


Tuhun cha sañahá ra
Jesucristo chi yo



New Testament in Mixtec, Jamiltepec (MX:mxt:Mixtec,
Jamiltepec)

Tuhun cha sañahá ra Jesucristo chi yo
New Testament in Mixtec, Jamiltepec (MX:mxt:Mixtec, Jamiltepec)

copyright © 1983 Wycliffe Bible Translators, Inc.

Language: Mixtec, Jamiltepec

Translation by: Wycliffe Bible Translators, Inc.

Mixteco, Jamiltepec [mxt], Mexico

Copyright Information

© 1983, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Jamiltepec

© 1983, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022
 7411d349-0f34-5963-987e-74457a7bad38

Contents

San Mateo	1
San Marcos	59
San Lucas	95
San Juan	158
Hechos	202
Romanos	258
1 Corintios	282
2 Corintios	305
Gálatas	321
Efesios	330
Filipenses	339
Colosenses	345
1 Tesalonicenses	351
2 Tesalonicenses	356
1 Timoteo	359
2 Timoteo	366
Tito	371
Filemón	374
Hebreos	376
Santiago	394
1 Pedro	401
2 Pedro	408
1 Juan	412
2 Juan	418
3 Juan	419
Judas	420
Apocalipsis	423

Tuhun Nyoo Cha Tyaa San Mateo

*Ñáyivi vachi ra Jesucristo tata
(Lc. 3.23-38)*

¹ Ican ihya cuví sivi ñáyivi vachi ra Jesucristo tata. Tata ra David ta tata ra Abraham cuví chi ra.

² Sehe ra Abraham cuví chi ra Isaac, sutu ra Jacob. Ta sehe ra Jacob cuví chi ra Judá ta yañi ra.

³ Ta sehe ra Judá chihin cu Tamar cuví chi ra Fares ta ra Zara. Ta sehe ra Fares cuví chi ra Esrom sutu ra Aram.

⁴ Ta sehe ra Aram cuví chi ra Aminadab sutu ra Naasón. Ta sehe ra Naasón cuví chi ra Salmón.

⁵ Ta sehe ra Salmón chihin cu Rahab cuví chi ra Booz. Ta sehe ra Booz chihin cu Rut cuví chi ra Obed, sutu ra Isaí.

⁶ Ta sehe ra Isaí cuví chi rey David. Ta sehe rey David chihin ñaha cha cuví ñasihí ra Urías cuví chi ra Salomón.

⁷ Ta sehe ra Salomón cuví chi ra Roboam sutu ra Abías. Ta sehe ra Abías cuví chi ra Aza.

⁸ Sehe ra Aza cuví chi ra Josafat, sutu ra Joram. Ta sehe ra Joram cuví chi ra Uzías.

⁹ Sehe ra Uzías cuví chi ra Jotam, sutu ra Acaz. Ta sehe ra Acaz cuví chi ra Ezequías.

¹⁰ Sehe ra Ezequías cuví chi ra Manasés, sutu ra Amón. Sehe ra Amón cuví chi ra Josías.

¹¹ Sehe ra Josías cuví chi ra Jeconías ta yañi ra. Cacacu ra quivi catiin ra ñuu Babilonia chi ñu Israel, cuahan coyo ñu cua sacuvi ñu tyiño nuu ñu.

¹² Cha yaha cuan, ta chicoo sehe ra Jeconías, ta ican cuví ra Salatiel sutu ra Zorobabel.

¹³ Ta sehe ra Zorobabel ican cuví chi ra Abiud sutu ra Eliaquim. Ta sehe ra Eliaquim cuví chi ra Azor.

¹⁴ Ta sehe ra Azor cuví chi ra Sadoc sutu ra Aquim. Ta sehe ra Aquim cuví chi ra Eliud.

¹⁵ Ta sehe ra Eliud cuví chi ra Eleazar sutu ra Matán. Ta sehe ra Matán cuví chi ra Jacob.

¹⁶ Ta ra Jacob cuví sutu ra José yii cu María. Ican ña cuví sihi ra Jesús ra cuví Cristo, o cuñí chi catyí, ra cha saquichi Nyoo vatyi cuví ra rey cuenda yo.

¹⁷ Ra Abraham chicoo uchi cumi tahan tata ra nyacua nya cacu ra David. Ta ra David chicoo uchi cumi tahan tata ra nyacua nya quivi tiiñ ñu Babilonia chi ñu Israel. Ta nyacua nya quivi cuan chicoo uchi cumi ca tahan tata ñu nyacua nya quivi cacu ra Cristo.

*Nu cacu ra Jesucristo
(Lc. 2.1-7)*

¹⁸ Tyehe caa cacu ra Jesucristo: Cha yaha cundaa tyiño cha cutandaha cu María, sihi ra Jesús, chihin ra José. Ta cha ni cumañi ca coo ñu chihin tahan ñu, chicohon sehe ña, soco cha cuenda maa Tatyí Ii Nyoo.

¹⁹ Ta ra José ra cua cuví yii ña, cuví ra noo ra vaha. Ta ña cuñí ra cuhva ra ticahan nuu chi ña, yucuan chaha tyaa ra cuhva cha sandoo xehe ra chi ña.

²⁰ Ta cha ni ri ca cha chicá xiñi ra tyicuan caa, tuví noo ángel Sutu Mañi yo nuu ra nu quixí ra. Ta nyehe ra ñumahna ta catyí ángel cuan chi ra tyehe caa:

—Yoho José, tata ra David cuvún. Ma caca iñun quehun chi cu María cuví ña ñasihun, vatyi sehe ña cha cua cacu, cuenda Tatyí Ii Nyoo cuví.

²¹ Ta cha yaha cacu cha lee cuan, cusacunañun chi cue: Jesús. Tyicuan caa cunañi ra vatyi cusacacu ra chi ñáyivi chihin cuatyí ñu.

²² Tandihí ihya cuví tacuhva nachino cava tuhun cha cahán Sutu Mañi yo chihin yuhu ra cacuvi profeta ra ta cha naha, ra cachahá cuenda tuhun cahán ra.

²³ Ta catyí ra tyehe caa:

Ñaha tyivaa cha ta coo ca rayii chi, cucohon sehe ña.

Ta coo noo sehe ña. Ta cunañi cue: Emanuel.

Ta sivi cuan cuñí chi catyí: “Nyoo nyaá ra chihin yo.” Catyí ángel cuan chi ra José chichi ñumahna.

²⁴ Cuhva cha nducachi iñi ra José, sacuvi ra tari cuhva catyi ángel cuan chi ra. Ta quehen ra chi cu María vatyí cuvi ña ñasihi ra.

²⁵ Soco ña chiyo ra chihin ña cha numi ri. Nyacua nya cha yaha cacu sehe ña. Ta sacunañi ra chi cue: Jesús.

2

Nu cuahan coyo ra chiñi tuñi cua nyehe ra nu cacu ra Jesús

¹ Cacu ra Jesús noo ñuu cha nañi Belén. Ta ñuu cuan nyaá chi nu cuvi Judea. Ta rey Judea cuan nañi ra Herodes. Tyicuan ta chaá coyo suhva ra nya ñuu Jerusalén. Quichi coyo ra ityi nu caña ñanyii. Ta ra cachiñi tuñi xaan cacuvi ra.

² Ta candaca tuhun ra chi ñáyivi tyehe caa:

—¿Nya nyaá ra cuvi rey cuenda ñu Israel? Vatyí ityi nu caña ñanyii nyehe ndi tiño cha chaha cuenda tyi cacu ra ityi ihya. Ta vachi ndi vachi sacahnu ndi chi ra —cacatyí ra.

³ Ta quivi cha chito rey Herodes tuhun cuan cutyoño cuñi ra. Ta tyicuan caa tucu tandihi ñáyivi ñuu Jerusalén cuan.

⁴ Tyicuan ta cana ra Herodes chi tandihi ra cacuvi nuu chi tata sutu ta ra casacuahá ley vehe ñuhu. Ta ndaca tuhun ra chi ra, nya maa maa tahán chi cacu ra Cristo.

⁵ Ta canacahan ra cuan ta cacatyí ra tyehe caa:

—Ñuu Belén ityi Judea, yucuan tahán chi cacu ra vatyí tyehe caa catyaa ra profeta Nyoo nu tutu ta cha naha:

⁶ Ta yoho ñuu Belén ityi Judá, vasi ñuu luhlu ri cuvún cha nuu ñuu nahnu ca iyó ityi Judá nu nyaún.

Soco cahnu ca cucuvun vatyí Belén chiña cucacu minoo ra cunyaca ñaha.

Ta cusaha cumi ra chi ñu Israel ñáyivi cuende.

Tyicuan caa catyí nu tutu Nyoo, —cacatyí ra cuan chi ra Herodes.

⁷ Tyicuan ta cana xehe ra Herodes chi ra chiñi tuñi cuan, ta ndaca tuhun ra chi ra ñáá cuhva ta ñáá quivi caña tiño cuan.

⁸ Tyicuan ta tachi ra chi ra nya ñuu Belén, ta catyí ra chi ra:

—Cuahan ndo, ta nducu tuhun vaha ndo tuhun cha lee cuan. Ta tatu nañihi ndo chi cue, ta quichi catyi ndo chii, tacuhva vatyí cuhun tucu yuhu cusacahni chi cue —catyí ra Herodes chi ra.

⁹ Cha yaha cachiñi ra chiñi tuñi cuan cha catyí ra Herodes, caquehen ra ityi ta cuahan coyo ra. Ta tiño cha canyehe ra ityi nu caña ñanyii cuan, cuahan ti ityi nuu ra. Ta chicuñi ti maa maa siqui nu catuvi cha lee cuan.

¹⁰ Ta cuhva cha canyehe ra chiñi tuñi cuan tyi chicuñi tiño cuan, si xaan cacuñi ra.

¹¹ Ta caquihvi ra chichi vehe nu catuvi cha lee cuan. Ta cananyehe ra chi cue chihin cu María sihi cue. Ta chicuñi chiti ra vatyí sacahnu ra chi cue. Tyicuan ta canuñá ra yuhu caja cha canyisó ra. Ta catava ra regalo cha cuvi xuhun cuan, ta cutu vixi chahán, ta ndutya vixi chahán cha nañi mirra. Ta cachaha ra chi cue.

¹² Yaha cuan ta catahan ra ñumahna ta cutuñi iñi ra vatyí ña tahán chi canayaha ra ityi nu nyaá ra Herodes, yucuan chaha sin ca ityi cuanuhu coyo ra.

Nu chinq xehe ra José ta cu María chihin cha lee nya Egipto

¹³ Cha yaha cuahan coyo ra chiñi tuñi cuan, tyicuan ta noo ángel Sutu Mañi yo tui nuu ra José chichi ñumahna. Ta catyí ra chi ra:

—Ndicuita, quehen chi ra lee ihya, ta chi sihi ra, ta cuhun ndo nya Egipto. Ta yucuan cunyaa ndo nyacua nya sacote chi ndo. Vatyí ra Herodes cunanducu ra chi cha lee ihya vatyí cahni ra chi cue.

¹⁴ Tyicuan ta ndicuita ra José cha cuan cuan. Ta quehen ra chi cha lee cuan ta chi sihi cue. Ta cuahan ñu nya Egipto.

¹⁵ Ta yucuan chinyaa ñu nyacua nya cha chihí ra Herodes. Tyehe caa

cuví tacuhva na chino cava tuhun cahán Nyoo cha tyaá ra profeta ta cha naha. Tyehe caa catyí ra: “Nya ñuu Egipto cané chi Sehi”, catyí ra.

Nu tachi ra Herodes na cahñi ra chi ra cuatyaa

¹⁶ Cha tuví iñi ra Herodes vatyí ra cachiñi tuñi cuan sandaví ñaha ra chi ra, nduxaan vavaha ra. Ta tachi ra tyiño na cacahñi ra chi ra cuatyaa cha iyó ñuu Belén cuan ta ndaha ñuu ñandíhi, ra cuatyaa cha ni cacu ny-acua nya cha uvi cuiya. Tyicuan caa sacuví ra vatyí nandichí xiñi ra vatyí tyicuan tahan cuiya ra Jesús tari cuhva catyí ra chiñi tuñi cuan chi ra.

¹⁷ Tyicuan caa chinq cava tuhun cahán Nyoo cha tyaá ra Jeremías profeta Nyoo ta cha naha, ta catyí ra tyehe caa:

¹⁸ Tyacú noo ndusu ñuu Ramá, cha chacú chaa ñáyivi, ta iyo tahan ñu.

Ta ican cuví ñáyivi tata cu Raquel, ñáyivi Israel, chacú chaa ñu cha cuenda sehe ñu.

Soco ña cuñi ñu cha naquehen ndahvi ñu chi ñu cha cuenda cha cachihi sehe ñu, catyí chi nuu tutu Nyoo.

¹⁹ Soco cha yaha cha chihí ra Herodes, tyicuan ta tuví tucu noo ángel cha tachi Sutu Mañi yo nuu ra José nu quixí ra ñuu Egipto. Ta catyí ra chi ra:

²⁰ —Ndícuita ta quehen chi cha lee chiña, ta chi sihi cue. Ta cuanuhu ndo nya ñuu Israel, vatyí cha chihí ra nducú cahñi chi cue.

²¹ Tyicuan ta ndícuita ra José, ta quehen ra chi cha lee cuan ta chi sihi cue. Ta cuanuhu coyo ñu nya Israel.

²² Soco quívi chito ra José vatyí ra Arquelao cuví ra rey tyiño nuu sutu ra, ra Herodes, nya Judea, nayuhvi ra ta ña cuñi ra cuhun ra yucuan. Ta vatyí sacoto Nyoo chi ra chichi ñumahna, yucuan chaha cuanuhu ñu nya Galilea.

²³ Cha chaa ñu yucuan, cuahan ñu nya ñuu Nazaret, cua coo ñu. Ta yucuan chiyó ñu. Tyehe caa cuví

tacuhva chino cava tuhun cha cahán Nyoo, cha catyaa ra profeta ta cha naha. Vatyí catyí ra tyí ra Jesús ra ñuu Nazaret cucunañi ra.

3

Ra Juan ra sacondutyá chi ñáyivi cahán ra tuhun Nyoo chihin ñu

(Mt. 1.1-8; Lc. 3.1-9, 15-17; Jn. 1.19-28)

¹ Quívi cuan ra Juan ra sacondutyá chi ñáyivi cuahan ra noo chiqui ndii ityi Judea. Ta quichaha cahan ra tuhun Nyoo chihin ñu.

² Ta catyí ra:

—Ndu uvi iñi ndo cuatyí ndo vatyí cha yatyin nyaá Nyoo ra cua cunyaca ñaha aña yo.

³ Ican tuhun ra Juan ihya cuví cha tyaá ra Isaías ra cuví profeta Nyoo ta cha naha. Tyehe caa tyaá ra:

Chiñi yo cha caná chaa noo ra noo nu chiqui ndii ta catyí ra:

“Tari sanduvahá ndo noo ityi, tyicuan caa sanduvaha ndo aña yo, vatyí cua quichi Sutu Mañi yo.

Nuña ndo noo ityi ndoo chi ra naquihvi ra aña yo.”

⁴ Ta ra Juan ñihnó ra sahma chinq chihin ixí camellu. Ta sincho ra, ñii cuví. Ta maa maa ri pinchi chachí ra ta tyañuñu cuhu chihí ra.

⁵ Ñáyivi ñuu Jerusalén ta tandíhi ñu ñuu cha nyicú Judea, ta ñu ca iyó yatyin ri ityi yuvi cahnu Jordán cuan, quichi coyo ñu, quichí tyasoho ñu tuhun cahán ra.

⁶ Ta cha yaha nahma ñu cuatyí ñu, ra Juan sacondutyá ra chi ñu yuvi cahnu Jordán cuan.

⁷ Soco ra Juan nyehe ra vatyí cuaha xaan ra fariseo, ra quichahá xaan ley vehe ñuhu, ta cuaha xaan ra saduceo, caquichí coyo ra vatyí condutyá ra. Ta catyí ra chi ra:

—¡Nyoho, tari noo tata coo xaan cuví ndo! ¿Yóo cha sacoto chi ndo vatyí chihin cha condutyá ri ndo ta ma tachi tuñi ca Nyoo chi ndo? Ña ndicha.

⁸ Coo ndo noo cha quetuví vaha tyi ndicha cha ndu uvi ñni ndo cuatyí ndo.

⁹ Ta ma cuyaa ndo catyí ndo vatyí tata ra Abraham vachi ndo. Vatyí nyacua nya chihin yuu ihya ta cuví savaha Nyoo ñáyiví tata ra Abraham.

¹⁰ Tari yutun cha ña chahá chiti, tyicuan caa cuví ndo. Vatyí ña sacuví ndo tari cuhva cuñí Nyoo. Ta yutun cha ña chahá chiti, cahnya ñáyiví chi tun. Ta cahmi ñu chi tun. Tyicuan caa tucu nyoho, cuhun ndo nu cayú ñuhu.

¹¹ Cha ndicha vatyí yuhu sacondutyé chi ñáyiví chihin ndutyá, tari noo seña vatyí cha ndu uvi ñni ñu cuatyí ñu. Soco cha yaha sacondutyá yuhu chihin ndutyá, vachi inga ra cusacondutyá chi ñáyiví chihin Tatyí Ii Nyoo ta chihin ñuhu ihñi. Iyó ca tunyee ñni chi maa ra ta ñima ca yuhu. Ta ni cha cuise ndichan ra ta ña nañe, vatyí cahnu xaan ca ra cuví ra.

¹² Tari noo ra cha cua naquehen vaha trigo ta natyihí vaha ra chichi yaca ta mihin cahmi ra, tyicuan caa cuví maa Sutu Mañi yo chihin yo. Tatu chinó ñni yo chi ra cunaquehen vaha ra chi yo. Ta cunyicu yo chihin ra. Soco tatu ña chinó ñni yo chi ra cutyihí ra chi yo anyaya nu cayu ñuhu cha ma ndahva ca maa —catyí ra Juan.

Nu condutyá ra Jesús

(Mr. 1.9-11; Lc. 3.21-22)

¹³ Tyicuan ta quitá ra Jesús Galilea ta chaá ra yuvi cahnu Jordán nu ñohó ra Juan, vatyí cuñí ra cha sacondutyá ra Juan chi ra.

¹⁴ Cha xihna ri ña cuñi ra Juan sacondutyá ra chi ra, ta quichaha catyí ra chi ra Jesús tyehe caa:

—Yoho cuñún cha sacondutyé chuun, soco ña tahán chi cha sacondutyá yuhu chuun. Maun tahán chi sacondutyon chii —catyí ra.

¹⁵ Soco ra Jesús catyí ra chi ra:

—Cha vityin, na cuví chi cuhva catyí yuhu chuun. Vatyí cuñí chi cha sacuví yo tandihí cha cuñí Nyoo —catyí ra chi ra Juan. Tyicuan ta ndoo ra Juan vaha.

¹⁶ Cha yaha ri condutyá ra Jesús ta quitá ra chichi ndutyá. Ta nuña ri andiví, ta ra Jesús nyehe ra yoso caa vachi noó Tatyí Ii Nyoo, tari noo paloma, ta chaá chi síqui ra.

¹⁷ Tyicuan ta tyacu noo ndusu ityí andiví, ta catyí chi tyehe caa:

—Ican ra ihya cuví Sehi, ra cuñí xain chi. Ta sii xaan cuñí chihin ra —catyí ndusu cuan.

4

Nu nducú nyehe cuihna chi ra Jesús *(Mr. 1.12-13; Lc. 4.1-13)*

¹ Tyicuan ta Tatyí Ii Nyoo chinyaca chi ra Jesús noo chiquí ndii, tacuhva nducu nyehe cuihna chi ra.

² Ña chachí ra uvi xico quiví ta uvi xico ñuu. Ta yaha cuan ta chaá soco chi ra.

³ Tyicuan ta tuhva cuihna chi ra, vatyí cuñí ra nducu nyehe ra chi ra. Ta catyí ra chi ra:

—Tatu ndicha cha Sehe Nyoo cuví chuun, sananduvi pan yuu ihya —catyí cuihna chi ra Jesús.

⁴ Soco ra Jesús nacahan ra ta catyí ra:

—Tuhun Nyoo catyí chi tyehe caa: “Ñima chihin cha cachi ri ñáyiví ta conyito ñu. Conyito tucu añima ñu chihin tuhun cahán Nyoo” —catyí ra Jesús chi cuihna cuan.

⁵ Tyicuan ta chinyaca cuihna cuan chi ra Jesús nya ñuu Jerusalén. Ta sandaa cuan chi ra xiñi vehe ñuhu cahnu cuan.

⁶ Ta catyí cuan chi ra:

—Tatu ndicha cha Sehe Nyoo cuvún, sandupehla nyacua nya nu sucun ihya ta nyacua nya nu ñuhú. Vatyí nyaá nu catyí chi nu tutu Nyoo tyehe caa: “Nyoo cusaquichi ra ángel, quichi saha cuenda chuun. Cunaquehen ra chuun chihin ndaha ra ta ma cuhva ra cha taxin chahun chihin yuu” —catyí cuihna cuan chi ra.

⁷ Ta nacahan ra Jesús ta catyí ra:

—Soco catyí tucu chi nu tutu Nyoo tyehe caa: “Ma nducu nyehun chi Sutu Mañi yo Nyoo” —catyí ra Jesús chi cuihna.

⁸ Tyicuan ta chinyacá tucu cuihna cuan chi ra noo yucu sucun. Ta sañaha cuan tandihí cha cahnu cuví nu nyacá ñaha rey ta ra cuví tyiño chi ñáyiví iyó siqui ñuhu ñayiví.

⁹ Ta catyí cuihna cuan chi ra tyehe caa:

—Yuhu cuhve tandihí maa ihya chuun, tatu yoho ta cuiñi chitun nui ta sacahnun chii —catyí cuan chi ra.

¹⁰ Tyicuan ta nacahan ra Jesús ta catyí ra chi cuihna cuan:

—Canyaha chuun nui, yoho cuihna. Vatyí tuhun cahán Nyoo nyaá chi nu tutu ta catyí chi tyehe caa: “Noo ri chi maa Nyoo sacahnu yo. Ta ñin ri chi maa ra quichaha yo.”

¹¹ Tyicuan ta cuahan cuihna cuan, ta ndoo ra Jesús, ta chaá coyo ángel ta tyinyeē ra chi ra.

Nu quichaha saha tyiño ra Jesús ñuu cha nyicú ityi Galilea

(Mr. 1.14-15; Lc. 4.14-15)

¹² Quiví cha chito ra Jesús vatyí ra Juan ñohó ra vehe caa, cuahan ra nya Galilea.

¹³ Soco ña ndoo ra ñuu Nazaret, nu chahnu ra. Cuahan ra cua coo ra nya ñuu Capernaum, noo ñuu cha nyaá yatyin ri yuhu miñi, cha nyaá yatyin ñuhú cuenda ra Zabulón chihin ñuhú ra Neftalí.

¹⁴ Tyehe caa cuví tacuhva chino cava tuhun cha tyaá ra Isaías nu tutu Nyoo ta cha naha. Catyí chi tyehe caa:

¹⁵ Ñuhú ra Zabulón ta ñuhú ra Neftalí cha nyaá yuhu miñi inga chiyo yuvi cahnu Jordán, cha cuví Galilea nu iyó ñu ñima ñu Israel cuví.

¹⁶ Chinyicú aña ñu nu ñaa iñi vatyí chinyacá ñaha ra ña vaha chi ñu chihin tuhun chihi, soco sandundichín ñuhu Sutu Mañi yo aña ñu nu nyicú ñu, catyí ra Isaías.

¹⁷ Nyacua nya quiví cuan, ta quichaha cahan ra Jesús tuhun Nyoo chihin ñáyiví, ta catyí ra chi ñu:

—Ndu uvi iñi ndo cuatyí ndo vatyí yatyin ri nyaá Nyoo ra cua cunyaca ñaha aña ndo —catyí ra Jesús chi ñáyiví.

Nu cana ra Jesús chi cumi tahan ra catiñ tiyaca

(Mr. 1.16-20; Lc. 5.1-11)

¹⁸ Ra Jesús chicá noo ra yuhu miñi cha nañi Tyañuhu Galilea cuan. Ta nanyehe ra chi uvi tahan ra chihin yañi ra, ra Simón cha nañi tucu Pedro, ta ra Andrés. Ra catiñ tiyaca cacuví ra. Ta cacañi ra yuhva ra nu ndutya.

¹⁹ Tyicuan ta quichaha catyí ra Jesús chi ñanduvi ra tyehe caa:

—Cunyicon ndo chii. Ta yuhu cusacuví vatyí tari ñihí ndo tiyaca, tyicuan caa cuñihi ndo anima ñáyiví (ta cutava ndo chi ñu nu quiñi caa na quihví ñu cuenda Nyoo) —catyí ra Jesús chi ra.

²⁰ Caa cuhva ri cuan casandoo ra yuhva ra ta cuahan coyo ra chihin ra Jesús.

²¹ Chiin ri ca chica ra Jesús ityi nuu ca ta nanyehe ra chi uvi ca ra chihin yañi ra, ra Jacobo ta ra Juan. Sehe ra Zebedeo cacuví chi ra. Canyicú ra chichi noo canoa chihin sutu ra canaquicú ra yuhva ra. Ta cana ra Jesús chi ra.

²² Ta caa cuhva ri cuan casandoo ra canoa cuan ta chi sutu ra, ta cuahan coyo ra chihin ra.

Nu sañahá ra Jesús chi cuaha ñáyiví

(Lc. 6.17-19)

²³ Cuahan ra Jesús chicá noo ra tandihí ñuu cha nyicú Galilea sañahá ra chichi vehe ñuhu tahan tahan ñuu. Cahán ra tuhun vaha yoso caa nyacá ñaha Nyoo aña yo. Ta sanduvaha ra chi ñu cuhví chihin tandihí ri nuu cuehe cha iyó chi ñu.

²⁴ Cachitó tandihí ñáyiví ñuu cha nyicú Siria tuhun ra Jesús. Ta quichí nyaca ñu tandihí ñu cuhví chi ra: tandihí ñu ñin ñin cuehe tahán. Ta suhva ñu yihí tatyí ña vaha chi ñu. Ta yihí ñu, yihí cuehe chihi tañi chi ñu. Ta yihí ñu ña cuví nacanda ñu. Ta ra Jesús sanduvaha ra chi tandihí ñu.

²⁵ Cuaha xaan ñáyiví nyicón chi ra Jesús: ñáyiví iyó ñuu cha nyicú Galilea, ñáyiví iyó ndi uchi ñuu Decápolis, ñáyiví iyó ñuu cha nyicú

Judea, ta ñáyiví iyó inga chiyo yuvi cahnu Jordán ñandihí.

5

Nu cahán ra Jesús nuu ñáyiví nu chiquí

(Lc. 6.20-23)

¹ Cuhva cha nyehe ra Jesús tyi cuaha xaan ñáyiví, ndaa ra noo nuu yucu. Ta chicunyaá ra yucuan. Tyicuan ta ñu nyicón chi ra chicunyicu ñu nicachico nu nyaá ra.

² Tyicuan ta quichahá sañaha ra Jesús chi ñu tyehe caa:

³ —Tandihí ri ñu cha chitó vatyí chiñuhú Nyoo chi ñu, sñi xaan cucuvi chi ñu, vatyí tahán chi vatyí cunyaca ñaha Nyoo añima ñu.

⁴ 'Ta tandihí ri ñu nducuihya iñi vityin cha catyí cuatyí ñu, sñi xaan cucuvi chi ñu. Vatyí cusanaa Nyoo cha cuihya iñi ñu.

⁵ 'Tandihí ri ñu cha ña cahnu sahá chi, sñi xaan cucuvi chi ñu, vatyí cuquehen cuenda ñu ñuhu ñáyiví cha catyí Nyoo tyi kuhva ra chi ñu.

⁶ 'Ta tandihí ri ñu cuñí xaan sacuvi kuhva catyí Nyoo, sñi xaan cucuvi chi ñu, vatyí Nyoo cutyinyee ra chi ñu tacuhva cuvi sacuvi ñu.

⁷ 'Ta tandihí ri ñu cha iyó tucahnu iñi chi, sñi xaan cucuvi chi ñu, vatyí Nyoo, cucoo ticahnu iñi chi ra chihin ñu.

⁸ 'Ta tandihí maa ñu ndundihí añima sahá Nyoo, sñi xaan cucuvi chi ñu, vatyí ñu cuan, cunyehe ñu chi Nyoo.

⁹ 'Ta ñu nducú kuhva cha coo taxi ri ñáyiví chihin Nyoo sñi xaan cucuvi chi ñu, vatyí Nyoo, cucatyí ra tyi sehe ra cuví chi ñu.

¹⁰ 'Ta tandihí ñu cha tasi cuñí nyehe ñáyiví chi ñu cha catyí cha sacuví ñu tari kuhva catyí Nyoo, sñi xaan cuvi chi ñu, vatyí nyacá ñaha Nyoo añima ñu.

¹¹ 'Na cusñi cuñi ndo tatu cahán ña vaha ñáyiví siqui ndo. Ta sanyehé ñu tindoho chi ndo. Ta tavá ñu cuaha cuendu siqui ndo cha catyí yuhu.

¹² Na cusñi cuñi ndo vatyí tatu tyehe caa sacuví ñu chihin ndo, sñi xaan cucuvi chi ndo, vatyí cahnu xaan ta

tyaquí xaan cha cutahan chi chi ndo, nachaa ndo andiví. Vatyí suri tyicuan caa chinyacuví tucu ñu cha ña vaha chihin ra cacuví profeta cuenda Nyoo ta cha naha.

Tatu sandihí yo cha chinó iñi yo chi Nyoo cuví yo tari ñi cha ndihí cha uhva
(Mr. 9.50; Lc. 14.34-35)

¹³ 'Nyoho cha chinó iñi ndo chii, tari ñi vaha cuví ndo. Soco tatu ñi, ta ndihí cha uhva, ma sacu uhva ca chi cha cachi yo. Ña vaha ca ñi cuan. Tyicuan ta sacuita yo. Ta cuañi ñáyiví siqui chi.

Tatu vaha quichahá yo tuhun cahán Nyoo, cuví yo tari ñuhu cha sandundichín nu cuahan ñáyiví nu ñaa iñi

¹⁴ 'Nyoho cuví ndo tari ñuhu cha sandundichín nu cuahan ñáyiví. Noo ñuu cha nyaá xiñi noo yucu, ma cuvi quihí xehe. Tyicuan caa tahán chi cuvi ndo.

¹⁵ Ta yori yo cha tyaa yo noo ñuhu tima, ta tixehe yo chichi noo caja. Soco tyiso yo noo nu sucun vatyí sandichín chi chichi vehe tatu cua quihví ñáyiví, soco ndichin.

¹⁶ Ta tyicuan caa tahán chi sandundichín tucu nyoho chihin ñuhu Nyoo cha iyó añima ndo nu cuahan ñáyiví. Tyicuan ta nanyehe ñu cha vaha cha nyacuví ndo, ta sacahnu ñu chi Sutu yo Nyoo ra nyaá andiví.

Sañahá ra Jesús vatyí niñi xaan sacuvi yo ta sañaha yo tandihí tuhun cha tachí Nyoo chi yo

¹⁷ 'Ma cuñi ndo vatyí yuhu vachi sanai ley cha tachí Nyoo chi ra Moisés vatyí tyaa ra. Ta ni ri ña vachi sanai tuhun cha tyaa ra cacuví profeta cuenda Nyoo ta cha naha. Yuhu ña vachi vatyí sanai yucuan. Soco vachi quichahi tandihí cha catyí tuhun cuan, ta sañahí ñáa cha cuñí chi catyí.

¹⁸ Cha ndicha catyí chi ndo vatyí cha ni ri ca cha iyó ca andiví chihin ñuhu ñáyiví ma naa ni chiin cha tyaa ra Moisés ta ra cacuví profeta Nyoo ta cha naha, nyacua nya yaha cuvi tandihí tari kuhva nyaá cha catyaa ra.

19 Yucuan chaha, tatu ña quichahá ñáyivi tuhun cha tachí Nyoo chi ñu, vasi noo tuhun luhlu ri cuví, ta tatu chasi ñu nu quichaha inga ñáyivi, luhlu xaan cucuvi ñu nu nyacá ñaha Nyoo. Soco ñu cha quichahá tandihí, ta sañahá tucu ñu chi inga ñáyivi. Ican ñu cuan cahnu xaan cucuvi ñu nu nyacá ñaha Nyoo.

20 Vatyí cuñí chi cha quichahá vaha ca ndo chi Nyoo ican saha ra sacuahá cuenda ley vehe ñuhu, ta ra cacuví fariseo. Yucuan ta cuví quihvi ndo nu nyacá ñaha Nyoo.

Nu sañahá ra Jesús chi yo vatyí ma cuxaan yo chi ñáyivi

21 'Nyoho cha cuaha chaha chiñi ndo tuhun cha catyi Nyoo chi ñu chiyo ta cha naha. Catyi ra: "Ma cahñi ndo chi ñáyivi, vatyí tatu cahñi ndo ñáyivi, tahán chi cutuñi chi ndo."

22 Soco yuhu, catyi chi ndo, vatyí vasi cha cuxaan ri ndo chi noo ñáyivi, o vasi cha cahán uhvi ri ndo chi ñáyivi, o vasi cha cahán nyaa ri ndo chi ñáyivi, tahán chi cutuñi chi ndo. Ta sin ri saha cuenda ndo chi ndo coto cuhun ndo anyaya chihin cuatyí cuan.

23 "Ta yucuan chaha quivi cuahun vehe ñuhu, ta nyisón cha cucuhvon chi Nyoo, ta tatu cha nanyaun cha cua cuhvon ta nichon iñun vatyí ña vaha iyó noo yañun chuhun.

24 Sandoo cha cua cuhvon chi Nyoo yucuan. Ta cuhun vatyí na coo vahun chihin yañun. Tyicuan ta ndichun nya vehe ñuhu, ta cuhva cuendon cha cua cuhvon chi Nyoo.

Sañahá ra Jesús vatyí cacan yo ticahnu iñi cuatyí yo coto cuhun yo anyaya

(Lc. 12.57-59)

25 "Tatu yóo ra chicán cuatyí chahun, ta cuahan ra chuhun nya nuu ra cuví tyiño, nandacan ticahnu iñi chi ra ityi cuahun, coto cuhva cuenda ra chuun chi ra cuví tyiño. Ta ra cuví tyiño cua cuhva cuenda ra chuun chí policia. Ta policia cuan cutyihí ra chuun vehe caa.

26 Soco catyi chuun vatyí ma cuví quiton vehe caa cuan nyacua nya tyiyahvun tandihí cha tahán chi tyiyahvun.

Sañahá ra Jesús vatyí ni cha ndichí xiñi yo cha coo nonga ñusihi, o nonga rayii chi yo, ta ña vaha

27 'Nyoho chiñi ndo tuhun vatyí catyi Nyoo ta cha naha vatyí nyoho cha iyó ñasihi ndo, ma coo inga ñusihi chi ndo.

28 Soco yuhu catyi chi ndo, vatyí nya nyoho cha nyehé ndo chi noo ñusihi ta quihvi iñi ndo chi ñu, catyi chi ndo vatyí chihin yucuan ri ta cha chicoo cuatyí ndo.

29-30 'Vatyí tatu chiti nuu chiyo vahun sanacavá chuun nu cuatyí, vaha taxin ca tava ta sacuiton cañi. Vatyí vaha ca quihvun nu nyacá ñaha Nyoo chihin noo chiti nuun, ta ñima ca chihin cha ninduvi chiti nuun ta cuhun nu cayu ñuhu chichi anyaya. O tatu ndahun sanacavá chuun nu cuatyí, vaha taxin ca cahnya ta sacuiton cañi. Vatyí vaha ca cha quihvun nu nyacá ñaha Nyoo chihin cha luu ndahun, ta ñima ca cha naniun ta cuhun nu cayu ñuhu chichi anyaya.

Nu sañahá ra Jesús siqui ra sandoo ñasihi

(Mt. 19.9; Mr. 10.11-12; Lc. 16.18)

31 "Ta suri catyi tucu Nyoo chi ñáyivi chiyo ta cha naha vatyí yóo ra sandoo ñasihi, cuñí chi cuhva ra noo tutu cuenda cha sandoo ra chi ña.

32 Soco catyi yuhu chi ndo, ñahri ityi iyó chi noo ra cha sandoo ra chi ñasihi ra tatu ña natuvi ña chihin inga rayii. Vatyí tatu sandoo ra chi ña, ta ñima cha catyi cuatyí cuan, chicoo cuatyí ra nuu Nyoo. Ta sin ri sacco ra cuatyí ña vatyí tatu quehen ña inga ra, chicoo cuatyí ña nuu Nyoo. Ta chicoo tucu cuatyí ra cha quehen chi ña cuan.

Ma catyi yo "chito vaha maa Nyoo" tacuhva chino iñi ñáyivi vatyí ndicha cha cahán yo

33 "Ta chiñi tucu ndo, vatyí catyi tucu Nyoo chi ñu chiyo ta cha naha

tyehe caa: “Tatu tyanaha ndo Nyoo tyi cusacuvi ndo noo cha cusacuvi ndo, tahan chi cha sacuvi ndo.”

³⁴ Soco yuhu catyí chi ndo vatyí ma tyanaha ndo Nyoo tacuhva chino iñi ñáyiví vatyí ndicha cha cahán ndo. Ta ma tyanaha ndo ni tuhun andiví, vatyí yucuan nu nyaá maa Nyoo cuví.

³⁵ Ta ni ri tuhun ñuhu ñáyiví ihya ma tyanaha ndo, vatyí yucuan cuví nu chañí Nyoo. Ta ni ri tuhun ñuu Jerusalén, ta ma tyanaha ndo, vatyí yucuan cuví ñuu Nyoo ra cuví Rey cha cahnu ca.

³⁶ Ta ni ri tuhun xiñi ndo, ta ma tyanaha ndo, vatyí ma cuví sandu-cuichin ndo ni noo ixi xiñi ndo. Ta ni ma cuví sandutoon tucu ndo.

³⁷ “Ican” catyí ndo, tatu ican. Soco tatu ñima, “ñima”, catyí ndo. Ta ma tyanaha ndo Nyoo vatyí ra ña vaha tyyuhú chi ndo cuví cuan.

Nu sañahá ra Jesús vatyí tatu sacuví ñáyiví cha ña vaha chihin yo, na sacuví yo cha vaha chihin ñu

(Lc. 6.29-30)

³⁸ Ta chiñi tucu ndo cha catyí tuhun cha tyaa ra Moisés ta cha naha: “Vatyí tatu noo ñáyiví cañi ñu nuu ndo, ta tahvi noo noho ndo, o tiví noo chiti nuu ndo, o nya chi ndo sañicuehe ñu, tahan chi vatyí sañicuehe tucu ñáyiví chi maa ñu, tari kuhva cha sañicuehe ñu chi ndo.”

³⁹ Soco yuhu catyí chi ndo, vatyí ma nasacuvi ndo cha ña vaha cha nyacuví ñu tasi iñi chi ndo. Vatyí tatu yóo cha cañi ñin chiyo xitín ndo, ma nduxaan ndo chi ñu. Soco kuhva tucu ndo inga chiyo xitín ndo na cañi ñu.

⁴⁰ O tatu chicán ñu cuatyí chaha ndo, ta cuñi ñu tinyaa ñu noo camisa ndo, ma cuxaan ndo chi ñu. Soco kuhva ndihi ndo chaqueta ndo chi ñu.

⁴¹ O tatu yóo cha catyí chi ndo na cuiso ndo cha chii ñu noo kilómetro, cuiso ndo uvi kilómetro.

⁴² Tatu yóo ñu chicán tumañi iñi chi ndo, kuhva ndo chi ñu. Ma catyí ndo cha ma saha ndo tumañi iñi cuan.

Na cuñi yo chi ñu xaan iñi chi yo
(Lc. 6.27-28, 32-36)

⁴³ Ta chiñi tucu ndo tuhun cha catyí ñu chiyo ta cha naha vatyí cuñi ndo chi ra tahan ndo. Ta chi ra xaan iñi chi ndo quñi tisihi iñi ndo chi ra.

⁴⁴ Soco yuhu catyí chi ndo, cuñi ndo chi ñáyiví xaan iñi chi ndo. Ta sacuvi ndo cha vaha chihin ñáyiví cahan chi ndo, ta chi ñu ña cuñi nyehe chi ndo. Ta cacan tahvi ndo chaha ñu quiñi nyacuvi chihin ndo ta sanyehé tndoho chi ndo.

⁴⁵ Ta tyicuan caa sacuvi ndo tacuhva coto ñáyiví vatyí cuví ndo sehe Sutu yo ra nyaá andiví. Vatyí maa ra sacañá ra ñanyii, ta sacoón ra savi siqui tyiño sahá ñáyiví vaha ta ñáyiví ña vaha ñandihí.

⁴⁶ Tatu nyoho ta cuñi ndo chi ñáyiví cha vaha iyó chihin ndo ta ña cuñi nyehe ndo chi ñáyiví xaan iñi chi ndo, ñahri cha vaha cuñihi ndo. Vatyí suri tyicuan caa nyacuví tucu ra catavá xuhun cuenda gobiernu ñuu Roma. Ta quiñi ca iyó ra cuan cuñi maa ndo.

⁴⁷ O tatu chahá ndo nocumi chi ra tahan ri ndo, ñahri cha vaha xaan nyacuví ndo. Vatyí suri tyicuan caa sacuví tucu ñáyiví ña ñohó nuu Nyoo.

⁴⁸ Tari Sutu yo cha nyaá andiví maa maa ri cha vaha sacuví ra, tyicuan caa nyoho maa maa ri cha vaha sacuvi ndo.

6

Nu sañahá ra Jesús yoso caa sacuví yo tumañi iñi

¹ Saha ndo cuenda ta ma cuyaa ndo ñáa tumañi iñi sacuvi ndo chi ñáyiví. Vatyí tatu cuyaa ndo nuu ñáyiví, ñahri cuñihi ndo nuu Sutu yo ra nyaá andiví.

² Kuhva cha sahá ndo tumañi iñi, ma sacoto ndo chi inga ñáyiví vatyí sahá ndo tumañi iñi. Ma sacuvi ndo tari sacuví ra sahá tyi vaha ta chicá noo ra nuyahvi ta chichi vehe ñuhu. Sahá ra tumañi iñi tacuhva na catyí ñáyiví vatyí vaha xaan ñáyiví cuví ra. Soco yucuan ri ñihí ra cuan ta ñahri ca cuñihi ra nuu Nyoo.

³ Soco nya quiví sahá ndo tumañi iñi chi ñu ndahvi, ma sacoto ndo ni chi ra tahan cahnu ndo.

⁴ Xehe ri sacuvi ndo, tacuhva cha ma coto ñáyiví. Tyicuan ta Sutú yo Nyoo nyehe ra cha sacuvi ndo tyicuan caa. Ta cuaha ca cha vaha cucuhva ra chi ndo.

Nu sañahá ra Jesús yoso caa cahan yo chihin Sutú yo Nyoo (Lc. 11.2-4)

⁵ Ta cuhva cha chicán tahvi ndo chi Nyoo, ma cacán tahvi ndo tari cuhva sacuví ñu savahá chii. Vatyí ñu cuan tahán iñi ñu cacán tahvi ñu chi Nyoo nu tuvi ñáyiví, tacuhva catyí ñáyiví vatyí vaha xaan ñáyiví cuví ñu, vaha xaan chinó iñi ñu chi Nyoo. Soco catyí chi ndo cha ndicha vatyí ñahri ca cuñihi ñu nuu Nyoo. Vatyí ñima cha ndicha sacuví ñu.

⁶ Soco nyoho ñáá quiví cacán tahvi ndo chi Nyoo, ma cacán tahvi ndo tacuhva nyehe ri ñáyiví chi ndo. Soco quihvi ndo chichi vehe ndo ta ñacasi ndo yuvehe ta cacán tahvi ndo chihin tandihí añima ndo. Ta noo tuhun ri maa Nyoo Sutú yo nyehe ra cha sacuvi ndo tyicuan caa vatyí nuu maa ra chicán tahvi ndo, ta ñima nuu ñáyiví. Ta cuaha ca cha vaha cucuhva ra chi ndo.

⁷ Cuhva cha cahán ndo chihin Nyoo ñima susuri tuhun cha ñima ri tuhun cahan ndo. Vatyí tyicuan caa sacuví ñu cha ñahri tuhun Nyoo caá añima. Cuñí maa ñu vatyí tyicuan caa ta cuiñi Nyoo cha cahán ñu. Vatyí cuaha xaan chaha cahán ñu susuri maa tuhun cuan.

⁸ Ma sacuvi ndo tyicuan caa. Vatyí Nyoo cha chitó ra ñáá cha chiñuhú chi ndo, cha ni ri ca cha cumañi ca cacán ndo chi ra.

⁹ Yucuan chaha nyoho, tatu cua cacán tahvi ndo chi Nyoo, tyehe caa catyí ndo:

Sutú Mañi yuhu, yoho cha nyaún andiví. Sacahnú xaan ndi chuun.

¹⁰ Na quichi quiví cha nyaca ñahun ihya siqui ñuhu ñayiví, tari nyacá ñahun andiví.

Na sacuvi ñáyiví ihya siqui ñuhu ñayiví tandihí cuhva cuñí maun, tari cuhva cuví gloria.

¹¹ Cuhva cha cachi ndi tacuhva cha yaha ndi noo noo quiví.

¹² Saha tucahnu iñi chi ndi ñáá ndihí cha ña vaha nyacuví ndi, tari maa ndi sahá ndi ticahnu iñi chi ñu satasí iñi chi ndi.

¹³ Ma cuhvon cha nducu nyehe ra ña vaha chi ndi, tacuhva ma sacuvi ndi cuatyí nuun. Soco maun cuví ra sacacú chi ndi ndaha ra ña vaha.

Vatyí maun cuví ra nyacá ñaha tandihí. Ta maun cuaha xaan ca tunyee iñi iyó chuun. Ta tahán chi vatyí sacahnu tandihí ñáyiví chuun tyicuan ri maa. Ta na cuvi chi tyicuan caa.

Tyicuan caa cuhva tahán chi cacán tahvi ndo chi Nyoo.

¹⁴ Vatyí tatu nyoho ta sahá ndo ticahnu iñi chi ñu nyacuví cha ña vaha chihin ndo, tyicuan caa ta Sutú yo ra nyaá andiví, cusaha ra ticahnu iñi chi maa ndo.

¹⁵ Vatyí tatu ma saha ndo ticahnu iñi chi ñu nyacuví cha ña vaha chihin ndo, tyicuan caa tucu Sutú yo, ma saha ra ticahnu iñi cuatyí maa ndo —catyí ra Jesús.

Ñáá quiví ña chachí yo ta nanducú yo chi Nyoo, ma sacoto yo chi inga ñáyiví

¹⁶ Ta catyí tucu ra Jesús chi ñu chicá noo chihin ra:

—Quiví cha ña chachí ndo ta nanducú ndo chi Nyoo, ma cuihya nyehe ndo, tari ñu savahá chii. Vatyí cuñí ñu cha coto ñáyiví vatyí ña chachí ñu ta nanducú ñu chi Nyoo. Soco catyí chi ndo vatyí yucuan ri ñihi ñu. Ñahri ca cuñihi ñu nuu Nyoo.

¹⁷ Soco tatu nya quiví ña chachí ndo ta nanducú ndo chi Nyoo, ñacatya ndo nuu ndo. Ta ñacuaca ndo cuca xiñi ndo,

¹⁸ tacuhva vatyí ma tuvi iñi ñáyiví vatyí ña chachí ndo ta nanducú ndo chi Nyoo. Tyicuan ta noo tuhun maa Nyoo nyehe ra cha sacuví ndo

cha xehe ri cuan. Ta cuaha ca cha vaha cua cuhva ra chi ndo chihin nuu ñáyiví.

Nu sañahá ra Jesús vatyí ma sacaya yo cha iyó siquí ñuhu ñáyiví
(Lc. 12.33-34)

¹⁹ 'Ma sacaya ndo cha tyayí ihya ñáyiví. Vatyí coto tiví cha tyayí cuan. O cuví tucu quihví ra suhu, ta suhu ra tandihí cha tyayí ndo.

²⁰ Vaha taxín ca sacaya ndo cha vaha chi ndo nu nyaá Nyoo gloria. Vatyí nuu Nyoo ña ndihí cha vaha cuan. Vatyí ní ri ra suhu, ní quití, yori cha sativí iyó yucuan.

²¹ Ta catyí chi ndo vatyí nu nyaá cha tyayí ndo, yucuan cuví nu nyaá xiñi ndo. Ta yucuan cunyaa añima ndo.

Tari sandichín chítí nuu yo chi yo tacuhva nyehe yo nu cuahan yo, tyicuan caa tucu sandundichín tuhun Nyoo añima yo

(Lc. 11.34-36)

²² 'Chítí nuu ndo noo cha sandundichín ityí cuahan ndo cuví. Ta tyicuan caa tucu añima ndo, tatu iyó cha ndichín Nyoo, vaha ñáyiví cuví ndo.

²³ Soco tatu ña vaha chítí nuu ndo, ña ndichín nyehe ndo nu cuahan ndo. Tandihí ri ta ñaa iñi. Ta tyicuan caa tucu tatu ñahri cha ndichín Nyoo nyaá añima ndo, tari noo ra cuaa cuví ndo. Ña cuví nyehe ndo ityí vaha cha cuahan nu nyaá Nyoo.

Sañahá ra Jesús vatyí ma cuví quichaha yo chi Nyoo tatu cuñí xaan ca yo cha tyayí

(Lc. 16.13)

²⁴ 'Noo musu ma cuví coo uyi chitohó ra. Vatyí musu cuan cuñí ca ra chi noo ra ta ñima ca chi inga ra. Ta quichahá ra chi noo ra, ta chi inga ra ma quichaha ra. Ta tyicuan caa tucu nyoho, ma cuví cuñí ndo chi Nyoo, ta suri cuhva cuan cuñí ndo cha tyayí.

Sañahá ra Jesús vatyí ma caca xaan iñi yo ñáá ndihí cha chiñuhú chi yo
(Lc. 12.22-31)

²⁵ 'Yucuan chaha catyí chi ndo vatyí ma caca xaan iñi ndo yoso caa ñihi ndo cha cachi ndo ta cha coho ndo. Ní ma caca iñi ndo ñáá cha cuihno ndo. Vatyí yahví ca nyaá añima ndo ta coño ñuhu ndo nuu Nyoo, ican saha cha cachi ndo ta cha cuihno ndo. Vatyí maa ra chahá ra ñáyiví coo ndo. Ta ña yí cuhva ra inga cha chiñuhú chi ndo ñandihí.

²⁶ Saha ndo cuenda chi saa. Ña savahá tí itu. Ta ña sahá tyiño tí. Ní ri ña naquehén vaha tí tyiño sahá tí chichi yaca. Soco Sutu yo Nyoo chahá ra cha cachi tí. ¿Atu ña yahví ca nyaá nyoho nuu Nyoo ta ñima ca saa cuan?

²⁷ Ní ri maa chicá xaan xiñi ndo ma cuví sandusucun ndo ní chiin ca chi ndo.

²⁸ 'Ta tatu ní chiin cuan ña cuví chi ndo, ¿ñáá tuhun cha chicá xaan xiñi ndo tuhun sahma ndo? Saha ndo cuenda yoso caa iyó tu ita nu chiquí. Vatyí ña taví tun. Ta ní ña conó tun isa.

²⁹ Soco catyí chi ndo vatyí ní rey Salomón cha tyayí xaan cuví ra, soco ña cuví cuihno ra cha tyaquí, tari cha sacuihnó Nyoo chi tu ita cuan.

³⁰ Ta tu ita cuan tyaquí xaan ñihno tun suhva ri quiví ta yaha cuan ta cuna ityí tun ta cucayu tun chichi horno. Ta nyoho, vaha ca cusacuihno Nyoo chi ndo. Soco chiin xaan chinó iñi ndo chi ra.

³¹ Yucuan chaha ma caca xaan xiñi ndo ta catyí ndo: "¿Ñáá cha cachi ndi, o ñáá cha coho ndi, o ñáá cha cuihno ndi?"

³² Vatyí ñáyiví cha ñahri tuhun Nyoo caá añima, chicá xaan xiñi ñu tuhun ihya. Soco nyoho ma caca iñi ndo tuhun cuan vatyí iyó noo Sutu ndo, ra nyaá andiví. Ta chitó ra ñáá ndihí cha chiñuhú chi ndo.

³³ Yucuan chaha, cunyaa xiñi ndo maa maa ri maa tuhun maa Nyoo. Ta nducu ndo cuhva cunyaca ñaha ra añima ndo. Ta sacuvi ndo tari cuhva cuñí maa ra. Ta tyicuan caa ñihi ndo tandihí cuii maa cha chiñuhú chi ndo.

³⁴ Tandihí quiví ta iyó tindocho chi ndo. Ma caca xiñi ndo tuhun tindocho cha vachí. Vatyí Nyoo nyaá ra chihin

ndo.

7

*Ma cahan yo cha caá inga ñáyivi
(Lc. 6.37-38, 41-42)*

¹Ma cahan ndo cha caá inga ñáyivi. Tyicuan caa ta ma tñin Nyoo cuenda cha caá ndo.

²Vatyí tari cuhva cahán ndo cha caá inga ñu, tyicuan caa cuhva cutachi tuñi Nyoo chi ndo.

³¿Yoso caa cha cuví nyehun cuatyí luhlu ra yañun ta ña cuví nyehún cuatyí cahnu cha iyó chi maun?

⁴Tatu chiti nuu maun yihí noo vitu cahnu, ¿yoso caa cuví catyun chi ra yañun: “Nyaca, na tave mihin lee cha yihí chiti nuun”?

⁵Yoho cha savahún chuun, tava xihna vitu cahnu cha yihí chiti nuu maun, tyicuan ta cuví nyehe vahun mihin lee cha cutavon chiti nuu ra yañun.

⁶Ma sañihi ndo cahan ndo tuhun Nyoo chihin ñu ña cuñi coto, vatyí coto cañi ñu chi ndo. Tari ina cha tñin vavaha chi ndo, tyicuan caa cuví ñu. Ta tari quini cha chaca chaha ti cha yahvi nyaá, tyicuan caa cahán ña vaha ñu siqui tuhun Nyoo.

*Ma cundihñi yo cacan yo chi Nyoo,
tyicuan ta cuhva ra chi yo
(Lc. 11.9-13; 6.31)*

⁷‘Cacan ndo cha chihuhú chi ndo chi Nyoo. Ta cuhva ra chi ndo. Nanducu ndo, ta nañihi ndo. Sacachán ndo yuvehe, ta nuña.

⁸Vatyí tandihí ndo cha chicán ndo, ñihi ndo. Tatu nanducú ndo, nañihi ndo. Ta tatu sacachán ndo yuvehe, cunuña yuvehe.

⁹‘Tyicuan caa tucu nyoho cha iyó sehe ndo. Chahá ndo cha vaha chi sehe ndo. Na tuhvá ndo chaha ndo noo yuu chi sehe ndo, tatu chicán ndotyín pan chi ndo.

¹⁰Ta ña tuhvá ndo chaha ndo noo coo chi sehe ndo tatu chicán ndotyín noo tiyaca chi ndo.

¹¹Nyoho cha quiñi iyó ndo soco chitó ndo yoso caa cuhva ndo cha vaha chi sehe ndo. Ta vihi ca Sutu

yo, ra nyaá andivi. Cuaha ca cha vaha cuhva ra chi ndo tatu cacan ndo chi ra.

¹²‘Tari cuñi maa ndo cha cunyacuvi ñáyivi cha vaha chihin ndo, tyicuan caa cunyacuvi tucu maa ndo cha vaha chihin ñu. Vatyí tyicuan caa catyí tuhun cha tachí Nyoo, cha tyaa ra Moisés ta ra cacuvi profeta Nyoo ta cha naha.

*Tihin yuvehe ta cuiñi ityi cha cuahan nu nyaá Nyoo
(Lc. 13.24)*

¹³‘Nducu ndo cuhva quihvi ndo yuvehe tihin. Vatyí quehen yuvehe, ta quehen ityi cha cuahan nya nu cunaa ñáyivi anyaya. Ta cuaha xaan ñu cuahan ityi cuan.

¹⁴Soco tihin yuvehe ta cuiñi ityi cha cuahan ñayivi cha ma naa ca maa nu cucoo ñáyivi vaha. Soco suhva ri ñáyivi nañihí ityi cuan.

*Chihin cha sacuvi ri ñáyivi, ta nichón nuu yo chi ñu tatu ñu vaha o ñu ña vaha cuví ñu
(Lc. 6.43-44)*

¹⁵‘Saha ndo cuenda chi ra cuendu. Vatyí cacatyí ra vatyí cuenda Nyoo cahán ra. Soco ña ndicha. Vatyí vachi coyo ra tari noo mbee nu nyicú ndo. Sahá ra tyi ra vaha cacuvi ra. Soco tari noo ñaña xaan cacuvi ra.

¹⁶Nyoho cuví nichón nuu ndo chi ra chihin cha nyacuvi ra. Tari noo yutun ña vaha, tyicuan caa cacuvi ra. Vatyí noo tuñiyaca ma cuhva tun mango, ta ni ri noo iñu nduhva ma cuví cuhva chi tichaha ndivi.

¹⁷Ta tyicuan caa tucu tandihí yutun vaha. Chahá tun chiti vaha. Ta tandihí yutun ña vaha, chahá tun chiti ña vaha.

¹⁸Ta yutun vaha, ma cuví cuhva tun chiti ña vaha. Ta ni ri yutun ña vaha ma cuví cuhva tun chiti vaha.

¹⁹Ta tandihí yutun cha ña chahá chiti vaha, cahnya yo chi tun. Ta cahmi yo chi tun.

²⁰Ta tyicuan caa, chihin cha nyacuvi ñáyivi cuví nichón nuu ndo chi ñu tatu ñu vaha cuví ñu, o ñu ña vaha cuví ñu.

Nu catyí ra Jesús vatyi ña tandihí ñáyivi quihví ñu nu nyacá ñaha Nyoo (Lc. 13.25-27)

²¹ 'Ma tandihí ñu cha catyí chii: "Sutu Mañi yuhu, Sutu Mañi yuhu", cuquihví ñu nu nyacá ñaha Nyoo gloria. Ñu sacuví tandihí cha catyí maa Nyoo Suti, ican ñu cuan cuquihví nu nyacá ñaha ra.

²² Quiví cha cucutuñi chi ñáyivi, cuaha xaan ñu cucatyí ñu chii tyehe caa: "Sutu Mañi yuhu. Yuhu cahin tuhun maun chihin ñáyivi. Ta chihin sivun tave tatyí ña vaha cha yihí aña ñáyivi. Ta cuaha xaan milagru savahí chihin sivun", cucatyí ñu chii.

²³ Tyicuan ta yuhu cucatyí chi ñu: "Ña ñohó nui chi nyoho. Canyaha ndo nu nyaí. Vatyi nyoho sacuví ndo maa maa ri cha ña vaha."

Nu sañahá ra Jesús yoso caa cucuvi chi ñu quichahá ta ñu ña quichahá tuhun cahán ra (Lc. 6.47-49; Mr. 1.22)

²⁴ 'Ihya catyí chi ndo, yóo cha chiñi tuhun cahín ta sacuví tari cuhva catyí; cuví ra tari noo ra chiñi tuñi cha savahá ra vehe ra siqui cava.

²⁵ Ta quichahá coon savi. Ta cama xaan yuvi ndutya yahá. Ta ñihi xaan caa tatyí. Soco ña cuví sanduva chi vehe cuan. Vatyi ñihi nanyaá siqui cava cuan.

²⁶ Soco yóo cha chiñi tuhun cahín, ta ña sacuví ra tari cuhva catyí; cuví ra tari noo ra tondo, cha savahá ra vehe ra nu ñiti.

²⁷ Ta chaá savi. Ta cama xaan yuvi ndutya yahá. Ta ñihi xaan caa tatyí. Ta vehe cuan tañi tyehe ri nduva —catyí ra Jesús chi ñu.

²⁸ Cuhva cha ndihí cahan ra Jesús chihin ñáyivi, iyo xaan cuñi ñu tuhun cha sañahá ra.

²⁹ Vatyi sañahá ra tari noo ra cha nyacá ñaha. Ta ña sañahá ra tari ra sacuahá cuenda ley vehe ñuhu.

8

Nu sanduvahá ra Jesús chi noo ra cuhví cha tyahyú coño (Mr. 1.40-45; Lc. 5.12-16)

¹ Cuhva cha noo ra Jesús yucu cuan, cuaha ñáyivi nyicón chi ra.

² Ta chaá noo ra cha tyahyú coño, ta chicuñi chiti ra nuu ra, ta catyí ra chi ra:

—Sutu Mañi yuhu, tatu yoho ta cuñún, cuví sanduvahun chii —catyí ra chi ra.

³ Tyicuan ta sanacaá ra Jesús ndaha ra ta tñn ra chi ra, ta catyí ra:

—Cuñi sanduvahi chuun. Ta na nduvahun vityin ri —catyí ra.

Ta caa cuhva ri cuan ta nduvahá nu tyahyú cuan.

⁴ Tyicuan ta quichaha catyí ra Jesús chi ra:

—Nyehe, yori chihin cahun tuhun. Soco cuahan, ta sañahun chuun chi tata sutu, ta cuhva cuendon ofrenda cha catyí ra Moisés nu ley chahnu vatyi tacuhva coto ñu vatyi cha nduvahun.

Nu sanduvahá ra Jesús chi musu noo ra capitán (Lc. 7.1-10)

⁵ Cuhva cha chaá ra Jesús Capernaum, noo capitán, ra ñuu Roma, chaá ra nu nyaá ra Jesús ta chacu ndahvi ra nuu ra,

⁶ ta catyí ra:

—Sutu Mañi yuhu, musi catuví ra nu cama. Cuhví ra. Ña cuví nducuita ra vatyi ñihi xaan tahán ra.

⁷ Ta catyí ra Jesús chi ra:

—Cuhun mai ta cusanduvahi chi ra —catyí ra chi ra.

⁸ Nacahan capitán cuan ta catyí ra:

—Sutu Mañi yuhu, ña nañé cha cuhun vehi; soco tacuhva catyí run, ta musi nduvaha ra.

⁹ Vatyi suri iyó ra nyacá ñaha chi mai. Ta iyó sindaro nyacá ñaha tucu mai. Ta tatu cha tave tyiño chi noo ra, cuhun ra. Ta tatu cane chi inga ra, quichi ra. Ta tatu cha tave tyiño chi musi, sacuvi ra.

¹⁰ Ta cha chiñi ra Jesús cha cahan ra, iyo xaan cuñi ra. Ta catyí ra chi ñu nyicón chi ra:

—Cha ndicha catyí chi ndo, vatyi ñuu cha nyicú nicahnu Israel, ta nañihi que ni noo ñáyivi cha chinó xaan iñi ñu tari chinó iñi ra ihya.

11 Ta catyí chi ndo vatyí cuaha ñu inga ñuu cuquichi coyo ityi nu caña ñanyii, ta ityi nu quee ñanyii, ta cunyicu ñu cachi ñu chihin ra Abraham ta ra Isaac ta ra Jacob nya andivi.

12 Ta ñu Israel cha tahán chi cuhun andivi, yihí ñu, ma cuhun ñu, vatyí cuhun ñu nu ñaa iñi ityi chata. Ta yucuan cucuacu chaa ñu ta cucahñi noho ñu —catyí ra Jesús chi ñu.

13 Tyicuan ta quichaha catyí ra chi capitán cuan tyehe caa:

—Cuahan, ta na cuvi chi tari cuhva catyún vatyí chinó xaan iñun chii —catyí ra.

Ta suri cuhva cuan nduvahá musu ra.

Nu sanduvahá ra Jesús chi maha tyiso ra Pedro

(Mr. 1.29-31; Lc. 4.38-39)

14 Ta cha yahá cuan, chaa ra Jesús vehe ra Pedro. Ta nanyehe ra chi maha tyiso ra Pedro, catuví ña nu chito chihin cahñi.

15 Ta tijn ra ndaha ña, ta quita cahñi cuan chi ña. Ta ndicuita ña, ta quichahá tyiñuhu ña chi ra.

Nu sanduvahá ra Jesús cuaha ñu cuhví

(Mr. 1.32-34; Lc. 4.40-41)

16 Ta cuhva cha cuaa cuan, quichi nyaca ñu cuaha xaan ñáyivi yihí tatyí ña vaha chi chi ra Jesús. Ta chihin noo ri tuhun cahan ra, tavá ñehe ra chi tatyí ña vaha cuan, ta sanduvahá ra chi tandihí ñu cuhví.

17 Tyicuan caa cuvi tacuhva vatyí na chino cava tari cuhva catyí ra profeta Isaías, quivi catyí ra tyehe caa: “Maa ra quehen ra cuehe cha yihí chi yo, ta tinyaa ra cha uhvi chi yo.”

¿Yoso chiquihí chi yo tatu cuñi yo cunyicon yo chi ra Jesús?

(Lc. 9.57-62)

18 Tyicuan ta nyehe ra Jesús vatyí nicachico nu nyaá ra nyicú ñáyivi. Ta catyí ra chi ñu vatyí cuyaha ra inga chiyo miñi.

19 Tyicuan ta chaa noo ra sacuaha ley vehe ñuhu ta catyí ra chi ra:

—Maestro, cuñi cunyiquen chuun tandihí ri ityi nu cuhun —catyí ra.

20 Ta ra Jesús catyí ra chi ra:

—Ñaña, iyó vehe ti, ta saa cha chicó nu tatyí, iyó taca ti. Soco yuhu Rayii cha quichí nya gloria, ñahri vehi ta ni ri nu cava xiñi ta ñahri —catyí ra.

21 Inga tucu ra chicá noo chihin ra catyí ra chi ra:

—Tata, cuhva na cuhun xihne cutyihí chi suti chichi ñuhú, tyicuan ta quichi ta cunyiquen chuun —catyí ra.

22 Ta catyí ra Jesús chi ra:

—Ñaha yoho vatyí cunyicon chii. Saña chi ñu ña ñohó nuu chi Nyoo, na tyihí maa ñu chi tahan ñu chichi ñuhú —catyí ra.

Nu sacutaxín ra Jesús tatyí xaan

(Mr. 4.35-41; Lc. 8.22-25)

23 Tyicuan ta quihvi ra chichi canoa, ta ra cachicá noo chihin ra, cuahan coyo ra chihin ra.

24 Ta chaa noo tatyí ñihi xaan nu miñi cuan, ta nyacua chasí ndutya cuan canoa ra soco maa ra Jesús quixí ra.

25 Ta ra cachicá noo chihin ra sandoyo ra chi ra, ta cacatyí ra:

—¡Sutu Mañi yuhu, sacacu chi yo, vatyí cuñi cunaa yo!

26 Ta catyí ra Jesús chi ra:

—¿Ñáá tuhun cha yuhví xaan ndo? ¡Nyoho chiin xaan chinó iñi ndo chii!

Tyicuan ta nacandá ra ta sacutaxín ra tatyí nu miñi cuan, ta tandihí cutaxín.

27 Ta iyo xaan cacuñí ra cuan ta cacatyí ra:

—¿Yóó ra cuví ra ihya? Vatyí nyacua nya tatyí ta nyacua nya ndutya ta quichahá chi ra —catyí ra.

Nu nduvahá uvi ra ñuu Gadara ra cayihí tatyí ña vaha chi

(Mr. 5.1-20; Lc. 8.26-39)

28 Tyicuan ta chaa coyo ra inga chiyo miñi cha nyaá ñuhú cha nañí Gadara. Ta chaa coyo uvi tahan ra yihí tatyí ña vaha chii. Ta nu ñaña caquita coyo ra cuan. Xaan vavaha ra, ta yori maa cuví yaha ityi cuan.

29 Ta canachaá ra, ta cacatyí ra:

—¿Ñáá cha cuñún chihin ndi, yoho Jesús Sehe Nyoo? ¿Atu vachun vachi sanyehun tindoho chi ndi cha ni cumañi ca chaa quiví? —cacatyí ra cuan.

³⁰ Ta yatyin ri cuan nyicú cuaha quini cachachí ti.

³¹ Ta catyí tatyí ña vaha cuan chi ra Jesús:

—Tatu cuatava ñehun chi ndi, cuhva cha quihví ndi chichi quini cuan —cacatyí tatyí ña vaha cuan.

³² —Vaha. Quihví ndo —catyí ra Jesús.

Ta caquita coyo tatyí ña vaha cuan, ta quihví coyo chichi tandihí quini canyicú cuan. Ta tandihí quini cuan cachino ti ta canacocho ti noo xahva yuhu miñi cuan, ta chihí ti chihin ndutya cuan.

³³ Tyicuan ta ra casaha cumi chi ti cuan, cachino vavaha ra cuahan coyo ra chichi ñuu, ta canacatyí ra tandihí cha cuví chi ra cayihí tatyí ña vaha cuan chi.

³⁴ Ta tandihí ñáyiví ñuu, chahan ñu chinyehé ñu chi ra Jesús, ta chacu ndahvi ñu nuu ra na quita ra yucuan.

9

Nu sanduvahá ra Jesús chi noo ra cuhví cha ña cuví nacanda
(Mr. 2.1-12; Lc. 5.17-26)

¹ Tyicuan ta quihví ra Jesús chichi canoa ta yaha sava ra inga chiyo miñi, ta nachaa ra nya ñuu nu iyó ra.

² Nu nyaá ra yucuan chinyaca ñáyiví chi noo ra cuhví cha ña cuví nacanda catuví ra nu chito. Ta cha nyehé ra Jesús vatyí chinó xaan iñi ñu chi ra, quichaha catyí ra chi ra cuhví cuan:

—Sani iñun, suti vatyí cha chicoo tìcahnu iñi cuatyun —catyí ra chi ra.

³ Tyicuan ta quichaha chica xiñi suhva ra sacuahá ley vehe ñuhu cha nyicú yucuan tyehe caa: “Ra ihya chicoo cuatyí ra nu Nyoo chihin tuhun cahán ra”, cachicá xiñi ra.

⁴ Soco ra Jesús chitó ri ra ñáá cha cachicá xiñi ra, ta catyí ra chi ra:

—¿Ñáá tuhun cha ña vaha maa chicá xiñi ndo?

⁵ Vatyí ¿nya cha yí ca catyí yo: atu yí ca catyí yo “Cuatyun cha yaha ndachi”, o yí ca catyí yo: “Ndícuíta ta cacon”?

⁶ Vaha. Cuasañahi chi ndo vatyí yuhu Rayí cha quichi nya gloria, iyó ityí chii siquí ñuhu ñáyiví ihya vatyí sahi tìcahnu iñi cuatyí —catyí ra Jesús.

Tyicuan ta catyí ra chi ra cuhví cuan:

—Ndícuíta, naquehen chiton ta cuanuhu nya vehun —catyí ra.

⁷ Tyicuan ta ndícuíta ra cuhví cuan ta cuanuhu ra nya vehe ra.

⁸ Cuhva cha nyehé ñáyiví tuhun ihya, canayuhví ñu. Ta casacahnú ñu chi Nyoo vatyí chaha ra tunyee iñi cuan chi ñáyiví.

Nu caná ra Jesús chi ra Mateo
(Mr. 2.13-17; Lc. 5.27-32)

⁹ Quita ra Jesús yucuan, ta nanyehé ra chi noo ra cha nañí Mateo, nyaá ra quehen ra xuhun cha tyiyahví ñu Israel chi gobiernu ñuu Roma. Ta catyí ra chi ra:

—Coho chihin.

Tyicuan ta ndícuíta ra Mateo ta tyinyicon ra chi ra.

¹⁰ Tyicuan ta cuví chi noo chaha ra Jesús nyaá ra nya vehe ra Mateo, chachí ra. Ta cachaa coyo cuaha ra catavá xuhun cuenda gobiernu ñuu Roma ta inga ca ra ca iyó cuatyí. Ta cachicunyicú tucu ra yucuan nu mesa in ri chihin ra Jesús ta ra cachicá noo chihin ra.

¹¹ Soco cha canyehé ra fariseo cha tyicuan caa, candaca tuhun ra chi ra cachicá noo chihin ra Jesús, ta cacatyí ra:

—¿Ñáá tuhun cha vatyí ra sacuahá chi nyoho chachí ra chihin ra catavá xuhun cuenda ra nyacá ñaha nya Roma ta chihin ra ca iyó cuatyí? —cacatyí ra.

¹² Chiñi ra Jesús cha cahan ra, ta catyí ra chi ra:

—Ña chiñuhú doctor chi ñu iyó vaha, ñu ña cuhví, soco chi ñu cuhví chiñuhú ra.

¹³ Cuahan ndo ta cutuhva ndo cha cuñí chī catyi nu tutu Nyoo, nu catyí ra tyehe caa: “Yuhu cuñí vatyi cundahvi cuñi ndo chi ñáyivi, ta ñima ca cha cahñi ndo quití ta cuhva cuenda ndo chii.” Ña vachi na cane chi ñu vaha, soco chi ñu iyó cuatyí, tacuhva na nasama ñu cuhva iyó ñu.

Nu catyí ra Jesús vatyi cha ni ri ca cha nyaá ca ra chihin ra cachicá noo chihin ra ña tahán chi cha saha ra ayunar

(Mr. 2.18-20; Lc. 5.33-35)

¹⁴ Tyicuan ta ra canyicón chi ra Juan, ra sacondutya chi ñáyivi, catuhva ra chi ra Jesús ta candaca tuhun ra chi ra ta cacatyí ra:

—¿Ñáá tuhun cha nyuhu ta ra cacuví fariseo, cuaha xaan chaha savaha ndi ayuno, ña chachí ndi ta nanducú ndi chi Nyoo? ¿Ta ra cachicá noo chihin yoho ñima tyicuan caa sacuvi ra? —cacatyí ra nyicón chi ra Juan.

¹⁵ Ta nacahan ra Jesús ta catyí ra:

—¿Atu cuví cunyaa cuihya ñu nyicú vico cha ni ri ca cha nyaá ra cua tandaha chihin ñu? Soco vachi quivi vatyi cucuachiyo ra nu nyicú ñu, tyicuan ndicha ta cusavaha ñu ayuno.

Nu sañahá ra Jesús vatyi ña chachí tahan tuhun chahnu cha iyó ñu chihin tuhun chaa cha sañahá ra chi ñu

(Mr. 2.21-22; Lc. 5.36-39)

¹⁶ 'Yori naquicú noo vestido chahnu chihin noo sahma chaa vatyi coto cundiyo nu naquicu ñu chihin cha chaa cuan, ta cahnya chi cha chahnu cuan, ta nu tahnya cuan nducahnu ca.

¹⁷ Ta ni ña tyihí yo vinu chaa chichi ñi chahnu vatyi tatu sacuvi yo tyicuan caa, tahnya ñi cuan, ta tari cunaa vinu, ta cunaa ñi cuan. Yucuan chaha cuñí chi tyihi yo vinu chaa chichi ñi chaa, ta tyicuan ta ninduvi ta cusaha cuenda chi chi tahan chi.

Sehe ra Jairo, ta ñaha cha tñn sahma ra Jesús

(Mr. 5.21-43; Lc. 8.40-56)

¹⁸ Cha ni ri ca cha catyí ra Jesús tuhun ihya, chaá noo ra cuví nuu chi

ñu Judea ta chicuiñi chiti ra nuu ra Jesús, ta catyí ra:

—Ni chihí sehi, soco tatu yoho quichun ta tyison ndahun siqui ña, cunandoto ña —catyí ra chi ra Jesús.

¹⁹ Ndicuita ra Jesús ta cuahan ra ñn ri chihin ra ta ra cachicá noo chihin ra ñandihí.

²⁰ Tyicuan ta noo ñaha, cuhví ña chihin cha chati niñi ña. Ta cha uchi uvi cuiya cuhví ña. Ta tuhva ña chi ra Jesús ityi chata ra, ta tñn ña yuhu sahma ra,

²¹ vatyi tyehe caa chicá xiñi ña: “Ma chihin cha tñn ri sahma ra ta nduvahi”, chicá xiñi ña.

²² Soco ra Jesús nanyocava ra nanyehe ra chi ña, ta catyi ra chi ña:

—Nduní iñun sihi, cha nduvahun vatyi chinó iñun —catyí ra.

Ta caa cuhva ri cuan ta nduvaha ña.

²³ Yahá cuan ta chaá ra Jesús vehe ra cuví nuu cuan, ta nyehe ra vatyi ra música canyatú tuhva ra cha cuhun coyo ra nu quihvi cue chichi ñuhú. Ta ñáyivi cha nyicú cuan chacú chaa ñu.

²⁴ Ta catyí ra chi ñu:

—Quita ndo ihya. Ñaha tyivaa ihya, ña chihí ña, soco quixí ña —catyí ra.

Ta chacú cuehe ri ñáyivi nyehe ñu chi ra.

²⁵ Soco ra Jesús tava ra chi ñu ityi chata vehe, tyicuan ta quihvi ra ta tñn ra ndaha ñaha tyivaa cuan, ta maa ña ndicuita ña.

²⁶ Ta tandihí ityi cuan chitya tuhun cha cuví yucuan.

Nu sanduvaha ra Jesús chi uvi ra cuaa

²⁷ Cuhva cha quitá ra Jesús yucuan, uvi tahan ra cuaa canyicón chi ra suri caná chaa ra ta cacatyí ra:

—¿Cundahvi cuñi chi ndi, yoho ra vachi tata ra David! —cacatyí ra.

²⁸ Ta cuhva cha quihvi ra Jesús chichi vehe, ra cuaa cuan, catuhva ra chi ra, ta maa ra Jesús quichaha ndaca tuhun ra chi ra:

—¿Atu chinó iñi nyoho vatyi cuví sanduvahi chi ndo? —catyí ra.

Ta canacahan ra ta catyí ra:

—Ay, chinó iñi ndi chuun, Sutu Mañi yuhu —cacatyí ra.

29 Tyicuan ta t̄in ra Jesús ch̄iti nuu ra ta catyí ra chi ra:

—Na cuvi maa yoso cuhva chinó iñi ndo —catyí ra.

30 Ta canduvaha ch̄iti nuu ra. Ta catyí vaha ra Jesús chi ra tyehe caa:

—Nducu ndo cuhva cha yori coto.

31 Soco quita coyo cuiri ra ta quichaha canacatyí ra cha sacuvi ra Jesús chihin ra chi ñáyivi tandih̄i ityi yucuan.

Nu sanduvaha ra Jesús chi noo ra ñih̄i

32 Cha ni ri ca cha caquita coyo ra cucuaa cuan, suhva ñáyivi quich̄i nyaca ñu chi noo ra ñih̄i cha yih̄i noo tatyí ña vaha chi nu nyaá ra Jesús.

33 Ta caa cuhva ri cha tava ñehe ra Jesús tatyí ña vaha cuan, quichaha cuvi cahan ra cuan. Ta iyo xaan cuñi ñáyivi, ta catyí ñu:

—Ni noo chaha ta cuvi ca cha tyehe caa Israel Ihya —catyí ñu.

34 Soco ra cacuvi fariseo, cacatyí ra:

—Ra ihya tava ñehe ra tatyí ña vaha chihin tunyee iñi chi cuihna ra cuvi nuu —catyí ra.

Nu catyí ra Jesús vatyí ña cuaha maa ñu sahá tyiño cuenda Nyoo iyó

35 Ra Jesús chahan ra tandih̄i ñuu sañahá ra chi ñáyivi chichi vehe ñuhu tahan tahan ñuu. Cahán ra tuhun Nyoo yoso caa nyacá ñaha Nyoo añima ñáyivi. Ta sanduvahá ra tandih̄i nuu cuehe cha yih̄i ñu.

36 Ta cha nanyehé ra chi ñáyivi, cundahvi cuñi ra nyehé ra chi ñu, vatyí nyehé ñu t̄indoho ta cuihya cuñi ñu, tari mbee quit̄i cha yori sahá cumi chi.

37 Tyicuan ta catyí ra chi ra cachicá noo chihin ra tyehe caa:

—Cha ndicha, cuaha tyiño iyó, soco ra sahá tyiño, ña cuaha ra.

38 Yucuan chaha, cacan ndo chi chitoho tyiño yucuan, na tachi ra chi ra saha tyiño na sataca ra tyiño cuan.

10

Nu cachí ra Jesús chi ndi uchi uvi ra caca tyiño ra

(Mr. 3.13-19; Lc. 6.12-16)

1 Tyicuan ta cana ra Jesús chi ndi uchi uvi ra chicá noo chihin ra ta chaha ra ityi chi ra vatyí tava ñehe ra chi tatyí ña vaha cha yih̄i añima ñáyivi, ta sanduvaha ra ndih̄i nuu cuehe ta cha uhvi ñandih̄i.

2 Ican ihya cuvi sivi ndi uchi uvi ra chicá tyiño ra: xihna ca, ra Simón, cha nañi tucu Pedro, ta yañi ra, ra Andrés, ra Jacobo ta yañi ra, ra Juan, sehe ra Zebedeo cacuvi chi ra;

3 ta ra Felipe, ra Bartolomé, ra Tomás, ta ra Mateo ra tava xuhun cuenda gobiernu ñuu Roma, ra Jacobo sehe ra Alfeo, ra Lebeo cha nañi tucu Tadeo,

4 ta ra Simón cha yih̄i cuenda ityi ra cacuñi cuhun cuatyí siqui gobiernu ñuu Roma cha nyacá ñaha chi ñu, ta ra Judas Iscariote, ra cha naxico tuhun chi ra Jesús.

Nu tachí ra Jesús chi ra cachicá noo chihin ra, na cuahan ra tuhun Nyoo

(Mr. 6.7-13; Lc. 9.1-6)

5 Ta tyehe caa tachí ra Jesús chi uchi uvi tahan ra cuan, ta catyí ra:

—Ma cuhun ndo nu iyó ñu cha ñima ñu Israel cuvi, ta ni ma quihvi ndo ñuu cha nyicú Samaria.

6 Cuahan ndo, soco nu nyicú mbee cha cuanaa cha cuvi ñu ñuu Israel.

7 Cuahan ndo cuacahan ndo tuhun vatyí cha cha cha cunyaca ñaha Nyoo añima ñáyivi.

8 Sanduvaha ndo chi ñu cuhvi ñu tyahyú coño, ta ñu yih̄i inga cuehe chii. Sanandoto ndo ndiyi, tava ñehe ndo chi tatyí ña vaha cha yih̄i chi ñu. Nyoho, naquehén cuenda ndo tunyee iñi ihya chihin cha ñahri yahvi, ta cotyiño ndo soco ma quehen ndo yahvi.

9 'Ma cuiso ndo ni noo xuhun, ni xuhun cuaan ni xuhun cuichin, ni xuhun cuaha.

10 Ma cuiso ndo ni yono cha cuenda cha caca ityi ndo. Noo ri camisa cha ñihnó ndo cuhun chihin ndo. Ta ma

cuiso ndo inga ityi ndichan, ni yutun ma tuvi ndo, vatyí ra sahá tyiño, iyó ityi chi ra cha coo yahvi ra.

¹¹ 'Cuhva cha chaa ndo noo ñuu, nducu ndo noo ñáyiví cachi iyó, ta ndoo ndo vehe ñu nyacua nya quita ndo ñuu cuan.

¹² Cuhva cha cua quihví ndo noo vehe, cuhva ndo nocumi chi ñáyiví iyó vehe cuan. Ta catyi ndo chi ñu: Na coo cha taxi Nyoo aña ndo, catyi ndo chi ñu.

¹³ Ta tatu ñu ñuu cuan ta nacotó ñu tyi chiñuhú cha taxi ri cuan chi ñu, cundoo cuan chihin ñu. Soco tatu ña nacotó ñu vatyí chiñuhú cuan chi ñu, ma ndoo cuan chihin ñu.

¹⁴ Ta tatu ña cuñí ñu quehen cuenda ñu chi ndo, ta ni ña cuñí ñu cuiñí ñu tuhun cahán ndo, tyicuan ta quita ndo vehe yucuan, o ñuu yucuan, ta naquisi ndo ñiyaca chaha ndo.

¹⁵ Cha ndicha catyí chi ndo vatyí quiví cutuñi chi ñáyiví, ñihi ca cutachi tuñi Nyoo chi ñu cuan, ta ñima ca ñáyiví ñuu Sodoma ta ñuu Gomorra.

Nu sañahá chi ñáá ndihí tindoho cunyehe ñu chicá tyiño Nyoo

¹⁶ 'Nyehe ndo! Yuhu tachí chi ndo, tari mbee mahñu lobo. Quiyi saha ndo chi ndo, tari coo, soco masu saha ndo chi ndo tari paloma.

¹⁷ Saha ndo cuenda chi ndo vatyí ñáyiví cucuhva cuenda ñu chi ndo chí ra cuví tyiño, ta chichi vehe ñuhu cucañi ñu chi ndo.

¹⁸ Ta cha cuenda yuhu, nyacua cun-yaca ñu chi ndo nuu gobiernu ta nuu rey. Ta tyicuan caa ta cuví cahan ndo tuhun nuu ra ta nuu ñu cha ñima ñu Israel cuví.

¹⁹ Soco tatu nacuhva cuenda ñu chi ndo chí ra cuví tyiño, ma caca xiñi ndo yoso caa cucahan ndo, vatyí tatu chaa cuhva cha cahan ndo, Nyoo cucuhva ra tuhun cha cucahan ndo.

²⁰ Vatyí ñima maa ndo cucahan, soco maa Tatyí li Sutu yo Nyoo cusacahan chi ndo.

²¹ 'Rayí cunaxico tuhun ra suri chi yañi ra tacuhva na cacahñi ra chi ra. Ta yihí ra cunaxico tuhun ra chi sehe

ra. Ta yihí ñáyiví cunanuhu ñu síqui sutu ñu ta síhi ñu, ta cusacuvi ñu, na cúvi ñu.

²² Tandihí ñáyiví, cucutasi cuñi nyehe ñu chi ndo cha catyi yuhu. Soco tatu ña ndu uvi ñni ndo chino ñni ndo chí, tyicuan ta cucacu aña ndo.

²³ Tatu chica nyicon ñu chi ndo noo ñuu, cono ri ndo inga ñuu. Vatyí cha ndicha catyi chí ndo ni cha ta ndihí ca cahan ndo tuhun Nyoo tandihí ñuu nu nyicu ñáyiví Israel ta yuhu Rayí cha quichi nya gloria cuquichi inga chaha.

²⁴ 'Ni noo ra cutuhvá, ña cahnu ca ra cuví ra ican saha ra sacuaaha chí ra. Ta ni noo musu, ña cahnu ca cuví ra ican saha chitoho ra.

²⁵ Ra cutuhva, cuñí chí ndoo ra vaha cha chaa ra cuví ra tari ra sacuaaha chí ra, ta musu tari chitoho ra. Tatu yuhu ra cuví chitoho vehe, catyí ñu chí vatyí Beelzebú, cuihna ra cuví nuu, cuví, suri tyicuan caa cucatyí tucu ñu chí ñáyiví cuende.

Yóo chí tahán chí cuyuhvi yo (Lc. 12.2-7)

²⁶ 'Yucuan chaha ma yuhvi ndo chí ñáyiví, vatyí ni noo tuhun xehe ta cuñun, tyi ma natuvi. Ta ni ñahri cha ñohó xehe, ta cuñún tyi ma coto tandihí ñáyiví.

²⁷ Tandihí cha catyí chí ndo nu ñaa ñni, catyi nyoho nu ndichin. Ta tandihí cha catyi chí ndo nu xehe, çana chaa ndo nya xiñi vehe, na coto tandihí ñáyiví.

²⁸ Ma yuhvi ndo chí ñu chahñi coño ñuhu yo, vatyí ma cuvi cahñi ñu aña yo. Soco yuhvi ndo chí ra cuví sanaa coño ñuhu yo ta aña yo chí chí anyaya ñandihí.

²⁹ '¿Atu ñima chihin noo xuhun luhlu ri, sata yo uvi tahan saa? Ican. Soco ni noo ti ña canacava ti nu ñuhú tatu ña catyí maa Nyoo Sutu yo.

³⁰ Vatyí nyacua nya ixi xiñi nyoho ta chitó Nyoo yoso tahan nyaá.

³¹ Ma yuhvi ndo. Nyoho, yahvi ca nyaá ndo ta ñima ca ticuítí saa.

Ma yuhvi yo cahan yo tuhun ra Jesucristo nuu ñáyiví

(Lc. 12.8-9)

³² Tandihí ñu cha cahán vaha tuhun nuu ñáyiví, yuhu tucu cucahan vahi cuenda ñu nuu Suti ra nyaá andiví.

³³ Soco ñu cahán nuu cahan tuhun, yuhu tucu ma cahin tuhun ñu nuu Suti ra nyaá andiví.

Cha cuenda ra Jesús cusin ñáyiví

(Lc. 12.51-53; 14.26-27)

³⁴ 'Ma cuñi ndo vatyi yuhu vachi cuhve cha taxi ri coo ndo síqui ñuhu ñáyiví ihya. Ña vachi cuhve cha taxi ri, soco cha cañi tahan ñáyiví.

³⁵ Vatyi sasiín chi ndo. Vatyi noo ra cahun ra síqui sutu ra. Ta noo ña cahun ña síqui síhi ña. Ta ñu cuví chono cucañi tahan ñu chihin tyiso ñu.

³⁶ Ta tyicuan caa suri ñáyiví chi ndo cucuvi ñu ñu xaan iñi chi ndo.

³⁷ 'Ñu cha cuñí ca chi sutu o chi síhi ican saha chi yuhu, ña tahán chi cuví ñu ñu cuende. Ta ñu cuñí ca chi sehe, ican saha chi yuhu, ña tahán chi cuví ñu ñu cuende.

³⁸ Ta ñu cha ña cuñí nyehe tindhoho ta cunyicon ñu chii, ña tahán chi cuví ñu ñu cuende.

³⁹ Vatyi ñu ña cuñí nyehe tindhoho cha cuenda yuhu, cunyehe ñu tindhoho anyaya, soco ñu nyehé tindhoho ta chahá ñáyiví cha catyi yuhu, cucacu añima ñu.

Yahvi cha tahán chi chi yo

(Mr. 9.41)

⁴⁰ 'Ñu quehén cuenda chi ndo, chi yuhu quehén cuenda ñu, ta ñu quehén cuenda chi yuhu, quehén cuenda ñu chi ra cha tachí chii.

⁴¹ 'Ñu quehén cuenda noo ra profeta Nyoo cha cuenda vatyi cuenda Nyoo cahán ra, cuñihi ñu suri tahan yahvi cha cuñihi profeta cuan. Ta ñu quehén cuenda chi noo ra vaha cha cuenda tyi ra vaha cuví ra, suri tahan yahvi cha cuñihi ra vaha cuan cuñihi ñu.

⁴² Ta savahri ñu cha cuhva vasí noo vasu ndutya vichin coho ñu nyihi ihya cha cuenda cha nyicón ñu chii,

cuñihi ñu cha cucuhva Nyoo chi ñu —catyí ra Jesús.

11

Ra cha tachí ra Juan nu nyaá ra Jesús

(Lc. 7.18-35)

¹ Ndihi chaha ra Jesús tuhun chi uchi uvi ra chicá noo chihin ra, tyicuan ta quitá ra yucuan, vatyi cucahan ra tuhun Nyoo chihin ñáyiví cha iyó ñuu cha nyicú ityi cuan.

² Ta ra Juan nu ñohó ra vehe caa, ñihi ra tuhun cha sacuví ra Cristo. Tyicuan ta tachí ra chi uvi ra nyicón chi ra, cundaca tuhun ra noo tuhun chi ra Jesús. Ta cachaa coyo ra nu nyaá ra

³ ta cacatyí ra chi ra:

—¿Atu yoho cuvún ra Cristo cha tahán chi quichi sacacu chi ndi, o cuñí chi cha cuatu ndi chi inga ra? —cacatyí ra chi ra.

⁴ Nacahan ra Jesús ta catyí ra:

—Cuahan ndo ta catyi ndo chi ra Juan cha nyehé ndo, ta cha chiñí ndo.

⁵ Nacatyí ndo chi ra yoso caa nanyehé ñu cuaa, yoso caa nacacá ñu coxo, ta ñu tyahyu coño yoso caa nduvahá ñu, ta yoso caa nacuiñi ñu soho, ta ñu ndiyi nandoto ñu, ta chihin ñu ndahvi cahán ndi tuhun Nyoo yoso caa sacacu ra añima ñu.

⁶ 'Sii xaan cuñí ñu ña chicá uvi iñi nyicón chii.

⁷ Cuhva cha cuahan coyo ra, ra Jesús quichaha cahan ra tuhun ra Juan chihin ñáyiví, ta catyí ra:

—¿Ñáá cha chahan nyoho chinyehe ndo chiqui ndi cuan? ¿Atu chinyehé ndo noo ndoo cha naquisí tatyí? ¿Ñáá cha nyehé ndo?

⁸ ¿Atu nyehé ndo noo ra vaha ñihnó? Ñima. Nyoho chitó ndo vatyi ra ñihnó vaha, nyaá ra vehe rey.

⁹ Tu tyicuan caa, ¿ñáá cha chahan ndo chi nyehé ndo? ¿Atu noo ra cuví profeta? Ican. Soco noo ra cha cahnu ca cuví ican saha noo profeta cuenda Nyoo.

10 Vatyí ican ra Juan ihya, cuví cha cahán tuhun nu tutu Nyoo tyehe caa: Yuhu cuví Nyoo ta tachí chi noo ra cahan tuhín ityi nuu nu cuhun. Vatyí cucahan ra tuhun chihin ñáyiví nanasama ñu cuhva iyo ñu ta cuatu tuhva ñu quiví quichun.

11 'Cha ndicha catyí chi ndo, vatyí chichi cha tandihí ñáyiví, ni noo chaha ta coo ca noo ra cahnu ca cuví ican saha ra Juan ra sacondutyá chi ñáyiví. Soco ra cha nyacá ñaha Nyoo añima, vasi cuví ra noo ra luhlu ca, soco cahnu ca ra ta ñima ca ra Juan.

12 Nyacua nya quiví cha chaá ra Juan ta nya vityín, cuaha ñu ndachan sahá chii nducú sativí ñu tuhun Nyoo, ña cuñí ñu cha cunyacá ñaha Nyoo añima ñáyiví.

13 Ra Moisés cahan ra tuhun yoso caa nyacá ñaha Nyoo añima ñáyiví, ta tyicuan caa tucu tandihí ra profeta nyacua nya quiví quichí ra Juan.

14 Ta tatu cuñí nyoho chino iñi ndo tuhun cahín, catyí chi ndo vatyí profeta Elías cha tahan chi quichi, ra Juan cuví ra.

15 Yóo ñu cha cutuñi iñi, na tyasoho ñu tuhun cahín.

16 '¿Yóo chihin sandu inuu ri chi ñáyiví cha iyó tyembu ihya? Tari ra cuatyaa cuví ñu, vatyí chicunyaa ndotyín nuyahví nyasiqui ndotyín, ta canachaa ndotyín chi ra tahan ndotyín, ta catyí ndotyín tyehe caa:

17 "Tiví ndi flauta, soco ña chita chaha ndo. Chita ndi yaa cuihya soco ña chacu ndo." Tyicuan caa tucu nyoho, ni noo cuhva ña tahan iñi ndo.

18 Vatyí quichí ra Juan, cha ña chachí ra ta ña chihí ra, ta nyoho catyí ndo vatyí noo tatyí ña vaha yihí chi ra.

19 Yaha cuan ta quichí tucu yuhu Rayí cha quichi nya gloria. Ta yuhu chachí ta chihí tandihí, ta catyí ndo tyi ra cuahví ra tuhvá chihi cuví. Ta ña tahan iñi ndo cha cutahín chihin ra iyó cuatyí ta ra tavá xuhun. Soco vasi ni noo ndi ña naquehén cuenda ndo tuhun cahán ndi, soco Nyoo chahá ra cha chiñi tuñi ra chi ñu naquehén tuhun cahín ta tuhun cahan ra Juan,

ta maa ñu cusañaha chi ndo vatyí vaha cha chiñi tuñi Nyoo —catyí ra Jesús.

Uvi ñuu nu ña tyasohó ñáyiví tuhun Nyoo
(Lc. 10.13-15)

20 Tyicuan ta quichaha cahan ra Jesús chi ñu ñuu nu sacuvi ra cuaha milagru, vatyí ñáyiví cuan ña canasama maa ñu cuhva iyó ñu, ta catyí ra:

21 —¡Ndahví nyoho, ñu ñuu Corazin! ¡Ndahví nyoho ñu ñuu Betsaida! Vatyí nyehé ndo nyatu cahnu ta ña nasama ndo cuhva iyó ndo. Soco ñáyiví ñuu Tiro ta ñuu Sidón cha sanaa Nyoo ta cha naha cha cuenda cuatyí ñu ñahri nyatu cahnu nyehe ñu. Soco tyehe ta nyehe ñu nyatu cahnu quiví cuan tari cha nyehé nyoho vityín, tañi tyehe ri ndihví noo ñu sahma tucuihya iñi ta cunyaa ñu nu ñiyaa. Tari cuhva costumbre iyó maa ñu, noo seña vatyí ndu uvi iñi ñu cuatyí ñu cuví cuan.

22 Soco catyí chi ndo vatyí quiví cutuñi chi nyoho nuu Nyoo, cahnu ca cha uhví cunyehe ndo ta ñima ca ñáyiví Tiro ta Sidón.

23 Ta nyoho ñu ñuu Capernaum, cuñí maa ndo tyi cundaa ndo nya andiví, soco cunoo ndo nya nu nyicú ñu ndiyí. Vatyí tyehe ta cuví milagru ñuu Sodoma cuan, tahan cha cuví ñuu ndo, ñuu cuan coo ca nyacua nya vityín.

24 Soco catyí chi ndo vatyí quiví cutuñi chi nyoho, yaha ca cunyehe ndo tindoho, ta ñima ca ñu ityi ñuu Sodoma cuan.

Cuhva ndo chi ndo chii, ta cuhve cha nyitatu ndo, catyí ra Jesucristo
(Lc. 10.21-22)

25 Tyembu cuan catyí ra Jesús chi Nyoo tyehe caa:

—Sutu Mañi yuhu, Nyoo, ra nyacá ñaha andiví ta ñuhu ñayiví. Sacahní chuun vatyí sañahun tuhun maun chi ñu ñahri maa chitó. Ta tixehun tuhun maun chi ñu cha sahá tuhun tyi chitó xaan ta ñu chiñi tuñi ñandihí.

²⁶ Ndicha Sutu Mañi yuhu, vatyí tyicuan caa cuñí maun.

²⁷ Tyicuan ta catyí tucu ra:

—Suti nacuhva cuenda ra tandihi chii. Yori maa ñohó nuu noo cha ndicha chii, soco noo tuhun ri maa Suti ñohó nuu ra chii. Ta yori ñohó nuu noo cha ndicha chi Suti, soco noo tuhun ri mai, cha cuví Sehe ra chii, ñohó nui chi ra. Ta ñáyivi cha cuñí mai cha cohon nuu chi ra, ican ñu cuan cua cohon nuu chi ra.

²⁸ Tandihí nyoho cha chitatu ndo cha sahá tyiño ndo, ta chihin carga cha nyisó ndo, quichi ndo nu nyaí, ta yuhu cuhve cha nyitatu ndo.

²⁹ Cuhva ndo cha cunyaca ñahi chi ndo ta cutuhva ndo cuhva iyó yuhu. Vatyí yuhu masu iñi ta cama iñi. Tyicuan caa ta ñihi ndo nu nyitatu aña ndo.

³⁰ Ña yíi cha cuhva ndo chi ndo cha cunyaca ñahi. Ta carga cha chahí chi ndo, ñahma.

12

Nu tohón ra cachicá noo chihin ra Jesús yoco trigu quivi nyitatu ñáyivi
(Mr. 2.23-28; Lc. 6.1-5)

¹ Noo quivi nyitatu ñáyivi, yaha ra Jesús mahñu nu iyó cha tachí ñu. Ta chaá soco chi ra cachicá noo chihin ra. Ta quichaha catohon ra yoco trigu cuan ta quichaha cachachi ra chiti yoco cuan.

² Cuhva cha cananyehe ra fariseo cha tyicuan caa, cacatyí ra chi ra Jesús:

—Nyehe, ra cachicá noo chuhun sacuví ra noo cha ña tahán chi sacuví yo quivi nyitatu yo —catyí ra chi ra.

³ Soco maa ra Jesús catyí ra chi ra:

—¿Atu ta sacuha ca nyoho cha sacuvi ra David chihin ra tahan ra quivi cha chisoco ra?

⁴ Quihvi ra chichi vehe Nyoo. Ta quehen ra pan ii cha cha yaha catuvi nuu Nyoo. Ta chachi ra ta ña tahán chi cachi ra, ni maa ra ni ra ndihi chihin ra, vatyí maa ri maa tata sutu tahán chi cachi pan cuan.

⁵ ¿O ta sacuha ca ndo nu ley cha chahá Nyoo chi ra Moisés nu catyí chi

vatyí ra cacuví sutu, ña canyitatu ra quivi nyitatu yo, soco sahá tyiño ra chichi vehe ñuhu? Yucuan nyehé yo vatyí ñima cuatyí cuví cuan.

⁶ Ta catyí chi ndo, vatyí ihya nyaá yuhu cha cuví noo ra cahnu ca ican saha vehe ñuhu.

⁷ Nyoho, ta cutuñi ca iñi ndo nu catyí chi tyehe caa nu tuhun Nyoo: “Cha cuñí yuhu, cha cundahvi cuñi ndo nyehe ndo chi tahan ndo, ta ñima ca cha cahñi ndo quiti ta cuhva cuenda ndo chii.” Tyehe ta cutuñi iñi ndo tuhun ihya, ma tyaa ndo cuatyí siqui ñáyivi cha ñahri sacuvi.

⁸ Yuhu cuví Rayi cha quichi nya gloria. Ta iyó ityi chii vatyí catyí chi noo noo ndo ñáá cha sacuvi ndo quivi nyitatu yo —catyí ra Jesús.

Nu nduvaha ra cha ityi ndaha
(Mr. 3.1-6; Lc. 6.6-11)

⁹ Tyicuan ta quita ra Jesús yucuan, ta cuahan ra vehe ñuhu.

¹⁰ Ta yucuan ñohó noo ra ityi inchiyo ndaha. Ta nyicú tucu suhva ra nducu cuhva yoso caa ta catyaa ra cuatyí siqui ra Jesús. Yucuan chaha candaca tuhun ra chi ra ta catyí ra:

—¿Atu cuví sanduvaha yo chi noo ñu cuhvi quivi nyitatu yo? —cacatyí ra chi ra Jesús.

¹¹ Ta nacahan ra Jesús ta catyí ra:

—¿Nya noo nyoho, tatu canacava noo mbee sana ndo chichi noo yavi quivi nyitatu yo, atu ma cuhun ndo ta tava ndo chi ti?

¹² Ta ¿atu ña yahvi ca nyaá noo ñáyivi ta ñima ca noo mbee? Yucuan chaha vatyí tahán chi sacuvi yo cha vaha quivi nyitatu yo —catyí ra.

¹³ Tyicuan ta catyí ra chi ra cha ityi ndaha cuan:

—Sanacaa ndahun —catyí ra.

Ta cuhva cha sanacaa ra, nduvaha ri ndaha ra tari inga chiyo cuan.

¹⁴ Tyicuan ta caquita coyo ra fariseo cuandatuhun tahan ra yoso caa cacahñi ra chi ra Jesús.

Noo profeta, ra chahá cuenda tuhun cahán Nyoo, cahan ra tuhun ra Jesús cha ni cumañi ca cacu ra

15 Cha chito ra Jesús tuhun tyi canducú ra chi ra, quita ra yucuan ta cuaha ñáyivi chinyicon chi ra. Ta maa ra sanduvaha ra chi tandihi ñu cuhvi.

16 Ta catyí ra chi ñu tyi ma cahan ñu tuhun vatyí ican ra sanduvaha chi ñu.

17 Tyicuan caa cuvi tacuhva nachino cava tuhun cha tyaa ra Isaías ra cuví profeta Nyoo ta cha naha. Tyehe caa tyaa ra:

18 Ican ra ihya cuví ra sacuvi tyiño nui, ra cha nacachi vahi. Cuñí xain chi ra, ta sñi cuñí chihin ra. Cusacuti chi ra chihin Tatyí li cha iyó chii.

Ta cusacoto ra chi ñáyivi cha ñima ñu Israel cuví yoso caa sacuvahi chi ñu nui.

19 Ta ma xaan cahan ra ta ni ma cana cha ra, ta ni yori cuiñi ndusu ra ityi cahnu.

20 Ta ni noo ndoo yacua, ta ma cahnu ndihi ra.

Ta ni ma ndahva ndihi ra mecha cha caña ñuhma.

Nyacua nya cha sanicoo vaha ra chi ñáyivi chihin ra ta cunyaca ñaha vaha ra ñima ñu.

21 Ta tandihi ñáyivi, ta chi ra cuquihi ñi ñu.

*Nu catyí ñáyivi vatyí ra Jesús, tun-
yee iñi ra ña vaha iyó chi ra*

(Mr. 3.20-30; Lc. 11.14-23; 12.10)

22 Tyicuan ta nu nyaá ra Jesús chinyaca ñu chi noo ra yihí tatyí ña vaha chi, cuaa ra ta ñihi ra. Ta ra Jesús sanduvaha ra chi ra. Ta cuvi nacahan ra, ta cuvi nanyehe ra.

23 Iyo xaan cuñí tandihi ñáyivi, ta catyí ñu:

—¿Vasi ra vachi tata rey David cuví chi ra ihya? —catyí ñu.

24 Soco cuhva cha cachiñi ra fariseo tuhun cuan, cacatyí ra:

—Chihin fuerza ra Beelzebú, ra cuví nuu chi cuihna, tavá ra ihya tatyí ña vaha —catyí ra.

25 Soco ra Jesús chitó ra cha cachicá xiñi ra, yucuan chaha catyí ra chi ra:

—Tatu noo gobiernu ta cacusin ra, cuaha ri ityi nanduvi ra, cucañi tahan ra chihin tahan ra, ta cundihi tuhun cha canyacá ñaha ra. O tatu noo ñuu

o tandihi ñáyivi noo vehe cacusin ñu chihin tahan ñu, cutivi nu nyicú ñu.

26 Ta tyicuan caa tucu, tatu cuihna ta tava ra suri ra tahan maa ra, cuñí chi catyí vatyí ña in ri cacuví ra, ta cundihi fuerza cha iyó chi ra.

27 Ta nyoho catyí ndo vatyí yuhu tavé tatyí ña vaha chihin fuerza ra Beelzebú. Tu tyicuan caa, ra nyicú chihin maa ndo, ¿yóó cha chaha fuerza vatyí tavá ra tatyí ña vaha? Maa ra na sacoto ra chi ndo cha ndicha, vatyí nyoho tondo ri chicá xiñi ndo.

28 Yucuan chaha catyí chi ndo, vatyí yuhu tave tatyí ña vaha chihin fuerza Tatyí li Nyoo. Ta cuñí chi catyí vatyí ndicha cuii Nyoo ra nyacá ñaha ñima ñáyivi cha chaá ra nu canyicú ndo.

29 'Chichi vehe noo ra ñihi xaan, tari cuihna, ma cuvi quihvi noo ra ta quehen ra tandihi cha chii ra, soco tatu cuhñi xihna ra chi ra tyicuan caa ta cuví tinyaa ra tandihi cha chii ra.

30 'Ñáyivi cha ña nyaá tumañi iñi chii, ñáyivi xaan iñi chii cuví ñu. Ta tatu ña tyinyeé ndo chii cha cahán ndo tuhun nuu ñáyivi, cuñí chi catyí vatyí ña chahá ndo cha coto ñáyivi tuhun cahín.

31 Yucuan chaha catyí chi ndo vatyí Nyoo sahá ra ticahnu iñi cuatyí ñáyivi, ta ñáa cha ña vaha cahán ñu ñandihí, soco cha cahan ña vaha ñu siqui Tatyí li Nyoo, yucuan ndicha, ma coo ticahnu iñi cha cuenda ñu.

32 Ta yóó ri ñu cha cahán ña vaha siqui yuhu Rayi cha quichi nya gloria, coo ticahnu iñi chi ñu cha cuenda cuan. Soco ñu cahán ña vaha siqui Tatyí li Nyoo, ma coo maa ticahnu iñi chi ñu cha cuenda cuatyí cuan, niri ihya ñayivi, ta niri inga ñayivi ñandihí.

*Chihin cha sacuvi ri ñáyivi ta
nicohon nuu ri yo chi ñu tatu ñu vaha o
ñu ña vaha cuví ñu*
(Lc. 6.43-45)

33 'Noo yutun vaha chahá tun chiti vixi, chiti vaha. Ta noo yutun ña vaha chahá tun chiti ña vaha. Nicohón nuu ri yo tatu yutun vaha cuví tun chihin chiti cha chahá tun.

³⁴ ¡Nyoho, ñu quiñi iyó, tari tata coo xaan cuví ndo! ¿Yoso caa cuví quitá tuhun vaha yuhu ndo, ta ñáyivi quiñi caa añima cuví ndo? Vatyí cha quitá chichi añima yo ican cuan cahán yo.

³⁵ Noo ra vaha cahán ra tuhun vaha vatyí ñohó cha vaha añima ra. Ta ra quiñi iyó, maa maa ri tuhun quiñi caa cahán ra, vatyí cha quiñi caa ñohó añima ra.

³⁶ Ta yuhu catyí chi ndo vatyí quiñi cutuñi chi tandihí ñáyivi, cucuhva ñu cuenda tandihí tuhun cha ña saha ñu cuenda ta cahan ñu.

³⁷ Vatyí yoso cuhva cahún, yucuan cuhva cucutuñi chuun, tatu iyó o ñahri cuatyun.

Ñu quiñi iyó cuñí ñu nyehe ñu seña milagru

(Mr. 8.12; Lc. 11.29-32)

³⁸ Tyicuan ta suhva ra fariseo ta ra sacuahá ley vehe ñuhu cacatyí ra chi ra Jesús tyehe caa:

—Maestro, cuñí ndi vatyí sacuvun noo seña milagru vatyí nyehe ndi.

³⁹ Ta nacahan ra Jesús ta catyí ra:

—Ñu quiñi iyó ta ñu nyicón inga nyoo cuñí ñu nyehe ñu seña milagru. Soco ma nyehe ca ñu inga seña, noo ri seña ra Jonás ra profeta Nyoo, yucuan ri cunyehe ñu.

⁴⁰ Vatyí tari ñohó ra Jonás chichi tiyaca cahnu cuan uñi quiñi ta uñi ñuu, tyicuan caa cucohon yuhu Rayii cha quichi nya gloria chichi ñuhú uñi quiñi ta uñi ñuu.

⁴¹ Ta quiñi cucutuñi chi tandihí ñáyivi, cundicuita ñu chiyo ñuu Ninive ta cha naha ta cucatyí ñu na tachi tuñi Nyoo chi nyoho ñáyivi cha iyó vityin, ta cucatyí ñu vatyí cucunaa ndo, vatyí maa ñu cha cuví ñu ñuu Nínive, canasama ñu cuhva iyó ñu quiñi cahan ra Jonás tuhun Nyoo chihin ñu. Ta ihya nyaá ra cahnu ca cuví ta ñima ca ra Jonás.

⁴² Vatyí tyicuan caa tucu ñaha cha cuví reina ityi Sur, cundicuita ña quiñi cucutuñi chi ñáyivi ta cucatyí ña vatyí cucunaa nyoho ñu iyó vityin, vatyí maa ña, vasi cañi ñuu ña soco

quichi ña, quichi tyasoho ña tuhun cha chiñi tuñi ra Salomón. Ta ihya cahnu ca cuví ra cha cahán chihin ndo vityin ta ñima ca ra Salomón.

Yoso caa ndichi tucu tatyí ña vaha inga chaha añima ñáyivi tatu naa iñi ñu chi Nyoo

(Lc. 11.24-26)

⁴³ Tatu noo tatyí ña vaha quita chi añima noo rayii, chicá noo chi noo nu ityi, nanducú chi noo nu nyitatu chi, soco ña nañihi chi nu nyitatu chi. Tyicuan ta ndichi xiñi chi:

⁴⁴ “Cunuhu tiqui nya vehi nu quite.” Yucuan ta nachaa chi añima ra nu quita chi. Ta nanyehe chi vatyí ndi xaan, ta yori nyaá.

⁴⁵ Tyicuan ta cuanaquehen chi ucha ca tahan tatyí ña vaha, cha yaha ca cuhva ican saha maa chi. Tyicuan ta quihvi tandihí tatyí ña vaha cuan añima ra cuan. Yucuan chaha, quiñi ca cunicoo ra ta ñima ca cuhva chiyo maa ra. Ta tyicuan caa cucuvi chi ñáyivi quiñi iyó ihya —catyí ra Jesús.

Tari yañi ra Jesús ta tari sihi ra cuví chi ñáyivi sacuvi cuhva catyí Nyoo

(Mr. 3.31-35; Lc. 8.19-21)

⁴⁶ Ni cahán ca ra Jesús chihin ñáyivi, ta chaá sihi ra ta yañi ra, ta ndoo ñu chata vehe, ta cuñí ñu cahan ñu chihin ra.

⁴⁷ Tyicuan ta sacoto noo ñáyivi nyaá cuan chi ra Jesús, ta catyí ñu:

—Sihun ta yañun nyicú ñu chata vehe. Ta cuñí ñu cahan ñu chuhun.

⁴⁸ Tyicuan ta nacahan ra Jesús ta catyí ra chi ñu:

—¿Yóó cha cuví sihi ta yañi? —catyí ra.

⁴⁹ Tyicuan ta sañaha ndaha ra chi ra cachicá noo chihin ra, ta catyí ra:

—Ican ra ihya cuví sihi ta yañi.

⁵⁰ Vatyí tandihí ñáyivi cha sacuvi cuhva cuñí Suti ra nyaá andivi, ican ñu cuan cuví yañi, ta cuhve, ta sihi —catyí ra Jesús.

13

Tari noo ra chicá noo tachí, tyicuan caa cuví ra cahán tuhun Nyoo chihin ñáyivi

(Mr. 4.1-9; Lc. 8.4-8)

¹ Quiivi cuan quita ra Jesús vehe ra ta chicunyaḷ ra yuhu miñi.

² Ta chaha cha cuaha ñáyivi nat-aca nu nyaá ra, quihvi ra chichi noo canoa ta chicunyaḷ ra. Ta tandihi ñáyivi ndoo ñu nyicú ñu nu ñiti cuan.

³ Tyicuan ta cuaha ri cha quichaha sañahá ra chi ñu chihin noo cuhva ta catyí ra:

—Noo chaha quita noo ra, tachí ra chiti trigu.

⁴ Ta nu cuahan ra quití ra chiti cuan, canacoyo suhva chiti cuan yuhu ityi. Ta quichí coyo saa ta cachachí ti.

⁵ Ta suhva ca canacoyo ticu yuu, nu ña cuaha ñuhú yihí. Ta yucuan caña chiti cuan cha numi ri vatyi ña cuaha ñuhú yihí chaha.

⁶ Soco cuhva cha caña ñanyii ñn na ityi ri tun, vatyi ña cono yihí yoho tun.

⁷ Suhva ca chiti canacoyo ticu iñu. Ta chahnu iñu cuan. Ta chasi chi nuu tun. Yucuan chaha ña chiyo chiti tun.

⁸ Soco suhva ca canacoyo nu ñuhú vaha. Ta quivi cachahnu tun, vaha xaan cachaha tun chiti, vatyi yihí tun noo cientu chiti chaha tun cha noo ri maa tun. Ta inga tun uñi xico, ta inga tun oco uchi chiti chaha tun.

⁹ ¡Tatu cutuñi iñi ndo, tyasocho ndo!

Nu sacoto ra Jesús ñáá tuhun cha chihin cuhva ri cahan ra ta ña cahán cachi ra

(Mr. 4.10-12; Lc. 8.9-10)

¹⁰ Tyicuan ta tuhva ra cachicá noo chihin ra Jesús, ta candaca tuhun ra chi ra, ta catyí ra:

—¿Ñáá tuhun cha chihin cuhva ri cahán chihin ñáyivi, ta ña cahán cachun chihin ñu? —cacatyí ra.

¹¹ Ta nacahan ra Jesús ta catyí ra:

—Chi nyoho sacotó Nyoo tuhun xehe, yoso caa nyacá ñaha ra, soco chi maa ñu ña chahá ra cha coto ñu.

¹² Vatyi ñáyivi cutuñi iñi tuhun cahán ta sacuví ñu, cuaha ca cucutuñi

iñi ñu. Ta ñáyivi cha chiin ri cutuñi iñi, ta ña cuñi ñu sacuvi ñu, cutinyaa ndihi cha cutuñi iñi ñu.

¹³ Yucuan chaha vatyi chihin cuhva ri cahán chihin ñu, tacuhva nyehe ñu ta cuví chi tari cha ña ndichin nyehe ñu. Ta cuiñi ñu soco ma cutuñi iñi ñu, tari cha ña chiñi ñu cuví cuan.

¹⁴ Ta tyicuan caa ta chinó cava tuhun cha cahan ra Isaías ra profeta Nyoo ta cha ñaha, ta catyí ra:

Cha ndicha vatyi nyoho cuiñi ndo tuhun, soco ma cutuñi iñi ndo.

Ta cunyehe ndo cha sacuví, ta ma cutuñi iñi ndo.

¹⁵ Vatyi cha ndundava ña ñáyivi ihya, ta ña cachi vaha chiñi ñu.

Ta tahán nuu ñu,

Tacuhva cha ma nyehe ñu chihin chiti nuu ñu.

Ta ma cuiñi ñu chihin soho ñu.

Ta ni ma cutuñi iñi ñu chihin ña ña ñu.

Ta ni ma nanducu ñu chii, tacuhva sanduvahi chi ñu.

¹⁶ 'Soco si xaan cuví chi nyoho, vatyi nyehé ndo chihin chiti nuu ndo, ta chiñi ndo chihin soho ndo.

¹⁷ Cha ndicha catyí chi ndo, vatyi cuaha ra cacuvi profeta Nyoo ta cuaha ñáyivi vaha, cacuñi ñu nyehe ñu cha nyehé nyoho cha sacuví, soco ña nyehe ñu. Cuñi ñu cuiñi ñu tandihi tuhun cha chiñi nyoho vityin, soco ña chiñi ñu.

Nu catyí ra Jesús ñáá cha cuñi chi catyi cuhva cha cahan ra

(Mr. 4.13-20; Lc. 8.11-15)

¹⁸ 'Tyasocho ndo ñáá cha cuñi chi catyi noo cuhva cha catyi chi ndo tuhun ra cha tachí chiti trigu cuan:

¹⁹ Ñáyivi cha chiñi tuhun yoso caa cuñi Nyoo cunyaca ñaha ra ña ña ñu, ta ña cutuñi iñi ñu, tari nu canacoyo chiti yuhu ityi, tyicuan caa cuví ñu. Vatyi quichí cuhna ta tava ra tuhun Nyoo cha caa ña ñu.

²⁰ Ta tari nu canacoyo chiti ticu yuu cuan, tyicuan caa cuví tucu ñáyivi cha chiñi tuhun Nyoo, ta si xaan cuví chi ñu naquehen cuenda ñu noo ri cuhva.

21 Vatyí nu caña chiti tucu yuu cuan, chiin ri ñuhú yihí chaha. Yucuan chaha caña soco ña cuví tyihi yoho chi. Ta tyicuan caa ñu cuan. Suhva ri quiví chinó iñi ñu. Soco quiví cha quichaha nyehe ñu tindoho, ta satasi iñi ñáyiví chi ñu cha cuenda tuhun Nyoo ta sandihí ri ñu tuhun cha chinó iñi ñu.

22 Ta tari nu canacoyo chiti chichi iñu cuan, tyicuan caa cuví tucu inga ñu cha chiñí tuhun Nyoo. Chiñí ñu, soco ña cuñí ñu sacuví ñu tari cuhva chiñí ñu. Vatyí nyaá xaan ca xiñi ñu tuhun tindoho ñáyiví ican saha tuhun Nyoo. Ta nyiyo ca iñi ñu cha tyayí. Ta tandihí tuhun cuan sayanga chi chi ñu, ta ña chahá nanducu vaha ñu chi Nyoo.

23 Soco tari nu canacava chiti nu ñuhu vaha, tyicuan caa cuví ñu chiñí tuhun Nyoo, ta cutuñí iñi ñu, ta sacuví ñu tandihí tuhun cahán ra. Yihí ñu cuví ñu tari yutun cha chaha noo cientu chiti, ta inga ñu tari yutun cha chaha uñi xico, o tari yutun cha chahá oco uchi chiti noo noo tun.

Nu catyí ra Jesús yoso caa cuahan tuhun trigu ta cuhu ña vaha

24 Ta chaha tucu ra Jesús inga cuhva ihya chi ñu; ta catyí ra:

—Cha nyacá ñaha Nyoo aña ñáyiví cuví chi tari noo ra cha tachí chiti trigu nu noo ñuhú.

25 Soco cuhva cha caquixí tandihí ra casahá tyiño cuan, quihví noo ra xaan iñi chi ra, ta tachí ra chiti cuhu ña vaha, ta cuahan ra.

26 Ta quiví caña chiti trigu cuan, ta caña yoco chi, ta yucuan na tuvi tucu cuhu ña vaha cuan.

27 Tyicuan ta ra cacuví musu, cachahan ra chicatyí ra chi chitoho ra: “Tata, tatu maa maa ri maa chiti trigu tachun, ¿nya quitá cuhu ña vaha cuan?” cacatyí ra.

28 Ta nacahan ra cuan ta catyí ra: “Iyó noo ra xaan iñi chi yo tachí.” Tyicuan ta musu cuan, catyí ra chi chitoho ra: “¿Atu cuñún cha cuhun ndi ta tohon ndi cuhu ña vaha cuan?”

29 Soco chitoho ra catyí ra: “Ma tohon ndo, coto cuhva cha tohon ndo cuhu ña vaha cuan, ta coyo ndihí trigu cuan.

30 Saña ndo, na cuahnu maa chi iin ri chihin trigu cuan, tyicuan ta quiví cunicoñehi tyiño sahi, cutachi chi ra casaha tyiño cutohon xihna ca ra cuhu ña vaha cuan ta cuhñi ra cuenda sucun, vatyí cahmi ra. Ta yaha cuan ta canaquehen vaha ra cha vaha cuan chichi yaque.”

Nu catyí ra Jesús vatyí tari chiti mostaza cuví cha nyacá ñaha Nyoo aña yo

(Mr. 4.30-32; Lc. 13.18-19)

31 Tyicuan ta catyí tucu ra Jesús inga cuhva ihya chi ñu:

—Cha nyacá ñaha Nyoo aña ñáyiví cuví chi tari noo chiti yutun cha nañí mostaza cha tachí noo ra nu ñuhú ra.

32 Vatyí ican chiti cuan cuví cha luhlu ca ican saha tandihí ca chiti. Soco quiví chahnu tun cuví tun noo yutun cahnu vavaha. Ta quichí coyo saa, ta casavahá ti taca ti nuu tun —catyí ra Jesús.

Nu catyí ra Jesús vatyí tari yuchan iya cuví cha nyacá ñaha Nyoo aña ñáyiví

(Lc. 13.20-21)

33 Ta catyí tucu ra Jesús inga cuhva ihya:

—Cha nyacá ñaha Nyoo aña ñáyiví cuví chi tari yuchan iya cha nasaca noo ñaha chihin uñi cuhva yutyí pan. Vatyí tari ndaa tandihí pan cuan chihin yuchan iya cuan, tyicuan caa cuahan nducuaaha ca ñu nyacá ñaha Nyoo aña —catyí ra.

Yoso caa chotyíño ra Jesús noo cuhva cha cahán ra

(Mr. 4.33-34)

34 Tandihí tuhun ihya cahan ra Jesús chihin ñáyiví chihin cuhva ri. Ta tandihí tuhun cha catyí ra chi ñu soco maa maa ri chihin noo cuhva ri.

35 Tyehe caa sacuví ra tacuhva chino cava tuhun cha cahán ra profeta ta cha naha ta tyaa ra tyehe caa:

Chihin *cuhva* ri *cucahin* *chihin* *ñáyiví*.

Cucatyí *chi* ñu *tuhun* *cha* ñohó *xehe* *nyata* *savahá* Nyoo ñuhu *ñáyiví*.

Nu catyí ra Jesús ñáá cha cuñí chi catyí tuhun cuhu ña vaha cha cañá mahñu chiti trigu cuan

³⁶ Tyicuan ta *sacunuhu* ra Jesús *chi* *ñáyiví*, ta *ndihví* ra *chichi* *vehe*. Ta *catuhva* ra *cachicá* noo *chihin* ra *chi* ra, ta *catyí* ra *chi* ra:

—Nacatyí *chi* *ndi* ñáá *cha* *cuñí* *chi* *catyí* *tuhun* *cha* *cañá* *cuhu* *ña* *vaha* *cuan* *nu* *ñuhu* *cuan*.

³⁷ Tyicuan ta *quichaha* *catyí* ra Jesús *chi* ra:

—Ra *cha* *tachí* *chiti* *trigu* *cuan* *ican* *cuví* *yuhu* *Rayí* *cha* *quichí* *nya* *gloria*.

³⁸ Ta *ñuhú* *cuan*, *ican* *cuví* *añima* *ñáyiví* *iyó* *siquí* *ñuhu* *ñáyiví*. Ta *chiti* *trigu* *cuan* *ican* *cuñí* *chi* *catyí* *ñáyiví* *cha* *nyicón* *chi* *Nyoo*, ta *chiti* *cuhu* *ña* *vaha* *cuan* *cuñí* *chi* *catyí* *ñáyiví* *cha* *nyacuví* *cuhva* *cuñí* ra *ña* *vaha*.

³⁹ Ra *cha* *tachí* *cuhu* *ña* *vaha* *cuan*, *ican* *cuví* *cuihna* ra *xaan* *iñi* *chi* *Nyoo*. Ta *quíví* *cunacoñehe* ra *tyiño* *saha* ra, *ican* *cuví* *quíví* *cucunaa* *ñuhu* *ñáyiví*. Ta ra *cha* *cunacoñehe* *chiti* *cuan*, *ican* *cuví* ra *cacuví* *ángel*.

⁴⁰ Tari *nasataca* ra *cuhu* *ña* *vaha* *cuan* *vatyí* *cayu* *chi*, *tyicuan* *caa* *cucuví* *quíví* *naa* *ñáyiví*.

⁴¹ Yuhu *Rayí* *cha* *quichi* *nya* *gloria* *cutachi* *chi* *ángel* *cunasataca* ra *chi* *ñu* *sacoo* *cuatyí* *inga* *ñu*, ta *ñu* *cha* *sacuví* *cha* *ña* *vaha*.

⁴² Ta *cutyíhi* ra *chi* *ñu* *chichi* *horno* *nu* *cayú* *ñuhu*. Ta *cucuacu* *ñu* ta *cusacahñi* *ñu* *noho* *ñu*.

⁴³ Ta *ñu* *cha* *sacuví* *cuhva* *cuñí* *Nyoo* *cutuvi* *ñu* *nuu* *Nyoo* *Sutu* *yo*. Ta *tari* *cha* *ndichin* *ñanyii*, *tyicuan* *caa* *cucuví* *ñu*. *Tatu* *cutuñí* *iñi* *ndo*, *tyasoho* *ndo* *tuhun* *cahín*.

Noo xuhun cuaan cha ñohó xehe

⁴⁴ Cha *nyacá* *ñaha* *Nyoo* *añima* *ñáyiví* *cuví* *chi* *tari* *noo* *xuhun* *cuaan* *ñohó* *xehe* *chichi* *ñuhú*. Ta *noo* ra *nañihí* *xuhun* *cuaan* *cuan*, *soco* *natyihí* *xehe* *tucu* ra *inga* *chaha* ta *sii* *xaan* *cuñí* ra *cuanuhu* ra ta *xico* ra *tandihí*

cha *iyó* *chi* ra, ta *sata* ra *ñuhu* *nu* *ñohó* *xehe* *xuhun* *cuaan* *cuan*.

Noo cuhva cha cahan ra Jesús cuenda noo perla cha yahvi xaan nyaá

⁴⁵ Ta *cha* *nyacá* *ñaha* *Nyoo* *añima* *ñáyiví*, *cuví* *tucu* *chi* *tari* *noo* ra *sata* ta *naxicó* *perla* *finu*.

⁴⁶ Ta *cuhva* *cha* *ñihí* ra *noo* *cha* *yahví* *vavaha* *nyaá*, ta *xico* ra *ndii* *maa* *cha* *cumí* ra, ta *sata* ra *perla* *vaha* *cuan*.

Nu sañahá ra Jesús noo cuhva cuenda tarraya

⁴⁷ Ta *suri* *cuví* *tucu* *cha* *nyacá* *ñaha* *Nyoo* *añima* *ñáyiví* *tari* *tarraya* *cha* *cañí* ra *nu* *tyañuhu*, ta *ñihi* ra *ndihi* *nuu* *tiyaca* *chihin*.

⁴⁸ Ta *cuhva* *cha* *chitu* *tarraya* *cuan* *chihin* *tiyaca*, *catava* ra *ityi* *nu* *ñiti*, ta *yucuan* *canacachí* ra *chi* *ti*, *canaquehen* *vaha* ra *chi* *quiti* *vaha* *chichi* *noo* *tica*, ta *sacuita* ra *chi* *quiti* *ña* *vaha* *cuan*.

⁴⁹ Ta *tyicuan* *caa* *cucuví* *quíví* *naa* *ñáyiví*, *cuquichi* *coyo* *ángel*, *quichi* *tava* *sín* ra *chi* *ñu* *vaha* ta *ñu* *ña* *vaha*.

⁵⁰ Ta *cutyíhi* ra *chi* *ñu* *ña* *vaha* *cuan* *chichi* *anyaya* *nu* *cayú* *ñuhu*, *nu* *cucuacu* *ñu* ta *cusacahñi* *ñu* *noho* *ñu*.

Nu sañahá chi vatyí vaha tuhun chahnu ta tuhun chaa Nyoo

⁵¹ Tyicuan ta ra Jesús *ndaca* *tuhun* ra *chi* ra *cachicá* *noo* *chihin* ra, ta *catyí* ra:

—¿Atu *cutuñí* *iñi* *ndo* *tandihí* *tuhun* *ihya*?

Ta *nacahan* ra ta *cacatyí* ra:

—Ay, *Sutu* *Mañi* *yuhu*. *Cutuñí* *iñi* *ndi*.

⁵² Tyicuan ta *catyí* ra Jesús *chi* ra:

—*Tatu* *noo* ra *sacuahá* *cuenda* *ley* *vehe* *ñuhu*, ta *cutuhva* ra *tuhun* *yoso* *caa* *nyacá* *naha* *Nyoo* *añima* *ñáyiví*, *cumí* ra *cha* *vaha* *tuhun* *chahnu* *Nyoo*, ta *cumí* *tucu* ra *tuhun* *chaa* *cha* *sañahí*. Ta *cuví* ra *tari* *noo* ra *cuví* *nuu*, ra *chitó* ta *sañahá* ra *tuhun* *chahnu* ta *tuhun* *chaa* *cha* *sañahí* —*catyí* ra Jesús.

Nu ñohó ra Jesús Nazaret ñuu nu chahnu ra

(Mr. 6.1-6; Lc. 4.16-30)

⁵³ Ndihi cahan ra Jesús cuhva ihya ta cuahan ra.

⁵⁴ Ta nachaa ra ñuu ra. Ta yucuan quichaha sañaha ra chichi vehe ñuhu ñuu cuan. Ta iyo cuñi ñáyivi ta catyi ñu:

—¿Nya maa maa cutuhva ra ihya cha chiñi tuñi xaan ra? ¿Ta yoso caa cuví sacuvi ra milagru?

⁵⁵ Vatyí sehe ra satyá vitu cuan cuví chi ra. Ta cu María cuví sihi ra. Ta yañi ra cuví chi ra Jacobo, ta ra José, ta ra Simón ta ra Judas.

⁵⁶ Ta cuhva ra ñandihí, iyó ñu ityi nu iyó yo. Tu tyicuan caa, ¿nya maa maa cutuhva ra tandihí tuhun ihya? —catyi ñu.

⁵⁷ Ta yucuan chaha ña cuñi ñu quichaha ñu chi ra. Soco ra Jesús catyi ra chi ñu:

—Tandihí ñáyivi tandihí ri ityi sahá ñu ñáyivi chi ra profeta. Soco ña quichahá ñu chi ra tatu ra ñuu ñu, o ra vehe ñu cuví chi ra —catyi ra.

⁵⁸ Ta ña cuaha milagru sacuvi ra yucuan cha cuenda vatyí ña chinó iñi ñu chi ra.

14

Nu catyi chi yoso caa chihí ra Juan ra sacondutyá

(Mr. 6.14-29; Lc. 9.7-9)

¹ Quivi cuan ra Herodes, ra cuví gobiernu nicahnu nu cuví Galilea, ñihi ra tuhun ra Jesús.

² Ta catyi ra chi ra nyicú chihin ra:

—Ican ra cuan cuví ra Juan ra sacondutyá chi ñáyivi, ra cha chihí ta vityin nandoto ra. Yucuan chaha iyó tunyee iñi chi ra cha sacuvi ra milagru.

³⁻⁴ Tyicuan caa catyi ra vatyí suri maa ra tyihí tyiño ta catiñ ra chi ra Juan. Ta chahñi ra chi ra chihin cadena, ta tyihi ra chi ra vehe caa. Tyicuan caa sacuvi ra tyi xaan cuñi ra tyi catyi ra Juan tyi ña vaha cha nyaá ra chihin cu Herodías cha cuví ña ñasihí yañi ra ra Felipe.

⁵ Ta yucuan chaha, ra Herodes, cuñi ra cahñi ra chi ra Juan, soco yuhvi ra chi ñáyivi, vatyí tandihí ñu

chinó iñi ñu tyi ra Juan cuenda Nyoo cahán ra.

⁶ Soco noo quivi cha vico ra Herodes, ta quichahá chita chaha sehe cu Herodías nu nyicú ñu vico cuan. Ta tahañ xaan iñi ra Herodes.

⁷ Ta tyaa ra cuhva vatyí cuhva ra ñáá ri cha cacan ñaha tyivaa cuan, ta ma nacahnu ra tuhun cahan ra.

⁸ Tyicuan ta tyiyuhu sihi ña chi ña, na catyi ña chi ra Herodes tyehé caa:

—Cuhva xiñi ra Juan ra sacondutyá ñáyivi chii nu noo coho —catyi ña.

⁹ Cha chiñi rey Herodes tuhun cahan ña, nducuihya cuñi ra. Soco cha cuenda cha tyaa ra cuhva vatyí cuhva ra ñáá ri cha cacan ña nuu ñu canyicú vico cuan ta ma cuví nacahnu ra, yucuan chaha tachí ra nacuhva ra xiñi ra Juan chi ña.

¹⁰ Ta tachí ra tyiño na cutahnya sucun ra Juan nu ñohó ra vehe caa.

¹¹ Tyicuan ta caquichí nyaca ra xiñi ra, yihí noo nu coho. Ta cachahá ra chi ñaha tyivaa cuan. Ta maa ña nacuhva cuenda ña chi sihi ña.

¹² Tyicuan ta chaá coyo ra canyicon chi ra Juan ta canaquehen ra coño ñuhu ra, ta catyihí ra chichi ñuhu. Ta yaha cuan ta chahan coyo ra chisacoto ra chi ra Jesús.

Nu chahá ra Jesús cha cachi ohon mil rayi

(Mr. 6.30-44; Lc. 9.10-17; Jn. 6.1-14)

¹³ Cha chito ra Jesús tuhun ihya, quehen ra noo canoa, ta cuahan noo tuhun ri maa ra noo nu taxi ri iyó. Soco chito ri ñáyivi, ta quitá coyo ñu ñuu ñu, ta cuahan coyo ñu chata ra ityi nu ñuhú.

¹⁴ Cha quitá ra Jesús chichi canoa cuan, nanyehé ra cuaha xaan ñáyivi. Ta cundahvi xaan cuñi ra nyehé ra chi ñu. Ta sanduvahá ra chi ñu cuhvi cha chaá chihin ñu.

¹⁵ Ta vatyí cha cua cuaá, ra cachicá noo chihin ra Jesús chaá coyo ra, ta catyi ra chi ra:

—Cha iñi xaan, ta yori ñáyivi iyó yatyin ri ihya. Yucuan cuenda natchi chi ñáyivi ihya na cunuhu

coyo ñu nya ñuu cusata ñu cha cachi ñu —cacatyí ra chi ra Jesús.

16 Ta ra Jesús catyí ra:

—Ña tahan chi cuhun ñu. Cuhva maa ndo cha cachi ñu.

17 Ta nacahan ra ta cacatyí ra:

—Noo tuhun ohon tahan sin pan ta uvi tahan sin tiyaca cumí ndi.

18 Ta catyí ra Jesús:

—Nyaca ndo chii.

19 Tyicuan ta tachí ra tyiño na cun-
yicu ñáyivi nu cuhu cuan. Yahá cuan
ta quehen ra ohon tahan pan cuan,
ta ni nduvi tiyaca cuan. Ta nanyehe
ndaa ra andivi, ta nacuhva ra tyahvi
nyoo chi Nyoo ta tahvi ra pan cuan.
Ta chahá ra chi ra cachicá noo chihin
ra, na casacha ra chi ñáyivi cuan.

20 Ta tandihi ñu cachachi ñu ta
ndaha iñi ñu. Yahá cuan ta canasat-
aca ra yiquin cha ndoo. Ta quita uchi
uvi tahan tica.

21 Ta cha tandihi ñu cachachi cuan,
quita ta cha ohon mil cha maa ri maa
rayi. Ta ña quihvi cuenda ñusihí ni ra
cuatyaa.

*Nu chicá ra Jesús nu ndutya
(Mr. 6.45-52; Jn. 6.16-21)*

22 Ta cha yaha tuhun cuan ta catyí
ra Jesús chi ra cachicá noo chihin ra,
na quihvi coyo ra chichi canoa, vatyí
cayaha sava ra miñi cuan ta cuhun
coyo ra inga chiyo. Ta niri ca cha
cuahan coyo ra cuan, ra Jesús ndoo ra
natachi ra chi ñáyivi na cuhun coyo
ñu.

23 Cha yahá cha natachi ra chi ñu
cuan, ta ndaa ra yucu cuan cua cacan
tahvi noo tuhun ri maa ra chi Nyoo.
Ta yucuan ñohó ra ta cuaa ndihi.

24 Ta cha niri ca cha chicán tahvi ra
cha cuahan vavaha canoa cuan nya
mahñu miñi. Ta ndutya miñi cuan
cañí chi chi canoa cuan cha cuenda
vatyi ñihi xaan caá tatyí nu cuahan
coyo ra.

25 Ta cuhva cha ñaa ca cuan cua
tuhva ra Jesús nu cuahan coyo ra
chihin canoa cuan suri chicá ra nu
ndutya.

26 Ta cuhva cha cananyehe ra
chi ra, chicá ra nu ndutya cuan,

canayuhvi xaan ra. Ta cacana chaa
vavaha ra, ta catyí ra:

—¡Noo cha sayuhvi cuví!

27 Soco nacahan ra Jesús chihin ra,
ta catyí ra:

—¡Saníi ndo iñi ndo, yuhu cuví, ma
yuhvi ndo! —catyí ra.

28 Tyicuan ta nacahan ra Pedro ta
catyí ra:

—Sutu Mañi yuhu, tatu icon cuvún,
catyi na quichi yuhu nu ndutya chiña
nyacua nya nu vachun.

29 Ta ra Jesús catyí ra chi ra:

—Ñaha.

Tyicuan ta noo ra Pedro nu canoa
cuan, ta quichahá chica ra nu ndutya
vatyi cuhun ra nu vachi ra Jesús.

30 Soco cuhva cha tuví iñi ra tyi ñihi
xaan fuerza tatyí cuan, nayuhvi ra ta
quichaha nducu nyee ra, ta quichaha
cana chaa ra ta catyí ra:

—¡Sacacu chii, Sutu Mañi yuhu!

31 Ta caa cuhva ri cuan, ta tñin ra
Jesús ndaha ra, ta catyí ra chi ra:

—¡Chiin xaan chinó iñun chii! ¿Ñáá
tuhun cha nacaca uvi iñun? —catyí ra
Jesús chi ra.

32 Ta cuhva cha ndaa coyo ra nu
canao cuan, cutaxin ri tatyí cuan.

33 Tyicuan ta ra cañohó chichi
canao cuan cachicuiñi chiti ra nuu ra
Jesús, ta cacatyí ra chi ra:

—Ndicha ndicha cuii vatyi Sehe
Nyoo cuví chuun —cacatyí ra.

*Nu sanduvahá ra Jesús chi ñu cuhvi
ñuu cha nyicú nicacahnu Genesaret
(Mr. 6.53-56)*

34 Cha cayahá sava ra miñi cuan,
cachaá coyo ra nu cuví Genesaret.

35 Ta cuhva cha canicohon nuu
ñáyivi iyó yucuan chi ra Jesús, sacoto
ñu chi tandihi ñáyivi ityi cuan. Ta
quichi nyaca ñu tandihi ñu cuhvi nu
nyaá ra.

36 Ta chacú ndahvi ñu nuu ra, na
cuhva ra tñin ñu vasi chiin sahma ra.
Ta tandihi ñu tñin sahma ra, nduvahá
ñu.

15

Nu sañahá chi ñáá cha sativí chi ñáyiví

(Mr. 7.1-23)

¹ Tyicuan ta suhva ra cacuví fariseo ta ra casacuaha ley vehe ñuhu quita coyo ra Jerusalén. Ta chaꝥ coyo ra nu nyaá ra Jesús ta candacá tuhun ra chi ra, ta catyí ra:

² —¿Ñáá tuhun cha ña sacuví ra cachicá noo chuhun costumbre cha sañahá ra cacuví mandoñi ñuu yo? Vatyí ña canacatyá ra ndaha ra tari cuhva cha tahán chi, tatu cuacachi ra xita —cacatyí ra.

³ Soco ndacá tuhun ra Jesús chi ra, ta catyí ra:

—¿Ñáá tuhun cha ña quichahá tucu nyoho tuhun cahán Nyoo ta ñihi xaan ca quichaha ndo costumbre maa ndo?

⁴ Vatyí Nyoo catyí ra: “Saha ndo ñáyiví chi sutu ndo ta chi sihi ndo. Ta tandihí ñu cha cahán ña vaha chi sutu o chi sihi, na cúvi ñu”, catyí Nyoo.

⁵ Soco nyoho catyí ndo tyi noo ñáyiví cuví catyí ñu chi sutu ñu o chi sihi ñu tyehe caa: “Ma cuví tyinyei chuun vatyí tandihí cha iyó chii cha yahá chahá cuende chi Nyoo.”

⁶ Ta tatu cha catyí ndo tyicuan caa, ña cuñí ca chi cha tyinyee ca ndo chi sutu ndo o chi sihi ndo, catyí ndo. Ta tyicuan caa sacuachiyó xiin ndo tuhun cha catyí Nyoo tyi sacuvi ndo, vatyí cuñí ndo sacuvi maa ndo cuhva costumbre maa ndo.

⁷ ¡Nyoho cha sahá ndo tyi vaha ndo! Ndicha vaha tuhun cha tyaꝥ ra Isaías, ra profeta Nyoo ta cha naha nu catyí Nyoo tuhun ndo tyehe caa:

⁸ Ñáyiví ihya, chihin yuhu ri ñu catyí ñu tyi cuñí ñu chii.

Soco ñima chihin tandihí aña ñu, tyi sñn nu nyaá xiñi ñu.

⁹ Ta ñahri maa tuhun cha sacahnú ñu chii.

Vatyí cha sañahá ñu maa maa ri cuhva sañahá ñáyiví ri cuví, tyehe caa tyaꝥ ra Isaías tuhun ndo, catyí ra Jesús.

¹⁰ Tyicuan ta caná ra chi ñáyiví ta catyí ra chi ñu:

—Tyasoho ndo, ta cutuñi iñi ndo tuhun cahín.

¹¹ Vatyí cha quihví yuhu ñáyiví, ñima cuan sativí chi ñu nuu Nyoo. Soco cha quitá yuhu ñu, ican cuan sativí chi ñu.

¹² Tyicuan ta catuhvꝥ ra cachicá noo chihin ra Jesús ta candacá tuhun ra chi ra, ta catyí ra:

—¿Atu chitón vatyí ra fariseo quiñi xaan cuñí ra cha cachiñi ra tuhun cahún?

¹³ Soco maa ra Jesús nacahan ra:

—Tandihí yutun cha ña tachí Suti, ra nyaá andiví, cucoyo tun nya yoho tun.

¹⁴ Saña ndo chi ra vatyí ra cuaa cacuví ra, ta casañahá ra ityi chi inga ra cuaa. Ta tatu noo ra cuaa ta sañahá ra ityi chi inga ra cuaa, ni nduvi ra cucanacoyo ra chichi noo yavi.

¹⁵ Tyicuan ta quichaha catyí ra Pedro chi ra Jesús:

—Nacatyí chi ndi ñáá cha cuñí chi catyí cuhva cha cahun cuan.

¹⁶ Tyicuan ta ra Jesús catyí ra chi ra:

—¿Atu ni nyoho ta ña cutuñi iñi ndo?

¹⁷ ¿Atu ña cutuñí iñi ndo vatyí cha quihví ityi yuhu yo, chichi yo cuahan? Yahá cuan ta quita tucu.

¹⁸ Soco tuhun cha quitá yuhu yo, chichi aña yo quitá, ta ican cuan cuví cha sativí chi ñáyiví nuu Nyoo.

¹⁹ Vatyí nya chichi aña ñu quitá cha quiñi caá chicá xiñi ñu. Ta cuñun, cha chahñi ñu chi ñáyiví, cha quichi cuví iñi ñu coo ñu chihin inga ñu cha ñima ñasihí ñu cuví. Ta tandihí ca cha quiñi caa cha sacuvi ñu chihin coño ñuhu ñu. O yihí ñu cha suhu ñu cha chii ñáyiví. O sandaví ñaha ñu. O cahán ndasi ñu.

²⁰ Ican cuan cuví cha sativí chi ñáyiví. Soco cha ma sacuvi ñu costumbre cha nacatyá xaan ñu ndaha ñu cha ni cumañi ca cachi ñu, ña sativí cuan chi ñu —catyí ra Jesús.

Nu naching_ iñi noo ñaha inga ñuu chi ra Jesús

(Mr. 7.24-30)

²¹ Quita ra Jesús ñuu cuan ta cuahan ra ityi ñuu Tiro ta ñuu Sidón.

²² Ta noo ñaha ñuu Canaan iyó ña ityi cuan, suri caná chaa ña vachi ña nu vachi ra Jesús, ta catyí ña:

—Sutu Mañi yuhu, ra vachi tata rey David cuvún. Cundahvi cuñi nyehun chii, vatyí sehi yihí noo tatyí ña vaha chi ña, ta nyehé xaan ña tindoho —catyí ña.

²³ Soco ra Jesús ña nacahan ra nu cahán ña. Tyicuan ta tuhva ra cachicá noo chihin ra chi ra ta cachacu ndahvi ra nuu ra ta catyí ra chi ra:

—Catyí chi ña na cunuhu ña vatyí caná chaa xaan ña vachi ña chata yo.

²⁴ Tyicuan ta catyí ra Jesús chi ra:

—Nyoo noo ri nu tachí ra chii, cuenda mbee cha cuanaa. Ta mbee cuan ican cuví ñu ñuu Israel.

²⁵ Soco ñaha cuan tuhva ña ta chicuñi chiti ña nuu ra ta catyí ña chi ra:

—Sutu Mañi yuhu, ¡tyinyee chii!

²⁶ Ta ra Jesús catyí ra chi ña:

—Ña vaha cha tinyaa yo pan yuhu sehe yo ta cuhva yo cachi ina —catyí ra chi ña.

²⁷ Soco maa ña ña quichaha ña ta catyí ña chi ra:

—Ndicha, Sutu Mañi yuhu. Soco nyacua nya ina ta chachí ti yiquin cha canacoyo nu mesa chitoho ti —catyí ña.

²⁸ Tyicuan ta catyí ra Jesús chi ña:

—Sihi ¡ñana cha chinó xaan iñun chii! Cua sacuvi tari cuhva cuñún.

Ta caa cuhva ri cuan ta nduvaha sehe ña.

Nu sanduvaha ra Jesús cuaha ñu cuhvi

²⁹ Quita ra Jesús yucuan ta yaha ra yuhu miñi Galilea, ta ndaa ra noo yucu ta chicunyaa ra yucuan.

³⁰ Ta cuaha ñáyivi chaa coyo nu nyaá ra ta quichi nyaca ñu cuaha ñu cuhvi: ñu coxo, ñu cuaa, ñu luu, ñu ñihi. Ta cuaha ca ñu cuhvi quichi nyaca ñu nu nyaá ra. Ta chacun ñu

chi ñu nuu ra, ta maa ra sanduvaha ra chi ñu.

³¹ Ta iyo cuñi ñáyivi nyehé ñu yoso caa nacahan ñu ñihi ta yoso caa nduvaha ñu luu, ta yoso caa nacacá ñu coxo, ta yoso caa nanyehé ñu cuaa. Ta quichaha casacahnu ñu chi ra cuví Nyoo cuenda ñu, ñu Israel.

Nu chahá ra Jesús cha cachi cumi mil rayi

(Mr. 8.1-10)

³² Tyicuan ta cana ra Jesús chi ra cachicá noo chihin ra, ta catyí ra chi ra:

—Ndahvi xaan cuñi nyehi chi ñáyivi ihya, vatyí cha uñi quivi nyicú ñu ihya chihin, ta ñahri maa cha cachi ñu nyisó ñu. Ta ña cuñi natachi chi ñu nya vehe ñu vatyí ta cachi ca ñu, coto coñaa ñu ityi cunuhu ñu —catyí ra Jesús.

³³ Tyicuan ta ra cachicá noo chihin ra cacatyí ra chi ra:

—Soco ¿nya cuquehen yo cha cachi ñáyivi cuaha ihya, nu yori maa ñáyivi iyó ihya?

³⁴ Tyicuan ta ra Jesús ndaca tuhun ra chi ra:

—¿Yoso tahan pan cumí ndo?

Ta maa ra catyí ra:

—Ucha tahan pan, ta uvi tahan tiyaca nyihi ri.

³⁵ Tyicuan ta tachí ra na cunyicu ñáyivi cuan nu ñuhú.

³⁶ Tyicuan ta quehen ra ndi ucha pan cuan ta tiyaca cuan, ta nacuhva ra tyahvi nyoo chi Nyoo. Tyicuan ta tahvi ra ta chaha ra chi ra cachicá noo chihin ra, ta maa ra cachicá noo chihin ra canasacha ra chi ñáyivi.

³⁷ Tandihí ñu chachi ñu, ta chitu chichi ñu. Ta yaha cuan casacutu ra ucha tica chihin yiquin cha ndoo cuan.

³⁸ Cumi mil rayi cachachi, ta ña quihvi cuenda ñusihi ni ri ra cuatyaa.

³⁹ Yaha cuan ta sacunuhu ra chi ñáyivi, ta quihvi ra nu canoa, ta cuahan ra ityi nu cuví Magdala.

16

Ra fariseo ta ra saduceo cachicán ra chi ra Jesús na sacuvi ra noo milagru

(Mr. 8.11-13; Lc. 12.54-56)

¹ Tyicuan ta ra fariseo ta ra saduceo chahan coyo ra nu nyaá ra Jesús. Vatyí cacuñí ra nducu nyehe ra chi ra yucuan chaha chicán ra na sacuvi ra noo milagru chihin tunyee iñi Nyoo.

² Soco nacahan ra Jesús ta catyí ra chi ra:

—Cha cha iñi cuhva cha cuaa quee ñanyii, tuhvá ndo catyí ndo: “Vaha xaan cucuvi quiví tyaan, vatyí tyaquí xaan cuaha andiví.”

³ Ta cha ñaha ri catyí ndo: “Vityin ña tyaquí maa cucuvi quiví vatyí cuaha ta iñi ñaa xaan andiví”, catyí ndo. Nyoho vaha xaan chitó ndo ¿yoso caa nacotó ndo tuhun vico andiví soco ña cuví nacoto ndo yoso caa cuahan tuhun cha sañahá Nyoo chi ndo vityin?

⁴ Ñáyiví iyó vityin, quiñi iyó ñu ta ña chinó iñi ñu chi Nyoo. Cuñí ñu nyehe ñu noo cha iyo. Soco ma cuhve nyehe ñu vatyí cha yahá sañahá Nyoo cha iyó cha sacuví ra chihin ra Jonás —catyí ra Jesús chi ra, ta sandoq ra chi ra, ta cuahan ra.

Tuhun cahán ra fariseo cuví chi tari yuchan iya

(Mr. 8.14-21)

⁵ Cuhva cha cayahá ra cachicá noo chihin ra Jesús inga chiyo miñi cuan, canaa iñi ra cacuiso ra pan.

⁶ Tyicuan ta catyí ra Jesús chi ra: —Saha ndo cuenda chi ndo chihin yuchan iya ra fariseo ta ra saduceo —catyí ra Jesús chi ra.

⁷ Tyicuan ta quichahá candatuhun ra chihin ra tahan ra ta catyí ra:

—Cha cuenda vatyí ñahri pan nyisó yo vachi, yucuan chaha catyí ra tyicuan caa chi yo —catyí ra.

⁸ Ta tuví iñi ra Jesús tuhun candatuhún ra, ta catyí ra chi ra:

—Nyoho, chiin xaan chinó iñi ndo chii. ¿Ñáá tuhun cha catyí ndo vatyí ñahri pan nyisó ndo?

⁹ ¿Atu ta cutuñi ca iñi ndo? ¿Atu ña nicohón iñi ndo quiví sacachi chi ndi ohon mil rayí chihin ohon tahan ri pan? Ta ¿yoso tahan tica sacutu ndo chihin yiquin cuan?

¹⁰ ¿Atu ña nicohón iñi ndo quiví sacachi chi cumi mil ca ra chihin ucha tahan pan? Ta ¿yoso tahan tica sacutu ndo chihin yiquin cuan?

¹¹ ¿Yoso caa cha ña tuví iñi nyoho vatyí ñima tuhun pan cahín, cuhva cha catyí vatyí na saha ndo cuenda chi ndo chihin yuchan iya ra fariseo ta ra saduceo? —catyí ra Jesús chi ra.

¹² Tyicuan ta cacutuñí iñi ra vatyí ñima tuhun yuchan iya pan cuan cahán ra, soco na casaha ra cuenda chi ra chihin tuhun cha casañahá ra fariseo ta ra saduceo.

Nu catyí cachi ra Pedro vatyí ra Jesús cuví Cristo ra cha quitá nu nyaá Nyoo

(Mr. 8.27-30; Lc. 9.18-21)

¹³ Cuhva cha chaá ra Jesús ityi ñuu Cesarea Filipo, ndaca tuhun ra chi ra cachicá noo chihin ra ta catyí ra:

—¿Ñáá catyí ñáyiví? ¿Yóó ra cuví Rayí cha quichi nya gloria? —catyí ra.

¹⁴ Ta canacahan ra ta catyí ra:

—Yihí ñu catyí ñu tyi ra Juan ra sacondutya chi ñáyiví cuvún. Ta inga ñu catyí ñu tyi ra Elías, ta yihí tucu ñu catyí ñu tyi ra Jeremías, o inga ra cuví profeta Nyoo ta cha naha.

¹⁵ Tyicuan ta catyí ra chi ra:

—Ta cha cuenda chi nyoho, ¿Yóó ra cuví yuhu?

¹⁶ Tyicuan ta nacahan ra Simón Pedro:

—Yoho cuvún ra Cristo, Sehe Nyoo nyitó —catyí ra.

¹⁷ Ta nacahan ra Jesús ta catyí ra:

—Sii xaan cuví chi yoho, Simón sehe ra Jonás, vatyí ni noo rayí ña sañahá ra chuun tuhun ihya, soco maa Suti ra nyaá andiví sañahá chuun.

¹⁸ Ta yuhu catyí chuun tyi yoho cuvún ra Pedro. Ta siquí cava ihya, savahí vehe ñuhi. Ta ma cuví chasaha tuhun chihi chi chi.

19 Yuhu cuhve ndaha ticu andiví nu nyacá ñaha Nyoo chuun. Ta cha cuhñun ihya siqui ñuhu ñayiví, cha nuhñi saha maa Nyoo nya andiví. Ta tandihí cha ndachun ihya siqui ñuhu ñayiví, cha ndachi maa Nyoo nya andiví.

20 Tyicuan ta catyí ra Jesús chi ra cachicá noo chihin ra tyi yori chihin cacahan ra tuhun vatyí ican ra cuví Cristo cha quitá nu nyaá Nyoo.

*Nu sacotó ra Jesús tyi cucúvi ra
(Mr. 8.31—9.1; Lc. 9.22-27)*

21 Nya ndaha quiví cuan quichaha catyí ra Jesús chi ra cachicá noo chihin ra, vatyí cuñí chi cha cuhun ra ñuu Jerusalén. Ta ra cacuví mandoñi, ta ra cacuví nuu chi tata sutu, ta ra sacuha ley vehe ñuhu, cucasanyehe xaan ra tindoho chi ra. Ta catyí tucu ra vatyí cucahñi ra chi ra soco nu cu uñi quiví ta cunandoto ra.

22 Tyicuan ta quehen ra Pedro chi ra ta quitá siñ ra chihin ra ta quichaha catyí ra chi ra Jesús vatyí ña vaha cha cahán ra ta catyí ra:

—Ña cuñí Nyoo ta cuvi chuun tyehe caa, Sutu Mañi yuhu.

23 Soco nanyocava ra Jesús, ta quichaha catyí ra chi ra Pedro:

—¡Canyaha chuun nui, cuihna! Vatyí cha cahún tyiña caa nducú sanacavon chii. Vatyí ña chicá xiñun cuhva chicá xiñi Nyoo. Soco cuhva chicá xiñi ñayiví chicá xiñun —catyí ra.

24 Tyicuan ta ra Jesús catyí ra chi ra cachicá noo chihin ra:

—Tatu nya nyoho cuñí ndo cunyon ndo chii, cuñí chi sanaa ndo iñi ndo tuhun maa ndo. Ta ma ndu uvi iñi ndo cha nyicón ndo chii, vasi nyehe ndo tindoho cha cuende vatyí yucuan cuví cruzi cha tahán chi cuiso ndo.

25 Vatyí nya nyoho ña cuñí ndo nyehe ndo tindoho cha cuenda yuhu, cucúvi ndo ta cuhun ndo anyaya. Soco nya ndo cuhva ndo ñayiví ndo cha cuende, cucacu aña ndo.

26 Vatyí ñáá ri tuhun cha saha ganaa ndo tandihí cha tyayí cha iyó

siqui ñuhu ñayiví tatu cunaa aña ndo. Vatyí ñahri chihin cutyiyahvi ndo ta cacu aña ndo.

27 Vatyí yuhu Rayí cha quichí nya gloria, cuquichi tiqui soco chihin cha cahnu cuví Suti, ta cuquichi coyo ángel chihin. Tyicuan ta cutyiyahvi chí noo noo ndo yoso cuhva sacuví ndo.

28 Cha ndicha catyí chi ndo, vatyí yihí nyoho cha nyicú ndo ihya cha ma cuví ñaha ndo nyacua nya nyehe ndo chi yuhu Rayí cha quichí nya gloria, cunyehe ndo yoso caa vachí cunyaca ñahi chi ndo —catyí ra Jesús.

17

*Nu sañahá Nyoo yoso caa ra Jesús
noo cha ndicha nu nyacá ñaha ra
(Mr. 9.2-13; Lc. 9.28-36)*

1 Iñu quiví cha yaha, ta quehen ra Jesús chi ra Pedro ta ra Jacobo, ta ra Juan yañi ra Jacobo. Ta cuahan coyo ra noo yucu sucun xaan chihin ra.

2 Ta yucuan nasama cuhva caa ra Jesús nuu ra ndihí chihin ra. Ta xiño vavaha nanduví nuu ra tari ñanyii. Ta sahama ra cuichin xaan nanduví tari maa ñuhú cuichin.

3 Tyicuan ta cananyehe ra chi ra Moisés ta ra Elías, candatuhún ra chihin ra.

4 Ta quichaha catyí ra Pedro chi ra Jesús:

—Sutu Mañi yuhu, vaha xaan cha nyicú ndi ihya. Tatu cuñún na savaha ndi uñi tahan vehe. Noo chuun, noo chí ra Moisés, ta nonga chí ra Elías —catyí ra Pedro chí ra Jesús.

5 Cha ni ri ca cha cahán ra Pedro, quichí ri noo vico cha xiño vavaha siqui ra. Ta sahvi cuan chí ra. Ta chichi vico cuan quitá noo ndusu cha catyí chí tyehe caa:

—Ican ra ihya cuví Sehi, ta cuñí xain chí ra. Ta siñ xaan cuñí chihin ra. Tyasoho ndo tuhun cahán ra —catyí ndusu cuan.

6 Cha cachiñi ra cachicá noo chihin ra Jesús tuhun cuan, cachicava ra nya ñuhu, ta cayuhvi xaan ra.

7 Tyicuan ta tuhva ra Jesús nu cayucú ra, ta tiñ ra chí ra, ta catyí ra:

—Ndicuita ndo. Ma yuhvi ndo.

⁸ Ta cuhva cha cananyehe ra, noo tuhun ri ca ra Jesús nanyaá, ta uvi ca ra cuan, yori ca ra.

⁹ Ta cuhva cha vachi noo coyo ra yucu cuan, catyí ra Jesús chi ra:

—Yori chihin cahan ndo tuhun cha nyehe ndo ihya. Cahan ndo tuhun soco nya yaha cúvi ta nandoto yuhu Rayi cha quichi nya gloria —catyí ra.

¹⁰ Tyicuan ta candaca tuhun ra cachicá noo chihin ra chi ra,

—¿Ñáá tuhun cha catyí ra casacuahá ley vehe ñuhu vatyí xihna ca ra Elías tahán chi quichi?

¹¹ Ta nacahan ra Jesús ta catyí ra:

—Cha ndicha vatyí xihna ca ra Elías quichi ta cusanduvaha ra tandihi.

¹² Soco yuhu catyí chi ndo vatyí cha yaha quichi ra Elías, soco ña nichon nuu ñáyivi chi ra, ta casacuvi ñu chihin ra tandihi cuhva cuñi maa ñu. Ta tyicuan caa tucu yuhu Rayi cha quichi nya gloria, cusanyehe ñu tindoho chii —catyí ra.

¹³ Tyicuan ta cacutuñi ñi ra vatyí tuhun ra Juan ra sacondutya cahán ra Jesús.

Nu sanduvaha ra Jesús chi noo ra tyivaa cha yihí noo tatyí ña vaha chi (Mr. 9.14-29; Lc. 9.37-43)

¹⁴ Cuhva cha cachaa coyo ra nu nyicú ñáyivi, tuhva noo ra ta chicuñi chiti ra nuu ra Jesús, ta catyí ra chi ra:

¹⁵ —Tata, cundahvi cuñi nyehun chi sehi, vatyí yihí noo cuehe chihitani chi ra, ta cuaha xaan tindoho nyehé ra chihin cuehe cuan. Ta cuaha xaan chaha nduva ra nu ñuhu ta cayu ra, ta nduva ra nu ndutya ñandihí.

¹⁶ Ta quichi nyaque chi ra chi ra cachicá noo chuhun, soco ña cuvi sanduvaha ra chi ra —catyí ra.

¹⁷ Ta nacahan ra Jesús ta catyí ra:

—¡Nyoho, ñu ña chinó ñi cuví ndo! ¡Ta nicaa ni quiñi iyó ndo! ¿Yoso tahan ca quivi cunyai chihin ndo ta cunyei tisihi ndo nyacua nya cutuhva ndo ta chino ñi ndo chii? Nyaca ndo chi ra tyivaa chiña tyehe —catyí ra.

¹⁸ Tyicuan ta tava ñehe ra Jesús chi tatyí ña vaha cuan, ta quita cuan chi ra tyivaa cuan. Ta caa cuhva ri cuan ta nduvaha ra.

¹⁹ Cha yaha cuan ta ndaca tuhun siin ra chicá noo chihin ra Jesús chi ra ta catyí ra:

—¿Ñáá tuhun cha ña cuvi tava nyuhu chi tatyí ña vaha cuan?

²⁰ Ta ra Jesús nacahan ra ta catyí ra:

—Cha cuenda cha chiin xaan chinó ñi ndo chii. Cha ndicha catyí chi ndo vatyí tyehe ta chinó ñi ndo chii, tari cuhva cha cahnu noo chiti mostaza, cuví catyí ndo chi yucu ihya na canyaha chi ta cuhun chi inga ityi, ta yucu ihya cuhun chi inga ityi. Ta ñahri cha ma cuvi sacuvi ndo tatu ndicha cha chinó ñi ndo chii.

²¹ Soco tahan tatyí ña vaha cuan, quita chi chihin cha ma cachi yo ta cacan tahvi yo —catyí ra Jesús chi ra.

Inga tucu chaha cahán ra Jesús tuhun yoso caa cucahñi ñáyivi chi ra (Mr. 9.30-32; Lc. 9.43-45)

²² Cha ni ri ca cha in ri cachicá noo ra ityi Galilea cuan, ra Jesús catyí ra chi ra cachicá noo chihin ra:

—Yuhu Rayi cha quichi nya gloria, cucuhva cuenda ñu chii chichi ndaha ra xaan ñi chii. Ta cucahñi ra chii.

²³ Soco nu cu uñi quivi ta cunandote —catyí ra.

Ta canducuihya xaan ñi ra cachicá noo chihin ra cha cachiñi ra tuhun cuan.

Nu catyiyahví ra cuenda vehe ñuhu cahnu

²⁴ Cuhva cha cha ra Jesús ta ra cachicá noo chihin ra ñuu Capernaum, ra catavá xuhun cuenda vehe ñuhu cuan, chahan coyo ra chinyehe ra nu nyaá ra Pedro ta candaca tuhun ra chi ra:

—¿Atu ña tyiyahví ra sacua chi nyoho xuhun cha tahán chi cuenda vehe ñuhu cahnu? —cacatyí ra chi ra Pedro.

²⁵ Ta nacahan ra Pedro ta catyí ra:

—Tyiyahví ra.

Cuhva cha quihvi ra Pedro chichi vehe nu ca iyó ra, xihna ca ra Jesús nacahan ra ta catyí ra:

—¿Yoso caa catyi tucu yoho vityin Simón? Ra cuví tyiño siqui ñuhu ñayivi ihya, ¿yóó chi caquehen ra yahvi? ¿Atu chi ñu ñuu maa ra o chi ñu inga ñuu?

²⁶ Nacahan ra Pedro ta catyí ra:

—Chi ñu inga ñuu.

Ta catyí ra Jesús chi ra:

—Tu tyicuan caa, ñu ñuu maa ra ña tahán chi tyiyahvi ñu.

²⁷ Soco tacuhva vatyí ma cuhva yo tisihi chi ni noo ra, cuahan miñi cuan, ta tyihun anzuelo, ta tiyaca cha tavon cha xihna ri, chichi yuhu ti cunañihun noo xuhun. Ta ñihi tyiyahvun cha cuende ta cha cuenda maun. Quehun ta cutiyahvun —catyí ra Jesús chi ra Pedro.

18

Nu sañahá ra Jesús yóó ra cha cahnu ca cucuvi nu nyacá ñaha Nyoo (Mr. 9.33-37; Lc. 9.46-48)

¹ Quivi cuan catuhva ra cachicá noo chihin ra Jesús chi ra, ta candaca tuhun ra chi ra:

—¿Nya ndi cahnu ca cuví nu nyacá ñaha Nyoo?

² Tyicuan ta ra Jesús cana ra chi noo ra cuehe luhlu, ta chinanya ra chi cue mahñu ra.

³ Ta catyí ra:

—Cha ndicha catyí chi ndo, vatyí tatu nyoho ta ma nasama ndo cuhva iyó ndo, ta tatu ma cuví ndo tari ra cutyaa, ma cuví quihvi ndo nu nyacá ñaha Nyoo. Vatyí ra cuatyaa chahá ndotyin cunyaca ñaha sutu ndotyin chi ndotyin, ta tyicuan caa cuhva ndo chi ndo cunyaca ñaha Nyoo chi ndo.

⁴ Ta tyicuan caa ra cahnu ca cuví nu Nyoo, ican cuví ñu ña cahnu sahá chi, ta cuví ñu tari ra cuehe luhlu ihya.

⁵ Ta ñáyivi cha natín cuenda chihin sivi chi noo ra ña cahnu sahá chi, tari ra cuehe luhlu ihya, chi yuhu natín cuenda ñu.

Nu sañahá ra Jesús chi yo yoso caa saha cuenda yo chi yo coto sacuvi yo cha ña vaha

(Mt. 5.29-30; Mr. 9.42-48; Lc. 17.1-2)

⁶ Tatu yóó ñu sanacavá nu cuatyí chi noo ra nachinó iñi chii ta cuví ra tari minoo ra luhlu, vaha taxin ca, cuhñi ñu noo yuu vee sucun ñu ta tuchi ñu chi ñu nu cono tyañuhu.

⁷ ¡Ñana cha ña vaha cha cuenda ñáyivi iyó siqui ñuhu ñayivi, vatyí iyó tuhun cha sacco ñu cuatyí tahan ñu! Ta tyicuan ri coo tuhun cuan, soco jndahvi ñu ndahvi cha sanacava nu cuatyí chi inga ñu!

⁸ Yucuan chaha tatu ndahun o tatu chahun sanacava chuun nu cuatyí, vaha taxin ca cahnya ta sacuiton cañi. Vatyí vaha ca quihvun nu coun chihin Nyoo chihin cha luu ndahun o luu chahun, ta ñima ca cha naniun ta tuchi Nyoo chuun nu cayú ñuhu cha ma ndahva ca maa.

⁹ Ta tatu noo chiti nuun sanacavá chuun nu cuatyí, vaha taxin ca tava ta sacuiton cañi. Vatyí vaha ca quihvun nu coun chihin Nyoo chihin noo chiti nuun, ta ñima ca chihin cha ninduvi chiti nuun ta tuchi Nyoo chuun nu cayú ñuhu chichi anyaya.

Nu sañahá ra Jesús tyi tari noo mbee cha cuanaa, tyicuan caa cuví yo (Lc. 15.3-7)

¹⁰ Ma tava xiin ndo chi ni noo ra cha cuví tari noo ra luhlu, vatyí catyí chi ndo tyi ángel cha sahá cuenda chi ra, tyicuan ri sacuví ra tyiño nuu Suti, ra nyaá andivi.

¹¹ Vatyí yuhu Rayi cha quichi nya gloria, vachi sacaqui chi ñáyivi cha cuanaa chihin cuatyí ñu.

¹² ¿Yoso caa catyi nyoho? Tatu noo ra cumí ra noo cientu mbee, ta cuanaa noo ti, ¿atu ma sandoo ra ndi cumi xico chahun cumi tahan ca ti cuan yucu cuan, ta cuhun ra cunanducu ra chi quití cha cuanaa cuan? Yuhu catyí tyi sandoo ra ta cuhun ra.

¹³ Ta tatu nañihi ra chi ti, cha ndicha vatyí cusii ca cuñí ra chihin quití cuan, ta ñima ca chihin cumi xico

chahun cumi ca quit̃i cha ña chinaa cuan.

¹⁴ Ta tyicuan caa tucu, Sutu ndo ra nyaá andiṽi ña cuñi ra cha cunaa ni noo ñu cuṽi tari noo ra luhlu.

Yoso caa tahán chi saha yo ticahnu iñi chi tahan yo (Lc. 17.3)

¹⁵ Tatu ra yañun ta sacuṽi ra cha ña vaha chuhun, cahan chihin noo tuhun ri maa ra ta cãtyun chi ra tyi ña vaha cuhva sacuṽi ra. Ta tatu quichaha ra tuhun cahún, cha saha ganaun chi ra cuṽi cuan.

¹⁶ Soco tatu ña quichahá ra chuun, tyicuan ta cañon chi uvi o uñi ra, tacuhva tandih̃i cha chahun cucuvi ra testigu.

¹⁷ Tatu ña quichahá ra ni chi ra cha chahan coyo chuhun cuan, tyicuan ta cahan chihin ra chihin nuu ñáyiṽi nyicú vehe ñuhu. Ta tatu ña quichaha ra chi ñu vehe ñuhu, tyicuan ta cuṽi saha ndo tuhun tyi tari noo ra ña chinó iñi chi Nyoo cuṽi ra, o tari ra catavá xuhun cuenda gobiernu ñuu Roma.

¹⁸ Cha ndicha catyí chi ndo, vatyí tandih̃i cha cuhñi ndo ihya siqũi ñuhu ñáyiṽi, ta cha nuhñi saha maa Nyoo nya andiṽi. Ta tandih̃i cha ndachi ndo ihya siqũi ñuhu ñáyiṽi, cha ndachi maa Nyoo nya andiṽi.

¹⁹ Ta suri catyí tiqui chi ndo, vatyí tatu uvi nyoho ihya siqũi ñuhu ñáyiṽi, ndu ñin ri ndo ta cacañ tahvi ndo cuenda ñáá noo cha cuñi ndo cacañ ndo, Suti, ra nyaá andiṽi cuhva ra chi ndo.

²⁰ Vatyí nu nyicú uvi o uñi ñu sacahnú chii, yucuan cunyai mahñu ñu —catyí ra Jesús.

²¹ Tyicuan ta chahan ra Pedro chin-dacá tuhun ra chi ra Jesús ta catyí ra:

—Sutu Mañi yuhu, tatu ra tahin ta sacuṽi ra ñáá noo cha ña vaha chihin, ¿yoso tahan chaha tahán chi sahi ticahnu iñi chi ra? ¿Atu ucha tahan chaha?

²² Ta nacahan ra Jesús ta catyí ra:

—Catyí chuun vatyí ñima ucha tahan ri chaha, soco tandih̃i ri chaha.

Nu cahán ra Jesús noo cuhva cuenda noo ra cha ña cuñi saha ticahnu iñi

²³ Yucuan chaha cha nyacá ñaha Nyoo añima ñáyiṽi cuṽi chi tari noo rey cha nacana chi tandih̃i musu vatyí cuanyehe ra yoso yosó yica ñu chi ra.

²⁴ Ta cuhva cha quichahá natava ra cuenda, ta quich̃i nyaca ñu chi noo musu cha cuaha millón pesu yosó yica chi ra.

²⁵ Ta musu cuan ñahri maa chihin tyiyahvi ra chi chitoho ra, ta chitoho ra catyí ra: “Cuaxico ndo chi ra ñin cuenda ri chihin ñasih̃i ra, ta chihin sehe ra ta tandih̃i cha iyó chi ra tacuhva vatyí chihin xuhun cuan cunatyiyahvi ra cha yosó yica ra chii.”

²⁶ Tyicuan ta musu cuan chicuiñi chit̃i ra nuu chitoho ra, ta chacu ndahvi ra nuu ra, ta catyí ra: “Tata, cuatu noo chiin chii, ta tyiyahvi mai tandih̃i chuun”, catyí ra.

²⁷ Ta cundahvi cuñi chitoho ra chi ra, ta saha ra ticahnu iñi chi ra, ta sanaa ra tandih̃i cha yoso yica ra, ta saña ra chi ra.

²⁸ Soco cuhva cha quit̃a musu cuan, nañih̃i ra chi noo ra tahan ra cha cuṽi musu tari maa ra. Ta ra cuan yosó yica ra chiin ri chi ra. Ta tñin ra chi ra cuan, ta quichahá quitu ra sucun ra, ta catyí ra chi ra: “Tyiyahvi cha yosó yicon chii.”

²⁹ Tyicuan ta chicuiñi chit̃i ra cuan nuu ra, ta chacu ndahvi ra nuu ra ta catyí ra: “Cuatu noo chiin chii, ta tyiyahvi mai tandih̃i chuun”, catyí ra.

³⁰ Soco maa ra ña cuñi ra, ta chahan ra ta tyih̃i ra chi ra vehe caa nyacua nya cha tyiyahvi ra cha yoso yica ra chi ra.

³¹ Cha canyehe inga ca musu cha sacuṽi ra, uhvi xaan cacuṽi chi ra, ta chahan coyo ra chinacatyí ra chi chitoho ra cha sacuṽi ra cuan.

³² Tyicuan ta chitoho ra cuan tach̃i ra tyiño na quichi ra ta catyí ra chi ra: “Musu ña vaha cuṽun. Yuhu sahi ticahnu iñi tandih̃i cha yosó yicon chii, vatyí chacu ndahvun nui.

³³ Tyicuan caa tucu cuñí chi cundahvi cuñun chi ra tahun cuan tari cundahvi cuñi nyehi chuun”, catyí ra chi ra.

³⁴ Ta cuxaan xaan chitoho ra, ta tachi ra tyiño na tachi tuñi ñu chi ra, nyacua nya cha tyiyahvi ra tandihí cha yosó yíca ra.

³⁵ Ta nu ndihí cahan ra Jesús, ta catyí ra tyehe caa:

—Tyicuan caa tucu cusacuvi Suti, ra nyaá andivi, chihin ndo tatu ma saha ndo tīcahnu iñi chihin cha tandihí añima ndo chi tahan ndo.

19

Nu sañahá ra Jesús tyi ña vaha sandoo ñáyivi chi ñasihí ñu o yí ñu

(Mr. 10.1-12; Lc. 16.18)

¹ Cha yaha cha catyí ra Jesús tuhun ihya, ta quita ra Galilea cuan, ta cuahan ra ityi Judea cha nyaá inga chiyo yuvi cahnu Jordán, ityi nu caña ñanyii.

² Cuaha ñáyivi chinyicon chi ra, ta yucuan sanduvaha ra chi ñu cuhvi.

³ Tyicuan ta suhva ra fariseo catuhva ra chi ra Jesús, vatyí cacuñí ra nducu ra cuhva tyaa ra cuatyí siqui ra. Ta candaca tuhun ra chi ra ta catyí ra:

—¿Atu vaha cha sandoo rayí chi ñasihí ra cha cuenda ñáá ri tisihi luhlu chaha ña chi ra?

⁴ Ta nacañan ra ta catyí ra:

—¿Atu ta sacuaha ca nyoho nu tutu Nyoo nu catyí chi vatyí ra cha savaha chi ndo nya quivi xihna ri, savaha ra rayí ta ñaha sihi?

⁵ Ta catyí tucu chi tyehe caa: “Tahán chi sandoo rayí chi sutu ra ta chi sihi ra, ta ndu in ri ra chihin ñasihí ra. Ta chichi cha ninduvi ñu, cucuvi ñu tari cha noo ri ñáyivi.”

⁶ Yucuan chaha, ñima ca uvi tahan cuví ñu, soco cha nanduvi ñu noo ri ñáyivi. Yucuan chaha, cha sandu in ri Nyoo ña tahán chi cha sasín ñáyivi —catyí ra.

⁷ Tyicuan ta candaca tuhun ra chi ra Jesús ta cacatyí ra:

—¿Ñáá tuhun cha tyaa ra Moisés vatyí cuví cahnya noo rayí tutu chihin ñasihí ra ta sandoo ra chi ña?

⁸ Ta ra Jesús catyí ra chi ra:

—Cha cuenda cha ndavá añima ndo, yucuan chaha, chaha ra Moisés cha sandoo ra ñasihí ra. Soco quivi xihna ri ñima tyicuan caa cuvi.

⁹ Yuhu catyí chi ndo tyehe caa: Ra cha sandoo ñasihí, ta ñima cha cuenda cha natuvi ña chihin inga ra, ta tandaha ra chihin inga ñu, chicoo cuatyí ra nuu Nyoo. Ta ra cha tandaha chihin noo ñaha sihi cha sandoo yí chi, suri chicoo tucu cuatyí ra cuan —catyí ra.

¹⁰ Tyicuan ta ra cachicá noo chihin ra, cacatyí ra chi ra:

—Tatu tyicuan caa tahán chi coo rayí chihin ñasihí ra, vaha taxin ca ma tandaha yo.

¹¹ Ta ra Jesús catyí ra chi ra:

—Soco ña tandihí ñáyivi cuví cutuñi iñi ñu tuhun ihya. Soco ñu cha chaha Nyoo cha cutuñi iñi, ican ñu cua cutuñi iñi.

¹² Cha ña tandaha ñáyivi, cuaha ri cuenda cuví. Yihí ñu ña quichi cuví iñi ñu tandaha ñu vatyí in caa maa ñu cacu ñu. Ta inga ñu ña quichi cuví iñi ñu tandaha ñu vatyí cha yaha tava ñáyivi ñi ñu. Ta yihí ñu ña tandaha ñu cha cuenda cha cuñí ñu sacuvi ñu tyiño nuu Nyoo, na nducuaha añima cha nyacá ñaha Nyoo. Tandihí ñu cuví sacuvi tyehe caa, na sacuvi ñu —catyí ra Jesús.

Nu nasocó ra Jesús chi ra cuatyaa

(Mr. 10.13-16; Lc. 18.15-17)

¹³ Tyicuan ta quichi nyaca ñu suhva ra cuatyaa chi ra Jesús tacuhva na tyiso ra ndaha ra siqui ndotyín, ta cacan tahvi ra chaha ndotyín. Soco ra cachicá noo chihin ra quichaha cacahan ra chi ñu quichi nyaca chi ndotyín.

¹⁴ Soco ra Jesús catyí ra:

—Saña ndo chi ra cuatyaa, na quichi maa ndotyín nu nyaí. Ta ma casi ndo. Vatyí ñu nyacá ñaha Nyoo añima, cuví ñu tari ra cuatyaa ihya —catyí ra.

¹⁵ Tyicuan ta tyiso ra ndaha ra siqui ndotyín. Yaha cuan ta cuahan ra.

Nu cahán noo ra tyivaa tyay# chihin ra Jesús

(Mr. 10.17-31; Lc. 18.18-30)

¹⁶ Noo ra tyivaa chahan ra chin-daca tuhun ra chi ra Jesús ta catyí ra:

—Maestro vaha xaun. ¿Ñáá cha vaha tahán chi sacuvi ta ñihi ñayiví cha ma naa ca maa coi?

¹⁷ Ta ra Jesús catyí ra chi ra:

—¿Ñáá tuhun cha catyun tyi vaha yuhu? Noo ri ra vaha iyó ta ican ra cuan cuví Nyoo. [Ta cha catyun tyi vahi, nacotón tyi Nyoo cuvi.] Soco tatu cuñún quihvun ñayiví cha ma naa ca maa, sacuvun tandihi tuhun cha tachí Nyoo tyi sacuvi yo —catyí ra chi ra.

¹⁸ Ta ra tyivaa cuan catyí ra:

—¿Nya cha cuví cuan?

Ta ra Jesús catyí ra chi ra:

—Ma cahñun chi ñayiví. Ma coo inga ñusihí chuun. Ma suhun cha chii ñayiví. Ma cahun cuendu siqui ñu.

¹⁹ Saha ñayiví chi sutun ta chi sihun. Ta cuñun chi ñayiví, tari cha cuñún chi maun.

²⁰ Ta ra tyivaa cuan, catyí ra chi ra:

—Tandihí tuhun ihya ta quichahí nyata luhli ta nya vityin. ¿Ñáá ca cha cumañí chii?

²¹ Ta ra Jesús catyí ra chi ra:

—Tatu cuñún cuvun noo ra cuiñi nuu Nyoo, cuahan ta xicon cha iyó chuun, ta cuhvon chi ñu ndahvi, ta cunyicon chii. Tyicuan ta coo cha tyay# chuun nya gloria —catyí ra.

²² Soco cuhva cha chiñi ra tyivaa cuan cha cahán ra Jesús tyehe caa, cuihya xaan cuanuhu ra vatyí tyay# xaan ra.

²³ Tyicuan ta ra Jesús catyí chi ra cachicá noo chihin ra:

—Cha ndicha catyí chi ndo vatyí y# xaan cuhva ra tyay# cha cunyaca ñaha Nyoo añaima ra.

²⁴ Catyí chi ndo inga chaha, vatyí numi ca yaha noo camellu xiyu noo yiqui ticu, ta ñima ca noo ra tyay# ta cuhva ra chi ra cha cunyaca ñaha Nyoo —catyí ra Jesús.

²⁵ Cha cachiñi ra cachicá noo chihin ra tuhun ihya, iyo xaan cacuñi ra,

ta quichaha candaca tuhun ra chi ra tahan ra, ta cacatyí ra:

—Tu tyicuan caa, ¿yóó cha cuví cacu vii?

²⁶ Tyicuan ta nanyehe ra Jesús nu nyicú ra ta catyí ra:

—Ñáyiví ma cuvi sacuvi ñu tyehe caa, soco Nyoo cuví sacuvi ra tandihí.

²⁷ Tyicuan ta quichaha catyí ra Pedro chi ra:

—Sutu Mañi yuhu, nyuhu tandihí maa cha iyó chi ndi sandoo ndi ta nyicón ndi chuun. ¿Ñáá cha cuñihí ndi? —catyí ra chi ra.

²⁸ Ta nacahan ra Jesús ta catyí ra:

—Cha ndicha catyí chi ndo, vatyí quiví cha cunduchaa tandihí, yucuan quiví yuhu Ray# cha quichí nya gloria cucunyai ta cunyaca ñahi, ta nyoho cha nyicón ndo chii, cunyaa tucu nyoho nu uchi uvi tahan tyayu tyaquí. Ta cunyaca ñaha ndo chi ndi uchi uvi tahan ityi ñayiví Israel.

²⁹ Ta tandihí ndo cha sandoo ndo vehe ndo, o yañi ndo, o cuhva ndo, o sutu ndo, o sihi ndo, o ñasihí ndo o sehe ndo, o ñuhú ndo cha catyí yuhu, cunañihí ndo noo cientu ca chaha siqui cuan, ta cunañihí tucu ndo ñayiví cha ma naa ca maa coo ndo.

³⁰ Cuaha xaan ñu cuahan ityi nuu vityin, ican ñu cuan, cuhun nya nu ndihí. Ta cuaha xaan ñu cuahan nu ndihí vityin, ican ñu cuhun ñu ityi nuu.

20

Nu sañahá ra Jesús noo cuhva cuenda ra casahá tyiño

¹ 'Cha nyacá ñaha Nyoo añaima ñayiví, cuví chi tari noo chitoho chacu yoho tichaha ndiví. Ta chitoho chacu cuan ñaha cuirí quita ra cuanducu ra cuaha ri musu cusaha tyiño nu tyiño saha ra.

² Ta sandaa ra tyiño chihin musu cuan vatyí cutiyahvi ra yahvi cha tahán chi chi ra cha noo quiví, ta tachí ra chi ra cusaha tyiño ra nu iyó tyiño sahá ra.

³ Yahá cuan ta quita tucu ra cuhva cha caa #in cha ñaha ri. Ta nanyehe

ra chi suhva ca ra canyicú ri maa nuyahvi cuan.

⁴ Ta catyí ra chi ra: “Cuahan tucu nyoho cua saha tyiño ndo nu iyó tyiño sahi, ta tyiyahvi mai yahvi cha tahán chi chi ndo.” Tyicuan ta cuahan coyo tucu ra cuan.

⁵ Tyicuan ta chitoho chacu cuan quitá tucu ra inga chaha cuhva cha ora. Yucuan ta quitá tucu ra cuhva cha caa uñi cha cha iñi.

⁶ Ta yahá cuan ta quitá tucu ra cuhva cha caa ohon cha cha iñi ta nanyehé ra canyicú ri maa suhva ca ra nuyahvi cuan. Ta catyí ra chi ra: “¿Ñáá tuhun cha canyicú ri maa nyoho ndiyaca ihya, ta ña sahá tyiño ndo?”

⁷ Ta canacahan ra cuan ta catyí ra: “Yori maa cahan chihin ndi cha cusaha tyiño ndi.” Tyicuan ta catyí ra chi ra: “Cuahan tucu nyoho cua saha tyiño ndo nu iyó tyiño sahi. Ta tyiyahvi mai chi ndo yoso cuhva cha tahán chi chi ndo”, catyí ra.

⁸ Ta cuhva cha caa cuan, chitoho tyiño cuan catyí ra chi ra cuví nuu chi musu cuan: “Na canon chi musu, ta tyiyahvun chi ra. Quichaha tyiyahvun chi ra cha caquihvi nu ndihi, ta nu ndihi ta tyiyahvun chi ra cha caquihvi cha xihna ri”, catyí ra.

⁹ Tyicuan ta chaá coyo ra cha caquihvi cuhva cha caa ohon cha cha iñi cuan. Ta tahan tahan ra quehen ra yahvi nani noo quivi.

¹⁰ Yahá cuan, ta cuhva cha tahán chi chi ra cha caquihvi coyo cha xihna ri cuan, cacuñi maa ra vaty cuaha ca cutiyahvi ra chi ra. Soco suri ñin ri yahvi noo quivi caquehen ra.

¹¹ Ta cuhva cha caquehen ra, quichaha cacahan ra chi chitoho tyiño cuan.

¹² Ta catyí ra: “Ra cha cachaa coyo nu ndihi ihya, noo tuhun hora casaha tyiño ra. Ta ñin ri cuhva tyiyahvun chi ra chihin nyuhu cha saha tyiño ndi nu cahni ndiyaca”, cacatyí ra.

¹³ Soco nacahan chitoho tyiño cuan, ta catyí ra chi noo ra cuan: “Amigo, ñahri cha ña vaha sacuvi chuhun. ¿Atu ñima yahvi cha noo

quivi catyí vaty tyiyahvi chuun?

¹⁴ Quehen yahvun, ta cuanuhu. ¿Atu ñahri ityi iyó chii cha tyiyahvi chi ra cha quihvi nu ndihi ñin ri cuhva cha tyiyahvi chi yoho?

¹⁵ ¿Atu ñahri ityi iyó chii cha sacuvi cha cuñi mai chihin xuhin? ¿Atu quiñi cuñún tyi vaha ñáyivi cuví chihin inga ra cuan?” catyí ra.

¹⁶ Ta tyicuan caa ñu quihvi nu ndihi, cahun ñu ityi nuu. Ta ñu cuahan ityi nuu, nya nu ndihi cahun ñu. Vaty cuaha xaan ñu nacaná Nyoo chi. Soco chiin xaan ri ñu nacachi ra.

Inga chaha sacotó ra Jesús yoso caa cucahni ñáyivi chi ra

(Mr. 10.32-34; Lc. 18.31-34)

¹⁷ Cuhva cha cuñi cahun ra Jesús nya Jerusalén, cana ñin ra chi ndi uchi uvi ra cachicá noo chihin ra ta catyí ra chi ra:

¹⁸ —Ta cha nyehe maa ndo vaty cuahan yo Jerusalén vityin. Ta yucuan cucuhva cuenda ñu chi yuhu Rayi cha quichi nya gloria chi ra cacuvi nuu chi tata sutu, ta chi ra casacuaha ley vehe ñuhu, ta cucatyí ra tyi tahán chi cúvi.

¹⁹ Ta cucuhva cuenda ra chii chi ra ñuu Roma, ta cucuacu nyaa ra chii, ta cucañi ra chii, ta cucahni ra chii nu cruzi. Soco nu cu uñi quivi cunandote —catyí ra Jesús chi ra.

Nu chicán sihi ra Jacobo ta ra Juan noo tumañi iñi chi ra Jesús

(Mr. 10.35-45)

²⁰ Tyicuan ta sihi ra Jacobo ta ra Juan sehe ra Zebedeo tuhva ña nu nyaá ra Jesús chihin ninduvi sehe ña. Ta chicuiñi chiti ña nuu ra vaty cacan ña noo tumañi iñi chi ra.

²¹ Ta quichaha ndaca tuhun ra Jesús chi ña:

—¿Ñáá cha cuñún?

Ta catyí ña:

—Quivi cha cunyaun nu nyacá ñahun nya andivi, cuhva cha cunyaa ninduvi sehi xiun. Na cunyaa noo ra chiyo vahun, ta inga ra cunyaa ra chiyo satyun.

²² Soco nacahan ra Jesús ta catyí ra:

—Nyoho ña chitó ndo cha chicán ndo. ¿Atu cuví nyehe nyoho tindocho cha cunyehe yuhu? ¿Atu cuví cuhun ndo tuhun chihi tari cuhva cuhun yuhu? —catyí ra.

Ta canacahan ra ta catyí ra:

—Cuví chi ndi.

²³ Ta catyí ra Jesús chi ra:

—Cha ndicha vatyí cunyehe ndo tindocho, ta cuhun ndo tuhun chihi tari cuhun yuhu tuhun chihi. Soco tuhun cha cunyaa ndo chiyo vahi ta chiyo satyin, ñima yuhu tahán chi cuhve chi ndo, soco maa Suti cucatyí ra yóo cha cuñihi nyatu cuan —catyí ra Jesús chi ra.

²⁴ Ta cha cachiñi uchi ca ra cachicá noo chihin ra Jesús tuhun cuan cacuxaan ra chihin ninduvi ra cuan.

²⁵ Soco cana ra Jesús chi ra ta catyí ra chi ra:

—Cha chitó maa ndo, vatyí ra nyacá ñaha chi ñáyivi iyó siqui ñuhu ñáyivi ihya, ñihi xaan nyacá ñaha ra chi ñu tari nyaca ñaha ra musu ra.

²⁶ Soco ñima tyicuan caa tahán chi sacuvi nyoho. Vatyí ra cha cuñi cucahnu ca nu Nyoo, cuñi chi cuví ra musu tandihi ca ndo.

²⁷ Ta nya nyoho cha cuñi ndo cuví ndo nuu, cuñi chi cuví ndo musu tandihi ca ñu.

²⁸ Tari yuhu Rayi cha quichi nya gloria, ña vachi vatyí sacuvi ndo tyiño nui, soco vachi sacuvi tyiño nuu ndo, ta cuhve ñáyivi. Vatyí chihin cuan ta cuví sacaqui cuaha ñáyivi.

Nu sanduvahá ra Jesús chi uvi ra cuaa

(Mr. 10.46-52; Lc. 18.35-43)

²⁹ Cuhva cha cua quitá coyo ra ñuu Jericó, cuaha xaan ñáyivi cuahan chihin ra Jesús.

³⁰ Ta yuhu ityi cuan canyicú uvi tahan ra cuaa. Ta cuhva cha cachiñi ra vatyí cua yaha ra Jesús, quichaha canachaa ra. Ta catyí ra:

—Sutu Mañi yuhu, ra vachi tata ra David cuvún. ¡Cundahvi cuñi nyehun chi ndi! —cacatyí ra.

³¹ Ta ñáyivi quichaha cahan ñu chi ra na cacasi ra yuhu ra. Soco maa ra ñihi ca cacana chaa ra:

—Sutu Mañi yuhu, ra vachi tata ra David cuvún. ¡Cundahvi cuñi nyehun chi ndi!

³² Tyicuan ta chicuiñi ra Jesús ta cana ra chi ninduvi tahan ra cuaa cuan, ta ndaca tuhun ra chi ra:

—¿Ñáa cha cuñi ndo cha sacuvi chihin ndo?

³³ Ta canacahan ra ta catyí ra:

—Sutu Mañi yuhu, cuñi ndi nyehe ndi.

³⁴ Tyicuan ta cundahvi cuñi ra Jesús nyehe ra chi ra, ta tiin ra chiti nuu ra. Ta caa cuhva ri cuan cananyehe ra, ta cananyicon ra chi ra Jesús.

21

Nu quihvi ra Jesús Jerusalén

(Mr. 11.1-11; Lc. 19.28-40; Jn. 12.12-19)

¹ Cuhva cha cua cha coyo ra ñuu Jerusalén, ta cachaa ra ñuu Betfagé, yatyin ri nu cuví yucu yutun Olivo. Tyicuan ta tachi ra Jesús tyiño chi uvi ra chicá noo chihin ra.

² Ta catyí ra chi ra:

—Cuahan ndo ñuu cha nyaá ityi nuu ihya. Ta yucuan cunañihi ndo noo burru sihi, nuhñi ti. Ta nyacá ti noo burru luhlu. Ndachi ndo chi ti, ta quichi nyaca ndo chi ti chii.

³ Ta tatu yóo cha catyí ñáa cha catyí chi ndo, catyí ndo chi ñu: “Vatyí chiñuhú ti chi maa ra nyacá ñaha, soco numi ri quichi nanyaca ndi chi ti”, catyí ndo chi ñu —catyí ra.

⁴ Tyehe caa cuví tacuhva na chino cava tuhun cha catyí ra profeta nu tyaa ra tyehe caa:

⁵ Catyí ndo chi ñu ñuu Sión:

“Nyehe ndo, vachi rey maa ndo nu nyaá ndo.

Ndahvi ri vachi ra yosó ra noo burru luhlu, sehe noo quití cha tuhvá nyisó carga”, catyí ra profeta.

⁶ Tyicuan ta cuahan coyo ra cachicá noo chihin ra, ta casacuvi ra tari cuhva catyí ra Jesús chi ra.

⁷ Caquichi nyaca ra chi ti chihin sihi ti. Ta catyiso ra sahna ra siqui ti, ta ndaa ra Jesús chi ti.

8 Ta cuaha xaan ñáyiví candicā ñu sahma ñu ityi nu cuahan ra, ta inga ñu catohon ñu numa yutun ta cachacun ñu ityi.

9 Ta ñáyiví cha cuahan ityi nuu ta ityi chata, quichahā cana chaa ñu ta catyí ñu:

—¡Cahnu xaan cuví ra vachi tata rey David! ¡Cahnu xaan cuví ra vachi cuenda Sutu yo Nyoo! ¡Ta sacahnú xaan yo chi Nyoo nu nyaá ra ityi andiví! —catyí ñu.

10 Cuhva cha chaā ra Jesús ñuu Jerusalén cuan, tandihí maa ñáyiví ñuu naquiquí, ta cuaha xaan ñu candacá tuhun ñu chi tahan ñu, ta catyí ñu:

—¿Yóo ra cuví ra ihya?

11 Ta ñáyiví catyí ñu:

—Ra Jesús, ra chahá cuenda tuhun cahan Nyoo, ra ñuu Nazaret nu cuví Galilea cuví ra —catyí ñu.

Nu tavá ñehe ra Jesús chi ra caxicó chichi vehe ñuhu cahnu

(Mr. 11.15-19; Lc. 19.45-48; Jn. 2.13-22)

12 Yahā cuan ta quihví ra Jesús chichi vehe ñuhu cahnu Nyoo. Ta tavá ñehe ra chi tandihí ra casatá ta ra caxicó yucuan. Ta sanduvā ra mesa ra canasamá xuhun chi ñáyiví yucuan. Ta sanduvā ra tyayu ra caxicó paloma.

13 Ta catyí ra:

—Nu tutu Nyoo catyí chi tyehe caa: “Vehi, vehe nu chicán tahvi ñáyiví chii cuví, ta tyicuan caa cucunañi chi. Soco nyoho cha nasahā ndo vehe nu nyicú ra suhu” —catyí ra.

14 Chichi vehe ñuhu cuan catuhvā suhva ra cuaa ta ra coxo chi ra Jesús. Ta maa ra sanduvahā ra chi ra.

15 Soco canyehe ra cacuví nuu chi tata sutu ta ra casacuahá ley vehe ñuhu cuan vatyí savahā ra Jesús milagru, ta canachaa ra cuatyaa chichi vehe ñuhu, ta catyí ndotyín:

—¡Cahnu xaan cuví ra vachi tata rey David! —catyí ndotyín.

Tyicuan ta cacuxaan tata sutu ta inga ra cuan cha canyehe ra ta cha cachiñi ra.

16 Ta cacatyí ra chi ra Jesús tyehe caa:

—¿Atu chiñún cha cahán ndotyín?

Ta nacahan ra Jesús ta catyí ra:

—Chiñí. Soco ¿atu ta sacuaha ca ndo nu tutu Nyoo nu catyí chi tyehe caa?

Sutu Mañi yuhu, sacuvun vatyí ra cuatyaa nyihi cata ndotyín.

Ta ra cuatyaa lee cha chaxín sacahnú ndotyín chuun, catyí chi, —catyí ra Jesús.

17 Tyicuan ta sandoo ra chi ra, ta quitā ra ñuu cuan ta cuahan ra ñuu Betania. Ta yucuan ndoo ra cha cuaa cuan.

Nu tyanahá ra Jesús chi tu higo vatyí ñahri higo iñi nuu tun

(Mr. 11.12-14, 20-26)

18 Tuvi inga quiví. Ta cha ñaha ri, cua ndichi ra Jesús nya Jerusalén, ta chaā soco chi ra.

19 Ta nanyehe ra noo tu higo yatyín ri yuhu ityi cuan. Ta tuhvā ra nu nanyaá tun, soco ñahri maa nañihi ra nuu tun. Maa maa ri maa numa ri iñi nuu tun. Tyicuan ta catyí ra chi tun tyehe caa:

—¡Ni nonga chaha ma cuhva con chiti!

Ta caa cuhva ri cuan ta na ityi tun.

20 Ta cha nyehe ra cachicá noo chihin ra cha sacuví ra, iyo cacuñí ra, ta ndacā tuhun ra chi ra ta catyí ra:

—¿Ñáá tuhun cha numi xaan na ityi tu higo cuan?

21 Ta nacahan ra Jesús ta catyí ra:

—Cha ndicha catyí chi ndo, vatyí tatu chinó iñi ndo ta ma nacaca uvi iñi ndo, ñima ihya ri cha sacuví chi tu higo ihya cuví sacuvi ndo, soco cuví catyí ndo chi yucu ihya tyehe caa: “Canyaha chuun ihya ta cuahan nya chichi tyañuhu.” Ta tyicuan caa cucuvi.

22 Ta tandihí cha cacan ndo nu chicán tahvi ndo, tatu chinó iñi ndo tyi cucuhva Nyoo, cuñihi ndo —catyí ra Jesús.

Nu sañahá chi yóo ra chahā tyiño chi ra Jesús

(Mr. 11.27-33; Lc. 20.1-8)

23 Yahā cuan ta quihvi ra Jesús chichi vehe ñuhu cahnu, ta cha ni ri ca cha sañahá ra yucuan, tuhva ra cacuví nuu chi tata sutu chi ra, ta ra cacuví mandoñi ñu ñuu Israel, ta candaca tuhun ra chi ra:

—¿Yóo cha tyaa tyiño vatyí sacuvun tyehe caa, ta yóo cha chaha tyiño cuan chuun?

24-25 Ta nacahan ra Jesús ta catyí ra:

—Yuhu tucu cua ndaca tuhun noo tuhun chi ndo. ¿Yóo cha tachí chi ra Juan vatyí sacondutya ra chi ñáyivi? ¿Atu Nyoo tachí chi ra, o ñáyivi? Tatu catyí ndo chii, cucatyí tucu yuhu chi ndo yóo cha tyaa tyiño ihya chii —catyí ra Jesús chi ra.

Tycuan ta quichaha cacuvi yuhu ra chihin ra tahan ra, ta cacatyí ra:

—Tatu catyí yo tyi Nyoo tachí chi ra, cucatyí ra chi yo: “Tu tycuan caa, ¿ñáá tuhun ña chinó iñi ndo chi ra?”

26 Ta tatu catyí yo tyi ñáyivi, ñáyivi cuví nacanda ñu siqui yo, vatyí tandihi ñu chinó iñi ñu tyi ra Juan, cuenda Nyoo cahan ra —catyí ra chi ra tahan ra.

27 Tycuan ta quichaha cacatyí ra chi ra Jesús tyehe caa:

—Ña chitó ndi.

Tycuan ta ra Jesús catyí ra chi ra:

—Ni yuhu, ta ma catyí chi ndo yóo cha tyaa tyiño ihya chii.

Nu cahan ra Jesús noo cuhva cuenda uvi tahan sehe noo ra

28 Ra Jesús catyí ra chi ra:

—¿Yoso caa catyí ndo cuenda tuhun cha cua catyí ihya? Noo ra, iyó uvi tahan sehe ra. Ta catyí ra chi noo sehe ra: “Cuahan cua saha tyiño nu iyó tyiño sahí.”

29 Ta nacahan sehe ra ta catyí ra: “¡Ma cuhin!” Soco yahā cuan ta nasama cuhva chicá xiñi ra ta chahan ra chisaha tyiño ra.

30 Yahā cuan ta sutu ra chahan ra nu nyaá inga sehe ra. Ta catyí tucu ra chi ra na cuhun ra cusaha tyiño ra. Soco ra yucuan numi ri quehen ra tuhun, ta catyí ra: “Vaha, Tata, cuhin.” Soco ña chahan ra.

31 Chichi cha ninduvi tahan ra, ¿nya ra sacuvi ra cha catyí sutu ra? —catyí ra Jesús.

Ta nacahan ra ta cacatyí ra:

—Ra cha cahan ra chihin cha xihna ri.

Ta catyí ra Jesús chi ra:

—Cha ndicha catyí chi ndo, vatyí xihna ca ra catavá xuhun cuenda gobiernu, ta ñu cata iñi cuquihvi ñu nu nyacá ñaha Nyoo, ican saha nyoho.

32 Vatyí ra Juan ra sacondutya quichí ra, quichi sañaha ra chi ndo yoso caa tahan chi coo ndo, soco nyoho ña chingo iñi ndo chi ra, soco ra catavá xuhun ta ñu cata iñi cachingo iñi ñu chi ra. Ta nyoho vasi nyehe ndo ihya, soco ña nasama ndo cuhva iyó ndo, tacuhva chino iñi ndo chi ra.

Nu catyí ra Jesús vatyí ra cacahñi chi ra cuvira tari ra sahá tyiño ña vaha (Mr. 12.1-12; Lc. 20.9-19)

33 Tyasoho ndo inga cuhva ihya: Chiyo noo chitoho noo ñuhú, ta tachi ra yoho tichaha ndivi, ta tyihí ra noo chacu. Ta savaha ra noo nu cuhñi ra tichaha ndivi cuan ta tava ra ndutya chi. Ta savaha tucu ra noo vehe sucun tacuhva vatyí cuvi saha ra cuenda tandihi.

Yahā cuan ta chaha noo ra ñuhú cuan chi suhva ra casahá tyiño, ta cuahan ra inga ñuu.

34 Ta cha cha quivi cha iyó tichaha ndivi cuan, tachí ra chi suhva musu, na cucacan ra chi ra casahá tyiño cuan, na cuhva ra suhva tichaha ndivi cha tahan chi chi ra.

35 Soco ra casaha tyiño cuan, catiñ ra chi musu cuan, ta cacahñi ra chi noo ra. Ta chi inga ra cachahñi ra, ta catuchí ra yuu chi inga ra.

36 Tycuan ta cha inga chaha, cuaha ca musu tachí chitoho chacu cuan ta ñima ca cha xihna ri. Soco tari cacacuvi ra chi ra cha xihna ri, sacuvi tucu ra chi ra ihya.

37 Nu ndihi tachí ra chi maa maa sehe ra, vatyí cuñí maa ra vatyí cusaha ra ñáyivi chi sehe ra.

38 Soco cuhva cha cananyehe ra casahá tyiño cuan chi sehe ra, catyí ra chi ra tahan ra tyehe caa: “Ican ra

ihya cundoo chihin tandihí ihya. Na cahñi yo chi ra tacuhva ndoo maa yo chihin”, cacatyí ra.

³⁹ Tyicuan ta catiñ ra chi ra, ta catava ra chi ra ityi chata chacu, ta cachahñi ra chi ra —catyí ra Jesús.

⁴⁰ Tyicuan ta ndaca tuhun ra Jesús chi ñu:

—Quiví quichi chitoho ñuhú cuan, ¿ñáa cha cusacuvi ra chihin ra casahá tyiño quiñi iyó cuan?

⁴¹ Ta nacahan ra ta cacatyí ra:

—Ma cuatu ra, soco cahñi ra chi ra caquiñi iyó cuan. Ta cuhva ra ñuhú cuan chi inga ra casahá tyiño. Ta quiví coo tichaha ndiví, cunacuhva cuenda ra chi chitoho chacu cuan cha tahán chi chi ra.

⁴² Tyicuan ta quichaha catyí ra Jesús chi ñu:

—¿Atu ta sacuaha ca nyoho nu tutu Nyoo nu catyí chi tyehe caa?

Yuu cha ña cuñi ra casavahá vehe cotyiño ra,

ican cuan cuví yuu cha niñi ca.

Ican ihya cuví cha sacuví Sutu yo Nyoo.

Ta tyaqui xaan tuhun cuan cha cuenda chi yo, catyí chi.

⁴³ Yucuan chaha catyí chi ndo vatyí ma cuhva ca Nyoo cuhun ndo nu nyacá ñaha ra, ta cucuhva ra chi ñu cha ndicha nyacá ñaha ra aña. Vatyí maa ñu cunacuhva cuenda ñu cha vaha cha tahán chi chi ra.

⁴⁴ Ta cha cuenda yuu cuan, yóo ñu cha nduva síqui chi, yiquin maa cucuví ñu. Ta tatu yuu cuan ta canacava síqui yóo ñu, cutaxin nyihi maa ñu —catyí ra Jesús.

⁴⁵ Cuhva cha catuví iñi ra cacuví nuu chi tata sutu cuan ta ra fariseo vatyí cuenda ra cahan ra Jesús cuhva ihya,

⁴⁶ cacuñí ra catiñ ra chi ra, soco cayuhvi ra chi ñáyiví vatyí ñáyiví, chitó ñu vatyí ra Jesús cuenda Nyoo cahan ra.

22

Nu chahá ra Jesús noo cuhva cuenda vico tandaha (Lc. 14.15-24)

¹ Quichaha cahan tucu ra Jesús chihin ñu inga chaha chihin cuhva, ta catyí ra:

² —Cha nyacá ñaha Nyoo aña ñáyiví cuví chi tari noo rey cha savaha noo vico cha cuenda cha cua tandaha sehe ra.

³ Ta tachí ra chi musu ra na cuhun ra cucana ra chi ñu cha nacatyí tuhun ra, soco ñu cuan, ña cacuñí ñu quichi coyo ñu.

⁴ Tachí ra inga chaha chi inga musu, ta catyí ra chi ra tyehe caa: “Catyí ndo chi ñu cha nacatyí tuhun, vatyí cha yaha chahñi síndiqui sane, ta inga quiñi cha xahan ñandihí, ta cha nyaá vaha nyayu, ta tandihí cha nyatú tuhva. Na quichi ñu vico tandaha”, catyí ra.

⁵ Soco ñu nacatyí tuhun ra, ña caquichaha ñu chi ra. Noo ñu chahan coyo ñu nu iyó chacu ñu, inga ñu chahan ñu nu tyiño sahá ñu.

⁶ Ta inga ñu tññ ñu chi musu rey cuan ta cañi vavaha ñu chi ra nyacua chahñi ñu chi ra.

⁷ Tyicuan ta rey cuan cuxaan vavaha ra, ta tachí ra chi síndaro ra, cucahñi ra chi ra cachahñi cuan, ta cahmi ra ñuu ra.

⁸ Tyicuan ta quichaha catyí ra chi musu ra: “Tandihí ta cha iyó vaha cha cuenda vico tandaha, soco ñu nacatyí tuhun cuan, ña tahán chi cha quichi coyo ñu.

⁹ Cuahan ndo tandihí calle ta nacatyí tuhun ndo chi tandihí ri ñu cha nañihi ndo na quichi coyo ñu vico tandaha”, catyí rey cuan.

¹⁰ Musu cuan cuahan coyo ra tandihí calle, ta casandu iññ ri ra chi tandihí ñu canañihí ra: ñu quiñi iyó, ta ñu vaha. Ta tyicuan caa chitu chichi vehe ra chihin ñáyiví.

¹¹ Tyicuan ta quihví rey cuan cua nyehe ra chi ñáyiví cha canacatyí tuhun musu cuan. Ta nanyehe ra chi noo ra ñohó yucuan, soco ñahri sahma vico tandaha ñihnó ra.

¹² Ta catyí rey chi ra: “Amigo, ¿yoso caa cha quihvun ihya ta ñahri sahma vico tandaha ñihnón?” Soco ra cuan ña na cahan maa ra.

13 Tyicuan ta catyí rey cuan chi ra catyihí mesa cuan: “Cuhñi ndo chaha ra ta ndaha ra, ta tuchi ndo chi ra nu ñaa iñi ityi chata vhehe, ta yucuan cucuacu ra, ta cusacahñi ra noho ra”, catyí ra.

14 Vatyí cuaha xaan ñu nacana Nyoo chii, soco chiin xaan ñu nacachi ra —catyí ra Jesús.

Nu candacá tuhun ra cuenda xuhun cha tavá gobiernu

(Mr. 12.13-17; Lc. 20.20-26)

15 Tyicuan ta catyihí tahan ra fariseo tuhun chihin tahan ra vatyí cusacahan ra chi ra Jesús noo cuhva cha ña tahán chi, vatyí tyicuan caa ta coo cuatyí catyaa ra siqui ra.

16 Ta tachi ra chi suhva ra cuenda ra, ñn ri chihin suhva ra cuenda ra Herodes. Ta cacatyí ra chi ra Jesús tyehe caa:

—Maestro, chitó ndi vatyí cha ndicha cahún. Ta chihin cha ndicha sañahún ityi Nyoo. Ta ña quichahún cha cahán ñáyivi, vatyí ña tñn cuendon cuhva caá ri ñu.

17 Catyí chi ndi yoso caa chicá xiñun: ¿Atu vaha cha tyiyahví yo cha chicán gobiernu ñuu Roma chi yo, o ma tyiyahvi yo?

18 Soco tuví iñi ra Jesús vatyí ña vaha cuhva cachicá xiñi ra, ta catyí ra chi ra:

—Nyoho sahá ndo tyi vaha ndo, soco ña ndicha ndo. ¿Ñáa tuhun cha nducu nyehe ndo chii?

19 Sañaha ndo xuhun cha tuhva ndo tyiyahvi ndo chi gobiernu —catyí ra.

Ta caquichí nyaca ra noo xuhun cha nañí denariu chi ra.

20 Ta cuhva cha nanyehe ra Jesús, ta quichahá ndaca tuhun ra chi ra:

—¿Yóo chi nuu ta yóo chi sivi nyaá ihya?

21 Ta nacahan ra ta cacatyí ra:

—Chi ra nyacá ñaha.

Tyicuan ta catyí ra Jesús chi ra:

—Cuhva ndo chi ra nyaca ñaha cha tahán chi chi ra, ta cuhva tucu ndo chi Nyoo cha tahán chi chi Nyoo —catyí ra.

22 Cuhva cha cachiñi ra cha cahan ra Jesús, iyo xaan cacuñi ra. Ta cuahan coyo ra.

Nu canducu tuhun ra saduceo siqui tuhun cha nandotó ndiyi

(Mr. 12.18-27; Lc. 20.27-40)

23 Suri quivi cuan suhva ra saduceo chahan coyo ra nu nyaá ra Jesús. Ta ra saduceo cuan ña cachino iñi ra cha cunandoto ndiyi quivi cu naa ñayivi. Yucuan chaha candaca tuhun ra chi ra Jesús, ta catyí ra:

24 —Maestro, ra Moisés catyí ra vatyí tatu noo ra tandaha ta chihí ra ta ña chiyo sehe ra, tahán chi cha tandaha yañi ra chihin ñaha chihí yí cuan. Tyicuan ta coo sehe ra chihin ña cha cuenda yañi ra cha chihí.

25 Vaha. Vityin tyehe caa cuvi chi noo ra chiyo ucha tahan ra chihin yañi ra. Ra cha xihna ri tandaha ra. Yahá cuan ta chihí ra. Soco vatyí ña chiyo sehe ra, ndoo ñasihí ra chi yañi cu uvi ra.

26 Ta suri tyicuan caa cuvi chi yañi ra ra cu uvi. Ta yahá cuan, ta ra cu uñi quehen ra chi ña, ta suri chihí tucu ra. Ta tyicuan caa cuvi chi ndi ucha ra.

27 Ta cha yahá cuan nu ndihí tuhun chihí ndihí maa ña cuan.

28 Ta cha tyicuan caa, quivi cunandoto ñu, chichi cha ucha ra chihin yañi ra, ¿nya ra cucuvi ñasihí chi ñaha cuan? ¿Vatyí tandihí ra tandaha ra chihin ña? —cacatyí ra.

29 Nacahan ra Jesús ta catyí ra:

—Nyoho, cahán tondo ri maa ndo, cha cuenda vatyí ña chitó ndo cha nyaá nu tutu Nyoo, ni tunyee iñi Nyoo, ta ña chitó ndo.

30 Vatyí quivi cunandoto ndiyi, ni ma tandaha ñu, ta ni ma cuhva ñu sehe ñu tandaha, vatyí tari ángel Nyoo ra nyaá andivi cucuvi ñu.

31 Soco tuhun cha nandotó ñu ndiyi, ¿atu ta sacuaha ca ndo tuhun cha catyí maa Nyoo chi ndo? Catyí ra tyehe caa:

32 “Yuhu cuví Nyoo cuenda ra Abraham, ta ra Isaac ta ra Jacob.”

Ihya nyehé yo vatyí canyito añima ra cuan, vasi cha naha chihí ra vatyí

Nyoo ñima Nyoo cuenda ñu ndiyi cuví ra, soco Nyoo cuenda ñu nyitó cuví ra —catyí ra.

³³ Iyo cuñí ñáyivi cha chiñi ñu tuhun sañahá ra Jesús.

Ley cha ñiñi ca cha chahá Nyoo
(Mr. 12.28-34)

³⁴ Cha cachito ra fariseo vatyí ra Jesús chasi ra yuhu ra saduceo, candu ñin ri ra.

³⁵ Ta noo ra cha cuví ra sacuahá ley vehe ñuhu, cuñi ra nducu nyehe ra chi ra Jesús. Ta quichaha ndaca tuhun ra chi ra, ta catyí ra:

³⁶ —Maestro, ¿nya mandamiento cha nyaa nu ley cuví cha ñiñi ca?

³⁷ Ta catyí ra Jesús chi ra:

—“Cuñun chi Sutu Mañi yo Nyoo chihin cha ñi ñun ta chihin cha tandihi ñimon, ta chihin cha tandihi cha chiñi tuñi xiñun.”

³⁸ Ican ihya mandamiento cha ñiñi ca, ta cha xihna ri ñandihí.

³⁹ Ta cha cu uvi cha yatyin ri tyicuan caa, ta catyí chi: “Cuñun chi ñáyivi tahun tari cuñun chi maun.”

⁴⁰ Ican uvi tahan mandamiento ihya cuví cha nyisó chi ley cha chahá Nyoo chi ra Moisés ta tandihí tuhun cha casañahá ra profeta Nyoo ta cha naha.

Ra Cristo quichi ra tata ra David, ta suri cuví ra Sehe Nyoo

(Mr. 12.35-37; Lc. 20.41-44)

⁴¹ Cha ni ri ca cha canyicú ñin ri ca ra fariseo,

⁴² ra Jesús ndaca tuhun ra chi ra, ta catyí ra:

—¿Yoso caa chicá xiñi nyoho cuenda ra cuví Cristo? ¿Yóó chi tata vachi ra cuñi maa ndo?

Ta canacahan ra ta catyí ra:

—Tata ra David cuví chi ra.

⁴³ Tyicuan ta ra Jesús catyí ra chi ra:

—¿Ta yoso caa cha vatyí ra David cuan, maa Tatyí li Nyoo chotyíño chi ra? ta catyí ra vatyí ra cuví Cristo, ra nyacá ñaha chi ra cuví ra, vatyí catyí ra tyehe caa:

⁴⁴ Cahán Suti Nyoo chihin Suti ra Cristo, ta catyí ra chi ra:

“Cunyaa chiyo vahi nyacua nya quivi cuhve chi ra xaan ñi chuun vatyí cuaca chahun siqui ra” tyaa ra David.

⁴⁵ ¿Yoso caa cha ra vachi tata ra David cuví chi ra Cristo, tatu suri maa ra David catyí ra vatyí ra Cristo Sutu ra cuví chi ra? —catyí ra Jesús.

⁴⁶ Ta yori maa cuví nacahan ni noo tuhun. Ta nya ndaha quivi cuan, yori ca maa caña ñi candaca tuhun ñáa ca cha candaca tuhun chi ra.

23

Nu cahán ra Jesús chi ra sacuahá ley vehe ñuhu ta ra fariseo

(Mr. 12.38-40; Lc. 11.37-54; 20.45-47)

¹ Tyicuan ta ra Jesús catyí ra chi ñáyivi, ta chi ra cachicá noo chihin ra tyehe caa:

² —Ra sacuahá ley ta ra fariseo nyicú ra tyiño cha sañahá ra ley cha tyaa ra Moisés.

³ Ta cha tyicuan caa, quichaha ndo cha cahán ra ta sacuvi ndo tandihí cha cacatyí ra chi ndo. Soco ma quehen ndo cuhva iyó ra, vatyí maa ra, ñin cha sañaha ra, ta ñin cha sacuvi ra.

⁴ Vatyí yori ndoyo carga cha tyaá ra siqui ñáyivi. Ta saniñi ra chi ñu na cuiso ñu, ta maa ra ni chiin nundaha ra ña nañi chata carga cuan.

⁵ Tandihí cha casacuví ra, cha cuñi ra na nyehe ñáyivi. Vatyí tahan ñi ra catyaa ra tuhun Nyoo tyaan ra ta soco ra chihin letra nahnu. Ta tahan ñi ra cacuihno ra sahna chihin adorno nañi.

⁶ Ta nu vaha ca, cuñi ra cunyicu ra vico, ta cachi ra. Ta nu vaha ca cuñi ra cunyicu ra chichi vehe ñuhu.

⁷ Ta nu chicá noo ra cacuñi ra vatyí cuhva ñáyivi nocumi chi ra chihin cha sahá xaan ñu ñáyivi chi ra. Ta cuñi tucu ra cha catyí ñu chi ra vatyí chito xaan ra.

⁸ Soco nyoho, ma cuhva ndo ityi cha catyí ñáyivi vatyí chitó xaan ndo. Vatyí tandihí nyoho, yañi ndo cuví. Ta noo ri ra chitó iyó, ta ican ra cuví Cristo.

⁹ Ta ma catyi ndo Sutu ndo chi ni-noo ra ñuhu ñáyívi ihya, vatyi iyó noo Sutu ndo, ta nyaá ra andívi.

¹⁰ Ta ma catyi ndo vatyi ra cuví nuu cuví ndo, vatyi noo ri maa ra Cristo cuví nuu.

¹¹ Ra cha sacuví tyiño nuu tandihí ca ra, ican ra cuan cuví ra cahnu ca nu nyicú ndo.

¹² Vatyi ra cahnu sahá chii, cunocuee ra. Ta ra ña cahnu sahá chii cucucahnu ra.

¹³ ¡Ndahvi nyoho ra sacuahá ley vehe ñuhu, ta ra fariseo! ¡Ndahvi nyoho cha sahá ndo tyi vaha ndo! Vatyi chasí ndo yuvehe nu nyacá ñaha Nyoo, tacuhva ma cuví quihví ñáyívi. Ta ni ri maa ndo ña quihví ndo ta ni ña chahá ndo cha quihví ñáyívi, ñu cuñí quihví.

¹⁴ ¡Ndahvi nyoho ra sacuahá ley ta ra fariseo, nyoho cha sahá ndo tyi vahá ndo! Vatyi tinyaá ndo vehe ñu chihí yí, tyi ña cuví tyiyahvi ñu ñáá xuhun tavá ndo síqui ñu. Ta yahá cuan, ta naha chicán tahvi ndo nu tuvi vatyi sahá ndo tyi vaha ndo. Ta cuenda cha sacuví ndo tyehe caa, cahnu ca tindocho cunyehe ndo.

¹⁵ ¡Ndahvi nyoho ra sacuahá ley vehe ñuhu, ta ra fariseo. ¡Sahá ndo tyi vaha ndo, soco ña ndicha ndo! Vatyi nducú xaan ndo cuhva na cunyicon ñáyívi chi ndo. Ta tatu cha nandihví ñu cuenda ndo, quiñi caa nicoo ñu saha ndo, ta ñima ca maa ndo. Ta cha tyicuan caa nyacuví ndo, ñihi ca sacuhún ndo chi ñu anyaya cha nuu maa ndo.

¹⁶ ¡Ndahvi nyoho ra ndahvi! Vatyi cuñí ndo saquehen ityi ndo chi ñáyívi, ¡soco cuaa ndo! Vatyi catyí ndo tatu noo ñu catyí ñu cha cusacuvi ñu noo cha cusacuvi ñu, ta tyanaha ñu chihin sívi vehe ñuhu, yucuan ña niñi cha sacuvi ñu. Soco tatu xuhun cuaan cha iyó vehe ñuhu cuan tyanaha ñu, yucuan ndicha, niñi cuñí chi cha sacuvi ñu, catyí ndo.

¹⁷ ¡Tondo xaan ndo ta cuaa ndo! ¿Nya cha niñi ca? ¿Atu niñi ca xuhun

cuaan cuan, o vehe ñuhu cha sacu ii chi xuhun cuaan cuan?

¹⁸ Ta suri catyí tucu ndo: “Tatu yihí ñu catyí ñu cha cusacuvi ñu cha cusacuvi ñu, ta tyanaha ñu cuenda arta cha yoso cha chahá cuenda ñu chi Nyoo, ña niñi cha sacuvi ñu. Soco tatu tyanaha ñu cuenda ofrenda cha yosó síqui arta cuan, yucuan ndicha niñi cuñí chi sacuvi ñu, catyí ndo.”

¹⁹ ¡Tondo xaan ndo ta cuaa ndo! ¿Nya cha niñi ca? ¿Atu niñi ca ofrenda o arta cuan cha sacu ii chi ofrenda cuan?

²⁰ Vatyi ñu tyanahá cuenda arta cuan, ñima cuenda ri cuan tyanaha ñu, soco cha cuenda tandihí cha yosó nuu ñandihí.

²¹ Ta ñu tyanahá cuenda vehe ñuhu cahnu, ñima cuenda vehe ñuhu ri cuan, soco cuenda Nyoo tyanahá ñu ñandihí, vatyi iyó ra yucuan.

²² Ta tyicuan caa tucu ñu tyanahá cuenda andívi, tyanahá tucu ñu cuenda tyayu Nyoo ta suri cha cuenda maa Nyoo ñandihí, tyi maa ra cuví ra nyaá nyacá ñaha yucuan.

²³ ¡Ndahvi nyoho ra sacuahá ley vehe ñuhu ta ra fariseo! sahá ndo tyi vaha ndo vatyi chahá ndo diesmo chi Nyoo cha cuví menta, ta añii, ta comino. Soco ña quichahá ndo tuhun cha niñi ca cha nyaá nu ley cha tahán chi sacuvi yo. Ta cuñun, cha sacuví yo cha vaha chihin tandihí ñáyívi, cha cundahvi cuñi yo chi ñu, cha chinó iñi yo chi Nyoo ta ma sandoo yo chi ra. Ican ihya cuñí chi sacuvi ndo, ta ma sandihí ndo cha cuhva ndo diesmo cuan ñandihí.

²⁴ Nyoho cuñí ndo casaquehen ityi ndo chi ñáyívi, soco cuaa ndo. Vatyi sacuita ndo noo tiyucun luhlu, soco coco ndo noo camellu. Cuatyí luhlu ri nyehe ndo ta ña sahá ndo cuenda cuatyí cahnu cuví cuan.

²⁵ ¡Ndahvi nyoho ra sacuahá ley vehe ñuhu ta ra fariseo, ra casaha tyi vaha! Vatyi ityi chata ri vasu ta ityi chata ri coho sanduvií ndo, soco ityi chichi ña sanduvií ndo. Vatyi chichi añima ndo tyitu ñohó cha quiñi caa. Chicá xiñi ndo cha ñihi ndo nu

cusuhu ndo, ta ña cuví chasaha ndo cha quiñi caa cha quichi cuvi xaan iñi ndo.

²⁶ ¡Ra fariseo cuaa cuví ndo! Sanduvii xihna ndo ityi chichi vasu ta coho, tyicuan ta cuvii tucu ityi chata.

²⁷ ¡Ndahvi nyoho ra sacuahá ley vehe ñuhu ta ra fariseo, ra casavaha chii! Vatyí cuví ndo tari noo ñaña ndiyi cha nacahyu, vatyí ityi chata chi tyaqui xaan, soco ityi chichi tyitu ñohó yiqui ndiyi, ta tandihí nuu cha quiñi caa.

²⁸ Tyicuan caa cuví nyoho. Vatyí ityi chata tari maa tyi vaha xaan ndo nuu ñáyivi, soco ityi chichi, tyitú ñohó cha cuendu ndo, ta cha quiñi caa.

²⁹ ¡Ndahvi nyoho ra sacuahá ley vehe ñuhu, ta nyoho ra fariseo! Sahá ndo tyi vaha ndo ta ña ndicha. Nyoho samá ndo ñaña ra profeta Nyoo ra chiyo ta cha naha. Ta nyoho nacahyu ndo ñaña ñáyivi vaha ñu chiyo ta cha naha.

³⁰ Ta yucuan ta catyí ndo! “Tyehe ta chiyo ndi quivi chiyo ñáyivi chahnu ndi, ma tyinyee ndi chi ra chahñi chi ra profeta Nyoo”, catyí ndo.

³¹ ¡Ma chihin yucuan ri! Suri maa ndo nacotó ndo vatyí vachi ndo tata ñu cachahñi chi profeta Nyoo.

³² ¡Vaha vityin, chaha chi cuhva savaha ndihí ndo cha quiñi caa cha quichaha savaha sutu chahnu ndo!

³³ ¡Nyoho ñu quiñi iyó, ñu vachi tata coo! ¿Yoso caa cucacu nyoho tacuhva ma cahun ndo anyaya? Ma cuvi.

³⁴ Yucuan chaha cutachi chi ra profeta Nyoo nu nyicú ndo, cutachi tiqui chi ra chiñi tuñi, ta ra sacuahá nu nyicú ndo. Soco nyoho cucahñi ndo chi ra ta cutyaa ndo chi suhva ra nu cruzi. Ta chi inga ra cucañi ndo chi ra chichi vehe ñuhu. Ta cacanyicon ndo chi ra tahan tahan ñuu.

³⁵ Yucuan chaha, siqui ndo cucun-yaa cuatyí cha cuenda cha cachihí tandihí ra vaha cha cachahñi ñu nyacua nya ra Abel ta nyacua nya ra Zacarías sehe ra Berequías ra cha chahñi ndo chichi vehe ñuhu yatyin

nu nyaá arta cha yosó cha chahá cuenda yo chi Nyoo.

³⁶ Cha ndicha catyí chi ndo, vatyí tandihí cuatyí ihya cucoso siqui ñáyivi cha iyó vityin —catyí ra Jesús chi ra.

Nu nducuihya iñi ra Jesús nyehe ra chi ñuu Jerusalén ta chacu ra

(Lc. 13.34-35)

³⁷ ¡Jerusalén, Jerusalén! ¡Ndahvi nyoho ñu iyó ñuu chiña! Vatyí chahñi ndo chi ra profeta Nyoo. Ta tuchí ndo yuu chi tandihí ra cha saquichí Nyoo nu nyicú ndo. Cuaha xaan chaha cuñi saha cuende chi ndo, tari noo ndivi cha sahá cuenda ti chi sehe ti, ta naquehén ndahvi ti chi ti chichi ndichin ti, soco ña cuñi ndo.

³⁸ Nyehe ndo vityin, vatyí cha sandoo ndahvi chi ndo.

³⁹ Vatyí catyí chi ndo, vatyí ma nyehe ca ndo chii nyacua nya chaa chi quivi cucatyí ndo tyehe caa: “Cahnu xaan ra cuví ra vachi chihin tunyee iñi sivi Sutu yo Nyoo”, cucatyí ndo —catyí ra Jesús.

24

Nu catyí ra Jesús vatyí cutani vehe ñuhu cahnu

(Mr. 13.1-2; Lc. 21.5-6)

¹ Quita ra Jesús chichi vehe ñuhu cahnu cuan, ta cha cuñi cahun ra, ta catuhva ra cachicá noo chihin ra chi ra, ta quichaha casañaha ra vehe ñuhu cuan chi ra.

² Soco nacahan ra Jesús ta catyí ra: —¿Atu nyehé ndo tandihí ihya? Cha ndicha catyí chi ndo, vatyí ihya ni noo yuu ta ma ndoo coso nyitahan. Tandihí ta cutani —catyí ra.

Nu catyí ra Jesús ñáa ndihí seña cucuvi cha ni cumañi ca naa ñáyivi

(Mr. 13.3-23; Lc. 21.7-24; 17.22-24)

³ Tyicuan ta cuahan coyo ra yucu yutun Olivo. Ta cuhva cha nyaá ra Jesús yucuan, ra cachicá noo chihin ra quichí coyo ra ta catyí xehe ra chi ra tyehe caa:

—Cuñi ndi cha catyun chi ndi, ama cucuvi tuhun cuan. ¿Ñáa seña cucuvi

cha cuquichun inga chaha ta cha cunaa ñayiví?

⁴ Tyicuan ta nacahan ra Jesús:

—Saha ndo cuenda chi ndo coto yóo cha sandahvi ñaha chi ndo.

⁵ Vatyí cuaha xaan ra cuquichi, ta cotyíño ra sívi, ta cucatyí ra tyehe caa: “Yuhu cuví Cristo ra cha saquichi Nyoo.” Ta cuaha ñu cusandaví ñaha ra.

⁶ Nyoho cuñihi ndo tuhun tyi iyó cuatyí ta cañí tahan ñáyiví ityi cuan ityi ihya. Soco ma nayuhvi ndo, vatyí tyicuan caa tahan maa chi cuvi. Soco ta chaa ca quiví cunaa ñayiví.

⁷ Vatyí ñáyiví noo ñuu cahnu, cucañi tahan ñu chihin ñáyiví inga ñuu cahnu. Ta cucoo cuatyí noo ñuu chihin inga ñuu. Ta cucoo soco, ta cucoo cuehe, ta cha taan nahnu cuaha ri ityi.

⁸ Tandíhi ihya ta nu cua quichaha ñáyiví nyehe ñu tindoho cuví.

⁹ Tyicuan ta cucuhva cuenda ñu chi nyoho vatyí sanyehe ra tindoho chi ndo. Ta cacahñi ra chi ndo. Ta tandíhi ñu iyó síqui ñuhu ñayiví cutasí cuñi nyehe ñu chi ndo cha cuenda yuhu.

¹⁰ Quiví cuan cuaha xaan ñu cusandíhi ñu cha chino iñi ñu chii, ta cutasí cuñi ñu nyehe ñu chi tahan ñu. Ta cunaxico tuhun ñu chi tahan ñu.

¹¹ Cuaha xaan ra cuendu cunatuvi, ta cucatyí ra vatyí cuenda Nyoo cacahan ra. Ta cuaha xaan ñáyiví cusandaví ñaha ra.

¹² Ta cuaha xaan cha quiñi caa cucoo. Yucuan chaha cuaha xaan ñu cusandíhi ñu cha cuñi ñu chi tahan ñu.

¹³ Soco ñu cha ña ndu uví iñi chino iñi chii nyacua nya nu ndíhi, cucacu añima ñu.

¹⁴ Ta cucutya nicahnu ñayiví tuhun vaha cha nyacá ñaha Nyoo añima ndo, tacuhva coto tandíhi ñáyiví iyó síqui ñuhu ñayiví, tyicuan ta cunaa ñayiví.

¹⁵ Tandíhi nyoho cha sacuahá ndo ihya, na cutuñi iñi ndo tuhun ihya: Ra Daniel, ra profeta Nyoo ta cha naha, tyaá ra tuhun noo cha sacuquiñí caa, noo cha sativí. Ta quiví nyehe ndo vatyí chaa ihya Nu Ii,

¹⁶ tyicuan ta ñu ñohó Judea, cuñi chi cono ñu ityi yucu.

¹⁷ Ta ñu yosó xiñi vehe, noo ñu, soco ma quihví ñu chichi vehe ñu tava ñu cha iyó chichi vehe cuan.

¹⁸ Ta ñu ñohó nu chiqui, ni ma cunuhu ca ñu cunaquehen ñu ni sahma ñu.

¹⁹ ¡Ndahvi ñusíhi cha cañohó sehe quiví cuan! O tatu iyó sehe ñu cha chaxín, ¡ndahvi ñu cuan!

²⁰ Cacan ndo chi Nyoo tacuhva cha ma tahan chi caca cono ndo quiví vichin, ni quiví nyitatú yo.

²¹ Vatyí cuaha xaan tindoho cucoo quiví cuan, noo tindoho cha ta coo ca maa nyata chino ñuhu ñayiví, ta ni ma coo ca cha yaha tuhun cuan.

²² Soco tatu Nyoo, ta ma sanducuti ra quiví cuan, yori maa cacu. Soco cusanducuti ra cha cuenda cha cuñi ra chi ñu nacachí maa ra.

²³ “Ta tatu yóo cha catyí chi nyoho: “Nyehe ndo, ma ra Cristo ihya” o “Nyehe ndo ma ra nyaá yucuan”, ma chino iñi ndo.

²⁴ Vatyí cuquichi coyo ra casandaví ñaha ta cucatyí ra vatyí ra Cristo cacuví ra. Ta cucatyí ra vatyí ra profeta Nyoo cacuví ra. Ta cusavaha ra seña ta milagru nahnu tacuhva casandaví ñaha ra. Nyacua nya ñu cha nacachí maa Nyoo ta cusandaví ñaha ra tatu cuví chi ra.

²⁵ Saha ndo cuenda vatyí cha yaha catyí chi nyoho cha ni cumañi ca cuvi.

²⁶ Yucuan chaha tatu catyí ñu chi ndo tyehe caa: “Nyehe ndo, ma ra Cristo nyaá nu chiqui ndíhi cuan”, catyí ñu chi ndo, ma cuhun ndo. O tatu catyí ñu chi ndo: “Nyehe ndo, ma ra nyaá chichi cuarto ihya”, ma chino iñi ndo.

²⁷ Vatyí tari noo cha quihví tacha cha nyehé yo cuxiño nya nu caña ñanyii ta nya nu quee ñanyii, tyicuan caa cucuvi quiví quichi yuhu Rayíi cha quichi nya gloria.

²⁸ Nu caá coño chíhi, yucuan cuchaa coyo chii.

Yoso caa cuquichi ra Cristo inga

chaha

(Mr. 13.24-37; Lc. 21.25-33; 17.26-30, 34-36)

²⁹ 'Ta cha yahá ri cha nyehé ñu t̄ndoho, ta cunduñaa ñanyii, ta yoo ma sacundichin ca chi. Ta tiño cu-canacoyo ti andiv̄i, ta nyacua nya cha iyó andiv̄i cunacanda.

³⁰ Tyicuan ta cuquetuvi noo seña ityi andiv̄i nu vachi yuhu Raȳi cha quich̄i nya gloria. Cuquichi nu vico ityi andiv̄i chihin tunyee iñi cahnu ta chihin cha cahnu cuv̄i Nyoo. Ta tandih̄i ñáyiv̄i iyó siqui ñuhu ñayiv̄i, cucuacu chaa xaan ñu cha nanyehe ñu chii.

³¹ Ta cutachi ángel cuende tacuhva vatyi chihin cha ñih̄i tiv̄i ra cutu ra ta cusandu ñin ri ra chi ñu nacach̄i maa Nyoo chi, cuquita ñu nicacahnu nu ñuhu ñayiv̄i, nyacua nya nu ndih̄i ñuhu ñayiv̄i ta nyacua nya nu ndih̄i andiv̄i.

³² 'Cutuñi iñi ndo noo cuhva yutun cha nañi higo: Tatu cha yutya soco tun, ta caña ndaha tun, nyoho cha chitó ndo vatyi cha vachi vico savi.

³³ Ta suri tyicuan caa, tatu cha nyehé ndo tandih̄i maa cha cucuvi ihya, coto ndo vatyi cha cuyatyin quichi. Cha nyañái yuvehe cuv̄i chi cuan.

³⁴ Cha ndicha catyí chi ndo vatyi tandih̄i tuhun ihya, cucuvi cha ni ri ca cha iyó ñáyiv̄i.

³⁵ Andiv̄i ta ñuhu ñayiv̄i cundih̄i chi, soco tuhun cahán yuhu, ma ndih̄i chi. Ta cuchino cava tandih̄i tuhun cahin chihin ndo ihya.

³⁶ 'Soco quiv̄i ta cuhva cha cucuvi cuan, yori chitó, ni ángel andiv̄i ta ña chitó ra. Ni yuhu Raȳi cha quich̄i nya gloria ta ña chité. Noo tuhun ri maa Nyoo Suti chitó ra.

³⁷ 'Tari cuv̄i quiv̄i chiyó ra Noé, tyicuan caa cucuvi quiv̄i quichi tucu yuhu Raȳi cha quichi nya gloria.

³⁸ Quiv̄i ta ni cumañi ca coon savi xaan, ñáyiv̄i cuan, chachí ñu, ta chih̄i ñu, tandahá ñu, ta chahá ñu chi sehe ñu tandaha nyacua nya quiv̄i quihv̄i ra Noé chichi barcu cuan.

³⁹ Ta sana iñi ñu ta chaḡ savi ta tyañi tandih̄i ñu. Ta tyicuan caa cucuvi

tucu quiv̄i quichi tucu yuhu Raȳi cha quich̄i nya gloria.

⁴⁰ Quiv̄i cuan, tu uvi ra ñohó ra nu chiqui. Noo ra cunaquehin, ta noo ra ndoo ra.

⁴¹ Tu uvi ñusih̄i nyicó ñu molinu. Noo ña cunaquehin, ta noo ña ndoo ña.

⁴² Cuḡtu tuhva vaha ndo vatyi ña chitó ndo ñáá cuhva cuquichi ra nyacá ñaha chi ndo.

⁴³ Soco coto ndo tuhun ihya vatyi tatu noo chitoho vehe ta chitó ra ñáá cuhva cuquihv̄i ra suhu chichi vehe ra, cuatu tuhva vaha ra ta ma cuhva ra cha quihv̄i ra suhu cuan.

⁴⁴ Yucuan chaha nyoho, cuḡtu tuhva ndo. Vatyi sana ri iñi ndo, ta cuquichi yuhu Raȳi cha quichi nya gloria.

Ñu cha nyatú tuhva na ndichi ra Cristo, ican ñu cuv̄i musu vaha ra (Lc. 12.41-48)

⁴⁵ 'Noo musu cha tyasohó tuhun cahán chitoho, ta tyicuan ri sacuv̄i ra tyiño tyaa ra chi ra, yucuan cuv̄i noo musu vaha. Ta sahá cuenda ra vehe chitoho ra. Ta chahá ra cha cachi inga musu cha vahri cuhva.

⁴⁶ Ta sīi xaan cuv̄i chi musu cuan tatu cuhva cha sahá tyiño ra ta nachaa chitoho ra. Vatyi quichahá ra tandih̄i cha tahán chi sacuvi ra.

⁴⁷ Ta cha ndicha catyí chi ndo, vatyi chitoho ra cunatyaa ra tandih̄i cha cumí ra ndaha ra, vatyi vaha quichahá ra chihin tyiño sahá ra.

⁴⁸ Soco tatu noo musu quiñi iyó ta chicá xiñi ra vatyi naha cuahan chitoho ra,

⁴⁹ ta quichaha nyacuvi ra cha ña vaha chihin inga musu cuan, ta quichaha chachi ra ta chih̄i ra ndixi chihin ra chiñi,

⁵⁰ tyicuan ta sana iñi ra ta ndichi chitoho ra quiv̄i cha ña nyatú ra chi ra.

⁵¹ Tyicuan ta chitoho ra ñih̄i xaan cutachi tuñi ra chi ra chihin ñáyiv̄i quiñi iyó cha savaha chii soco ña ndicha. Tyicuan ta cucuacu ra ta cusacahñi ra noho ra.

25

Nu chahá ra Jesús noo cuhva cuenda uchi tahan ñu tyivaa

¹ 'Cha nyacá ñaha Nyoo añima ñáyivi cuví chi tari uchi tahan ñu tyivaa cha quehen ñu lámpara cha yihí acetye ta cuahan coyo ñu noo vico tandaha cua quehen cuenda ñu chi ra cha cua tandaha.

² Ohon tahan ñu, tondo xaan ñohó iñi ñu, ta ohon tahan ñu cachi xaan ñohó iñi ñu.

³ Ñu cha tondo ñohó iñi cuan, canyisó ñu lámpara ñu soco ña quehen ñu suhva ca acetye vatyí natyihí ñu chichi lampara ñu tatu ndihi.

⁴ Soco ñu cachi ñohó iñi cuan, canyisó sñn ñu yutyí acetye chihin lámpara ñu.

⁵ Ta vatyí cucuee ca chaa ra cha cua tandaha cuan, catiñ ñumahna chi tandihí ñu, ta caquixí ñu.

⁶ Tyicuan ta ñáá cuhva ñuu, ta chiñi ñu noo ndusu cha catyí tyehe caa: "¡Cha vachi ra cha cua tandaha! ¡Quita ndo, quehen cuenda ndo chi ra!" catyí ndusu cuan.

⁷ Tandihí ñu tyivaa cuan canducuita coyo ñu ta quichaha casanduvaha ñu lámpara ñu.

⁸ Tyicuan ta quichaha catyí ohon ñu tondo ñohó iñi cuan chi inga ohon ñu cuan: "Cuhva ndo suhva acetye ndo chi ndi, vatyí cuñí ndahva lámpara ndi", catyí ñu.

⁹ Soco ñu tyivaa cha cachi ñohó iñi cuan nacahan ñu tyehe caa: "Ma cuhva ndi vatyí coto ma ñihi, ni cha cuenda maa ndi ta ni cha cuenda maa ndo. Cuahan taxi ndo nya nu quiyahví chi, ta sata ndo cha cuenda ndo."

¹⁰ Soco cha ni ri ca cha cuahan coyo ndi ohon ñu cha tondo ñohó iñi cuan, cua sata ñu acetye, ta chaa ra cha cua tandahá cuan. Ta ñu tyivaa cha nyatú tuhva cuan, quihví coyo ñu chihin ra chichi vehe nu cuacoo vico tandaha cuan. Ta nicunyasí ri yuvehe.

¹¹ Yaha cuan ta cachaa coyo tucu ñu chisata acetye cuan, ta catyí ñu:

"¡Tata! ¡Tata! ¡Nuña yuvehe naquihví ndi!"

¹² Soco maa ra nacahan ra, ta catyí ra: "Cha ndicha vatyí ña ñohó nui chi nyoho."

¹³ Tyicuan ta quichaha catyí ra Jesús:

—Cuatu tuhva ri nyoho, vatyí ña chitó ndo nya quivi ta ñáá cuhva cuquichi yuhu Rayi cha quichi Nya gloria.

Noo cuhva cuenda xuhun (Lc. 19.11-27)

¹⁴ 'Cha nyacá ñaha Nyoo añima ñáyivi cuví chi tari noo ra cha cha nyaá cha cua quita cuhun inga ñuu. Ta cana ra chi musu ra, ta chaha cuenda ra xuhun chi ra.

¹⁵ 'Chi noo ra chaha ra ta cha ohon mil xuhun, ta chi inga ra chaha ra ta cha uvi mil, ta chi inga ra tari noo mil. Chaha ra chi noo noo ra yoso cuhva cha cuví saha tyiño ra chihin. Tyicuan ta cuahan ra.

¹⁶ Musu cha quehen cuenda ohon mil xuhun cuan, saha ra lucha chihin xuhun cuan, ta saha ganaa ra nonga ohon ca mil chihin xuhun cuan.

¹⁷ Ta suri tyicuan caa tucu ra cha quehen cuenda uvi mil cuan, saha ganaa ra uvi ca mil chihin xuhun cuan.

¹⁸ Soco ra cha quehen cuenda noo ri mil cuan, chahan ra ta chatya ra noo yavi chichi ñuhú ta tixehe ra xuhun chitoho ra.

¹⁹ 'Cuaha quivi yaha ta nachaa chitoho musu cuan. Ta quichaha natava ra cuenda chihin noo noo ra.

²⁰ Xihna ca ra cha quehen cuenda ohon mil xuhun cuan chaa, ta nacuhva cuenda ra ohon ca mil siqui cuan, ta catyí ra: "Tata, ohon mil chahun chii, ma inga ohon mil ihya cha saha ganai."

²¹ Ta chitoho ra catyí ra chi ra: "Vaha. Noo musu vaha xaan cuvún. Ta sacuvun tandihí cha catyí. Ta vasi chiin ri xuhun chahi chuun soco vaha xaan chotyínon chí chi. Vityin cuaha ca cucuhva cuende chuun. Quihví nu vaha ihya, ta cusí cuñun chihin."

22 Yaha cuan ta chaa tucu musu cha quehen cuenda uvi mil xuhun cuan, ta catyí ra: “Tata, uvi mil chahun chii, ma uvi ca mil ihya cha saha ganai siqui.”

23 Ta catyí chitoho ra chi ra: “Vaha. Noo musu vaha xaan cuvún, ta sacuvún cha catyí. Vasi chiin ri xuhun chahí chuun soco vaha xaan chotyíñon chi chi. Vityin cuaha ca cucuhva cuende chuun. Quihvi nu vaha ihya, ta cusii cuñun chihin”, catyí ra.

24 Soco cuhva cha chaa musu cha quehen cuenda noo mil ri xuhun cuan, catyí ra chi chitoho ra: “Tata, yuhu chité vatyi cuvún noo ra xaan ta cuñun naquehún xuhun noo nu ña sahá tyiñon, ta cuñun naquehun cosecha noo nu ña tachun.

25 Yucuan chaha nayuhvi ta chahin ta tyihí xehi xuhun chichi ñuhú. Soco ma xuhun ihya cha chahun chii”, catyí ra.

26 Tyicuan ta nacahan chitoho ra, ta catyí ra chi ra: “Musu quiñi iyó ta musu suchan cuví yoho. Tatu chitón vatyi cuñi naquehín nu ña saha tyiñe, ta quehín cosecha noo nu ña tachí,

27 ¿ñáá tuhun ña chityihun xuhin banco? Ta cha ndichi ta, cunaquehin xuhun cuan chihin xuhun siqui cha saha ganaa chi”, catyí ra.

28 Tyicuan ta quichaha catyí ra chi ñu nyicú cuan: “Tinyaa ndo noo mil xuhun cha nyisó ra, ta cuhva ndo chi ra cha nyisó uchi mil.

29 Vatyi ñu iyó chii, cuhva que chi ñu, ta coo cuaha chi ñu, nyacua ndoo ca. Soco ñu ñahri chii, nyacua nya cha chiin cha cumí ñu, cutinyaa ndihi chi ñu.

30 Ta musu cha ña chiñuhú ihya, tuchi ndo chi ra nu ñaa iñi ityi chata, ta yucuan cuacu chaa ra, ta cusacahñi ra noho ra chihin cha nyehe ra tindoho.”

Nu catyí ra Jesús vatyi cucutuñi chi tandihi ñáyivi

31 'Quiivi cuquichi yuhu Rayi cha quichi nya gloria, cuquichi chihin

cuaha ángel cuende, ta cucunyai tyayu tyaqui ta cunyaca ñahi.

32 Ñáyivi tandihi ri ñuu cundu in ri ñu nui. Ta cusasiin chi noo noo ñu, tari ra sahá cumi mbee tavá siin ra chi mbee ta tava siin ra ndixihyu.

33 Ta cucuatyai chi mbee cuan chiyo vahi, ta chi ndixihyu cuan, chiyo satyin.

34 Tyicuan ta yuhu cha cuví Rey cucatyí chi ñu nyicú chiyo vahi: “Ñaha nyoho vatyi nyoho ñáyivi cha nasocó Suti cuví ndo. Quehen cuenda ndo nu cuacunyaa ndo nu nyacá ñaha Nyoo, vatyi cha cuenda maa ndo chino ihya nyata quivi savaha Nyoo ñuhu ñáyivi.

35 Vatyi quivi chisoque, ta nyoho chaha ndo cha cachi. Quiivi cu ityi ndutya ta chaha ndo cohi. Ta quivi chica noi tari ra inga ñuu ta nyoho chaha ndo vehe coi.

36 Quiivi cumañi sahme, ta nyoho chaha ndo sahme. Quiivi cuhvi ta nyoho chahan ndo chinyehe ndo chii. Ta quivi ñohi vehe caa, ta quichi nyehe ndo nu ñohi.”

37 Ta ñu cha vaha cuan cundaca tuhun ñu chii, ta catyí ñu: “Sutu Mañi yuhu, ¿ama nyehe ndi chisocon, ta chaha ndi cha cachun? ¿Ama nyehe ndi ityun ndutya ta chaha ndi cohun?

38 ¿Ama nyehe ndi chuun chicá noun tari ra inga ñuu ta chaha ndi vehe coun? ¿Ama cumañi sahmon, ta chaha ndi chuun?

39 ¿Ama nyehe ndi cuhvún, o ñohún vehe caa, ta chahan ndi chinyehe ndi chuun?” cucatyí ñu.

40 Ta yuhu cha cuví Rey cucatyí chi ñu: “Cha ndicha catyí chi ndo, vatyi tandihi tumañi iñi sacuvi ndo chihin ra ndahvi, ra yañi ihya, chi yuhu sacuvi ndo tumañi iñi cuan.” Tyicuan caa cucatyí yuhu chi ñu.

41 Tyicuan ta yuhu cha cuví Rey cucatyí tiqui chi ñu nyicú chiyo satyin tyehé caa: “Canyaha ndo nui, nyoho ñu tahan chi cuhún anyaya. Cuahan ndo nu ñuhu cha ma ndahva ca maa. Vatyi yucuan cuví nu chino cha cuenda cuihna ta cha cuenda tatyí ña vaha cuenda ra.

42 Vatyí chisoque, ta nyoho ña chaha ndo cha cachi. Cu ityí ndutya, ta ña chaha ndo ndutya cohi.

43 Chica noi tari chicá noo ra inga ñuu, ta ña chaha ndo nu coi. Cumañi sahme ta ña chaha ndo sahma cuihne. Cuhvi ta ñohi vehe caa, soco ña chahan ndo chinyehē ndo chii nu ñohi”, cucatyí chi ñu.

44 Tyicuan ta cucatyí ñu chii tyehe caa: “Sutu Mañi yuhu, ¿ama nyehe ndi chisocon, o ityun ndutya, o chicán noun tari ra inga ñuu, o ñahri sahmon, o cuhvun, o ñohun vehe caa, ta ña tyinyee ndi chuun?” cucatyí ñu.

45 Ta yuhu cha cuví Rey cucatyí chi ñu tyehe caa: “Cha ndicha catyí chi ndo vatyí tandihí maa cha ña sacuvi ndo chi ñáyivi ndahvi ihya, suri ña sacuvi tucu ndo chi yuhu cuví cuan”, cucatyí yuhu chi ñu.

46 Tyicuan ta ñu cuan cuhun coyo ñu nu cayú ñuhu cha ma ndahva ca maa. Ta ñáyivi vaha cuan cuhun ñu cucoo ñu noo ñáyivi cha ma naa ca maa.

26

Nu canducu ra cuhva yoso caa catiñ ra chi ra Jesús

(Mr. 14.1-2; Lc. 22.1-2; Jn. 11.45-53)

1 Cuhva cha ndihí catyí ra Jesús tuhun ihya, ta quichaha catyí ra chi ra cachicá noo chihin ra tyehe caa:

2 —Nyoho chitó ndo vatyí uvi ca quivi ta sanducahnu yo vico pascua. Ta yuhu Rayi cha quichi nya gloria cucuhva cuenda ñu chii vatyí tyaa ñu chii nu cruzi —catyí ra.

3 Quivi cuan ra cacuví nuu chi tata sutu, ta ra casacuahá ley vehe ñuhu, ta ra cacuví mandoñi ñu Israel, candu iñ ri ra nuquehe vehe tyiño ra Caifás, ra cuví nuu chi tata sutu.

4 Yucuan casandaá ra tyiño yoso caa ta sandavi ñaha ra chi ra Jesús ta catiñ ra chi ra ta cacahñi ra chi ra.

5 Soco cacatyí ra:

—Ma cahñi yo chi ra cha ni ri ca cha chichi vico, tacuhva cha ma naquiqui xaan ñáyivi —catyí ra.

Nu chosó noo ñaha sihi ndutya vixi chahan xiñi ra Jesús

(Mr. 14.3-9; Jn. 12.1-8)

6 Ra Jesús ñohó ra ñuu Betania, vehe ra Simón, cha catyí ñu Ra Tyahyu Coño chi, sivi saca ra cuví cuan.

7 Ta tuhva noo ñaha nu nyaá ra Jesús, nyisó ña noo yutyí tyitú yihí ndutya vixi chahan. Ta yahvi xaan nyaá ndutya cuan. Ta ra Jesús nyaá ra yuhu mesa ta choso ña ndutya cuan xiñi ra.

8 Cuhva cha cananyehe ra chicá noo chihin ra cacuxaan ra ta quichaha catyí ra:

—¿Ñáá tuhun cha sativi ña ndutya vixi chahan cuan?

9 Vaha ca tyehe ta xico ña, ta ñihi ña cuaha xuhun chihin ta tyinyee ña chi ñu ndahvi chihin xuhun cuan —catyí ra.

10 Tyicuan ta chiñi ra Jesús, ta catyí ra chi ra:

—¿Ñáá tuhun cha sayangá ndo chi ñaha ihya? Vatyí cha sacuvi ña chihin, noo cha vaha cuví.

11 Vatyí ñu ndahvi tyicuan ri cun- yaa ñu chihin ndo, soco yuhu, ñima tyicuan ri cua cunyai chihin ndo.

12 Choso ña ndutya vixi chahan siqui coño ñuhi, vatyí sanduvaha ña cuenda cha cohin chichi ñuhú.

13 Cha ndicha catyí chi ndo, vatyí tandihí ri nu cahan ñu tuhun Nyoo nicahnu ñáyivi, cunacatyí tucu ñu cha sacuvi ñaha ihya, tacuhva nicohon iñi ñáyivi chi ña —catyí ra Jesús.

Nu naxico tuhun ra Judas Iscariote chi ra Jesús

(Mr. 14.10-11; Lc. 22.3-6)

14 Tyicuan ta noo ra chicá noo chihin ra Jesús, ra cha nañi Judas Iscariote, chahan ra chicahan ra chihin ra cacuví nuu chi tata sutu.

15 Ta catyí ra chi ra:

—¿Yoso cuhva ndo chii tatu cuhva cuende chi ra Jesús chi ndo?

Tyicuan ta ra cacuví nuu cuan cacatyí ra vatyí oco uchi tahan xuhun cuichin.

16 Ta nya cuhva cuan ta quichaha nducu ra Judas ñáá noo cuhva cuví

nacuhva cuenda ra chi ra Jesús chi ra cacuví nuu chi tata sutu cuan.

Nu cuxiñi ra Jesús chihin ra cachicá noo chihin ra

(Mr. 14.12-25; Lc. 22.7-23; Jn. 13.21-30; 1 Co. 11.23-26)

¹⁷ Quiñi xihna ri cha quichaha vico ta chachí ñu pan cha ñahri yuchan iya yihí chihin, ra cachicá noo chihin ra Jesús tuhva ra chi ra ta quichaha candaca tuhun ra chi ra:

—¿Nya cuñun cha sanduvaha ndi cha cuxiñun cuenda vico pascua ihya?

¹⁸ Ta catyí ra Jesús chi ra:

—Cuahan ndo chichi ñuu ta cha ndo vehe noo ra cuan. Ta catyí ndo chi ra: “Ra Sacuaha catyí ra vatyí cha cuyatyin cua cúvi ra, ta vehun cusanducahnu ndi vico pascua”, catyí ndo chi ra —catyí ra Jesús.

¹⁹ Tyicuan ta casacuví ra tari cuhva catyí ra Jesús chi ra. Yahá cuan ta casanduvaha ra cha cacuxiñi ra cha vico pascua cuan.

²⁰ Cuhva cha cuaa, chicunya ra Jesús nu mesa chihin ndi uchi uvi ra chicá noo chihin ra.

²¹ Ta cha ni ri ca cha cachachí ra, catyí ra Jesús chi ra:

—Cha ndicha catyí chi ndo vatyí noo nyoho cucuhva cuenda ndo chii chi ra xaan iñi chii.

²² Ta canducuihya xaan iñi ra, ta quichaha candaca tuhun ñin ñin ra chi ra ta cacatyí ra:

—Sutu Mañi yuhu, ¿atu yuhu cuví?

²³ Ta nacahan ra Jesús ta catyí ra:

—Ra cha chachí ñin ri coho chihin, ican ra cuan cua na cuhva cuenda chii.

²⁴ Yuhu Rayi cha quichi nya gloria, cuahin ityi cha catyí nu tutu tuhun Nyoo. Soco ndahvi ra ndahvi cha cunacuhva cuenda chii. Quitá vihi ca cuenda chi ra, tyehe ta ña cacu taxin ra —catyí ra Jesús.

²⁵ Tyicuan ta nacahan ra Judas, ra cha cua cuhva cuenda chi ra, ta catyí ra:

—Maestro, ¿atu yuhu cuví?

Ta nacahan ra Jesús, ta catyí ra:

—Ican yoho cuvún.

²⁶ Cha ni ri ca cha cachachí ra, ra Jesús quehen ra pan ta nacuhva ra tyahvi nyoo chi Nyoo, ta cha yahá tahvi sava ra, ta chaha ra chi ra cachicá noo chihin ra, ta catyí ra:

—Cachi ndo. Ican ihya cuví coñe.

²⁷ Yahá cuan ta quehen tucu ra copa, ta nacuhva ra tyahvi nyoo chi Nyoo, ta sayaha ra chi tandihi ra ta catyí ra:

—Coho tandihi ndo ihya.

²⁸ Vatyí ican ihya cuví ñiñi. Ta chihin ñiñi natyihí tahan Nyoo tuhun chaa chihin ndo, vatyí cucati ñiñi cha catyí cha vaha chi cuaha ñu, vatyí chihin ñiñi coo tichahnu iñi cuatyí ñu.

²⁹ Soco catyí chi ndo, vatyí ma coho que tahan vinu tichaha ndivi ihya, nyacua nya cha cohi vinu chaa chihin ndo nya nu nyacá ñaha Suti andivi —catyí ra.

Nu catyí ra Jesús vatyí cucatyí ra Pedro vatyí ña ñohó nuu ra chi ra

(Mr. 14.26-31; Lc. 22.31-34; Jn. 13.36-38)

³⁰ Cha yahá cha cachita ra yaa chi Nyoo, ta cuahan coyo ra yucu yutun Oliyo cuan.

³¹ Tyicuan ta quichaha catyí ra Jesús chi ra:

—Tandihí nyoho ta cucaca uvi iñi ndo cha nyicón ndo chii vityin cha cuaa. Vatyí nu tutu Nyoo catyí chi tyehe caa: “Cukahni chi ra sahá cumi mbee, ta mbee cuquiti cuatyí ti”, catyí chi.

³² Soco cha yahá nandote, xihna que cuhin Galilea, ican saha nyoho.

³³ Tyicuan ta nacahan ra Pedro ta catyí ra:

—Vasi tandihí ra ndu uvi iñi ra cha nyicón ra chuun, soco yuhu ma ndu uvi iñi.

³⁴ Tyicuan ta quichaha catyí ra Jesús chi ra:

—Cha ndicha catyí chuun vatyí suri maa cha cuaa ihya, cha ni cumañi ca cuacu loho, yoho cucatyun uñi chaha vatyí ña ñohó nuun chii —catyí ra.

³⁵ Ta ra Pedro catyí ra:

—Vasi cúvi chuhun, soco ma catyi cha ña ñohó nui chuun —catyi ra.

Ta suri tyicuan caa catyi tandihí ra chicá noo chihin ra.

Nu chicán tahvi ra Jesús chi Nyoo nu cuví Getsemaní

(Mr. 14.32-42; Lc. 22.39-46)

³⁶ Tyicuan ta chaá ra Jesús chihin ra cachicá noo chihin ra noo nu nañi Getsemaní, ta catyi ra chí ra:

—Cunyicu ndo ihya, cha niri ca cha cuahin yucuan, cua cacan tahvi.

³⁷ Ta quehen ra chí ra Pedro ta chí nì nduvi sehe ra Zebedeo, cuahan coyo chihin ra. Ta quichahá nducuihya cuñi ra, ta tyoño xaan cuñi ra.

³⁸ Tyicuan ta catyi ra chí ra:

—Cahnu xaan tucuihya iñi nyaá añime. Nyacua cuñi chí cahñi chí chii. Ndo ndo ihya ri ta conyito ndo chihin —catyi ra.

³⁹ Tyicuan ta cuahan ra Jesús chiin ca ityi nuu ca ta chicuiñi chiti ra ta chacun ra nuu ra nu ñuhú, ta chican tahvi ra chí Nyoo ta catyi ra:

—Sutu Mañi yuhu, tu yoho ta cuñun, cuhva cha ma nyehi tindoho ihya. Soco ma cuvi tari cuhva cha cuñi mai, soco tari cuhva cuñi maun na cuvi —catyi ra.

⁴⁰ Tyicuan ta nachaa ra nu nyicu ra cachica noo chihin ra, ta nyehe ra vatyí caquixí ra. Ta catyi ra chí ra Pedro tyehe caa:

—¿Atu ni minoo hora ña cuví conyito ndo chihin?

⁴¹ Conyito ndo, ta cacan tahvi ndo tacuhva cha ma cuvi chasaha cuihna chí ndo. Cha ndicha vatyí añima ndo, cuñi xaan chí nanducu chí Nyoo, soco coño ñuhu ndo vita cuñi chí —catyi ra Jesús chí ra.

⁴² Nu cu uvi chaha chahan ra, ta chican tahvi ra tyehe caa:

—Sutu Mañi yuhu, tatu ma cuvi cha ma nyehi tindoho ihya, tu tyicuan caa, na cuvi maa cuhva cuñún —catyi ra.

⁴³ Tyicuan ta nachaa ra inga chaha ta caquixí tucu ra cachicá noo chihin ra, vatyí nicunyasi maa chiti nuu ra chihin cha cacuñi ra cusu ra.

⁴⁴ Tyicuan ta sandoo ra chí ra, ta cuahan ra cha cu uñi chaha cua cacan tahvi ra. Ta catyi ra suri maa tuhun cha yahá cahan ra cha chican tahvi ra chí Nyoo.

⁴⁵ Tyicuan ta nachaa ra nu canyicu ra cachicá noo chihin ra, ta catyi ra chí ra:

—Vityin ndicha, cusu ndo ta nyitatu ndo. Vatyí cha chaá cuhva cha cua nacuhva cuenda ra chí chí ra quiñi iyó, ta Rayñi cha quichi nya gloria cuví.

⁴⁶ Ndícuita ndo, ta coho ndo. Vatyí cha vachi ra cha cunacuhva cuenda chí —catyi ra Jesús.

Nu catiñ ra xaan iñi chí ra Jesús cuahan ra vehe caa

(Mr. 14.43-50; Lc. 22.47-53; Jn. 18.2-11)

⁴⁷ Ni cahán ca ra Jesús tuhun ihya, ta chaá ra Judas, ta ra Judas cuví noo ra chicá noo chihin ra Jesús. Ta cuaha ra vachi coyo chihin ra, canyisó ra mityi ta yutun. Ra cuví nuu chí tata sutu, ta ra cacuvi mandoñi ñu Israel, ican tachí chí ra.

⁴⁸ Ra Judas, ra cha chahá cuenda chí ra Jesús, cha yahá chahá ra noo seña chí ra cuan, tacuhva coto ra yóo chí tñin ra. Ta catyi ra:

—Ra cha cutyayuhi chí, ican ra cuan cuví. Tñin ndo chí ra.

⁴⁹ Tyicuan ta tuhva ra chí ra Jesús ta catyi ra:

—Nocumi chuun, Maestro.

Ta tyayuhú ra chí ra.

⁵⁰ Tyicuan ta nacahan ra Jesús ta catyi ra chí ra:

—Amigo, sacuvi ñáá tyiño vachun.

Tyicuan ta catuhva ra ta catiñ ra chí ra Jesús.

⁵¹ Tyicuan ta noo ra ndihí chihin ra Jesús, tava ra mityi ra ta chahnya ra soho noo musu ra cuví nuu chí tata sutu cuan.

⁵² Ta catyi ra Jesús chí ra:

—Natyihí mityun chichi vena. Vatyí tandihí ñu cacañi tahan chihin mityi, suri chihin mityi cúvi ñu.

⁵³ ¿Atu ña chitón vatyí tatu yuhu ta cuñi, cuví caquen chí Suti, ta maa ra

cutachi ra vityin vityin yaha ca uñi xico uchi mil ángel, ta sacacu ra chii?

⁵⁴ Soco tatu tyicuan caa, ¿yoso caa chino cava cuhva nyaá nu tutu Nyoo? Vatyí catyí chi tyi tahán maa chi cuvi chi yuhu tyehe caa —catyí ra.

⁵⁵ Ta catyí tucu ra Jesús chi ñáyivi:

—¿Atu vachi coyo nyoho vachi t̄in ndo chii chihin cha xaan ta chihin yutun? Tari cha noo ra suhu cuví yuhu sahá ndo. Ndiq̄ivi chinyaj̄ sañahi nu nyicú ndo chichi vehe ñuhu cahnu, soco ña t̄in ndo chii cha cuhin vehe caa.

⁵⁶ Vatyí tandih̄i cha cuví chii vityin, ta chicunyaá nu tutu Nyoo, cha catyaa ra profeta Nyoo ta cha naha.

Tyicuan ta nd̄i ra cachicá noo chihin ra, cachino ra. Noo tuhun ca maa ra Jesús casando ra.

Nu cutuñi chi ra Jesús nuu ra cacuví tyiño cuenda ñu Israel

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ Ta ra cha cat̄in chi ra Jesús cuan, chinyac̄a ra chi ra nuu ra Caifás, ra cuví nuu chi tata sutu. Suri yucuan canyicú ñin ri ra sacuah̄a ley vehe ñuhu ta ra cacuví mandoñi.

⁵⁸ Soco ra Pedro cuahan ra chata ra, nya sava ri nya nuquehe vehe ra cuví nuu chi tata sutu cuan. Ta quih̄vi ra ta ndo ra nyaá ra chihin policia cuan, vatyí nyehe ra yoso caa quita tuhun cuan.

⁵⁹ Ra cacuví nuu chi tata sutu, ta ra cacuví mandoñi, ta tandih̄i ra cuví tyiño, canducu ra noo cuatyí catyaa ra siqui ra Jesús, vasi ña ndicha, tacuhva vatyí chihin cuatyí cuan ta cuví cahñi ra chi ra.

⁶⁰ Soco ña cañih̄i maa ra cuatyí ra, vasi cuaha ñáyivi chahan ñu chicatyí ñu cuendu siqui ra. Soco nu ndih̄i tuhun, chaá coyo uvi ca testigu cuendu.

⁶¹ Ta cacatyí ra:

—Ra ihya, catyí ra vatyí cuví satani ra vehe ñuhu cahnu Nyoo, ta chichi cha uñi quivi cunacananyaa ra inga chaha, na —cacatyí ra.

⁶² Tyicuan ta ra cuví nuu chi tata sutu cuan, ndicuita ra, ta catyí ra chi ra Jesús:

—¿Atu ña nacahun nu cahan ra ihya? ¿Ñáá cha cuvi cha cacatyí ra ihya sicun?

⁶³ Soco ra Jesús taxi ri nanyaá ra. Tyicuan ta quichah̄a catyí ra cuví nuu chi tata sutu cuan chi ra:

—Chihin sivi Nyoo nyitó, catyí chuun vatyí catyun cha ndicha vaha. ¿Atu ra Cristo Sehe Nyoo nyitó cuví chuun? —catyí ra.

⁶⁴ Ta catyí ra Jesús chi ra:

—Ican cuví, tari cuhva catyí maun. Ta suri catyí chi ndo, vatyí cunyehe ndo chi yuhu Rayi cha quichi nya gloria, cunyai chiyo vaha Nyoo ra iyó tandih̄i tunyee ñni chii, ta cunyehe ndo nu quichi tiqui nu vico ityi andivi —catyí ra.

⁶⁵ Tyicuan ta ra cuví nuu chi tata sutu cuan chahnya ra sahma ra tari noo seña tyi cuñi maa ra tyi ña vaha cha cahan ra Jesús, ta catyí ra:

—Ra ihya chicoo cuatyí ra nuu Nyoo chihin tuhun cahan ra. ¡Nyeh̄e ndo vityin! Ña ñni cha tava yo cha ndaa. Nyoho cha chiñi ndo tuhun ña vaha cahan ra.

⁶⁶ ¿Ñáá catyí ndo vityin?

Ta canacahan ra ta cacatyí ra:

—Iyó cuatyí ra, ta cuñi chi cha cúvi ra.

⁶⁷ Tyicuan ta catyicus̄i ra nuu ra ta cacañi ra chi ra. Inga ra cacatu ra nuu ra chihin chiqui ra.

⁶⁸ Ta cacatyí ra chi ra:

—Yoho, cha sahún Cristo chuun. ¡Nacoto yóo cha cañi chuun!

Nu catyí ra Pedro vatyí ña ñohó nuu ra chi ra Jesús

(Mr. 14.66-72; Lc. 22.56-62; Jn. 18.15-18, 25-27)

⁶⁹ Cha ñiri ca cha nyaá ca ra Pedro nuquehe ityi chata cuan, ta noo ñaha cha cuví musu tata sutu cuan, tuhva ña nu nyaá ra ta catyí ña chi ra:

—Yoho tucu chica noun chihin ra Jesús, ra Galilea cuan.

⁷⁰ Ta ra Pedro catyí ra vatyí ña ñohó nuu ra chi ra nuu tandihí ñu nyicú cuan, ta catyí ra:

—Ña chité ñáá tuhun cahún.

⁷¹ Tyicuan ta cuahan ra Pedro ityi yuvehe, ta nyehe inga ña chi ra, ta catyí ña chi ra nyicú cuan:

—Suri chicā noo tucu ra ihya chihin ra Jesús, ra ñuu Nazaret cuan —catyí ña.

⁷² Ta inga chaha tucu tixehe ra Pedro cha ñohó nuu ra chi ra ta catyí ra:

—Cha ndicha vaha tyi ña ñohó nui chi ra cuan.

⁷³ Suhva ri ca cuhva cuan, ta ra canyicú cuan catuhva ra nu nyaá ra Pedro ta cacatyí ra chi ra:

—Ra tahan ra cuan cuví chi yoho, ndicha. Vatyí quetuví nyacua nya cuhva cahún.

⁷⁴ Tyicuan ta iyo xaan tyanaha ra ta catyí ra:

—Chitó vaha Nyoo tyi ña ñohó nui chi ra cuan, ta nacañi Nyoo chii tatu ña ndicha cha cahín —catyí ra.

Ta suri cuhva cuan nacuacu chaa noo loho.

⁷⁵ Tyicuan ta nicohon iñi ra Pedro tuhun cha catyí ra Jesús chi ra: “Cha ni cumañi ca cuacu loho, yoho cha yaha catyun uñi chaha vatyí ña ñohó nuun chii.” Tyicuan ta quitā ra Pedro yucuan, ta chacu vavaha ra cha cuihya iñi ra cha sacuvi ra tyicuan caa.

27

Nu cachahá cuenda ra chi ra Jesús chi ra Pilato

(Mr. 15.1; Lc. 23.1-2; Jn. 18.28-32)

¹ Cuhva cha cundichin, tandihí ra cacuví nuu chi tata sutu ta ra cacuví mandoñi ñuu cuan, catyihí tahan ra tuhun vatyí cacahñi ra chi ra Jesús.

² Ta nuhñí ra. Ta chahan coyo ra chicuhva cuenda ra chi ra chi ra Poncio Pilato, ra cuví gobiernu cuenda ñuu Roma cha nyacá ñaha ñuu Israel cuan.

Nu chihí ra Judas

³ Cha nyehe ra Judas, ra cha naxico tuhun chi ra Jesús, vatyí cuacúvi ra, ta ndu uvi iñi ra cha sacuvi ra, ta nacuhva ra ndi oco uchi xuhun

cuichin cuan chi ra cacuví nuu chi tata sutu cuan, ta chi ra cacuví mandoñi ñuu cuan.

⁴ Ta catyí ra:

—Chicoo cuatyí yuhu, vatyí chaha cuende chi noo ra ñahri cuatyí na cúvi ra.

Soco maa ra canacahan ra ta cacatyí ra:

—Ta yucuan ¿ñáá cuenda nyuhu? ¡Nyehe maa yoho!

⁵ Tyicuan ta tuchi ra Judas xuhun cuan chichi vehe ñuhu cahnu, ta chahan ra ta chicuhñi ra yoho sucun ra ta suri maa ra chitacaā ra chi ra. Ta chihí ra.

⁶ Ra cacuví nuu chi tata sutu cuan canaquehen ra xuhun cuan ta cacatyí ra:

—Ma cuvi tyihi yo xuhun ihya chichi caja ofrenda vatyí yahvi cha chahñi ñu noo ñáyivi cuví.

⁷ Tyicuan ta catyihí tahan ra tuhun, ta chihin xuhun cuan casata ra noo ñuhú cha nañi Ñuhú Ra Savahá Quisi. Vatyí coo nu cuchí ra chi ñu inga ñuu tu chihí ñu.

⁸ Yucuan chaha nañi ñuhú cuan nyacua nya vityin Ñuhú Sata Ñu Chihin Xuhun Yahvi Cha Chihí Ñáyivi.

⁹ Ta tyicuan caa chingo cava cha tyaa ra Jeremías profeta Nyoo ta chahaha. Catyí chi tyehe caa: “Quehen ra ndi oco uchi xuhun cuichin, yahvi cha tyaa ñu Israel chi ra.

¹⁰ Ta chihin cuan, casata ra Ñuhú Ra Savahá Quisi, tari cuhva catyí Sutu Mañi yo chii”, catyí chi.

Nu nyehe ra Pilato vatyí ñahri maa cuatyí ra Jesús

(Mr. 15.2-5; Lc. 23.3-5; Jn. 18.33-38)

¹¹ Cachinyaca ra chi ra Jesús nuu gobiernu, ta ra cuan ndaca tuhun ra chi ra, ta catyí ra:

—¿Atu ican yoho cuví rey cuenda ñu Israel?

Ta ra Jesús catyí ra chi ra:

—Ican, yuhu cuví. Ndicha cha cahún.

¹² Ta cuhva cha catyaa ra cacuví nuu chi tata sutu cuan ta mandoñi

cuatyi siqui ra, ra Jesús ña nacahan maa ra.

¹³ Tyicuan ta quichaha catyí ra Pilato chi ra:

—¿Atu ña chiñún tandihí cha cacahán ra sicun?

¹⁴ Soco ra Jesús ña nacahan ra. Ta nyacua iyo cuñí gobiernu cuan vatyi ña nacahan ra. Ta ña chitó ra ñáa cunyacuvi ra.

Nu cutuñí chi ra Jesús ta cacatyí ñu vatyi cucúvi ra

(Mr. 15.6-20; Lc. 23.13-25; Jn. 18.38—19.16)

¹⁵ Soco cha vico pascua cuan, iyó noo tuhun chi ñu vatyi tuhva ra gobiernu saña ra noo ra ñohó vehe caa, nya ra cachi maa ñáyivi.

¹⁶ Ta quívi cuan ñohó noo ra cha nañi Barrabás vehe caa. Ta chitó tandihí ñáyivi tuhun ra.

¹⁷ Ta cuhva cha canyicú ñin ri ñu, ra Pilato ndaca tuhun ra chi ñu, ta catyí ra:

—¿Yóo chi cuñí nyoho cha sañe? ¿Atu chi ra Barrabás o chi ra Jesús, ra nañi Cristo? —catyí ra.

¹⁸ Vatyi chitó ra vatyi cha cuenda cha tasi cuñí nyehe ñu chi ra Jesús, yucuan cuenda chaha cuenda ñu chi ra.

¹⁹ Cha ñi ri ca cha nyaá ra Pilato nu tyayu ra, nu cuví ra tyiño, tachi ñasihí ra noo tyiño chi ra ta catyí ña: “Ma tyihun chuun chihin ra vaha chiña. Vatyi cuñi tahin noo ñumahna cha cuenda ra. Ta quiñi xaan tahin chihin”, catyí ña.

²⁰ Soco ra cacuví nuu chi sutu ta mandoñi ñuu cuan, cacuñihi ra catyiyuhu ra chi ñáyivi na cacan ñu cha saña ra Pilato chi ra Barrabás, ta na cúvi ra Jesús.

²¹ Ta gobiernu cuan cahan ra chihin ñu inga chaha, ta catyí ra:

—Chichi cha ñanduvi ra, ¿nya ra cuñí ndo cha sañe?

Ta maa ñu nacahan ñu, ta catyí ñu:

—Chi ra Barrabás.

²² Ta ra Pilato ndaca tuhun ra chi ñu, ta catyí ra:

—¿Ta ñáa cha cusacuvi chihin ra Jesús cha nañi Cristo ihya?

Tandihí ñu nacahan ñu ta catyí ñu:

—¡Na cúvi ra nu cruzi!

²³ Tyicuan ta quichaha catyí ra Pilato chi ñu:

—Soco ¿ñáa cha ña vaha sacuvi ra?

Soco maa ñu nacana chaa tucu ñu inga chaha ta catyí ñu:

—¡Cahñi chi ra nu cruzi!

²⁴ Cuhva cha nyehe ra Pilato vatyi ñahri maa cha cuví sacuvi ra, vatyi quiñi xaan cacuví ñu, chican ra ndutya, ta nacatya ra ndaha ra chihin nuu ñáyivi cuan, ta catyí ra:

—Yuhu ñahri cuatyi cha cua cúvi ra ñahri cuatyi ihya. Na ndoo siqui maa ndo.

²⁵ Ta tandihí ñáyivi canacahan ñu, ta catyí ñu:

—Na ndoo chi siqui maa ndi ta siqui sehe ndi.

²⁶ Tyicuan ta ra Pilato saña ra chi ra Barrabás, ta tachi ra na ndoho ra Jesús, ta nacuhva cuenda ra chi ra na cúvi ra nu cruzi.

²⁷ Tyicuan ta sindaro cuenda gobiernu cuan chinyaca ra chi ra Jesús nya vehe tyiño, ta casandu ñin ri ra chi tandihí sindaro cuan nicachico.

²⁸ Tyicuan ta catava ra sahma ra ta casacuihno ra noo sahma cuaha chi ra.

²⁹ Ta catyihí ra noo corona cha chino chihin iñu xiñi ra. Ta chaha ra noo yutun na quindaha ra chihin chiyo vaha ra. Tyicuan ta cachicuiñi chiti ra nuu ra, ta cachacu nyaa ra chi ra ta catyí ra:

—¡Nocumi chuun, yoho Rey cuenda ñu Israel!

³⁰ Ta catyicu sii ra chi ra ñandihí. Ta quehen ra yutun cuan ta cañi ra xiñi ra.

³¹ Cha yaha cha cachacu nyaa ra chi ra ta catava ra sahma cuaha cuan chi ra ta sandihvi noo tucu ra sahma maa ra chi ra. Tyicuan ta quehen ra chi ra cua cahñi ra chi ra nu cruzi.

Nu catyaa ra chi ra Jesús nu cruzi

(Mr. 15.21-32; Lc. 23.26-43; Jn. 19.17-27)

³² Cuhva cha caquita coyo ra yucuan, catahan ra chi noo ra ñuu Cirene, nañi ra Simón. Ta casaniñi ra chi ra na cuiso ra cruzi ra Jesús.

³³ Ta cachaa coyo ra noo nu nañi Gólgota, ta cuñi chi catyí Nu Cuví Yiquí Xiñi Ndiyí.

³⁴ Ta yucuan cachaha ra vinu nasaca chihin cava uva coho ra Jesús. Soco cha yaha cha chihí ra chiin, ña cuñi ca ra coho.

³⁵ Ta cha yaha cha catyaa ra chi ra nu cruzi, tyicuan ta sindaro cuan caquehen ra sahma ra ta chahan ra noo sihva chihin. Ta nya ra saha ganaa, ñihí ra sahma cuan. Ta tyicuan caa chino cava tuhun cha tyaa noo profeta Nyoo ta cha naha nu catyí chi tyehe caa: “Casacha ra sahme chihin cha chahan ra sihva”, catyí chi.

³⁶ Tyicuan ta cachicunycu ra yucuan vatyí saha cuenda ra chi ra.

³⁷ Ta ityi xiñi ra catyaa ra noo letra cha catyí ñaa tuhun cua cahni ra chi ra. Ta catyí chi tyehe caa: “Ican ra ihya cuví ra Jesús, rey cuenda ñu ñuu Israel.”

³⁸ Tacoyó tucu uvi ra suhu chihin ra nu uvi ca cruzi cuan. Noo ra chiyo vaha ra, ta inga ra chiyo satyin ra.

³⁹ Ta ñu yahá coyo cuan, cacahan ñu chi ra, ta quisi xiñi ñu,

⁴⁰ ta catyí ñu chi ra:

—¡Yoho cha catyün tyi cusanduvon vehe ñuhu cahnu, ta chichi cha uñi quivi ta nacananyaa tucun! ¡Sacacu chuun vityin! ¡Tatu Sehe Nyoo cuví chuun, ño nu cruzi chiña! —catyí ñu chi ra.

⁴¹ Ta suri tyicuan caa cachacú nyaa tucu ra cacuví nuu chi tata sutu chi ra, ta ra sacuahá ley vehe ñuhu, ta mandoñi ñuu ñandihí. Ta cacatyí ra chi tahan ra tyehe caa:

⁴² —Sacacu ra chi inga ñu, soco ña cuví sacacu ra chi maa ra. Tatu Rey cuenda ñu Israel cuví ra, na noo ra nu cruzi cuan, tacuhva chino iñi yo chi ra.

⁴³ Itá iñi ra chi Nyoo, vityin na sacacu Nyoo chi ra, tatu ndicha cuñi ra chi ra. Vatyí catyí ra chi yo vatyí Sehe Nyoo cuví chi ra.

⁴⁴ Ta nyacua nya ra suhu cha tacaá nu cruzi xiin ra ta cacahan ra chi ra ñandihí.

Nu chihí ra Jesús

(Mr. 15.33-41; Lc. 23.44-49; Jn. 19.28-30)

⁴⁵ Tyicuan ta tandihí siqui ñuhu ñayivi nduñaa iñi, nyacua nya ora ta nyacua nya ca uñi cha cha iñi.

⁴⁶ Ta suri cuhva cuan, cana chaa ra Jesús chihin cha chaa ndusu ra. Ta catyí ra tyehe caa:

—Elí, Elí, ¿lama sabactani? —ta cuñi chi catyí: Nyoo Suti, Nyoo Suti, ¿ñaá tuhun cha sandoó ñihnon noo tuhun mai?

⁴⁷ Suhva ra canyicú cuan, cachiñi ra cha chahan ra, ta cacatyí ra:

—Chi ra Elías, ra profeta Nyoo ta cha naha, ican cana chaa ra.

⁴⁸ Ta caa cuhva ri cuan, cuahan vavaha noo ra cua quehen ra noo xixan, ta satyí ra chihin vinu iya, ta tyaa ra noo nu yutun, ta satuhva ra yuhu ra Jesús tacuhva na coho ra.

⁴⁹ Soco inga ra cacatyí ra:

—Saña chi ra. Na nyehe yo tatu quichi sacacu ra Elías chi ra.

⁵⁰ Inga tucu chaha cana chaa ñihi ra Jesús, tyicuan ta chihí ra.

⁵¹ Ta caa cuhva ri cuan ndata sava sahma cha tacaá chichi vehe ñuhu cahnu cuan, nyacua nya siqui ta nyacua nya yuvi ndata. Ta taan. Ta ndata yuu.

⁵² Ta nuña yuhu ñaña. Ta nyacua canandoto cuaha ñu chinó iñi chi Nyoo, ñu cachihí.

⁵³ Ta cha yaha nandoto ra Jesús caquita coyo ñu nu ñaña ta quihvi coyo ñu chichi ñuu Jerusalén, ta cuaha ñayivi nyehe chi ñu.

⁵⁴ Tyicuan ta capitán ta sindaro cha casahá cumi chi ra Jesús, cayuhvi xaan ra cuhva cha taan. Ta cha canyehé ra inga ca cha cuví, ta cacatyí ra:

—Ndicha ndicha cuii, vatyí Sehe Nyoo cuví chi ra ihya.

⁵⁵ Cuaha ñusihi cha chinyicon chi ra Jesús nya Galilea ta tyinyee ñu chi ra, nyicú ñu canyehé ñu nya sava ri yucuan.

⁵⁶ Ta ican suhva ñu ihya cuví cu María ñaha Magdala, ta cu María sihi

ra Jacobo ta ra José, ta sihi sehe ra Zebedeo.

Nu cua cuchi ra chi ra Jesús
(Mr. 15.42-47; Lc. 23.50-56; Jn. 19.38-42)

⁵⁷ Cuhva cha cua cuaa, quichi noo ra tyay^h cha nañi José. Ra ñuu Ari-matea. Ta suri chinó iñi ra chi ra Jesús.

⁵⁸ Ta chahan ra chinyehē ra nu nyaá ra Pilato, ta chican ra coño ñuhu ra Jesús. Tyicuan ta tyihⁱ ra Pilato tyiño na cuhva ra coño ñuhu ra chi ra.

⁵⁹ Tyicuan ta quehen ra José coño ñuhu ra, tyihⁱ ra chichi noo sinduhu ndi.

⁶⁰ Ta tyihⁱ ra chi ra chichi noo ñaña nicaa chaa cha cuvⁱ noo yavi yuu cha tyihⁱ ra tyiño cachatya ra. Ta cha yaha cha nacasi ra yuhu ñaña cuan chihin noo yuu cahnu, ta cuahan ra.

⁶¹ Soco cu María ñaha Magdala, ta inga cu María, ndoo ñu nyicú ñu yuhu ñaña cuan.

Nu casahá cumi sindaro ñaña ra Jesús

⁶² Ta cha inga quivⁱ, quivⁱ nyitatu ñu cuvⁱ, ta ra cacuvⁱ nuu chi tata sutu, ta ra fariseo chahan coyo ra chinyehē ra nu nyaá ra Pilato.

⁶³ Ta catyⁱ ra chi ra:

—Tata, nichón iñi ndi vatyⁱ ra cuendu cuan, catyⁱ ra ta nyitó ca ra vatyⁱ cha yaha cha uñi quivⁱ cunandoto ra.

⁶⁴ Yucuan chaha tyihⁱ tyiño na casaha cumi vaha ra ñaña cuan, nya yaha cha uñi quivⁱ, coto quichi coyo ra cachica noo chihin ra cha cha cuaa, ta casuhu ra coño ñuhu ra. Yaha cuan ta cucatyⁱ ra chi ñáyivⁱ vatyⁱ cha nandoto ra. Ta cha tyicuan caa nu ndihⁱ tuhun ihya, yaha ca cuhva cucuvi —catyⁱ ra.

⁶⁵ Ta ra Pilato catyⁱ ra chi ra:

—Ma suhva sindaro chiña. Cuahan ndo, ta saha cumi vaha ndo ñaña cuan, yoso cuhva cha vaha cuvⁱ saha cumi ndo —catyⁱ ra.

⁶⁶ Tyicuan ta cuahan coyo ra, ta casahá cumi vaha ra ñaña cuan, ta catyaa ra noo sellu chata yuu cha

chasí cuan. Ta casandoo ra chi sindaro sahá cumi yucuan.

28

Nu nandoto ra Jesús
(Mr. 16.1-8; Lc. 24.1-12; Jn. 20.1-10)

¹ Cha yaha quivⁱ cha nyitatu ñu, cuhva cha vachi cundichin, nu quichaha vitya cuvⁱ. Ta cu María ñaha Magdala cuan, ta inga cu María chahan coyo ñu nu ñaña.

² Ta quichi minoo cha taan vatyⁱ quichⁱ ángel Sutu Mañi yo noo ra nya ityi andivⁱ, ta chaa ra nu ñaña cuan. Ta sacanyaha ra yuu cha nyasi yuhu cuan, ta chicunyaa ra siqui.

³ Ta xiño vavaha ra, tari cha quihvi tacha. Ta sahna ra cuichin vavaha.

⁴ Cuhva cha cananyehe sindaro cuan chi ra, canayuhvi vavaha ra nyacua nihí ra, ta nyacua coña ra chihin cha yuhvi ra.

⁵ Tyicuan ta quichaha catyⁱ ángel cuan chi ñusihi cuan:

—Ma yuhvi ndo. Yuhu chité vatyⁱ chi ra Jesús cha chihⁱ nu cruzi nanducú ndo.

⁶ Yori ca ra ñohó ihya, vatyⁱ cha nandoto ra, tari catyⁱ ra. Ñaha ndo ta nyehē ndo nu catuvⁱ ra.

⁷ Ta cuhun ndo numi ri, ta catyⁱ ndo chi ra cachica noo chihin ra vatyⁱ cha nandoto ra, ta cha cuahan ra Galilea, nyatú ra chi ra yucuan. Ican ihya cuvⁱ cha nyaa catyⁱ chi ndo —catyⁱ ángel cuan chi ñu.

⁸ Tyicuan ta numi ri quitá coyo ñu nu ñaña cuan. Suhva ri yuhvi ñu, ta suhva ri sii vavaha cuñi ñu. Ta chino vavaha ñu cua catyⁱ ñu chi ra cachica noo chihin ra Jesús.

⁹ Ta cuhva cuan tuvⁱ ra Jesús nuu ñu ta chaha ra nocumi chi ñu. Tyicuan ta catuhva ñu chi ra ta chicuifi chiti ñu nuu ra ta casacahnu ñu chi ra, ta suri numi ñu chaha ra.

¹⁰ Ta catyⁱ ra chi ñu:

—Ma yuhvi ndo. Cuahan ndo cua sacoto ndo chi yañi vatyⁱ na cuhun coyo ra Galilea, ta nyicuan cuñihi tahan ndi —catyⁱ ra chi ñu.

Tuhun cha canacatyí sindaro

¹¹ Cha ni ri ca cha cuahan coyo ñu cuan, suhva sindaro cha casaha cumi yucuan, cuahan coyo ra nya ñuu, cua nacatyí ra cha cuví cuan chi ra cacuví nuu chi sutu.

¹² Tyicuan ta ra cacuví nuu cuan chahan coyo ra chichan ra chihin ra mandoñi ñuu vatyí catyíhi tahan ra tuhun yoso caa casacuvi ra. Tyicuan ta cuaha xuhun cachaha ra chi sindaro cuan.

¹³ Ta cacatyí ra chi ra:

—Nyoho, catyí ndo vatyí cha cha cuaa cha ni ri ca cha quixí ndo, chahan coyo ra cachica noo chihin ra Jesús ta chिकासuhú ra coño ñuhu ra.

¹⁴ Ta tatu chito gobiernu tuhun ihya, cua nyehe maa ndi yoso caa catyí ndi chi ra, ta nyoho ma caca ñi ndo. Ñahri cucuvi chi ndo.

¹⁵ Tyicuan ta caquehen sindaro cuan xuhun, ta cuahan coyo ra cua casacuvi ra cha cacatyí ra chi ra. Ta nya vityin ta tyicuan caa catyí ñáyivi ñuu Israel.

Nu tyaa ra Jesús tyiño chi ra cachicá tyiño ra

(Mr. 16.14-18; Lc. 24.36-49; Jn. 20.19-23)

¹⁶ Ta tyicuan caa, ndi uchi ñin ra cachica noo chihin ra, cuahan coyo ra nya Galilea nya yucu nu catyí maa ra Jesús chi ra vatyí cuhun coyo ra.

¹⁷ Ta cuhva cha cananyehe ra chi ra Jesús, casacahnú ra chi ra soco suhva ra chica uvi ñi ra.

¹⁸ Tyicuan ta tuhva ra Jesús chi ra ta cacatyí ra chi ra:

—Nyoo chaha ra cha cunyaca ñaha yuhu tandihí andivi ta siqui ñuhu ñáyivi.

¹⁹ Yucuan chaha, cuahan ndo tandihí nu nyicú ñáyivi, tandihí ri ñuu, ta catyí ndo chi ñu na nanyicon ñu chii. Ta sacondutya ndo chi ñu chihin sivi Sutú yo Nyoo ta chihin sivi yuhu Sehe Nyoo, ta chihin sivi Tatyí li Nyoo.

²⁰ Ta sañaha ndo chi ñu na naquichaha ñu tandihí cha catyí yuhu tyi sacuvi ñu. Ta coto ndo

vatyí yuhu cunyai chihin ndo tandihí quivi nyacua nya naa ñáyivi —catyí ra Jesucristo chi ra cachicá tyiño ra.

Tuhun Nyoo Cha Tyaa San Marcos

Nu sacondutyá ra Juan chi ñáyiví ta cahán ra tuhun Nyoo chihin ñu
(Mt. 3.1-12; Lc. 3.1-9, 15-17; Jn. 1.19-28)

¹ Tyehe caa quichahá tuhun vaha ra Jesuscristo Sehe Nyoo.

² Ra Isaías profeta Nyoo tyaa ra tuhun ra Cristo ta tuhun ra Juan. Tyehe caa catyí Nyoo chi ra Cristo: Cumañi ca cuhun siqui ñuhu ñáyiví ta cutachi chi noo ra cusacoto chi ñáyiví vatyi nyaá cuhun nu ny-icú ñu, catyí Nyoo chi ra Cristo.

³ Chiñi yo ndusu noo ra cha canachaá nu chiqui ndi, ta catyí ra: “Tari sanduvahá ndo noo ityi, tyicuan caa sanduvaha ndo añima ndo vatyi cua quichi Sutu Mañi yo.

Nuña ndo noo ityi ndoo chi ra na quihvi ra añima ndo.”

Tyicuan caa tyaa ra profeta Isaías nu tutu Nyoo ta cha naha.

⁴ Ta tyicuan caa quichi ra Juan sacondutyá ra chi ñáyiví nu chiqui ndi cuan. Ta catyí ra chi ñu na ndu uvi iñi ñu cuatyí ñu, ta na condutyá ñu tari noo seña tyi nasama ñu cuhva iyó ñu, ta tyicuan caa ta Nyoo cusaha ra ticahnu iñi cuatyí ñu.

⁵ Ta tandihi ñáyiví ityi Judea quichi coyo ñu tyasoho ñu tuhun cahán ra, ta ñu ñuu Jerusalén ñandihí. Ta cha yaha nahma ñu cuatyí ñu, sacondutyá ra Juan chi ñu yuvi cahnu Jordán.

⁶ Ta sahma cha ñihno ra Juan cuan chihin ixi camellu chino chi. Ta ñií cuví sinchu ra. Ta pinchi tuhvá ra chachí. Ta tyañuñu cuhu tuhvá ra chihí.

⁷ Ta cahán ra tuhun Nyoo ta catyí ra:

—Cha yaha yuhu ta vachi noo ra iyó xaan ca tunyee iñi chi ican saha yuhu. Ta ña nañé ni cha ndachi ñií xityin ndichan ra.

⁸ Yuhu sacondutyé chi ndo chihin ndutyá. Soco maa ra cusacondutyá ra chi ndo chihin Tatyí Ii Nyoo —catyí ra Juan.

Nu condutyá ra Jesús
(Mt. 3.13-17; Lc. 3.21-22)

⁹ Quiví cuan quita ra Jesús ñuu Nazaret, cha nyaá ityi Galilea, ta cuahan ra nya yuvi cahnu Jordán. Ta yucuan sacondutyá ra Juan chi ra.

¹⁰ Ta cha yaha condutyá ra Jesús, ta cuhva cha cua quita ra chichi ndutyá, ta nanyehé ra andiví cuahan nuña. Ta nyehe ra Tatyí Ii Nyoo tari noo paloma, vachi noó siqui ra.

¹¹ Ta tyacú noo ndusu ityi andiví ta catyí ndusu cuan tyehe caa:

—Yoho cuvún Sehi ta cuñi xain chuun. Ta sií xaan cuñi chuhun —catyí ndusu cuan.

Nu nducú nyehe ra ña vaha chi ra Jesús

(Mt. 4.1-11; Lc. 4.1-13)

¹² Yaha cuan ta sacuhun Tatyí Ii Nyoo chi ra Jesús noo nu chiqui ndi.

¹³ Ta yucuan chinyaa ra uvi xico quivi nu chiqui ndi cuan, nu yori ñáyiví iyó, maa ri quití iyó. Ta nducú nyehe cuihna chi ra. Ta yaha cuan ta cha coyo ángel ta catyiñuhu ra chi ra.

Nu quichahá saha tyiño ra Jesús ityi Galilea

(Mt. 4.12-17; Lc. 4.14-15)

¹⁴ Cha yaha catyihí ñu chi ra Juan vehe caa, ta ra Jesús cuanuhu ra Galilea ta cahán ra tuhun vaha Nyoo chihin ñáyiví.

¹⁵ Ta catyí ra:

—Cha chaá cuhva cha cua cunyaca ñaha Nyoo añima ndo. Yatyin ri nyaá ra chihin ndo. Ndu uvi iñi ndo cuatyí ndo, ta chino iñi ndo tuhun Nyoo cha sacacu añima ndo —catyí ra Jesús.

Nu cana ra Jesús chi cumi tahan ra catiñ tiyaca

(Mt. 4.18-22; Lc. 5.1-11)

¹⁶ Chicá noo ra Jesús yuhu miñi cha nañi Tyañuhu Galilea. Ta nanyehé ra chi ra Simón ta chi yañi ra, ra Andrés,

cacañí ra yuhva ra nu ndutya, vatyí ra catiín tiyaca cacuví ra.

17 Ta catyí ra Jesús chi ra:

—Cunyicon ndo chii, ta yuhu cusacuví vatyí tari ñihí ndo tiyaca, tyicuan caa cuñihi ndo añima ñáyivi, tava ndo chi ñu nu quiñi caa, na quihvi ñu cuenda Nyoo —catyí ra Jesús chi ra Simón ta chi ra Andrés cuan.

18 Caa cuhva ri cuan casandoḡ ra yuhva ra, ta cuahan coyo ra chihin ra.

19 Yaha cuan ta chiin ri ca chica ra Jesús, ta nanyehē ra chi ra Jacobo, sehe ra Zebedeo, ta chi yañi ra, ra Juan. Cañohó ra chichi noo canoa canaquicú ra yuhva ra.

20 Cana ra Jesús chi ra. Ta ninduvi tahan ra casandoḡ ra sutu ra, ra Zebedeo, chichi canoa chihin ra catyinyeé chi ra. Ta cuahan coyo ra chihin ra Jesús.

Nu nduvahaḡ noo ra yihí tatyí ña vaha añima
(Lc. 4.31-37)

21 Ta chaḡ coyo ra ñuu Capernaum. Ta cuví chi noo quivi nyitatuñ ñáyivi, ta quihvi ra Jesús chichi vehe ñuhu, ta quichahaḡ sañaha ra tuhun Nyoo chi ñáyivi.

22 Ta iyo cuñí ñu tuhun cahán ra, vatyí sañahá ra tari noo ra iyó vaha ityi chii cha cahán. Ña cahán ra cuhva cahán ra casacuahá cuenda ley vehe ñuhu.

23 Chichi vehe ñuhu cuan ñohó noo ra yihí tatyí ña vaha añima. Ta cana cha ra ta catyí ra:

24 —¿Ñáá tuhun cha tyihún chuun chihin ndi, yoho Jesús ra ñuu Nazaret? ¿Atu vachun vatyí sanaun chi ndi? Yuhu ñohó nui chuun, ta chité vatyí Sehe Ii Nyoo cuví chuun —catyí ra yihí tatyí ña vaha cuan chi ra Jesús.

25 Nacahan ra Jesús ta catyí ra chi tatyí ña vaha cuan:

—¡Taxi ri! ¡Saña chi ra ndahvi chiña!
—catyí ra.

26 Ta tatyí ña vaha cuan, chihí tañi ra cuhví cuan saha chi, ta iyo canachaaḡ tatyí cuan quita chi ra.

27 Tandihí ñáyivi yuhvi xaan ñu cuvi, ta candacaḡ tuhun ñu chi tahan ñu, ta catyí ñu:

—¿Ñáá cha cuví ihya? ¿Ñana vaha tuhun chaa sañahá ra ihya? ¡Vatyí iyo vaha tunyee iñi chi ra, nyacua nya tatyí ña vaha, ta quichahá chi ra! —catyí ñu.

28 Ta numi ri cachitoḡ ñáyivi tandihí ñuu cha iyó Galilea cuan tuhun ra Jesús.

Nu sanduvahaḡ ra Jesús chi maha tyiso ra Simón Pedro
(Mt. 8.14-15; Lc. 4.38-39)

29 Cuhva cha quitaḡ coyo ra chichi vehe ñuhu, ta cuahan ra Jesús vehe ra Simón ta ra Andrés. Ta cuahan tucu ra Jacobo ta ra Juan chihin ra.

30 Ta maha tyiso ra Simón catuví ña nu chito, cuhví ña chihin cahñi. Ta catyí ñu chi ra Jesús tyi cuhví ña.

31 Tyicuan ta tuhvaḡ ra Jesús, ta tin ra ndaha ña. Ta nacoñehē ra chi ña. Ta caa cuhva ri cuan, tinyaaḡ cahñi chi ña. Ta quichaha tyiñuhu ña chi ra.

Nu sanduvahaḡ ra Jesús chi cuaha ñu cuhví
(Mt. 8.16-17; Lc. 4.40-41)

32 Cuhva cha quee ñanyii ta cha cua cuaa, quichi nyaca ñu tandihí ñu cuhví ta ñu yihí tatyí ña vaha nu nyaá ra Jesús.

33 Ta tandihí ñáyivi ñuu cuan candu iin ri ñu yuvehe cuan.

34 Ta cuaha ñu cuhví cha siin siin cuehe sanduvahaḡ ra. Ta tavañehē ra chi cuaha tatyí ña vaha, soco ña chahaḡ ra cha cahan tatyí cuan, vatyí chitó cuan yóo ra cuví ra.

Nu cahán ra Jesús tuhun Nyoo ityi Galilea
(Lc. 4.42-44)

35 Ta cha inga quivi cuhva cha ni ñaa ca, ndicuitaḡ ra Jesús, ta cuahan ra ityi chata ñuu. Cuahan ra noo nu yori sayanga chi ra cua cacan tahvi ra chi Nyoo.

³⁶ Ta ra Simón ta ra tahan ra cuahan coyo ra cua nanducu ra chi ra.

³⁷ Ta cuhva cha canañihí ra chi ra cacatyí ra chi ra:

—Tandihí ñáyiví nanducú ñu chuun —cacatyí ra chi ra Jesús.

³⁸ Soco maa ra catyí ra chi ra:

—Coho ndo inga ñuu cha nyicú yatyin ri ihya, vatyí cahan tiqui tuhun Nyoo yucuan, vatyí yucuan tyiño vachi —catyí ra Jesús chi ra.

³⁹ Yucuan chaha chicá noo ra Jesús tandihí ri ñuu cha iyó Galilea, cahan ra tuhun Nyoo chichi vehe ñuhu tahan tahan ñuu. Ta tava ñehe ra tatyí ña vaha cha yihí aña ñáyiví.

Nu sanduvahá ra Jesús chi noo ra cha tyahyu coño

(Mt. 8.1-4; Lc. 5.12-16)

⁴⁰ Noo chaha tuhva noo ra cuhví cha tyahyu coño nu nyaá ra Jesús. Ta chicuñí chiti ra nuu ra, ta catyí ra chi ra:

—Tatu cuñún, cuví sanduvahun chii —catyí ra.

⁴¹ Ta cundahvi cuñí ra Jesús nyehé ra chi ra, ta tyiso ra ndaha ra siqui ra, ta catyí ra:

—Cuñí sanduvahi chuun. Ta na nduvahun vityin ri —catyí ra chi ra.

⁴² Caa cuhva ri cha catyí ra tyehe caa, tinyaa cuehe cuan chi ra, ta nduvahá ra.

⁴³ Tyicuan ta catyí ra Jesús vatyí cha cuví cuhun ra, soco catyí xaan ra chi ra na sacuvi ra tyehe caa:

⁴⁴ —Nyehe. Yori chihin cahun tuhun. Soco cuahan nu nyaá tata sutu. Ta sañahun chuun chi ra, ta cuhvon cha tahan chi cuhvon na ndundiun nu Nyoo tari cuhva catyí nu ley cha tyaa ra Moisés, vatyí tacuhva coto tandihí ñáyiví tyi cha nduvahun chihin cuehe cuan —catyí ra Jesús chi ra.

⁴⁵ Soco ra cuan cahan ra, ta quichahá nacatyí ra chi tandihí ñáyiví. Yucuan chaha ña cuví ca quihví ndichin ra Jesús chichi ni noo ñuu. Ta ityi chata ri ñuu chicá noo ra nu yori ñáyiví iyó, soco tandihí ri ityi quitá coyo ñu, quichí nyehe ñu chi ra.

2

Nu sanduvahá ra Jesús chi noo ra cuhví cha ña cuví nacanda

(Mt. 9.1-8; Lc. 5.17-26)

¹ Suhva quiví yahá ta quihví ra Jesús inga chaha chichi ñuu Capernaum. Ta cachito ñáyiví tyi nyaá ra vehe.

² Ta numi ri candu ñin ri cuaha ñáyiví. Ta nyacua ña chitahan ñu, ni yuvehe. Ta maa ra Jesús cahan ra tuhun Nyoo chihin ñu.

³ Tyicuan ta cumi tahan ra canyiso chi noo ra cuhví cha ña cuví nacanda, caquichí nyaca ra chi ra nu nyaá ra Jesús.

⁴ Soco ña cuví caquihví ra nya nu nyaá ra Jesús cha cuenda vatyí tuvi xaan ñáyiví. Tyicuan ta candaá ra ityi xiñi vehe. Ta sacuachiyó ra suhva tyiyo. Ta sanoó ra chi ra cuhví cuan chihin chito.

⁵ Nyehe ra Jesús vatyí cachinó xaan iñi ra cuan. Ta catyí ra chi ra cuhví cuan:

—Cha ndachí cuatyun, suti —catyí ra Jesús chi ra.

⁶ Soco suhva ra sacuahá cuenda ley vehe ñuhu nyicú ra cuan, ta cachicá xiñi ra tyehe caa:

⁷ “¿Ñáá tuhun cha cañá iñi ra ihya cahan ra tyehe caa? Chicoó cuatyí ra nuu Nyoo chihin tuhun cahan ra vatyí yori cuví sandachi cuatyí, noo tuhun ri maa Nyoo cuví sandachi ra cuatyí”, cachicá xiñi ra.

⁸ Soco ra Jesús chitó ra cha cachicá xiñi ra. Ta catyí ra chi ra:

—¿Ñáá tuhun cha chicá xiñi nyoho tyicuan caa?

⁹ ¿Ñáá cha yí ca, cha catyí yo chi ra cuhví ihya vatyí cuatyí ra cha yahá ndachi, o cha catyí yo chi ra vatyí nducuita ra ta naquehen ra chito ra ta caca ra?

¹⁰ Vaha, vityin chihin cha sanduvahi chi ra ihya, cusañahi chi ndo vatyí yuhu ra cuví Rayí cha quichí nya gloria, iyó ityi chii cha sandachi cuatyí ñáyiví —catyí ra Jesús chi ra.

Tyicuan ta quichaha catyí ra chi ra cuhví cuan:

11 —Catyí chi yoho, ndicuita, naquehen chiton, ta cuanuhu nya vehun —catyí ra Jesús chi ra.

12 Ta ra cuhví cuan ndicuita ra. Naquehen ra chito ra, ta cuanuhu ra. Ta tandíhi ñu nyehe ñu, ta iyo cuñí ñu, ta sacahnú ñu chi Nyoo, ta catyí ñu:

—Ni noo chaha ta nyehe ca yo cha tyehé caa —catyí ñu.

*Nu cana ra Jesús chi ra Leví
(Mt. 9.9-13; Lc. 5.27-32)*

13 Yahá cuan ta cuahan tucu ra Jesús inga chaha yuhu miñi cuan. Ta cuhva cha nataca ñáyivi nu nyaá ra, quichaha cahan ra nuu ñu.

14 Tyicuan ta cuahan ra ta nu yaha ra nanyehe ra chi ra Leví sehe ra Alfeo, nyaá ra nu sahá tyiño ra, tavá ra xuhun cuenda gobiernu ñuu Roma. Ta catyí ra Jesús chi ra:

—Coho chihin.

Tyicuan ta nducuita ra Leví, ta cuahan ra chihin ra.

15 Yahá cuan ta tahan chi nyaá ra Jesús chihin ra cachicá noo chihin ra cachachí ra nu mesa vehe ra Leví. Ta nyicú tucu cuaha ra catavá xuhun chihin inga ñáyivi iyó cuatyí. Vatyí cuaha xaan ñu nyicón chi ra.

16 Soco ra casacuahá cuenda ley vehe ñuhu, ta ra cacuví fariseo, ra cha quichahá xaan ley vehe ñuhu, cha canyehe ra vatyí chachí ra Jesús chihin ra catavá xuhun, ta ñu iyó cuatyí, ta cacatyí ra chi ra cachicá noo chihin ra Jesús:

—¿Yoso caa cha ra sacuaha chi nyoho chachí ra ta chihí ra chihin ra catavá xuhun ta ñu iyó cuatyí?

17 Chiñi ra Jesús cha cacahan ra ta catyí ra:

—Ña chiñuhú doctor chi ñu ña cuhví, soco chiñuhú ra chi ñu cuhví. Vachi yuhu soco ñima cha cuenda cha vaha chi ñu vaha, soco cha cuenda cha vaha chi ñu iyó cuatyí —catyí ra Jesús chi ra.

Nu sañahá ra Jesús vatyí nya cha yaha canyaha ra chi ñu nyicón chi ra, tyicuan ta cutahan chi savaha ñu ayuno

(Mt. 9.14-15; Lc. 5.33-35)

18 Noo chaha, ra canyicón chi ra Juan ta ra canyicón chi ra fariseo, ña chachí ra ta nanducú ra chi Nyoo. Ta suhva ñáyivi quichí coyo ñu nu nyaá ra Jesús, ta ndaca tuhun ñu chi ra, ta catyí ñu chi ra:

—¿Ñáá tuhun cha ra canyicón chi ra Juan ta ra canyicón chi ra fariseo tuhvá ra savaha ra ayuno, ta ra cachicá noo chuhun ña tuhvá ra? —catyí ñu.

19 Ta nacahan ra Jesús ta catyí ra:

—Noo vico tandaha, ¿atu cuví cha ma cachi ra ñohó vico cha ni ri ca cha nyaá ra cha cua tandaha cuan chihin ra? Tatu nyaá ca ra cua tandaha cuan chihin ra, ma cuví cha ma cachi ra.

20 Soco vachi chi quivi cha cutinyaa ra chi ra tandaha cuan nu nyicú ra tahan ra. Yucuan ndicha quivi coo cuhva cha ma cachi ra ta nanducu ra chi Nyoo —catyí ra Jesús chi ñu.

*Nu sañahá ra Jesús vatyí ña nacachi tahan tuhun chahnu cha iyó ñáyivi chihin tuhun chaa cha sañahá ra
(Mt. 9.16-17; Lc. 5.36-39)*

21 Catyí ra Jesús:

—Yori naquicu noo sahma chahnu chihin noo sahma chaa, vatyí cha chaa cuan nandiyi ta cahnya chi sahma chahnu, ta nu tahnya cuan cunducahnu ca.

22 Ta ni ri ña tuhvá yo tyihi yo vinu chaa chichi ñi chahnu, vatyí vinu chaa chahnyá chi ñi, ta chati vinu, ta tivi ñi. Yucuan chaha cuñí chi cha tyihi yo vinu chaa chichi ñi chaa —catyí ra Jesús.

*Nu catohon ra cachicá noo chihin ra Jesús yoco trigu quivi nyitatu ñáyivi
(Mt. 12.1-8; Lc. 6.1-5)*

23 Noo quivi cha tuhvá ñáyivi nyitatu, cuahan ra Jesús chicá ra mahñu nu iyó cha tachí ñáyivi. Ta ra cachicá noo chihin ra quichaha catohon ra yoco trigo cuan cuhva cha yahá coyo ra.

24 Tyicuan ta quichaha cacatyí ra fariseo chi ra Jesús:

—¿Nyehe xihna! ¿Ñáá tuhun cha sacuví ra cachicá noo chuhun tyiño

cha ña tahán chi sacuví yo quívi nyitátú yo? —cacatyí ra.

²⁵ Soco maa ra Jesús catyí ra chi ra: —¿Atu ni noo chaha ta sacuaaha ca nyoho cha sacuví ra David chihin ra tahan ra noo quívi cha cachisoco vavaha ra?

²⁶ Quívi cha cuví ra Abiatar tyiño cha cuví ra nuu chi tata sutu, quíhví ra David chichi vehe Nyoo. Ta chachí ra pan ii, cha tahán chi cachi maa ri maa ra cuví sutu. Ta chaha tucu ra cachi ra ndíhi chihin ra —catyí ra Jesús.

²⁷ Ta catyí tucu ra Jesús chi ra: —Chicoo quívi nyitátú yo, cuenda cha vaha chi ñáyívi, soco ñáyívi ña chicoo ñu cha cuenda cha vaha chi quívi nyitatu yo.

²⁸ Yucuan chaha yuhu Rayíi cha quichí nya gloria, iyó ityi chíi cha catyí chi noo noo ndo ñáá cha sacuvi ndo quívi nyitátú yo —catyí ra Jesús.

3

Nu nduvaha noo ra na ityi inchiyo ndaha

(Mt. 12.9-14; Lc. 6.6-11)

¹ Quíhví ra Jesús inga chaha chichi noo vehe ñuhu. Ta yucuan nyaá noo ra na ityi inchiyo ndaha.

² Ta cañañí ra fariseo chi ra Jesús nyehé ra tatu sanduvaha ra chi ra quívi nyitátú ñu, vatyí tacuhva coo cuatyí tyaa ra síqui ra.

³ Tyicuan ta ra Jesús catyí ra chi ra na ityi ndaha cuan:

—Ndícuíta ta cuinanyaa mahñu ihya.

⁴ Yaha cuan ta ndaca tuhun ra chi inga ñu cha tayucú cuan, ta catyí ra:

—¿Ñáá cha tahán chi sacuvi yo quívi nyitatu yo? ¿Atu sacuví yo cha vaha o cha ña vaha? ¿Atu tahán chi sanduvaha yo ñáyívi o cha cahñi yo? —catyí ra Jesús.

Tyicuan ta taxi taxi maa candoo ñu cuan.

⁵ Tyicuan ta xaan nanyehe ra Jesús chi ñu, ta cuihya cuñí ra vatyí ña cuñí ñu cutuñi iñi ñu. Ta catyí ra chi ra cuan:

—Sanacaa ndahun.

Ta sanacaa ra, ta nduvaha ndaha ra.

⁶ Tyicuan ta quita coyo ra fariseo, ta quichaha catyíhi tahan ra tuhun chihin ra cuenda ra Herodes, yoso caa cacahñi ra chi ra Jesús.

Nu nyicú cuaha ñáyívi yuhu miñi

⁷ Soco ra Jesús cuahan ra chihin ra cachicá noo chihin ra yuhu miñi, ta cuaha ñáyívi ityi Galilea canyicón chi ra.

⁸ Ta cha chito ñáyívi tuhun nahnu cha sacuví ra, cuaha xaan ñu quichí coyo ñu ñuu Jerusalén ta inga ñuu cha iyó ityi Judea, ta ñuu cha iyó Idumea, ta inga chiyo yuvi cahnu Jordán, ta ñuu Tiro ta ñuu Sidón ñandíhi, vatyí cuñí ñu nyehe ñu chi ra.

⁹ Yucuan chaha catyí ra Jesús chi ra cachicá noo chihin ra na casanduvaha ra noo canoa, tacuhva vatyí tatu ndutihin xaan chihin ñáyívi, cuví quíhví ra chichi canoa cuan.

¹⁰ Vatyí cuaha xaan ñu cha yaha sanduvaha ra, ta yucuan chaha tandíhi ñu cuhví cuahan ñu nu nyaá ra vatyí cuñí ñu tñn ñu chi ra tacuhva nduvaha ñu.

¹¹ Ta ñu yíhi tatyí ña vaha aña, chicuíni chiti ri ñu nuu ra, ta canachaa tatyí ña vaha cuan, ta catyí chi tyehe caa:

—¡Yoho cuvún Sehe Nyoo!

¹² Soco ra Jesús chasi ra yuhu tatyí cuan vatyí ma catyí ca chi yóo ra cuví ra.

Nu nacachi ra Jesús chi uchi uvi apóstol vatyí cacaca ra tyiño ra

(Mt. 10.1-4; Lc. 6.12-16)

¹³ Yaha cuan ta ndaa ra Jesús noo yucu ta cana ra chi ra cuñí maa ra nacachi ra. Ta quichí coyo ra nu nyaá ra.

¹⁴ Ta tyiso ra chi uchi uvi tahan ra vatyí cundíhi ra chihin ra, ta vatyí tyatyíño ra chi ra na cucahan ra tuhun Nyoo.

¹⁵ Ta chaha ra ityi chi ra vatyí sanduvaha ra chi ñu cuhví, ta tava ñehe ra chi tatyí ña vaha.

¹⁶ Ta ican ra ihya cacuví ndi uchi uvi tahan ra: ra Simón cha sacunañi ra Jesús Pedro chi;

¹⁷ ra Jacobo ta yañi ra ra Juan, sehe ra Zebedeo. Ta Boanerges sacunañi ra chi ninduvi tahan ra ta cuñi chi catyi: ra ñihi cahán tari cahán savi,

¹⁸ ra Andrés, ra Felipe, ra Bartolomé, ra Mateo, ra Tomás, ra Jacobo sehe ra Alfeo, ra Tadeo, ta inga ra Simón cha yihí cuenda ityi ra cuñi cuhun cuatyí siqui gobiernu ñuu Roma cha nyacá ñaha chi ñu,

¹⁹ ta ra Judas Iscariote, ra cha naxico tuhun chi ra Jesús.

Nu tyaá ñáyivi cuatyí siqui ra Jesús, ta catyi ñu vatyí tunyee ñi cuihna iyó chi ra

(Mt. 12.22-32; Lc. 11.14-23; 12.10)

Yaha cuan ta quihvi ra Jesus noo vehe chihin ra cachicá noo chihin ra.

²⁰ Ta inga chaha nataca cuaha ñáyivi, ta nyacua ni ña cuví ca cachi ra.

²¹ Cha cachito ñáyivi chi ra Jesús vatyí nyaá ra yucuan, quichi coyo ñu vatyí cunahun ra chihin ñu, vatyí catyi ñáyivi chi ñu tyi nduloco ra.

²² Ta suhva ra casacuahá cuenda ley vehe ñuhu Jerusalén cha quichi coyo suri tyicuan caa cacatyí ra:

—Ra ihya, ra Beelzebú ra cuví nuu chi cuihna yihí chi ra. Ta chihin tunyee ñi cuihna tava ñehe ra tatyí ña vaha —cacatyí ra.

²³ Tyicuan ta cana ra Jesús chi ra, ta catyi ra chi ra:

—¿Yoso caa, atu tavá ñehe cuihna suri chi ra tahan maa ra? Ma sacuvi cuihna tyicuan caa.

²⁴ Tatu noo gobiernu cacusiin ra, ta cacañi tahan ra chihin tahan ra, gobiernu cuan ña naha cuacunyaca ñaha ra.

²⁵ O tatu ñáyivi noo vehe, ña ñin ri cuví ñu chihin tahan ñu ta cañi tahan ñu, cutivi nu nyicú ñu.

²⁶ Ta tatu cuihna cacusiin ra ta canducuita ra siqui tahan ra, ¿yoso caa cucuvi chi ra? Cundihi tuhun ra.

²⁷ Yori cuví quihvi chichi vehe noo ra ñihi tari cuihna ta tinyaa ra cha chii ra, tatu ma cuhñi xihna ra chi ra.

Yucuan ndicha ta cuví tinyaa yo cha chii ra.

²⁸ 'Cha ndicha catyi chi ndo vatyí cuví coo ticahnu ñi tandihí nuu cuatyí ñáyivi, ta tandihí cha quiñi caa cha cahán ñu.

²⁹ Soco ñu cahán ña vaha siqui Tatyí Ii Nyoo, ma cuví maa coo ticahnu ñi cuenda cuan, soco tyicuan ri maa coo cuatyí ñu —catyi ra Jesús.

³⁰ Tyicuan caa catyi ra Jesús chi ra casacuahá cuenda ley vehe ñuhu, vatyí maa ra cacatyí ra vatyí ñohó noo tatyí ña vaha chi ra.

Yóo ñu cuví sihi ra Jesús ta yañi ra (Mt. 12.46-50; Lc. 8.19-21)

³¹ Tyicuan ta cha coyo sihi ra Jesús ta yañi ra, soco ndoo ñu ityi chata vehe, ta tachi ñu cucana chi ra.

³² Ta ra nyicú nicachico nu nyaá ra Jesús cacatyí ra chi ra:

—Sihun ta yañun ta cuhvon nyicú ñu ityi chata vehe, ta nanducú ñu chuun —catyi ra chi ra.

³³ Soco maa ra catyi ra:

—¿Yóo ñu cuví sihi ta yañi? —catyi ra.

³⁴ Tyicuan ta nanyehé ra chi ñu nyicú nicachico, ta catyi ra:

—Ican ñu ihya cuví sihi ta yañi.

³⁵ Vatyí savahri ñu sacuví cuhva cuñi Nyoo, ican ñu cuan cuví yañi, ta cuhve, ta sihi —catyi ra Jesús.

4

Tari noo ra chicá noo tachi, tyicuan caa cuví ra cahán tuhun Nyoo

(Mt. 13.1-9; Lc. 8.4-8)

¹ Inga chaha quichaha sañaha ra Jesús yuhu miñi, ta ndu ñin ri cuaha ñáyivi nu nyaá ra. Yucuan chaha quihvi ra chichi noo canoa cha tacaá nu ndutya yuhu miñi cuan. Ta chicunyaá ra, ta tandihí ñáyivi ndoo ñu nu ñiti.

² Tyicuan ta cuaha cha sañaha ra chi ñu chihin cuhva ri. Ta nu sañahá ra chi ñu, ta catyi ra chi ñu:

³ —Tyasoho ndo tuhun ihya. Minoo ra quitá ra vehe ra, cuahan ra nu iyó tyiño sahá ra. Ta quichaha quitá ra chiti trigu nu ñuhú ra.

⁴ Ta ityi cuahan ra quití ra, suhva chiti cuan canacoyo yuhu ityi, ta quichi coyo saa ta cachachi ti.

⁵ Suhva ca chiti canacoyo ticu yuu nu ña cuaha ñuhú yihí. Ta chiti cuan numi ri caña, vatyí ña cono xaan yihí ñuhú cuan.

⁶ Soco cuhva cha caña ñanyii, na ityi chi vatyí ña cono yihí yoho chi.

⁷ Ta suhva ca chiti canacoyo chichi tu iñu. Ta chahnu tu iñu cuan, ta chasi tun nuu trigo cuan. Yucuan chaha ña chiyo chiti tun.

⁸ Soco suhva chiti cha canacoyo nu ñuhú vaha. Ta caña ta chahnu. Ta vaha chaha tun chiti. Suhva tun chaha tun oco uchi chiti cha noo noo tun. Inga tun chaha tun uñi xico chiti. Ta inga tun chaha ciento chiti —catyí ra Jesús chi ñu.

⁹ Ta catyí tucu ra chi ñu:

—Tatu cutuñi iñi ndo, tyasoho ndo tuhun cahín.

Nu sacotó ra Jesús ñáá cuenda sañahá ra chihin cuhva ri chi ñáyivi (Mt. 13.10-17; Lc. 8.9-10)

¹⁰ Yaha cuan ta ndoo maa ri maa ra Jesús chihin ñu nyicón chi ra ta ndi uchi uvi tahan ra chicá noo chihin ra. Ta candaca tuhun ñu chi ra ñáá cha cuñi chi catyí tuhun cuan.

¹¹ Ta catyí ra chi ñu:

—Chi nyoho sacotó Nyoo tuhun xehe yoso caa nyacá ñaha ra ñima ñáyivi. Soco chi ñu cha ña chinó iñi chi ra, maa maa ri chihin cuhva ri sañahí chi ñu.

¹² Vatyí tatu nyehé ñu soco cuví chi tari cha ña nyehé ñu, ta tatu chiñi ñu soco ma cutuñi iñi ñu. Tacuhva cha ma nasama ñu cuhva iyó ñu ta ni ma coo ticahnu iñi cuatyí ñu —catyí ra Jesús chi ñu.

Nu chaha ra Jesús cuenda yoso caa cuahan tuhun ra tachí chiti cuan (Mt. 13.18-23; Lc. 8.11-15)

¹³ Ta catyí tucu ra chi ñu:

—¿Atu ña cutuñi iñi nyoho tuhun ihya? Tatu tyicuan caa ña cutuñi iñi ndo, ¿yoso caa cuví cutuñi ini ndo tandihi inga tuhun sañahí chi ndo?

¹⁴ Ra cha tachí chiti trigu cuan cuví ra tari noo ra cahán tuhun Nyoo.

¹⁵ Yihí ñáyivi cuví ñu tari nu canacoyo chiti yuhu ityi: chiñi ñu tuhun Nyoo, soco cha yaha chiñi ñu, quichi cuhna ta tinyaa ra tuhun Nyoo cha tachí ra ñima ñu.

¹⁶ Inga ñáyivi cuví ñu tari nu canacoyo chiti ticu yuu: chiñi ñu tuhun Nyoo ta sii cuñi ñu natin cuenda ñu noo ri cuhva.

¹⁷ Vatyí nu caña chiti ticu yuu cuan, chiin ri ñuhú yihí chaha, yucuan chaha caña soco ña cuví tyihi yoho vaha chi. Ta tyicuan caa ñu cuan, suhva ri quivi chino iñi ñu. Soco quivi vachi tindoho siqui ñu, o sataxi iñi ñáyivi chi ñu cha cuenda tuhun Nyoo, sandihi ri ñu tuhun cha chinó iñi ñu.

¹⁸ Ta inga ñu cuví ñu tari nu canacoyo chiti chichi tu iñu: chiñi ñu tuhun Nyoo,

¹⁹ soco cutyoño ca iñi ñu cha cuenda tindoho cha iyó siqui ñuhu ñáyivi ihya. Cha tyayii sandaví ñaha chi ñu, ta cuñi ñu tandihi ri nuu cha iyó. Tandihi ihya quihví xiñi ñu ta ña nyaá ca xiñi ñu tuhun Nyoo, ta ña chahá chi sacuvi ñu cha vaha cha cuenda cuan.

²⁰ Soco yihí ñu cha chiñi ñu tuhun Nyoo ta naquehén cuenda ñu, ta vaha sacuví ñu, tari nu canacoyo chiti nu ñuhú vaha cuví ñu. Yihí ñu cuví ñu tari yutun cha caña ta chaha tun oco uchi tahan chiti tahan tahan tun. Ta inga ñu cuví ñu tari yutun cha chaha uñi xico. Ta inga ñu tari yutun cha chaha ciento.

Ma tyihi xehe yo ñuhu cha sandundichin Nyoo ñima yo coto tinyaa ra

(Lc. 8.16-18)

²¹ Ta catyí tucu ra chi ñu:

—¿Atu quichi nyaca yo noo tima vatyí cananyaa yo chichi noo cajón o xiu chito? Ñima. Tima cuan cuñi chi tyiso yo noo nu sucun vatyí na sacundichin chi chichi vehe.

²² Ta tyicuan caa tucu, ñahri cha ñohó xehe, ta cuñun, tyi ma natuvi.

Ta ñahri noo tuhun xehe, ta cuñun, tyi ma coto yo.

²³ Nyoho cha cutuñí iñi ndo, tyasoho ndo tuhun cahín —catyí ra Jesús chi ñu.

²⁴ Catyí tucu ra tyehe caa:

—Tyasoho vaha ndo tuhun cahín. Yoso cuhva sacuví ndo chi ñáyivi, yucuan cuhva sacuvi Nyoo chihin ndo. Ta cuaha ca cucuhva ra chi ndo tatu tyasohó ndo cha cahán ra.

²⁵ Vatyí ñu tyasohó cha cahín, cuaha ca cuhva Nyoo chi ñu. Soco ñu ña tyasohó, cutinyaa ndihi ra cha chiin cha cha yaha chaha ra chi ñu.

Nu sañahá ra Jesús cuhva chahnu noo chiti yutun

²⁶ Catyí tucu ra Jesús tyehe caa:

—Cha nyacá ñaha Nyoo aña ñáyivi cuví chi tari noo ra tachí noo chiti chichi ñuhú.

²⁷ Ta cuahan ra cua cusu ra. Yaha cuan ta ndicuita ra. Ta cuaha quivi yaha. Ta caña chiti cuan, ta chahnu yutun. Soco maa ra ña chitó ra yoso caa chahnu tun.

²⁸ Cha cuenda vatyí maa ñuhú cuan sacuvahá chi tun tyicuan ri caa. Xi-hna ca quitá xityin tun, ta yaha cuan yoco tun, yaha cuan ta quitá chiti nu yoco cuan.

²⁹ Ta tatu cha chityi chiti cuan, cutohon ra vatyí cha cha quivi cha coyo —catyí ra Jesús.

Nu sañahá ra Jesús vatyí tari chahnu noo chiti mostaza, tyicuan caa nducuaaha nu nyacá ñaha Nyoo
(Mt. 13.31-32; Lc. 13.18-19)

³⁰ Ta catyí tucu ra Jesús:

—¿Ñáá chihin sanandiqui tahir cha nyacá ñaha Nyoo aña yo? ¿Ñáá chihin sandu inuu ri yo?

³¹ Cuví chi tari noo chiti mostaza cha tachí yo nu ñuhú. Ican chiti cuan, lee ca cha nuu tandihi chiti iyó siqui ñuhu ñayivi.

³² Soco tatu tachí yo, caña ta cuahnu. Ta cahnu vavaha cuví tun. Ta nahnu soco tun, ta nyacua nya saa cha chicó nu tatyí cuví nyitatu ti nu vati tun.

Yoso caa sañahá ra Jesús chihin cuhva ri chi ñáyivi

(Mt. 13.34-35)

³³ Tyehe caa sañahá ra Jesús chi ñu, chihin cuaha cuhva, nyacua nya nu cuví cutuñi iñi ñu.

³⁴ Ñahri maa cha catyí ra chi ñu tatu ñima chihin noo cuhva. Soco chi ra cachicá noo chihin ra, nacatyí vaha ra chi ra.

Nu sacutaxín ra Jesús tatyí ta miñi
(Mt. 8.23-27; Lc. 8.22-25)

³⁵ Suri maa quivi cuan, cuhva cha cuaa, catyí ra chi ra cachicá noo chihin ra:

—Coho ndo inga chiyo miñi cuan.

³⁶ Tyicuan ta casando ra chi ñáyivi. Ta cuahan ra Jesús chihin ra chichi canoa cha catuvi cuan. Ta cuahan tucu inga canoa chihin ra.

³⁷ Ta quichaha caa noo tatyí ñihi xaan, ta quichaha quivi ndutya chichi canoa cuan, ta quichaha chitu.

³⁸ Ta ra Jesús quixí ra siqui noo cabecera cha nyaá inchiyo xiin canoa cuan. Ta casandoyo ra chi ra, ta cacatyí ra:

—¡Maestro! ¿atu ñahri cuendon cha cuñi nyee yo?

³⁹ Tyicuan ta ndicuita ra Jesús ta cahan ra chi tatyí cuan na cutaxin. Ta catyí ra chi ndutya miñi cuan tyehe caa:

—¡Taxi ri! ¡Taxi cunyaun! —catyí ra.

Ta tatyí cuan cutaxin, ta taxi taxi cuví.

⁴⁰ Tyicuan ta catyí ra Jesús chi ra cachicá noo chihin ra:

—¿Ñáá tuhun cha yuhví xaan ndo? ¿Atu ta chino ca iñi ndo? —catyí ra chi ra.

⁴¹ Soco maa ra cayuhví xaan ra cha cuvi cuan. Ta cacatyí ra chi ra tahan ra:

—¿Yóó ra cuví ra ihya, vatyí nyacua nya tatyí ta miñi quichahá chi ra? —cacatyí ra.

5

Nu nduvaha ra yihí tatyí ña vaha chii ñuu Gadara
(Mt. 8.28-34; Lc. 8.26-39)

1 Chaa coyo ra yuhu miñi, inga chiyo nu nyaá ñuu Gadara.

2 Ta quita ri ra Jesús chichi canoa, ta quita noo ra nu ñaña cuan ta chaa ra nu nanyaá ra Jesús. Ta yihí noo tatyí ña vaha aña ra.

3 Ta nu ñaña cuan iyó maa ra cuan. Ta yori maa cuví chasaha chi ra, ni ri chihin cadena.

4 Cuaha xaan chaha chahñi ñu chaha ra ta ndaha ra chihin cadena, soco chahnya ra. Yiquin maa sacuvi ra. Ta yori maa cuví chasaha chi ra.

5 Ñicahñu ta cha cuaa chicá noo ra canachaá ra nya nu yucu ta nya nu ñaña. Ta sañicuehé ra suri chi maa ra chihin yuu.

6 Soco cañi ca nanyehe ra chi ra Jesús, ta chino vavaha ra chaa ra. Ta chicuiñi chiti ra nuu ra.

7 Ta cana chaa ra ta catyí ra:

—¿Ñáá tuhun cha tyihún chuun chihin yuhu, yoho Jesús, Sehe Nyoo ra cuví nuu? Chacú ndahvi nuun chihin sívi Nyoo, ma sanyehun tindoho chii.

8 Catyí tatyí cuan tyehe caa vatyí ra Jesús cha catyí ra chi ra:

—¡Saña chi ra chiña, yoho tatyí ña vaha! —catyí ra.

9 Ta ra Jesús ndaca tuhun ra chi ra, ta catyí ra:

—¿Ñáá nañún?

Ta nacahan tatyí ña vaha cuan:

—Legión nañi, vatyí cuaha xaan ndi —catyí chi chi ra Jesús.

10 Ta chacu ndahvi tatyí ña vaha cuan nuu ra Jesús tacuhva cha ma tachi ra chi chi nu cañi.

11 Ta yatyin ri yucu cuan nyicú cuaha xaan quini cachachí ti.

12 Yucuan chaha catyí tatyí ña vaha cuan chi ra Jesús tyehe caa:

—Tachi chi ndi na quihvi ndi quini cuan —catyí tatyí cuan.

13 Tyicuan ta chaha ra Jesús, ta tatyí cuan quita coyo chi ra cuan, ta quihvi chi quini cuan. Ta cha uvi mil quini nyicú cuan, cachino ti, ta canacoyo ti chichi noo xahva yuhu miñi cuan, ta cachihí ti chichi ndutya cuan.

14 Tyicuan ta ra sahá cumi quini cuan, chino xaan ra chihin cha yuhví ra, ta chinacatyí ra chi ñáyivi ñuu cuan ta ñu ñohó nu chiqui. Ta quichí coyo ñáyivi, quichí nyehe ñu ñáá cha cuví.

15 Cuhva cha chaa coyo ñu nu nyaá ra Jesús, nanyehe ñu chi ra cha yihí tatyí ña vaha cuan chi. Ta vityin nyaá ra ñihnó ra sahma, ta cachi vaha iyó xiñi ra. Ta yuhví xaan ñu cuví.

16 Ta ñu cha nyehe cha cuví chi ra cuan ta chi quini cuan, canacatyí ñu chi tandihí ca ñu.

17 Tyicuan ta quichaha chacu ndahvi ñu nuu ra Jesús, na quita ra ñuu ñu.

18 Ta cuhva cha cua quihvi ra Jesús chichi canoa, ra cha yihí tatyí ña vaha cuan chi chacu ndahvi ra nuu ra Jesús na cuhva ra cuhun ra chihin ra.

19 Soco ra Jesús ña chaha ra cuhun ra, ta catyí ra chi ra:

—Cuanuhu nya vehun, nu nyaá ñáyivi chuun, ta nacatyun chi ñu tandihí cha sacuvi Sutu yo Nyoo chuhun, ta yoso caa cundahvi cuñi ra nyehe ra chuun.

20 Ta ra cuan cuahan ra ta quichaha nacatyí ra chi ñáyivi tandihí ñuu Decápolis tandihí cha sacuvi ra Jesús chihin ra. Ta tandihí ñu, iyo cuñi ñu.

Nu nduvaha sehe ra Jairo ta ñaha sihi cha tñn sahma ra Jesús

(Mt. 9.18-26; Lc. 8.40-56)

21 Ta cuhva cha nachaa ra Jesús chihin canoa nya inga chiyo miñi cuan, chaa coyo cuaha ñáyivi nu nyaá ra. Ta ndoo ra yuhu miñi cuan.

22 Tyicuan ta chaa noo ra cuví nuu vehe ñuhu. Nañi ra Jairo. Ta cuhva cha nanyehe ra chi ra Jesús, chicuiñi chiti ra nuu ra.

23 Ta chacu ndahvi ra nuu ra ta catyí ra:

—Cha cuñi cúvi sehi. Coho chihin ta tyison ndahun síqui ña na nduvaha ña ta ma cúvi ña.

24 Tyicuan ta cuahan ra Jesús chihin ra, soco cuaha ñáyivi nyicón chi ra, ta nyacua nañi tahan ri ca maa ñu.

²⁵ Ta mahñu ñáyivi cuan ñohó noo ñaha cha cuhvi. Cha quita uchi uvi cuiya ndoho ña cuehe cha chatí niñi ña.

²⁶ Ta cuaha tindoho nyehe ña cha cuaha xaan doctor nyehe chi ña. Ta cha sanaa ña tandihi maa cha iyó chi ña, soco ñahri maa tyinyee chi chi ña. Soco ñihi ndihi ca nanduvi.

²⁷ Cuhva cha chitó ña tuhun milagru cha sacuvi ra Jesús, tuhva ña ityi chata ra ta tiin ña sahma ra.

²⁸ Vatyí chicá xiñi ña: “Ma chihin cha tiin ri sahma ra, ta nduvahi”, chicá xiñi ña.

²⁹ Ta caa cuhva ri cha tiin ña sahma ra ta cha chatí niñi ña cutaxin. Ta tuví iñi coño ñuhu ña tyi cha nduvaha ña chihin cuehe cuan.

³⁰ Tyicuan ta tuví iñi ra Jesús vatyí nduvaha noo ñáyivi chihin suhva tunyee iñi cha quita chi ra. Tyicuan ta nanyehé ra ityi chata ra ta quichaha ndaca tuhun ra:

—¿Yóo cha tiin sahme? —catyí ra.

³¹ Tyicuan ta ra cachicá noo chihin ra quichaha catyí ra chi ra:

—Cha nyehun vatyí ñáyivi tyandahá chuun tyi tiin xaan. ¿Yoso caa cha ndaca tuhun: “Yóo cha tiin chii”? —cacatyí ra chi ra.

³² Soco ra Jesús nyehe ra ityi cuan ityi ihya, vatyí cuñi ra nyehe ra yóo cha tiin chi ra.

³³ Tyicuan ta ñaha cuan nihi ña chihin cha yuhvi ña vatyí chitó ña ñáa cha cuví chi ña. Ta chahan ña chicuiñi chiti ña nuu ra. Ta nacatyí ña tandihi cha ndicha chi ra.

³⁴ Ta catyí ra Jesús chi ña:

—Cha nduvahun, sihi, vatyí chinó iñun. Cuahan, ta ma caca xiñun, vatyí cha nduvahun chihin cuehe cha ndohun —catyí ra Jesús chi ña.

³⁵ Ni cahán ca ra Jesús ta chaa coyo ñu vehe ra cuví nuu cuan, ta catyí ñu chi ra cha cuví sutu cha luhlu cuan:

—Sehun, cha chihí ña. Ñáa ri ca tuhun cha sayangon chi Ra Sacuaha chiña —catyí ñu.

³⁶ Soco ra Jesús ña quichaha ra cha cahan ñu, ta catyí ra chi ra cuví nuu vehe ñuhu cuan:

—Ma yuhvun. Chino iñun —catyí ra chi ra.

³⁷ Ta ña chaha ra yóo ca cha cuhun chihin ra, notuhun ri ra Pedro ta ra Jacobo ta ra Juan, yañi ra Jacobo.

³⁸ Ta cuhva cha cachaa coyo ra vehe ra cuví nuu vehe ñuhu, nyehe ra cha chacú chaa ñáyivi ta caná chaa ñu.

³⁹ Quihvi ra ta catyí ra chi ñu:

—¿Ñáa tuhun cha iyo xaan cuví ndo, ta chacú ndo tyiña caa? Cuehe luhlu ihya, ña chihí cue, quixí cue —catyí ra chi ñu.

⁴⁰ Soco chacu cuehe ri ñu nyehe ñu chi ra. Tyicuan ta ra Jesús tava ra chi tandihi ñu, ta quehen ra chi sutu cue ta sihi cue ta chi ra cha chaa coyo chihin ra, ta quihvi coyo ra nu catuví cue.

⁴¹ Ta tiin ra ndaha cue, ta catyí ra chi cue:

—Talita cumi —ta cuñi chi catyí cuan: Catyí chuun, yoho cuehe luhlu, jndicuita!

⁴² Ta caa cuhva ri cua ndicuita cuehe luhlu cuan. Iyó uchi uvi cuiya cue. Ta cuví nacaca cue. Ta ñáyivi iyó xaan cuñi ñu.

⁴³ Soco ra Jesús ñihi chaha ra tuhun chi ñu, tyi ma cahan maa ñu tuhun, ta catyí ra chi ñu na cuhva ñu cha cachi cue.

6

Nu ñoho ra Jesús ñuu Nazaret (Mt. 13.53-58; Lc. 4.16-30)

¹ Tyicuan caa cuví ta quita ra Jesús yucuan, ta cuanuhu ra nya ñuu ra. Ta ra cachicá noo chihin ra cuahan coyo ra chihin ra.

² Ta chaa quivi nyitatu ñáyivi, ta quichaha sañaha ra chichi vehe ñuhu. Ta cuaha ñáyivi chiñi tuhun cahán ra, ta iyo cuñi ñu, ta catyí ñu:

—¿Nya cutuhva ra ihya tandihi tuhun ihya? ¿Yóo cha chaha cha chiñi tuñi ihya chi ra? ¿Yoso caa cha cuví sacuvi ra milagru nahnu xaan ihya?

³ ¿Atu ñima ra satyá vitu cuan cuví ra? Sehe cu María cuví chi ra. Ta yañi ra Jacobo, ta ra José, ta ra Judas, ta ra

Simón, ta cuhva ra iyó tucu ñu chihin yo ihya —catyi ñu.

Ta quiñi cuñi ñu nyehe ñu chi ra.

⁴ Soco catyi ra Jesús chi ñu:

—Tandihí ñu inga ñuu sahá ñu ñáyivi chi noo ra profeta Nyoo, soco ñu ñuu ra ña quichahá ñu chi ra, ni ñu vehe ra, ni ñáyivi chi ra —catyi ra Jesús.

⁵ Ta ña cuvi sacuvi ra ni noo milagru yucuan, soco tyiso ra ndaha ra siqui suhva ri ñu cuhvi, ta sanduvaha ra chi ñu.

⁶ Ta iyo cuñi ra vatyí ra ñu ñuu ra ña chinó iñi ñu chi ra. Ta chahan ra tandihí ñuu nyihi cha nyicú yatyin ri cuan, ta sañaha ra.

Nu tyatyíño ra Jesús chi ra cachicá noo chihin ra nu cucahan ra tuhun Nyoo

(Mt. 10.5-15; Lc. 9.1-6)

⁷ Yahá cuan ta caná ra chi ndi uchi uvi ra chicá noo chihin ra, ta quichaha tachi ra chi uvi uvi ra. Ta chaha ra ityi chi ra vatyí tava ñehe ra chi tatyí ña vaha yihí añima ñáyivi.

⁸ Ta catyi ra chi ra vatyí ñahri maa cha cacuiso ra ityi. Ni yono, ni cha cachi ra, ni xuhun. Ñahri maa cuquindaha ra, noo ri yutun tui ra cuiiso ra.

⁹ Ndichan ri quihí chaha ra. Ta noo ri sahma cuihno ra, ñima uvi tahan.

¹⁰ Ta catyi ra chi ra:

—Cuhva cha chaa ndo noo ñuu ta quihvi ndo noo vehe, ndo noo yucuan ri nyacua nya cha quita ndo ñuu cuan.

¹¹ Ta tatu ñáyivi iyó noo ñuu, ña cuñi ñu tñn cuenda ñu chi ndo, ta ña cuñi ñu tyasoho ñu tuhun cahan ndo, quita ndo yucuan ta naquisi ndo ñiyaca chaha ndo tari noo seña vatyí ña vaha sacuvi ñu. Cha ndicha catyi chi ndo, vatyí quivi cucutuñi chi ñáyivi iyó siqui ñuhu ñáyivi, ñu cha ma cuñi tñn cuenda tuhun cahan ndo, cuaha ca tindoho cunyehe ñu, ta ñima ca ñu ñuu Sodoma ta ñuu Gomorra —catyi ra Jesús chi ra.

¹² Tyicuan ta quita coyo ra ta chichahan ra tuhun Nyoo chihin ñáyivi na

ndu uvi iñi ñu cuatyí ñu, ta na nanducu ñu chi Nyoo.

¹³ Ta catava ñehe ra cuaha tatyí ña vaha añima ñáyivi. Ta cahyu ra acetye chi cuaha ñu cuhvi ta casanduvaha ra chi ñu.

Nu catyi chi yoso caa chihí ra Juan ra sacondutyá chi ñáyivi

(Mt. 14.1-12; Lc. 9.7-9)

¹⁴ Chito rey Herodes tuhun ra Jesús vatyí tandihí ñáyivi cahán ñu tuhun cha sacuvi ra, ta chicá xiñi ra tyehe caa:

—Ra Juan ra sacondutyá chi ñáyivi cuví ra cuan. Nandoto ra cha yaha chihí ra, yucuan chaha iyó tunyee iñi chi ra —chicá iñi ra.

¹⁵ Inga ñu catyi ñu:

—Ra Elías profeta Nyoo ta cha naha cuví ra ihya —catyi ñu.

Ta inga ñu catyi ñu:

—Inga profeta Nyoo cuví ra, tari ra profeta Nyoo ra chiyó ta cha naha.

¹⁶ Cuhva cha chiñi ra Herodes tuhun ihya, catyi ra:

—Ican ra cuan cuví ra Juan cha tyihí tyiño tahnya sucun, ta vityin nandoto ra —catyi ra Herodes.

¹⁷ Tyicuan caa catyi ra Herodes vatyí cha catyi cu Herodías, ta tyihí ra chi ra Juan vehe caa ta chahñi ra chi ra chihin cadena. Cu Herodías cuan, ñasihí ra Felipe, yañi ra Herodes, cuví chi ña. Soco ra Herodes quehen ra chi ña vatyí cuví ña ñasihí ra.

¹⁸ Ta ra Juan catyi ra chi ra Herodes vatyí ña vaha cha cunyaa ra chihin ñasihí yañi ra.

¹⁹ Yucuan chaha cu Herodías tasi xaan cuñi ña nyehe ña chi ra Juan, ta cuñi ña cahñi ña chi ra, soco ña cuví.

²⁰ Vatyí ra Herodes chitó ra vatyí ra Juan cuví ra noo ra vaha, ra ii, ta yuhvi ra chi ra. Yucuan chaha sahá cuenda vaha ra chi ra, ña chaha ra cha sacuvi ña cha cuñi maa ña chihin ra. Ta vasi ña cuaha cutuñi iñi ra Herodes cha cahán ra Juan soco vaha cuñi ra chiñi ra cha cahán ra.

²¹ Soco cu Herodías ñihí ña noo cuhva nu ndihí ra Herodes cuiya, vatyí sacoo ra noo vico cha cuenda ra cacuvi tyiño, ta comandante cuenda

sindaro, ta ra nahnu ca ityi Galilea cuan.

²²⁻²³ Ta quihv̄i sehe cu Herodías vico cuan, ta quichaha chit̄a chaha ña. Ta tahañ xaan iñi ra Herodes ta ra cha nyicú cuxiñi chihin ra. Ta tyaa ra cuhva vatyi cuhva ra ñáá cha cacac ña chi ra. Ta catyi ra chi ña:

—Cacan ñáá cha cuñún chii, ta cuhve chuun —catyi ra chi ña.

Ta catyi ra vatyi cuhva ra ñáá ri cha cacac ña, vasi sava ñuhú ñuu nu nyacá ñaha ra.

²⁴ Quit̄a ña ta catyi ña chi sihi ña:

—¿Ñáá cha caquen chi ra? —catyi ña.

Ta catyi sihi ña:

—Cacan xiñi ra Juan ra sacondutyá —catyi ña chi sehe ña.

²⁵ Ta numi ri ndihv̄i ñaha tyivaa cuan nu nyaá rey Herodes, ta catyi ña chi ra:

—Cuñí vatyí cahnyon xiñi ra Juan ra sacondutyá ta tyihun nuu noo coho ta cuhvon chii vityin vityin —catyi ña chi ra.

²⁶ Tyicuan ta nducuihya xaan iñi rey cuan. Soco cha tyaa ra cuhva vatyí cuhva ra chi ña, ta s̄in ri cachiñi ra canyicú chihin ra, ta ña cuñí ra nacahnu ra cha catyi ra chi ña.

²⁷ Numi ri tach̄i rey cuan tyiño chi noo sindaro na quichi nyaca ra xiñi ra Juan.

²⁸ Chahan sindaro cuan chichi vehe caa cuan, ta chahnyá ra xiñi ra Juan. Ta quichi nyaca ra, yihí nu noo coho. Tyicuan ta chah̄a ra chi ñaha tyivaa cuan, ta maa ña nacuhv̄a ña chi sihi ña.

²⁹ Cha chit̄o ra canyicón chi ra Juan, chahan coyo ra chinaquehen ra coño ñuhu ra, ta cachityih̄i ra chichi ñuhú.

Nu chah̄a ra Jesús cha cachi ohon mil rayi

(Mt. 14.13-21; Lc. 9.10-17; Jn. 6.1-14)

³⁰ Yah̄a cuan ta ndu ñin ri ra cha tyatyño ra Jesús chi chihin ra, ta canacatyí ra tandih̄i cha casacuv̄i ra, ta cha casañah̄a ra nu chahan ra chichahan ra tuhun Nyoo.

³¹ Ta catyi ra Jesús chi ra:

—Ñaha ndo, na nyitatu yo chiin noo nu taxi ri iyó —catyi ra chi ra.

Tyicuan caa catyi ra vatyí cuaha ñáyiv̄i cuahan ta vachi ñu, ta nyacua ña cacuyatyí ra cha cacachi ra.

³² Tyicuan ta maa ri maa ra Jesús ta ra cachicá noo chihin ra cuahan coyo ra chihin noo canoa noo nu yori maa ñáyiv̄i nyicú, minoo nu taxi ri.

³³ Soco cuaha ñu nyehe nu quit̄a ra. Ta canicohon nuu ñu chi ra. Ta cuahan coyo vavaha ñu chihin chaha ñu, quit̄a ñu tandih̄i ñuu ta xihna ca maa ñu chāa coyo.

³⁴ Cuhva cha chāa ra Jesús, quit̄a ra chichi canoa ta nanyehe ra tyí cuaha xaan ñu nyicú yucuan. Ta cundahvi cuñí ra nyehé ra chi ñu, vatyí nyicú ñu tari mbee cha yori ra sahá cumi chi ti. Ta quichah̄a sañaha ra cuaha tuhun chi ñu.

³⁵ Cha cua iñi xaan, ta ra cachicá noo chihin ra catuhv̄a ra ta catyi ra chi ra:

—Cha iñi xaan, ta yucu taxin cuv̄i ihya.

³⁶ Catyi chi ñu, na cuhun ñu ñuu cha nyicú yatyin ihya, ta sata ñu pan, vatyí ñahri cha cachi ñu iyó ihya —catyi ra chi ra.

³⁷ Soco nacahan ra Jesús, ta catyi ra:

—Cuhva maa ndo cha cachi ñu.

Canacahan ra ta catyi ra:

—Vasi saha tyiño ndi iñu yoo, soco ma caña xuhun cha cusata ndi pan cachi tandih̄i ñu ihya.

³⁸ Ta catyi ra Jesús chi ra:

—¿Yoso tahan pan nyisó ndo? Cuahan ndo cua nyehe ndo.

Ta cuhva cha cachit̄o ra yoso tahan, cacatyí ra chi ra:

—Ohon tahan pan ta uvi tiyaca.

³⁹ Tyicuan ta catyi ra na cunyicú noo noo ticūiti ñu nu cuhu cuui cuan.

⁴⁰ Ta chicunyicú ñu cuenda ciento ta cuenda uvi xico uchi ñu.

⁴¹ Tyicuan ta quehen ra Jesús ndi ohon tahan pan cuan ta n̄induvi tiyaca cuan. Ta nanyehe ndaa ra andiv̄i, ta nacuhv̄a ra tyahv̄i nyoo chi Nyoo, ta tahv̄i ra pan cuan, ta chah̄a ra chi

ra cachicá noo chihin ra na casacha ra. Tyicuan ta casachá ra chi ñáyiví cuan. Yaha cuan ta casachá tucu ra nĩnduvi tiyaca cuan chi ñu.

⁴² Tandihí ñu cachachí ta ndaha iñi ñu.

⁴³ Ta nyacua ndoo ca ta casacutú ra uchi uvi tica chihin yiquin pan ta tiyaca.

⁴⁴ Ta ohon mil rayí cachachí pan cuan.

*Nu chicá ra Jesús nu miñi
(Mt. 14.22-27; Jn. 6.16-21)*

⁴⁵ Tyicuan ta catyí ra Jesús chi ra cachicá noo chihin ra na quihví coyo ra chichi canoa vatyí cuhun coyo ra ityi nuu nya inga chiyo miñi cuan ñuu Betsaida. Vatyí maa ra Jesús cunasacha xihna ra ñáyiví, tyicuan ta cuhun ra catyí ra.

⁴⁶ Ta cha yaha cuahan coyo ra, ra Jesús cuahan ra nu yucu, cua cacan tahvi ra.

⁴⁷ Ta cuhva cha cuaa, canoa nu ñohó ra cachicá noo chihin ra cha cuahan nya mahñu miñi cuan, ta ndoo noo tuhun ri maa ra.

⁴⁸ Ta nyehe ra vatyí ña cacuví vaha casacaca ra canoa cuan vatyí ñihi xaan tatyí. Ta cha ñaa ca cuan tuhva ra Jesús chicá ra nu ndutya cuan. Ta saha ri ra cha cua yaha ra nu canoa cuan.

⁴⁹ Soco cananyehe ra chi ra, chicá ra nu ndutya. Ta cacuñi maa ra vatyí noo cha sayuhvi cuví, ta cacana cha ra.

⁵⁰ Vatyí tandihí ra canyehe ra chi ra ta cayuhvi ra. Soco maa ra cahan ra chihin ra ta catyí ra:

—¡Sanyee ndo iñi ndo! ¡Yuhu cuví! ¡Ma yuhvi ndo! —catyí ra.

⁵¹ Quihví ra chichi canoa nu canyicú ra, ta cutaxin tatyí cuan. Ta iyo xaan cacuñi ra

⁵² cha cuenda vatyí ta cutuñi ca iñi ra milagru cha sacuví ra chihin pan, vatyí ni ndava ca añima ra.

*Nu sanduvahá ra Jesús chi ñu cuhví
ñuu Genesaret
(Mt. 14.34-36)*

⁵³ Cayaha sava ra miñi cuan ta cachaá coyo ra ñuu Genesaret, ta

cachahñi ra canoa cuan yuhu ndutya ri cuan.

⁵⁴ Ta cha quita coyo ri ra chichi canoa cuan, nichon nuu ri ñáyiví chi ra Jesús.

⁵⁵ Ta cachino vavaha ñu nichonu ityi cuan sacotó ñu vatyí chaá ra. Ta quichí coyo ñu tandihí ri ñuu, quichí nyaca ñu chi ñu cuhví chihin chito nya nu nyaá ra Jesús.

⁵⁶ Ta tandihí ri ityi nu quihví ra chichi ñuu luhlu o chichi ñuu nahnu, o chichi cuhu, chacun ñu chi ñu cuhví yuhu ityi. Ta chacu ndahvi ñu nuu ra na cuhva ra cha tin ñu vasí chiin yuhu sahma ra. Ta tandihí ri ñu tin chi ra, nduvahá ñu.

7

*Nu sañahá ra Jesús ñáá cha sativí
chi ñáyiví
(Mt. 15.1-20)*

¹ Yaha cuan ta ra fariseo ta suhva ra sacuahá cuenda ley vehe ñuhu quichí coyo ra nya ñuu Jerusalén, ta catuhva ra chi ra Jesús.

² Ta canyehe ra vatyí yihí ra cachicá noo chihin ra Jesús cachachí ra ta ña nacatya ra ndaha ra tari cuhva cha tahán chi cha costumbre. Yucuan chaha cacahan nya ra chi ra.

³ Vatyí ra fariseo ta tandihí ñu Israel cuan nyicón ca ñu costumbre sutu chahnu ñu, vatyí ma cachi ra tatu ma ndoo ndaha ra cuaha chaha tari cuhva costumbre iyó chi ñu.

⁴ Ta tatu nachaa coyo ñu cha chahan ñu nuyahvi, ma cachi ñu tatu ma sacuví ñu cuhva cuan cha canacatya xaan ñu ndaha ñu. Ta iyó cuaha ca costumbre cha canyicón ñu. Iyó noo cuhva cha tahán chi nacatya ñu vasu, jarra, ta tandihí ndaha tyiño caa cha iyó chi ñu ta cama ñu ñandihí.

⁵ Tyicuan ta ra fariseo ta ra sacuahá cuenda ley cuan candaca tuhun ra chi ra Jesús, ta catyí ra:

—¿Ñáá tuhun ña sacuví ra nyicón chuun cuhva costumbre sutu chahnu yo? Vatyí ña nacatya ra ndaha ra tari cuhva tahán chi tatu cuacachi ra xita —catyí ra chi ra.

6 Ta nacahan ra Jesús, ta catyí ra:
—Ndicha cha cahan ra Isaías tuhun ndo vatyí sahá ndo tyi vaha ndo ta ña ndicha ndo. Catyí ra tyehe caa:

Ñáyivi ihya, chihin yuhu ri ñu catyí ñu tyi cuñí ñu chii.

Soco ñima chihin cha tandihí aña ñu, tyi sñn nu nyaá xiñi ñu.

7 Ñahri maa tuhun cha sacahnú ñu chii,

vatyí cha sañahá ñu chi tahan ñu, maa maa ri maa cuhva sañahá ñáyivi ri cuví, tyaá ra Isaías tuhun ndo.

8 Vatyí nyoho sandoó ndo cuhva catyí Nyoo, ta nanyicón ndo cuhva costumbre ñáyivi ri, tuhun cha nacatya xaan ndo ndaha tyiño ndo, ta cuaha cha tyicuan caa sacuví ndo.

9 Nyoho sanducaxiin ndo tuhun cha catyí Nyoo tyi sacuvi ndo, tacuhva vatyí cuvi sacuvi ndo costumbre cha iyó ndo.

10 Soco ra Moisés catyí ra nu ley cha tyaá ra: “Saha ndo ñáyivi chi sutu ndo ta chi sihi ndo.” Ta catyí tucu ra: “Tandihí ñu cha cahan ña vaha chi sutu o chi sihi ñu, tahnán chi cúvi ñu.” catyí ra Moisés nu ley Nyoo.

11 Soco nyoho catyí ndo tyi noo ñáyivi cuví catyí ñu chi sutu ñu o chi sihi ñu tyi ma cuvi tyinyee ñu chi ñu vatyí tandihí cha iyó chi ñu Corbán cuví. (Cuñí chi catyí: “Cha चाहि chi Nyoo cuví.”)

12 Ta tatu catyí ñu tyicuan caa, ña cuñí ca chi cha tyinyee ñu chi sutu ñu o chi sihi ñu catyí ndo.

13 Ta tyicuan caa sacuachiyó ndo tuhun cha catyí Nyoo tyi sacuvi ndo, vatyí cuñí ndo sacuvi ri maa ndo tuhun cha iyó ndo. Ta cuaha ca cha inuu ri caa sacuví ndo —catyí ra Jesús.

14 Tyicuan ta cana tucu ra Jesús chi ñáyivi ta catyí ra chi ñu:

15 —Tyasoho vaha tandihí ndo tuhun cahnín, ta natyihí tuñi iñi ndo. Cha quihví yuhu ñáyivi ta chachí ñu, ña cuví sativi chi chi ñu. Soco cha quitá aña ñu, ican cuan sativi chi ñu.

16 Nyoho cha cutuñí iñi ndo, tyasoho ndo tuhun cahnín —catyí ra Jesús chi ñu.

17 Tyicuan ta sandoó ra Jesús chi ñáyivi cuan, ta quihví ra chichi vehe. Ta ra cachicá noo chihin ra candaca tuhun ra chi ra ñáá cha cuñí chi catyí tuhun cuan.

18 Ta catyí ra Jesús chi ra:

—Tu tyicuan caa, ni nyoho, ña cutuñí iñi ndo. ¿Atu ña cutuñí iñi ndo vatyí cha quihví chichi yuhu yo ña sativi chi chi yo?

19 Vatyí ñima aña yo quihví chi, soco chichi yo. Ta yaha cuan ta quita chi chichi coño ñuhu yo —catyí ra Jesús.

Chihin cuan cuñí ra catyí ra vatyí tandihí nyayu ta vaha cachi yo.

20 Ta catyí tucu ra:

—Cha quitá aña ñáyivi, ican cuan sativi chi ñu.

21 Vatyí aña ñu quitá cha ña vaha chicá xiñi ñu, ta sacuví ñu cha ña vaha. Yihí ñu iyó ñu chihin rayi o chihin ñusihí ta ñima ñasihí ra cuví, ta ñima yi ñu cuví. Yihí ñu casuhú ñu. Yihí ñu cachahñí ñu.

22 Yihí ra iyó ñasihí ra ta chicá noo ra chihin inga ñu. Yihí ñu quichi cuvi iñi ñu cha chii inga ñáyivi. Yihí ñu sacuví ñu cha quiñi caa. Yihí ñu sandaví ñaha ñu. Yihí ñu iyó viciu chi ñu. Yihí ñu nyiyo iñi ñu. Yihí ñu ñi ñu cuendu. Yihí ñu cahnú sahá ñu chi ñu. Yihí ñu ña chaa cha chiñi tuñi xiñi ñu.

23 Tandihí tuhun ña vaha ihya, quitá chi ityi chichi aña ñáyivi, ta sativi chi chi ñu —catyí ra chi ra.

Noo ñaha inga ñuu cha chino iñi chi ra Jesús

(Mt. 15.21-28)

24 Yaha cuan ta quita ra Jesús yucuan, ta cuahan ra ityi ñuu Tiro ta Sidón. Quihví ra chichi noo vehe ta ña cuñí ra cha coto ni noo ñáyivi, soco ña cuví tixehe nuu ra.

25 Ta sihi noo ñaha tyivaa cha yihí noo tatyí ña vaha aña, numi ri chito

ña tuhun ra Jesús. Ta chaa ña ta chicuiñi chiti ña nuu ra.

²⁶ Ñaha cuan, ñaha inga ñuu cuví ña, ñaha ñuu Sirofenicia cuví ña. Quichi ña ta chacú ndahvi ña nuu ra Jesús na tava ra tatyí ña vaha cha yihí añima sehe ña.

²⁷ Soco catyí ra Jesús chi ña:

—Saña, nacachi xihna ca ñu Israel ñu cuví sehe Nyoo, vatyí ña vaha cha tinyaá yo pan chi sehe yo ta cuhva yo cachi ina —catyí ra Jesús chi ña.

²⁸ Ta nacahan ña ta catyí ña:

—Ndicha, Tata, soco ina cuan chachí tucu ti yiquin cha canacoyo xiu mesa cuan —catyí ña chi ra.

²⁹ Tyicuan ta catyí ra Jesús chi ña:

—Vaha nacahun. Ta cha cuenda cuan cuví cuhun, vatyí tatyí ña vaha cha yaha quitá chi añima sehun —catyí ra chi ña.

³⁰ Ta cuhva cha nachaa ña vehe ña, catuví sehe ña nu chito, ta tatyí ña vaha cuan cha yaha quitá chi cue.

Nu sanduvaha ra Jesús chi noo ra soho ta ñihi

³¹ Ta quitá tucu ra Jesús ñuu Tiro, ta yaha ra ñuu Sidón, ta cuahan ra ityi ñuu cha canañí Decápolis, ta nachaa ra miñi Galilea.

³² Nu nyaá ra Jesús yucuan, quichi nyaca ñu chi noo ra soho ta ña cuví vaha cahán ra. Ta chacu ndahvi ñu nuu ra Jesús na tyiso ra ndaha ra siqui ra.

³³ Tava sijn ra Jesús chi ra ñin chiyo xiin, nu yori ñáyivi, ta tyihí ra nundaha ra chichi soho ra, ta tyaa sji ra nu yaa ra.

³⁴ Yucuan ta nanyehē ndaa ra andivi. Ta naxitá ra tatyí ra, ta catyí ra:

—¡Efata! —ta cuñí chi catyí: ¡Nuña! —catyí ra.

³⁵ Ta chihin cuan nuña soho ra soho cuan, ta nduvaha yaa ra, ta nacahan vaha ra.

³⁶ Ta catyí ra Jesús chi ñu tyi yori chihin cahan ñu tuhun, soco tatu catyí ra chi ñu tyicuan caa, ñihi ca canacatyí ñu.

³⁷ Ta iyo cuñí ñu ta catyí ñu:

—Tandihí ta vaha sacuví ra. Nyacua cuví nacuiñi ñáyivi soho sahá ra ta cuví tucu nacahan ñáyivi ñihí ñandihí.

8

Nu chaha ra Jesús cha cachi cumi mil ñáyivi

(Mt. 15.32-39)

¹ Quiví cuan nataca tucu cuaha xaan ñáyivi. Ta ñahri maa cha cachi ñu iyó. Tyicuan ta cana ra Jesús chi ra cachicá noo chihin ra, ta catyí ra:

² —Cundahvi cuñi nyehi chi ñáyivi ihya, vatyí cha uñi quivi nyicú ñu ihya chihin, ta ñahri maa cha cachi ñu iyó.

³ Tatu natachi chi ñu nya vehe ñu cucachi ñu, coto coña ñu ityi, vatyí yihí ñu cañi quichi coyo ñu —catyí ra Jesús chi ra.

⁴ Ta nacahan ra cachicá noo chihin ra, ta catyí ra chi ra:

—¿Soco yoso caa cuhva yo cha cachi ñu ihya, ta yori maa ñáyivi iyó ta xico ñu chi yo?

⁵ Ta ndaca tuhun ra Jesús chi ra, ta catyí ra:

—¿Yoso tahan pan nyisó ndo?

Ta cacatyí ra:

—Ucha tahan.

⁶ Ta catyí ra na cunyicu ñáyivi cuan nu ñuhú. Ta quehen ra ucha pan cuan, ta nacuhva ra tyahvi nyoo chi Nyoo. Yaha cuan ta tahvi sava ra pan cuan, ta chaha ra chi ra cachicá noo chihin ra, na casacha ra chi ñáyivi cuan.

⁷ Ta canyisó tucu ra suhva tiyaca nyihi. Ta nacuhva tucu ra Jesús tyahvi nyoo chi Nyoo, ta chaha ra chi ra na casacha ra.

⁸ Tandihí ñu cachachi ñu, ta cachitu chichi ñu. Ta casacutu ra ucha tahan tica chihin yiquin cha ndoo ca.

⁹ Ta cha cumi mil tahan ñu cachachi. Yaha cuan ta catyí ra Jesús chi ñu na cunuhu coyo ñu.

¹⁰ Ta quihvi ra chichi noo canoa chihin ra cachicá noo chihin ra. Ta cuahan coyo ra ityi Dalmanuta.

Nu cacatyí ra fariseo chi ra Jesús na sacuvi ra noo milagru

(Mt. 16.1-4; Lc. 12.54-56)

¹¹ Tyicuan ta cachaa coyo ra fariseo, ta quichaha cuvi yuhu ra chihin ra Jesús. Ta cacatyí ra chi ra na sacuvi ra noo milagru tatu ndicha cha Nyoo tachí chi ra. Tyicuan caa catyí ra vatyí cuñí ra nducu nyehe ra chi ra.

¹² Ta ra Jesús uhvi uhvi naxita ra tatyí ra, ta catyí ra:

—¿Ñáá tuhun cha chicán ñáyiví iyó vityin milagru? Cha ndicha catyí chi ndo vatyí ma sacuvi ni noo milagru nyehe ndo —catyí ra chi ra.

¹³ Tyicuan ta sandoo ra chi ra, ta nandihví ra chichi canoa ta cuahan ra inga chiyo miñi.

Cuhva iyó ra fariseo tari yuchan iya cuvi, catyí ra Jesús

(Mt. 16.5-12)

¹⁴ Naa iñi ra cachicá noo chihin ra Jesús cacuiso ra cha cacachi ra. Ta noo pan ri ñohó chihin ra chichi canoa cuan.

¹⁵ Tyicuan ta catyí ra Jesús chi ra:

—Saha ndo cuenda chi ndo chihin yuchan iya ra fariseo ta ra Herodes —catyí ra chi ra.

¹⁶ Ta ra cachicá noo chihin ra quichaha cacatyí ra chi ra tahan ra:

—Cha cuenda vatyí ñahri pan nyisó yo, yucuan cuenda cahan ra tuhun cuan —catyí ra chi ra tahan ra.

¹⁷ Tuví iñi ra Jesús cha ndatuhún ra, ta catyí ra chi ra:

—¿Ñáá tuhun cha catyí ndo tyi ñahri pan nyisó ndo? ¿Atu ta cutuñi ca iñi nyoho? ¿Atu ta coto ca ndo? ¿Atu ni ndava xaan aña ndo?

¹⁸ Nyaá chiti nuu ndo, ¿atu ña nyehé ndo? Nyaá soho ndo. ¿Atu ña chiñi ndo? ¿Atu ña nichon iñi ndo?

¹⁹ quiví cha saché ohon tahan pan cuan chi ndi ohon mil rayí? ¿Yoso tahan tica yiquin naquehen ndo? —catyí ra Jesús, ndacá tuhun ra chi ra cachicá noo chihin ra.

Ta maa ra cacatyí ra:

—Uchi uvi.

²⁰ Ta catyí tucu ra Jesús chi ra:

—Ta quiví saché ucha tahan pan chi cumi mil ñu, ¿yoso tahan tica tyitu nacoñehe ndo?

Ta cacatyí ra:

—Ucha tahan.

²¹ Tyicuan ta catyí ra Jesús chi ra:

—¿Atu ta cutuñi ca iñi ndo? —catyí ra chi ra cachicá noo chihin ra.

Nu sanduvaha ra Jesús chi noo ra cuaa ñuu Betsaida

²² Yahá cuan ta chaá ra Jesús chihin ra cachicá noo chihin ra nya ñuu Betsaida. Ta quichí nyaca ñu chi noo ra cuaa. Ta cachacu ndahvi ñu nuu ra na tñin ra chi ra.

²³ Tyicuan ta tñin ra ndaha ra cuaa cuan, ta cuahan ra chihin ra ityi chata ñuu. Ta tyaa sií ra chiti nuu ra, ta tyiso ra ndaha ra siqui ra, ta ndaca tuhun ra chi ra tatu cuví nyehe ra chiin.

²⁴ Ra cuaa cuan nanyehe ra ta catyí ra:

—Nyahí in cahnu ri maa chi ñáyiví. Cuhva caa yutun caa ñu cahvi iñi, soco chicá ñu —catyí ra.

²⁵ Tyicuan ta tñin tucu ra Jesús chiti nuu ra inga chaha, ta maa ra nanyehe vaha ra ta nduvaha ra. Nanyehe cachi vaha ra tandihí.

²⁶ Tyicuan ta natachi ra Jesús chi ra ta catyí ra chi ra:

—Ma quihvun chichi ñuu ta ni yori chihin cahun tuhun.

Nu catyí ra Pedro vatyí ra Jesús cuví Cristo

(Mt. 16.13-20; Lc. 9.18-21)

²⁷ Yahá cuan ta chahan ra Jesús chihin ra cachicá noo chihin ra ñuu cha ca iyó Cesarea Filipino. Ta ityi cuahan ra, ta ndaca tuhun ra chi ra cachicá noo chihin ra, ta catyí ra:

—¿Ñáá catyí ñáyiví? ¿Yóo ra cuví yuhu? —catyí ra chi ra.

²⁸ Ta canacahan ra ta catyí ra:

—Yihí ñu catyí ñu tyi ra Juan ra sacondutyá chi ñáyiví cuvún. Inga ñu catyí ñu tyi ra Elías cuvún. Ta inga ñu catyí ñu tyi inga ra profeta Nyoo cuvún —cacatyí ra chi ra.

²⁹ Tyicuan ta ndaca tuhun ra chi ra, ta catyí ra:

—¿Ta nyoho, yóo ra cuví yuhu, cuñi tucu nyoho?

Ra Pedro catyí ra chi ra:

—Yoho cuví Cristo.

³⁰ Soco catyí ra Jesús chi tandihí ra tyi yori chihin cacahan ra tuhun cuan.

Nu cahan ra Jesus tuhun tyi cucúvi ra
(Mt. 16.21-28; Lc. 9.22-27)

³¹ Tyicuan ta quichaha sañaha ra vatyí Rayíi cha quichí nya gloria cunyehe ra cuaha xaan tindocho. Ta ra mandoñi ta ra cacuví nuu chi tata sutu ta ra casacuahá cuenda ley vehe ñuhu ma cuñi ra natíin cuenda ra chi ra. Catyí ra Jesús chi ra vatyí cucahñi ñu chi ra soco chichi cha cu uñi quívi cunandoto ra.

³² Catyí cachi ra chi ra tuhun ihya. Tyicuan ta tava sñin ra Pedro chi ra ta quichaha catyí ra tyi ña vaha cha cahan ra cha tyicuan caa.

³³ Soco ra Jesús nanyocava ra, ta nanyehe ra chi inga ra cachicá noo chihin ra. Ta quichaha cahan ra chi ra Pedro ta catyí ra:

—¡Cuachiyo chuun nui, cuihna! Vatyí yoho ña chicá xiñun tari cuhva chicá xiñi Nyoo, soco tari chicá xiñi ñáyivi, chicá xiñun —catyí ra Jesús chi ra Pedro.

³⁴ Tyicuan ta cana ra Jesús chi ñáyivi ta chi ra cachicá noo chihin ra ta catyí ra chi ñu:

—Tatu nya ndo cuñi ndo cunyicon ndo chii, cuñi chi cahnya ndo ñi ndo tuhun maa ndo. Ta ma ndu uvi ñi ndo cha yihí ndo cuende vasi nyehe ndo tindocho cha cuende. Vatyí yucuan cuví cruzi cha tahán chi cuiso ndo.

³⁵ Vatyí nya ndo ña cuñi ndo cúvi ndo cha cuende, suri cha cúvi maa ndo cuví, ta cuhun ndihí ndo anyaya. Soco nya ndo cuhva ndo ñáyivi ndo cha cuende ta cha cuenda tuhun Nyoo, cucacu aña ndo.

³⁶ Tatu sacunaa ndo aña ndo anyaya, ¿ñáá ri tuhun cha saha ganaa ndo tandihí cha tyayíi cha iyó síqui ñuhu ñáyivi?

³⁷ Vatyí tatu sacunaa ndo aña ndo, ñahri maa cha iyó cha cuví cuhva ndo ta sacacu ndo aña ndo.

³⁸ Tatu nya noo ndo cucahan nuu ndo nyehe ndo chii, ta cucahan nuu ndo tuhun cahín nuu ñáyivi cha iyó cuatyí ta ña quichahá tuhun Nyoo, yuhu Rayíi cha quichí nya gloria cucahan tucu nuu mai nyehi chi ndo quívi quichi tíqui chihin ángel cuenda Nyoo. Vatyí cuquichi chihin cha tyaquí maa Suti.

9

¹ 'Cha ndicha catyí chi ndo, vatyí yihí ndo cha nyicú ndo ihya, ma cúvi ñaha ndo nyacua nya nyehe ndo yoso caa nyacá ñaha Nyoo. Vatyí cuquichi chihin tunyee ñi ra —catyí ra Jesús.

Nu sañahá Nyoo yoso caa ra Jesús noo cha ndicha nu nyacá ñaha ra
(Mt. 17.1-13; Lc. 9.28-36)

² Ñu quívi yaha ta cuahan ra Jesús noo yucu sucun. Ta ra Pedro, ra Jacobo, ta ra Juan ri cuahan coyo chihin ra. Ta yucuan nasama cuhva caa nuu ra Jesús.

³ Nduxiño xaan sahma ra ta cuichin xaan nanduvi. Yori maa síqui ñuhu ñáyivi ihya cuví nacatya ta nducuichin tyicuan caa.

⁴ Ta cananyehe ra tyi nanyaá ra Elías ta ra Moisés, candatuhún ra chihin ra Jesús.

⁵ Tyicuan ta ra Pedro catyí ra chi ra Jesús:

—Maestro, ¡vaha xaan cha nyicú ndi ihya! Na savaha ndi uñi tahan tiyahva: noo cha cuenda maun, ta noo cha cuenda ra Moisés, ta nonga cha cuenda ra Elías —catyí ra Pedro,

⁶ vatyí ña chitó ra ñáá tuhun cahan ra. Vatyí maa ra ta inga ra cayuhví ra.

⁷ Tyicuan ta noo xica noo vico síqui ra ta sahví chi ra. Ta chichi vico cuan tyacu noo ndusu cha catyí:

—Ican ihya cuví Sehi, ta cuñi xain chi ra. Tyasoho ndo tuhun cahan ra —catyí ndusu cuan.

⁸ Ta cuhva cha cananyehe ra, yori ca ra tayucú chihin ra, noo ri ca maa ra Jesús.

⁹ Cuhva cha cuanoo coyo ra yucu cuan, catyí ra Jesús chi ra tyi ma cacahan ra tuhun cha canyehe ra yucuan, soco nya yaha cha nandoto Rayi cha quichi nya gloria, tyicuan ta cuvi cahān ra tuhun.

¹⁰ Yucuan chaha ña cacahan maa ra tuhun, vasi cacatyí ra chi tahanan ra ñana vaha tuhun cuví cha cunandoto ra.

¹¹ Tyicuan ta quichaha candaca tuhun ra chi ra Jesús:

—¿Ñáá tuhun cha catyí ra casacuahá cuenda ley vehe ñuhu vatyi cuquichi xihna ca ra Elías?

¹² Ta nacahan ra, ta catyí ra:

—Cha ndicha vatyi xihna ca ra Elías nyaá quichi ta sanduvaha ra tandihi. ¿Ta yoso caa catyí tuhun Nyoo cuenda Rayi cha quichi nya gloria? Catyí chi tyi cunyehe ra tindoho, ta ma cuñi nyehe ñáyivi chi ra.

¹³ Soco yuhu catyí chi ndo tyi cha yaha quichi ra Elías. Ta sacuvi maa ñáyivi cha cuñi ñu chihin ra, tari cuhva catyí nu tutu Nyoo cha cucuvi chi ra —catyí ra Jesús chi ra.

Nu sanduvaha ra Jesús chi noo ra tyivaa cha yihí noo tatyí ña vaha chi (Mt. 17.14-21; Lc. 9.37-43)

¹⁴ Yaha cuan ta nachaa coyo ra nu nyicú inga ra cachicá noo chihin ra Jesús. Ta canyehe ra tyi cuaha ñáyivi tayucú nicachico. Ta nyicú tucu ra sacuahá cuenda ley yucuan, ta cacuvi yuhu ra chihin ra.

¹⁵ Tyicuan ta cha nanyehe ñu chi ra Jesús, tandihi ñu iyo cuñi ñu, ta cachino ñu chicuhva ñu nocumi chi ra.

¹⁶ Tyicuan ta ndaca tuhun ra Jesús chi ra cacuvi yuhu cuan ta catyí ra:

—¿Ñáá cuenda cuví yuhu xaan ndo? —catyí ra chi ra.

¹⁷ Ta noo ra nanyaá chichi cha cuaha ñáyivi yucuan, nacahan ra ta catyí ra:

—Maestro, ihya vachi nyaque chi sehi. Yihí noo tatyí ña vaha chi cue ta sacuñihi chi cue.

¹⁸ Vatyi tandihi ri nu tñn tatyí cuan chi cue, sanduva chi cue nu ñuhú, ta

yucuan quita tiñi yuhu cue ta cahñi noho cue. Ta ndundava cue. Cha catyí chi ra cachicá noo chuhun na tava ra tatyí ña vaha cuan, soco ña cacuvi chi ra —catyí ra cuan chi ra Jesús.

¹⁹ Nacahan ra Jesús ta catyí ra:

—¡Nyoho ñu ña chinó iñi cuví ndo! ¿Yoso tahan ca quivi cunyai chihin ndo ta cunyei tisihi ndo nyacua nya cha cutuhva ndo ta chino iñi ndo chii?

Ta catyí ra chi ra cuan:

—Nyaca chi ra luhlu chiña tyehe —catyí ra.

²⁰ Quichi nyaca ra chi ra luhlu cuan. Ta cuhva cha nanyehe tatyí cuan chi ra Jesús, quehen tatyí cuan chi cue. Ta nduva cue nu ñuhú, sacañuhú cue chi cue, ta quita tiñi yuhu cue.

²¹ Tyicuan ta ndaca tuhun ra Jesús chi sutu cue:

—¿Ama quichaha cuvi chi ra tyehe caa? —catyí ra chi ra.

Ta nacahan sutu cue, ta catyí ra:

—Nyata luhlu ra.

²² Ta cuaha chaha tyihí tatyí ña vaha ihya chi cue nu cayú ñuhu, o nu ndutya. Cuñi chi cahñi chi chi cue. Soco tatu cuví chuun, cundahvi cuñi nyehun chi ndi, ta tyinyeun chi ndi —catyí sutu cue chi ra Jesús.

²³ Ta catyí ra Jesús chi ra:

—Tatu chinó iñun, tandihi ta cuví cha cuenda ñu chino iñi —catyí ra Jesús.

²⁴ Tyicuan ta sutu cue canachaa ra ta catyí ra:

—¡Chinó iñi! ¡Tyinyee chii na chino ca iñi! —catyí ra chi ra Jesús.

²⁵ Cuhva cha nyehe ra Jesús tyi cuaha ñáyivi candu ñn ri, ta tava ñehe ra chi tatyí ña vaha cuan, ta catyí ra:

—Yoho tatyí ña vaha cha sañihí ta sasohó chi cue ihya, catyí chuun, na quiton. Saña chi ra luhlu ihya, ta ma ndihvi con chi ra —catyí ra Jesús chi tatyí ña vaha cuan.

²⁶ Ta tatyí cuan quiñi xaan canachaa ta na quisi chi chi cue inga chaha ta quita. Ta sandoo tatyí cuan

chi cue tari noo ndiyi. Ta cuaha ñu catyí vatyí cha chihí cue.

²⁷ Soco tñn ra Jesús ndaha cue, ta nacoñehe ra chi cue, ta nicuinanyaa cue.

²⁸ Tyicuan ta quihvi ra Jesús noo vehe, ta ra cachicá noo chihin ra candaca tuhun ra chi ra ta catyí ra:

—¿Ñáá tuhun ña cuví tava ndi chi tatyí ña vaha cuan?

²⁹ Ta catyí ra Jesús:

—Cha cuenda vatyí tahan tatyí ña vaha ihya, quitá, soco chihin cha ma cachi yo ta cacan tahvi yo chi Nyoo —catyí ra chi ra.

Nu cahán ra Jesús tuhun inga chaha vatyí cucúvi ra

(Mt. 17.22-23; Lc. 9.43-45)

³⁰ Quivi cha quitá coyo ra yucuan, yahá coyo ra ityi Galilea. Ta ña cuñi ra Jesús cha coto ñáyivi.

³¹ Vatyí sañahá ra chi ra cachicá noo chihin ra. Ta catyí ra chi ra vatyí Rayi cha quichi nya gloria cunacuhva cuenda ñu chi ra ndaha ñáyivi. Ta cucahni ñu chi ra, soco cha cu uñi quivi cunandoto ra.

³² Soco ña cacutuñi iñi ra tuhun cahán ra chihin ra. Ta cayuhvi ra candaca tuhun ra chi ra.

¿Yóó ra cahnu ca?

(Mt. 18.1-5; Lc. 9.46-48)

³³ Tyicuan ta cachaá coyo ra ñuu Capernaum. Ta cuhva cha nyicú ra nya vehe, ra Jesús ndaca tuhun ra chi ra ta catyí ra:

—¿Ñáá tuhun cuví xaan yuhu nyoho ityi vachi yo? —catyí ra ndaca tuhun ra.

³⁴ Taxi taxi cacuvi ra, vatyí ityi vachi coyo ra, ta cacuví yuhu ra nya ra cuví ra ra cahnu ca.

³⁵ Tyicuan ta chicunyaá ra Jesús ta cana ra chi ndi uchi uvi ra chicá noo chihin ra, ta catyí ra chi ra:

—¿Nya ndo cuñi ndo cuví ndo nuu, cuñi chi cha cuví ndo ra nu ndihi cha nuu tandihi ra, ta sacuvi ndo tyiño nuu tandihi ra? —catyí ra Jesús chi ra.

³⁶ Tyicuan ta quehen ra chi noo ra cuehe luhlu ta chinanyaá ra chi cue

mahñu ra. Ta tyihí sucun ndaha ra chi cue, ta catyí ra:

³⁷ —Ñáyivi cha natín cuenda chi noo ra cuehe luhlu chihin sivi, chi yuhu natín cuenda ñu. Ta ñu natín cuenda chii, ñima chi yuhu ri natín cuenda ñu, soco chi ra cha tachí chii ñandihí.

Tatu ña cuahan ñáyivi siqui yo, tumañi iñi chi yo cuahan ñu

(Mt. 10.42; Lc. 9.49-50)

³⁸ Tyicuan ta catyí ra Juan chi ra Jesús:

—Maestro, nyehe ndi chi noo ra cuan ta chihin sivun tavá ñehe ra chi tatyí ña vaha. Soco vatyí ñima chihin yo chicá noo ra, catyí ndi chi ra tyi ma sacuvi ca ra —catyí ra Juan chi ra Jesús.

³⁹ Soco catyí ra Jesús chi ra:

—Ma casi ndo. Vatyí ni noo ra cha casacuvi milagru chihin sivi ta yaha cuan ta caña iñi ra cahan ña vaha ra siqui.

⁴⁰ Vatyí ñu cha ña cuahan siqui yo, tumañi iñi chi yo cuahan ñu.

⁴¹ Tatu cuhva noo ñu, vasi noo vasu ndutya coho ndo chihin sivi, cha cuenda vatyí ñu cuenda yuhu ra Cristo cuví ndo, cha ndicha vatyí cuñihi ñu cha cuacuhva Nyoo chi ñu.

Yica xaan cha sanacava yo chi noo yañi yo nu cuatyí

(Mt. 18.6-9; Lc. 17.1-2)

⁴² Tatu yóó ñu sanacava nu cuatyí chi noo ñu chinó iñi chii, vaha taxin ca cuhni ñáyivi noo yuu sucun ñu ta tuchi ñu chi ñu cuan nu tyañuhu.

⁴³ Tatu ndahun sanacavá chuun nu cuatyí, vaha taxin ca cahnya. Vatyí vaha ca cha quihvun nu coun chihin Nyoo chihin cha luu ndahun ta ñima ca chihin cha ninduvi ndahun ta cuhun anyaya nu cayú ñuhú cha ma ndahva ca maa.

⁴⁴ Ta yucuan ña chihí tindacu chachí chi ñu, ta ñuhú ña ndahva maa ni noo chaha.

⁴⁵ Ta tatu chahun ta sanacavá chuun nu cuatyí, vaha taxin ca cahnya. Vatyí vaha ca cuhun nu coun chihin Nyoo chihin cha luu chahun

ta ñima ca chihin cha nĩnduvi chahun ta tuchi Nyoo chuun anyaya. Vatyí yucuan ma ndahva ca maa ñuhũ.

⁴⁶ Ta ña chihí tĩndacu chachí chi ñu, ta ñuhũ ni noo chaha ña ndahva.

⁴⁷ Ta tatu noo chĩti nuu sanacavá chuun nu cuatyí, vaha taxin ca tava. Vatyí vaha ca cha quĩhvun nu nyacá ñaha Nyoo chihin noo chĩti nuu ta ñima ca chihin nĩnduvi chĩti nuun ta tuchi Nyoo chuun anyaya.

⁴⁸ Vatyí yucuan ña chihí tĩndacu chachí chi ñu, ta ni noo chaha ña ndahva ñuhũ.

⁴⁹ 'Soco tandihĩ ñu nyicon chii, tari cha cayú ñu chihin ñuhũ tatu nyehe ñu tĩndoho cha cuende, vatyí chihin cuan cua sanduvaha Nyoo chi ñu, tari nduvaha nyayu chihin ñĩ.

⁵⁰ Ñĩ vaha xaan. Soco tatu ndihĩ cha uhva, ¿yoso caa cuvĩ cotyĩño yo inga chaha? Tyicuan caa tucu nyoho, ma sandihĩ ndo cha coo tuhun Nyoo aĩma ndo cha cuvĩ tari ñĩ vaha. Tyicuan caa ta coo taxi ri ndo chihin tahan ndo.

10

Nu sañaha ra Jesús tyi ña vaha sandoo rayĩ chi ñasihĩ ra

(Mt. 19.1-12; Lc. 16.18)

¹ Quita ra Jesús Capernaum ta cuahan ra ityĩ Judea nya inga chiyo yutya Jordán. Yucuan candũ ñĩn ri ñáyivĩ inga chaha nu nyaá ra, ta quichaha sañaha tucu ra chi ñu tari tuhvá maa ra.

² Tyicuan ta suhva ra fariseo catuhva ra nu nyaá ra Jesús, vatyí nducu ra cuhva tyaa ra cuatyí siqui ra. Ta candaca tuhun ra chi ra tatu vaha cha sandoo noo rayĩ chi ñasihĩ ra.

³ Tyicuan ta nacahan ra Jesús ta catyí ra:

—¿Ñáá cha catyí ra Moisés tyi sacuvĩ ndo?

⁴ Ta canacahan ra ta cacatyí ra:

—Ra Moisés chaha ra cha cuvĩ cahnya noo ra tutu cha tandaha ra tyicuan ta cuvĩ sandoo ra chi ñasihĩ ra —catyí ra chi ra.

⁵ Tyicuan ta catyí ra Jesús chi ra:

—Catyí ra Moisés cha sacuvi ndo tyicuan caa soco cha cuenda cha ndava aĩma ndo.

⁶ Soco quivĩ xihna ri, quivĩ savaha Nyoo tandihĩ maa, savaha ra rayĩ ta ñaha sihi.

⁷ “Yucuan cuenda sandoó rayĩ chi sutu ra ta chi sihi ra vatyí ndu ñĩn ri ra chihin ñasihĩ ra.

⁸ Ta chichi cha nĩnduvi tahan ñu cucuvi ñu tari cha noo ri ñáyivĩ.” Yucuan chaha ñima ca uvi tahan cuvĩ ñu, soco cha nanduvĩ ñu noo ri ñáyivĩ.

⁹ Yucuan chaha, ña tahan chi cha sasiĩn ñáyivĩ cha sandũ ñĩn ri Nyoo —catyí ra Jesús chi ra.

¹⁰ Yaha cuan ta nachaa coyo ra nya vehe, ta quichaha ndaca tuhun ra cachicá noo chihin ra inga chaha siqui tuhun cuan.

¹¹ Ta catyí ra Jesús chi ra:

—Ra cha sandoó ñasihĩ ta tandaha ra chihin inga ñu, chicoó cuatyí ra vatyí ña vaha sacuvĩ ra chihin ñasihĩ ra, ñaha cha xihna ri cuan.

¹² Ta tyicuan caa tucu ñusihĩ. Tatu sandoó ñu chi yĩ ñu ta tandaha ñu chihin inga ra suri chicoo tucu cuatyí ñu —catyí ra Jesús.

Nu nasoco ra Jesús chi ra cuatyaa

(Mt. 19.13-15; Lc. 18.15-17)

¹³ Tyicuan ta quichi nyaca ñu suhva ra cuatyaa chi ra Jesús tacuhva natyiso ra ndaha ra siqui ndotyĩn. Soco ra cachicá noo chihin ra ña chahá ca ra cha quichi nyaca ñu chi ndotyĩn.

¹⁴ Soco cuhva cha nanyehẽ ra Jesús, cuxaan ra. Ta catyí ra chi ra:

—Saña ndo. Na quichi nyaca ñu chi ra cuatyaa nu nyaí. Ta ma casi ndo. Vatyí ñu nyacá ñaha Nyoo aĩma, cuvĩ ñu chinó ñĩn chi Nyoo tari chinó ñĩn ra cuatyaa ihya.

¹⁵ Cha ndicha catyí chi ndo vatyí tatu ma nacuhva cuenda ndo chi ndo chi Nyoo tari noo ra cuatyaa chihin sutu ndotyĩn, ma cuvĩ quihvĩ ndo nu nyacá ñaha Nyoo —catyí ra Jesús chi ra.

¹⁶ Ta quehen ra chi noo noo ndotyĩn ta tyihĩ sucun ndaha ra. Ta tyiso ra ndaha ra siqui ndotyĩn, ta chican tahvi ra chaha ndotyĩn.

*Nu ndatuhún minoo ra tyivaa tyay#
chihin ra Jesús*

(Mt. 19.16-30; Lc. 18.18-30)

¹⁷ Yaha cuan ta cuahan ra Jesús. Ta chino vavaha noo ra cuan chata ra ta chícuiñi chiti ra nuu ra, ta ndaca tuhun ra chi ra, ta catyí ra:

—Maestro, ra vaha cuvún. ¿Yoso caa sacuvi ta ñihi ñayivi cha ma naa ca maa coi? —catyí ra chi ra Jesús.

¹⁸ Ta catyí ra Jesús chi ra:

—¿Yoso caa chitón tyi vahi? Noo ri ra vaha iyó, ta ican ra cuan cuví Nyoo. (Ta cha catyún tyi vahi, nacotón tyi Nyoo cuví.)

¹⁹ Yoho cha chitón cha catyí Nyoo cha sacuvi yo: “Ma coun chihin inga ñusihi tatu ñima ñasihun cuví. Ma cahñun. Ma suhun. Ma cahun cuendu siqui ni noo ñu. Ma sandavi ñahun. Sahun ñáyivi chi sutun ta chi sihun” —catyí ra Jesús chi ra.

²⁰ Ta nacahan ra cuan ta catyí ra:

—Maestro, tandihi ihya cha sacuvi nyata luhli —catyí ra.

²¹ Tyicuan ta cusii cuñi ra Jesús nanyehé ra chi ra. Ta catyí ra chi ra:

—Cumañi noo ri ca cha cumañi chuun. Cuahan ta xicon tandihi cha iyó chuun ta cuhvon chi ñu ndahvi. Tyicuan ta coo cha tyay#un nya andivi. Yaha cuan ta quichun cunyicon chii vasi nyehún tindoho —catyí ra Jesús chi ra.

²² Soco cha chiñi ra tuhun cahan ra Jesús tyehe caa, nducuihya iñi ra, ta cuihya xaan cuanuhu ra vatyí tyay# xaan ra.

²³ Tyicuan ta nanyehé ra Jesús nicachico chata ra, ta catyí ra chi ra cachicá noo chihin ra:

—¡Ñana cha y#i ta cuvi nacuhva cuenda ñu tyay#i chi ñu na cunyaca ñaha Nyoo chi ñu! —catyí ra chi ra.

²⁴ Iyo cacuñi ra cachicá noo chihin ra tuhun cahan ra. Soco catyí ra Jesús chi ra inga chaha:

—Sehi, ñu cha tyaa xaan xiñi cha tyay#, iy#i xaan quihvi ñu nu nyacá ñaha Nyoo!

²⁵ Tañi tyehe yaha noo camellu xiu noo yiqui ticu, ta ñima ca cha cuhva

noo ñu tyay#i cunyacá ñaha Nyoo chi ñu —catyí ra Jesús.

²⁶ Cha cachiñi ra tuhun ihya, iyo xaan cacuñi ra, ta candaca tuhun ra chi ra tahan ra, ta catyí ra:

—Tu tyicuan caa, ¿yóo cha cuví cacu ñima? —catyí ra.

²⁷ Nanyehé ra Jesús chi ra ta catyí ra chi ra:

—Ñáyivi ña cuví sacuvi ñu ihya. Soco Nyoo cuví chi ra. Vatyí cha cuenda Nyoo ñahri cha y#i sacuvi ra.

²⁸ Tyicuan ta catyí ra Pedro chi ra:

—Sutu Mañi yuhu, nyuhu sandoo ndi tandihi cha iyó chi ndi, ta vityin nyicón ndi chuun.

²⁹ Nacahan ra Jesús ta catyí ra:

—Cha ndicha catyí chi ndo vatyí tandihi ñu sandoo vehe, o yañi, o cuhva, o sutu, o sihi, o ñasihí, o sehe, o ñuhú, cha cuenda yuhu ta cha cuenda cha sacoto ñu chi ñáyivi tyi cuñi Nyoo sacacu ra chi ñu,

³⁰ cuañihi ñu ciento chaha siqui cha sandoo ñu ihya ñuhu ñayivi. Cuañihi ñu vehe ta yañi ñu, ta cuhva ñu, ta sihi ñu, ta sehe ñu, ta ñuhú, vasi sanyehé ñáyivi tindoho chi ñu. Soco inga ñayivi cha vachi, cuñihi ñu ñayivi cha ma naa ca maa.

³¹ Soco cuaha xaan ñu cha cuvi nuu vityin, ñu nu ndihi cucuvi ñu. Ta cuaha xaan ñu cuví ñu nu ndihi vityin, ican ñu cucuvi nuu —catyí ra Jesús.

*Nu cahan ra Jesús inga chaha tyi
cucúvi ra*

(Mt. 20.17-19; Lc. 18.31-34)

³² Cuahan coyo ra ndaa ra ityi cuahan ñuu Jerusalén, ta ra Jesús cuahan ra ityi nuu ñu nyicón chi ra. Ta maa ñu iyo cuñi ñu ta chihin cha yuhvi ñu cuahan coyo ñu chata ra. Tyicuan ta cana sin ra chi ndi uchi uvi ra cachicá noo chihin ra. Ta quichaha catyí ra cha cucuvi chi ra.

³³ Ta catyí ra:

—Tari cuhva nyehé ndo vityin, cua ndaa yo ityi cuahan ñuu Jerusalén nu cucuhva cuenda ñu chi yuhu Ray#i cha quichi nya gloria chi ra cuví nuu chi tata sutu, ta chi ra sacuahá cuenda ley vehe ñuhu. Ta cucatyí ra

tyi cucúvi ta cucuhva cuenda ra chii chi ra inga ñuu.

³⁴ Ta cucuacu nyaa ra chii, cucañi ra chii, cutyicu sii ra chii. Ta cucañi ra chii. Soco cha cu uñi quiví cunan-dote cha yaha cúvi —catyí ra Jesús.

Nu cachican ra Jacobo ta ra Juan noo tumañi iñi chi ra Jesús

(Mt. 20.20-28)

³⁵ Tyicuan ta ra Jacobo ta ra Juan, ra cacuví sehe ra Zebedeo, catuhva ra nu nyaá ra Jesús, ta catyí ra chi ra:

—Maestro, cuñí ndi cha sahun noo tumañi iñi chi ndi —catyí ra.

³⁶ Ta ndaca tuhun ra Jesús chi ra:

—¿Ñáá cha cuñí ndo cha sacuvi cha cuenda ndo?

³⁷ Ta canacahan ra ta catyí ra:

—Cuhva cha cunyaa ndi chuhun nu nyacá ñahun, noo ndi chiyo vahun, ta inga ndi chiyo satyun —catyí ra chi ra Jesús.

³⁸ Tyicuan ta catyí ra Jesús chi ra:

—Nyoho ña chitó ndo cha chicán ndo. ¿Atu cuví nyehe nyoho tindhó cha cuanyehe yuhu? ¿Atu cuví cahun ndo tuhun chihi tari cahun yuhu? —catyí ra chi ra.

³⁹ Ta canacahan ra:

—Cuví chi ndi.

Ta ra Jesús catyí ra:

—Cha ndicha vatyi cunyehe ndo tindhó ta cahun ndo tuhun chihi tari cahun yuhu.

⁴⁰ Soco tuhun cha cunyaa ndo chiyo vahi ta chiyo satyin, ñima yuhu tahán chi kuhve chi ndo, soco maa Nyoo cucatyí yóo cha cuñihi nyatu cuan —catyí ra Jesús chi ra.

⁴¹ Cha cachiñi uchi ca tahan ra chicá noo chihin ra Jesús tuhun cuan, cacuxaan ra chihin ra Jacobo ta ra Juan.

⁴² Soco cana ra Jesús chi ra ta catyí ra chi ra:

—Chitó nyoho vatyi ra canyacá ñaha chi ñáyivi siqui ñuhu ñayivi, ñihi xaan yosó ra siqui ñu.

⁴³ Soco ñima tyicuan caa tahán chi sacuvi nyoho. Vatyi ra cuñi cucahnu ca, cuñi chi cuvi ra musu tandihí ca ndo.

⁴⁴ Ta nya nyoho cha cuñi ndo cuvi ndo nuu, cuñi chi cuvi ndo musu tandihí ca ñu.

⁴⁵ Vatyi ni ri yuhu Rayi cha quichi nya gloria ta ña vachi vatyi sacuvi ñáyivi tyiño nui. Soco vachi vatyi sacuvi tyiño nuu ndo. Ta vachi vatyi kuhve ñayivi tari noo cha cutiyahvi ta cusacaqui cuaha ñáyivi —catyí ra Jesús.

Nu sanduvaha ra Jesús chi ra Bartimeo ra cha cuaa

(Mt. 20.29-34; Lc. 18.35-43)

⁴⁶ Tyicuan ta cachaa coyo ra ñuu Jericó. Ta cua yaha ri ra ñuu cuan. Ta kuhva cha quita ra Jesús ñuu cuan cuaha xaan ñáyivi cuahan chata ra, iin ri chihin ra cachicá noo chihin ra. Ta yucuan nyaá noo ra cuaa cha nañi Bartimeo. Sehe ra Timeo cuví chi ra. Nyaá ra cuan yatyin ri yuhu ityi cuan, chicán ra carídaa.

⁴⁷ Ta cha chiñi ra cuaa cuan tyi cua yaha ra Jesús ra ñuu Nazaret, quichaha cana chaa ra, ta catyí ra:

—¡Yoho Jesús, ra vachi tata ra David, cundahvi cuñi chii! —catyí ra canachaá ra.

⁴⁸ Cuaha ñu chasi yuhu ra na cutaxin ra, soco maa ra ñihi ca cana chaa ra ta catyí ra:

—¡Yoho ra vachi tata ra David, cundahvi cuñi chii! —catyí ra.

⁴⁹ Tyicuan ta chicuñi ra Jesús ta catyí ra:

—Cana ndo chi ra.

Ta cacana ra chi ra cuaa cuan ta catyí ra chi ra:

—Sani iñun. Nducuita, vatyi cana ra chuun —cacatyí ra chi ra.

⁵⁰ Tyicuan ta tuchi ñihno ra sahman dichí ra. Ta ndava ra noo ta tuhva ra nuu nyaá ra Jesús.

⁵¹ Tyicuan ta quichaha ndaca tuhun ra Jesús chi ra:

—¿Ñáá cha cuñún cha sacuvi chuhun?

Ta nacahan ra cuaa cuan ta catyí ra:

—Maestro, cuñi cha sanduvahun chiti nui —catyí ra.

⁵² Ta catyí ra Jesús chi ra:

—Cuahan. Cha nduvahun vatyí chinó iñun chii.

Ta caa cuhva ri cuan cuví nanyehe ra cuaa cuan. Ta cuahan ra chata ra Jesús ityi cuahan ra.

11

Nu quihví ra Jesús ñuu Jerusalén
(Mt. 21.1-11; Lc. 19.28-40; Jn. 12.12-19)

¹ Cachaa coyo ra yatyin ri ñuu Jerusalén, nu nyaá ñuu Betfagé ta ñuu Betania. Ta yucu yutun Olivo nyaá ityi nuu chiin ca. Tyicuan ta catyí ra Jesús chi uvi ra chicá noo chihin ra:

²—Cuahan ndo chichi ñuu cha nyaá ityi nuu chiña. Ta nu cua chaa ndo cunañihi ndo noo burru chaa nuhñí ti, quití ta quihí ca tyayu cuví ti. Ndachi ndo chi ti, ta quichi nyaca ndo chi ti.

³ Ta tatu yóo cha ndaca tuhun ñáá tuhun sacuví ndo tyicuan caa, catyí ndo chi ñu vatyí chiñuhú ti chi ra nyacá ñaha, ta numi ri cunanyaca ndo chi ti, catyí ndo chi ñu —catyí ra Jesús chi ra.

⁴ Tyicuan ta cuahan coyo ra, ta canañihí ra burru cuan nuhñí ti ityi cahnu yatyin ri noo yuvehe, ta candachí ra chi ti.

⁵ Ta suhva ra canyicú cuan catyí ra chi ra:

—¿Ñáá cha nyacuvi ndo? ¿Ñáá tuhun cha ndachí ndo burru chiña? —catyí ra chi ra.

⁶ Tyicuan ta canacahan ra tari cuhva cha catyí ra Jesús chi ra. Ta cachaha ra cuhun coyo ra.

⁷ Tyicuan ta caquehen ra burru cuan ta chinyaca ra chi ra Jesús. Ta catyiso ra sahma ra siqui ti, ta ndaa ra Jesús chi ti.

⁸ Ta cuaha ñu ndica ñu sahma ñu ityi cuahan ra, ta inga ñu chahnu ñu soco numa ta cachacun ñu.

⁹ Tyicuan ta ñu cha cuahan ityi nuu ra ta ñu cha cuahan ityi chata, quichaha cana chaa ñu ta catyí ñu:

—¡Cahnu xaan cuví Nyoo! ¡Na sacahnu yo chi ra vachi cuenda Sutu yo Nyoo!

¹⁰ ¡Sacahnu yo chi ra vachi nyacá ñaha tari chinyaca ñaha sutu chahnu

yo ra David! ¡Cahnu xaan ca cuví ra nyaá andiví! —catyí ñu.

¹¹ Tyicuan ta quihví ra Jesús chichi ñuu Jerusalén, ta cuahan ra vehe ñuhu cahnu. Ta cha yaha nanyehe ra ityi cuan ityi ihya, ndaca chata ra ñuu Betania chihin ndi uchi uvi ra chicá noo chihin ra vatyí cha iñi.

Nu soco ra Jesús chi yutun higo cha ñahri chiti iñi nuu tun
(Mt. 21.18-19)

¹² Cha inga quiví quita coyo ra ñuu Betania cuan, ta cha ni ri ca cha cuahan ra chicá ityi ra chaa noo soco chi ra Jesús.

¹³ Ta nyasava ri nanyehe ra noo tu higo cha nyaá numa. Ta chahan ra chinyehe ra tatu iñi chiti nuu tun, soco maa maa ri numa ri iñi, vatyí ta chaa ca quiví quita chiti tun.

¹⁴ Tyicuan ta cahan ra Jesús chihin tun, ta catyí ra chi tun tyehe caa:

—Ma coo ca chiti cachi ñáyiví nuun —catyí ra chi tun.

Ta ra cachicá noo chihin ra cachiñí ra cha cahán ra.

Nu tava ñehe ra Jesús chi ra caxicó chichi vehe ñuhu cahnu
(Mt. 21.12-17; Lc. 19.45-48; Jn. 2.13-22)

¹⁵ Yaha cuan ta nachaa coyo ra Jerusalén. Ta quihví tucu ra Jesús chichi vehe ñuhu cahnu. Ta quichaha tava ñehe ra chi ra caxicó ta ra casatá yucuan. Sanduva ra mesa ñu canasamá xuhun chi ñáyiví. Ta suri tyicuan caa sacuví ra chihin tyayu ra caxicó paloma.

¹⁶ Ta ña chaha ca ra ca cuiso ñu ñáá cha cuiso ñu ityi chichi vehe ñuhu cuan.

¹⁷ Ta quichaha sañaha ra chi ñu, ta catyí ra:

—Nu tutu Nyoo catyí chi: “Vehi, vehe nu chicán tahvi tandihí ñáyiví iyó siqui ñuhu ñáyiví cuví”, catyí Nyoo. ¡Soco nyoho nasahá ndo vehe nu nyicú ra suhu! —catyí ra Jesús.

¹⁸ Ta ra cacuví nuu chi tata sutu ta ra casacuahá cuenda ley vehe ñuhu cachiñí ra cha cahán ra, ta quichaha canducu ra cuhva cha cacahñi ra chi ra vatyí cayuhví ra chi ra tyi cha

tandihí ñáyiví iyo cuñí ñu cha sañahá ra.

¹⁹ Soco cuhva cha cua cuaa ra Jesús quita ri ra ñuu cuan chihin ra cachicá noo chihin ra.

Nu na ityi tu higo cha soco ra Jesús (Mt. 21.20-22)

²⁰ Cha ñaha ri cha inga quiví cuan, nayaha coyo ra nu nanyaá tu higo cuan. Ta cananyehe ra vatyí na ityi nyacua nya yoho tun.

²¹ Tyicuan ta nichon iñi ra Pedro vatyí soco ra Jesús chi tun ta catyí ra chi ra Jesús:

—Maestro, nyehe tu higo cha soco, cha na ityi tun —catyí ra.

²² Nacahan ra Jesús, ta catyí ra:

—Chino iñi ndo chi Nyoo.

²³ Vatyí cha ndicha catyí chi ndo vatyí nya nyoho catyí ndo chi yucu ihya, “Na canyaha ta cuhun nu tyañuhu”, ta tatu ña chicá uvi iñi ndo, ta chinó iñi ndo, tuhun cahan ndo cua cuvi.

²⁴ Yucuan chaha catyí chi ndo vatyí tandihí cha chicán tahvi ndo, ta tatu chinó iñi ndo tyi cha naquehen ndo, tyicuan caa cucuvi.

²⁵ Ta tatu chicán tahvi ndo chi Nyoo ta cuxaán ndo chi inga ñu, saha ndo ticahnu iñi chi ñu, tacuhva vatyí Sutu ndo, ra nyaá andiví, saha tucu maa ra ticahnu iñi cuatyí ndo.

²⁶ Soco tatu ña sahá ndo ticahnu iñi chi ñu, ni ri Sutu ndo, ra nyaá andiví, ma saha ra ticahnu iñi cuatyí maa ndo.

Yóo cha chaha ityi chi ra Jesús vatyí sacuvi ra cha sacuví ra (Mt. 21.23-27; Lc. 20.1-8)

²⁷ Tyicuan ta nachaa coyo ra Jerusalén. Ta cha niri ca cha chicá noo ra Jesús chichi vehe ñuhu cahnu cuan, catuhva ra cacuví nuu chi tata sutu, ta ra sacuahá cuenda ley, ta ra cacuví mandoñi nu nyaá ra.

²⁸ Ta candaca tuhun ra chi ra.

—¿Yóo cha tyaa tyiño chuun vatyí sacuvun tyehe caa? ¿Yóo cha chaha ityi chuun vatyí sacuvun? —cacatyí ra.

²⁹⁻³⁰ Ta nacahan ra Jesús, ta catyí ra:

—Cua ndaca tuhun tucu yuhu noo tuhun chi ndo. ¿Yóo cha tachí chi ra Juan vatyí sacondutya ra chi ñáyiví? ¿Atu Nyoo tachí chi ra, o ñáyiví? Tatu catyí ndo chii, tyicuan ta cua catyí tucu yuhu chi ndo yóo cha tyatyíño ihya chii —catyí ra Jesús chi ra.

³¹ Tyicuan ta quichaha cacuvi yuhu maa ra chihin tahan ra ta cacatyí ra:

—Tatu catyí yo tyi Nyoo tachí chi ra Juan, cucatyí ra chi yo: “Tu tyicuan caa, ¿ñáá tuhun ña chino iñi ndo chi ra?”

³² ¿Ta yoso caa catyí yo tyi ñáyiví tachí chi ra? Ma cuvi —cacatyí ra, vatyí cayuhví ra chi ñáyiví, vatyí tandihí ñu cachinó iñi ñu vatyí cha ndicha cuenda Nyoo cahan ra Juan.

³³ Tyicuan ta quichaha cacatyí ra chi ra Jesús:

—Ña chitó ndi.

Tyicuan ta ra Jesús catyí ra chi ra:

—Ni yuhu ma catyí chi ndo yóo cha tyaa tyiño chii tyi sacuvi cha sacuví —catyí ra Jesús chi ra.

12

Nu chaha ra Jesús noo cuhva yoso caa cacahñi ñu chi ra (Mt. 21.33-46; Lc. 20.9-19)

¹ Tyicuan ta chihin cuhva ihya quichaha cahan ra Jesús chihin ra, ta catyí ra chi ra:

—Chiyó noo ra cha tachí ra yoho tichaha ndiví. Ta chasí ra chaha. Ta savaha ra noo nu cuhñi ra tichaha ndiví. Ta savaha ra noo vehe sucun tacuhva vatyí cuví saha ra cuenda tandihí.

Yaha cuan ta chaha noo ra ñuhú cuan chi suhva ra casahá tyiño. Ta cuahan ra inga ñuu.

² Ta cha cha quiví iyó chiti yoho cuan, chitoho ñuhú cuan tachí ra noo musu nu nyicú ra casahá tyiño cuan vatyí cacan ra suhva chiti cha tahan chi chi ra.

³ Soco catiñ ra chi ra. Ta cacañi ra chi ra. Ta canatachí ra chi ra chihin nu ndaha nu ndii ra.

⁴ Tyicuan ta chitoho ñuhú cuan tachí ra chi inga musu, soco chi ra

ihya catuchī ra yuu chi ra, catahvī ra xiñi ra, ta cacahan uhvi ra chi ra.

⁵ Ta inga tucu musu tachī chitoho ñuhú cuan. Ta chi ra cuan cachahñi ra. Yahā cuan ta tachī ra cuaha ca ra. Soco cacañi ra chi suhva ra. Ta chi suhva ca ra cachahñi ra.

⁶ Ta ndoo noo ri ca ra cha cuvī tachi chitoho ñuhú cuan. Ican cuvī sehe ra cha cuñi xaan ra. Ta nu ndihī tachī ra chi sehe ra vatyī cuñi maa ra chicá xiñi ra: “Cucasaha ra ñáyivi chi sehi”, cuñi ra chicá xiñi ra.

⁷ Soco nu chaā sehe ra, ra casahá tyiño cuan catyī ra chi tahan ra: “Ican ra ihya cundoo chihin tandihī ihya. Na cahñi yo chi ra, ta ndoo maa yo chihin”, catyī ra.

⁸ Ta tyicuan caa catiñ ra chi ra ta cachahñi ra chi ra. Tyicuan ta cachi-tuchī ra coño ñuhu ra ityi chata chacu cuan —tyicuan caa cuhva cahan ra Jesús chihin ra cuan.

⁹ Tyicuan ta ndaca tuhun ra Jesús chi ra ta catyī ra:

—¿Ñáá cha cusacuvi ra cuvī chitoho ñuhú cuan? Cuquichi ra ta cucahñi ra chi ra casahá tyiño cuan. Ta cuhva ra ñuhú cuan chi inga ra.

¹⁰ ¿Atu ta sacuaha ca nyoho nu tutu Nyoo nu catyī chi tyehe caa?

Yuu cha ña cacuñi ra casavaha vehe cotyiño ra,

ican cuan cuvī yuu cha ñiñi ca.

¹¹ Ican ihya cuvī cha sacuvi Sutu yo Nyoo.

Ta tyaqui xaan tuhun cha cuenda chi yo, catyī chi nu tutu Nyoo

—catyī ra Jesús chi ra cacuvi nuu chi tata sutu cuan.

¹² Tyicuan ta canducu ra cuhva cha tyihī ra chi ra Jesús vehe caa vatyī cachitó ra vatyī cahan ra cuhva ihya soco cha cuenda maa ra. Soco vatyī cayuhví ra chi ñáyivi, casandoo ra chi ra, ta cuahan coyo ra.

Nu ndaca tuhun ra chi ra Jesús cha cuenda xuhun cha tavá gobiernu ñuu Roma

(Mt. 22.15-22; Lc. 20.20-26)

¹³ Tyicuan ta catachī ra suhva ra cuenda ra Herodes ta suhva ra fariseo nu nyaá ra Jesús vatyī

casacahan ra chi ra ta coo cuatyī catyaa ra siqui ra.

¹⁴ Chaā coyo ra ihya ta quichaha catyī ra chi ra Jesús:

—Maestro, chitó ndi vatyī cahún cha ndicha, ta ña quichahún cha cahán ñáyivi, ta ña natíin cuendon cuhva caa ri ñu. Ta ndicha sañahún ityi Nyoo. Yucuan chaha cuñi ndi coto ndi, ¿atu vaha cha tyiyahvi yo cha chicán gobiernu ñuu Roma chi yo, o ña vaha? ¿Atu tahán chi cha tyiyahvi yo, o ña tahán chi? —catyī ra chi ra Jesús.

¹⁵ Soco ra Jesús chitó ra vatyī ñima cha vaha chicá xiñi ra, ta catyī ra chi ra:

—¿Ñáá tuhun cha cuñi ndo sandavi ñaha ndo chii? Nyaca ndo noo xuhun chii, na nyehi —catyī ra.

¹⁶ Caquichī nyaca ra chi ra. Ta cuhva cha nanyehe ra ta ndaca tuhun ra chi ra, ta catyī ra:

—¿Yóó chi nuu ihya, ta yóó chi sivi nyaá ihya? —catyī ra chi ra.

Ta canacahan ra ta cacatyī ra:

—Chi gobiernu.

¹⁷ Tyicuan ta catyī ra Jesús chi ra:

—Cuhva ndo chi gobiernu cha tahán chi chi ra. Ta cuhva tucu ndo chi Nyoo cha tahán chi Nyoo —catyī ra Jesús chi ra.

Ta iyo cacuñi ra tuhun cha nacahan ra.

Nu canducu tuhun ra saduceo siqui tuhun cha nandotó ndiyi

(Mt. 22.23-33; Lc. 20.27-40)

¹⁸ Tyicuan ta cuahan coyo suhva ra saduceo nu nyaá ra Jesús. Ican ra saduceo ihya catyī ra vatyī ña nandotó ndiyi. Yucuan chaha cacahan ra tyehe caa ta catyī ra chi ra Jesús:

¹⁹ —Maestro, tyaā ra Moisés tuhun yoso caa tahán chi sacuvi yo tatu noo rayi ta chihī ra ta ndoo ñasihī ra soco ña chicoo sehe ra chihin ña. Catyī ra vatyī tahán chi tandaha yañi ra chihin ñaha cha chihī yi cuan, tacuhva vatyī coo sehe ña cha cuenda ndi yañi ra.

20 Noo chaha chiyo ucha tahan ra chihin yañi ra. Ra cha xihna ri tandaha ra chihin noo ña, ta yori sehe ra chicoo.

21 Ta ra cu uvi tandaha ra chihin ñaha cha ndoo cuan. Ta suri chihí ra. Ta suri yori sehe ra chicoo. Ta tyicuan caa tucu cuví chihin ra cu uñi cuan.

22 Ta tyicuan caa ndi ucha tahan ra tandaha chihin ña. Ta ni noo ra ña cachiyó sehe ra chihin ña. Ta nu ndihí tuhun, chihí ndihí maa ña.

23 Ta vityín, quiví cunandoto ñáyiví, ¿nya ra cucuvi yí ña? Vatyí ndi ucha tahan ra cuan chiyo chihin ña —catyí ra chi ra Jesús.

24 Tyicuan ta nacahan ra Jesús ta catyí ra chi ra:

—Nyoho cahán tondo ri maa ndo, vatyí ña chitó ndo cha nyaá nu tutu tuhun Nyoo. Ta ni ña chitó ndo yoso caa tunyee iñi Nyoo.

25 Vatyí quiví cunandoto ndiyí, ni ma tandaha ñu ta ni ma cuhva ñu sehe ñu tandaha, vatyí tari ángel cha nyaá andiví tyicuan caa cucuvi ñu.

26 Ta tuhun cha nandotó ndiyí cuan, ¿atu ta sacuaha ca ndo nu libru ra Moisés yoso caa cahan Nyoo chihin ra nu cayú taca iñu cuan? Ta tyehe caa catyí ra chi ra: “Yuhu cuví Nyoo cuenda ra Abraham, ta cuenda ra Isaac, ta cuenda ra Jacob”, catyí Nyoo chi ra Moisés.

27 Ta cha catyí Nyoo tyicuan caa cuñí chi catyí vatyí vasi cha naha cachihí ra, soco canyitó añaima ra vatyí Nyoo ñima Nyoo cuenda ñu ndiyí cuví ra, soco Nyoo cuenda ñu nyitó cuví ra. Yucuan chaha catyí vatyí nyoho cahán tondo ri ndo —catyí ra Jesús chi ra.

*Ley cha niñi ca cha chaha Nyoo
(Mt. 22.34-40)*

28 Chaa tucu noo ra sacuahá cuenda ley vehe ñuhu cuan, ta chiñi ra cacuví yuhu ra. Ta vatyí chitó ra vatyí ra Jesús vaha nacahan ra nu cacahan ra yucuan, ta ndaca tuhun ra chi ra ta catyí ra:

—Chichi cha tandihí ley, ¿nya cha niñi ca sacuvi yo? —catyí ra.

29 Ta nacahan ra Jesús ta catyí ra:

—Cha xihna ca sacuvi yo cha nuu tandihí, ican cuví ihya: “Cuñi ndo ñu Israel. Sutu yo Nyoo, noo ri maa ra iyó.

30 Cuñun chi Sutu yo Nyoo chihin cha niñi iñun ta chihin cha tandihí añaimon, ta chihin cha tandihí cha chiñi tuñi xiñun, ta chihin cha tandihí tunyee iñun.” Ican ihya cuví cha xihna ca cha tahán chi sacuvi yo.

31 Ta cha cu uvi catyí chi: “Cuñun chi tahun tari cuñun chi maun.” Ñahri ca tuhun cha niñi ca ican saha nduvi tahan ihya —catyí ra Jesús.

32 Tyicuan ta ra sacuahá cuenda ley cuan catyí ra chi ra:

—Vaha xaan nacahun, Maestro. Ndicha cha catyún vatyí noo ri Nyoo iyó, ta yori ca Nyoo iyó, noo tuhun ri maa ra.

33 Ta cha cuñí yo chi Nyoo chihin cha niñi iñi yo ta chihin cha tandihí cha chiñi tuñi xiñi yo, ta chihin cha tandihí añaima yo, ta chihin cha tandihí fuerza yo, ta cuñi yo chi tahan yo tari cha cuñi yo chi maa yo, vale ca cuan ta ñima ca tandihí quití cha chahá yo chi Nyoo cha chahñi yo ta chahmí yo —catyí ra sacuaha cuenda ley cuan chi ra Jesús.

34 Nyehe ra Jesús vatyí vaha nacahan ra chihin cha cachi xiñi ra. Ta catyí ra chi ra:

—Chiin ri ca cuñí chi ta ñihún cuhva yoso caa nacuhvon añaimon chi Nyoo na cunyaca ñaha ra —catyí ra Jesús chi ra.

Ta ni noo ca ñu ña cañá ca iñi ñu candaca tuhun ñu ñáá cha ndaca tuhun ñu chi ra Jesús.

*¿Yóo chi tata vachi ra Cristo?
(Mt. 22.41-46; Lc. 20.41-44)*

35 Sañahá ra Jesús chichi vehe ñuhu cahnu, ta catyí ra:

—¿Yoso caa cha cacatyí ra sacuahá cuenda ley vehe ñuhu vatyí ra Cristo vachi ra tata ra David?

36 Vatyí suri maa ra David chotyíño Tatyí Ii chi ra ta catyí ra:

Cahan Suti Nyoo chihin Suti ra Cristo, ta catyí ra:

“Cunya chiyo vahi nyacua nya cuhve chi ra xaan iñi chuun vatyí cuaca chahun siqui ra”, catyí Nyoo chihin yuhu ra David ta cha naha.

³⁷ ¿Yoso caa cha ra vachi tata ra David cuví chi ra Cristo, ta suri maa ra David catyí ra vatyí ra Cristo cuví Sutu ra? —catyí ra Jesús.

Ta cuaha xaan ñáyivi nyicú yucuan sñi xaan cacuñí ñu chiñí ñu tuhun cahán ra.

Nu catyí ra Jesús vatyí iyó cuatyí ra casacuahá cuenda ley vehe ñuhu

(Mt. 23.1-36; Lc. 11.37-54; 20.45-47)

³⁸ Nu sañahá ra Jesús ta catyí ra tyehe caa:

—Saha ndo cuenda chi ndo chihin ra casacuahá cuenda ley vehe ñuhu, vatyí tahán iñi ra cacuihno ra sahmanañi ta chicá noo ra nuyahvi tacuhva saha ndo ñáyivi chi ra, ta cuhva ndo nocumi chi ra.

³⁹ Maa ra cananducú ra nu vaha ca cunyicu ra chichi vehe ñuhu. Ta nu vaha ca cacuñí ra cachi ra nyayu nu iyó vico.

⁴⁰ Ta ican ra catinyaá vehe ñu chihí yñi, vatyí ña cuví tyiyahvi ñu ñáá xuhun tava ra siqui ñu. Ta cuñí ra sacuvaha ra chi ra nuu ñáyivi. Yucuan chaha naha chicán tahvi ra nu tuví. Maa ra cuví cha cutachi tuñi ca Nyoo chii —catyí ra Jesús.

Noo cha chahá noo ñaha chihí yñi
(Lc. 21.1-4)

⁴¹ Noo chaha nyaá ra Jesús chichi vehe ñuhu cahnu yatyin ri nu nyaá chatun nu cumí ñu xuhun cha chaha ñáyivi chi Nyoo. Ta nyehe ra yoso caa tyihí ñáyivi xuhun yucuan. Ta cuaha ñu tyayñi chahá ñu cuaha xaan xuhun.

⁴² Tyicuan ta chaá tucu noo ñaha ndahvi chihí yñi, ta tyihí ña uvi tahan xuhun cuatyí cha caha xaan nyaá.

⁴³ Tyicuan ta cana ra Jesús chi ra cachicá noo chihin ra, ta catyí ra chi ra:

—Cha ndicha catyí chi ndo vatyí ñaha ndahvi chihí yñi ihya, cuaha ca

chaha ña ta ñima ca inga ñu catyihí xuhun chiña.

⁴⁴ Vatyí tandihí ñu cachaha ñu cha ndoo ri ca chi ñu. Soco maa ña chihin cha ndahvi ña chaha ña tandihí cha cumí ña —catyí ra Jesús.

13

Nu catyí ra Jesús vatyí cutani vehe ñuhu cahnu

(Mt. 24.1-2; Lc. 21.5-6)

¹ Cuhva cha cua quita ra Jesús chichi vehe ñuhu cahnu cuan, noo ra chicá noo chihin ra catyí ra chi ra:

—¡Maestro, nyehe ñana cha tyaqui yuu yihí vehe ihya! ¡Ñana cha nahnu vehe ihya! —catyí ra chi ra Jesús.

² Soco nacahan ra Jesús, ta catyí ra chi ra:

—¿Atu nyehún vehe nahnu ihya? Soco catyí chuun vatyí ma ndoo ni noo yuu coso siqui tahan, vatyí tandihí cutani —catyí ra Jesús.

Seña cha cucuvi cha ni cumañi ca naa ñáyivi

(Mt. 24.3-28; Lc. 21.7-24; 17.22-24)

³ Tyicuan ta cuahan coyo ra nya yucu yutun Olivo cha nyaá inga chiyo xahva ityi nuu vehe ñuhu cahnu. Ta cuhva cha nyaá ra Jesús yucuan, ra Pedro, ra Jacobo, ra Juan, ta ra Andrés candaca tuhun xehe ra chi ra:

⁴ —Cuñí ndi cha catyun chi ndi ama cucuvi tandihí tuhun cha cahun tuhun. ¿Ñáá seña cucuvi tatu cha cua cuvi? —cacatyí ra.

⁵ Nacahan ra Jesús ta catyí ra:

—Saha ndo cuenda chi ndo tacuhva yori sandavi ñaha chi ndo.

⁶ Vatyí cuaha xaan ra cuquichi coyo ra, ta cucotyíño ra siivi ta cucatyí ra: “Yuhu cuví ra Cristo.” Ta cusandavi ñaha ra chi cuaha xaan ñáyivi.

⁷ ‘Soco tatu chiñí ndo tuhun tyi iyó cuatyí ta cañi tahan ñáyivi, ma nayuhvi ndo. Vatyí tyicuan caa tahán chi cucuvi, soco ta cha ca quivi cuna ñáyivi.

⁸ Vatyí noo ñuu cucañi tahan chi chihin inga ñuu, ta ñáyivi cuenda noo gobiernu cucañi tahan ñu chihin

ñáyiví cuenda inga gobiernu. Ta cu-coo cha taan nahnu cuaha ri ityi. Ta cucoo tama. Ta cunaquiqui ñáyiví. Ta tyehe caa cua quichaha cha nyehe ñáyiví tindocho.

⁹ Soco saha ndo cuenda chi ndo. Vatyí cucuhva cuenda ñu chi ndo chi ra cacuví tyiño. Ta cucañi ñu chi ndo chichi vehe ñuhu. Cucuhva cuenda ñu chi ndo nuu gobernador ta nuu rey cha cuenda yuhu. Ta tyicuan caa cuví cahan ndo tuhín nuu ra.

¹⁰ Vatyí cha ni cumañi ca naa ñáyiví, cuñí chi cucutya tuhún Nyoo yoso caa sacacú ra añima ñáyiví tandihí ñuu.

¹¹ Ta cuhva cha cunyaca ñu chi ndo nuu ra cacuví tyiño, ma caca xiñi ndo ñáá tuhún cucahan ndo, ni ma ndichí xiñi ndo. Cahan ndo cha catyi Nyoo chi ndo cha cahan ndo cuhva cuan. Vatyí ñima nyoho cucahan, soco maa Tatyí Ii Nyoo.

¹² Yihí ra cunacuhva cuenda ra nyacua nya chi yañi maa maa ra. Ta sacuvi ra na cacahñi ñu chi ra. Ta yihí ñáyiví cunacuhva cuenda ñu chi sehe ñu. Ta yihí ñu cunaquiqui ñu siqui sutu ñu ta sihi ñu. Ta cunacuhva cuenda ñu chi ñu na cahñi ra chi ñu.

¹³ Tandihí ñáyiví cutasi cuñi nyehe ñu chi ndo cha cuenda yuhu. Soco tatu cunyehe iñi ndo nyacua nya nu ndihí, cucacu ndo.

¹⁴ Ra Daniel, ra profeta Nyoo ta cha naha, tyaá ra yoso caa cuahan tuhún noo cha cusacaquiñi nu ii xaan. Ta cusativi chi tandihí. Tatu nyehé ndo nanyaá yucuan nu ña tahán chi cuinanyaa, (nyoho cha sacuahá ndo ihya na cutuñi iñi ndo) cuñí chi cha cono tandihí ñu iyó Judea nya ityi yucu.

¹⁵ Ta ñu ñohó xiñi vehe quiví cuan, noo ñu, soco ma quihví ñu chichi vehe ñu tava ñu ñáá cha tava ñu.

¹⁶ Ta ñu ñohó nu chiqui, ma cunuhu ñu nya vehe ñu cha cunaquehen ñu sahma ñu.

¹⁷ ¡Ndahví ñusihí cha cañohó sehe quiví cuan! ¡Ndahví tucu cuvi ñusihí cha chaxín sehe quiví cuan!

¹⁸ Cacan ndo chi Nyoo tacuhva cha

ma tahan chi caca cono ndo quiví vichin.

¹⁹ Vatyí quiví tindocho cucuvi. Ta ni noo chaha ta cuvi ca tyicuan caa nyata quiví chino ñuhu ñáyiví nyacua nya vityin. Ta ni ma coo ca tindocho tahán ihya nu cuahan ca chi.

²⁰ Tyehe ta ma sanducuti Sutu Mañi yo tyembu cuan, yori maa cucacu. Soco cusanducuti ra cha cuenda cha cuñi ra chi ñu cuenda ra, ñu cha nacachi maa ra.

²¹ Tatu yóó cha catyi chi ndo: “Nyehe ndo, ma ra Cristo ihya” o “Nyehe, ma ra nyaá yucuan”, ma chino iñi ndo.

²² Vatyí cuquichi ra casandavi ñaha, cucatyí ra tyi ra Cristo cuví ra. Ta yihí ra cucatyí ra vatyí profeta Nyoo cacuví ra. Ta cucasavaha ra seña, milagru, vatyí canducú ra cuhva sandavi ñaha ra nyacua nya chi ñu cha nacachi maa Nyoo tatu cuví chi ra.

²³ Soco saha vaha ndo cuenda vatyí yuhu cha sacote chi ndo cha ni cumañi ca cuvi tyicuan caa —catyi ra Jesús.

Nu sacoto ra Jesús yoso caa cuquichi tucu ra inga chaha

(Mt. 24.29-35, 42-44; Lc. 21.25-36)

²⁴ Ta catyi tucu ra Jesús tyehe caa: —Soco quiví cha yaha tindocho, cunduñaa ñanyii. Ma cundichin ca yoo.

²⁵ Tiño cunacoyo andivi. Ta nyacua nya tandihí cha iyó andivi ta cunacanda.

²⁶ Tyicuan ta cunyehe ndo chi yuhu Rayi cha quichi nya gloria inga chaha, vachi nu vico chihin cha ndicha ñuhu Nyoo, ta chihin cha cahnu cuví ra.

²⁷ Tyicuan ta cutachi chi ángel ta cusandu in ri chi ñu nacachi nichahnu siqui ñuhu ñáyiví, nyacua nya nu ndihí ñuhu ñáyiví ta nyacua nya nu ndihí andivi.

²⁸ Cutuñi iñi ndo cuhva tu higo ihya: Tatu nduyutya soco tun ta caña numa tun cha chitó ndo vatyí cha cuñí chaa quiví coo chiti, cha vachi vico savi.

²⁹ Ta suri tyicuan caa tatu cha nyehe ndo tuhún ihya, coto ndo tyi

cha nyaña yatyin quiví quichi tiqui. Cha nyañai yuvehe cuví cuan.

³⁰ Cha ndicha catyí chi ndo vatyí tandihí ihya cucuvi cha ni ri ca cha iyó ñáyiví.

³¹ Tyicuan ta cunaa andiví ta ñuhu ñáyiví cha iyó cha vityin. Soco tuhun cahín tyicuan ri cucuvi tari cuhva catyí.

³² 'Soco yori chitó ñáá quiví ta ñáá cuhva cucuvi tandihí ihya, ni ángel Nyoo, ni yuhu Sehe Nyoo. Noo tuhun ri maa Nyoo Suti cuví ra chitó.

³³ 'Yucuan chaha conyito vaha ndo, ta saha ndo cuenda ta cacán tahvi ndo, vatyí ña chitó ndo ñáá quiví cuchaa cuhva.

³⁴ Tari noo ra cha cua cuhun nu cañi. Ta cha ni cumañi ca cuhun ra, chaha cuenda ra vehe ra chi musu ra. Ta chaha ra tyiño chi noo noo ra. Ta tachí ra chi ra sahá cumi yuvehe cuan na saha ra cuenda.

³⁵ Yucuan chaha nyoho conyito ndo vatyí ña chitó ndo ñáá cuhva cuquichi ra cha cuví tari chitoho vehe cuan, an cha ni cua cuaa, an ñuu, an cuhva cha chacú chaa loho, an cha ñaha ri.

³⁶ Conyito ndo coto sana iñi ndo ta quichi ra, ta nañihi ra chi ndo quixí ndo.

³⁷ Cha catyí chi nyoho, catyí tiqui chi tandihí ñáyiví ñandihí. Na conyito ñu.

14

Nu canducú ra cuhva catiñ ra chi ra Jesús

(Mt. 26.1-5; Lc. 22.1-2; Jn. 11.45-53)

¹ Uvi ca quiví cumañi ta cua tahan chi vico cha nañí pascua ta vico cha tuhva ñu chachí ñu pan cha ñahri yuchan iya yihí. Ta ra cacuví nuu chi tata sutu ta ra casacuahá cuenda ley vehe ñuhu canducú ra cuhva catiñ xehe ra chi ra Jesús ta cacahñi ra chi ra.

² Soco cacatyí ra chi ra tahan ra:

—Ma tiñ yo chi ra cha chichi vico vityin coto naquiqui ñáyiví —cacatyí ra.

Nu choso noo ñaha sihi ndutya vixi chahán chi ra Jesús

(Mt. 26.6-13; Jn. 12.1-8)

³ Ñohó ra Jesús ñuu Betania vehe ra Simón, cha catyí ñu: “Simón ra cha tyahyu coño.” Ta cha ni ri ca cha nyaá ra mesa, chaa noo ñaha sihi ndaha ña noo yutyi cha chinqo chihin noo yuu cha nañí alabastro. Tyitu yihí chihin ndutya vixi chahán cha nañí nardo. Ta yahvi vavaha nyaá. Ta tahvi ña yutyi cuan ta choso ña ndutya vixi chahán cuan xiñi ra Jesús.

⁴ Soco suhva ra canyicú yucuan cacuxaan ra ta cacatyí ra chi tahan ra:

—¿Ñáá tuhun sativí ña ndutya vixi chahán cuan?

⁵ Tyehe ta quiyahvi cuan, cuenda mil cuñihi yo chihin chi, ta tyinyee chi chi ñu ndahvi —catyí ra.

Ta cahan ra chi ña.

⁶ Soco ra Jesús catyí ra:

—¡Saña ndo chi ña! ¿Ñáá tuhun cha sayangá ndo chi ña? Cha choso ña chii tyehe caa, cha vaha cuví.

⁷ Vatyí ñu ndahvi tyicuan ri cua cunyata ñu chihin ndo, ta cuví sacuvi maa ndo cha vaha chihin ñu ñáá ri quiví cuñí ndo. Soco yuhu ñima tyicuan ri cua cunyai chihin ndo.

⁸ Ñaha sihi ihya sacuvi ña yoso cuhva cha cuví chi ña. Choso ña ndutya vixi chahán coño ñuhi, cha ni cumañi ca cucúvi ta quihvi chichi ñuhu.

⁹ Cha ndicha catyí chi ndo, vatyí tandihí ri nicahnu ñuhu ñáyiví nu cahan ñu tuhun Nyoo, cunacatyí tucu ñu tuhun cha sacuvi ñaha ihya, tacuhva nicohon iñi ñáyiví tuhun ña —catyí ra Jesús.

Nu nacuhva cuenda ra Judas chi ra Jesús chi ra xaan iñi chi ra

(Mt. 26.14-16; Lc. 22.3-6)

¹⁰ Yaha cuan ta ra Judas Iscariote, noo ra chichi cha uchi uvi tahan ra cachicá noo chihin ra Jesús, cahan ra chindatuhun ra chihin ra cacuví nuu chi tata sutu, vatyí casandaa ra noo tyiño ta nacuhva cuenda ra chi ra Jesús chichi ndaha ra.

11 Cuhva cha cachiñi ra ihya, cusii xaan cacuñi ra, ta catyi ra vatyí cuhva ra xuhun chi ra. Tyicuan ta quichaha nducu ra Judas cuhva nacuhva cuenda ra chi ra Jesús.

Nu cuxiñi ra Jesús chihin ra cachicá noo chihin ra

(Mt. 26.17-29; Lc. 22.7-23; Jn. 13.21-30; 1 Co. 11.23-26)

12 Cuví chi quivi quichaha vico cha chachí ñu pan cha ñahri yuchan iya yihí. Yucuan quivi cha vico pascua tuhvá ñu chahñi ñu mbee luhlu cha chahá ñu chi Nyoo. Ta ra cachicá noo chihin ra Jesús candaca tuhun ra chi ra, ta cacatyí ra:

—¿Nya maa maa cuñún cha sandu-vaha ndi cha cuxiñun cha vico ihya?

13 Tyicuan ta tachí ra chi uvi tahan ra ta catyi ra chi ra:

—Cuahan ndo chichi ñuu, ta yucuan cunañihi ndo chi noo ra cha nyisó noo quivi ndutya. Cuahan ndo chata ra.

14 Ta nu quihvi ra, catyi ndo chi ra cuví chitoho vehe yucuan tyehe caa: “Ra Sacuaha cuñi ra coto ra nya nyaá cuarto nu cusanducahnu ra vico chihin ra cachicá noo chihin ra”, catyi ndo chi ra.

15 Ta maa ra cusañaha ra noo cuarto cahnu nu piso sucun chi ndo. Cha yaha nduvii, ta yucuan cusanduvaha ndo cha cuxiñi yo —catyi ra Jesús chi ra.

16 Cuahan coyo ra. Ta cha coyo ra chichi ñuu. Canañihi ra tari cuhva catyi ra Jesús chi ra, ta casanduvaha ra cha cuxiñi ra cha vico pascua cuan.

17 Ta cha cuaa cuan cha ra Jesús chihin ndi uchi uvi ra chicá noo chihin ra.

18 Ta cuhva cha canyicú ra nu mesa cachachí ra, ra Jesús catyi ra:

—Cha ndicha catyi chi ndo vatyí noo nyoho cha chachí ndo chihin cunaxico tuhun ndo chii.

19 Tyicuan ta canducuihya ñi ra ta quichaha candaca tuhun tahan tahan ri ra chi ra, ta cacatyí ra:

—¿Atu yuhu?

20 Ta nacahan ra Jesús ta catyi ra:

—Noo ra chichi cha uchi uvi ndo. Ra cha satyi pan ñn ri nu coho chihin, ican ra cuan cuví.

21 Vatyí yuhu Rayi cha quichí nya gloria cucuvi chii tari cuhva catyi nu tutu tuhun Nyoo. Soco jndahvi ra ndahvi ra naxicó tuhun chii! Vaha taxin ca cha cuenda ra, tyehe ta ña cacu ra —catyi ra Jesús.

22 Cha ñi ri ca cha cachachí ra, ra Jesús quehen ra pan ta nacuhva ra tyahvi nyoo chi Nyoo. Ta tahvi ra ta chaha ra chi tandihi ca ra, ta catyi ra:

—Quehen ndo. Ican ihya cuví coñe —catyi ra chi ra.

23 Yaha cuan ta quehen ra vaso vinu. Ta cha yaha cha nacuhva ra tyahvi nyoo chi Nyoo, chaha ra chi ra. Ta tandihi ra cachihí ra cha ñohó chichi vaso cuan.

24 Ta catyi ra chi ra:

—Vinu cha yihí chichi vasu ihya tari ñiñi cuví. Ta chihin ñiñi tyihí tahan Nyoo tuhun chaa chihin ndo vatyí cucati cha cuenda cha vaha chi cuaha ñáyivi.

25 Cha ndicha catyi chi ndo vatyí ma coho que vinu nyacua nya quivi nachai nu nyacá ñaha Nyoo ta cohi vinu chaa —catyi ra Jesús chi ra.

Nu catyi ra Jesús tyi cucatyí ra Pedro tyi ña ñohó nuu ra chi ra

(Mt. 26.30-35; Lc. 22.31-34; Jn. 13.36-38)

26 Cha yaha cha cachita ra yaa, ta caquita ra cuahan coyo ra nya yucu yutun Olivo.

27 Tyicuan ta catyi ra chi tandihi ra: —Tandihí nyoho cusandoo no-tuhun maa ndo chii vityin cha cuaa. Vatyí catyi chi nu tutu tuhun Nyoo tyehe caa: “Cucahñi chi ra sahá cumi mbee, ta mbee cacacono ti ityi cuan ityi ihya”, catyi chi.

28 Soco cha yaha cha nandote, xihna que cuhun ityi Galilea ican saha nyoho —catyi ra Jesús chi ra.

29 Tyicuan ta quichaha catyi ra Pedro chi ra:

—Vasi tandihí ra sandoo ra chuun, soco yuhu ma sandoi chuun —catyi ra chi ra Jesús.

³⁰ Soco ra Jesús catyí ra chi ra:

—Cha ndicha catyí chuun, vatyí suri maa cha cuaa ihya, cha ni cumañi ca cuacu loho uvi chaha, yoho cucatyun tyi ña ñohó nuun chii uñi chaha —catyí ra Jesús chi ra Pedro.

³¹ Soco saniñi ra Pedro ta catyí ra:

—Vasi cúvi chuhun, soco ma tixehi cha ñohó nui chuun —catyí ra Pedro.

Ta tandihí ra cacatyí ra tyicuan caa.

Nu chican tahvi ra Jesús nu cuví Getsemaní

(Mt. 26.36-46; Lc. 22.39-46)

³² Tyicuan ta cachaa coyo ra noo nu nañi Getsemaní. Ta ra Jesús catyí ra chi ra cachicá noo chihin ra:

—Cunyicu ndo ihya ni ri cuhin cucacan tahvi —catyí ra Jesús.

³³ Ta quehen ra chi ra Pedro, ta ra Jacobo ta ra Juan cuahan chihin ra. Ta quichaha chica xaan iñi ra ta cutyoño cuñi ra.

³⁴ Ta catyí ra chi ra:

—Tuví iñi añime noo tucuihya iñi, ta cuñi cahñi chi chii. Ndo nyoho ihya, ta conyito ndo —catyí ra.

³⁵ Tyicuan ta cuahan ra chiin ca ityi nuu ca. Ta chicuiñi chiti ra nu ñuhú. Ta chican ra chi Nyoo tatu cuví cha ma nyehe ra tindocho cha cua cuví chi ra cuhva cuan, catyí ra chicán tahvi ra.

³⁶ Ta nu chicán tahvi ra, ta catyí ra:

—Sutu Mañi yuhu, cha cuenda yoho ñahri cha ma cuví chuun. Tu yoho ta cuñun na canyaha tindocho ihya chii. Soco ma cuví tari cuhva cha cuñi mai, soco cuhva cha cuñi maun na cuví —catyí ra Jesús chicán tahvi ra.

³⁷ Yaha cuan ta nachaa ra nu nyicú ra. Ta nyehe ra tyi caquixí ra. Ta catyí ra chi ra Pedro:

—Yoho Simón, ¿atu quixún? ¿Atu ña cuví conyiton ni noo hora?

³⁸ Conyito ndo ta çacan tahvi ndo tacuhva cha ma sanacava ra ña vaha chi ndo nu cuatyí. Cha ndicha, cuñi añima ndo sacuvi ndo cha vaha, soco coño ñuhu ndo vita xaan cuñi chi —catyí ra Jesús chi ra.

³⁹ Tyicuan ta cuahan ra inga chaha. Ta chican tahvi ra suri maa cha chican ra cha xihna ri.

⁴⁰ Tyicuan ta nachaa tucu ra inga chaha, nyehe ra tyi caquixí ra. Vatyí nicunyasi maa chiti nuu ra chihin cha cacuñi xaan ra cusu ra. Ta ña cachitó ra ñaa cha nacahan ra chihin ra Jesús.

⁴¹ Ta chahan ra cha cu uñi chaha, ta nachaa ra, ta catyí ra:

—Vityin ndicha cusu ndo, nyitatu ndo. Cha iyó vaha ri vityin, cha chaa cuhva cha cucuhva cuenda ra chi yuhu Rayi cha quichi nya gloria ndaha ra ca iyó cuatyí.

⁴² Ndicutita ndo, coho ndo. Cha vachi ra naxicó tuhun chii —catyí ra Jesús chi ra.

Nu catin ra chi ra Jesús

(Mt. 26.47-56; Lc. 22.47-53; Jn. 18.2-11)

⁴³ Ni cahán ca ra Jesús ta chaa ri ra Judas, noo ra chichi cha uchi uvi tahan ra chicá noo chihin ra. Ta cuaha sindaro ta policia vachi coyo chihin ra canyisó ra mityi ta yutun. Vachi coyo ra cuenda ra cacuví nuu chi tata sutu, ta ra casacuaha cuenda ley vehe ñuhu, ta cuenda ra mandoñi.

⁴⁴ Cha ni cumañi ca cachaa coyo ra, ra Judas, ra cha naxicó tuhun chi ra, chaha ra noo seña chi ra ta catyí ra:

—Ra cha tyayuhi, ican ra cuan cuví. Tin vaha ndo chi ra na cuhun ra chihin ndo.

⁴⁵ Ta cuhva cha chaa ra tuhva ra nu nyaá ra Jesús ta catyí ra chi ra:

—Maestro.

Ta tyayuhu ra xitin ra.

⁴⁶ Tyicuan ta catin ra chi ra Jesús ta cuahan ra vehe caa.

⁴⁷ Soco noo ra cha nyaá yucuan tava ra mityi ra ta chahnya ra soho musu ra cuví nuu chi tata sutu.

⁴⁸ Tyicuan ta ra Jesús catyí ra chi ra cachaa coyo cuan:

—¿Atu vachi tin ndo chii chihin mityi ta chihin yutun, tari cha vatyí cuví yuhu noo ra suhu?

⁴⁹ Ndi quivi chinyai chihin ndo sañahi chichi vehe ñuhu cahnu cuan. Ta ni noo chaha ña tin ndo chii. Soco cuví chi tyehe caa vityin, tacuhva

chino cava tari cuhva catyí nu tutu tuhun Nyoo —catyí ra Jesús chi ra.

⁵⁰ Tyicuan ta tandihí ra cachicá noo chihin ra, cachino ra ta casandoo noo tuhun maa ra chí ra Jesús.

⁵¹ Soco noo ri ca ra tyivaa nyicón ra chi ra, ndichí ra noo sinduhu ta catiñ tucu ra chi ra.

⁵² Soco sandoo ra sinduhu cuan ta cuahan vavaha ra vityiaa vityi cañi ra.

Nu cutuñi chi ra Jesús nuu ra cuví tyiño

(Mt. 26.57-68; Lc. 22.54-55, 63-71; Jn. 18.12-14, 19-24)

⁵³ Tyicuan ta cachinyaca ra chi ra Jesús nuu ra cuví nuu chi tata sutu, ta candu ñin ri tandihí ra chihin ra cacuví mandoñi, ta ra casacuahá cuenda ley vehe ñuhu.

⁵⁴ Ta ra Pedro cuahan ra chata ra nya sava ri, nyacua nya nuquehe vehe ra cuví nuu chi tata sutu cuan. Ta ndoo ra nyaá ra chihin policía sanasaá ra chi ra yatyin yunuhu.

⁵⁵ Ra cacuví nuu chi tata sutu, ta tandihí ra cuví tyiño canducu ra ñáá noo cuatyí tyaa ra siqui ra Jesús, tacuhva cuví cacahñi ra chi ra soco ña cañihí maa ra.

⁵⁶ Vasi cuaha ñáyivi cahan ñu cuendu siqui ra, soco ña nacachí tahan tuhun cahán ñu.

⁵⁷ Yihí ñu candicuita ñu ta catyaa ri maa ñu cuendu siqui ra, ta cacatyí ñu:

⁵⁸ —Nyuhu chiñi ndi cha cahan ra vatyí cusatani ra vehe ñuhu cahnu cha savaha ñáyivi. Ta chichi cha uñi quivi cunacananyaa ra inga vehe ñuhu cha ñima ñáyivi savaha, na —catyí ñu.

⁵⁹ Soco ni tyicuan caa ña nacachí tahan cha catyí ñu.

⁶⁰ Tyicuan ta ra cuví nuu chi tata sutu ndicuita ra mahñu nu nyicú tandihí ra yucuan, ta quichaha ndaca tuhun ra chi ra Jesús, ta catyí ra:

—¿Atu ña nacahan maun? ¿Ñáá cha cuví ihya cha cacahán ra sicun? —catyí ra chi ra.

⁶¹ Soco ra Jesús taxi ri nanyaá ra, ta ña nacahan maa ra. Ta ra cuví nuu

chi tata sutu cuan ndaca tuhun ra chi ra inga chaha, ta catyí ra:

—¿Atu yoho cuvún Cristo, Sehe Nyoo ra cha iyó cha vaha chi?

⁶² Ra Jesús catyí ra chi ra:

—Ican, yuhu cuví. Ta nyoho cunyehe ndo chi yuhu Rayi cha quichi nya gloria, cucunyai chiyo vaha Nyoo ra cha iyó tandihí tunyee ñi chi. Ta cunyehe ndo chii quivi quichi nu vico andivi —catyí ra chi ra.

⁶³ Tyicuan ta ra cuví nuu chi tata sutu cuan, chahnya ra sahma ra tari noo seña vatyí ña tahan ñi ra, ta catyí ra:

—¿Ñáá ca cha ndaa cuñi yo?

⁶⁴ Nyoho cha chiñi ndo vatyí chicoo cuatyí ra nuu Nyoo chihin tuhun cahán ra. ¿Yoso caa cuñi nyoho? —catyí ra.

Ta tandihí ra cacatyí ra vatyí tahan chi cuví ra.

⁶⁵ Tyicuan ta suhva ra quichaha tyicu si ra chi ra. Ta chasi ra nuu ra, ta cañi ra chi ra chihin chiqui ra ta cacatyí ra chi ra:

—¡Nacoto yóo cha cañi chuun! —cacatyí ra chi ra.

Ta policía cacatu ra nuu ra.

Nu catyí ra Pedro vatyí ña ñohó nuu ra chi ra Jesús

(Mt. 26.69-75; Lc. 22.56-62; Jn. 18.15-18, 25-27)

⁶⁶ Ra Pedro nyaá ra ityi yuvi nuquehe. Tyicuan ta cha noo ñaha sahá tyiño chihin ra cuví nuu chi tata sutu cuan.

⁶⁷ Ta cuhva cha nanyehé ña chi ra Pedro vatyí sanasaá ra chi ra yunuhu cuan, ndoo ña nyehé vavaha ña chi ra, ta catyí ña chi ra:

—Yoho ñandihí, chica noun chihin ra Jesús ra ñuu Nazaret cuan —catyí ña chi ra.

⁶⁸ Soco ra Pedro tixehé ra, ta catyí ra:

—Ña ñohó nui chi ra, ña chité ñáá tuhun cahún —catyí ra chi ña.

Tyicuan ta quitá ra ityi yuvehe. Tyicuan ta chacu noo loho.

⁶⁹ Tyicuan ta ñaha cha nyaá tyiño yoo cuan, nanyehé tucu ña chi ra

inga chaha ta quichaha catyi ña chi ra canyicú yucuan:

—Noo ra tahan ra cuan cuví ra ihya —catyí ña.

⁷⁰ Soco tixehe ra inga chaha. Ta yaha suhva ri ca cuhva ta ra canyicú yucuan cacatyí tucu ra inga chaha chi ra Pedro:

—Cha ndicha vatyí noo ra yucuan cuví yoho, vatyí ra Galilea cuvún, vatyí tari cahán ñu, cahún —catyí ra chi ra.

⁷¹ Tyicuan ta iyo xaan tyanaha ra Pedro, ta catyí ra:

—¡Chitó vaha Nyoo tyi ña ñohó nui chi ra cha cahán nyoho tuhun! ¡Na cahñi Nyoo chii tatu ña ndicha cha cahín! —catyí ra.

⁷² Ta caa cuhva ri cuan chacu ri loho cha cu uvi chaha. Tyicuan ta nicohon iñi ra Pedro tuhun cha cahan ra Jesús chihin ra: “Cha ni cumañi ca cuacu loho uvi chaha, yoho cucatyun vatyí ña ñohó nuun chi yuhu uñi tahan chaha.” Nicohon iñi ra Pedro ta quichaha chacu chaa ra.

15

Nu nanyaa ra Jesús nuu ra Pilato
(Mt. 27.1-2, 11-14; Lc. 23.1-5; Jn. 18.28-38)

¹ Cuhva cha cundichin candu ñn ri ra cacuví nuu chi tata sutu chihin ra cacuví mandoñi ta chihin ra casacuahá cuenda ley vehe ñuhu ta tandihi ra cuví tyiño ñu Israel. Ta ra Jesús nuhñi ra, chinacuhva cuenda ra chi ra chi ra Pilato.

² Ta ndaca tuhun ra Pilato chi ra, ta catyí ra:

—¿Atu rey cuenda ñu Israel cuví yoho?

Ta nacahan ra Jesús ta catyí ra:

—Ican, yuhu cuvi. Ndicha cha cahún.

³ Ta ra cacuví nuu chi tata sutu cuaha xaan cha catyaa ra siqui ra.

⁴ Tyicuan ta quichaha ndaca tuhun tucu ra Pilato inga chaha chi ra, ta catyí ra:

—¿Atu ña nacahan maun? Nyehe yoso cha cuaha cha tyaá ra sicun.

⁵ Soco ra Jesús ña nacahan maa ra. Yucuan chaha ña chitó ra Pilato ñáa cha caca xiñi ra.

Nu cutuñi chi ra Jesús vatyí cucúvi ra

(Mt. 27.15-31; Lc. 23.13-25; Jn. 18.38—19.16)

⁶ Ta vico cuan tuhvá ra Pilato saña ra chi noo ra ñohó vehe caa, noo ra cha cacan maa ñáyivi.

⁷ Ta ñohó noo ra nañi Barrabás vehe caa cuan, ñn ri chihin inga ra cha cachahñi chi ñáyivi noo nu naquiqui ñáyivi siqui gobiernu.

⁸ Ta quichi coyo ñáyivi quichaha chican ñu chi ra Pilato na saña ra chi noo ra tari tuhvá maa ra.

⁹ Ta nacahan ra Pilato, ta catyí ra:

—¿Atu cuñi nyoho cha sañe chi Rey cuenda ñu Israel?

¹⁰ Tyicuan caa catyí ra vatyí tuví iñi ra vatyí ra cacuví nuu chi tata sutu cuan tasi cuñi ra chi ra Jesús tyi cuaha ñáyivi nyicón chi ra, yucuan chaha nacuhva cuenda ra chi ra.

¹¹ Soco ra cacuví nuu chi tata sutu cuan catyiyuhu ra chi ñáyivi na catyí ñu na saña ra chi ra Barrabás.

¹² Tyicuan ta ndaca tuhun ra Pilato chi ñu, ta catyí ra:

—¿Ta ñáa cha cuñi ndo sacuvi chihin ra cha catyí nyoho Rey cuenda ñu Israel chi? —catyí ra chi ñu.

¹³ Tyicuan ta nacanachaá ñu, ta catyí ñu:

—¡Na cúvi ra nu cruzi! —catyí ñu, canachaá ñu.

¹⁴ Ta catyí ra Pilato chi ñu:

—Soco ¿ñáa cha ña vaha sacuvi ra? —catyí ra.

Soco canachaá ca ñu ta catyí ñu:

—¡Na cúvi ra nu cruzi! —catyí ñu.

¹⁵ Tyicuan ta vatyí cuñi ra Pilato cuvaha ra nuu ñu, saña ra chi ra Barrabás. Tyicuan ta tyihí ra tyiño na ndoho ra Jesús, ta cha yaha cuan chaha cuenda ra chi ra vatyí cúvi ra nu cruzi.

¹⁶ Tyicuan ta chinyaca sindaro chi ra nuquehe vehe tyiño cuan. Ta casandu ñn ri ra tandihi sindaro.

¹⁷ Ta casacuihno ra noo sahma tyacu nyaa chi ra. Ta caquicu ra noo

corona chihin iñu. Ta catyih̄i ra xiñi ra.

¹⁸ Yahā cuan ta quichaha cacana chaa ra siqui ra chacú nyaa ra chi ra, ta catyí ra:

—¡Nocumi chuun, yoho Rey cuenda ñu Israel! —catyí ra.

¹⁹ Ta cacañi ra xiñi ra chihin noo yutun, ta tyicú si ra chi ra. Ta cachicuiñi chiti ra casaha ra tyi sacahnu ra chi ra.

²⁰ Cha yahā cha chacú nyaa ra chi ra tyicuan caa, tinyaa ra sahma nyaa cuan chi ra, ta sandihvi noo ra sahma maa ra chi ra. Yahā cuan ta cuahan ra chihin ra vatyí cuatyaa ra chi ra nu cruzi.

Nu cuacúvi ra Jesús nu cruzi

(Mt. 27.32-44; Lc. 23.26-43; Jn. 19.17-27)

²¹ Yahá noo ra ñuu Cirene, nañi ra Simón. Sutu ra Alejandro ta ra Rufo cuví chi ra. Ni cua nachaa ra cha chahan ra nu chiqui. Ta cuhva cha cua yaha ra ityi cuan, casaniñi sindaro chi ra na cuiso ra cruzi ra Jesús.

²² Ta cachinyaca ra chi ra Jesús noo nu nañi Gólgota. Ta cuñi chi catyí: Nu Cuví Yiqui Xiñi Ndiyí.

²³ Ta cachaha ra vinu nasaca chihin noo tatan cha nañi mirra coho ra. Soco ra Jesús ña chih̄i ra.

²⁴ Cha yahā catyaa sindaro chi ra nu cruzi, cachahan ra sihva chihin sahma ra ta nya ra saha ganaa caquehen ra sahma ra.

²⁵ Caa in cha ñaha ri catyaa ra chi ra nu cruzi.

²⁶ Ta letra cha catyaa ra xiñi cruzi cuan, catyí chi ñáá cuatyí ra. Ta catyí chi tyehe caa: “Ican ra ihya cuví Rey cuenda ñu ñuu Israel.”

²⁷ Ta chinanyaa ra uvi ca cruzi nu chitaca ra uvi tahan ra suhu, noo ra chiyo vaha ra, ta inga ra chiyo satyin ra.

²⁸ Ta tyicuan caa quitā chi tari cuhva catyí nu tutu tuhun Nyoo tyehe caa: “Sahá ñu tuhun tyi cuví ra noo ra quiñi iyó.”

²⁹ Ta ñu yahá coyo chacú nyaa ñu chi ra. Ta quisí xiñi ñu, ta catyí ñu chi ra:

—¡Jaan! ¡Yoho cha catyūn tyi cusanun vehe ñuhu cahnu, ta chichi cha uñi quivi cunacoñehun inga chaha!

³⁰ ¡Sacacu maun chuun ta noo nu cruzi chiña! —catyí ñu.

³¹ Ta tyicuan caa tucu ra cacuví nuu chi tata sutu ta ra casacuahá cuenda ley vehe ñuhu, cachacú nyaa ra chi ra, ta catyí ra chi tahan ra:

—¡Chi inga ñu sacacu ra, soco ña cuví sacacu ra chi maa ra!

³² Na noo ra nu cruzi vityin, na nyehe yo ta chino iñi yo tyi Cristo Rey cuenda ñu Israel cuví ra —catyí ra.

Ta nyacua nya ra tacaá inga cruzi inchiyo inchiyo xiin ra ta cacahán ra chi ra.

Nu chih̄i ra Jesús

(Mt. 27.45-56; Lc. 23.44-49; Jn. 19.28-30)

³³ Cuhva cha cua cu hora, tandih̄i ñuhu ñayivi nduñaa, nyacua nya caa uñi cha cha iñi.

³⁴ Ta suri cuhva cuan canachaa ra Jesús chihin tandih̄i fuerza ra, ta catyí ra:

—Eloi, Eloi, ¿lama sabactani? —ta cuñi chi catyí: Nyoo Suti, Nyoo Suti, ¿ñáá tuhun sandoo noo tuhun maun chii? —catyí ra.

³⁵ Suhva ra tayucu yucuan cachiñi ra ta catyí ra:

—¡Xihna! Caná chaa ra chi ra profeta Elías —catyí ra.

³⁶ Tyicuan ta chino noo ra yucuan chiquehen ra noo tari caa xixan ta satyji ra chihin vinu iya. Ta tyaa ra noo nu yutun ta satuhva ra yuhu ra na coho ra, ta catyí ra:

—Cuatu ndo. Na nyehe yo tatu quichi ra Elías sanoo ra chi ra —catyí ra cuan.

³⁷ Tyicuan ta ñihi xaan canachaa ra Jesús, ta chih̄i ra.

³⁸ Ta sahma cha tacaá chichi vehe ñuhu cahnu ndata sava maa chi, nya siqui ta nyacua nya ityi yuvi.

³⁹ Ta noo capitán cuenda sindaro Roma nanyaá ra yatyin nuu ra Jesús cuan. Cha nyehe ra yoso caa cana chaa ra, ta yoso caa chih̄i ra, ta catyí ra:

—Cha ndicha ndicha cuii vatyí Sehe Nyoo cuví chi ra ihya —catyí ra.

⁴⁰ Ta nya sava ri tayucú tucu suhva ñusihí canyehé ñu. Ta mahñu ñu cuan nanyaá cu María ñaha Magdala, ta cu María sihi ra José ta ra Jacobo ra tyivaa ca. Ta nanyaá tucu cu Salomé.

⁴¹ Ican ñusihí ihya cachinyicon chi ra Jesús, ta tyinyeé ñu chi ra quiví chica noo ra ityi Galilea. Ta sin ri nyicú cuaha ca ñu cha chaq coyo chihin ra Jerusalén cuan.

Nu chicuchi ñu chi ra Jesús

(Mt. 27.57-61; Lc. 23.50-56; Jn. 19.38-42)

⁴² Cuví chi quiví cha sanduvaha ñu cha cachi ñu vatyí inga quiví tuhvá ñu nyitatu.

⁴³ Ta cha cuaa cuan chaq ra José ra ñuu Arimatea. Noo ra cuví tyiño. Nyatú tucu maa ra nu cunyaca ñaha Nyoo. Ta ndachan cuñí ra ta quihví ra nu nyaá ra Pilato, ta chican ra coño ñuhu ra Jesús chi ra.

⁴⁴ Iyo cuñí ra Pilato cha nacoto ra vatyí cha chihí ra Jesús. Ta cana ra chi capitán vatyí ndaca tuhun ra tatu cha yaha chihí ra.

⁴⁵ Ta cha catyí capitán vatyí cha yaha chihí ra, ra Pilato chaha ra coño ñuhu ra chi ra José.

⁴⁶ Tyicuan ta sata ra José noo sinduhu cha chinq chihin sahma finu cha nañi lino, ta sanoo ra coño ñuhu ra. Ta siquí noo ra chihin sinduhu cuan. Yaha cuan ta chityihí ra chi ra noo chichi ñaña cha cachatya ra chichi noo yuu. Ta chasi ra yuhu ñaña cuan chihin noo yuu cahnu.

⁴⁷ Ta cu María ñaha Magdala cuan ta cu María sihi ra José, chaq coyo ñu nyehe ñu nu tyihí ra chi ra.

16

Nu nandoto ra Jesús

(Mt. 28.1-10; Lc. 24.1-12; Jn. 20.1-10)

¹ Yaha quiví nyitatu ñu. Tyicuan ta cu María ñaha Magdala ta cu María sihi ra Jacobo, ta cu Salomé sata ñu

ndutya vixi chahán ta cuahan coyo ñu cua tyihí ñu coño ñuhu ra Jesús.

² Ta timingu cuví, quiví quichaha vitya, ñaha cuii ri cuhva cha vachi cundichin cuhva cha ni cua caña ñanyii, chaq coyo ñu nu ñaña.

³ Ta catyí ñu chi tahan ñu:

—¿Yóo cha cusacanyaha yuu yuhu ñaña cuan? —catyí ñu chi tahan ñu.

⁴ Soco cuhva cha nanyehe ñu, yuu cahnu cha nyasi yuhu ñaña cuan cha cuachiyó chi nya sava.

⁵ Quihví coyo ñu chichi ñaña yu-cuan. Ta nanyehe ñu chi noo ángel tari caa noo ra tyivaa, nyaá ra chiyo vaha. Ta ñihnó ra sahma cañi ta cuichin. Ta canayuhví ñu.

⁶ Soco catyí ra chi ñu:

—Ma yuhvi ndo. Nyoho nanducú ndo chi ra Jesús ra ñuu Nazaret, ra cha chihí nu cruzi. Soco cha nandoto ra. Ña ñohó ca ra ihya. Nyehe ndo nu chacun ra chi ra.

⁷ Cuahan ndo cua sacoto ndo chi ra Pedro ta chi inga ra cachica noo chihin ra. Catyí ndo chi ra vatyí na cahun coyo ra ityi Galilea vatyí yu-cuan nyatú ra Jesús chi ra, tari cuhva catyí ra chi ra. Vatyí ra Jesús cha cuahan ra ityi nuu —tyicuan caa catyí ángel cuan chi ñu.

⁸ Tyicuan ta cuahan coyo vavaha ñu, vatyí suri canihí ñu cha cuenda cha yuhví ñu. Ta yori maa chihin cahán ñu tuhun cha cuenda cha yuhví ñu.

Nu tuví ra Jesús nuu cu María ñaha Magdala

(Jn. 20.11-18)

⁹ Cuví chi timingu quiví quichaha vitya cha nandoto ra Jesús. Yaha cuan ta xihna ca nuu cu María ñaha Magdala tuví ra. Maa ña cuví ñaha cha tava ñehe ra ucha tahan tatyí ña vaha.

¹⁰ Ta chahan ña chisacoto ña chi ra cachica noo chihin ra, vatyí canyicú cuihya ra ta cachacú cha ra.

¹¹ Soco cuhva cha cachiñi ra vatyí iyó ra Jesús ta vatyí nyehe ña chi ra, ña cachinq iñi ra.

*Nu tuv̄i ra Jesús nuu uvi tahan ra
chica noo chihin ra
(Lc. 24.13-35)*

¹² Cha yaha cuan, ra Jesús tuv̄i ra nuu uvi tahan ra cha cuahan coyo chica ityi ityi nu chiqui. Soco siin caa cuhva caá ra cananyehe ra chi ra.

¹³ Ta cuanuhu coyo ra ta sacoto ra chi tandih̄i ca ra. Soco suri ña cachino ñi ra cha cacahan ra cuan.

*Tuhun cha chahara Jesús chira cha
tyatyño ra chi
(Mt. 28.16-20; Lc. 24.36-49; Jn.
20.19-23)*

¹⁴ Ta cuee ca ta tuv̄i ra Jesús nuu ndi uchi siin ra cha cachica noo chihin ra, cha ni ri ca cha canyicú ra nu mesa. Ta cahan ra chi ra cha cuenda cha ña cachino ñi ra, ta cha cuenda cha candava ñima ra vaty ña cachino ñi ra tuhun cahan ñu nyehe tyi nandoto ra.

¹⁵ Ta catyí ra chi ra:

—Cuahan ndo nicacahnu ñuhu ñayivi, ta cahan ndo chihin tandih̄i ñayivi, ta catyi ndo chi ñu yoso caa sacacú Nyoo ñima ñu.

¹⁶ Ta ñu cha chinó ñi ta condutya ñu, cucacu ñima ñu. Soco ñu cha ña chinó ñi cundoo cuaty ñu siqui ñu ta cunaa ñu.

¹⁷ Ta tandih̄i seña ihya cusacuvi ñu cha chinó ñi chii: Chihin sivi cutava ñehe ñu taty ña vaha. Cucahan ñu inga sahan cha ña chitó ñu.

¹⁸ Cutiin ñu coo, ta tatu coho ñu cha yihí venenu, ma saha cuehe chi ñu. Ta siin ri cutyiso ñu ndaha ñu siqui ñu cuhví, ta cunduvaha ñu.

*Nu nandaq xica ra Jesús andivi
(Lc. 24.50-53)*

¹⁹ Nu ndih̄i cahan Sutu Mañi yo Jesús chihin ra, ta nandaq xica ra andivi, ta chicunyaq ra chiyo vaha Nyoo.

²⁰ Tyicuan ta ra cachica noo chihin ra quita ra ta chahan coyo ra chicanahan ra tuhun Nyoo yoso caa sacacú ra ñima yo tandih̄i ri ityi. Suri maa Sutu Mañi yo tyinye chi ra vaty

chaha ra cha sacuvi ra cuaha milagru. Ta tyicuan caa nyehé ñayivi tyi ndicha tuhun cacahan ra.

Tuhun Nyoo Cha Tyaa San Lucas

Nu sacuhun ra Lucas noo tuhun chi ra Teófilo

1-3 Cha chitón yoho Tata Teófilo, vatyí cha cuaha ñáyiví nducú ñu cuhva ta tyaa ñu nuu tutu tuhun cha cuví nu nyicú ndí. Tyaa ñu tari maa cuhva nacatyí ñáyiví chi yo, ñáyiví cha nyehe ta cahán tuhun ra Jesús nya quiví xihna ri. Ta vityin tahán tucu chí chí yuhu tyi sacote tuhun ra chuun. Vatyí cha yahá sacuahí ta nyehe vahi tandíhi nya nu quichahá. Ta vityin ñañi ñañi ri cuatyai tuhun ra.

4 Vatyí coto vahun tyi ndicha cha sacotó ñáyiví chuun.

Nu sacotó noo ángel chí ra Zacarías ama cucacu ra Juan ra sacondutyá chí ñáyiví

5 Quiví cha cuví ra Herodes rey nicañu Judea, chiyo noo tata sutu, chinañi ra Zacarías. Ta yihí ra cuenda ityi tata sutu cha chinañi Abías. Ta ñasihí ra chinañi ña Elisabet. Ta vachi ñu tata ra Aarón, ra chiyo ta cha naha.

6 Ta ñahri maa cuatyí ñu iyó nuu Nyoo. Vatyí vaha xaan quichahá ñu tuhun cahán Nyoo. Ta yori maa cuví tyaa cuatyí síqui ñu.

7 Soco yori maa sehe ñu chicoo. Vatyí cu Elisabet, ña cuví coo sehe ña. Ta sín ri ninduvi tahan ñu chahnu xaan ñu.

8 Ta noo quiví tahan chí ityi cuenda ra Zacarías cha sacuvi ra tyiño nuu Nyoo.

9 Tari cuhva costumbre maa tata sutu, nyehe ra nya ra tahan chí nyatu chí. Ta tahan chí nyatu chí ra Zacarías cha quihví ra chichi vehe ñuhu, vatyí cahmi ra cutu.

10 Cha ní ri ca cha ñohó ra chahmí ra cutu cuan, cuaha xaan ñáyiví chicán tahvi ñu ityi chata vehe.

11 Yucuan ta tuví noo ángel cuenda Nyoo nuu ra Zacarías. Ta

chicuinanyaa ra chiyo vaha arta nu chahmí ra cutu.

12 Ta cha nanyehe ra Zacarías chí ángel cuan, iyo xaan cuñí ra. Ta yuhví xaan ra.

13 Soco ángel cuan catyí ra chí ra:

—Zacarías, ma yuhvun. Vatyí Nyoo chíni ra tuhun cahún. Ta ñasihun cu Elisabet cucoo noo sehe ña. Ta Juan cusacunañun chí cue.

14 Sii xaan cucuvi chuun. Ta cuaha xaan ñu, cusii cuñi quiví cacu cue.

15 Vatyí sehun, cahnu xaan ra cucuví ra nuu Nyoo. Ma coho ra vinu ta ní ndixi. Ta ñihi xaan cuquihí Tatyí li Nyoo chí ra nyata cumañi cacu ra ta tandíhi tyembu cha coo ra.

16 Ta cuaha xaan ñáyiví Israel cunyicon chí Sutu yo Nyoo cha cuenda ra.

17 Ta cucoo tunyee iñi Nyoo chí ra. Ta cuquihí xaan Tatyí li Nyoo chí ra. Vatyí cucuvi ra tari ra Elías, ra cuví profeta Nyoo ta cha naha. Ta cusanicoo vaha ra chí ñáyiví chihin sehe ñu. Ta cusañaha ra chí ñáyiví quiñi iyó na quichaha ñu tuhun cahán Nyoo. Tyicuan caa cusanduvaha ra chí ñáyiví ta cuatu tuhva ñu chí Nyoo —catyí ángel chí ra Zacarías.

18 Ta ndaca tuhun ra Zacarías chí ángel, ta catyí ra:

—¿Yoso caa ta cote noo cha ndicha vaha? Vatyí yuhu cha chahnu xain. Ta ñasihí cha chahnu xaan ña ñandíhi —catyí ra.

19 Ta ángel cuan quichahá catyí ra:

—Yuhu Gabriel nañí. Ta chiqué tyiño Nyoo. Maa ra tachí chí vatyí cahin nuun ta sacote tuhun vaha ihya chuun.

20 Ta vityin nduñihun. Vatyí ña chinó iñun tuhun cahín. Ta ma cuví cahun nyacua nya chino cava tuhun cahin chuhun —catyí ángel cuan chí ra.

21 Ta ñáyiví cha nyatú chí ra Zacarías ityi chata vehe, iyo xaan cuñí ñu ñáá tuhun cha cucuee xaan ra chichi vehe ñuhu.

22 Soco cuhva cha quitá ra Zacarías, ña cuví maa cahan ra chihin ñu. Tyicuan ta tuví iñi ñu vatyí iyó cha nyehe ra chichi vehe ñuhu cuan. Ta

quichaha cahan ra chihin ñu chihin seña ri. Vatyí ña cuví cahan ra.

²³ Ta quiví cha ndihí tyiño saha ra Zacarías vehe ñuhu cuan, ta cuanuhu ra nya vehe ra.

²⁴ Ta cha yaha tuhun cuan chicohon sehe ñasihí ra, cu Elisabet. Ta ña quitá maa ña chata vehe cha ni ri ca cha ohon yoo. Ta chicá xiñi ña:

²⁵ “Tyehe caa sacuví Sutu Mañi yuhu chihin, tacuhva ma cahan cuehe ca ñáyiví chii”, chicá xiñi ña.

Nu sacoto noo ángel chi cu María vatyí cucacu ra Jesús

²⁶ Nu cu iñu yoo cha ñohó sehe cu Elisabet, tachí Nyoo chi ángel Gabriel ñuu Nazaret ityi Galilea.

²⁷ Vatyí cucahan ra chihin noo ñaha tyivaa cha nañi María. Ta cha nyaña cha tandaha ña chihin noo ra nañi José. Ta ra José cuan vachi ra tata rey David.

²⁸ Ta tuví ángel cuan nu nyaá ña. Ta quichaha catyí ra chi ña:

—Nocumi chuun, María. Ñihun tumañi iñi nuu Nyoo. Vatyí maa ra nyaá chuhun. Ta chi yoho nasocó xaan ca Nyoo nuu tandihí ca ñusihí —catyí ángel cuan chi ña.

²⁹ Ta cuhva cha chiñi ña cha cahan ra, iyo xaan cuñi ña tuhun cahan ra. Ta ndichí xiñi ña: “¿Ñáá tuhun cha chaha ra ihya nocumi chi yo tyicuan caa?” ndichí xiñi ña.

³⁰ Ta catyí ángel cuan:

—Ma yuhvun, María, vatyí ñihún tumañi iñi nuu Nyoo.

³¹ Vatyí cuacohon noo sehun. Ta sacunañun Jesús chi ra.

³² Cahnú xaan ra cuacuvi ra. Ta cunañi ra Sehe Nyoo ra cuvi nuu. Ta Nyoo Sutu Mañi yo cusacuvi ra rey chí ra. Tari cuví ra David, ra vachi ra tata.

³³ Vatyí cunyaca ñaha ra chi ñáyiví Israel tandihí maa tyembu. Ta ma ndihí maa cha cunyaca ñaha ra —catyí ángel cuan chi ña.

³⁴ Yucuan ta ndaca tuhun cu María chi ángel, ta catyí ña:

—¿Yoso caa cuahan tuhun ihya? Vatyí yuhu, ta coo ca yíi.

³⁵ Ta nacahan ángel ta catyí ra:

—Maa Tatyí Ii Nyoo cuquichi sícun. Ta tunyee iñi Nyoo cahnú cuquichi tari noo vico ta casi chí sícun. Yucuan chaha ra ii cha cucacu cunañi ra Sehe Nyoo.

³⁶ Tyicuan caa tucu cu Elisabet ñáyiví chuun. Cucacu noo sehe ña vasi cha chahnú ña. Ñaha cha catyí ñáyiví vatyí ña cuví maa coo sehe. Soco vityin cha ñohó sehe ña. Cha iñu yoo ñohó.

³⁷ Vatyí Nyoo ñahri cha ma cuvi sacuvi ra —catyí ángel chi ña.

³⁸ Ta quichaha catyí cu María:

—Yuhu cuví musu Sutu yo Nyoo. Na sacuvi maa ra yoso cuhva catyún —catyí ña.

Yucuan ta cuahan ángel cuan.

Cuahan cu María cuanyehe ña chi cu Elisabet

³⁹ Cuví noo quiví cuan, numi xaan cuahan cu María noo ñuu ityi Judea nu maa ri maa yucu cuví.

⁴⁰ Ta quihví ña chichi vehe ra Zacarías. Ta chaha ña nocumi chí cu Elisabet.

⁴¹ Cuhva cha chiñi cu Elisabet tuhun cahan cu María, natyoño cha lee cha ñohó chichi ña. Ta chitu ña chihin Tatyí Ii Nyoo.

⁴² Ta chaa nacahan ña, ta catyí ña:

—Nyoo sahá ra tumañi iñi chuun cha nuu tandihí ñusihí. Ta nasocó ra chí sehun.

⁴³ ¿Ta yóo ñaha cuví yuhu? Vatyí quichi síhi Sutu Mañi yo quichí nyehe ña nu nyai.

⁴⁴ Cuhva cha chiñi tuhun cahnú, ta natyoño sehi cha ñohó chichi. Vatyí síi xaan cuví chí ra.

⁴⁵ Ta síi xaan cuñi añimon vatyí chinó iñun cha cuacuvi tuhun cahnú Nyoo chuhun —catyí cu Elisabet.

⁴⁶ Ta quichaha catyí cu María: —Sacahní chí Nyoo chihin tandihí añime.

⁴⁷ Ta síi xaan cuví chíi vatyí sacacú Nyoo añime.

⁴⁸ Vatyí cuví yuhu noo ñaha ndahví ta Nyoo tñn cuenda ra chíi. Ta vityin tandihí quiví cucatyí

ñáyiví chii vatyi cahnu xaan tumañi iñi ñihí.

49 Vatyi Nyoo, cahnu xaan cuví ra. Ta cahnu cha sacuví ra chihin. Ta ii xaan sívî ra.

50 Ta tyicuan ri ndahvi cuñí ra chi tandihí ñáyiví cha sahá ñáyiví chi ra.

51 Cahnu xaan cha sacuví ra chihin tunyee iñi iyó chi ra.

Sanaá ra cuhva chicá xiñi ñu cahnu sahá chi.

52 Sanocueé ra chi ñu sacahnú chii. Ta ra cha ña cahnu sahá chii, sacucahnú ra chi ra.

53 Chahá Nyoo cha vaha chi ñu cuñí coto cha vaha,

ñu chitó vatyi chiñuhú Nyoo chi. Soco ñu tyayîi cha cuñí maa tyi ñahri chiñuhu chi, chihin nundaha nu ndîi ñu, sacuhún ra chi ñu.

54 Tyinyeé ra chi ñáyiví Israel cha cuví musu ra.

Ta ña naá iñi ra chi ñu. Nyehé ndahvi ra chi ñu.

55 Tari cuhva catyí Nyoo chi ra Abraham, sutu yo, ta chi sehe ra, tyicuan caa sacuví Nyoo tyicuan ri maa —catyí cu María.

56 Ta cu María ndoo ña chihin cu Elisabet uñi yoo. Ta cha yahá uñi yoo cuan ta cuanuhu ña nya vehe ña.

Quiví cacu ra Juan, ra cha sacodutyá

57 Ta chaá quiví cha cuacacu cha lee sehe cu Elisabet. Cacu cue ta rayîi cuví cue.

58 Ta cha chiñi ñáyiví cha nyicú yatyin yuvehe ña ta ñáyiví chi ña cha tyicuan caa, síi xaan cuví chi ñu. Ta síi xaan cuñí tucu maa ña. Vatyi vaha xaan cha sacuví Nyoo chihin ña.

59 Ta nu cu uña quiví cha cacu cue, chahan ñu chihin cue vehe ñuhu. Vatyi cuhva cuenda ñu chi cue chi Nyoo. Ta sahá ñu circuncidar chi cue tari cuhva iyó maa ñu. Chahnya ñu chiin ñîi cue nu cuví cue rayîi. Ta cuñí ñu sacunañi ñu Zacarías chi cue tari sutu cue.

60 Soco síhi cue catyí ña:

—Ma cuví. Juan, cunañi cue.

61 Ta quichaha catyí ñu:

—¿Ñáá tuhun sacunañún Juan chi cue? Yori ñáyiví chi ndo cha nañí tyicuan caa —catyí ñu.

62 Ta quichaha ndaca tuhun ñu chihin seña ri chi sutu cue. Vatyi coto ñu ñáá sívî cuñí ra cha cunañi cue.

63 Ta chican sutu cue noo vitu, ta nuu vitu cuan tyaa ra tyehe caa: “Juan cuví sívî cue”, tyaa ra.

Ta tandihí maa ñu cuan iyo xaan cuñí ñu tuhun cuan.

64 Ta nacahan ra Zacarías caa cuhva ri cuan. Ta quichahá sacahnu ra chi Nyoo.

65 Tandihí maa ñu iyó yatyin ri yuvehe ñu, yuhví xaan ñu tuhun ihya. Ta tandihí maa ñáyiví cha iyó yucu ityi Judea cuan nacatyí ñu chi tahan ñu tuhun ihya.

66 Ta tandihí maa ñáyiví cha chitó tuhun cuan, ndichí xiñi ñu, ta ndaca tuhun ñu chi tahan ñu:

—¿Yóó ra cuví cha lee cuan? —catyí ñu.

Vatyi ndicha, Nyoo nasoco xaan ra chi cue.

Nu sacahnú ra Zacarías chi Nyoo

67 Sutú cue, ra Zacarías, tyitú ra chihin Tatyí Ii Nyoo. Tyicuan ta quichahá cahan ra tuhun cha chahá Nyoo chi ra, ta catyí ra:

68 —Cahnu xaan ra cuví Sutú Mañi yo Nyoo cuenda yo ñu Israel.

Vatyi quichí ra nu nyicú yo, cha cuví yo ñáyiví chi ra.

Ta sacacu ra chi yo.

69 Ta chahá ra noo ra cahnu chi yo, cha cusacacu chi yo.

Tata ra David ra cha sacuví tyiño nuu Nyoo vachi ra.

70 Tyicuan caa cahan Nyoo chihin yuhu ra cacuví profeta cuenda ra ta cha naha.

71 Vatyi tyicuan caa cusacacu ra chi yo ndaha ra xaan iñi chi yo, ra cha tasi cuñí nyehé chi yo.

72 Tyicuan caa cundahvi cuñí nyehé ra chi ñáyiví chi yo ta cha naha.

Ta ma sanaa ra iñi ra tuhun cahan ra.

73 Ican ihya tuhun cahan Nyoo chihin ra Abraham sutu yo.

74 Catyí ra vatyí cusacacu ra chi yo ndaha ra xaan iñi chi yo.

Vatyí ma yuhvi ca yo sacahnu yo chi ra.

75 Ta maa ra sanducachi ra iyó yo nuu ra.

Ta vaha coo yo nuu ra tandihí quiví cha cuacoo yo ñáyiví —catyí ra Zacarías.

76 Ta catyí ra Zacarías chi cha lee cuan tyehe caa:

—Ta yoho sehi, profeta Nyoo cahnu cucatyí ñáyiví chuun.

Vatyí cuhun ityí nuu Sutu Mañi yo. ta cucahun tuhun ra chihin ñáyiví vatyí cha cuñí quichi ra.

77 Ta cusacoton chi ñáyiví vatyí cunasaha Nyoo tucahnu iñi cuatyí ñu.

Ta tyicuan caa ta cacu añañima ñu.

78 Vatyí Sutu yo Nyoo cuñí ra chi yo. Ta cundahví cuñí ra chi yo.

Ta saquichí ra noo ra tyinyeé chi yo. Tari noo ñuhú ñanyii cucuvi ra.

79 Vatyí chihin cha sañahá ra chi yo sacundichín ra nu nyicú yo nu ñaa iñi cha catyí cuatyí yo.

Ta cusañaha ra chi yo yoso caa quihví yo ityí vaha —catyí ra Zacarías.

80 Ta cha luhlu cuan cuahan chahnu ra. Nyee cuñí ra chihin Tatyí Ii Nyoo. Ta chicoo ra noo chiqui ndii nyacua nya quiví cha chicohon nuu ñáyiví Israel chi ra.

2

Quiví cacu ra Jesús (Mt. 1.18-25)

1 Ta quiví cuan iyó noo ra nyacá ñaha, nañí ra Augusto. Tachí ra tyiño natyaa ra siví tandihí ñáyiví nicahnu ñuhu ñáyiví.

2 Ta quiví cuan ra Cirenio cuví ra ra nyacá ñaha tandihí ñuu ityí Siria.

3 Ta tahán chi cuhun tandihí ñáyiví nya ñuu ñu. Vatyí cuhva ñu siví ñu yucuan.

4 Yucuan chaha quitá ra José ñuu Nazaret ityí Galilea. Ta chahan ra ityí Judea ñuu Belén nu cacu ra David. Yucuan chahan ra vatyí tata ra David vachi ra.

5 Ta chahan ra chi cuhva ra siví ra chihin cu María. Ta cha cuñí tandaha ña chihin ra. Ta ñohó sehe ña.

6 Ta chiquitahan chaa quiví cha cacu sehe ña cha ni ri ca cha ñohó ñu Belén cuan.

7 Ta yucuan cacu sehe nuu ña. Ta natyihí ña chi cue chichi sahma. Ta nandacun ña chi cue chichi noo nu chachí quití. Vatyí cuaha xaan ñáyiví cha coyo ñuu cuan. Ta ña nuña ca ni minoo vehe nu cunyaa ñu.

Nu cahán ángel chihin ra sahá cumi mbee

8 Yatyin ñuu Belén cuan nyicú suhva ra casahá cumi mbee sana ra cha cha cuaa cuan.

9 Ta sana iñi ra ta tuví noo ángel Nyoo. Ta cha ndichin Nyoo Sutu Mañi yo ndundichin nicachico ri nu canyicú ra. Ta nayuhví xaan ra.

10 Ta quichaha cahán ángel cuan, ta catyí ra tyehe caa:

—Ma yuhvi ndo. Vatyí cuacatyí mai noo tuhun chi ndo. Noo tuhun cha sii xaan cuacuvi chi tandihí ñáyiví.

11 Vatyí vityin cacu ra sacacú añañima ndo ñuu ra David. Noo ra cuví Cristo, ra cuví Sutu Mañi yo.

12 Ta ihya cuví seña chahi chi ndo, cunyehe ndo chi cha lee cuan, siqui noo cue sahma. Catuví cue chichi noo nu chachí quití —catyí ángel chi ra casahá cumi mbee cuan.

13 Ta caa cuhva ri cuan cha coyo cuaha xaan ca ángel casacahnú ra chi Nyoo, ta cacatyí ra:

14 Sacahnu yo chi Nyoo nu nyaá ra gloria.

Ta ñáyiví iyó siqui ñuhu ñáyiví cha ñihi tumañi iñi ra, na coo taxi añañima ñu, catyí angel cuan.

15 Yucuan ta cuanuhú coyo ángel cuan gloria. Tyicuan ta ra casahá cumi mbee quichaha catyí ra chi ra tahan ra:

—Coho ndo Belén. Cunyehe yo ñáa cha cuví. Vatyí maa Sutu yo Nyoo sacoto chi yo.

16 Tyicuan ta numi xaan cuahan coyo ra Belén. Ta nañihí ra chi cue

chihin cu María ta ra José. Ta catuvi cue noo nu chachí quiti.

¹⁷ Ta yaha cha canyehe ra chi cue, ta canacatyí ra chi ñu ñáá ndihí tuhun cahān ángel chihin ra cuenda cha lee cuan.

¹⁸ Ta tandihí ñu chiñi tuhun cahān ra, iyo xaan cuñí ñu.

¹⁹ Soco cu María ta cuhva chicá ri xiñi ña tuhun cuan.

²⁰ Ta ra sahá cumi chi mbee cuan cuanuhū coyo ra. Ta casacahnú ra chi Nyoo cha cuenda cha cachiñi ra ta canyehe ra. Vatyí chinō cava tandihí cha catyí ángel chi ra.

Nu cuacuhva cuenda ñu chi ra Jesús chi Nyoo vehe ñuhu cahnu

²¹ Ta nu cu uña quivi, saha ñu circuncidar chi cue, tari cuhva tuhva maa ñu. Ta sacunañi ñu chi cue, Jesús. Suri maa sivi cha catyí ángel chi cu María quivi cha cumañi ca cohon sehe ña.

²² Ta cha yaha quivi cha tahan chi vatyí ndundii ñu nuu Nyoo, tari cuhva catyí maa ley Nyoo cha tyaa ra Moisés, tyicuan ta cuahan ñu Jerusalén. Vatyí cuacuhva cuenda ñu chi cue chi Nyoo.

²³ Sacuvi ñu tyicuan caa vatyí in caa maa catyí ley tyehe caa: “Tandihí rayi cha cuví sehe nuu ñu, cucuhva cuenda ñu chi Nyoo”, catyí ley cuan.

²⁴ Ta chahan ñu chicuhva cuenda ñu uvi tahan quiti tari cuhva catyí maa ley Sutu yo Nyoo nu catyí chi tyehe caa: “Cuhva ndo uvi tahan cucu o uvi tahan ndicuiya”, catyí ley cuan.

²⁵ Ta quivi cuan iyó noo ra ñuu Jerusalén cha nañi Simeón. Ta cuví ra noo ra vaha, ra sacahnú chi Nyoo. Ta nyatú tuhva ra nya quivi cusacacu Nyoo chi ñáyivi Israel. Ta yihí ra Tatyí Ii Nyoo.

²⁶ Ta sacoto Tatyí Ii Nyoo chi ra vatyí ma cúvi ra cha ni ri ca cha ta nyehe ca ra chi ra sacacú chi ñu Israel, ra cuví Cristo, ra cha cusaquichi Sutu yo Nyoo.

²⁷ Ta ra cuan chahan ra vehe ñuhu cuhva catyí maa Tatyí Ii Nyoo chi ra. Cuhva cuan chahan tucu sutu ta

sihi cha lee cuan chinyaca ñu chi cue vehe ñuhu cahnu, vatyí sacuvi ñu tari cuhva catyí maa ley.

²⁸ Ta quehen ra Simeón chi ra Jesús. Ta tyihí sucun ndaha ra chi ra. Ta quichaha sacahnu ra chi Nyoo. Ta catyí ra:

²⁹ —Sutu Mañi yuhu. Na cúvi mai vityin chihin cha vaha.

Vatyí cha sacuvun cha catyūn chi yuhu cha cuví sehun.

³⁰ Vatyí cha nyehi chihin nui chi ra cusacacu chi ndi.

³¹ Vatyí sañahun chi ra nuu tandihí ñáyivi.

³² Cha catyí ra ta cucahnu ñáyivi Israel nuu inga ñáyivi.

Ta ican racuví ra cha sacundichín añima tandihí inga ñáyivi cha ñima ñu Israel cuví. Vatyí cusacuvi ra na cutuñi iñi ñu tuhun Nyoo —catyí ra Simeón.

³³ Ta ra José chihin sihi ra Jesús, iyo xaan cuñi ñu cha cahān ra Simeón tuhun cha lee cuan.

³⁴ Yucuan ta chican tahvi ra Simeón chi Nyoo chaha ñu. Ta catyí ra chi cu María sihi ra Jesús:

—Nyehe chi cha lee ihya. Vatyí cuaha xaan ñáyivi cuchino iñi ñu chi ra quivi coto ñu tuhun ra, ta cucacu añima ñu. Soco cuaha ñu ma chino iñi ñu chi ra, ta cunaa ñu. Ta cucahan ñu chi ra.

³⁵ Ta cha tyicuan caa cusanatuví ra cha caa añima noo noo ñáyivi. Soco cha cuenda yoho, María. tari cha uhvi cha yahá sava noo tyicua añima ñáyivi, tyicuan caa cha uhvi cun-yehún cha catyí cha lee ihya —catyí ra Simeón.

³⁶ Ta yucuan ñohó tucu noo ñaha cha cuví profeta Nyoo. Ta cha chahnu xaan ña. Nañi ña Ana. Ta sehe ra Fanuel noo ra vachi tata ra Aser cuví chi ña. Luhlu xaan ña ta tandaha ña, ta ucha ri cuiya chiyo ña chihin yi ña ta chihí ri ra.

³⁷ Ta cha cumi xico cumi cuiya chihí yi ña. Ta vehe ñuhu cahnu ña quitá ña, vatyí ndiyaca ta ñiyaca chicán tahvi ña chi Nyoo. Ta iyó

cuhva cha ña chachi ña cha ni ri ca cha chicán tahvi ña.

³⁸ Ta cuhva cha ñohó ra José ta cu María chihin cha lee, chaá ña nu canyicú ñu. Ta nacuhva ña tyahvi nyoo chi Nyoo. Ta quichaha cahan ña tuhun ra Jesús chihin tandihi ñáyivi cha nyatú tuhva cha quita ñuu Jerusalén chichi ndaha ra ñuu Roma.

Nu cuanuhu ñu nya Nazaret

³⁹ Cha yaha cha sacuvi ñu tandihi maa yoso caa catyí ley Sutu yo Nyoo, ta cuanuhu ñu nya Galilea nya ñuu ñu nu nañi Nazaret.

⁴⁰ Ta ra Jesús cuahan chahnu ca ra. Ta cuahan ndunye ca ra ta cuahan chicoo ca cha chiñi tuñi Nyoo. Vaty nasoco Nyoo chi ra.

Nu ñohó ra Jesús chichi vehe ñuhu

⁴¹ Ra José chihin sihi ra Jesús ndihi cuiya ri tuhva ñu chahán nya Jerusalén cha vico pascua.

⁴² Ta quivi ndihi ra Jesús uchi uvi cuiya, chahan tandihi ñu Jerusalén tari tuhva maa ñu chahán cha vico.

⁴³ Ta quivi ndihi vico ta cuandichi ñu, ta ra Jesús ndoo ra Jerusalén. Ta ña saha ñu cuenda.

⁴⁴ Cuñi maa ñu vaty cuandichi ra mahnu nu tuvi ñáyivi cuan. Yucuan chaha ñahri chicá iñi ñu chicá ityi ñu noo quivi. Tyicuan ta nanducu ñu chi ra chichi nu tuvi ñáyivi cuan,

⁴⁵ ta ña nañihi ñu chi ra. Tyicuan ta cuanuhu chata ñu cuananducu ñu chi ra nya Jerusalén.

⁴⁶ Cha yaha cha uñi quivi ta nañihi ñu chi ra chichi vehe ñuhu cahnu cuan. Nyaá ra chihin ra sacuahá cuenda ley vehe ñuhu. Ta tyasohó ra cuan tuhun cahán ra. Ta ndacá tuhun ra tuhun chi ra.

⁴⁷ Ta tandihi ñu chiñi tuhun cahán ra, iyo xaan cuñi ñu chihin cha chiñi tuñi ra, ta chihin tuhun cha nacahán ra.

⁴⁸ Cuhva cha nanyehé sutu ra ta sihi ra chi ra, iyo xaan cuñi ñu. Ta sihi ra catyí ña chi ra:

—Sehe luhli. ¿Ñáá tuhun cha sacuvun chi ndi tyehe caa? Sutun ta

yuhu chica xaan iñi ndi ta nanducu xaan ndi chuun —catyí ña.

⁴⁹ Tyicuan ta catyí ra Jesús:

—¿Ñáá tuhun cha nanducu ndo chii? ¿Atu ña chito ndo vaty niñi cuñi chi cha cahin tuhun Suti chihin ñáyivi? —catyí ra.

⁵⁰ Soco ña cutuñi iñi ñu tuhun cahan ra.

⁵¹ Tyicuan ta cuanuhu ra chihin ñu nya Nazaret. Ta quichahá ra tuhun cahán ñu. Ta sihi ra naquehen vaha ña tandihi tuhun ihya chichi aña ña.

⁵² Yucuan cuví nu cuacuahnu ca ra Jesús. Ta cuahan cha ca cha chiñi tuñi xiñi ra. Ta sii xaan cuví chi Nyoo chihin ra ta ñáyivi ñandihí.

3

Ra Juan, ra sacondutya, cahán ra tuhun Nyoo nuu ñáyivi

(Mt. 3.1-12; Mr. 1.1-8; Jn. 1.19-28)

¹ Nu ndihi chahun cuiya cha cuví ra Tiberio rey cahnu ñuu Roma, ta ityi Judea nyacá ñaha ra Poncio Pilato. Ta ra Herodes nyacá ñaha ra Galilea. Ta yañi ra, ra Felipe nyacá ñaha ra Iturea chihin Traconite. Ta ra Lisanas nyacá ñaha ra Abilinia quivi cuan.

² Ta ra Anás chihin ra Caifás, ican ra cuví ra ra cacuvi nuu chi tandihi tata sutu. Ta quivi cuan cahán Nyoo chihin ra Juan sehe ra Zacarías noo nu chiqui ndii.

³ Ta ra Juan chicá noo ra tandihi ñuu cha nyaá yatyin ri nu nyaá noo yuvi cahnu cha nañi Jordán cahán ra tuhun Nyoo chihin ñáyivi. Ta catyí ra chi ñu na ndu uvi iñi ñu cuatyí ñu ta na condutya ñu. Tyicuan caa ta Nyoo saha ra tucahnu iñi chi ñu, catyí ra.

⁴ Tyehe caa cuvi tari cuhva catyí nu libru cha tyaa ra Isaías profeta Nyoo ta cha naha. Ta catyí ra:

Chiñi yo cha caná chaa noo ra noo nu chiqui ndii, ta catyí ra:

“Tari sanduvahá ndo noo ityi, tyicuan caa sanduvaha ndo aña ndo vaty cuaquichi Sutu Mañi yo.

Nuña ndo noo ityi ndoo chi ra na quihvi ra aña ndo.

5 Tari cha sanandutú ndo noo ticoho, ta tari sandundaá ndo noo yucu cahnu,

ta tari sandundoó ndo cha yacua, ta tari sanduvií ndo nu quiñi caa, tyicuan caa ñasama ndo cuhva iyó ndo.

6 Tyicuan caa ta tandihi ñáyivi ta nyehe ñu vatyí Nyoo chaha ra cha cacú añima ñu.”

7 Ta tyicuan caa cahán ra Juan chihin ñáyivi. Yucuan ta cuhva cha chiñi ñu tuhun cahán ra, ta catyí ñu chi ra vatyí na sacondutya ra chi ñu. Yucuan ta quichaha catyí ra chi ñu:

—¡Nyoho tari noo tata coo xaan cuví ndo! ¿Yóo cha sañaha chi ndo vatyí chihin cha condutya ri ndo ta ma tachi tuñi ca Nyoo chi ndo?

8 Ñasama ndo cuhva iyó ndo, na nyehe ñáyivi vatyí cha ndu uvi iñi ndo cuatyí ndo. Ta ma catyí ndo vatyí tata ra Abraham vachi ndo. Vatyí nyacua nya noo yuu ihya, Nyoo cuví sananduvi ra noo ñáyivi chi ra Abraham.

9 Tari yutun cha ña chahá chiti, tyicuan caa cuví ndo. Vatyí ña sacuvi ndo tari cuhva cuñi Nyoo. Ta yutun cha ña chaha chiti, cahnya ñáyivi chi tun. Ta cahmi ñu chi tun. Tyicuan caa tucu nyoho cha cuñi cuiri cuhun ndo nu cayu ñuhu —catyí ra Juan.

10 Yucuan ta quichaha ndaca tuhun ñáyivi chi ra:

—¿Yoso caa sacuvi ndi, cuñi yoho? —catyí ñu.

11 Ta nacahan ra Juan, ta catyí ra:

—Yóo ra cha iyó uvi tahan camisa, tahán chi cuhva ra noo chi ra cha ñahri chi. Ta yóo ñu cha iyó cha cachi, tahán chi cuhva ñu cha cachi ñu ñahri chi —catyí ra.

12 Ta chaḡ coyo tucu suhva ra catavá xuhun cuenda gobiernu Roma, ta cuñi ra condutya ra. Ta candaca tuhun ra chi ra Juan:

—Maestro, ¿yoso caa sacuvi tucu nyuhu? —catyí ra.

13 Ta catyí ra Juan chi ra:

—Tari cuhva catyí ley tava ndo xuhun. Ta ma tava ndo cuaha ca.

14 Yucuan ta quichaha candaca tuhun tucu suhva sindaro chi ra, ta catyí ra:

—Ta nyuhu tucu, ¿yoso caa sacuvi ndi? —catyí ra.

Ta nacahan ra Juan ta catyí ra:

—Ma tinyaa ca ndo cha chii ñáyivi. Ta ma tyanaha ndo chi ñu. Ma tyaa ndo cuatyí siqui ñu tatu ñahri cuatyí ñu. Ta ndoḡ ndo vaha yoso cuhva yahvi ndo —catyí ra Juan.

15 Iyo cuñi ñáyivi tuhun cahán ra Juan. Ta cuñi ñu tyi ican ra cuví Cristo, ra cha sacacú chi yo.

16 Soco ra Juan catyí ra chi tandihi ñu:

—Cha ndicha vatyí sacondutyé chi ndo chihin ndutya. Soco cha yaha yuhu cuhin cuquichi inga ra cusacondutya chi ndo chihin Tatyí Ii Nyoo ta chihin ñuhu. Iyó ca tunyee iñi chi maa ra, ta ñima ca yuhu. Vatyí ña nañé cha cuví musu ra ta ñiri cha ndachi ñi xityin ndichan ra.

17 Tari noo ra cha cuanaquehen vaha ñiñi, ta natyihí vaha ra chichi yaca. Ta cahmi ra mihin. Tyicuan caa cuví maa Sutu Mañi yo chihin yo. Tatu chinó iñi yo chi ra, cunaquehen vaha ra chi yo, ta cunyicu yo chihin ra. Soco tatu ña chinó iñi yo chi ra cutyihí ra chi yo anyaya nu cayu ñuhu cha ma ndahva ca maa —catyí ra Juan.

18 Ta tyehe caa cahan ra Juan chihin ñu. Ta cuaha xaan ca tuhun cahan ra nuu ñu tyi cuaquichi Sehe Nyoo ta cua sacacu ra chi yo.

19 Ta cahán ra Juan chi ra Herodes cha cuenda tandihi cuíi cha ña vaha nyacuví ra. Vatyí naquehen ra chi cu Herodías, ñasihí ra Felipe yañi ra. Ta cuaha ca cha ña vaha nyacuví ra.

20 Soco ra Herodes tahán chi cha tyasohḡ ra tuhun ihya soco ña cuñi ra. Nu ndihi tuhun tyihí ndihi ra chi ra Juan vehe caa.

Quivi cua condutya ra Jesucristo (Mt. 3.13-17; Mr. 1.9-11)

21 Cumañi ca cha cohon ra Juan vehe caa sacondutya ra chi tandihi ñáyivi. Ta sacondutya tucu ra chi ra

Jesús. Ta cha ni ri ca cha chicán tahvi ra Jesús chi Nyoo ta nuña andivi.

²² Ta nyehe ra Tatyí li Nyoo quichi síqui ra tari noo paloma. Ta tyacu noo ndusu andivi cha catyí tyehe caa:

—Yoho cuvún Sehi cha cuñí. Ta sîi xaan cuñí chuhun —catyí ndusu cuan.

*Ñáyivi vachi ra Jesucristo tata
(Mt. 1.1-17)*

²³ Oco uchi cuiya ra Jesús ta quichaha saha tyiño ra tyiño Nyoo. Ta tandihî ñáyivi cuñí maa ñu vatyi sehe ra José cuví chi ra. Ta ra José, sehe ra Elí cuví chi ra.

²⁴ Ta ra Elí, sehe ra Matat cuví chi ra. Ta ra Matat, sehe ra Leví cuví chi ra. Ta ra Leví, sehe ra Melqui cuví chi ra. Ta ra Melqui, sehe ra Jana cuví chi ra. Ta ra Jana, sehe ra José cuví chi ra.

²⁵ Ta ra José, sehe ra Matatías cuví chi ra. Ta ra Matatías, sehe ra Amós cuví chi ra. Ta ra Amós sehe ra Nahum cuví chi ra. Ta ra Nahum, sehe ra Esli cuví chi ra. Ta ra Esli, sehe ra Nagai cuví chi ra.

²⁶ Ta ra Nagai, sehe ra Maat cuví chi ra. Ta ra Maat, sehe ra Matatías cuví chi ra. Ta ra Matatías sehe ra Semei cuví chi ra. Ta ra Semei, sehe ra José cuví chi ra. Ta ra José, sehe ra Judá cuví chi ra.

²⁷ Ta ra Judá, sehe ra Joana cuví chi ra. Ta ra Joana sehe ra Resa cuví chi ra. Ta ra Resa, sehe ra Zorobabel cuví chi ra. Ta ra Zorobabel, sehe ra Salatiel cuví chi ra. Ta ra Salatiel, sehe ra Neri cuví chi ra.

²⁸ Ta ra Neri, sehe ra Melqui cuví chi ra. Ta ra Melqui, sehe ra Adi cuví chi ra. Ta ra Adi, sehe ra Cosam cuví chi ra. Ta ra Cosam, sehe ra Elmodam cuví chi ra. Ta ra Elmodam, sehe ra Er cuví chi ra.

²⁹ Ta ra Er, sehe ra Josué, cuví chi ra. Ta ra Josué, sehe ra Eliezer cuví chi ra. Ta ra Eliezer, sehe ra Jorim cuví chi ra. Ta ra Jorim, sehe ra Matat cuví chi ra.

³⁰ Ta ra Matat, sehe ra Leví cuví chi ra. Ta ra Leví, sehe ra Simeón cuví chi ra. Ta ra Simeón, sehe ra Judá cuví chi ra. Ta ra Judá, sehe ra José cuví chi ra.

Ta ra José sehe ra Jonán cuví chi ra. Ta ra Jonán, sehe ra Eliaquim cuví chi ra.

³¹ Ta ra Eliaquim, sehe ra Melea, cuví chi ra. Ta ra Melea, sehe ra Mainán cuví chi ra. Ta ra Mainán, sehe ra Matata cuví chi ra. Ta ra Matata, sehe ra Natán cuví chi ra.

³² Ta ra Natán, sehe ra David, cuví chi ra. Ta ra David, sehe ra Isaí cuví chi ra. Ta ra Isaí, sehe ra Obed cuví chi ra. Ta ra Obed, sehe ra Booz cuví chi ra. Ta ra Booz, sehe ra Salmón cuví chi ra. Ta ra Salmón, sehe ra Naasón cuví chi ra.

³³ Ta ra Naasón, sehe ra Aminadab cuví chi ra. Ta ra Aminadab, sehe ra Aram cuví chi ra. Ta ra Aram, sehe ra Esrom cuví chi ra. Ta ra Esrom, sehe ra Fares cuví chi ra. Ta ra Fares, sehe ra Judá cuví chi ra.

³⁴ Ta ra Judá, sehe ra Jacob cuví chi ra. Ta ra Jacob, sehe ra Isaac cuví chi ra. Ta ra Isaac, sehe ra Abraham cuví chi ra. Ta ra Abraham sehe ra Taré cuví chi ra. Ta ra Taré, sehe ra Nacor cuví chi ra.

³⁵ Ta ra Nacor, sehe ra Serug cuví chi ra. Ta ra Serug, sehe ra Ragau cuví chi ra. Ta ra Ragau, sehe ra Peleg cuví chi ra. Ta ra Peleg, sehe ra Heber cuví chi ra. Ta ra Heber, sehe ra Sala cuví chi ra.

³⁶ Ta ra Sala, sehe ra Cainán cuví chi ra. Ta ra Cainán, sehe ra Arfaxad cuví chi ra. Ta ra Arfaxad, sehe ra Sem cuví chi ra. Ta ra Sem, sehe ra Noé cuví chi ra. Ta ra Noé, sehe ra Lamec cuví chi ra.

³⁷ Ta ra Lamec, sehe ra Matusalén cuví chi ra. Ta ra Matusalén sehe ra Enoc cuví chi ra. Ta ra Enoc, sehe ra Jared cuví chi ra. Ta ra Jared, sehe ra Mahalaleel cuví chi ra. Ta ra Mahalaleel, sehe ra Cainán cuví chi ra.

³⁸ Ta ra Cainán, sehe ra Enós cuví chi ra. Ta ra Enós, sehe ra Set cuví chi ra. Ta ra Set, sehe ra Adán cuví chi ra. Ta ra Adán, sehe Nyoo cuví chi ra.

4

*Nu nducú nyehe cuihna chi ra Jesús
(Mt. 4.1-11; Mr. 1.12-13)*

¹ Ta chitú ra Jesús chihin Tatyí li Nyoo cha yaha condutya ra. Yucuan

ta quitā ra nu cuvī yuvi cahnu Jordán ta cuanuhu ra. Ta Tatyí li Nyoo chinyaca chi ra noo nu chiqui ndii.

² Yucuan chinyaa ra uvi xico quivi. Ta nducú nyehe cuihna chi ra. Ña chachi maa ra quivi cuan. Yahā cuan ta quichaha chisoco ra.

³ Yucuan ta quichaha catyí cuihna chi ra:

—Tatu ndicha cha Sehe Nyoo cuvī chuun, catyí chi yuu cha catuví ihya, na nanduví pan.

⁴ Ta ra Jesús nacahan ra, ta catyí ra:

—Catyí tuhun Nyoo tyi ñima chihin cha cachi ri ñáyivi ta conyito ñu. Soco conyitó tucu añima ñu chihin tandihí tuhun cahán Nyoo —catyí ra Jesús chi cuihna.

⁵ Yucuan ta quehen cuihna chi ra Jesús. Ta cuahan ra chihin ra noo nu sucun ca. Ta numi ri sañahā ra tandihí nu nyacá ñaha ñáyivi siqui ñuhu ñáyivi.

⁶ Ta cuihna catyí ra chi ra Jesús:

—Ndaha yuhu nyaá tandihí ñáyivi ihya. Vatyí chahā Nyoo cha cunyaca ñahi tandihí ihya siqui ñuhu ñáyivi. Ta cuvī kuhve yóo chi cuñí mai kuhve.

⁷ Kuhve tandihí ñáyivi cuan chuun tatu yoho ta cuiñi chitun nui, ta sacahnun chii —catyí cuihna cuan chi ra Jesús.

⁸ Soco ra Jesús catyí ra chi cuihna:

—Canyaha chuun nui, cuihna. Vatyí nyaá tuhun cahán Nyoo ta catyí chi tyehe caa: “Noo ri chí maa Nyoo sacahnu yo. Ta ñin ri chí maa ra quichaha yo.”

⁹ Yahā cuan ta quehen tucu cuihna cuan chi ra Jesús. Ta chinyaca ra chi ra nya ñuu Jerusalén. Ta sandaa ra chi ra xiñi vehe ñuhu cahnu. Ta quichaha catyí ra chi ra Jesús:

—Tatu ndicha cha Sehe Nyoo cuvī chuun, sandupehla nyacua nya nu ñuhú.

¹⁰ Vatyí nyaá nu catyí chi nu tutu Nyoo tyehe caa:

Nyoo cusaquichi ra ángel, quichi saha cuenda chuun.

¹¹ Cunaquehen ra chuun chihin ndaha ra. Ta ma kuhva ra

cha taxin chahun chihin yuu —catyí ra chi ra.

¹² Tyicuan ta nacahan ra Jesús, ta catyí ra:

—Soco catyí tucu nu tutu Nyoo tyehe caa: “Ma nducu nyehun chi Sutu Mañi yo Nyoo”, —catyí ra.

¹³ Ta cuihna ña cuvī sandahvi ñaha ra chi ra Jesús. Ta cuahan ra suhva quivi.

Nu quichaha ra Jesús cahan ra tuhun Nyoo chihin ñáyivi

(Mt. 4.12-17; Mr. 1.14-15)

¹⁴ Cha yahā tuhun cuan, ta nachaa ra ityi Galilea. Ta tyitú ra yihí chihin tunyee iñi Tatyí li Nyoo. Ta cahán ñáyivi tuhun ra tandihí ri ityi.

¹⁵ Ta sañahá ra chi ñáyivi nu cuvī vehe ñuhu tandihí ri ñuu. Ta tandihí ñu sacahnú ñu chi ra.

Nu nyaá ra Jesús Nazaret ñuu nu chahnu ra

(Mt. 13.53-58; Mr. 6.1-6)

¹⁶ Tyicuan ta nachaa ra Jesús nya Nazaret, ñuu nu chahnu ra. Ta noo quivi nyitatú ñáyivi, ta quihvi ra chichi vehe ñuhu, tari tuhva maa ra. Ta chicunanyaa ra vatyí cua sacuaha ra tuhun Nyoo.

¹⁷ Ta chahā ñu noo libru Nyoo chi ra cha tyaā ra Isaías ra profeta Nyoo ta cha naha. Ta kuhva cha nuñā ra, nañihí ra noo nu catyí tyehe caa. Ta quichaha sacuaha ra:

¹⁸ Nyaá Tatyí li Nyoo chihin vatyí maa ra tachí chii.

Vatyí nacachi ra chii vatyí sañahi tuhun vaha ra chí tandihí ñáyivi ndahvi.

Tachi ra chii vatyí sanduvahi chí ñu uhvi añima.

Tachi ra chii vatyí sacote tuhun ra chí ñu nyaá ndaha ra ña vaha, vatyí cusacacu Nyoo chí ñu.

Tachi ra chii vatyí sanyehi chí ñáyivi cuaa.

Ta sacote chí ñu nyehe tindoho vatyí cucacu ñu.

¹⁹ Ta sacote chí ñu vatyí cha chaā quivi cha chahā Nyoo tumañi iñi chí ñu.

²⁰ Ndihi sacuaha ra ta nacasi ra nu libru cuan. Ta nacuhva ra chí noo ra

cha nyaá vehe ñuhu cuan. Ta chicun-yaḡ ra. Yucuan ta tandihí ñáyiví cha nyicú cuan ndoo ñu nyehe ñu chi ra.

²¹ Yucuan ta quichaha catyí ra chi ñu:

—Vityin quiví ihya chinq cava tuhun cha nyaá nu libru cha sacuahí nuu ndo —catyí ra Jesús chi ñu.

²² Tandihí ñu, vaha cahán ñu tuhun ra Jesús. Ta iyo cuñí ñu tuhun cha cahán ra vatyi vaha xaan cha cahán ra. Ta quichaha ndaca tuhun ñu chi tahan ñu:

—¿Atu ñima ra ihya cuví sehe ra José?

²³ Ta quichaha catyí ra Jesús chi ñu:

—Chité cha nacacá iñi ndo. Vatyi tyehe caa cua catyi ndo chii: “Tatu ra sanduvahá cuvún, sanduvaha xihna ca chi maun. Tandihí cha chiñi ndi cha sacuvun ñuu Capernaum. Sacuvi tucu ñuu maun vityin.”

²⁴ Ta catyi tucu ra Jesús:

—Cha ndicha vatyi ni noo ra profeta Nyoo, ta ña quichaha ñáyiví ñuu ra chi ra.

²⁵ Ta cha ndicha catyí chi ndo vatyi cuaha xaan ñu chihí yí chiyo Israel ihya cuiya cha chicá noo ra Elías. Ta cuiya cuan ña coon savi uñi cuiya sisava. Ta cuaha xaan tama chiyo.

²⁶ Soco ña tachí Nyoo chi ra Elías vatyi tyinyee ra chi ni noo ñu chihí yí Israel cuan. Soco tachí Nyoo chi ra nu nyaá noo ñaha chihí yí ñuu Sarepta cha nyaá yatyin ñuu Sidón.

²⁷ Ta tyicuan caa tucu cuaha ra yihí cuehe cha tyahyu coño chi chiyo Israel quiví chicá noo ra Eliseo, profeta Nyoo. Soco ña nduvahá ni noo ra Israel cuiya cuan. Mino ri ra Naamán ra ñuu Siria nduvahá —catyí ra Jesús.

²⁸ Ta cha chiñi ñáyiví nyicú vehe ñuhu cuan tuhun cuan, cuxaan xaan tandihí cuí ñu.

²⁹ Ta nducuita ñu. Ta tñn ñu chi ra Jesús. Tava ñu chi ra xiñi noo yucu nya yuhu ñuu, vatyi tuchi ñu chi ra yucuan.

³⁰ Soco ra Jesús yahá ri ra mahñu ñu ta cuahan ra.

Noo ra cha yihí tatyí ña vaha chi
(Mr. 1.21-28)

³¹ Ta cuahan ra Jesús Capernaum cha nya Galilea quiví nyitatú ñáyiví. Ta quichaha sañaha ra chi ñáyiví.

³² Ta iyo cuñí ñu tuhun cahán ra. Vatyi ñihi cahán ra tari noo ra iyó vaha ityi chi cha cahán.

³³ Ta chichi vehe ñuhu cuan nyaá noo ra cha yihí tatyí ña vaha chi. Ta quichaha canachaa ra, ta catyí ra:

³⁴ —Saña chi ndi, yoho Jesús ra ñuu Nazaret. ¿Ñáá tuhun cha tyihun chuun chihin ndi? ¿Atu vachi sanaun chi ndi? Yuhu, ñohó nui chuun. Ta chité vatyi Sehe Nyoo cuví chuun —catyí tatyí ña vaha cuan sacahan chi chi ra cuan.

³⁵ Ta cahan ra Jesús chihin tatyí ña vaha cuan, ta catyí ra:

—Taxi ri. Saña chi ra ndahvi chiña —catyí ra.

Tyicuan ta tatyí ña vaha cuan sanduvá chi ra cuan nu ñuhú. Ta quita tatyí cuan chi ra ta cuahan. Ta ñahri ca sacuvi chi chi ra ndahvi cuan.

³⁶ Tandihí ñáyiví nayuhví ñu. Ta quichaha catyí ñu chi tahan ñu:

—¿Ñáá túhun cuví ihya? Ra Jesús ihya chihin cha iyó ityi chi ra ta chihin tunyee iñi ta tachí ra chi tatyí ña vaha cuan na quita. Ta quichaha chi nu cahán ra —catyí ñu.

³⁷ Ta tandihí ri ityi cahán ñáyiví tuhun ra Jesús.

Nu sanduvahá ra Jesús chi maha tyiso ra Simón Pedro

(Mt. 8.14-15; Mr. 1.29-31)

³⁸ Ta quita ra Jesús chichi vehe ñuhu cuan. Ta chaá ra vehe ra Simón. Ta tyiso ra Simón cuhví ña chihin cahñi. Ta quichaha cahán ñu chihin ra Jesús cha cuenda ña.

³⁹ Ta nanyehe noo ra nu catuví ña. Ta quichaha catyí ra chi cahñi cuan vatyi na quita. Ta caa cuhva ri cuan ta quita cahñi cuan chi ña. Ta nducuita ri ña. Ta quichaha tyiñuhu ña chi ra.

Cuaha xaan ñu cuhví sanduvahá ra Jesús

(Mt. 8.16-17; Mr. 1.32-34)

⁴⁰ Ta cuhva cha quee ñanyii, tandihi maa ñu cha cumí chi ñu cuhvi tandihi nuu cuehe, chinyaca ñu chi ra Jesús. Ta tyiso ra ndaha ra siqui noo noo ñu. Ta tyicuan caa ta sanduvaha ra chi ñu.

⁴¹ Ta chichi cha tandihi ñu yihí ñu cha yihí tatyí ña vaha chi, ta quita chi. Ta suri cana chaa chi cuahan coyo chi, ta catyí chi:

—Yoho Sehe Nyoo cuví chuun —catyí chi.

Soco ña chaha ca ra Jesús cha cahan chi. Vatyí chitó chi vatyí ra Cristo, ra cha saquichi Nyoo cuví ra.

Nu cahán ra Jesús tuhun Nyoo nuu tandihi cuii ñáyivi ñuu cha iyó Galilea (Mr. 1.35-39)

⁴² Cundichin cuan ta quita ra Jesús ñuu cuan. Ta cuahan ra noo nu taxi ri iyó. Soco ñáyivi nanducu ñu chi ra. Ta chaa ñu nya nu ñohó ra. Ta ña cuñí ñu cha cuhun ra.

⁴³ Soco catyí ra Jesús chi ñu:

—Cumañi sacote chi ñáyivi inga ñuu tuhun vaha yoso caa nyacá ñaha Nyoo ánima ñu. Vatyí yucuan chaha vachi siqui ñuhu ñáyivi.

⁴⁴ Ta tyicuan caa chicá noo ra Jesús cahán ra tuhun Nyoo vehe ñuhu ityi Galilea.

5

Nu chaha ra Jesús noo nyatu cha ñihi ra cuaha xaan tiyaca (Mt. 4.18-22; Mr. 1.16-20)

¹ Noo quivi nyaá ra Jesús yuhu miñi nu cuví Genesaret. Ta chaa coyo cuaha xaan ñáyivi, vatyí cuñí ñu cuiñi ñu tuhun Nyoo. Ta tihin xaan ñohó ra Jesús mahñu ñu.

² Ta nanyehé ra uvi tahan canoa yatyin ri yuhu miñi cuan. Yori ñohó chichi. Vatyí cha quita coyo ra catín tiyaca cuan. Ta cha quichaha canacatyí ra yuhva ra.

³ Yucuan ta quihvi ra Jesús chichi noo canoa cuan. Ta canoa cuan chi ra Simón cuví. Ta catyí ra chi ra vatyí na tyandaha ra suhva ca cuhun nya

mahñu ca cuan. Tyicuan ta chicun-yaá ra Jesús chichi canoa cuan. Ta quichaha sañaha ra chi ñáyivi.

⁴ Cuhva cha ndihi cahan ra, catyí ra chi ra Simón:

—Sacuhun canoa nya nu cama ca ndutya cuan. Ta tuchi ndo yuhva vatyí tñn ndo tiyaca —catyí ra Jesús chi ra.

⁵ Ta nacahan ra Simón ta catyí ra:

—Maestro, cha saha tyiño xaan ndi ñiyaca maa ta ni noo tiyaca ña ñihí ndi. Soco tatu maun catyí, cuatuchi tucu ndi yuhva —catyí ra Simón.

⁶ Cuhva cha cacañi ra yuhva cuan, cuaha xaan tiyaca ñihí ra. Ta nyacua tahnya yuhva ra chihin cha vee ti.

⁷ Tyicuan ta cachaha ra seña chi ra tahan ra, ra cha canyicú chichi inga canoa cuan, na quichi coyo ra ta tyinyee ra chi ra. Yucuan ta chaa coyo ra cuan. Ta casacutu ra ninduvi canoa cuan chihin tiyaca. Ta nyacua cuñí nyee canoa cuan cha tyitu yihí tiyaca.

⁸ Cha nanyehé ra Simón Pedro cha tyicuan caa, ta chicuiñi chiti ra nuu ra Jesús. Ta catyí ra chi ra:

—Cuachiyo chuun nui, Sutu Mañi yuhu, vatyí yuhu ra iyó cuatyí cuví —catyí ra.

⁹ Vatyí ra Simón iyo xaan cuñi ra chihin tandihi ra canyicu chihin ra. Vatyí cuaha xaan tiyaca catñn ra.

¹⁰ Tyicuan caa tucu ra tahan ra Simón: ra Jacobo chihin ra Juan, sehe ra Zebedeo, iyo xaan cacuñi ra. Ta catyí ra Jesús chi ra Simón:

—Ma iyo xaan cuñun. Vatyí vityin ta nu cuahan ca chi quivi, ma tñn con tiyaca. Soco cunducun ñáyivi, tavon chi ñu nu quiñi caa na quihvi ñu cuenda Nyoo —catyí ra Jesús chi ra Simón.

¹¹ Yucuan ta casacunuahu ra canoa nya ñuhu ityi. Ta casandoo ra tandihi cha iyó chi ra nyacua nya tiyaca cha tñn ra. Ta cuahan ra chihin ra Jesús.

Nu sanduvaha ra Jesús chi noo ra tyahyu coño (Mt. 8.1-4; Mr. 1.40-45)

12 Noo quivi ñohó ra Jesús noo ñuu nu iyo noo ra cuhví. Ta tyahyu xaan coño ra. Ta cha nanyehe ra chi ra Jesús, ta chicuñi chiti ra nuu ra. Ta nacañinoo ra xiñi ra nya nu ñuhu. Ta chacu ndahvi ra nuu ra, ta catyí ra:

—Sutu Mañi yuhu, tu yoho ta cuñún, cuví sanduvahun chii —catyí ra.

13 Tyicuan ta tyiso ra Jesús ndaha ra siqui ra. Ta catyí ra:

—Cuñí sanduvahi chuun. Ta na nduvahun vityin ri —catyí ra Jesús chi ra.

Ta caa cuhva ri cuan ta nduvaha ra cuan.

14 Tyicuan ta catyí ra Jesús chi ra:

—Ma nacatyun chi ñáyivi. Noo ri catyí chuun, cuahan nu nyaá tata sutu. Ta sañahun chuun chi ra. Ta cuhva cuendon cha tahán chi cuhvon tari cuhva catyí nu ley ra Moisés tacuhva coto ñáyivi vatyí nduvahun —catyí ra Jesús chi ra.

15 Vasi ña cuñí ra cha coto ñáyivi, soco cuaha ca ñáyivi ñihi ñu tuhun ra. Ta cuaha xaan ñáyivi ndu in ri ñu, vatyí cuñí ñu cuiñi ñu tuhun cahán ra. Ta cuñí xaan ñu nduvaha ñu.

16 Soco ra Jesús, canyaha canyaha ri ra nu iyó ñáyivi. Ta cuahan ra noo nu yori ñáyivi iyó. Ta yucuan chican tahvi ra chi Nyoo.

Nu sanduvaha ra Jesús chi noo ra cuhví cha ña cuví nacanda

(Mt. 9.1-8; Mr. 2.1-12)

17 Noo quivi sañahá ra Jesús chi ñáyivi. Ta chicunyicú suhva ra fariseo, ra quichahá xaan ley vehe ñuhu cha tyaa ra Moisés ta cha naha. Ta nyicú tucu suhva ra sacuahá cuenda ley vehe ñuhu cuan. Quichi coyo ra ñuu cha iyó Galilea, ta ñuu Jerusalén, ta tandihi ca ñuu cha iyó Judea. Ta iyó xaan tunyee iñi Nyoo chi ra Jesús, tacuhva vatyí sanduvaha ra chi ñu cuhví.

18 Yucuan ta chaá coyo ra canyisó chihin noo chito chi noo ra ña cuví nacanda. Ta cuñí ra quihvi ra chichi vehe ta cacun ra chi ra nuu ra Jesús.

19 Soco ña cuví quihvi ra vatyí tuvi xaan ñáyivi. Tyicuan ta candaá ra ityi

xiñi vehe. Ta sacuahiyó ra suhva tyiyo. Tyicuan ta sanoó ra chi ra cuhví cuan maa maa nuu ra Jesús mahñu nu tuvi ñáyivi cuan.

20 Yucuan cuví nu nyehe ra Jesús vatyí cachinó xaan iñi ra chi ra. Ta quichaha catyí ra chi ra cuan:

—Xaa, cha chicoó ticahnu iñi tandihi cuatyun —catyí ra Jesús.

21 Tyicuan ta ra casacuahá cuenda ley vehe ñuhu chihin ra fariseo quichaha nacuaan iñi ra: “¿Yóó ra cuví ra ihya? Vatyí cuñí maa ra vatyí cuví saha ra ticahnu iñi cuatyí yo. Noo ri maa Nyoo cuví saha ra ticahnu iñi cuatyí yo”, ndichi xiñi ra.

22 Soco ra Jesús chitó ra tuhun chicá xiñi ra. Ta quichaha catyí ra chi ra:

—¿Ñáá tuhun chicá xiñi ndo tyehe caa?

23-24 ¿Ñáá cha yí ca catyí yo? ¿Atu yí ca catyí yo: “Cuatyun cha yaha ndachi”, o yí ca catyí yo chi noo ñáyivi: “Ndicuita ta cacon”? Soco vityin cua sañahi chi ndo vatyí iyó ityi chii cha sahi ticahnu iñi cuatyí. Vatyí yuhu Rayí cha quichi nya gloria cuví. Ta vityin cua sanduvahi chi ra ña cuví caca ihya —catyí ra Jesús.

Tyicuan ta quichaha catyí ra chi ra cha catuví cuan:

—Catyí chuun, ndicuita. Naquehen chiton ta cuanuhu nya vehun.

25 Ta caa cuhva ri cuan nducuita ra cha cuhvi cuan, ta naquehen ra chito ra. Ta cuanuhu ra vehe ra, suri sacahnú ra chi Nyoo.

26 Tandihi ñáyivi iyo xaan cuñí ñu. Ta yuhví xaan ñu. Ta sacahnú ñu chi Nyoo, ta catyí ñu:

—Vityin ndicha nyehé yo minoo tuhun cha iyo caa —catyí ñu.

Nu cana ra Jesús chi ra Leví

(Mt. 9.9-13; Mr. 2.13-17)

27 Yaha cuan ta quita ra Jesús vehe cuan. Ta nanyehe ra chi noo ra cha tavá xuhun cuenda gobiernu ñuu Roma. Ta nañí ra Leví. Ta nyaá ra nu tyiyahví ñáyivi. Ta catyí ra Jesús chi ra:

—Coho chihin —catyí ra.

²⁸ Tyicuan ta nducuita ra Leví. Ta sandoo ra tandihi cha iyó chi ra. Ta cuahan ra chata ra Jesús.

²⁹ Tyicuan ta savaha ra Leví noo vico cahnu vehe ra cuenda ra Jesús. Ta cuaha vavaha ra catavá xuhun cuenda gobiernu ñuu Roma canyicú ra mesa. Ta canyicú tucu inga ñáyivi.

³⁰ Soco ra fariseo chihin ra sacuahá ley vehe ñuhu quichaha cahan nyaa ra chi ra cachicá noo chihin ra Jesús ta catyí ra:

—¿Ñáá tuhun chachí ndo ta chihí ndo chihin ra catavá xuhun ta chihin ra cahnu cuatyí? —catyí ra.

³¹ Ta ra Jesús nacahan ra, ta catyí ra:

—Ña chiñuhú doctor chi ra iyó vaha. Chi ra cuhví, yucuan ra chiñuhú doctor chi.

³² Yuhu ña vachi tyinyei chi ñu vaha sahá chi, soco vachi tyinyei chi ñu chitó vatyí iyó cuatyí, vatyí tacuhva nasama ñu cuhva iyó ñu —catyí ra Jesús chi ra.

Nu sañahá ra Jesús vatyí cha yaha canyaha ra chí ñu nyicón chí ra, cusavaha ñu ayuno

(Mt. 9.14-15; Mr. 2.18-20)

³³ Tyicuan ta quichaha candaca tuhun ra chi ra Jesús, ta catyí ra:

—Ra canyicón chi ra Juan savahá ra ayuno, ña cachachí ra ta nanducú ra chi Nyoo, ta tyicuan caa tucu ra fariseo. Soco ra cachicá noo chihin yoho, ndi quivi maa chachi ra ta chihí ra. ¿Ñáá tuhun? —catyí ra.

³⁴ Ta nacahan ra Jesús, ta catyí ra:

—¿Atu cuví cha ma cuhva ndo cachi ñu canyicu vico tandaha tatu nyaá ra cha cua tandaha chihin ñu? Ma cuví. Vatyí sii cuñí ñu, ta cuñí ñu cachi ñu.

³⁵ Soco cuchaa quivi cuachiyo ra tandaha cuan nu nyicú ñu. Yucuan ndicha quivi, ta cusaha ñu ayunar.

Nu sañahá ra Jesús vatyí ña nacachi tahan tuhun chahnu cha iyó ñáyivi chihin tuhun chaa cha sañahá ra

(Mt. 9.16-17; Mr. 2.21-22)

³⁶ Tyicuan ta cahan ra Jesús noo cuhva chihin ñu, ta catyí ra:

—Yori cahnya noo sahma chaa, ta chihin cuan naquicu ñu noo sahma chahnu. Vatyí tatu sacuvi ñu tyicuan caa, cundiýi sahma chaa cuan. Ta siin ri ma cuhva chi chihin sahma chahnu cuan.

³⁷ Ta tyicuan caa tucu ma cuví tyihí ñáyivi vinu chaa chichi ñii chahnu. Vatyí cutahnya ñii cuan chihin vinu chaa cuan. Ta tiví vinu cuan ta tiví ñii chahnu cuan ñandihí.

³⁸ Yucuan chaha tahan chi tyihí yo vinu chaa chichi ñii chaa. Vatyí tyicuan ta ninduvi ta saha cuenda chi tahan.

³⁹ Ta yori ñu chihí vinu chahnu, ta cuñí ñu coho ñu cha chaa. Vatyí catyí ñu, vaha ca vinu chahnu. Cuñí ca ñu vinu chahnu cuan vatyí ican cuan cuví costumbre cha iyó maa ñu.

6

Tohon ra cachicá noo chihin ra Jesús yoco trigu quivi nyitatu ñáyivi
(Mt. 12.1-8; Mr. 2.23-28)

¹ Noo quivi cha nyitatu ñáyivi, yahá ra Jesús mahñu cha tachí ñu. Ta ra cachicá noo chihin ra catohón ra yoco trigu. Ta casacoyó ra chihin ndaha ra. Ta cachachí ra chiti cuan.

² Tyicuan ta catyí suhva ra fariseo chi ra:

—¿Ñáá tuhun cha sacuví ndo noo tyiño cha ña tahan chi sacuvi yo quivi nyitatu yo?

³ Ta nacahan ra Jesús, ta catyí ra:

—¿Atu ta sacuaha ca ndo cha sacuvi ra David chihin ra tahan ra quivi cha chisoco ra?

⁴ Quihví ra chichi vehe Nyoo. Ta quehen ra pan cha chacun ñáyivi nuu Nyoo. Ta chachí ra. Ta chaha ra chi ra candihí chihin ra. Ta maa ri maa tata sutu tahan chi cachi pan cuan —catyí ra Jesús.

⁵ Yucuan ta catyí tucu ra Jesús:

—Yuhu cuví Rayii cha quichi nya gloria. Ta iyó ityi chii vatyí catyí chi noo noo ndo ñáá cha sacuvi ndo quivi nyitatu yo —catyí ra.

Nu sanduvaha ra Jesús chi noo ra cha ityi ndaha

(Mt. 12.9-14; Mr. 3.1-6)

⁶ Inga quivi cha nyitatu ñáyivi, quihvi ra Jesús chichi vehe ñuhu. Ta quichaha sañaha ra chi ñáyivi. Ta yucuan nanyehę ra chi noo ra cha na ityi chiyo ndaha vaha.

⁷ Ta ra casacuaha cuenda ley chihin ra fariseo, canducú nyehe ra chi ra Jesús, tatu sanduvaha ra chi ra cuhvi cuan quivi nyitatu ñu. Tyicuan caa ta cuvi tyaa ra cuatyí siqui ra.

⁸ Soco ra Jesús chitó ra tuhun chicá xiñi ra. Ta catyí ra chi ra cha ityi ndaha cuan:

—Nducuita. Ta cuinanyaun mahñu ihya.

Tyicuan ta ra cha ityi ndaha cuan nducuita ra. Ta chicunanyaq ra mahñu.

⁹ Tyicuan ta catyí ra Jesús chi ra canyicú cuan:

—Cua nducu tuhun noo tuhun chi ndo. ¿Yoso caa cuhva tahán chi cha sacuvi yo quivi nyitatu yo? ¿Atu tahán chi vatyí sacuvi yo cha vaha, o cha ña vaha? ¿Atu tahán chi vatyí sacacu yo chi ñáyivi, o cha cahñi ndihí yo chi ñu?

¹⁰ Tyicuan ta ra Jesús nanyehę ra chi noo noo ra canyicú cuan. Ta quichaha catyí ra chi ra cuhvi cuan:

—Sanacaa ndahun.

Tyicuan ta ra cuhvi cuan sanacaa ra ndaha ra. Ta nduvaha ndaha ra.

¹¹ Soco suhva ra canyicú cuan, cuxaan xaan ra. Ta quichaha can-daca tuhun ra chi ra tahan ra:

—¿Yoso caa sacuvi yo tacuhva cha ma cuvi ca cahan ra Jesús nuu ñáyivi? —cacatyí ra.

Nacachi ra Jesús ndi uchi uvi tahan ra tyi caca ra tyiño ra

(Mt. 10.1-4; Mr. 3.13-19)

¹² Quivi cuan ndaa ra Jesús noo yucu. Ta ñiyaca maa chicán tahvi ra chi Nyoo.

¹³ Cuhva cha cundichin, cana ra chi tandihí ri ñu nyicón chi ra. Ta nacachi ra uchi uvi tahan ri ra. Ta sacunañi ra chi ra, apóstol ra, ta cuñi chi catyí, ra caca tyiño nuu ra.

¹⁴ Ta ihya nyaá sivi ndi uchi uvi tahan ra: Ra Simón ra cha sacunañi

ra Cristo Pedro chi, ta yañi ra, ra Andrés, ta ra Jacobo, ra Juan, ra Felipe, ra Bartolomé,

¹⁵ ra Mateo, ra Tomás, ra Jacobo sehe ra Alfeo, ta ra Simón ra yihí cuenda ityi ra cacuñi cuhun cuatyí siqui gobiernu ñuu Roma cha nyacá ñaha chi ñu.

¹⁶ Ta ra Judas, yañi ra Jacobo, ta ra Judas Iscariote, ra cha naxico tuhun chi ra Jesús.

Nu sañahá ra Jesús chi cuaha xaan ñáyivi

(Mt. 4.23-25)

¹⁷ Noo ra Jesús yucu cuan chihin ndi uchi uvi tahan ra. Ta chicutayucu ra nu ndaa cuan chihin ñu nyicón chi ra. Ta cuaha ri ityi quita coyo ñáyivi. Quita coyo ñu ñuu Jerusalén ta tandihí ca ñuu cha iyó Judea, ta ñuu Tiro chihin ñuu Sidón cha nyicú yuhu tyañuhu. Ta cha ñáyivi cuan vatyí cuiñi ñu tuhun cahán ra Jesús. Ta tandihí ñu cuhvi cuñi ñu vatyí sanduvaha ra chi ñu.

¹⁸ Ta tandihí ñu cha yihí tatyí ña vaha chi, nduvaha ñu saha ra.

¹⁹ Ta tandihí ñu cuñi ñu tin ñu chi ra. Vatyí nduvaha ñu chihin tunyee iñi Nyoo, vasi tacuhva tin ri ñu chi ra.

Ñu ñihí tumañi iñi, ta ñu ña ñihí tumañi iñi

(Mt. 5.1-12)

²⁰ Tyicuan ta nanyehę ra Jesús chi ra cachicá noo chihin ra. Ta quichaha catyí ra chi ra:

—Tandihí nyoho cha ndahvi ndo, sii xaan cuví chi ndo, vatyí tahán chi cha cunyaca ñaha Nyoo añima ndo.

²¹ Tandihí nyoho cha chisocó ndo vityin, sii xaan cuví chi ndo. Vatyí coo quivi cha ma nyehe ca ndo soco. Tandihí nyoho cha chacú chaa ndo cha cuihya iñi ndo, sii xaan cuví chi ndo vatyí coo quivi ta ñahri ca tucuihya iñi coo chi ndo. Ta cuacu ndo chihin cha sii cuñi ndo.

²² Sii xaan cucuvi chi ndo, quivi cha tasi cuñi ñáyivi nyehé ñu chi ndo, quivi tavá ñehe ñu chi ndo nu nyaá ñu, quivi cahán ñu chi ndo, quivi catyí ñu vatyí ñáyivi ña vaha cuví ndo

vatyi chinó iñi ndo chi yuhu Rayi cha quichi nya gloria.

²³ Si xaan cucuvi chi ndo quivi nyehe ndo tindoho cuan vatyí tyicuan caa tucu sacuvi ñáyivi ta cha naha. Cahān vavaha ñu chi ra cacuvi profeta Nyoo. Caña ndava ndo chihin cha si cuñi ndo. Vatyí cahnu xaan cha cucuhva Nyoo chi ndo gloria.

²⁴ 'Soco ndahvi nyoho, ñu tyayii. Vatyí vityin si xaan cuñi ndo chihin tandihi cha tyayii ndo. Soco coo quivi maa maa ri tundoho cunyehe ndo. Vatyí ñahri cuñihi ndo nuu Nyoo.

²⁵ 'Ta ndahvi nyoho cha cuñi maa ndo vatyí ñahri cumañi chi ndo cha vityin, vatyí coo quivi cunyehe ndo soco. Nyoho cha si cuñi ndo cha vityin, ndahvi nyoho vatyí coo quivi cunyehe ndo tucuihya iñi. Ta cuacu cha ndo.

²⁶ Ta ndahvi nyoho vatyí vaha cahān ñáyivi siqui ndo. Vatyí tyicuan caa tucu ñáyivi ta cha naha, vaha xaan cahān ñu siqui ra cha cahān cha ña ndicha.

*Cuñi ndo chi ñu xaan iñi chi ndo
(Mt. 5.38-48; 7.12)*

²⁷ 'Tandihí nyoho cha chiñi ndo tuhun cahín, catyí chi ndo tyehe caa: Cuñi ndo chi ñu xaan iñi chi ndo. Sacuvi ndo cha vaha chihin ñu cha tasi cuñi nyehe chi ndo.

²⁸ Cahān ndo cha vaha chihin ñu cha cahān ña vaha siqui ndo. Cācan tahvi ndo chaha ñu cahān chi ndo.

²⁹ Tatu yóo cha cañi inchiyo nuu ndo, cuhva tucu ndo inga chiyo nacañi maa ñu. Tatu yóo cha tinyaa chaqueta ñihno ndo, cuhva ndihí ndo camiseta ndo.

³⁰ Cuhva ndo ñáa ndihí cha chicán ñu chi ndo. Tatu tinyaa ñu ñáa cha iyó chi ndo, ma ndacan ndo chi ñu.

³¹ Tari cuhva cuñi ndo cha sacuvi ñáyivi cha vaha chihin ndo, tyicuan caa sacuvi ndo cha vaha chihin ñu.

³² 'Tatu cuñi ndo chi maa ri maa ñu cha cuñi chi ndo, ñahri cha vaha xaan sacuvi ndo. Vatyí tyicuan caa nyacuví tucu ñu quiñi iyó, cuñi ñu chi ñáyivi ñohó nuu ri ñu.

³³ O tatu sacuví ndo cha vaha chihin ñu cha sacuví cha vaha chihin ndo, ñahri cha vaha xaan nyacuví ndo. Vatyí tyicuan caa nyacuví tucu ñu quiñi iyó.

³⁴ O tatu sacuví ndo tumañi iñi chi noo ñáyivi, ta yihí iñi ndo vatyí cusacuvi tucu ñu cuan tumañi iñi chi ndo, ñahri cha vaha nyacuví ndo. Vatyí tyicuan caa nyacuví tucu ñu quiñi iyó. Tatu ñáa noo tumañi iñi sacuví ñu chi tahan ñu, nyatú ñu cha nacuhva tucu ñu cuan tumañi iñi chi ñu.

³⁵ Soco nyoho, cuñi ndo chi ñu xaan iñi chi ndo. Ta sacuvi ndo cha vaha chi ñu. Ta cuhva noo ndo chi ñu. Soco ma cuatu ndo ñáa tumañi iñi cunacuhva ñu chi ndo. Tyicuan ta cahnu xaan cha cuñihi ndo nuu Nyoo ta cucuvi ndo sehe vaha Nyoo cahnu. Vatyí Nyoo vaha ñáyivi cuví ra chihin ñu cha ña nacuhva tyahvi nyoo chi ra ta chihin ñu quiñi iyó.

³⁶ Vaha ñáyivi cuví ndo chihin ñáyivi, tari maa Nyoo Sutu yo, vaha ñáyivi cuví ra chihin ndo.

*Ma cahān yo cha caa inga tahan yo
(Mt. 7.1-5)*

³⁷ 'Ma cahān ndo cha caá tahan ndo, tyicuan ta Nyoo ma tñn cuenda ra cha caá maa ndo. Ma soco ndo chi ñáyivi cha cuhun ñu anyaya, tyicuan ta ma sacuhun Nyoo chi ndo anyaya. Saha ndo tucahnu iñi chi ñáyivi. Ta Nyoo cusaha ra tucahnu iñi chi maa ndo.

³⁸ Cuhva ndo cha chiñuhú chi ñáyivi. Ta tyicuan caa cuhva tucu maa Nyoo cha chiñuhú chi maa ndo. Noo ñáyivi vaha, tatu xicó ñu ñáa cha xicó ñu chi ndo, tyitu maa chahá ñu chi ndo, tyicuan caa tucu cuhva Nyoo chi ndo. Vatyí tari cuhva cuhva ndo chi ñáyivi, tyicuan caa cuhva cuhva Nyoo chi ndo —catyí ra Jesús.

³⁹ Ta chahā ra Jesús cuhva ihya chi ñu, ta catyí ra:

—Noo ra cuaa ña cuví sañaha ra ityi chingonga ra cuaa. Vatyí ninduvi ra ña nyehé ra ityi cuahan ra. Ta cuví canacoyo ra chichi noo xahva. Tyicuan caa tucu noo ra ña chitó ityi Nyoo,

vasi cuñí ra, soco ma cuvi sañaha ra ityi Nyoo chi nonga ra.

⁴⁰ Ni noo ra cuatyaa sicuela ma cuvi coto ra cha chitó ra cha sañaha chi ra. Vatyí nicaa ni quichaha sacuaaha ra. Coto ra soco nya ndihí sacuaaha ra.

⁴¹ ¿Yoso caa tyi nyehún cuatyí luhlu cha cuví tari mihin lee ri cha yihí chiti nuu tahun, ta ña sahun cuenda cuatyí cahnu cha iyó chuun cha cuví tari vitu cahnu cha yihí nuu maun?

⁴² Tatu chiti nuu maun yihí noo vitu cahnu, yoso caa cuví catyun chi ra yañun: “Nyaca, natave mihin lee cha yihí chiti nuun.” ¡Yoho cha savahún chuun! Tava xihna vitu cahnu cha yihí chiti nuun. Tyicuan ta cuví nyehe vahun mihin lee cha cutavon chiti nuu yañun.

Chihin cha sacuví ñáyivi ta nicohon nuu ri yo chi ñu tatu ñu vaha, o ñu ña vaha cuví ñu

(Mt. 7.17-20; 12.34-35)

⁴³ 'Noo yutun vaha chahá tun chiti vixi, chiti vaha. Ta noo yutun ña vaha chahá tun chiti ña vaha.

⁴⁴ Tandihí yutun nicohon nuu yo chi tun chihin chiti ri tun. Vatyí tuñiyaca, ma cuhva tun mangu. Ta ni ri noo iñu nduhva ma cuhva tun tichaha ndivi.

⁴⁵ Ta tyicuan caa tandihí ñáyivi vaha, tuhun vaha cahán ñu. Vatyí yihí cha vaha aña ñu. Soco ñáyivi ña vaha, maa maa ri maa tuhun ña vaha cahán ñu. Vatyí yihí cha caquiñi aña ñu. Chihin yuhu ñu cahán ñu tandihí cha quiñi caa cha quitá aña ñu.

Cacu aña ñu quichahá tuhun cahán ra Jesús, ta ñu ña quichahá tuhun cahán ra, ma cacu ñu

(Mt. 7.24-27)

⁴⁶ ¿Ñáá tuhun cha catyí ndo chii, “Sutu Mañi yuhu, Sutu Mañi yuhu”, tatu ña sacuvi ndo tari cuhva cha catyí chi ndo?

⁴⁷ Ihya cua catyí chi ndo yóó chi ndacu nyoho cha vachi ndo nu nyaí, ta tyasohó ndo cha cahín, ta sacuví ndo cha catyí.

⁴⁸ Tari noo ra chitó vaha savaha vehe cuví ndo. Vatyí xihna ca chatyá ra cono vavaha ta tahan ra yuu. Ta siqui yuu cuan savahá ra vehe ra. Ta quivi coon xaan savi, ta cama xaan ndutya yahá, ta ña nduva vehe cuan vatyí siqui yuu nanyaá chi.

⁴⁹ Soco ñu cha chiñí tuhun cahín ta ña sacuví ñu tari cuhva catyí, cuví ñu tari minoo ra ña chitó savaha vehe. Vatyí ña chatyá ra nu quiñi chaha vehe ra. Ta ñima nu yuu savaha ra vehe ra. Ta chaa quivi cha coon savi. Cama xaan ndutya yaha. Ta chatya chi chaha vehe ra vatyí ñuhu ri cuví. Ta nduva vehe ra vatyí ña cunye. (Ta tyicuan caa cuví ñáyivi, tatu sacuví ñu tari cuhva catyí, tyicuan ta cacu ñu. Soco tatu ma sacuvi ñu, ma cacu ñu) —catyí ra Jesús.

7

Nu sanduvaha ra Jesús noo musu capitán sindaro

(Mt. 8.5-13)

¹ Cuhva cha ndihí cahan ra Jesús chihin ñáyivi, ta cuanuhu tucu ra inga chaha nya Capernaum.

² Ta yucuan iyó noo capitán cha nyacá ñaha noo cientu sindaro cuatyí. Ta iyó noo musu ra cha cuñí vavaha ra. Ta cuhví ra. Ta cha cuñí cúvi ra.

³ Quivi cha chitó capitán cuan tuhun ra Jesús, tachí ra chi suhva ra cacuvi mandoñi ñuu Israel na cucahan ra chihin ra Jesús, vatyí na quichi ra vatyí sanduvaha ra chi musu ra.

⁴⁻⁵ Tyicuan ta cha coyo ra mandoñi cuan nu nyaá ra Jesús. Ta quichaha catyí ra chi ra:

—Iyó noo capitán cuenda ñuu Roma. Ta vaha xaan ñáyivi cuví ra chihin yo cha cuví yo ñáyivi Israel. Nyacua savaha ra noo vehe ñuhu yo. Ta tahán chi vatyí tyinyeun chi ra. Vatyí cuhví xaan noo musu ra. Ta cuñí ra vatyí sanduvahun chi ra.

⁶ Tyicuan ta cuahan ra Jesús chihin ra. Soco cuhva cha cumañi ca chaa ra nya vehe capitán cuan, capitán cuan tachí ra chi suhva ra tahan ra. Ta quichaha catyí ra chi ra Jesús:

—Tata, catyí capitán vatyí ma sayangon chuun cha cuhun nya vehe ra na. Vatyí ña naña ra cha cuhun, na.

⁷ Yucuan chaha ña caña iñi ra quichi ra nu nyaún. ¿Atu ma sahn noo tumañi iñi chi ra vatyí noo tuhun cahan run ihya ri, ta nduvaha ri musu ra, na?

⁸ Vatyí maa ra capitán cuví ra. Ta nyacá ñaha rey chí ra. Ta maa ra nyacá ñaha ra chí ra cuatyí ca cha nuu ra. Tatu tava ra tyiño chí noo ra cuatyí cuan, na cuhun ra. Cuhun ra. O tatu catyí ra chí nonga ra na quichi ra, quichi ra. O tatu tachi ra chí inga ra na sacuvi ra tyiño, sacuvi ra. Ta tyicuan caa tucu yoho, tatu catyun na nduvaha musu ra, tyicuan ta nduvaha ra na —catyí ra tahan capitán cuan chí ra Jesús.

⁹ Cha chiñi ra Jesús cha catyí ra cuan ta iyo xaan cuñi ra. Ta nanyehe ra chí ñáyivi cha nyicú chihin ra, ta catyí ra:

—Ndicha ndicha cuii vatyí chinó xaan iñi capitán cuan. Ta nañihi que chí ni noo ra Israel cha chinó xaan iñi tari ra cuan —catyí ra.

¹⁰ Yucuan ta cuanuhu ra tahan capitán cuan. Ta cha nachaꝓ coyo ra nya vehe, ta nanyehe ra vatyí cha nduvaha musu cuan.

Nu sanandotoꝓ ra Jesús chi sehe noo ñaha ndahvi chihí y#

¹¹ Cha yaha tuhun cuan ta cuahan ra Jesús noo ñuu cha nañi Naín. Ta cuahan tucu ra cachicá noo chihin ra, ta cuaha xaan ñáyivi ñandihí.

¹² Tyicuan ta cuhva cha cua chaa ra yatyin ñuu cuan, nanyehe ra cuaha ñáyivi quitá coyo ñuu cuan. Ta canyisó ñu noo ndiyi, cuacuchi ñu sehe noo ñaha ndahvi cha chihí y#. Ta noo tuhun ri maa ra iyó chí ña, ta chihí ra.

¹³ Ta cha nanyehe ra Jesús chí ña, ta cundahvi cuñi nyehe ra chí ña. Ta quichahaꝓ catyí ra chí ña:

—Ma cuacun.

¹⁴ Tyicuan ta tuhva ra ta tijn ra chatun cha yihí ndiyi cuan. Tyicuan ta ra canyisó chí ndiyi cuan

chicuitayucu ra. Ta catyí ra Jesús chí ndiyi cuan:

—Ndicuita, ra cuehe —catyí ra.

¹⁵ Tyicuan ta ndicuita ndiyi cuan. Ta nicunyaa ra. Tyicuan ta quichaha cahan ra. Ta ra Jesús nacuhva cuenda ra chí ra chí sihi ra.

¹⁶ Cha nanyehe ñu cha tyicuan caa ta yuhvi xaan ñu cuví. Ta quichaha sacahnu ñu chí Nyoo. Ta catyí ñu:

—Cahnu xaan ra profeta Nyoo tuví nu nyicú yo ihya.

Ta catyí tucu ñu:

—Maa Nyoo, ican vachi nu nyicú yo, vachi tyinyee ra chí yo —catyí ñu.

¹⁷ Ta tandihí maa ñáyivi nicahnu ityi Judea, chitó ñu cha sacuvi ra Jesús.

Nu tachi ra Juan uvi tahan ra chicá noo chihin ra nu nyaá ra Jesús

(Mt. 11.2-19)

¹⁸ Ta ra cachicá noo chihin ra Juan nacatyí ra tuhun cha sacuvi ra Jesús. Tyicuan ta cana ra Juan chí uvi tahan ra.

¹⁹ Ta tachi ra chí ra nu nyaá ra Jesús, vatyí cundaca tuhun ra chí ra tatu ican ra cuví Cristo ra cha cusaquichi Nyoo. Vatyí tatu ñima ra, tyi cuatu ra inga ra.

²⁰ Tyicuan ta ra cha tachi ra Juan, cuahan coyo ra. Ta chaꝓ ra nu nyaá ra Jesús. Ta quichaha catyí ra:

—Ra Juan, ra sacondutyá, tachi ra chí ndi vatyí ndaca tuhun ndi chuun tatu icon cuví Cristo ra cha cusaquichi Nyoo. Vatyí tatu ñimon, cuatu ndi chí inga ra —catyí ra.

²¹ Ta cuhva cha canyicú ra tachi ra Juan cuan, ra Jesús sanduvaha ra cuaha xaan ñu cuhvi, ta cuaha xaan ñu yihí tatyí ña vaha chí. Ta sananyehe ra chí ñu cuaa.

²² Tyicuan ta catyí ra Jesús chí ra tachi ra Juan:

—Cuahan ndo. Ta nacatyí ndo chí ra Juan tandihí cha nyehe ndo, ta tandihí cha chiñi ndo. Ta catyí ndo chí ra yoso caa nanyehé ra cuaa, yoso caa nacacá ra coxo, yoso caa nduvahá ra tyahyu coño, yoso caa nacuiñi ra soho, yoso caa nandotoꝓ

ndiyi, yoso caa cahín tuhun Nyoo chihin ñu ndahvi yoso caa sacacú ra añima ñu. Ta catyi tucu ndo chi ra vatyi

²³ sñi xaan cuví chi ñu ña chicá uvi iñi nyicón chii —catyi ra Jesús chi ra.

²⁴ Cuhva cha cuahan coyo ra cha tachí ra Juan, ta quichaha cahan ra Jesús tuhun ra Juan chihin ñáyivi. Ta catyi ra:

—¿Ñáá cha chahan ndo chinyehe ndo quivi chahan ndo chiqui ndi cuan? ¿Atu chahan ndo chinyehe ndo noo ndoo cha naquisí tatyí?

²⁵ ¿O noo ra cha ñihnó sahma vaha chinyehe ndo vaha? Ñima. Vatyí chitó ndo vatyi ra ñihnó sahma vaha iyó vaha ra ñáyivi ta iyó ra vehe rey.

²⁶ ¿Atu ña chinyehe ndo chi noo profeta Nyoo? Ican. Ta cahnu ca ra cuví ra ican saha noo profeta.

²⁷ Ican tuhun ra Juan nyaá nuu tutu cha tyaa ra Isaías ta cha naha. Ta catyi Nyoo tuhun ra tyehe caa:

Yuhu tachí chi noo ra cahan tuhin ityi nuu nu cuahun.

Vatyí cucahan ra tuhun chihin ñáyivi na nasama ñu cuhva iyó ñu, ta cuatu tuhva ñu quivi quichun.

²⁸ Ta catyi chi ndo vatyi chichi cha tandihí ra cha cacu, yori profeta cha cahnu ca ican saha ra Juan. Soco ra cha nyacá ñaha Nyoo añima, vasi cuví ra noo ra luhlu ca soco cahnu ca ra ican saha ra Juan ra sacondutyá —catyi ra Jesús.

²⁹ Cha chiñi ñu tuhun ihya, tandihí ñáyivi ta ra catavá xuhun cuenda gobiernu ñuu Roma cha sacondutyá ra Juan nacoto ñu vatyi cuhva sacuví Nyoo vaha xaan.

³⁰ Soco tandihí ra fariseo chihin ra sacuahá cuenda ley vehe ñuhu, maa ra cuví ra ña cuñí cha sacondutyá ra Juan chi ra, vatyi ña cuñí ra quehen ra cha chahá Nyoo.

³¹ Ta catyi ra Jesús:

—¿Ñáá chihin sandu inuu ri chi nyoho, ñu iyó quivi ihya? ¿Yóó cha tari caa caá ndo?

³² Tari ra cuatyaa cuví nyoho. Vatyí ra cuatyaa nyasiquí ndotyín nuyahvi.

Ta caná chaa ndotyín chi tahan ndotyín, ta catyi ndotyín: “Tivi ndi tiyoo ta ña chita chaha ndo. Ta chita ndi yaa cuihya, soco ña chacu ndo.” Ta tyicuan caa ni noo cuhva ña tahn iñi ndo.

³³ Vatyí ra Juan ra sacondutyá, quichi ra ta ña chachí vaha ra. Ta ña chihí ra vinu. Ta nyoho catyi ndo vatyi tatyí ña vaha yihí chi ra.

³⁴ Ta quichi tucu yuhu Rayi cha quichi nya gloria. Ta chachí ta chihí. Ta nyoho catyi ndo vatyi ra cuahyi cuví ta cuví noo ra tuhvá chihí. Ta ña tahn iñi ndo cha cutahín chihin ra iyó cuatyí, ta chihin ra tavá xuhun. Soco vasi ni noo ndi ña quehen cuenda ndo,

³⁵ soco catyi chi ndo vatyi cha chiñi tuñi Nyoo, chaha ra chi ñu naquehen tuhun cahín ta tuhun cahán ra Juan. Ta maa ñu cusañaha ñu chi ndo vatyi vaha cha chiñi tuñi Nyoo —catyi ra Jesús.

Nu nyaá ra Jesús vehe ra Simón ra cuví fariseo

³⁶ Noo ra fariseo cha nañí Simón nacatyí tuhun ra chi ra Jesús noo vico vehe ra. Ta chaa ra Jesús vehe ra, ta chicunyaa ra mesa.

³⁷ Tyicuan ta noo ñaha cata iñi ñuu cuan chitó ña vatyi nyaá ra Jesús yucuan. Ta chaa ña chihin noo yutyí alabastro tyitu yihí ndutyá vixi chahán.

³⁸ Ta chicunyaá ña yatyín ri chaha ra. Ta quichaha chacu chaa ña vatyi ndu uvi iñi ña cuatyí ña. Ta quitá ndutyá nuu ña. Ta chihin ndutyá nuu ña nacatyá ña chaha ra. Yaha cuan ta sana ityi ña chaha ra chihin ixi xiñi ña. Ta tyayuhu ña chaha ra. Tyicuan ta choso ña ndutyá vixi chahán cuan siqui chaha ra.

³⁹ Cuhva cha nyehe ra fariseo cuan cha tyicuan caa, ndichí xiñi ra: “Tatu ndicha ndicha cha Nyoo saquichi chi ra ihya, coto ra yóó ñaha tñ chaha ra, vatyi ñaha cuan, ñaha iyó cuatyí cuví ña.”

⁴⁰ Tyicuan ta ra Jesús catyi ra chi ra fariseo cuan:

—Yoho Simón, iyó noo tuhun cua catyi chuun —catyi ra chi ra.

Tyicuan ta nacahan ra Simón:

—Vaha, catyi chii, Maestro —catyi ra.

⁴¹ Ta quichaha catyi ra Jesús tyehe caa:

—Uvi tahan ra yosoyicá ra xuhun chi noo ra cha tuhva chahá noo. Ta noo ra cuan yosiyicá ra ohon cientu denario. Ta nonga ra yosiyicá ra uvi xico uchi ri denario (tari ohon cientu ri pesu).

⁴² Ta ninduvi tahan ra ña cuví tyiyahvi ra. Ta ra tuhvá chahá noo cuan, saha ra ticahnu iñi chi ninduvi tahan ra. Ta vityin catyi chii, yoho Simón ¿nya ra cua cuñi ca chi ra cha chahá noo cuan? —catyi ra Jesús.

⁴³ Tyicuan ta nacahan ra Simón, ta catyi ra:

—Ra cha cuaha ca saha ra tucahnu iñi chi —catyi ra.

Tyicuan ta catyi ra Jesús:

—Ndicha cha cahún.

⁴⁴ Tyicuan ta nanyehe ra Jesús chi ñaha sihi cuan, ta catyi ra chi ra Simón:

—¿Nyhún chi ñaha ihya? Yuhu quihvi chichi vehun. Ta ña chahun ndutya cha ndoo chahi tari cuhva costumbre cha iyó chi yo. Ta ñaha ihya nacatya ña chahi chihin ndutya nuu ña. Ta yaha cuan, ta sana ityi ña chihin ixi xiñi ña.

⁴⁵ Yoho ña tyayuhun ndahi, tari costumbre cha iyó chi yo, soco maa ña nyacua nya cuhva cha quihvi ihya ta ña sandihi ña cha tyayuhú ña chahi.

⁴⁶ Ta yoho ña tyihun aceitye xiñi, soco ñaha ihya tyihí ña ndutya vixi chahán chahi.

⁴⁷ Ta catyi chuun, yoho Simón, vasi cahnu xaan cuatyí ña, soco sahí ticahnu iñi chi ña. Yucuan chaha cuñi xaan ña chii. Ta ñu sahí tucahnu iñi chiin ri cuatyí, chiin ri cuñi ñu chii —catyi ra Jesús.

⁴⁸ Tyicuan ta quichaha catyi ra Jesús chi ña:

—Cuatyun cha yaha sandachi. Vatyí cha saha Nyoo ticahnu iñi chuun —catyi ra chi ña.

⁴⁹ Tyicuan ta ra nyicú chihin ra quichaha ndichí xiñi ra: “¿Yóó ra cuví ra ihya? Vatyí sahá ra tucahnu iñi cuatyí ñáyivi.”

⁵⁰ Tyicuan ta quichaha catyi ra Jesús chi ñaha sihi cuan:

—Cuahan vityin, cha cacun vatyí chinó iñun chii. Cuahan chihin cha vaha —catyi ra chi ña.

8

Ñusihí cha tyinyeé chi ra Jesús

¹ Cha yaha tuhun cuan, ta cuahan ra Jesús chicá noo ra noo noo ñuu cahnu ta noo noo ñuu luhlu. Ta cahan noo ra nuu ñáyivi. Ta sacoto ra chi ñu tuhun vaha yoso cuhva cuñi Nyoo cunyaca ñaha ra chi ñu. Ta ndi uchi uvi tahan apóstol, ra cha tyatyíño ra chi, cuahan coyo ra chihin ra.

² Ta cuahan coyo tucu suhva ñusihí cha sanduvaha ra, ñu cuhvi ta ñu yihí tatyí ña vaha chi. Ta chihin ñu cuahan cu María noo ñaha ñuu Magdala, cha yihí ucha tahan tatyí ña vaha chi ta nduvaha ña.

³ Ta cuahan tucu cu Juana ñasihí ra Chuza ra cuví tyiño cuenda ra Herodes, ta cu Susana chihin cuaha xaan ca ñu cha tyinyeé chi ra chihin ñáa cha iyó chi ñu.

Nu sañahá ra Jesús vatyí tari noo ra chicá noo tachi, tyicuan caa cuví ra cahán tuhun Nyoo

(Mt. 13.1-9; Mr. 4.1-9)

⁴ Ta cuaha xaan ñáyivi quitá noo noo ñuu, vatyí cua nyehe ñu nu cahan ra Jesús tuhun Nyoo. Ta tuvi xaan ñu nyicú ñu, ta quichaha catyi ra chi ñu chihin noo cuhva:

⁵ —Quitá noo ra vehe ra. Ta cuahan ra nu iyó tyiño sahá ra, vatyí cua quití ra chiti trigu nu ñuhú ra. Ta cuhva cha quití ra canacoyo suhva chiti cuan yuhu ityi. Ta chañi ñáyivi siqui. Ta quichí saa ta chachí ti.

⁶ Ta suhva ca chiti cuan canacoyo ticu yuu. Cañá chiti cuan. Soco na ityi ri vatyí chiin xaan ñuhu yihí chaha. Ta siin ri ña cachin.

⁷ Ta suhva ca chiti canacoyo chichi chiti iñu, soco quivi caña tun in ri, tu iñu cuan chahñi chi tun.

⁸ Soco suhva ca chiti canacoyo nu ñuhú vaha ta quivi chahnu tun, vaha xaan chaha tun chiti. Vatyí noo ri chiti cuan, cientu chiti quita chihin —catyí ra Jesús.

Ta cha yaha catyí ra tuhun cuan. Ta quichaha cana chaa ra vatyí na cuiñi ñáyivi, ta catyí ra:

—Tatu cutuñi iñi ndo, tyasoho ndo tuhun cahín —catyí ra.

Nu sacotó ra Jesús ñáa cuenda sañahá ra chihin cuhva ri
(Mt. 13.10-17; Mr. 4.10-12)

⁹ Yaha cuan ta ra cachicá noo chihin ra, ndaca tuhun ra chi ra ñáa cha cuñi chi catyí tuhun cha nacatyí ra chi ñáyivi.

¹⁰ Tyicuan ta quichaha catyí ra:

—Chi nyoho sacotó Nyoo tuhun xehe, yoso caa nyacá ñaha ra. Soco chi tandihi ca ñu cuan, cuhva ri chahi chi ñu. Tacuhva nyehe ñu ta cuví chi tari cha ña ndichin nyehé ñu, ta cuiñi ñu soco ma cutuñi iñi ñu ñáa tuhun cuví.

Nu sacotó ra Jesús ñáa cha cuñi chi catyí tuhun ra tachí cuan
(Mt. 13.18-23; Mr. 4.13-20)

¹¹ Cuhva cha catyí chi ndo, cuñi chi catyí tyehe caa: chiti cuan tari tuhun Nyoo cuví.

¹² Ta tari nu canacoyo chiti trigu cuan yuhu ityi, tyicuan caa cuví noo ñu chiñi tuhun Nyoo. Soco quichi cuihna ta tinyaa ra tuhun Nyoo chi ñu tacuhva cha ma chino iñi ñu. Ta ma cacu ñu.

¹³ Ta tari nu canacoyo chiti cuan ticu yuu, tyicuan caa tucu inga ñáyivi cha chiñi tuhun Nyoo. Ta sii xaan cuví chi ñu suhva ri quivi. Soco vatyí ña yihí vaha yoho ñu, suhva ri quivi chinó iñi ñu, soco quivi cha quichaha nyehe ñu tindoho, ta sandihi ri ñu tuhun cha chinó iñi ñu.

¹⁴ Tari nu canacoyo chiti chichi iñu, tyicuan caa cuví tucu inga ñu chiñi tuhun Nyoo. Chiñi ñu tuhun Nyoo soco ña cuñi ñu sacuvi ñu tari cuhva chiñi ñu. Vatyí yihí ñu, nyaá ca xiñi ñu

tuhun tindoho ican saha tuhun Nyoo. Ta nonga ñu nyiyo ca iñi ñu cha tyayii. Ta nonga tucu ñu sii ca cuñi ñu chica noo yanga ri ñu. Ta tari cha ña chicoo chiti nuu ñu cuví cuan.

¹⁵ Soco tari nu canacava chiti nu ñuhú vaha, tyicuan caa cuví noo ñu cha chiñi tuhun Nyoo. Ta vaha aña ñu vatyí chinó iñi ñu chihin tandihi aña ñu. Ta vaha tyasohó ñu tuhun Nyoo, ta ña naa maa iñi ñu tuhun ra. Ta sacuvi ñu tandihi tuhun cahán ra.

Ma tyihi xehe yo ñuhú cha sandundichin Nyoo aña yo coto tinyaa ra
(Mr. 4.21-25)

¹⁶ Yori yo cha natyaa yo ñuhú tima ta tixehe yo xiu chito o nonga nu xehe. Natyaa yo ñuhú tima soco cha cananyaa yo noo nu sucun. Ta cuhva quihvi ñáyivi chichi vehe soco ndichin.

¹⁷ Vatyí ñahri noo cha ñohó xehe, ta cuñun, tyi ma natuvi. Ta ni noo tuhun xehe, ta cuñun, tyi ma quita nu ndichin ta coto yo.

¹⁸ Yucuan chaha tyasoho ndo tuhun cahín. Vatyí tatu quichaha ndo tuhun cahín, cuaha ca cusañahi chi ndo. Soco tatu ma tyasoho ndo, tyicuan ta cutinyaa Nyoo tandihi maa chi ndo nyacua nya cha chiin ri cha cuñi maa ndo tyi cumí ndo.

Tari yañi ra, ta tari sihi ra, tyicuan caa cuví chi ñu quichaha tuhun Nyoo, catyí ra Jesús

(Mt. 12.46-50; Mr. 3. 31-35)

¹⁹ Tyicuan ta chaq sihi ra Jesús chihin yañi ra nu nyaá ra. Soco ña cuví chaa ñu vatyí tuví xaan ñáyivi.

²⁰ Tyicuan ta sacoto ñáyivi canyicú cuan chi ra Jesús, ta catyí ñu:

—Sihun chihin yañun nyicú ñu chata vehe. Ta cuñi ñu cahan ñu chuhun.

²¹ Tyicuan ta nacahan ra Jesús, ta catyí ra:

—Tandihi maa ñáyivi cha chiñi ta sacuvi tuhun Nyoo cha cahín, ican ñu cuví sihi, ta ican ñu cuví yañi —catyí ra Jesús.

Nu sacutaxin ra Jesús tatyí ñihi vavaha nu miñi

(Mt. 8.23-27; Mr. 4.35-41)

²² Cuví chi noo quivi cuan quihvi ra Jesús chichi noo canoa chihin ra cachicá noo chihin ra. Ta quichaha catyí ra chi ra:

—Coho ndo inga chiyo miñi ihya.

Yucuan ta cuahan coyo ra chihin canoa cuan.

²³ Ta cha ni ri ca cha cuahan ra mahñu miñi cuan, tin ñumahna chi ra Jesús. Tyicuan ta sana iñi ra ta cha noo tatyí ñihi vavaha. Ta quichaha tyihi chi ndutya chichi canoa cuan. Ta quichaha cuñi nyee canoa cuan vatyí cama xaan ndutya quihvi.

²⁴ Tyicuan ta casandoyo ra chi ra Jesús. Ta quichaha catyí ra:

—¡Maestro! ¡Maestro! Cha cuñi nyee yo chichi ndutya —catyí ra.

Tyicuan ta nducuita ra Jesús. Ta quichaha catyí ra chi tatyí cuan ta chi ndutya cuan, na cutaxin chi. Ta cutaxin ri.

²⁵ Tyicuan ta quichaha catyí ra chi ra cachicá noo chihin ra:

—¿Ñáá tuhun yuhví ndo? ¿Atu ña chinó iñi ndo vatyí yuhu sahá cuende chi ndo? —catyí ra.

Soco ra cuan, yuhvi xaan ra. Ta iyo xaan cuñi ra. Ta quichaha ndaca tuhun ra chi ra tahan ra:

—¿Yóó ra cuví ra ihya? Vatyí nyacua nya tatyí ta ndutya ta quichahá tuhun cahán ra.

Nu nduvaha noo ra yihí tatyí ña vaha ñuu Gadara

(Mt. 8.28-34; Mr. 5.1-20)

²⁶ Tyicuan ta cha coyo ra ityi Gadara cha nyaá inga chiyo miñi ityi nuu Galilea.

²⁷ Ta quitá ra chichi canoa cuan. Ta yucuan cha noo ra cha quichi noo ñuu ityi cuan chisatahan ra chi ra. Ta yihí tatyí ña vaha chi ra. Ta cha naha xaan ña ñihnó maa ra sahma. Ni ri ña iyó ra vehe ra. Chicá noo ri maa ra nu ñaña calavari cuan.

²⁸⁻²⁹ Ta tuhvá tatyí ña vaha cuan naquiqui chi ra. Ta yucuan chaha chahñi ñu ndaha ra ta chaha ra chihin cadena. Soco tatyí ña vaha cuan

chahá fuerza chi ra cha cahnya ra. Ta sacono chi chi ra. Ta chinyaca chi chi ra noo nu yori maa ñáyivi iyó. Ta cuhva cha nyehe ra chi ra Jesús, chicuiñi chiti ra nuu ra. Ta quichaha canachaa ra, ta catyí ra:

—¿Ñáá tuhun tyihún chuun chihin yuhu, yoho Jesús, Sehe Nyoo cahnu? Chiquén chuun vatyí ma sanyehun tundoho chii —catyí ra yihí tatyí ña vaha cuan chi ra Jesús.

Ta catyí ra tyehe caa vatyí ra Jesús tachí ra chi tatyí ña vaha cuan, na quita chi ra ndahvi cuan.

³⁰ Ta quichaha ndaca tuhun ra Jesús chi tatyí ña vaha cuan, ta catyí ra:

—¿Ñáá nañún?

Ta tatyí ña vaha cuan sacahan chi ra cuan, ta catyí ra:

—Nyuhu nañi ndi, Legión.

Tyicuan caa catyí ra vatyí cuaha xaan tatyí ña vaha yihí chi ra. Cuenda mil tatyí ña vaha cuan yihí chi ra.

³¹ Tyicuan ta tatyí ña vaha cuan catyí chi ra Jesús vatyí ma tuchi ra chi chi nu tindoho nu ma cuvi maa quita chi.

³² Ta chicán tatyí ña vaha cuan chi ra Jesús nacuhva ra caquihvi chi chichi quini cha canyicú yuhu miñi cuan. Tyicuan ta chaha ra Jesús permiso cha caquihvi chi chichi quini cuan.

³³ Ta quitá tatyí ña vaha cuan chi ra ndahvi cuan. Ta caquihvi chi chichi quini cuan. Tyicuan ta cachino quini cuan. Ta yatyin cuan nyaá noo xahva yuhu miñi cuan. Yucuan canacoyo ti chichi miñi cuan. Ta cachihí ti chihin ndutya cuan.

³⁴ Tyicuan ta ra casahá cumi chi quini cuan, yuhví xaan ra. Ta cuahan coyo vavaha ra cua nacatyí ra chi ñáyivi nya ñuu. Ta tandihí ri ñáyivi cha nyehe ra, ta nacatyí ra tuhun cuan.

³⁵ Tyicuan ta cha coyo ñáyivi cua nyehe ñu ñáá cha cuví cuan. Tyicuan ta cha ñu nu nyaá ra Jesús. Ta nañihí ñu chi ra cha yihí tatyí ña vaha cuan chi. Nyaá ra nuu ra Jesús. Ta ñihnó ra

sahma ra. Ta vaha cuñí ra. Ta yuhví xaan ñu cuví.

³⁶ Tyicuan ta tandihí ñu cha nyehe cha cuví cuan, nacatyí ñu chí tandihí ca ñáyiví yoso caa quitá tatyí ña vaha chí ra ndahví cuan, ta nduvahá ra.

³⁷⁻³⁹ Yucuan ta tandihí ñáyiví ityi Gadara cuan quichaha catyí ñu chí ra Jesús na cunuhu ra ityi nu quichi ra. Vatyí yuhví xaan ñu chihin cha sacuví ra chihin tatyí ña vaha cuan. Tyicuan ta ra cha quitá tatyí ña vaha cuan chí, catyí ra chí ra Jesús, na cuhva ra cha cuhun ra chihin ra. Soco catyí ra Jesús chí ra:

—Cuahunu nya vehun. Ta nacuhva cuendon chí ñáyiví chuun ñáá cha sacuví Nyoo chuhun —catyí ra.

Yucuan ta ra Jesús nandihví ra chichi canoa cuan. Ta cuanuhu ra chihin ra cachicá noo chihin ra. Tyicuan ta ra ndahví cha nduvaha cuan, cuanuhu ra nya ñuu ra. Ta ityi cuahan ra nacatyí ra chí tandihí ñáyiví ñuu cuan yoso caa sanduvahá ra Jesús chí ra.

Nu nduvahá sehe ra Jairo ta ñaha síhi cha tñn sahma ra Jesús

(Mt. 9.18-26; Mr. 5.21-43)

⁴⁰ Quiví cha nachaa ra Jesús cha chahan ra inga chiyo miñi cuan, cuaha xaan ñáyiví nyatú ñu chí ra. Ta síi xaan cuñí ñu vatyí nachaa ra.

⁴¹ Tyicuan ta chaá noo ra cha nañí Jairo, ra cuví nuu vehe ñuhu, ta chicuñí chiti ra nuu ra. Ta quichaha chacu ndahví ra nuu ra, na cuhun ra vehe ra.

⁴² Vatyí iyó noo tuhun ri sehe ra, ta iyó uchi uvi cuiya ña. Ta cha cuñí cúvi ña chihin cuehe. Ta cuahan ra Jesús vehe ra. Ta cuaha xaan ñáyiví cuahan chihin ra Jesús, ta tñn xaan cuahan ra mahñu ñu.

⁴³ Ta chihin ñáyiví cuan cuahan noo ñaha cuhví. Cha iyó uchi uvi cuiya ndoho ña noo cuehe niñi. Ta cha ndihí maa xuhun ña sanaa ña, ta ña nduvahá ña.

⁴⁴ Soco chaá ña nu nyaá ra Jesús ityi chata ra. Ta tñn ña sahma ra. Ta caa cuhva ri cuan, ta chicunyasi cha chati niñi ña.

⁴⁵ Tyicuan ta quichaha catyí ra Jesús:

—¿Yóó cha tñn sahme?

Ta tandihí ñu cuahan chihin ñu catyí ra:

—Yori.

Ta catyí ra Pedro ta ra tahan ra chí ra Jesús:

—Maestro, cuaha xaan ñáyiví cuahan chuhun, ta tñn xaan cuahun. Ta suri maa ñu tyandahá ñu chuun. Ta ndacá tuhun con “¿Yóó cha tñn sahme?” —catyí ra.

⁴⁶ Soco ra Jesús catyí ra:

—Chitó mai vatyí iyó noo cha tñn sahme. Vatyí tuví iñi cuahan suhva tunyee iñi cha iyó chii —catyí ra.

⁴⁷ Tyicuan ta ñaha síhi cuan nyehe ña vatyí cha chitó ra. Ta quichaha niñi ña chihin cha yuhví ña. Ta chicuñí chiti ña nuu ra. Ta quichaha nacatyí ña chí ra ñáá tuhun cha tñn ña sahma ra, ta yoso caa nduvahá ña caa cuhva ri cuan. Ta chiñí tandihí ñáyiví cuan cha nacatyí ña.

⁴⁸ Yucuan ta catyí ra Jesús chí ña:

—Yoho síhi, cha nduvahun vatyí chinó iñun chii. Cuahan chihin cha vaha —catyí ra.

⁴⁹ Ni cahán ca ra Jesús tuhun ihya, ta chaá noo ra quitá vehe ra cuví nuu vehe ñuhu cuan. Ta quichaha catyí ra chí ra Jairo cuan:

—Sehun cha yaha chihi ña. Ma sayanga con chí Ra Sacuaha chiña —catyí ra.

⁵⁰ Soco cha chiñi ra Jesús tuhun cuan. Ta quichaha catyí ra:

—Ma yuhvun. Chino iñun. Ta sehun cua nduvaha ña —catyí ra.

⁵¹ Ta cuhva cha chaá ra Jesús vehe ra Jairo, ña chaha ra quihví ñáyiví chichi vehe. Maa ri maa ra Pedro ta ra Jacobo ta ra Juan ta maa ra Jairo chihin ñasíhi ra, quihví ñu chichi vehe cuan nu catuví cuehe luhlu cha chihí cuan.

⁵² Ta tandihí ñu chacú chaa ñu cha cuenda vatyí chihí cue. Soco ra Jesús catyí ra chí ñu:

—Ma cuacu ca ndo. Vatyí ña chihí cue. Quixí cue —catyí ra.

⁵³ Soco chacú nyaa ñu tuhun cahan ra. Ta ña chinó iñi ñu. Vatyí chitó ñu tyi cha chihí cue.

⁵⁴ Tyicuan ta tiin ra Jesús ndaha cue. Ta ñihi cahan ra ta catyí ra chí cue:

—Nducuita, cuehe luhlu —catyí ra.

⁵⁵ Tyicuan ta nandoto cue. Ta caa cuhva ri cuan ndicuita cue. Ta quichaha catyí ra Jesús:

—Cuhva ndo cha cachi cue.

⁵⁶ Ta sutu cue ta sihi cue, iyo xaan cuñi ñu. Soco catyí ra Jesús chí ñu vatyí yori maa chihin cahan ñu tuhun cha cuví cuan.

9

Nu tachi ra Jesús ndi uchi uvi tahan ra cachicá noo chihin ra vatyí cucahan ra tuhun Nyoo

(Mt. 10.5-15; Mr. 6.7-13)

¹ Sandu iin ri ra Jesús ndi uchi uvi tahan ra cachicá noo chihin ra. Ta chaha ra tunyee iñi chí ra vatyí cuví tava ra tatyí ña vaha, ta cuví sanduvaha ra chí ñu cuhví.

² Ta tachi ra tyiño chí ra vatyí na sanduvaha ra chí ñu cuhví, ta cahan ra tuhun Nyoo yoso caa nyacá ñaha ra añima ñáyivi.

³ Ta catyí ra chí tandihi ra cuan:

—Ñahri cha cuison ndo ityi cuhun ndo, ni yutun ma tuvi ndo. Ni yitin, ta ni ri cha cachi ndo ta ma cuison ndo. Ta ni ri xuhun ta ma cuison ndo. Tacuhva ñihnó ri ndo cuhun ndo.

⁴ Ta savaha ri vehe cha chaa ndo, cunyaa ndo yucuan nyacua nya cha chaa quivi cha cuhun ndo inga ñuu.

⁵ Ta nu ña cuñi ñu cuiñi ñu tuhun cahan ndo, quita ndo ñuu cuan. Ta naquisi ndo ñiyaca chaha ndo. Tyehe caa sacuvi ndo na cuví chí tari minoo seña chí ñu, vatyí ña cuñi ñu tyasoho ñu tuhun Nyoo —catyí ra Jesús chí tandihi ra cuan.

⁶ Tyicuan ta cuahan coyo ra tandihi cuii maa ñuu. Ta cahan ra tuhun vaha Nyoo ta yoso caa cuñi chí ta cacu ñu. Ta sanduvaha ra chí ñu cuhvi.

Nu cuñi ra Herodes coto ra yóo ra chicá noo cahan tuhun Nyoo ta sanduvaha chí ñáyivi

(Mt. 14.1-12; Mr. 6.14-29)

⁷ Ra Herodes ra cuví ra nyacá ñaha nicahnu ityi Galilea, ñihi ra tuhun cha sacuví ra Jesús. Ta ña ñihi vaha ra cuhva yóo ra cuví ra. Vatyí yihí ñu catyí ñu vatyí ra Juan, ican ra nandoto.

⁸ Ta yihí ñu catyí ñu vatyí ra Elías, ican ra nandoto. Ta yihí ñu catyí ñu vatyí inga ra profeta Nyoo ta cha naha, ican nandoto.

⁹ Soco catyí ra Herodes:

—Maa mai tyihí tyiño chichanya sucun ra Juan. ¿Tu tyicuan caa, yóo ra chíñi xain tuhun ihya? —catyí ra.

Ta ra Herodes cuan nducú xaan ra cuhva yoso caa nyehe ra chí ra cha chicá noo cuan.

Nu chaha ra Jesús cha cachi ohon mil rayi

(Mt. 14.13-21; Mr. 6.30-44; Jn. 6.1-14)

¹⁰ Ta cuhva cha nachaa coyo ra chicá tyiño nuu ra Jesús, canacatyí ra chí ra Jesús tandihi cuii maa cha cuví nu chahan coyo ra. Tyicuan ta tava siin ra Jesús chí ra ta cuahan coyo ra yatyin ri noo ñuu cha nañi Betsaida.

¹¹ Soco cuhva cha ñihi ñáyivi tuhun vatyí cuahan ra Jesús nyicuan, ta cuahan coyo vavaha ñu nya nu nyaá ra. Tyicuan ta quichaha cahan ra chihin ñu tuhun yoso caa nyacá ñaha Nyoo añima ñáyivi. Ta sanduvaha ra chí ñu cuhví.

¹² Ta cuhva cha cua iñi xaan, ndi uchi uvi tahan ra chicá noo chihin ra quichaha catyí ra chí ra:

—Catyí chí ñáyivi ihya na cunuhu ñu cunyitatu ñu, ta na cunducu ñu noo cha cachi ñu noo ñuu cha nyaá yatyin ri cuan. Vatyí ihya ñahri maa cha cachi yo iyó —catyí ra.

¹³ Tyicuan ta quichaha catyí ra Jesús chí ndi uchi uvi tahan ra cuan:

—Cuhva ndo cha cachi ñu —catyí ra.

Tyicuan ta quichaha catyí ra chicá noo chihin ra chí ra tahan ra:

—Ñahri maa cha iyó ihya. Ohon tahan ri pan, ta uvi tahan ri tiyaca iyó. Soco ma ñihi cha cachi tandihí ñáyiví ihya. Ni ri cusata ndi soco ma ñihi —catyí ra.

¹⁴ Vatyí ohon mil rayí nyicú yucuan. (Ta sñin ri nyicú ñusihí chihin sehe ñu.) Yucuan ta ra Jesús catyí ra chi ra cachicá noo chihin ra:

—Na cunyicu ñáyiví cha uvi xico uchi tahan ñu noo noo nu cunyicu ñu.

¹⁵ Tyicuan ta chicunyicu tandihí ñu.

¹⁶ Tyicuan ta quehen ra Jesús ohon tahan pan cuan chihin uvi tahan tiyaca cuan. Ta nanyehé ndaa ra andiví, ta nacuhva ra tyahví nyoo chi Nyoo. Tyicuan ta tahví sava ra pan ta tiyaca cuan. Ta chaha ra chi ra cachicá noo chihin ra na casacha ra chi ñáyiví.

¹⁷ Tyicuan ta tandihí ñu chachí ñu. Ta chitu chichi ñu. Yaha cuan ta ndoo ca yiquín ta sacutu ra uchi uvi tahan tica chihin yiquín cuan.

Nu catyí ra Pedro tyi ra Jesús cuví ra Cristo, ra sacacú chi yo
(Mt. 16.13-19; Mr. 8.27-29)

¹⁸ Noo quiví quita sñin ra Jesús chihin ra cachicá noo chihin ra. Ta quichaha chicán tahví ra chi Nyoo. Ta nu ndihí chicán tahví ra, ta quichaha ndaca tuhun ra chi ra chicá noo chihin ra ta catyí ra:

—¿Ñáá catyí ñáyiví, yóo ra cuví yuhu?

¹⁹ Tyicuan ta nacahan ra cachicá noo chihin ra, ta catyí ra:

—Yihí ñu catyí ñu vatyí ra Juan ra sacondutyá chi ñáyiví cuvún. Ta yihí ñu catyí ñu vatyí ra Elías cuvún. Ta yihí ñu catyí ñu vatyí inga ra profeta Nyoo ta cha naha cuvún —catyí ra.

²⁰ Tyicuan ta ndaca tuhun ra Jesús chi tandihí ra, ta catyí ra:

—Ta nyoho, ¿yóo ra cuví yuhu, cuhva cha cuñi nyoho?

Tyicuan ta nacahan ra Pedro, ta catyí ra:

—Yoho cuví ra Cristo ra cha quita nu nyaá Nyoo.

Nu sacoto ra Jesús yoso caa cuc-ahñi ñáyiví chi ra

(Mt. 16.20-28; Mr. 8.30—9.1)

²¹ Ta catyí ra Jesús chi ra cachicá noo chihin ra vatyí yori maa chihin cahan ra tuhun cuan.

²² Tyicuan ta catyí tucu ra chi ra:

—Yuhu Rayí cha quichí nya gloria cuví. Ta tahan chi vatyí cuaha xaan tundoho cunyehe. Ta ra cacuví mandoñi ta ra cacuví nuu chi tata sutu chihin ra casacuaha cuenda ley, ma chino iñi ra chii. Ta cucahñi ra chii. Soco nu cu uñi quiví cunandote —catyí ra.

²³ Tyicuan ta quichaha catyí tucu ra chi tandihí ra:

—Tatu nya nyoho cuñi ndo cunyon ndo chii, cahnya iñi ndo cha cuñi maa ndo sacuvi ndo, tacuhva cuví sacuvi ndo cha cuñi Nyoo. Ma ndu uvi iñi ndo cha yihí ndo cuende vasi ndiquiví nyehe ndo tundoho. Vatyí yucuan cuví cruzi cha tahan chi cuiso ndo.

²⁴ Ta nya ndo ña cuñi ndo nyehe ndo tundoho cha catyí yuhu, cunyehe ndo tundoho anyaya. Soco nya ndo cuhva ndo ñáyiví ndo cha catyí yuhu, cucacu añima ndo.

²⁵ ¿Ñáá cuenda quita chi ndo cha saha ganaa ndo tandihí cha iyó ñáyiví, tatu cuhun añima ndo anyaya?

²⁶ Vatyí tatu cahan nuu ndo cha cahan ñáyiví chi ndo cha catyí yuhu, ta cha catyí tuhun cahní, cucahan tucu nuu mai nyehi chi ndo nachaa quiví quichi inga chaha. Vatyí cuquichi chihin cha cahnú cuví, ta cha cahnú cuví Sutu yo Nyoo ta ángel cuenda ra. Vatyí yuhu cuví Rayí cha quichí nya gloria.

²⁷ Ta catyí chi ndo vatyí yihí ndo cha nyicú ndo ihya vityin, ma cúvi ndo nyacua nya nyehe ndo yoso caa cuví nu nyacá ñaha Nyoo.

Uñi tahan ra cachicá noo chihin ra Jesús nyehé ra yoso caa cuví nu nyacá ñaha Nyoo

(Mt. 17.1-8; Mr. 9.2-8)

²⁸ Uña quiví yaha cha catyí ra Jesús tuhun cuan. Ta ndaa ra noo yucu

vatyí cua cacan tahvi ra chi Nyoo. Ta cuahan ra Pedro, ra Jacobo ta ra Juan chihin ra.

²⁹ Ta cha ñi ri ca cha chicán tahvi ra Jesús, nasama cuhva caá sahma ra ta nuu ra. Tyaquí xaan cuichin nanduvi sahma ra. Ta xiño xaan.

³⁰ Tyicuan ta tuvi uvi tahan ra candatuhún chihin ra, ra Moisés ta ra Elías.

³¹ Ta ndichin xaan nu tayucú ra. Ta cacahán ra tuhun yoso caa cunyehe ra Jesús tundoho Jerusalén ta cúvi ra.

³² Ta vasi cuñí xaan ra Pedro chihin ra tahan ra cacusu ra, soco ña quixí ra. Ta nyehé ra cha ndichin xaan cuan nu nanyaá ra Jesús chihin ra cha tayucú chihin ra.

³³ Cuhva cha cuahan coyo ra tayucú chihin ra Jesús cuan, catyí ra Pedro:

—Maestro, vaha xaan cha nyicú ndi ihya. Na savaha ndi uñi tahan vehe, noo chuun, noo chi ra Moisés, ta noo chi ra Elías —catyí ra.

Soco ña chitó ra Pedro tuhun cahán ra.

³⁴ Ta cha ñi ri ca cha cahán ra ta quichí noo vico síqui ra. Ta yuhví xaan ra cacuví cha caquihví ra chichi víco cuan.

³⁵ Tyicuan ta chichi vico cuan chiñi ra noo ndusu cha catyí:

—Ican ra ihya cuví Sehi, ta cuñí xain chi ra. Tyasoho ndo tuhun cahán ra —catyí ndusu cuan.

³⁶ Ta cha yahá cahán ndusu cuan, nanyehe ra Pedro ta ra ndihi chihin ra vatyí noo ri ca maa ra Jesús nanyaá yucuan. Ta yori maa chihin cacahan ra tuhun cha nyehé ra.

Nu sanduvahá ra Jesús chi noo ra cuehe luhlu cha yihí tatyí ña vaha chii (Mt. 17.14-21; Mr. 9.14-29)

³⁷ Ta cha inga quiví cha noo ra Jesús yucu cuan, cuaha xaan ñáyiví chisatahan chi ra.

³⁸ Tyicuan ta chichi cha cuaha ñáyiví cuan, noo ra cana chaa xaan ra, ta catyí ra:

—Maestro, saha tumañi iñi chii. Nyehe ndahvi chi sehi. Vatyí noo tuhun maa ra iyó chii.

³⁹ Ta yihí ndihi tatyí ña vaha chi ra. Ta sacanachaa chi chi ra. Ta tuchí chi chi ra nyasava. Ta quitá tiñi yuhu ra. Ta quiñi xaan nyacuví chi chihin ra. Ta ña cuñí maa tatyí ña vaha cuan saña chi ra.

⁴⁰ Cha cahin chihin ra cachicá noo chuhun na tava ra tatyí ña vaha cuan, soco ña cuví chi ra —catyí ra.

⁴¹ Tyicuan ta nacahan ra Jesús ta catyí ra:

—Nyoho, ñu ña chinó iñi cuví ndo. Ta ni caa ni quiñi iyó ndo. ¿Yoso ca tahan quiví cunyai chihin ndo ta cunyehe iñi tisihi ndo nyacua nya cha cutuhva ndo ta chino iñi ndo chii?

Ta catyí ra chi ra cuan:

—Nyaca chi sehung.

⁴² Ta cuhva cha cua tuhva ra cuehe cuan nu nyaá ra Jesús, ta tuchí tatyí ña vaha cuan chi cue nya sava. Soco ra Jesús tava ra chi tatyí ña vaha cuan. Ta sanduvahá ra chi cue. Tyicuan ta nacuhvá cuenda ra chi cue chi sutu cue.

⁴³ Ta tandihi ñáyiví, iyo xaan cuñí ñu cha cahnu cha sacuví Nyoo chihin ñu.

Inga chaha tucu cahán ra Jesús tuhun yoso caa cucahñi ñáyiví chi ra (Mt. 17.22-23; Mr. 9.30-32)

Cha ñi ri ca cha iyo cuñí ñáyiví cha sacuví ra Jesús, ta quichaha catyí ra chi ra cachicá noo chihin ra:

⁴⁴ —Tyasoho vaha ndo tuhun cahín. Ta ma naa iñi ndo. Vatyí yuhu Rayi cha quichí nya gloria, cucuhva cuenda ñu chii ndaha ra xaan iñi chii —catyí ra Jesús.

⁴⁵ Soco ra cachicá noo chihin ra ña cutuñí iñi ra ñáá tuhun cahán ra. Vatyí Nyoo ña chahá ra cha cacutuñi iñi ra. Ta cayuhví ra ndaca tuhun ra chi ra Jesús ñáá cha cuví cuan.

Nu sañaha ra Jesús yóo ra cha cahnu ca cucuvi nu nyacá ñaha Nyoo (Mt. 18.1-5; Mr. 9.33-37)

⁴⁶ Yucuan ta ra cachicá noo chihin ra quichaha cacuvi yuhu ra tuhun nya ra cahnu ca cuví chichi cha uchi uvi tahan ra.

⁴⁷ Tyicuan ta chitó ra Jesús cha chicá xiñi ra, ta quehen ra chi noo ra cuehe luhlu.

⁴⁸ Ta quichaha catyí ra chi tandihi ra cuan:

—Tatu chihin sivi natíin cuenda ndo chi noo ñáyivi ña cahnu sahá chi tari ra cuehe luhlu ihya, chi yuhu natíin cuenda ndo. Ta tatu natíin cuenda ndo chii, chi maa Nyoo cha saquichi chii, natíin cuenda ndo. Vatyí ra cha ñima ri tuhun sahá maa ndo tuhun, ican ra cuví ra cahnu nuu Nyoo —catyí ra Jesús.

Ñu cha ña cahán chi yo, ican ñu cuan tyinyee chi yo
(Mr. 9.38-40)

⁴⁹ Yucuan ta ra Juan catyí ra chi ra Jesús:

—Maestro, nyehe ndi chi noo ra cuan. Cahán ra sivun ta tavá ra tatyí ña vaha. Soco ña chaha ca ndi. Vatyí ñima chihin yo chicá noo ra —catyí ra.

⁵⁰ Tyicuan ta catyí ra Jesús chi ra:

—Ma casi ndo nu cahan ra. Vatyí yóo ra ña cahán chi yo, tumañi iñi chi yo cuahan ra —catyí ra.

Nu catyí ra Jesús chi ra Juan ta chi ra Jacobo vatyí ña vaha cha chicá xiñi ra

⁵¹ Tuvi iñi ra Jesús vatyí cha nyaña yatyin cha tahán chi cunuhu ra gloria, ta sandunhi ra iñi ra. Ta quehen ra ityi ta cuahan ra Jerusalén nu cucuví ra.

⁵² Ta tachi ra tyiño na cuhun coyo ra cachicá noo chihin ra ityi nuu ca noo ñuu ityi Samaria. Vatyí canducu ra nu nyitatu ra.

⁵³ Soco ñu Samaria cuan, ña cuñi ñu cha ndoo ra yucuan, vatyí tuví iñi ñu vatyí Jerusalén cuahan coyo ra, ta ñu Samaria ña cuví nyehe ñu chi ñu Jerusalén.

⁵⁴ Cuhva cha chitó ra Jacobo ta ra Juan cha ña chahá ñu Samaria cuan cha ndoo ra yucuan, cuxaan ra. Ta quichaha catyí ra chi ra Jesús:

—Sutu Mañi yuhu, ¿atu cuñun cha sacuvi yo tari sacuvi ra Elías? ca-can yo chi Nyoo na saquichi ra ñuhu andivi siqui ñáyivi Samaria cuan,

vatyí cayu ñu vatyí ña cuñi ñu cha ndoo yo ñuu ñu —cacatyí ra.

⁵⁵ Tyicuan ta nanyehe ra Jesús chi ra. Ta cahan ra chi ra ta catyí ra:

—Taxi ri ndo. Vatyí ña cutuñi iñi ndo ñáá tyiño vachi yuhu.

⁵⁶ Vatyí yuhu Rayi cha quichi nya gloria, ña vachi vatyí sanai aña ñáyivi, Soco vachi vatyí sacaqui chi ñu —catyí ra.

Tyicuan ta cuahan coyo ra inga ñuu.

Ñu cha cuñi quihvi cuenda ra Jesús
(Mt. 8.19-22)

⁵⁷ Ta cuhva cha cachica ityi ra, quita noo ra, ta catyí ra chi ra Jesús:

—Sutu Mañi yuhu, cuñi cunyi quen chuun. Ta cuhin chuhun tandihi ri ityi cuahun —catyí ra.

⁵⁸ Yucuan ta catyí ra Jesús chi ra:

—¿Atu ndichon? Vatyí yuhu ñahri maa cha iyó chii. Ñaña iyó vehe ti. Ta saa iyó taca ti. Soco yuhu Rayi cha quichi nya gloria ñahri maa nu cava xiñi iyó —catyí ra chi ra cuan.

⁵⁹ Tyicuan ta catyí ra Jesús chi inga ra:

—Coho chihin.

Tyicuan ta nacahan ra cuan ta catyí ra:

—Tata, cuatu noo chii, na cuhun xihne cucuchi chi suti —catyí ra.

⁶⁰ Tyicuan ta ra Jesús nacahan ra ta catyí ra chi ra:

—Sandoo chi ñu ña ñohó nuu chi Nyoo natyihí maa ñu chi tahan ndiyi ñu chichi ñuhu. Soco yoho cuahan cua cahan tuhun Nyoo chihin ñáyivi nacuhva cuenda ñu chi ñu chi Nyoo na cunyaca ñaha ra chi ñu —catyí ra.

⁶¹ Tyicuan ta quichaha catyí inga ra chi ra Jesús:

—Tata, cuñi cunyi quen chuun. Soco cuhva xihna na cuhin cucahin chihin ñu vehi —catyí ra.

⁶² Tyicuan ta ra Jesús catyí ra:

—Tari noo ra tahví ñuhú chihin arado, tatu nanyehe chata ra ña quita vaha yucun nu sahá tyiño ra. Ta tyicuan caa cuví noo ra nyicón chii, tatu yihí iñi ra cha sandoo ra, ña yihí vaha

iñi ra cha cuví cunyaca ñaha Nyoo chi ra —catyí ra Jesús chi ra.

10

Nu tachí ra Jesús chi uñi xico uchi tahan ra cucahan tuhun Nyoo chihin ñáyivi

¹ Cha yaha tuhun cuan ta nacachi Sutú Mañi yo Jesús chi inga uñi xico uchi tahan ca ra. Ta tachí ra chi uvi uvi ra noo noo ityi cuahan ra tandihí ñuu ta tandihí ityi nu tahan chi cuhun ra Jesús.

² Ta catyí ra chi ra:

—Tari noo itu cahnu vavaha, tyicuan caa nu tyiño sahi. Soco ña cuaha musu. Yucuan chaha çacan ndo chi Nyoo na saquichi ca ra musu. Vatyí tyinyee ra chi ndo cahan ndo tuhun ra chihin ñáyivi.

³ Ta cuahan ndo ta nyehé ndo vatyí cua sacuhin chi ndo tari mbee mahño lobo. Vatyí lobo tuhvá ti chachí ti chi mbee. Ta tyicuan caa cucuñi ñáyivi sata si iñi ñu chi ndo.

⁴ Ta ma cuiso ndo ni yono ta ni cha quihí xuhun ndo, ni inga ityi ndichan ndo. Sanumi ndo. Ta ma cohon vaha ndo ityi ndatuhun ndo tuhun cha ñima ri tuhun.

⁵ Cuhva cha quihvi ndo chichi vehe noo ñáyivi, çahan vaha ndo chihin ñu. Ta catyí ndo, na coo cha vaha añima ñu.

⁶ Ta tyicuan caa tatu iyó ñáyivi vaha vehe cuan, ndoo cha vaha cuan chihin ñu. Soco tatu yori ñu vaha añima, ma ndoo cha vaha chihin ñu.

⁷ Ta ndoo ndo suri maa vehe cuan. Tatu chaha ñu cha cachi ndo, çachi ndo. Tatu chaha ñu cha coho ndo, çoho ndo yucuan. Vatyí ra sahá tyiño, iyó ityi chi ra cha cachi ra cha sahá ganaa ra. ñin ri maa vehe cuan cunyaa ndo nyacua nya cha chaa chi quivi cha cuhun ndo inga ñuu.

⁸ Ta nu chaa ndo noo ñuu ta vaha cahan ñu chihin ndo, çachi ndo ta çoho ndo tandihí cha cuhva ñu chi ndo.

⁹ Ta sanduvaha ndo chi ñu cuhvi ñuu cuan. Ta catyí ndo chi ñu: “Cha

nyañaa yatyin Nyoo ra cunyaca ñaha añima ndo.”

¹⁰ Soco tatu chaa ndo noo ñuu ta ña cuñí ñu tyasoho ñu tuhun cahan ndo, quita ndo ityi cahnu. Ta catyí ndo chi ñu:

¹¹ “Nyacua nya ñiyaca ñuu ndo cha iñi chaha ndi, ta cunaquisi ndi. Vatyí tari noo seña vatyí ndoo cuatyí ndo siqui ndo. Vatyí Nyoo nyañaa yatyin ra chi ndo ta ña tyasoho ndo tuhun cahan ra yoso caa cuñí ra cunyaca ñaha ra añima ndo.” Tyicuan caa catyí ndo chi ñu —catyí ra Jesús chi ra nyicón chi ra.

¹² Ta quichaha catyí tucu ra chi ra:

—Quivi tachi tuñi Nyoo chi ñáyivi, yaha ca cuhva cunyehe ñáyivi ñuu cuan tundoho, ta ñima ca ñáyivi chiyo ta cha naha ñuu Sodoma, ñu chihí cha catyí cuatyí ñu —catyí ra Jesús.

Ñáyivi ña tyasohó tuhun cahan ra Jesús cunyehe ñu tundoho

(Mt. 11.20-24)

¹³ Ta catyí ra:

—¡Ndahvi nyoho, ñáyivi ñuu Corazín! Ta ¡ndahvi nyoho, ñáyivi ñuu Betsaida! Vatyí nyehé ndo nyatu cahnu, ta ña nasamá ndo cuhva iyó ndo. Soco ñáyivi ñuu Tiro ta ñuu Sidón cha sanaa Nyoo ta cha naha cha cuenda cuatyí ñu, ñahri nyatu cahnu nyehé ñu. Soco tyehe ta nyehé ñu quivi cuan cha nyehé nyoho vityin, tañi tyehe ri ndihvi noo ñu sahna tucuihya iñi ta cunyaa ñu nu ñiyaa. Tari cuhva costumbre iyó maa ñu, noo seña vatyí ndu uvi iñi ñu cuatyí ñu cuví cuan.

¹⁴ Yucuan chaha, nyoho ñuu Corazín chihin ñuu Betsaida, ñihi ca cutachi tuñi Nyoo chi ndo ican saha ñáyivi Tiro ta ñáyivi Sidón cuan.

¹⁵ Ta nyoho ñu ñuu Capernaum, cuñí maa ndo vatyí cundaa ndo nyacua nya andivi. Soco cunoo ndo nyacua nya anyaya, vatyí ña quichaha ndo tuhun Nyoo —catyí ra Jesús.

¹⁶ Ta catyí ra chi ndi uñi xico uchi tahan ra cuan:

—Ñáyivi cha tyasohó tuhun cahan nyoho, tuhun cahan yuhu tyasohó

ñu cuví cuan. Ta ñu ña quichahá tuhun cahán nyoho, tuhun cahán yuhu ña quichahá ñu cuví cuan. Ta ñu ña quichaha tuhun cahán yuhu, tuhun cahán ra cha saquichí chii, ña quichahá ñu cuví cuan —catyí ra Jesús chi tandihí ra.

Nu nachaq coyo ndi uñi xico uchi tahan ra cha chichahān tuhun Nyoo

¹⁷ Yucuan cuví nu nachaq coyo ndi uñi xico uchi ra cha chichahān tuhun Nyoo chihin ñáyivi. Ta sñi xaan cacuví chi ra. Ta cacatyí ra chi ra Jesús:

—Sutu Mañi yuhu, nyacua nya tatyí ña vaha ta quichahá tuhun cahán ndi tatu cahán ndi sivun —catyí ra.

¹⁸ Tyicuan ta catyí ra Jesús chi ra:

—Ay, yuhu nyehí andivi nu cana cava cuihna, ra nañi Satanás. Tari noo tacha, tyicuan caa cana cava ra.

¹⁹ Ta yuhu, चाहि fuerza chi ndo vatyí cuví chasaha ndo chi ra ña vaha cuan. Ta cuví cuaca chaha ndo siqui coo ta tisuhma, ta ñahri cha cuvi chi ndo.

²⁰ Soco ma sñi xaan cuvi chi ndo vatyí cuví tava ñehe ndo tatyí ña vaha cuan. Sñi ca cuvi chi ndo vatyí nyaá sivi ndo nu libru Nyoo —catyí ra Jesús.

Nu sacahnú ra Jesús chi Nyoo vatyí sñi cuñi ra vatyí sañahá Nyoo tuhun vaha chi ñu ndahvi

(Mt. 11.25-27; 13.16-17)

²¹ Cuhva cuan sñi xaan cuñi ra Jesús sahá Tatyí Ii Nyoo, ta catyí ra:

—Sacahní chuun, Sutu Mañi yuhu, vatyí nyacá ñahun andivi ta ñuhu ñayivi. Vatyí maun sañahún tuhun maun chi ñu ndahvi ihya. Ta ña sañahún chi ra chitó ta ra cha chiñi tuñi. Tyicuan caa Sutu Mañi yuhu vatyí tyicuan caa kuhva cuñún —catyí ra Jesús.

²² Ta catyí ra Jesús chi tandihí ra sacuví tyiño nuu ra:

—Tandihí maa tuhun cuan chaha Suti chii. Yori ñohó nuu chii, noo tuhun ri maa Suti ñohó nuu chii. Ta yori ñohó nuu chi Suti, noo tuhun ri mai ñohó nui chi ra. Ta chi ñáyivi

cuñi mai sacote tuhun ra, chi ñu cuan cusacote —catyí ra.

²³ Tyicuan ta nanyehe ra chi ra cachicá noo chihin ra. Ta catyí ra chi ra:

—Sñi xaan cuñi nyoho ta ñáyivi cha iyó vityin vatyí nyehé ndo cha sacuví.

²⁴ Vatyí cuaha xaan rey ta ra profeta Nyoo ta cha naha cuñi ra nyehe ra cha nyehé nyoho vityin. Soco ña nyehe ra. Ta cuñi ra cuiñi ra tuhun cha chiñi nyoho vityin. Soco ña chiñi ra —catyí ra Jesús.

Nu sañaha ra Jesús chi yo vatyí tahan chi tyinyee yo chi ñáyivi savahari

²⁵ Tyicuan ta chaq noo ra sacuahá cuenda ley vehe ñuhu. Ta quichaha ndaca tuhun ra chi ra Jesús, Vatyí nducu nyehe ra chi ra. Ta catyí ra:

—Maestro, ¿yoso caa cunyacuvi ta cuhin nu coi noo ñayivi cha ma naa ca maa?

²⁶ Tyicuan ta nacahan ra Jesús, ta catyí ra:

—¿Ñáá catyí nu ley? ¿Yoso caa tuhun cha sacuahún?

²⁷ Tyicuan ta nacahan ra sacuahá cuenda ley cuan ta catyí ra:

—Catyí ley, cuñi yo chi Nyoo chihin tandihí añaima yo ta chihin cha nñi iñi yo, ta chihin tandihí fuerza yo, ta chihin cha tandihí cha chiñi tuñi xiñi yo. Ta cuñi yo chi ñáyivi tahan yo tari cha cuñi yo chi maa yo. Tyicuan caa catyí chi —catyí ra cuan.

²⁸ Tyicuan ta catyí ra Jesús chi ra:

—Ndicha cha cahún. Tyicuan caa sacuvun ta cacu añaimon ta coun ñayivi cha ma naa ca maa —catyí ra Jesús.

²⁹ Soco ra sacuahá cuenda ley cuan cuñi ra savaha ra chi ra, ta quichaha catyí tucu ra chi ra Jesús:

—¿Yóó cha cuví ñáyivi tahn? —catyí ra.

³⁰ Tyicuan ta nacahan ra Jesús, ta catyí ra:

—Noo ra quitā ra Jerusalén ta cuahan ra nya ñuu Jericó. Ta tahan ra chi ra suhu. Ta suhu ra tandihí cuii maa cha nyiso ra, nyacua nya sahma ra. Ta cañi ra chi ra nyacua chacun

taxin ra chi ra. Ta sandoq maa ra chi ra yucuan.

³¹ Tyicuan ta yaha noo tata sutu ityi cuan. Soco cuhva cha nanyehe ra chi ra catuvi cuan nya sava ri yaha ra.

³² Tyicuan ta yaha tucu nonga ra cha yihí cuenda vehe ñuhu, cha nañí levita. Soco cha nanyehe ra chi ra catuvi cuan suri nya sava ri yaha ra.

³³ Tyicuan ta quichi tucu noo ra Samaria. Ta cua yaha tucu ra suri ityi cuan. Ta nanyehe ra chi ra catuvi yucuan, ta quichi nundahvi cuñi ra nyehe ra chi ra.

³⁴ Ta tuhva ra nu catuvi ra, ta quichaha saha ra tatan chi ra. Ta tyihí ra aceitye ta vinu nu cahvi chi ra. Ta sahví ra noo sahma chata ra. Yaha cuan ta sandaa ra chi ra burru sana ra, ta naquehen ra chi ra, ta cuahan ra chihin ra nu nyaá noo vehe. Ta yucuan saha cuenda ra chi ra.

³⁵ Ta cha inga quivi cha cuñi cuhun ra Samaria cuan. Ta tava ra uvi tahan xuhun. Ta chaha ra chi chitoho vehe cuan. Ta catyí ra chi ra: “Saha cuenda vahun chi ra ihya. Ta cuhvon cha cachi ra. Ta sañon tatan chi ra na nduvaha ri ra. Tatu cuñi ca chi xuhun, tyiyahvi mai chuun nandichi”, catyí ra. Yucuan ta cuahan ra —catyí ra Jesús.

³⁶ Nu ndihí nacatyí ra Jesús tuhun ihya, quichaha ndaca tuhun ra chi ra sacuahacuan, ta catyí ra:

—Vaha. ¿Chichi cha uñi tahan ra cuan, nya ra cuví ra tahan ra ndahvi cuan? —catyí ra Jesús.

³⁷ Tyicuan ta quichaha catyí ra sacuahacuan:

—Ra cha cundahvi cuñi chi ra —catyí ra.

Tyicuan ta quichaha catyí ra Jesús:

—Cuahan ta sacuvi tucu yoho tyicuan caa chihin ñáyivi cha iyó tundoho chii —catyí ra.

Nu chinyaq ra Jesús vehe cu Marta chihin cu María

³⁸ Ta quehen ra Jesús ityi cuahan ra. Ta chaq ra noo ñuu. Ta yucuan iyó noo ñaha cha nañí Marta. Ta chaq ra vehe ña.

³⁹ Ta cu Marta iyó noo cuhu ña cha nañí María. Ta cu María chicunyaq ña yatyin ri chaha ra Jesús, vatyí cuiñi ña tuhun cahán ra.

⁴⁰ Soco cu Marta cuaha xaan tyiño nyaá sacuvi ña. Ta chaq ña nu nyaá ra Jesús, ta quichaha catyí ña chi ra:

—Tata. ¿Atu ña chicá xiñi yoho vatyí cuhi sandoq maa ña chii chihin tyiño? Catyí chi ña na tyinyee ña chii —catyí ña chi ra.

⁴¹ Soco ra Jesús catyí ra chi ña:

—Marta, Marta, chicá xaan xiñun ta cutyiño xaan cuñún chihin tyiño chiña.

⁴² Soco iyó noo tuhun cha tahan chi caca xiñi yo. Ta cu María ihya nacachi ña tyiño vaha ca sacuvi ña cha tyasohó ña tuhun cahín. Ta yuhu ma cuvi tinyai chi ña —catyí ra Jesús chi cu Marta.

11

Nu sañaha ra Jesús chi ra cachicá noo chihin ra yoso caa cacan tahvi ra chi Nyoo

(Mt. 6.9-15; 7.7-11)

¹ Cuví noo chaha cha chicán tahvi ra Jesús. Ta cuhva cha ndihí chican tahvi ra, ta quichaha catyí noo ra chicá noo chihin ra chi ra:

—Sañaha chi ndi yoso caa cacan tahvi ndi chi Nyoo. Tari sañaha ra Juan chi ra chica noo chihin ra —catyí ra.

² Tyicuan ta catyí ra Jesús chi ra:

—Cua cuhve cuhva chi ndo yoso caa. Tyehe caa cacan tahvi ndo:

Sutu Mañi yuhu, yoho cha nyaun andivi. Sacahnu xaan ndi chuun.

Na quichi quivi cha nyaca ñahun ihya siqui ñuhu ñayivi.

Na sacuvi ñayivi ihya siqui ñuhu ñayivi tandihí cuhva cuñi maun, tari cuhva cuví gloria.

³ Cuhva cha cachi ndi tacuhva yoso cuhva yaha ndi noo noo quivi.

⁴ Saha tucahnu iñi chi ndi. Tari maa ndi sahá ndi tucahnu iñi chi ñu tasi iñi chi ndi.

Ma cuhvon cha nducu nyehe ra ña vaha chi ndi, soco sacacu chi

ndi tacuhva ma sacuvi ndi cu-
atyí nuun.

Tyicuan caa cacán tahvi ndo —catyí
ra Jesús.

⁵ Ta catyí tucu ra ñandíhi:

—Saha yo tuhun tyi nyoho iyó noo
amigon, ta chaa ra vehun cha ñuu ta
catyí ra chuun: “Xaa, saha tumañi iñi
chii, cuhva noo uñi tahan pan chii.

⁶ Vatyí noo ra tahin nichaa ra vehi.
Ta cañi xaan quichi ra. Ta ñahri maa
cha iyó chii cuhve chi ra.”

⁷ Ta yoho cunacahun ta catyun chi
ra: “Ma sayangon chii, ndee. Vatyí
nyasí yuvehi. Ta ñiquixi chihin sehi.
Ta ña cuví nducuite ta cuhve cha
cuhve chuun cha vityin.” Tyicuan
caa cucatyun chi ra.

⁸ Ta catyí yuhu chuun. Vasi ra
tahun cuví chi ra, ma nducuiton ta
cuhvon chi ra cha numi ri. Soco tatu
ndo ra yucuan, ta ma cundihñi ra
cacán ra chuun, sacachan ra yuve-
hun ta cana chaa ra chuun tacuhva
cha ma cuví cusun, ta cundihñun
cha sacachan ra yuehun, tyicuan ta
nducuiton ta cuhvon chi ra, tacuhva
cha ma sayanga ca ra chuun.

⁹ Ta tyicuan caa tucu nyoho, cacán
ndo chí Nyoo. Ta cuhva ra chí ndo.
Ñanducu ndo ta ñihi ndo. Sacachan
ndo yuvehe ta nuña.

¹⁰ Vatyí tatu chican ndo, ñihi ndo.
Tatu nducu ndo, ñihi ndo. Ta tatu
sacachan ndo yuvehe, nuña yuvehe.

¹¹ Tyicuan caa tucu nyoho cha iyó
sehe ndo. Chahá ndo cha vaha chí
sehe ndo. Ña tuhvá ndo chahá noo
yuu chí sehe ndo tatu chican ndotyín
pan. Ta ña tuhvá ndo chaha ndo noo
coo chí sehe ndo, tatu chicán ndotyín
tiyaca.

¹² Ta ña tuhvá ndo chaha ndo noo
tisuhma chí sehe ndo tatu chicán ndo-
tyín ndiví cachi ndotyín.

¹³ Nyoho cha quiñi iyó ndo, soco
chitó ndo yoso caa cuhva ndo cha
vaha chí sehe ndo. Ta vihi ca Sutu
Mañi yo cha nyaá andiví, cuaha ca
cha vaha cuhva ra chí ndo tatu cacán
ndo chí ra. Ta cuhva ra Tatyí Ii ra
cunyaa ñima ndo.

*Ra xaan iñi chí ra Jesús catyí ra
vatyí chihin fuerza cuhna sacuví ra
milagru*

(Mt. 12.22-30; Mr. 3.20-27)

¹⁴ Ra Jesús tavá ra tatyí ña vaha cha
yihí chí noo ra cha ñihi sahá cuhna.
Ta cuhva cha quita tatyí ña vaha cuan
chí ra ñihi cuan, nacahan ra. Tyicuan
ta ñáyiví, iyo xaan cuñí ñu.

¹⁵ Ta yihí ñu catyí ñu:

—Ra ihya, tavá ra tatyí ña vaha soco
chihin fuerza ra Beelzebú ra cuví nuu
chí cuhna —catyí ñu.

¹⁶ Ta yihí ñu cuñí ñu nducu nyehe
ñu chí ra, ta chicán ñu chí ra Jesús
na savaha ra noo seña chí ñu chihin
tunyeé iñi Nyoo.

¹⁷ Soco ra Jesús chitó ra tuhun chicá
xiñi ñu. Ta quichaha catyí ra chí ñu:

—Tatu gobiernu ta cacusiñ ra,
cuaha ri ityi nanduvi ra, cucañi tahan
ra chihin tahan ra, ta cundihí tuhun
cha cunyaca ñaha ra. Tatu noo vehe
ta cacusiñ ñu chihin tahan ñu, cutiví
nu nyicú ñu.

¹⁸ Ta tyicuan caa tucu cuhna. Tatu
tandíhi ra cacusiñ ra chihin tahan
ra cundihí fuerza cha iyó chí ra. Ta
ihya catyí chí ndo tyehe caa vatyí
nyoho catyí ndo vatyí chihin fuerza
ra Beelzebú tavé tatyí ña vaha.

¹⁹ Soco tyehe ta tavé tatyí ña vaha
tari cuhva catyí ndo, ndaca tuhun
ndo chí ra nyicú chihin ndo yóo chí
fuerza tavá maa ra tatyí ña vaha. Maa
ra sacoto ra chí ndo cha ndicha vatyí
nyoho tondo ri chicá xiñi ndo.

²⁰ Soco catyí chí ndo vatyí yuhu
tave tatyí ña vaha chihin fuerza
Nyoo. Ta cuñí chí catyí cuan vatyí
ndicha cuí Nyoo ra nyacá ñaha ñima
ñáyiví cha chaa ra nu nyicú ndo.

*Nu sañahá ra Jesús vatyí ñihi ca
fuerza Nyoo ta ñima ca fuerza cuhna*

²¹ Tatu noo ra iyó vavaha fuerza
chí ra ta nyisó ra mityí ra, ta sahá
cumi ra vehe ra. Ñohó xehe vaha
ndaha tyiño ra chichi vehe ra tacuhva
cha ma cuví tinyaa ra suhu.

²² Soco tatu quichi inga ra cha
cuaha ca fuerza iyó chí, ta cañi tahan

ra chihin ra, ta cuvi chasaha ra chi ra, tyicuan ta tinyaa ra ndaha tyiño ra, ta sachá ra chi ra tahan ra.

²³ Ñáyivi ña sahá tyiño chihin, sativi ñu tyiño sahí. Ta ñu ña tyinyeé chii cha cahán ñu tuhun Nyoo chihin ñáyivi, cuñí chi catyi vatyí ña chahá ñu cha coto ñáyivi tuhun cahín.

Nu sañahá ra Jesús chi yo yoso caa ndichi tucu tatyí ña vaha inga chaha tatu naa iñi yo chi Nyoo

(Mt. 12.43-45)

²⁴ Tatu noo tatyí ña vaha quita chi noo ñáyivi, chicá noo chi noo ñuhu ityi, nanducú chi noo nu nyitatu chi. Soco ña nañihi maa chi nu nyitatu chi, tyicuan ta ndichi xiñi chi: “Cunuhu tiqui nya vehi nu quite.”

²⁵ Yucuan ta nachaa chi añima nu quita chi. Ta nanyehé chi vatyí ndii xaan ta vii xaan.

²⁶ Tyicuan ta cua naquehen chi ucha ca tahan tatyí ña vaha cha yaha ca cuhva ta ican saha maa chi. Tyicuan ta ñin ri quihvi tandihi chi añima ñu cuan. Yucuan chaha yaha ca cuhva nanduvi ñu ican saha cha cuvi maa ñu —catyi ra Jesús.

Ñu cha ndicha iyó vaha ñáyivi

²⁷ Cha ñi ri ca cha cahán ra Jesús tuhun cuan, ta caná chaa noo ñaha cha ñohó mahñu ñáyivi cuan. Ta quichaha catyi ña:

—Ñana cha sii cuví chi ñaha cha sacacu chuun ñaha cha chahá caxun —catyi ña.

²⁸ Soco ra Jesús catyi ra:

—Sii ca cuñí ñu cha chiñí tuhun cahán Nyoo ta quichahá ñu —catyi ra.

Ñáyivi ña vaha, maa ri maa nyatu cahnu cuñí ñu nyehe ñu

(Mt. 12.38-42; Mr. 8.12)

²⁹ Tyicuan ta chaá coyo ñáyivi nu nyaá ra Jesús. Ta quichaha catyi ra chi ñu:

—Ñáyivi cha iyó vityin quiñi xaan iyó ñu. Ta nyiyo iñi ñu. Cuñí ñu nyehe ñu seña ta cha iyo. Soco noo ri cunyehe ñu, tahan cha sacuvi Nyoo chihin ra Jonas.

³⁰ Tari ra Jonás cuvi ra seña chi ñáyivi ñuu Nínive ta cha naha, tyicuan caa tucu yuhu Rayi cha quichi nya gloria, cuví tari noo seña chi ñáyivi cha iyó vityin.

³¹ Quivi tachi tuñi Nyoo chi ñáyivi cunandoto ñaha cuví reina ityi sur ta cha naha, ta cucatyí ña vatyí cuhun ndo anyaya, vatyí maa ña vasi cañi ñuu ña, soco quichi ña, quichi tyasoho ña tuhun cha chiñi tuñi cahán ra Salomón. Ta ihya cahnu ca cuví ra cha cahán chihin ndo vityin ta ñima ca ra Salomón.

³² Ta quivi cutuñi chi tandihi ñáyivi, cunducuita ñu chiyo ñuu Nínive ta cha naha, ta cucatyí ñu vatyí nyoho ñu cha iyó vityin cuhun ndo anyaya, vatyí maa ñu ñu Nínive, canasama ñu cuhva iyó ñu quivi cahán ra Jonás tuhun Nyoo chihin ñu. Ta vityin yuhu ra cahnu ca cahán chihin ndo ta ñima ca ra Jonás.

Nu sañahá ra Jesús vatyí na saha yo cuenda añima yo coto vaha ñahri cha ndichin Nyoo nyaá

(Mt. 5.15; 6.22-23)

³³ Yori ndo tyaa ndo lámpara ta tyihi xehe ndo, o tyihi ndo chichi noo caja. Vatyí ñuhu cuan tahán chi coso minoo nu sucun. Tacuhva quihvi ñáyivi vehe ndo, soco ndichin.

³⁴ Chiti nuu ndo noo cha sandichin chi ndo cuví. Ta tyicuan caa tucu añima ndo, tatu iyó cha ndichin Nyoo añima ndo, vaha ñáyivi cuví ndo. Tatu ñahri cha ndichin Nyoo nyaá tari noo ra cuaa cuví ndo, ña cuví nyehe ndo ityi vaha cha cuahan nu nyaá Nyoo.

³⁵ Yucuan chaha saha ndo cuenda añima ndo. Tatu nyaá cha ndichin Nyoo chihin ndo, o nyaá cha ñaa iñi.

³⁶ Tatu tyitu añima ndo chihin cha ndichin Nyoo ñahri ca maa noo nu ñaa iñi iyó chi ndo, vatyí sandichin chi tandihi ndo. Tari cha nyaá noo lámpara sacatá chi ñuhu chi ndo cuví cuan —catyi ra Jesús.

Cahán ra Jesús chi ra casacuaaha cuenda ley vehe ñuhu ta chi ra fariseo,

ra caquichaha xaan ley cuan

(Mt. 23.1-36; Mr. 12.38-40; Lc. 20.45-47)

³⁷ Cuhva cha ndihí cahan ra Jesús nuu ñáyiví, noo ra fariseo, ra quichaha xaan ley vehe ñuhu, catyí ra chí ra Jesús, vatyí na cuhun ra cucachi ra nya vehe ra. Ta chaá ra Jesús vehe ra. Ta quihví ra chicunyaa ra mesa.

³⁸ Tyicuan ta ra fariseo cuan iyo cuñí ra vatyí ña nacatyá ra Jesús ndaha ra, tari cuhva costumbre maa ñu cha cumañi cachi ñu.

³⁹ Soco ra Jesús catyí ra chí ra:

—Nyoho, ra cacuví fariseo, tari cha chata ri vaso ta coho sanduvii nyoho. Soco ityi chichi, quiñi caa. Vatyí ña nacatyá ndo. Tyicuan caa nyoho. Vatyí cuñí ñáyiví vatyí vaha ñáyiví cuví ndo. Soco xehe ri suhu ndo ta ña sacuví ndo cha vaha.

⁴⁰ Ndava xaan iñi ndo. ¿Atu ña chitó ndo vatyí ra cha savahá ityi chata vaso, suri maa ra savahá ityi chichi? Vatyí tari vaso cuví ndo.

⁴¹ Tahán chí sahá ndo tumañi iñi chí ñáyiví, ta tyinyee ndo chí ñu. Sacuvi ndo cha vaha chihin ñu, tyicuan ta nduvii tucu ityi chichi ndo.

⁴² ¡Ndahvi nyoho ra fariseo! Vatyí nyoho vasi vaha chaha ndo diesmo chí Nyoo cuenda yucu cha nañi menta ta ruda ta ñáá ndihí ca yucu cha tachí ndo, soco ña quichahá ndo cuhva cha vaha cha cuñí Nyoo sacuvi yo, ta cha cuñí yo chí ra. Ta ican ihya cuví cha tahán chí sacuvi ndo, soco ma sandihí ndo cha cuhva ndo diesmo ñandihí.

⁴³ ¡Ndahvi nyoho cha cuví ndo fariseo! vatyí cuñí ndo cunyaa ndo nu tyayu vaha ca chichi vehe ñuhu. Ta cuñí ndo cha saha ñáyiví ñáyiví chí ndo nuyahvi.

⁴⁴ ¡Ndahvi nyoho ra sacuahá cuenda ley, ta nyoho ra fariseo! Vaha sahá ndo chí ndo, soco cuví ndo tari noo ñaña ndiyí cha ña quetuví. Vatyí yahá ñáyiví siqui soco ña chitó ñu ñáá cha ñohó chichi ñaña cuan. Vatyí ñahri seña catuví nu yihí ndiyí cuan. Cuñí maa ñu vatyí vaha ndo, soco ña chitó

ñu vatyí ña vaha ña ñima ndo —catyí ra Jesús.

⁴⁵ Tyicuan ta nacahan noo ra sacuahá cuenda ley vehe ñuhu, ta catyí ra:

—Maestro, cha catyún tyehe caa, nañi tucu chiin chí nyuhu —catyí ra.

⁴⁶ Tyicuan ta quichaha catyí ra Jesús chí ra:

—¡Ndahvi tucu nyoho ra casacuaha cuenda ley vehe ñuhu! Vatyí sanducua ha ca ndo ley cha tachí Nyoo ta cha naha. Ta ña tahán chí. Ta yori ndoyó carga cuan, ta saniñi ndo na sacuvi ñu ta ni maa ndo ni chiin ña tyinyee ndo chí ñáyiví.

⁴⁷ ¡Ndahvi nyoho! Vatyí sanduvahá vaha ndo ñaña nu ñohó yiqui ra profeta Nyoo cha cachahñi sutu chahnu ndo ta cha naha.

⁴⁸ Chihin cuan cuñí chí catyí vatyí ndoó ndo vaha cha sacuvi sutu chahnu ndo ta cha naha. Vatyí sutu ndo cachahñi ra chí ra profeta Nyoo. Ta nyoho sanduvahá ndo ñaña ra.

⁴⁹ Yucuan chaha catyí Nyoo ta cha naha vatyí cutachi ra suhva ra profeta ta ra caca tyiño ra nu nyicú ndo. Ta cucahñi ndo suhva ra ta inga ra cusacono ndo chí ra.

⁵⁰ Ta ndicha tyicuan caa sacuvi ndo. Nyoo cutachi tuñi ra chí ndo cha cuenda tandihí ra profeta ra cachahñi sutu chahnu ndo nyata chinó ñuhu ñáyiví ta nyacua nya vityin.

⁵¹ Nyacua nya niñi ra Abel cha chati cha chahñi ra Caín yañi ra, ta nyacua nya niñi ra Zacarías cha cachahñi ñu chichi vehe ñuhu yatyin nu nyaa arta. Yucuan chaha catyí Nyoo vatyí cutachi tuñi ra chí ñáyiví cha iyó vityin cha catyí cuatyí ñu chiyo ta cha naha.

⁵² ¡Ndahvi nyoho ra casacuaha cuenda ley vehe ñuhu! Vatyí tari cha tyihí xehe ndo ndaha ticu cuenda yuvehe nu quihví ñáyiví ityi Nyoo. Ta ni maa ndo ña quihví ndo nu nyaá Nyoo. Ta ni ri ña chahá ndo cha quihví inga ñáyiví cha cuñí quihví —catyí ra Jesús.

53-54 Ndihi cahan ra Jesús tuhun cuan, ta quita ra. Soco ra casacuaha ley vehe ñuhu chihin ra fariseo, nduxaan xaan ra ta quichaha cuquiñi cuñi ra nyehe ra chi ra Jesús. Ta canducu ra cuhva yoso caa cahan ra Jesús noo tuhun ña vaha, ta tyaa ra cuatyí siqui ra.

12

Nu sañahá ra Jesús vatyí ma cuví tixehe yo cuatyí yo

¹ Cuenda mil ñáyivi ndu ñin ri nyacua nañi tahan ñu, vatyí cuaha xaan ñu. Tyicuan ta ra Jesús catyí xihna ca ra chi ra cachicá noo chihin ra:

—Saha ndo cuenda chi ndo chihin ra fariseo coto sandahvi ñaha ra chi ndo. Vatyí tari ndaa pan chihin yuchan iya, tyicuan caa cuví cuatyí ra tyi sahá ra tyi vaha ra. Soco ma cuví tixehe ra cuatyí ra.

² Vatyí ñahri noo cha ñohó xehe ta cuñún, tyi ma natuvi, ta ñahri cha xehe ta cuñun, vatyí ma coto ñáyivi.

³ Yucuan chaha ñáá ndihi tuhun cha cahán ndo nu xehe, cuquita chi nu ndichin. Ta ñáá ndihi tuhun cha cahan ndo chichi vehe ndo, cucuiñi tandihi ñáyivi noo quivi.

¿Yóo chi tahán chi cuyuhvi yo, chi ñáyivi o chi Nyoo?

(Mt. 10.28-31)

⁴ "Ta catyí chi ndo cha cuví ndo ra tahin, vatyí ma yuhvi ndo chi ra chahñi coño ñuhu ri. Vatyí yaha tuhun cuan ta ñahri ca cha cuví sacuvi ra.

⁵ Soco cua catyí chi ndo yóo chi tahán chi cuyuhvi ndo. Yuhvi ndo ta quichaha ndo, soco chi maa Nyoo ra cuví tinyaa ñáyivi ndo. Ta yaha cuan ta cuví tyihi ra añima ndo anyaya.

⁶ 'Saa, ña yahvi nyaá ti. Cuví sata yo ohon tahan ti chihin uvi ri xuhun. Soco vasi nyihi ri ti, Nyoo ña naa iñi ra chi ni noo ti.

⁷ Ta nyoho, yahvi ca nyaá ndo nu Nyoo ta ñima ca cuaha saa ta nyacua nya ixi xiñi ndo ta chitó Nyoo yoso tahan nyaá. Yucuan chaha ma yuhvi ndo.

Ma yuhvi yo cahán yo tuhun ra Jesucristo nuu ñáyivi

(Mt. 10.32-33; 12.32; 10.19-20)

⁸ 'Catyí chi ndo vatyí nya ndo cahán ndo tuhin chihin ñáyivi, tyicuan caa tucu cucahin tuhun ndo nuu ángel Nyoo gloria. Vatyí yuhu Rayi cha quichi nya gloria cuví.

⁹ Soco nya nyoho cha cahán nuu ndo cahán ndo tuhin chihin ñáyivi, tyicuan caa tucu yuhu, ma cahin tuhun ndo nuu ángel cuenda Nyoo.

¹⁰ Ta vasi cahán ñáyivi chi yuhu Rayi cha quichi nya gloria, Nyoo cusaha ra tucahnu iñi chi ñu. Soco yóo cha cahán ña vaha siqui Tatyí Ii Nyoo ma ñihi ñu tucahnu iñi cuenda cuan.

¹¹ 'Cuhva cha cunyaca ñáyivi chi ndo chichi vehe ñuhu, o nu juez, o nuu ra cuví tyiño, ma caca xiñi ndo ñáá tuhun cunacahan ndo.

¹² Vatyí cuhva cha cua nacahan ndo, yucuan cuhva cuhva maa Tatyí Ii Nyoo ñáá tuhun tahán chi nacahan ndo —catyí ra Jesús.

Nu chahá ra Jesús cuhva vatyí ña tahán chi cunyicon yo cha tyayii

¹³ Noo ra cha ndihi chihin ñáyivi cuaha cuan, catyí ra chi ra Jesús:

—Maestro, catyí chi yañi vatyí natahvi sava ra cha tyayii cha sandoo sutu ndi chi ndi —catyí ra.

¹⁴ Tyicuan ta catyí ra Jesús chi ra:

—¿Yóo cha tyiso chi yuhu cha cuví juez ta catyí ndo vatyí tahvi sava yuhu cha chii ndo? —catyí ra.

¹⁵ Tyicuan ta quichaha catyí tucu ra:

—Saha ndo cuenda ta ma nyiyo iñi ndo cha tyayii. Vatyí ña chiñuhú ri cha coo cuaha ndaha tyiño yo tacuhva coo vaha yo ñáyivi —catyí ra.

¹⁶ Tyicuan ta chaha ra Jesús noo cuhva ihya chi ñu:

—Chiyó noo ra tyayii. Ta cuaha xaan tyiño sahá ra iyó.

¹⁷ Tyicuan ta ndichi xiñi ra: "¿Yoso caa cusacuvi? Ñahri nu naquehen vahi tandihi tyiño sahi.

¹⁸ Soco cha chité yoso caa cunyacuvi. Cusatani yaca nyihi nu

yihí niñi, vatyí nyihi xaan. Ta cusavahi cha nahnu ca. Ta yucuan cunaquehen vahi tandihí maa niñi cha cuquita nu iyó tyiño sahi.

¹⁹ Tyicuan ta cuaha cuiya ma saha tyiño que. Cunyatati ta cusii cuñi. Ta cachi vahi. Ta cucoho vahi”, ndichi xiñi ra.

²⁰ Soco catyí Nyoo chi ra: “Tondo xaan iyón. Vatyí vityin cha cuaa cucúvun. Ta cha cumí vahun ¿yóó chi cua ndoo?”

²¹ Tyicuan caa cuvi chi ñáyiví cha sacayá tandihí cha tyayii soco ñahri maa iyó chi ñu nuu Nyoo —catyí ra Jesús.

Ma caca xaan iñi yo ñáá ndihí cha chiñuhú chi yo

(Mt. 6.25-34)

²² Tyicuan ta quichaha catyí ra Jesús chi ra cachicá noo chihin ra:

—Catyí chi ndo, vatyí ma caca xaan xiñi ndo yoso caa ñihi ndo cha cachi ndo, ta tuhun sahma cuihno ndo.

²³ Vatyí yahvi ca nyaá ñayiví yo ican saha cha cachi yo. Ta yahvi ca nyaá coño ñuhu yo ican saha cha cuihno yo.

²⁴ Saha ndo cuenda saa vatyí ña sahá tyiño ti. Ta ni ri ña naquehén vaha ti cha cachi ti. Soco chachí ti, vatyí Nyoo chahá ra cha cachi ti. Ta nuu Nyoo yahvi ca nyaá nyoho ta ñima ca saa.

²⁵ Ta vasi chicá xaan xiñi ndo soco ma cuvi sandusucun ca ndo ni chiin ca chi ndo.

²⁶ Tatu ni chiin cuan ña cuví chi ndo, ¿ñáá tuhun cha chicá xaan xiñi ndo tuhun tandihí ca cha chiñuhu chi ndo?

²⁷ Saha ndo cuenda yoso caa iyó tu ita vatyí ña sahá tyiño tun. Soco catyí chi ndo vatyí ni rey Salomón chihin tandihí cha tyayii ra ta ña tyaqui cha ñihnó ra tari cha sacuihno Nyoo chi tu ita cuan.

²⁸ Tatu tyicuan caa sacuihnó Nyoo chi tun ita cha iyó nu chiqui vityin, ta tyaan cucayu tun chichi horno, ta nyaca cuví chi nyoho ta ma sacuihno ra. Soco maa ndo ña chinó vaha iñi ndo chi ra.

²⁹ Ma caca xaan xiñi ndo tuhun cha cachi ndo ta cha coho ndo.

³⁰ Vatyí ñáyiví cha ña chinó iñi chi Nyoo chicá xiñi ñu tuhun ihya. Soco nyoho chinó iñi ndo chi Sutu yo Nyoo ta maa ra chitó ra ñáá cha chiñuhú chi ndo.

³¹ Vaha ca cha nanducu ndo yoso caa nacuhva cuenda ndo chi ndo chi Nyoo vatyí cunyaca ñaha ra añaima ndo. Ta tyicuan caa ta ñihi ndo tandihí cha chiñuhú chi ndo.

Cha vaha cha iyó gloria

(Mt. 6.19-21)

³² Ma yuhvi nyoho, mbee sane. Vasi ña cuaha ndo soco Sutu yo Nyoo cuñí ra chi ndo. Yucuan chaha cucuhva ra quihvi ndo nu nyacá ñaha ra.

³³ Xico ndo cha iyó chi ndo. Ta cuhva ndo chi ñu ndahvi. Tatu sacuví ndo tyehe caa, sacayá ndo cha vaha nuu Nyoo cuví cuan. Vatyí nuu Nyoo ña ndihí cha vaha cuan. Vatyí ni ri ra suhu, ni quiti, yori cha sativí iyó yucuan.

³⁴ Vatyí nuu cunyaa cha tyayii ndo, yucuan cuví nu nyaá xiñi ndo. Ta yucuan cucunyaa añaima ndo —catyí ra.

Nu sañahá ra Jesús chi yo yoso caa cuatu tuhva yo chi ra quivi quichi ra inga chaha

³⁵ Cuatu tuhva vaha ndo quivi quichi inga chaha.

³⁶ Ta cuvi ndo tari musu cha canyatú tuhva chi chitoho ñáá cuhva ndichi ra cha cuahan ra noo vico tandaha. Ta nyatú tuhva ra, vatyí tacuhva tañi tyehe ri nuña ra yuvehe cuhva cha sacachan chitoho ra cha nachaa ra.

³⁷⁻³⁸ Ta caa cuhva ri cuan sii xaan cuñí ra nyehe ra chi ra. Vatyí nyatú tuhva ra chi ra nyacua nya nachaa ra, vasi cha cuaa, vasi ñaa ca. Ta cuatyaa ra chi musu cuan yuhu mesa ta cacachi ra. Tyicuan ta sii xaan cucuñi musu cuan. Vatyí tyicuan caa nyacuví chitoho ra chihin ra.

³⁹ Ta coto ndo tuhun ihya vatyí tatu noo chitoho noo vehe, ta coto ra ñáá cuhva cuquihvi ra suhu vehe ra, saha ra cuenda vehe ra. Ta ma cuhva ra quihvi ra suhu cuan chichi vehe ra.

Vatyí coto quehen ra tandihí cha iyó chi ra.

⁴⁰ Ta tyicuan caa cuví tucu nyoho, cuatu tuhva ri ndo. Vatyí yuhu Rayíi cha quichi nya gloria, sana ri ñni ndo ta cuquichi —catyí ra Jesús.

Musu vaha ta musu ña vaha
(Mt. 24.45-51)

⁴¹ Tyicuan ta quichaha ndaca tuhun ra Pedro chi ra Jesús:

—¿Yóó chi cuenda cahun tuhun ihya? ¿Atu cha cuenda maa ri maa ndi, o cha cuenda tandihí ñáyiví?

⁴² Tyicuan ta nacañan ra Jesús, ta catyí ra chi ra:

—Musu cha tyasohó tuhun cahán chitoho, yucuan cuví musu vaha. Vatyí sahá cuenda ra vehe chitoho ra. Ta vaha ri cuhva chahá ra cha cachi tandihí ca musu cuan.

⁴³ Ta sñi xaan cuví chi musu cuan tatu cuhva cha sahá tyiño ra, ta nachaa chitoho ra. Vatyí quichaha ra tandihí cha tahán chi sacuvi ra.

⁴⁴ Ta catyí chi ndo vatyí cha ndicha cuví. Vatyí chitoho ra cunatyaa ra tandihí cuíi cha cumí ra ndaha ra. Vatyí vaha quichahá ra chihin tyiño sahá ra.

⁴⁵ Soco tatu chicá xiñi musu cuan vatyí naha xaan cuahan chitoho ra, ta quichaha nyacuvi ra cha ña vaha chihin ñu nyaá tyiño yoo, ta chihin ra canyicú tucu sahá tyiño cuan. Ta ña cuñí ra sahá tyiño ra. Tyiño chachí ta tyiño chihí ndixi iyó ra.

⁴⁶ Tyicuan ta sana ñni ra ta ndichi chitoho ra quiví cha ña nyatú ra chi ra noo cuhva cha ña chito ra. Tyicuan ta cutachi tuñi chitoho ra chi ra, tari tuhva maa ra chihin musu cha ña quichahá tuhun cahán ra.

⁴⁷ 'Ta noo musu cha chitó yoso caa iyó chitoho ta ña sacuvi tari cuhva cuñi chitoho ra, cuaha xaan tundoho cunyehe ra.

⁴⁸ Soco tatu noo musu cha ña chitó ta sacuvi ra cha ña vaha, tachi tuñi chitoho ra chi ra. Soco chiin ri, vatyí ña chitó ra, ta chinyacuví ra. Tatu noo musu ta cuaha cha chaha chitoho ra chi ra, cuaha tahán chi nacuhva cuenda ra chi chitoho ra. Ta ra cha cuaha xaan nyaá ndaha, cuaha xaan

tahán chi nacuhva cuenda ra chi chitoho ra.

Nu catyí ra Jesús vatyí cha catyí ra cucañi tahan ñáyiví chihin tahan ñu
(Mt. 10.34-36)

⁴⁹ 'Tari cha sanatahín ñuhu siqui ñuhu ñayiví, tyicuan caa cuví tyiño vachi. ¡Ñana cha cuñí cha nacayu catyín ri ñuhu ihya!

⁵⁰ Vatyí nyaá yahi noo tundoho cahnu, ta ñana cha nyehí tundoho nyacua nya ndihí tyiño sahí.

⁵¹ Cuñí maa ndo vatyí cha vachi cuhve cha taxi ri coo ndo siqui ñuhu ñayiví ihya. Soco yuhu vachi vatyí sasiin chi ndo.

⁵² Vatyí cha vityin ta ityi nuu ca, ohon ñáyiví noo vehe cucusiin ñu. Uñi ñu cañi tahan chihin uvi ñu. Ta uvi ñu cucañi tahan chihin uñi ñu.

⁵³ Ta ra cuví sutu, cucañi tahan ra chihin sehe ra. Ta ra cuví sehe cucañi tahan ra chihin sutu ra. Ta ñu cuví sihi cucañi tahan ñu chihin sehe ñu. Ta ñu cuví sehe cucañi tahan ñu chihin sihi ñu. Ta ñu cuví tyiso cucañi tahan ñu chihin chono ñu. Ta ñu cuví chono cucañi tahan ñu chihin tyiso ñu —catyí ra Jesús.

Nu catyí ra Jesús chi ñáyiví vatyí ña nacotó ñu vatyí cha cha quiví cha quichi Sehe Nyoo

(Mt. 16.1-4; Mr. 8.11-13)

⁵⁴ Catyí tucu ra Jesús chi ñáyiví cuaha cha nyicú yucuan:

—Tatu cha nyehe ndo vatyí cha ndihví vico, catyí ndo vatyí cua coon savi. Ta tyicuan caa cuví.

⁵⁵ Tatu cha nyehe ndo vatyí cha caá tatyí ityi tyañuhu, catyí ndo vatyí cha chaa quiví ihñi. Ta tyicuan caa cuví.

⁵⁶ Nyoho sahá ndo tyi chitó ndo, ta nacotó ndo tandihí tuhun andiví, ta tandihí tuhun ñuhu ñayiví. Soco ¿ñáá tuhun cha ña nacotó ndo ñáá tyembu nyaá ndo vityin?

Nducu yo cuhva yoso caa coo vaha yo chihin ra chicán cuatyí chaha yo coto cuhun yo vehe caa

(Mt. 5.25-26)

⁵⁷ '¿Ñáá tuhun ña sahá ndo cuenda nya cha vaha ta nya cha ña vaha?

⁵⁸Tatu noo ra chicán cuatyí chahun ta cuahun chihin ra nu nyaá ra cuví tyiño, ityi cuahun nducun cuhva ni coo vahun chihin ra cha cumañi ca chaa ndo nu nyaá ra cuví tyiño. Coto nacuhva cuenda ra chuun chi juez. Ta juez cuan cunacuhva cuenda ra chuun chi policía. Ta policía cuan cutyihi ra chuun chichi vehe caa.

⁵⁹Tatu tyicuan caa cuvi, catyí chuun vatyí ma quiton nyacua nya tyiyahvun tandihí cha tahán chi tyiyahvun —catyí ra Jesús.

13

Cuñí chi cha nasama yo cuhva iyó yo o cunyehe yo tundoho

¹Tyicuan ta suri quiví cuan canyicu suhva ra. Ta quichaha canacatyí ra chi ra Jesús yoso caa cha nyacuví ra Pilato chihin suhva ra Galilea. Vatyí tyihí ra tyiño na cucahñi sindaro chi ra Galilea cha cachahá ofrenda chi Nyoo vehe ñuhu. Ta nasacá ra niñi ra cuan chihin niñi quití cha cua cuvi ofrenda cuan.

²Ta nacahan ra Jesús ta catyí ra chi ra:

—¿Atu chicá xiñi nyoho vatyí cahnu xaan ca cuatyí ra Galilea cuan cha nuu tandihí ra ityi ñuu ra. Ta yucuan chaha cachihí ra?

³Ñima. Vatyí tatu nyoho ta ma nasama ndo cuhva iyó ndo, tyicuan caa tucu cunaa nyoho.

⁴Ta ndí chahun uñi ra cachihí cha canacava torre Siloé cuan siqui ra. ¿Atu cuaha ca cuatyí ra ta ican saha inga ra cha iyó ñuu Jerusalén cuñi maa ndo?

⁵Ñima. Vatyí tatu nyoho ta ma nasama ndo cuhva iyó ndo, cunaa tucu nyoho.

Nu catyí ra Jesús noo cuhva yoso caa nyatú Nyoo cha nasama yo cuhva iyó yo

⁶Tyicuan ta chahá ra Jesús noo cuhva. Ta catyí ra:

—Noo ra iyó yutun cha nañi higo chi ra. Ta nanyaá tun nu ñuhú ra. Ta chahan ra chinyehe ra tatu iñi chiti tun. Ta nanyehe ra vatyí ñahri.

⁷Ta quichaha catyí ra chi ra sahá cuenda chi tun: “Cha uñi cuiya tyito ri quichi nyehi tatu iyó chiti tun. Ta ñahri maa chiti tun iñi. Na cahnya yo chi tun. Vatyí ¿ñáá ri tuhun sayangá tun nu ñuhú ihya? Vatyí ñahri chiti chahá tun”, catyí ra.

⁸Soco ra cha sahá cuenda ñuhú cuan quichaha catyí ra: “Tata, ma cahnya yo chi tun vityin. Na cuinanyaa maa tun nonga cuiya ihya. Cusanduvite ñuhú chaha tun ta cutyihi ñuhú tyahyu.

⁹Vasi tyicuan caa ta cuhva tun chiti. Soco tatu ña chaha tun chiti, tyicuan ta cahnya yo chi tun”, catyí ra.

Quiví nyitatú ñáyiví sanduvahá ra Jesús chi noo ñaha tihí chata

¹⁰Noo quiví cha nyitatú ñáyiví sañahá ra Jesús chi ñu chichi vehe ñuhu.

¹¹Ta yucuan nyaá noo ñaha cha yihí tatyí ña vaha chí. Ta cha chahun uñi cuiya cuhví ña cha ndutihí chata ña. Ta ña cuví ndundoo ña.

¹²Tyicuan ta nanyehe ra Jesús chi ña. Ta caná ra chi ña. Ta quichaha catyí ra chi ña:

—Cha nduvahun. Ñahri ca cuehe ndohún —catyí ra chi ña.

¹³Tyicuan ta tyiso ra ndaha ra siqui ña. Ta caa cuhva ri cuan ta ndundoo ña. Tyicuan ta quichaha sacahnu ña chi Nyoo.

¹⁴Soco ra cuví nuu vehe ñuhu, cuxaan xaan ra. Vatyí quiví nyitatú ñáyiví sanduvahá ra Jesús chi ña. Ta quichaha catyí ra chi ñáyiví canyicu cuan:

—Iyó iñu tahan quiví tahán chi saha tyiño yo. Yucuan quiví quichi ndo quichi cuví tatan chí ndo. Ta ma quichi ndo quiví nyitatu yo —catyí ra.

¹⁵Tyicuan ta ra Jesús quichaha catyí ra chi ra:

—Nyoho cha sahá ndo tyi vaha ndo. ¿Atu ña ndachi tucu nyoho quití sana ndo vatyí sacoho ndo ndutya chí ti quiví nyitatú yo?

¹⁶Ta tyicuan caa tucu ñaha ihya, vachi ña tata ra Abraham. Ta cha chahun uñi cuiya nuhñi ña chihin

cuehe ihya sahá ra ña vaha. Ta yori ndachi chi ña. ¿Atu ña tahan chi ndachi yo chi ña vasi quivi nyitatu yo? —catyí ra Jesús.

¹⁷ Tyicuan ta cuhva cha catyí ra Jesús tuhun cuan, tandihi maa ra xaan iñi chi ra cahān cuvi nuu ra. Soco tandihi maa ñáyivi cusii cuñi ñu chihin cha cahnu cha sacuví ra Jesús.

Nu catyí ra Jesús vatyí tari noo chiti mostaza cuví cha nyacá ñaha Nyoo aña yo

(Mt. 13.31-32; Mr. 4.30-32)

¹⁸ Tyicuan ta quichaha catyí ra Jesús:

—¿Ñáá chihin sandiqui tahan cha nyacá ñaha Nyoo aña yo? ¿Ñáá chihin sandu inuu ri yo?

¹⁹ Tari noo chiti mostaza, tyicuan caa cuví. Vatyí noo ra tachí ra noo chiti nu ñuhú, ta chahnu tun. Ta cuví tun noo yutun cahnu vavaha. Tyicuan ta chaá coyo saa nuu yutun cuan. Ta yucuan savahá ti taca ti.

Nu catyí ra Jesús vatyí tari yuchan iya tyicuan caa cuví cha nyacá ñaha Nyoo aña yo

(Mt. 13.33)

²⁰ Tyicuan ta quichaha catyí ra Jesús inga chaha:

—¿Ñáá ca chihin sandu inuu ri yo yoso caa nyacá ñaha Nyoo aña yo?

²¹ Cuví chi tari noo yuchan iya cha nasaca noo ñaha sihi chihin uñi cuhva yutyi pan. Vatyí tari ndaa pan cuan chihin yuchan iya cuan, tyicuan caa cuahan nducuaha ca ñu nyacá ñaha Nyoo aña —catyí ra.

Yuvehe tihin ta ityi cuiñi cha cuahan nu nyaá Nyoo

(Mt. 7.13-14, 21-23)

²² Ityi cuahan ra Jesús Jerusalén cahān ra tuhun Nyoo chihin ñáyivi tandihi ñuu nu yahā ra.

²³ Ta quichaha ndaca tuhun noo ra chi ra:

—¿Atu ña cuaha maa ñáyivi cucacu aña yo? —catyí ra.

Tyicuan ta nacahan ra Jesús, ta catyí ra:

²⁴ —Nanducu ndo cuhva quihvi ndo yuvehe tihin. Vatyí yii xaan quihvi ndo nu nyacá ñaha Nyoo. Vatyí cuaha xaan ndo cha cucuñi ndo quihvi ndo yucuan. Ta ma cuví.

²⁵ Vatyí tari chitoho noo vehe tyicuan caa cuví Nyoo. Ta chitoho vehe cuan cunacasi ra yuvehe. Tyicuan ta nyoho cha nyicú ndo ityi chata cusacachan ndo yuvehe, ta cucatyí ndo: “Ñuña yuvehe.” Ta ra cuan cucatyí ra chi ndo: “Ña chité nya ityi quichi nyoho.”

²⁶ Tyicuan ta nyoho cucatyí ndo: “Nyuhu chachi ndi ta chihí ndi chuhun. Maun sañahun tuhun Nyoo chi ndi ityi nu nyaá vehe ndi”, cucatyí ndo chi ra cuan.

²⁷ Soco ra cuan cunacahan ra chihin ndo ta cucatyí ra: “Cha catyí chi ndo vatyí ña chité nya ityi quichi nyoho. Canyaha ndo nu nyai, tandihi nyoho ñu nyacuví cha ña vaha”, cucatyí ra chi ndo.

²⁸ Yucuan ta cuacu ndo ta sacahñi noho ndo cha nyehe ndo chi ra Abraham ta chi ra Isaac ta chi ra Jacob, ta chi tandihi ra profeta Nyoo cha chiyo ta cha naha. Vatyí canyicú ra nu nyacá ñaha Nyoo. Ta nyoho ndoo ndo ityi chata.

²⁹ Ta cuquichi ñáyivi ityi tyañuhu, ta ityi norte, ta ityi nu caña ñanyii, ta ityi nu quee ñanyii. Ta cunyicu ñu cachi ñu chihin Nyoo nu nyacá ñaha ra.

³⁰ Ta yóo ñu cha cuñi cuhun ityi nuu, ican ñu cuhun nu ndihi. Ta ñu cuahan nu ndihi, ican ñu cuhun ityi nuu —catyí ra.

Nu nducuihya iñi ra Jesús nyehé ra chi ñáyivi ñuu Jerusalén

(Mt. 23.37-39)

³¹ Suri maa quivi cuan chaá coyo suhva ra fariseo. Ta catyí ra chi ra Jesús:

—Quita ihya vatyí ra Herodes cuñi ra cahñi ra chuun —catyí ra.

³² Soco ra Jesús quichaha catyí ra chi ra:

—Cuahan ndo ta catyí ndo chi ra ñucuii quiñi iyó cuan, vatyí nyacua nya nu chaa maa chi quivi cha ndihi

tyiño sahi cha tave tatyí ña vaha ta cha sanduvahi chi ñu cuhví, tyicuan ta cundihi tyiño sahi.

³³ Soco nya tahán chi cha ndihi maa tyiño sahi, tyicuan ta cuhun mai cucúvi nya Jerusalén. Vatyí ma cuvi cha cúvi noo ra profeta Nyoo ityi cha chata Jerusalén.

³⁴ ¡Ndahvi nyoho ñáyivi Jerusalén! vatyí chahñi ndo chi ra profeta ra cachahá cuenda tuhun cahán Nyoo chi ndo. Ta tuchi ndo yuu chi tandihi ra cha saquichi Nyoo nu nyicú ndo. Ta yuhu cuaha xaan chaha cuñi saha cuende chi ndo tari noo ndivi cha sahá cuenda ti chi sehe ti, ta naquehen vaha ti chi ti chichi ndichin ti. Soco maa ndo ña cuñi ndo.

³⁵ Nyehe ndo vityin vatyí cha sandoi chi ndo. Ta catyí chi ndo vatyí ma nyehe ca ndo chii nyacua nya chaa chi quivi cuacatyí ndo vatyí cahnu xaan ra vachi chihin sivi Nyoo —catyí ra Jesús.

14

Nu sanduvaha ra Jesús chi noo ra cuhvi chayihí cuiño chi

¹ Cuví chi noo quivi nyitatu ñáyivi. Ta ra Jesús cuahan ra cua cachi ra vehe noo ra cuvi nuu chi ra fariseo. Ta suhya ca fariseo cuan cañañi ra chi ra Jesús tatu ñáa cha ña vaha cunyacuvi ra.

² Yucuan ta nuu ra Jesús nyaá noo ra cuhvi cha yihí cuiño chii.

³ Tyicuan ta quichaha catyí ra Jesús chi ra casacuaha ley vehe ñuhu ta chi ra fariseo:

—¿Atu vaha sanduvaha yo chi ñáyivi cuhvi quivi nyitatu yo? —catyí ra.

⁴ Tyicuan ta tandihi ra cuan, taxi taxi cacuvi ra. Yucuan cuvi nu tyiso ra Jesús ndaha ra siqui ra cuhvi cuan. Ta sanduvaha ra chi ra. Ta natachi ra chi ra na cunuhu ra.

⁵ Tyicuan ta quichaha catyí ra Jesús chi ra fariseo:

—Tatu canacava noo burru sana ndo, o nonga quití sana ndo chichi noo xahva, ¿atu ma cutava ndo chi

ti tañi tyehe ri, vasi quivi nyitatu yo cuvi? —catyí ra.

⁶ Tyicuan ta inga chaha tucu taxi cuii ri nicunyicu ra fariseo. Vatyí ña ñihi ca ra tuhun nacahan ra.

Nu sañaha ra Jesús chi yo vatyí ma cahnu saha yo chi yo

⁷ Cha nyehe ra Jesús vatyí tandihi ra canyicú vico cuan nacachí ra tyayu vaha ca cunyaa ra. Tyicuan ta quichaha chaha ra tuhun ihya chi ra:

⁸ —Nya quivi cuhun ndo vico tandaha, ma nanducu ndo tyayu vaha ca cunyaa ndo. Vatyí coto quichi inga ra cha cahnu ca cuvi ican saha ndo,

⁹ ta coto quichi ra cha nacatyí tuhun ta catyí ra chuun: “Cuhva tyayu chiña. Vatyí cunyaa ra ihya.” Tyicuan ta yoho chihin cha cahán nuun, ta cuhvon. Yucuan ta cunyaun nu ndihi.

¹⁰ Soco catyí chi ndo, vatyí nya quivi nacatyí tuhun ra chi ndo, cunyaa ndo noo nu ñima ri tuhun. Vatyí quichi maa ra cha nacatyí tuhun chi ndo ta catyí ra chi ndo: “Ra tahin, ñaha, cunyaun nu tyayu vaha tyehe.” Ta tyicuan caa sacucahnu ra chuun nu ñáyivi nyicú yuhu mesa chuhun.

¹¹ Vatyí yóo ra cha cahnu sahá chii, cuquehen ra ticahan nuu. Ta yóo ra cha ndahvi sahá chii, cahnu cucuvi ra —catyí ra Jesús.

¹² Tyicuan ta quichaha catyí tucu ra chi ra nacatyí tuhun chi ra:

—Nya quivi coo vico vehun, ma nacatyí tuhun chi ra tahun, ni chi yañun, ni ri chi ñáyivi chuun, niri chi ñu nyicú yuehun ñu tyayii. Vatyí ñu cuan cuvi nacatyí tuhun ñu chuun, na coo tucu vico vehe maa ñu. Tyicuan ta nacahnya ñu cuenda cha chahan ñu vico vehun.

¹³ Soco cua catyí chuun vatyí nya quivi coo vico vehun, nacatyí tuhun chi ñu ndahvi, chi ñu cuhvi, chi ñu coxo, ta chi ñu cuaa.

¹⁴ Tyicuan ta sii cuvi chuun, vatyí ñu cuan ma cuvi natyiyahvi ñu chuun. Soco cuñihun yahvun quivi cunandoton chihin ñáyivi vaha.

Nu chaha ra Jesús noo cuhva yoso caa nacatyí tuhun ra chi yo vatyí quihví yo nu nyacá ñaha Nyoo (Mt. 22.1-10)

15 Ta chiñi noo ra cha nyaá yuhu mesa cuan tuhun cahán ra Jesús. Ta quichaha catyí ra chi ra:

—Siñi xaan cuvi chi ñu cachi nu nyacá ñaha Nyoo —catyí ra.

16 Tyicuan ta catyí ra Jesús:

—Noo ra cuan savaha ra noo vico cahnu vavaha vehe ra. Ta nacatyí tuhun ra chi cuaha xaan ñáyivi.

17 Tyicuan ta chaá cuhva cha cuxiñi ñu, ta tachi ra chi musu ra nacana ra chi ñu. Vatyí cha chaá cuhva cha cuxiñi ñu.

18 Soco tandihí ñu cuan quichaha catyí ñu vatyí ma cuhun ñu. Ta noo ra cuan catyí ra: “Ni sate noo ñuhú. Ta cuñí chi cuhin cunyehe. Ican tuhun chiquén na saha ra tucahnu iñi chii vatyí ma cuhin.”

19 Tyicuan ta inga tucu ra cuan catyí ra: “Ni sata cuiri ohon tahan yunta quiti. Ta cuhin cunyehe tatu vaha ti. Ican tuhun chiquén tumañi iñi chi ra na saha ra tucahnu iñi chii, vatyí ma cuvi cuhin.”

20 Tyicuan ta inga tucu ra cuan catyí ra: “Ni ndihí tandahi, ta ma cuvi cuhin”, catyí ra.

21 Tyicuan ta musu ra cuan cuanuhu ra. Ta nacatyí ra tandihí tuhun cuan chi ra cha tachi chi ra. Cha chiñi ra savaha vico cuan cha tyicuan caa, ta cuxaan xaan ra. Ta catyí ra chi musu ra: “Cuahan tandihí maa ityi. Ta quichi nyacon chi ñu ndahvi, chi ñu cuhví, ta chi ñu coxó, ta chi ñu cuaa”, catyí ra.

22 Ta cha yaha nachaa musu cuan ta catyí ra chi ra cha tachi chi ra: “Cha sacuvi tandihí maa cha catyún. Ta nuñá ca chichi vehe”, catyí ra.

23 Tyicuan ta chitoho ra catyí ra chi ra: “Cuahan cua nducu ca chi ñu tandihí maa ityi. Ta saníñun chi ñu na quichi coyo ñu, vatyí na cutu chichi vehi.

24 Vatyí catyí chuun vatyí ni minoo ñu cha nacatyí tuhun cha xihna ri, ma cachi ñu chihín” —catyí ra Jesús.

Cuaha xaan tundoho nyehe yo tatu cuenda ra Jesús yihí yo (Mt. 10.37-38)

25 Cuaha xaan ñáyivi nyicón chi ra Jesús. Tyicuan ta nanyehe ra chi ñu, ta quichaha catyí ra:

26 —Tandihí nyoho cha nyicón ndo chii, tatu cuñí ca ndo chi ñáyivi chi ndo ican saha chi yuhu, ñima cuende yihí ndo. Ta tatu cuñí ca ndo chi maa ndo ican saha chi yuhu, ñima cuende yihí ndo.

27 Vatyí nya nyoho cha ña cuñí ndo nyehe ndo tundoho cha cunyi-con ndo chii, ña tahán chi cuví ndo ñu cuende, vatyí cha nyehe ndo tundoho yucuan cuví cruzi cha tahán chi cuiso ndo.

28 Vatyí tatu nya nyoho cuñí ndo savaha ndo noo vehe cahnu, xihna ca cunyaa ndo ta ndichi xiñi ndo tatu caña xuhun ndo cha cananyaa ndo vehe cuan.

29 Vatyí tatu quichaha sacacu ndo vehe cuan, ta quichaha ña cuví sandihí ndo vatyí ñahri ca xuhun ndo, cuacu nyaa ñáyivi chi ndo.

30 Ta cuacatyí ñu: “Ra cuan quichaha savaha ra vehe ra, ta ni ña cuví sandihí ra”, cucatyí ñu.

31 O tatu noo rey cha cuñí cañi tahan chihin inga rey ¿atu ña chicun-yaa xihna ra ta ndichi xiñi ra tatu ñihi uchi mil sindaro cha cuahan chihin ra cua cañi tahan chihin inga rey cha vachi chihin oco mil sindaro cuan?

32 Tatu chitó ra vatyí ma cuvi chasaha ra chi inga rey cuan, tyicuan ta cañi ca vachi rey cuan, ta tachi ra chi noo musu ra vatyí cucatyí ra chi rey cuan na ndihí tuhun yucuan ri.

33 Ta tyicuan caa cuví chi nyoho. Tatu ma cahnya iñi ndo tandihí maa cha cuñi ndo ta cha cumi ndo, ma cuvi cunyi-con ndo chii.

Nu sañahá ra Jesús vatyí tari ñi cha ndihí cha uhva, tyicuan caa cuvi yo

tatu ndu uvi iñi yo cha chino iñi yo chi ra

(Mt. 5.13; Mr. 9.50)

³⁴ Vaha ñi vatyí sacú uhva chi cha cachi yo. Soco tatu ndihi cha uhva chi, ña vaha ca chi.

³⁵ Ñahri ca tyiño cuví saha chi. Ta sacuita yo vatyí ña vaha ca. Nya nyoho cha cutuñí iñi ndo, tyasoho ndo tuhun cahín —catyí ra Jesús.

15

Nu sañahá ra Jesús vatyí tari mbee cha cuanaa tyicuan caa cuví yo

(Mt. 18.10-14)

¹ Tandihí ra tavá xuhun cuenda gobiernu ñuu Roma, ta ra iyó cuatyí, tuhva ra nu nyaá ra Jesús, tacuhva cuiñi ra tuhun cahán ra.

² Tyicuan ta ra fariseo ta ra casacua ha ley vehe ñuhu quichaha cacahan nyaa ra, ta cacatyí ra:

—Ra ihya, cahán ra chihin ra iyó cuatyí. Ta chachí ra chihin ra —cacatyí ra.

³ Tyicuan ta ra Jesús cahan ra noo cuhva ihya, ta catyí ra:

⁴ —Ta nya nyoho cha iyó noo cientu mbee sana ndo, tatu cuanaa noo ti, çatu ma sandoo ndo chi tandihí ca ti cuan nu chiquí. Ta cunanducu ndo chi quití cha cuanaa cuan, nyacua nya cha nañihí ndo chi ti?

⁵ Ta cuhva cha nañihí ndo chi ti, ta natyiso soco ndo chi ti. Ta sñi vavaha cuví chi ndo.

⁶ Ta cuhva cha nachaa ndo vehe ndo, ta ndu ñin ri ndo chihin ra tahan ndo ta chihin ñu nyicú yatyin yuvehe ndo, yucuan ta catyí ndo chi ñu vatyí na cusñi cuiñi ñu chihin ndo vatyí nañihí ndo chi mbee sana ndo cha chinaa.

⁷ Ta ihya catyí chi ndo, vatyí sñi xaan ca cuví chi ángel Nyoo andivi cha catyí noo ra cha iyó cuatyí ta nasama cuhva iyó ra, ta ñima ca cha catyí ndi cumi xico chahan cumi tahan ñáyivi cha ñahri cuatyí.

Ñaha sihi cha cuanaa xuhun ta nañihí ña

⁸ Ta catyí chi ndo, tatu iyó noo ñaha cha iyó uchi tahan xuhun ña, ta

tatu cuanaa noo xuhun ña, tyaa ña noo candil. Ta tihvi ña tandihí cuii maa chichi vehe ña. Ta nanducu ña tandihí cuii nyacua nya cha nañihí ña xuhun cuan.

⁹ Ta cuhva cha yahá nañihí ña, cuahan ña cua nanducu ña chi ñaha tahan ña, ta ñáyivi cha nyicú yuvehe ña, ta catyí ña chi ñu: “Cusñi cuiñi ndo chihin vatyí cha nañihí xuhin cha chinaa”, catyí ña.

¹⁰ Ta catyí chi ndo vatyí tyicuan caa sñi cuví chi ángel Nyoo cha catyí noo ra iyó cuatyí ta ndu uvi iñi ra cuatyí ra —catyí ra Jesús.

Nu sañahá ra Jesús yoso caa cuiñi Nyoo chi noo ra ndu uvi iñi cuatyí

¹¹ Tyicuan ta quichaha catyí tucu ra Jesús cuhva ihya:

—Noo ra, chiyo uvi tahan sehe ra.

¹² Ta noo chaha, ra luhlu ca cuan catyí ra chi sutu ra vatyí nacuhva ra cha tahan chi chi ra. Tyicuan ta sutu ra chahá ra chi ñanduvi sehe ra.

¹³ Ta ña cuaha ri quivi cuan ta ra luhlu ca cuan xico ra tandihí cuii maa cha chahá sutu ra chi ra. Ta sandu ñin ri ra xuhun ra, ta quehen ra ityi ta cuahan ra noo ñuu cañi. Ta yucuan chiyo ra, sanaa ra tandihí maa xuhun ra chihin tusñi iñi. Ta quiñi xaan chicá noo ra.

¹⁴ Tyicuan ta chaá noo tama ityi nu iyó ra. Ta quichaha chisoco ra vatyí ndihí xuhun ra sanaa ra.

¹⁵ Tyicuan ta chahan ra chicacan ra tyiño chi noo ra ñuu cuan. Ta ra cuan tachí ra chi ra noo nu iyó quiñi sana ra, vatyí cusaha cuenda ra chi ti.

¹⁶ Ta cuví noo chaha cuan chisoco xaan ra. Ta ñahri maa cha cachi ra iyó, nyacua quichi cuví iñi ra cachi ra cha cachachí quiñi cuan soco yori maa chaha cha cachi ra.

¹⁷ Tyicuan ta nichon iñi ra tuhun sutu ra. Ta ndichi xiñi ra: “¿Atu chiin cuaha ra casahá tyiño chihin suti? Soco ñahri maa cha cumañi chi ra. Ta yuhu cuiñi cúvi soco ihya.

¹⁸ Vityin cunuhin nu nyaá suti. Ta catyí chi ra tyi chicoo cuatyí nuu Nyoo ta nuu maa ra.

19 Ta ña naña que cha cuvi sehe ra chii, ta na saha ra tuhun vatyí noo musu ri ra cuví chii.” Tyicuan caa ndichi xiñi ra.

20 Tyicuan ta quehen ra ityi cuanuhu ra nya vehe sutu ra. Cañi ca vachi ra ta nanyehe sutu ra chi ra, ta cundahvi cuñi ra nyehe ra chi ra. Ta chino ra chisatahan ra chi sehe ra. Ta nanumi ra chi ra.

21 Tyicuan ta quichaha catyí ra chi sutu ra: “Tata, chicoo cuatyí nuu Nyoo ta chicoo cuatyí nu maun. Ta yucuan chaha ña naña que cha cuvi sehun chii”, catyí ra chi sutu ra.

22 Soco sutu ra tyihi ra tyiño, ta catyí ra chi musu ra: “Tava ndo sahma vaha ca ta sacuihno ndo chi ra. Ta tyihi ndo noo xehe nundaha ra. Ta nyaca ndo zapato quihí chaha ra ñandihí.

23 Ta siin ri cahñi ndo noo becerru cha xahan ca, vatyí cachi yo chi ti. Vatyí vityin cucoo yo noo vico.

24 Vatyí ra sehi ihya cha chihí ra saha mai tuhun. Cuñi mai vatyí ma nyehe que chi ra, soco natuvi ra”, catyí sutu ra. Tyicuan ta quichaha chicoo ñu vico. Ta sii xaan cacuñi ñu vatyí natuvi ra cuan.

25 Tyicuan ta inga sehe ra, ra cha chahnu ca, ñohó ra nu chiquí. Ta cuhva cha cuanachaa ra nya vehe ra, ta quichaha chiñi ra yaa. Ta chiñi ra vatyí sii xaan cachitá chaha ñu.

26 Tyicuan ta cuhva cha cuyatyin ra nya vehe ra ta cana ra chi noo musu ra. Ta ndaca tuhun ra ñáá cha cuvi cuan.

27 Tyicuan ta musu ra quichaha catyí ra: “Yañun, ican nachaa. Ta yucuan chaha tachí sutun vatyí na cahñi ra chi noo becerru xahan ca. Vatyí vaha ri nachaa yañun, ta ñahri cha cuvi chi ra”, catyí ra.

28 Tyicuan ta cuxaan xaan cuñi ra. Ta ña cuñi ra ndihvi ra chichi vehe. Soco sutu ra chahan ra chichahan ndahvi ra chihin ra, vatyí na ndihvi ra chichi vehe.

29 Tyicuan ta nacahan ra ta catyí ra chi sutu ra: “¿Atu chiin cuiya sahá tyiñe chuhun? Ta tyasohí tuhun

cahún. Ta ni noo chaha ta ta nacahnu que nu cahún. Soco ni noo ndixihyu lee ta cuhva con chii vatyí coi vico chihin ra tahn.

30 Soco vityin cha nachaa sehun ihya, ra cha sanaa xuhun chihin ñu cata iñi. Ta vityin chahun noo becerro quití xahan ca chi ra”, catyí ra chi sutu ra.

31 Tyicuan ta nacahan sutu ra ta catyí ra chi ra: “Sehi, yoho tyicuan ri nyaún chihin. Ta tandihí cha cumi, chuun cuví.

32 Soco vityin tahn chi sacuvi yo vico ihya. Ta cusii cuñi yo. Vatyí nachaa yañun, ra cha saha mai tuhun vatyí chihí. Tari quivi nandoto ra cuvi ihya. Ta chinaa ra, ta nañihí tucu yo chi ra inga chaha”, catyí ra chi sehe ra —catyí ra Jesús.

16

Nu sañahá ra Jesús chi yo yoso caa sahayo tumañi iñi chihin cha iyó chi yo

1 Tyicuan ta quichaha catyí ra Jesús chi ra cachicá noo chihin ra:

—Iyó noo ra tyayii vavaha ra. Ta iyó noo ra yindaha tandihí tyiño sahá ra. Ta chahan coyo musu ra canacatyí ra chi ra tyayii cuan, vatyí ra yihí ndaha tyiño cuan, sanaa ra tandihí cha iyó chi ra.

2 Tyicuan ta cana ra tyayii cuan chi ra yindaha tyiño cuan, ta catyí ra chi ra: “Cha cuaha xaan cuatyí chahún quichi nu nyaí. Nacuhva cuendon tandihí tyiño cha sacuvun chii. Vatyí ma saha tyiño con chihin”, catyí ra chi ra.

3 Tyicuan ta ra yindaha tyiño cuan ndichi xiñi ra: “¿Yoso caa cunyacuvi vityin? Chitohi ña cuñi ca ra cha sahá tyiñe chihin ra. Ta ñahri fuerza iyó chii cha saha tyiñe nu ñuhú. Ta cahán nui caye chichi ñuu.

4 Soco cha chité yoso caa cunyacuvi vityin, ta vaha coo ñáyivi chihin quivi cha ma coo ca tyiño sahi, ta vaha chai vehe ñu”, ndichi xiñi ra.

5 Tyicuan ta cana ra chi noo noo ra yosoyicá chi chitoho ra. Ta quichaha

catyí ra chi noo ra cuan: “¿Yoso yosoyicón chi chitohi?” catyí ra.

⁶ Tyicuan ta nacahan ra cuan ta catyí ra: “Yuhu yosoyiqué noo cumi mil litru aceitye.” Tyicuan ta ra yindaha tyiño cuan catyí ra chi ra: “Quehen nonga tutu ihya. Ta natyaa uvi mil ri. Ta sacuiton tutu chahnu cuan”, catyí ra. Tyicuan caa sacuvi ra. Ta cuahan ra.

⁷ Tyicuan ta cha inga ra. Ta quichaha ndaca tuhun tucu ra chi ra cuan ta catyí ra: “¿Yoso yosoyicá yoho chi chitohi?” Ta nacahan ra cuan ta catyí ra: “Yosoyiqué noo mil arroba trigu”, catyí ra. Tyicuan ta quichaha catyí ra yindaha tyiño cuan: “Quehen inga tutu, ta natyaun uña cientu ri arroba. Ta sacuita tutu chahnu chiña”, catyí ra.

⁸ Tyicuan ta chitó chitoho ra cha ña vaha cha chinyacuvi ra. Ta iyo xaan cuñi ra vatyí yatyí xaan saha ra cuan chi ra —catyí ra Jesús.

Ta quichaha catyí tucu ra chi ra cachicá noo chihin ra:

—Ñayivi ña vaha añima yatyí xaan ca sahá ñu chi ñu ican saha ñayivi vaha añima.

⁹ Ta catyí chi ndo, vatyí cotyíño ndo cha tyayii cha iyó siqui ñuhu ñayivi ihya, ta saha ganaa ndo amigo. Ta quivi cha ndihi cha tyayii cuan, cuñihi ndo nu cunyicu ndo nya nu nyaá Nyoo tyicuan ri maa.

¹⁰ Tatu chitó ndo cotyíño ndo chiin cha iyó chi ndo cha cuenda cha vaha, tyicuan caa coto tucu ndo cotyíño ndo tatu cuaha iyó chi ndo. Soco tatu ña chitó ndo cotyíño ndo chiin cha iyó chi ndo, tyicuan caa ma coto tucu ndo cotyíño ndo tatu cuaha coo chi ndo.

¹¹ Ta catyí chi ndo, tatu ña sahá ndo tumañi iñi chihin cha iyó chi ndo siqui ñuhu ñayivi ihya, Nyoo ma cuhva ra noo cha tyayii cha ndicha chi ndo.

¹² Tandihí cha iyó chi ndo maa Nyoo chaha noo chi ndo. Soco tatu ña sahá ndo tumañi iñi chihin cuan, ma cuhva ra cha tahan chi chi ndo.

¹³ Noo musu ma cuvi coo uvi tahan chitoho ra. Vatyí musu cuan cuñi ca ra chi noo ra, ta ñima ca chi inga ra.

O chi noo ra, vaha quichahá ra tuhun cahán ra, ta chi inga ra, ma quichaha ra cha cahán ra. Ma cuvi cuñi ndo chi Nyoo ta suri cuhva cuan cuñi tucu ndo cha tyayii —catyí ra Jesús.

¹⁴ Tyicuan ta cha chiñi ra fariseo tandihí tuhun cahán ra Jesús. Tyicuan ta quichaha chacu cuehe ra nyehe ra chi ra. Vatyí maa ra fariseo cuan cuñi xaan ra chi xuhun.

¹⁵ Tyicuan ta quichaha catyí ra Jesús chi ra:

—Vaha xaan sahá ndo chi ndo nuu ñayivi. Soco chitó Nyoo vatyí añima ndo ña vaha. Ta tandihí cha catyí ñayivi vatyí cahnu xaan ihya siqui ñuhu ñayivi, Nyoo ña cuñi nyehe ra.

Nu sañahá ra Jesús tuhun ley ra Moisés, ta tuhun yoso caa cunyaca ñaha Nyoo añima yo chi yo

¹⁶ Ley cha tachí Nyoo chi ra Moisés vatyí tyaa ra, ta tuhun cha tyaa ra profeta Nyoo ta cha naha, ican chi cuvi cha saquehen ityi chi ñayivi nyacua nya quivi cha ra Juan. Ta maa ra Juan quichaha cahan ra tuhun vaha vatyí cha cuñi quichi Nyoo vatyí cunyaca ñaha ra. Ta tandihí ñayivi cha nducú cuhva yoso caa cunyaca ñaha Nyoo añima ñu, ican ñu quihvi ndaha ra.

¹⁷ Soco catyí chi ndo, vasi cunaa andivi ta ñuhu ñayivi, soco cha cuvi ley Nyoo cha tyaa ra Moisés, ma naa nyacua nya cha yahá cuvi tandihí.

Sañahá ra Jesús vatyí ña vaha cha sandoo rayii chi ñasihí ra

(Mt. 19.1-12; Mr. 10.1-12)

¹⁸ Tatu noo rayii iyó ñasihí ra, ta sanandoo ra chi ña, ta tandaha ra chihin inga ña, iyó cuatyí ra nuu Nyoo. Ta tatu tandaha noo rayii chihin noo ñaha cha sandoo yii chii, coo tucu cuatyí ra nuu Nyoo.

Nu sañahá ra Jesús tuhun noo ra tyayii chihin ra Lázaro

¹⁹ Chiyó noo ra tyayii. Ta vaha ñihno ra. Ta tandihí quivi iyó ra vico ta chachí vaha ra.

²⁰ Ta chiyō tucu noo ra ndahvi cha nañí Lázaro. Ta cuaha xaan ndihyí iñi ra. Ta nyaá ra yuvehe ra tyayñi cuan.

²¹ Ta ra ndahvi cuan, cuñí ra cachi ra, vasi cha canacoyo nu mesa ra tyayñi cuan. Ta nyacua nya ina ta chaá ti nu nyaá ra, ta yuyaá ti nu cahvi chi ra.

²² Ta noo quivi cuan chihñi ra ndahvi cuan. Ta ángel Nyoo quehen ra chi ra ta cua nyaca ra chi ra nya nu nyaá ra Abraham gloria. Tyicuan ta chihñi tucu ra tyayñi cuan. Ta chicuchñi ñu chi ra.

²³ Tyicuan ta ra tyayñi cuan nyehé xaan ra tundoho nu ñohó ra anyaya. Ta nanyehe ra nu cañi. Ta nanyehe ra chi ra Abraham chihin ra Lázaro, nyaá ra chihin ra yucuan.

²⁴ Tyicuan ta canachaa ra ta catyí ra: “Tata Abraham, cundahvi cuñi chii. Tachi chi ra Lázaro na satyí ra chiin nundaha ra. Ta na satoo ra ñn titi ndutya nu yai. Vatyí nyehé xain tundoho nu cayú ñuhu ihya”, catyí ra.

²⁵ Soco ra Abraham catyí ra chi ra: “Ñicohon iñun vatyí vaha chiyon ñuhu ñayivi. Ta ra Lázaro, ña vaha chiyō ra. Vityin vaha iyó ra ihya, ta yoho nyehún tundoho.

²⁶ Ta siin ri, mahñu ihya cono xaan. Ta ma cuvi yaha ra iyó tyehe cahun ra chiña. Ta ma cuvi yaha ra iyó chiña, quichi ra tyehe”, catyí ra Abraham chi ra.

²⁷ Tyicuan ta quichaha catyí ra tyayñi cuan: “Tata Abraham, sahun tumañi iñi chii. Ta tachun chi ra Lázaro nya vehe suti.

²⁸ Vatyí iyó ohon tahan yañi. Ta cuñí vatyí nacatyí ra chi ra yoso caa iyé ihya nu nyehí tundoho, coto quichi coyo tucu ra cuan ihya”, catyí ra.

²⁹ Tyicuan ta quichaha catyí ra Abraham: “Iyó ley cha tyaa ra Moisés. Ta iyó tuhun cha tyaa ra profeta Nyoo ta cha naha. Na quichaha ra tu cuñi ra”, catyí ra Abraham.

³⁰ Tyicuan ta quichaha catyí ra tyayñi cuan: “Tata Abraham. Ma quichaha ra. Soco tatu yóo cha nandoto, ta cahun cucahan chihin ra,

yucuan ta tyasoho ra ta nasama ra cuhva iyó ra”, catyí ra cuan.

³¹ Soco ra Abraham catyí ra: “Tatu ña cuñí ra quichaha ra tuhun tyaa ra Moisés ta tuhun cha tyaa ra profeta Nyoo ta cha naha, ma chino iñi ra tuhun cahan noo ndiyi tatu nandoto ra ta cahan ra chihin ra.”

17

Nu sañahá ra Jesús chi yo yoso caa saha cuenda yo chi yo coto sacuvi yo cha ña vaha

(Mt. 18.6-7, 21-22; Mr. 9.42)

¹ Tyehe caa catyí ra Jesús chi ra cachicá noo chihin ra:

—Tyicuan ri iyó cha quiñi caa cha sativi chi ñayivi. Soco ndahvi ra ndahvi ra sativi chi ñayivi.

² Vaha taxin ca cuhñi ra noo yuu sucun ra. Ta cutuchi ra chi ra nu tyañuhu. Coto sativi ra chi ñu ni nasama cuhva iyó ihya.

³ Saha ndo cuenda chi ndo. Tatu noo ra tahan ndo ta sacuvi ra noo cha ña vaha chihin ndo. Catyí ndo chi ra vatyí ña vaha cha sacuvi ra. Tatu nasama ra cuhva iyó ra, saha ndo tucahnu iñi chi ra.

⁴ Ta ni ri maa sacuvi ra cha ña vaha chihin ndo ucha tahan chaha cha noo quivi. Tatu ndi ucha tahan chaha ta catyí ra chi ndo vatyí ndu uvi iñi ra cha sacuvi ra chi ndo, ndi ucha tahan chaha saha ndo tucahnu iñi chi ra.

Nu sañahá ra Jesús chi yo vatyí tatu chinó iñi yo chi ra, cuvi sacuvi yo cuaha cha vaha

⁵ Tyicuan ta quichaha catyí ra cachicá tyiño nuu ra Jesús chi ra:

—Cuhva cha chinó ca iñi ndi chuun —catyí ra.

⁶ Tyicuan ta catyí ra Jesús chi ra:

—Tatu chinó iñi ndo chi yuhu vasi chiin ri tari cuhva noo chiti mostaza luhlu, cuvi catyí ndo chi yutun sicómoro cha nanyaá ihya nacoyo tun, ta cucuinanyaa tun nu tyañuhu. Ta cucuvi nu cahan ndo —catyí ra Jesús.

Yoso caa tahan chi quichaha yo chi Nyoo

⁷ Ta catyí ra Jesús:

—Tatu noo nyoho ta iyó noo musu ndo. Ta nachaa ra cha chahan ra nu chiqui chi sahatyiño ra, o chi saha cumi ra quiti sana ndo, ¿atu catyí ndo chi ra: “Cunyaa ta cachun”? Ña catyí ndo chi ra tyicuan caa.

⁸ Soco tyehe caa catyí ndo chi ra: “Sanduvaha cha cuxiñi. Ta tyihun cha cachi. Cha yaha cha cachi tyicuan ta cachi tucu maun”, catyí ndo chi ra.

⁹ Ni ña tuhvá ndo nacuhva ndo tyahvi nyoo chi ra vatyí sacuvi ra ñáa noo tyiño tavá ndo chi ra.

¹⁰ Tyicuan caa tucu nyoho chihin Nyoo. Quivi ndihi sacuvi ndo cha catyí Nyoo chi ndo, tahn chi catyí ndo: “Nyuhu chiin ri cha tachun chi ndi, yucuan ri sacuvi ndi. Ta ña yaha ca.”

Nu sanduvaha ra Jesús chi uchi tahan ra tyahyu coño

¹¹ Ityi cuahan ra Jesús ityi ñuu Jerusalén yaha ra nu cuví xahñi Samaria chihin Galilea.

¹² Nu chaá ra noo ñuu, quita coyo uchi tahan ra cuhvi chihin cha tyahyu coño ra. Ta chicuitayucu ra nyasava ri.

¹³ Ta quichaha cacanachaa ra chi ra Jesús, ta catyí ra:

—Yoho, Maestro Jesús, cundahvi cuñi chi ndi —catyí ra.

¹⁴ Tyicuan ta nanyehe ra Jesús chi ra ta catyí ra chi ra:

—Cuahan ndo. Ta cua sañaha ndo chi ndo chi tata sutu vatyí cha nduvaha ndo.

Tyicuan ta cuahan coyo ra cuan. Ta ityi cuahan coyo ra ta cananyehe ra vatyí nduvaha ra.

¹⁵ Tyicuan ta cuhva cha nanyehe noo ra cuan vatyí nduvaha ra, cuanuhu chata ra nu nyaá ra Jesús. Ta cana chaa ra, ta sacahnu ra chi Nyoo.

¹⁶ Ta chicuñi chiti ra. Ta nacañi noo ra xiñi ra nya nu ñuhu nuu ra Jesús. Ta nacuhva ra tyahvi nyoo chi ra. Ta ra cuan, ra Samaria cuví ra.

¹⁷ Tyicuan ta catyí ra Jesús chi ra:

—¿Atu ñima uchi tahan ndo nduvaha? ¿Nya nyaá inga ñn tahan ca ra?

¹⁸ ¿Ñáa tuhun cha noo tuhun ri maa ra inga ñuu nandichi chata ra ta sacahnu ra chi Nyoo? —catyí ra Jesús.

¹⁹ Tyicuan ta quichaha catyí ra chi ra cuan:

—Nducuita ta cuahan. Nduvahun vatyí chinó ñun —catyí ra Jesús chi ra.

Yoso caa cuquichi Nyoo cunyaca ñaha ra nu iyó yo ihya

(Mt. 24.23-28, 36-41)

²⁰ Candaca tuhun ra fariseo chi ra Jesús, ta catyí ra:

—¿Ama quichi Nyoo cunyaca ñaha ra?

Tyicuan ta ra Jesús quichaha catyí ra:

—Cha cunyaca ñaha Nyoo ihya siqui ñuhu ñayivi, ñima cha nyehé yo cuví.

²¹ Ma cuvi catyí ñayivi: “Ma ra nyaá ihya, o ma ra nyaá ityi cuan.” Vatyí Nyoo cha chaá ra mahñu ndo, ta nyacá ñaha ra añima ñayivi cuenda ra —catyí ra chi ra.

²² Yaha cuan ta catyí ra chi ra cachicá noo chihin ra:

—Cuchaa chi quivi vatyí cucuñi ndo nyehe ndo chi yuhu Rayi cha quichi nya gloria. Soco ma nyehe ndo chii.

²³ Cuchaa tucu chi quivi ta cucatyí ñayivi chi ndo: “Ihya nyaá ra”, o “Yucuan nyaá ra.” Soco ma cuhun ndo cunyehe ndo. Ta ma cunyicon ndo chi ra cuan vatyí ñime cuví.

²⁴ Vatyí tandihi ñayivi cunyehe chi yuhu Rayi cha quichi nya gloria quivi quichi inga chaha. Tari nyehé tandihi ñayivi nu quihvi tacha nicahnu andivi, tyicuan caa cucuvi.

²⁵ Soco cunyehe xihne tundoho. Vatyí ñayivi cha iyó cha vityin cua cutasi cuñi nyehe ñu chii.

²⁶ Tari cuví quivi ra Noé, tyicuan caa cucuvi quivi quichi yuhu Rayi cha quichi nya gloria inga chaha.

²⁷ Quivi ra Noé, chachi ñu. Chihí ñu. Tandahá ñu. Ta chahá ñu sehe ñu tandaha. Nya quivi quihvi ra Noé

chichi barcu ra, ta coon savi xaan. Ta tandihí ñu cachihí ñu.

²⁸ Tyicuan caa tucu cuví quiví ra Lot. Chachí ñu. Chihí ñu. Satá ñu. Xicó ñu. Tachí ñu. Ta savahá ñu vehe ñu.

²⁹ Soco quiví cha quita ra Lot ñuu Sodoma cuan, coon ñuhu chihin azufre andiví. Ta chihí tandihí ñáyiví Sodoma.

³⁰ Ta tyicuan caa cucuvi quiví cha quichi tucu yuhu Rayí cha quichi nya gloria inga chaha.

³¹ "Ta quiví cuan tatu nyicú ndo nuquehe ndo, ma ndihví ndo chichi vehe ndo vatyí tava ndo ndaha tyiño ndo. O tatu chicá noo ndo nu chiquí, ma cunuhu ndo nya vehe ndo.

³² Nícohon iñi ndo ñasihí ra Lot, ñáa cha cuví chi ña.

³³ Tandihí ndo cha cuñí ca ndo cha iyó síqui ñuhu ñáyiví ihya, cucunaa ndo. Ta tandihí ndo cha ña quichaha ndo cha iyó ñáyiví ihya, cucacu ndo.

³⁴ "Ta catyí chi ndo vatyí cha cuaa cuan uvi tahan ra cucava noo nu chito. Noo ri ra cunaquehin. Ta nonga ra cundoo ra.

³⁵ Ta uvi tahan ñusihí ñn ri cu nyicó ñu quiví cuan. Noo ri ña, cunaquehin. Ta nonga ña cundoo ña.

³⁶ Ta catyí chi ndo vatyí uvi tahan ra cohon nu chiquí. Noo ra cunaquehin, ta nonga ra cundoo ra —catyí ra Jesús.

³⁷ Cuhva cha chiñí ñu tuhun ihya, quichaha ndaca tuhun ñu chi ra Jesús.

—¿Nya maa maa cucuvi ihya Tata? —catyí ñu.

Tyicuan ta nacahan ra Jesús ta catyí ra:

—Nu catuví coño ñuhu chihi, yucuan cundu ñn ri chii.

18

Nu sañahá ra Jesús vatyí tari chicán noo ñaha chihí yí chi juez, tyicuan caa tahán chi cacan yo chi Nyoo

¹ Tyicuan ta chaha ra Jesús noo cuhva ihya. Vatyí na cacan tahvi ñu tyicuan ri maa, ta ma cundihñi ñu.

² Ta catyí ra:

—Iyó noo ñuu cha nyaá noo juez. Ta juez cuan ña sahá maa ra ñáyiví chi Nyoo. Ta ni ri ña quichaha maa ra chi ñáyiví.

³ Ta suri ñuu cuan iyó tucu noo ñaha ndahvi cha chihí yí. Ta chahan ña chicahan ña chihin ra, vatyí chicá ña cuatyí chaha noo ra xaan iñi chi ña.

⁴ Ta juez cuan ña quichaha maa ra chi ña. Ña sandaa maa ra tyiño chicá ña. Ta cha naha xaan chicán ña. Tyicuan ta quichaha ndichi xiñi juez cuan: "Vasi ña yuhví chi Nyoo, ta ñahri cuende chi ñáyiví,

⁵ soco ñaha ihya sayangá xaan ña chii. Ta yucuan chaha cua sacaqui chi ña. Vatyí coto quichi ca ña, ta sanaquiqui ña tisihi", ndichi xiñi ra.

⁶ Tyicuan ta catyí ra Jesús:

—Tyicuan caa catyí juez ña vaha cuan. Tu juez cuan cha quiñi iyó ra ta tyinyee ra chi ñaha ndahvi cuan,

⁷ ta nyaca cuví Nyoo, ¿atu ma tyinyee ra chi ñáyiví cha chicán ndiyaca ta ndiquiví chi ra? ¿Atu cuatu xaan ra cha tyinyee ra chi ñu?

⁸ Catyí chi ndo, vatyí numi ri cutyinyee ra chi ñu. Soco quiví quichi yuhu, Rayí cha quichí nya gloria, inga chaha, chitó Nyoo tatu nañihi que chi ñu cha ndicha chinó iñi chii —catyí ra Jesús.

Noo cuhva cuenda ra tavá xuhun cuenda gobiernu ñuu Roma ta cuenda ra fariseo

⁹ Tyicuan ta chaha ra Jesús nonga cuhva cuenda ra savahá chii, ta ña cuñí nyehe ra chi inga ra. Ta quichaha catyí ra:

¹⁰ —Iyó uvi tahan ra chahan chichi vehe ñuhu chicacan tahvi ra chi Nyoo. Noo ra cuan ra fariseo cuví ra. Ta inga ra cuan ra tavá xuhun cuenda gobiernu ñuu Roma cuví ra.

¹¹ Ta ra fariseo cuan chicuinanyaa ra, ta quichaha cahan ra chihin Nyoo. Ta cahnu saha ra chi ra. Ta catyí ra: "Sutu Mañi yuhu, nacuhve tyahvi nyoo chuun vatyí yuhu ñima tari inga ñáyiví cuví. Vatyí suhu ñu. Quiñi iyó ñu. Iyó ñasihí ra ta iyó inga ñusihí chi

ra. Ta ni ri ñima tari ra tavá xuhun cuan cuví.

¹² Vaha ca quichahí tuhun maun ta ñima ca inga ñáyivi. Vatyí uvi chaha cha noo vitya ña chachí. Ta chahí uchi siqui noo noo cientu cha sahá ganai chuun”, catyí ra.

¹³ Soco ra tavá xuhun cuenda gobiernu Roma cuan cha cañi ri chiin nanyaá ra. Ta ña caña iñi ra nanyehe ndaa ra. Ta cañi ra ndaha ra añima ra vatyí ndu uvi iñi ra cuatyí ra. Ta catyí ra: “Sutu Mañi yuhu. Nyehe ndahvi chii vatyí iyó xaan cuatyí”, catyí ra —catyí ra Jesús.

¹⁴ Ta catyí tucu ra Jesús tyehe caa:

—Catyí chi ndo vatyí Nyoo sahá ra tucahnu iñi chi ra tavá xuhun cuan. Sanaa Nyoo cuatyí ra ta cuanuhu ra nya vehe ra. Soco ra fariseo cuan, ñahri tucahnu iñi ñihi ra, vatyí yóo ñáyivi cha savahá xaan chi nuu Nyoo, cusanocuee Nyoo chi ñu, ta ñu sanocuee chi, Nyoo cusanducahnu ra chi ñu —catyí ra Jesús.

Nu nasocó ra Jesús chi ra cuatyaa (Mt. 19.13-15; Mr. 10.13-16)

¹⁵ Tyicuan ta quichi nyaca ñáyivi chi ra cuatyaa chi ra Jesús vatyí na tyiso ra ndaha ra xiñi ndotyin. Soco cuhva cha nanyehe ra cachicá noo chihin ra vatyí tyicuan caa, ña chaha ca ra.

¹⁶ Tyicuan ta cana ra Jesús chi ra cachicá noo chihin ra, ta catyí ra chi ra:

—Saña ndo chi ra cuatyaa na quichi maa ndotyin nu nyai. Ta ma casi ndo, vatyí ñu nyacá ñaha Nyoo añima, cuví ñu tari ra cuatyaa ihya.

¹⁷ Ta catyí chi ndo vatyí tatu ña ita iñi ndo chi Nyoo, tari noo ra cuatyaa ita iñi ndotyin chi sutu ndotyin, ma cuví quihvi ndo nu nyacá ñaha Nyoo.

Nu chahá ra Jesús tuhun vatyí yí xaan nacuhva cuenda noo ra tyayii chi ra chi Nyoo

(Mt. 19.16-30; Mr. 10.17-31)

¹⁸ Tyicuan ta noo ra cha cuví nuu cuenda vehe ñuhu ndacá tuhun ra chi ra Jesús, ta catyí ra:

—Maestro, ra vaha cuvún. ¿Yoso caa cunyacuvi ta ñihi ñáyivi cha ma naa ca maa coi? —catyí ra.

¹⁹ Tyicuan ta catyí ra Jesús chi ra:

—¿Ñáa tuhun catyún vatyí ra vaha cuví? Noo ri maa Nyoo cuví ra ra vaha. (Ta cha catyún tyi vahi, nacotón tyi Nyoo cuví.)

²⁰ Yoho chitón tandihí tuhun cha tachí Nyoo tyi sacuvi yo: “Cha ma coo inga ñusihí chuun. Ma cahñun chi ñáyivi. Ma suhun. Ma cahun cuendu siqui ñáyivi. Ta sahun ñáyivi chi sutun ta chi sihun” —catyí ra Jesús.

²¹ Tyicuan ta ra cuan catyí ra:

—Tandihí ihya ta quichahí nyata luhli ta nyacua nya vityin —catyí ra.

²² Nu chiñi ra Jesús cha catyí ra cuan, tyicuan ta catyí ra chi ra:

—Soco cumañi sacuvun nonga cha sacuvun. Xico tandihí cha iyó chuun. Ta cuhva chi ñu ndahvi. Ta quichun chate. Tyicuan ta coo cha tyayii chuun nya gloria —catyí ra.

²³ Soco ra cuan nu chiñi ra tuhun cuan, nducuihya xaan iñi ra, vatyí tyayii xaan ra.

²⁴ Cha nanyehe ra Jesús vatyí nducuihya iñi ra, ta quichaha catyí ra:

—Yii xaan ta cuvi nacuhva cuenda ñu tyayii chi ñu na cunyacá ñaha Nyoo añima ñu.

²⁵ Tañi tyehe yaha noo camello xiu noo yiqui ticu, ta ñima ca cha quihvi noo ñu tyayii nu nyacá ñaha Nyoo —catyí ra.

²⁶ Ta ñu cha cachiñi tuhun ihya catyí ñu:

—Tatu tyicuan caa, ¿yóo cha cuví cacu vii? —catyí ñu.

²⁷ Tyicuan ta ra Jesús catyí ra:

—Tandihí cha ña cuví sacuvi rayii, Nyoo cuví sacuvi ra —catyí ra.

²⁸ Tyicuan ta ra Pedro catyí ra:

—Sutu Mañi yuhu, nyuhu tandihí maa cha iyó chi ndi sandoo ndi, ta nyicón ndi chuun —catyí ra.

²⁹ Tyicuan ta catyí ra Jesús chi ra:

—Cha ndicha catyí chi ndo. Vatyí tandihí ndo cha sandoo ndo vehe ndo, o ñasihí ndo, o yañi ndo, o sutu ndo, o sehe ndo cha catyí cha chaha

ndo cha cunyaca ñaha Nyoo aña
ndo,

³⁰ cuaha xaan cha vaha cunañihi
ndo ihya ñáyiví ta cunañihi ndo inga
ñáyiví cha ma naa ca maa —catyí ra
Jesús.

*Inga chaha sacotó ra Jesús yoso
caa cucahñi ñáyiví chi ra*

(Mt. 20.17-19; Mr. 10.32-34)

³¹ Ta cana sñin ra Jesús chi ndi uchi
uvi ra cachicá noo chihin ra, ta catyí
ra chi ra:

—Vityin cuhun yo nya Jerusalén.
Vatyí yucuan cuchino cava tandihi
tuhin cha tyaa ra profeta Nyoo ta cha
naha. Vatyí yuhu Rayi cha quichi nya
gloria cuví.

³² Vatyí cucuhva cuenda ra chii chi
ra inga ñuu, ra cha ñima ra ñuu Israel
cuví. Ta cucuacu nyaa ra chii. Ta
cucahan ra chii. Ta cutyicusñi ra nui.

³³ Ta cucañi ra chii, ta cucahñi ra
chii, soco nu cu uñi quiví ta cunan-
dote —catyí ra Jesús.

³⁴ Ta ra cachicá noo chihin ra ña
cutuñi iñi ra tuhun cuan ni ña cachitó
ra ñáa tuhun cahán ra Jesús chihin ra.
Vatyí ña chaha Nyoo vatyí cacutuñi
iñi ra.

*Nu sananyehé ra Jesús chi noo ra
caa ñuu Jericó*

(Mt. 20.29-34; Mr. 10.46-52)

³⁵ Cuhva cha cua cha ra Jesús ñuu
Jericó. Ta yuhu ityí cuan nyaá noo ra
cuaa. Ta chicán ra limuxtan.

³⁶ Tyicuan ta chiñi ra vatyí cuaha
xaan ñáyiví cua yaha. Ta ndaca
tuhun ra ñáa cha cuví cuan.

³⁷ Ta ñáyiví nacatyí ñu chi ra vatyí
ra Jesús, ra ñuu Nazaret, ican cua
yaha cuan.

³⁸ Tyicuan ta quichaha cana cha
ra:

—¡Yoho Jesús, ra vachi tata rey
David! ¡Cundahví cuñi nyehun chii!
—catyí ra.

³⁹ Ta ra cha cuahan coyo ityí nuu
cuan, quichaha cacatyí ra chi ra,
nacasi ra yuhu ra. Soco cha ca caná
cha ra, ta catyí ra:

—¡Yoho, ra vachi tata ra David!
¡Cundahví cuñi nyehun chii! —catyí
ra.

⁴⁰ Tyicuan ta chicuiñi ra Jesús yu-
cuan. Ta tachi ra tyiño na cuquehen
chi ra cuaa cuan. Ta cuhva cha cha
ra cuaa cuan nu nanyaá ra Jesús, ta ra
Jesús quichaha ndaca tuhun ra chi ra,
ta catyí ra:

⁴¹ —¿Ñáa cha cuñún vatyí sacuvi
chuun?

Tyicuan ta ra cuaa cuan nacahan
ra, ta catyí ra:

—Sutu Mañi yuhu, cuñí nanyehi
—catyí ra.

⁴² Tyicuan ta catyí ra Jesús chi ra:

—Nanyehe. Cha nduvaha chiti
nuun, vatyí chinó iñun chii —catyí ra.

⁴³ Ta caa cuhva ri cuan, ra cuaa
cuan nanyehé ra. Ta cuahan ra chata
ra Jesús. Ta sacahnú ra chi Nyoo. Ta
tandihí ñáyiví cha nyehe ñu tyicuan
caa, sacahnú ñu chi Nyoo.

19

Nu cuahan ra Jesús vehe ra Zaqueo

¹ Yucuan ta quihví ra Jesús ñuu Jer-
icó cuan. Ta cua yaha ra chichi ñuu
cuan.

² Ta yucuan iyó noo ra tyayñi
vavaha. Nañi ra Zaqueo. Ta ra cuví
nuu cuenda ra catava xuhun cuenda
gobiernu ñuu Roma cuví ra.

³ Ta cuñí xaan ra cohon nuu ra chi
ra Jesús. Ta ña cuví nyehe ra chi ra
vatyí cuaha xaan ñáyiví. Ta maa ra
tyaha xaan ra.

⁴ Yucuan ta chino vavaha ra
cuahan ra ityí nuu, ta ndaa ra nu
noo yutun cha nañi sicómoro cha
nanyaá yuhu ityí nu cua yaha ra
Jesús, tacuhva cuví nyehe ra chi ra.

⁵ Ta cuhva cha yaha ra Jesús
nanyehé ndaa ra ityí siqui ta nanyehé
ra chi ra Zaqueo. Ta quichaha catyí ra
chi ra:

—Zaqueo, sanumi ta noun nu yu-
tun chiña. Vatyí vityin cuhin vehun
—catyí ra chi ra.

⁶ Tyicuan ta numi ri noo ra Zaqueo
nuu yutun cuan. Ta sñi vavaha cuví
chi ra. Ta quehen cuenda ra chi ra
Jesús. Ta cuahan ra chihin ra nya
vehe ra.

⁷ Ta cha nyehe ñáyiví cha tyicuan
caa, ta tandihí ñu quichaha cahán

nyaa ñu chi ra Jesús. Ta catyí ñu vatyí ndoo ra vehe noo ra iyó cuatyí.

⁸ Nu canyicú ra chichi vehe cuan, ra Zaqueo ñicuinyaa ra. Ta quichaha catyí ra chi ra Jesús:

—Sutu Mañi yuhu, yuhu cua cuhve sava cha iyó chii chi ñu ndahvi. O tatu suhi chi ñáyiví chihin cha sandavi ñahi chi ñu, vityin cunacuhva cuende nya cumi ca tahan chaha chi ñu —catyí ra chi ra.

⁹ Tyicuan ta catyí ra Jesús:

—Vityin cacu añimon, ta ñáyiví chi ra Abraham cuvún. Vatyí nacuhva cuendon chuun chi Nyoo tari nacuhva cuenda ra Abraham chi ra chi Nyoo.

¹⁰ Vatyí yuhu Rayíi cha quichi nya gloria vachi nanduqui ta vachi sacaqui chi ñáyiví cha cua naa —catyí ra Jesús.

Nu sañahá ra Jesús na saha tyiño yo chihin cha chahá Nyoo chi yo

(Mt. 25.14-30)

¹¹ Ta cha ni ri ca cha chiñí ñáyiví tuhun cahán ra Jesús, quichaha cahán tucu ra inga cuhva ihya. Vatyí cha cuyatyin chaa ra Jerusalén. Ta ñáyiví cuñí maa ñu vatyí cha cua quichaha ra cunyaca ñaha ra yucuan.

¹² Tyicuan ta catyí ra:

—Chiyo noo ra vaha ta cuñí cuhun ra noo ñuu cañi. Vatyí yucuan cunanduvi ra rey tacuhva vatyí ndichi ra ñuu ra, soco cha cuví ra rey.

¹³ Ta cuhva cha cumañi cuhun ra, cana ra chi uchi tahan musu ra. Ta chaha cuenda ra noo xuhun chi noo noo ra. Ta catyí ra chi ra: “Saha tyiño ndo chihin xuhun chiña nyacua nya ndichi mai”, catyí ra.

¹⁴ Soco suhva ñáyiví ñuu ra, tasi cuñí ñu nyehe ñu chi ra ta ña cuñí ñu cha cuví ra rey chi ñu. Ta tachi ñu chi suhva ra cuhun chata ra, vatyí catyí ra vatyí ña cuñí ñu cha cuví ra rey chi ñu.

¹⁵ Soco ra cuan nduví ra rey. Tyicuan ta nachaa ra nya ñuu ra. Ta quiví cha nachaa ra, cana ra chi musu ra, ra cha sandoo ra xuhun chii. Vatyí

coto ra yoso saha ganaa xuhun ra cha ni ri ca cha chahan ra.

¹⁶ Ta chaa noo ra cuan. Ta catyí ra: “Tata, saha ganai uchi ca tahan chaha siqui xuhun cha sandoun chii”, catyí ra.

¹⁷ Tyicuan ta quichaha catyí rey cuan chi ra: “Vaha xaan. Yoho vaha musu cuvún. Vatyí vaha saha tyiño chihin chiin xuhun cha chahí chuun. Ta vityin cunyaca ñahun uchi tahan ñuu”, catyí rey cuan chi ra.

¹⁸ Tyicuan ta chaa tucu inga ra cha chaha ra xuhun chii. Ta quichaha catyí ra: “Ma xuhun ihya. Saha ganai ohon tahan ca chaha siqui xuhun cha sandoun chii”, catyí ra.

¹⁹ Tyicuan ta catyí rey chi ra: “Yoho cunyaca ñahun ohon tahan ñuu”, catyí ra.

²⁰ Tyicuan ta chaa tucu inga ra cuan. Ta quichaha catyí ra: “Ma xuhun ihya cha chahun chii. Yuhu chicumí vahi chichi noo pañitu.

²¹ Vatyí yuhví xain chuun, vatyí yoho cuvún noo ra xaan. Vatyí naquehun cha ñima chuun cuví. Ta naquehun tyiño saha inga ñáyiví”, catyí ra cuan.

²² Tyicuan ta rey cuan catyí ra chi ra: “Yoho musu ña vaha cuvún. Vityin suri chihin tuhun cha catyun chii, cucatyí tucu yuhu chuun. Tatu chitón vatyí yuhu, xain, ta chitón vatyí naquehin cha ñima chii cuví, ta naquehín cha ña saha tyiño,

²³ ¿ñáá tuhun ña chahun ta chityihun xuhin banco vatyí nachai soco cha nducuaha ca xuhin?” catyí rey cuan.

²⁴ Ta quichaha catyí ra chi ra canyicú cuan: “Tinyaa ndo xuhun cha chahí chi ra, ta cuhva ndo chi ra cha saha ganaa uchi ca tahan cuan”, catyí ra.

²⁵ Tyicuan ta quichaha catyí ra chi rey cuan: “Tata, soco ra cuan, cha iyó uchi tahan chi ra”, catyí ra.

²⁶ Tyicuan ta rey cuan catyí ra: “Soco catyí yuhu chi ndo. Vatyí ra cha vaha ca saha tyiño chihin cha chahí chi, cucuhva que chi ra. Ta ra cha chahí chiin ri, ta ña cuñí ra saha tyiño

ra chihin cuan, cutinyaa ndihi chi ra.

²⁷ Ta tandihi ñu xaan iñi chii, ñu ña cuñí vatyí cunyaca ñahi chi ñu, nyaca ndo chi ñu tyehe vatyí cahñi ndo chi ñu nui”, catyí rey cuan —catyí ra Jesús.

Nu cua chaa ra Jesús Jerusalén
(Mt. 21.1-11; Mr. 11.1-11; Jn. 12.12-19)

²⁸ Cha yaha cahan ra Jesús cuhva cuan, ta sañihi ra cuahan ra ityi Jerusalén.

²⁹ Yucuan ta cua chaa ra ñuu Betfagé chihin ñuu Betania, yatyin ri noo yucu cha nañi Olivo, vatyí maa maa ri maa tun Olivo iyó yucuan. Ta tava ra tyiño chi uvi tahan ra cachicá noo chihin ra.

³⁰ Ta catyí ra chi ra:

—Cuahan ndo ñuu cha nyaá yatyin ri cuan. Ta yucuan cunañihi ndo noo burru luhlu, quití ta coto ca tyayu, nuhñi ti. Ndachi ndo chi ti. Ta nyaca ndo chi ti tyehe.

³¹ Tatu yóo cha catyí chi ndo: “¿Ñáá tuhun cha ndachi ndo chi ti?” catyí ndo chi ñu: “Vatyí chiñuhú ti chi maa ra nyaca ñaha chi yo.”

³² Tyicuan ta ra cachicá noo chihin ra, cuahan coyo ra. Ta nañihi ra chi ti tari cuhva catyí maa ra Jesús.

³³ Ta cuhva cha candachi ra chi ti, cha coyo chitoho ti. Ta candaca tuhun ra chi ra:

—¿Ñáá tuhun cha ndachi ndo chi burru chiña? —catyí ra.

³⁴ Tyicuan ta canacahan ra cuan ta cacatyí ra:

—Ndachí ndi chi ti vatyí chiñuhú ti chi maa ra nyacá ñaha —catyí ra.

³⁵ Tyicuan ta quehen ra chi ti. Ta chinyaca ra chi ti nu nyaá ra Jesús. Ta tyiso ra sahma ra siqui ti. Tyicuan ta casanda ra chi ra Jesús siqui ti.

³⁶ Tyicuan ta cuahan ra Jesús. Ta cuaha vavaha ñáyivi cachacun ñu sahma ñu ityi nu cua yaha ra, yosó ra burru cuan.

³⁷ Tyicuan ta cha cua cuyatyin tandihi ñu chihin ra Jesús nu iñi noo yucu Olivo cuan. Ta quichaha cana chaa tandihi ñu chinó iñi chi ra chihin

cha sii cuví chi ñu. Ta sacahnú ñu chi Nyoo vatyí cuaha xaan cha vaha nyehe ñu cha sacuvi ra.

³⁸ Yucuan chaha catyí ñu:

—¡Na sacahnu yo chi Rey ihya vatyí vachi ra chihin siivi Nyoo! ¡Na coo cha taxi ri andivi! ¡Ta na sacahnu yo chi Nyoo! —catyí ñu.

³⁹ Tyicuan ta suhva ra fariseo cha cuahan coyo chihin ñáyivi cuan quichaha cacatyí ra:

—Maestro, sacutaxin chi ñu nyicón chuun —cacatyí ra.

⁴⁰ Nacahan ra Jesús ta catyí ra:

—Tatu ñáyivi ihya ta cu taxin ñu, nyacua nya yuu ta nacana chaa chi, ta sacahnu chi chii —catyí ra Jesús.

⁴¹ Yucuan ta cha cua chaa ra yatyin ri Jerusalén cuan. Ta nanyehe ra Jesús chi ñuu cuan ta quichaha chacu chaa ra vatyí cuihya iñi ra.

⁴² Ta catyí ra:

—Tyehe ta chitó nyoho, ta cutuñi iñi ndo yoso caa cha vaha cha vachi nyaque chi ndo quivi ihya. Soco xehe xaan ñohó cha chiñi tuñi cuan, ta ña nañihí maa ndo.

⁴³ Soco cuchaa quivi ña vaha vatyí ra xaan iñi chi ndo cutyihí chacu ra chi ndo. Vatyí tandihi ri ityi cuquichi coyo ra siqui ndo. Ta cucañi tahan ra chihin ndo.

⁴⁴ Ta cucacun ñuhú ra chi ndo ta cucañi ra chi ndo. Ta ni noo yuu yoso nyitahan ta ma sandoo ra. Tyicuan caa cucuvi vatyí ña cuñí ndo nacoto ndo cha quichi Nyoo quichi sacacu ra chi ndo.

Nu tava ñehe ra Jesús chi ra caxico chichi vehe ñuhu cahnu
(Mt. 21.12-17; Mr. 11.15-19; Jn. 2.13-22)

⁴⁵ Tyicuan ta ra Jesús quihvi ra chichi nuquehe vehe ñuhu cahnu. Ta quichaha tava ñehe ra tandihi ra caxicó ta casatá yucuan.

⁴⁶ Ta catyí ra chi ra:

—Nu tutu Nyoo catyí chi vatyí vehe Nyoo, nu chicán tahvi yo chi ra cuví. Soco nyoho sananduvi ndo vehe nu nyicú ra suhu —catyí ra.

⁴⁷ Ta tandihí quiví chahán ra Jesús chisañaha ra chí ñáyiví chichi vehe ñuhu cuan. Soco ra cacuví nuu chi tata sutu, ta ra casacuahá cuenda ley vehe ñuhu, ta ra cacuví nuu chi ñuu cuan, canducú ra cuhva yoso caa ta cahñi ra chi ra.

⁴⁸ Soco ña ñihí maa ra cuhva yoso caa sacuvi ra. Vatyí tandihí ñáyiví ta vaha tyasohó ñu tuhun cahán ra Jesús.

20

Nu ndaca tuhun ra fariseo chi ra Jesús yóo cha tachí chi ra vatyí cahán ra nuu ñáyiví

(Mt. 21.23-27; Mr. 11.27-33)

¹ Noo quiví cuan cha ni ri ca cha sañahá ra Jesús chí ñáyiví chichi vehe ñuhu cahnu, ta cahán ra tuhun yoso caa sacacú Nyoo chí ñu. Ta chaá coyo ra cuví nuu chí tata sutu chihin ra casacuahá cuenda ley vehe ñuhu, in ri chihin ra cacuví mandoñi.

² Ta cacatyí ra chí ra:

—Catyí chí ndi ¿yóo cha tyaá tyiño chuun vatyí sacuvun tyehe caa? —catyí ra.

³ Tyicuan ta ra Jesús quichaha catyí ra chí ra:

—Yuhu tucu cua ndaca tuhin noo tuhun chí ndo.

⁴ ¿Yóo cha tachí chí ra Juan vatyí sacondutya ra chí ñáyiví? ¿Atu Nyoo tachí chí ra, o ñáyiví?

⁵ Tyicuan ta cacatyí ra cuan chí ra tahan ra:

—Tatu catyí yo vatyí Nyoo tachí chí ra Juan cuan, cucatyí ra chí yo “Ñáá tuhun ña chinó ñni ndo tuhun cahán ra.”

⁶ Ta tatu catyí yo vatyí ñáyiví tachí chí ra, ñáyiví cahñi ñu chí yo chihin yuu. Vatyí tandihí ñu, ta cuñí ñu vatyí Nyoo tachí chí ra —cacatyí ra.

⁷ Tyicuan ta cacatyí ra chí ra Jesús vatyí ña cachitó ra yóo cha tachí chí ra Juan vatyí na sacondutya ra chí ñáyiví.

⁸ Tyicuan ta ra Jesús catyí ra chí ra:

—Ni ri yuhu, ta ma catyí chí ndo yóo cha tachí chii, cha sacuvi tyehe caa.

Nu sañahá ra Jesús vatyí tari ra sahá tyiño ña vaha tyicuan caa cuví ra cha cucahñi chí ra

(Mt. 21.33-44; Mr. 12.1-11)

⁹ Tyicuan ta quichaha catyí ra Jesús noo cuhva ihya chí ñáyiví:

—Noo ra tachí ra cuaha yoho tichaha ndiví nu ñuhú ra. Yaha cuan ta chaha noo ra ñuhú cuan chí suhva ra casaha tyiño. Tyicuan ta naha cuahan ra inga ñuu.

¹⁰ Ta chaá quiví cha ñni chíti cuan. Tyicuan ta tachí ra chí noo musu vatyí cuquehen ra suhva chíti cha tahán chí chí ra. Soco cacañi xaan ra casahá tyiño cuan chí musu cuan. Ta sacunuhu ra chí ra chihin nu ndaha nu ndi ra.

¹¹ Tyicuan ta chitoho yoho tichaha ndiví cuan tachí tucu ra chí inga musu. Suri cacañi xaan ra chí ra. Ta cacahan uhvi ra chí ra. Ta natachí ra chí ra. Soco suri ñahri cachaha ra cuiso ra cunuhu.

¹² Tyicuan ta chitoho cuan tachí tucu ra chí inga ra. Soco suri tyicuan caa chinyacuvi tucu ra chihin ra. Ta sañicuehe ra chí ra. Ta tava ñehe ra chí ra yucuan.

¹³ “Yaha cuan ta quichaha catyí chitoho ñuhu cuan: “¿Yoso caa cunyacuvi vityin? Cua tachi chí sehi, ra cha cuñí vavahi. Ta cha nanyehe ra chí ra, vasi casaha ra ñáyiví chí ra, vatyí sehi cuví chí ra.”

¹⁴ Soco cuhva cha cananyehe ra casahá tyiño cuan chí ra, catyí ra chí ra tahan ra: “Ican ra ihya cundoo chihin ñuhú ihya tatu chíti sutu ra. Soco nacahñi yo chí ra. Vatyí ndoo maa yo chihin ñuhú ihya”, catyí ra.

¹⁵ Tyicuan ta tava ñehe ra chí sehe chitoho ñuhú cuan ityi chata chacu. Ta cachahñi ra chí ra —catyí ra Jesús.

Tyicuan ta catyí ra Jesús chí ñáyiví nyicú cuan:

—¿Ñáá cha cusacuvi chitoho ñuhú cuan chí ra cachahñi chí sehe ra cha cuhva cha cuñí nyoho?

¹⁶ Catyí chí ndo vatyí quichi ra ta cahñi ra chí ra casahá tyiño cuan. Ta cuhva ra ñuhú cuan chí inga ra —catyí ra Jesús.

Ta cuhva cha chiñi ñáyivi tuhun cuan, yuhví xaan ñu cuví. Ta quichaha catyí ñu:

—Ñã cuñi Nyoo ta cuvi tyicuan caa! —catyí ñu.

¹⁷ Soco ra Jesús nanyehe ra chi ñu ta catyí ra:

—Tyicuan caa cucuvi. Vatyí nyaá nu tutu Nyoo ta catyí chi tuhín tyehe caa:

Yuu cha ñã cuñí ra casavahá vehe cotyiño ra,

Ican cuan cuví yuu cha niñi ca.

¹⁸ Tari tahnú noo ra cha canacava síqui yuu, tyicuan caa tiví ñu ñã cuñí quichaha tuhún cahín. Ta sñn ri, tari taxín nyihi noo ra cha canacava yuu síqui, tyicuan caa cunaa ñu ñã cuñí quichaha tuhún cahín —catyí ra Jesús.

¹⁹ Ta ra cacuví nuu chi tata sutu ta ra casacuahá cuenda ley vehe ñuhu catuví iñi ra vatyí tuhún cha catyí ra Jesús, chi maa ra nañi cuan. Ta cuñí ra catiñ ra chi ra Jesús vatyí cacahñi ra chi ra. Soco ñã cachitó maa ra yoso caa. Vatyí yuhví ra chi ñáyivi.

Tuhún cha tyiyahví ñu xuhún chi gobiernu ñuu Roma

(Mt. 22.15-22; Mr. 12.13-17)

²⁰ Tyicuan ta catachí ra chi suhva ra vatyí cunducu nyehe ra chi ra Jesús. Ta casahá ra tyi ra vaha cacuvi ra. Vatyí coto ra ñáá noo tuhún ñã vaha cahán ra Jesús tacuhva cuvi catiñ ra chi ra. Ta cuhva cuenda ra chi ra chi gobernador.

²¹ Yucuan chaha candaca tuhún ra casavaha chii cuan chi ra Jesús:

—Maestro, chitó ndi vatyí vaha tuhún cahún. Ta sañahún cha vaha chi ñáyivi. Ta ñima cuhva iyó ri ñu nyehún soco añima ñu ñandihí. Ta maa ri maa ityí Nyoo sañahún.

²² Catyí chi ndi ¿atu vaha cha tyiyahví yo cha chicán gobiernu ñuu Roma chi yo, o ñã vaha? —catyí ra.

²³ Soco ra Jesús tuví iñi ra vatyí cuñí ra nducu nyehe ra chi ra. Ta catyí ra chi ra:

—¿Ñáá tuhún cuñí ndo nducu nyehe ndo chii?

²⁴ Sañaha ndo noo xuhún chiña chii, na nyehi. ¿Yóó chi nuu ta yóó chi sívi nyaá nu xuhún ihya? —catyí ra.

Tyicuan ta nacahan ra cuan, ta catyí ra:

—Nuu gobiernu, ta sívi ra ñandihí —cacatyí ra.

²⁵ Tyicuan ta catyí ra Jesús:

—Tu tyicuan caa, cuhva ndo xuhún chiña chi ra cuví gobiernu cuan vatyí chi maa ra tahán chi. Ta cuhva tucu ndo chi Nyoo cha tahán chi chi ra —catyí ra Jesús chi ra.

²⁶ Ta ñã cuví maa sandahví ñaha ra chi ra Jesús chihin tuhún cahán ra nuu ñáyivi. Ta iyo xaan cacuñí ra tuhún cha nacahan ra. Ta taxi ri cuví ra.

Nu cacuñí ra saduceo sandavi ñaha ra chi ra Jesús

(Mt. 22.23-33; Mr. 12.18-27)

²⁷ Cha yahá cuan ta chaá coyo suhva ra saduceo nu nyaá ra Jesús. Maa ra cuví ra casañahá vatyí ñã nandotó ndiyi.

²⁸ Tyicuan ta catyí ra chi ra Jesús:

—Maestro, sandoq ra Moisés tuhún ihya vatyí tatu noo ra chihí ra ta ndoo ñasihí ra, tatu yori sehe ra chiyó chihin ñã, tahán chi cha tandaha yañi ra chihin ñã tacuhva cha ma cunaa tata yañi ra.

²⁹ Soco cuñí ndi coto ndi vatyí chiyó ucha tahan ra chihin yañi ra. Ta ra cha ñihi ca chicoq ñasihí ra, soco yori sehe ñu chiyó, ta chihí ra.

³⁰ Tyicuan ta naquehen ra cha cu uvi suri maa ñã cuan. Ta yori tucu sehe ñu chiyó. Ta chihí tucu ra cuan.

³¹ Ta suri tyicuan caa cuví chihin ra cu uñi cuan. Ta suri tyicuan caa cuví chi ndi ucha ra. Ni noo ra ta yori sehe ra chiyó chihin ñã.

³² Ta nu ndihí tuhún chihí ndihí maa ñã.

³³ Ta cuñí ndi coto ndi yóó ra cuví ñasihí chi ñã chichi cha ndi ucha tahan ra cuan nu cunandoto ñu nuu Nyoo —cacatyí ra saduceo cuan.

³⁴ Tyicuan ta nacahan ra Jesús, ta catyí ra:

—Ihya ñáyivi, rayíi ta ñusihí tandaha ñu.

35 Soco ñu cha tahán chi nandoto inga ñáyiví nu nyacá ñaha Nyoo, ña tandaha ca ñu ta ni ma cuhva ca ñu sehe ñu tandaha.

36 Ta ñahri tuhun chihi iyó nyicuan. Soco cucuvi ñu tari ángel. Ta cuví ñu sehe Nyoo cha ndicha vaha vatyí nandoto ñu.

37 Cha ndicha cuví vatyí ra Moisés nu sacoto ra tuhun cha cayu taca iñu cuan, yucuan sacotó ra chi yo vatyí ñu chihi nandotó ñu. Vatyí yucuan catyí ra vatyí Sutu Mañi yo Nyoo cuenda ra Abraham, ta Nyoo cuenda ra Isaac, ta Nyoo cuenda ra Jacob, cuví chi ra.

38 Vatyí Nyoo ñima Nyoo cuenda ñáyiví chihi cuví ra. Nyoo cuenda ñu nyitó cuví ra. Vatyí cha cuenda Nyoo tandihí yo ta nyitó añima yo vasi chihi coño ñuhu yo —catyí ra Jesús.

39 Tyicuan ta suhva ra casacuahá cuenda ley vehe ñuhu catyí ra:

—Vaha xaan nacahun Maestro —catyí ra.

40 Yucuan ta ña caña ca maa iñi ra candaca tuhun ra ñáa ca tuhun chi ra Jesús.

Cristo vachi ra tata ra David, ta suri cuví tucu ra Sehe Nyoo

(Mt. 22.41-46; Mr. 12.35-37)

41 Tyicuan ta ndaca tuhun ra Jesús chi ñu:

—¿Ñáa tuhun cha catyí ndo vatyí ra Cristo tata ra David vachi ra?

42-43 Vatyí suri maa ra David catyí ra nu libru Salmo tyehe caa:

Cahán Suti Nyoo chihin Suti ra Cristo, ta catyí ra chi ra:

“Cunya chiyo vahi nyacua nya cuhve chi ra xaan iñi chuun vatyí cuaca chahun síqui ra”, catyí Nyoo chihin yuhu ra David ta cha naha.

44 ¿Yoso caa cha ra vachi tata ra David cuví chi ra Cristo, ta suri maa ra David catyí vatyí Sutu ra cuví chi ra Cristo? —catyí ra Jesús.

Nu catyí ra Jesús vatyí cuaha xaan cuatyí ra casacuahá cuenda ley vehe ñuhu iyó

(Mt. 23.1-36; Mr. 12.38-40; Lc. 11.37-54)

45 Tandihí ñáyiví cachiñí ñu tuhun cahán ra Jesús chihin ra cachicá noo chihin ra nu catyí ra tyehe caa:

46 —Saha ndo cuenda chi ndo chihin ra casacuahá ley vehe ñuhu. Tahán xaan iñi ra cuihno ra sahma cañi. Ta cuñí ra vatyí saha ndo ñáyiví chi ra nuyahvi ta cuhva ndo nocumi chi ra. Ta nanducú ra tyayu vaha cunyaa ra chichi vehe ñuhu ta nu cuahan ra vico.

47 Ta naha chicán tahvi ra chi Nyoo nu tuví, cha cuñí ra cha catyí ñáyiví tyi vaha ñáyiví cuví ra. Soco suri maa ra tinyaá ra vehe ñu ndahvi cha chihí y# vatyí ña cuví tyiyahvi ñu xuhun cha tavá ra síqui ñu. Yucuan chaha ñihi ca cutachi tuñi Nyoo chi ra —catyí ra Jesús.

21

Noo ofrenda cha chaha noo ñaha sihi cha chihí y#

(Mr. 12.41-44)

1 Ta nyehe ra Jesús vatyí cuaha xaan ñu tyay# catyihí ra xuhun chichi caja cha nanyaá chichi vehe ñuhu cahnu.

2 Ta nyehe tucu ra noo ñaha ndahvi cha chihí y#. Ta tyihí ña uvi tahan ri xuhun cuatyí.

3 Ta catyí ra Jesús:

—Cha ndicha catyí chi ndo vatyí nuu Nyoo cuaha ca tyihí ñaha ndahvi ihya ta ñima ca tandihí ñu tyay# cuan.

4 Vatyí cha ndoó ri síqui chi ñu catyihí ñu. Soco ñaha ihya tyihí ña tandihí cha iyó chi ña —catyí ra.

Nu catyí ra Jesús vatyí cucani ñáyiví vehe ñuhu cahnu

(Mt. 24.1-2; Mr. 13.1-2)

5 Tyicuan ta suhva ñu ndatuhún ñu tuhun vehe ñuhu cahnu cuan. Ta catyí ñu vatyí tyaqui xaan yuu. Tyaqui xaan tacaá cha chaha ñáyiví. Tyicuan ta quichaha catyí ra Jesús:

6 —Coo quiví ta tandihí cha nyehé ndo ihya cutani. Ni noo yuu ta ma coso ca síqui tahan. Vatyí cusanacoyo ra xaan iñi chi ndo.

*Ñáá ndihí seña cha cucuvi cha ni
cumañi ca naa ñáyiví*

(Mt. 24.3-28; Mr. 13.3-23)

⁷ Tyicuan ta quichaha candaca
tuhun ra chi ra Jesús, ta catyí ra:

—Maestro, ¿ama cucuvi tandihí
tuhun cahun ihya? ¿Yoso caa ta coto
ndi tatu cha cuyatyin cha naa ñáyiví?
—cacatyí ra.

⁸ Tyicuan ta catyí ra Jesús:

—Saha vaha ndo cuenda, coto san-
davi ñaha ra chi ndo. Vatyí cuaha
xaan ra cuquichi, ta cucotyíño ra sívi,
ta cucatyí ra: “Yuhu cuví Cristo ra cha
saquichí Nyoo chí. Cha cuñí cunaa
ñáyiví”, cucatyí ra. Soco ma cunyicon
ndo chí ra. Ta ma chino iñi ndo chí ra.

⁹ Ta quiví ñihí ndo tuhun tyi iyó cu-
atyí ta cañí tahan ñáyiví, ma nayuhví
ndo. Vatyí tandihí cuan cutahan chí
cuví xihna ca. Soco cumañi ca chaa
quíví cha naa ñáyiví.

¹⁰ Ta catyí tucu ra:

—Ñáyiví iyó noo ñuu cucañi tahan
ñu chihin ñáyiví inga ñuu. Ta cucoo
cuatyí.

¹¹ Ta cutaan nahnu. Ta cucoo tama.
Ta cucoo cuehe tandihí ri ityí. Ta
cunyehe ñáyiví cuaha xaan cha yuhví
andiví. Cuaha xaan seña nahnu cha
ña tuhvá ñu nyehe cunyehe ñu.

¹² Soco cha cumañi ca cuví ihya,
cutasi iñi ñáyiví chí ndo. Ta cucacan
ñu cuatyí chaha ndo. Vatyí cucutuñi
chí ndo ta cucuhva cuenda ñu chí ndo
chí tata sutu. Ta cutyihí ñu chí ndo
chichi vehe caa. Ta cunyaca ñu chí
ndo nuu rey ta nuu ra cacuví tyiño
cha catyí yuhu.

¹³ Tyicuan ta cuví cahan ndo tuhin
chihin ñu.

¹⁴ Soco saha ndo cuenda ta ma caca
xiñi ndo ñáá tuhun cunacahan ndo
chihin ra cuví tyiño cuan.

¹⁵ Vatyí yuhu cucuhve tuhun cu-
nacahan ndo. Ta cucuhve cha chiñi
tuñi xiñi ndo. Vatyí ni noo ra xaan iñi
chí ndo ta ma cuví chasaha ra chí ndo
chihin tuhun cahán ra.

¹⁶ Soco ñáyiví cunacuhva cuenda
ñu chí ndo nuu ñu xaan iñi chí ndo.
Nyacua nya sutu ndo ta síhí ndo, yañi
ndo, tahan ndo, ta ra tahan ndo cu-
nacuhva cuenda ra chí ndo chí ñu

xaan iñi chí ndo. Ta yihí nyoho cuc-
ahñi ñu chí ndo.

¹⁷ Tandihí ñáyiví ta cutasi cuñí ñu
nyehe ñu chí ndo cha catyí yuhu.

¹⁸ Soco ni noo ixí xiñi ndo ta ma
cunaa.

¹⁹ Tatu ma ndu uvi iñi ndo chii,
cucacu añima ndo.

²⁰ Quíví nyehe ndo vatyí nicachico
yuhu ñuu Jerusalén ihya nyicú
sindaro, coto ndo vatyí cha cuñi chaa
quíví cha sanaa ra ñuu ihya.

²¹ Ta ñáyiví cha nyicú ityí Judea, na
cono ñu ta na tixehe nuu ñu ityí yucu.
Ta ñu nyicú ñuu Jerusalén ihya, na
quita ñu. Ta ñu nyicú nu chiqui, ma
ndichi ñu ñuu ihya.

²² Vatyí yucuan quíví cutachi tuñi
Nyoo chí ñáyiví ñuu ihya. Vatyí
cuchino cava tandihí cuhva catyí
maa nu tutu Nyoo.

²³ Ta ndahví ñusihí cha ñohó sehe
quíví cuan. Ta ndahví ñu cha iyó cha
lee sehe cha ni chaxín ca. Vatyí cuaha
xaan tndoho cunyehe ñu ta tandihí
ñáyiví. Vatyí cuxaan xaan Nyoo chi-
hin ñáyiví ñuu Jerusalén ihya.

²⁴ Sindaro cucahñi ra chí suhva
ñáyiví chihin mityí ra. Ta suhva ñu
cutiin ra ta cunyaca ra chí ñu vehe caa
inga ñuu. Ta ñáyiví cha ñima ñu Israel
cuví, cucuaca chaha ñu Jerusalén ny-
acua nya quíví cha catyí maa Nyoo.

*Yoso caa cuquichi Rayí cha quichi
nya gloria inga chaha*

(Mt. 24.29-35, 42-44; Mr. 13.24-37)

²⁵ Tyicuan ta cuaha cha iyo cun-
yehe ñáyiví nu ñanyii, ta nu yoo, ta
nu tiño. Ta ihya síqui ñuhu ñáyiví
cunayuhví ñáyiví chihin cha iyo cu-
nacatyin tyañuhu.

²⁶ Ta cucoña ñu chihin cha yuhví
ñu cha chicá xiñi ñu ñáá ndihí cha cua
cuví ihya síqui ñuhu ñáyiví. Vatyí ny-
acua nya cha iyó andiví cunacanda.

²⁷ Tyicuan ta cunyehe ñu chí yuhu
Rayí cha quichí nya gloria vachi
chichi noo vico tyaquí chihin tunyee
iñi Nyoo, ta chihin cha cahnú cuví ra.

²⁸ Ta cuhva cha quichaha tuhun
ihya, sanduní ndo iñi ndo ta cusí

cuñi ndo vatyi numi xaan ta cucacu ndo —catyí ra.

²⁹ Tyicuan ta chaha ra Jesús noo cuhva ihya, ta catyí ra:

—Saha ndo cuenda noo yutun cha nañí higuera, o ñáá nonga yutun.

³⁰ Tatu cha cua cuyatyin cha coon savi cha nduyutya numa tun.

³¹ Ta tyicuan caa tucu nyoho, tatu cha nyehe ndo vatyi cha quichaha tandihí tuhun cha catyí chi ndo, coto ndo vatyi cha cuyatyin quivi cha cun-yaca ñaha Nyoo siqui ñuhu ñayivi ihya.

³² 'Soco catyí chi ndo vatyi tuhun ihya cucuvi cha ni ri ca cha iyó ñayivi.

³³ Ta coo quivi cucunaa andivi ta ñuhu ñayivi, soco tuhun cahán yuhu, tyicuan ri cucuvi tari cuhva catyí.

³⁴ Ta saha ndo cuenda chi ndo coto ndundava añima ndo chihin vicio, ta coho xaan ndo ndixi, o caca xaan iñi ndo tuhun tundoho ñayivi ihya. Ta coto sana iñi ndo ta chaa quivi quichi yuhu ta quichi tundoho siqui ndo.

³⁵ Vatyi tyicuan caa cucuvi chi tandihí ñayivi iyó siqui ñuhu ñayivi. Sana iñi ñu ta tari noo cha cua nacasi Nyoo nu ñohó ñu ta ma cuvi quita ñu.

³⁶ Soco nyoho cuatu tuhva ri ndo. Caçan tahvi ndo chi Nyoo tandihí quivi, tacuhva tyinyee ra chi ndo. Ta ma cunaa ndo quivi cuan, tacuhva cuvi chaa vaha ndo nuu yuhu Rayii cha quichi nya gloria —catyí ra Jesús.

³⁷ Ta cha ñucañu sañahá ra Jesús chi tandihí ñayivi chichi vehe ñuhu cahnu. Ta cha cha cuaa chahán ra yucu Olivo.

³⁸ Ta tandihí ñayivi chaç coyo ñu chichi vehe ñuhu cahnu ndihí ñaha ri. Vatyi cuiñi ñu tuhun cahán ra.

22

Nu cua xico ra Judas Iscariote chi ra Jesús

(Mt. 26.1-5, 14-16; Mr. 14.1-2, 10-11; Jn. 11.45-53)

¹ Ta cha nyaña yatyin quivi cha coo vico pascua vico nu tuhva ñu chachi pan cha ñahri yuchan iya yihí chihin.

² Ta ra cacuví nuu chi tata sutu chihin ra casacuahá cuenda ley vehe

ñuhu, nducú xaan ra cuhva yoso caa ta cacahñi ra chi ra Jesús. Soco cayuhví ra chi ñayivi.

³ Tyicuan ta quihvi cuhna chi ra Judas cha catyí ñayivi Iscariote chi. Ta maa ra cuvi noo ra cha uchi uvi tahan ra cha nacachí ra Jesús.

⁴ Ta ra cuan, chahan ra chi cahan ra chihin ra cuví nuu chi tata sutu, ta chihin ra cuví nuu chi ra sahá cuenda vehe ñuhu cahnu. Ta candatuhun tahan ra yoso caa cunacuhva cuenda ra chi ra Jesús.

⁵ Ta ra cuan sii xaan cacuví chi ra. Ta tyaa ra cuhva vatyi cuhva ra xuhun chi ra Judas.

⁶ Ta ra Judas ndoo ra vaha. Ta quichaha nducu ra cuhva yoso caa cuhva cuenda ra chi ra Jesús chi tata sutu cuan, cuhva cha yori ñayivi ny-icú chihin ra.

Nu cuxiñi ra Jesús chihin ra cachicá noo chihin ra

(Mt. 26.17-29; Mr. 14.12-25; Jn. 13.21-30; 1 Co. 11.23-26)

⁷ Ta chaç quivi cha cuví vico nu chachí ñu pan cha ñahri yuchan iya yihí. Ta suri quivi cuan tuhva ñu chahñi ñu noo mbee luhlu cha vico pascua cuan. Vatyi cachi ñu chi ti.

⁸ Ta ra Jesús tachí ra chi ra Pedro chihin ra Juan, ta catyí ra chi ra:

—Cuahan ndo cua sanduvaha ndo mbee cha cuxiñi yo —catyí ra.

⁹ Tyicuan ta quichaha ndaca tuhun ra chi ra:

—¿Nya cuñún cha sanduvaha ndi cha cuxiñi yo? —cacatyí ra.

¹⁰ Tyicuan ta catyí ra Jesús chi ra:

—Cuahan ndo chichi ñuu. Ta yucuan cunañihi ndo chi noo ra nyisó noo quivi ndutya. Ta cuahan ndo chata ra nyacua nya nu quihvi ra chichi vehe.

¹¹ Ta catyí ndo chi chitoho vehe cuan: “Ra Sacuaha, cuñí ra coto ra nya nyaá cuarto nu sanduvaha ra cha cuxiñi ra chihin ra cachicá noo chihin ra, vatyi casanducahnu ra vico pascua.” Tyicuan caa çatyí ndo chi ra.

¹² Tyicuan ta maa ra cuan cusañaha ra cuarto cahnu ityi siqui nu cu uvi

piso chi ndo. Ta cha yahā nduvii. Ta yucuan sanduvaha ndo cha cuxiñi yo —catyí ra chi ra.

¹³ Tyicuan ta cuahan coyo ra. Ta nañihí ra tandihí tari cuhva catyí ra Jesús. Tyicuan ta casanduvaha ra cha cuxiñi ra cha vico pascua cuan.

¹⁴ Yucuan ta cha chaā cuhva cha cuxiñi ra Jesús ta tandihí apóstol ra, cachicunyicu ra yuhu mesa.

¹⁵ Tyicuan ta ra Jesús quichaha catyí ra:

—Cuñí xain cuxiñi in caa ri chihin ndo cuenda vico pascua ihya cha ni ri ca cha cumañi ca cunyehe tundo ho ta cúvi.

¹⁶ Vatyí nya ri ca ihya cua cachi ta cucúvi. Yucuan ta cachi tiqui soco nya nu nyacá ñaha Nyoo —catyí ra.

¹⁷ Tyicuan ta quehen ra noo vasu vinu. Ta nacuhva ra tyiyahvi nyoo chi Nyoo, ta sayaha ra chi tandihí ra nyicú chihin ra. Ta quichaha catyí ra:

—Quehen ndo ihya. Ta coho ndo suhva suhva.

¹⁸ Vatyí catyí chi ndo vatyí ma coho que vinu tichaha ndivi nyacua nya quichi cha nyacá ñaha Nyoo ñayivi ihya —catyí ra.

¹⁹ Ta yahā cuan ta quehen ra pan. Ta nacuhva ra tyahvi nyoo chi Nyoo. Ta tahvi sava ra. Ta chaha ra chi ra cachicá noo chihin ra. Ta quichaha catyí ra:

—Ican ihya cuví coñe. Vatyí cha catyí ndo ta cua cuhva cuende chii ta cúvi. Tyicuan ri nichohon iñi ndo chii ta cuxiñi ndo tyehe caa —catyí ra.

²⁰ Ta cha yahā cuxiñi ra, tyicuan ta quehen tucu ra vaso vinu tichaha ndivi, ta quichaha catyí ra:

—Chihin ihya natyihí tahan Nyoo tuhun chaa chihin ndo vityin. Vatyí vinu cha yihí chichi vaso ihya, tari niñi cuví. Ta cha catyí nyoho ta cucati niñi. Vatyí cucúvi cha catyí ndo.

²¹ 'Soco vityin, ra cha cua nacuhva cuenda chii chi ra xaan iñi chii, in ri yoso ndaha ra chihin ndahi nu mesa ihya.

²² Vatyí yuhu Rayi cha quichi nya gloria cua cuví chii tari cuhva cha

nyaá maa tyi cuví chii. Soco jndahvi ra ndahvi, ra cha cunacuhva cuenda chii! —catyí ra Jesús.

²³ Tyicuan ta ra cachicá noo chihin ra Jesús quichaha candaca tuhun ra chi tahan ra, nya ra cuví ra cua nacuhva cuenda chi ra chi ra xaan iñi chi ra.

Nu candatuhún ra cachicá noo chihin ra Jesús yóo ra cahnu ca cuví

²⁴ Yahā cuan ta quichaha candatuhun ra cachicá noo chihin ra Jesús nya ra cahnu ca cuví.

²⁵ Soco ra Jesús catyí ra:

—Chitó nyoho vatyí ra nyacá ñaha chi ñayivi iyó siqui ñuhu ñayivi, ñihi xaan yosó ra siqui ñu. Ta cacuñí ra vatyí catyí ñayivi tyi tyinyee ra chi ñu.

²⁶ Soco nyoho ña tahan chi sacuvi ndo tari sacuví ra cuan. Vatyí tatu cuñí ndo cuví ndo ra cuví nuu, tahan chi sacuvi ndo tyiño nuu ñayivi. Vatyí tatu sacuvi ndo tyiño nuu ñayivi, ican ndo cuví ra cuví nuu.

²⁷ Vatyí ihya siqui ñuhu ñayivi ra cuví nuu cuví ra cha ña sahá tyiño. Ta nyaá ra yuhu mesa ta musu ra sacuví ra tyiño nuu ra. Soco yuhu ra cuví nuu cuví, ta sacuví tyiño nuu ndo.

²⁸ 'Soco nyoho tyicuan ri ndihí ndo chihin, tandihí chaha cha nyehí tundo ho.

²⁹ Yucuan chaha, yuhu chahí noo nu cunyaca ñaha ndo tari cha chaha Suti chii cha cunyaca ñahi.

³⁰ Vatyí cucachi ndo cucho ndo yuhu mesa chihin nya nu nyacá ñahi. Ta yucuan cunyaa ndo nu tyayu tyaqui. Ta cunyaca ñaha ndo chi ndi uchi uvi tahan ityi ñayivi vachi tata ra Israel.

Catyí ra Jesús vatyí cua catyí ra Pedro vatyí ña ñohó nuu ra chi ra

(Mt. 26.31-35; Mr. 14.27-31; Jn. 13.36-38)

³¹ Tyicuan ta catyí ra Jesús chi ra Pedro:

—Nyehe vahun, yoho Simón. Vatyí cuihna, ra nañí Satanás, cha chican ra chi Nyoo na cuhva ra ityi chi ra vatyí quisi ñihno ra chi ndo tari

naquisi ñihno yo trigu, tacuhva ndu uvi iñi ndo chi Nyoo.

³² Soco chicán xain chi Nyoo cha catyun, vatyí ma ndihí cha chinó iñun chi ra. Ta quívi ndu uvi iñun cuatyun ta na chino vaha iñun chii cutyinyeun chi ra tahun cha ma sandihí ra cha cachino iñi ra chii —catyí ra Jesús chi ra Simón.

³³ Ta ra Simón catyí ra chi ra:

—Sutu Mañi yuhu, cha iyó vahi vatyí cuhin chuhun vasi vehe caa, vasi tuhun chihi —catyí ra.

³⁴ Tyicuan ta catyí ra Jesús chi ra:

—Pedro, catyí chuun vatyí vityin cha ñi ri ca cha cumañi ca cuacu chaa loho, yoho cha uñi tahan chaha cucatyun vatyí ña ñohó nuun chii —catyí ra Jesús chi ra.

Nu cha cuñí chaa cuhva cha cucuahva cuenda ra Judas chi ra Jesús

³⁵ Tyicuan ta ndacá tuhun ra Jesús chi ra cachicá noo chihin ra, ta catyí ra:

—Ñicohon iñi ndo quívi cha tachí chi ndo vatyí cucahan noo ndo nuu ñáyivi ta ñahri nyiso ndo, ñi ri cha cachi ndo, ñi ri xuhun, ñi ri sahman do. ¿Atu chiyó cha cumañi chi ndo quívi cuan? —catyí ra Jesús.

Tyicuan ta canacahan ra, ta catyí ra:

—Ñahri cha cumañi chi ndi.

³⁶ Tyicuan ta quichaha catyí ra Jesús chi ra:

—Soco vityin, tatu iyó cha cachi ndo ta iyó xuhun ndo, cuiso ndo. Ta tatu ñahri mityi ndo, xico ndo noo sahman do ta sata ndo.

³⁷ Vatyí catyí chi ndo, vatyí tandihí tuhun cha nyaá nu tutu Nyoo cuchino cava vatyí tyehe caa catyí chi: “Sahá ñu tuhun tyi cuví ra noo ra quiñi iyó.” Tyicuan caa catyí tuhun nu tutu Nyoo. Ta tandihí cuan cuchino cava —catyí ra.

³⁸ Tyicuan ta quichaha catyí ra cachicá noo chihin ra:

—Ihya nyaá uvi tahan mityi —catyí ra.

Tyicuan ta catyí ra Jesús:

—Cha iyó vaha ri —catyí ra.

Nu chicán tahvi ra Jesús chi Nyoo Getsemaní

(Mt. 26.36-46; Mr. 14.32-42)

³⁹ Tyicuan ta quitá ra Jesús vehe cuan. Ta cuahan ra nya yucu Olivo. Tari cuhva tuhvá maa ra chahan. Ta ra cachicá noo chihin ra cuahan coyo ra chata ra.

⁴⁰ Ta cuhva cha chaa ra yucuan, quichaha catyí ra chi ra cachicá noo chihin ra:

—Cacan tahvi ndo chi Nyoo tacuhva ma cuvi chasaha cuihna chi ndo.

⁴¹ Tyicuan ta cuahan ra Jesús cha cañi ca, tari cuhva cha chaa noo yuu tatu tuchi yo. Yucuan ta chicuñi chiti ra. Ta quichaha cahan ra chihin Nyoo,

⁴² ta catyí ra:

—Sutu Mañi yuhu, tu yoho ta cuñún, cuhva cha ma nyehi tundoho ihya. Soco ma cuvi tari cuhva cha cuñí mai. Soco na cuvi tari cuhva cha cuñí maun —catyí ra.

⁴³ Tyicuan ta tuví noo ángel, vatyí cuhva ca ra tunyee iñi chi ra.

⁴⁴ Ta cha ñi ri ca cha nyehé xaan ra Jesús tundoho vatyí cuihya vavaha iñi ra, ta ñihi ca chicán tahvi ra chi Nyoo. Ta cuaha xaan tyeen ra quitá ta canacoyó nu ñuhú, ta tari caa ñiñi caa.

⁴⁵ Yucuan ta nducuitá ra cha ndihí cahan ra chihin Nyoo. Ta cuanuhu ra nu canyicu tandihí ra cachicá noo chihin ra. Ta nyehe ra vatyí caquixí ra, cha cuenda vatyí cacuihya xaan iñi ra, ña cacunyeē ra ñumahna ta caquixi ra.

⁴⁶ Tyicuan ta quichaha catyí ra Jesús chi ra:

—¿Ñáá tuhun cha caquixí ndo? Nducuita ndo. Ta cacan tahvi ndo chi Nyoo, tacuhva cha ma cuvi chasaha cuihna chi ndo.

Nu chahá cuenda ra Judas chi ra Jesús chi ra xaan iñi chi ra

(Mt. 26.47-56; Mr. 14.43-50; Jn. 18.2-11)

⁴⁷ Ñi cahan ca ra Jesús tuhun ihya, ta cuaha xaan ra cachaa coyo. Ta ityi nuu vachi ra Judas, noo ra chicá noo

chihin ra Jesús cuví ra. Ta tuhva ra chi ra Jesús vatyí cua tyayuhu ra xitin ra.

⁴⁸ Tyicuan ta catyí ra Jesús chi ra:

—Judas, ¿atu chihin cha cua tyayuhun chii, nacuhvá cuendon chi yuhu, Ray# cha quichi nya gloria, chi ra xaan iñi chii? —catyí ra Jesús.

⁴⁹ Ta ra canyicú chihin ra Jesús quichaha ndaca tuhun ra chi ra:

—Sutu Mañi yuhu, ¿atu sañicuehe ndi chi ra chihin mityi? —catyí ra.

⁵⁰ Yucuan ta noo ra, chahnya ra soho chiyo vaha noo ra cha cuví musu ra cuví nuu chi tata sutu.

⁵¹ Soco ra Jesús catyí ra chi ra:

—Saña ndo. Vaha ri —catyí ra.

Tyicuan ta naquehen ra Jesús soho ra cuan. Ta natyaa ra, ta nduvaha.

⁵² Ta ra cacuví nuu chi tata sutu chihin ra cacuví nuu chi ra sahá cuenda vehe ñuhu, chihin ra cacuví mandoñi, ican ra cuví ra quichi coyo vatyí catiin ra chi ra Jesús. Ta quichaha catyí ra Jesús chi ra:

—¿Atu vachi coyo nyoho siqui chihin cha xaan ta chihin yutun tari cha vatyí minoo ra suhu cuví yuhu sahá ndo?

⁵³ Ndiquivi chinyaí chichi vehe ñuhu cahnu, ¿ñaá tuhun ña cuví tñn ndo chii? Soco vityin chaa cuhva cha ñaa iñi vatyí ra ña vaha nyacá ñaha. Yucuan chaha vachi tñn ndo chii.

Nu catyí ra Pedro vatyí ña ñohó nuu ra chi ra Jesús

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

⁵⁴ Tyicuan ta catiin ra chi ra Jesús. Ta cua nyaca ra chi ra nya vehe ra cuví nuu chi tata sutu. Ta ra Pedro nyasava ri cuahan ra chata ra.

⁵⁵ Ta cha chaa coyo ra vehe ra cuví nuu chi tata sutu cuan, casanatahan ra ñuhu nuquehe. Ta chicunycú cutya ra nicachico ri nu cayú ñuhu cuan. Ta chicunya tuu ra Pedro mahñu ñáyivi cuan.

⁵⁶ Ta cuhva cha ndundichin cha cayu ñuhu cuan, tyicuan ta noo ñaha cha cuví musu tata sutu cuan nanyehe ña chi ra. Ta quichaha catyí ña:

—Ra ihya chicá noo ra chihin ra cuan —catyí ña.

⁵⁷ Soco ra Pedro catyí ra:

—Yuhu ña ñohó nui chi ra cuan.

⁵⁸ Tañi ri cuan ta nyehe tucu inga ra chi ra, ta catyí ra:

—Yoho, ra cuenda ra cuan cuvún —catyí ra.

Ta ra Pedro catyí ra:

—Ñima —catyí ra.

⁵⁹ Ta cha yaha noo ora, ta nanyehe tucu inga ra chi ra ta catyí ra chi ra tahan ra:

—Cha ndicha cuii vatyí ican ra ihya cuví noo ra cha chicá noo chihin ra cuan. Vatyí suri ra Galilea cuví ra —catyí ra.

⁶⁰ Tyicuan ta catyí ra Pedro:

—Ña chité ñáá tuhun cahún —catyí ra.

Ta caa cuhva ri cuan, ni cahán ca ra Pedro tuhun cuan, ta chacu chaa ri noo loho.

⁶¹ Tyicuan ta ra Jesús nanyehe ra nuu ra Pedro. Ta ra Pedro nicohon iñi ra tuhun cha catyí ra Jesús chi ra: “Cuhva cha ni cumañi ca cuacu chaa loho, yoho cha catyun tyi ña ñohó nuun chii uñi tahan chaha.”

⁶² Tyicuan ta quitá ra Pedro ityi chata vehe. Ta chacu vavaha ra cha cuihya iñi ra.

Nu cachacú nyaa ra chi ra Jesús ta cacañi ra chi ra

(Mt. 26.67-68; Mr. 14.65)

⁶³ Tyicuan ta ra casahá cuenda chi ra Jesús, quichaha chacu nyaa ra chi ra. Ta cacañi ra chi ra.

⁶⁴ Cachahñi ra sahma nuu ra, ta quichaha cacatu ra nuu ra. Ta cacatyí ra chi ra:

—Nacoto yóo cha cañi chuun —cacatyí ra chi ra.

⁶⁵ Ta cuaha vavaha ca cha cacahan ra chi ra.

Nu ndacá tuhun ra chi ra Jesús tatu Sehe Nyoo cuví chi ra

(Mt. 26.59-66; Mr. 14.55-64; Jn. 18.19-24)

⁶⁶ Ta cha cundichin inga quivi cuan. Ta candu ñin ri ra chahnu ñuu cuan chihin ra cuví nuu chi tata sutu, ta ra casacuahá cuenda ley vehe

ñuhu. Ta caquehen ra chi ra Jesús. Ta cuahan coyo ra chihin ra nya nu cuví junta cahnu. Ta quichaha candaca tuhun ra chi ra:

⁶⁷ —Cati chi ndi ¿atu ra Cristo ra cha saquichi Nyoo cuvún? —cati ra chi ra.

Ta ra Jesús nacahan ra, ta cati ra:

—Tatu cati chi ndo vaty ican, ma chino iñi ndo.

⁶⁸ O tatu ndaca tuhun ñáa cha ndaca tuhun chi ndo, ma nacahan ndo ni ma saña ndo chii.

⁶⁹ Soco vityin ta ityi nuu ca yuhu Rayi cha quichi nya gloria cucunyai chiyo vaha Nyoo ra cha iyó tandihi tunyee iñi chi —cati ra.

⁷⁰ Tyicuan ta tandihi ra quichaha ndaca tuhun ra chi ra:

—Tu tyicuan caa, Sehe Nyoo cuví chuun —cati ra.

Tyicuan ta nacahan ra Jesús ta cati ra:

—Suri maa ndo cati tyi ican cuví.

⁷¹ Tyicuan ta quichaha cacati ra cuan chi ra tahan ra:

—Nyehe nuu. Yuhu maa ra quita. Ña niñi ca cha tava yo cha ndaa. Vaty suri maa yo chiñi —cacati ra.

23

Nu nyehe ra Pilato vaty ñahri cati ra Jesús

(Mt. 27.1-2, 11-14; Mr. 15.1-5; Jn. 18.28-38)

¹ Tyicuan ta tandihi ra nducuita ra. Ta cua nyaca ra chi ra nya nu nyaá ra Pilato, ra cuví gobernador.

² Tyicuan ta quichaha cacati ra chi ra Pilato:

—Ra ihya, sativi ra chi ñayivi chihin cha cahán ra nuu ñu, ta cati ra vaty ña vaha tyiyahvi ndi xuhun chi gobiernu ñuu Roma. Ta sin ri cati ra vaty ra Cristo ra cha saquichi Nyoo vaty cuví ra rey cuví ra —cacati ra.

³ Tyicuan ta ra Pilato quichaha ndaca tuhun ra chi ra Jesús, ta cati ra:

—¿Atu ican yoho cuví Rey cuenda ñu Israel? —cati ra.

Ta nacahan ra Jesús, ta cati ra:

—Ican, suri maun cati.

⁴ Tyicuan ta quichaha cati ra Pilato chi ra cuví nuu chi tata sutu ta chi ñayivi:

—Ñahri cuaty ra ihya —cati ra chi ñu.

⁵ Soco xaan ca nanduvi ñu. Ta quichaha cacati ra ñu:

—Cahnu xaan cuaty ra. Cuaha xaan tisihi chaha ra, vaty cahán ra nuu ñayivi. Cha xihna ri quichaha cahan noo ra nuu ñayivi ityi Galilea. Ta nicañi maa ityi vachi ra cahán ra chihin ñayivi nyacua nya cha ra Judea ihya —cati ra ñu.

Nu tachí ra Pilato chi ra Jesús nuu ra Herodes

⁶ Cuhva cha chiñi ra Pilato tuhun ihya, quichaha ndaca tuhun ra tatu ra Galilea cuví ra Jesús.

⁷ Ta cati ñayivi chi ra vaty ican. Tyicuan ta sacuhun ra Pilato chi ra nya nu nyaá ra Herodes. Vaty ra Herodes cuví ra gobernador nicañu Galilea. Soco quivi cuan ñohó ra ñuu Jerusalén.

⁸ Ta cuhva cha nanyehe ra Herodes chi ra Jesús, si xaan cuví chi ra. Vaty cha naha xaan cuñi ra nyehe ra chi ra. Vaty niñi ra tuhun vaty cuaha xaan milagru sacuvi ra. Ta cuñi xaan ra nyehe ra noo milagru cha sacuvi ra Jesús.

⁹ Ta cuaha xaan tuhun ndaca tuhun ra chi ra. Soco ra Jesús ña nacahan maa ra.

¹⁰ Ta yucuan canyicú tucu ra cuví nuu chi tata sutu ta ra casacuahá ley vehe ñuhu. Ta catyaa xaan ra cuaty siqui ra.

¹¹ Tyicuan ta ra Herodes chihin sindaro cuenda ra chacu nyaa ra chi ra. Ta sandihvi noo ra noo sahmayahvi ta tyaqui chi ra, tari cha tuhvá rey ñihnó. Tyicuan ta natachi ra Herodes chi ra inga chaha nuu ra Pilato.

¹² Ta quivi cuan ra Pilato chihin ra Herodes nduvaha iyó ra chihin tahan ra. Vaty nu quichi chi, ña cuví canyehe ra chi tahan ra.

Nu cutuñí chi ra Jesús vatyí cucúvi ra

(Mt. 27.15-26; Mr. 15.6:15; Jn. 18.39—19.16)

¹³ Tyicuan ta ra Pilato sandu ñn ri ra chi ra cuví nuu chi tata sutu, ta chi ra cuví tyiño, ta chi ñáyivi ñandihí.

¹⁴ Ta catyí ra chi ñu:

—Nyoho quichí nyaca ndo chi ra ihya chii. Ta catyí ndo vatyí satívi ra chi ñáyivi. Soco yuhu cha sacutuñí chi ra nuu ndo. Ta ñahri cuatyí ra nañihí tari kuhva catyí ndo.

¹⁵ Ta ni ri ra Herodes ña nañihí ra ni noo cuatyí ra. Yucuan chaha sandichí ra chi ra inga chaha nu nyai. Nyehe ndo vatyí ñahri cha sacuví ra, ñahri cuatyí ra. Ta ña tahán chi cha cúvi ra.

¹⁶ Yucuan chaha cua tachi tuñi ri chi ra. Yaha cuan ta sañe chi ra —catyí ra Pilato.

¹⁷ Tyicuan caa catyí ra Pilato vatyí cha ni ri ca cha iyó vico cuan, tahán chi cha saña ra noo ra ñohó vehe caa, tari kuhva cha tuhva maa ra.

¹⁸ Soco tandihí ñu ñn ri nacanachaa ñu, ta catyí ñu:

—Cahñi chi ra Jesús. Ta saña chi ra Barrabás —catyí ñu.

¹⁹ Ta ra Barrabás cuan ñohó ra vehe caa cha cuenda cha cuñi ra nacanda ra siqui ra cuví tyiño. Ta ñn ri chahñi ra chi ñáyivi.

²⁰ Ta ra Pilato cuñi ra saña ra chi ra Jesús. Ta quichaha catyí ra chi ñáyivi cuan inga chaha vatyí cusaña ra chi ra.

²¹ Soco ñáyivi chaa ca caná chaa ñu, ta catyí ñu:

—Na cúvi ra nu cruzi.

²² Tyicuan ta cha cu uñi chaha catyí ra Pilato chi ñu:

—Soco ¿ñáa cha ña vaha sacuví ra ihya? Nyehí tyi ña tahán chi cúvi ra. Tacuhva cutachi tuñi ri chi ra, ta sañe chi ra —catyí ra Pilato.

²³ Soco ñáyivi caná chaa ca ñu, ta catyí ñu vatyí tyaa ra chi ra nu cruzi. Ta cuví chasaha ñu. Vatyí maa ñu ta ra cacuví nuu chi tata sutu caná chaa ñu.

²⁴ Tyicuan ta sacuví ra Pilato tari kuhva catyí ñu.

²⁵ Ta tari kuhva catyí ñáyivi, saña ra chi ra Barrabás cha ñohó vehe caa cha cuenda cha cuñi ra nacanda ra siqui ra cuví tyiño ta cha cuenda cha chahñi ra. Ta sacuví ra chi ra Jesús tari kuhva catyí ñu.

Nu cua cunyaa ra Jesús nu cruzi

(Mt. 27.32-44; Mr. 15.21-32; Jn. 19.17-27)

²⁶ Yucuan ta quehen sindaro chi ra Jesús. Ta cuahan ra chihin ra. Ta catiñ tucu ra chi noo ra Cirene cha nañi Simón. Ra cuan ni cua ndichi ra cha chahan ra nu chiqui. Ta saniñi sindaro chi ra, na cuiso ra cruzi ra Jesús ta cuahan ra chata ra.

²⁷ Ta cuaha xaan ñáyivi cuahan chata ra. Ta cuaha xaan ñusihí chacú chaa ñu cha cuihya iñi ñu cha catyí ra.

²⁸ Soco ra Jesús nanyehe ra chi ñu. Ta quichaha catyí ra chi ñu:

—Tandihí nyoho ñusihí ñuu Jerusalén, ma cuacu ndo cha catyí yuhu. Cuacu ndo, soco cha catyí maa ndo ta cha catyí sehe ndo.

²⁹ Vatyí cuquichi quívi nu cunyehe xaan ndo tundoho. Ta cucahan ñáyivi chihin tandihí ndo cha cuví ndo ñusihí cha yori sehe ndo iyó. Ta cucatyí ñu chi ndo: “Vaha xaan vatyí yori sehe ndo iyó vatyí cuaha xaan tundoho nyehé yo vityin”, cucatyí ñu chi ndo.

³⁰ Vatyí quívi cuan cucuñi ñu vatyí na canacoyo yucu siqui ñu tacuhva sahvi chi chi ñu.

³¹ Vatyí tatu tyehe caa sacuvi ñu chihin yuhu cha ñahri cuatyí. Yaha ca kuhva cunyacuvi tucu ñu chihin maa ndo cha iyó cuatyí ndo —catyí ra Jesús.

³² Ta quehen tucu sindaro cuan chi uvi tahan ra quiñi iyó, vatyí cahñi ra chi ra ñn ri chihin ra Jesús.

³³ Tyicuan ta cachaa ra noo nu nañi Nu Cuví Yiquí Xiñi Ndiyí. Ta yucuan chicatacaá ra chi ra Jesús nu cruzi. Ta tyicuan caa tucu chinyacuví ra chihin ninduvi tahan ra iyó cuatyí cuan. Noo ra chitacaá ra nuu cruzi chiyo vaha ra Jesús. Ta nonga ra cuan chitacaá ra nuu cruzi chiyo satyin ra.

34 Ta cuhva cha tacaá ra Jesús nu cruzi cuan, quichaha catyi ra:

—Sutu Mañi yuhu, saha tucahnu iñi chi ra. Vatyí ña chitó ra ñáá cha nyacuví ra chihin —catyi ra.

Tyicuan ta sindaro cuan chahan ra noo sihva chihin sahma ra Jesús. Nya ra saha ganaa caquehen ra sahma cuan.

35 Ta ñáyivi tayucú ñu nyehé ñu. Ta nyacua nya ra cacuví nuu cuenda vehe ñuhu, ta chacú cuehe ra nyehé ra chi ra Jesús. Ta catyi ra:

—Sacacu ra chi inga ñáyivi. Soco vityin na sacacu tucu ra chi maa ra, tatu ndicha cha Cristo, ra cha saquichi Nyoo, cuví ra —cacatyí ra.

36 Ta suri cahán cuehe tucu sindaro chi ra. Ta catuhva ra chi ra. Ta chaha ra vinu iya coho ra.

37 Ta quichaha cacatyí ra chi ra:

—Tatu rey cuenda ñáyivi Israel cuvún. Sacacu chuun —cacatyí ra.

38 Ta siqui cruzi ityi xiñi ra nyaá noo nu tyaa ra chihin griego, chihin latín, ta chihin hebreo. Tyehe caa quita cahán letra cuan: “Ican ra ihya cuví Rey cuenda ñu ñuu Israel” —catyi nu vitu cuan.

39 Ta noo ra quiñi iyó cha tacaá xiin ra Jesús, quichaha cahan ra chihin ra, ta catyi ra:

—Tatu ndicha cha Cristo cuvún, sacacu chuun. Ta sacacu chi ndi ñandihí —catyi ra.

40 Soco inga ra cuan catyi ra chi ra:

—¿Atu ña yuhvún chi Nyoo? Vatyí nyehún suri tundoho cha nyehé maa ra vityin.

41 Maa yo nyehé yo tundoho ihya vatyí iyó cuatyí yo. Soco ra ihya ñahri cuatyí ra iyó —catyi ra.

42 Tyicuan ta quichaha catyi ra chi ra Jesús:

—Yoho Jesús, ñicohon iñun tuhin quivi cunyaca ñahun —catyi ra.

43 Tyicuan ta ra Jesús catyi ra chi ra:

—Cha ndicha catyi chuun vatyí tañi ri vityin ta cunyaun chihin nya paraíso nu nyaá añima ñu chinó iñi chi Nyoo —catyi ra Jesús chi ra.

Nu chihí ra Jesús

(Mt. 27.45-56; Mr. 15.33-41; Jn. 19.28-30)

44 Tyicuan ta ñáá cuhva ora quichaha nduñaa ñayivi, nyacua nya caa uñi cha cha iñi.

45 Vatyí nduñaa ñanyii. Ta sahma cha tacaá chichi vehe ñuhu cahnu cuan, tahnya sava.

46 Tyicuan ta quichaha cana chaa ra Jesús:

—Sutu Mañi yuhu, natyaí añime chichi ndahun —catyi ra.

Ta cuhva cha catyi ra tuhun ihya, ta chihí ra.

47 Ta ra cuví nuu chi sindaro cuan, nyehé ra tandihí cha cuví cuan. Ta sacahnú ra chi Nyoo, ta catyi ra:

—Ñahri ndicha cuii cuatyí ra iyó —catyi ra.

48 Ta tandihí ñáyivi cha canyicú yucuan canyehé ñu cha cuví cuan. Ta cuahan coyo ñu ta suri cacañi ñu ndaha ñu yiqui nyica ñu. Vatyí chitó ñu vatyí ña vaha cha chinyacuví ñu chihin ra Jesús.

49 Ta tandihí ñu cha ñohó nuu chi ra Jesús, ta ñusihí cha chinyicon chi ra nya Galilea, canyicú ñu nya sava ri. Ta nyehé ñu tandihí cha cuví yucuan.

Nu cua cuchi ra chi ra Jesús

(Mt. 27.57-61; Mr. 15.42-47; Jn. 19.38-42)

50 Ta iyó noo ra vaha, nañi ra José. Ta Arimatea ityi Judea cuví ñuu ra. Ta cuví ra noo ra cuví nuu cuenda Junta Cahnu ñu Israel.

51 Ta ra José cuan nyatú ra quivi cha cunyaca ñaha Nyoo. Ta ña ndoo ra vaha chihin cha sacuví ra tahan ra, ra cacuví nuu cuenda tata sutu cuan.

52 Tyicuan ta chahan ra chicacan ra coño ñuhu ra Jesús chi ra Pilato.

53 Ta yahá cha sanoo ra José cuan coño ñuhu ra Jesús nu cruzi, ta natyihí ra chichi noo sahma cha cuví lino. Ta cuahan ra cua cuchi ra chi ra chichi noo ñaña chaa cha cuví yavi yuu cha savahá ñu.

54 Ta viarni cuví, quivi cha sandu-vahá ñáyivi cha cachi ñu cha sabarú inga quivi, quivi nyitatu ñu. Ta cha cuñi cuví sabarú.

⁵⁵ Ta tandihí ñusihí cha quichi chihin ra Jesús nya Galilea, cuahan ñu chata ra. Ta nyehe ñu chichi yavi yuu cuan. Ta nyehe ñu yoso caa chicava coño ñuhu ra.

⁵⁶ Ta cuanuhu coyo ñu nya vehe ñu. Ta sanduvaha ñu ndutya vixi chahán vatyi cutyihí ñu coño ñuhu ra Jesús coto coo xico. Vatyi tyicuan caa cuví costumbre cuiya cuan. Tyicuan ta nyitatu ñu inga quivi cuan tari cuhva catyí maa tuhun cha tachí Nyoo chi yo.

24

Nu nandoto ra Jesús

(Mt. 28.1-10; Mr. 16.1-8; Jn. 20.1-10)

¹ Cundichin timingu quivi nu quichaha vitya. Ta ñaha cuiri cuahan coyo ñusihí cuan nya nu ñaña ra Jesús. Ta nyisó ñu ndutya vixi chahán cha sanduvaha ñu.

² Ta cuhva cha chaá coyo ñu, nanyehe ñu vatyi ña nyasí ca yavi yuu cuan tari cuhva chinyasí maa.

³ Ta quihvi ñu chichi, soco ña ñañihí ñu coño ñuhu Sutu Mañi yo Jesús.

⁴ Ta yucuan tayucú ñu chihin cha yuhví ñu. Ta ña chitó ñu ñáá cunyacuvi ñu. Ta tuví uvi tahan rayí nuu ñu. Ta xiño vavaha sahma cañihno ra.

⁵ Ta chihin cha yuhví ñu, ta chicuini chiti ñu chihin nuu ñu nya nu ñuhú. Tyicuan ta quichaha cacatyí ra cuan chi ñu:

—¿Ñáá tuhun nanducú ndo chi ra Jesús ihya nu ñohó ndiyi?

⁶ Yori ra ñohó ihya, vatyi cha nandoto ra. Nicohon iñi ndo tuhun cha cahan ra chihin ndo quivi chicá noo ra Galilea.

⁷ Catyi ra vatyi tahán chi cucuhva cuenda ñu chi ra ndaha ra iyó cuatyí. Vatyi cuví ra Rayí cha quichi nya gloria. Ta tahán chi cucañi ra chi ra nu cruzi. Soco nu cu uñi quivi cunandoto ra. Tyicuan caa catyi ra chi ndo —catyí ángel cuan chi ñu.

⁸ Tyicuan ta nicohon iñi ñu tuhun cahan ra Jesús quivi cuan.

⁹ Ta cuanuhu coyo ñu. Ta nacatyí ñu chi ndi uchi ñn tahan ra apóstol ra Jesús chihin tandihí ca ñáyivi.

¹⁰ Ta ñu sacoto tuhun cuan chi ra cuan cuví ñu cu María, ñaha Magdala, ta cu Juana, ta cu María sihi ra Jacobo, ta suhva ca ñusihí.

¹¹ Soco ra cachica noo chihin ra Jesús cuñí maa ra vatyi cahán ri maa ñu. Ta ña chinó iñi ra tuhun cahán ñu.

¹² Soco ra Pedro nducuita ra ta chino vavaha ra cuahan ra cuanyehe ra nya chichi ñaña ra Jesús tatu ndicha. Ta nanyehe ra chichi yavi yuu cuan tyi sahma ri cayucú inchiyo xiin. Tyicuan ta cuanuhu ra nya vehe. Ta iyo cuñí ra vatyi ñahri ca coño ñuhu ra Jesús catuví chichi ñaña cuan.

Noo cha cuví ityi Emaús

(Mr. 16.12-13)

¹³ Suri maa quivi cuan, uvi tahan ra chicá noo chihin ra Jesús cuahan coyo ra nya ñuu cha ñañí Emaús, tari noo cha uchi ñn kilómetro cha quita yo Jerusalén.

¹⁴ Ta cuahan coyo ra ta ndatuhún ra tuhun ñáá ndihí cha cuví.

¹⁵ Ta cha ni ri ca cha candatuhún ra, ta ra Jesús natahan ra chi ra nu cuahan coyo ra.

¹⁶ Soco ni ri maa nyehé ra chi ra Jesús, ña canicohon nuu ra chi ra. Vatyi tari cha iyó noo cha chasi nuu ra tacuhva cha ma canicohon nuu ra chi ra Jesús.

¹⁷ Tyicuan ta quichaha ndaca tuhun ra Jesús chi ra:

—¿Ñáá tuhun ndatuhún xaan ndo? ¿Ñáá tuhun cha cuihya xaan iñi ndo? —catyí ra chi ra.

¹⁸ Ta ra cha ñañí Cleofas, nacahan ra. Ta catyí ra:

—¿Atu ñima nya Jerusalén quichi yoho? ¿Atu ra inga ñuu cuvún? ¿Atu ña chitón cha cuví ñuu cuan? —catyí ra.

¹⁹ Tyicuan ta catyí ra Jesús chi ra:

—¿Ñáá cha cuví?

Ta quichaha canacatyí ra chi ra:

—Tuhun ra Jesús ra ñuu Nazaret. Vatyi cuví ra noo ra profeta Nyoo. Ta

chihin tunyee iñi cahnu Nyoo sacuvi ra cha vaha nuu Nyoo ta nuu ñáyivi.

²⁰ Soco ra cacuvi nuu chi tata sutu ta ra cacuvi nuu cuenda vehe ñuhu, nacuhva cuenda ra chi ra chi sindaro ñuu Roma. Ta cachahñi ra chi ra. Ta chihj ra nu cruzi.

²¹ Ta cha vityin cha iyó uñi quivi cuvi tuhun cuan. Ta nyuhu cuñi maa ndi vatyí ican ra cuví ra cusacacu chi ñáyivi Israel.

²² Soco vityin iyo xaan cuñi ndi cha nacatyí suhva ñusihí chi ndi. Vatyí maa ñu, ñaha cuii ri chahan coyo ñu nu ñaña ra.

²³ Ta nacatyí ñu chi ndi vatyí ñahri ca coño ñuhu ra catuví. Ta nacatyí ñu vatyí nyehe ñu uvi tahan ángel. Ta catyí ángel cuan chi ñu vatyí ra Jesús nyitó ra.

²⁴ Yaha cuan ta chahan coyo tucu suhva ra tahan ndi nu ñaña. Ta nyehe ra vatyí cha ndicha cuví tari cuhva catyí ñusihí cuan. Vatyí ñahri ca coño ñuhu ra Jesús catuví —catyí ra chi ra.

²⁵ Tyicuan ta ra Jesús catyí ra chi ra: —Chiin xaan cutuñi iñi ndo. Ta cuee xaan chinó iñi ndo tuhun tyaá ra profeta Nyoo ta cha naha.

²⁶ ¿Atu ña chitó ndo vatyí tahan chi cha cunyehe xihna ra Cristo tundoho? Yaha cuan ta tahan chi cuñihí ra tyiño cha cunyaca ñaha ra —catyí ra Jesús chi ra.

²⁷ Tyicuan ta quichaha nacuhva ra cuenda yoso caa cuahan tuhun ra nu tutu Nyoo. Ta quichaha cahan ra tuhun cha tyaá ra Moisés ta cha naha. Ta yaha cuan ta cahan ra tuhun tandihí libru cha tyaá ra profeta Nyoo.

²⁸ Ta cuhva cha chaá ra nya ñuu Emaús cuan nu cuahan coyo ra, ta saha ra Jesús vatyí cañi ca cuahan ra.

²⁹ Tyicuan ta cacatyí ra chi ra na ndoo ra chihin ra. Ta catyí ra:

—Ndoo chihin ndi vatyí cha cua quee ñanyii —cacatyí ra.

Tyicuan ta cuahan ra Jesús nya vehe ninduvi ra cuan.

³⁰ Ta cuhva cha chicunyaá ra yuhu mesa chihin ra, quehen ra pan. Ta

chaha ra tyahvi nyoo chi Nyoo. Ta chahnu sava ra, ta chaha ra chi ra.

³¹ Ta caa cuhva ri cuan nuña nuu ra canicohon nuu ra chi ra Jesús. Soco ra Jesús cuanaa ri ra.

³² Tyicuan ta quichaha catyí ra chi ra tahan ra:

—Yucuan chaha vaha xaan cuñi aña yoso cuhva cha vachi ra chihin yo, ta nacatyí vaha ra yoso caa cuahan tuhun Nyoo cha nyaa nu tutu chi yo, ta nicohon nuu yo chi ra —cacatyí ra.

³³ Ñahri ca cha canyatu ra, ta cuanuhu coyo ra nya Jerusalén. Ta yucuan nañihí ra chi ndi uchi ñn ra chicá noo chihin ra Jesús, canyicú ra.

³⁴ Tyicuan ta quichaha canacatyí ndi uchi ñn tahan ra chi ra cha nichaa coyo cuan:

—Ndicha vatyí Sutu Mañi yo, nandoto ra. Vatyí ra Simón nyehe ra chi ra —cacatyí ra.

³⁵ Tyicuan ta ra cha ni nachaa coyo cuan canacatyí tucu ra yoso caa ndatuhun ra Jesús chihin ra ityi cuahan ra ñuu Emaús, ta yoso caa canicohon nuu ra chi ra nu chahnu ra pan.

Nu tuvi ra Jesús nu canyicu ra cachica noo chihin ra (Mt. 28.16-20; Mr. 16.14-18; Jn. 20.19-23)

³⁶ Ni cahán ca ra tuhun cuan ta tuvi ra Jesús nu canyicú ra. Ta chaha ra nocumi, ta catyí ra:

—Na coo cha taxi ri aña ndo.

³⁷ Tyicuan ta canayuhví xaan ra. Ta cacuñi maa ra vatyí noo tatyí ri cuví.

³⁸ Tyicuan ta catyí ra Jesús chi ra:

—¿Ñáá tuhun cha nayuhvi ndo? ¿Ñáá tuhun cha chicá uvi iñi ndo?

³⁹ Nyehe ndo ndahi. Ta nyehe ndo chahi. Vatyí suri mai cuví. Tñn ndo chii ta coto ndo. Vatyí tatyí, ñahri coño ñuhu. Ta ñahri yiqui tari cha nyehe ndo tyi yihí chi yuhu —catyí ra Jesús.

⁴⁰ Ta cuhva cha catyí ra tuhun ihya, sañahá ra ndaha ra ta chaha ra.

⁴¹ Soco maa ra chaha cha iyo cacuñi ra ta siñ cacuñi ra nyacua ña chinó

vaha iñi ra. Tyicuan ta catyí ra Jesús chi ra:

—¿Atu iyo cha cachi? —catyí ra.

⁴² Tyicuan ta chaha ra chiin yuhu tiyaca tyihyo chihin tyañuñu chi ra.

⁴³ Ta quehen ra. Ta quichaha chachi ra.

⁴⁴ Ta catyí ra chi ra:

—Tandihí cha cuví chii, ican ihya cuví cha catyí chi ndo quiví cuan. Ta catyí chi ndo vatyi tyicuan caa cucuví, tari cuhva nyaá tuhun cha tyaa ra Moisés ta ra profeta Nyoo ta cha nyaá nu libru salmo —catyí ra chi ra.

⁴⁵ Tyicuan ta chaha ra Jesús vatyi na cutuñi iñi tandihí ra cuan yoso caa catyí nu tutu Nyoo.

⁴⁶ Tyicuan ta catyí ra Jesús chi ra vatyi tyicuan caa nyaá nu tutu Nyoo vatyi tahán chi cha cúvi ra Cristo. Ta nu cu uñi quiví nandoto ra.

⁴⁷ Ta tahán chi coto ñáyiví tuhun sívi ra Cristo ñuu Jerusalén, ta yaha cuan ta tandihí ñuu nicahnu ñuhu ñayiví. Tacuhva cuvi ndu uvi iñi ñu ta ndachi cuatyí ñu.

⁴⁸ —Ta nyoho cuví ndo cha ndaa tandihí tuhun ihya.

⁴⁹ Ta cusaquichi mai Tatyí Ii Nyoo síqui ndo tari catyí Suti tyí cuhva ra chi ndo. Soco cunyicu ndo Jerusalén ihya. Ta ma quita maa ndo nyacua nya quichi tunyee iñi Tatyí Ii Nyoo cuquihí chi ndo —catyí ra Jesús.

Nu nandaq xica ra Jesús andiví

(Mr. 16.19-20)

⁵⁰ Tyicuan ta ra Jesús cuahan ra chihin tandihí ra cachicá noo chihin ra ityi chata ñuu, nya ñuu Betania. Ta sandaa ra ndaha ra. Ta nasoco ra chi ra.

⁵¹ Ta cha ñi ri ca cha nasocó ra chi ra, nandaq xica ra andiví.

⁵² Tyicuan ta tandihí ra sacahnú xaan ra chi ra. Ta sí xaan cacuví chi ra, cuanuhu coyo ra Jerusalén.

⁵³ Ta tyicuan ri chinyicú ra chichi vehe ñuhu cahnu cuan, ta sacahnú xaan ra chi Nyoo.

Tuhun Nyoo Cha Tyaa San Juan

Tuhun Cahán Nyoo nanduvi noo rayi, ta ican cuví ra Cristo

¹ Nyata quivi xihna ri, nyata ni cumañi ca coo tandihi cha iyó, ta cha iyó ra cuví Tuhun Cahán Nyoo. Nyaá ra chihin Nyoo. Ta Nyoo cuví ra.

² Ta chicoo ra chihin Nyoo nyata quivi xihna ri.

³ Ta chihin ra, savaha Nyoo tandihi cuii maa cha iyó. Ta ñahri savaha Nyoo cha maa ri maa ra.

⁴ Ta chihin ra cuví Tuhun Cahán Nyoo nyaá ñayivi cha ma naa ca maa. Ta ñayivi cuan, ican cuví cha sacundichín aña ñayivi.

⁵ Ta cha ndichin ihya, sacundichín chi nu ñaa iñi. Ta cha ñaa iñi ña cuñihi chi ndahva chi cha ndichin cuan.

⁶ Chiyo noo ra cha tachí Nyoo chi. Ta nañi ra Juan.

⁷ Quichi ra cuví ra noo cha ndaa. Vatyí cañan ra tumañi iñi cuenda ra cuví cha ndichin cuan, tacuhva vatyí chino iñi tandihi ñayivi chi ra.

⁸ Ra Juan, ñima cha ndichin cuan cuví ra. Noo cha ndaa ri cuví ra cha cuenda cha ndichin cuan.

⁹ Vatyí cha ndichin cha ndicha vaha cuan, ni cuachaa chi siqui ñuhu ñayivi, tacuhva vatyí sacundichín chi aña tandihi ñayivi cha iyó siqui ñuhu ñayivi ihya.

¹⁰ Ra cuví Tuhun Cahán Nyoo quichi ra siqui ñuhu ñayivi. Ta ican ra cuví ra Cristo. Ta suri maa ra savaha ra ñuhu ñayivi. Soco ñayivi iyó siqui ñuhu ñayivi, ña nichon nuu ñu chi ra.

¹¹ Quichi ra nu nyicú ñayivi cha savaha ra, soco ñayivi cha savaha ra ña natin cuenda ñu chi ra.

¹² Soco tandihi ñu natin cuenda chi ra, ta chinó iñi ñu chi ra, ican chi ñu cuan, chaha ra ityi vatyí nanduvi ñu sehe Nyoo.

¹³ Vatyí nacacu chaa ñu. Soco ñima tari cacu ñu ta lee ñu cuenda coño ñuhu ñu. Ta ni ñima cha cuenda cha

quichi cuví iñi noo rayi coo ra chihin noo ñaha sihi. Ñima cha cuenda cha cuñi ñayivi coo sehe ñu. Soco maa Nyoo sanacacu chaa chi ñu.

¹⁴ Ta ra cuví Tuhun Cahán Nyoo nanduvi ra noo rayi. Ta chicoo ra chihin yo. Ta nyehe ndi cha cañu cuví ra. Ta cañu cuví ra vatyí Sehe mañi Sutu yo Nyoo cuví chi ra. Tyitu yihí ra chihin cha ndicha ta tumañi iñi cha cua cuhva ra chi yo.

¹⁵ Ta ra Juan cuan cañan ra tumañi iñi cuenda ra, ta catyí ra:

—Ican ra ihya cha cañin tuhun quivi cuan, vatyí ra cha vachi ityi chate, cañu ca ra cuví ra ican saha yuhu. Vatyí nyata tyembu chañu ta cha iyó maa ra —catyí ra Juan.

¹⁶ Tandihi yo naquehén cuenda yo tumañi iñi cañu cha chaha ra chi yo, vatyí nasocó xaan ra chi yo.

¹⁷ Ra Moisés chaha cuenda ra ley Nyoo chi yo. Soco ra Jesucristo cundahvi iñi ra chi yo ta saha ra ticañu iñi cuatyí yo. Ta chaha ra cha ndicha coo chi yo.

¹⁸ Ta yori ca maa nyehé chi Nyoo. Notuhun ri maa Sehe mañi ra cha iyó in ri chihin ra. Ican ra cuví ra chaha cha cohon nuu yo chi Sutu ra.

Nu cañan ra Juan, ra sacondutyá, tumañi iñi cuenda ra Jesucristo

(Mt. 3.11-12; Mr. 1.7-8; Lc. 3.15-17)

¹⁹ Ra cacuví nuu chi ñu Israel cha iyó ñuu Jerusalén, catachi ra chi tata sutu ta chi ra cacuví levita nu nyaá ra Juan na ndaca tuhun ra chi ra yóo ra cuví ra.

²⁰ Ta maa ra Juan catyí cachi ra:

—Yuhu ñima ra Cristo cuví.

²¹ Tyicuan ta candaca tuhun ra inga chaha chi ra:

—¿Yóo ra cuví yoho? ¿Atu ra Elías, ra cuví profeta Nyoo ta cha naha cuvún? —catyí ra chi ra.

Ta ra Juan nacahan ra:

—Ñima ra cuan cuví.

Ta sañihi ca ra candaca tuhun ra chi ra, ta catyí ra:

—Tu tyicuan caa, ¿atu icon cuví ra profeta Nyoo cha nyaá cha quichi?

Ta nacahan tucu ra Juan ta catyí ra:

—Ñima.

²² Ta inga tucu chaha candaca tuhun ra chi ra:

—¿Yóó ra cuví yoho? Vatyí cuñí chi cuiso ndi tyiño chi ra cha tachí chi ndi. ¿Yóó ra cuví yoho? —catyí ra chi ra.

²³ Ta ra Juan nacahan ra:

—Yuhu cuví ra cahán ta canachaá noo nu chiqui ndi, ta catyí: “Ñña ndo noo ityi ndoo chichi añima ndo vatyí cha vachi Sutu Mañi yo.” Tari cuhva cahán ra Isaías profeta Nyoo tuhun ta cha naha —catyí ra Juan chi ra.

²⁴ Ra cha cacahán chihin ra Juan, ra cacuví fariseo tachí chi ra.

²⁵ Ta candaca tuhun tucu ra chi ra:

—Tatu ñima ra Cristo, ni ra Elías, ni ra profeta cuan cuvún, ¿ñáá tuhun cha sacondutyón chi ñáyivi? —catyí ra chi ra Juan.

²⁶ Ta ra Juan catyí ra chi ra:

—Yuhu sacondutyé chihin ndutya. Soco mahñu ndo nanyaá noo ra cha ña ñohó nuu ndo.

²⁷ Ican ra cuví ra vachi chate. Soco cha iyó maa ra ta caqui. Ta ña ñaña mai ni cha cuví musu ra ta ndachi ñi xityin ndichan ra —catyí ra Juan.

²⁸ Tandihí tuhun ihya cuví noo nu nañí Betábara cha nyaá inga chiyo yuvi cahnu Jordán nu ñohó ra Juan sacondutyá ra.

Ra Jesucristo, Mbee Luhlu sana Nyoo cuví ra

²⁹ Cha inga quivi nanyehe ra Juan chi ra Jesús cuachaa ra nu nyaá ra, ta catyí ra Juan:

—Nyehe ndo, ican ra ihya cuví Mbee Luhlu sana Nyoo vatyí cucuhva ra ñayivi ra tacuhva cahnya ra cuatyí ñáyivi iyó siqui ñuhu ñayivi.

³⁰ Tuhun maa ra cahin quivi cha catyí chi ndo vatyí cha yaha yuhu ta vachi nonga ra cha cahnu ca cuví ta ñima ca yuhu, vatyí nyata tyembu chahnu ta cha iyó ra.

³¹ Ni yuhu ta ña ñohó nui chi ra quivi cuan. Soco vachi sacondutyé chihin ndutya tacuhva vatyí ñu ñuu

Israel cohon nuu ñu chi ra —catyí ra Juan.

³² Ta catyí tucu ra Juan ñandihí:

—Yuhu nyehí chi Tatyí Ii Nyoo quichí ityi andivi vachi chi tari noo paloma, ta ndoo chi siqui ra.

³³ Yuhu ta coto que yóó ra cuví ra quivi cuan. Soco Nyoo, ra cha tachí chii na sacondutye chihin ndutya, catyí ra chii: “Quivi nyehun Tatyí Ii yuhu, vachi noó siqui noo rayí, ican ra cuan cuví ra sacondutyá chihin Tatyí Ii yuhu”, catyí Nyoo chii.

³⁴ Yuhu cha yaha nyehí chi ra. Ta cuví cha ndaa vatyí ican ra cuví Sehe Nyoo —catyí ra Juan.

Ra cha xihna ca nanyicon chi ra Jesús

³⁵ Cha inga quivi, ra Juan nyaá tucu ra yucuan inga chaha, ta nyicú tucu uvi ra nyicón chi ra.

³⁶ Ta cuhva cha nyehe ra, yahá ra Jesús, ta catyí ra:

—Nyehe ndo, ican ra cuan cuví Mbee Luhlu sana Nyoo —catyí ra Juan.

³⁷ Cha chiñí ninduvi ra nyicon chi ra Juan tuhun cahán ra, ta cananyicon ra chi ra Jesús.

³⁸ Tyicuan ta nanyehe ra Jesús ityi chata ra, ta nyehe ra tyi canyicón ra chi ra, ta catyí ra:

—¿Ñáá cha nducú ndo?

Tyicuan ta canacahan ra ta catyí ra:

—Maestro, ¿nya iyón?

³⁹ Ta ra Jesús catyí ra chi ra:

—Coho ndo chihin. ta nyehe ndo —catyí ra chi ra.

Tyicuan ta cuahan coyo ra chihin ra. Ta canyehe ra nu iyó ra. Ta yucuan cuaa ndihí ra vatyí tari cha caa cumi cha cha ñni cuhva cha cha ra yucuan.

⁴⁰ Chichi cha ninduvi ra cha chiñí tuhun cahán ra Juan ta nanyicon ra chi ra Jesús, noo ra cuví ra ra Andrés yañí ra Simón Pedro.

⁴¹ Ta ra Andrés numi ri chinanducú ra chi yañí ra, ra Simón, ta catyí ra chi ra:

—Nañihí ndi chi ra cha cuví Mesías —catyí ra.

Ta tuhun Mesías cuan cuñí chi catyí, ra Cristo, o ra cha nacachí vaha Nyoo, vatyi cuví ra rey chi yo.

⁴² Tyicuan ta ra Andrés chinyaca ra chi ra Simón yañi ra nu nyaá ra Jesús. Ta cuhva cha nyehe ra Jesús chi ra Simón, ta catyí ra chi ra:

—Yoho Simón, sehe ra Jonás cuví chuun. Soco cunañun Cefas. —catyí ra chi ra.

Ta Cefas cuñí chi catyí Pedro chihin sahan griego, ta ninduvi tahan sívi cuan, cuñí chi catyí “yuu”.

Nu cana ra Jesús chi ra Felipe ta chi ra Natanael

⁴³ Cha inga quívi tyaa ra Jesús cuhva cuhun ra ityi Galilea. Tyicuan ta nañihí ra chi ra Felipe. Ta catyí ra chi ra:

—Cunyicon chii —catyí ra.

⁴⁴ Ra Felipe ihya, ra ñuu Betsaida cuví ra. Ta yucuan iyó tucu ra Andrés ta ra Pedro.

⁴⁵ Tyicuan ta chahan ra Felipe chinanducu ra chi ra Natanael. Ta catyí ra chi ra:

—Nyehe ndi chi ra cha tyaa ra Moisés tuhun nu libru ley, ta suri tuhun ra catyaa tucu ra profeta Nyoo ta cha naha. Jesús nañi ra. Sehe ra José ra ñuu Nazaret cuví chi ra.

⁴⁶ Ta catyí ra Natanael:

—¿Atu cuvi quita cha vaha ñuu Nazaret cuan? —catyí ra chi ra Felipe.

Ta nacahan ra Felipe ta catyí ra:

—Ñaha ta nyehun —catyí ra.

⁴⁷ Yahá cuan ta cuachaa ra Natanael nu nyaá ra Jesús. Ta cuhva cha nanyehe ra Jesús tyi vachi ra, ta quichaha catyí ra:

—Ihya vachi noo ra cha ndicha ndicha ra ñuu Israel cuví. Ta ña tuhvá ra sandaví ñaha —catyí ra Jesús tuhun ra Natanael.

⁴⁸ Tyicuan ta ra Natanael ndaca tuhun ra chi ra:

—¿Yoso caa cha ñohó nuun chii?

Ta ra Jesús nacahan ra ta catyí ra:

—Yuhu nyehí chuun nyata ni cumañi ca cana ra Felipe chuun, cuhva cha nyaún chaha tun higo cuan —catyí ra Jesús chi ra.

⁴⁹ Tyicuan ta quichaha catyí ra Natanael:

—Sutu Mañi yuhu, yoho cuvún Sehe Nyoo. Yoho cuvún rey cuenda ndi ñu Israel.

⁵⁰ Ta ra Jesús catyí ra chi ra Natanael:

—¿Atu chinó iñun chii cha cuenda vatyi catyí tyi nyehí chuun chaha tun higo? Soco nahnu ca cha cunyeñun ican saha cuan —catyí ra chi ra.

⁵¹ Ta catyí tucu ra Jesús:

—Cha ndicha catyí chi ndo vatyi nyoho cunyehe ndo andivi cuitanuña ta cuaha ángel Nyoo cundaa ra, ta cunoo ra siquí yuhu ra cuví Rayí cha quichí nya gloria —catyí ra Jesús chi ra.

2

Noo vico tandaha iyó ñuu Caná ityi Galilea

¹ Yahá uñi quívi ta chicoo noo vico tandaha ñuu Caná ityi Galilea. Ta síhi ra Jesús ñohó ña yucuan.

² Ta suri canacatyí tuhun ñu chi ra Jesús ta chi ra cachicá noo chihin ra cha cuhun coyo ra vico tandaha cuan.

³ Tyicuan ta cuahan coyo ra. Ta nyicú ñu vico, ta ndihí vinu. Tyicuan ta catyí síhi ra Jesús chi ra:

—Ñahri ca vinu ñu —catyí ña.

⁴ Ta catyí ra Jesús chi ña:

—¿Ñáa cha cuñún cha sacuvi yuhu, Maha? Ta chaa ca cuhva cha sañahi chi ndo yóo ra cuví yuhu —catyí ra chi ña.

⁵ Soco síhi ra catyí ña chi ra cha catyinyeé vico cuan:

—Sacuvi ndo tandihí cha catyi ra chi ndo —catyí ña chi ra.

⁶ Ta tayucú iñu tahan quisi yuu nahnu cha quíhi ndutya cha catuhvá ra Israel chotyíño nu tuhvá ra canacatyá xaan ra ndaha ra tari cuhva costumbre cha ca iyó maa ra. Ta tahan tahan quisi cuan chitahan tari uvi xico uchi o uñi xico uchi litru ndutya.

⁷ Tyicuan ta catyí ra Jesús chi ra cha catyinyeé vico cuan:

—Sacutu ndo quisi ihya chihin ndutya —catyí ra chi ra.

Tyicuan ta sacuv̄i ra tari cuhva catȳi ra.

⁸ Tyicuan ta catȳi ra Jesús chi ra:

—Vityin tava ndo suhva ta cunyaca ndo chi ra cuv̄i nuu cuenda vico ihya —catȳi ra Jesús chi ra.

Ta tyicuan caa casacuv̄i ra.

⁹ Ra cuv̄i nuu cuenda vico cuan chih̄i ra ndutya cha nanduv̄i vinu cuan. Soco ña chitó ra nya quichi. Maa ri maa ra catyinyee vico cuan cachitó ra, vatȳi maa ra catava ndutya cuan. Tyicuan ta ra cuv̄i nuu cuenda vico cuan cana ra chi ra cha tandaha cuan.

¹⁰ Ta catȳi ra chi ra:

—Tandih̄i ñáyivi, xihna ca vinu vaha tuhva ñu tava. Yaha cuan ta tatu cha cachih̄i xaan ñu, tyicuan ta tava ñu vinu pehe ca. Soco yoho chicum̄i vahun vinu vaha. Ta nya vityin tavon —catȳi ra chi ra.

¹¹ Cha sacuv̄i ra Jesús ñuu Caná ityi Galilea, ican cuan cuv̄i milagru cha xihna ri savaha ra vatȳi sañaha ra cha cahnu cuv̄i ra. Ta ra cachicá noo chihin ra cachino ñi ra chi ra vatȳi ican ra cuv̄i ra cha tach̄i Nyoo.

¹² Cha yaha cuan ta cuahan ra ñuu Capernaum. Ta cuahan sihi ra, yañi ra ta ra cachicá noo chihin ra. Ta yucuan chinyicu ñu suhva quivi.

Nu tava ra Jesús chi ñu caxicó chichi vehe ñuhu cahnu

(Mt. 21.12-13; Mr. 11.15-18; Lc. 19.45-46)

¹³ Cha cuñi chaa quivi vico cha nañi pascua cha sanducahnú ñu Israel. Yucuan chaha cuahan ra Jesús ñuu Jerusalén.

¹⁴ Ta chaa ra ñuu cuan, ta quihvi ra nuquehe vehe ñuhu cahnu cuan, ta nanyehe ra chi ra caxicó sindiqui, mbee, ta paloma. Ta na nyehe tucu ra chi ñu nyicú nasama xuhun chi ñáyivi.

¹⁵ Ta cha nyehe ra Jesús cha tyicuan caa, savaha ra noo yoho. Ta chihin yoho cuan tava ñehe ra chi tandih̄i ñu nuquehe vehe ñuhu ñn ri chihin mbee ta chihin sindiqui sana ñu. Ta ñu nasamá xuhun cuan, sacuita ra

xuhun ñu nu ñuhu ta sanduva ra mesa ñu.

¹⁶ Ta catȳi ra chi ñu xicó paloma cuan:

—¡Tava ndo paloma chiña ihya! ¡Ma nasaha ndo vehe Suti tari noo nuyahvi! —catȳi ra chi ñu.

¹⁷ Tyicuan ta ra cachicá noo chihin ra, canicohon ñi ra cha catȳi nu tutu Nyoo tyehe caa: “Cuiño xain chihin vehun”, catȳi chi, nicohon ñi ra.

¹⁸ Tyicuan ta quichaha candaca tuhun ra cacuv̄i nuu chi ñu Israel chi ra:

—¿Ñáá seña cuhvon chi ndi ta sañahun vatȳi chaha Nyoo ityi chuun cha sacuvun tyehe caa? —catȳi ra chi ra.

¹⁹ Ta nacahan ra Jesús ta catȳi ra:

—Satani ndo vehe ñuhu ihya, ta chichi cha uñi quivi, yuhu cusanandai inga chaha —catȳi ra chi ra.

²⁰ Tyicuan ta quichaha cacatȳi ra cuan chi ra:

—Uvi xico ñu cuiya cañoho ra casavaha ra vehe ñuhu ihya. Ta yoho catyún tyi chichi cha uñi quivi cusanandaun inga chaha —catȳi ra chi ra.

²¹ Soco vehe ñuhu cha cahan ra Jesús tuhun, ican cuv̄i coño ñuhu ra.

²² Yucuan chaha ra cachicá noo chihin ra canicohon ñi ra tuhun ihya quivi nandoto ra Jesús. Ta cutuñi ñi ra vatȳi tuhun cha nyaá nuu tutu Nyoo cahán chi cuenda ra Jesús. Ta canachino ñi ra tuhun cahan ra Jesús ta tuhun cha nyaá nu tutu Nyoo.

Ra Jesús chitó ra cha caá aña ñáyivi

²³ Quivi cha ñohó ra Jesús Jerusalén, quivi vico pascua cuan, cuaha xaan ñu nachino ñi ra chi ra cha cuenda cha cuaha xaan milagru sacuv̄i ra.

²⁴ Soco ra Jesús ña cunhi ñi ra nyehé ra chi ñu vatȳi chitó ra cha caá aña tandih̄i ñu.

²⁵ Ña chiñuhú ri cha nacatȳi yo chi ra yoso caa ñáyivi, vatȳi maa ra chitó ra ñáá cha caá chichi aña ñu.

3

Nu ndatuhún ra Nicodemo chihin ra Jesús

¹ Chiyó noo ra fariseo cha nañi Nicodemo. Ta cuví ra noo ra cuví nuu chi ra ñuu Israel.

² Ra Nicodemo ihya, chahan ra nu nyaá ra Jesús noo cha cuaa. Ta catyí ra chi ra:

—Maestro, chitó ndi vatyí Nyoo tachí chuun quichi sañahun chi ndi. Vatyí yori ñáyivi cuví sacuvi milagru tahan cha sacuvún, tatu yori Nyoo nyaá chihin ñu —catyí ra chi ra Jesús.

³ Tyicuan ta catyí ra Jesús chi ra:

—Cha ndicha catyí chuun vatyí tatu ma nacacu chaa ñáyivi inga chaha, ma cuví nyehe ñu nu nyacá ñaha Nyoo —catyí ra.

⁴ Tyicuan ta ndaca tuhun ra Nicodemo ta catyí ra:

—¿Yoso caa cuví cacu noo rayi inga chaha tatu cha chahnu ra? ¿Atu cuví ndihvi ra chichi sihi ra ta nacacu chaa ra inga chaha? —catyí ra.

⁵ Nacahan ra Jesús ta catyí ra:

—Cha ndicha catyí chuun vatyí ñima chihin cha cacu ri ñáyivi chihin coño ñuhu ñu ta cuví quihvi ñu nu nyacá ñaha Nyoo. Soco niñi tucu cuñi chi cha nacacu ñu chihin Tatyí Ii Nyoo.

⁶ Vatyí ñáyivi cha cacu chihin coño ñuhu, coño ñuhu ri nyisó ñu. Ta ñu cha nacacu chaa chihin Tatyí Ii Nyoo, iyó Tatyí Ii Nyoo añima ñu.

⁷ Ma iyo cuñun cha catyí chuun tuhun ihya vatyí tandihi ñu, cuñi chi nacacu chaa ñu.

⁸ Tari caá tatyí tandihi ri ityi nu cuñi chi ta chiñun cayú chi, soco ña chitón nya ityi quichi chi, ni nya ityi cuahan chi; ta tyicuan caa tandihi ñu nacacu chihin Tatyí Ii Nyoo —catyí ra Jesús chi ra.

⁹ Tyicuan ta ndaca tuhun tucu ra Nicodemo inga chaha chi ra:

—¿Yoso caa cuahan tuhun ihya? —catyí ra chi ra.

¹⁰ Nacahan ra Jesús ta catyí ra:

—Yoho cha cuvún noo ra sacuaha cuenda ñu Israel, tahan chi coton tuhun ihya.

¹¹ Cha ndicha catyí chuun vatyí cahín cha chité ta cuví cha ndaa cha nyehi. Soco nyoho ña chinó iñi ndo cha catyí chi ndo.

¹² Tatu ña chinó iñi ndo chii nu cahín tuhun ñáyivi ihya chihin ndo, ¿yoso caa chino iñi ndo tu cahin tuhun andivi chihin ndo?

¹³ Yori chahan andivi chinyehe yoso caa iyó. Noo ri yuhu Rayi cha quichi nya gloria nyehi, vatyí yucuan iyé.

¹⁴ Tari nacatacaá ra Moisés noo coo cha chino chihin caa nu noo chiqui ndi, tyicuan caa cunacataca tucu ñu chi yuhu Rayi cha quichi nya gloria,

¹⁵ tacuhva vatyí tandihi ñu cha chinó iñi chii, ma cunaa ñu. Soco coo ñu ñáyivi cha ma naa ca maa.

Nyoo cuñi xaan ra chi ñáyivi

¹⁶ Vatyí Nyoo cuñi xaan ra chi tandihi ñáyivi iyó siqui ñuhu ñáyivi. Yucuan cuenda chaha ra vatyí cuví Sehe mañi ra nu cruzi cha cuenda ñu. Tacuhva vatyí tandihi ñu cha chinó iñi chi Sehe ra, ma cunaa ñu, soco coo ñu noo ñáyivi cha ma naa ca maa.

¹⁷ Nyoo ña tachí ra chi Sehe ra siqui ñuhu ñáyivi vatyí sacunaa ra chi ñáyivi, soco tachí ra chi ra na sacacu ra añima ñu tacuhva ma cuhun ñu anyaya cha catyí cuatyí ñu.

¹⁸ Vatyí ñu chinó iñi chi Sehe Nyoo ma cunaa ñu, soco ñu ña chinó iñi chi ra, cha cuanaa ñu cha cuenda cha ña chinó iñi ñu chi noo ri Sehe mañi Nyoo.

¹⁹ Ñu ña chinó iñi, cha cuanaa ñu. Vatyí quivi quichi ra cuví ñuhu ndichin cha sacundichin siqui ñuhu ñáyivi, ña natiin cuenda ñu chi ra tyi tahan ca iñi ñu nu ñaa iñi vatyí nyacuví ñu cha ña vaha.

²⁰ Tandihi ñu cha nyacuví cha ña vaha, ña tahan iñi ñu ñuhu ndichin, vatyí coto quetuvi cha ña vaha cha nyacuví ñu.

²¹ Soco ñu nyacuví cha ndicha, nanyitá ñu nu ndichin tacuhva na cundichin nyehe ñáyivi vatyí sacuvi ñu cuhva cuñi Nyoo vatyí nyaá ra chihin ñu —catyí ra Jesús.

Nu cahán ra Juan, ra sacondutyá, tuhun ra Jesús inga chaha

²² Cha yaha tuhun ihya, ra Jesús chihin ra cachicá noo chihin ra cuahan coyo ra nu cuví Judea. Ta candoo ra suhva quivi yucuan, vatyí casacondutyá ra chí ñáyivi.

²³ Tyicuan caa tucu ra Juan cuan ñohó ra sacondutyá ra chí ñáyivi nu cuví Enón yatyin ri nu cuví Salim, vatyí yucuan ñohó cama ndutyá. Ta ñáyivi chaá coyo ñu ta condutyá ñu.

²⁴ Tuhun ihya cuví ta ni cumañi ca catyíhi ra chí ra Juan vehe caa.

²⁵ Tyicuan ta suhva ra nyicón chí ra Juan quichaha cuví yuhu ra chihin noo ra ñuu Israel síqui yoso caa sandundí ñáyivi chí ñu nuu Nyoo.

²⁶ Tyicuan ta cuahan coyo ra nu nyaá ra Juan. Ta catyí ra chí ra:

—Maestro, ra cha ñoho chuhun inga chiyo yuvi cahnu Jordán, ra cha cahun tuhun chihin ndí, vityin sacondutyá ra ta tandíhi ñu nanyicón ñu chí ra —catyí ra chí ra.

²⁷ Tyicuan ta ra Juan catyí ra chí ra: —Ni noo yo ta ñahri cha cuví sacuvi yo, tyehe ta ña chahá Nyoo tunyee ñi ra chí yo.

²⁸ Suri maa ndo chíñi vaha ndo cha cahin vatyí yuhu ñima ra Cristo cuví. Noo ra cha tachí ri Nyoo ityi nuu ra cuví yuhu.

²⁹ Vatyí noo vico tandaha, ra nyaá xiin ñaha tyivaa cuan, ican ra cuan cutandaha chihin ña. Ta ra tahan ra nyaá ra yatyin ri cuan. Ta cusí cuñí ra chíñi ra tuhun cahán ra cha cutandaha. Ta tyicuan caa tucu yuhu, sí cuñí vatyí naquehen ñáyivi tuhun cahán ra Jesús ta nyicón ñu chí ra.

³⁰ Maa ra cahnu ca ra cuacuvi ra. Ta yuhu cunocuee que vatyí tyicuan caa tahan maa chí.

Ra quita nya gloria ta quichi síqui ñuhu ñáyivi

³¹ 'Ra cha quichí nya gloria, cahnu ca ra cuví ra cha nuu tandíhi ñáyivi. Vatyí ra iyó síqui ñuhu ñáyivi, cuenda ñuhu ñáyivi cuví ra. Ta cahán ra tuhun ñuhu ñáyivi. Soco ra quichí nya gloria, cahnu ca ra cuví ra.

³² Ta cahán ra cha nyehé ra ta cha chíñi ra, soco yori chinó ñi tuhun cahán ra.

³³ Soco tatu nya noo yo chinó ñi yo chí ra, cuví yo noo cha ndaa vatyí Nyoo ndicha cha cahán ra.

³⁴ Vatyí ra cha tachí Nyoo chí, tuhun Nyoo cahán ra vatyí Nyoo ña tyicuhvá ra Tatyí li ra chaha ra chí ra. Chaha ra naní Tatyí li ra chí ra.

³⁵ Nyoo Sutu yo cuñí ra chí Sehe ra. Ta natyaa ra tandíhi ndaha ra.

³⁶ Ñu cha chinó ñi chí Sehe Nyoo, iyó ñu noo ñáyivi chaha ma naa ca maa. Soco ñu ña cuñí chino ñi chí ra, ma coo ñu ñáyivi cuan. Ta cutachí tuñi Nyoo chí ñu.

4

Nu ndatuhun ra Jesús chihin noo ñaha Samaria

¹ Cachitó ra cuví fariseo vatyí cuaha ca ñáyivi nyicón chí ra Jesús ican saha ra Juan. Ta cuaha ca ñu sacondutyá ra ñandíhi.

² Vasi ñima maa ra Jesús sacondutyá, soco ra cachicá noo chihin ra, ican casacondutyá.

³ Ta quivi chito ra Jesús vatyí cachito ra tuhun ihya, ta quita ra Judea cuan ta cuanuhu ra nya Galilea.

⁴ Ta ityi cuanuhu ra, tahan chí yaha ra nu cuví Samaria.

⁵ Yucuan ta chaá ra noo ñuu cha nyaá ityi Samaria cha nañí Sicar yatyin nu nyaá ñuhú ra Jacob nu chaha ra chí ra José sehe ra.

⁶ Ta yucuan nyaá noo yavi ndutyá cha catyí ñu tyi chí ra Jacob cuví. Ta vatyí chitatú xaan ra Jesús cha chica ityi ra, ta chicunyaá ra yuhu yavi cuan, ñáá cuhva hora cuví.

⁷⁻⁸ Ta ra cachicá noo chihin ra, yori ra canyicú vatyí cuahan coyo ra chichi ñuu, cuasata ra cha cacachi ra. Tyicuan ta chaá noo ñaha Samaria cuatava ña ndutyá chichi yavi cuan. Ta quichaha catyí ra Jesús chí ña:

—Cuhva chíin ndutyá cohi —catyí ra chí ña.

⁹ Tyicuan ta ñaha Samaria cuan catyí ña chí ra Jesús:

—Yoho cha cuvún noo ra ñuu Israel, ¿yoso caa cha chicón ndutya cohun chi yuhu cha cuví ñaha Samaria? —catyí ña vatyí ñu Israel ña vaha iyó ñu chihin ñu Samaria.

¹⁰ Tyicuan ta ra Jesús nacahan ra ta catyí ra:

—Tyehe ta chitón cha chahá Nyoo, ta chitón yóo cha chicán ndutya chuun, maun cucacon ndutya chii. Ta yuhu cuhve ndutya nyitó chuun —catyí ra chi ña.

¹¹ Tyicuan ta catyí ña chi ra:

—Tata, ni ñahri vihi chihin tavon ndutya ihya. Vatyí yavi ihya cono xaan. ¿Nya cuquehun ndutya nyitó cuhvon cohi?

¹² Vatyí sutu chahnu yo, ra Jacob sandoo ra yavi ihya chi yo. Ta suri ihya chihí tucu maa ra ndutya. Ta suri ihya chihí tucu sehe ra ta quití sana ra. ¿Atu cahnu ca ra cuví yoho ican saha ra cuan? —catyí ña chi ra.

¹³ Tyicuan ta nacahan ra Jesús ta catyí ra chi ña:

—Tandihí ñu chihí ndutya ihya, cu ityi ca ñu ndutya.

¹⁴ Soco ñu chihí ndutya cha chahá yuhu, ma cu ityi ca ñu. Vatyí ndutya cha chahí chi ñu cucaña chi tari noo ndohyo chichi añima ñu tacuhva coo ñu ñayiví cha ma naa ca maa —catyí ra chi ña.

¹⁵ Tyicuan ta quichaha catyí ña chi ra:

—Tata, cuhva ndutya cuan cohi, tacuhva cha ma cu ityi que ndutya, ta ni ma quichi que quichi tave ndutya chichi yavi ihya —catyí ña chi ra.

¹⁶ Tyicuan ta ra Jesús catyí ra chi ña: —Cuahan cuacana chi yíun ta quichun —catyí ra chi ña.

¹⁷ Ta nacahan ña ta catyí ña:

—Yori yíi iyó —catyí ña.

Tyicuan ta catyí ra Jesús chi ña:

—Ndicha cha cahun, vatyí yori yíun iyó.

¹⁸ Vatyí cha ohon tahan yíun chiyó, ta ra nyaá chuhun vityin ñima yíun cuví chi ra. Ndicha tuhun cha cahún —catyí ra chi ña.

¹⁹ Cha chiñi ña tuhun cahan ra, quichaha catyí ña chi ra:

—Tata, tuví iñi vatyí noo profeta cuenda Nyoo cuvún.

²⁰ Sutu chahnu ndi, ra Samaria, sacahnu ra chi Nyoo yucu ihya. Soco nyoho ñu Israel catyí ndo vatyí Jerusalén yucuan tahán chi sacahnu yo chi Nyoo —catyí ña chi ra.

²¹ Tyicuan ta ra Jesús nacahan ra ta catyí ra chi ña:

—Chino iñun tuhun cahín chuhun. Vatyí vachi cuhva vatyí cusacahnu ndo chi Sutu yo Nyoo. Soco ña chiñuhú ri cha quichi ndo yucu ihya o cahun ndo nya Jerusalén.

²² Nyoho ñu Samaria, ña chitó ndo yóo chi sacahnú ndo. Soco nyuhu chitó ndi yóo chi sacahnú ndi. Vatyí chitó ndi vatyí cuenda noo ra Israel cuasacacu Nyoo chi ñáyiví.

²³ Soco chaa chi cuhva ta cuhva cuan nyaa yo vityin vatyí ñáyiví cha ndicha sacahnú chi Sutu yo Nyoo, cusacahnu ñu chi ra chihin añima ñu ta cha ndicha. Tari cuhva saquehen ityi Tatyí li Nyoo chi ñu. Vatyí Sutu yo Nyoo tyicuan caa cuñí ra cha sacuvi ñu cha sacahnú chi ra.

²⁴ Vatyí Nyoo Tatyí li cuví ra. Ta ñu sacahnú chi ra cuñí chi sacahnú ñu chi ra chihin cha ndicha tari cuhva saquehen ityi Tatyí li chi ñu —catyí ra chi ña.

²⁵ Ta nacahan ña ta catyí ña chi ra:

—Yuhu chité vatyí cuquichi ra cuví Mesías, ra Cristo, ra cuvi rey chi yo. Ta quiví quichi ra, maa ra cunacatyí tandihí chi yo —catyí ña chi ra.

²⁶ Tyicuan ta nacahan ra Jesús ta catyí ra chi ña:

—Ra cha cahún tuhun cuan, ican ra cahán chuhun —catyí ra chi ña.

²⁷ Tyicuan ta canachaa coyo ra cachicá noo chihin ra ta iyo cacuñí ra cha ndatuhún ra Jesús chihin noo ñaha sihi. Soco ni noo ra ña caña iñi ra ndaca tuhun ra ñáa cha cuñí ra o ñáa cuenda ndatuhún ra chihin ñaha cuan.

²⁸ Tyicuan ta sandoo ña quiyí ña ta cuanuhu ña chichi ñuu. Ta catyí ña chi ñáyiví ñuu ña:

29 —Ñaha ndo cunyehe ndo chi noo ra cha catyí tandihí cha cai. ¿Atu ñima ra Cristo cuví ra? —catyí ña chi ñu.

30 Tyicuan ta quita coyo ñu ñuu cuan ta cuahan coyo ñu nu nyaá ra Jesús.

31 Ta cha niri ca cha cumañi chaa ñu nu nyaá ra, ra cachicá noo chihin ra, saniñi ra chi ra na cachi ra chiin. Ta cacatyí ra chi ra:

—Maestro, cachi chiin —catyí ra.

32 Soco catyí ra Jesús chi ra:

—Yuhu iyó noo nyayu cuacachi, ta nyoho ña chitó ndo —catyí ra chi ra.

33 Tyicuan ta ra cachicá noo chihin ra quichaha candaca tuhun ra chi ra tahan ra, ta catyí ra:

—¿O iyó yóo cha quichi nyaca cha cachi ra, vaha? —cacatyí ra.

34 Soco ra Jesús catyí ra chi ra:

—Cha chachí yuhu ican cuví cha sacuví cuhva cuñi ra cha tachí chii ta sacuví tyiño chaha ra chii.

35 Nyoho catyí ndo: “Soco cumañi ca cumi yoo ta naquehen yo cha tachí yo.” Soco yuhu catyí chi ndo vatyí nyehe ndo ta saha ndo cuenda cha cuaha ñáyivi cuñi ñu quichi ñu chihin, cuví ñu tari noo itu cha cuan ta cuñi chi cha cahnu yo ñiñi.

36 Ra cha naquehén ñiñi cuan ñiñi ra yahvi ra. Ta ñiñi cha naquehen vaha ra cuví ñu cha ñiñi noo ñáyivi cha ma naa ca maa. Ta tyicuan caa cuví tacuhva vatyí ra cha tachí, ta ra cha naquehén ñiñi cuan in ri cacusi cuñi ra.

37 Ta iyó noo tuhun ñáyivi cha catyí vatyí sin ñu tachí ta sin ñu naquehén ñiñi. Ta ndicha tuhun cuan.

38 Yuhu sacuhin chi ndo vatyí cuahnu ndo ñiñi cha iyó nu ña saha tyiño ndo. Vatyí inga ra saha tyiño. Ta nyoho nyari cuahnu ndo ta naquehen vaha ndo ñiñi cuan —catyí ra Jesús chi ra.

39 Ta cuaha xaan ñu ñuu Samaria cuan canachino ñiñi ñu chi ra Jesús cha cuenda cha catyí ñaha cuan, vatyí catyí ña: “Catyí ra tandihí cha cai chii”, catyí ña.

40 Ta cuhva cha cachaa coyo ñu Samaria nu nyaá ra Jesús, cha cundahvi ñu nuu ra nandoo ra chihin ñu. Ta ra Jesús ndoo ra yucuan uvi quivi chihin ñu.

41 Ta cuaha ca ñu cachino ñiñi ñu cha chiñi ñu tuhun cahán maa ra.

42 Tyicuan ta quichaha catyí ñu chi ñaha sihi cuan:

—Vityin chinó ñiñi ndi, ñima cha cuenda vatyí catyun chi ndi, soco vatyí chiñi maa ndi chihin soho ndi tuhun cahán ra, ta chitó vaha ndi vatyí ican ra cuví Cristo ra sacacú chi ñáyivi iyó siqui ñuhu ñáyivi ihya —catyí ñu.

Nu sanduvaha ra Jesús chi sehe noo ra cuví tyiño

43 Cha yaha uvi quivi ta quita ra Jesús ñuu Samaria cuan ta cuahan ra ityi nu cuví Galilea.

44 Vatyí suri maa ra Jesús catyí ra vatyí ñáyivi ñuu noo ra cuví profeta, ra chahá cuenda tuhun cahán Nyoo, ña sahá ñu ñáyivi chi ra.

45 Tyicuan ta cuhva cha chaá ra Galilea, ñu iyó yucuan vaha tyiñuhu ñu chi ra, vatyí chahan coyo tucu maa ñu Jerusalén vico cuan, ta nyehe ñu cha vaha cha sacuví ra.

46 Tyicuan ta cuanuhu tucu ra Jesús nya ñuu Caná nu cuví Galilea nu sananduví ra vinu chihin ndutya. Ta iyó noo ra cuví tyiño cuenda rey, ta iyó noo sehe ra cha cuhví ñuu Capernaum.

47 Quivi cha chito ra cuan vatyí nachaa ra Jesús Galilea cha chahan ra Judea, chahan ra chinyehe ra chi ra, ta chican ra tumañi ñiñi chi ra na cuhun ra vehe ra ta sanduvaha ra chi sehe ra, vatyí cha cuñi cuii ri cúvi sehe ra.

48 Tyicuan ta ra Jesús catyí ra chi ra:

—Nyoho ma chino ñiñi ndo tatu ma nyehe xihna ndo noo milagru —catyí ra chi ra.

49 Soco ra cha vaha cuan catyí ra chi ra Jesús:

—Tata, coho chihin cha numi ri vityin cha ta cúvi ca sehi —catyí ra chi ra.

50 Tyicuan ta ra Jesús catyí ra chi ra:

—Cuanuhu nya vehun. Sehun cha nduvaha ra —catyí ra chi ra.

Tyicuan ta ra cha vaha cuan chinó ñni ra tuhun cahan ra Jesús ta cuanuhu ra.

⁵¹ Ta cuhva cha cuanachaa ra nya vehe ra, quita coyo musu ra ta cacatyí ra chi ra:

—¡Cha nduvaha sehun!

⁵² Tyicuan ta quichaha ndaca tuhun ra chi ra ñáá cuhva nduvaha ra. Ta cacatyí ra chi ra:

—Icu cuhva ca ñn cha yaha hora tinyaa cahni chi ra —cacatyí ra.

⁵³ Tyicuan ta tuví ñni ra cha vaha cuan, vatyí cuhva cuan catyí ra Jesús chi ra, “Cuanuhu vatyí sehun cha nduvaha ra.” Ta maa ra ta tandihi ñáyivi chi ra nachino ñni ñu chi ra Jesús.

⁵⁴ Ican ihya cuví cha cu uvi milagru cha sacuvi ra Jesús cha nachaa ra Galilea cha chahan ra Judea.

5

Nu sanduvaha ra Jesús chi noo ra ña cuví caca

¹ Cha yaha tuhun cuan ta ra Jesús cuahan ra Jerusalén inga chaha vatyí ñu ñuu Israel sanducahnu ñu noo vico.

² Ta ñuu cuan iyó noo yuvehe cha nañi Yuvehe Cuenda Mbee. Ta yatyin ri nyaa noo vehe cahnu. Ta chichi vehe cuan ñohó ndutya. Ta cha chihin sahan hebreo nañi chi Betesda. Ta iyó ohon tahan corredor.

³ Ta yucuan cayucu cuaha ñu cuhvi: ñu cuaa, ñu coxo, ta ñu ña cuví nacanda. Canyatú ñu ñáá cuhva nacanda ndutya cuan.

⁴ Vatyí ña naha ña naha ri ta noó noo ángel sanacanda ra ndutya cuan. Ta yóo cha quihvi xihna ca cha yaha nacanda ndutya cuan, nduvaha ñu niri maa ñáá ca cuehe ndoho ñu.

⁵ Ta yucuan catuvi noo ra cuhvi cha iyó oco chahun uñi cuiya cuhvi ra.

⁶ Cuhva cha nanyehé ra Jesús chi ra catuvi ra yucuan, tuví ñni ra vatyí cha cañi xaan cuiya caá ra tyicuan caa. Ta ndaca tuhun ra chi ra, ta catyí ra:

—¿Atu cuñún nduvahun?

⁷ Ta ra cuhvi cuan nacahan ra ta catyí ra:

—Tata, yori maa tyihi chii chichi tanque tatu cha nacandá ndutya. Vatyí tahan ri cha cuñi quihvi, inga ñu quihvi xihna ca —catyí ra cuhvi cuan chi ra Jesús.

⁸ Tyicuan ta catyí ra Jesús chi ra:

—Ndicuita ta naquehen yuvun ta cacon —catyí ra chi ra.

⁹ Ta caa cuhva ri cuan nduvaha ra, naquehen ra yuvi ra, ta nacaca ra. Soco vatyí quivi nyitatu ñu cuví,

¹⁰ ra cacuví nuu chi ñu Israel catyí ra chi ra cha nduvaha cuan:

—Quivi nyitatu yo cuví vityin, ña tahan chi cuison yuvun —catyí ra chi ra.

¹¹ Ta ra cha nduvaha cuan nacahan ra ta catyí ra:

—Ra cha sanduvaha chii, ican ra catyí chii: “Naquehen yuvun ta cacon”, catyí ra chii.

¹² Tyicuan ta quichaha candaca tuhun ra chi ra, ta catyí ra:

—¿Yóo ra cha catyí chuun vatyí naquehun yuvun ta cacon?

¹³ Soco ra cha nduvaha cuan ña chitó ra yóo cha sanduvaha chi ra. Vatyí cuaha xaan ñáyivi yucuan, ta ra Jesús yori ca ra vatyí cha cuahan ra.

¹⁴ Yaha cuan ta nañihi ra Jesús chi ra chichi vehe ñuhu cahnu, ta catyí ra chi ra:

—Nyehe, vityin cha nduvahun, ma sacuvi con cuatyí, coto ñáá ca cha cahnu ca cuví chuun —catyí ra chi ra.

¹⁵ Tyicuan ta chahan ra chicatyi ra chi ra Israel cuan vatyí ra Jesús cuví ra cha sanduvaha chi ra.

¹⁶ Ta cha cuenda cha sacuvi ra Jesús tyehe caa quivi nyitatu ñu, yucuan chaha cuxaan xaan ra cacuví nuu chi ñu Israel chí ra Jesús. Ta cuñi ra cahni ra chi ra.

¹⁷ Soco ra Jesús catyí ra chi ra:

—Maa Suti, nya vityin ta sahá tyiño ra. Ta yuhu tucu sahá tyiño —catyí ra.

¹⁸ Ta cha cuenda cha chahan ra tuhun ihya, xaan ca cuñi ra Israel cuan. Ta ñihi ca cuñi ra cahni ra chi ra vatyí cuñi maa ra vatyí ña sahá ra ñáyivi quivi nyitatu ñu, ta ñin rí tyi

sahá ra tuhun tyi #n ri cuví ra chihin Nyoo vatyí catyí ra tyi sutu ra cuví chi Nyoo.

Sehe Nyoo iyó xaan ityi chi ra cha cunyaca ñaha ra

¹⁹ Tyicuan ta ra Jesús catyí ra chi ra:

—Cha ndicha catyí chi ndo vatyí yuhu, cha cuví Sehe Nyoo, ñahri cha savahí cha maa ri mai. Soco sacuví cha nyehí sacuví Suti. Tandihí cha sacuví Suti ta sacuvi tucu maí.

²⁰ Vatyí cuñi xaan Suti chii, vatyí Sehe ra cuví chii, yucuan chaha sañahá ra tandihí cha sacuví ra chii. Ta nahnu ca cha cusañaha ra, tacuhva cu iyo cuñi ndo.

²¹ Tari sanandotó Nyoo Suti chi ndiyí, ta chahá ra ñayiví coo ñu, tyicuan caa tucu yuhu cha cuví Sehe ra, chahí ñayiví chi ñu cuñí mai cuhve.

²² Ta Suti Nyoo ña sandaa ra cuatyí ni noo ñu, soco chi yuhu cha cuví Sehe ra chahá ra ityi na sandai cuatyí ñáyiví.

²³ Tyicuan caa sacuví Suti Nyoo vatyí cuñí ra tyi sacahnu ñáyiví chi Sehe ra tari sacahnú ñu chi maa ra. Ñu ña sacahnú chi yuhu Sehe Nyoo, niri chi Suti ta ña sacahnú ñu. Tyi maa ra tachí ra chi yuhu cha cuví Sehe ra.

²⁴ Ta cha ndicha catyí vatyí ñu tya-sohó tuhun cahín ta chinó iñi ñu chi ra cha tachí chii, iyó ñu noo ñayiví chaa cha ma naa ca maa. Ta ma cuhun ca ñu anyaya cha catyí cuatyí ñu vatyí cha sacacú Nyoo aña ñu ndaha tuhun chihí, ta nacuhva ra ñayiví chaa coo ñu.

²⁵ Ñáyiví tari cha ndiyí cuví ñu soco cha ndicha catyí chi ndo vatyí vachi chi quiví vatyí cuiñi ñu ndusu Sehe Nyoo. Ta ñu cha quichahá cha cahán ra, cucoo ñu ñayiví cha ma naa ca maa. Ta vityin cuví quiví cha cahín tuhun.

²⁶ Vatyí Nyoo Suti iyó ra ñayiví cha ma naa ca maa. Ta chahá tucu ra ityi chi yuhu cha cuví Sehe ra vatyí cuhve ñayiví coo ñáyiví.

²⁷ Ta Nyoo chahá ra vatyí sandai cuatyí ñáyiví, vatyí Rayí cha quichi nya gloria cuví yuhu.

²⁸ Ma iyo cuñi ndo tuhun ihya, vatyí cuchaa chi quiví vatyí ñu ndiyí chichi ñaña cucuiñi ñu ndusu Sehe Nyoo.

²⁹ Ta cuquita coyo ñu chichi ñaña. Ta ñu cha sacuví cha vaha cunandoto ñu vatyí coo ñu noo ñayiví chaa. Soco ñu ña sacuví cha vaha cunandoto ñu vatyí cuhun ñu anyaya nu cutachi tuñi Nyoo chi ñu.

Nu sañaha chi vatyí ra Jesús iyó ityi chi ra cha cuhva ra ñayiví chaa coo ñáyiví

³⁰ Yuhu ñima noo tuhun ri mai sacuví ñáa noo cha sacuví. Nyehí cha caá aña ñáyiví yoso cuhva catyí Suti. Ta vaha cuhva nyehí vatyí ña sacuví cuhva cuñí mai, soco cuhva cuñí Suti, ra cha tachí chii.

³¹ Ta tatu suri mai cuví cha ndaa chi mai, ñahri yahvi nyaá cha ndaa cuan.

³² Soco iyó inga ra cuví cha ndaa cuenda yuhu. Ta yuhu chité vatyí cha cahán ra cuende yucuan cuví noo cha ndaa ta cha ndicha.

³³ Nyoho chindaca tuhun ndo chi ra Juan. Ta tuhun cha cahán ra, ndicha vaha.

³⁴ Soco yuhu ña chiñuhú cha cuví rayí cha ndaa cuende. Soco catyí tuhun ihya chi ndo cha cuenda cha vaha chi ndo, tacuhva vatyí chino iñi ndo chii ta cacu aña ndo.

³⁵ Ra Juan cuví ra tari noo lámpara cha cayú ta sacundichín. Ta nyoho tahan iñi ndo cusí iñi ndo nu ndichin ñuhú ra suhva ri quiví.

³⁶ Soco yuhu iyó noo cha ndaa vaha ca cha nuu cha catyí ra Juan. Vatyí tandihí cha sacuví yuhu, maa Suti catyí chii na sacuví. Ta ican cuví cha ndaa cha nyehé ndo vatyí ndicha vatyí maa Suti tachí chii.

³⁷ Ta tyicuan caa tucu Suti, ra cha tachí chii, cuví ra cha ndaa cuende. Nyoho ta cuiñi ca ndo ndusu ra. Ta ni ta nyehe ca ndo chi ra.

³⁸ Ta tuhun ra cha cahín nuu ndo, ña ndoó chi aña ndo vatyí ña chinó iñi ndo vatyí Nyoo tachí ra chii.

³⁹ Nyoho chihin cuenda xaan sacua ha ndo nu tutu Nyoo, vatyí cuñí maa ndo vatyí nuu cuan cuanañihi

ndo ñayiví chaa cha ma naa ca maa. Soco nu tutu Nyoo cuan, tuhun yuhu cahán chi.

⁴⁰ Ta nyoho ña cuñí ndo quichi ndo nu nyaí tacuhva vatyí cuhve ñayiví chaa cuan coo ndo.

⁴¹ 'Yuhu ña nduqui nu cuvahi nuu ñáyiví.

⁴² Vatyí yuhu ñohó nui chi nyoho ta chité vatyí ña cuñí ndo chí Nyoo.

⁴³ Yuhu vachi cuenda Suti ta nyoho ña naquehén ndo tuhun cahín. Soco tatu inga ra vachi ra cuenda maa ra, chi ra cuan nachino iñi ndo.

⁴⁴ Nyoho ña cuví chino iñi ndo chii vatyí cuñí ndo cuvaha ndo nu tahan ndo. Ta ña nducú ndo nu cuvaha ndo nuu Nyoo cha noo tuhun ri maa iyó.

⁴⁵ Ma cuñi ndo vatyí cutyaa yuhu cuatyí chaha ndo nuu Suti. Ra Moisés cuví ra tyaá cuatyí chaha ndo vatyí ña sacuví ndo ley cha tyaá ra. Ta ley ra cuñí maa ndo vatyí cunyaca chí chi ndo andiví.

⁴⁶ Vatyí tyehe ta chinó iñi ndo tuhun cahan ra Moisés, chinó tucu iñi ndo tuhun cahán yuhu. Vatyí tuhun yuhu ican tyaá ra.

⁴⁷ Soco tatu ña chinó iñi ndo tuhun cha tyaá ra, ¿yoso caa cuchino iñi ndo tuhun cahán yuhu? —catyí ra Jesús chi ra cacuví nuu chí ñu Israel.

6

Nu chaha ra Jesús cha cachi ohon mil rayi

(Mt. 14.13-21; Mr. 6.30-44; Lc. 9.10-17)

¹ Cha yaha cuan, ra Jesús cuahan ra inga chiyo miñi cahnú cha nañí Tyañuhu Galilea. Ta suri miñi cuan nañí chí Miñi Tiberias.

² Cuaha xaan ñáyiví cuahan nyicon chí ra cha cuenda vatyí nyehé ñu milagru cha sacuví ra vatyí sanduvahá ra chí ñu cuhví.

³ Tyicuan ta ra Jesús ndaa ra noo yucu ta chicunyaá ra yucuan chihin ra cachicá noo chihin ra.

⁴ Ta cha nyaña quiví vico cha nañí pascua cha sanducahnú ñu Israel.

⁵ Cha nanyehe ra Jesús vatyí cuaha ñáyiví nyicón chí ra, ta quichaha catyí ra chí ra Felipe:

—¿Yoso caa cusata yo cha cachi tandihí ñáyiví cuaha ihya? —catyí ra chí ra.

⁶ Soco catyí ri maa ra chí ra Felipe cha nducú nyehe ra chí ra ñáá catyí ra, vatyí ra Jesús chitó vaha ra ñáá cha cuasacuví ra.

⁷ Tyicuan ta nacahan ra Felipe ta catyí ra:

—Yahvi cha quehen yo cha saha tyiño yo ucha tahan yoo ta ma ñihi sata yo cha cachi ñu chíin chíin —catyí ra Felipe.

⁸ Ta ra Andrés nonga ra nyicón chí ra Jesús, ta yañi ra Simón Pedro cuví chí ra, catyí ra chí ra Jesús:

⁹ —Ihya nyaá noo ra cuehe luhlu nyisó cue ohon tahan pan cebada ta uvi tahan tiyaca. Soco ¿nyata cuví ihya ta cuaha ñáyiví ihya? —catyí ra Andrés.

¹⁰ Tyicuan ta ra Jesús catyí ra chí ra: —Catyí ndo chí tandihí ñu na cunyicu ñu —catyí ra.

Iyó vavaha cuhu yucuan ta chicunyicu ñu ta cha ohon mil rayi, ta siñ ri ñusihí chihin ra cuatyaa.

¹¹ Tyicuan ta quehen ra Jesús pan cuan ta cha yaha nacuhva ra tyahvi nyoo chí Nyoo, chaha ra chí ra cachicá noo chihin ra. Ta ra cachicá noo chihin ra casacha ra chí tandihí ñu canyicú cuan. Suri tyicuan caa sacuví tucu ra chihin tiyaca cuan, chaha ra cachi ñu nyacua nya cha chitu chí ñu.

¹² Ta cuhva cha ndaha iñi ñu, ra Jesús catyí ra chí ra cachicá noo chihin ra:

—Nacoñehe ndo yiquin cha ndoo tacuhva vatyí ñahri cha tiví —catyí ra chí ra.

¹³ Canacoñehe ra, ta casacutu ra uchi uvi tahan tica chihin yiquin cha ndoo cuan cha cuenda ohon tahan pan cuan.

¹⁴ Tyicuan ta cha yaha nyehe ñáyiví cuan milagru cha savaha ra Jesús, ta catyí ñu:

—Ican ndicha cui ra ihya cuví profeta, ra chahá cuenda tuhun cahan Nyoo cha nyaá cha quichi siqui ñuhu ñayiví ihya —catyí ñu.

¹⁵ Soco tuví iñi ra Jesús vatyí cuñí ñu quehen ñu chi ra chihin fuerza vatyí sacuvi ñu rey chi ra. Ta cuahan ri ra nu sucun yucu cuan inga chaha vatyí cunyaa notuhun maa ra.

*Nu chicá ra Jesús nu ndutya
(Mt. 14.22-27; Mr. 6.45-52)*

¹⁶ Ta cha cuaa, ta noo coyo ra cachicá noo chihin ra Jesús yuhu miñi cuan.

¹⁷ Ta quihví coyo ra chichi canoa ta cuayahá sava ra mahñu miñi cuan vatyí cuchaa ra Capernaum. Cha cuñaa ta ra Jesús suri cha ta ndichi ca ra.

¹⁸ Tyicuan ta chaá noo tatyí ñihi. Ta iyo ndicuita ndutya miñi cuan.

¹⁹ Tyicuan ta cha cayahá ra chihin canoa cuan tari noo cha ohon o iñu kilómetro, ta cananyehe ra chi ra Jesús suri chicá ra nu ndutya cuan cuachaa ra nu nyaá canoa cuan, ta canayuhví ra.

²⁰ Soco ra Jesús catyí ra chi ra:

—¡Yuhu cuví, ma yuhvi ndo!

²¹ Tyicuan ta chihin cha casí cuñi ra caquehen cuenda ra chi ra Jesús chichi canoa. Tyicuan ta tañi ri ta cachaa ra yuhu miñi nu cuahan coyo ra.

Nu nanducú ñáyiví chi ra Jesús

²² Tuvi inga quiví cuan cha ñaha cui ri chitó ñáyiví cha ndoo inga chiyo miñi cuan vatyí ra cachicá noo chihin ra Jesús cuahan coyo ra chihin noo canoa cha iyó cuan. Vatyí noo ri maa iyó. Ta chitó ñu tyi ña cuahan ra Jesús chihin ra.

²³ Soco chaá coyo ca canoa cha quitá coyo ñuu Tiberias. Chaá chi yatyin ri ityi nu cachachi ñu pan, yahá cha nacuhva Sutu Mañi yo tyahví nyoo chi Nyoo.

²⁴ Tyicuan ta cha nanyehe ñu tyi yori ra Jesús yucuan ta ni ra cachicá noo chihin ra, quihví coyo ñu chichi inga canoa cuan ta cuahan ñu nya Capernaum cuananducu ñu chi ra.

*Ra Jesús cuví pan cha chahá ñayiví
chaa coo yo*

²⁵ Cha chaá coyo ñu inga chiyo miñi cuan, nañihí ñu chi ra Jesús. Ta ndaca tuhun ñu chi ra:

—Maestro, ¿ama chaun ihya? —catyí ñu chi ra.

²⁶ Soco ra Jesús catyí ra chi ñu:

—Cha ndicha catyí chi ndo vatyí nyoho nanducú ndo chii soco cha cuenda vatyí chachi ndo nyacua nya cha chitu chi ndo. Soco ñima vatyí nyehe ndo milagru cha sacuví.

²⁷ Ma saha tyiño ndo cuenda nyayu cha ndihí, soco saha tyiño ndo cuenda nyayu cha ña ndihí ta chahá chi noo ñayiví chaa cha ma naa ca maa coo ndo. Ican ihya cuví nyayu cha cucuhve chi ndo vatyí Nyoo Suti tyaa tyiño cuan chii vatyí yuhu cuví Rayíi cha quichi nya gloria —catyí ra Jesús.

²⁸ Tyicuan ta quichahá ndaca tuhun ñu chi ra ta catyí ñu:

—¿Ñáá cha cuví sacuvi ndi tacuhva sacuvi ndi cuhva cuñi Nyoo? —catyí ñu.

²⁹ Tyicuan ta ra Jesús catyí ra chi ñu:

—Cha cuñi Nyoo cha sacuvi ndo ican cuví ihya: Cha chino iñi ndo chi yuhu, ra cha tachi ra chi —catyí ra Jesús chi ñu.

³⁰ Ta candaca tuhun tucu ñu chi ra, ta catyí ñu:

—¿Ñáá seña cuhvon chi ndi tacuhva vatyí nyehe ndi ta chino iñi ndi chuun? ¿Ñáá cha cuasacuvun?

³¹ Sutu chahnu ndi chachi ñu maná chiqui ndi nu yori ñáyiví iyó quiví cuan, tari catyí tuhun Nyoo: “Nyoo chahá ra pan cha quichi ityi andiví cachi ñu” —catyí ñu chi ra Jesús.

³² Ta ra Jesús nacahan ra ta catyí ra:

—Cha ndicha catyí chi ndo. Ñima ra Moisés chahá pan cha quichi ityi andiví cachi ñu, soco Nyoo Suti cuví ra chahá pan cha ndicha vaha cha quichi ityi andiví.

³³ Vatyí pan cha chahá Nyoo, ican cuví ra cha noo ityi andiví. Ta ican cuví ra cha chahá noo ñayiví chaa

coo ñu iyó siqui ñuhu ñayivi —catyí ra Jesús.

³⁴ Tyicuan ta quichaha cacatyí ñu chi ra:

—Tata, cuhva pan chiña cachi ndi tyicuan ri maa —catyí ñu.

³⁵ Ta nacahan ra Jesús ta catyí ra chi ñu:

—Yuhu cuví pan cha chahá cha conyito añima ndo. Ñu vachi nu nyaí ma cusoco ca añima ñu, ta ñu chino iñi chii ma cu ityi ca maa añima ñu.

³⁶ Soco cha yaha catyí chi ndo vatyí nyoho ña chinó iñi ndo vasi cha nyehé ndo chii.

³⁷ Tandihí ñáyivi cha chaha Nyoo Suti chii, vachi ñu nu nyaí, ta ñu vachi nu nyaí, naquehén cuende chi ñu.

³⁸ Vatyí yuhu quichi ityi andivi soco ñima cha cuenda cha sacuvi cuhva cuñí mai, soco sacuvi cuhva cuñí ra cha tachí chii.

³⁹ Ta cuhva cuñí ra cha tachí chii, ican cuví ihya: cha ma sacunai ni noo ñu cha chahá ra chii, tacuhva vatyí sanandote chi ñu nu cuandihí quivi.

⁴⁰ Suti, ra cha tachí chii, cuñí ra vatyí tandihí ñáyivi cha nyehe chi yuhu ra cha cuví Sehe Nyoo, ta chino iñi ñu chii, coo ñu noo ñayivi cha ma naa ca maa. Ta suri yuhu cusanandote chi ñu nu cuandihí quivi —catyí ra Jesús chi ñu.

⁴¹ Cha cuenda cha cahan ra Jesús tyehe caa, ñu Israel quichaha cacahan nyaa ñu chi ra vatyí catyí ra: “Yuhu cuví pan cha quichi ityi andivi”, catyí ra.

⁴² Tyicuan ta quichaha catyí ñu:

—¿Atu ñima ra cuví ra Jesús, sehe ra José vii? Yoó ñohó nuu yo chi sutu ra ta chi sihi ra. ¿Yoso caa cha catyí ra vatyí ityi andivi quichi ra? —catyí ñu.

⁴³ Tyicuan ta ra Jesús catyí ra chi ñu: —Sandihí ndo tuhun cha cahan nyaa ndo.

⁴⁴ Yori maa ñu quichi nu nyaí tatu ñima Suti, ra cha tachí chii, cana chi ñu. Ta cusanandote chi ñu nu cuandihí quivi.

⁴⁵ Nu libru cha catyaa ra profeta Nyoo ta cha naha catyí chi tyehe caa: “Nyoo cusañaha ra chi tandihí ñáyivi.”

Yucuan chaha vatyí ñu cha tyasohó tuhun cahan Nyoo Suti ta cutuhvá ñu tuhun cahan ra, ican ñu vachi nu nyaí.

⁴⁶ Ñima cha cuenda vatyí nyehé ñu chi Nyoo Suti, vatyí yori nyehé chi ra. Soco noo ri mai nyehé chi ra. Ta iquen cuví ra cha quitá nu nyaá ra.

⁴⁷ Cha ndicha catyí chi ndo vatyí ñu chinó iñi chii coo ñu noo ñayivi chaa cha ma naa ca maa.

⁴⁸ Yuhu cuví pan cha chahá cha conyito añima ndo.

⁴⁹ Sutu chahnu ndo chachi ñu maná chiqui ndi cuan, soco suri cachihí ñu.

⁵⁰ Soco yuhu, tuhun pan cha quichi ityi andivi cahín chihin ndo, vatyí nya ñu cachi pan cuan, ma cúvi añima ñu.

⁵¹ Suri mai cuví pan nyitó cha quichi ityi andivi. Yoó cha cachi pan ihya coo ñu tyicuan ri maa. Pan cha cuhva yuhu, ican cuví coño ñuhi.

Ta cuhve ñayivi cha cuenda tandihí ñáyivi iyó siqui ñuhu ñayivi —catyí ra Jesús chi ñu.

⁵² Tyicuan ta ra Israel cuan quichaha candatuhun ra chihin tahan ra ta cacatyí ra:

—¿Yoso caa cuhva ra cha cachi yo coño ñuhu ra?

⁵³ Ta ra Jesús catyí ra:

—Cha ndicha catyí chi ndo, yuhu cuví Rayi cha quichi nya gloria, ta tatu nyoho ta ma cachi ndo coño ñuhi, ta tatu ma coho ndo niñi, ma cuví coo ndo ñayivi chaa.

⁵⁴ Ñu chachí coño ñuhi ta chihí ñu niñi, iyó ñu noo ñayivi chaa cha ma naa ca maa. Ta yuhu cusanandote chi ñu nu cuandihí quivi.

⁵⁵ Vatyí coño ñuhi ican cuví pan cha ndicha vaha cha tahan chi cachi ndo, ta niñi cuví vinu cha ndicha vaha cha tahan chi coho ndo.

⁵⁶ Ñu chachí coño ñuhi ta chihí niñi, ñn ri cuví ñu chihin. Ta mai ñn ri cuví chihin ñu.

⁵⁷ Suti ra tachí chii, Nyoo nyitó cuví ra. Ta yuhu iyé chihin tunyee iñi ra. Ta suri tyicuan caa tucu ñu chachí coño ñuhi, coo ñu chihin tunyee iñi iyó chii.

⁵⁸ Tuhun pan cha quichi ityi andivi cahín. Pan ihya ñima tari maná cha chachi sutu chahnu ndo, vatyí suri chihí ñu. Ñu chachí pan cha cuví coño ñuhi, coo ñu tyicuan ri maa —catyí ra Jesús.

⁵⁹ Ican tuhun ihya sañaha ra Jesús nu ndu ñn ri ñu chichi vehe ñuhu Capernaum.

⁶⁰ Cuaha xaan ñáyivi nyicón chi ra Jesús. Ta cuhva cha chiñi ñu tuhun ihya catyí ñu:

—Tuhun cha cahan ra ihya, yíi xaan cha natin cuenda yo. Yori cuví quichaha tuhun cahán ra —catyí ñu.

⁶¹ Tyicuan ta tuví iñi ra Jesús vatyí ña cuñí ñu naquehen ñu tuhun cuan. Ta ndaca tuhun ra chi ñu:

—¿Atu quiñi cuñí ndo cha cahín tuhun ihya?

⁶² Ta ¿yoso caa sacuvi ndo tatu nyehe ndo chi yuhu Rayíi cha quichi nya gloria nandaa xica tiquí inga chaha ityi nu quite quivi xihna ri?

⁶³ Tatyí Ii Nyoo ican cuví cha chahá ñáyivi chaa. Coño ñuhu, ña tyinyeé chi coo yo ñáyivi cuan. Ta tuhun cha cahín chihin ndo, Tatyí Ii Nyoo cuví ta chahá chi cha conyito aña ndo.

⁶⁴ Soco yihí suhva ndo cha ña chinó iñi ndo chii —tyicuan caa catyí ra Jesús.

Vatyí nya quivi xihna ri ta chitó ra yóo cha ña chinó iñi chi ra ta yóo cha cunaxico tuhun chi ra.

⁶⁵ Ta catyí ra:

—Yucuan chaha catyí chi ndo vatyí yori ñu cuví quichi nu nyaí tatu ñima Nyoo Suti cana chi ñu —catyí ra Jesús.

⁶⁶ Nya ndaha quivi cuan cuaha xaan ñu nyicon chi ra Jesús sandoo ñu chi ra. Ta ña chicá noo ca ñu chihin ra.

⁶⁷ Tyicuan ta ra Jesús ndaca tuhun ra chi ndihí uchi uvi tahan ra chicá noo chihin ra, ta catyí ra:

—¿Atu cuñí tucu nyoho cuhun ndo? —catyí ra chi ra.

⁶⁸ Soco nacahan ra Simón Pedro ta catyí ra:

—Sutu Mañi yuhu, ¿yóo chi cunyi-con ndi? Ta noo tuhun yoho cahún

tuhun ñáyivi cha ma naa ca maa coo ndi.

⁶⁹ Nyuhu chinó iñi ndi, ta ñoho nuu ndi chuun vatyí yoho cuvún ra cuví Cristo Sehe Nyoo nyitó.

⁷⁰ Ta nacahan ra Jesús ta catyí ra:

—¿Atu ñima yuhu nacachí chi ndi uchi uvi nyoho? Ta noo nyoho cuví cuihna —catyí ra.

⁷¹ Tuhun cha cahán ra Jesús ihya, tuhun ra Judas Iscariote sehe ra Simón cuví. Vatyí ra Judas cuví ra cucuhva cuenda chi ra Jesús chi ra xaan iñi chi ra, vasi noo ra cha uchi uvi cuan cuví ra.

7

Nu ña cachinó iñi yañi ra Jesús chi ra

¹ Cha yaha tuhun ihya, ta ra Jesús chicá noo ra ityi Galilea. Ña cuñí ra cuhun ra Judea vatyí ra cacuví nuu chi ñu Israel cuan cacuñí ra cacahñi ra chi ra.

² Ta cha nyaña quivi vico cha sanducahnu ñu Israel ndi cuiya ri. Ta nañi chi vico Tabernáculo.

³ Yucuan chaha yañi ra Jesús catyí ra chi ra:

—Ma ndoun ihya. Cuahan Judea tacuhva vatyí ñu naquehén tuhun cahún cha nyicú yucuan nyehe ñu tyiño cha sacuvún.

⁴ Vatyí tatu cuñí yo cha cohon nuu ñáyivi chi yo, ma xehe ri sacuví yo cha sacuví yo. Ta yoho tatu ndicha cha sacuvún tuhun ihya, sacuvi nuu tandihí ñáyivi —cacatyí yañi ra chi ra.

⁵ Tyicuan caa cacatyí ra vatyí ni yañi ra ta ña chinó iñi ra chi ra.

⁶ Tyicuan ta ra Jesús catyí ra chi ra: —Ta chaa ca cuhva cha cuhun yuhu. Soco nyoho savahri quivi cuví cuhun ndo.

⁷ Vatyí ñáyivi ña cutasi cuñí ñu nyehé ñu chi ndo, soco chi yuhu tasi cuñí ñu nyehé ñu cha cuenda vatyí cachi ri catyí chi ñu vatyí ña vaha cha nyacuví ñu.

⁸ Cuahan nyoho vico cuan. Yuhu ma cuhin vatyí ta chaa ca cuhva cha tahan chi cuhin —catyí ra.

⁹ Yaha cuan ta ndoo ra nya Galilea.

Nu ñohó ra Jesús vico Tabernáculo

10 Cha yaha cuahan coyo yañi ra Jesús, cuahan tucu maa ra vico cuan, soco xehe ri.

11 Ta ra cacuví nuu chi ñu Israel cananducú ra chi ra vico cuan, ta cacatyí ra chi ra tahan ra:

—¿Nya nyaá ra cuan? —catyí ra.

12 Ta ñáyivi ñohó vico cuan cacahán ñu tuhun ra. Ta yihí ñu catyí ñu: “Noo ra vaha cuví ra.” Ta inga ñu catyí ñu: “Ña vaha ra, sandaví ñaha ra chi ñáyivi”, catyí ñu.

13 Soco yori cahán ndichin tuhun ra cha cuenda cha yuhví ñu chi ra cacuví nuu cuan.

14 Cha cusava iyó vico ta quihví ra Jesús chichi vehe ñuhu cahnu quichaha cahan ra nuu ñáyivi.

15 Ta ra cacuví nuu cuan iyó cacuñi ra ta cacatyí ra chi ra tahan ra:

—¿Yoso caa chitó ra ihya ta ña sacuahá ra? —catyí ra.

16 Ta nacahan ra Jesús ta catyí ra:

—Tuhun cha sañahí, ñima cha cuenda mai cuví, soco cuenda ra cha tachí chii cuví.

17 Tatu yihí nyoho cha cuñi ndo sacuvi ndo cuhva cuñi Nyoo, cua coto ndo vatyí cuenda Nyoo sacote ta ñima cha cuenda mai.

18 Ra cha cahán cuenda maa, cahán ra na sacahnu ñáyivi chi ra. Soco ra nanducú cha sacahnu ñu chi Nyoo, ra cha tachí chi ra, ican ra cuan cahán cha ndicha. Ta ñahri cha sandaví ñaha ra.

19 ¿Atu ña ndicha vatyí ra Moisés chaha ley chi ndo? Soco ni noo nyoho ña quichahá ndo ley cuan. ¿Ñáá tuhun cuñi ndo cahni ndo chii? —catyí ra.

20 Ta nacahan ñáyivi ta catyí ñu chi ra:

—Noo tatyí ña vaha yihí chi yoho. Yori cuñi cahni chuun —catyí ñu chi ra.

21 Ta catyí ra Jesús:

—Cha catyí noo milagru cha sacuvi quivi nyitatu yo, iyo xaan cuñi nyoho.

22 Soco ra Moisés catyí ra chi ndo vatyí sacuvi ndo costumbre circuncisión. Vasi ñima ra quichaha chihin

tuhun cuan, soco ñáyivi chi ra ityi chata, casacuvi tyicuan caa. Yucuan chaha nyoho sacuví ndo costumbre cuan vasi tahan chi quivi nyitatu yo.

23 Ta vityin, vaha tatu cha cuenda cha ña cuñi ndo nacahnu ndo ley ra Moisés sacuvi ndo tyicuan caa vasi quivi nyitatu yo tahan chi. Soco tatu tyicuan caa sacuvi ndo, ¿ñáá tuhun cha cuxaan ndo chii cha cuenda vatyí sanduvahí nani coño ñuhu noo ra cuan quivi nyitatu yo?

24 Ma tyaa ndo cuatyí siqui ñáyivi tatu ña chitó vaha ndo ñáá cha sacuvi ñu. Cuatu ndo nya nyehe vaha ndo, tyicuan ta cucoto ndo yoso caa sacutuñi ndo chihin cha ndaa ta chihin cha ndicha vaha.

Nu cahán ra Jesús tuhun maa ra

25 Tyicuan ta suhva ñu iyó Jerusalén, quichaha ndaca tuhun ñu:

—¿Atu ñima chi ra ihya canducu ra cha cahni ra?

26 Ta maa ra nanyaá cuan cahán ra nuu ñáyivi. Ta yori maa catyí ñáá cha catyí chi ra. ¿O vasi ca chinó tucu iñi ra cacuví nuu vatyí ra ihya ra Cristo ra cuvi rey cha saquichi Nyoo cuví ra?

27 Soco yoó chitó yo nya quitá ra ihya. Soco quivi quichi ra Cristo yori coto nya ityi quichi ra cuan —catyí ñu.

28 Chitó ra Jesús tuhun cha ndatuhún ñu ihya cuhva cha sañahá ra chichi vehe ñuhu. Ta ñihi cahán ra ta catyí ra:

—¿An ñohó nuu ndo chii ta chitó ndo nya ityi quichi, cuñi maa ndo! Soco yuhu vachí soco ñima cuenda mai. Vachí cuenda ra cha tachí chii, ra cha cuví cha ndicha. Ta nyoho ña ñohó nuu ndo chi ra.

29 Yuhu ñohó nui chi ra vatyí cuenda ra vachi, ta maa ra tachí chii —catyí ra Jesús.

30 Tyicuan ta cuñi ñu tyihi ñu chi ra chichi vehe caa. Soco ni noo ñu ña tñin ñu chi ra cha cuenda vatyí ta chaa ca quivi cha tahan chi tñin ra chi ra.

31 Soco cuaha xaan ñu chinó iñi chi ra. Ta catyí ñu:

—Ican ra ihya cuví Cristo. ¿Atu cuaha ca milagru sacuvi inga ra tatu quichi ra? —catyi ñu.

Nu tachi ra cuví fariseo policia cuquehen chi ra Jesús cohon ra vehe caa

³² Cha chiñi ra fariseo cha cahán ñáyivi tuhun ra Jesús, maa ra ta ra cacuví nuu chi tata sutu catachi ra chi policia cuenda vehe ñuhu cuan cuquehen ra chi ra tyi cohon ra vehe caa.

³³ Tyicuan ta ra Jesús catyi ra:

—Cunyai chihin ndo suhva ri ca quivi. Yahá cuan ta cunuhi nu nyaá ra cha tachi chii.

³⁴ Nyoho cunanducu ndo chii. Soco ma nañihi ndo chii. Vatyí ma cuvi cuhun ndo nu cuacunyai —catyi ra Jesús.

³⁵ Tyicuan ta quichaha candaca tuhun ra cacuví nuu chi ñu Israel chi ra tahan ra:

—¿Nya cuhun ra ihya cha ma nañihi yo chi ra? ¿O cuhun ra nu nyaá ra Israel cha ca iyó ñuu Grecia vatyí sañaha ra chi ñu iyó yucuan, vaha?

³⁶ ¿Ñáá cha cuñi chi catyi tuhun cahan ra chihin yo? Vatyí catyi ra: “Cuananducu ndo chii soco ma nañihi ndo chii. Vatyí ma cuvi cuhun ndo nu cucunyai” —tyicuan caa cacuví yuhu ra tuhun ra.

Ñu chinó iñi chi Nyoo cucohon Tatyí li ra aña ñu

³⁷ Quivi nu ndihi chiyo vico, yucuan quivi cha niñi ca. Ta quivi cuan ndicuita ra Jesús ta ñihi cahán ra ta catyi ra:

—Tatu nya noo ndo ityi aña ndo tuhun Nyoo, ñaha ndo ta nachineo iñi ndo chii.

³⁸ Ñu cha chinó iñi chii, chichi aña ñu cucono tari noo yuvi ndutya cha nyitó, tari cuhva catyi nu tutu Nyoo —catyi ra Jesús.

³⁹ Soco chihin cuan cuñi ra catyi ra vatyí ñu chinó iñi chi ra cunaquehen ñu Tatyí li Nyoo, vatyí quivi cuan ta quichi ca Tatyí li Nyoo vatyí ra Jesús, ta cunuhu ca ra nya gloria nu cusacahnu Sutu ra chi ra.

Nu cusin ñáyivi cha ña tahan iñi tuhun cahan ra

⁴⁰ Suhva ñáyivi cha chiñi ñu tuhun ihya, catyi ñu:

—Ndicha vatyí ra ihya profeta Nyoo cha nyaá quichi cuví ra —catyi ñu.

⁴¹ Ta inga ñu catyi ñu:

—Ican ra cuví Cristo —catyi ñu.

Soco inga ñu catyi ñu:

—¿Yoso caa cha ra Galilea cuví ra Cristo?

⁴² Vatyí nu tutu Nyoo catyi chi vatyí ra Cristo cucuvi ra ñáyivi vachi tata rey David ta ra ñuu Belén cucuvi ra tari ra David —catyi ñu.

⁴³ Tyicuan ta ñáyivi cuan canatahvi sava ñu cha cuenda ra Jesús.

⁴⁴ Yihí ñu cuñi ñu quehen ñu chi ra cutyíhi ñu chi ra chichi vehe caa. Soco yori tin chi ra.

Ra cacuví nuu vehe ñuhu ña cachinó iñi ra chi ra Jesús

⁴⁵ Tyicuan ta policia vehe ñuhu cahnú cuan, cuanuhu coyo ra nu nyicú ra fariseo ta ra cuví nuu chi tata sutu. Ta candaca tuhun ra chi policia cuan ta cacatyí ra:

—¿Ñáá tuhun ña quehen ndo chi ra?

⁴⁶ Ta policia cuan cacatyí ra:

—¡Ni noo chaha ta ni yori tuhva cahan tari cahán ra cuan! —cacatyí ra.

⁴⁷ Tyicuan ta ra fariseo catyi ra chi policia cuan:

—¿Atu sandaví ñaha ndihi ra chi nyoho ñandihí?

⁴⁸ ¿Nyehé ndo vatyí ni noo ra cuví nuu chi ndi cha cuví ndi fariseo ta ña chinó iñi chi ra cuan?

⁴⁹ Soco maa ri ñáyivi cha ña chitó nyicón chi ra. Soco ña vaha ñu nuu Nyoo —catyi ra.

⁵⁰ Tyicuan ta ra Nicodemo, ra cha chahan nu nyaá ra Jesús cha cha caaa, cuví ra noo ra fariseo, ta catyi ra chi ra:

⁵¹ —Catyí ley vatyí ma cuvi tachi tuñi yo chi noo ra tatu ma cuiñi xihna yo tuhun cahan ra, tacuhva coto yo ñáá cha sacuvi ra —catyi ra chi ra.

⁵² Tyicuan ta canacahan ra ta cacatyí ra chi ra:

—¿Atu suri ra Galilea cuví tucu yoho? Sacuaha nu tutu Nyoo ta nyehun, vatyí ni noo ra chahá cuenda tuhun cahán Nyoo ta ña nyaá chi cha quichi ra ityi Galilea —cacatyí ra.

Ñaha síhi cha natuvi chihin rayi ta iyó yí ña

⁵³ Tyicuan ta tahan tahan ra cuanuhu coyo ra vehe ra.

8

¹ Soco ra Jesús cuahan ra yucu cha nañi Olivo.

² Ta cha inga quivi cuhva cha vachi cundichin, cuahan tucu ra inga chaha vehe ñuhu cahnu. Ta tandihi ñáyivi tuhva ñu nu nyaá ra. Ta maa ra chicunyaá ra ta quichaha cahan ra nuu ñu.

³ Tyicuan ta ra sacuahá cuenda ley ta ra cuví fariseo chaá coyo ra chihin noo ñaha iyó yí vatyí natiin ra chi ña nu cuatyí ña chihin inga rayi. Ta cuatyaa ra chi ña mahñu ñáyivi nyicú cuan.

⁴ Ta quichaha cacatyí ra chi ra Jesús:

—Maestro, ñaha síhi ihya natiin ndi chi ña nu cuatyí ña chihin inga rayi.

⁵ Ta ley cha tyaa ra Moisés catyí chi vatyí nacahñi yo chihin yuu chi ñusihi cha sacuví tyehe caa. ¿Ta yoho, yoso caa catyun vityin? —catyí ra chi ra.

⁶ Cacatyí ra tuhun ihya chi ra Jesús cha cuenda cha nducú nyehe ra chi ra tacuhva tyaa ra noo cuatyí síqui ra. Tyicuan ta ra Jesús chicunyaá tyayii ra nu ñuhú ta quichaha tyaa ra letra nu ñuhú chihin nundaha ra.

⁷ Soco vatyí candacá tuhun ca ra chi ra, tyicuan ta nicuinanyaá ra ta cacatyí ra chi ra:

—Xihna ca nyoho cha ñahri cuatyí ndo quehen ndo yuu ta cañi ndo chi ña —catyí ra chi ra.

⁸ Ta nicunyaá tucu ra ta quichaha sañihi ra tyaa ra letra nu ñuhú.

⁹ Soco maa ra cha cachiñi ra tuhun ihya, tuvi iñi ra tyi iyó tucu cuatyí maa ra. Ta quichaha quita coyo

tahan tahan ri ra, quichaha xihna ca ra chahnu. Ta cuhva cha ndihi ra quita coyo ta ndoo noo tuhun ca maa ra Jesús chihin ñaha síhi cuan mahñu nu nyicu ñáyivi.

¹⁰ Tyicuan ta nicuinanyaá ra Jesús ta nyehe ra tyi cha cuahan coyo ra cuan ta ndoo noo tuhun ri ca ñaha. Tyicuan ta cacatyí ra chi ña:

—¿Nya nyaá ra tyaa cuatyí sicun vityin? ¿Yori ni minoo ca ra cuñi cahñi chuun? —catyí ra chi ña.

¹¹ Ta nacahan ña ta cacatyí ña:

—Ni nonga ra, Tata.

Tyicuan ta ra Jesús cacatyí ra chi ña:

—Ni yuhu ta ma cahñi chuun. Cuahan vityin. Ta ma sacuvi con cuatyí —catyí ra chi ña.

Ra Jesús cuví cha ndichin cha sandichin añima ñáyivi

¹² Tyicuan ta cahan tucu ra Jesús nuu ñáyivi inga chaha, ta cacatyí ra chi ñu:

—Yuhu cuví ra cha sandichin añima ñáyivi iyó síqui ñuhu ñáyivi. Yóo cha nyicón chii, coo ñu noo ñáyivi cha nu ndichin. Ta ma caca noo maa ñu nu ñaa iñi —catyí ra Jesús chi ñu.

¹³ Tyicuan ta ra cacuví fariseo cacatyí ra chi ra:

—Yoho, cahún tumañi iñi cuenda maun. Ta yucuan ña ndicha —catyí ra chi ra.

¹⁴ Nacahan ra Jesús ta cacatyí ra:

—Vasi suri mai cahín tumañi iñi cuende, soco ndicha cha cahin vatyí yuhu chité nya ityi quichi ta nya ityi cuahín. Soco nyoho ña chító ndo nya ityi quichi ni nya ityi cuahín.

¹⁵ Nyoho vatyin xaan cahan ndo cha caa ñáyivi. Soco yuhu, yori chi cahin cha caa.

¹⁶ Soco tatu cacatyí cha caa ñáyivi, cacatyí cha ndicha. Vatyí ñima noo ri mai nyehí, soco Suti ra cha tachi chii, ican ra nyehé chihin.

¹⁷ Nu ley nyoho nyaá vatyí tatu uvi ra chaha cha ndaa, cuñi chi chinó iñi yo cha ndaa cuan.

¹⁸ Ta vityin vaha, suri mai cuví cha ndaa cuenda mai. Ta Suti, ra cha

tachí chii, cuví inga cha ndaa —catyí ra Jesús chi ra.

¹⁹ Tyicuan ta candacā tuhun ra chi ra:

—¿Nya nyaá sutun?

Ta ra Jesús catyí ra:

—Nyoho ña ñohó nuu ndo chi yuhu. Ta ni chi Suti ña ñohó nuu ndo. Tyehe ta ñohó nuu ndo chii, cohon nuu ndo chi Suti —catyí ra.

²⁰ Tuhun ihya cahan ra Jesús cha ni ri ca cha sañahá ra chichi vehe ñuhu cahnu, nu nyaá caja nu tyihí ñáyiví xuhun. Soco yori tyihí chi ra vehe caa, vatyí ta chaa ca quiví cha tahán chi cohon ra.

“Nu cuhun yuhu ma cuvi cuhun ndo”, catyí ra Cristo

²¹ Ra Jesús catyí ra chi ra cacuvi fariseo inga chaha:

—Yuhu cuhin, ta nyoho cunanducu ndo chii, soco cucúvi ndo ta cundoo cuatyí ndo síqui ndo. Nu cuahan yuhu, nyoho ma cuvi cuhun ndo —catyí ra Jesús chi ñu.

²² Tyicuan ta ra cacuví nuu chi ñu Israel cacatyí ra:

—¿Atu cucahñi maa ra chi ra? vatyí catyí ra vatyí ma cuvi cuhun yo nu cuahan ra —cacatyí ra.

²³ Tyicuan ta ra Jesús catyí ra:

—Nyoho ra cuenda ityi yuvi ihya cuví ndo. Soco yuhu ra cuenda ityi síqui cuví. Nyoho ñu ñuhu ñáyiví ihya cuví ndo. Soco yuhu ñima ra ñuhu ñáyiví ihya cuví.

²⁴ Yucuan chaha catyí chi ndo vatyí cucúvi ndo ta cundoo cuatyí ndo síqui ndo. Vatyí tatu ña chinó ñni ndo cha yuhu cuví ra tinyaá cuatyí ndo, cundoo cuatyí ndo síqui ndo quiví cúvi ndo —catyí ra Jesús chi ra.

²⁵ Tyicuan ta quichaha candacā tuhun ra chi ra, ta catyí ra:

—¿Yóó ra cuví yoho?

Ta ra Jesús nacahan ra ta catyí ra:

—Cha yaha catyí chi ndo nyata quiví xihna ri.

²⁶ Cuaha xaan ca cha nyaá cha catyí chi ndo, ta cuaha xaan ca nyaá catyí cha caá ndo. Soco tuhun cha catyí yuhu chi ñáyiví iyó síqui ñuhu ñáyiví,

tuhun cha chiñi cha cahán ra cha tachí chii cuví. Ta maa ra cahán ra cha ndicha —catyí ra.

²⁷ Soco maa ra cacuví nuu chi ñu Israel ña cutuñi ñni ra vatyí tuhun Nyoo Sutu yo cahán ra chihin ra.

²⁸ Yucuan chaha catyí ra chi ra:

—Cutyaa ndo chi ra cuví Rayii cha quichi nya gloria nu cruzi. Tyicuan ta cunacoto ndo vatyí yuhu cuví, ta cucoto ndo vatyí tyiño sahí ñima cha cuenda mai sacuví, soco cahán cha sañahá Suti chii.

²⁹ Vatyí Suti, ra cha tachí chii, nyaá ra chihin. Ta ña sandoó ra chii cha maa ri mai. Vatyí yuhu tyicuan ri sacuví cuhva cuñi ra —catyí ra Jesús.

³⁰ Cha cahán ra Jesús tuhun ihya, cuaha ra quichaha chino ñni ra chi ra.

Ñu cha cuví Sehe Nyoo ta ñu cha sacuví cha quiñi caa

³¹ Tyicuan ta catyí ra Jesús chi ra cacuvi nuu chi ñu Israel cha chinó ñni chi ra:

—Tatu nyoho ta sañihi ca ndo sacuvi ndo cuhva sañahí chi ndo, cuchaa ndo cuví ndo noo ñu yihí cuende.

³² Ta cucoto ndo cha ndicha. Ta chihin cha ndicha cuan cundoo ndo libre —catyí ra.

³³ Ta canacahán ra ta catyí ra:

—Nyuhu ñáyiví vachi tata ra Abraham cuví ndi. Ta ni noo chaha ta cuvi ca ndi musu chi ni noo ñáyiví. ¿Yoso caa cha catyí yoho tyi ndoo ndi libre? —catyí ra chi ra.

³⁴ Ta ra Jesús catyí ra:

—Cha ndicha catyí chi ndo vatyí tandihí ñu sacuví cha quiñi caa, musu cuenda cha quiñi caa cuví ñu.

³⁵ Noo musu ña nyaá ra vehe chitoho ra tyicuan ri. Soco noo sehe ra cuví chitoho cuan, nyaá ra tyicuan ri chihin sutu ra.

³⁶ Yucuan chaha tatu yuhu cha cuví Sehe Nyoo ta tave chi ndo ndaha ra ña vaha, ndicha cuii cucoo ndo libre.

³⁷ Cha chité vatyí ñáyiví chi ra Abraham cuví chi ndo. Soco yihí ndo cuñi ndo cahñi ndo chii, vatyí ña tñn cuenda ndo tuhun cahin.

38 Yuhu cahín cha sañahá Suti chii. Ta nyoho sacuví ndo cha catyí sutu ndo chi ndo —catyí ra chi ra.

39 Ta canacahan ra ta catyí ra:

—Sutu ndi cuví chi ra Abraham —catyí ra.

Soco ra Jesús catyí ra chi ra:

—Tyehe ta ndicha cha sehe ra Abraham cuví chi ndo, sacuví ndo cha sacuví ra.

40 Soco nyoho, vasi catyí chi ndo cha ndicha cha sañahá Nyoo chii, nyoho cuñí ndo cahñi ndo chii. ¡Ra Abraham ña sacuví ra cha tyicuan caa!

41 Nyoho tari sacuví sutu ndo, sacuví ndo —catyí ra chi ra.

Tyicuan ta nacahan ra ta catyí ra:

—Nyuhu ñima sehe ndahvi ñu cuví chi ndi. Iyó noo ri sutu ndi ta ican ra cuví Nyoo —catyí ñu.

42 Tyicuan ta ra Jesús catyí ra:

—Tyehe ta ndicha cha Nyoo cuví sutu ndo, nyoho cuñí ndo chii. Vatyí yuhu quite nu nyaá ra ta chaj nyehe. Ña vachí cuenda mai, soco Nyoo tachí chii.

43 ¿Ñáá tuhun cha ña cutuñí iñi ndo tuhun cha catyí chi ndo? Cha cuenda tyi ña cuñí ndo tyasohó ndo tuhun cahín.

44 Cuihna ican ra cuví sutu ndo. Ta sehe ra cuví chi ndo. Ta cuñí ndo sacuví ndo cuhva cuñí ra. Ra chahñi ñáyivi cuví cuihna nyata quivi xihna ri. Ni noo chaha ña sacuví ra cha ndicha. Ta ni noo chaha ña cahán ra cha ndicha. Cuhva cha cahán ra cuendu, cahán ra cuhva caá ra, vatyí cuendu ra. Ta sutu ñu cuendu cuví chi ra.

45 Ta yuhu vatyí cahín cha ndicha, ña chinó iñi ndo chii.

46 ¿Nya noo nyoho cuví catyí ndo vatyí yuhu iyó noo cuatyí? Ni noo ndo. Ta cha tyicuan caa cahín cha ndicha, ¿ñáá tuhun cha ña chinó iñi ndo chii?

47 Ñu cuenda Nyoo tyasohó ñu tuhun cahán Nyoo. Soco vatyí nyoho ñima ñu cuenda Nyoo cuví ndo, yucuan chaha ña cuñí ndo tyasoho ndo tuhun cahín —catyí ra Jesús.

Ra Cristo, nyata nicumañi coo ra Abraham, ta cha iyó ra

48 Tyicuan ta ra cacuvi nuu chi ñu Israel cacatyí ra chi ra:

—¿Atu ña ndicha vatyí yoho ra ñuu Samaria cuvún, ta ñohó noo tatyí ña vaha chuun? —cacatyí ra chi ra.

49 Ta nacahan ra Jesús ta catyí ra:

—Ñahri tatyí ña vaha ñohó chi yuhu. Chi Suti sacahní. Ta nyoho cahán ña vaha ndo siqui.

50 Yuhu ña nanduquí nu sacahnu ñáyivi chii, soco iyó noo ra nanducú cha sacahnu ñu chii. Ta maa ra cunyehe ra tatu sacahnú ndo chii.

51 Cha ndicha catyí vatyí ñu quichahá tuhun cahín ma chaa tuhun chihi añima ñu —catyí ra Jesús chi ra.

52 Tyicuan ta ra Israel cuan canacahan ra ta catyí ra:

—Vityin chitó vaha ndi vatyí yihí noo tatyí ña vaha chuun. Vatyí ra Abraham ta tandihí ra cuví profeta Nyoo cachihí ra. Ta yoho catyún vatyí ñu quichahá tuhun cahún ma cúvi maa ñu.

53 ¿Atu cahnu ca ra cuví yoho ican saha sutu ndi ra Abraham? Maa ra chihí ra ta ra cuví profeta Nyoo ñandihí. ¿Yóó ra cuví yoho cuñí maun? —catyí ra chi ra.

54 Ta nacahan ra Jesús ta catyí ra:

—Tatu suri mai sacahní chii, ñahri maa vale cuan. Soco ra sacahnú chii, ican cuví Suti. Ta suri maa ra cuví cha catyí nyoho tyi Nyoo cuenda ndo cuví chi ra.

55 Soco nyoho ña ñohó nuu ndo chi ra. Yuhu, ñohó nui chi ra. Ta tatu catyí tyi ña ñohó nui chi ra, cuví noo ra cuendu tari nyoho. Soco yuhu ndicha cha ñohó nui chi ra, ta quichahí tuhun cahán ra.

56 Ra Abraham sutu chahnu ndo cusii xaan cuñi ra vatyí cunyehe ra quivi quichi yuhu siqui ñuhu ñáyivi. Ta nyehe ra ta cusii xaan cuñi ra —catyí ra Jesús chi ñu.

57 Tyicuan ta ra Israel cuan cacatyí ra chi ra Jesús:

—Ni uvi xico uchi cuiya ta quita con, ta catyún tyi nyehun chi ra Abraham.

⁵⁸ Ta ra Jesús nacahan ra ta catyí ra:

—Cha ndicha catyí chi ndo vatyí nyata ni cumañi coo ra Abraham ta cha iyó yuhu —catyí ra Jesús chi ra.

⁵⁹ Tyicuan ta quehen ra yuu vatyí cañi ra chi ra Jesús. Soco maa ra quihv̄i xehe ra, ta quita ra chichi vehe ñuhu cuan. Ta yah̄a ra mah̄nu ra ta cuahan ra.

9

Nu sanduvah̄a ra Jesús chi noo ra cha cuaa nyata cacu

¹ Cuhva cha yah̄a ra Jesús noo nu yah̄a ra, nyeh̄e ra chi noo ra cha cuaa nyata cacu.

² Ta quichahá ndaca tuhun ra cachicá noo chihin ra Jesús chi ra:

—Maestro, ¿ñáá tuhun cha cacu cuaa ra ihya? ¿Atu cha cuenda cuatyí sihi ra ta sutu ra, o cha cuenda cuatyí maa ra? —cacatyí ra chi ra.

³ Ta ra Jesús nacahan ra ta catyí ra:

—Ñima cuatyí maa ra, ta ni ñima cuatyí sihi ra ta sutu ra. Soco cha cuenda vatyí cuví sañaha Nyoo tun-yeé iñi ra chihin ra.

⁴ Cha ni ri ca cha ñicah̄nu, cuñi chi cha sacuvi tyiño ra cha tach̄i chii. Vatyí vachi cha cuaa cha ma cuvi ca saha tyiño yo.

⁵ Cha ni ri ca cha nyaí siqui ñuhu ñayiv̄i ihya, ñuhu ndichin cuenda ñáyiv̄i iyó siqui ñuhu ñayiv̄i cuví.

⁶ Cha yah̄a cha catyí ra Jesús tuhun ihya, ta tyicu si ra nu ñuhú. Ta savah̄a ra chiin nyahyu chihin si ra ta tyāa ra chiti nuu ra cuaa cuan.

⁷ Tyicuan ta catyí ra chi ra:

—Cuahan cuanacatyá nuun nya tanque Siloé cuan. —Sivi cuan cuñi chi catyí: “Tach̄i Chuun.”

Tyicuan caa ta ra cuaa cuan chahan ra chinacatyá ra nuu ra. Ta cuhva cha nachāa ra, cha nyehe ra.

⁸ Tyicuan ta ñu nyicú yatyin yuvehe ra, ta ñu cha nyeh̄e chi ra cha cucuāa ra ta cayāa ra, catyí ñu:

—¿Atu ñima ra ihya cuví cha tuhva chinyaa chican caridaa? —catyí ñu.

⁹ Yihí ñu catyí ñu:

—Ican ra.

Inga ñu catyí ñu:

—Ñima ra cuví ra, soco ndacú xaan ra chi ra.

Soco maa ra catyí ra:

—Ican yuhu cuví —catyí ra.

¹⁰ Tyicuan ta quichaha candaca tuhun ñu chi ra:

—¿Ta yoso caa cha cuví nyehun vityin? —catyí ñu.

¹¹ Ta catyí ra:

—Ra cha nañi Jesús cuan, ican savah̄a nyahyu ta tyāa ra chiti nui ta catyí ra chii: “Cuahan nya tanque Siloé ta nacatyon nuun.” Tyicuan ta chahin. Ta cha yah̄a nacatye nui ta nanyehi —catyí ra chi ñu.

¹² Tyicuan ta quichahá ndaca tuhun ñu chi ra:

—¿Nya nyaá ra cuan vityin?

Ta maa ra catyí ra:

—Ña chité —catyí ra chi ñu.

Nu casanah̄a ra cuví fariseo chi ra cha cucuāa ta nanyeh̄e

¹³ Tyicuan ta chinyac̄a ñu chi ra cha cucuāa cuan nuu ra cuví fariseo.

¹⁴ Vatyí quiv̄i cha savah̄a ra Jesús nyahyu ta sanduvah̄a ra chi ra cha cucuāa cuan, quiv̄i nyitatú yo cuví.

¹⁵ Yucuan chaha ra fariseo candac̄a tuhun tucu ra chi ra yoso caa cha vatyí nanyehé ra. Ta maa ra catyí ra:

—Tyāa ra nyahyu chiti nui, ta nacatye ta vityin ndichin nyehí —catyí ra chi ra.

¹⁶ Tyicuan ta suhva ra fariseo cacatyí ra:

—Ra cha sacuvi tyehe caa ñima ra cuenda Nyoo cuví ra, vatyí ña sahá ra ñáyiv̄i quiv̄i nyitatú yo —cacatyí ra.

Soco inga ra cacatyí ra:

—¿Yoso caa cha cuví sacuvi ra milagru ihya tatu ra iyó cuatyí cuví ra? —catyí ra.

Ta siin siin cha cacahan ra. Ta cacusiin ra.

¹⁷ Ta candac̄a tuhun tucu ra inga chaha chi ra cha cucuāa cuan, ta catyí ra chi ra:

—¿Ta yoho, ñáá catyún cuenda ra cha sanduvahā chiti nuun? —catyí ra.

Ta nacahan ra ta catyí ra:

—Yuhu catyí vatyí noo profeta cuenda Nyoo cuví ra —catyí ra.

¹⁸ Soco ra cacuví nuu chi ñu Israel ña cuñí ra chino iñi ra cha cucuaā ra cuan ta vityin nyehé ra. Ta nyacua nya cha cacana ra chi sihi ra ta chi sutu ra cha nduvahā cuan.

¹⁹ Ta candaca tuhun ra chi ñu, ta catyí ra:

—¿Atu ican ra ihya cha cuví sehe ndo cha catyí ndo tyi cuaá ra ta cacu ra? ¿Yoso caa cha cuví nyehe ra vityin? —catyí ra.

²⁰ Ta nacahan sutu ra ta sihi ra ta catyí ñu:

—Chitó ndi vatyí ican ra ihya cuví sehe ndi. Ta cuaá ra nyata cacu ra.

²¹ Soco ña chitó ndi ñáá tuhun cha cuví nyehe ra vityin. Ta ni ña chitó ndi yóo cha sanduvahā chiti nuu ra. Ndaça tuhun ndo chi maa ra. Cha iyó cuiya ra. Ta cuví nacatyí maa ra chi ndo —catyí ñu chi ra.

²² Sutú ra sihi ra catyí ñu tyehe caa cha cuenda cha yuhví ñu chi ra cacuví nuu chi ñu Israel, vatyí cha catyihí tahan ra tuhun vatyí cutava ñehe ra chi ñu vehe ñuhu, yóo ri ñu cha catyí vatyí ra Jesús cuví Cristo.

²³ Yucuan chaha catyí ñu: “Cha ñihi ra. Ndaça tuhun ndo chi maa ra.”

²⁴ Tyicuan ta canacana tucu ra chi ra cha cucuaā cuan inga chaha. Ta cacatyí ra chi ra:

—Chihin nuu Nyoo catyí cha ndicha chi ndi. Vatyí nyuhu chitó ndi tyi rayi cuan, ra iyó cuatyí cuví ra —cacatyí ra.

²⁵ Tyicuan ta nacahan ra cha cucuaā cuan ta catyí ra:

—Yuhu ña chité tatu ra iyó cuatyí cuví ra, o ñima. Soco noo ri cha chité vatyí yuhu cucuaā, ta vityin ndichin nyehí —catyí ra.

²⁶ Ta candaca tuhun tucu ra chi ra inga chaha ta catyí ra:

—¿Ñáá cha sacuví ra chuun? ¿Yoso caa sacuví ra ta nanyehún? —cacatyí ra chi ra.

²⁷ Ta catyí ra:

—Cha catyí chi ndo, ta ña quichahá ndo chii. ¿Ñáá tuhun cha cuñí ndo cha catyí inga chaha? ¿Atu cuñí tucu nyoho cunyicon ndo chi ra?

²⁸ Tyicuan ta cacahan ra chi ra, ta catyí ra:

—Yoho yihún cuenda ra, socio nyuhu cuenda ra Moisés yihí ndi.

²⁹ Nyuhu chitó ndi tyi Nyoo cahan chihin ra Moisés. Soco ra cuan, ña chitó ndi nya quitā ra —cacatyí ra.

³⁰ Tyicuan ta nacahan ra cucuaā cuan ta catyí ra:

—¡Ñana vaha cha cuví ihya! Nyoho ña chitó ndo nya quitā ra, ta chi yuhu sananyehe ra.

³¹ Chitó vaha yo vatyí Nyoo ña tya-sohó ra nu chicán ra iyó cuatyí. Soco ra cha sacahnú chi ra ta sacuví cuhva cuñí ra, tyasohó Nyoo nu chicán ra cuan.

³² Ni noo chaha ta cuiñi ca yo vatyí iyó noo ra sananyehe chi noo ra cuaá nyata cacu.

³³ Tyehe ta ra ihya ta ñima cuenda Nyoo vachí ra, ñahri cha cuví sacuvi ra —catyí ra chi ra.

³⁴ Tyicuan ta cacatyí ra chi ra:

—Yoho ra iyó cuatyí cuvún nyata cacun. ¿Ta cuñún sañahun chi nyuhu? —cacatyí ra.

Ta catavā ñehe ra chi ra vehe ñuhu.

Ñu cha ñahri tuhun Nyoo caa añima tari cha cuaa ñu

³⁵ Ra Jesús chitó ra vatyí catavā ñehe ra chi ra cucuaā cuan vehe ñuhu. Ta cuhva cha nañihí ra chi ra ta catyí ra chi ra:

—¿Atu chinó iñi yoho chi Rayi cha quichi nya gloria? —catyí ra chi ra.

³⁶ Ta nacahan ra ta catyí ra:

—Tata, catyí chii, yóo ra cuví ra vatyí chino iñi chi ra —catyí ra chi ra.

³⁷ Ta ra Jesús catyí ra:

—Cha nyehun chi ra. Ta ican ra ndatuhún chuhun —catyí ra chi ra.

³⁸ Tyicuan ta chicuiñi chiti ra chaha ra Jesús ta catyí ra chi ra:

—Chinó iñi chuun, Sutu Mañi yuhu
—catyí ra chi ra Jesús.

³⁹ Ta ra Jesús catyí ra:

—Yuhu vachí vatyí catyí cha caá
añima ñáyivi iyó siqui ñuhu ñayivi
ihya. Vatyí ñu cuaa, ñu ña chitó
tuhun Nyoo cunanyehe ñu vatyí cu-
cava tuhun Nyoo añima ñu. Ta ñu cuñí
maa tyi ndichin nyehe tyi catyí ñu tyi
chitó ñu tuhun Nyoo, coto ñu tyi cuaa
ñu tyi ña chinó iñi ñu chii —catyí ra
Jesús.

⁴⁰ Tyicuan ta suhva ra cuví fariseo
cha nyicú yucuan chiñi ra cha cahan
ra Jesús, ta catyí ra chi ra:

—¿Atu cuaa tucu nyuhu ñandihí?
—catyí ra.

⁴¹ Tyicuan ta catyí ra Jesús chi ra:

—Tyehe ta cuaa nyoho, nicohón
nuu ndo tyi chiñuhú tuhun Nyoo chi
ndo, ta ma coo cuatyí ndo. Soco vatyí
catyí ndo tyi nyehé ndo ta chitó ndo,
yucuan chaha ndoó cuatyí siqui ndo
—catyí ra chi ra.

10

*Mbee sana Nyoo cuví ñáyivi yihí
cuenda ra, ta ñohó nuu ñu chi ra cha
tachí Nyoo vatyí sahá cumi ra chi ñu*

¹ Cahán ca ra Jesús ta catyí ra:

—Cha ndicha catyí chi ndo, tatu
noo ra cuaquihví chichi noo chacu
mbee, ta cha nuu cha quihví ra yuhu
chacu, quihví ra inga ityi, ra suhu
cuví ra.

² Soco ra quihví ityi yuhu chacu, ra
sahá cumi mbee cuan cuví ra.

³ Ra nyaá yuhu chacu cuan nuña ra
na quihví ra sahá cumi mbee cuan.
Ta mbee cuan nicohón soho ti ndusu
ra. Noo noo ti ta iyó sivi ti sahá ra, ta
cana ra chi ti ta tavá ra chi ti ityi chata
chacu.

⁴ Ta cha yaha tavá ra chi ti, ta cua-
han ra ityi nuu ti ta nyicón ti chi ra,
vatyi nicohón soho ti ndusu ra.

⁵ Soco tatu ña ñohó soho ti ndusu ra,
chinó ti chi ra ta ma cunyicon ti chi ra.

⁶ Tyehe caa tuhun cahan ra Jesús
chihin ñu. Soco maa ñu ña cutuñí iñi
ñu ñáá tuhun cuñí ra cahán ra cha
tyicuan caa.

*Ra Jesús cuví ra sahá cumi vaha
mbee*

⁷ Tyicuan ta catyí ra Jesús inga
chaha chi ñu:

—Cha ndicha catyí chi ndo vatyí
yuhu cuví tari noo yuhu chacu nu
quihví coyo ñáyivi cuende cha cuví ñu
tari mbee sane.

⁸ Tandihí ra cha yaha caquichí
coyo, ra suhu cacuví ra. Soco mbee ña
quichaha ti cha cacahan ra.

⁹ Yuhu cuví yuvehe gloria. Ñu
quihví cuende, cacu ñu cha ma cuhun
ñu anyaya. Ta cuví ñu tari noo mbee
cha quihví ta quitá chichi chacu cuan.
Ta ñihí ti cuhu cachi ti.

¹⁰ 'Noo ra suhu vachí ra, soco vachí
suhu ra, vachí cahñi ra, vachí sativi
ra. Soco yuhu vachí vatyí coo ndo noo
ñayivi chaa cha ma naa ca maa.

¹¹ Yuhu cuví noo ra vaha sahá cumi
mbee. Vatyí ra sahá cumi mbee
chahá ra ñayivi ra cuenda sana ra.

¹² Soco ra cuví musu, tatu nyehé ra
vachí lobo cha cuví noo quitá xaan,
sandoo maa ra chi mbee sana chitoho
ra. Ta chinó ra. Vatyí ñima sana maa
ra cuví ti. Tyicuan ta tin quitá xaan
chi mbee cuan. Ta saquicono ti chi ti
ityi cuan ityi ihya.

¹³ Musu cuan chino ra cha cuenda
vatyi cha cuenda xuhun ri sahá tyiño
ra. Ta ñahri cuenda ra chi mbee, tyi
ñima sana ra cuví.

¹⁴ 'Yuhu cuví ra sahá cumi vaha
mbee sane. Ta ñohó nui chi ti. Ta maa
ti ñohó nuu ti chii,

¹⁵ tari ñohó nuu Suti chii, ta yuhu
ñohó nui chi ra. Yuhu chahí ñayivi
cuenda mbee sane.

¹⁶ Iyó tucu inga mbee sane cha
ñima chichi chacu ihya iyó ti. Cuñí
chi cha cuhin cunaquehin chi ti. Ta
cuquichaha ti chii. Ta coo noo ri nu
quihí tandihí ti. Ta noo ri ra sahá cumi
chi ti cucoo.

¹⁷ 'Suti cuñí ra chii vatyí chahí
ñayivi cha catyí ñáyivi cuende. Soco
yaha cuan, nacuhva tucu ra ñayivi
inga chaha.

¹⁸ Yori tinyaá ñayivi, soco cha iyó
vaha iñi mai ta chahí. Iyó ityi chii cha
cuhve ñayivi ta cúvi, ta iyó tucu ityi

chii cha naquehen tiq̄ui inga chaha vatyí cunandote. Ican ihya cuví tyiño cha tyaa Suti chii —catyí ra Jesús.

¹⁹ Cha cachiñi tucu ra cacuví nuu chi ñu Israel tuhun cha cahán ra Jesús ihya, cacusiñ tucu ra chihin tahan ra inga chaha.

²⁰ Ta cuaha xaan ra catyí ra:

—¿Ñáá tuhun cha quichaha ndo chi ra chiña? Ta yihí noo tatyí ña vaha chi ra, ta loco ra —cacatyí ra.

²¹ Ta inga ra catyí ra:

—Yori ñu ñohó tatyí ña vaha chi cahán tyehe caa. ¿Atu cuví sananyehe noo tatyí ña vaha chi noo ra cuaa? —catyí ra.

Nu ña cuñi ra cacuví nuu chi ñu Israel chi ra Jesús

²² Nya ñuu Jerusalén yoo vichin cuví. Ta sanducahnú ñu noo vico quiví nanduchin cuiya cha suhñi ñu vehe ñuhu cahnu cuan.

²³ Ta ra Jesús chicá noo ra vehe ñuhu cuan ityi corredor ra Salomón.

²⁴ Ta ra cacuví nuu chi ñu Israel cachicuitayucú cutya ra nuu ra. Ta quichaha ndaca tuhun ra chi ra:

—¿Ama catyí cachun chi ndi tatu icon cuví Cristo? ingaña ri catyí cachi chi ndi.

²⁵ Ta ra Jesús catyí ra:

—Cha yaha catyí chi ndo, ta ña chinó iñi ndo chii. Tyiño sacuví nuu Suti ican cuví cha ndaa cuende.

²⁶ Soco nyoho ña chinó iñi ndo chii vatyí ñima mbee sane cuví chi ndo. Tari cuhva catyí chi ndo ndaa ri.

²⁷ Mbee sane nicohón soho ti ndusi, ta yuhu ñohó nui chi ti. Ta maa ti nyicón ti chii.

²⁸ Yuhu चाहि ñayiví cha ma naa ca maa coo ti. Ta ma cunaa ti. Ta ni yori maa cuví tinyaa chi ti chichi ndahi.

²⁹ Maa Suti chaha chi ti chii. Ta cahnu ca cuví maa ra ican saha tandihí ca. Ta yori cuví tinyaa chi ti chichi ndaha ra.

³⁰ Yuhu ta Suti Nyoo, noo ri cuví ndi —catyí ra Jesús.

³¹ Tyicuan ta ra cacuví nuu chi ñu Israel cuan caquehen tucu ra yuu vatyí tuchi ra chi ra.

³² Ta ra Jesús catyí ra chi ra:

—Cuaha xaan cha vaha sacuví yuhu nuu ndo chihin tunyee iñi Suti. ¿Ta nya cuenda cuan cua tuchi ndo yuu chii? —catyí ra Jesús chi ra.

³³ Ta ra cacuví nuu chi ñu Israel cuan cacatyí ra:

—Ñima cha cuenda noo cha vaha sacuvun cutuchi ndi yuu chuun, soco cha cuenda vatyí yahun nuu Nyoo chihin tuhun cahún. Noo rayi ri cuvún, soco sahún tari Nyoo chuun —cacatyí ra chi ra.

³⁴ Tyicuan ta catyí ra Jesús chi ra:

—Nu tutu tuhun Nyoo nyaá vatyí Nyoo catyí ra: “Nyoho cuví ndo nyoo”, catyí Nyoo.

³⁵ Chitó yo vatyí cha cahán tuhun Nyoo, ma cuví catyí yo tyi ña ndicha. Ta Nyoo sacunañi ra nyoo chi ñu naquehén tuhun cahán ra.

³⁶ Ta tatu maa Nyoo nacachi chi yuhu ta tachi ra chii siqui ñuhu ñayiví ihya ¿yoso caa catyí nyoho vatyí yahá yuhu nuu Nyoo nu catyí tyi Sehe Nyoo cuví chii?

³⁷ Tatu ña sacuví cha sacuví Suti, ma chino iñi ndo chii.

³⁸ Soco tatu sacuví, vasi ma chino iñi ndo chii, soco chino iñi ndo tyiño sacuví. Tyicuan ta cucoto cachi ndo vatyí Nyoo Suti ñn ri cuví ra chihin. Ta yuhu ñn ri cuví chihin Nyoo Suti —catyí ra Jesús.

³⁹ Inga tucu chaha cacuñi ra catyihí ra chi ra vehe caa, soco ra Jesús cuahan ri ra.

⁴⁰ Tyicuan ta cuanuhu ra ityi nu caña ñanyii inga chiyo yuvi cahnu Jordán cuan nu sacondutyá ra Juan ta xihna ri.

⁴¹ Cuaha ñayiví chahan chinyehe chi ra, ta catyí ñu:

—Ndicha, vasi ni noo milagru ña sacuví ra Juan, soco tandihí tuhun cha chahan ra cuenda ra ihya ta ndicha —catyí ñu.

⁴² Ta cuaha xaan ñu cachino iñi ñu chi ra Jesús ityi cuan.

11

Nu chihí ra Lázaro

¹ Iyó noo ra cuhví cha nañí Lázaro ñuu Betania nu cuví ñuu cu María ta cu Marta cuhu ña.

² Ta cu María, cuhva ra Lázaro cuan ican ña cuví ñaha cha choso ndutya vixi chahán chaha Sutu Mañi yo, ta chihin ixi xiñi ña nacuhva ña.

³ Ta tyicuan caa ninduvi tahan ñu, cu María chihin cuhu ña, tachí ñu tyiño na cucatyí ra chi ra Jesús tyehe caa;

—Sutu Mañi ndi, amigon cuhví ra —catyí ñu, tachí ñu tyiño.

⁴ Ta cha chiñi ra Jesús tuhun ihya ta catyí ra:

—Cuehe cuan ma cahñi chi chi ra. Cuhví ra tyehe caa tacuhva vatyí quivi nduvaha ra cunyehe ñáyivi tyi cahnu xaan ca ra cuví Nyoo ta tyicuan caa tucu Sehe ra —catyí ra Jesús tuhun maa ra.

⁵ Cuñi vavaha ra Jesús chi cu Marta ta chi cuhu ña, ta chi cuhva ña, ra Lázaro.

⁶ Soco cuhva cha catyí ñu chi ra tyi cuhví ra Lázaro, ndoo ra nu ñohó ra uvi ca quivi.

⁷ Tyicuan ta catyí ra chi ra cachicá noo chihin ra:

—Coho ndo inga chaha nya Judea —catyí ra.

⁸ Tyicuan ta ra cachicá noo chihin ra cacatyí ra chi ra:

—Maestro, ta cunaha ca cha cuñi ra cacuvi nuu chi ñu Israel cahñi ra chuun chihin yuu. Ta vityin, ¿inga chaha cuñún cuhun yucuan? ¿Ñáá tuhun?

⁹ Ta catyí ra Jesús:

—¿Atu ñima uchi uvi hora iyó noo quivi? Vatyí tatu cha ñicahñu chicá noo noo ra, ma nduva ra vatyí ndichin nyehé ra ta sacuvi ra tyiño nuu Nyoo.

¹⁰ Soco tatu cha cha cuaa chicá noo ra, nduva ra vatyí ñahri ñuhú.

¹¹ Tyicuan ta quichaha catyí tucu ra Jesús:

—Amigo yo, ra Lázaro quixí ra. Soco cuhin cusandoye chi ra —catyí ra chi ra.

¹² Tyicuan ta catyí tucu ra cachicá noo chihin ra:

—Tata, tatu quixí ra, cuñi chi catyí vatyí cuanduvaha ra —cacatyí ra.

¹³ Soco ra Jesús cuñi ra catyí ra vatyí cha chihí ra Lázaro. Ta ra cachicá noo chihin ra, cuñi maa ra vatyí cha ndicha quixí ra cuan.

¹⁴ Tyicuan ta catyí cachi ra Jesús chi ra:

—Ra Lázaro cha chihí ra.

¹⁵ Ta cusí cuñi vatyí yori chinyaa yucuan. Vatyí tyicuan caa vaha ca cha cuenda nyoho, tacuhva chino ñi ndo chii. Coho ndo cunyehe ndo chi ra —catyí ra chi ra.

¹⁶ Tyicuan ta ra Tomás, cha catyí ñu: “ra tñihí cuan”, catyí ra chi inga ra cachicá noo chihin ra Jesús:

—Coho tucu yo vatyí cúvi yo ñn ri chihin ra —catyí ra.

Ra Jesús cuví ra sanandotó chi yo ta chahá ra ñáyivi coo yo

¹⁷ Cha chaá ra Jesús Betania, ñihí ra tuhun vatyí ra Lázaro cha cumi quivi ñohó ra chichi ñuhú.

¹⁸ Ñuu Betania cuan nyaá chi yatyin ri nu nyaá ñuu Jerusalén, tari noo uvi kilómetro sisava.

¹⁹ Ta cuaha ra cacuvi nuu chi ñu Israel cuahan ra cuanyehe ra nu nyaá cu Marta ta cu María vatyí chihí cuhva ñu.

²⁰ Ta ñihí cu Marta tuhun vatyí cha cuachaa ra Jesús. Ta cuahan ña cuasatahan ña chi ra. Soco cu María ndoo ña vehe.

²¹ Ta cu Marta catyí ña chi ra Jesús:

—Sutu mañi yuhu, tyehe ta nyaun ihya, ma cúvi cuhve.

²² Soco yuhu chité vatyí Nyoo cusacuvi ra tandihí cha cacon chi ra —catyí ña chi ra.

²³ Ta ra Jesús catyí ra chi ña:

—Cuhvon cunandoto ra.

²⁴ Ta cu Marta catyí ña:

—Ndicha, chité vatyí cunandoto ra quivi nandoto ndiyí nu cuandihí quivi —catyí ña.

²⁵ Tyicuan ta catyí ra Jesús chi ña:

—Yuhu cuví ra sanandotó chi ndiyí. Ta chahí cha conyito ñáyivi. Ñu chinó ñi chii, vasi cha chihí ñu soco coo tucu ñu.

26 Ta tandihí ñu nyitó ca ta chinó iñi ñu chii, ma cúvi maa ñu. ¿Atu chiñó iñun tuhun ihya? —catyí ra chi ña.

27 Ta maa ña catyí ña:

—Chinó iñi, Sutu Mañi yuhu, vatyí yoho cuvún Cristo Sehe Nyoo, ra cha nyaá cha quichi síqui ñuhu ñayivi ihya —catyí ña.

Nu chacu ra Jesús nu ñaña ra Lázaro

28 Cha yaha cha catyí cu Marta tuhun ihya, ta chahan ña chiquehen ña chi cuhu ña, cu María, ta catyí xehe ña chi ña:

—Cha cha Ra Sacuaha. Ta tachí ra tyiño nacuhun nu nyaá ra —catyí ña.

29 Ta cha chiñi cu María tuhun ihya, nducuita ri ña, ta cuahan ña nu nyaá ra Jesús,

30 Ta ra Jesús ta quihvi ca ra chichi ñuu cuhva cuan, nyaá ra nu nañihí cu Marta chi ra.

31 Ta nya vehe cu María, nyicú ra cacuví nuu chi ñu Israel tyinyeé ra chi ñu. Ta nyehe ra vatyí numi ri quita ña. Ta cuñí maa ra tyi cuahan ña nu ñaña cuacuacu ña. Ta cuahan coyo ra chata ña.

32 Ta cuhva cha cha cu María nu nyaá ra Jesús chicuñi chiti ña chaha ra, ta catyí ña:

—Sutu Mañi yuhu, tyehe ta chinyaun ihya, cuhve ma cúvi ra —catyí ña.

33 Nyehe ra Jesús cha chacú cu María chihin ra Israel cha vachi coyo chihin ña, ta nducuihya xaan cuñi aña ra.

34 Ta ndaca tuhun ra chi ñu:

—¿Nya maa maa tyihí ndo chi ra? —catyí ra.

Ta catyí ñu:

—Tata, coho ta nyehun —catyí ñu chi ra.

35 Ta ra Jesús chacu ra.

36 Tyicuan ta catyí ra Israel cuan:

—Nyehe ndo yoso cha cuñi ra chi ra —catyí ra.

37 Soco suhva ñu catyí ñu:

—Ican ra ihya cha sananyehe chi ra cuaa cuan. ¿Atu ña cuví sanduvaha tucu ra chi ra Lázaro ihya? —catyí ñu.

Nu sanandoto ra Jesús chi ra Lázaro

38 Nducuihya cuñi ra Jesús inga chaha ta tuhva ra nu ñaña cuan. Noo chichi yuu cuví. Ta nyasí noo yuu yuhu chi.

39 Ta catyí ra Jesús:

—Sacanyaha ndo yuu chiña —catyí ra.

Ta cu Marta, cuhva ndiyi cuan, catyí ña:

—Soco cha caña xico, Sutu Mañi yuhu, vatyí cha cumi quivi cha chihí ra —catyí ña.

40 Soco ra Jesús catyí ra chi ña:

—¿Atu ña cha catyí chuun vatyí tatu chinó iñun, cunyahun yoso cha cahnu cuví Nyoo? —catyí ra chi ña.

41 Tyicuan ta sacanyaha ñu yuu cuan. Ta ra Jesús nanyehe ndaa ra ityi andivi, ta catyí ra:

—Sutu Mañi yuhu, tyahvi nyoo chuun tyi chiñun cha cahín.

42 Yuhu chité vatyí tyicuan ri chiñun tuhun cahín. Soco tyehe caa cahín cha cuenda cha vaha chi ñayivi nyicú ihya, tacuhva nachino iñi ñu tyi yoho tachí chii —catyí ra Jesús chi Nyoo.

43 Cha yaha cha catyí ra tuhun ihya, canachaa ra, ta catyí ra:

—¡Lázaro, quita chiña!

44 Ta quita ra cha chihí cuan, nuhñi ndaha ra ta nuhñi chaha ra chihin sahma. Ta nuhñi nuu ra chihin noo sahma. Ta ra Jesús catyí ra chi ñayivi nyicú yucuan:

—Ndachi ndo chi ra. Ta saña ndo chi ra nacuhun ra —catyí ra Jesús chi ñu.

Nu nducú cahñi ñu chi ra Jesús

(Mt. 26.1-5; Mr. 14.1-2; Lc. 22.1-2)

45 Ta cuaha xaan ra cacuví nuu chi ñu Israel cha chahan coyo chihin cu María nachino iñi ñu cha nyehe ñu cha sacuvi ra Jesús.

46 Soco suhva ra chahan ra chisacoto ra chi ra fariseo cha sacuvi ra Jesús.

47 Tyicuan ta ra fariseo ta ra cacuví nuu chi tata sutu sacoo ra noo junta ta cacatyí ra:

—¿Ñáa cha sacuví yo? Vatyí cuaha xaan milagru sacuví ra cuan.

48 Tatu cuhva yo cha sacuvi ca ra tyicuan caa, tandihí ñáyiví cuchino iñi ñu chi ra. Ta ra cacuví tyiño nya ñuu Roma cuquichi ra ta cusatani ra vehe ñuhu yo ta ñuu yo —cacatyí ra chi ra tahan ra.

49 Soco ra cuví nuu cahnu ca chi tata sutu cuiya cuan, ra nañí Caifás cahan ra ta catyí ra chi ra:

—Nyoho ñahri maa cha chitó ndo.

50 Ni ña cutuñí iñi ndo vatyí vaha ca cha cúvi noo ri rayíi cha cuenda tandihí ñáyiví ñuu, ta ñima ca cha cúvi tandihí yo —catyí ra Caifás.

51 Soco ra Caifás cuan ñima cha cuñí maa ra ta cahan ra, soco vatyí ra cuví nuu cahnu ca chi tata sutu cuiya cuan cuví ra, yucuan chaha maa Nyoo sacahan chi ra. Vatyí catyí ra vatyí ra Jesús cucúvi ra cha cuenda tandihí ñáyiví ñuu Israel.

52 Ta ñima cha cuenda ri ñu cuan, soco vatyí cusandu ñin ri ra chi tandihí ñu cuví sehe Nyoo cha iyó inga ñuu ñandihí.

53 Yucuan ta nyacua nya quiví cuan ta ra cacuví nuu chi ñu Israel cuan, nducu ra cuhva yoso caa cahñi ra chi ra Jesús.

54 Yucuan chaha tyi ra Jesús ña chicá noo ndichin ca ra nu nyicú ñu Israel. Ta quita ra ityi Judea cuan. Ta cuahan ra noo ñuu cha nañí Efraín cha nyaá yatyin ri ñuhu ityi. Ta yucuan ndoó ra chihin ra cachicá noo chihin ra.

55 Ña cuaha ri ca quiví ta chaq vico cuenda ñu Israel, vico cha nañí pascua. Ta cuaha xaan ñáyiví quita ñu ñuu ñu ta cuahan ñu Jerusalén cuasacuvi ñu cha tuhvá maa ñu sacuví cha sandundíi ñu chi ñu nuu Nyoo cha ni cumañi ca chaa quiví vico cuan.

56 Nanducú ñu chi ra Jesús. Ta cuhva cha nyicú ñu chichi vehe ñuhu cahnu cuan ta ndaca tuhun ñu chi tahan ñu, ta catyí ñu:

—¿Yoso caa cuñí nyoho? ¿Atu cuquichi ra vico ihya, o ma quichi ra? —catyí ñu chi tahan ñu.

57 Ta ra cacuví fariseo ta ra cacuví nuu chi tata sutu, catyí ra vatyí tatu

nya noo ñu chitó ñu nya nyaá ra Jesús, nacatyí ñu. Vatyí cutin ra chi ra vatyí cohon ra vehe caa.

12

Nu chosó cu María ndutya vixi chahán chaha ra Jesús

(Mt. 26.6-13; Mr. 14.3-9)

1 Cumañi iñu ca quiví cha cuatahan chi vico pascua, ta chaq ra Jesús ñuu Betania nu iyó ra Lázaro, ra cha sanandoto ra Jesús chi.

2 Yucuan savaha ñu cha cuxiñi ra Jesús. Cu Marta tyihí ña coho nu mesa. Ta chicunyaq ra Jesús nu mesa. Ta nyaá tucu ra Lázaro chihin ra.

3 Tyicuan ta cu María quehen ña ta cha sava litro ndutya vixi chahán cha chino chihin maa ri nardo, noo cha yahví xaan nyaá. Ta cuhví ña chaha ra Jesús chihin ndutya vixi chahán cuan. Yaha cuan ta sana ityi ña chihin ixi xiñi ña. Tandihí chichi vehe cuan chitú chihin xico ndutya vixi chahán cuan.

4 Ta yucuan nyaá tucu ra Judas Iscariote, sehe ra Simón. Cuví ra noo ra chicá noo chihin ra Jesús. Ta suri maa ra cuví ra cha naxico tuhun chi ra Jesús nuu ra xaan iñi chi ra. Ta quichaha catyí ra Judas cuan chi ñu cuan:

5 —¿Ñáá tuhun ña xico ndo ndutya vixi chahán ihya chi ñáyiví, cuhva ñu cuenda mil chí ndo chihin, ta tyinyee ndo chí ñu ndahví? —catyí ra.

6 Soco ra Judas ña catyí ra tuhun ihya cha cuenda cha ndahví cuñí ra nyehe ra chí ñu ndahví, soco vatyí ra suhu cuví ra. Ta vatyí ndaha maa ra nyaá yitin xuhun ta tuhvá ra suhu ra cha tyihí ñu chichi yitin cuan.

7 Tyicuan ta catyí ra Jesús chi ra:

—Saña chi ña, vatyí ñaha ihya sacuví ña tyehe caa cha cuenda cha cuquihví coño ñuhi chichi ñuhu.

8 Ñu ndahví tyicuan ri cu cunyicú ñu chihin ndo, soco yuhu ña tyicuan ri —catyí ra Jesús chí ra Judas cuan.

Nu nducu cahñi ra chi ra Lázaro

9 Cuaha xaan ñu Israel ñihí ñu tuhun tyi ra Jesús ñohó ra Betania, ta

chahan coyo ñu nyicuan. Ñima cha cuñi ñu nyehe ñu chi ra Jesús ri, soco cuñi tucu ñu nyehe ñu chi ra Lázaro, ra cha sanandoto ra Jesús chi.

¹⁰ Tyicuan ta ra cacuvi nuu chi tata sutu catyihí tahan ra tuhun vatyí cucañi tucu ra chi ra Lázaro ñandihí.

¹¹ Vatyí cha cuenda ra ta cuaha xaan ñu Israel cacusiñ ñu chihin ra ta nachino iñi ñu chi ra Jesús.

Nu quihvi ra Jesús ñuu Jerusalén

(Mt. 21.1-11; Mr. 11.1-11; Lc. 19.28-40)

¹² Cuaha xaan ñáyivi cuahan ñu Jerusalén cha vico pascua. Ta cha inga quivi cachito ñu tyi ra Jesús cuachaa ra.

¹³ Tyicuan ta chahnya ñu ndaha tunducaha ta cuahan coyo ñu cuasatahan ñu chi ra Jesús. Ta canachaa ñu, ta catyí ñu:

—¡Cahnu xaan ca cuví maa Nyoo! ¡Nasoco xaan Nyoo chi ra vachi ihya chihin tunyee iñi Nyoo! ¡Nasoco xaan Nyoo chi Rey cuenda yo ñu Israel! —cacatyí ñu, canachaa ñu.

¹⁴ Ta ra Jesús ñihí ra noo burru ta chico so ra chi ti tari cuhva catyí maa nu tutu Nyoo tyehe caa:

¹⁵ Ma yuhvi ndo ñáyivi ñuu Sión Nyehe ndo, vachi Rey ndo.

Yosó ra noo burru —catyí chi nu tutu Nyoo.

¹⁶ Quivi cuan ra cachicá noo chihin ra Jesús, ña cacutuñi iñi ra tuhun cuan cha nyaá nu tutu Nyoo. Soco cha yaha cuanuhu ra Jesús gloria, canicohon iñi ra vatyí tandihí tuhun cuan ta nyaá nu tutu Nyoo tyi tyicuan caa cucuvi chi ra. Ta tyicuan caa cuví chi ra.

¹⁷ Ta ñáyivi cha nyehe quivi cha cana ra Jesús chi ra Lázaro chichi ñaña, quivi sanandoto ra chi ra, nacatyí ñu cha nyehe ñu.

¹⁸ Ta yucuan chaha cuaha xaan ñáyivi chisatahan ñu chi ra Jesús, vatyí chito ñu milagru cha sacuvi ra.

¹⁹ Tyicuan ta ra cuví fariseo cacatyí ra chi ra tahan ra:

—Cha nyehé maa ndo tyi ñahri maa cuví sacuvi yo, vatyí tandihí ñáyivi nyicón chi ra —cacatyí ra.

Nu nducú suhva ra ñuu Grecia chi ra Jesús

²⁰ Ñohó tucu suhva ra ñuu Grecia mahñu ñáyivi cha chahan coyo chisacahnu vico ñuu Jerusalén cuan.

²¹ Tyicuan ta catuhva ra ñuu Grecia cuan nu nyaá ra Felipe, ra ñuu Betsaida nu cuví Galilea, ta cachacu ndahvi ra nuu ra ta cacatyí ra:

—Tata, cuñi ndi cahan ndi chihin ra Jesús —cacatyí ra.

²² Ta ra Felipe chahan ra chicatyí ra chi ra Andrés. Ta ninduvi ra chinacatyí ra chi ra Jesús vatyí ra Grecia cuan cuñi ra cahan ra chihin ra.

²³ Ta nacahan ra Jesús, ta catyí ra:

—Chaa cuhva vityin vatyí yuhu cha cuví Rayi cha quichi nya gloria, cuanuhu tiqui nya gloria, ta cusacahnu Suti chii.

²⁴ Cha ndicha catyí chi ndo vatyí tatu noo chiti ta ma quihí chichi ñuhú ta ma tyahyu chi, noo ri chiti cucuvi chi tyicuan ri maa. Soco tatu tyahyu chi, nduchaa chi inga chaha ta coo cuaha ca chiti chi.

²⁵ Ñu cuñi xaan ñáyivi iyó ñu, cucunaa ñu. Soco ñu ña cuñi ñáyivi ñuhu ñáyivi ihya, cunañihi ñu noo ñáyivi cha ma naa ca maa cucoo ñu.

²⁶ Tatu yihí ndo cuñi ndo sacuvi ndo tyiño nui, cunyicon ndo chii. Ta nu cuacunyai, yucuan cucunyaa tucu ñu sacuvi tyiño nui. Tatu nya nyoho sacuvi ndo tyiño nui, Suti cusacahnu ra chi ndo.

Nu cahán ra Jesús tuhun yoso caa cucuvi ra

²⁷ Vityin chicá xaan xiñi. Ta ¿ñáa cha cucatyí? ¿Atu catyí chi Suti na sacanyaha ra tindocho cha nyaá cunyehe vityin? Ma catyí cha tyicuan caa vatyí cha cuenda cuan vachi siqui ñuhu ñáyivi ihya.

²⁸ Vaha ca catyí chi Suti: “Sutu Mañi yuhu, sacahnu sivun” —catyí ra Jesús.

Tyicuan ta cahan noo ndusu ityi andivi ta catyí chi tyehe caa:

—Cha yaha sacahni sivi, ta cusacahni inga chaha —catyí ndusu cuan.

²⁹ Ta ñu nyicú yucuan, chiñi ñu ndusu cuan, ta catyí ñu vatyí savi cahān. Ta inga ñu catyí ñu:

—Noo ángel cahān chihin ra.

³⁰ Tyicuan ta ra Jesús catyí ra chi ñu:

—Ñima cha cuenda cha vaha chi yuhu cahān ndusu cuan soco cha cuenda cha vaha chi maa ndo cuví.

³¹ Vityin cuví cuhva cutachi tuñi Nyoo chi ñáyivi iyó siqui ñuhu ñayivi. Ta vityin cuhva cutava ñehe Nyoo chi ra nyacá ñaha siqui ñuhu ñayivi ihya.

³² Ta cuhva cha cuitacai nu cruzi, yucuan cuhva cunaxite chi tandihi ñáyivi —catyí ra Jesús.

³³ Cahán ra tyehe caa cha cuñi ra na cutuñi iñi ñu tyi tyicuan caa cuhva cucúvi ra.

³⁴ Ta ñáyivi nacahān ñu ta catyí ñu chi ra:

—Tuhvá ndi chiñi ndi sacuaha ra nu libru ley yo vatyí ra cuví Cristo tyicuan ri maa cucoo ra. ¿Yoso caa cha catyí yoho tyi cusandaa ñu chi Rayi quichi nya gloria nu cruzi? ¿Yóo ra cuví Rayi cha quichi nya gloria cha cahún tuhun? —catyí ñu, ndacá tuhun ñu chi ra.

³⁵ Tyicuan ta ra Jesús catyí ra chi ñu:

—Iyó cha ndichin nu nyicu ndo, soco suhva ri ca quivi. Caca ndo ityi nu ndichin cha ni ri ca cha ndichin. Coto sana ri iñi ndo ta nduñaa iñi, vatyí ñu chicá noo nu ñaa iñi ña chitó ñu nya ityi cuahan ñu.

³⁶ Chino iñi ndo chi yuhu ra cuví ñuhu ndichin cuan, cha ni ri ca cha nyaá que chihin ndo. Tyicuan ta cuví ndo ñáyivi iyó nu ndichin.

Cha yaha catyí ra Jesús tuhun ihya tixehe nuu ra chi ñu.

Nu catyí chi ñaa tuhun cha ña cachinó iñi ra cacuvi nuu chi ñu Israel chi ra Jesús

³⁷ Vasi cuaha xaan milagru sacuvi ra Jesús nuu ñu soco ña chinó iñi ñu chi ra.

³⁸ Vatyí tahán chi cha cuví tari catyí ra Isaías profeta Nyoo, nu cahān ra tyehe caa:

Sutu Mañi yuhu, yori cuñi chino iñi tuhun cahán ndi.

Yori cutuñi iñi tunyee iñi iyó chuun, Sutu Mañi yuhu, catyí ra Isaías ta cha naha.

³⁹ Ta cha cuenda tuhun ihya cha nyaá nu tutu, yucuan chaha vatyí ña cuví chino iñi ñu vatyí suri tyaa tucu ra Isaías tyehe caa:

⁴⁰ Nyoo sanducuaa ra chi ñu. Ta sandundava ra aña ñu,

tacuhva cha ma nyehe ñu chihin chiti nuu ñu,

ta ma cutuñi iñi aña ñu,

ta ni ma nacuhva cuenda ñu chi ñu chi ra tacuhva sanduvaha ra chi ñu.

⁴¹ Ra Isaías catyí ra tyehe caa vatyí nyehe ra nu nyacá ñaha Sutu Mañi yo Jesús ta cahān ra tuhun ra.

⁴² Soco cuaha ñu Israel chinó iñi chi ra Jesús, ta nyacua nya suhva ra cacuvi nuu, soco ña saquetuvi ra nuu ñáyivi vatyí yuhví ra chi ra cacuvi fariseo coto tava ñehe ra chi ra vehe ñuhu.

⁴³ Vatyí cuñi ca ra cuvaha ra nuu ñáyivi ta ñima ca cha cuvaha ra nuu Nyoo.

Tuhun cahān ra Jesús cusacutuñi chi ñáyivi

⁴⁴ Ñihi cahán ra Jesús, ta catyí ra:

—Ñu chinó iñi chii, ñima chi maa ri mai chinó iñi ñu, soco chinó tucu iñi ñu chi ra cha tachi chii.

⁴⁵ Ta ñu nyehé chii, nyehé tucu ñu chi ra cha tachi chii.

⁴⁶ Yuhu cha cuví tari noo cha ndichin vachi ñuhu ñayivi ihya, vatyí tacuhva vatyí ñu chinó iñi chii ma ndoo ñu nu ñaa iñi.

⁴⁷ Soco tatu yihí ndo chiñi ndo tuhun cahín, ta ña sacuvi ndo cha cahín, ñima yuhu tachi tuñi chi ndo. Vatyí ña vachi yuhu ñuhu ñayivi ihya vatyí tachi tuñi chi ñáyivi. Soco vachi sacaqui aña ñu.

⁴⁸ Ñu ña cuñi naquehen tuhun cahín ta ña cuñi ñu sacuvi ñu tari cuhva cuñi, iyó cha cutachi tuñi chi ñu. Tuhun cha cahín, ican cuan cutachi tuñi chi ñu nu cundihí quivi.

⁴⁹ Vatyí ñima cuenda mai cahín. Suti ra cha tachí chii, chaha ra tuhun chii ñáá cha cucahin ta ñáá cha cusañahi.

⁵⁰ Ta chité vatyí tuhun cha chaha ra, chahá chi noo ñayiví cha ma naa ca maa coo ñáyivi. Yucuan chaha, tuhun cha cahín, cahín soco cuhva catyí maa Suti cha cahín cuví.

13

Nu nacatyá ra Jesús chaha ra cachicá noo chihin ra

¹ Nonga quívi cumañi ta chaa vico pascua chitó ra Jesús vatyí cha chaa cuhva cha cuaquita ra ñuhu ñayiví ihya ta cunuhu ra nu nyaá Sutu ra. Tyicuan ri cuñi xaan ra chi ñu cuenda ra cha iyó siqui ñuhu ñayiví ihya. Ta vityin cua sañahá ra chi ñu tyi cuñi xaan ra chi ñu vatyí cuacúvi ra cha cuenda ñu.

² Ta cuxiñí ra Jesús chihin ra cachicá noo chihin ra. Ta cha quíhví cuihna añima ra Judas Iscariote sehe ra Simón tyiyuhú ra chi ra, naxico tuhun ra chi ra Jesús ta nacuhva cuenda ra chi ra chi ra xaan iñi chi ra.

³ Soco ra Jesús chitó ra vatyí chaha cuenda Sutu ra tandihí chi ra vatyí cunyaa ndaha ra. Ta chitó ra vatyí nu nyaá Nyoo quitá ra ta suri yucuan cunanuhu ra. Ta nyaá ra Jesús cuxiñí ra.

⁴ Tyicuan ta nicuinanyaa ra ta tava ra sahma chata ra, ta chahñi ra noo toalla chichi ra.

⁵ Tyicuan ta tyihí ra ndutya chichi noo caa ta quichaha nacatya ra chaha ra cachicá noo chihin ra. Ta quichaha nacuhva ra chihin toalla cuan.

⁶ Ta cha cuanacatya ra chaha ra Simón Pedro ta catyí ra Simón chi ra:

—Sutu Mañi yuhu, ¿atu yoho cuanacatyon chahi?

⁷ Tyicuan ta catyí ra Jesús:
—Vityin ña cutuñí iñun cha sacuví. Soco cucutuñi maa iñun nu cuahan ca chi.

⁸ Soco ra Pedro catyí ra chi ra:
—Ni noo chaha ta ma nacatyon chaha yuhu.

Ta catyí ra Jesús chi ra:

—Tatu ma nacatye chahun, ñima ra cuende cuvún.

⁹ Tyicuan ta catyí ra Pedro chi ra Jesús:

—Tu tyicuan caa, Sutu Mañi yuhu, ñima chaha ri nacatyon, soco nacatya tucun ndahi ta xiñi ñandihí —catyí ra.

¹⁰ Soco ra Jesús catyí ra chi ra:

—Ñu cha ni chityi, ña cuñi chi cha ndoo tandihí coño ñuhu ñu. Chaha ri ca ñu cuñi chi, vatyí cha ndii maa nanii ñu. Nyoho cha ndii ndo, vasi ña tandihí ndo —catyí ra Jesús.

¹¹ Ta catyí ra vatyí ña tandihí ra ndii ra vatyí chitó ra yóo cha cunaxico tuhun chi ra chi ra xaan iñi chi ra.

¹² Ta cha yaha cha nacatya ra Jesús chaha ra cachicá noo chihin ra, ndihví noo ra sahma ra, ta nicunyaa tucu ra inga chaha nu mesa ta catyí ra chi ra:

—¿Atu cutuñí iñi nyoho cha sacuví chi ndo?

¹³ Nyoho catyí ndo chii, Maestro ta Sutu mañi yuhu, ta ndicha vatyí ican cuví.

¹⁴ Yuhu cha cuví Ra Sacuaha ta Sutu Mañi ndo, nacatye chaha ndo, tyicuan caa cuñi tucu chi cha nacatya ndo chaha tahan ndo.

¹⁵ Yuhu chahí noo cuhva chi ndo vatyí sacuvi ndo tari cuhva sacuvi mai.

¹⁶ Cha ndicha catyí chi ndo vatyí ni noo musu ta ña cahnu ca ra ican saha chitoho ra. Ta ni noo ra cha cuahan tyiño, ña cahnu ca ra ican saha ra cha tachí chi ra.

¹⁷ Tatu cutuñí iñi ndo tuhun ihya, ta sacuví ndo, sii xaan cucuví chi ndo.

¹⁸ Ñima cha cuenda tandihí ndo cahín. Yuhu chité yóo chi nacachí mai. Soco cuñi chi cha cucuvi tari catyí tuhun Nyoo tyehe caa: “Ra cha chachí pan chihin, ican ra cuan cunaxico tuhun chii chi ra xaan iñi chii”, catyí chi nu tutu Nyoo.

¹⁹ Catyí chi ndo tuhun ihya cha ni cumañi ca chino cava tacuhva vatyí quívi nacuvi tyehe caa, chino iñi ndo tyi iquen cuví ra cha tinyaa cuatyí ndo.

²⁰ Cha ndicha catyí chi ndo vatyí ñu tiñ cuenda chi ñu tachí yuhu chi, chi

yuhu tíin cuenda ñu cuví cuan. Ta ñu cha tíin cuenda chi yuhu, tíin cuenda tucu ñu chi ra cha tachí chii —catyí ra Jesús.

Nu sacotó ra Jesús vatyí cunaxico tuhun ra Judas chi ra chi ra xaan iñi chi ra

(Mt. 26.20-25; Mr. 14.17-21; Lc. 22.21-23)

²¹ Cha yaha cha catyí ra Jesús tyehe caa, quichaha nducuihya xaan cuñi añima ra, ta catyí cachi ra:

—Cha ndicha catyí chi ndo, vatyí noo nyoho cunaxico tuhun ndo chii nuu ra xaan iñi chii —catyí ra Jesús.

²² Tyicuan ta ra cachicá noo chihin ra, quichaha canyehe ra nuu tahan ra, ta ña cachitó ra yóo chi tuhun cahán ra Jesús.

²³ Noo ra chicá noo chihin ra nyañaá ra chi ra Jesús nu cuxiñi ra. Ta ícan ra cuví ra cha cuñi xaan ra Jesús chi.

²⁴ Ta ra Simón Pedro savaha ra seña chi ra, na ndaca tuhun ra yóo chi tuhun cahán ra.

²⁵ Tyicuan ta nyañaá ra chi ra Jesús, ta ndaca tuhun ra chi ra:

—Sutu Mañi yuhu, ¿yóo ra cuví ra cha cahún tuhun?

²⁶ Ta nacahan ra Jesús ta catyí ra:

—Cuasatyí chii pan, ta ra cha cuhve chi, ícan ra cuan cuví ra —catyí ra.

Tyicuan ta quehen ra chiin pan ta satyí ra, ta chaha ra chi ra Judas Iscariote, sehe ra Simón.

²⁷ Ta cha quehen ra Judas pan cuan ta quihvi ra ña vaha añima ra. Tyicuan ta ra Jesús catyí ra chi ra:

—Tuhun cha yihí iñun sacuvun, sacuvi cha numi ri —catyí ra Jesús chi ra Judas.

²⁸ Soco ni noo ra canyicú nu mesa cuan, ña cacutuñi iñi ra ñáá tuhun cha catyí ra chi ra tyicuan caa.

²⁹ Soco cha cuenda vatyí ndaha ra Judas nyaá yitín xuhun, yucuan chaha yihí ra cuñi maa ra vatyí cuñi ra Jesús cha cusata ra cha chiñuhú chi ra cha cuenda cha vico cuan, o nacuhva ra suhva xuhun cuan chi ñu ndahvi, cacuñi maa ra.

³⁰ Cha yaha chachi ra Judas pan, tyicuan ta quita ra. Ta cha cuaa cuví cuan.

Ley cha chaha ra Jesús cha cuñi yo chi tahan yo

³¹ Cha yaha cha cuahan ra Judas, ra Jesús catyí ra:

—Vityin cunyehe ñáyivi yoso cha cahnu yuhu cha cuví Rayi cha quichi nya gloria. Ta cuanyehe ñu yoso cha cahnu Nyoo cha cuende.

³² Ta tatu Rayi cha quichi nya gloria sacahnú ra chi Nyoo, tyicuan ta Nyoo cusacahnu ra chi ra. Ta cha chaa quivi cuasacahnu ra chi ra.

³³ Sehe luhli, ña naha ca cuacunyai chihin ndo. Nyoho cunanducu ndo chii, soco tari catyí chi ra cacuvi nuu chi ñu Israel cuan, catyí chi ndo vityin, vatyí ma cuví cuhun ndo nu cuahin.

³⁴ Chahí noo tuhun chaa chi ndo. Cuñi ndo chi tahan ndo. Tari cuñi yuhu chi ndo, tyicuan caa cuñi chi cha cuñi ndo chi tahan ndo.

³⁵ Tatu cuñi ndo chi tahan ndo, tandihí ñáyivi ta coto ñu vatyí ñu nyicón chii cuví ndo.

Nu catyí ra Jesús vatyí ra Pedro cucatyí ra vatyí ña ñohó nuu ra chi ra

(Mt. 26.31-35; Mr. 14.27-31; Lc. 22.31-34)

³⁶ Ra Simón Pedro ndaca tuhun ra chi ra Jesús ta catyí ra:

—Sutu Mañi yuhu, ¿nya cuhun? —catyí ra.

Ta ra Jesús nacahan ra ta catyí ra:

—Nu cuahan yuhu, vityin ma cuví cunyicon chii. Soco nu cuahan ca chi, ta cunyicon chii —catyí ra Jesús.

³⁷ Tyicuan ta catyí ra Pedro chi ra:

—Sutu Mañi yuhu, ¿ñáá tuhun ma cuví cunyiquen chuun vityin? Nyaí cha cuhve ñáyivi cha cuendon —catyí ra.

³⁸ Ta nacahan ra Jesús ta catyí ra:

—¿Atu ndicha cha cuhvon ñáyivun cha cuende? Cha ndicha catyí chuun, vatyí cha ni cumañi ca cuacu chaa loho, yoho cucatyun uñi chaha tyi ña ñohó nuun chii —catyí ra Jesús chi ra Pedro.

14

Ra Jesús cuví ityi cuhun yo ta chaa yo nu nyá Sutu yo Nyoo

¹ Ta catyí ra Jesús:

—Ma caca xaan xiñi ndo. Chino iñi ndo chi Nyoo, ta chino iñi ndo chii.

² Vehe Suti cuaha xaan nuu coo ndo iyó. Tyehe ta ñima tyicuan caa, cha naha catyí yuhu chi ndo. Ta cuhin cusanduvahi noo nu coo ndo.

³ Ta cha yaha cha cuhin ta sanduvahi nu coo ndo, ta cuquichi inga chaha, quichi naquehin chi ndo. Tacuhva cunyaa ndo nu cuacunyai.

⁴ Nyoho chitó ndo nya cuhin, ta chitó ndo ityi.

⁵ Ta catyí ra Tomás chi ra:

—Tata, ña chitó ndi nya cuhun. Ta ¿yoso caa coto ndi ityi? —catyí ra.

⁶ Ta ra Jesús catyí ra:

—Yuhu cuví ityi cha cuahan gloria. Ta yuhu cuví cha ndicha. Ta suri yuhu cuví ra chahá ñayiví coo ndo. Noo tuhun ri cha cuenda yuhu, cuví chaa ndo nu nyaá Suti.

⁷ Ñohó nuu ndo chii, ta cha cuenda cuan ñohó nuu tucu ndo chi Suti. Ta nya vityin ta nu cuahan ca chi, ñohó nuu ndo chi ra, vatyí cha nyehé ndo chi ra —catyí ra Jesús.

⁸ Tyicuan ta catyí ra Felipe chi ra:

—Tata, cuhva cha nyehe ndi chi Sutu yo Nyoo, ta chihin yucuan ri ta ndoo ndi vaha.

⁹ Ta nacahan ra Jesús, ta catyí ra:

—Yoho Felipe, cha naha nyaí chihin ndo, ta ¿yoso caa cha catyún cha ta cohon nuu con chii? Ñu cha nyehé chii, nyehé tucu ñu chi Nyoo Suti. Ta ¿ñáá tuhun catyún chii: “Cuhva cha nyehe ndi chi Sutu yo Nyoo”?

¹⁰ ¿Atu ña chinó iñun tyi ñin ri cuví yuhu chihin Suti Nyoo? Ta maa ra ñin ri cuví ra chihin. Tuhun cha catyí chi ndo, ñima yuhu ri catyí, soco Suti cha nyaá chihin, ican ra sacuví tyiño ra chihin.

¹¹ Chino iñi ndo chii vatyí ñin ri ra cuví chihin Nyoo Suti. Ta Nyoo Suti ñin ri ra cuví ra chihin. O cuví tucu chino iñi ndo chii cha cuenda tyiño Nyoo Suti cha sacuví.

¹² Cha ndicha catyí chi ndo vatyí ñu chinó iñi chii, cusacuvi tucu ñu cha sacuví yuhu. Ta cahnu ca cusacuvi ñu, vatyí yuhu cuhin nu nyaá Nyoo Suti.

¹³ Ta tandihí cha cacan ndo chihin sivi, yuhu cusacuvi tacuhva vatyí sacahnu ñáyiví chi Suti Nyoo cha cuenda cha cuví Sehe ra.

¹⁴ Yuhu cusacuvi ñáá cha cacan ndo chihin sivi.

Nu catyí ra Jesús vatyí cuhva ra Tatyí Ii ra chi yo

¹⁵ Tatu cuñí ndo chii, quichaha ndo tuhun cahín.

¹⁶⁻¹⁷ Ta cacan tahvi mai chi Nyoo Suti na saquichi ra noo ra naquehen ndahvi chi ndo. Ta ican ra cuan cuví Tatyí Ii Nyoo, ra cha cahán maa ri cha ndicha. Ta cucunyata ra chihin ndo tyicuan ri maa. Soco ñáyiví cha tahán ca iñi cha iyó siqui ñuhu ñayiví ihya ma cuví naquehen ñu Tatyí Ii Nyoo vatyí ña cuví nyehe ñu chi ra. Ta ni ña caá ra aña ñu. Ta ni ña ñohó nuu ñu chi ra. Soco nyoho ñohó nuu ndo chi ra vatyí nyaá ra chihin ndo ta cuandoo ra chihin ndo.

¹⁸ Ma sandoo maa ri mai chi ndo. Quichi tiqui nu nyaá ndo.

¹⁹ Chiin ri ca, ta ñáyiví cuenda ñuhu ñayiví ma nyehe ca ñu chii. Soco nyoho nyehé ndo chii. Vatyí yuhu iyé, yucuan chaha nyoho coo ndo ñandihí.

²⁰ Quiví cuan cucoto ndo tyi yuhu ñin ri cuví chihin Suti. Ta nyoho ñin ri cuví ndo chihin. Ta yuhu ñin ri cuví chihin ndo.

²¹ Ñu cha cumí vaha tuhun cahín, ta sacuví ñu cuhva catyí, ican ñu cuan cuví ñu cha cuñí chii. Ta ñu cha cuñí chii, Suti cucuñi ra chi ñu. Ta cuñí tucu yuhu chi ñu ta cusañahi chi ñu yóo ra cuví yuhu —catyí ra Jesús.

²² Ta catyí ra Judas, ñima ra Judas Iscariote, inga ra.

—Sutu Mañi yuhu, ¿yoso caa cha chi nyuhu cusañahun chuun, ta ñima chi ñu cuenda ñuhu ñayiví?

²³ Nacahan ra Jesús ta catyí ra:

—Ñu cuñí chii, sacuví ñu tuhun cahín. Ta Suti cuñí ra chi ñu. Ta

quichi ndi nu nyaá ñu ta coo ndi chihin ñu.

²⁴ Ñu ña cuñi chii, ña sacuví ñu cha catyí. Ta tuhun cahín cha chiñi ndo, ñima tuhun mai cuví, tuhun cahán Suti, ra cha tachi chii cuví.

²⁵ 'Catyí tandihí tuhun ihya chi ndo cha ni ri ca cha nyaí chihin ndo.

²⁶ Soco nu cuahan ca chi cutachi Suti Tatyí li ra tyiño nui. Maa ra cuví ra cutyinyee chi ndo ta cunaquehen ndahvi ra chi ndo ta cusañaha ra tandihí chi ndo. Ta cusanicohon ra ñi ndo tuhun cha yaha cahín chihin ndo.

²⁷ 'Sandoí noo cha taxi coo añima ndo, tari cha taxi cuñi añime. Ican चाहí chi ndo. Ñima tari cha taxi cha ñihí ndo siqui ñuhu ñayivi ihya. Ma caca xaan ñi ndo ta ma yuhvi ndo.

²⁸ Chiñi ndo tuhun cha cahín nu catyí vatyí cuahin ta quichi tiqui nu nyicú ndo. Tatu cuñi ndo chii, cucusi cuñi ndo tyi catyí vatyí cuahin nu nyaá Suti. Vatyí cahnu ca cuví Suti ican saha yuhu.

²⁹ Ta vityin catyí tiqui chi ndo cha ni cumañi ca cuhin, tacuhva quivi cuhin, cunachino ñi ndo chii.

³⁰ 'Ma cahan cuaha que chihin ndo. Vatyí vachi ra nyacá ñaha siqui ñuhu ñayivi ihya. Vasí ña nyacá ñaha ra chii.

³¹ Soco cuñi chi nacoto ñayivi iyó siqui ñuhu ñayivi vatyí yuhu cuñi chi Nyoo Suti, ta sacuví tyiño tyaa ra chii.

'Ndícuíta ndo. Cōho ndo, naquita yo ihya.

15

Tari noo yoho tichaha ndivi cha ndicha vaha cuví ra Jesucristo

¹ 'Yuhu cuví yoho tichaha ndivi cha ndicha vaha. Ta Suti cuví ra sahá cumi chi yoho cuan.

² Chahnyá ra soco cha ña chahá chiti. Ta soco cha chahá chiti nacahnyá ra nuu chi, ta sanduvií ra, tacuhva nacuhva ca chi cuaha ca chiti.

³ Suti cha sandundi ra chi ndo chihin tuhun cha cahín chihin ndo.

⁴ Sañihi ca ndo cu ñin ri ndo chihin, tari yuhu ñin ri cuví chihin ndo. Tari noo soco yoho cuan ma cuví

cuhva chi chiti cha maa ri maa chi tatu ña nyañaá chi chata yoho cahnu, tyicuan caa nyoho, ma cuví sacuvi ndo cha vaha tatu ña ñin ri cuví ndo chihin.

⁵ 'Yuhu cuví yoho cahnu cuan. Ta nyoho cuví ndo soco yoho cuan. Ñu cha nyañaá chii, ta yuhu nyañaí chi ñu, cuaha cha vaha sacuví ñu, vatyí ñahri cha cuví sacuvi ndo tatu yori yuhu nyaá chihin ndo.

⁶ Ñu cha ña nyañaá chii, cusacuita Suti chi ñu, tari sacuitá yo soco yoho cha chahnyá yo vatyí ña chahá chiti. Ta na ityi ta nasataca yo, ta cucayu nu ñuhu.

⁷ 'Tatu nyoho ta tyicuan ri nyañaá ndo chii, ta ña naa ñi ndo tuhin, cācan ndo ñáá cha cuñi ndo, ta yuhu cuhve.

⁸ Tatu cuaha cha vaha sacuví ndo, sacahnú xaan ndo chi Suti. Ta tyicuan caa sañahá ndo tyi cuví ndo noo ñu ndicha cha nyicón chii.

⁹ Yuhu cuñi chi ndo, tari cuñi Suti chii. Ma naa ñi ndo cuhva cuñi chi ndo.

¹⁰ Tatu quichahá ndo tuhun cahín, cuacuñi que chi ndo. Tari yuhu quichahí nu cahán Suti, ta cuñi xaan ra chii.

¹¹ 'Cahín tyehe caa chihin ndo tacuhva na cusí cuñi ndo chihin. Ta cucusi vavaha cuñi ndo.

¹² Tuhun cha catyí chi ndo, ican cuví ihya: na cuñi ndo chi tahan ndo, tari cuñi yuhu chi ndo.

¹³ Tatu yaha xaan cuñi yo chi tahan yo, caña ñi yo cuhva yo nyacua nya ñayivi yo cha cuenda ñu.

¹⁴ Nyoho cuví ndo amigue, tatu sacuví ndo cha catyí chi ndo.

¹⁵ Ña catyí que vatyí musi cuví chi ndo, vatyí noo musu ña chitó ra ñáá cha sacuví chitoho ra. Amigue, catyí chi ndo vatyí sacote chi ndo tandihí maa cha catyí Suti chii.

¹⁶ Nyoho ña cachí ndo chii. Mai nacachí chi ndo. Ta catyí chi ndo na cuhun ndo ta sacuvi ndo tyiño nui. Ta tyiño sahá ndo cucuvaha xaan tari cuvaha noo itu. Ta cuaha vavaha ñiñi cucoo, ta ma tiví maa chi. Ta tyicuan

caa ta Suti cuhva ra tandihí cha cacan ndo chihin sívi.

¹⁷ Ican ihya cuví cha catyí chi ndo: Cũñi ndo chi tahan ndo.

Ñáyivi cuenda ñuhu ñayivi tasi cuñi nyehé ñu chi ra Jesús ta chi ñu nyicón chi ra

¹⁸ Tatu ñu cuenda ñuhu ñayivi ña cuñi nyehe ñu chi ndo, coto ndo vatyí xihna ca chi yuhu ña cuñi nyehe ñu.

¹⁹ Tyehe ta cuví ndo ñu cuenda ñuhu ñayivi, cucuñi ñu chi ndo tari cuñi ñu chi tahan ñu. Soco yuhu nacachí chi ndo mahñu ñu. Ta yucuan chaha tasi cuñi nyehe ñu chi ndo, vatyí ñima ca ñu cuenda ñuhu ñayivi cuví ndo.

²⁰ Nícohon iñi ndo tuhun cha catyí chi ndo, tyi ni noo musu ta ña cahnu ca ra ican saha chitoho ra. Ta tatu quichahá ñu tuhun cahín chihin ñu, tyícuan caa cuquichaha tucu ñu tuhun sañaha ndo chi ñu. Ta tatu satasí iñi ñu chii, cusatasí iñi tucu ñu chi nyoho.

²¹ Tandihí ihya cusacuvi ñu chi ndo cha catyí yuhu, vatyí ña ñohó nuu ñu chi ra cha tachí chii.

²² Tyehe ta ña quichí cahin chihin ñu, yucuan ndicha ñahri cuatyí ñu. Soco vityin ñahri síqui tyaa ñu cuenda cuatyí ñu, vatyí cha yaha catyí chi ñu.

²³ Ñu cha tasi cuñi nyehé chii, tasi cuñi nyehé ñu chi Suti ñandihí.

²⁴ Ñahri cuatyí ñu, tyehe ta ña sacuvi milagru cha ní nonga ñáyivi ta sacuvi ca. Soco cha nyehé ñu tandihí ihya. Ta vasi cha nyehé ñu soco tasi cuñi nyehé ñu chii, ta chi Suti ñandihí.

²⁵ Soco tandihí tuhun ihya cuví chi tyehe caa, vatyí cuñi chi cha chino cava tari cuhva catyí nu tutu ley cha sacua ha ñu nu catyí chi tyehe caa: “Ñahri vihi tuhun, ta cutasi cuñi ñu nyehe ñu chii”, catyí chi.

²⁶ Soco cuquichi Tatyí Ii, ra cha cahán maa ri cha ndicha. Maa ra cuví ra cha naquehen ndahvi chi ndo. Nachai nu nyaá Suti ta cusaquichi ndi chi ra nu nyicú ndo. Ta quívi quichi ra, cucahan ra tumañi iñi cuende.

²⁷ Ta nyoho tucu cucahan ndo tumañi iñi cuende, vatyí nyaá ndo chihin nyata quívi quichaha sahatyiñe.

16

¹ Catyí tuhun ihya chi ndo tacuhva cha ma sandihí ndo cha chinó iñi ndo chii.

² Cutava ñehe ñáyivi chi ndo vehe ñuhu. Ta cuchaa chi quívi vatyí ñu cahñi chi ndo, cucuñi ñu vatyí tyiño nuu Nyoo sacuví ñu.

³ Tyehe caa cusacuvi ñu cha cuenda vatyí ni chiin maa ta cohon nuu ca ñu ni chi Suti ta ni chi mai.

⁴ Catyí tuhun ihya chi ndo tacuhva vatyí quívi chaa chi tari cuhva catyí chi ndo, nícohon iñi ndo vatyí cha yaha catyí chi ndo.

Tyiño sahá Tatyí Ii Nyoo

Ña catyí tuhun ihya chi ndo quívi xihna ri cha cuenda tyi nyaá que chihin ndo.

⁵ Soco vityin cuhin vatyí cunyai chihin ra cha tachí chii. Ta ni noo nyoho ña ndacá tuhun ndo chii nya cuhin.

⁶ Soco nducuihya ndihí iñi ndo cha catyí tuhun ihya chi ndo.

⁷ Soco catyí cha ndicha chi ndo: vaha ca cha cuhin cha cuenda cha vaha chi ndo. Vatyí tatu ma cuhin, ma quichi Tatyí Ii cha naquehen ndahvi chi ndo. Soco tatu cuhin, cutachi mai chi ra.

⁸ Ta quívi quichi ra cusacoto ra chi ñáyivi iyó síqui ñuhu ñayivi vatyí iyó cuatyí ñu. Ta cusañaha ra chi ñu vatyí iyó noo cuhva vaha tahán chi coo ñu. Ta cusacoto ra chi ñu vatyí cutuñi chi ñu nuu Nyoo.

⁹ Cusacoto ra chi ñu tyi iyó cuatyí ñu cha cuenda cha ña chinó iñi ñu chii.

¹⁰ Cusacoto ra chi ñu tyi iyó noo cuhva vaha cha tahán chi coo ñu, vatyí yuhu cuhin nu nyaá Suti ta ma nyehe ca ndo chii.

¹¹ Ta cu coto ñu tyi cusandaa Nyoo cuatyí ñu vatyí cha yaha cundaa cuatyí ra cuví cuihna, ra nyacá ñaha síqui ñuhu ñayivi ihya.

¹² Ta cuaha ca tuhun nyaá catyí chi ndo, soco ma cutuñi iñi ndo vityin.

13 Soco quiví quichi Tatyí li cha cahán maa ri cha ndicha, maa ra cusañaha tandihí cha ndicha chi ndo. Vatyí ñima cuenda maa ra cucahan ra, soco cucahan ra tandihí cha chiñí ra. Ta cusacoto ra tuhun ñáá cha cucuvi nu cuahan ca chi.

14 Cusacahnu ra chii, vatyí cunaquehen ra tuhun ta cusañaha ra chi ndo.

15 Tandihí cha iyó chi Suti, chi mai cuví ñandihí. Yucuan chaha vatyí Tatyí li cuquehen cuenda ra cha iyó chii, ta cusañaha ra chi nyoho.

Ra cha cachicá noo chihin ra Jesús cuihya ñi ra, soco nu cuahan ca chi cucusí cuñi ra, catyí ra Jesús

16 'Ña naha ca ta ma nyehe ca ndo chii, soco yaha cuan ta cunyehe tucu ndo chii, vatyí yuhu cuhin nu nyaá Suti —catyí ra Jesús.

17 Tyicuan ta suhva ra cachicá noo chihin ra, candaca tuhun ra chi tahan ra ta catyí ra:

—¿Ñana vaha tuhun cahán ra ihya? Catyí ra chi yo vatyí ña naha ca ta ma nyehe ca yo chi ra, ta yaha cuan ta cunyehe tucu yo chi ra inga chaha vatyí chun ra nu nyaá Sutu ra.

18 ¿Ñáá cha cuñí chi catyí cha ña naha ca cuan? Ña cutuñí ñi yo ñáá túhun cahan ra —cacatyí ra.

19 Ra Jesús tuví ñi ra vatyí cacuñí ra candaca tuhun ra chi ra, ta catyí ra:

—Yuhu catyí chi ndo vatyí ña naha ca ta ma nyehe ca ndo chii, soco yaha cuan ta nanyehe tucu ndo chii. ¿Atu ican ihya cuví cha ndacá tuhun ndo chi tahan ndo?

20 Cha ndicha catyí chi ndo vatyí nyoho cucuacu ndo ta cunducuihya ñi ndo, soco ñu cuenda ñuhu ñayiví cusí cuñi ñu. Soco vasi cuihya ñi ndo vityin, tucuihya ñi cha iyó chi ndo cunanduvi chí tusí ñi.

21 Cuhva cha cuacu sehe noo ñaha síhi nyehé ña cha uhvi. Soco cha yaha cha cacu cha lee cuan, ni tuhun cha uhvi cuan ña nicohon ca ñi ña cha cuenda cha sí cuñí ña vatyí cacu noo cha lee sehe ña.

22 Tyicuan caa tucu nyoho vityin, nducuihyá ñi ndo. Soco cunanyehe tiqui chi ndo inga chaha. Tyicuan ta cundusí tucu ñi ñima ndo. Ta yori cuví tinyaa tusí ñi cuan chi ndo.

23 'Quiví cuan ñahri ca cha cundaca tuhun ndo chii. Cha ndicha catyí chi ndo vatyí Nyoo Suti cucuhva tandihí cha cacan ndo chi ra chihin sívi.

24 Nya vityin ta ta ñaha ca cha cacan ndo chihin sívi yuhu. Cacan ndo ta cuñihi ndo tacuhva na cusí xaan cuñi ndo.

Ra Jesucristo cuví chasaha ra chi cha ña vaha iyó ñayiví

25 'Maa maa ri chihin cuhva ri sañahí chi ndo. Soco nu cuahan ca chí, ñima ca chihin cuhva cuasañahi chí ndo, soco cuacatyí cachi chí ndo tuhun Suti.

26 Quiví cuan chihin sívi cucacan ndo cha cacan ndo chí ra. Ta ña chiñuhú ca cha cucuacu ndahvi nuu Suti cha cuenda ndo.

27 Vatyí maa Nyoo Suti suri cuñí ra chí ndo. Cuñí ra chí ndo vatyí nyoho cuñí ndo chii. Ta nachinó ñi ndo vatyí nu nyaá Nyoo quite.

28 Nu nyaá Suti quite vatyí quichi síqui ñuhu ñayiví ihya. Soco vityin cusandoi ñuhu ñayiví ihya vatyí cunuhi nu nyaá ra —catyí ra Jesús.

29 Tyicuan ta ra cachicá noo chihin ra cacatyí ra:

—Vityin ndicha catyí cachun chí ndi.

30 Vityin nyehe ndi vatyí chitón tandihí maa tuhun, ta ña nyatun cha ndaca tuhun ndi chuun, vatyí cha chitón nyacua nya tandihí cha chicá xiñi ndi. Yucuan chaha chinó ñi ndi vatyí nu nyaá Nyoo quiton —cacatyí ra chí ra Jesús.

31 Ta catyí ra Jesús:

—Ta vityin ¿atu chinó ñi ndo chii?

32 Soco catyí chí ndo vatyí cha vachi chí cuhva ta vityin cuví cuhva vatyí nyoho cuquiti cuatyí ndo sín sín ityi, ta cusandoo ndo notuhun mai. Soco ñima notuhun ri mai nyaá, vatyí nyaá Suti chihin.

33 Catyí tuhun ihya chí ndo tacuhva na coo cha taxi ri ñima ndo cha

cuenda cha ñn ri cuví ndo chihin. Ñuhu ñayiví ihya cunyehe ndo tñdoho, soco sanyee ndo iñi ndo vatyí yuhu cha cuví chasahi chi cha ña vaha cha iyó ñuhu ñayiví ihya.

17

Nu chicán tahvi ra Jesús cuenda ra cachicá noo chihin ra

¹ Cha yaha cha catyí ra Jesús tuhun ihya, nanyehē ndaa ra ityí andiví ta catyí ra:

—Sutu Mañi yuhu, cha chaḗ cuhva vityin. Sacahnu chi yuhu cha cuví sehun, tacuhva sacahnu tucu yuhu chuun.

² Vatyí tyaun tyiño chii siqui tandihí ñáyiví, vatyí cuhve ñayiví cha ma naa ca maa chi tandihí ñu chahun chii.

³ Ta ihya cuví cuhva coo ñu ñayiví cha ma naa ca maa: Cha cohon nuu ñu chuun vatyí noo tuhun ri maun cuví Nyoo cha ndicha vaha, ta cohon nuu ñu chi yuhu ra Jesucristo ra cha tachun chi.

⁴ 'Cha sacahní chuun ihya siqui ñuhu ñayiví ta cha sandihí tyiño cha chahun chii.

⁵ Ta vityin, Sutu Mañi yuhu, cua ndichí nu nyaun, ñacuhva cha chahun cuví maun chii, tari cuhva cha chiyo chii nyata ni cumañi ca chino ñuhu ñayiví.

⁶ 'Tandihí ra cha chahun chii ra cha natavá vahun mahñu ñu iyó siqui ñuhu ñayiví ihya sacote chi ra yóo ra cuví yoho. Chi maun cuví chi ra ta chahun chi ra chii. Ta quichahá ra tuhun cahún.

⁷ Vityin cachitó ra vatyí tandihí cha chahun chii, nu nyaún quita.

⁸ Vatyí catyí chi ra tuhun cha catyún chii, ta maa ra canatiñ cuenda ra. Ta tuví iñi ra vatyí ndicha cha quite nu nyaún, ta chinó iñi ra tyi maun tachí chii.

⁹ 'Yuhu chiquén cha cuenda ra chuun. Ña chiquén cha cuenda ñáyiví ña ñohó nuu chuun, soco chiquén cha cuenda ra cha chahun chii, vatyí chi maun cuví chi ra.

¹⁰ Tandihí cha iyó chii, chi maun cuví. Ta tandihí cha chuun, chi mai cuví. Ta tandihí cuan sacahnú chii.

¹¹ 'Yuhu ma ndoo que ñuhu ñayiví ihya, soco maa ra cundoo ra ñuhu ñayiví ihya. Ta yuhu cuhin tyi cunyai chuhun. Sutu Mañi yuhu, saha cumi chihin cha ndicha ñuhu chi ra cha chahun chii, tacuhva na cu ñn ri ra chihin ra tahan ra, tari yoho chihin yuhu, ñn ri cuví yo.

¹² Quiví chinyai ñuhu ñayiví ihya chihin ra, saha cumi chi ra cha chahun chii chihin cha ndicha ñuhun. Ta sahi cuenda chi ra. Ta ni noo ra ña cuanaa soco noo tuhun ri ra cha cha nyaá maa cunaa, ican ra cuan cunaa, tacuhva chino cava tari cuhva catyí nu tutu maun.

¹³ 'Vityin cha vachi nu nyaún, soco cha ni ri ca cha nyaí siqui ñuhu ñayiví ihya, catyí tuhun ihya tacuhva na cusí cuñi ra tari mai.

¹⁴ Yuhu catyí chi ra tuhun cahún, soco ñáyiví cuenda ñuhu ñayiví tasi cuñí nyehe ñu chi ra nyicón chi yo, cha cuenda vatyí ñima ra cuenda ñuhu ñayiví cuví ra, tari yuhu, ñima ra cuenda ñuhu ñayiví cuví.

¹⁵ Ña chiquén chuun cha tavon chi ra nyicón chi yo nu ñuhu ñayiví ihya, soco saha cumun chi ra coto ñáá cha saha ra ña vaha chi ra.

¹⁶ Tari yuhu ñima ra cuenda ñuhu ñayiví cuví, tyicuan caa tucu ra ihya, ñima ra cuenda ñuhu ñayiví cuví ra.

¹⁷ Cuhva cha ndicha chi ra nasacuví ra maa maa ri cuhva cuñí maun. Tuhun cahún, ican cuví cha ndicha.

¹⁸ Tari tachun chi yuhu nu nyicú ñu iyó siqui ñuhu ñayiví, tyicuan caa tachí tucu yuhu chi maa ra nyicón chi yo nu nyicú ñu iyó siqui ñuhu ñayiví.

¹⁹ Ta cha cuenda cha vaha chi ra, sacuví yuhu maa maa ri cuhva cuñí maun, tacuhva vatyí chihin cha ndicha, cuví sacuví tucu maa ra maa maa ri cuhva cuñí maun.

²⁰ 'Soco ñima cha cuenda ri ra ihya chiquén chuun, soco chicán tiqui cha cuenda ñáyiví cha cuchino iñi chii chihin tuhun cahán ra ihya nu cuahan ca chi.

²¹ Chiquén chuun na tandihí ñu ta ñin ri na cuví ñu chihin tahan ñu. Ta noo ri na cuví ñu chihin yo, Sutu Mañi yuhu. Tari yoho nyaún chihin ta yuhu nyaí chuhun, na cu ñin ri cuví ñu chihin yo, tacuhva vatyí tandihí ñáyiví iyó siqui ñuhu ñáyiví chino iñi ñu tyi maun tachí chii.

²² Yuhu चाहि cha ndicha ñuhu chi ñu nyicón chi yo, suri cha ndicha ñuhu cha चाहुन chii. Vatyí chihin cuan na ñin ri cuví ñu tari yoho chihin yuhu noo ri cuví yo.

²³ Yuhu nyaí chihin ñu ta yoho nyaún chihin, tacuhva na cuví yo noo ri chihin ñu. Tyicuan caa ta coto tandihí ñáyiví iyó siqui ñuhu ñáyiví tyi maun tachí chii, ta cuñí xaun chi ñu nyicón chi yo tari cuñún chi yuhu.

²⁴ 'Sutu Mañi yuhu, maun चाहुन chi ñu chii. Ta cuñí cha cunyaa ñu chihin nu cuacunyai, tacuhva nanyehe ñu cha ndicha ñuhu cha चाहुन chii vatyí cuñún chii nyata ni cumañi ca chino ñuhu ñáyiví.

²⁵ Sutu Mañi yuhu, ra vaha cuvún, ta ñu cuenda ñuhu ñáyiví ña ñohó nuu ñu chuun, soco yuhu ñohó nui chuun. Ta ra nyicón chi yo ihya chitó ra tyi maun tachí chii.

²⁶ Cha catyí chi ra yóo ra cuvún, ta cucatyí tiqui inga chaha, tacuhva vatyí tari cuhva cuñún chii, tyicuan caa cuhva cuacuñi tucu maa ra chi ra tahan ra. Ta yuhu cunyai aña ra.

18

Nu cuahan ra Jesús vehe caa

(Mt. 26.47-56; Mr. 14.43-50; Lc. 22.47-53)

¹ Cha yaha cha catyí ra Jesús tuhun ihya, quitá ra ta cuahan ra chihin ra cachicá noo chihin ra inga chiyo yuhu yuvi Cedrón. Ta yucuan nyaá noo chacu yutun yucu. Ta yucuan quihví ra Jesús chihin ra cachicá noo chihin ra.

² Ta ra Judas, ra cha naxicó tuhun chi ra, chitó ra nu cuahan ra Jesús. Vatyí tuhvá ra Jesús चाहán ra yucuan chihin ra cha cachicá noo chihin ra.

³ Ta yucuan chaá ra Judas chihin cuaha sindaro ta cuaha policia cuenda vehe ñuhu cha tachí ra cuví nuu chi tata sutu ta ra cuví fariseo. Chaá coyo ra yucuan, canyisó ra mityi, ta canyiso ra lámpara ta ñuhu yiti.

⁴ Ta vatyí ra Jesús cha chitó ra tandihí cha cucuvi chi ra, quitá ra ta ndaca tuhun ra chi ra:

—¿Yóo chi nanducú ndo? —catyí ra.

⁵ Ta cacatyí ra chi ra:

—Chi ra Jesús ra ñuu Nazaret.

Ta catyí ra Jesús:

—Yuhu cuví —catyí ra.

Ta ra Judas, ra cha naxicó tuhun chi ra Jesús nuu ra xaun iñi chi ra, nanyaá ra chihin ra yucuan.

⁶ Ta cuhva cha catyí ra Jesús: “Yuhu cuví”, tandihí ra canandaca chata ra ta canduva ra nu ñuhú.

⁷ Tyicuan ta inga tucu chaha ndaca tuhun ra Jesús chi ra, ta catyí ra:

—¿Yóo chi nanducú ndo?

Ta cacatyí ra:

—Chi ra Jesús ra ñuu Nazaret.

⁸ Ta catyí ra Jesús:

—Cha catyí chi ndo tyi yuhu cuví. Tatu chii nanducú ndo, saña ndo chi ra chica noo chihin na cuñuhun coyo ra —catyí ra Jesús chi ra.

⁹ Ican tyehe caa catyí ra Jesús tacuhva na chino cava cha catyí maa ra ta ityi chata ca nu catyí ra: “Ra cha chaha Suti chii, ni noo ra ña cuanaá.”

¹⁰ Tyicuan ta ra Simón Pedro nyisó ra noo mityi. Ta tava ra ta chahnya ra soho chiyo vaha noo ra cha nañí Malco. Cuví ra cuan musu ra cuví nuu chi tandihí tata sutu.

¹¹ Soco ra Jesús catyí ra chi ra Pedro:

—Natyihí mityun chichi veno. Tatu Nyoo Suti ta cuñí ra cha nyehi tindoho, tahan chi cha nyehi —catyí ra Jesús chi ra.

Nu nanyaá ra Jesús nuu ra cuví nuu chi tata sutu

(Mt. 26.57-58; Mr. 14.53-54; Lc. 22.54)

¹² Tyicuan ta sindaro cuan chihin capitán ra, ta policia cuenda vehe

ñuhu, catiñ ra chi ra Jesús, ta chahñi ra chi ra vatyí cuhun ra vehe caa.

¹³ Tyicuan ta chinyaca ra chi ra vehe ra Anás, vatyí ra Anás cuan tyiso ra Caifás cuví chi ra. Ta cuiya cuan cuví ra Caifás ra cuví nuu chi tata sutu.

¹⁴ Ican ra Caifás ihya cuví ra cha catyí chi ra cacuví nuu chi ñu Israel vatyí vaha ca cha cúvi noo ri rayí cha cuenda tandihí ñáyivi ñuu.

Nu catyí ra Pedro tyí ña ñohó nuu ra chi ra Jesús

(Mt. 26.69-70; Mr. 14.66-68; Lc. 22.55-57)

¹⁵ Ra Simón Pedro ta nonga ra cha chica noo chihin ra Jesús, canyicón ra chi ra Jesús nu cuahan ra nuquehe vehe ra Anás cuan. Ta ra cuví nuu chi tata sutu cuan ñohó nuu ra chi inga ra cuan. Yucuan chaha quihví ra cuan chihin ra Jesús nuquehe ra cuví nuu cuan.

¹⁶ Soco ra Pedro ndoo ra yuvehe chata vehe. Yucuan chaha quita ra cha ñohó nuu chi ra cuví nuu chi tata sutu cuan, ta cahan ra chihin ñaha cha nyaá yuvehe cuan. Ta tyihí ra chi ra Pedro chichi nuquehe cuan.

¹⁷ Tyicuan ta ñaha cha nyaá yuvehe cuan ndaca tuhun ña chi ra Pedro, ta catyí ña:

—¿Atu ñima noo ra chica noo chihin rayí cuan cuvún?

Ta ra Pedro catyí ra:

—Ñime cuví —catyí ra chi ña.

¹⁸ Tyicuan ta musu ta policia cha tayucú yucuan, casanatahan ra ñuhu vatyí vichin xaan. Ta tayucú ra casanasaá ra chi ra. Ta ñohó tucu ra Pedro cuan yunuhu cuan, sanasaá ra chi ra.

Nu sanahma ra cuví nuu chi tata sutu chi ra Jesús

(Mt. 26.59-66; Mr. 14.55-64; Lc. 22.66-71)

¹⁹ Tyicuan ta ra cuví nuu chi tata sutu quichaha ndaca tuhun ra chi ra Jesús, yóo ra cuví ra cachicá noo chihin ra, ta ñáa cha sañahá ra chi ñáyivi.

²⁰ Ta ra Jesús catyí ra chi ra:

—Yuhu chihin nuu tandihí ñáyivi cahín. Ta sañahí chichi vehe ñuhu tahan tahan ñuu ta chichi vehe ñuhu cahnu ñuu ihya nu ndu ín ri tandihí ñu Israel. Ta ñahri tuhun xehe cahín.

²¹ ¿Ñáa tuhun cha ndaca tuhun chii? Vaha taxin ca ndaca tuhun chi ñu cha chiñi tuhun cahín, ta maa ñu nacatyí ñu ñáa tuhun cahín chihin ñu. Maa ñu chitó ñu ñáa tuhun cahín —catyí ra Jesús chi ra.

²² Cuhva cha catyí ra Jesús tuhun ihya, noo policia vehe ñuhu cha nanyaá cuan, cañi ra noo nuu ra Jesús ta catyí ra:

—¿Atu tyiña caa nacañun nu cahan ra cuví nuu chi tata sutu? —catyí ra chi ra Jesús.

²³ Ta ra Jesús catyí ra:

—Tatu cahín noo tuhun ña vaha, catyí chii nya maa maa ña vaha cahín. Soco tatu cahín tuhun vaha, ¿ñáa tuhun cha cañun chii? —catyí ra Jesús chi ra cuan.

²⁴ Yahá cuan ta nuhñí ra Jesús, ta tachí ra Anás chi ra nu nyaá ra Caifás, ra cuví nuu chi tata sutu.

Nu catyí ra Pedro inga chaha vatyí ña ñohó nuu ra chi ra Jesús

(Mt. 26.71-75; Mr. 14.66-72; Lc. 22.58-62)

²⁵ Ta ra Pedro nanyaá ca ra yunuhu cuan sanasaá ra chi ra. Ta catyí ñu chi ra:

—¿Atu ñima noo ra chicá noo chihin ra cuan cuví yoho? —catyí ñu chi ra.

Ta ra Pedro tixehe ra, ta catyí ra:

—Ñime.

²⁶ Tyicuan ta noo musu ra cuví nuu chi tata sutu, noo ra cha cuví ñáyivi chi ra cha chahnya ra Pedro soho, quichaha ndaca tuhun ra ta catyí ra:

—Ta caa cui ri tyi nyehi chuun chihin ra chichi chacu cuan —catyí ra chi ra Pedro.

²⁷ Ta ra Pedro tixehe ra inga chaha, ta caa cuhva ri cuan ta chacu noo loho.

Nu nanyaá ra Jesús nuu ra Pilato
(Mt. 27.1-2, 11-14; Mr. 15.1-5; Lc. 23.1-5)

²⁸ Yaha cuan ta quita coyo ra chihin ra Jesús vehe ra Caifás ta chinyaca ra chi ra vehe tyiño gobernador. Cha vachi cundichin ta ra Israel ña caquihvi ra chichi vehe tyiño cuan vatyí ñima vehe ñu Israel cuví. Ta vatyí catyí ñu tyi yica cha quihvi ñu vehe savahri vatyí coto ma cuví cuxiñi ñu quivi vico pascua cuan.

²⁹ Yucuan chaha quita ra Pilato vatyí cahan ra chihin ra, ta catyí ra:

—¿Ñáá cuatyí tyaá ndo siqui ra ihya? —catyí ra Pilato chi ra ñuu Israel.

³⁰ Ta canacahan ra Israel ta catyí ra:

—Tyehe ta ñima noo ra iyó cuatyí cuví ra, ma nacuhva cuenda ndi chi ra chuun —cacatyí ra chi ra Pilato.

³¹ Tyicuan ta ra Pilato catyí ra chi ra:

—Quehen maa ndo chi ra, na cuntuñi chi ra nuu maa ndo tari cuhva catyí ley maa ndo.

Ta nacahan ra ñuu Israel cuan ta cacatyí ra:

—Soco nyuhu ñu Israel ñahri ityi iyó chi ndi cha cahñi ndi chi ni noo ñáyivi —catyí ra.

³² Tyicuan caa chinq cava cha catyí ra Jesús yoso caa cucúvi ra.

³³ Tyicuan ta nandihvi tucu ra Pilato chichi vehe tyiño cuan inga chaha. Ta cana ra chi ra Jesús ta ndaca tuhun ra chi ra:

—¿Atu yoho cuvún rey cuenda ñu Israel? —catyí ra chi ra.

³⁴ Ta ra Jesús catyí ra:

—¿Atu cha cuenda maun ndaca tuhun, o inga ñu nacatyí ñu tuhin chuun? —catyí ra Jesús chi ra Pilato.

³⁵ Ta catyí ra Pilato:

—Ñima ra ñuu Israel cuví yuhu. Suri ra ñuu maun ta ra cuví nuu chi tata sutu ñuu maun cuví ra canacuhva cuenda chuun chii. ¿Ñáá cha sacuvun? —catyí ra chi ra Jesús.

³⁶ Tyicuan ta nacahan ra Jesús ta catyí ra:

—Nu nyacá ñahi ñima cuenda ñuhu ñayivi ihya cuví. Tyehe ta ican, ra nyicón chii cañi tahan ra tacuhva ma cunyai ndaha ra Israel. Soco nu

nyacá ñahi, ñima cuenda ihya cuví —catyí ra Jesús chi ra Pilato.

³⁷ Tyicuan ta ra Pilato catyí ra chi ra:

—¿Tu tyicuan caa, rey cuvún vii? —catyí ra Pilato chi ra Jesús.

Ta nacahan ra Jesús ta catyí ra:

—Rey cuví tari catyun chiña. Yucuan cuenda caqui ta vachi ñuhu ñayivi ihya, vatyí catyí ñáá cha cuví cha ndicha. Tandihí ñu quichaha cha ndicha, tyasohó ñu tuhun cahín —catyí ra Jesús.

³⁸ Ta ra Pilato catyí ra chi ra:

—¿Ta ñáá cha cuví cha ndicha? —catyí ra.

Nu cuacacahñi ra chi ra Jesús

(Mt. 27.15-31; Mr. 15.6-20; Lc. 23.13-25)

Cha yaha cha ndaca tuhun ra tuhun ihya, quita ra Pilato chican ra chihin ra Israel inga chaha ta catyí ra:

—Yuhu ña nañihi mai ni noo cuatyí ra ihya.

³⁹ Soco nyoho iyó noo costumbre chi ndo cha chican ndo na sañe chi noo ra ñohó vehe caa cha vico pascua ihya. ¿Atu cuñi ndo cha sañe chi ra cha cuví rey cuenda ndo ñu Israel? —catyí ra Pilato chi ra.

⁴⁰ Tyicuan ta tandihí ra quichaha canachaa ra ta catyí ra:

—¡Ma sañon chi ra chiña! ¡Chi ra Barrabás sañon! —catyí ra.

Ta ra Barrabás cuví ra noo ra suhu.

19

¹ Tyicuan ta quehen ra Pilato chi ra Jesús ta tachí ra na cucañi sindaro chi ra.

² Ta sindaro savaha ra noo corona chihin iñu ta catyihí ra xiñi ra Jesús. Ta sacuihno ra chi ra chihin noo sahma tyacú nyaa tari cha tuhvá rey cañihno.

³ Tyicuan ta catuhva ra nu nanyaá ra ta chacú nyaa ra chi ra, ta cacatyí ra:

—¡Nocumi chuun yoho Rey cuenda ñu Israel! —cacatyí ra, ta cacatu ra chi ra.

⁴ Tyicuan ta quita tucu ra Pilato inga chaha ta catyí ra chi ra:

—Nyehe ndo cuatave chi ra ityi nuu ndo tacuhva nanyehe ndo vatyi ni noo cuatyí ra ña nañihí —catyí ra Pilato chi ra.

⁵ Ta quita ra Jesús yihí corona iñu cuan xiñi ra, ta ñihnó ra sahma tyacu nyaa cuan. Tyicuan ta ra Pilato catyí ra chi ra:

—¡Ma ra ihya! —catyí ra chi ra.

⁶ Cuhva cha cananyehe ra cacuví nuu chi tata sutu ta policia chi ra, quichaha cacana chaa ra ta catyí ra:

—¡Cahñi chi ra nu cruzi! ¡Cahñi chi ra nu cruzi! —cacatyí ra.

Soco ra Pilato catyí ra chi ra:

—Quehen maa ndo chi ra ta cahñi maa ndo chi ra nu cruzi. Vatyí yuhu ni noo cuatyí ra ña nañihí.

⁷ Soco nacahan ra Israel cuan ta cacatyí ra:

—Iyó noo ley chi ndi, ta cuhva catyí ley ndi, cuñí chi cha cúvi ra vatyí nasahá ra Sehe Nyoo chi ra —cacatyí ra.

⁸ Cha chiñi ra Pilato tuhun ihya, nayuhví ca ra.

⁹ Ta ndihví tucu ra inga chaha chichi vehe tyiño, ta ndaca tuhun ra chi ra Jesús:

—¿Nya quita yoho? —catyí ra chi ra.

Soco ra Jesús ñahri cha nacahan ra.

¹⁰ Tyicuan ta ra Pilato catyí ra chi ra:

—¿Ñáá tuhun ña nacahún nu cahán yuhu? ¿Atu ña chitón vatyí ra cuví tyiño cuví ta iyó ityi chii cha tyai chuun nu cruzi, ta iyó tucu ityi chii cha sañe chuun? —catyí ra Pilato chi ra Jesús.

¹¹ Ta nacahan ra Jesús ta catyí ra:

—Tyehe ta ña chaha Nyoo tyiño cuan chuun, ñahri ityi iyó chuun cha tachi tuñun chii. Yucuan chaha, ra cha cachaha cuenda chii chuun, cahnu ca cuatyí ra ican saha yoho —catyí ra Jesús chi ra Pilato.

¹² Nya cuhva cuan ta nducu ra Pilato cuhva saña ra chi ra Jesús, soco ra Israel cacana chaa ra siqui ra, ta catyí ra:

—¡Tatu sañon chi ra, ñima amigo rey cahnu cuví chuun! Vatyí tandihí ri ra

cha catyí tyi rey cuví ra, ra xaan iñi chi rey cahnu cuví ra —cacatyí ra.

¹³ Tyicuan ta cha chiñi ra Pilato tuhun ihya, tachi ra na quita ra Jesús ityi chata vehe. Ta chicunya ra Pilato nu tyayu ra nu tuhvá ra sandaa cuatyí ñáyiví nu nañí chi Gabata chihin sahan hebreo, ta cuñí chi catyí: “Nu yihí yuu”.

¹⁴ Ta cuví chi noo quiví cha ni cumañi ca vico pascua, ñáá cuhva ora. Tyicuan ta ra Pilato catyí ra chi ra Israel cuan:

—¡Ma rey ndo chiña!

¹⁵ Soco maa ra Israel canachaa ra ta cacatyí ra:

—¡Na cúvi ra! ¡Na cúvi ra! ¡Cahñi chi ra nu cruzi! —cacatyí ra.

Ta ra Pilato catyí ra chi ra:

—¿Atu cahñi nu cruzi chi rey ndo?

Soco ra cacuví nuu chi tata sutu cacatyí ra:

—Yori ca rey iyó. Noo tuhun ri ra César, cha cuví rey cahnu —catyí ra.

¹⁶ Tyicuan ta ra Pilato chaha cuenda ra chi ra Jesús chi ra na cunya ra nu cruzi. Ta quehen sindaro chi ra, ta cuahan ra chihin ra.

Nu chihí ra Jesucristo nu cruzi

(Mt. 27.32-44; Mr. 15.21-32; Lc. 23.26-43)

¹⁷ Ta nyisó ra Jesús cruzi ra, cuahan ra noo nu nañí: “Yiquí Xiñi Ndiyí”. Ta chihin sahan hebreo nañí chi Gólgota.

¹⁸ Ta yucuan catyaa ra chi ra nu cruzi chihin clavu. Ta ñin ri chihin ra catyaa ra uvi ca ra. Noo ra tacaá ra noo nu cruzi inchiyo xiin ra ta inga ra inga chiyo xiin ra. Ta ra Jesús tacaá ra mahñu.

¹⁹ Ta ra Pilato tachi ra tyiño na cunya letra xiñi cruzi cuan. Ta catyí chi tyehe caa: “Ra Jesús ra ñuu Nazaret, Rey cuenda ñu ñuu Israel.”

²⁰ Ta cuaha ñu Israel sacuhaha ñu tuhun cuan, vatyí yatyin ri ñuu ñu cuví nu chinanya ra cruzi ra Jesús. Ta letra cuan nyaá chihin sahan hebreo, ta sahan griego, ta sahan latín.

²¹ Yucuan chaha ra cacuví nuu chi tata sutu cacatyí ra chi ra Pilato:

—Ma tyaun: “Rey cuenda ñu ñuu Israel”, vaha ca tyaun: “Ican ra ihya cha catyí vatyí rey cuenda ñu ñuu Israel cuví ra” —cacatyí ra.

²² Soco ra Pilato catyí ra:

—Noo cha yaha tyaj, nandoo maa tyicuan caa —catyí ra chi ra.

²³ Cha yaha cha catyaa sindaro cuan chi ra Jesús nu cruzi, canaquehen ra sahma ra ta cha cumi tahan ra quehen ra noo noo sahma ra. Ta ndoo nonga sahma ra cha ña quicu ñu. Noo ri savaha ñu nyacua nya siqui ta nya yuvi.

²⁴ Ta sindaro cuan cacatyí ra chi ra tahan ra:

—Ma cahnya yo. Cuhun yo noo sihva, nyehe yo yóo chi tahan chi sahma cuan —cacatyí ra.

Tyicuan caa cuví tari cuhva catyí nu tutu Nyoo nu catyí chi tyehe caa: “Casacha ra sahme ta chahan ra noo sihva chihin chi, nyehe ra yóo ra saha canaa.” Ta ican ihya casacuví sindaro cuan.

²⁵ Ta chaha cruzi ra Jesús nanyaá sihi ra. Ta nanyaá tucu cuhu ña, ta cu María ñasihi ra Cleofas, ta cu María ñaha Magdala.

²⁶ Ta nanyehe ra Jesús chi sihi ra, nanyaá ña yatyin ri. Ta nanyehe tucu ra chi ra cha chica noo chihin ra, ra cha cuñí xaan ra chi. Ta catyí ra chi sihi ra:

—Ma sehun nanyaá chiña —catyí ra.

²⁷ Tyicuan ta catyí ra chi ra cha cuñí xaan ra chi:

—Ma sihun nanyaá chiña —catyí ra chi ra.

Ta nya quivi cuan ta naquehen cuenda ra chi ña cuanuhu ña vehe ra.

Nu chihí ra Jesús

(Mt. 27.45-56; Mr. 15.33-41; Lc. 23.44-49)

²⁸ Cha yaha tuhun ihya, cha nyehe ra Jesús vatyí cha ndihí tyiño saha ra. Tyicuan ta catyí ra:

—Ityi ndutya —catyí ra.

Ta chihin tuhun cuan nachino cava tuhun cha nyaá nu tutu Nyoo.

²⁹ Ta yucuan nanyaá noo quiyi tyitú chihin vinagre. Tyicuan ta casatyí ra

chihin noo xixan ndutya iya cuan. Ta tyaa ra noo nu soco yutun cha nañí hisopo, ta catyaa ra nya yuhu ra.

³⁰ Chihí ra Jesús ndutya cuan ta catyí ra:

—Cha iyó vaha tandihí vityin —catyí ra.

Tyicuan ta nacañí noo ra xiñi ra ta chihí ra.

Nu quiñi lanza yiqui naha ra Jesús

³¹ Noo ri ca quivi cumañi ta cuví quivi cahnu ca vico pascua cuan, ta ra cacuví nuu chi ñu Israel ña cuñí ra cha ndoo coño ñuhu cuan nu cruzi quivi nyitatu ñu, vatyí quivi nyitatu ñu quivi ii cuví. Yucuan chaha chican ra tumañi iñi chi ra Pilato na tachi ra na cucahnu sindaro sihin ra cha catacoyo nu cruzi cuan tacuhva na cacuví ra cha numi ri, ta cañehe ra coño ñuhu ra.

³² Tyicuan ta cuahan coyo sindaro nu tayucú cruzi cuan. Ta chahnu ra sihin noo ra cha tacaá yucuan. Tyicuan ta chahnu tucu ra sihin inga ra cha taca xiin ra Jesús.

³³ Soco cuhva cha cuatuhva ra nu tacaá ra Jesús, cananyehe ra vatyí cha chihí ra. Ta yucuan chaha ña cachahnu ca ra sihin ra.

³⁴ Soco suvita ri noo sindaro cuan quiñi ra lanza yiqui naha ra Jesús. Ta quitá niñi ta ndutya.

³⁵ Ra cha nacatyí tuhun ihya, noo ra cha nyehe cuví ra. Ta cha ndicha cahán ra, vatyí maa ra chitó ra vatyí cha ndicha cahán ra, tacuhva nachino tucu iñi nyoho.

³⁶ Vatyí tuhun ihya cuví chi tyehe caa tari cuhva catyí tuhun Nyoo nu catyí chi: “Ni noo yiqui ra ta ma tahnu.”

³⁷ Ta iyó nonga tucu nu catyí chi nu tutu Nyoo tyehe caa: “Cunyehe ñu chi ra cha quiñi ra lanza chi.”

Nu quihvi ra Jesús chichi ñuhú

(Mt. 27.57-61; Mr. 15.42-47; Lc. 23.50-56)

³⁸ Cha yaha tuhun ihya, ra José ra ñuu Arimatea chican ra chi ra Pilato nacuhva ra cha naquehen ra coño ñuhu ra Jesús. Ta ra José cuan cuví

ra noo ra yihí cuenda ra Jesús vasi xehe ri cha cuenda cha yuhví ra chi ra cacuví nuu chi ñu Israel. Tyicuan ta chaha ra Pilato permisú chi ra, ta ra José chahan ra chinaquehen ra coño ñuhu cuan.

³⁹ Chahan tucu ra Nicodemo, ra cha chahan chichan chihin ra Jesús cha cha cuaa. Chaa ra chihin ndutya vixi chahan. Ta noo ndutya vixi chahan cha nañ mirra nasaca ñu chihin inga cha nañ áloe. Ta quita chi tari noo oco uchi kilu cha tandihi.

⁴⁰ Yucuan ta ra José ta ra Nicodemo caquehen ra coño ñuhu ra Jesús ta canasiqui noo ra chi ra chihin sahma cuiñi cahyu ra ndutya vixi chahan cuan, tari cuhva noo tuhun cha iyó chi ñu Israel tu cuatyihí ñu noo ndiyi chichi ñuhú.

⁴¹ Yatyin nu cachahñi ra chi ra Jesús nu cruzi nyaá noo chacu yutun yucu vixi. Ta chichi chacu cuan nyaá noo ñaña chaa nu ta cohon ca ni noo ndiyi.

⁴² Yucuan tyihí ra coño ñuhu ra Jesús vatyí yatyin ri cuan nyaá ñaña cuan ta vatyí cha cua quichaha quivi nyitatu ñu Israel.

20

Nu nandoto ra Jesús

(Mt. 28.1-10; Mr. 16.1-8; Lc. 24.1-12)

¹ Cha timingu cha ñaa ca, cu María ñaha Magdala cuan chahan ña nu ñaña. Ta nyehe ña tyi ñahri ca yuu nyasi yuhu ñaña cuan.

² Tyicuan ta chinó vavaha ña cuahan ña nu nyaá ra Simón Pedro ta inga ra chica noo chihin ra Jesús, ra cha cuñi xaan ra Jesús chi. Ta catyí ña chi ra:

—Quehen ñáyivi coño ñuhu Sutú Mañi yo chichi ñaña, ta ña chitó yo nya chinyaca ñu —catyí cu María chi ra Pedro ta chi inga ra cuan.

³ Tyicuan ta ra Pedro ta inga ra cuan cuahan coyo ra nu ñaña.

⁴ Nínduvi ra ñin ri cuahan coyo ra cachino ra. Soco chino ca inga ra cuan ican saha ra Pedro, ta xihna ca ra chaa nu ñaña.

⁵ Quichaha nyehe ñihñi ra chichi ñaña, ta nyehe ra sahma cuiñi cha yihí coño ñuhu ra Jesús, catuví cuan. Soco ña quihvi ra chichi ñaña.

⁶ Yaha cuan ta chaa ra Simón Pedro chata ra, ta quihvi ra chichi ñaña cuan. Suri nyehe tucu ra cuan sahma cuan catuví.

⁷ Ta suri nyehe tucu ra vatyí sahma cha siqui noo xiñi ra Jesús, ña ñin ri cayucú chihin inga sahma cuan, soco catuví ñin.

⁸ Tyicuan ta quihvi tucu inga ra chica noo chihin ra Jesús cuan, ra cha chaa cha xihna ri nu ñaña cuan. Ta nyehe ra cha cuví cuan, ta chino ñi ra.

⁹ Vatyí cha cuví maa ta cutuñi ca ñi ra cha catyí nu tutu Nyoo, vatyí ra Jesús cuñi chi cha nandoto ra cha yaha chihi ra.

¹⁰ Tyicuan ta ra cachica noo chihin ra Jesús cuanuhu coyo ra nya vehe.

Nu tují ra Jesús nuu cu María ñaha ñuu Magdala

(Mr. 16.9-11)

¹¹ Soco cu María ndoo ña chata yatyin ri yuhu ñaña, chacú chaa ña. Cha ñiri ca cha chacú ña, nyehé ñihñi ña chichi ñaña.

¹² Ta nyehe ña uvi tahan ángel ñihnó ra sahma cuichin, nyicú ra nu catuví coño ñuhu ra Jesús. Noo ra nyaá ityi nu catuví xiñi ra, ta nonga ra ityi nu catuví chaha ra.

¹³ Ta ángel cuan ndaca tuhun ra chi ña ta catyí ra:

—Maha, ¿ñáá tuhun chacú chaun? Ta catyí ña:

—Vatyí quehen ñu chi Sutú Mañi yuhu, ta ña chité nya tyihí ñu chi ra —catyí ña chi ángel cuan.

¹⁴ Ni cahán ña tuhun ihya ta nanyocava ña ta nanyehe ña chi ra Jesús yucuan. Soco ña chitó ña cha ra Jesús cuví ra.

¹⁵ Tyicuan ta ra Jesús ndaca tuhun ra chi ña:

—¿Ñáá tuhun chacún? ¿Yóo chi nanducún? —catyí ra chi ña.

Cuñi maa ña vatyí ra sahá cumi chacu cuan cuví ra. Ta catyí ña:

—Tata, tatu yoho quehün chi ra Jesús, catyi chii nya sandoun chi ra, vaty naquehin chi ra —catyí ña chi ra.

¹⁶ Tyicuan ta catyí ra Jesús chi ña:

—¡María! —catyí ra chi ña.

Maa ña nanyehé ña ta cahan ña chihin ra chihin sahan hebreo, ta catyí ña:

—¡Raboni! —Ta cuñí chi catyí: “Maestro”.

¹⁷ Ta catyí ra Jesús chi ña:

—Ma tiun chii, vaty ta nandaa que nu nyaá Suti. Soco cuahan ta catyun chi tandihí yañi vaty cuahin nu nyaá Suti, ta suri Sutu ndo cuví chi ra. Cuahin nu nyaá Nyoi, ta suri Nyoo ndo cuví chi ra —catyí ra Jesús chi ña.

¹⁸ Tyicuan ta chahan cu María ñaha Magdala cuan chisacoto ña chi ra cachica noo chihin ra Jesús vaty nyehé ña chi ra Jesús ta catyí ra tuhun cuan chi ña.

Nu tuví ra Jesús nuu ra cachica noo chihin ra

(Mt. 28.16-20; Mr. 16.14-18; Lc. 24.36-49)

¹⁹ Suri maa quivi cuan cha quichaha vitya, cha cuacuaa ta candu ñin ri ra cachica noo chihin ra Jesús. Ta nyasí vaha yuvehe nu nyicú ra cha cuenda cha yuhví ra chi ra cacuví nuu chi ñu Israel. Ta ra Jesús tuví ra ta chicuinanyaa ra mahñu. Ta chaha ra nocumi chi ra, ta catyí ra:

—Na coo cha taxi ri añima ndo —catyí ra.

²⁰ Cha yaha cha catyí ra tuhun ihya ta sañaha ra ndaha ra ta yiqui naha ra. Ta maa ra cacusí cuñi ra cha nanyehé ra chi Sutu Mañi yo.

²¹ Ta catyí tucu ra Jesús inga chaha chi ra:

—Na coo cha taxi ri añima ndo. Tari tachí Suti tyiño chii, tyicuan caa tachí tyiño chi nyoho —catyí ra chi ra.

²² Tyicuan ta tiví ra siqui ra ta catyí ra chi ra:

—Naquehen ndo Tatyí Ii Nyoo.

²³ Ñu cha sahá ndo tucahnu iñi chi, iyó tucahnu iñi chi ñu. Ta ñu cha ña sahá ndo tucahnu iñi chi, ñahri

tucahnu iñi iyó chi ñu —catyí ra Jesús chi ra.

Nu nyehé ra Tomás chi Sutu Mañi yo chayahá nandoto ra

²⁴ Soco ra Tomás, noo ra chica noo chihin ra Jesús, ra cha catyí ñu: “ra tinihi”, yori ra nyaá chihin ra cuhva cha quichi ra Jesús.

²⁵ Yaha cuan ta canacatyí ra cachica noo chihin ra Jesús chi ra:

—Nyehe ndi chi Sutu Mañi yo —catyí ra chi ra.

Soco ra Tomás catyí ra:

—Tatu ma nyehi ndaha ra nu cahví nu yihí clavu, ta tatu ma tyihi ndahi nu yihí clavu cuan, ta tatu ma tyihi ndahi yiqui naha ra, ma chino iñi —catyí ra Tomás.

²⁶ Uña quivi yaha ta canyicú tucu ra cachica noo chihin ra Jesús noo vehe. Ta nyaá ra Tomás chihin ra. Tyicuan ta vasi nyasí vaha yuvehe soco quihví ra Jesús ta chicuinanyaa ra mahñu ra. Ta chaha ra nocumi ta catyí ra:

—Na coo cha taxi ri añima ndo.

²⁷ Tyicuan ta quichaha catyí ra chi ra Tomás:

—Tyihi nu ndahun nu cahví ndahi. Ta tyihi ndahun yiqui nahi. Ta ma caca uvi iñun, soco chino iñun —catyí ra Jesús chi ra Tomás.

²⁸ Tyicuan ta nacañan ra Tomás ta catyí ra:

—¡Sutu Mañi yuhu! ¡Nyoo Suti cuví chuun! —catyí ra Tomás.

²⁹ Ta catyí ra Jesús chi ra:

—Yoho Tomás, vityin chinó iñun tyi nyehún chi. Si ca cuñí ñu cha ña nyehé ta chinó iñi ñu —catyí ra Jesús chi ra Tomás.

Nu sacoto ra Juan ñaá cuenda chinqo libru ihya

³⁰ Ta cuaha ca milagru sacuví ra Jesús nuu ra cachica noo chihin ra, ta ñahri chicunyaa nu libru ihya.

³¹ Soco chicunyaa tuhun ihya vaty tacuhva chino iñi ndo vaty ra Jesús cuví Cristo, ra cuví Sehe Nyoo, ta vaty coo ndo ñayivi cha ma naa ca maa tatu chinó iñi ndo chi ra.

21

Nu tuvı̄ ra Jesús nuu ucha tahan ra cachica noo chihin ra

¹ Cha yaha cuan ta tuvı̄ tucu ra Jesús nuu ra cachica noo chihin ra inga chaha. Tyehe caa tuvı̄ ra yuhu miñi Tiberias.

² İ̄n ri nyicú ra Simón Pedro ta ra Tomás cha catyí ñu: “ra tinihi” chi, ta ra Natanael, ra ñuu Caná nu cuvı̄ Galilea. Nyicú tucu sehe ra Zebedeo ta uvi ca ra cachica noo chihin ra Jesús.

³ Ta catyí ra Simón Pedro chi ra:

—Cuahin cuatiin tiyaca —catyí ra.

Ta cacatyí ra chi ra:

—Cuhun tucu nyuhu chuhun —cacatyí ra.

Cuahan coyo ra ta quihvı̄ coyo ra chichi noo canoa, soco cha cuaa cuan ni noo tiyaca ña catiın ra.

⁴ Cha vachi cundichin cuan tuvı̄ ra Jesús nu ñiti yuhu miñi cuan. Socó ra cachica noo chihin ra, ña canicohón nuu ra chi ra.

⁵ Tyicuan ta catyí ra chi ra:

—Yoho ra tahan yo, ¿atu ta ñihi ca ndo tiyaca?

Ta canacahan ra ta catyí ra:

—Ta ñihi ca ndi.

⁶ Tyicuan ta nacahan ra Jesús ta catyí ra:

—Tyihi ndo tarraya chiyo vaha canoa chiña, ta ñihi ndo —catyí ra Jesús chi ra.

Tyicuan caa casacuvı̄ ra, ta yaha cuan ta nyacua ña cuvı̄ tava ra tarraya cuan nu ndutya chaha cha cuaha tiyaca yihı̄.

⁷ Ta ra cha cuñı̄ xaan ra Jesús chii catyí ra chi ra Pedro:

—¡Sutu Mañi yo cuvı̄! —catyí ra chi ra Pedro.

Cha chiñi ra Simón Pedro vatyı̄ Sutu Mañi yo cuvı̄, ndihvı̄ noo ra sahna ra, vatyı̄ tava ra cha cuatiin ra tiyaca, ta quiñi ra cuahan ra chichi ndutya cuan.

⁸ Ta inga ra cachica noo chihin ra Jesús cha coyo ra nya yuhu miñi cuan chihin canoa, caxitá ra tarraya cuan tyitú yihı̄ tiyaca, vatyı̄ yatyin ri

yuhu miñi cuan cañohó ra ta cha noo cientu metru ri.

⁹ Cuhva cha canoó ra nu ñuhú, cananyehe ra noo nu caá titi ñuhı̄. Ta catuvı̄ noo tiyaca siqui titi ñuhı̄ cuan, ta pan ñandihi.

¹⁰ Ta ra Jesús catyí ra chi ra:

—Nyaca ndo suhva tiyaca cha ni tiın ndo —catyí ra Jesús chi ra.

¹¹ Ta ra Simón Pedro ndaa ra nu canoa ta quichaha xita quiñoho ra tarraya tyitú yihı̄ tiyaca nahnu. Cientu uvi xico uchi uñi tahan ti ñohó. Ta vasi cuaha ti, ña tahnya tarraya cuan.

¹² Tyicuan ta catyí ra Jesús chi ra:

—Ñaha ndo ta curumusa ndo —catyí ra Jesús chi ra.

Ta ni noo ra cachica noo chihin ra ña cacaña iñi ra candaca tuhun ra yóo ra cuvı̄ ra vatyı̄ cachitó ra vatyı̄ Sutu Mañi yo cuvı̄ ra.

¹³ Tyicuan ta tuhva ra Jesús ta quehen ra pan, ta chaha ra chi ra. Ta suri tyicuan caa sacuvı̄ ra chihin tiyaca.

¹⁴ Ican ihya cuvı̄ chaha cu uñi cha tuvı̄ ra Jesús nuu ra cachica noo chihin ra cha yaha cha nandoto ra.

Nu cahán ra Jesús chihin ra Simón Pedro

¹⁵ Cha yaha cha curumusa ra Jesús, ndaca tuhun ra chi ra Simón Pedro:

—Simón, sehe ra Jonás, ¿atu cuñı̄ con chii ican saha ra ihya?

Ta nacahan ra Pedro ta catyí ra:

—Ay, Sutu Mañi yuhu, maun chitón tyi cuñı̄ chuun —catyí ra Pedro.

Ta catyí ra Jesús chi ra:

—Cuhva cha cachi mbee nyihi sane —catyí ra Jesús chi ra Pedro.

¹⁶ Ta ndaca tuhun ra Jesús chi ra inga chaha:

—Simón sehe ra Jonás, ¿atu cuñın chii? —catyí ra Jesús chi ra.

Ta nacahan ra Pedro ta catyí ra:

—Sutu Mañi yuhu, maun chitón tyi cuñı̄ chuun —catyí ra Pedro chi ra.

Ta catyí ra chi ra:

—Saha cumi mbee sane —catyí ra Jesús chi ra Pedro.

17 Ta chaha cu uñi ndacā tuhun ra chi ra:

—Simón Pedro, sehe ra Jonás, ¿atu cuñun chii? —catyí ra Jesús chi ra.

Cuhva cha ndacā tuhun ra chi ra cha cu uñi chaha tatu cuñí ra chi ra, ra Pedro nducuihya iñi ra, ta catyí ra chi ra:

—Sutu Mañi yuhu, maun chitón yoso caa añime ta maun chitón tyi cuñí chuun —catyí ra Pedro.

Ta ra Jesús catyí ra chi ra:

—Saha cuenda mbee sane.

18 Cha ndicha catyí chuun vatyí ta tyivaun ndihví noun sahmon ta chahun nu cuñún. Soco na cuchahun, cusanacaun ndahun ta inga ra cusandihví noo chuun. Ta cunyaca ra chuun nu ña cuñún cahun —catyí ra Jesús chi ra Pedro.

19 Cha catyí ra Jesús tuhun ihya cuñí ra catyí ra yoso caa cucúvi ra Pedro ta cusacahnu ra chi Nyoo cha cuenda cuan. Yahá cuan ta catyí ra Jesús chi ra Pedro:

—¡Cunyicon chii! —catyí ra chi ra.

Nu cahán ra Juan tuhun maa ra

20 Tyicuan ta nyocavā ra Pedro ta nanyehę ra vatyí nyicón inga ra cha chicā noo chihin ra Jesús, ra cha cuñí xaan ra Jesús chi. Suri maa ra chinyañā ra chi ra Jesús cha cuxiñi ra quiví cuan. Ta ndacā tuhun ra ta catyí ra: “Sutu Mañi yuhu, ¿yóo ra cunaxico tuhun chuun?” catyí ra, ndacā tuhun ra quiví cha ni cumañi cúvi ra Jesús.

21 Cuhva cha nanyehę ra Pedro chi ra, ndacā tuhun ra chi ra Jesús:

—Sutu Mañi yuhu, ta ra ihya, ¿ñáa cha cucuvi chi ra? —catyí ra chi ra.

22 Nacahan ra Jesús ta catyí ra:

—Tatu cuñí mai cha coo ra nyacua nya ndichi inga chaha, ¿ñáa cha cuenda yoho? Yoho cunyicon chii —catyí ra Jesús chi ra Pedro.

23 Tyicuan ta chityā tuhun ihya nu canyicú yañi yo vatyí ra cuan, ma cúvi ra. Soco ña catyí ra Jesús cha ma cúvi ra. Catyí ra: “Tatu cuñí yuhu cha coo ra nyacua nya quichi inga chaha, ¿ñáa cha cuenda yoho?”

24 Yuhu cuví ra yucuan, ra cha cahán ra Jesús tuhun. Ta nyehi tandihí cuii maa cha cuví ta tyai nu libru ihya. Yuhu chite vatyí tandihí cha tyai, ndicha.

25 Iyó cuaha ca cha sacuví ra Jesús. Tyehe ta chicunyā tahan tahan tuhun cuan nu libru, cahví iñi tyi naní ñuhu ñayiví ma cutahan tandihí libru cuan.

Tyiño Cha Casacuví Ra Apóstol: Ra Cha Tyatyíño Ra Jesucristo Chi

Nu catyí ra Jesús tyi cuaquichi Tatyí li Nyoo

¹ Yoho Teófilo, yuhu ra Lucas sacuhín tutu chuun quívi cuan. Ta nu sacuhín tutu cha xihna ri cuan, tyaj tandihí cha quichahá sacuvi ra Jesús ta tandihí cha sañahá ra nya quívi xihna ri

² ta nya quívi nandaá xica ra andívi. Ta cha cumañi ca nandaá ra andívi, nacachí ra chí ra apóstol cuenda ra. Ta tyatyíño ra chí ra chihin Tatyí li Nyoo tyi cacaca ra tyiño ra.

³ Ta maa ra Jesús nyehe ra tindoho ta chihí ra. Ta cha yahá cuan, nandotó ra ta tuví ra nu canyicú ra apóstol. Ta chichi cha uvi xico quívi, cuaha xaan chaha tuví ra nu canyicú ra, vatyi na cacoto ra vatyi ndicha cha nyitó ra. Ta cahan ra tuhun yoso caa nyacá ñaha Nyoo chí yo.

⁴ Cuhva cha nyaá ca ra chihin ra, ra Jesús catyí ra chí ra:

—Ma quita ndo Jerusalén ihya, nyacua nya naquehen ndo Tatyí li cha catyí Suti tyi cuhva ra chí ndo, tari catyí chí ndo quívi cuan.

⁵ Chihin ndutya sacondutya ra Juan chí ñáyivi. Soco nyoho ña cuaha ca quívi ta cucondutya ndo chihin Tatyí li —catyí ra Jesús.

Nu nandaá xica ra Jesús andívi

⁶ Cuhva cha canyicú ra apóstol ñin ri chihin ra Jesús, ta candacá tuhun ra chí ra:

—Sutu Mañi yuhu, ¿atu vityin ri cusacacun chí ñuu yo Israel ihya ndaha ra ñuu Roma? —catyí ra.

⁷ Ta nacahan ra Jesús ta catyí ra:

—Ña tahán chí coto nyoho nya quívi. Noo tuhun ri maa Nyoo Sutu yo cuacatyí ra ama.

⁸ Soco cuhva cha quichi Tatyí li síqui ndo cunaquehen ndo tunyee ñi, ta cuquita ndo vatyi cahan ndo tuhun Jerusalén ihya ta tandihí ñuu cha nyicú Judea ta Samaria, ta ñicahnu ñuhu ñáyivi.

⁹ Ta cha yahá cha catyí ra Jesús tuhun ihya, ta cha ní ri ca cha canyehé ra chí ra, nandaá xica ra andívi, ta quíhvi ra chichi noo vico. Ta ña canyehé ca ra chí ra.

¹⁰ Ta cuhva cha canyehé ndaa ra andívi, ta tuví uvi tahan ángel yatyin nu canyicú ra. Ñihnó ra sahma cuichin.

¹¹ Ta cacatyí ra cuan chí ra:

—Nyoho ra Galilea, ¿ñáá tuhun cha ndoo ndo nyehé ndaa ndo andívi? Suri maa ra Jesús cha nyehe ndo nandaá xica ihya, tyehe caa cuquichi tucu ra inga chaha.

Nu canacachí ra apóstol chí ra Matías vatyi ndihvi ra tyiño nuu ra Judas

¹² Tyicuan ta quita coyo ra apóstol nu chinyicu ra yucu nu iyó yutun olivo cuan. Ta cuanuhú coyo ra ñuu Jerusalén. Ta yatyin ri nyaá ñuu cuan, tari sava hora ri. Ta sava ri hora cuví caca ñáyivi quívi nyitatú ñu, vatyi tyicuan caa catyí ley cha tyaa ra Moisés.

¹³ Cuhva cha nachaa coyo ra Jerusalén cuan, candaá ra nu cu uvi piso noo vehe nu ca iyó ra. Ta tandihí ra cuan, ican ra cuví, ra Pedro, ra Jacobo, ra Juan, ra Andrés, ra Felipe, ra Tomás, ra Bartolomé, ra Mateo, ra Jacobo sehe ra Alfeo, ta ra Simón cuenda ra cacuñí naquiqui síqui gobiernu Roma, ta ra Judas yañi ra Jacobo.

¹⁴ Ta nyita ri ndu ñin ri ra ta ñin ri cuhva cachicá xiñi ra ta cachicán tahvi ra chí Nyoo. Ta nyicú tucu yañi ra Jesús ta cu María síhi ra, ta inga ñusihi ñandihí.

¹⁵ Tari noo ciento oco ñáyivi ndu ñin ri ñu quívi cuan. Ta nicuinanyaa ra Pedro. Ta catyí ra chí ñu:

¹⁶ —Nyoho yañi, cuñi chí cha cuví tari cuhva catyí nu tutu Nyoo. Vatyi

cahan Tatyí li chihin yuhu ra David yoso caa cucuhva cuenda ra Judas chi ra Jesús chi ra xaan iñi chi ra.

¹⁷ Ta ra Judas cuví ra noo ra chindihí chihin yo. Ta ñin ri chica ra tyiño Sutu Mañi yo chihin yo.

¹⁸ Soco chahan ra, ta sata ra noo ñuhú chihin xuhun cha ñihí ra cha chaha cuenda ra chi ra Jesús. Yaha cuan ta canacava ra chihin xiñi ra, ta ndata chichi ra ta quita tandihí chiti yihví ra.

¹⁹ Ta quiví cha cachito ñu ca iyó Jerusalén ihya cha chihí ra, casacunañi ñu chi ñuhu cuan Acéldama. Ta cha chihin sahan maa ñu cuñí chi catyí Nu Catuvi Niñi.

²⁰ Vatyí nu libru Salmo catyí chi tuhun ra Judas tyehe caa:

Na ndoo maa ri maa vehe ra.
Ta yori coo chichi.

Ta catyí tucu chi:

Inga ra cunanduvi tyiño nuu ra.

²¹⁻²² Ta vityin nyicú ra cachica noo chihin yo quiví chinyaa Sutu Mañi yo Jesús chihin yo; nya quiví sacondutya ra Juan chi ra, ta nya quiví nandaaxica ra andiví. Ta vityin cuñí chi chandu ñin ri noo ra chihin yo, vatyí cuví ra cha ndaa cha cuenda cha nandoto ra Cristo —catyí ra Pedro.

²³ Tyicuan ta cacana ra chi uvi tahan ra, chi ra José cha nañi Barsabás, ta suri nañi tucu ra Justo; ta cacana tucu ra chi ra Matías.

²⁴ Ta cachican tahvi ra tyehe caa:

—Sutu Mañi yuhu, yoho chitón cha caa aña tandihí ndí. Sañaha chi ndi chichi cha uvi tahan ra ihya, nya ra cha nacachí maun,

²⁵ vatyí sacuvi ra tyiño cha sacuna ra Judas cha cuenda cuatyí ra, ta cuahan ra nu tahan chi cuhun ra —cacatyí ra, chicán tahvi ra.

²⁶ Tyicuan ta cachahan ra noo sihva, tacuhva nyehe ra nya ra tahan chi nyatu cuan chi. Ta tahan chi chi ra Matías. Ta yucuan cuví nu ndu ñin ri ra chihin ndí uchi ñin apóstol.

2

Nu chaq Tatyí li

¹ Ta ñin ri nyicú ñáyiví yihí cuenda ra Jesús ta cha quiví vico Pentecostés cha sanducahnú ñáyiví Israel. Ta ñin ri cuhva chicá xiñi ñu.

² Ta sana iñi ñu ta nacuiñi ñu noo cha cayu vachi ityi andiví. Tari cha cayu yahá noo tatyí ñihí. Ta iyo cuví tandihí chichí vehe nu canyicú ñu.

³ Tyicuan ta tuví tari yaa ñuhu quiñi cuatyí siqui noo noo ñu.

⁴ Ta tandihí ñu chitu ñu chihin Tatyí li. Ta quichaha cahan ñu inga sahan yoso cuhva saquehen ityi maa Tatyí li chi ñu.

⁵ Ta quiví cuan cuaha xaan ra Israel ra vaha chicá chihin Nyoo canyicú ra ñuu Jerusalén cuan. Cuaha xaan ra ca iyó inga ityi ñicahnu siqui ñuhú ñáyiví chaq coyo vatyí casanducahnu ra vico Pentecostés.

⁶ Ta cha cachiñi ra cuan cha iyo xaan cuví nu canyicú ñu, ta cuahan coyo ra ta nataca ra yatyin ri nu nyicú ñu. Ta ña cutuñi iñi ra ñáá cha cuví cuan, vatyí noo noo ra cachiñi ra cahan ñu cuhva sahan cha cacahan maa ra.

⁷ Iyo cuñi ra ta catyí ra chi ra tahan ra:

—¿Atu ñima ñu Galilea cuví tandihí ñu cha cahan ihya?

⁸ ¿Ñáá tuhun cha chiñi yo cahan ñu cuhva sahan noo noo yo?

⁹ Ihya nyicú yo cha cuví yo ñu Partia, ta ñu Media, ta ñu Elam, ta ñu Mesopotamia, ta ñu Judea, ta ñu Capadocia, ta ñu Ponto, ta ñu Asia.

¹⁰ Ta ñu Frigia ta ñu Panfilia, ta ñu Egipto, ta ñu iyó ityi nuu ca Cirene ityi África. Ta nyicú tucu ñu ñuu Roma cha iyó ñuu ihya. Ta suhva ñu cuví ñu ñu Israel nya quiví cacu ñu. Ta inga ñu cuví ñu ñáyiví nanduví cuenda ñu Israel ta nyicon ñu ley ra Moisés.

¹¹ Iyó tucu ñáyiví ñuhú Creta ta ñu Arabia. Soco tandihí yo ta chiñi yo cahan ñu chihin sahan cha cahan yo. Ta nacatyí ñu cha cahnu cha sacuví Nyoo —cacatyí ra.

¹² Tandihí ra, iyo xaan cacuñi ra, ta yihí ra ndaca tuhun ra chi tahan ra:

—¿Ñáá cha cuñi chi catyí chi tandihí tuhun ihya? —catyí ra.

13 Soco inga ra cahán nyaa ra ta cacatyí ra vatyí cachiñí ñu.

Nu cahán noo ra Pedro nuu ñáyiví

14 Tyicuan ta nicuinanyaa ra Pedro chihin inga uchi ñin tahan apóstol. Ta chihin cha chaa cahán ra ta catyí ra:

—Nyoho yañi, cha cuví ndo ra Israel, ta tandihí nyoho cha iyó ndo Jerusalén ihya. Coto ndo tuhun ihya. Ta cuiñi vaha ndo tuhun cha cuacatyí chi ndo.

15 Vatyí cuñí maa ndo tyi chiñí ndi. Soco ña chiñí ndi, vatyí ña tuhvá ñáyiví chiñi cha cuhva ihya, vatyí ni ca ñin cha ñaha ri cuví.

16 Soco ihya cuví tuhun cha cahán ra Joel, ra cuví profeta Nyoo ta cha naha. Vatyí catyí ra:

17 Nu cuandihí ca quívi, catyí Nyoo, cusaquichi Tatyí Ii síqui tandihí ñáyiví. Ta cucahan sehe ndo cuende. Ta ra tyivaa ta ñu tyivaa cunyehe ñu cha sañaha Nyoo chi ñu. Ta ra chahnu cunyehe ra ñumahna.

18 Cusaquichi Tatyí Ii síqui ñu sacuví tyiño nui. Ta cucahan ñu cuende, catyí Nyoo.

19 Ta catyí ra vatyí cusañaha ra cha iyo cucuvi ityi andiví. Ta ityi nu ñuhu ñayiví cusañaha ra seña, seña niñi, seña ñuhú, ta vico ñuhma.

20 Cunduñaa ñanyii. Ta yoo tari caa tyacu niñi cunanduvi. Tyicuan caa cucuvi cha niri ca cha chaá quívi quichi Sutu Mañi yo. Ta cucuvi noo quívi cahnu vatyí cucutuñi chi yo nuu ra.

21 Ta tandihí ñu chicán tahví sívi ra cucacu ñu. Tyicuan caa catyí ra Joel.

22 'Cuiñi ndo nyoho ra Israel. Cuiñi ndo tuhun cha cuacatyí ihya. Ra Jesús ra Nazaret cuví ra noo ra cha cachí Nyoo chi vatyí quichi ra nu nyicu yo. Ta chitó yo vatyí ndicha vatyí cuaha xaan cha iyo, ta cuaha xaan milagru ta seña sacuví Nyoo nu canyicú yo cha cuenda ra Jesús. Ta nyoho chitó vaha ndo tuhun ihya.

23 Soco quívi quehen cuenda ndo chi ra, sacuví ndo tari cuhva tyaa maa Nyoo cuhva nyata quívi xihna ri. Vatyí chaha cuenda ndo chi ra chi ra quiñi iyó. Ta chitacaá ra chi ra nu cruzi. Ta tyicuan caa chahñi ndo chi ra.

24 Soco Nyoo sanandoto ra chi ra vatyí sacacu ra chi ra ndaha tuhun chihi. Vatyí tuhun chihi ña cuví cunyaca ñaha chi ra.

25 Vatyí ra David cahán ra tuhun ra Cristo ta cha naha, ta catyí ra:

Tyicuan ri nyehí chi Sutu Mañi yo ityi nui.

Maa ra nyaá ñin chiyo vahi ta ñahri maa cha cuví sayuhvi chii.

26 Yucuan chaha cusii xaan cuñí añime. Ta chité yaa chihin cha sii cuñí.

Ta sñin ri coño ñuhi cunyitatu chi vatyí chité tyi cunandote.

27 Vatyí yoho Nyoo Suti, ma sandoun añime nu nyicu ñu chihi, ta ni ma cuhvon cha tyahyu coño ñuhi.

Vatyí sehe iun cuví chii.

28 Sañahún ityi cha cuahán nu coi ñayiví chaa cha ma naa ca maa. Ta sacutún chii chihin tusii iñi vatyí nyaún chihin, catyí ra David ta cha naha.

29 'Nyoho yañi, chitó cachi yo vatyí ra David sutu chahnu yo chihí ra ta quíhví ra chichi ñuhu. Ta ñaña ra nyaá ca chi ihya nya vityin.

30 Soco ra David cuví ra noo profeta cuenda Nyoo. Ta chitó ra vatyí Nyoo tyaa ra cuhva ta ñin ri tuhun cahán ra chihin ra vatyí suri tata maa ra ican cuacacu ra Cristo. Ta ra Cristo, ican ra cunyaca ñaha.

31 Ta tyicuan caa ra David tari cha vatyí nyehe ra cha cuacuvi nu cuahan ca chi quívi. Ta cahán ra tuhun cha cunandoto ra Cristo. Ta catyí ra vatyí ma ndoo añima ra nu nyicu ñu chihí. Ta ni ma tyahyu coño ñuhu ra, catyí ra.

32 Ta ra Jesús ihya sanandoto Nyoo chi ra. Ta tuhun ihya tandihí maa ndi cuví ndi cha ndaa.

³³ Nyoo sacahnú ra chi ra Jesús, ta cuatyaa ra chi ra chiyo vaha ra andivi. Ta ra Jesús naquehen cuenda ra Tatyí li cha catyí Sutu yo Nyoo ta cha naha vatyí cuhva ra chi yo. Ta ican cuví cha chahá ra chi ndi vityin. Ican cuví nyehé ndo ta chiñí ndo.

³⁴ Vatyí ñima ra David nandaa ra andivi. Vatyí suri maa ra David cañan ra tuhun ra Jesús, ta catyí ra:

Catyí Suti Nyoo chi Suti ra Cristo:
“Cunyaa chiyo vahi

³⁵ cha niri ca cha caquin chi ra xaan iñi chuun chahun”, catyí Nyoo chi ra Cristo chihin yuhu ra David.

³⁶ 'Nyoho ta tandihí ca ñu Israel, coto vaha ndo vatyí tuhun ra Jesús ican cahín ihya. Chitacaá ndo chi ra nu cruzi. Soco Nyoo cuatyaa ra chi ra tyi cuví ra Sutu Mañi yo, ra nyaca ñaha chi yo —catyí ra Pedro.

³⁷ Cuhva cha chiñí ñu tuhun cañan ra Pedro ihya, nducuihya iñi ñu. Ta ndaca tuhun ñu chi ra Pedro ta chi tandihí ca ra apóstol, ta catyí ñu:

—Nyoho yañi, ¿yoso caa sacuví ndi vityin? —catyí ñu chi ra.

³⁸ Yucuan ta catyí ra Pedro chi ñu:

—Noo noo ndo ndu uvi iñi ndo cuatyí ndo ta nasama ndo cuhva iyó ndo nuu Nyoo. Ta condutya ndo chihin sívi ra Jesucristo. Tacuhva na saha ra ticahnu iñi cuatyí ndo. Tyicuan caa ta cua cuhva Nyoo Tatyí li ra chi ndo.

³⁹ Vatyí cha naha catyí Nyoo vatyí cuhva ra Tatyí li ra chi maa ndo, ta chi sehe ndo, ta chi ñu cha cañi nyaa ñandihí. Vatyí tandihí ñu cha nacana Sutu Mañi yo Nyoo chii cucuhva ra Tatyí li ra chi ñu.

⁴⁰ Chihin tuhun ihya ta chihin inga tuhun, ra Pedro chahá ra tuhun chi ñu ta catyí ra chi ñu:

—Nducu ndo cuhva na sacacu Nyoo chi ndo, tacuhva cuví sandoo ndo cha caa ñáyivi quiñi iyó ihya —catyí ra chi ñu.

⁴¹ Tyicuan ta tandihí ñu cha natin cuenda tuhun cañan ra Pedro condutya ñu. Ta quita tari noo uñi mil ñu,

ta ndu in ri ñu chihin ñu yihí cuenda ra Jesucristo.

⁴² Ta tyicuan ri ndu in ri tandihí ñu, ta chihin cha ñi iñi ñu tyasoho ñu cha sañahá ra apóstol chi ñu. Ta in ri cuví ñu chihin tahan ñu, ta chicán tahvi ñu ta chachí ñu pan ta chihí ñu vinu vatyí nicohón iñi ñu tyi chihí ra Cristo tyiño nuu ñu.

Cuhva iyó ñu yihí cuenda Sutu Mañi yo Jesucristo quivi cuan

⁴³ Ta cuaha milagru ta seña sacuví Nyoo chihin ndaha ra apóstol. Ta tandihí maa ñáyivi iyo cuñí ñu.

⁴⁴ Tandihí ñu yihí cuenda ra Cristo in ri cacuví ñu chihin cha iyó chi ñu.

⁴⁵ Xicó ñu cha tyayin ñu ta cha iyó chi ñu. Ta sachá ñu xuhun ñu chi tahan ñu yoso cuhva cha chiñuhú chi noo noo ñu.

⁴⁶ Ndiquivi ta ndu in ri ñu nya vehe ñuhu cañu. Ta ndu in tucu ri ñu noo noo vehe tahan ñu ta chachí ñu pan ta chihí ñu vinu. Ta in ri cachachí ñu chihin cha síi cuñí aña ñu. Ta chahá ñu cha cachí tahan ñu chihin cha ñi iñi ñu.

⁴⁷ Ta sacahnú ñu chi Nyoo. Ta vaha cañan tandihí ñáyivi síqui ñu. Ta tahan tahan quivi cuahan sanducuahá ca Sutu Mañi yo chi ñu cha cuahán sacacu ra.

3

Nu nduvaha noo ra coxo

¹ Noo quivi cuahán coyo ra Pedro chihin ra Juan vehe ñuhu cañu. Cuví chi cuhva caa uñi cha cha iñi, cuhva cha tuhvá ñáyivi Israel cachicán tahvi ñu chi Nyoo.

² Ta ndi quivi maa nyaá noo ra ndahvi, ra coxo nyata cacu, yuvehe ñuhu cañu cuan. Vatyí chinyacá ñu chi ra na cacan ra limuxtan chi ñáyivi quihvi yuvehe cuan, ta nañí chi: Yuvehe Tyaqui.

³ Tyicuan ta nanyehé ra coxo cuan chi ra Pedro ta chi ra Juan cha cuaquihvi ra chichi vehe ñuhu cañu. Ta chicán ra noo limuxtan chi ra.

⁴ Ta cananyehé ra Pedro ta ra Juan chi ra. Ta ra Pedro catyí ra chi ra:

—Nyehe chi ndi —catyí ra.

⁵ Tyicuan ta quichaha nyehe ra coxo cuan chi ra. Cuñí maa ra vatyí iyó cha cuacuhva ra chi ra.

⁶ Soco ra Pedro catyí ra chi ra:

—Ñahri maa xuhun cuichin ta xuhun cuaan iyó chii, ta cuhve chuun. Soco nonga cha iyó chii cua cuhve chuun. Chihin sivi ra Jesucristo ra Nazaret, catyí chuun, ndicuita ta cacon —catyí ra Pedro chi ra.

⁷ Tyicuan ta tñin ra Pedro ndaha chiyo vaha ra ta nacoñehē ra chi ra. Ta caa cuhva ri cuan nicoo fuerza chaha ra ta tatu chaha ra.

⁸ Tyicuan ta ra coxo cuan ndava ra noo, ta nicuinanyaā ra. Ta quichaha chica ra. Ta quihvi ra chihin ra chichi vehe ñuhu. Ta chicá ra. Ta cañá ndava ra. Ta sacahnú ra chi Nyoo.

⁹ Tandihí ñáyivi nyehe ñu chicá ra ta sacahnú ra chi Nyoo.

¹⁰ Ta iyo xaan cuñí ñu ta yuhví ñu cha cuenda cha nduvaha ra cuan. Vatyí nichón nuu ñu chi ra. Ta chitó ñu vatyí suri maa ra cuví cha tuhva chinyaā Yuvehe Tyaqui cuan chican ra limuxtan.

Nu cahán noo ra Pedro tuhun ra Cristo nuu ñáyivi nu cuví corredor ra Salomón

¹¹ Ra coxo cha nduvaha cuan, ña sañá maa ra chi ra Pedro ta ra Juan. Ta tandihí ñáyivi iyo cuñí ñu ta chino ñu nataca ñu nu nyicú ra, nya nu cuví corredor ra Salomón chichi vehe ñuhu.

¹² Cha nanyehe ra Pedro cha tyicuan caa, catyí ra chi ñáyivi:

—Nyoho ra Israel, ¿ñáá tuhun cha iyo xaan cuñí nyoho? ¿Ñáá tuhun cha nyehé xaan ndo chi nyuhu? Tari cha vatyí chihin tunyee iñi maa ndi, o cha cuenda cha cachi iyó ndi nuu Nyoo, sanduvaha ndi chí rayi ihya, cuñí maa ndo.

¹³ Nyuhu ña cuví sanduvaha ndi chí ñáyivi. Nyoo cuenda sutu chahnu yo, ra Abraham, ra Isaac, ta ra Jacob, ican ra sacahnú xaan ca ra chí Sehe ra, ra Jesús. Ta maa ndo chaha cuenda ndo chí ra chí ra Pilato, ra cuví tyiño. Ta

maa ra cuñi ra saña ra chí ra. Soco nyoho ña chaha ndo.

¹⁴ Cha nuu cha cacan ndo cha saña ra chí ra vaha, ra ii cuan, nyoho chican ndo cha saña ra chí noo ra tuhvá chahñi ñáyivi.

¹⁵ Tyicuan caa chahñi ndo chí ra cha chahá ñáyivi chaa coo yo chihin Nyoo. Soco Nyoo sanandoto ra chí ra. Ta ña ndoo ra chihin ñu chihí. Ta nyuhu cuví ndi cha ndaa.

¹⁶ Ta suri maa ra Jesús cuví ra chaha fuerza chaha ra coxo ihya. Vatyí chinó iñi ndi tyi iyó tunyee iñi chí ra Jesús. Yucuan chaha ndunyee chaha ra ihya, ta ñohó nuu vaha ndo chí ra ihya. Ta nduvaha ra vatyí chinó iñi ndi chí ra Jesús. Ta tandihí nyoho cha nyehe maa ndo vityin.

¹⁷ 'Chité yañi —catyí ra Pedro— vatyí quivi cha chahñi ndo chí ra Jesús, ña chito ndo tyi ña vaha cha nyacuví ndo. Ta tyicuan caa tucu ra cuví nuu chí ndo, ña cachitó ra.

¹⁸ Soco tyehe caa chino cava tuhun cahan Nyoo chihin yuhu ra profeta cuenda ra ta cha naha, vatyí catyí ra vatyí ra Cristo cunyehe ra tindoho.

¹⁹ Yucuan chaha ndu uvi iñi ndo cuatyí ndo. Ta nacuhva ndo añima ndo chí Nyoo, tacuhva na ndachi cuatyí ndo. Tyicuan ta Sutu Mañi yo sandunyee ra añima ndo vatyí cohon ra añima ndo.

²⁰ Tyicuan ta cutachi ra chí ra Jesús ra cuví Cristo na quichi ra inga chaha. Vatyí quivi xihna ri tyaā Nyoo cuhva tyi quichi ra cha cuenda ndo.

²¹ Tahán chí cha ndoo ra Jesucristo andivi cha vityin nyacua nya sanduchaa Nyoo tandihí maa. Tari cuhva catyí maa ra chihin yuhu ra profeta cuenda ra ta cha naha.

²² Vatyí tyicuan caa catyí ra Moisés chí sutu chahnu yo: “Cusaquichi Sutu yo Nyoo chí noo ra cahan cuenda ra. Ta suri ñáyivi chí yo cucuvi ra. Ta cuacahan ra tuhun Nyoo chihin ndo tari cahán yuhu. Quichaha ndo tandihí cha catyí ra chí ndo.

²³ Vatyí tandihí ñu cha ma tyasoho tuhun cahan ra, cunaa ñu, vatyí ma

cu ñin ri ñu chihin ñáyiví cachi Nyoo chii”, catyí ra Moisés.

²⁴ Ta tyicuan caa tucu tandihí profeta cuenda Nyoo nya quiví ra Samuel ta nyacua nya vityin, casacoto ra tuhun cha cuví vityin.

²⁵ Tandihí promesa cha chaha Nyoo cha cahan ra profeta tuhun ta cha naha, chí maa ndo cuví. Ta tuhun cha natyihí tahan Nyoo chihin sutu chahnu yo, chihin ra Abraham, suri cha cuenda maa ndo cuví. Vatyí catyí Nyoo chí ra Abraham: “Tandihí ñáyiví cha iyó siqui ñuhu ñayiví cunasoque chí ñu cha cuenda ñáyiví chuun.”

²⁶ Ta quiví sanandoto Nyoo chí Sehe ra, xihna ca nu nyicú ndo tachí ra chí ra, vatyí nasoco ra chí ndo. Tacuhva vatyí tahan tahan ndo sandoo ndo cha quiñi caa —catyí ra Pedro chí ñu.

4

Nu catiñ ra cacuví nuu vehe ñuhu cahnu chí ra Pedro ta chí ra Juan

¹ Ni cahán ca ra Pedro ta ra Juan chihin ñáyiví, ta cha coyo tata sutu cuenda ñu Israel chihin ra cuví nuu chí ra sahá cumi vehe ñuhu, ta chihin ra cuví saduceo.

² Cacuxaan xaan ra vatyí ra Pedro ta ra Juan sañahá ra chí ñáyiví ta catyí ra vatyí ndicha cha nandoto ñu chihí, vatyí ra Jesús nandoto ra.

³ Tyicuan ta catiñ ra chí ra. Ta catyihí ra chí ra vehe caa. Ta candoo ra nyacua nya inga quiví vatyí cha iñi xaan cuhva cuan.

⁴ Soco cuaha ñu cha chiñi tuhun cahán ra Pedro nachinó iñi ñu. Ta candu ñin ri ñu chihin ñu yihí cuenda ra Jesús. Ta cha tandihí ñu vasi quita ohon mil ñu cha maa ri maa rayí ri.

⁵ Tuvi inga quiví ta candu ñin ri ra cacuví tyiño chí ñu Israel, ra chahnu, ta ra casacuaha cuenda ley cha tyaa ra Moisés, nya Jerusalén cuan.

⁶ Ta ñohó tucu ra Anás ra cuví nuu chí tata sutu. Ta ra Caifás, ta ra Juan, ta ra Alejandro. Ta nyicú tucu tandihí ñáyiví chí ra cacuví nuu chí tata sutu.

⁷ Tyicuan ta catachí ra tyiño chiquehen chí ra Pedro ta chí ra Juan. Ta chitayucu ra chí ra mahñu. Ta candaca tuhun ra chí ra:

—¿Yóó cha chaha ityí chí ndo vatyí sanduvaha ndo chí ra cuan? ¿Yóó chí cha cuenda nyacuví ndo tyehe caa? —cacatyí ra chí ra.

⁸ Ta ra Pedro tyitu ra yihí Tatyí Ii Nyoo. Ta catyí ra chí ra:

—Nyoho ra nyacá ñaha Israel ñuu yo ihya. Ta nyoho ra chahnu.

⁹ Vityin ndacá tuhun ndo chí ndi tuhun vaha cha cuví chí noo ra coxo ihya, vatyí cuñí ndo coto ndo yoso caa nduvaha ra.

¹⁰ Yucuan chaha cunacatyí ndi chí ndo tacuhva nacoto tandihí ñáyiví Israel. Vatyí ra ihya nanyaá ra nuu tandihí ndo. Vatyí nduvaha ra chí hin tunyee iñi ra Jesucristo ra ñuu Nazaret, ra cha chaha cuenda ndo vatyí cuví ra nu cruzí. Soco Nyoo sanandoto ra chí ra.

¹¹ Ta suri ra Jesús ihya cuví yuu cha chiñuhú ca cha ña cuñí ra savahá vehe cotyíño ra, tari cuhva catyí nuu tutu Nyoo. Ta ican ndo cuví tari ra savahá vehe ta ña cuñí ndo yuu cha chiñuhu ca cuan.

¹² Vatyí yori inga ra cuví sacacú chí yo. Vatyí noo tuhun ri maa ra chaha Nyoo vatyí sacacu ra chí yo. —catyí ra Pedro chí ñu.

¹³ Tyicuan ta cachiñi ra cacuví tyiño cuan vatyí ñi xaan iñi ra Pedro ta ra Juan cacahán ra. Ta ñima ra cañoho vaha sicuela cacuví ra. Ta iyo xaan cuñi ra. Tyicuan ta nicohon nuu ra chí ra vatyí ican ra cuví ra cha cachica noo chihin ra Jesús.

¹⁴ Ta siñ ri, ra cha nduvaha cuan, nanyaá ra chihin ra yucuan. Yucuan chaha ña cuví cahan ña vaha ra cacuví tyiño cuan siqui ra Pedro ta ra Juan.

¹⁵ Tyicuan ta catyí ra chí ra naquita coyo ninduñi ra chata vehe. Ta candoo maa ra cacuví tyiño cuan candatuhun tahan ra.

¹⁶ Ta catyí ra:

—¿Yoso caa cunyacuvi yo chihin ra ihya? Vatyí tandihí maa ñu Jerusalén

chitó ñu seña cha casacuví ra ihya. Ta ma cuvi catyi yo vatyí ña ndicha.

¹⁷ Soco tacuhva cha ma cono tuhun ihya ñicahnu chichi ñuu ihya, cutyanaha yo chi ra, tacuhva vatyí ma cahan ca ra tuhun ra Jesús chihin ñáyivi —cacatyí ra.

¹⁸ Tyicuan ta cacana ra chi ra Pedro ta ra Juan. Ta catyi ra chi ra vatyí ni chiin ca maa ta ma cahan ca ra tuhun ra Jesús. Ta ma sañaha ca ra chi ñáyivi.

¹⁹ Soco ra Pedro ta ra Juan canacahan ra ta catyi ra:

—Ndíchi xiñi nyoho ta nyehe ndo tatu vaha ca cha quichaha ndi chi maa ndo o vaha ca cha quichaha ndi chi Nyoo.

²⁰ Vatyí nyuhu ma cuvi cha sandíhi ndi cha nacatyí ndi tuhun cha nyehe ndi ta chiñi ndi —cacatyí ra.

²¹ Tyicuan ta nacatyanaha tucu ra chi ra. Soco saña ra chi ra vatyí ña ñíhi ra cuhva tachi tuñi ra chi ra. Vatyí tandíhi ñáyivi sacahnú ñu chi Nyoo cha cuenda cha cuví cuan.

²² Vatyí rayí cha nduvaha cuan, yaha ca uvi xico cuiya ra, ta tyicuan cuiya nyehe ra tindocho ta nduvaha ra saha Nyoo.

Nu chicán ñu yíhi cuenda ra Cristo tunyee iñi Nyoo

²³ Ta casaña ra chi ra Pedro ta chi ra Juan. Tyicuan ta cuahan coyo ra nu nyicú ra tahan ra. Ta canacatyí ra tandíhi cha cacatyí ra chahnu ta ra cacuví nuu chi tata sutu chi ra.

²⁴ Cuhva cha cachiñi ñu tuhun ihya tandíhi ñu ta ñn ri quichaha chican tahvi ñu chi Nyoo. Ta catyi ñu:

—Sutu Mañi yuhu, yoho savahun andívi ta ñuhu ñáyivi. Savahun tyañuhu. Ta tandíhi ca cha iyó, maun savaha.

²⁵ Ta yoho chihin Tatyí iun sacahun chi ra David ta cha naha. Ta catyi ra:

¿Ñáá tuhun cha naquiqui ñáyivi ña ñohó nuu Nyoo? ¿Ñáá tuhun chicá xiñi ñu cha ñima ri tuhun?

²⁶ Rey ta inga cha nyacá ñaha síqui ñuhu ñáyivi ihya candu cuita ra

sicun Sutu Mañi yuhu, ta síqui ra Cristo, catyi ra David.

²⁷ Sutu Mañi yuhu, ndicha vatyí ra Herodes, ta ra Poncio Pilato candu ñn ri ra ñuu Jerusalén ihya chihin ra ñuu Roma ta chihin ra Israel vatyí cahñi ra chi ra Jesús Sehe iun cha cachi vahun.

²⁸ Ta tyicuan caa ta casacuví ra, tari cuhva cha catyi maun ta cha naha tyi cucuvi.

²⁹ Ta vityin, Sutu Mañi yuhu, nyehe cha tyanaha ra chi ndi. Ta cuhva cha cuní ca iñi ndi tyi tyiño nuu maun sacuvi ndi, Sutu Mañi yuhu. Ta cuhva cha cahan ndi tuhun chihin cha ña yuhví ndi.

³⁰ Ta chihin fuerza maun ta cunduvaha ñu cuhví, ta cunyehe ndi seña ta milagru cha cuenda tunyee iñi ra Jesús Sehe iun —catyi ñu chicán tahvi ñu.

³¹ Ta cuhva cha ndíhi savaha ñu oración ta tañ nu nyicu ñu. Ta tandíhi ñu chitu ñu chihin Tatyí Ii ta cahan ñu tuhun Nyoo chihin cha ñi iñi ñu.

Ñahri cha cumañi chi ñu yíhi cuenda Nyoo

³² Tandíhi ñu cha chinó iñi, ñn ri cuví ñu, ta ñn ri cuhva chicá xiñi ñu. Ni noo ñu ta ña catyi ñu vatyí chi maa ñu cuví cha iyó chi ñu, soco chi tandíhi ñu cuví, catyi ñu. Vatyí ñn ri nyicú ñu.

³³ Ta chihin tunyee iñi cahnu, cacahan ra apóstol tuhun cha nandoto Sutu Mañi yo Jesús. Ta Nyoo nasocó xaan ra chi tandíhi ra.

³⁴ Ta ni noo ñu ta ñahri cumañi chi ñu vatyí tandíhi ñu cha iyó vehe o ñuhú, xicó ñu. Ta quichi nyacá ñu xuhun,

³⁵ ta chahá cuenda ñu chi ra apóstol. Ta maa ra nasachá ra chi noo noo ñu yoso cuhva cha chiñuhú chi ñu.

³⁶ Tyicuan caa sacuví noo ra cha nañi José. Ra cuan vachi ra tata ra Levi. Ta cacu ra ñuhú Chipre cha nyaá mahñu tyañuhu. Ta ra apóstol sacunañi ra Bernabé chi ra. Ta cuñi chi catyi sívi cuan: Ra Naquehen Ndahvi.

³⁷ Ta ra Bernabé cuan xico ra ñuhú ra. Ta chaha ra xuhun cuan chi ra apóstol.

5

Cuatyí ra Ananías ta cu Safira

¹ Soco noo ra cha nañi Ananías chihin cu Safira ñasihí ra, xico ñu noo ñuhú.

² Soco tixehe ñu suhva xuhun. Tyicuan ta chinyaca ra Ananías suhva xuhun chi ra apóstol. Ta catyí ra vatyí tandihí xuhun cha quiyahví ñuhú cuví cuan.

³ Tyicuan ta catyí ra Pedro chi ra:
—Yoho Ananías, ¿ñáá tuhun cha chahun cha quihví ra ña vaha añimon, vatyí cuñún sandavi ñahun chi Tatyí Ii, ta catyún vatyí tandihí xuhun cha quiyahví ñuhu cuví ihya ta ndoún chihin suhva?

⁴ Chuun cuví ñuhú, ta chuun cuví xuhun cha ñihun cuenda ñuhú cuan. ¿Ñáá tuhun cha cuñún sandavi ñahun chi Nyoo ta catyún tyí tandihí xuhun chahun? Ñima chi nyuhu sandaví ñahun, chi Nyoo sandaví ñahun —catyí ra Pedro chi ra Ananías.

⁵ Cha chiñi ra Ananías tuhun cha cahan ra Pedro, nduva ra ta chihí ra. Ta quichi noo cha yuhví cuñi ñáyivi cha chito ñu tuhun ihya.

⁶ Tyicuan ta quichí coyo suhva ra tyivaa ta tyihí ra coño ñuhu ra chichi noo sahna. Ta chahan ra chityihí ra chi ra chichi ñuhú.

⁷ Yaha noo uñi hora ta chañ ñasihí ra Ananías ta quihví ña nu nyicú ra apóstol. Soco ña chitó ña cha cuví cuan.

⁸ Ta quichaha ndaca tuhun ra Pedro chi ña ta catyí ra:

—¿Atu tyehe cuví yahví cha quiyahví ñuhú ndo? —catyí ra.

Ta nacahan ña ta catyí ña:

—Ay, tyehe cuví yahví chi —catyí ña chi ra.

⁹ Tyicuan ta catyí ra Pedro chi ña:

—¿Ñáá tuhun cha ñoho naha ndo tuhun ta sandavi ñaha ndo chi Tatyí Ii Sutú Mañi yo Nyoo? Cha cuandichi coyo ra cha chahan chityihí chi yun chichi ñuhú. Ta vityin cuhun tucu ra

cutyihí ra chi yoho —catyí ra Pedro chi ña.

¹⁰ Caa cuhva ri cuan ta nduva ña chaha ra Pedro, ta chihí ña. Ta caquihví coyo ra tyivaa cuan, ta nyehe ra vatyí chihí ña. Ta cana-coñehe ra chi ña ta chityihí ra chi ña xiin yí ña.

¹¹ Ta tandihí ñáyivi yihí cuenda ra Cristo, ta tandihí ca ñu chitó tuhun cuan, canayuhví xaan ñu.

Cuaha milagru ta seña sacuvi ra apóstol

¹² Cuaha seña ta milagru sacuvi ra apóstol sahá Nyoo nu nyicú ñáyivi. Ta tandihí ñu yihí cuenda ra Cristo ndu iin ri ñu nu cuví corredor ra Salomón.

¹³ Ta ni nonga ñu cha inga cuenda ta ña cañá iñi ñu cutahan ñu chihin ñu yihí cuenda ra Cristo. Soco vaha cahan ñáyivi siqui ñu.

¹⁴ Ta cuaha xaan ñáyivi nachinó iñi chi Sutú Mañi yo Jesús, tari rayí ta ñusihí.

¹⁵ Ta nyacua tavá ñu chi ñu cuhví ityí cahnu, chacún ñu chi ñu nu chito. Vatyí tatu yaha ra Pedro soco vasi xiñahñu ra yaha siqui ñu, ta nduvaha ñu.

¹⁶ Tyicuan tucu ñu iyó yatyin ri Jerusalén cuan, quichí nyaca ñu chi ñu cuhví ta ñu cha yihí tatyí ña vaha chi. Ta nduvaha tandihí ñu.

Nu nyehé ra Pedro ta ra Juan tindoho

¹⁷ Tyicuan ta ra cuví nuu chi tata sutu, ta ra cayihí cuenda ra cuví saduceo, quiñi cuñi ra nyehe ra chi ra apóstol cha cuenda cha vaha cha casacuví ra chihin tunyee iñi chahá Nyoo chi ra.

¹⁸ Tyicuan ta catiin ra chi ra apóstol. Ta catyihí ra chi ra vehe caa.

¹⁹ Soco cha cuaa cuan quichí noo ángel cha tachi Sutú Mañi yo, ta nuña ra yuvehe caa cuan. Ta tavá ra chi ra. Ta catyí ra chi ra:

²⁰ —Cuahan ndo ta cuinanyaa ndo chichi vehe ñuhu cahnu. Ta nacatyí ndo chi ñáyivi yoso caa cuví coo ñu

ñáyiví chaa cha iyó ndo —catyí ángel cuan chi ra.

²¹ Cha cachiñi ra tuhun cahan ángel cuan, ta cuahan coyo ra. Ta ñaha cui ri quihvi coyo ra chichi vehe ñuhu cahnú. Ta quichaha sañaha ra chi ñáyiví. Ta cha ni ri ca cha sañahá ra apóstol cuan, ndu in ri ra cuví nuu chi tata sutu ta ra ndihí chihin ra. Ta cana ra chi ra cacuví tyiño cuenda ñáyiví Israel vatyí coo ra junta. Tyicuan ta tachí ra na cuquehen chi ra apóstol nu cañohó ra vehe caa cuan.

²² Soco cuhva cha cha coyo policia chichi vehe caa cuan, ña nañihí ra chi ra apóstol. Ta cuanuhu coyo ra cuanacatyí ra chi ra cuví nuu chi tata sutu.

²³ Ta cacatyí ra chi ra:

—Nyasi yuvehe caa cuan ta cha ndi. Ta sindaro, tayucú ra yuvehe casahá cumi ra. Soco cuhva cha nuña ndi, ña nañihí ndi chi ni noo ra chichi vehe caa cuan —catyí ra chi ra.

²⁴ Cuhva cha cachiñi tata sutu chihin ra cuví nuu chi ra, ta ra cuví nuu chi ra casaha cuenda vehe ñuhu tuhun ihya, iyo xaan cuñí ra. Ta candatuhun tahan ra yoso caa sacuvi ra ta cundihí tuhun cuan.

²⁵ Tyicuan ta cha noo ra ta catyí ra:

—Ra cha tyihí ndo vehe caa cuan, nyicú ra chichi vehe ñuhu sañahá ra chi ñáyiví —catyí ra.

²⁶ Tyicuan ta ra cuví nuu chi ra casahá cuenda vehe ñuhu, cahan ra chihin policia, ta chiquehen ra chi ra chihin cha vii ri ta ña cañi ra chi ra, vatyí yuhví ra chi ñáyiví coto tuchi ñu yuu chi ra.

²⁷ Chinyaca ra chi ra nuu ra cacuvi tyiño vehe ñuhu cahnú. Ta ra cuví nuu chi tata sutu catyí ra chi ra:

²⁸ —Nyuhu catyí cachi ndi chi ndo vatyí ma cahan ca ndo tuhun ra Jesús. Soco nyoho ña tyasohó maa ndo. Cha ndihí maa chichi ñuu Jerusalén sacotó ndo tuhun ra. Ta cuñí ndo natyaa ndo siqui ndi vatyí nyuhu chahñi ndi chi ra cuan —catyí ra cuví nuu chi tata sutu chi ra apóstol.

²⁹ Tyicuan ta nacahan ra Pedro ta inga ra apóstol, ta catyí ra:

—Nyaá siqui ndi cha quichaha xihna ca ndi chi Nyoo ta ñima ca chi rayi.

³⁰ Nyoo cuenda sutu chahnú yo ican sanandoto chi ra Jesús, ra cha chitaca ndo nu cruzi ta chahñi ndo chi ra.

³¹ Ta ra Jesús ican ra cuví ra cha sacahnú xaan Nyoo chi, ta cuatyaa ra chi ra chiyo vaha ra, vatyí cunyaca ñaha ra tandihí. Ta noo tuhun ri maa ra cuví ra sacacú chi yo. Vatyí tyicuan caa chahá ra cuhva chi yo cha cuví yo ñu Israel na ndu uvi ñi yo cuatyí yo tacuhva saha ra ticahnú ñi cuatyí yo.

³² Ta nyuhu cuví ndi cha ndaa cuenda ihya. Ta tyicuan caa tucu Tatyí Ii cha chaha Nyoo cunyaa aña ñu quichahá chi ra —catyí ra Pedro chi ra.

³³ Ta cha cachiñi ra cha catyí ra Pedro, nduxaan xaan ra. Ta cuñi ra cahñi ra chi ra.

³⁴ Soco mahñu ra cacuví tyiño cuan ñohó noo ra cuví fariseo cha nañi Gamaliel. Ta cuví ra ra sacuahá cuenda ley ra Moisés. Ta ñáyiví saha xaan ñu ñáyiví chi ra. Ta ra Gamaliel cuan, nicuinanyaa ra. Ta tachí ra naquita coyo ra apóstol cuan noo cuhva ri. Tyicuan ta quita coyo ra.

³⁵ Ta quichaha catyí ra Gamaliel cuan chi inga ra cacuví tyiño:

—Nyoho ra nyacá ñaha ñu Israel, saha ndo cuenda chi ndo chihin cha cua cunyacuvi ndo chihin ra chiña.

³⁶ Nicohon ñi ndo vatyí cha iyó suhva quiví ndicuita noo ra cha nañi Teudas. Ta catyí ra vatyí cuví ra noo ra vaha. Ta tari cha cumi cientu rayi chinyicon chi ra. Soco yaha cuan chahñi ñáyiví chi ra. Ta tandihí ra chinyicon chi ra nacutyaa cuatyí ra. Ta ndihí tuhun.

³⁷ Yaha cuan ta nu cuahan ca chi, quiví nacahvi ra gobiernu chi ñáyiví, ta ndicuita ra Judas ra ityi Galilea cuan. Ta cuaha ñu chinyicon chi ra. Soco suri chahñi ñáyiví chi ra. Ta tandihí ñu cha chinyicon chi ra chityaa cuatyí ñu.

³⁸ Yucuan chaha saña ndo chi ra chiña. Ta ma tyihí ndo chi ndo chihin

ra vatyí tatu tuhun ñáyiví ri cuví cha chicá noo ra, cundihi tuhun.

³⁹ Soco tatu ndicha tyi tuhun Nyoo cuví, ma cuví chi nyoho sativí ndo. Saha ndo cuenda chi ndo coto vaha chihin Nyoo cañi tahan ndo —catyí ra Gamaliel chi ra.

⁴⁰ Tandihí ra ndoo ra vaha. Tyicuan ta cana ra chi ra apóstol. Cacañi policia chi ra. Ta chasi ra nu cahan ca ra tuhun ra Jesús. Tyicuan ta saña ra chi ra.

⁴¹ Ta quitá coyo ra apóstol nuu ra cuví tyiño. Ta si xaan cacuñi ra vatyí chaha Nyoo cuhva vatyí nyehé ra tindoho cha cuenda ra Jesús.

⁴² Ta ña casandihí ra cha cacahán ra. Ta ndiquiví ri sañahá ra tuhun ra Jesucristo vehe ñuhu ta vehe ñáyiví ñandihí.

6

Nu nacachí ñu yihí cuenda ra Jesús ucha tahan ra vatyí saha cuenda ra ñáa cha chiñuhu chi ñu

¹ Ta nu cuahan ca chi quiví cuaha xaan nanduví ñáyiví cha yihí cuenda ra Cristo. Tyicuan ta ñu cha cahán sahan griego quichaha cahan ñu siqui ñu cha cahán sahan hebreo cuan. Vatyí catyí ñu tyi ña tyiñuhú vaha ra cha cahán sahan hebreo chi ñu chihí yí cuenda ñu, cuhva cha sachá ra cha cacachi ñu ndiquiví ri.

² Tyicuan ta ndi uchi uvi tahan apóstol sandu ñin ri ra chi tandihí ñu yihí cuenda ra Cristo. Ta cacatyí ra chi ñu:

—Ña vaha cha sandihí ndi cha cahan ndi tuhun Nyoo ta sachá ndi cha cachi ndo.

³ Yucuan chaha yañi, nanducu ndo ucha tahan ra nu canyicú ndo ihya, ra vaha iyó chihin Nyoo, ra chiñi tuñi, ra tyitú yihí chihin Tatyí Ii. Ta cuhva yo tyiño ihya chi ra.

⁴ Ta nyuhu sañihí ndi cacan tahvi ca ndi. Ta cuasañaha ca ndi tuhun Nyoo —catyí ra apóstol.

⁵ Tandihí ñu ndoo ñu vaha. Ta nacachí ñu chi ra Esteban. Vatyí chinó xaan iñi ra chi Nyoo. Ta tyitu ra chihin Tatyí Ii. Ta nacachí tucu ra

chi ra Felipe, ta chi ra Prócoro, ta chi ra Nicanor, ta chi ra Timón, ta chi ra Parmenas, ta chi ra Nicolás cha cuví ra noo ra ñuu Antioquía, ta nanduví ra noo ra Israel.

⁶ Tyicuan ta quichí nyaca ra chi ra nu nyicu ra apóstol. Tyicuan ta catyiso ra ndaha ra xiñi noo noo ra ta cachican tahvi ra chi Nyoo cha cuenda ra.

⁷ Ta cuahan chitya ca tuhun Nyoo. Ta nducuaha ca ñu yihí cuenda ra Cristo ñuu Jerusalén. Ta na chino iñi tucu cuaha tata sutu cuenda ñu Israel ñandihí.

Nu catyihí ra chi ra Esteban vehe caa

⁸ Ra Esteban cuví ra noo ra cha tyitú chihin tunyee iñi Nyoo. Ta vaha xaan ñáyiví cuví ra vatyí tyitu añima ra chihin cha vaha Nyoo. Ta cuaha xaan milagru ta seña sacuví ra nu nyicú ñáyiví.

⁹ Tyicuan ta suhva ra vehe ñuhu ñuu Israel cha nañi Vehe Ñuhu Cuenda Ñáyiví Ndo Libre, candu ñin ri ra chihin ra ñuu Cirene, ta ra ñuu Alejandría, ta ra ityi Cilicia, ta ra ityi Asia. Ta quichaha cuví yuhu ra chihin ra Esteban.

¹⁰ Soco ña cacuvi chasaha ra chi ra, vatyí ra Esteban cahán ra chihin cha chiñi tuñi cha chaha Tatyí Ii chi ra.

¹¹ Tyicuan ta catyiyahví ra cuan chi suhva ra vatyí canducu ra cuendu chaha ra Esteban ta catyí ra cuendu cuan vatyí ra Esteban cahán ña vaha ra siqui ra Moisés, ta siqui Nyoo.

¹² Yucuan chaha tandihí ñáyiví cuan naquiquí ñu. Tyicuan ta ra chahnu ta ra sacuaha cuenda ley ra Moisés, catiñ ra chi ra Esteban. Ta chahan ra chinyaca ra chi ra nu ndu ñin ri ra cuví tyiño cuenda vehe ñuhu ñu Israel.

¹³ Ta canducu ra chi ra cahan cuendu chaha ra. Ta maa ra catyí ra tyehe caa:

—Ra Esteban ihya, ña sandihí ra cha cahan cuehe ra siqui vehe ñuhu yo ta siqui ley ra Moisés.

¹⁴ Ta chiñi ndi cahan ra vatyí ra Jesús ra Nazaret cuan cusatani ra

vehe ñuhu cahnu ihya. Ta cunasama ra costumbre cha sandoo ra Moisés chi yo na —catyí ra cuendu cuan siqui ra Esteban.

¹⁵ Tyicuan ta ra cacuví tyiño ta ra canyicú yucuan canyehe ra chi ra Esteban vatyí tari maa nuu ángel tyicuan caa nuu ra cuhva cuan.

7

Nu cahán ra Esteban tuhun Nyoo chihin ñáyivi nducú cahñi chi ra

¹ Tyicuan ta ra cuví nuu chi tata sutu ndaca tuhun ra chi ra Esteban, ta catyí ra:

—¿Atu ndicha cha catyí ra ihya?

² Tyicuan ta nacahan ra Esteban ta catyí ra:

—Nyoho yañi, ta nyoho tata, cuiñi ndo tuhun cahín. Sutu yo Nyoo cha cahnu ca tuví ra nuu sutu chahnu yo, ra Abraham quivi nyaá ra ityi Mesopotamia cha niri ca cha cumañi cucoo ra nya ñuu Harán.

³ Ta catyí ra chi ra: “Sandoo ñuun, ta chi tandihi ñáyivi chuun. Ta cunuhu inga ñuu cha cusañahi chuun”, catyí Nyoo chi ra Abraham.

⁴ Tyicuan ta ra Abraham quita ra ñuu Caldea ityi Mesopotamia cuan, ta cuanuhu ra nya ñuu Harán. Ta yucuan cuví nuu chihí sutu ra. Yaha cuan saquichí Nyoo chi ra ñuhú nu iyó yo vityin.

⁵ Soco ñahri ñuhú chaha Nyoo chi ra quivi cuan. Ni noo nu cuinanyaa chaha ra ta ña chaha ra. Soco catyí Nyoo chi ra vatyí cucuhva ra. Ta cutahan chi chi sehe ra chata cha yaha cúvi ra. Tyicuan caa catyí Nyoo chi ra Abraham, vasi ta coo ca sehe ra quivi cuan.

⁶ Ta sin ri catyí Nyoo chi ra vatyí ñáyivi chi ra cucoo ñu inga ñuu. Ta cusacuvi ñu tyiño nuu ñáyivi ñuu cuan, ta ma tyiyahvi ñu chí ñu. Ta cunyehe ñu tindoho cumi cientu cuiya.

⁷ Soco catyí tucu Nyoo chi ra tyehe caa: “Ñáyivi ñuu cuan cusanyehe ñu tindoho chi ñáyivi chuun. Yucuan cuenda cuatachi tuñi yuhu chi ñu. Ta

yaha cuan ta cuquita ñáyivi chuun ñuu cuan ta cuquichi ñu ihya. Ta cusacuvi ñu tyiño nuu mai ihya”, catyí Nyoo chi ra Abraham.

⁸ Tyicuan caa natyihí tahan Nyoo tuhun chihin ra. Ta chaha Nyoo noo costumbre cha cuasacuvi ñu coto naa iñi ñu. Chaha ra tyi cutahnya chiin ñi xiñi ndivi cha lee sehe ñu, o cha sahá ñu circuncidar chi sehe ñu cuví cuan. Ta cha yaha uña quivi cha cacú ra Isaac sehe ra Abraham, tyicuan caa chinyacuví ra chihin ra. Ta suri tyicuan caa sacuví tucu ra Isaac chihin ra Jacob sehe ra. Ta ra Jacob tucu chihin uchi uvi tahan sehe ra, tyaa ra noo seña cuan chi noo noo sehe ra. Ta ican ra cuan cacuví sutu chahnu yo.

⁹ Ta ican uchi iñi tahan ra sehe ra Jacobo ihya catasi cuñi ra nyehe ra chi ra José yañi ra cha cuenda vatyí vaha ca ra nuu sutu ra. Yucuan chaha caxico ra chi ra na cuhun ra Egipto. Soco Nyoo ña sandoó ra chi ra José.

¹⁰ Ta sacacú ra chi ra nu nyehé ra tindoho. Ta chaha ra cha chiñi tuñi ra chi ra. Ta chaha ra cha vaha coo ra nuu ra Faraón, ra cuví rey Egipto. Ta rey cuan chaha ra cha cuvi ra José gobiernu Egipto cuan. Ta chinyaca ñaha tucu ra vehe maa rey ñandihí.

¹¹ Tyicuan ta chiyo tama nicahnu ityi Egipto ta ityi Canaán. Ta nyehe xaan ñáyivi tindoho. Ta tandihi sutu chahnu yo cha chicoo tyembu cuan ña cañihí ra cha cachi ra.

¹² Soco quivi chito ra Jacob vatyí iyó trigu nya Egipto, ta tachí ra chi sehe ra na cuquehen ra. Ta chahan coyo ra noo chaha.

¹³ Ta cha cu uvi chaha cha chahan coyo ra, ra José sacoto ra chi ra vatyí yañi ra cuví chi ra. Yucuan quivi chito ra Faraón yoo chi tata vachi ra José.

¹⁴ Tyicuan ta tachí ra José tyiño na quichi sutu ra, ra Jacob, chihin tandihí ñáyivi chi ra, uñi xico chahun tahan ñu.

¹⁵ Ta tyicuan caa cuvi cha cuahan ra Jacob cucoo ra Egipto cuan. Yaha cuan ta chihí ra yucuan. Ta chihí tucu sehe ra, ra cacuví sutu chahnu yo.

16 Tyicuan ta chaꝯ quiví cha chinyaca ñu yiqui ra Jacob ta yiqui sehe ra nya Siquem. Ta yucuan quihvi ra chichi ñuhú nu sata ra Abraham noo ñaña chi sehe ra Hamor ta cha naha.

17 'Soco cha ni cumañi ca quita ñu Egipto, ñáyiví chi ra Abraham cha iyó Egipto cuan cuaha xaan nanduvi ñu. Ta cha nyaña yatyin quiví cha cuacuhva Nyoo ñuhú chi ñu tari cuhva catyi cachi ra chi ra Abraham.

18 Tyicuan ta quichaha nyaca ñaha noo rey cha ña ñohó nuu chi ra José.

19 Rey cuan sandavi ñaha ra chi ñáyiví chi yo cuan. Ta sanyehé xaan ra tindoho chi ñu, ta saniñi ra chi ñu na sanandoo ñu chi sehe ñu cha ni cacu vatyí na cúvi ndotyin.

20 Ta suri quiví cuan cacu ra Moisés. Ta tahan xaan iñi Nyoo chi ra lee cuan. Ta uñi yoo sacuahnu sihi ra chi ra nya vehe ña.

21 Yaha cuan ña cuví ca tixehe sihi ra chi ra. Ta sandoo ña chi ra chichi noo tica yuhu yutya. Tyicuan ta sehe maa rey Egipto cuan nañihí ña chi ra. Ta naquehen ña chi ra. Ta sacuahnu ña chi ra, tari cha sehe ña cuví chi ra.

22 Yucuan chaha cutuhva ra Moisés tandihí cha chitó ñu Egipto. Ta sin ri nyee xaan cuhva cahan ra, ta cuhva sacuví ra ñandihí.

23 'Ta quiví cha chaꝯ uvi xico cuiya ra Moisés quichi cuví iñi ra cuhun ra cunyehe ra nu nyicú ñu Israel, ñáyiví chi ra.

24 Tyicuan ta noo quiví nyehe ra nu cañi noo ra Egipto cuan chi noo ra Israel cuan. Tyicuan ta chahñi ra Moisés chi ra Egipto cuan vatyí sata si iñi ra chi ra Israel ra ñuu ra.

25 Cuñi maa ra Moisés cuan vatyí ñáyiví Israel cuan cutuñi iñi ñu tyi Nyoo tachí chi ra vatyí cusacacu ra chi ñu. Soco maa ñu ña tuví iñi ñu cha tyicuan caa cucuvi.

26 Tyicuan ta cha inga quiví cuan nyehé ra Moisés chi uvi tahan ra Israel cha cacañi tahan ra. Ta ra Moisés, cuñi ra cha ma cacañi tahan ca ra, ta quichaha catyi ra: "Ña vaha

cha cacañi tahan nyoho, vatyí suri yañi ndo cuví", catyi ra chi ra.

27 Tyicuan ta ra cha cañi chi tahan cuan tyandaha ra chi ra Moisés, ta catyi ra chi ra: "¿Yóó cha tyatyíño chi yoho vatyí cunyaca ñahun ta cuvun juez chi ndi?"

28 ¿Atu cuñun cahñun chii tari chahñun chi ra Egipto cuan icu?" catyi ra chi ra Moisés.

29 Cuhva cha chiñi ra Moisés cha catyi ra, chino ra. Ta cuahan ra nya ñuu Madián. Yucuan ñihi ra ñasihí ra. Ta yucuan chiyo uvi tahan sehe ra.

30 'Yaha uvi xico cuiya. Tyicuan ta noo quiví chicá noo ra Moisés chiqui ndi yatyin noo yucu cha nañi Sinaí. Ta nyehe ra noo taca iñu cha cayú. Tyicuan ta tuví noo ángel chichi ñuhú cha cayu cuan.

31 Iyo xaan cuñi ra Moisés cha nyehé ra yucuan. Ta cuhva cha tuhva yatyin ca ra vatyí tacuhva nyehe vaha ra, chiñi ra noo ndusu Sutu Mañi yo. Ta catyi ra tyehe caa:

32 "Yuhu cuví Nyoo cuenda sutu chahnun, Nyoo cuenda ra Abraham, ta ra Isaac, ta ra Jacob", catyi Nyoo chi ra. Tyicuan ta ra Moisés quichaha ñihi ra chihin cha yuhvi ra. Ta ña caña iñi ra nanyehe ra.

33 Ta quichaha catyi tucu Sutu Mañi yo chi ra: "Tava ndichan chahun vatyí ñuhú nu chañun, ñuhú ii cuví.

34 Yuhu nyehí tandihí tindoho cha nyehé ñáyiví cuende ñuu Egipto chiña. Ta chiñi ndusu ñu cha chacú cha ñu. Yucuan chaha noó xique vityin vatyí sacaqui chi ñu. Ñaha, vatyí cutachi chuun nya Egipto", catyi Nyoo chi ra Moisés.

35 'Quiví cuan ña cuñi ñáyiví Israel chi ra Moisés cha cunyaca ñaha ra chi ñu, ta catyi ñu chi ra: "¿Yóó cha tyatyíño chi yoho vatyí cunyaca ñahun ta cuvun juez chi ndi?", catyi ñu chi ra. Ta vasi ña cuñi ñu cha cunyaca ñaha ra chi ñu, soco Nyoo tachí chi ra vatyí cuví ra nuu, ta sacacu ra chi ñu. Vatyí tyicuan caa catyi ángel cha tuví nuu ra nu taca iñu cha cayu cuan.

³⁶ Ta ican ra Moisés cuan tava chi ñáyivi Israel Egipto cuan. Ta cha yaha savaha ra milagru ta seña ñuu cuan, ta sacuvi tucu ra nu yaha ñu Tyañuhu Cuaha. Ta nu chica noo ñu ñuhú ityi chichi cha uvi xico cuiya sacuvi tucu ra ñandihí.

³⁷ Ta suri maa ra Moisés cuan cuví ra cha catyi chí ñu Israel ta cha naha tyehe caa: “Nyoo cutachi ra noo profeta ra tari tachí ra chi mai. Ta cucuvi ra noo ra Israel tari maa ndo. Quichaha ndo chí ra”, catyí ra.

³⁸ Ta suri maa ra Moisés cuan ndihí ra chihin ñáyivi chahnu yo nu chica noo ñu ñuhú ityi cuan. Ta ican ra cuví ra cha cahan ángel cuan chihin nya yucu Sinaí. Ta ican ra quehen cuenda ra tuhun yoso caa coo ñáyivi ta sañaha ra chí yo.

³⁹ 'Soco ñáyivi chahnu yo ña quichaha ñu chí ra. Tava xiin ñu chí ra. Ta cacuñi ñu cunuhu coyo ñu nya Egipto.

⁴⁰ Yucuan chaha cuhva cha nyaá ca ra Moisés yucu Sinaí ta cahan ñáyivi chihin ra Aarón ta catyí ñu: “Savahun suhva nyoo cha cuhun coyo ityi nuu ndi. Vatyí ña chitó ndi ñáá cha cuví chí ra Moisés, ra cha tava chí ndi Egipto”, catyí ñu.

⁴¹ Tyicuan ta casavaha ñu noo becERRU xuhun cuaan. Tyicuan ta cachahñi ñu quití vatyí cuhva cuenda ñu chí xitohyo cuan. Ta sii xaan cuñi ñu cachiyo ñu vico cuenda xitohyo cha casavaha ñu chihin ndaha ñu.

⁴² Tyicuan ta Nyoo cuachiyo ra chí ñu. Ta saña ndaha ra chí ñu vatyí cusacahnu ñu chí ñanyii, chí yoo, ta ñáá ndihí tiño cha iyó ityi andivi. Vatyí tyehe caa catyaá ra profeta cuenda Nyoo nu libru ta cha naha:

Nyoho ñáyivi Israel, ¿atu chahñi ndo quití vatyí cuhva cuenda ndo chí yuhu chichi cha uvi xico cuiya cha chica noo ndo ñuhu ityi? Ñima.

⁴³ Soco sacahnu ndo chí nyoo cha nañí Moloc, ta sacahnu tucu ndo chí nyoo cha nañí Renfán cha caá tari caá tiño andivi.

Suri maa ndo savaha xitohyo cuan, vatyí sacahnu ndo.

Yucuan chaha yuhu cuatave chí ndo ñuu ndo, ta cuasacuhin chí ndo noo nu cañi ityi nuu ca Babilonia, catyi Nyoo chí ñu.

⁴⁴ 'Nu chicá noo sutu chahnu yo ñuhú ityi cuan, chicumi ra noo vehe ñuhu cha chino chihin ñi quití. Ta chichi vehe cuan chicumi ra tabla yuu cha nyaá ley Nyoo nuu. Ta ra Moisés tachí ra tyiño na savaha ñu vehe ñuhu cuan ta ityi chata ca tari cuhva sañaha maa Nyoo chí ra.

⁴⁵ Yucuan ta ra Josué nanduvi ra nuu chí ñu. Ta quehen ñu vehe ñuhu ta chicoo ñu chihin nu nyaá yo ihya vityin. Vatyí Nyoo tava ñehe ra chí ñáyivi chiyo ñuhu ihya ta nacuhva cuenda ra chí ñu Israel ñáyivi chí yo. Ta chotyño ñu vehe ñuhu cuan nyacua nya quivi chiyo rey David.

⁴⁶ Ta rey David ñihí ra tumañi iñi nuu Nyoo. Ta cuñi ra savaha ra noo vehe vaha nu coo Nyoo. Suri Nyoo ihya sacahnu ra Jacob ta cha naha.

⁴⁷ Soco ra Salomón savaha vehe Nyoo.

⁴⁸ Vasi ña iyó Nyoo chichi vehe ñuhu cha savaha ñáyivi. Tari catyi ra chihin yuhu ra profeta ta cha naha tyehe caa:

⁴⁹ Andivi cuví tyayu nu nyaí ta nyacá ñahi tandihí. Ta ñuhu ñayivi, yucuan cuví nu chañi chahi.

¿Atu cuví savaha ndo vehi ta coi chichi, cuñi maa ndo?

¿Ta nya maa maa cuví nyitati, cuñi maa ndo?

⁵⁰ ¿Atu ña chitó ndo vatyí mai savahi andivi ta ñuhu ñayivi? catyí Nyoo.

⁵¹ 'Soco nyoho —catyí ra Esteban— tyicuan ri tuhvá ndo sandava ndo iñi ndo. Ta ña cuñi ndo naquehen ndo tuhun cahan Nyoo. Tyicuan ri ña quichahá ndo chí Tatyí Ii. Inuu ri caa ndo chihin sutu chahnu ndo.

⁵² Sutu chahnu ndo sataji iñi ra ta cachahñi ra chí tandihí ra profeta cuenda Nyoo ta cha naha. Ta ican ra cuan cacatyí vatyí cuquichi noo ra vaha. Ta cha quichi ra vityin, nyoho

ña cuñí nyehe ndo chi ra, ta cachahñi ndo chi ra.

⁵³ Nyoho naquehen cuenda ndo ley Nyoo cha chahā ángel chi ndo, soco ña cuñí ndo sacuvi ndo cuhva catyí ley cuan —catyí ra Esteban.

Nu chihí ra Esteban

⁵⁴ Cuhva cha chiñi ra cacuví tyiño vehe ñuhu cahnu tuhun ihya, xaan xaan cuñi ra, nyacua casacahñi noho ra nyehé ra chi ra Esteban.

⁵⁵ Soco ra Esteban tyitú cuii maa ra chihin Tatyí Ii ta nanyehé ra ityi andivi. Ta nyehé ra cha cahnu cuví Nyoo. Ta suri nyehe ra chi ra Jesús nanyaá ra chiyo vaha Nyoo.

⁵⁶ Tyicuan ta catyí ra Esteban:

—¡Nyehe ndo! Nyehe tanuña andivi. Ta nyehí chi ra Jesús, Rayi cha quichi nya gloria, nanyaá ra chiyo vaha Nyoo —catyí ra Esteban.

⁵⁷ Soco ra cuan cachasi ra soho ra, cha ma cuiñi ra tuhun cahán ra Esteban. Tyicuan ta vaa ri cananduvi ra. Ta tandihí ra cuahan coyo ra siqui ra Esteban.

⁵⁸ Tyicuan ta catava ra chi ra yuhu ñuu. Ta ca chahñi ra chi ra chihin yuu. Ta ra cha cacuví cha ña vaha cuan, casandoo ra sahma cha nyaa chata ra vatyí sahadumi noo ra tyivaa cha nañi Saulo.

⁵⁹ Cha niri ca cha cacañi ra yuu chi ra Esteban, quichahā chican tahvi ra Esteban chi Nyoo, vatyí tui iñi ra cuacúvi ra. Ta catyí ra tyehe caa:

—Sutu Mañi yuhu Jesús, naquehen añime —catyí ra.

⁶⁰ Yahā cuan, tyicuan ta chicuñi chiti ra, ta chaa canachaa ra ta catyí ra:

—Sutu Mañi yuhu, ma tñin cuendon cuatyí cha sacuví ñu —catyí ra.

Ta cha yahā catyí ra tyehe caa, ta chihí ri ra.

8

Nu chicá nyicon ra Saulo chi ñáyivi yihí cuenda ra Cristo

¹ Ta ra Saulo ña chinó iñi ra chi ra Jesús, ta ndoó ra vaha cha chahñi ra chi ra Esteban.

Ta suri quivi cuan quichaha nducu xaan ñáyivi chi ñu yihí cuenda ra Cristo ñuu Jerusalén cuan vatyí cucahñi ñu chi ñu. Soco ra apóstol ña caquita ra. Candoo ra nyicú ra Jerusalén. Ta tandihí ca ñu cachino ñu, cuahan coyo ñu cuacoo ñu ityi Samaria, ta ityi Judea.

² Ta suhva ra cha nyicón vaha chi Nyoo Jerusalén cuan, catyihí ra coño ñuhu ra Esteban chichi ñuhú. Ta cachacú xaan ra cha cuenda ra.

³ Cha niri ca cha tyicuan caa, ra Saulo chicá nyicon vavaha ra chi ñáyivi yihí cuenda Cristo. Ta tahan tahan vehe ñu chahan ra. Ta suri quiñoho ñaa ra chi ñu, ta chahā cuenda ra chi ñu vatyí cohon ñu vehe caa, rayi ta ñusihi.

Nu cacahán ñu tuhun ra Cristo ityi Samaria

⁴ Soco tandihí ñu cha quita ñuu Jerusalén, cahán ñu tuhun yoso caa sacacú ra Cristo añima ñu tandihí ri maa ityi nu chaā coyo ñu.

⁵ Minoo ra cha nañi Felipe chaā ra noo ñuu ityi Samaria. Ta quichahā cahan ra tuhun ra Cristo chihin ñu.

⁶ Ta tandihí ri ñáyivi ta tyasohó ñu tuhun cha cahán ra. Ta nyehé ñu milagru ta seña cha savahá ra.

⁷ Vatyí cuaha vavaha ñáyivi cha yihí tatyí ña vaha chii nduvaha ñu. Vatyí tatyí ña vaha cha yihí chi ñu, quita chí ta suri canachaa chi cuahan chí. Ta cuaha vavaha ñáyivi coxo ta ñáyivi cha ña cuví nacanda, nduvaha ñu.

⁸ Yucuan chaha ñáyivi ñuu cuan, sii xaan cacuví chi ñu.

⁹ Soco ñuu Samaria cuan iyó noo ra tasi cha nañi Simón. Ta sandaví ñaha ra chi ñáyivi cuan. Catyí ra vatyí cuví ra noo ra cahnu.

¹⁰ Ndi cuii maa ñáyivi tyasohó ñu tuhun cahan ra, nya ñu tyayii, ta nya ñu ndahvi. Ta cacatyí ñu:

—Ndicha ndicha cuii, vatyí tunyee iñi Nyoo nyaá chihin ra ihya —catyí ñu.

¹¹ Quichahá xaan ñu tuhun cahán ra vatyí cha naha xaan sandaví ñaha ra chi ñu chihin tuhun tasi.

12 Tyicuan ta quichij ra Felipe. Ta sacoto ra chi ñu yoso caa nyacá ñaha Nyoo añima ñáyivi. Ta yoso cuhva cha cahnu cuvi ra Jesucristo. Ta yucuan ta chino iñi ñu chi ra Cristo, rayi ta ñusihi. Ta condutyā ñu.

13 Nyacua nya ra Simón cuan, ta nachino iñi ra chi ra Cristo, ta condutyā ra. Ta quichaha chica noo ra chihin ra Felipe. Ta iyo xaan cuñi ra nyehe ra milagru, ta seña cha sacuvi ra Felipe cuan.

14 Tyicuan ta ra apóstol cha canyicú ñuu Jerusalén cuan ñihij ra tuhun cha canachinó iñi ñáyivi ityi Samaria cuan tuhun Nyoo. Ta catachij ra chi ra Pedro ta chi ra Juan.

15 Cuhva cha chaq coyo ra yucuan, ta chican tahvi ra chaha ñu quihvij cuenda ra Cristo vatyí tacuhva tyi naquehen ñu Tatyí Ii.

16 Vatyí ñu cuan, ta naquehen ca ñu Tatyí Ii. Tacuhva condutyā ri ñu chihin sivi Sutu Mañi yo Jesús.

17 Tyicuan ta ra Pedro ta ra Juan catyiso ra ndaha ra siqui ñu, ta naquehen ñu Tatyí Ii.

18 Ta ra Simón cuan nyehe ra cuhva cha catyiso ra apóstol ndaha ra siqui ñu cuan, ta naquehen ñu Tatyí Ii.

19 Ta quichaha catyí ra tyehe caa:

—Yoso xuhun cuñi ndo ta cuhva ndo tunyee iñi chiña chii, vatyí tacuhva cuvi tyise ndahi siqui ñáyivi, ta naquehen tucu ñu cuan Tatyí Ii —catyí ra Simón cuan chi ra apóstol.

20 Tyicuan ta nacahan ra Pedro ta catyí ra:

—Na cunaun in ri chihin xuhun chiña. Vatyí chicá iñun tyi cuví sata yo chihin xuhun nyatu cha chahá maa Nyoo chi yo.

21 Yoho, ña tahn chi tyihun chuun chihin tuhun ihya. Vatyí añimon ña vaha nuu Nyoo.

22 Ndu uvi iñun cuhva chicá xiñun chiña, vatyí cahnu cha quiñi caa cuví cuan nuu Nyoo. Ta çacan tahvi chi ra na nyehe yo tatu saha ra ticahnu iñi chuun cha cuenda cha caa chichi añimon.

23 Vatyí nyehí tyi chichi añimon tyitú maa yihí cha quiñi caa cha cuvi tari cha uva. Ta cha quiñi caa cuan, ña chahá coton cha vaha. —catyí ra Pedro chi ra Simón cuan.

24 Tyicuan ta nacahan ra Simón ta catyí ra:

—Çacan tahvi maa ndo cha cuende nuu Nyoo, ta cuhva cha ma quichi tandihij tuhun cha catyún chiña siqui —catyí ra Simón chi ra Pedro.

25 Cha yaha cuan ta ra apóstol nacatyí ra tandihij cha nyehe ra cha sacuvi ra Cristo. Ta cahan ra tuhun Nyoo. Tyicuan ta cuanuhij coyo ra nya Jerusalén. Ta suri sacoto ra tuhun yoso caa sacuvi yo ta cacu añima yo tandihij ñuu ityi Samaria nu yaha ra.

Nu cahn ra Felipe tuhun Nyoo chihin noo ra Etiopía

26 Cha yaha tuhun cuan tyicuan ta cahan noo ángel Nyoo chihin ra Felipe, ta catyí ra:

—Ndicuita ta cuhun ityi sur, ityi quita nya Jerusalén ta cuahan nya Gaza —catyí ángel cuan chi ra.

Yucuan cuvi ityi cha yaha noo ñuhú ityi.

27 Tyicuan ta ra Felipe ndicuita ra ta cuahan ra. Ta ityi cuahan ra ta ñihi tahan ra chihin noo ra ñuu Etiopía. Ta cuvi ra eunuco. Cuví ra noo ra cuví tyiño cahnu ñuu Etiopía, vatyí saha cuenda ra xuhun cu Candace, ñaha cha cuví reina ñuu Etiopía cuan. Ta chahan ra Etiopía cuan chisacahnij ra chi Nyoo nya Jerusalén.

28 Ta ityi cuanuhú ra nya ñuu ra nyaá ra siqui carru ra. Ta sacuahá ra libru cha tyaa ra Isaías ra profeta cuenda Nyoo ta cha naha.

29 Tyicuan ta Tatyí Ii catyí chi ra Felipe:

—Satuhva ca nu cuahan carru cuan.

30 Ta cuhva cha tuhva ra Felipe, chijij ra vatyí sacuahá ra cuan nu libru cha tyaa ra Isaías. Ta ndaca tuhun ra chi ra:

—¿Atu cutuñi iñun cha sacuahún? —catyí ra.

³¹ Tyicuan ta nacahan ra cuan ta catyí ra:

—¿Yoso caa cutuñi iñi ta yori sañahá chii? —catyí ra chi ra.

Ta chican ra chi ra Felipe na ndaa ra ta cunyaa ra chihin ra.

³² Ta nu cuahan sacuaha ra, catyí chi tyehe caa:

Chahñi ra chi ra tari chahñi ra noo mbee.

Vatyí tari ña chacú mbee tatu cuasatya ra ixí ti, ta tari ña chacú ti tatu chahñi ra chi ti, tyicuan caa cuví ra cuan tyi nyehe ra tindocho ta ñahri maa catyí ra.

³³ Sanocuee ñu chi ra ta yori cuñi sacacu chi ra.

¿Yóo ra cuví nacatyí tuhun sehe ra cha cuacoo?

Yori, vatyí chihí ra.

Catyí chi nu tutu cha sacuaha ra cuan.

³⁴ Tyicuan ta ra cuan quichaha ndaca tuhun ra chi ra Felipe, ta catyí ra:

—Saha tumañi iñi chii, ta catyun chiin chii yóo chi tuhun cahán ra profeta ihya. ¿Atu tuhun maa ra, o yóo chi tuhun cahán ra? —catyí ra chi ra Felipe.

³⁵ Tyicuan ta ra Felipe quichaha cahan ra siqui tuhun cha cha yaha sacuaha ra cuan, ta nacatyí ra chi ra vatyí tuhun ra Jesús cahán ra cuan. Ta nacatyí ra vatyí ra Jesús cuví ra cha sacacú chi yo.

³⁶ Tyicuan ta cha cuayaha ra noo nu ñohó ndutya. Ta ra cuan quichaha catyí ra chi ra Felipe:

—Ihya ñohó ndutya. ¿Atu ma cuví condutye vityin? —catyí ra.

³⁷ Tyicuan ta nacahan ra Felipe, ta catyí ra:

—Tatu chinó iñun chihin cha tandihí añimon, cuví condutyon —catyí ra chi ra.

Tyicuan ta nacahan ra cuan, ta catyí ra:

—Chinó iñi yuhu vatyí Sehe Nyoo cuví chi ra Jesucristo —catyí ra.

³⁸ Tyicuan ta ra cuan catyí ra chi musu ra na sacucuiñi ra carru cuan.

Tyicuan ta canoo nduvi tahan ra. Ta caqui hví ra chi ndutya. Tyicuan ta sacondutya ra Felipe chi ra.

³⁹ Ta cuhva cha caquita coyo ra chichi ndutya cuan, Tatyí Ii Sutu Mañi yo naquehen chi chi ra Felipe. Ta ra cuan ña nyehe ca ra chi ra. Soco sii xaan cuví chi ra, cuanuhu ra.

⁴⁰ Ta ra Felipe chaa ra ñuu Azoto. Ta cuahan ra tahan tahan ñuu, ta cahan ra tuhun ra Cristo chihin ñáyivi nyacua nya cha chaa ra ñuu Cesarea.

9

Nu nachinó iñi ra Saulo chi ra Cristo

(Hch. 22.6-16; 26.12-18)

¹ Cha ni ri ca cha chicá noo ra Felipe cahán ra tuhun ra Cristo chihin ñáyivi, ra Saulo ña sandihí ra tuhun cha nducú cahñi ra chi ñu yihí cuenda Sutu Mañi yo. Ta chahan ra nu nyaá ra cuví nuu chi tata sutu,

² chicacan ra noo tutu chi ra, tacuhva nacuhva ra cuhun ra vehe ñuhu ñuu Damasco, ta tin ra chi ñu cuahan ityi ra Cristo, ta quichi nyaca ra chi ñu vehe caa Jerusalén, rayi o ñusihi.

³ Nihí ra Saulo tutu cuan ta cuahan ra. Ta cuhva cha cuachaa ra ñuu Damasco cuan, sana cuí ri iñi ra, ta quichi noo nduva ñuhu ityi andivi, sacondichin nicachico maa nu cuahan ra.

⁴ Tyicuan ta ra Saulo nduva ra nu ñuhú. Ta chihí ra noo ndusu cha catyí tyehe caa:

—Saulo, Saulo, ¿ñáá tuhun cha chicá nyicon chi yuhu? —catyí ndusu cuan chi ra.

⁵ Tyicuan ta nacahan ra Saulo ta ndaca tuhun ra chi ra ta catyí ra:

—¿Yóo yoho Tata? —catyí ra.

Tyicuan ta nacahan ndusu cuan chihin ra, ta catyí:

—Yuhu cuví ra Jesús, ra chicá nyicon chi. Suri chi maun sañicuehún, tari sañicuehé sindiqui quití tahví ñuhu chi ti cha chañi nyaa ti nu noo cha xaan cha saquehen ityi ra chi ti —catyí ra Jesús chi ra.

⁶ Tyicuan ta ra Saulo suri nihi ra chihin cha yuhvi ra. Ta catyí ra:

—Sutu Mañi yuhu, ¿ñáá cha cuñún tyi sacuvi? —catyí ra.

Tyicuan ta Sutu Mañi yo catyí ra chi ra tyehe caa:

—Ndícuita ta quihvun chichi ñuu Damasco chiña. Ta yucuan cucatyí noo ra chuun ñáá cha cusacuvun —catyí ra Jesús chi ra Saulo.

⁷ Ra cha candihi chihin ra Saulo, yuhvi xaan ra cacuvi. Ta ña cañihi ra tuhun cahan ra vatyí cachiñi ra ndusu cuan soco yori chi nyehe ra.

⁸ Tyicuan ta ra Saulo ndícuita ra. Soco cuhva cha nuña ra chiti nuu ra, ña cuví ca maa nyehe ra vatyí nducuaa ra. Yucuan chaha, ra tahan ra cayindaha ra ndaha ra ta chinyaca ra chi ra ñuu Damasco cuan.

⁹ Yucuan chinyaa ra uñi tahan quivi. Ta ña cuví nyehe ra. Ta niri ña chachi ra, ta ña chihí ra ndutya.

¹⁰ Ñuu Damasco cuan iyó noo ra chinó iñi chi Nyoo. Ta nañi ra Ananías. Ta nyehe ra noo visión nu catyí Sutu Mañi yo chi ra tyehe caa:

—¡Ananías! —catyí ra chi ra.

Tyicuan ta nacahan ra Ananías, ta catyí ra:

—Ma yuhu ihya, Sutu Mañi yuhu —catyí ra chi ra.

¹¹ Tyicuan ta Sutu Mañi yo catyí ra:

—Ndícuita, ta cahun noo ityi cahnu cha nañi Ndo. Ta nanducun vehe noo ra cha nañi Judas. Ta ndaca tuhun sivi noo ra cha nañi Saulo, ra ñuu Tarso. Vatyí chicán tahvi ra chi Nyoo.

¹² Ta nyehé ra noo visión, ta nyehé ra chi noo ra nañi Ananías. Ta chaá ra nu nyaá ra, ta tyisó ra ndaha ra siqui ra tacuhva cuví nanyehe ra inga chaha —catyí Sutu Mañi yo chi ra Ananías.

¹³ Tyicuan ta nacahan ra Ananías ta catyí ra:

—Sutu Mañi yuhu, cuaha xaan ñáyivi nacatyí chii vatyí cuaha xaan cha ña vaha chinyacuvi ra Saulo cuan chihin ñu yihí cuendon nya ñuu Jerusalén.

¹⁴ Ta vityin vachi tucu ra ihya vatyí chaha ra cacuví nuu chi tata sutu ityi chi ra cha tyihi ra chi ñáyivi chicán tahvi chihin sivun vehe caa —catyí ra Ananías chi Sutu Mañi yo.

¹⁵ Soco Sutu Mañi yo catyí ra chi ra:

—Cuahan vatyí yuhu cha nacachi vahi chi ra Saulo cuan, vatyí cahan ra tuhun chihin ñáyivi inga ñuu, ta chihin rey inga ñuu, ta suri cahan tucu ra chihin ñáyivi Israel ñandihí.

¹⁶ Yuhu cusañahi chi ra yoso caa cha cuaha tindoho cunyehe ra cha cuende —catyí Sutu Mañi yo chi ra Ananías.

¹⁷ Tyicuan ta cuahan ra Ananías vehe nu nyaá ra Saulo. Chaá ra vehe cuan ta quihvi ra chichi vehe. Ta tyiso ra ndaha ra siqui ra Saulo, ta catyí ra chi ra tyehe caa:

—Yañi Saulo, Sutu Mañi yo ra Jesús ra tuví nuun ityi vachun, ican ra tachi chii vatyí tacuhva cuví nanyehun inga chaha. Ta cusacutu ra chuun chihin Tatyí Ii ra —catyí ra Ananías chi ra Saulo.

¹⁸ Caa cuhva ri cuan ta cana coyo noo cha tari caa soo tiyaca cha yihí chiti nuu ra Saulo. Tyicuan ta cuví nanyehe ra inga chaha. Yahá cuan ta condutya ra.

¹⁹ Yahá cuan ta chachi ra. Ta ndun-yeé coño ñuhu ra inga chaha. Ta ndoo ra suhva quivi chihin ñu yihí cuenda ra Cristo ñuu Damasco cuan.

Nu quichaha cahan ra Saulo tuhun ra Cristo chihin ñáyivi ñuu Damasco

²⁰ Tyicuan ta numi ri quichaha cahan ra Saulo tuhun ra Cristo chihin ñáyivi tandihí vehe ñuhu ñu Israel ñuu Damasco cuan. Ta catyí cachi ra vatyí ra Jesús, Sehe Nyoo cuví chi ra.

²¹ Ndií cuii maa ñáyivi cha chiñi tuhun cahán ra, iyo vavaha cuñi ñu. Ta catyí ñu chi tahan ñu:

—¿Atu ñima ra ihya cuví ra cha chica nyicon chi ñu chicán tahvi chihin sivi ra Jesús ityi ñuu Jerusalén cuan? ¿Atu suri ñima ra cuví cha vachi tñi chi ñu ityi tyehe vatyí cucuhva cuenda ra chi ñu chi ra cacuví nuu chi tata sutu? —catyí ñu.

22 Soco ra Saulo ñihi ca cahán ra tuhun ra Cristo chihin cha ñi ca iñi ra. Ta sañahá ra vatyí ra Jesús cuví ra Cristo, Sehe Nyoo. Nyacua ña cutuñi iñi ra Israel nyicú Damasco cuan nya ityi chino iñi ra.

Nu chino xehe ra Saulo chi ra Israel

23 Cha yahá suhva quivi, ta ra Israel cha ña chinó iñi chi ra Cristo catyihí tahan ra tuhun cha cahñi ra chi ra Saulo.

24 Ta ndiyaca ta ñiyaca canyatú ra chi ra yuvehe cahnu ñuu cuan. Soco ra Saulo cuan numi ri chito ra tuhun cuan.

25 Tyicuan ta ñáyivi cha chinó iñi chi ra Cristo ñuu cuan catyihí ñu chi ra chichi noo tica cahnu. Ta noo cha cuaa casanoq ñu chi ra ityi ventana noo vehe cha cacú chihin barda cha nyaá nicachico yuhu ñuu cuan. Ta tyicuan caa chino ra cuahan ra.

Nu ñohó ra Saulo Jerusalén

26 Quivi cha chaá ra Saulo Jerusalén, cuñi ra ndu in ri ra chihin ñu yihí cuenda ra Cristo. Soco tandihí maa ñu cuan ta yuhvi ñu chi ra. Vatyí ña chinó iñi ñu cha yihí ra cuenda ra Jesús.

27 Soco noo ra cha nañi Bernabé, naquehen ra chi ra. Ta chahá cuenda ra chi ra chi ra apóstol. Ta nacatyí ra chi ra yoso caa nyehe ra Saulo chi Sutu Mañi yo ra Cristo ityi ñuu Damasco; ta nacatyí ra yoso caa cahan Sutu Mañi yo chihin ra. Ta yoso caa cahan ra tuhun ra Cristo chihin cha ña yuhvi ra nya ñuu Damasco cuan.

28 Tyicuan ta ndoo ra Saulo Jerusalén chihin ñu yihí cuenda ra Cristo.

29 Ta cahan ra tuhun Sutu Mañi yo chihin cha ña yuhvi ra. Ta ndatuhún xaan ra tuhun ra Cristo chihin ra Israel cha cahan sahan griego. Soco ra cuan cananducú ra cuhva yoso caa ta cacahñi ra chi ra.

30 Soco cachitó ra hermano cuan vatyí tyicuan caa yihí iñi ra cuan. Yucuan chaha chinyaca ra chi ra Saulo nya ñuu Cesarea. Ta yucuan ta natachi ra chi ra nya Tarso ñuu ra.

31 Tyicuan ta ñu yihí cuenda ra Cristo cha nyicú tandihí ityi Judea, ta ityi Galilea, ta ityi Samaria, vii xaan nyicu ñu vatyí ña cuxaan ca ñáyivi chi ñu. Ta ndunyeé ca iñi ñu chihin fuerza Nyoo vatyí quichahá vaha ñu cuhva catyí Nyoo, vatyí yuhvi ñu coto ma sacuvi ñu cuhva cuñi ra. Iyó ñu chihin cha tyinyeé Tatyí li chi ñu. Ta cuaha xaan ñu cuahan nanduvi.

Nu nduvahá ra Eneas

32 Tyicuan caa cuví ta ra Pedro tuhvá ra chica noo ra nyehe ra yoso caa canyicu hermano noo noo ñuu. Ta chahan tucu ra chinyehe ra nu nyicu ñu yihí cuenda ra Jesucristo noo ñuu cha nañi Lida.

33 Yucuan nañihí ra chi noo ra cuhvi. Nañi ra Eneas. Ta cha uña cuiya catuví ra ña cuvi nacanda ra vatyí ndundava coño ñuhu ra.

34 Soco ra Pedro catyí ra chi ra:

—Yoho Eneas, ra Jesucristo sanduvahá ra chuun. Ndicuita ta natuvi yuvun —catyí ra chi ra.

Tyicuan ta caa cuhva ri cuan ndicuita ra Eneas.

35 Ta nyehe tandihí ñáyivi ñuu Lida cuan tyi nduvahá ra. Ta ñáyivi ñuu Sarón ñandihí. Tyicuan ta ñu cuan nachino iñi ñu chi Sutu Mañi yo. Ta sandoq ñu tuhun chahnu cha chino iñi ñu ta cumañi ca coto ñu tuhun ra Cristo.

Nu nandoto cu Dorcas

36 Quivi cuan chiyo noo ñaha chinó iñi chi ra Cristo ñuu Jope. Ta nañi ña Tabita, soco chihin sahan griego, Dorcas nañi ña. Ta tyicuan ri sacuví ña cha vaha chihin ñáyivi. Tyinyeé ña chi ñu ndahvi.

37 Ta quivi cuan cu Dorcas quehen noo cuehe chi ña ta chihí ña. Ta cha yahá sacutyí ñu chi ña, chicacun ñu chi ña chichi noo cuarto nu cu uvi piso.

38 Ñuu Jope cuan yatyin ri nyaá chihin ñuu Lida, nu nyaá ra Pedro. Ta ñu cha yihí cuenda ra Cristo ñuu Jope cuan chitó ñu vatyí nyaá ra Pedro ñuu Lida cuan. Tyicuan ta tachi ñu chi uvi tahan ra na cucatyí ra chi ra Pedro

vatyí naquichi ra cha numi ri. Cuahan ra cuan ta catyí ra chi ra Pedro:

—Coho nya Jope. Sanumi ta ma cucueun —catyí ra chi ra.

³⁹ Tyicuan ta ra Pedro ndicuita ra ta cuahan ra chihin ra. Ta cuhva cha chaa ra, chinyaca ra chi ra nya cuarto nu caa ndiyi cuan. Ta tandihi maa ñu chihí yí catuhva ñu nicachico chata ra. Suri chacú chaa ñu. Ta sañahá ñu sahma cha quicu cu Dorcas ta chinyito ña.

⁴⁰ Tyicuan ta ra Pedro tava ra chi tandihi ñáyivi cuarto cuan. Tyicuan ta chicuini chiti ra ta quichaha chican tahvi ra chi Nyoo. Tyicuan ta nanyehe ra chi ñaha chihí cuan catuvi ña. Ta quichaha catyí ra chi ña:

—Hermana Tabita, ndicuita —catyí ra chi ña.

Tyicuan ta nandica ña chiti nuu ña. Ta cuhva cha nanyehe ña chi ra Pedro, nicunya ña.

⁴¹ Tyicuan ta ra Pedro tin ra ndaha ña ta sandicuita ra chi ña. Tyicuan ta cana ra chi ra hermano, ta chi ñu chihí yí. Ta nacuhva cuenda ra chi ña chi ñu vatyí nandoto ña.

⁴² Yaha cuan ta ndi cuii maa ñu Jope chitó ñu cha nandoto ña cuan. Ta cuaha vavaha ñu nachino ñi chi Sutu Mañi yo.

⁴³ Ta ra Pedro ndoo ra cuaha ri quivi ñuu cuan. Nyaá ra vehe noo ra satyahyú ñi. Nañi ra Simón.

10

Ra Pedro ta ra Cornelio

¹ Ñuu Cesarea iyó noo ra cha nañi Cornelio. Ta cuví ra capitán cuenda noo ciento sindaro. Ta ityi sindaro cuan, Italia nañi.

² Ta ra Cornelio cuan yuhví ra chi Nyoo ta vaha sacahnú ra chi ra, maa ra ta ñáyivi chi ra ñandihí. Ta sin ri cuaha vavaha xuhun chahá ra chi ñu ndahvi ñu Israel. Ta tyicuan ri chicán tahvi ra chi Nyoo.

³ Ta cuví noo quivi cuan cuhva cha caa uñi cha cha ñi, nyehe ra noo visión. Ta yucuan cuvi nu cachi xaan nyehe ra vatyí noo ángel cha tachi

Nyoo quihvi nu nyaá ra, ta catyí ra chi ra:

—¡Yoho Cornelio! —catyí ángel cuan chi ra.

⁴ Tyicuan ta nanyehe ra Cornelio chi ángel cuan. Ta yuhvi xaan ra cuvi. Ta quichaha ndaca tuhun ra ta catyí ra:

—¿Ñáá cha cuví ihya, Tata? —catyí ra chi ángel cuan.

Tyicuan ta ángel cuan quichaha catyí ra chi ra:

—Nyoo chiñi ra ndi cuii maa cha chicón chi ra. Ta tahán ñi ra vatyí tyinyeé xaan chi ñu ndahvi.

⁵ Ta vityin cuñi chi cha tachun tyiño nya ñuu Jope na cuquehen chi noo ra cha nañi Simón Pedro.

⁶ Ta maa ra cuan cuacatyí ra chuun ñáá cha tahán chi sacuvun. Ta iyó ra vehe noo ra cha nañi tucu Simón, cuví ra noo ra satyahyú ñi. Ta iyó vehe ra yuhu tyañuhu —catyí ángel cuan chi ra Cornelio, ta cuahan ángel cuan.

⁷ Ta cha yaha cuahan ángel cuan, ra Cornelio cana ra chi uvi tahan musu ra, ta chi noo sindaro cha chinó xaan ñi chi Nyoo. Ta cuví tucu ra noo ra sahá cuenda chi ra Cornelio ñandihí.

⁸ Ndi cuii tuhun cahan ángel cuan chihin ra Cornelio ta nacatyí ra chi nduñi tahan ra cuan. Ta tachi ra chi ra ñuu Jope.

⁹ Tuvi inga quivi ta cuahan coyo ra cuan. Ta cuhva cha cuachaa coyo ra yuhu ñuu Jope cuan, ra Pedro ndaa ra xiñi vehe vatyí cuacacan tahvi ra chi Nyoo, ta cha cuñi hora cuví cuhva cuan.

¹⁰ Ta chaa noo soco chi ra ta chisocó vavaha ra. Soco cha ñiri ca cha sanduvahá ñu cha cachi ra, quichaha nyehe ra noo visión.

¹¹ Ta nyehe ra vatyí nicuitacoho andivi. Ta nyehe ra cua noo noo sahma cahnú vavaha ityi andivi. Ta tari quivi nuhñi noo noo tutun sahma cuan ta cuahan noo ityi nu ñuhu.

¹² Ta chichi sahma cuan ñohó tandihí maa nuu quiti cha cumi tahan chaha. Ta tandihí nuu coo, ta tandihí nuu saa.

¹³ Tyicuan ta chiñi ra noo ndusu cha catyí chi ra:

—Pedro, ndicuita ta cahñi quití ihya, ta cachun —catyí ndusu cuan chi ra.

¹⁴ Soco ra Pedro nacahan ra ta catyí ra:

—Ma cachi, Sutu Mañi yuhu. Yuhu ña tuhvé chachi quití cha catyí ley tyi yica cha cachi ndí —catyí ra Pedro.

¹⁵ Tyicuan ta quichaha catyí tucu ndusu cuan chi ra inga chaha:

—Ma catyun vatyí yica cha cachun noo cha cha yaha sanduvij yuhu —catyí ndusu cuan chi ra Pedro.

¹⁶ Uñi tahan chaha sañaha Nyoo visión ihya chi ra. Tyicuan ta sahmacahnu cuan nandaq cuanuhu tucu ityi andivi.

¹⁷ Cha niri ca cha chicá xiñi ra Pedro ñáa cha cuñi chi catyí visión cuan, chaq coyo musu cha tachí ra Cornelio. Ta candaca tuhun ra nya nyaá vehe ra Simón.

¹⁸ Ta cha chaa coyo ra ityi yuvehe candaca tuhun ra tatu yucuan iyó noo ra cha nañi Simón Pedro.

¹⁹ Ta ra Pedro suri cha chicá xiñi ra ñáa cha cuñi chi catyí visión cha nyehe ra. Tyicuan ta Tatyí li quichaha catyí chi ra:

—Nyehe Pedro, uñi tahan ra nanducú chuun.

²⁰ Ndicuita ta cuhun chihin ra, ta ma quihí uvi iñun vatyí mai tachí chi ra ihya —catyí Tatyí li chi ra.

²¹ Tyicuan ta ra Pedro noq ra nu canyicu ra cha tachí ra Cornelio, ta catyí ra chi ra:

—Yuhu cuví ra nanducú ndo. ¿Ñáa tyiño vachi ndo?

²² Tyicuan ta canacahan musu ra Cornelio ta catyí ra:

—Ra Cornelio, ra cuví capitán chi ndi ican tachí chi ndi. Noo ra vaha xaan ñáyivi cuví. Ta vaha xaan quichahá ra nu cahán Nyoo. Ta tandihí maa ra Israel ityi Judea ihya cacuñi ra chi ra chaha cha cuenda cha vaha ñáyivi cuví ra. Ta noo ángel Nyoo catyí chi ra vatyí na cana ra chuun, vatyí cuhun vehe ra vatyí tacuhva cuñi ra tuhun cha cuacahun —cacatyí musu ra Cornelio chi ra Pedro.

²³ Tyicuan ta chaha ra Pedro quihvi coyo ra chichi vehe. Ta candoq ra chihin ra cha cuaa cuan. Ta cha inga quivi cuan ta cuahan ra Pedro chihin ra. Ta cuahan suhva ra hermano cha iyó Jope cuan ñandihí.

²⁴ Cha inga quivi chaq coyo ra nya Cesarea nu nyatú ra Cornelio chi ra chihin ñáyivi chi ra, ta chihin tandihí ra tahan ra.

²⁵ Cuhva cha chaq ra Pedro vehe ra, ra Cornelio quitá ra ta cahan ra chihin ra. Ta chicuñi chiti ra nuu ra ta quichaha sacahnu ra chi ra.

²⁶ Soco ra Pedro nacoñehé ra chi ra, ta catyí ra chi ra:

—Ndicuita vatyí noo rayi ri cuví yuhu tari yoho, ta ñima Nyoo cuví —catyí ra chi ra.

²⁷ Ta cha niri ca cha cahán ra chihin ra, quihvi ra ta nanyehe ra cuaha ñáyivi candu in ri.

²⁸ Tyicuan ta catyí ra Pedro chi ñu:

—Nyoho chitó ndo vatyí ley nyuhu cha cuví ndi ñu Israel, ña chahá chi cha cu in ri ndi chihin ñáyivi inga ñuu. Ta niri chichi vehe ñu ta ma cuví quihvi ndi. Soco Nyoo sañaha ra chii, ta catyí ra: “Yoho, ma catyun chi ni noo ñáyivi tyi ña vaha ñu”, catyí Nyoo chii.

²⁹ Yucuan chaha quivi cha cana ndo chii, numi ri vachi. Ta vityin cuñi cote ñáa cuenda cana ndo chii —catyí ra Pedro chi ra Cornelio.

³⁰ Tyicuan ta nacahan ra Cornelio, ta catyí ra:

—Cha iyó cumi quivi vityin, suri maa cuhva ihya cha nyaí vehi ta ña chachi ta chicán tahvi chi Nyoo cha cha iñi. Ta tuví noo ra nui. Ñihnó ra noo sahma xiño vavaha.

³¹ Ta catyí ra chii: “Yoho Cornelio, Nyoo chiñi ra cha chicán tahvun. Ta nichón iñi ra cha sacuvún vatyí tyinyeún chi ñu ndahvi.

³² Tachi tyiño nya ñuu Jope na quichi ra Simón Pedro. Nyaá ra vehe inga tucu ra cha nañi Simón, noo ra cha satyahyu ñi. Ta vehe ra nyaá yatyin ri yuhu tyañuhu. Ta na quichi ra Simón Pedro ta cahan ra chuun”, catyí ángel cuan chii.

³³ Tyicuan ta numi ri tachí tyiño vatyí cuquehen chuun. Ta vaha vatyí vachun. Ta vityin tandihí yo nyicú yo nuu Nyoo. Ta cuñí ndi cuiñi ndi tandihí cuii maa cha tachí Sutu Mañi yo chuun vatyí nacatyun chi ndi.

Nu cahán ra Pedro tuhun ra Cristo vehe ra Cornelio

³⁴ Tyicuan ta quichaha cahan ra Pedro ta catyí ra:

—Vityin cutuñi iñi vatyí Nyoo cuñí ra chi tandihí ñáyivi. Cuví ri yo ñu Israel, o cuví ri yo ñu inga ñuu.

³⁵ Soco naquehen ra chi yo tatu quichaha yo chi ra, ta sacuví yo cha vaha.

³⁶ Cahan ra chihin nyuhu ñu vachi tata ra Israel, ta sacoto ra vatyí nduvaha coo yo chihin ra cha cuenda ra Jesucristo. Maa ra nyacá ñaha tandihí maa yo.

³⁷ Nyoho chitó vaha ndo tandihí cha cuví ñuu Israel ñui, yoso caa quichaha chi nu cuví Galilea cha yaha cha cahan noo ra Juan nuu ñáyivi, ta sacondutyá ra chi ñu.

³⁸ Chitó ndo yoso caa chaha Nyoo tunyee iñi Tatyí Ii ra chi ra Jesús, ra Nazaret. Ta chica noo ra sacuví ra cha vaha, sanduvaha ra chi tandihí ñu cha nyehé tindoño sahá ra ña vaha. Tyehe caa sacuví ra Jesús vatyí Nyoo nyaá ra chihin ra.

³⁹ Nyuhu cuví ndi cha ndaa tandihí cha sacuví ra Jesús nicahnu Judea ta ñuu Jerusalén. Yaha cuan ta chahñi ñu chi ra nu cruzi.

⁴⁰ Soco sanandoto Nyoo chi ra nu cu uñi quívi. Ta tuví ra nuu ndi.

⁴¹ Ña tuví ra nuu tandihí ñáyivi. Soco tuví ra nuu nyuhu vatyí nacachí ra chi ndi nyata ityi chata ca vatyí cuví ndi cha ndaa cuenda ra. Nyuhu chachí ndi ta chihí ndi chihin ra cha yaha cha nandoto ra.

⁴² Ta tachí ra chi ndi vatyí cahan ndi tuhun ra chihin ñáyivi. Ta cuví ndi cha ndaa vatyí Nyoo cuatyaá ra chi ra Jesús tyi cuví ra juez chi ñu cha nyitó ta ñu cha chihí.

⁴³ Ta tyicuan caa tucu nyata ityi chata ca, cacahan tandihí ra profeta

Nyoo tuhun ra Jesús. Ta cacatyí ra vatyí tandihí ñu cha chinó iñi chi ra Jesús, cusandachi Nyoo cuatyí ñu cha cuenda maa ra.

Nu naquehén ñu Tatyí Ii ta ñima ñu Israel cuví ñu

⁴⁴ Ni cahán ca ra Pedro ta noo xica ri Tatyí Ii síqui tandihí ñu tyasohó tuhun cahán ra.

⁴⁵ Ta ra Israel cha cayihí cuenda ra Jesús cha chaá coyo chihin ra Pedro iyo xaan cuñí ra vatyí chaha tucu Nyoo Tatyí Ii ra chi ñu cha ñima ñu Israel cuví.

⁴⁶ Chitó ra tyi tyicuan caa cuví vatyí chihí ra cahán ñu inga sahan, ta sacahnú ñu chi Nyoo.

⁴⁷ Tyicuan ta quichaha catyí ra Pedro chi ra cha chaá coyo chihin ra:

—Ma cuví casi yo nu condutya ñáyivi ihya. Vatyí cha naquehen tucu maa ñu Tatyí Ii tari maa yo —catyí ra chi ra.

⁴⁸ Tyicuan ta tachí ra Pedro chi ñu ni ñihí Tatyí Ii na condutya ñu chihin sívi ra Jesucristo. Tyicuan ta chacu ndahví ñu nuu ra Pedro vatyí cuñí ñu cha ndoo ra suhva quívi chihin ñu.

11

Nu nacatyí ra Pedro chi ñu yihí cuenda ra Cristo Jesús nya Jerusalén yoso caa cuahan chitya tuhun ra inga ñuu

¹ Ra apóstol ta inga ra hermano cha nyicú Judea, ñihí ra tuhun vatyí nyacua nya ñu cha ñima ñu Israel cuví ta naquehén ñu tuhun Nyoo.

² Tyicuan ta nachaa ra Pedro Jerusalén. Ta ra cha catyí vatyí cuñí chi cha sacuvi yo costumbre circuncisión ta cuhva cuví cacu yo, xaan xaan cuñí ra nyehe ra chi ra Pedro.

³ Ta cacatyí ra chi ra tyehe caa:

—¿Ñáá tuhun cha chahun vehe ñu cha ñima ñu Israel cuví ta chachun chihin ñu? —catyí ra.

⁴ Tyicuan ta ra Pedro nacatyí ra nya nu quichaha tandihí cha cuví chi ra ta catyí ra:

5 —Yuhu nyaí ñuu Jope. Ta cuhva cha chicán tahvi chí Nyoo ta nyehi noo visión. Ta nyehi tari noo sahma cahnu cha noó ityi andivi. Tari cha nuhñi noo noo tutun ta cuahan noo ityi nu ñuhú nu nyaí.

6 Ta nanyehé vahi ñáá cha ñohó chichi. Ta nyehi quití cha cumi chaha, quití cuhu, ta coo, ta saa.

7 Ta chiñi noo ndusu cha catyí chii: “Ndicuti Pedro. Cahñi quití ihya ta cachun”, catyí ndusu cuan chii.

8 Ta nacahin ta catyí tyehe caa: “Sutu Mañi yuhu, ma cuvi, vatyí ni noo chaha ta ta cachi que coño quití quiñi caa.”

9 Tyicuan ta ndusu andivi nacahan chi chihin inga chaha, ta catyí chi: “Ma catyí yoho vatyí ma cachun noo cha yahá sanduvijí”, catyí ndusu cuan chi.

10 Uñi chaha cuvi tyehe caa. Yaha cuan ta nandaá tandihí chihin sahma cuan ityi andivi.

11 Ta caa cuhva ri cuan chaá coyo uñi tahan ra vehe nu nyaí, quitá ra ñuu Cesarea ta nanducu ra chii.

12 Ta Tatyí Ii tachí chii na cuhin chihin ra. Ta catyí ra chii tyi ma caca iñi cha ñima ñu Israel cuví ñu. Ta chahan coyo tucu iñu tahan ra yañi yo ihya chihin. Ta cha chaá ndi nya Cesarea quihvi ndi chichi vehe noo ra.

13 Ta nacatyí ra cuan chi ndi yoso caa nyehé ra chi noo ángel chichi vehe ra. Nanyaá ángel cuan ta catyí ra chi ra vatyí na tachi ra musu ra ñuu Jope na cana ra chi noo ra cha nañi Simón Pedro.

14 Vatyí ican ra cucatyí ra chí ra yoso caa cacu aña ra ta aña tandihí ñáyivi chí ra, catyí ángel cuan chí ra cuan na.

15 Ta sacuvi ra cuan tari cuhva catyí ángel cuan chí ra. Ta cuhva cha chái vehe ra quichaha cahín chihin ñu. Ta quichí ri Tatyí Ii siqui ñu tari quichi siqui yo cha xihna ri.

16 Tyicuan ta nichon iñi cha catyí Sutu Mañi yo quivi cuan. Ta catyí ra tyehe caa: “Ndicha vatyí ra Juan sacodutya ra chí ñáyivi chihin

ndutya. Soco nyoho cucondutya ndo chihin Tatyí Ii”, catyí ra.

17 Nyoo chaha tucu ra Tatyí Ii ra chí ñu cuan tari chaha ra chí maa yo quivi chino iñi yo chí Sutu Mañi yo Jesucristo. Ta cha tyicuan caa zyóo ra cuvi yuhu vatyí casi cha sacuvi Nyoo? —catyí ra Pedro chí ra.

18 Tyicuan ta cuhva cha cachiñi ra yañi yo ra Jerusalén tuhun cuan ña nacahan ca ra. Ta casacahnu ra chí Nyoo. Ta cacatyí ra:

—Tu tyicuan caa cuvi, cuñi chí catyí vatyí Nyoo chahá tucu ra chí ñu cha ñima ñu Israel cuví vatyí ndu uvi iñi tucu maa ñu cuatyí ñu, ta coo ñu ñayivi cha ma naa ca maa —cacatyí ra.

Ñu yihí cuenda ra Cristo ñuu Antioquía

19 Quivi cha cachahñi ra chí ra Esteban, quichaha chica nyicon ra chí inga ñu yihí cuenda ra Cristo. Ta yihí ñu cachino ñu ta cuahan coyo ñu ityi Fenicia. Ta inga ñu nya noo ñuhú cha nyaá mahñu tyañuhu cha nañi Chipre. Ta yihí ñu chaá coyo ñu ñuu Antioquía. Ta suri cahan ñu tuhun ra Cristo soco ñn ri maa chihin ñu Israel.

20 Ta chihin ñu cha cuahan coyo cuan, ndihí suhva ñáyivi ñuhú Chipre. Ta yihí tucu suhva ñu ñuu Cirene. Ta cha chaá coyo ñu ñuu Antioquía, ta quichaha cahan tucu ñu cuan chihin ñu cha ñima ñu Israel cuví. Ta sacoto ñu tuhun Sutu Mañi yo Jesús, ra cha sacacu aña yo.

21 Ta tunyee iñi Sutu Mañi yo nyaa chihin ñu. Ta yucuan chaha cuaha ñáyivi casando ñu tuhun chahnu cha chino iñi ñu. Ta nachino iñi ñu chí Sutu Mañi yo.

22 Tyicuan ta chaá tuhun cuan nya Jerusalén. Ta ñu yihí cuenda Cristo tachí ñu chí ra Bernabé na cuhun ra nya Antioquía.

23 Ta cha chaá ra Bernabé Antioquía cuan, nyehé ra yoso caa nasocó Nyoo chí ñu. Ta ndusi xaan cuñi ra. Ta cahan ra nuu ñu na cunyicon ñu chí Sutu Mañi yo chihin cha ñi iñi ñu.

²⁴ Tyicuan caa sacuví ra Bernabé vatyí cuví ra noo ra vaha. Tyitú ra chihin Tatyí Ii. Ta chinó xaan iñi ra chi Nyoo. Ta tyicuan caa ta cuaha ñáyiví quihví ñu cuenda Sutu Mañi yo.

²⁵ Cha yaha cuan ta cuahan ra Bernabé cuananducu ra chi ra Saulo nya ñuu Tarso. Ta cha nañihí ra chi ra, chinyaca ra chi ra nya ñuu Antioquía.

²⁶ Ta cachinyicu ra chihin ñu yihí cuenda Nyoo ñuu cuan noo cuiya nani ta sañaha ra tuhun Nyoo chi cuaha ñáyiví. Ta suri ñuu Antioquía cuan cuví nu quichaha catyí ñáyiví: Cristiano chi ñu, o ñu yihí cuenda ra Cristo cuví cuan.

²⁷ Ta quiví cuan chaꝥ coyo ra cachahá cuenda tuhun cahán Nyoo, ra cacuví profeta. Quita ra ñuu Jerusalén ta chaꝥ coyo ra Antioquía.

²⁸ Ta noo ra cuan nañí ra Agabo chicutanyaa ra nu nyicú ra yihí cuenda ra Cristo ta cahan ra tuhun cha chaha Tatyí Ii chi ra. Ta catyí ra vatyí cuquichi noo tama nicacahnu ñáyiví. Ta tyicuan caa cuví quiví chinyaa ra Claudio cuví ra rey cahnu.

²⁹ Tyicuan ta ñu yihí cuenda Cristo nya Antioquía tyihí tahan ñu tuhun vatyí cucuhva ñu yoso cuhva cundaa iñi maa noo noo ñu, vatyí cutyinyee ñu chi ñu yihí cuenda Cristo cha iyó ityí Judea.

³⁰ Tyicuan caa sacuví ñu ta sacuhun ñu xuhun chi ra cuví nuu chi ñu yihí cuenda Cristo nya Jerusalén. Ta ra Bernabé ta ra Saulo chinyaca ra xuhun cuan.

12

Nu chihí ra Jacobo ta nu quihví ra Pedro vehe caa

¹ Ta quiví cuan quichaha chica nyicon rey Herodes chi suhva ñu yihí cuenda ra Cristo.

² Ta tachí ra tyiño vatyí na cahñi ra chi ra Jacobo yañi ra Juan chihin mityí.

³ Ta nyehe ra Herodes vatyí tahan xaan iñi ñu Israel cha sacuví ra tyicuan caa, ta tyihí ra tyiño vatyí tñin

ndihí ra chi ra Pedro. Ta cuví chi noo quiví vico pascua nu tuhva ñu chachi ñu pan cha ñahri yuchan iya yihí chihin.

⁴ Cha yaha cha tñin ra chi ra Pedro, tyihí ra chi ra vehe caa. Ta cumi ityí sindaro sahá cumi chi ra. Ta cumi sindaro cha noo ityí ra ta sahá cuenda ra suhva suhva cuhva chi ra. Ta tyaꝥ ra Herodes cuhva vatyí nayahá vico cuan ta cucuhva cuenda ra chi ra chi ñáyiví.

⁵ Ta tyicuan caa ñohó ra Pedro vehe caa. Ta sindaro cuan sahá cumi vaha xaan ra chi ra. Soco cha ni ri ca cha ñohó ra yucuan, ñu yihí cuenda ra Cristo chicán tahvi xaan ñu nyita cuii ri maa cha cuenda ra.

Nu sacacu Nyoo chi ra Pedro vehe caa

⁶ Ta tyaꝥ ra Herodes cuhva vatyí cha ñaha ri inga quiví cuan cutava ra chi ra Pedro nuu ñáyiví. Ta suri cha cuaa cuan ra Pedro quixí vavaha ra mahñu uvi sindaro cuan. Ta nuhñi ra chihin uvi cadena. Ta uvi ca sindaro canyicú ra yuvehe casahá cumi ra.

⁷ Ta tañi ri ta tuví noo ángel cha tachí Sutu Mañi yo. Ta ndundichin ri chichi vehe caa cuan. Ta ángel cuan tñin ra xiin ra Pedro. Ta sandoyoꝥ ra chi ra. Ta catyí ra chi ra:

—Sanumi. Ndícuíta —catyí ángel cuan chi ra.

Tyicuan ta ndachí cadena cha nuhñi ndaha ra Pedro.

⁸ Ta ángel cuan catyí ra chi ra:

—Nacuhñi vaha chichun ta natyihí ndichan chahun —catyí ángel cuan.

Tyicuan caa sacuví ra Pedro. Ta catyí ángel chi ra:

—Quehen sahmon ta tyaun chaton ta quichun chate —catyí ángel cuan chi ra Pedro.

⁹ Ta ra Pedro quita ra chata ángel cuan. Soco ña chitó ra tatu cha ndicha o cha ña ndicha cuví cuan, ta cuñi maa ra vatyí visión nyehé ra.

¹⁰ Soco cuahan ra chata ángel cuan ta cayaha ra noo nu sahá cumi sindaro. Tyicuan ta cayaha ra inga tucu nu casahá cumi sindaro cuan. Yaha cuan ta chaꝥ coyo ra yuvehe caa cahnu nu quita ñáyiví ta quihví

ñu chichi ñuu. Ta yuvehe cuan nuña ri maa. Ta quitá coyo ra. Ta cha yaha yaha ra noo ityi cahnu, ta sandoo ángel cuan chi ra.

¹¹ Tyicuan ta nacoto ra Pedro vatyí ndicha ta quichaha catyí ra:

—Ndicha, ñima visión cuví. Soco maa Sutu Mañi yo tachí ra noo ángel vatyí sacacú ra chii ndaha ra Herodes ta ndaha ra Israel —catyí ra Pedro.

¹² Chicá xiñi ra tuhun ihya ityi cuahan ra. Ta chaḡ ra vehe cu María sihi ra Juan Marcos. Ta cuaha xaan ñu canyicú cuan chicán tahvi ñu chi Nyoo.

¹³ Ta cuhva cha sacachan ra Pedro yuvehe nuquehe, quitá noo ñaha tyivaa cha nañi Rode chinyehe ña yóo cha sacachan cuan.

¹⁴ Soco cuhva cha nichon soho ña ndusu ra Pedro, ña nuña ña yuvehe. Vatyí si xaan cuñi ña, ta chino ña cua nacatyí ña. Ta catyí ña vatyí ra Pedro nanyaá ra yuvehe.

¹⁵ Tyicuan ta quichaha catyí ñu chi ña:

—Loco yoho —catyí ñu chi ña.

Soco ña cuan catyí ña vatyí ndicha cha cahán ña. Soco ñu cuan catyí ñu tyi ñima ra Pedro cuví ra, soco ángel cuenda ra cuví, catyí ñu.

¹⁶ Ta ra Pedro sañihí ca ra sacachan ra yuvehe. Ta cuhva cha nuña ñu ta nanyehe ñu chi ra, iyo xaan cuñi ñu ta yuhvi ñu cuví.

¹⁷ Soco savaha ra seña chihin ndaha ra nacutaxin ñu. Ta nacatyí ra chi ñu yoso caa tava Sutu Mañi yo chi ra vehe caa. Ta catyí ra chi ñu:

—Nacatyí ndo chi ra Jacobo ta chi inga yañi yo —catyí ra.

Ta quitá ra ta cuahan ra inga ityi.

¹⁸ Cuhva cha cundichin, iyo cacuvi sindaro cha sahá cumi chichi vehe caa cuan, vatyí ña cachitó ra yoso caa quitá ra Pedro.

¹⁹ Tyicuan ta tachí ra Herodes cunanducu chi ra. Ta vatyí ña nañihí ra chi ra, tyicuan ta tachí ra na cacahñi ra chi ra sahá cumi vehe caa cuan. Yaha cuan ta quitá ra Herodes ityi Judea cuan ta cuahan ra ñuu Cesarea cuaco ra.

Nu chihí ra Herodes

²⁰ Ta ra Herodes cuxaan xaan ra chihin ñáyivi ñuu Tiro ta ñáyivi ñuu Sidón. Soco cuñi ñu cuan nduvaha coo ñu chihin ra vatyí ñuu cha nyacá ñaha ra yucuan quitá cha cachi ñu. Tyicuan ta ndu in ri ñu ta cuahan coyo ñu cuacutahan ñu chihin noo ra cha nañi Blasto. Ican ra sahá cuenda chi ra Herodes. Ta chicán ñu cha nduvaha coo ra Herodes chihin ñu.

²¹ Tyicuan ta catyí ra Herodes vatyí cuhun ñu nu nyaá ra noo quivi. Ta chaḡ quivi cuan ta ndihvi noo ra sahama tyiño ra. Ta chicunyaa ra nu tyayu cahnu ra. Ta cahan noo ra nuu ñu.

²² Tyicuan ta quichaha canachaḡ ñáyivi, ta catyí ñu:

—Ra cha cahán ihya ñima noo rayi ri cuví ra. Nyoo cuví ra —catyí ñu.

²³ Ta caa cuhva ri cuan noo ángel Sutu Mañi yo chaha ra noo cuehe chi ra Herodes vatyí chaha ra cha catyí ñáyivi tyi Nyoo cuví ra. Ta quihvi tindacu chi ra, ta chihí ra.

²⁴ Soco tuhun Nyoo cuahan chitya ca. Ta cahan ñu tuhun Nyoo tandihí ri ityi.

²⁵ Quivi cha ndihí tyiño saha ra Bernabé ta ra Saulo nya Jerusalén, cuanuhu coyo ra ñuu Antioquia. Ta cuahan tucu ra Juan Marcos chihin ra.

13

Nu quichaha cachicá ra Saulo ta ra Bernabé tyiño Nyoo

¹ Vehe ñuhu Antioquía cuan iyó ra cacuví profeta Nyoo. Ta iyó tucu ra cha sañahá tuhun Nyoo chi ñáyivi. Ta sivi ra cuan ican cuvi ihya: Ra Bernabé, ra Simón Toon, ra Lucio ra ñuu Cirene, ra Manaén cha chahnu in ri chihin ra Herodes cha cuví rey ityi Galilea, ta ra Saulo.

² Ta noo quivi nyicú tandihí ra ta casacahnú ra chi Sutu Mañi yo. Ta casahá ra ayunar: ña cachachi ra ta cananducu ra chi Nyoo cuví cuan. Tyicuan ta catyí Tatyí li chi ra:

—Tava s̄in ndo chi ra Bernabé ta ra Saulo cha cuenda tyiño cha cané chi ra —catyí Tatyí Ii chi ra.

³ Tyicuan ta cha ndihí saha ra ayunar, ta catyiso ra ndaha ra síqui ra, ta cachican tahvi ra chi Nyoo cha cuenda ra. Ta cacahan ra chihin ra tahan ra ta cuahan coyo ra.

Nu cahán ra apóstol tuhun Nyoo ñuhu Chipre

⁴ Yahá cuan tachí Tatyí Ii chi ra Bernabé ta chi ra Saulo noo ñuu cha nañí Seleucia. Tyicuan ta cuahan coyo ra. Ta yucuan caquihví ra chichi noo barcu ta cuahan ra nya ñuhu Chipre cha nya mahñu tyañuhu.

⁵ Yucuan ta cachaa coyo ra noo ñuu yuhu tyañuhu cha nañí Salamina. Ta quichahá cahan ra tuhun Nyoo vehe ñuhu ra Israel. Cuahan tucu ra Juan chihin ra vatyí tyinyee ra chi ra.

⁶ Tyicuan ta cuahan coyo ra cahán ra tuhun Nyoo noo noo ñuu cha nya Chipre cuan nyacua nya chaa coyo ra ñuu cha nañí Pafos. Ta yucuan nañihi ra chi noo ra Israel cha nañí Barjesús. Ta chitó ra tuhun tasí. Cuví ra noo ra cuendu vatyí catyí ra vatyí cuenda Nyoo cahán ra.

⁷ Ta ra tasí cuan nyaá ra chihin gobernador Sergio Paulo. Ta ra Sergio cuví ra noo ra cachi iñi. Ta cana ra chi ra Bernabé ta chi ra Saulo, vatyí cuñí ra cuiñi ra tuhun Nyoo.

⁸ Ta ra tasí cuan nañí tucu ra Elimas, ta chasí ra nu chino iñi gobernador cuan chi ra Cristo.

⁹ Tyicuan ta ra Saulo cha nañí tucu Pablo, tyitú ra chihin Tatyí Ii. Ta nyehe vavaha ra chi ra Elimas cuan.

¹⁰ Ta catyí ra chi ra:

—Yoho ra sandaví ñaha, cuendu xaun. Sehe cuihna cuví chuun. Ta cuñún sativun tandihí cha vaha. Ta tyicuan ri chasún ityí vaha Sutu Mañi yo.

¹¹ Ta vityin Sutu Mañi yo cutachi tuñi ra chuun, vatyí cunducuaun. Ta ma cuví nyehun ñuhu ñanyii suhva quiví —catyí ra Pablo chi ra Elimas.

Tyicuan ta caa cuhva ri cuan ta nducuaa ra. Ta ndoo ra nu ñaa iñi. Ta

nducu ra noo ra t̄in ndaha ra vatyí ña ndichin ca nyehé ra.

¹² Cuhva cha nyehe gobernador cuan cha cuví chi ra Elimas, chingo iñi ra chi ra Jesucristo. Vatyí iyo cuñi ra nyehe ra cha sañahá Sutu Mañi yo.

Cuahan ra Pablo ta ra Bernabé nya ñuu Antioquía ityí Pisidia

¹³ Ra Pablo ta ra tahan ra quihví ra chichi noo barcu ñuu Pafos. Ta cuahan coyo ra nya ñuu Perge ityí Panfilia. Soco ra Juan Marcos sandoo ra chi ra ta cuanuhu ra nya Jerusalén.

¹⁴ Yahá cuan ta caquita ra Perge cuan, ta cuahan coyo ra ñuu Antioquía cha nyaá ityí Pisidia. Yucuan quihví coyo ra chichi vehe ñuhu ñu Israel ta cuví chi noo quiví nyitatu ñu. Ta chicunyicu ra.

¹⁵ Tyicuan ta quichahá sacuaña ñáyiví nu libru ley cha tyaa ra Moisés. Ta sacuaña tucu ñu libru cha tyaa ra cacuvi profeta Nyoo ta cha naha. Yahá cuan ta ra cacuví nu vehe ñuhu catyí ra chi ra hermano nyicú cuan, vatyí tatu iyó noo tuhun cuñí ra cahan ra chihin ñáyiví, cuví cahan ra.

¹⁶ Tyicuan ta ndicuita ra Pablo ta sacuví ra noo seña chihin ndaha ra vatyí na cutaxin ñu. Ta catyí ra:

—Cuiñi ndo nyoho ra Israel, ta nyoho cha quichahá ndo chi Nyoo.

¹⁷ Nyoo cuenda yo, ñu Israel, nacachí vaha ra chi sutu chahnu yo. Ta quiví cha iyó ca ñu ityí Egipto sacuví ra noo ñuu cahnu chí ñu. Vasi ñima ñáyiví ñuu cuan cuví ñu, soco sanducuaaha ra chí ñu. Yahá cuan ta tava ra chí ñu ityí cuan chihin tunyee iñi chí ra.

¹⁸ Ta cunyeé iñi Nyoo tandihí cuhva chiyo ñu nu chicá noo ñu ñuhú ityí chichi cha uvi xico cuiya.

¹⁹ Ta sanaa ra ucha tahan ñuu nahnu cha chiyo nichahnu Canaán, vatyí chaha ra ñuhú cuan chí sutu chahnu yo.

²⁰ Yahá cuan ta sacuví Nyoo vatyí cunyaca ñaha maa maa ri juez chí ñáyiví cuan. Tari noo cumi ciento sisava cuiya chinyaca ñaha juez chí

ñu nyacua nya quiví chinyaca ñaha ra profeta Samuel chi ñu.

²¹ Tyicuan ta maa ñu chicān ñu noo rey cha cunyaca ñaha chi ñu. Ta Nyoo chaha ra chi ra Saúl sehe ra Cis chi ñu, vatyí cunyaca ñaha ra chi ñu. Ta ra Saúl vachi ra tata ra Benjamín. Ta uvi xico cuiya chinyaca ñaha ra chi ñu.

²² Yahā cuan ta Nyoo tava ra chi ra Saúl cha cuví ra rey. Ta chaha ra vatyí cuví ra David rey. Ta catyí ra: “Nyehí vatyí ra David sehe ra Isaí cuví ra noo rayi cha tahán iñi cuhva iyó. Ta cusacuvi ra tandihí cha cuñí yuhu”, catyí Nyoo tuhun ra David.

²³ Ta minoo ra vachi tata ra David cuan ican cuví ra Jesús. Ta maa Nyoo tachí chi ra vatyí sacacu ra chi yo ñu Israel, tari catyí ra chi sutu chahnu yo.

²⁴ Ta cumañi ca quichi ra Jesús, ra Juan ra sacondutya chi ñáyiví cahan ra nuu tandihí ñáyiví Israel. Ta catyí ra chi ñu vatyí cuñí chi cha ndu uvi iñi ñu cuatyí ñu, ta condutya ñu.

²⁵ Ta cha cuandihí tyiño saha ra Juan ta catyí ra: “¿Atu cuñí maa ndo vatyí yuhu cuví noo ra cahnu cha saquichí Nyoo? Soco ñima yuhu cuví ra cahnu cuan. Vatyí chata cha yahā yuhu ta vachi nonga ra. Ta ni ndichan nyaá chaha ra ta ña nañé cha ndachi. Vatyí cahnu xaan ra cuví ra”, catyí ra Juan.

²⁶ ‘Hermano —catyí ra Pablo— nyoho ñu vachi tata ra Abraham, ta nyoho cha quichahá ndo chi Nyoo. Cha cuenda nyoho cuví tuhun ihya tyi sañahá Nyoo chi yo yoso caa cacu añima yo.

²⁷ Ñáyiví ñuu Jerusalén ta ra cuví nuu chi ñu cuan, ña chitó ñu vatyí ra Jesús cuví ra cha sacacú chi yo. Ta ni ña cutuñí iñi ñu tuhun cha catyaa ra profeta Nyoo ta cha naha, vasi sacuaha vavaha ñu tuhun cuan tandihí quiví cha nyitatu ñu, soco ña cutuñí iñi ñu. Ta quiví chahñi ñu chi ra Jesús chinó cava tari cuhva catyí ra profeta Nyoo cuan.

²⁸ Vatyí vasi ñahri cuatyí ra nañihí ñu, soco chicān ñu chi ra Pilato na

tyihi ra tyiño cucahñi chi ra.

²⁹ Ta cha yahā sacuvi ñu chi ra tari cuhva catyí maa tuhun ra nu libro Nyoo ta chihí ra. Tyicuan ta sanoo ñu chi ra nu cruzi. Ta tyihí ñu chi ra chichi ñuhú.

³⁰ Soco Nyoo sanandoto ra chi ra.

³¹ Ta chichi cha cuaha quiví tuví ra nuu ra cha quichi coyo chihin ra quiví quita ra ityi Galilea, ta quichi ra Jerusalén. Ta ican ra cuan cacahán tuhun ra chihin ñáyiví vityin.

³² Ta yucuan chaha nyuhu cahán ndi tuhun vaha cha catyí Nyoo chi sutu chahnu yo vatyí cuhva ra chi yo.

³³ Vatyí cha cuenda cha vaha chi maa yo cha cuví yo ñáyiví vachi tata ñu cuan, sacuvi maa Nyoo cha catyí ra. Vatyí sanandoto ra chi ra Jesús tari cuhva nyaá nu cu uvi salmo nu catyí Nyoo tyehe caa: “Sehi cuví chuun, ta yuhu chahí ñáyiví coun vityin”, catyí Nyoo.

³⁴ Nyoo tyaa ra cuhva vatyí sanandoto ra chi ra, tacuhva cha ma tyahyu coño ñuhu ra. Vatyí catyí nu tutu Nyoo: “Cuhve chi nyoho cha vaha cha catyí chi ra David.”

³⁵ Yucuan chaha catyí tucu nu inga salmo tyehe caa. “Ma cuhvon cha tyahyu coño ñuhu Sehe iun”, catyí chi.

³⁶ Ra David sacuvi ra tyiño nuu ñu cha chiyo quiví chiyo ra, yoso cuhva cha catyí Nyoo chi ra tyi sacuvi ra. Yahā cuan ta chihí ra ta chicuchí ñu chi ra tari chicuchí ñu chi sutu ra. Ta tyahyu coño ñuhu ra.

³⁷ Soco ra cha sanandoto Nyoo chi, ña tyahyu coño ñuhu ra.

³⁸ Yañi, cuñí chi coto ndo vatyí cha cuenda cha chihí ra Jesús tyiño nuu yo, Nyoo sahá ra ticahnu iñi cuatyí yo.

³⁹ Ta cha cuenda ra Jesús sahá Nyoo ticahnu iñi chi tandihí ñu cha chinó iñi chi ra, tyi ley ra Moisés ña cuví sacuvaha chi yo nuu Nyoo.

⁴⁰ Saha ndo cuenda coto ndoo siqui ndo cha catyaa ra profeta Nyoo nu catyí ra tyehe caa:

⁴¹ Nyehe nyoho, ra chacú nya, tahán chi cha iyo cuñi ndo ta cunaan do. Vatyí yuhu cuví Nyoo, ta

sacuví minoo cha cahnu quiví cha iyó ndo vityin.

Soco ma chino iñi ndo tandihí cha sacuví yuhu vasi nacatyí ñáyiví chi ndo, catyí Nyoo.

⁴² Ndihi cahan ra Pablo ta cuaquita ra chata vehe ñuhu cuan chihin ra tahan ra. Tyicuan ta ñu cha ñima ñu Israel cuví quichaha catyí ñu chi ra, vatyí na cahan tucu ra tuhun ihya chihin ñu inga vitya quiví cha nyitatu ñu.

⁴³ Cuhva cha ndihí ndu ñn ri ñu, cuaha xaan ñu Israel ta ñu cha yihí cuenda ñu Israel, cachinyicon ñu chi ra Pablo ta chi ra Bernabé. Ta chaha ra tuhun chi ñu vatyí na cahun ca ñu ityi nuu ca chihin Nyoo. Ta ñaquehen vaha ñu tumañi iñi cha chahá Nyoo chi ñu.

⁴⁴ Cha inga vitya quiví nyitatu ñu, ndu ñn ri ñu. Ta cha yatyin cha tandihí ñáyiví ñuu cuan ndu ñn ri ñu vatyí cuiñi ñu tuhun Nyoo.

⁴⁵ Soco cuhva cha canyehe ra Israel, cuxaan ra vatyí nyehe ra vatyí cuaha ñáyiví nyicón chí ra cuan. Ta quichaha cacuvi yuhu ra chihin ra Pablo, ta cacahan ra chi ra.

⁴⁶ Soco ña yuhví ra Pablo ta ra Bernabé. Ta quichaha cacatyí ra chi ra:

—Cuñi chi cha cahan xihna ndi tuhun Nyoo chihin nyoho cha cuví ndo ñu Israel. Soco ña cuñi ndo ñaquehen ndo. Ta cuñi maa ndo vatyí ña naña ndo cha ñihi ndo ñáyiví chaa cha ma naa ca maa. Yucuan chaha cahun ndi cucahan ndi chihin ñu cha ñima ñu Israel cuví.

⁴⁷ Vatyí tyicuan caa tachí Sutu Mañi yo chi ndi ta catyí ra tyehe caa:

Tyai chuun tari ñuhu chi ñáyiví nicahnu ñuhu ñáyiví.

Tacuhva vatyí cusañahun ityi chi ñu yoso caa cacu añima ñu, catyí Nyoo.

⁴⁸ Cuhva cha cachiñi ra cha ñima ra Israel cuví, ndusiñi cuñi ra. Ta quichaha catyí ra vatyí tuhun Nyoo vaha xaan. Ta nachino iñi tandihí ñu cha nacachi maa Nyoo chii, vatyí coo ñu ñáyiví chaa cha ma naa ca maa.

⁴⁹ Ta tyicuan caa chitya tuhun Nyoo tandihí ityi ñuu cuan.

⁵⁰ Soco ra Israel cacahan ra chihin suhva ñusihi tyayii cha nyicón ley ra Moisés. Catyí ra chi ñu vatyí ña vaha tuhun cahan ra Pablo. Ta cahan tucu ra chihin ra cuví nuu chi ñuu cuan. Ta yucuan cuví nu quichaha chica nyicon ñu chi ra Pablo ta chi ra Bernabé, nyacua nya cha tava ñehe ñu chi ra ñuu cuan.

⁵¹ Tyicuan ta canaquisi ra ñiyaca chaha ra tari noo seña vatyí ndoo cuatyí ñáyiví cuan siqui maa ñu. Ta cuahan coyo ra ñuu Iconio.

⁵² Soco ñu yihí cuenda Nyoo ñuu Antioquía cuan si xaan cacuví chi ñu. Ta tyitu ñu chihin Tatyí Ii.

14

Nu ñohó ra Pablo ta ra Bernabé ñuu Iconio

¹ Ñohó ra Pablo ta ra Bernabé ñuu Iconio. Ta caquihví ra chichi vehe ñuhu ñu Israel. Ta vaha xaan cacahan ra tuhun Nyoo chihin ñáyiví. Ta cuaha xaan ñu nachino iñi ñu chi ra Cristo, ñu Israel ta ñu cha ñima ñu Israel cuví ñandihí.

² Soco ra Israel cha ña chinó iñi chi ra Cristo catiyuhu ra chi ñu cha ñima ñu Israel cuví vatyí caca ña vaha iñi ñu nyehe ñu chi ra yihí cuenda ra Cristo.

³ Yucuan chaha ra Pablo ta ra Bernabé candoo ra yucuan cuaha quiví. Ta chihin cha ñi iñi ra cacahan ra tuhun ra Cristo. Ta chinó xaan iñi ra chí Sutu Mañi yo. Ta Sutu Mañi yo tyinyee ra chí ra cha cacahan ra tuhun ra yoso caa cuñi ra chí yo. Ta chaha Sutu Mañi yo cha casacuví ra seña ta milagru tacuhva coto ñáyiví tyi ndicha cha cahan ra.

⁴ Soco ñáyiví ñuu, ña ñn ri cuví ñu. Yihí ñu cuahan ñu tumañi iñi chí ra Israel. Ta inga tucu ñu cuahan ñu tumañi iñi chí ra apóstol.

⁵ Tyicuan ta ra Israel ta ra cha ñima ra Israel cuví, catyihí tahan ra tuhun chihin ra cuví tyiño, vatyí cahan ña vaha ra siqui ra, ta catuchí ra yuu chí ra.

⁶ Soco ra Pablo ta ra Bernabé ñihí ra tuhun vatyí cusacuvi ra tyicuan caa, ta cuahan coyo ra nya ñuu Listra, ta nya ñuu Derbe ityi Licaonia. Ta cachica noo ra ityi cuan.

⁷ Ta cacahan tucu ra tuhun Nyoo yoso caa sacacu ra añima yo.

Nu cañi ñáyiví yuu chi ra Pablo nya ñuu Listra

⁸ Nya Listra iyó noo rayíi cha pehe chaha. Ta nya ndaha cacu ra ta ña cuví caca ra. Vatyí pehe ninduvi chaha ra.

⁹ Ta suri maa ra pehe chaha cuan tyasohó vavaha ra nu cahán ra Pablo. Ta ra Pablo, tuví iñi ra vatyí chinó iñi ra cuan vatyí cuví nduvaha ra.

¹⁰ Tyicuan ta ra Pablo cahan ra chihin cha chaa ndusu ra, ta catyí ra:

—Ñicuinyaa ndoo —catyí ra Pablo chi ra.

Ta ra cuan, noo ri caña ndava ra, ta ñicuinyaa ra. Ta quichaha chica ra.

¹¹ Cha nyehé ñáyiví cha sacuví ra Pablo, quichaha cana chaa ñu chihin sahan Licaonia, ta catyí ñu:

—Nyoo cha tari caá rayíi chaá coyo nu nyicú yo —catyí ñu.

¹² Ta catyí ñu tyi ra Bernabé cuví ra noo nyoo cha nañí Júpiter, ta ra Pablo cuví nyoo cha nañí Mercurio, vatyí ican ra cuví ra cahán.

¹³ Ta iyó noo tata sutu cuenda Júpiter cuan, saha cumí ra vehe ñuhu cha nyaá yuhu ñuu ri cuan. Ta quichi nyaca ra toro ta ita vatyí maa ra ta ñáyiví cuñí ñu sacahnu ñu chi ra Pablo ta chi ra Bernabé. Ta cuacahñi ñu toro tyi cuacuhva cuenda ñu chi ra, vatyí cuñí ñu tyi nyoo cacuví ra.

¹⁴ Soco cuhva cha catuví iñi ra apóstol, ra Bernabé ta ra Pablo, cha chicá xiñi ñu, quichaha chahnya ra sahna ra. Ta casacuví ra tyicuan caa tari noo seña vatyí ña ndoó ra vaha. Ta quihví coyo ra mahñu nu tuví ñáyiví, ta cacana chaa ra,

¹⁵ ta catyí ra:

—Nyoho tata, ¿ñáá tuhun cha nyacuví ndo tyehe caa? Nyuhu rayíi ri cuví ndi tari maa ndo. Ta vachi ndi vatyí catyí ndi chi ndo vatyí na saña

ndo cha sacuvi ndo tyehe caa. Vatyí ña chiñuhu maa cha tyehe caa. Ta na cunyicon ndo chi Nyoo nyitó. Vatyí ican ra savaha andívi ta ñuhu ñáyiví. Ta savaha ra tyañuhu ta tandíhi cha iyó chichi tyañuhu cuan.

¹⁶ Ta tyiembu chahnu ta nya vityin, Nyoo saña ndaha ra chi ñáyiví na sacuvi maa ñu yoso cuhva cuñí ñu,

¹⁷ vasi tyicuan ri sañahá ra chi ñu yóó ra cuví ra, chihin cha vaha cha sacuví ra. Maa ra sacoon ra savi nu canyicú yo. Chahá ra cha vaha coo tyiño saha yo quívi tahan chi. Ta chahá ra cachi yo. Ta chahá ra cha cusíi cuñí añima yo —catyí ra Pablo chi ñu.

¹⁸ Soco vasi catyí ra tyicuan caa, yíi xaan ta chasi ra cha cañi ñu toro cuan, vatyí cuñí ñu sacahnu ñu chi ra chihin cuan.

¹⁹ Tyicuan ta chaá coyo suhva ra Israel, ra ña chinó iñi chi ra Cristo, ra ñuu Antioquía, ta ra ñuu Iconio. Ta tyiyuhu ra chi ñáyiví, ta catyí ra vatyí na tuchi ñu yuu chi ra Pablo. Ta tyicuan caa sacuví ñu. Ta cuñi maa ñu vatyí cha chihí ra. Ta xita quiñoño ñu chi ra ityi chata ñuu.

²⁰ Soco candu ñin ri ra cayihí cuenda Nyoo nu catuví ra Pablo. Ta ndicuita ri ra. Ta quihví ra inga chaha chichi ñuu. Ta cha inga quívi cuahan ra ñuu cha nañí Derbe ta cuahan ra Bernabé chihin ra.

²¹ Ta cahan tucu ra tuhun Nyoo nya ñuu Derbe yoso caa sacacu Nyoo añima yo. Ta cuaha ñáyiví nacuhva ñu chi ñu chi Nyoo. Yaha cuan ta cuanuhu coyo ra ityi quichi ra. Ta yaha ra ñuu Listra ta ñuu Iconio inga chaha, ta nachaa ra nya Antioquía.

²² Ta tandíhi ñuu cuan sanduníi ca ra iñi ñu yihí cuenda Nyoo. Ta catyí ra chi ñu na cuhun ñu ityi nuu ca chihin cha chino iñi ñu Nyoo. Ta catyí tucu ra chi ñu vatyí tatu cuñí yo cha cunyacá ñaha Nyoo chi yo, cuñí chi cha nyehe yo tindoho.

²³ Ta canatyiso ra chi ra ca quihí ndaha chi ñu yihí cuenda Nyoo noo noo vehe ñuhu. Ta cananducu ra Nyoo chihin cha ña chachí ra xita

ta cachican tahvi ra chi Nyoo cha cuenda ra. Yahā cuan ta catyí ra chi ra:

—Chino iñi ndo chi Sutu Mañi yo. Maa ra na cocumi ra chi ndo —catyi ra chi ra.

Nu cuanuhu coyo ra Pablo ta ra Bernabé Antioquía ityi Siria

²⁴Yahā cuan ta yahā coyo ra Pablo ta ra Bernabé ityi Pisidia, ta chaā coyo ra ityi Panfilia.

²⁵Cacahan ra tuhun Nyoo ñuu Perge. Yahā cuan ta chahan ra ñuu Atalia.

²⁶Yucuan quihvi coyo ra chichi noo barcu ta cuanuhu coyo ra Antioquía. Yucuan cuví ñuu nu natyaa ñu chi ra ndaha Nyoo tyi cusacuvi ra tyiño nuu ra, ta vityin cha nachaa coyo ra.

²⁷Cuhva cha nachaa coyo ra Antioquía sandu ñin ri ra chi ñu yihí cuenda Nyoo. Ta nacatyí ra chi ñu tandihí cha sacuvi Nyoo chihin ra. Ta yoso caa nuña Sutu Mañi yo ityi vatyí chinó tucu iñi ñu cha ñima ñu Israel cuví.

²⁸Ta naha xaan ndoo ra Pablo ta ra Bernabé chihin ñu yihí cuenda Nyoo ñuu cuan.

15

Nu casandaa ra apóstol tyiño nya Jerusalén

¹Nyaá ca ra Pablo ta ra Bernabé Antioquía, ta chaā coyo ra quita coyo ityi Judea. Ta quichahā sañahá ra chi ra yihí cuenda Nyoo. Ta catyí ra vatyí cuñí chi sacuvi ra costumbre circuncisión tari kuhva catyi ra Moisés, tyicuan ta cacu ra.

²⁻³Ta ñihi xaan cahan ra Pablo ta ra Bernabé chihin ra cuan cha cuenda cuan. Tyicuan ta catyiso ñu hermano Antioquía cuan chi ra Pablo ta ra Bernabé chihin suhva ca ra vatyí cuhun coyo ra Jerusalén. Vatyí cusandaa ra tyiño ihya chihin ra apóstol ta ra yihí ndaha ñu nyicu vehe ñuhu ñuu Jerusalén cuan. Tyicuan ta cuahan coyo ra. Ta ityi cuahan ra, yahā ra ityi Fenicia ta Samaria. Ta canacatyí ra chi ñu yihí cuenda Nyoo yoso

caa sañá ñu cha ñima ñu Israel cuví tuhun chahnu cha chino iñi ñu. Vatyí nacuhvá cuenda ñu chi ñu chi Nyoo. Ta tandihí ñu hermano cusii xaan cuñí ñu cha chitó ñu tuhun cuan.

⁴Quivi chaā coyo ra Pablo ta ra Bernabé Jerusalén, cuahan ra nu ndu ñin ri ñu yihí cuenda Nyoo. Ta tandihí ñu chihin ra apóstol, ta ra yihí ndaha chi ñu, chahā ñu lugar chi ra. Ta canacatyí ra tandihí cha sacuvi Nyoo chihin ra.

⁵Soco suhva ra fariseo cha cachinó iñi chi ra Cristo, nicuinanyaa ra ta catyí ra:

—Tandihí ra cha ñima ra Israel cuví ta chinó iñi ra chi ra Jesús, ñiñi cuñí chi cha sacuvi ra costumbre circuncisión. Ta cuñí tucu chi cha sacuvi ra kuhva catyi ley cha tyaa ra Moisés —catyí ra.

⁶Tyicuan ta candu ñin ri apóstol ta ra yihí ndaha chi ñu vehe ñuhu vatyí candatuhun vaha ra tuhun cuan.

⁷Cha yahā cha cuviyuhu vavaha ra ta ndicuita ra Pedro, ta catyí ra:

—Yañi, chitó ndo vatyí chichi cha tandihí yo cachí Nyoo chi yuhu ra ndahvi quivi cuan, vatyí cahin tuhun yoso caa cacu aña yo chihin ñu cha ñima ñu Israel cuví, vatyí nachino iñi ñu chi Sutu Mañi yo.

⁸Ta Nyoo, ra chitó aña tandihí ñayivi, sañahā ra chi yo vatyí cuñí ra chi ñu cuan. Ican tuhun chahā ra Tatyí li ra chi ñu, tari chahā ra chi yo.

⁹Nyoo ña sahá ra tyi vaha ca yoó cha nuu ñu cuan. Soco sanduvií tucu ra aña maa ñu cha cuenda cha chinó iñi ñu chi ra.

¹⁰Vityin nacaca xiñi yo kuhva cuñí Nyoo. Vatyí ña vaha cha tyisó yo ley ra Moisés siqui ñu. Vatyí niri maa sutu chahnu yo ta niri maa yo ta ña cuví naquehen vaha yo ley cuan.

¹¹Ñima tyicuan caa cacú yo. Yoó chitó yo vatyí cacú yo chihin tumañi iñi cha sacuvi Sutu Mañi yo Jesús chihin yo. Ta tyicuan caa tucu ñu cuan —catyí ra Pedro chi ra.

¹²Tyicuan ta taxi ri cacuvi tandihí ra. Ta tyasoho ra tuhun cahan ra Bernabé ta ra Pablo. Vatyí canacatyí

ra seña ta milagru cha sacuvi Nyoo nu cacahan ra tuhun Nyoo nu nyicú ñu cha ñima ñu Israel cuví.

¹³ Cuhva cha ndihí cahan ra, quichaha cahan ra Jacobo, ta catyí ra:

—Nyoho yañi, cuiñi ndo tuhun cahín.

¹⁴ Cha nacatyí ra Simón Pedro chi yo yoso caa quichaha chaha Nyoo tumañi iñi chi ñu cha ñima ñu Israel cuví. Vatyí cachí tucu ra chi suhva ñu vatyí cuví ñu noo ñáyivi cuenda ra.

¹⁵ Ta ñn ri nanduvi tuhun ihya chihin tuhun cha cahan ra profeta cuenda Nyoo ta cha naha, tari kuhva nyaa nu tutu Nyoo tyehe caa:

¹⁶ Yaha tandihí tuhun ihya cuquichi tiqui nu nyaá ndo.

Quiví chiyo ra David, vaha sacahnu ñáyivi chii.

Soco yahá cuan sandihí ñu tuhun cha sacahnu ñu chii.

Soco cuquichi tiqui ta tari cha cuna-coñehi vehe ñuhu ra David inga chaha.

Vatyí cusacahnu tucu ñáyivi chii.

¹⁷ Tacuhva cuví nanducu tandihí ca ñáyivi chii, tandihí ñu cha ñima ñu Israel cuví cha chicán tahvi chihin sívi.

¹⁸ Tyicuan caa catyí Sutu Mañi yo ta sañaha ra tuhun ihya chi ñáyivi chiyo ta cha naha ta chi ñáyivi cha iyó vityin.

¹⁹ Yucuan chaha catyí yuhu vatyí ña vaha sayanga yo chi ñáyivi cha ñima ñu Israel cuví cha sandoo ñu tuhun cha chiyo ñu ta quihvi ñu cuenda ra Cristo. Ña vaha catyí yo tyi cuñí chi cha quichaha ñu ley chahnu.

²⁰ Vaha ri maa chihin cha sacahun yo tutu chi ñu. Ta catyí yo chi ñu vatyí ma cachi ñu coño cha chaha cuenda ñáyivi chi xitohyo. Ta ni noo ñu ta ma coo ri maa ñusihí o rayí chi ñu, tatu ñima ñasihí o yí ñu cuví. Ta ma cachi ñu coño quiti chihí cha cava ñu sucun ta ña chati ñiñi. Ta ma cachi ñu ñiñi.

²¹ Vatyí nyata tyembu ta chiyo ra cha sañahá ley ra Moisés vehe ñuhu ñu Israel ta sañaha ra tuhun cuan tahan tahan ñuu. Ta tahan uña quívi quívi

nyitatú ñu, sacuahá ra tuhun cha tyaa ra Moisés —catyí ra Jacobo chi ra.

²² Tyicuan ta ra apóstol ta ra cayihí ndaha chi ñu nyicú vehe ñuhu chihin tandihí ñu yihí cuenda Nyoo nacachí ñu chi suhva ra. Ta yaha cuan ta tachí ñu chi ra vatyí cahun ra Antioquía chihin ra Pablo ta ra Bernabé. Ta ra cha canatyiso ñu ican cuví ra Judas cha nañí Barsabás, ta ra Silas. Ican ra cacuví ra ra cananyiso tyiño vehe ñuhu ñuu Jerusalén cuan.

²³ Ta chihin ra tachí ñu noo carta. Ta catyí carta cuan tyehe caa:

“Nyuhu ra apóstol, ta ra yihí ndaha chi ñu nyicú vehe ñuhu ta yañi ndo cuenda Nyoo, tandihí ri ndi chahá ndi nocumi chi nyoho cha ñima ra Israel cuví ndo vatyí yañi ndi cuví chi ndo vasi ñima ñu Israel cuví ndo. Tandihí ri ndo cha iyó ndo Antioquía ta nyoho ñu Siria, ta ñu Cilicia ñandihí, sacuhún ndi carta ihya chi tandihí ri ndo.

²⁴ Chitó ndi vatyí quita suhva ra ityi nu nyicú ndi ihya. Ta cuahan ra nu nyicu ndo. Soco ña catyí nyuhu chi ra tyi cahun ra cusayanga ra chi ndo chihin tuhun cahan ra. Satondo ra cuan xiñi ndo vatyí catyí ra chi ndo tyi cuñí chi cha sacuví ndo costumbre circuncisión ta naquehen vaha ndo ley ra Moisés. Soco ñima nyuhu catyí tyi cahun ra cucatyí ra chi ndo tyicuan caa.

²⁵ Yucuan chaha ndu ñn ri ndi ta nacachí tahan tuhun cahan ndi ta vaha cuñi ndi cha tachí ndi chi ra hermano ihya chihin ra Pablo ta ra Bernabé nu nyicu ndo.

²⁶ Nduvi tahan ra ihya nyehé xaan ra tindocho cha cuenda Sutu Mañi yo. Ta vasi cuñí ñáyivi cahni ñu chi ra soco ña sandihí ra tuhun cha sacoto ra tuhun Sutu Mañi yo Jesucristo.

²⁷ Ta yucuan chaha tachí ndi chi ra Judas ta chi ra Silas. Ta maa ra cacahan ra chihin yuhu ra chihin ndo, vatyí nacatyí ra tandihí cha tyaa ndi nu tutu ihya.

²⁸ Vatyí ñiri Tatyí Ii ta ñiri nyuhu ta ña cuñí ndi tyiso ca ndi carga síqui ndo, soco ihya ri cha ñiñi ca tahan chi cha naquehen vaha ndo.

29 Ma cachi ndo coño cha chaha cuenda ñu chi xitohyo. Ta suri ma cachi ndo ñiñi, ni coño quiti cha chihí ta ña chati ñiñi ti. Ta ma coo ñusihi o rayi chi ndo tatu ñima ñasihi ndo o yíi ndo cuví. Tatu ma sacuvi ndo tyicuan caa, vaha xaan cuacoo ndo. Ta Nyoo na cocumi ra chi ndo”, catyí ra nu carta cuan.

30 Ta cuahan coyo ra cha catachi ra chi cuan. Ta chaq coyo ra Antioquía. Ta sandu ñin ri ra chi tandihi ñu, ta nacuhva cuenda ra carta cuan.

31 Cuhva cha sacuahá ñu carta cuan ndusi xaan cuñi ñu vatyí vaha xaan cahán chi.

32 Ta ra Judas ta ra Silas cuví tucu ra cuan profeta cuenda Nyoo. Ta sanduní ra ñiñi ra hermano chihin tuhun cahán ra.

33 Ta cha yahá chinyicu ra cuan suhva quivi ta cuanuhu coyo ra nya nu nyicú ñu catachi chi ra. Ta tandihi ñu yíhi cuenda ra Cristo catyí ñu vatyí na cuhun vaha ra.

34 Soco ra Silas natyaa ra cuhva vatyí cundoo ra.

35 Ta ra Pablo ta ra Bernabé candoo tucu ra Antioquía yucuan. Ta maa ra chihin cuaha ca ra casañahá ca ra chi ñáyivi. Ta cacahan ca ra tuhun Sutu Mañi yo chihin ñu.

Nu cu uvi chaha cuahan ra Pablo tuhun Nyoo ta nu cusin ra chihin ra Bernabé

36 Ta cha yahá suhva quivi ta catyí ra Pablo chi ra Bernabé:

—Coho inga chaha cunyehe yo nu nyicú ñu yíhi cuenda ra Cristo tandihi ri ñuu nu cahán yo tuhun Sutu Mañi yo. Vatyí nyehe yo yoso caa canyicu ñu —catyí ra chi ra.

37 Ta ra Bernabé cuñi ra cha cuhun tucu ra Juan Marcos chihin ra.

38 Soco ra Pablo ña tahán ñiñi ra cha cuhun ra Juan chihin ra, vatyí sandoo ra chi ra nya Panfilia quivi cuan. Ta ña chahan ca ra chisaha tyiño ra chihin ra.

39 Ta ña chitahan ñiñi ni noo ra, ta cacusin ra. Ra Bernabé cuahan ra chihin ra Juan Marcos. Ta quihvi ra

chichi noo barcu ta cuahan coyo ra Chipre.

40 Ta ra Pablo cachi ra chi ra Silas. Ta cha yahá chican tahvi ra hermano chi Nyoo na tyinyee ra chi ra, ta cuahan coyo ra.

41 Ta yahá ra ityi Siria, ta ityi Cilicia, ta sanduní ca ra ñiñi ñu yíhi cuenda Nyoo noo noo ñuu.

16

Nu cuahan ra Timoteo chihin ra Pablo ta ra Silas

1 Ra Pablo ta ra Silas chaq coyo ra ñuu Derbe, ta ñuu Listra. Ta yucuan nañihí ra chi noo ra yíhi cuenda Cristo. Nañi ra Timoteo. Ta sihi ra cuví ña noo ñaha Israel. Ta suri yíhi tucu ña cuenda ra Cristo. Soco sutu ra ra Grecia cuví ra.

2 Vaha xaan chicá ra Timoteo chihin Nyoo catyí ñu yíhi cuenda Cristo ñuu Listra ta ñuu Iconio.

3 Ta ra Pablo cuñi ra cha cuhun ra Timoteo chihin ra. Ta saha ra circuncidar chi ra Timoteo. Vatyí coto ma cuiñi ñu Israel cha iyó ityi cuan tuhun ra Cristo cha cahán ra. Vatyí tandihi ñu chitó ñu vatyí sutu ra cuví ra ra ñuu Grecia.

4 Tyicuan ta cuahan coyo ra noo noo ñuu. Ta nacatyí ra chi ñu yíhi cuenda ra Cristo tuhun cha chaha ra apóstol ta ra yíhi ndaha chi ñu nyicu vehe ñuhu Jerusalén chi ra.

5 Ta tyicuan caa ta nduní ca ñiñi ñu yíhi cuenda ra Cristo ta chino ca ñiñi ñu chi Nyoo. Ta tahan quivi ta cuahan nducuaha ca ñu.

Nu nyehé ra Pablo noo visión chi noo ra Macedonia

6 Ña chahá Tatyí Ii cha cahan ra tuhun Nyoo ityi Asia. Yucuan chaha yahá sava ra ityi Frigia nu iyó xahñi ñuhu chihin ityi Galacia.

7 Ta chaq coyo tucu ra ityi Misia. Ta cuñi tucu ra cuhun coyo ra ityi Bitinia, soco Tatyí Ii ra Jesucristo ña chahá cuhun coyo ra.

8 Tyicuan ta nya sava ri yahá ra ñuu Misia ta canoo coyo ra ñuu Troas cha nyaá yuhu tyañuhu.

⁹ Cañohó ra ñuu Troas cuan, ta noo cha cuaa nyehe ra Pablo noo visión. Nyehe ra chi noo rayi ityi Macedonia. Nanyaá ra ta chacú ndahvi ra nuu ra, ta catyí ra chi ra: “Ñaha, vatyí tyinyeun chi ndi”, catyí ra.

¹⁰ Ta cha nyehe ra Pablo visión cuan, yuhu ra Lucas chihin ra Pablo ta inga ra sanduvaha ndi chi ndi ta cuahan ndi nya Macedonia cuan. Vatyí chitó vaha ndi vatyí Nyoo cana chi ndi, vatyí cahan ndi tuhun ra yoso caa sacacú ra añima yo chihin ñáyivi ityi cuan.

Nu ñohó ra Pablo ta ra Silas ñuu Filipos

¹¹ Quihvi ndi noo barcu ñuu Troas. Ta chahan ndoo ityi ri ndi nya Samotracia noo ñuhú luhlu iyó mahñu tyañuhu. Ta cha inga quivi cha ndi ñuu Neápolis.

¹² Ta yucuan quita ri ndi ta cuahan ndi ñuu Filipos cha cuví noo ñuu cuenda ñu Roma. Ta cuví chi noo ñuu cahnu ca cha nuu tandihí ñuu ityi Macedonia cuan. Ta yucuan chinyicu ndi suhva quivi.

¹³ Noo quivi cha nyitatu ñáyivi ta quita ndi ityi chata ñuu, yatyín noo yutya nu tuhva ñu chican tahvi ñu chi Nyoo. Chicunyaá ndi yucuan ta cahan ndi tuhun Nyoo chihin ñusihi cha candu in ri yucuan.

¹⁴ Noo ñaha nañi ña Lidia. Ta ñuu ña cuví Tiatira. Ta tuhva ña xico ña sahma finu, tyacu nyaa. Yucuan cuví tyiño sahá ña. Ta sacahnú ña chi Nyoo tari ñu Israel. Ta chiñi ña cha cahan ra Pablo. Ta Nyoo nuña ra añima ña na quichaha ña cha cahan ra.

¹⁵ Ta condutya ña chihin ñáyivi chi ña. Ta yaha cuan ta chacu ndahvi ña nuu ndi, ta catyí ña:

—Tatu nyehé ndo vatyí ndicha cha chinó iñi chi Sutu Mañi yo, ñaha ndo, cōo ndo vehi —catyí ña chi ndi.

Ta saniñi ña chi ndi cha ndoo ndi vehe ña.

¹⁶ Ta cuví noo chaha cha cuahan ndi nu chicán tahvi ndi. Ta cha niri ca cha cuahan ndi, tahan ndi chi noo ñaha tyivaa. Yihí noo tatyí ña vaha chi

ña. Yucuan chaha cuví nacoto ña ñáá ndihí cha cucuvi ityi nuu. Ta cuví ña noo ñaha iyó chitoho. Ta cuaha xaan xuhun sahá ganaa ña cuenda chitoho ña, vatyí cuví nacotó ña.

¹⁷ Ta ñaha tyivaa cuan quichaha nyicon ña chi ndi, ta chi ra Pablo ñandihí. Ta cana cha ña ta catyí ña:

—Rayi ihya ra casacuví tyiño nuu Nyoo cahnu cuví ra. Ta cahan ra tuhun yoso caa cuví cacu añima yo —catyí ña.

¹⁸ Cuaha quivi sacuvi ñaha tyivaa cuan tyicuan caa. Tyicuan ta ra Pablo ña cunye ca iñi ra, ta nanyocava ra ta catyí ra chi tatyí ña vaha cha yihí chi ña:

—Chihin sivi ra Jesucristo catyí chuun vatyí quiton chi ñaha tyivaa ihya —catyí ra.

Ta tatyí ña vaha cuan quita chi chi ña caa cuhva ri cuan.

¹⁹ Soco cuhva cha canyehe chitoho ña vatyí ma cuví ca saha ganaa ra xuhun chihin ña, catiñ ra chi ra Pablo ta ra Silas chinyaca ra chi ra nya vehe tyiño.

²⁰ Ta cachican ra cuatyí chaha ra nuu ra cacuví tyiño. Ta catyí ra:

—Ra Israel ihya sanaquiquí ra chi ñáyivi ñuu yo.

²¹ Ta sañahá ra costumbre cha ña cuví naquehen yo, niri ña cuví sacuvi yo vatyí ñu cuenda ñuu Roma cuví yo —catyí ra.

²² Tyicuan ta nduxaan ñáyivi chi ra Pablo ta ra Silas. Ta ra cacuví tyiño cuan chahnya ra sahma ra Pablo ta ra Silas ta tachí ra tyiño nacañi ra chi ra chihin yutun.

²³ Cha yaha cha cañi vavaha ra chi ra, ta catyihí ra chi ra vehe caa. Ta tachí ra chi ra sahá cumi chi ra na saha vaha ra cuenda chi ra.

²⁴ Cuhva cha quehen ra sahá cumi cuan tuhun, tyihí ra chi ra nya chichi cuivi vehe caa. Ta tyihí vaha ra chaha ra ticu vitu.

²⁵ Soco ñáá cuhva hora ñuu cuan cachitá vavaha ra Pablo ta ra Silas. Ta cachicán tahvi ra chi Nyoo. Ta ra cañohó vehe caa cuan catyasohó ra.

26 Ta saná iñi ra ta quichi noo cha taan ñihi vavaha. Ta naquisi chi cimientu vehe caa cuan, ta caa cuhva ri cuan nuña tandihi yuvehe, ta ndachi cadena tandihi ra ñohó vehe caa cuan.

27 Ta cha ndoyo ra sahá cumi cuan, nyehe ra vatyí tacoho yuvehe. Tyicuan ta tava ra mityi ra vatyí cahñi maa ra chi ra. Vatyí chicá xiñi ra vatyí ndihi ra ñohó vehe caa cuan cachino.

28 Soco ra Pablo cana cha ra chi ra, ta catyí ra:

—Ma cahñun chuun, vatyí tandihi ndi nyicú ndi ihya —catyí ra chi ra.

29 Tyicuan ta ra sahá cumi cuan chican ra noo ñuhu. Ta quicono ra quihvi ra nu cañohó ra. Ta ñihi ra chihin cha yuhvi ra. Ta chicuiñi chiti ra nuu ra Pablo ta ra Silas.

30 Numi ri tava ra chi ra nu ñoho ra yucuan. Ta ndacá tuhun ra chi ra ta catyí ra:

—¿Nyoho Tata, yoso caa sacuvi ta cacu añime? —catyí ra chi ra.

31 Ta ra cuan canacahan ra ta catyí ra:

—Chino iñi chi Sutu Mañi yo Jesucristo ta cacun, maun ta ñáyivi chuun ñandihí —catyí ra.

32 Ta cacahan ra tuhun Sutu Mañi yo chihin ra ta chihin tandihí ñu nyicu vehe ra.

33 Ta suri maa cha cuaa cuan ra sahá cumi vehe caa cuan nacatyá ra nu cahvi chi nduvi tahan ra nu cañi ra chi ra. Yaha cuan ta maa ra ta tandihí ñáyivi chi ra condutyá ñu suri cha cuaa cuan.

34 Tyicuan ta chinyaca ra chi ra nya vehe ra. Ta chaha ra cha cachi ra. Ta maa ra chihin ñáyivi chi ra sñi xaan cuñi ñu vatyí chinó iñi ñu chi Nyoo. [Tyicuan ta cuanuhu coyo ra nya vehe caa cuan coto cuxaan ra cuví tyiño chihin ra saha cumi chi ra.]

35 Tuví inga quivi ta catachi ra cacuví tyiño chi policia nu nyaá ra sahá cumi cuan, ta catyí ra vatyí na saña ra chi ra Pablo.

36 Tyicuan ta ra sahá cumi vehe caa cuan catyí ra chi ra Pablo:

—Chaa tyiño chii saha ra cuví tyiño, vatyí sañe chi ndo. Ican tuhun cha cuví quita ndo vityin —catyí ra chi ra.

37 Soco ra Pablo catyí ra:

—Chi nyuhu cha cuví ndi ra cuenda ñuu Roma ican cañi ra nu tuvi. Ta ni ña cutuñi chi ndi tari cuhva tahán chi. Ta tyihí ra chi ndi vehe caa. Ta vityin cuñi ra saña xehe ra chi ndi. Soco ma cuví. Naquichi tava maa ra chi ndi —catyí ra Pablo chi ra sahá cumi cuan.

38 Ta ra policia nacatyí ra chi ra cacuví tyiño. Ta ra cuan cayuhvi ra cuví cha cachitó ra vatyí ra cuenda ñuu Roma cuví ra Pablo.

39 Ta chahan coyo ra chinandacan ra ticahnu iñi chi ra Pablo ta chi ra Silas. Tyicuan ta catava ra chi ra ta cachacu ndahvi ra nuu ra na quita ra ñuu cuan.

40 Ta cha quita coyo ra vehe caa, chahan coyo ra vehe cu Lidia. Ta yaha cuan ta chinyehe ra chi ra hermano ta sanduní ra iñi ra ta cuahan coyo ra.

17

Nu naquiqui ñáyivi ñuu Tesalónica

1 Nu cuahan coyo ra Pablo ta ra Silas, cayaha coyo ra ñuu Anfípolis, ta ñuu Apolonia. Yaha cuan ta chaa coyo ra ñuu Tesalónica nu nyaá noo vehe ñuhu ñu Israel.

2 Ta chahan ra Pablo vehe ñuhu cuan tari cuhva tuhva maa ra chahan noo noo ñuu. Ta chahan ra tuhun Nyoo chihin ñáyivi chichi vehe ñuhu cuan uñi tahan quivi nyitatú ñu.

3 Quehen ra libru tuhun Nyoo ta sañaha ra tuhun ra Cristo chi ñu yoso caa catyí chi vatyí cunyehe ra tindoho ta cucúvi ra. Yaha cuan cunandoto ra. Ta catyí ra chi ñu vatyí suri maa ra Jesús cha chahán ra tuhun chihin ñu cuví ra Cristo.

4 Ta suhva ñáyivi Israel cuan nachino iñi ñu. Ta candu ñn ri ñu chihin ra Pablo ta ra Silas. Ta cachino tucu iñi cuaha ñu Grecia cha sacahnú chi Nyoo. Ta cuaha ñusihi tyayñi ñuu cuan ñandihí.

5 Soco ra Israel cha ña chinó iñi, quiñi cacuñi ra cha nyehé ra vatyí

nyicón ñáyiví chi ra Pablo. Ta sandu ñn ri ra chi noo ityi ra quiñi iyó cha cachicá noo yanga ri maa. Ta sanaquiqui ra ñuu cuan. Ta quihvi ra vehe ra Jasón, nanducú ra chi ra Pablo ta chi ra Silas, vatyí tava ra chi ra, ta nacuhva cuenda ra chi ra chi ñáyiví.

⁶ Soco cha cuenda cha ña nañihi ra chi ra Pablo ta ra Silas yucuan, ta quehen ra chi ra Jasón. Ta xita quiñoho ra chi ra ta chi suhva ca ra hermano ta cuahan coyo ra nuu ra cuví tyiño ñuu cuan. Ta cana chaa ra ta catyí ra:

—Ra ihya cuví ra cachicá noo satondó chi tandihi ñáyiví nicahnu ñuhu ñáyiví. Ta vityin chaa coyo tucu ra ihya.

⁷ Ta ra Jasón chiña chaha ra vehe ra cunyicu ra. Ta tandihi maa ra ña sahá ra ñáyiví chi ra cuví rey cahnu nya Roma. Vatyí catyí ra vatyí iyó nonga rey ta nañi ra Jesús.

⁸ Cha cachiñi ñu tuhun cuan, ñáyiví ta ra cacuví tyiño canaquiqui ñu.

⁹ Soco ra Jasón ta inga ra cachaha ra xuhun ta caquita yica ra.

Nu cuahan coyo ra Pablo ta ra Silas ñuu Berea

¹⁰ Ta suri cha cuaa cuan quiyí cuii ri casacuhun ra hermano chí ra Pablo ta ra Silas ityi ñuu Berea. Ta cha chaa coyo ra yucuan ta chahan coyo ra vehe ñuhu ñu Israel.

¹¹ Ta ra Israel cha iyó ñuu Berea cuan vaha ca ñáyiví cacuví ra ta ñima ca ra Tesalónica. Vatyí chihin cha ñi ñi ra naquehen ra tuhun Nyoo. Ta ndiquivi nanducú ra nuu tutu Nyoo, nyehé ra tatu ndicha cha cacatyí ra Pablo ta ra Silas ta ra Timoteo chi ra.

¹² Yucuan chaha cuaha vavaha ñu nachino ñi ñu chi ra Cristo. Ta ñu Grecia nachino tucu ñi ñu cuan, tari ñusihí tyayí ta rayí ñandihí.

¹³ Soco cha cachito ra Israel cha ca iyó ñuu Tesalónica vatyí ra Pablo ñohó ra Berea cahán ra tuhun Nyoo, ta chahan coyo ra ta sanaquiqui ra chi ñáyiví yucuan.

¹⁴ Soco ra hermano numi cuii ri tachí ra chi ra Pablo nya ityi yuhu tyañuhu. Soco ra Silas ta ra Timoteo candoo ra Berea.

¹⁵ Ta ra cha cuahan coyo chihin ra Pablo chinyaca ra chi ra nya ñuu Atenas. Tyicuan ta cuanuhú coyo ra nya Berea cuanacuhva ra tyiño cha tachí ra Pablo chi ra Silas ta chi ra Timoteo, na sanumi ra ta cahun ra nu nyaá ra.

Nu ñohó ra Pablo ñuu Atenas

¹⁶ Cha ñiri ca cha nyatú ra Pablo chi ra Silas ta ra Timoteo ñuu Atenas cuan quiñi cuñi añima ra cha nyehé ra vatyí cuaha xaan xitohyo iyó ñuu cuan.

¹⁷ Yucuan chaha cahan ra chihin ra Israel, ta chihin inga ra cha tuhvá sacahnú chi Nyoo chichi vehe ñuhu cuan. Ta ndi quivi cahan ra chihin ñu cha nyicu nuyahvi ñandihí.

¹⁸ Ta ñihi tahan ra chihin ñu cha sacuaha tuhun sañahá noo ityi ñáyiví cha nañi ñu epicúreo. Ta ñihi tahan tucu ra chihin ñu cha sacuaha tuhun sañahá ñáyiví estoico. Ta cacahan ñu chihin ra. Ta yihí ra catyí ra:

—¿Ñáá tuhun cahan xaan ra ihya? —catyí ra.

Ta inga ra catyí ra:

—Tuhun inga nyoo cahan ra ihya —catyí ra.

Tyehé caa catyí ra vatyí ra Pablo cahan ra tuhun ra Jesús, ta cahan tucu ra tuhun cha nandoto ñáyiví chihí.

¹⁹ Tyicuan ta chinyaca ra chi ra Pablo noo nu nañi Areópago, nu tuhva ra cacuvi tyiño ndu ñn ri ra. Ta cacatyí ra chi ra:

—Cuñi ndi coto ndi tuhun chaa cha vachi sañahún.

²⁰ Vatyí sacotón tuhun cha ña chitó ndi. Ta cuñi ndi coto ndi ñáá cha cuñi chí catyí tandihí tuhun ihya —cacatyí ra chi ra.

²¹ Vatyí tandihí ñu Atenas ta ñu inga ñuu cha iyó yucuan tahan xaan ñi ñu tyasoho ñu ta nacatyí ñu ñáá ndihí tuhun chaa.

²² Tyicuan ta ra Pablo nicuinanyaa ra mahñu nu nyicu ñu yucu Areópago, ta catyí ra:

—Nyoho Tata ñuu Atenas, yuhu nyehí vatyí chinó xaan iñi ndo chi cuaha nyoo.

²³ Vatyí chahin chinyehi nu tuhvá ndo savaha ndo culto. Ta nañihí noo arta nu nyaá letra cha catyí: “Cuenda Nyoo cha ña ñohó nuu yo”, catyí letra cuan. Nyoho sacahnú ndo chi Nyoo cuan vasi ña ñohó nuu ndo chi ra. Ican Nyoo cuan cuví cha cahín tuhun chihin ndo.

²⁴ Nyoo cha savaha ñuhu ñayiví ta tandihí cha iyó siqui ñuhu ñayiví. Chi maa ra cuví andiví ta ñuhu ñayiví. Ta ña iyó ra chichi vehe ñuhu cha savaha ñáyiví.

²⁵ Ta ña itá iñi ra cha tyinyee ñáyiví chi ra. Vatyí suri maa ra chaha ra ñayiví coo tandihí yo. Ta chahá ra tatyí cha xitá yo. Maa ra chaha tandihí chi yo.

²⁶ Cha xihna ri savaha Nyoo chi noo tuhun ri rayí. Ta maa ra cuví sutu tandihí yo. Yucuan chaha noo ri niñi nyisó tandihí yo. Ta chaha Nyoo cha coo yo nicahnu ñuhu ñayiví. Cha ni cumañi ca savaha ra chi yo ta catyí ra ñáá cuiya coo noo noo yo siqui ñuhu ñayiví ihya. Ta catyí tucu ra nya cucoo noo noo yo.

²⁷ Tyicuan caa sacuví ra vatyí tacuhva quichaha nanducu yo chi ra. Tari nanducú minoo ra cuaa noo cha nanducú ra chihin ndaha ra, vasi tyicuan caa ta cuví nañihí yo chi ra. Soco cha ndicha, Nyoo ña cañi nyaá ra chihin noo noo yo.

²⁸ Vatyí cha cuenda Nyoo iyó yo ta candá yo. Tari catyí tucu noo ra ñuu ndo, vatyí catyí ra: “Ñáyiví chi Nyoo cuví chi yo”, catyí ra.

²⁹ Tatu ñáyiví chi Nyoo cuví yo, ña tahán chi caca xiñi yo vatyí Nyoo cuví ra noo xitohyo cha chinqo chihin xuhun cuaan, o xuhun cuichin, o chihin yuu vaha cha savaha ñáyiví cuhva chicá xiñi maa ñu.

³⁰ Nyoo sahá ra ticahnu iñi chi ñu chiyó ta cha naha, vatyí ña chitó ñu. Soco vityin catyí ra chi tandihí ñáyiví tandihí ri ityi vatyí na ndu uvi iñi ñu cuatyí ñu.

³¹ Vatyí Nyoo tyaa ra cuhva vatyí coo noo quiví cha cucutuñi chi ñáyiví iyó siqui ñuhu ñáyiví nuu noo ra cha nacachi vaha maa ra chi. Ta sañaha ra chi tandihí yo vatyí tyicuan caa cuví vatyí sanandoto ra chi ra cuan cha yaha chihí ra —catyí ra Pablo.

³² Cuhva cha chiñí ñu tuhun cha nandoto ñu chihí, yihí ñu chacu nyaá ñu, ta inga ñu catyí:

—Quichun inga quiví ta cahun tuhun ihya chihin ndi —catyí ñu.

³³ Tyicuan ta cuahan ra Pablo.

³⁴ Soco yihí ñu chinyicon ñu chi ra, ta nachino iñi ñu chi Nyoo. Ta noo ra nañí ra Dionisio, ta cuví ra noo ra cuví tyiño ñuu cha tuhvá ndu ñin nya Areópago cuan. Ta noo ñaha sihi cha nañí Dámaris chino tucu iñi ña, ta inga tucu ñu ñándihí.

18

Nu ñohó ra Pablo ñuu Corinto

¹ Yaha cuan ta quitá ra Pablo ñuu Atenas ta cuahan ra ñuu Corinto.

² Ta yucuan nañihí ra chi noo ra Israel tari maa ra. Nañí ra Aquila. Ta ñuu Ponto cacu ra. Ta maa ra chihin ñasihí ra, cu Priscila quitá ñu Italia. vatyí ra Claudio, ra cuví rey cahnu yucuan, tava ra tandihí ra Israel. Catyí ra na quita ra ñuu Roma. Ta ra Pablo cuahan ra nu nyaá ñu ñuu Corinto cuan.

³ Ta ñin ri tyiño sacuví ra chihin ñu. Savaha ñu vehe sahma. Ta ndoo ra chihin ñu vatyí sahá tyiño ñu ñin ri.

⁴ Ta quiví nyitatu ñu Israel tahan vitya, ra Pablo chahan ra vehe ñuhu ñu. Ta ndatuhun tahan ra chihin ñu Israel ta chihin ñu cha ñima ñu Israel cuví. Vatyí nducú ra cuhva cha chino iñi ñu chi ra Jesucristo.

⁵ Ta quiví chaá coyo ra Silas ta ra Timoteo cha quitá ra Macedonia, ra Pablo sandoo ra tyiño sahá ra ta ñin ri ca tyiño cha cahán ra tuhun Nyoo nicunyaá ra. Ta catyí cachi ra chi ñu Israel vatyí ra Jesús cuví Cristo ra cha nyatú xaan ñu.

⁶ Soco ñu cuan xaan cuñi ñu. Ta quichaha cahan ña vaha ñu siqui Sutu Mañi yo. Tyicuan ta ra Pablo naquisi

ra sahma ra tari noo seña vatyí cuandoo cuatyí ñu siqui ñu. Ta catyí ra chi ñu:

—Cuatyí maa ndo cuví tatu cuhun ndo anyaya. Ñahri ca nyaá siqui. Vityin ta ityí nuu ca cuhin cucahin chihin ñu cha ñima ñu Israel cuví —catyí ra chi ñu.

⁷ Ta quita ra vehe ñuhu cuan. Ta cuahan ra vehe noo ra cha nañí Justo. Noo ra cha sacahnú chi Nyoo. Ta nyaá vehe ra ityí xiin vehe ñuhu cuan.

⁸ Ta noo ra cha nañí Crispo, ra cuví nuu vehe ñuhu cuan nachino ñi ra chi Sutu Mañi yo, ta ñáyivi chi ra ñandihí. Ta cuaha ca ñáyivi iyó Corinto cuan, cha yahá cha chiñi ñu tuhun cahán ra Pablo, nachino tucu ñi ra chi ra Jesús, ta condutyá ñu.

⁹ Tyicuan ta noo cha cuaa nyehe ra Pablo noo visión. Ta cahán Sutu Mañi yo chihin ra, ta catyí ra:

—Ma yuhvun. Cahán ca tuhín ta ma sandihun cha cahun.

¹⁰ Vatyí yuhu nyaí chuhun. Ta yori cuví sata si ñi chuun. Vatyí cuaha xaan ñáyivi nyaá sacaqui ñuu ihya —catyí Sutu Mañi yo chi ra Pablo.

¹¹ Yucuan chaha ra Pablo ndoo ra noo cuiya sisava ñuu Corinto cuan. Sañahá ra tuhun Nyoo chi ñáyivi.

¹² Soco quivi cha cuví ra Galión gobernador ñicahnu ityí Acaya cuan, candu ñin ri ra Israel siqui ra Pablo. Ta cachican ra cuatyí chaha ra nuu ra gobernador.

¹³ Ta cacatyí ra chi gobernador cuan:

—Ra ihya tyiyuhú ra chi ñáyivi na sacahnu ñu chi Nyoo noo cuhva cha ñahri nyaá nu ley ndi —cacatyí ra.

¹⁴ Tyicuan ta cuhva cha cuanacahan ra Pablo, nacahan ri ra Galión, ta catyí ra chi ra Israel cuan:

—Nyoho ra Israel, tatu cuenda noo cuatyí cahnu o cuatyí ndiyí cuví sandai yoso cuhva tahán chi.

¹⁵ Soco maa maa ri tuhun cahán ri cuví ihya. Ta yuhu ña cuñí sandai tyiño ihya, ta ñin ri cuenda ley maa ndo cuví. Nyehe maa ndo. Sandaa ndo tyiño vatyí yuhu ña cuñí cuvi

juez cuenda ihya —catyí gobernador cuan.

¹⁶ Ta tava ra chi ra nu cuví vehe tyiño ra.

¹⁷ Tyicuan ta tandihí ra Grecia catin ra chi ra Sóstenes, ra cuví nuu vehe ñuhu ñu Israel. Ta cacañi ra chi ra suri maa nuu ra Galión, ra cuví gobernador cuan. Soco ra Galión cuan ña cahán ri ra.

Nu cuanuhu ra Pablo ñuu Antioquía. Yahá cuan ta cuahan tucu ra tuhun Nyoo, cha cu uñi chaha

¹⁸ Ta ra Pablo ndoo ca ra ñuu Corinto cuaha quivi. Yahá cuan ta catyí ra chi ra hermano vatyí cuhun ra. Ta cuahan ra Aquila chihin cu Priscila chihin ra Pablo. Tyicuan ta chaá coyo ñu Cencrea. Ta ra Pablo satya ndi ra xiñi ra vatyí sacuví ra noo cha tyaá ra cuhva tyi sacuvi ra nuu Nyoo. Tyicuan ta caquihvi ñu chichi noo barcu cha cuahan ityí Siria.

¹⁹ Ta cha chaá barcu cuan nya ñuu Éfeso, ta caquita ñu. Ta ra Aquila chihin cu Priscila ndoo ñu yucuan. Ta ra Pablo cuahan ra vehe ñuhu ñu Israel. Ta cahán ra chihin ñu Israel cha ndu ñin ri yucuan.

²⁰ Ta chacu ndahvi ñu nuu ra na ndoo ra cuaha ca quivi. Soco ña cuñí ra.

²¹ Ta catyí ra chi ñu vatyí cha cuahan ra, ta catyí tucu ra tyehé caa:

—Cuñí chi cha cuhin ñuu Jerusalén vatyí sanducahni vico cha vachi cutahan. Soco cuquichi inga chaha nu nyicu ndo tatu Nyoo ta cuñí ra —catyí ra chi ñu.

Tyicuan ta cuahan ra quihvi ra chichi noo barcu cha cuahan ityí Siria.

²² Quivi nachaa ra ñuu Cesarea ityí Siria cuan, cahán ra chicuhva ra nocumi chi ñu yihí cuenda Nyoo Jerusalén. Yahá cuan ta cuahan ra Antioquía.

²³ Ta cha yahá chinyaa ra suhva quivi yucuan, quita ra ta cuahan ra tahan tahan ñuu ityí Galacia ta Frigia. Ta sanduní ra ñi tandihí ñu yihí cuenda Nyoo.

Nu cahán ra Apolos tuhun Nyoo ñuu Éfeso

²⁴ Quiví cuan chaá noo ra Israel ñuu Éfeso. Nañi ra Apolos. Ta ñuu ra cuvi Alejandría. Ta cuví ra minoo ra vaha cahán tuhun Nyoo. Ta chitó xaan ra tuhun Nyoo tuhun chahnu cha nyaá nu libru.

²⁵ Ta vaha xaan cutuhva ra tuhun Sutu Mañi yo. Ta cahán ra chihin cha ñi ñi ra. Ta vaha xaan nyicón ra chi Nyoo. Ta cachi xaan sañahá ra tuhun ra Jesús. Vasi cuhva cha sacondutyá ra Juan ri chitó ra.

²⁶ Ta quichahá cahan ra chichi vehe ñuhu chihin cha ñi ñi ra. Ta cuhva cha chiñi ra Aquila ta cu Priscila, tava sñn ñu chi ra ta nacatyí cachi ca ñu tuhun ityi Nyoo chi ra.

²⁷ Tyicuan ta quichaha cuñi ra Apolos cuhun ra ityi Acaya. Ta ra hermano catyinee ra chi ra. Ta catyaa ra noo carta chi ñu yihí cuenda Nyoo ityi cuan, ta catyí ra chi ñu vatyí na vaha cahan ñu chihin ra tatu chaá ra. Tyicuan ta cuahan ra. Ta cuhva cha chaá ra Acaya cuan tyinee xaan ra chi ñu chinó ñi chi Nyoo cha cuenda tumañi ñi cha chahá ra chi ñu.

²⁸ Vatyí nu tuvi sañahá cachi xaan ra yoso caa cuhva ña vaha cha sacuví ñu Israel. Ta sañahá ra cha catyí nu tutu Nyoo vatyí ra Jesús cuví Cristo, ra cha nyatú xaan ñu chi.

19

Nu cuahan tucu ra Pablo ñuu Éfeso

¹ Cha ni ri ca cha ñohó ra Apolos ñuu Corinto, ra Pablo yahá ra ityi yucu ta chaá ra nya ñuu Éfeso. Ta yucuan nañihí ra chi cuaha ri ra yihí cuenda Nyoo.

² Ta ndacá tuhun ra chi ra:

—¿Atu naquehen ndo Tatyí li quivi nachino ñi ndo? —catyí ra Pablo chi ra.

Ta canacahan ra cuan ta catyí ra:

—Ni chiin ña chitó ndi cha iyó Tatyí li.

³ Tyicuan ta ra Pablo ndacá tuhun ra chi ra:

—¿Ñáá chihin condutyá nyoho? —catyí ra.

Ta nacahan ra ta catyí ra:

—Chihin cuhva sacondutyá ra Juan yucuan cuhva condutyá ndi —catyí ra.

⁴ Tyicuan ta catyí ra Pablo chi ra:

—Ra Juan sacondutyá ra chi ñáyivi cha ndu uvi ñi cuatyí. Soco catyí tucu ra chi ñu vatyí cuñi chi cha chino ñi ñu chi ra cha cuaquichi ta ican ra cuan cuví ra Cristo Jesús —catyí ra Pablo chi ra.

⁵ Cuhva cha cachiñi ra cha catyí ra Pablo tuhun ihya, tyicuan ta nacondutyá ra inga chaha chihin sivi Sutu Mañi yo Jesús.

⁶ Ta cuhva cha tyiso ra Pablo ndaha ra siqui ra, quichi Tatyí li siqui ra. Ta quichaha cahan ra inga sahan. Ta sahá ra profetizar, o chahá cuenda ra tuhun chahá Tatyí li Nyoo chi ra cuví cuan.

⁷ Ta uchi uvi tahan ra cha tandihí ra.

⁸ Tyicuan ri chica ra Pablo vehe ñuhu ñuu cuan chichi cha uñi yoo. Ta cahan ra tuhun Nyoo chihin cha ñi ñi ra. Ta ñihi cahán ra chihin ñu yoso caa nyacá ñaha Nyoo añima yo.

⁹ Soco yihí ñu sandava ñu añima ñu. Ta ña cuñi ñu chino ñi ñu. Ta cahán ña vaha ñu siqui tuhun ra Cristo nuu ñáyivi, ta catyí ñu vatyí ña vaha ityi Sutu Mañi yo. Tyicuan ta ra Pablo canyahá ra nu nyicú ñu. Ta chinyaca ra chi ñu chinó ñi chi ra Cristo noo sicuela ra cha nañi Tiranno. Ta yucuan cahán ra tuhun ra Cristo chihin ñáyivi ndiquivi ri.

¹⁰ Ta tyicuan caa chinyacuví ra chichi cha uvi cuiya. Ta tandihí ñáyivi nicahnu ityi Asia cuan chiñi ñu tuhun Sutu Mañi yo Jesús, tari ñu Israel ta ñu cha ñima ñu Israel cuvi ñándihí.

¹¹ Ta nahnu milagru sacuví Nyoo chihin ndaha ra Pablo.

¹² Vatyí nyacua nya pañitu ta sahma cha tin ra Pablo, ta chinyaca ñu chi ñu cuhví ta nduvahá ñu. Ta ñu yihí tatyí ña vaha chi, quita chi chi ñu.

¹³ Ta iyó suhva ra Israel cha cachica noo tahan tahan ñuu. Catava ra tatyí

ña vaha chi ñáyivi. Ta cacuñí ra cotyíño ra sívi Sutu Mañi yo Jesús vatyí tava ra chi tatyí ña vaha. Ta catyí ra chi tatyí ña vaha cuan:

—Chihin sívi ra Jesús cha cahán ra Pablo tuhun catyí chi ndo vatyí quita ndo —catyí ra.

¹⁴ Tyehe caa chinyacuví ndi ucha tahan sehe noo ra Israel cha nañí Esceva. Ta ra Esceva cuan cuví ra noo ra cuví nuu chi tata sutu.

¹⁵ Ta cha cacahan ra cuan chihin tatyí ña vaha cuan, nacahan tatyí ña vaha cuan chihin ra ta catyí chi tyehe caa:

—Ñohó nui chi ra Jesús. Ta chité yóo ra cuví ra Pablo. Soco nyoho ¿yóo ra cuví nyoho? —catyí tatyí ña vaha cuan chi ra.

¹⁶ Tyicuan ta ra cha yihí tatyí ña vaha cuan chii, ndava ra síqui ra cuan. Ta chihin cha cuaha fuerza ra cuví chasaha ra chi tandihí ra. Ta chahnya cuatyí ra sahma ra. Ta sanduvityaa ra chi ra. Ta sañicuehe ra chi ra. Yucuan ta chihin cha cayuhvi ra ta cachino ra ta cuahan coyo ra.

¹⁷ Tyicuan ta tandihí ñu Éfeso, ñu Israel, ta ñu cha ñima ñu Israel cuví ñandihí, chito ñu tuhun cuan. Ta yuhvi xaan ñu cuví. Ta sacahnú ñu sívi Sutu Mañi yo Jesús.

¹⁸ Ta cuaha xaan ñu chinó iñi ñu chi ra. Ta chaá coyo ñu ta nahma ñu cuatyí ñu, tandihí cha ña vaha cha chinyacuví ñu ta ityi chata ca.

¹⁹ Ta cuaha ñu cha sacuhá tuhun tasi, quichi nyaca ñu libru ñu. Ta chahmi ñu libru cuan nuu tandihí ñáyivi. Ta natava ñu cuenda yoso yahvi libru cuan. Cha tandihí quita ta cha uvi xico uchi mil xuhun cuichin.

²⁰ Ta tyicuan ri ta cuahan chitya ca tuhun Sutu Mañi yo. Ta nducuhá ca ñu yihí cuenda ra. Ta tyicuan caa nyehé ñáyivi yoso cha cahnu tunyee iñi iyó chí ra.

²¹ Ta cha yaha tuhun ihya, ra Pablo natyaa ra cuhva cha cuhun ra ityi Macedonia, ta ityi Acaya. Yaha cuan ta cunuhu ra nya Jerusalén tyaá ra cuhva. Ta catyí ra vatyí yaha cuan ta cuñi chi cha cuhun ra nya ñuu Roma.

²² Tyicuan ta tachi ra chi uvi tahan ra tyinyee chi ra nya Macedonia, ra Timoteo ta ra Erasto. Soco ndoo maa ra suhva ca quivi ityi Asia cuan.

Nu naquiqui ñáyivi Éfeso síqui tuhun Nyoo

²³ Ta suri quivi cuan naquiqui ñáyivi ñuu Éfeso síqui tuhun Nyoo,

²⁴ vatyí noo ra cha nañí Demetrio sanaquiquí. Vatyí maa ra tuhvá ra saha tyiño chihin xuhun cuichin. Savahá ra vehe ñuhu nyihi nyoo Diana chihin xuhun cuichin cuan. Ta cuaha sahá ganaa ra chihin ra casahá tyiño chihin ra.

²⁵ Ta cana ra Demetrio cuan chi ra cha sahá tyiño chihin ra. Ta cana tucu ra chi ra cha casahá tyiño ñn ri tyiño cuan. Ta catyí ra chi ra:

—Nyoho ra tahan yo, chitó ndo vatyí chihin tyiño ihya iyó cha tyayí yo.

²⁶ Soco nyoho nyehé ndo ta chiñí ndo yoso caa sacuví ra Pablo ñuu yo Éfeso ihya, ta ñicahnu ityi Asia. Vatyí catyí ra tyi nyoo cha savahá ñáyivi ñima Nyoo cuví. Ta cuaha xaan ñáyivi nachino iñi sahá ra.

²⁷ Ta ña vaha cha sacuví ra vatyí ma quiyahvi ca xitohyo cha savahá yo. Ta ñin ri ma sacahnu ca ñáyivi chi nyoo Diana ta ma saha ca ñu ñáyivi vehe ñuhu ña, ta ña vaha tyicuan caa, vatyí ñaha cuan cahnu xaan cuví ña. Ta tandihí ñáyivi ityi Asia chihin ñu ñicahnu ñáyivi sacahnú ñu chi ña. Ta nu cuahan ca chi quivi ma sacahnu ca ñáyivi chi ña tatu chino iñi ñu cha cahán ra Pablo —catyí ra Demetrio.

²⁸ Ta cuhva cha cachiñi ra cha catyí ra, Xaan xaan cacuñí ra. Ta quichaha cacana cha ra ta cacatyí ra:

—Cahnu xaan cuví cu Diana, nyoo cuenda ñáyivi Éfeso ihya —catyí ra.

²⁹ Ta cutondo xiñi tandihí ñu ñuu cuan. Ta catiñ ñu chi ra Gayo, ta chi ra Aristarco, uvi ra Macedonia cha chicá noo chihin ra Pablo. Ta caxita quiñocho ra chi ra nyacua nya nu tuhva ñu candu ñn ri ñu.

³⁰ Ta ra Pablo cuñí ra quihvi ra nu nataca ñáyivi vatyí cahan ra chihin ñu. Soco ra hermano, ña chaha ra.

³¹ Ta tyicuan caa tucu suhva ra cuví tyiño ityi Asia, ra cuví amigo ra Pablo, tachí ra tyiño vatyí ña tahañ chi tyihi ra chi ra yucuan.

³² Ta nu ndu ñin ri ñu yucuan, suhva ñu caná chaa noo tuhun. Ta inga ñu caná chaa ñu inga tuhun. Vatyí naquiquí ñu. Ta cuaha xaan ñu cha ni ña chitó ñu ñáá tuhun cha natacá ñu.

³³ Tyicuan ta ñu Israel, tyatyño ñu chi noo ra cha nañí Alejandro na quita ra ityi nuu. Ta suhva ñu tayucú yucuan nacatyí ñu chi ra yoso caa cucahan ra. Tyicuan ta sacuvi ra seña chihin ndaha ra vatyí na taxi ri cuví ñu vatyí cuñí ra catyí ra vatyí ñahri cuatyí ñu Israel.

³⁴ Soco cuhva cha chito ñu vatyí ra Israel cuví ra, tandihí maa ñu cana chaa ñu. Ta chichi cha uvi hora caná chaa ñu, ta catyí ñu:

—Cahnu xaan cuví cu Diana nyoo cuenda ñu Éfeso —catyí ñu, caná chaa ñu.

³⁵ Tyicuan ta secretario ñuu cuan cuhva cha cuví sacutaxin ra ñáyivi, ta catyí ra:

—Nyoho tata ñuu Éfeso ihya. Tandihí ñáyivi chitó ñu vatyí nyaá siqui yo ñu Éfeso cha saha cumi yo vehe ñuhu cu Diana tyi cahnu xaan cuví ña. Ta cumí yo xitohyo ña cha cana cava ityi andivi.

³⁶ Ta yori cuví catyí tyi ña ndicha. Taxi ri ndo, ta ma cunyacuvi ri maa ndo tatu ña chitó ndo ñáá cha cuacunyacuvi ndo.

³⁷ Vatyí ra cha quichí nyaca ndo ihya ñahri cha suhu ra vehe ñuhu ndo. Ta ni ña cahañ ña vaha ra siqui nyoo cuenda ndo.

³⁸ Tatu ra Demetrio ta ra cha sahá tyiño chihin ra chicán ra cuatyí chaha noo ra, na cuhun ra nu nyaá juez. Cuví cacan ra cuatyí nuu ra cuan, ta maa ra cusandaa ra cuatyí cuan.

³⁹ Ta tatu inga tuhun chicán ndo, cuñí chi sacuví ndo nu nyicu ra cuví tyiño, tari cuhva catyí ley.

⁴⁰ Vatyí tatu coto gobiernu ta cana ra chi yo cha cuenda cha cuví ihya, ta ma ñihi yo tuhun cahan yo tatu ndacá tuhun ra chi yo ñáá cuenda naquiquí yo —catyí ra cuví secretario cuan.

⁴¹ Ta cha yaha catyí ra tuhun cuan catyí ra vatyí na cunuhu ñu nya vehe ñu.

20

Nuyahá ra Pablo ityi Macedonia ta cuahan ra Grecia

¹ Cha yaha tuhun cha naquiquí ñáyivi ñuu Éfeso cuan, cana ra Pablo chi tandihí ñu yihí cuenda Nyoo, vatyí cahan ra suhva nuu ñu ta cuhva ca ra tunyee iñi chi ñu. Vatyí maa ra chaa chi quivi cha cuhun ra inga ityi. Ta cahañ ra chihin ñu. Tyicuan ta cuahan ra Macedonia.

² Ta chahañ ra tandihí ityi cuan ta sanduní ca ra iñi tandihí ñu yihí cuenda ra Cristo cha iyó ityi cuan chihin tuhun cahañ ra. Tyicuan ta chaa ra ityi Grecia.

³ Ta yucuan ndoo ra uñi yoo. Ta cha nyaá ra cha cuaquehen ra barcu ta cuhun ra Siria, ta chito ra vatyí nducú ñáyivi Israel chi ra vatyí cahañi ñu chi ra. Yucuan chaha natyaa ra iñi ra cha cuhun ra chihin chaha ra ityi nu ñuhu ri. Ta nayaha ra inga chaha ityi Macedonia.

⁴ Ta cuahan ra Sópater, ra ñuu Berea chihin ra. Ta cuahan ra Aristarco ta ra Segundo, ta uvi tahan ra ihya, Tesalónica cuví ñuu ra. Ta cuahan ra Gayo, noo ra ñuu Derbe, ta ra Timoteo, ta uvi tahan ra ityi Asia, ra Tíquico ta ra Trófimo.

⁵ Ra hermano ihya cayaha ra ityi nuu ta canyatú ra chi ndi ñuu Troas.

⁶ Ta nyuhu nyatu ndi na yaha vico pascua nu tuhvá ñu Israel chachí ñu pan cha ñahri yuchan iya yihí. Tyicuan ta quita ndi ñuu Filipino chihin barcu. Ta nu cu ohon quivi ta natahan ndi chi ra cha cuahan ityi nuu nya ñuu Troas. Ta yucuan ndoo ndi ucha quivi.

Nu cahán ra Pablo tuhun Nyoo ñuu Troas

⁷ Ta cha timingu cuan ndu ñin ri ndi chihin ñu yihí cuenda Nyoo ñuu Troas cuan. Ta quivi cuan cuacachi ndi pan ta coho ndi vinu vatyí nicohon ñni ndi tyi chihí ra Cristo cha cuenda cuatyí yo. Ta ra Pablo cahán ra nuu ñu ta cuvi ora ñuu, vatyí cha nyaá cha cuhun ndi inga quivi cuan.

⁸ Canyicú ndi noo cuarto nu cu uñi piso. Ta ndichin xaan nu canyicú ndi chichi vehe cuan vatyí cuaha xaan ñuhu candil cayú.

⁹ Ta noo ra tyivaa cha nañi Eutico nyaá ra ventana tyasohó ra, soco ña cunyeer ra ñumahna vatyí ra Pablo, cha vehe xaan cahan ra. Quixí ra Eutico, ta ña chito ra canacava ra nya nu ñuhu. Ta nacoñehé ra chí ra soco cha chihí ra.

¹⁰ Tyicuan ta ra Pablo noo ra ta chaá ra nu catuví ra tyivaa cuan. Ta natyihí nundaha ra chí ra tyivaa cuan, ta catyí ra chí ndi hermano:

—Ma yuhvi ndo. Nyitó ra —catyí ra.

¹¹ Tyicuan ta nandaá tucu ra Pablo ta chachí ndi pan ta chihí ndi vinu cha cuenda Sutu Mañi yo. Tyicuan ta cahan ca ra Pablo tuhun Nyoo nyacua nya cundichin. Tyicuan ta cuahan ra.

¹² Ta ra tyivaa cuan nandoto ra ta cuanuhu ra nya vehe ra. Ta sii xaan nanduví cuñi ñu.

Nu quita ra Pablo ñuu Troas ta cuahan ra nya ñuu Mileto

¹³ Nyuhu yaha ndi ityi nuu ta cuahan ndi chihin barcu nya ñuu Asón. Vatyí yucuan cuñihi tahan ndi chihin ra Pablo, vatyí tyicuan caa sandaa maa ndi tyiño chihin ra. Vatyí maa ra cuñi ra cuhun ra ityi nu ñuhú ri chihin chaha ra.

¹⁴ Ta cuhva cha nañihí tahan ndi chihin ra nya ñuu Asón cuan, quihví ra chichi barcu chihin ndi ta cuahan ndi nya ñuu Mitilene.

¹⁵ Quita ndi yucuan ta yaha ndi ityi nuu noo ñuhú luhlu cha nañi Quío nyaá mahñu tyañuhu. Ta cha inga

quivi cuan chaá ndi inga ñuhú luhlu cha nañi Samos. Yaha ndi yucuan ta nyitatu ndi ñuu Trogilio. Ta cha inga quivi chaá ndi nya ñuu Mileto.

¹⁶ Tyicuan caa cuví vatyí ra Pablo ña cuñi ra cunyaa ca ra cuaha quivi ityi Asia. Ña cuñi ra cuhun ra Éfeso vatyí numi ri cuñi ra chaá ra ñuu Jerusalén, vatyí tatu cuhva chí cuhva cunyaa ra quivi vico Pentecostés cha sanducahnú ñu Israel.

Nu cahán ra Pablo chihin ra ñuu Éfeso vatyí cuhun ra ta ma quichi ca ra

¹⁷ Ta cuhva cha nyicu ndi ñuu Mileto, cana ra Pablo chí ra yihí ndaha chí ñu yihí cuenda Nyoo Éfeso.

¹⁸ Ta cuhva cha chaá coyo ra, catyí ra tyehe caa chí ra:

—Maa ndo chitó ndo yoso caa cuhva chica noi nyata quivi xihna ri cha chaj Asia ihya.

¹⁹ Tandihí quivi cha chinyaj chihin ndo ta sacuví tyiño nuu Sutu Mañi yo chihin cha nduquí cuhva cha ma cahnú sahi chí, vasi cuaha tindoho chihin cha cuaha tucuihya ñni. Ta cuaha tindoho quichi siqui sacuví ñayivi Israel.

²⁰ Soco ña sandihí cha cahán noi tuhun Nyoo nuu ndo. Vatyí ihya cuví tandihí cha chiñuhú chí ndo tacuhva coo vaha ndo. Ta sañahi tuhun Nyoo chí ndo nu ndu ñin ri ndo ta nya vehe ndo ñandihí.

²¹ Ta sañahi tuhun ihya chí ñu Israel ta chí ñu cha ñima ñu Israel cuví. Sañahi chí ñu na nasama ñu cuhva iyó ñu nuu Nyoo ta nachino ñni ñu chí Sutu Mañi yo Jesucristo.

²² Ta vityin cuhin nya ñuu Jerusalén vatyí maa Tatyí Ii catyí. Ta ña chité ñáá cha cucuvi chí yucuan.

²³ Soco noo ri cha chité vatyí tandihí ri nu cuahín Tatyí Ii catyí chí vatyí nyatú vehe caa chí, ta cuaha tindoho ñandihí.

²⁴ Soco ni noo ihya ta ña chicá xiñi. Ta ni ñayivi ta ña vale cha cuenda mai, tacuhva vatyí chihin tusi ñni ta cuví sañihi sahatyiñe tyiño cha chaha Sutu Mañi yo Jesús chí, cha sañahi tuhun vaha yoso cuhva cuñi Nyoo chí yo.

25 Ta vityin chitó vahi vatyí tandihí nyoho cha cahín tuhun Nyoo chihin ndo, ma nyehe ca maa ndo chii.

26 Yucuan chaha cuñí catyí chi ndo vityin vatyí ñahri ca cuatyí yuhu cha cuenda ni noo nyoho.

27 Vatyí chihin cha niñi cuñí ta cahin tuhun Nyoo chihin ndo ta ñahri cha tixehí.

28 Yucuan chaha saha ndo cuenda chi ndo. Ta saha tucu ndo cuenda chi tandihí ñu yihí cuenda Nyoo. Vatyí maa Tatyí Ii tyatyíño chi ndo vatyí saha cuenda ndo chi ñáyivi iyó vehe ñuhu Sutu Mañi yo. Maa ra satá ra chi ñu chihin niñi ra.

29 Vatyí chité vatyí quívi cuhin, cuquichi inga ra. Ta cuñi ra satívi ra chi ñu yihí cuenda Sutu Mañi yo. Tari lobo xaan cha chahñi chi mbee, tyicuan caa cuquichi ra cuan satívi ra añima ndo.

30 Ta suri nu nyicu ndo, cundicuita suhva ra. Ta cusañaha ra cha ña ndicha tacuhva cunyicon ndo chi ra.

31 Yucuan chaha saha vaha ndo cuenda. Niñi chihon iñi ndo vatyí chichi cha uñi cuiya ña sandihí cha cahín tuhun Nyoo nuu ndo. Cha ñicahñu ta cha cuaa cahín chihin noo noo nyoho, ta chihin cha cuihya iñi coto sandihí ndo tuhun Nyoo.

32 Ta vityin nyoho yañi, natyaí chi ndo ndaha Nyoo. Saha ndo cuenda ndi tuhun cahan ra chihin yo. Sacotó ra chi yo tyí cuñí xaan ra chi yo. Ta yucuan sandunyeé xaan chi iñi yo tacuhva cuvi yo ñáyivi yihí vaha cuenda ra chihin tandihí inga ñu cha nacuhva cuenda ñu chi ñu chi ra.

33 Yuhu ña nyiyó iñi ni minoo cha iyó chi ndo. Ni ri xuhun ndo, ni ri sahma ndo.

34 Nyoho chitó vaha ndo vatyí sahá tyiño xain chihin ndahi tacuhva ñihi cha chiñuhú chii chihin ra chicá noo chihin.

35 Tyicuan ri sañahí chi ndo vatyí cuñí chi cha saha tyiño ndo ta tyinyee ndo chi ñu iyó cha chiñuhu chi. Ta niñi chihon iñi ndo tuhun cahan Sutu Mañi yo Jesús nu catyí ra tyehe caa:

“Si ca cuñi noo ñáyivi ñu chahá, ta ñima ca ñu ita iñi”, catyí Sutu Mañi yo.

36 Cha yaha cha catyí ra Pablo tuhun ihya, chicuiñi chiti ra. Ta chican tahvi ra chihin tandihí ñu.

37 Ta tandihí ñu cuihya xaan nduvi iñi ñu ta chacu xaan ñu. Ta nanumi ñu chi ra.

38 Vatyí ra Pablo catyí ra tyí cuhun ra inga ñuu ta ma cuhun ca ra nu nyicu ñu. Tyicuan ta chinyaca ñu chi ra nyacua nya nu quihvi ra chichi barcu.

21

Nu cuahan ra Pablo ñuu Jerusalén

1 Tyicuan ta sandoo ndi chi ra hermano ta quihvi ndi chichi barcu. Ta cuahan ndi ñn ndoo ityi ri nya Cos noo ñuhú luhlu mahñu tyañuhu. Ta cha inga quívi cha ndi nya Rodas inga ñuhú luhlu ri. Yucuan ta cuahan ndi nya Pátara.

2 Ta ñuu Pátara cuan nañihí ndi nonga barcu cha cuahan nya Fenicia. Ta quihvi ndi chichi inga barcu cuan ta cuahan ndi.

3 Ta cha cuahan ndi nyehe ndi ñuhú Chipre chiyo satyin ndi. Ta yaha ri ndi cuahan ndi ityi nu ca, ityi Siria. Ta cha ndi nya ñuu Tiro vatyí yucuan cuatava ra carga cha nyisó barcu cuan.

4 Ta cha nañihí ndi chi ñu yihí cuenda Nyoo ñuu cuan, ndoo ndi chihin ñu ucha quívi. Ta catyí ñu chi ra Pablo vatyí ña tahán chi cha cuhun ra Jerusalén vatyí tyicuan caa sañaha Tatyí Ii chi ñu.

5 Soco cha ndihí ucha quívi cuan quita ndi ñuu cuan. Ta nu cuaquita ndi tandihí ra hermano chihin ñasihi ra ta sehe ra chinyaca ñu chi ndi nyacua nya ityi chata ñuu. Ta nu ñiti yuhu tyañuhu cuan nicuiñi chiti ndi, ta chican tahvi ndi chi Nyoo.

6 Tyicuan ta nanumi ndi chi tahan ndi. Tyicuan ta quihvi ndi chichi barcu. Ta maa ñu cuanuhu coyo ñu vehe ñu.

⁷ Ta quita ndi ñuu Tiro cuan ta cuahan ndi nya ñuu Tolemaida. Ta yucuan chaha ndi nocumi chi ñu hermano. Ta ndoo ndi chihin ñu noo quivi.

⁸ Ta cha inga quivi quita ndi ta cuahan ndi ñuu Cesarea. Ta yucuan chahan ndi vehe ra Felipe ra cha sacotó xaan chi ñáyivi yoso caa sacacu Nyoo aña ñu. Cuví ra noo ra chichi cha ucha tahan ra nyisó tyiño vehe ñuhu. Ta yucuan ndoo ndi chihin ra.

⁹ Ra Felipe, iyó cumi tahan ñu tyivaa sehe ra cha ta tandaha ca. Ta tuhvá ñu chahá cuenda ñu tuhun cahán Nyoo. O cuvi chi cuan sahá ñu profetizar.

¹⁰ Ta cha cuaha ri quivi cha cha ndi yucuan, tyicuan ta cha noo profeta Nyoo cha nañi Agabo. Quichi ra ityi Judea.

¹¹ Quichi nyehe ra nu nyicu ndi. Ta quehen ra sincho ra Pablo, ta cháhñi ra chaha ra ta ndaha ra, ta catyí ra:

—Tatyí Ii Nyoo catyí chii vatyí tyehe caa cunuhñi chitoho sincho ihya nya Jerusalén. Ta cucuhva cuenda ñáyivi Israel chi ra chi ra inga ñuu —catyí ra Agabo.

¹² Cha chiñi ndi tuhun ihya, nyuhu ta ra ñuu Cesarea chacú ndahvi ndi nuu ra Pablo vatyí ma cuhun ra Jerusalén.

¹³ Soco ra Pablo catyí ra:

—¿Ñáá tuhun chacú ndo ta sanducuihyá ndo iñi? Yuhu ñahri cuende. Ñima cha cunuhñi ri, vasi cahñi ra chii soco cha cuenda Sutu Mañi yo Jesús —catyí ra chi ndi.

¹⁴ Ta cha nyehe ndi tyi ña cuvi chasaha ndi chi ra, saña ndi. Ta catyí ndi:

—Na cuvi maa cuhva cuñi maa Sutu Mañi yo.

¹⁵ Cha yaha tuhun ihya sanduvaha ndi chi ndi ta cuahan ndi nya Jerusalén.

¹⁶ Ta cuahan suhva ra Cesarea ra yihí cuenda ra Cristo chihin ndi. Ta cuahan tucu noo ra ñuhú Chipre. Mnasón nañi ra. Cuaha xaan cuiya chinó iñi ra chi ra Cristo. Maa ra

chinyaca ra chi ndi nya vehe ra cha nyaá Jerusalén vatyí yucuan cunyaa ndi.

Nu cuanyehe ra Pablo nu nyaá ra Jacobo

¹⁷ Cuhva cha cha ndi Jerusalén, ñu yihí cuenda ra Cristo chihin cha sii cuñi ñu cahán ñu chihin ndi.

¹⁸ Ta inga quivi cuan cuahan ndi chihin ra Pablo cuanyehe ndi nu nyaá ra Jacobo. Ta yucuan nyicú tucu tandihí ra yihí ndaha vehe ñuhu.

¹⁹ Chaha ra Pablo nocumi chi ra. Yaha cuan ta nacatyí ra tahan tahan ri tuhun yoso caa chotyíño Nyoo chi ra nu cahan ra tuhun Nyoo chihin ñu cha ñima ñu Israel cuví.

²⁰ Cuhva cha cachiñi ñu tuhun ihya, casacahnu ñu chi Nyoo, ta catyí ñu chi ra Pablo:

—Vaha yañi yo, soco cha nyehun vatyí cuaha xaan mil ñu Israel chinó iñi ñu chi ra Cristo. Ta tandihí ñu catyí ñu vatyí ñiñi cha cunyicon yo ley ra Moisés.

²¹ Ta ñihí ñu tuhun vatyí yoho sañahún chi tandihí ñu Israel cha iyó inga ñuu vatyí ma quichaha ca ñu ley cha sañaha ra Moisés, ta catyún chi ñu vatyí ña tahán chi sacuvi ñu costumbre circuncisión chihin cha lee sehe ñu, ta ni ma sacuvi ca ñu costumbre chahnu yo.

²² ¿Yoso caa sacuvi yo vityin? Vatyí ñáyivi cuañihi ñu tuhun tyi chaun ihya.

²³ Vaha taxin ca cha sacuvun tyehe caa. Ihya iyó cumi tahan rayi cha nyaá sacuvi ra noo cha tyaa ra cuhva tyi sacuvi ra nuu Nyoo.

²⁴ Cuahan chihin ra na ndundiun nuu Nyoo chihin ra. Ta yoho tyiyahvun cha tahán chi tyiyahvi ra. Tyicuan ta maa ra cuvi satya ndi xiñi ra cuhva catyí ley. Ta cha sacuvun tyicuan caa ta coto tandihí ñáyivi vatyí ña ndicha cha cahán ñu sicun, soco cunyehe ñu vatyí quichahá tucu yoho ley ra Moisés.

²⁵ Ta cha cuenda ñu cha ñima ñu Israel cuví, ta nachinó iñi ñu tuhun Nyoo, cha sacuhun ndi tutu chi ñu,

ta catyí ndi chi ñu vatyí ña tahán chi caca xiñi ñu tuhun ihya. Soco noo cha ma cachi ñu coño cha chahá ñáyivi chi xitohyo. Ni ma cachi ñu niñi ni coño quití cha cava ñu sucun ta ña chati niñi. Ta ni noo ñu ta ma coo ñusihi o rayi chi ñu tatu ñima ñasihi o yi ñu cuví —catyí ra chahnu vehe ñuhu chi ra Pablo.

Nu nacandá ñu Israel siqui ra Pablo

²⁶ Tyicuan ta tuví inga quivi ta cuahan ra Pablo chihin ndi cumi tahan ra cuan. Ta sandundi ra chi ra nuu Nyoo in ri chihin ra cuan. Tyicuan ta quihvi ra chichi vehe ñuhu cahnu vatyí sacoto ra chi tata sutu ama cundihi cha ucha quivi cha ndundi ndi cumi tahan ra cuan, ta cuacuhva ra ofrenda cha cuenda noo noo ra.

²⁷ Soco cha cuñi cuii ri ndihi ucha quivi cuan, ta suhva ra Israel cha quichi nya Asia canyehe ra chi ra Pablo chichi vehe ñuhu. Ta casanaquiqui ra chi tandihi ñáyivi, ta catin ra chi ra Pablo.

²⁸ Ta cacanachaá ra ta cacatyí ra:

—Nyoho ñáyivi Israel, tyinyee ndo chi ndi. Ican ra ihya cuví ra cha chicá noo tandihi ri ityi. Ta sañahá ra chi tandihi ñáyivi. Catyí ra vatyí cha ñima ri tuhun cuví yo ñu Israel. Ta catyí ra tyi ña vaha ley cha tyaa ra Moisés, ta ña vaha vehe ñuhu ihya. Ta sin ri vityin tyihi ra chi suhva ra Grecia chichi vehe ñuhu sativi ra nu ii ihya —catyí ra canachaá ra.

²⁹ Tyehe caa cacatyí ra vatyí ta ityi chata ca canyehe ra chi ra Pablo chichi ñuu, chicá noo ra chihin ra Trófimo, noo ra ñuu Éfeso. Ta cacuñi maa ra vatyí ra Pablo chinyaca chi ra chichi vehe ñuhu.

³⁰ Ta tandihi ri ñáyivi ñuu naquiqui ñu. Ta ñáyivi chinó vavaha ñu vachi coyo ñu. Tyicuan ta catin ñu chi ra Pablo. Ta caxita quiñoho ñu chi ra nya ityi chata vehe ñuhu, ta numi ri nacasi ñu yuvehe.

³¹ Cha cuñi ñu cahni ñu chi ra, ta cha tyiño chi comandante cuenda sindaro vatyí tandihi ñu Jerusalén iyó xaan naquiquí.

³² Tyicuan ta comandante cuan sandu in ri ra capitán ta sindaro. Ta cachino ra cuahan coyo ra nu nyicú ñáyivi. Cuhva cha nanyehe ñu chi comandante chihin sindaro, sandihi ñu cha cañi ñu chi ra Pablo.

³³ Tyicuan ta tuhva comandante nu nyaá ra Pablo. Ta tachi ra tyiño natin sindaro chi ra, ta chahni ra chi ra chihin uvi tahan cadena. Yahá cuan ta ndaca tuhun ra chi ra yóo ra cuví ra, ta ñaa cha sacuvi ra.

³⁴ Soco ñáyivi sin sin tuhun canachaá ñu. Ta comandante cuan ña cutuñi maa iñi ra cha cuenda cha quiñi cuvaa ñu. Ta tachi ra cha cunyaca sindaro chi ra Pablo nya cuartel.

³⁵ Cuhva cha cachaá ra nu cuayi yuvehe cuartel cuan, quiñi xaan nanduví ñáyivi ta ña chahá ca ñu caca ra Pablo. Yucuan chaha catyaa soco sindaro cuan chi ra.

³⁶ Vatyí tandihi ñu nyicón ñu chi ra, ta canachaá ñu ta catyí ñu:

—¡Cahni ndo chi ra! —cacatyí ñu.

Nu sacacú ra Pablo chi ra nuu ñáyivi

³⁷ Cuhva cha cuatyihí ra chi ra Pablo chichi cuartel, ta quichaha catyí ra chi comandante:

—¿Atu cuhvon cha catyí noo tuhun chuun? —catyí ra chi ra.

Ta comandante cuan catyí ra:

—¿Atu cuví cahún griego?

³⁸ Tu tyicuan caa, ñima yoho cuví ra ñuu Egipto cha quichi quivi cuan ta sacañi tahan ra chi ñáyivi siqui gobiernu ta chinyaca ra chi cumi mil tahan ñáyivi ityi ñuhu ityi —catyí comandante cuan chi ra Pablo.

³⁹ Tyicuan ta ra Pablo catyí ra chi ra:

—Yuhu noo ra Israel cuví ta caqui noo ñuu cha nañi Tarso cha cuví minoo ñuu cahnu ityi Cilicia. Soco saha noo tumañi iñi chii vatyí cuhvon nacahin chiin chihin ñáyivi —catyí ra Pablo chi comandante cuan.

⁴⁰ Tyicuan ta chaha comandante cuan permiso chi ra. Tyicuan ta nicuinanyaa ra nu cuayi ta chaha ra noo seña chi ñu na cutaxin ñu.

Ta cahán ra chihin sahan hebreo, ta catyí ra:

22

¹—Nyoho tata, ta nyoho yañi, cuiñi ndo cha catyí chi ndo tyi coto ndo vatyi yuhu ñahri cuatyí —catyí ra Pablo chi ñáyivi cuan.

² Cha cachiñi ñu vatyi cahán ra chihin ñu chihin sahan hebreo, taxi ri cacuvi ñu. Ta ra Pablo catyí ra:

³—Yuhu ra Israel cuví tari maa ndo. Ta caqui ñuu Tarso ityi Cilia. Soco Jerusalén ihya chahni. Ta ra Gamaliel sañaha chii tandihi maa cuhva yoso caa quichahi ley sutu chahnu yo. Ta tyicuan ri nduqui cuhva sacuví tyiño nuu Nyoo chihin cha tandihi añime, tari maa cuhva nyacuví nyoho quivi vityin.

⁴Yuhu, nu quichi chi chica nyiquen ta sata si iñi chi ñu yihí cuenda ra Cristo. Ta nacuhva cuende chi ñu na cacahni ra chi ñu. Ta tyihí chi ñu chichi vehe caa, rayi ta ñusihí.

⁵Ra cuví nuu chi tata sutu chihin ra cacuví mandoñi, cacuví ra cha ndaa vatyi ican ra chaha tutu vatyi cuvi tiin chi yañi yo, ra yihí cuenda ra Cristo ñuu Damasco. Chahin nyicuan chinanduqui chi ñu chinó iñi chi ra Cristo, vatyi tacuhva cunuhni ñu chihin cadena, ta quichi nyaque chi ñu nya Jerusalén ihya vatyi cutachi tuñi ra chahnu chi ñu.

Nu nacatyí ra Pablo yoso caa nanduvi ra cuenda ra Cristo (Hch. 9.1-19; 26.12-18)

⁶Soco cuhva cha cuahin ityi cha cuachaa ndi Damasco, ñáá cuhva ora cuví cuan. Ta sana iñi ta ndundichin nicachico nu cuahin chihin noo nduva ñuhu cha quichi ityi andivi.

⁷Tyicuan ta nduve nu ñuhú. Yaha cuan ta chiñi noo ndusu cha catyí chii: “Saulo, Saulo, ¿ñáá tuhun cha chicá nyicon chii tyehe caa?” catyí ndusu cuan chii.

⁸Tyicuan ta ndacá tuhun chi ra ta catyí: “¿Yóó yoho tata?” Ta catyí ra chii: “Yuhu cuví ra Jesús, ra ñuu Nazaret, ra chicá nyicon chi”, catyí ra.

⁹Ndii ra cha cuahan coyo chihin canyehe ra ñuhu cuan, ta nayuhvi ra. Soco ña cachiñi ra ndusu ra cha cahán chihin.

¹⁰Tyicuan ta quichahá catyí yuhu chi ra: “Sutu Mañi yuhu, ¿ñáá cha tahán chi sacuvi?” Ta catyí ra chii: “Ndicuita ta cuahan nya Damasco. Ta yucuan cucatyí noo ra chuun tandihi cha tahán chi sacuvun”, catyí Sutu Mañi yo chii.

¹¹Ta vatyi nducuai saha ñuhu cuan, ra tahin cayindahá ndahi ta cachinya ca ra chii nya Damasco.

¹²’Ta yucuan iyó noo ra cha nañi Ananías. Ta sacahnú xaan ra chi Nyoo cuhva catyí ley cha tyaa ra Moisés. Ta tandihi ñu Israel cha iyó Damasco catyí ñu vatyi vaha xaan ñáyivi cuví ra Ananías.

¹³Quichi nyehe ra cuan chii. Ta cuhva cha chaa ra, catyí ra chii: “Yañi Saulo, nanyehe inga chaha”, catyí ra chii. Ta caa cuhva ri cuan nanyehi. Ta cuví nyehi chi ra Ananías cuan.

¹⁴Ta catyí ra chii: “Nyoo cuenda sutu yo nacachi ra chuun nyata ityi chata ca, vatyi coton cuhva cuñi ra, ta nyehun chi ra Jesucristo vatyi vaha ra, ta cuiñun ndusu ra.

¹⁵Vatyi yoho cuacahun tuhun ra nuu tandihi ñáyivi. Cuanacatyun cha nyehun ta cha chiñun.

¹⁶Ta vityin, ma cuatu con. Ndicuita ta condutyon. Ta cañan tahvun chi Sutu Mañi yo tyi cuasandachi ra cuatyun”, catyí ra Ananías chii.

Nu nacatyí ra Pablo yoso caa chaha Nyoo tyiño chi ra vatyi cuhun ra inga ñuu cuahan ra tuhun ra Cristo

¹⁷Yaha cuan ta cuanuhin Jerusalén ta cuhva cha nachai, chahin vehe ñuhu cahnu chicacñan tahvi. Ta nyehi noo visión.

¹⁸Nyehi chi Sutu Mañi yo. Ta catyí ra chii: “Sanumi. Quita cha numi ri Jerusalén vatyi ma chino iñi ñu tuhun cha cuacahun”, catyí ra chii.

¹⁹Tyicuan ta quichaha catyí yuhu chi ra: “Sutu Mañi yuhu, maa ñu chitó ñu vatyi yuhu chahin tandihi vehe

ñuhu. Ta t̄in chi ñu chinó iñi chuun, ta tyih̄i chi ñu vehe caa ta cañi chi ñu.

²⁰ Ta quiv̄i chat̄i niñi ra Esteban ra cha cahan cuendon, yuhu ñandih̄i nyaí yucuan. Ta ndoj̄i vaha cha chahñi ñu chi ra. Ta sahadum̄i sahma ra cha cachahñi chi ra”, catȳi yuhu chi Sutu Mañi yo.

²¹ Tyicuan ta catȳi ra chii: “Cuahan, vatȳi tach̄i chuun nu cañi, nu nyicu ñu cha ñima ñu Israel cuví”, catȳi Sutu Mañi yo chii.

Nu nyaá ra Pablo ndaha ra comandante cuenda ñuu Roma

²² Ihya ri tyasohó ñu tuhun cahán ra Pablo. Tyicuan ta quichahá canachaá ñu ta catȳi ñu:

—¡Cahñi ndo chi ra chiña! Ña tahán chi coo ra ñayiv̄i —catȳi ñu.

²³ Ta canachaá ca ñu. Ta sacaá ñu sahma ñu. Ta sacaá ñu ñiyaca nu tatȳi cha cuenda cha xaan xaan cuñi ñu.

²⁴ Yucuan chaha comandante cuan catȳi ra na cutyih̄i sindaro chi ra chichi cuartel. Ta tach̄i ra tyiño na cañi ra chi ra, vatȳi cuñi ra cha quita cha ndaa ñáá tuhun cha canachaá ñáyiv̄i siqui ra cha tyicuan caa.

²⁵ Soco cha yaha cachahñi ra chi ra ta cuacañi ra chi ra, tyicuan ta ra Pablo nacatȳi ra chi capitán cha nanyaá yucuan:

—¿Atu iyó ityi chi nyoho cha cañi ndo chii? Vatȳi yuhu ra cuenda ñuu Roma cuví ta siin ri ta cutuñi ca chii nu juez —catȳi ra Pablo chi ra.

²⁶ Cuhva cha chiñi capitán cha cahan ra Pablo, chahan ra chisacoto ra chi comandante. Ta catȳi ra chi ra:

—Saha cuenda chuun chihin cha nyacuvún. Vatȳi ra cuan, ra cuenda ñuu Roma cuví ra —catȳi ra chi ra.

²⁷ Tyicuan ta comandante cuan cuahan ra nu nyaá ra Pablo. Ta ndacá tuhun ra chi ra tatu ndicha vatȳi ra cuenda ñuu Roma cuví ra. Ta ra Pablo catȳi ra vatȳi ican.

²⁸ Tyicuan ta catȳi comandante cuan chi ra:

—Yuhu cuaha xaan xuhun tyiyahv̄i ta nanduv̄i noo ra cuenda Roma.

Ta ra Pablo catȳi ra:

—Soco yuhu ra cuenda Roma cuví nyata caqui —catȳi ra.

²⁹ Ta tyicuan caa ta sindaro cha cuacañi chi ra canyaha ra ta cuahan coyo ra. Ta nyacua nya comandante ta nayuhv̄i ra cha cuenda cha chahñi ra chi ra chihin cadena. [Vatȳi cuatȳi cuví cha sacuví ra cha tyicuan caa chihin noo ra cuenda ñuu Roma.]

Nu nanyaá ra Pablo nu candu ñn ri ra Israel

³⁰ Tuv̄i inga quiv̄i ta comandante cuan cuñi ra coto ra ñáá cuatȳi tyaá ñu Israel chaha ra Pablo. Ta ndach̄i ra cadena cha nuñi ra. Ta tach̄i ra tyiño na ndu ñn ri ra cuví nuu chi tata sutu, ta tandih̄i ra cuenda junta. Tyicuan ta tav̄a ra chi ra Pablo vehe caa ta chinyaca ra chi ra nu iyó junta cuan.

23

¹ Ta ra Pablo nyehe ra chi tandih̄i ra chihin cha ña cahan nuu ra, ta catȳi ra chi ra:

—Nyoho ra yañi yo, nyacua nya quiv̄i ihya iyó vahi nuu Nyoo ta ñahri cha ña vaha sacuví nuu ra —catȳi ra Pablo.

² Tyicuan ta ra Ananías ra cuví nuu chi tata sutu tach̄i ra chi ra nyicú yatyin ri nu nyaá ra Pablo, na nacañi ra ndaha yuhu ra.

³ Soco ra Pablo nacañan ra nu cahán ra ta catȳi ra:

—¡Xihna ca chi maun cucañi Nyoo, vatȳi sahá xaun tyi ra vaha cuvún nyaún chiña! ¿atu cutuñi chii nuun tari cuhva catȳi ley? ¿Ñáá tuhun cha tachun nacañi ra chii? ta ñima tyicuan caa catȳi ley —catȳi ra Pablo.

⁴ Tyicuan ta ra canyicu yucuan catȳi ra chi ra:

—Ña vaha cha cahún chi ra cuví nuu chi tata sutu cuenda Nyoo —catȳi ra chi ra Pablo.

⁵ Tyicuan ta ra Pablo catȳi ra:

—Yañi yuhu, ña chite tatu ra cuví nuu chi tata sutu cuví ra. Vatȳi catȳi tuhun Nyoo tyi ma cahan ña vaha yo siqui ra cuví tyiño ñuu yo —catȳi ra.

⁶ Tyicuan ta tuv̄i iñi ra Pablo vatȳi suhva ra cuenda junta cuan, yih̄i ra

cuenda ityi ra cuví saduceo. Ta inga ra yihí ra cuenda ra cuví fariseo. Tyicuan ta cahan ra chihin cha ñihi ndusu ra ta catyí ra:

—Nyoho yañi, yuhu ra fariseo cuví tari suti. Ta cutuñi chi nuu ndo vatyí chinó ñhi tyi nandotó ñu chihi —catyí ra Pablo.

⁷ Cuhva cha catyí ra tuhun ihya, ra fariseo ta ra saduceo, quichaha candatuhun tahan ra suri chihin tahan maa ra, ta cacusiñ ra.

⁸ Vatyí ra saduceo catyí ra vatyí ña nandotó ndiyi. Ta ni yori ángel ta ni yori tatyí ña vaha iyó catyí ra. Soco ra fariseo chinó ñhi ra tandihí ihya.

⁹ Tandihí ra vaa ri ca cananduví ra. Ta ndicuita ra fariseo, ra sacuahá cuenda ley ra Moisés, ta catyí ra:

—Nyehe xihna ndo, ñahri cha ña vaha sacuví ra ihya. Soco tatu noo ángel cahan chihin ra, saha yo cuenda coto vaha siqui Nyoo cahan ña vaha yo —catyí ra.

¹⁰ Cha chiñi ra tuhun ihya, vaa ri ca cananduví ra. Nyacua nayuhví comandante cuan coto cahnya cuatyí ra chi ra Pablo. Yucuan chaha tachi ra tyiño na tava sindaro chi ra Pablo nu nyicú ra, ta cunanyaca ra chi ra nya cuartel.

¹¹ Ta cha cuaa cuan tuví Sutu Mañi yo nuu ra Pablo ta catyí ra chi ra:

—Sandunhi ñhun, Pablo. Vatyí tari cahun tuhin Jerusalén ihya, tyicuan caa tucu cucahan tucun nya ñuu Roma —catyí Sutu Mañi yo chi ra Pablo.

Nu tyaá ra Israel cuhva cahñi ra chi ra Pablo

¹² Cha inga quivi, suhva ra Israel catyihí tahan ra tuhun. Catyí ra vatyí ni ma cacachi ra, ni ma coho ra nyacua nya cahñi ra chi ra Pablo. Ta nya noo ra ma sacuvi tyicuan caa na sanaa Nyoo chi ra siqui ñuhu ñáyivi, cacatyí ra.

¹³ Yaha ca uvi xico ra catyihí tahan tuhun ihya nuu Nyoo.

¹⁴ Chahan coyo ra nu nyicu ra cuví nuu chi tata sutu ta ra cacuví mandoñi cuenda ñu Israel. Ta catyí ra chi ra:

—Nyuhu ñn ri tuhun cahan ndi nuu Nyoo vatyí ma cachi ndi ta ni ma coho ndi cha ni ri ca cha ma cahñi ndi chi ra Pablo. Ta na sanaa Nyoo chi ndi tatu ma sacuvi ndi tari cuhva catyí ndi.

¹⁵ Ta vityin nyoho sacuhun ndo tuhun chi comandante. Catyí ndo chi ra na quichi nyaca ra chi ra Pablo nuu ndo ityaan. Saha ndo tuhun vatyí cuasandaa vaha ndo tyiño, ta nyuhu cuatu tuhva ri ndi nu yahá ra ta cucahñi ndi chi ra —catyí ra chi ra.

¹⁶ Soco sehe cuhva ra Pablo chiñi cue cha cahan ra. Ta chahan cue chisacoto cue chi ra Pablo nya cuartel.

¹⁷ Tyicuan ta ra Pablo cana ra chi minoo capitán. Ta catyí ra chi ra:

—Cuanyaca chi ra cuehe luhlu ihya nuu comandante vatyí iyó noo tuhun cuñi cue sacoto cue chi ra —catyí ra Pablo chi ra.

¹⁸ Tyicuan ta chinyaca capitán cuan chi cue nuu comandante. Ta catyí ra chi ra:

—Ra Pablo cha ñohó vehe caa cana ra chii ta catyí ra chii vatyí quichi nyaque chi ra cuehe luhlu ihya vatyí cuñi cue cahan cue chuhun —catyí ra chi ra.

¹⁹ Tyicuan ta tin comandante ndaha ra cuehe luhlu cuan ta tava sin ra chi cue ta catyí ra chi cue:

—¿Ñáá túhun cuñún catyun chii?

²⁰ Ta ra cuehe luhlu cuan catyí cue chi ra:

—Ra Israel catyihí tahan vaha ra tuhun vatyí catyí ra chuun na sacuhun chi ra Pablo nu iyó junta tyaan. Vatyí casaha ri maa ra cha cuñi ra cha cutuñi vaha ca chi ra.

²¹ Soco ma chino ñhun chi ra vatyí yaha ca uvi xico tahan ra nyatú xehe chi ra ityi. Ta tyanaha ra chihin nuu Nyoo vatyí ma cachi ra ta ma coho ra nyacua nya cahñi ra chi ra Pablo. Ta tatu ña cuví cahñi ra chi ra, vaha taxín ca nacuvi noo noo maa ra na.

Ta vityin nyatú tuhva ra coto ra ñáa cucatyí maun —catyí cue.

²² Tyicuan ta catyí comandante chi ra cuehe luhlu cuan vatyi yori chihin cahán cue tuhun cha catyí cue chi ra. Yaha cuan ta natachí ra chi cue.

Nu cacu ra Pablo ndaha ra Israel ta cuahan ra nuu ra gobernador cha nañi Félix

²³ Tyicuan ta comandante cana ra chi uvi capitán, ta catyí ra chi ra:

—Sanduvaha ndo chi ndo vatyi cuhun ndo Cesarea cuhva caa in cha cha cuaa. Cuacuhun uvi ciento sindaro chihin chaha ra, ta uñi xico uchi ra chihin caballo, ta uvi ciento ra cuiso ra lanza.

²⁴ Sanduvaha ndo caballo coso ra Pablo. Ta saha cuenda vaha ndo chi ra ityi cuahan ndo na chaa vaha ra nu nyaa ra Félix gobernador —catyí comandante chi capitán cuan.

²⁵ Tyicuan ta tyaá ra noo tutu quindaha ra cuhun ra. Ta tuhun cha tyaá ra nu carta, ican cuví ihya:

²⁶ “Yuhu ra Claudio Lisias sacuhin noo carta ihya chi yoho, tata gobernador Félix, vatyi vaha ñáyivi cuvun. Ihya vachi nocumi chuun.

²⁷ ‘Ra Pablo ihya, cati in ra Israel chi ra. Ta cacuñi ra cacahni ra chi ra. Soco cuhva cha chite vatyi ra cuenda ñuu Roma cuví ra, chahin chihin sindaro ta sacaquí chi ra.

²⁸ Ta vatyi cuñi cote ñáa cuatyí tyaá ñu síqui ra, chinyaque chi ra nu iyó junta ra cacuví mandoñi ñu Israel.

²⁹ Soco cuenda ley ri maa ñu cuví. Ta cha cuenda ley yoó, ñahri cuatyí ra ta cahni yo chi ra. Ta ni ri ña tahán chi cohon ra vehe caa.

³⁰ Soco vatyi ñihí tuhun vatyi ra Israel canducu cahni ra chi ra, yucuan chaha tachí chi ra nuu yoho. Ta catyí tiquí chi ra cha tyaá cuatyí síqui ra, na cuhun ra nu nyaun na cacan ra cuatyí ra nuu maun”, catyí ra Claudio chi ra Félix nu tutu cha tyaá ra.

³¹ Tyicuan ta quehen sindaro chi ra Pablo tari cuhva catyí ra Claudio chi ra, ta chinyaca ra chi ra nya Antípatris suri maa cha cuaa cuan.

³² Cha inga quivi sindaro cha cuahan chihin chaha, canandichí coyo ra nya cuartel. Ta ra cha cayosó caballo cuahan coyo ca ra chihin ra Pablo.

³³ Ta cuhva cha chaá coyo ra ñuu Cesarea, cachaha ra carta cuan chi ra Félix, gobernador, ta cachaha cuenda ra chi ra Pablo chi ra ñandihí.

³⁴ Cha yaha cha sacuhá ra Félix carta cuan, quichaha ndacá tuhun ra chi ra Pablo nya ñuu ra. Ta cha chito ra vatyi ra Cilicia cuví ra

³⁵ ta catyí ra chi ra:

—Na quichi xihna ra tyaá cuatyí chahun. Tyicuan ta cusandai tyiñon —catyí ra chi ra.

Tyicuan ta tachí ra tyiño na casaha cumi sindaro chi ra nya vehe tyiño cha savaha ra Herodes ta cha naha.

24

Nu cutuñi chi ra Pablo nuu ra Félix

¹ Yaha ohon quivi ta ra Ananías, ra cuví nuu chi tata sutu, chaá ra ñuu Cesarea cuan chihin suhva ra cacuví mandoñi, ta chihin noo ra cahán chaha ñáyivi cha nañi Tértulo. Chaá coyo ra nuu ra gobernador Félix vatyi cacan ra cuatyí chaha ra Pablo.

² Tyicuan ta tachí ra Félix na quichi nyaca sindaro chi ra Pablo. Tyicuan ta quichaha chican ra Tértulo cuatyí chaha ra Pablo. Ta catyí ra chi ra Félix:

—Tyahvi nyoo chuun, tata gobernador. Vatyi taxi ri iyó ñuu ndi, ta vaha iyó ndi vatyi yindaha vahun ñuu ndi.

³ Nacuhvá xaan ndi tyahvi nyoo chi yoho tata Félix, vatyi yoho, vaha ñáyivi cuvún.

⁴ Soco ña cuñi sayangue chuun chihin cha cuaha tuhun cahin, yucuan chaha chiquén noo tumañi iñi chuun na cuiñun suhva tuhun cuacahan ndi.

⁵ Vatyi chitó ndi tyi rayi ihya ñima ra vaha cuví ra, noo cuehe cuví ra. Ta tandihí ri ityi sanaquiquí ra chi ñu Israel. Ta ican ra cuví xiñi noo ityi ñáyivi nyicón chi ra Jesús ra ñuu Nazaret.

⁶ Nyacua cuñi ra sacuvi ra noo cha ña tahán chi vatyi ña sahá ra ñáyivi

vehe ñuhu cahnu. Ta nyuhu t̄in ndi chi ra, tacuhva tachi tuñi ndi chi ra tari cuhva ley maa ndi.

⁷ Soco comandante Licias chas̄i ri ra ta chihin cuaha fuerza ta tinyaā ra chi ra chi ndi.

⁸ Ta catyí ra vatyí tatu cuñí ndi cacan ndi cuatyí chaha ra, cuñí chi cha cacan ndi nuu maun. Nyehe maun. Sanahmon chi ra ta coton tyi ndicha cha catyí ndi —catyí ra Tértulo.

⁹ Tyicuan caa tucu ra Israel cha canyicu yucuan, catyí ra vatyí ndicha tandih̄i tuhun cahan ra Tértulo.

¹⁰ Tyicuan ta ra Félix savahā ra seña chi ra Pablo vatyí nacahan ra. Ta ra Pablo quichaha catyí ra:

—Chité tyi cha cuaha xaan cuiya nyacá ñahun ñuu ihya. Ta yucuan chaha sī vavaha cuñí vatyí nuu maun cuacutuñi chi yuhu vityin.

¹¹ Tatu ndaca tuhun cuacoton tyi cha iyó ri noo uchi uvi quiv̄i cha chah̄in Jerusalén. Chah̄in yucuan vatyí sacahni chi Nyoo.

¹² Ta yori chihin cuv̄i yuhi. Ni ña sanaquiquī chi ñáyiv̄i chichi vehe ñuhu cahnu. Ñahri maa sacuv̄i, ni ri chichi vehe ñuhu, ni ri chichi ñuu.

¹³ Ta cuatyí cha tyaá ra ihya siqui, ña ndicha maa.

¹⁴ Soco noo cha catyí chi ndo vityin vatyí yuhu sacahni chi Nyoo cha sacahnū sutu chahni. Sacahni chi ra cuhva sañahá ra Jesucristo. Ta catyí maa ra ihya tyi ña vaha. Soco yuhu chinó iñi ndī maa tuhun cha nyaá nu libru ley cha tyaá ra Moisés. Ta chinó iñi tandih̄i tuhun catyaā ra profeta cuenda Nyoo ñandih̄i.

¹⁵ Ta suri chinó iñi vatyí Nyoo cusanandoto ra ñáyiv̄i chih̄i, ñu vaha ta ñu quiñi iyó, tari chinó iñi tucu maa ra ihya.

¹⁶ Ta yucuan chaha tyicuan ri nduquí cuhva cha cachi coí nuu Nyoo, ta nuu ñáyiv̄i ñandih̄i.

¹⁷ 'Cuaha cuiya chica noj inga ityi. Yahā cuan ta cuanuh̄i nya Jerusalén ñui vatyí nacuhva cuende xuhun chi ñu ndahvi ñu yih̄i cuenda Nyoo, ta vatyí cuhve noo cha cuhve chi Nyoo.

¹⁸ Yuhu tyicuan caa sacuví chichi vehe ñuhu cahnu, ta suhva ra Israel ityi Asia, nyehe ra chii yucuan cha yahā cha sandundī chii nuu Nyoo cuhva catyí maa nu ley ndi. Soco ña cuaha ñáyiv̄i nyicu, ta ni ña naquiquī ñu.

¹⁹ Ican ra cha nyehē chii cuan, cuñí chi cha quichi ra ta cuhva ra cuenda tatu iyó cha sacuv̄i.

²⁰ O nacatyí maa ra cha canyicu ihya tatu nañih̄i ra cuatyí yuhu quiv̄i cutuñī chii nuu ra nu chiyō junta ra cacuví nuu chi ñu Israel.

²¹ O vasī cuví chi cha cuenda noo ri tuhun cah̄in chihin nuu ra nyicú junta cuan tyehe caa: “Nyoho nducú ndo cuatyí chahi cha cuenda tyi chinó iñi cha nandotó ñáyiv̄i chih̄i” —catyí ra Pablo.

²² Ta ra Félix chitó vaha ra yoso caa cuahan tuhun ñu nyicón chi ra Cristo. Ta catyí ra chi ra canyicu cuan:

—Vaha ri vityin. Na quichi xihna comandante Lisias. Tyicuan ta cusandai tuhun ndo —catyí ra.

²³ Tyicuan ta tach̄i ra Félix chi capitán na cunatyih̄i ra chi ra Pablo vehe caa. Soco ma ñihi xaan saha cumi ra chi ra. Ta nā cuhva ra cuhun ra tahan ra nu ñohó ra, ta cahan ra chihin ra.

²⁴ Yahā suhva quiv̄i ta nachaā ra Félix inga chaha chihin cu Drusila ñasih̄i ra. Ta cuví ña ñaha Israel. Ta tach̄i ra na quichi ra Pablo vatyí cuñí ñu tyasoho ñu yoso caa tuhun cha chinó iñi ra chi ra Jesucristo.

²⁵ Ta ra Pablo cah̄an ra tuhun yoso caa tahán chi sacuvi yo cha vaha, yoso caa cunyaca ñaha maa yo chi yo ta ma sacuvi yo cha quiñi caa. Ta cah̄an tucu ra yoso caa cucutuñi chi yo nuu Nyoo quiv̄i tahan chi. Ta ra Félix yuhv̄i xaan ra cuv̄i, ta catyí ra chi ra:

—Cuah̄an vityin. Ta na nanuña xihne, ta cana mai chuun inga chaha —catyí ra chi ra.

²⁶ Ta ra Félix cuñí maa ra tyi ra Pablo cucuhva ra xuhun chi ra, tacuhva vatyí numi ri saña ra chi ra.

Yucuan chaha vatyí tyito tyito ri cana ra chi ra, vatyí ndatuhun ra chihin ra.

²⁷ Uvi cuiya yaha, tyicuan ta nicunyaa ra Porcio Festo cuví ra gobernador tyiño nuu ra Felix. Ta ra Felix cuñí ra cuvaha ra nuu ra Israel ta sandoo ra chi ra Pablo vehe caa.

25

Nu cutuñí chi ra Pablo nuu ra Festo

¹ Tyicuan ta cha cu uñi quiví cha cuví ra Festo tyiño, quitá ra ñuu Cesarea cuan ta cuahan ra nya ñuu Jerusalén.

² Chaa ra Jerusalén, tyicuan ta chaa coyo ra cuví nuu chi tata sutu ta ra cuví tyiño ñu Israel ta cachican ra cuatyí chaha ra Pablo.

³ Ta chican ra noo tumañi ñi cahnu chi ra Festo. Cuñí ra vatyí tachi ra Festo tyiño na quichi nyaca sindaro chi ra Pablo nya Jerusalén. Vatyí maa ra cuñí ra cahñi ra chi ra ityi vachi ri ra.

⁴ Soco ra Festo nacahan ra, ta catyí ra:

—Ra Pablo ñohó ra vehe caa nya Cesarea. Ta yuhu tyaií cuhva cha cunuhi yucuan cha numi ri.

⁵ Yucuan chaha, nyoho cha cuví ndo tyiño ñuu ihya, cuhun maa ndo chihin. Tyicuan ta cuvi cacan ndo cuatyí chaha ra tatu iyó cha sacuví ra —catyí ra Festo chi ra.

⁶ Uña o uchi ri quiví chi nyaa ra Festo Jerusalén, ta cuanuhu ra Cesarea. Ta cha inga quiví chaa ra chichi vehe tyiño ra vatyí cutuñi chi ra ca iyó cuatyí nuu ra. Tyicuan ta cana ra chi ra Pablo.

⁷ Cuhva cha quihví ra Pablo, catuhva ra Israel cha quichi coyo nya Jerusalén, ta quichaha catyaa ra cuatyí cahnu siqui ra. Soco ñahri maa cha ndaa catava ra.

⁸ Tyicuan ta cahan ra Pablo ta catyí ra:

—Yuhu ni noo cuatyí ta sacuvi que, ni siqui ley ñu Israel, ni siqui vehe ñuhu cahnu Jerusalén, ni siqui rey cahnu Roma —catyí ra.

⁹ Soco vatyí cuñí ra Festo ndoo vaha ra chihin ra Israel, ndacá tuhun ra chi ra Pablo:

—¿Atu cuñún cuhun Jerusalén vatyí sandaí tyiñon nyicuan? —catyí ra chi ra.

¹⁰ Ta ra Pablo catyí ra:

—Cha nyaí nu maun. Ta maun cuví ra cuví tyiño cuenda rey cahnu Roma. Ihya cuví nu tahán chi cutuñi chii, vatyí ra cuenda ñuu Roma cuví. Ta chitó vahun tyi ñahri maa sacuví chi ñu Israel.

¹¹ Tatu sacuví noo cuatyí cahnu cha tahán chi cahñi ndo chii, ma nduqui cuhva caqui. Soco tatu ña ndicha tuhun cha cahán ra Israel ihya, yori cha iyó ityi chii cha cuhva cuenda chii chi ra cuñí cahñi chii. Chiquén vatyí cuhin nuu rey cahnu vatyí cutuñi chii nuu maa ra —catyí ra Pablo chi ra Festo.

¹² Tyicuan ta ra Festo cha yaha cha cahan tahan ra chihin ra tyinyeé chi ra chihin tyiño, ta catyí ra chi ra Pablo:

—Chicón cha cutuñi chuun nuu rey cahnu. Vaha. Cua cuhun nuu maa ra —catyí ra chi ra.

Nu nacatyí ra Festo tuhun ra Pablo chi ra Agripa

¹³ Yaha suhva quiví, tyicuan ta chaa rey Agripa chihin cu Berenice nya Cesarea, vatyí cuacuhva ñu nocumi chi ra Festo.

¹⁴ Quita suhva quiví chinyicu ñu yucuan, ta nacatyí ra Festo tuhun ra Pablo chi rey. Ta catyí ra:

—Iyó noo rayí ihya cha sandoo ra Félix vehe caa.

¹⁵ Ta cha chahin Jerusalén, ra cuví nuu chi tata sutu, ta ra cacuví mandoñi ñu Israel chaha cuenda ra noo tutu cuatyí ra, ta chicán ñu na cúvi ra.

¹⁶ Ta catyí yuhu chi tandihí ra vatyí ña tuhvá ra cuví tyiño cuenda Roma chahñi chi noo ñáyiví tatu ta cahan tahan ca ñu ta nducu ñu cuhva sacacu ñu chi ñu.

¹⁷ Yucuan chaha, quiví quichi coyo ra cacuví nuu chi ñu Israel cuan, ña sacunai cuhva. Ta cha inga quiví chahin vehe tyiño vatyí cutuñi chi ra

cha cacahán ra tuhun. Ta tachí tyiño na quichi ra cuan.

¹⁸ Soco ra catyaá cuatyí síqui ra, ña cuaha maa tuhun cacahan ra. Ta cuñi maa yuhu vatyi cahnu cuatyí cuatyaa ra síqui ra.

¹⁹ Cuñi ra cuan cuatyí chihin ra cha cuenda tuhun costumbre, cuhva chinó iñi ñu Israel. Cahán ra tuhun noo ra cha nañi Jesús cha chihí. Ta ra Pablo catyí ra vatyi iyó ra.

²⁰ Ta ña chité yoso caa sacuvi chihin tuhun cha tyicuan caa, ta ndaca tuhun chi ra Pablo tatu cuñi ra cuhun ra Jerusalén, vatyi cutuñi chi ra cuenda tuhun ihya.

²¹ Soco maa ra chicán ra cha cutuñi chi ra nuu rey cahnu Augusto nya Roma. Yucuan chaha ñohó ca ra vehe caa nyacua nya cuví tachi chi ra nuu ra Augusto —catyí ra Festo chi rey Agripa.

²² Tyicuan ta ra Agripa catyí ra chi ra Festo:

—Cuñi tucu yuhu cuiñi cha cahán ra cuan —catyí ra.

Ta ra Festo catyí ra chi ra:

—Tyaan cuiñun cha cahán ra —catyí ra chi ra.

²³ Tuví inga quivi ta chaá ra Agripa chihin cu Berenice. Iyo xaan caa ñu quihvi coyo ñu chichi vehe vatyi rey cuví ñu. Quihvi tucu comandante ta ra cacuví tyiño ñuu cuan. Tyicuan ta ra Festo catyí ra na quichi ra Pablo.

²⁴ Tyicuan ta quichaha catyí ra Festo:

—Yoho Rey Agripa, ta nyoho tata, cha nyicu ndo ihya. Nyehé ndo chi ra ihya. Tandihí ñu Israel ñuu Jerusalén ta ñu Cesarea cahan ñu síqui ra. Ta ña sandihí ñu cha catyí ñu chii vatyi tahán chi cúvi ra.

²⁵ Soco cha cuenda yuhu ñahri cuatyí ra cha tahán chi cúvi ra. Ta suri maa ra chicán cha cutuñi chi ra nuu ra Augusto. Yucuan chaha cutachi chi ra.

²⁶ Soco vatyi ñahri cuatyí ra ñihí, yucuan chaha ña ñihí tuhun tyai nu tutu cha cusacuhin chi ra nyacá ñaha chi yo. Yucuan chaha cané chi ra Pablo nuu ndo, ta nuu yoho Rey Agripa,

tacuhva tyi ndaca tuhun chi ra ta cote ñáá cha tahán chi sacote chi rey cahnu.

²⁷ Vatyi ña vaha cha sacuhín chi ra tatu ñahri tuhun cahín ñáá cuatyí ra.

26

Nu quichaha cahán ra Pablo nuu rey Agripa

¹ Tyicuan ta ra Agripa catyí ra chi ra Pablo:

—Cuví cahun vityin —catyí ra chi ra.

Ta ra Pablo sandaa ra ndaha ra ta catyí ra tyehe caa:

² —Si xaan cuñi vatyi cuví cahin nuu yoho, rey Agripa, ta cuví catyí mai chuun yoso caa tandihí cuatyí cha tyaá ra Israel síqui.

³ Vatyi, yoho chitón tandihí costumbre cha iyó chi yo ñu Israel. Ta chitón tuhun tuhva yo cuvi yuhu. Yucuan chaha chiquén chuun nacuiñi vahun cha cahín.

Nu catyí ra Pablo chi ra Agripa yoso caa ñayivi ra cha ni cumañi ca quihvi ra cuenda ra Cristo

⁴ Tandihí ñu Israel chitó ñu yoso caa chiye nyata ni luhli nya ñui. Ta chitó ñu cuhva chiye nya Jerusalén.

⁵ Ta suri chitó ñu vatyi nyata luhli cuví noo fariseo. Ta ra fariseo vaha xaan caquichahá ra costumbre yo. Ta na catyí maa ñu tatu ña ndicha cha cahín.

⁶ Ta vityin nanyaí ihya ta cutuñi chii cha cuenda vatyi chinó iñi cha sanandotó Nyoo chi ñayivi chihí, tari cuhva catyí ra chi sutu chahnu yo ta cha naha.

⁷ Ndi uchi uvi tahan ityi ñayivi Israel ñu vachi tata sutu chahnu yo nyatú tucu ñu nyehe ñu tyi ndicha cusanandoto Nyoo chi ñayivi chihí. Ta yucuan chaha nyita ri sacuví ñu tyiño nuu Nyoo sacahnu ñu chi ra ñicahñu ta cha cuaa. Vatyi suri cha cuenda tuhun ihya tyaá ra Israel cuatyí síqui vityin, yoho rey Agripa.

⁸ ¿O ña chinó iñi nyoho vatyi Nyoo sanandotó ra chi ñu chihí?

⁹ Ta quiví cuan suri mai chica xiñi vatyí vaha cha tachi tuñi chi ñáyiví chinó iñi chi ra Jesús ra ñuu Nazaret.

¹⁰ Ta tyicuan caa chinyacuví nya Jerusalén chihin ndusu yuhu ra cacuví nuu chi tata sutu. Ta cuaha ñu cha chinó iñi chi ra Cristo tyihí vehe caa. Ta tatu cachahñi ra chi ñu, vaha xaan cuñi.

¹¹ Cuaha chaha sanyehí tindocho chi ñu ta sahi fuerza chi ñu nacahan ña vaha ñu siqui ra Jesús. Tyehe caa chinyacuví tandihí ri vehe ñuhu ñu Israel. Ta xaan xaan cuñi nyehi chi ñu. Ta chica nyiquen chi ñu nyacua nya inga ñuu.

Nu nacatyí tucu ra Pablo yoso caa nanduví ra, ra cuenda ra Cristo (Hch. 9.1-19; 22.6-16)

¹² Ta yucuan chaha cuahin quiví cuan nya ñuu Damasco chihin ndusu yuhu ra cuví nuu chi tata sutu.

¹³ Soco yoho Rey, ityi cuahin ñáá cuhva ora, nyehí noo nduva ñuhu quichí andiví, ñihi ca ican saha ñuhu ñanyii. Sandundichin chi nicachico nu cuahin ta ra cuahan coyo chihin.

¹⁴ Tyicuan ta tandihí ndi nduva ndi nu ñuhú. Ta chiñi noo ndusu cha cahán chihin, chihin sahan yo hebreo, ta catyí chi chii: “Saulo, Saulo, ¿ñáá tuhun cha chicá nyicon chii? Tari noo quití chañi nyaa ti chata cha xaan cha saquehén ityi ra chi ti, tyicuan caa cuñún sañicuehun suri chi maun”, catyí ndusu cuan chii.

¹⁵ Tyicuan ta catyí yuhu: “¿Yóó yoho tata?” Ta Sutú Mañi yo catyí ra chii: “Yuhu cuví ra Jesús, ra cha chicá nyicon chi.

¹⁶ Ndícuita ta cuinanyaun, vatyí yuhu tuví nuun tacuhva vatyí cuasacuvun tyiño nui, vatyí cuacuvun cha ndaa cha nyehun vityin. Ta cucuvun cha ndaa cha nyehun chii nu cuahan ca chi.

¹⁷ Cusacaqui chuun ndaha ra Israel, ta ndaha ra cha ñima ra Israel cuví. Nu nyicú ñu tachí chuun vityin.

¹⁸ Vatyí na nuñon nuu ñu, ta sañahun chi ñu cha ndicha, ta ma sacuvi ca ñu cha ña vaha. Soco sacuvi

ñu cha vaha nu ndichin Nyoo vatyí quita ñu chichi ndaha ra ña vaha ta ndihví ñu ndaha Nyoo tacuhva vatyí tyicuan caa cusahi tcahnu iñi cuatyí ñu ta cunaquehen ñu cha vaha cha chahá Nyoo chi ñáyiví yihí cuenda ra”, catyí Sutú Mañi yo chii.

¹⁹ Yucuan chaha rey Agripa, sacuví cha catyí Sutú Mañi yo ra Jesucristo chii nu sañaha ra chi ra chii.

²⁰ Ta cahin tuhun ra xihna ca chihin ñu nyicu ñuu Damasco. Yaha cuan ta cahin chihin ñu ñuu Jerusalén ta tandihí ityi Judea. Ta cahin chihin ñu cha ñima ñu Israel cuví ñandihí. Sacote chi ñu nandu uvi iñi ñu cuatyí ñu, ta nandihví ñu chichi ndaha Nyoo cha ndicha cuii. Na nasama ñu cuhva iyó ñu chihin cha sacuvi ñu cha vaha.

²¹ Cha cuenda ihya catiñ ra Israel chii chichi vehe ñuhu cahnu. Ta cacuñi ra cahñi ra chii.

²² Soco maa Nyoo tyinyeé chii. Ta iyó que nya vityin. Ta cahin tuhun Nyoo chihin tandihí ñáyiví, ñu ndahví ta ñu tyayii. Ta ña cahin inga tuhun cha ña catyí ra Moisés ta ra profeta, vatyí cucuví nu cuahan ca chi.

²³ Vatyí catyí ra vatyí tahán chi cha cunyehe ra Cristo tindocho. Ta cha yaha cha cúvi ra, cunandoto ra. Ta ican ra cuví ra cunandoto xihna ca. Ta cusacata ra tari noo ñuhu ityi cuahan ñáyiví vatyí sacotó ra yoso caa cacu aña ñu, ñu Israel ta ñu cha ñima ñu Israel cuví —catyí ra Pablo.

Ra Pablo cuñi ra cha nachino iñi rey Agripa ta cunyicon ra chi ra Cristo

²⁴ Cuhva cha catyí ra Pablo tuhun ihya, ra Festo canacha ra, ta catyí ra:

—¡Loco yoho Pablo! cha cuenda cha cuaha xaan sacuahún ta ndulocon —catyí ra Festo chi ra.

²⁵ Soco ra Pablo catyí ra chi ra:

—Ña loco yuhu, yoho tata Festo. Soco cha cahin, maa maa ri tuhun ndicha cuví.

²⁶ Ihya nyaá rey Agripa. Ta chitó vaha ra tuhun ihya. Yucuan chaha cahin chihin cha ña cahán nui. Vatyí chité tyi chitó tucu maa ra tuhun ihya, vatyí ñima tuhun xehe cuví.

²⁷ Yoho rey Agripa, ¿atu chinó iñun tuhun cha catyaa ra profeta cuenda Nyoo ta cha naha? Yuhu chité vatyí chinó iñun —catyí ra Pablo chi ra Agripa.

²⁸ Tyicuan ta ra Agripa catyí ra chi ra:

—Suhva cuii ri ca ta nachino iñi tuhun cahun ta quihvi cuenda ra Jesús —catyí rey Agripa chi ra Pablo.

²⁹ Tyicuan ta ra Pablo catyí ra:

—Cuví ri suhva, o cuví ri cuaha soco chi Nyoo chiquén vatyí na nduvi ndihun ñáyivi cuenda ra Jesús tari mai. Ta ñima yoho ri, soco tandihí ri ñáyivi, ñu chiñí tuhun cahín. Noo ri cha ña cuñí, cha quihí cadena ndaha ndo tari mai vityin —catyí ra Pablo.

³⁰ Cha yaha cha catyí ra Pablo tuhun ihya, ndicuita rey ta gobernador ta cu Berenice, ta tandihí ra canyicú yucuan.

³¹ Ta cha yaha quita coyo ñu, ta cacatyí ñu chi tahan ñu:

—Ñahri cuatyí ra ihya cha ñihi xaan. Ña tahan chi cúvi ra. Ta ni ña tahan chi cohon ra vehe caa —catyí ñu.

³² Ta ra Agripa catyí ra chi ra Festo:

—Cuví saña yo chi ra, tyehe ta ñima maa ra chicán cha cutuñi chi ra nuu ra cuví rey cahnu —catyí ra.

27

Nu tachí ra Festo chi ra Pablo nya ñuu Roma

¹ Quivi cha catyaa ra Festo ta ra Agripa cuhva tyi tachí ra chi ndi nya ñuu Roma ityi Italia, nacuhva cuenda ra chi ra Pablo ta suhva ca ra chi noo capitán cha nañi Julio. Yihí ra noo batallón sindaro, cha nañi Cuenda Ra Augusto.

² Ta cuahan tucu ra Aristarco chihin ndi ñandihí. Ra ñuu Tesalónica cha nyaá ityi Macedonia cuví ra. Tyicuan ta quihvi ndi chichi noo barcu cha quichi ityi ñuu Adramitio ta cuhun chi ñuu cha nyicú yuhu tyañuhu ityi Asia.

³ Cha inga quivi cha ndi puerto Sidón. Ta ra Julio vaha ñáyivi cuví ra chihin ra Pablo. Ta chaha ra cha cunyehe ra chi ra tahan ra ñuu cuan.

⁴ Yaha cuan ta quita ndi Sidón ta casanda ra sahma barcu cuan ta chihin fuerza tatyí ri cuahan ndi. Ta vatyí caa tatyí siqui ndi yaha ndi chiyo xehe ca ñuhú Chipre. Vatyí ña ñihi xaan caa tatyí chiyo cuan.

⁵ Yaha sava ndi tyañuhu ityi nuu Cilicia ta Panfilia, ta chaa ndi noo ñuu cha nañi Mira ityi Licia. Ta noo ndi barcu cuan.

⁶ Yucuan nañihí capitán cuenda sindaro nonga barcu cha quichi nya ñuu Alejandría ta cuahan chi Italia. Ta catyí capitán na quihvi ndi barcu cuan vatyí cuhun ca ndi nu cuahan ndi.

⁷ Cuaha quivi chica ndi cuee ri. Ta chihin cha cuaha tindocho ta chaa ndi yatyin ri ñuu Gnido. Ta cha cuenda cha ñihi xaan caá tatyí, ña chaha chi cha cuhun ndi ityi nuu, ta yaha ndi yatyin ri ñuu Salmón. Ta nacuiço ndi ityi yuhu ñuhú Creta.

⁸ Nducu ndi cuhva cha cuhun ndi yuhu tyañuhu cuan ta chaa ndi nu nañi Buenos Puertos yatyin ri ñuu Lasea.

⁹ Cha cuaha xaan quivi yaha ta cha yica xaan nanduví cha caca noo ndi ityi nu tyañuhu. Vatyí cha yaha quivi vico ayuno nu ña chachi ñu Israel. Ta cha cuyatyin yoo vichin. Yucuan chaha ra Pablo chaha ra tuhun chi ra sacaca barcu cuan,

¹⁰ ta catyí ra:

—Nyoho ra canyicú ihya, cuiñi ndo tuhun cahín. Nyehí vatyí yica xaan cuhva cuahan yo. Ta tuví iñi vatyí cuaha xaan cusacunaa yo. Cunaan barcu ta cha nyisó chi ta nyacua nya maa yo ñandihí. Vaha taxin ca nandoo yo ihya —catyí ra chi ra.

¹¹ Soco capitán cuenda sindaro cuan quichaha ca ra chi ra sacaca barcu chihin chitoho barcu ta ñima ca chi ra Pablo.

¹² Ña cuví yaha ndi yoo vichin yucuan tyi ñihi xaan tuhvá caa tatyí, ta yica xaan cuenda barcu. Yucuan chaha tandihí ra ta catyí ra:

—Vaha ca cha quita yo ihya ta nducu yo cuhva chaa yo nya ñuu

Fenice suri ñuhú Creta ihya. Yucuan cuví noo nu vaha cunyaa barcu vatyi nyaa ñuu cuan chiyo caña ñanyii —catyí ra.

Nu ñihi xaan caá tatyí nu tyañuhu

¹³ Tyicuan ta quichahá caa chiin tatyí cha quichi ityi sur. Ta cuñí maa ra vatyi vaha xaan vatyi ñima tatyí ñihi cuví, ta cuví cuhun ra chihin barcu ra nicañi ri yuhu tyañuhu ñuhú Creta cuan.

¹⁴ Ña cuaha ri chicá ra ta quichaha caa noo tatyí xaan cha quichi ityi norte. Ta tyandahá chi barcu inga ityi.

¹⁵ Ta ña cuví ca cuhun ndi ityi nuu ca cha cuenda tatyí cuan. Ta saña ndaha ndi nacuhun maa barcu chihin tatyí nya ityi cuñí maa chi.

¹⁶ Ta tyandahá tatyí chi ndi ityi chiyo satyin noo ñuhú luhlu cha nañí Clauda. Ta chihin cha yí xaan naquehen ndi lancha luhlu cha xitá quiñoho barcu, ta natyihí ndi ityi chichi barcu coto nyee chi.

¹⁷ Ta cha yaha natyihí ra lancha cuan, yucuan ta chahñi vaha ra yoho nicachico barcu vatyi coo fuerza chi. Ta yuhví ra coto tahan ra nu yaxin ndutya ta quihví barcu cuan chichi ñiti vita iyó yuhu tyañuhu nu nañí chi Sirte, yucuan chaha sanoo ra sahna barcu ta chaha ra cha cuhun barcu yoso cuhva tyandahá tatyí.

¹⁸ Ta cha inga quiví suri ñihi xaan caá tatyí. Yucuan chaha quichaha catuchi ra carga nu tyañuhu.

¹⁹ Ta cha cu uñi quiví quehen ndi ndaha tyiño barcu ta tyihí ndi nu tyañuhu.

²⁰ Ta cuaha quiví ña nyehe ndi ni ñanyii ta ni tiño. Ta ñihi tatyí nañí chi ndi. Yucuan chaha ña tyaá ca ndi cuhva cha cacu ndi.

²¹ Cuaha quiví yaha ta ña chachí ndi. Tyicuan ta catyí ra Pablo chi tandihí ra:

—Nyehe ndo, vaha ca tyehe ta quichaha ndo chii quiví cuan, ta ndoo taxin yo Creta cuan. Ta vityin nyehe xaan yo tindoho ihya ta cuaha ndaha tyiño sacunaá yo.

²² Soco vityin ma caca xaan iñi ndo vatyi ni noo yo ta ma cuví yo. Barcu ihya cuví cha cunaa.

²³ Vatyi Nyoo nyacá ñaha ra chii, ta sacuví tyiño nuu ra, sanyehe ra noo visión chii cuñi. Ta tuví noo ángel nui.

²⁴ Ta catyí ángel cuan chii: “Ma yuhvun, Pablo. Vatyi cuñí chi cha cahun tuhun Nyoo nuu rey cahnu Augusto nya Roma. Ta cha cuendon cusacacu Nyoo tandihí ra canyicu chuhun chichi barcu”, catyí ángel cuan chii.

²⁵ Yucuan chaha nyoho cha ñohó ndo chichi barcu, saní ndo iñi ndo. Vatyi yuhu chinó iñi chi Nyoo. Ta chitó vahi vatyi cuví tari cuhva catyí ángel cuan chii.

²⁶ Vasi cuanyee barcu soco cuachaa yo noo ñuhú luhlu —catyí ra Pablo chi tandihí ndi.

²⁷ Noo cha cuaa quiví ndihí chahun quiví chica ityi ndi nu tyañuhu, ñohó ndi nu tyañuhu Adria. Ta chata cuan chata ihya tyandahá tatyí chi barcu ndi nu tyañuhu. Ta vasi ora ñuu cuví cuhva cuan ta tuví iñi ra sacacá barcu cuan tyi cuachaa ndi noo ñuhú.

²⁸ Tyicuan ta tyicuhva ra cha cono ndutya. Ta nyehe ra tyi oco chahun íin tahan metro iyó. Cuahan ndi chiin ca ityi nuu ca. Ta tyicuhva tucu ra inga chaha. Ta iyó oco ucha metro.

²⁹ Ta cayuhví ra coto nañi barcu cuan chata yuu. Yucuan chaha casanoo ra cumi tahan caa vee cha nyaa gancho nuu, ityi chata barcu. Ta ña iñi ca ra cha cundichin.

³⁰ Ta ra sacacá barcu cuan catyaa ra cuhva cacono xehe ra. Ta yucuan chaha quichaha casanoo ra lancha cuan nu ndutya ityi nuu barcu cuan. Ta sahá ri maa ra tyi inga caa casanoo ra.

³¹ Soco ra Pablo sacoto ra chi capitán ta chi sindaro ta catyí ra:

—Tatu ma ndoo ra cuan chichi barcu. Nyoho ma cuví cacu ndo —catyí ra chi ra.

³² Tyicuan ta sindaro cachahnya ra yoho lancha. Ta casanacava ra nu ndutya.

³³ Ta cha ñaa ca cuan ra Pablo catyí ra chi tandihí ra:

—Cha iyó uchi cumi quívi cha ta cachi ca yo.

³⁴ Catyí chi ndo, na cachi yo vityin. Niñi xaan cuñí chi cha cachi yo ta ndunye coño ñuhu yo. Vatyí cucacu yo ta ni noo ixi xiñi yo ta ma cunaa.

³⁵ Ta cha catyí ra tuhun ihya, ra Pablo quehen ra noo pan ta nacuhva ra tyahvi nyoo chi Nyoo nuu tandihí ra. Tyicuan ta tahvi ra ta quichaha chachi ra.

³⁶ Tyicuan ta tandihí ca ra canduní ca iñi ra ta cachachi ra ñandihí.

³⁷ Ta cha tandihí ndi cha ñohó ndi chichi barcu cuan, quita uvi ciento uñi xico chahun iñi tahan ñáyivi.

³⁸ Cuhva cha ndihí ca chachi ra ta tuchi ra yitin cha yihí trigu nu tyañuhu na nduñahma ca barcu.

Nu nyeé barcu

³⁹ Yahá cuan ta cundichin. Ta canyehe ra cha sacacá barcu noo ñuhú, soco ña canicohon nuu ra nya cuví cuan. Nyehe ra noo nu iyó ñiti. Ta catyaa ra cuhva nyehe ra tatu cuví sacuhun ra barcu yucuan.

⁴⁰ Cachahnya ra yoho cha nuhñi caa vee cuan. Ta sandoo ra chichi tyañuhu. Ta casandutaya ra vitu cha sanacuico barcu. Tyicuan ta casandaa ra sahma cha tuhva chitacaá ityi nuu barcu. Ta quichaha quehen tatyí sahma cuan, ta sacuhún chi barcu nya nu iyó ñiti cuan.

⁴¹ Ta chaá barcu cuan noo nu nañi tahan ndutya. Ta nyee xiñi chi chichi ñiti. Ta ña cuví ca natava ra. Ta suhva ca cha ña quihvi chichi ñiti, ñihi xaan cañi tyañuhu chi chi, nyacua tahvi cuatyí chi.

⁴² Tyicuan ta sindaro cacuñi ra cahni ra chi ndi cuii maa ra cuahan cuacutuñi chi nuu ra cuví rey cahnu, coto cacono ra.

⁴³ Soco capitán sindaro cuñi ra sacacu ra chi ra Pablo. Yucuan chaha ña chaha ra cahni ra chi ra, soco catyí ra vatyí nya ra cachitó sutya, na kuhun cuee ra nu ndutya ta quita ra nya ñuhú ityi.

⁴⁴ Ta tandihí ca ra cha ña cacuvi sutya, na quehen ra vitu cha nyisó barcu, ta suhva ra chihin yiquin vitu barcu cha tahvi tyañuhu. Ta tyicuan caa cacacu tandihí ndi ta quita ndi ñuhú ityi.

28

Nu ñohó ra Pablo ñuhú Malta

¹ Cuhva cha cha yaha cacu ndi ta catyí ñáyivi iyó ñuhú cuan vatyí nu nyaá ndi nañi chi Malta, o Melita.

² Ta vaha xaan tyiñuhu ñu chi ndi. Ta sanatahan ñu ñuhu vatyí coón savi ta vichin xaan. Ta catyí ñu chi tandihí ndi, natuhva ndi yuhu ñuhu cuan natava ndi cha vichin ndi.

³ Tyicuan ta ra Pablo naquehen ra suhva nducu tyihí ra nu ñuhu. Ta noo coo quita chichi nducu cuan, cha cuenda cha ihñi. Ta chachi yihí ti ndaha ra Pablo ta ndoo ti tacaá ti ndaha ra.

⁴ Cuhva cha canyehe ñáyivi ñuhú cuan tyi tacaá coo cuan ndaha ra, quichaha catyí ñu chi tahan ñu:

—Ra ihya vasi noo ra chahni ñáyivi cuví ra, vatyí vasi cacu ra nu tyañuhu soco ña chahá Nyoo cha coo ca ra cha cuenda cuatyí ra —catyí ñu.

⁵ Soco ra Pablo naquisi ra chi coo cuan, ta canacava ti nu ñuhú, ta ñahri cuví chi ra.

⁶ Tandihí ñu nyatú ñu ñáá cuhva ndaa nu tyaa ti, o ñáá cuhva cúvi ra. Soco cha yaha nyatu xaan ñu, ta nyehe ñu vatyí ñahri maa cuví chi ra. Tyicuan ta nasama ñu cuhva chicá xiñi ñu, ta quichaha catyí ñu:

—Minoo nyoo cuví ra —catyí ñu.

⁷ Yatyin ri cuan nyaá ñuhú ra cha cuví nuu ñuhú cuan. Publio nañi ra. Ta vaha xaan cahan ra chihin ndi. Ta tyiñuhu xaan ra chi ndi, ndoo ndi vehe ra uñi quívi.

⁸ Ta cuhvi xaan sutu ra chihin cahni ta cha chiyó ra. Ta ra Pablo chahan ra chinyehe ra nu catuví ra. Ta chican tahvi ra chaha ra. Ta tyiso ra ndaha ra siqui ra ta nduvaha ra.

⁹ Yahá cuan ta quichaha caquichí tucu inga ñu cuhvi cha iyó ñuu cuan. Ta nduvaha tucu ñu.

¹⁰ Ta tandihí ñu tyiñuhu xaan ñu chi ndi. Ta quiví quihví ndi chichi barcu cha cuacuhun ndi, chaha ñu tandihí cha cuchihuhu chi ndi ityi cuhun ndi.

Nu chaq ra Pablo ñuu Roma

¹¹ Uñi yoo ñohó ndi Malta cuan. Tyicuan ta ñihí ndi noo barcu cha quichi nya ñuu Alejandría ityi Egipto. Ta ndoo chi Malta nya yaha yoo vichin. Ta nyaa noo cha natava ñu, noo xiñahñu nyoo Cástor ta nyoo Pólux, xiñi chi. Quihví ndi barcu cuan ta cuahan ndi.

¹² Ta chaq ndi ñuu Siracusa. Ta yucuan ndoo ndi uñi quiví.

¹³ Ta yucuan ta quitá ndi ta cuahan ndi ityi yuhu tyañuhu nyacua nya chaq ndi ñuu Regio. Ta cha inga quiví cuan caa xaan tatyí cha quichi ityi sur ta chica ndi uvi quiví ta chaq ndi ñuu Puteoli.

¹⁴ Yucuan ñihí tahan ndi chihin suhva ra hermano. Ta catyí ra chi ndi cha ndoo ndi noo vitya chihin ra. Yaha cuan ta quitá ndi ta cuahan ndi nya ñuu Roma.

¹⁵ Ta ñu yihí cuenda Nyoo ñuu Roma cuan ñihí ñu tuhun tyi cua cha ndi. Ta chahan coyo ñu chisatahan ñu chi ndi ityi. Suhva ñu nyatú ñu chi ndi Nuyahví Apio. Ta inga ñu ñihí tahan ñu chihin ndi nya nu nañi Tres Tabernas. Ta cha nanyehé ra Pablo chi ñu, nacuhvá ra tyahvi nyoo chi Nyoo. Ta nduní ca iñi ra.

¹⁶ Cuhva cha chaq ndi Roma cuan, capitán cuan nacuhvá cuenda ra chi ra ca iyó cuatyí cuan chi noo ra cuví nuu chi ra sahá cumi vehe caa. Ta chaha ra cuan cha coo sñn ra Pablo. Ta noo ri sindaro sahá cumi chi ra.

Nu cahán ra Pablo tuhun Nyoo ñuu Roma

¹⁷ Uñi quiví cha yaha chaq ndi yucuan. Tyicuan ta tachi ra Pablo tyiño naquichí coyo ra cacuví nuu cuenda ñayiví Israel cha iyó ñuu Roma cuan. Ta cuhva cha ndu ñn ri ra, quichaha catyí ra chi ra:

—Nyoho yañi, vasi ñahri sacuví chi ñu Israel tahan yo, ta ni ñahri sacuví siqui costumbre sutu chahnu yo, soco

chaha cuenda ra Israel chii chi ra ñuu Roma. Ta ñohí vehe caa Jerusalén ndaha ra ñuu Roma.

¹⁸ Ta cha cutuñí chi, ta cuñí ra nyacá ñaha casaña ra chii. Vatyí ñahri cuatyí cha cahnu cha tahán chi cuví.

¹⁹ Soco cha cuenda cha nduxaán xaan ra Israel siqui, chican taxin cha cutuñí chii nuu maa rey cahnu. Vasi ñahri cuatyí cuacaquen siqui ñu ñui nuu ra.

²⁰ Yucuan chaha cané chi nyoho vatyí cohon nui chi ndo, ta sacoté chi ndo vatyí nuhñi yuhu chihin cadena vityin cha cuenda cha yihí iñi yo, ñu Israel, chi Nyoo —catyí ra Pablo.

²¹ Tyicuan ta catyí ra Israel chi ra Pablo:

—Ña chitó maa ndi tuhun yoho. Ta yori casacoto chi ndi, ni chihin carta, ta ni ta yori ca quichi ityi Judea sacoto cha caun, o cahan ña vaha ñu sicun.

²² Soco cuñí ndi cuiñi ndi tuhun chicá xiñi yoho. Vatyí chitó ndi vatyí tandihí ri ityi cahán ña vaha ñayiví siqui tuhun chaa ihya —catyí ra Israel chi ra Pablo.

²³ Tyicuan ta catyihí tahan ra tuhun nya quiví quichi coyo ra inga chaha. Ta cha chaq quiví cuan, chaq coyo cuaha ñayiví nu iyó ra Pablo. Ta nya ñaha ri ta nya cha cuaa cahán ra Pablo tuhun yoso caa nyacá ñaha Nyoo aña yó. Ta chihin ley ra Moisés ta tuhun cha catyaa ra profeta Nyoo ta cha naha, sañahá ra chi ñu vatyí ra Jesús cuví ra cha sacacú chi yo, vatyí cuñi ra tyi nachino iñi ñu chi ra.

²⁴ Yihí ñu chinó iñi ñu cha catyí ra Pablo. Ta inga ñu ña chinó iñi ñu.

²⁵ Ta vatyí ña ñn ri chino iñi ñu ta sñn sñn tuhun cahán ñu, ta quichaha cuahan coyo ñu. Ta ra Pablo catyí ra chi ñu:

—Ndicha xaan cha catyí Tatyí li chi sutu chahnu yo chihin yuhu ra profeta Isaías ta cha naha. Vatyí catyí ra tyehe caa:

²⁶ Cuahan ta catyí chi ñayiví ihya tyehe caa:

Nyoho cucuiñi ndo tuhun Nyoo. Soco ma cutuñi iñi ndo.

Ta cunyehe ndo chihin chiti nuu ndo
cha sacuví Nyoo.

Ta ma tuvi iñi ndo.
Tyicuan caa catyí chi ñu.

²⁷ Vatyí aña ñu cha ndundava xaan.

Ta chiñí ri maa ñu tuhun Nyoo.

Ta natahán chiti nuu ñu,
tacuhva cha ma cuvi nyehe ñu.

Ta nicunyasí soho ñu.

Yucuan chaha ña chiñí ñu, ta ndun-
dava aña ñu.

Yucuan chaha ña cuñí ñu quihvi ñu
chichi ndahi na sanduvahi chi
ñu, catyí Tatyí li chihin yuhu ra
Isaías ta cha naha.

²⁸ 'Coto vaha nyoho vatyí vityin ta
ityi nuu ca cuhin cusacote chi ñu cha
ña ñu Israel cuví vatyí sacacú Nyoo
chi ñu. Ta maa ñu cuatyasoho ñu,
—catyí ra Pablo chi ñu.

²⁹ Cuhva cha catyí ra Pablo tyehe
caa, ra Israel cuahan coyo ra suri cuví
yuhu ra chihin ra tahan ra tuhun cha
cahan ra Pablo chihin ra.

³⁰ Uvi cuiya naní ndoo ra Pablo
vehe nu nyaá ra cuenda yoo ñuu
Roma cuan. Ta vaha cahán ra chihin
tandihí ñu chahan vehe ra.

³¹ Ta chihin cha ní iñi ra ta cahan
ra tuhun yoso caa nyacá ñaha Nyoo
aña yo. Ta sañahá ra tuhun Sutu
Mañi yo ra Jesucristo. Ta yori chasí
cha cahán ra.

Carta Cha Sacuhun Ra Apóstol Pablo Chi Ñáyivi Ñuu Roma Cha Yihí Cuenda Nyoo

Nu sacuhun ra Pablo tutu chi ñu cuenda Nyoo ñu Roma

¹ Yuhu ra Pablo cuví noo ra sacuví tyiño nuu ra Jesucristo. Nacana ra chii, ta nacachi ra chii vatyí cuví apóstol chi ra, tacuhva vatyí sacote chi ñáyivi yoso caa sacacu Nyoo añaíma yo.

² Ihya cuví tuhun cha catyi Nyoo chi yo tyi cusacuví ra, ta chicunyaá nu tutu tuhun ra tandihí cha tyaá ra profeta ta cha naha.

³ Ican ihya cuví tuhun Sutu Mañi yo Jesucristo Sehe Nyoo cha cahán chi tuhun, vatyí quichi ra siqui ñuhu ñáyivi chihin coño ñuhu ra tari coño ñuhu maa yo. Tata rey David cuví chi ra.

⁴ Ta Nyoo chihin Tatyí Ii ra sacoto cachi ra chi yo vatyí Sehe ra cuví chi ra, vatyí sanandoto ra chi ra chihin cha ndicha ñuhu ra.

⁵ Ta cha cuenda maa ra Jesucristo chaha Nyoo tumañi iñi chi nyuhu cha cuhun ndi cucaca ndi tyiño ra, tacuhva nachino iñi ñáyivi chi ra nichahnu ñuhu ñáyivi, ta quichaha ñu chi ra.

⁶ Ta mahñu ñu cuan, ñohó tucu nyoho vatyí suri nacana tucu ra Jesucristo chi nyoho.

⁷ Sacuhín tutu ihya chi tandihí nyoho cha iyó ndo ñuu Roma. Cuñi Nyoo chi ndo ta nacana ra chi ndo vatyí coo ndo noo ñáyivi cachi cha sacahnu ndo chi ra. Na naquehen ndo cha vaha ta cha taxi ri cuñi añaíma ndo cha chahá Sutu yo Nyoo ta Sutu Mañi yo Jesucristo chi yo.

Nu catyi ra Pablo vatyí cuñi ra cuhun ra ñuu Roma

⁸ Cha xihna ri chahí tyahvi nyoo chi Nyoí chihin sivi ra Jesucristo, cha

cuenda tandihí nyoho. Vatyí tandihí ri ityi cahán ñu tuhun vatyí chinó xaan iñi ndo chi ra Jesucristo.

⁹ Ta tyiño nuu Nyoo sacuví yuhu chihin cha tandihí añaíme. Ta cahín tuhun yoso caa sacacu ra chi yo cha cuenda Sehe ra. Ta Nyoo cuví ra testigu vatyí chitó ra tyi tyicuan ri nichón iñi chi ndo cuhva cha chicán tahvi chi ra. Ta chicán tahvi cha cuenda ndo.

¹⁰ Chiquén chi Nyoo na cuvi cuhva cuñi ra, ta cuhin nu nyicú ndo, vatyí cha naha xaan cuñi cuhin.

¹¹ Vatyí cuñi tyinyei chi ndo, ta naquehen ndo cha vaha cha chahá Nyoo ta cuní ca iñi ndo.

¹² O cuñi chi catyi vatyí saní yo iñi tahan yo chihin cha chinó iñi yo, tari chinó iñi nyoho ta yuhu ñandihí.

¹³ Yañi, cuñi tyi coto ndo vatyí cuaha xaan chaha cuñi cunyehe nu nyicú ndo, soco nya vityin ta ña chaha chi cuhva chii. Cuñi vatyí cuní ca iñi ndo tari nduní ca iñi ñu vehe ñuhu inga ñuu nu chahín. Vatyí tatu nduní iñi ndo, nduní tucu iñi yuhu.

¹⁴ Vatyí nyaá siqui cha cahin tuhun Nyoo chihin tandihí ñáyivi, an cuví ri ñu ñuu Grecia, an cuví ri ñu inga ñuu, an cuví ri ñu chiñi tuñi, an cuví ri ñu ña cutuñi iñi. Tahán chi cha cahin chihin tandihí ri ñu.

¹⁵ Yucuan chaha, cha cuenda yuhu, cuñi xain cahan tiqui tuhun Nyoo chihin nyoho cha iyó ndo ñuu Roma chiña.

Tuhun Nyoo iyó xaan cha ndicha ñuhu chi

¹⁶ Yuhu ña cahán nui cahín tuhun Nyoo, vatyí ihya cuví fuerza Nyoo cha sacacú chi tandihí ñáyivi cha chinó iñi chi ra. Ta cha xihna ri chi ñu Israel. Ta cha cu uvi, ñu inga ñuu.

¹⁷ Vatyí tuhun Nyoo ihya, sañahá chi chi yo yoso caa sacuvahá Nyoo chi yo nuu ra chihin cha chinó iñi yo chi ra. Ta suri cha cuenda cha chinó iñi yo, coo yo ñáyivi chaa chihin ra. Tyehe caa nyaá nu tutu tuhun Nyoo: “Ñu cha nduvahá añaíma saha Nyoo, coo ñu noo ñáyivi chaa chihin cha chinó iñi ñu chi ra.”

Tandihí ñáyiví ta iyó cuatyí ñu

18 Ta nyehé yo vatyí nya nu nyaá Nyoo nya andiví ta tachí tuñi ra chí ñáyiví quiñi iyó, ñáyiví ña vaha. Ta cha quiñi iyó ñu, ña chahá chí coto ñu cha ndicha.

19 Chitó vaha ñu tyi tuhun vaha cuví tuhun Nyoo vatyí suri maa Nyoo sañahá ra chí ñu.

20 Vatyí vasi ña nyehé yo chí ra, cuví coto yo vatyí iyó ra vatyí nyehé yo tandihí cha savahá ra. Nyata chinqo ñuhu ñáyiví ta tandihí cha savahá ra ta sañahá chí chí yo vatyí maa ra cuví Nyoo, ta tunyee iñi cha iyó chí ra ma ndihí maa. Yucuan chaha ma cuví catyí ñáyiví tyi yori Nyoo iyó.

21 Ta vasi cha chitó ñu tyi iyó noo Nyoo cahnu, soco ña sacahnú ñu chí ra tari cuhva tahán chí cha sacahnu yo chí ra. Ní ña nacuhva ñu tyahvi nyoo chí ra. Soco maa maa ri tuhun cha ñima ri tuhun chicá xiñi ñu. Ta cha cuenda cha ndava añima ñu, cutondo cha chiñi tuñi xiñi ñu ta ndoo ñu nu ñaa iñi.

22 Vasi catyí ñu tyi chitó xaan ñu soco ñu tondo cuví ñu.

23 Vatyí cha nuu cha sacahnú ñu chí Nyoo ra cahnu ca cuví, ra ña tuhva chihi; sacahnú ñu chí xitohyo cha caá tari caá ñáyiví tuhva chihi. Ta nyacua nya xitohyo cha tari caá saa, ta coo, ta quiñi cha cumi tahan chaha, ta sacahnú ñu.

24 Yucuan chaha saña ndaha ndihí Nyoo chí ñu na sacuvi ñu tandihí cha quiñi caa cha quichí cuví iñi ñu. Yucuan chaha maa maa ri tuhun cha cahán nuu yo nyacuví ñu chihin tahan ñu.

25 Vatyí ña chinó iñi ñu cha ndicha vaha Nyoo. Vatyí noo cha ña ndicha, yucuan chinó iñi ñu. Ta sacuvahá ca ñu, ta casacahnú ca ñu cha savahá Nyoo ta ña cuñi ñu sacahnú ñu chí maa maa ra. Vatyí chí maa ra tahán chí sacahnú yo tyicuan ri maa. Ta na cuví chí tyicuan caa.

26 Yucuan chaha saña ndaha Nyoo chí ñu na sacuvi ca ñu cha chahá ticahan nuu chí ñu. Vatyí nyacua nya ñusihí nasama ñu cuhva nyacuví ñu,

vatyí ca iyó ñu chihin tahan sihi ñu, ta ña tahán chí tyicuan caa.

27 Ta tyicuan caa tucu rayi, casandihí ra cha ca iyó ra chihin ñasihí ra, ta quichí cuví iñi ra cacoo ra chihin tahan yí ra. Ta canyacuví ra chihin ra tahan ra, tuhun cha chahá ticahan nuu chí ra. Ta cha cuenda cuan tachí tuñi Nyoo chí ra ta tiví ra cha cuenda cha quiñi caa cha canyacuví ra.

28 Ta chaha cha ña cuñi ca ñáyiví nacoto nuu ñu chí Nyoo, yucuan chaha saña ndaha ra chí ñu na caca maa xiñi ñu cha quiñi caa, ta sacuvi ñu cha ña tahán chí sacuvi ñu.

29 Vatyí tandihí nuu cha ña vaha sacuví ñu. Iyó ñu chihin inga rayi ta ñima yí ñu cuví. Ta iyó ra chihin inga ñusihí ta ñima ñasihí ra cuví. Quiñi xaan iyó ñu. Quichí cuví xaan iñi ñu coo ca chí ñu. Nyacuví ñu cha quiñi caa. Nyiyó xaan iñi ñu cha chí inga ñáyiví. Chahñi ñu. Iyó ñu tisihi chihin tahan ñu. Sandaví ñaha ñu chí tahan ñu. Ta quiñi xaan ca iyó ñu. Ta ñi ñu cuendu.

30 Cahán ña vaha ñu siqui inga ñáyiví. Ta tasi cuñi ñu nyehe ñu chí Nyoo. Tyityi iñi ñu. Ta cahnu sahá ñu chí ñu. Casanducuahá ca ñu cha quiñi caa. Ta ña quichahá ñu chí sutu ñu, ta chí sihi ñu.

31 Ña cuñi ñu tyasoho ñu tuhun vaha. Ña sacuví ñu tuhun cahán ñu. Yori maa chí cuñi ñu. Ta ña casahá ñu ticahnu iñi chí tahan ñu. Ña ndahvi cuñi ñu nyehe ñu chí tahan ñu.

32 Maa ñu chitó vaha ñu ñáá cha catyí Nyoo tyi sacuví ñu, chitó ñu vatyí ñu casacuví cha ña vaha, tahán chí tuhun chihi chí ñu ta cuhun ñu anyaya. Soco maa ñu sañihí ca ñu sacuví ñu. Ta nyacua si cuñi ñu tatu sacuví inga ñáyiví cha quiñi caa.

2

Tachí tuñi Nyoo chí ñáyiví soco chihin cha ndicha

1 Yucuan chaha ñahri siqui tyaá ndo, nyoho ñu cha nyehé cha caá inga ñu ta cahán ndo. Ñahri saha, savahri ñu, yóo ri ñu cuví ndo. Vatyí tatu

nyehún cha caá inga ñu ta cahún, suri maun sacóun cuatyun. Vatyí suri ñn ri cha sacuvún chihin ñu nyehún ta cahún.

² Vatyí chitó yo vatyí Nyoo tachí tuñi ra chi ñu nyacuví tyehe caa, soco chihin cha ndicha ta chihin cha ndaa, tachí tuñi ra.

³ Ta yoho cha cahán nyaun chi inga ñu, suri ñn ri cha sacuvún chihin ñu. Cutachi tuñi Nyoo chuun cha cahún tyehe caa.

⁴ ¿Ñáá tuhun ña quichahún cha cundahví cuñí Nyoo nyehé ra chi yo ta cunyeé xaan ra cha sacuví yo? Vaha xaan ñáyiví cuví ra chihin yo. ¿Atu ña tuví iñun vatyí cha cuenda cha cundahví cuñi ra nyehé ra chuun, ta nyatú ra cha nasamon cuhva iyón?

⁵ Soco yoho ndava xaan añimon. Ta ña cuñún nasamon cuhva iyón. Ican cuan cuví cuatyun cha sacayá xaan, ta cuxaan ca cuñí Nyoo nyehé ra chuun ta ñihi ca cutachi tuñi ra chuun quiví cutachi tuñi ra chi ñáyiví. Ta cunyehe yo tyí chihin cha ndaa ta chihin cha ndicha tachí tuñi ra chi yo.

⁶ Tatu sacuví yo cha ña vaha, cutahan chi cha ña vaha chi yo. Tatu sacuví yo cha vaha cutahan chi cha vaha chi yo quiví cutachi tuñi ra chi yo.

⁷ Ta cuhva ra ñáyiví cha ma naa ca maa coo ñu cha nanducú cha vaha ta cha cahnu cuví Nyoo, ñu nanducú cuvaha nuu ra, ñu cha cuñí coo tyicuan ri maa. Cuhva ra tandihí cuan chi ñu cha cuenda vatyí sacuví ñu maa maa ri cha vaha chihin cha cama iñi ñu.

⁸ Soco ñihi xaan cutachi tuñi ra chi ñáyiví sacuví cuhva cuñí maa, ta ña cuñí ñu quichaha ñu tuhun ndicha Nyoo, ta sacuví ñu cha ña vaha.

⁹ Cuaha xaan tindoho ta tucuihya iñi cunyehe tandihí ñu casacuví cha ña vaha. Ta cha xihna ri cutachi tuñi ra chi ñu ñuu Israel, ñáyiví cuenda ra. Ta tyicuan caa tucu cutachi tuñi ra chi ñu cha ñima ñu Israel cuví.

¹⁰ Soco chi tandihí ñu cha sacuví cha vaha, Nyoo cucuhva ra cha cucahnu ñu chihin ra, cha xihna ri chi ñu Israel, tyicuan ta chi ñu cha ñima ñu

Israel cuví. Ta cucatyí ra tyí sñ cuñi ra chihin ñu. Ta cucuhva ra cha taxi ri coo añima ñu.

¹¹ Vatyí Nyoo ña cachí ra chi yo. Cuví ri yo ñu chitó, o cuví ri yo ñu ña chitó, ñn ri cuhva cuñí maa ra chi yo.

¹² Vatyí tandihí ñu casacuví cuatyí ta ña chitó ñu ley cha chaha Nyoo chi ra Moisés, cunaa ñu nuu Nyoo soco ñima cha cuenda tuhun cha catyí ley cuan. Ta ñu casacuví cuatyí ta chitó vaha ñu ley cha chaha Nyoo chi ra Moisés, cutachi tuñi Nyoo chi ñu yoso cuhva catyí suri maa nuu ley cuan.

¹³ Vatyí ñu cha chiñí ley, ta ña nyacuví ñu cuhva catyí Nyoo, ñima ñáyiví vaha cuví ñu nuu ra. Soco tyehe ta iyó noo ñu sacuví cuhva catyí ley, ican ñu cuan, vaha ñu nuu Nyoo.

¹⁴ Tatu ñima ñu Israel cuví ñu ta ña chitó ñu ley cuan, soco tuví iñi ñu yoso caa coo ñu; cha tuví iñi ñu chichi añima ñu, ican cuví ley ñu.

¹⁵ Vatyí chihin cuhva iyó ñu, sañahá ñu vatyí añima ñu ñohó ley Nyoo. Cha chiñi tuñi ñu cuví cha ndaa cuenda ñu, vatyí suri maa ñu tuví iñi ñu tatu vaha o ña vaha cha nyacuví ñu.

¹⁶ Cha tyaa Nyoo tyiño chi ra Jesucristo vatyí coo quiví cusandaa ra cuatyí tandihí ñáyiví iyó siqui ñuhu ñáyiví cha cuenda tandihí tuhun xehe cha sacuví ñu. Tari cuhva catyí tuhun Nyoo cha cahín chihin ndo, tyicuan caa cusandaa ra cuatyí yo.

Ñu Israel nyicón ñu ley cha chaha Nyoo chi ra Moisés

¹⁷ Soco yoho catyún tyí ra Israel cuvún. Ta catyún tyí sacuvún cuhva catyí ley cha chaha Nyoo chi ra Moisés, ra cuví nuu chi ñu Israel quiví cuan. Ta cahnu sahún chuun tyí catyún tyí caá tuhun Nyoo añimon.

¹⁸ Ta chitón cuhva cuñí Nyoo ta ley cuan sañahá chi chuun cha nacachún cha vaha, catyún.

¹⁹ Ta vaha xaan sañahún ityi chi ñu cuaa, cuñí maun. Vaha xaan sacatón ñuhú chi ñu cuahan nu ñaa iñi, cuñí maun.

²⁰ Ta cuñí maun vatyí chitón saquehen ityun chi ñu cha ña chitó. Ta

vatyí chitón tandihí cuií ley ta cha ndicha, chitón yoso caa sañahun chí ñu ña chitó, cuñí maun.

²¹ Tatu tyicuan caa yoho sañahun chí inga ñáyivi, ¿ñáá tuhun ña sañahun chí maun? Tatu suri maun catyún vatyí ña tahán chí suhu yo, ¿ñáá tuhun cha tyi maun suhún?

²² Tatu suri maun catyún vatyí ña tahán chí coo inga ñusihi chí noo rayíi, o inga rayíi chí noo ñaha sihi, ¿ñáá tuhun cha vatyí maun tyicuan caa sacuvún? Tatu tasi cuñún chí xitohyo, ¿ñáá tuhun cha suhún cha tyayíi cha iyó nu nyicú chí chichi vehe ñuhu?

²³ Cahnu sahún chuun vatyí chitón ley Nyoo, soco ticahan nuu chahún chí Nyoo cha cuenda cha ña sacuvún ley cuan.

²⁴ Yucuan chaha vatyí nu tutu tuhun Nyoo catyí chí tyehe caa: “Ñu cha ñima ñu Israel cuví, cahán ña vaha ñu siqui Nyoo cha catyí nyoho”, catyí chí.

²⁵ Ndicha vatyí cha sacuvi ñu tuhun cha tahnya chíin ñi xiñi ndivun ta leun, cha saha ñu circuncidar chuun cuví cuan, tari noo seña cha sañahá vatyí ñáyivi chí Nyoo cuvún. Tuhun cuan tyinyeé chí chuun soco tatu quichahún tandihí ley cha chaha Nyoo chí ra Moisés ñandihí. Soco tatu ña sacuvún cha catyí ley cuan, tari quivi cha ña sacuvun costumbre circuncisión cuví cuan.

²⁶ Soco tatu ñu cha ña sacuví tuhun cuan, ta sacuví ñu cuhva catyí ley Nyoo, cusaha Nyoo tari cha sacuvi ñu costumbre circuncisión cuan, vasi ña sacuvi ñu.

²⁷ Ra cha ña sacuvi costumbre cuan, soco quichahá ra cuhva catyí ley, cusanatuvi ra chí yoho cha ña quichahún, ta yoho, ra chitó ley ta ra sacuvi costumbre circuncisión cuvún.

²⁸ Vatyí ñima cha cuenda vatyí ñu Israel cuví ndo ta chihin cuan ta cuví ndo ñáyivi chí Nyoo. Ta ni ñima cha cuenda cha sacuvi ndo tuhun circuncisión.

²⁹ Vatyí ñáyivi nyaá ley Nyoo aña, ican ñu cuví ñu ñu Israel cha ndicha

vaha. Tari quivi tyaa Tatyí li seña cuan aña ñu, ta ñima ñi ri ñu. Tatyí li Nyoo sacuví cuan, ñima ley cha nyaá nuu tutu. Ta ñáyivi ihya cucuvi ñu ñu vaha nuu Nyoo, ta ñima nuu ñáyivi ri.

3

¹ Tatu tyicuan caa, ¿ñáá cha tyinyeé chí yo cha cuví yo ñu Israel? ¿O atu tyinyeé chí chí yo cha sacuví yo tuhun circuncisión?

² Cuaha cuhva tyinyeé chí. Cha xihna ri, Nyoo chaha ra ley maa ra chí yo ñu Israel.

³ Soco yoso caa tatu yihí ñu Israel ta ña chinó iñi ñu cuhva catyí Nyoo, ¿atu cha catyí ñu cuan ta ma sacuvi ca Nyoo cuhva catyí ra?

⁴ ¡Ñima! Soco na saha yo cuenda vatyí Nyoo ndicha ra. Sacuví ra tandihí cuhva cha catyí ra. Vasi tandihí ñáyivi cahán ñu cuendu. Vatyí nu tutu Nyoo catyí chí tuhun ra tyehe caa:

Sutu Mañi yuhu, cunyehe ñáyivi vatyí ñahri cuendu cahún. Ta cunyehe vaha ñu chuun vatyí ndicha cha cahún.

⁵ Chitó yo vatyí vaha ca quetuvi noo cha ndi tatu nyaá noo cha mecu xiin. Ndi xaan ca nyehe cuan. Cha ndicha cuví cuan. Soco catyí ñáyivi vatyí tyicuan caa tucu maa Nyoo chihin yo, ndi xaan ca natuvi ra tatu yoó ta cunyacuvi ca yo cha quiñi caa. Sacahnú yo chí ra cuví cuan, catyí ñu. Tyicuan ta ña tahán chí tachi tuñi ra chí yo, catyí ñu. Soco tatu tachí tuñi ra chí yo, ña vaha ra vatyí yoó sacahnú yo chí ra, catyí ñu.

⁶ Ña vaha cuhva cahán ñu, vatyí tyehe ta ña vaha Nyoo ma cuvi tachi tuñi ra chí yo. Soco chitó yo tyi tahán chí tachi tuñi ra chí yo cha cuenda cuatyí yo.

⁷ Tatu nyehé yo tyi vaha Nyoo chihin cuatyí sacuví ñáyivi, ¿atu tahán chí tachi tuñi ra chí ñu? Catyí ñu tyi ña tahán chí, soco ña ndicha.

⁸ Tyehe ta ndicha cha cahán ñu cuan, vaha taxin ca sacuvi yo maa

maa ri cha quiñi caa tacuhva nyehe ñáyiví tyi Nyoo vaha ra. Yihí ñu catyí ñu tyi tyicuan caa sañahá ndi. Ta cutachi tuñi Nyoo chi ñu chaha cha catyí tyi cahán ñu cuendu siqui ndi.

Tandihí yo ta iyó cuatyí yo

⁹ Ta yoso caa ¿atu vaha ca yoó ñu Israel ta ñima ca inga ñáyiví? ¡Ñimal! Vatyí cha yahá sañahi chi ndo vatyí iyó cuatyí tandihí yo. An cuví ri yo ñu Israel, an cuví ri yo ñu cha ñima ñu Israel cuví, soco iyó maa cuatyí yo.

¹⁰ Tyicuan caa catyí nu tutu Nyoo, nu catyí chi tyehe caa:

Yori maa ñáyiví vaha iyó, cha ni ña noo maa.

¹¹ Yori ñu cutuñí iñi tuhun Nyoo.

Yori maa nanducú chi Nyoo.

¹² Tandihí ñu sandoo ñu chi Nyoo, ta tandihí ñu ta sacunaa ñu chi ñu.

Yori maa ñu sacuví cha vaha.

Cha ni ña noo maa.

¹³ Tari noo ñaña ndiyí cha tacohó yuhu cuví sucun ñu.

Vatyí quiñi xaan cahán ñu.

Ta cahán ñu cuendu. Tari cha venenu coo yihí yuhu ñu vatyí cahán uhvi ñu chi tahan ñu.

¹⁴ Maa maa ri ca maa cha quiñi caa cahán ñu.

¹⁵ Yatyí xaan ñu cha cacahñi ñu chi tahan ñu.

¹⁶ Chahá xaan ñu tundoho ta tucuihya iñi chi ñáyiví chihin cuhva iyó ñu.

¹⁷ Ta ña chitó ñu yoso caa cuhva coo taxi ri ñu chihin Nyoo, ni chihin tahan ñu.

¹⁸ Ni ña chicá iñi ñu tatu tachi tuñi Nyoo chi ñu noo quiví, catyí chi nu tutu Nyoo.

¹⁹ Chitó yo vatyí tandihí cha catyí ley chahnu cha quehen cuenda ra Moisés, catyí chi cha cuenda ñu nyicón ley cuan, tacuhva vatyí ma cuvi catyí ñu tyi ñahri cuatyí ñu. Soco coto ñu vatyí cutahan chi cutachi tuñi Nyoo chi ñu vatyí iyó cuatyí ñu. Ta tyicuan caa tucu tandihí ñáyiví iyó siqui ñuhu ñáyiví.

²⁰ Ni minoo ñáyiví ma cuvi cuvaha ñu nuu Nyoo cha cuenda tyi sacuví ñu cuhva catyí ley. Soco ley cuan nyaá

chi cha cuenda vatyí sacotó chi chi yo tyi iyó cuatyí yo.

Cha cuenda cha chinó iñi yo chi Nyoo ta cuvaha yo nuu ra

²¹ Soco vityin sandoó yo inchiyo xiin ley cuan ta cua nyehe yo vatyí iyó noo cuhva cuvaha yo nuu Nyoo. Suri maa Nyoo sañahá ra chi yo nu tutu tuhun ra cha tyaa profeta ta cha naha. Tatu sacuahá yo yucuan, coto yo noo cha ndicha.

²² Vatyí cha cuenda cha chinó iñi yo chi ra Jesucristo ta cuvaha yo nuu ra, ta sahá ra tuhun tyi ñahri cuatyí yo. Ta ña cachí ra chi yo tatu ñu Israel cuví yo o ñima.

²³ Tandihí ri ñáyiví sacuví ñu cuatyí, ta cañi xaan nyaá ñu chihin cuhva cuñí Nyoo, ta cha tyaqui Nyoo ma cuvi cunyaa chihin ñu.

²⁴ Soco cha cuenda cha vaha ñáyiví cuví Nyoo chihin yo, chahá maa ra cha cuvaha yo nuu ra, ta ña tñn cuenda ca ra cuatyí yo. Vatyí chahnya ra Cristo Jesús cuatyí yo.

²⁵ Nyoo saquichí ra chi ra Cristo vatyí cati niñi ra ta cúvi ra nu cruzi cha catyí cuatyí yo. Ta vityin cuví saha Nyoo tucahnu iñi chi yo tatu chinó iñi yo chi ra Cristo. Ta cuví chi tyehe caa, tacuhva nyehe ñáyiví tyi Nyoo vaha ra. Ta tyembu chahnu, Nyoo ña tñn cuenda ra cuatyí ñáyiví cha cuenda vatyí cuchaa chi noo quiví cha cuquichi ra Cristo ta sanaa ra cuatyí ñu.

²⁶ Ta tyicuan caa cuví tacuhva vatyí nyehé ñáyiví vatyí Nyoo tyicuan ri vaha ra, ta sahá ra tuhun tyi vaha tandihí ñu chinó iñi chi ra Jesús.

²⁷ ¿Atu cuví sacahnu yo chi yo vityin? Ma cuvi. ¿Ñáá tuhun? Cha cuenda vatyí ma cuvi catyí yo vatyí sacuví yo cha catyí ley, ta yucuan chaha vaha yo nuu Nyoo. Vatyí cha cuenda cha chinó ri iñi yo chí ra ta cuvaha yo nuu ra.

²⁸ Cha chitó vaha yo vityin vatyí Nyoo sacuvaha ra chi yo nuu ra chihin cha chinó iñi yo chí ra, ta ñima

chihin cha sacuví yo cha catyí ley ta cuvaha yo nuu ra.

²⁹ ¿Atu Nyoo cuenda ñu Israel ri cuví ra? ¿Atu ñima suri ra cuví Nyoo ñu cha ñima ñu Israel cuví? Suri Nyoo tucu ñu cuan cuví chi ra.

³⁰ Vatyí noo tuhun ri maa ra iyó. Ta ican ra sacuvaha ra chi yo nuu ra cha cuenda cha chinó iñi yo chi ra. Cuví ri yo ñu sacuví tuhun circuncisión cuan, o cuví ri yo ñu ña sacuví.

³¹ Tatu tyicuan caa, ¿atu ña vaha ca ley chahnu cuan? ¡Ñima cha ña vaha ca! Vaha. Soco vityin chihin fuerza maa ra Cristo sañahá yo vatyí ndi maa cha catyí ley cuan ta ndicha.

4

Cuhva chiyo ra Abraham sañahá chi chi yo yoso caa cuvaha yo nuu Nyoo

¹ ¿Ñáá cha catyí yo cha cuenda ra Abraham sutu chahnu yo? ¿Ñáá cuenda catyí Nyoo vatyí vaha ra?

² Tyehe ta cuvaha ra nuu Nyoo cha cuenda cha sacuví ra cha vaha, yucuan ndicha, cuví sacahnu ra chi ra, soco ñima nuu Nyoo.

³ Vatyí ¿ñáá catyí nu tutu tuhun Nyoo? Catyí chi vatyí ra Abraham chinó iñi ra chi Nyoo, ta cha cuenda cha chinó iñi ra chi Nyoo, Nyoo saha ra tuhun tyi vaha ra.

⁴ Vaha, vityin cuacuhve noo cuhva chi ndo: Tatu minoo ra sacuví ra noo tyiño, yahvi cha quehén ra ñima cha ñihi caha ra cuví, soco yahvi tyiño saha ra, ican cuví.

⁵ Soco tatu noo ra cha ña saha tyiño ta ñihi ra cha ñihi ra, noo cha ñihi caha ra cuví. Ta tyicuan caa cuví chihin noo ra cha ña nducu cuhva cacu cha cuenda cha sacuví ra ley, soco chinó iñi ra vatyí Nyoo sahá ra tucahnu iñi chi ñu iyó cuatyí, Nyoo cusaha ra tuhun tyi vaha ra cha cuenda cha chinó iñi ra chi ra.

⁶ Ra David cahan ra tuhun tusi iñi cha iyó chi ñáyivi cha saha Nyoo tuhun vatyí vaha ta ña tñin cuenda ra cuatyí cha sacuví ñu.

⁷ Tyehe caa catyí ra David:

Ñáyivi cha saha Nyoo tucahnu iñi cuatyí, si xaan cuñi ñu, vatyí Nyoo ña tñin cuenda ra cuatyí ñu.

⁸ Si xaan cuñi ñu ña tñin cuenda Nyoo cuatyí.

⁹ ¿Atu cha cuenda ri ñu sacuví tuhun cha tahnya ñi cuví tusi iñi ihya, o cuví tucu chi cha cuenda ñu ña sacuví cuan? Cha yaha sañahi chi ndo vatyí Nyoo saha ra tuhun tyi vaha ra Abraham cha cuenda cha chinó iñi ra chi ra.

¹⁰ Soco ¿ama saha ra tuhun tyi vaha ra? ¿Atu cha ni cumañi ca sacuví ra Abraham tuhun circuncisión cuan, o cha yaha? Ñima nya cha yaha, soco cha ni cumañi ca.

¹¹ Yaha cuan ta sacuví ra Abraham tuhun cuan, tari noo seña ri o sellu vatyí Nyoo cha yaha saha ra tuhun tyi vaha ra cha cuenda cha chinó iñi ra chi ra. Ta cha cuenda ihya cuví ra Abraham tari noo sutu tandi hi yo ñu chinó iñi Nyoo vasi ña sacuví yo tuhun circuncisión. Ta tyicuan caa, Nyoo sahá ra tuhun vatyí vaha yo.

¹² Ndicha vatyí ra Abraham cuví tucu ra sutu ñu casacuví tuhun cuan, soco tatu chinó tucu iñi ñu chi Nyoo tari chinó iñi tucu maa ra Abraham sutu chahnu yo, quivi cha ta sacuví ca ra tuhun cuan.

Chihin cha chinó iñi yo ta ñihi yo cha chahá Nyoo chi yo

¹³ Vatyí Nyoo catyí ra chi ra Abraham ta chi sehe ra vatyí cuhva ra cha cunyaca ñaha ñu ñuhu ñáyivi chihin ra. Soco savaha Nyoo promesa cuan, ñima cha cuenda vatyí ra Abraham sacuví ra cha catyí ley, soco cha cuenda vatyí chinó iñi ra chi Nyoo, ta Nyoo saha ra tuhun vatyí vaha ra.

¹⁴ Tyehe ta maa maa ri ñu cha sacuví cuhva catyí ley, cuñihi ñu noo cha cucuhva Nyoo, ñahri yahvi nyaá cha chinó iñi yo chi Nyoo, ta ni ñahri yahvi nyaá cha catyí ra tyi cuhva ra chiyo.

¹⁵ Vatyí ley cuan sañahá chi vatyí tahán chi tachi tuñi Nyoo chi yo tatu ña sacuví yo cuhva catyí chi. Soco

tyehe ta ñahri ley iyó, ñahri cuatyí yo coo.

¹⁶ Yucuan chaha cuñihi yo promesa Nyoo cha cuenda cha chinó ñi ra, tacuhva vatyí cuví chi noo tumañi ñi cha chahá ra chi tandihí yo cha cuví yo ñáyiví chi ra Abraham. Ñima ñu chinó ri ñi chi Nyoo ta quichahá ley cuan cuñihi, soco cuñihi tucu ñu cha ña ita ñi ley, soco chi Nyoo ri chinó ñi ñu tari chinó ñi ra Abraham. Ican ra cuví sutu tandihí ñáyiví cha chinó ñi chi Nyoo.

¹⁷ Vatyí tari catyí Nyoo nu tutu ra tyehé caa: “¿Yoho cucuvun tari noo sutu cuaha xaan ñáyiví?”, coo siqui ñuhu ñáyiví”, catyí ra chi ra Abraham. Ta cha catyí ra tyicuan caa, cuñi chi catyí vatyí cuví yo sehe ra Abraham nuu Nyoo. Chinó ñi ra Abraham chi Nyoo, vatyí Nyoo sanandotó ra ndiyí, ta chihin tuhun cahán ra sacóo ra cha cumañi ca coo.

¹⁸ Ra Abraham chinó ñi ra chi Nyoo vasi ma cuví ñihi ra promesa cuan tyaá maa ra cuhva, vatyí cha chahnu xaan ra. Soco yihí ñi ra cha cuñihi ra. Ta tyicuan caa, ñihí ra promesa Nyoo ta cuví ra sutu cuaha ñáyiví, tari cuhva catyí Nyoo chi ra: “Tyehé caa cucucuaha ñáyiví chuun”, catyí ra chi ra.

¹⁹ Ra Abraham ña sandihí ra cha chinó ñi ra, vasi cha noo cientu cuiya ra ta tuví ñi ra vatyí cha cuñi cuví ra. Tari maa ra ta tari cu Sara ñasihí ra, ma cuví ca coo sehe ñu, tyi cha chahnu xaan ñu.

²⁰ Soco ña ndú uvi ñi ra cha cuñihi ra cha catyí Nyoo tyi cuhva ra chi ra. Soco chinó ñi ra chihin cha ñi ñi ra. Ta yihí ca ñi ra chi Nyoo. Ta sacahnú ra chi ra,

²¹ cha cuenda vatyí chitó vaha ra vatyí Nyoo iyó tunyee ñi chi ra cha cusacuví ra cha catyí ra chi ra.

²² Yucuan chaha Nyoo saha ra tuhun tyi vaha ra cha cuenda cha chinó ñi ra chi ra.

²³ Saha Nyoo tuhun vatyí vaha ra Abraham chaha cha chinó ñi ra chi ra. Ña chicunyaá nuu tutu vatyí noo ri ra Abraham cuvaha ra,

²⁴ soco chicunyaá tucu nuu tutu cha cuenda yoó. Vatyí sahá Nyoo tuhun tyi vaha tucu yo vatyí chinó ñi ra chi ra, vatyí ican ra sanandotó chi ra Jesús, Sutu Mañi yo.

²⁵ Ta maa ra chahá cuenda chi ra Jesús tyi cuví ra cha cuenda cuatyí yo, ta nandotó ra tacuhva vatyí cuví cuvaha yo nuu ra.

5

Vityin cha ñicoo vaha yo chihin Nyoo, cuaha cha vaha cucuhva ra chi yo

¹ Ta cha yahá nduvahá aña nuu Nyoo cha cuenda cha chinó ñi ra, ñicoo vaha yo chihin ra cha cuenda Sutu Mañi yo Jesucristo.

² Vatyí cha cuenda ra Cristo ñihí yo cha vaha Nyoo cha cuenda cha chinó ñi ra. Yucuan chaha ñi ñi yo ta si cuñi yo, ta yihí vaha ñi yo vatyí cucuhva ra cha cucahnu cuví yo chihin ra.

³ Ta ñima yucuan ri cusí cuñi yo, tahán tucu chi cusí cuñi yo quivi nyehé yo tindocho. Vatyí chitó yo vatyí cha nyehé yo tindocho cuan cutuhva ca yo coo cha cama ñi yo.

⁴ Ta tatu chihin cha cama ñi yo, yahá yo tindocho, quita vaha yo nuu Nyoo. Ta yucuan ta chitó vaha yo tyi cuñihi yo ndí maa cha cucuhva ra chi yo.

⁵ Tatu yihí ñi yo chi maa ra, ma cucahan nuu yo nyehé yo chi ra, vatyí cuñi xaan ra chi yo cha cuenda Tatyí li ra cha chahá ra cunyaá aña yo.

⁶ Vatyí quivi cha ña ñihí ca yo yoso caa sacuví yo chihin cha cuaha cuatyí yo, quivi cuan quichí ra Cristo, quichí cuví ra cha cuenda yo ñu iyó cuatyí.

⁷ Chitó yo vatyí yori caña ñi cuví tyiño nuu noo ñáyiví. Vasi xityi ri caña ñi ñu cuhva ñu ñáyiví ñu cha cuenda noo ñu vaha xaan.

⁸ Soco yucuan cuví nu sañahá Nyoo vatyí cuñi ra chi yo, vatyí quichi cuví ra Cristo cha cuenda yo vasi iyó xaan cuatyí yo.

⁹ Ta vityin cha cha yahá cuvaha yo nuu Nyoo cuenda cha chihí ra Cristo,

yucuan chaha chitó vaha yo tyi ma cuhun ca yo anyaya nu cutachi tuñi Nyoo chi ñáyiví ña chinó iñi chi ra.

¹⁰ Quiví cuan xaan cuví iñi yo chi Nyoo, soco sanicoo vaha ra chi yo chihin ra cha cuenda cha chihí Sehe ra. Yucuan chaha chitó vaha yo tyi cusacacu ndihí ra chi yo vatyí iyó ñáyiví ra Cristo añima yo vityin cha iyó vaha yo chihin ra.

¹¹ Ta ñima ihya ri, soco cusii tucu cuñí yo chihin Nyoo cha cuenda Sutu Mañi yo Jesucristo, vatyí cha cuenda ra nicoo vaha yo chihin Nyoo.

Ra Adán ta ra Cristo

¹² Cha cuenda noo rayii quihví cuatyí siqui ñuhu ñáyiví ta chicoo tuhun chihí. Ta tuhun chihí cuan chicoo chi siqui tandihí ñáyiví vatyí tandihí ñu sacuví ñu cuatyí cha cuenda ra Adán.

¹³ Nyata ni cumañi ca cuhva Nyoo ley chí ra Moisés ta cha iyó cuatyí siqui ñuhu ñáyiví, soco ña tiñ Nyoo cuenda cuatyí ñáyiví ta ni cumañi ca cuhva ra ley cuan.

¹⁴ Soco nyacua nya quiví ra Adán ta nyacua nya quiví ra Moisés, chinyaca ñaha tuhun chihí chí ñu cha sacuví cuatyí, vasi ñima tahan cuatyí ra Adán cuví, cha ña quichaha ra chí Nyoo. Ta ra Adán cuví ra tari noo xiñahñu noo ra cha cua quichi.

¹⁵ Soco cuatyí ra Adán ña ndiquí tahan chí chihin tumañi iñi cha chaha Nyoo chí yo. Vatyí cha cuenda cuatyí noo rayii cuan, cuaha xaan ñáyiví chihí. Soco sacacú Nyoo chí yo cha caha ri, cha cuenda noo ri rayii ta ican ra ihya cuví ra Jesucristo. Ta cahnu xaan ca cuví cuan. Ta cha cuenda cha vaha chí cuaha ñáyiví cuví.

¹⁶ Cuatyí noo ri rayii ra Adán cuan, ma cuví ndiquí tahan chí chihin cha sacacú Nyoo chí yo. Vatyí cha cuenda cuatyí noo ri ra cuan, Nyoo tachí tuñi ra chí ñáyiví. Soco vityin chihin cha ñahri tyiyahví yo, Nyoo sacacú ra chí yo ta sahá ra tuhun tyi vaha yo nuu ra, vasi cuaha xaan cuatyí sacuví yo.

¹⁷ Ndicha vatyí quichaha nyaca ñaha tuhun chihí siqui ñuhu ñáyiví cha

cuenda cuatyí noo ri rayii. Ta cha tyicuan caa chitó yo vatyí cahnu ca cuví cha vaha cha sacuví nonga ra, ra Jesucristo. Vatyí tandihí ñu cha ñihí cha vaha cha chahá Nyoo, cha cuvaha ñu nuu ra, ta iyó ñu ñáyiví chaha chihin tunyee iñi ra Jesucristo.

¹⁸ Tari cha catyí cuatyí ra Adán ta tachí tuñi Nyoo chí tandihí ñáyiví iyó siqui ñuhu ñáyiví, tyicuan caa tucu cha cuenda cha vaha cha sacuví ra Jesucristo, Nyoo saha ra tuhun tyi vaha ñáyiví nuu ra ta chahá ra noo ñáyiví vaha coo tandihí ñu.

¹⁹ O cuñí chí catyí tyehe caa: Cha cuenda cha ña quichaha ra Adán cuan nu cahán Nyoo, cuaha xaan ñu chicoo cuatyí ñu. Ta suri tyicuan caa tucu cha catyí cha quichaha ra Cristo nu cahán Nyoo, cuaha xaan ñu cucu vaha ñu nuu Nyoo.

²⁰ Vatyí Nyoo chaha cuenda ra ley cuan chí ra Moisés tacuhva nacoto ñáyiví tyi iyó cuatyí ñu. Ta vasi que-tuví xaan cuatyí yo cha cuenda ley cuan, soco Nyoo cahnu ca tucahnu iñi iyó chí ra chihin yo vatyí cuñí xaan ca ra chí yo.

²¹ Tari chinyaca ñaha cuatyí chí yo ta chaha chí tuhun chihí chí yo, tyicuan caa tucu nyacá ñaha tumañi iñi Nyoo chí yo vityin ta sacuvaha ra chí yo nuu ra vatyí coo yo noo ñáyiví cha ma naa ca maa cha cuenda Sutu Mañi yo Jesucristo.

6

Ma sacuvi ca yo cuatyí soco sacuvi yo cuhva catyí ra Cristo

¹ ¿Yoso caa catyí yo vityin? ¿Atu cusacuvi ca yo cuatyí tacuhva vatyí sañaha Nyoo vatyí cuaha xaan tuc-ahnu iñi iyó chí ra?

² Ma sacuvi ca yo. Yoó cha yaha ndu uvi iñi yo cuatyí yo. Tari quiví chihí cuatyí yo cuví cuan. Ta ¿yoso caa cuví sacuvi ca yo vityin? Ma cuví ca.

³ ¿Atu ña chitó nyoho vatyí cha ndu iñi ri yo chihin ra Cristo Jesús cha cuenda cha condutya yo? Tari quiví chihí yo chihin ra cuví cuan.

4 Vatyí cha cuenda cha condutyá yo, tari quiví cha quihví yo chichi ñuhú ñn ri chihin ra Cristo quiví chihí ra cuví cuan. Ta tari nandoto ra Cristo chihin cha ndicha ñuhu Sutu yo Nyoo, tyicuan caa tucu maa yo, tacuhva vatyí coo yo noo ñayiví chaa chihin ra.

5 Ta ñn ri coño ñuhu nanduví yo chihin ra, tari quiví chihí yo ñn ri chihin ra cuví cuan, ta cha tyicuan caa, cunandoto tucu yo tari nandoto ra.

6 Ta chitó yo vatyí tandihí cuhva chiyó yo ta ityi chata ca, cha yaha chihí chi nu cruzi chihin ra Cristo, tacuhva vatyí coño ñuhu cuatyí yo ma cuví ca cunyaca ñaha chi chi yo.

7 Vatyí ñu cha yahá chihí, ma cuví ca sacuví ñu cuatyí.

8 Ta tatu cha yahá chihí yo chihin ra Cristo, chinó ñni yo vatyí cucoo tucu yo chihin ra.

9 Ta chitó yo vatyí cha yahá chihí ra Cristo, noo ri chaha nandoto ra, ta ma cúvi ca ra. Ñahri ca tunyee ñni iyó chi tuhun chihi cha cunyaca ñaha ca chi chi ra.

10 Yahá cha chihí ra Cristo cha catyi cuatyí ñayiví, nandoto ra cha ma cúvi ca maa ra. Ta vityin iyó ra cha cuenda maa Nyoo.

11 Ta tyicuan caa tucu maa yo, ma sacuví ca yo cuatyí. Saha yo tuhun tyi cha yahá chihí yo cha cuenda cuatyí cuan. Soco coo yo cuhva cuñí Nyoo cha cuenda cha ñn ri cuví yo chihin ra Cristo Jesús Sutu Mañi yo.

12 Yucuan chaha yoó ma cuhva yo ityi cha cunyaca ñaha ca cuatyí chi coño ñuhu yo. Ma cuhva yo ityi chi coño ñuhu yo cha saniñi chi chi yo cha sacuví yo noo cha ña vaha cha cuñí chi.

13 Ma cuhva yo ityi chi coño ñuhu yo cha sacuví chi cha quiñi caa. Soco cuhva cuenda yo chi yo chi Nyoo, tari noo ñayiví cha chihí ta nandoto. Cuhva cuenda yo coño ñuhu yo chi Nyoo tacuhva vatyí sacuví yo cha vaha.

14 Vatyí cuatyí yo ma cuví ca chasaha chi chi yo. Vatyí ley cha tyaa

ra Moisés, ña nyacá ñaha ca chi chi yo, soco cha cacu ñnima yo ta iyó yo cha cuenda tumañi ñni cha chahá Nyoo chi yo.

Cuví yo tari noo musu cha sacuví cha vaha

15 Iyó yo cha cuenda tumañi ñni cuan, ta vityin ña nyacá ñaha ca ley chi yo. ¿Ta tatu ña nyaca ñaha ca ley chi yo, atu tahán chi sacuví ca yo cuatyí? Ña tahán chi.

16 Nyoho chitó vaha ndo vatyí tatu cuví ndo musu noo ra, tahán chi sacuví ndo cha catyí ra cuan. Ta tyicuan caa cuví yo musu ra cha tuhvá yo quichahá chi. Yucuan chaha tatu quichahá yo cha cuñí cuatyí cha sacuví yo, tari noo chitoho yo cuví cuatyí cuan, vatyí quichahá yo chi cuan. Ta cunaa yo chihin cuan. Soco tatu quichahá yo chi Nyoo, cusaha ra tuhun tyi vaha yo.

17 Soco tyahvi nyoo chi Nyoo, tyi nyoho nu quichi chi cuví ndo noo musu chi cuatyí vatyí quichahá ndo chi cuan. Soco vityin chihin cha ñni ñni ndo quichahá ndo tuhun Nyoo cha sañahá ñu chi ndo.

18 Cha yahá cundaá cuatyí ndo, ta vityin ña nyacá ñaha ca chi chi ndo. Ta vityin cuví ndo noo musu cha cua sacuví cha vaha.

19 Cahín noo cuhva cha ña yñ ri chihin ndo vatyí ta cutuñi vaha ca ñni ndo tuhun Nyoo. Quiví cuan chahá cuenda ndo coño ñuhu ndo chi cha quiñi caa ta cha ña vaha vatyí sacuví ndo cha ña vaha. Vityin ñacuhva cuenda ndo coño ñuhu ndo chi Nyoo tacuhva vatyí coo ndo noo ñayiví cachi, ta maa maa ri cha vaha sacuví ndo nuu ra.

20 Quiví cuví ndo musu cha quiñi caa, ña cuví sacuví ndo cha vaha.

21 Soco ¿ñáá cha ñihí ndo chihin cuan? Maa ri ticahan nuu chahá cuan chi ndo. Ta ña tuví ñni ndo. Maa ri tuhun chihi ta anyaya nyisó cuan.

22 Soco vityin ña nyacá ñaha ca cuatyí chi ndo. Ta vityin cha sacuví ndo tyiño nuu Nyoo. Ta ihya ndicha tyinyeé chi chi ndo vatyí chihin ihya

cuví coo ndo noo ñáyiví cachi. Ta nu ndihi tuhun tyicuan ri maa cucoo ndo chihin Nyoo.

²³ Cha sacuví yo cuatyí, ican cuan chahá tuhun chihi chí yo. Soco tumañi iñi cha chahá Nyoo chí yo, ican cuan cuví ñáyiví cha ma naa ca maa. Ta ican cuan chahá ra ta ñahri tyiyahví yo, cha cuenda cha ñn ri cuví yo chihin ra Cristo Jesús, Sutu Mañi yo.

7

Ña nyacá ñaha ca ley chahnu chi ñu yihí cuenda ra Cristo

¹ Yañi, nyoho ñu chitó ley cuví ndo, chitó ndo vatyí ley nyacá ñaha chí chí noo ñáyiví cha ñi ri ca cha iyó ñu.

²⁻³ Ta cuñun, noo ñaha tandaha, catyí ley vatyí coo ña chihin yñi ña nyacua nya cúvi ra. Ta tatu iyó ña chihin inga rayñi cha ñi ri cha iyó yñi ña, chicoo cuatyí ña nuu Nyoo. Soco tatu cha yahá chihi yñi ña, ña nyacá ñaha ca ley cuenda ñu tandaha chí ña, ta cuví tandaha ña chihin inga ra, ta ma coo cuatyí ña nuu Nyoo.

⁴ Ta tyicuan caa tucu nyoho yañi. Cha chihi ndo cha cuenda ley chahnu ta cuví ndo ñu cuenda ra Cristo vatyí ican ra cuví yñi ndo vityin. Ta ican ra cuví ra cha nandoto, tacuhva vatyí cuví cotyíño Nyoo chí yo ta sacuvi yo cha vaha.

⁵ Quiví chiyo yo cuhva cuñí coño ñuhu yo, ley chahnu cha tyaa ra Moisés, tacuhva sanaquiquí ri chí chí yo cha sacuvi yo cha quiñi caa, vatyí catyí chí tyi ma sacuvi yo. Soco sacuvi yo, ta yucuan cuví cha chahá tuhun chihi chí añima yo.

⁶ Soco vityin ña nyacá ñaha ca ley chahnu cuan chí yo, vatyí cha yahá chihi cha quiñi caa yo chihin ra Cristo. Ta vityin cuví sacuvi yo tyiño nuu Nyoo vatyí iyó yo ñáyiví chaa cha chahá Tatyí Ii Nyoo chí yo, ta ña sacuví ca yo tari sacuví yo quiví nyicon xaan yo ley chahnu cuan.

Ley Nyoo, ican sañahá vatyí iyó cuatyí yo

⁷ Ta vityin yoso caa, ¿atu ña vaha ley cuan? Ñima cha ña vaha. Vaha. Soco tyehe ta ña tuví ley cuan, ma cote ñáa cha cuví cuatyí. Ni ma cote tyi ña vaha cha quichi cuví iñi cha chí inga ñáyiví, tyehe ta ña catyí ley cuan vatyí ña vaha.

⁸ Tyehe ta ñahri ley cuan, ma cote ñáa cha cuví cuatyí, ta ma cuñi xain sacuvi, soco quiví cha chité ñáa cha cuví cuatyí, yucuan quiví quichi cuví xaan iñi sacuvi, vatyí naquiquí cha quiñi caa cha iyó chí. Soco tyehe ta ñahri ley, ma coto yo tyi iyó cuatyí.

⁹ Ta quiví cha ña chité ñáa tuhun cahán ley cha chahá Nyoo chí ra Moisés, chica iñi vatyí ñahri cuatyí iyó nuu Nyoo. Soco quiví chité ley cuan, ta chité vatyí tahán chí cunai nuu Nyoo vatyí iyó cuatyí.

¹⁰ Catyí ley cuan tyi tatu quichahí chí chí, cucoi tyicuan ri maa. Soco cha nuu cha ñihi tahvi añime chihin ley cuan, cunaa ndihi nuu Nyoo.

¹¹ Ta cuatyí cha iyó chí, sandaví ñaha chí chí vatyí chotyíño chí ley chahnu cuan tacuhva vatyí tahan chí cunai nuu Nyoo, vatyí ña quichahí nu cahán ley cuan.

¹² Ley cha chahá Nyoo chí ra Moisés, vaha xaan, vatyí tuhun cha chahá maa Nyoo cuví, ta tandihi cha catyí ra vatyí sacuvi yo, vaha xaan ta cuñi xaan.

¹³ Ta ley vaha cuan, ¿atu ican cuan sativí chí? Ñima. Cuatyí cha sacuví, ican sativí chí, yucuan chaha tahan chí cunai nuu Nyoo. Vatyí ley vaha cuan, ican cuví cha sañahá chí vatyí cuatyí cuví cha sacuví. Ta cha tyicuan caa, sañahá ley vatyí quiñi xaan caa cha sacuví yo cuatyí.

¹⁴ Ta chitó yo vatyí ley cuan, Nyoo chahá. Ta ñahri cuatyí ley cuan. Soco mai iyó cuatyí vatyí sacuví cha quiñi caa ta nyacá ñaha cuatyí cuan chí.

¹⁵ Ña cutuñi iñi ñáa cha tahin. Vatyí cuñi sacuvi cha vaha, ta ña cuví sacuvi. Ta cha ña vaha cha ña cuñi sacuvi, ican cuan sacuví.

¹⁶ Cuñi xain sacuvi cha vaha, soco ña cuví sacuvi, ta cha tyicuan caa tin

cuenda vatyí ley chahnu Nyoo, vaha chi.

¹⁷ Ñima ca mai sacuví cha ña vaha, soco cuatyí cha iyó chii, ican cuan sacuví cha ña vaha.

¹⁸ Vatyí chité vatyí iyó cuatyí cha cuenda coño ñuhi. Yucuan chaha ñahri cha vaha sacuví, vatyí quichí cuví iñi sacuvi cha vaha, soco ña cuví.

¹⁹ Cuñí sacuvi cha vaha, soco ña sacuví ta sañihí que sacuvi cha ña vaha.

²⁰ Ta tatu sacuví cha ña cuñí sacuvi, ñima ca mai sacuví, soco cuatyí cha iyó chii, ican cuan sacuví.

²¹ Ta tyehe caa iyó noo cha tahin, tatu cuñí sacuvi cha vaha, maa ri cha ña vaha sacuví.

²² Vatyí chichi añime tahán xaan iñi ley Nyoo.

²³ Soco iyó inga ley chichi coño ñuhi, ta ña tahán iñi chi cuhva cha tahán iñi añime. Ta chahá chi cha cunyaca ñaha cuatyí cha iyó chichi coño ñuhi chii.

²⁴ ¡Ndahví yuhu ra ndahví! ¿Yóó ra cusacacu chii tacuhva ma cunai nuu Nyoo chihin cuhva ña vaha cha nyacuví coño ñuhi?

²⁵ Noo tuhun ri maa Nyoo sacacú ra chii cha cuenda ra Jesucristo. ¡Tyahví nyoo chi Nyoo cha cuenda cuan! Ta vityin nyehí vatyí chihin añime cuñí sacuví ley Nyoo, soco coño ñuhi cuñí chi sacuví chi ley cuatyí.

8

Tatyí Ii Nyoo tyinyeé chi chi yo ta cuví coo yo noo ñayiví chaa

¹ Soco vityin, Nyoo ma tachi tuñi ca ra chi ñu ndu ñin ri chihin ra Cristo Jesús, ta ña iyó ca ñu cuhva cuñí coño ñuhu ñu, soco iyó ñu cuhva cuñí Tatyí Ii ra.

² Ta tyicuan caa tucu yuhu, Tatyí Ii Nyoo nyacá ñaha chii vityin vatyí ndachí chi chii, ta chahá chi noo ñayiví chaa coi cha cuenda cha ñin ri cuví chihin ra Cristo Jesús. Ta vityin ña nyacá ñaha ca ley cuatyí ta tuhun chihí chii.

³ Nyoo sacuví ra noo cha ña cuví sacuvi ley cha quehen cuenda ra Moisés, vatyí ña cuví chasaha chi

coño ñuhu cuatyí yo cha nyacá ñaha chi yo. Yucuan chaha Nyoo saquichí ra chi Sehe ra. Quichí ra chihin noo coño ñuhu tari maa yo, ta chihí ra cha cuenda cuatyí yo, ta sandihí ra tuhun cha nyacá ñaha cuatyí chi yo.

⁴ Sacuví Nyoo tyehe caa tacuhva cuví sacuvi yo cuhva catyí ley ra, vatyí ñima ca cuhva cuñí coño ñuhu yo iyó yo, soco iyó yo cuhva cuñí Tatyí Ii Nyoo.

⁵ Vatyí ñu iyó cuhva cuñí coño ñuhu, cuhva cuñí chi chicá xiñi ñu, soco ñu iyó cuhva cuñí Tatyí Ii Nyoo, cuhva cuñí Tatyí Ii Nyoo chicá xiñi ñu.

⁶ Ta ñu chicá xaan xiñi maa maa ri tuhun cha cuñí coño ñuhu ñu, cunaa ñu nuu Nyoo. Soco ñu chicá xiñi cuhva cuñí Tatyí Ii. Iyó cha taxi ri añima ñu ta cucoo ñu ñayiví tyicuan ri maa chihin Nyoo.

⁷ Ñu cha maa maa ri cuhva cuñí coño ñuhu chicá xiñi, ñu xaan iñi chi Nyoo cuví ñu, vatyí ni ña cuñí ñu ta ni ña cuví sacuvi ñu cha catyí ley ra.

⁸ Yucuan chaha ñu iyó cuhva cuñí coño ñuhu, ña cuví sacuvi ñu cuhva tahán iñi Nyoo.

⁹ Soco nyoho ña iyó ca ndo cuhva cuñí coño ñuhu, vatyí tatu ndicha cha iyó Tatyí Ii Nyoo añima ndo, iyó ndo chihin cha ñin ri cuví ndo chihin Tatyí Ii Nyoo. Ñu cha yori Tatyí Ii ra Cristo ñohó añima, ñima ñu cuenda ra Cristo cuví chi ñu.

¹⁰ Soco ñu iyó ra Cristo añima, nyitó añima ñu vatyí sanduvaha Nyoo. Soco coño ñuhu ñu chihí chi cha catyí cuatyí.

¹¹ Nyoo sanandoto ra chi ra Jesús cha yaha cha chihí ra. Ta tyicuan caa tucu nyoho, tatu iyó Tatyí Ii Nyoo añima ndo, cusanandoto tucu Nyoo chi coño ñuhu ndo chihin Tatyí Ii ra.

¹² Ta tyicuan caa yañi, nyaá noo cha nyaá siqui yo cha sacuvi yo, soco ñima cha sacuvi yo cuhva cuñí coño ñuhu yo.

¹³ Vatyí tatu iyó ndo maa maa ri cuhva cuñí coño ñuhu ndo, cunaa ndo nuu Nyoo. Soco tatu iyó ndo cuhva cuñí Tatyí Ii Nyoo chihin tunyee iñi

ra, cuví chasaha ndo chi cha quiñi caa cha cuñi coño ñuhu ndo ta cuconyito ndo cha ndicha cuii.

14 Vatyí tandihí ñu sacuví cuhva saquehén ityi Tatyí Ii Nyoo, sehe Nyoo cuví chi ñu.

15 Nya quiñi cha tñn cuenda yo Tatyí Ii Nyoo ta ña yuhví ca yo chi ra, vatyí ñima tari noo ra nyacá ñaha chihin cha xaan cuví ra, ta vityin nanduví yo sehe ra. Tatyí Ii sacahán chi yo na cahan yo chihin Nyoo tyehe caa: “Sutu Mañi yuhu”, catyí yo chi ra.

16 Ta suri maa Tatyí Ii cuan ndu ñn ri chi chihin cha chiñi tuñi yo ta sacoto chi chi yo vatyí cha cuví yo sehe Nyoo.

17 Ta cha cuenda cha cuví yo sehe ra, iyó ityi chi yo cha ñihi yo cha vaha cha catyí Nyoo tyi cuhva ra chi yo, ñn ri chihin ra Cristo. Vatyí tatu ñn ri nyehé yo tindoho chihin ra Cristo, suri ñn ri cucahnu yo chihin ra.

18 Chité vatyí tindoho cha nyehé yo vityin, noo cha luhlu ri cuví cha nuu cha tyaqui cha cunyehe yo nachaa yo nuu nyaá Nyoo.

19 Tandihí cha savaha Nyoo cuñi xaan chi nyehé chi, ta nyatú chi quiñi cha cusañaha ra yóo cha cuví tandihí sehe ra.

20 Vatyí tandihí cha savaha Nyoo tiví chi. Vasi ña cuñi chi tiví chi soco Nyoo chaha ra cha tiví chi cha cuenda cuatyí cha sacuví ñáyivi. Soco catyí Nyoo tyi coo quiñi ta cunduchaa tucu chi inga chaha.

21 Tandihí cha savaha Nyoo ta cunduchaa tucu chi inga chaha, ta ma cutiví ca, quiñi cha cunasama Nyoo cuhva iyó chi vityin. Ta cucusi cuñi chi ñn ri chihin tandihí sehe Nyoo vatyí ma tiví ca chi.

22 Chitó yo vatyí tandihí cha savaha Nyoo ta nyehé xaan chi tindoho. Cahnu xaan tindoho nyehé chi tari cha uhvi cha nyehé noo ñaha sihi cha cacú sehe ña.

23 Ta ñima maa ri maa chi nyehé tindoho, soco nyehé tucu yoó. Vasi cha natñn cuenda yo Tatyí Ii cha

chaha quiñi Nyoo chi yo, soco cahnu xaan tindoho nyehé yo, vatyí cuñi xaan yo cha tahán ri chi quiñi cha cunanduvi yo sehe ra. Vatyí cunasama ra cuhva iyó coño ñuhu yo.

24 Vasi ta ñihi ca yo tandihí cuan soco chitó yo tyi cuñihi yo vatyí chino ñni yo ta chihin cuan cacu yo. Tatu nyatú yo cha cutahan chi chi yo, cuñi chi catyí vatyí ta ñihi ca yo. Tatu cha yaha ñihi yo chi chi, ma cuatu ca yo.

25 Soco tatu yihí ñni yo cha ñihi yo noo cha ta nyehé ca yo, cuñi chi cha cuatu yo chihin cha cama ñni yo.

26 Ta suri tyicuan caa tyinyeé tucu Tatyí Ii chi yo chihin cha vita cuñi yo vatyí ña chitó yo yoso caa cacan tahvi yo chi Nyoo cuhva tahán chi. Ta Tatyí Ii cuan chicán tahvi chi chi Nyoo cha cuenda yo chihin noo tuhun cha ña cuví nacatyí yo.

27 Chitó maa Nyoo ñáá cha caá añaima yo, ta chitó ra ñáá cha cuñi Tatyí Ii ra cacan chi, vatyí chicán chi cuhva cuñi maa ra cha cuenda ñáyivi cuenda ra.

28 Chitó yo vatyí ñáyivi, ñu cuñi vavaha chi Nyoo, tandihí cha cuví chi ñu ta tyinyeé chi chi ñu, vatyí maa ñu cuví ñu nacachí ra, tari cuhva tyaá ra cuhva chi ñu.

29 Vatyí nya quiñi xihna ri, ta cha ñohó nuu Nyoo yóo cuví ñu cucunyon chi ra. Ta tyaá ra cuhva chi ñu vatyí cucuvi ñu tari Sehe ra, ra Jesucristo, tacuhva vatyí cucuvi ra ra cha ñihi ca cha nuu tandihí ca yañi ra, ñu yihí tuhun Nyoo.

30 Ta ñu cha tyaá Nyoo cuhva tyi cuví ñu sehe ra, nacana tucu ra chi ñu. Ta ñu cha nacana ra, suri sacuvaha ra chi ñu nuu ra. Ta ñu cha sacuvaha ra chi, chaha ra cha cucahnu cuví ñu chihin ra.

31 ¿Ñáá cha catyí yo cha tyicuan caa? Tatu Nyoo ta nyaá ra tumañi ñni chi yo, ¿yóo cha cuví tyaá cuatyí siqui yo? Yori.

32 Nyoo ña catyí ra cha ma cuhva cuenda ra sehe ra, soco chaha cuenda ra chi ra vatyí cúvi ra cha cuenda tandihí yo. Ta tatu tyicuan caa, ¿atu

ma cuhva tucu ra tandihí ca cha chiñuhú chi yo ñin ri chihin Sehe ra? Cuhva ra.

³³ ¿Yóó cha cuví tyaa cuatyí siqui ñu cha nacachí Nyoo? Yori. Vatyí Nyoo ican ra cuví ra saha ra tuhun tyi vaha ñu nuu ra.

³⁴ ¿Yóó cha cuví catyí tyi cuhun yo anyaya? Yori. Vatyí ra Cristo cuví ra chihí cha cuenda cuatyí yo, ta nandotó ra ta vityin nyaá ra chiyo vaha ndaha Nyoo, ta chicán tahví ra nuu Nyoo cha cuenda yo.

³⁵ Ñahri cha cuví sacuachiyo chi yo chihin cuhva cuñí xaan ra Cristo chi yo. Vatyí vasi nyehé xaan yo tindoho, vasi iyó tisihi, vasi cahán ñáyívi chi yo cuenda tuhun Nyoo, vasi iyó tama, o ñahri sahma yo, vasi yuhví yo, vasi chihí yo, soco ma cuví sacuachiyo tandihí tindoho cuan chi yo chihin cuhva cuñí ra chi yo.

³⁶ Vatyí tyehe caa cahán chi nu tutu Nyoo tuhun tindoho cha cunyehe yo: Cha cuendon, Sutu Mañi yuhu, ta cuñí cahñi ñáyívi chi ndi tandihí quívi.

Ta tari noo mbee cha cua cahñi ñu, tyicuan caa sacuví ñu chi ndi, catyí chi.

³⁷ Soco vasi yahá yo tandihí tindoho cuan, soco cucuvi vaha ca chasaha yo cha cuenda ra cha cuñí xaan chi yo.

³⁸ Yucuan chaha chitó vahi vatyí ñahri maa cha cuví sacuachiyo chi yo chihin cuhva cuñí xaan Nyoo chi yo. Ni tuhun chihí, ni ñáyívi iyó yo, ni ángel, ni tatyí ña vaha, ni cha cuví vityin, ni cha cucuvi ityi nuu ca, ni noo cuan, ta ma cuví sacusiñ chi chi yo chihin Nyoo.

³⁹ Ni cha iyó nu sucun, ni cha iyó nu cono xaan, ni nonga cha savaha Nyoo, ma cuví sacusiñ chi chi yo chihin Nyoo, ra cuñí xaan chi yo cha cuenda ra Cristo Jesús Sutu Mañi yo.

9

Nyoo nacachí ra chi ñu ñuu Israel

¹ Cahín cha ndicha, tari tuhvá cahán noo ra chinó ñni chi ra Cristo. Ña sandaví ñahi, vatyí Tatyí Ii Nyoo

ican saquehén ityi cha chiñi tuñi xiñi. Yucuan chaha chitó vahi vatyí cha ndicha cahín nu catyí tyi

² cuihya xaan cuñí ta tyicuan ri uhvi cuñí añime

³ cha cuenda ñu ñui ñu Israel. Cuñí xain chi ñu. Ta nyacua cuhve añime na cuhun maa nu uhvi, tyehe ta cuví cacu añima ñu cha tyicuan caa.

⁴ Ta maa ñu, tata ra Israel vachi ñu. Ta Nyoo naquehén cuenda ra chi ñu tari cha sehe ra. Ta sañaha ra cuhva caá ra chi ñu, tyi cahnu xaan ra cuví ra, vatyí chinyaa ra chihin ñu. Ta natyihí tahan ra tuhun chihin ñu, ta chaha ra ley ra chi ra Moisés vatyí cuhva ra chi ñu. Ta sañaha ra cuhva cuñí ra cha sacahnú ñu chi ra. Ta catyí ra chi ñu yoso caa cusacuvi ca ra cha vaha chihin ñu nu cuahan ca chi.

⁵ Tata ñu sutu chahnu yo cuví chi ñu, ta tata ñu, ican cuví chi ra Cristo cuenda coño ñuhu ra. Ican ra cuví Nyoo. Ta ican ra cuví ra nyacá ñaha tandihí cha iyó. ¡Na sacahnu yo chi ra tyicuan ri maa! ¡Ta na cuví chi tyicuan caa!

⁶ ¿Atu catyí vatyí ña sacuvi Nyoo tari cuhva catyí ra chi ñu Israel ta cha naha? Ñima. Soco cuñí chi coto yo tyi ña tandihí ñáyívi Israel cuví ñu ñu Israel cha ndicha.

⁷ Ña tandihí ñu tata ra Abraham ta cuví ñu sehe ra cha ndicha. Vatyí tuhun cha cahan maa Nyoo chihin ra, cahán chi cha cuenda noo ri sehe ra. Vatyí catyí Nyoo chi ra tyehe caa: “Cha cuenda ra Isaac sehun cucoo ñáyívi chuun.”

⁸ Ihya sañahá chi yo vatyí ñima cha cuenda tata cha vachi ñáyívi ta cuví ñu ñáyívi cuenda Nyoo. Soco tandihí ñáyívi chinó ñni tuhun catyí Nyoo tyi cusacuvi ra, ican ñu cuví ñu sehe ra cha ndicha.

⁹ Vatyí cha catyí Nyoo tyi cuhva ra chi ra Abraham, ican cuví ihya: “Quívi cha tahán chi, cuquichi nu nyicú ndo ta cu Sara cucoo noo sehe ña”, catyí Nyoo chi ra.

¹⁰ Ta ñima yucuan ri. Vatyí ni nduvi sehe cu Rebeca, ñin ri sutu ra, sutu chahnu yo, ra Isaac.

11-12 Soco cha ni cumañi ca cacu ndotyin, ta sacuvi ca ndotyin ni cha vaha, ni cha ña vaha, ta catyi Nyoo chi cu Rebeca: “Sehun cha ñihi ca cucuvi ra musu ra cha luhlu ca.” Sacuvi Nyoo tyicuan caa vatyi cachí ra chí ñáyivi cha cuñi maa ra, ta ñima cha cuenda cha sacuvi ñu.

13 Tari catyi ra nu tutu ra tyehe caa: “Cuñi que chi ra Jacob, ta chi ra Esaú ña cuñi.”

14 ¿Tu tyicuan caa ñáa cha cucatyí yo? ¿Atu cuví catyi yo tyi ña vaha cha sacuvi Nyoo? ¡Ma cuvi!

15 Vatyi catyi ra chi ra Moisés tyehe caa: “Cu cundahvi cuñi yóo ñáyivi cuñi mai cundahvi cuñi.”

16 Ta tyicuan caa chitó yo vatyi ma cundahvi cuñi Nyoo nyehe ra chí ñáyivi cha cuenda cuhva cuñi maa ñu, o cha cuenda cha sacuvi ñu. Soco cuhva cuñi maa Nyoo cucuvi. Vatyi maa ra cuví ra cundahvi iñi yóo chi cuñi maa ra.

17 Vatyi nu tutu ra, catyi ra chi rey Egipto tyehe caa: “Sacuvi rey chuun tacuhva sañahí tunyee iñi cha iyó chii chi ndo, ta tandihí ñáyivi cucoto ñu yóo ra cuví yuhu”, catyi Nyoo.

18 Ta tyicuan caa Nyoo cundahvi cuñi ra yóo ñáyivi cuñi maa ra. Ta suri sandundavá tucu ra añima ñu cuñi maa ra sandundava ra.

19 Ta cu catyón chii: “Tatu tyicuan caa, ¿ñáa tuhun cha tyaa Nyoo cuatyí siqui ñáyivi? Vatyi ¿yóo cha cuví nacahnu cuhva cuñi ra? ¡Yori!”

20 Soco ña vaha cuhva chicá iñun cha tyicuan caa. Vatyi yori cuví catyi tyi ña vaha cha sacuvi Nyoo. ¿Yóo ra cuví yoho vatyi nacahun nu cahán Nyoo? ¿Atu cuví catyi quisí ñuhú cuan chi ñu cha savaha chí chi vatyi ña tahán iñi chí cuhva cha savaha ñu chí chí? Ma cuvi.

21 Vatyi ñu cha savahá ndaha tyiño iyó ityi chí ñu savahá maa ñu ñáa cha cuñi ñu chihin nyahyu cuan. Chihin nyahyu cuan cuví savaha ñu noo quisí finu xaan. Ta cuví savaha tucu ñu noo cha ndahvi ri.

22 Tyicuan caa tucu Nyoo, iyó ityi chí ra cha tachi tuñi ra chí ñáyivi quiñi iyó cha cuenda cha sacuvi ñu

cha ña vaha. Ta cuví sañaha ra chí ñu tyi iyó xaan tunyee iñi chí ra. Soco sanyee xaan ra iñi ra chihin ñáyivi cuan. Ta chí maa ñu tahán chí tachi tuñi ra. Ta tahán chí sanaa ra chí ñu.

23 Ta iyó tucu ityi chí ra cha saha ra tucahnu iñi chí ñu savaha maa ra vatyi sañahá ra tyi cahnu ra cuví ra. Maa ñu cuví ñu ñu cachí ra vatyi cuñihi ñu tandihí cha vaha, ta cucoo ñu gloria chihin ra.

24 Ta suri maa yo cuví ñu cuan. Vatyi Nyoo cana ra chí yo. Yihí yo cuví yo ñu Israel, ta yihí yo cha ñima ñu Israel cuví yo.

25 Tari catyi Nyoo nu tutu cha tyaa ra Oseas tyehe caa:

Ñu cha ñima ñu ñu cucatyí yuhu tyi ñáyivi chíi cuví chí ñu.

Ñu cha ña cuñi, cunacuñi chí ñu, catyi Nyoo.

26 Ta suri nu catyi Nyoo chí ñu tyehe caa: “Nyoho ñima ñáyivi chíi cuví ndo.” Ta suri yucuan cunacatyí tucu ra chí ñu: “Sehe yuhu, ra cuví Nyoo nyito, cuacuvi ndo.”

27 Soco cha cuenda ñu Israel catyi ra Isaías tyehe caa: “Vasi cuaha xaan ñáyivi ñu Israel tari cha cuaha niyiti iyó yuhu tyañuhu, soco suhva ri ñu cucacu.

28 Vatyi Sutu Mañi yo numi ri cusacuvi ra tandihí cha catyi ra tyi cusacuvi ra siqui ñuhu ñáyivi chihin cha cachí.”

29 Tari catyi tucu ra Isaías ta ityi chata ca tyehe caa:

Tyehe ta Sutu Mañi yo ra nyacá ñaha tandihí cha iyó andivi, ta ma sacacu ra chí suhva yo, cunaa tandihí yo,

Tari naa ñáyivi Sodoma ta ñu Gomorra ta cha naha.

Ñu Israel nducú ñu cuhva cuvaha ñu nuu Nyoo soco ña ñihí ñu cuhva

30 ¿Tatu tyicuan caa, ñáa cha catyi yo? Ñáyivi cha ñima ñu Israel cuví, ña nanducu ñu cuhva cuvaha ñu nuu Nyoo, ta ican ñu cuví ñu cuvahá nuu ra cha cuenda cha chinó iñi ñu chí ra.

³¹ Ta ñu Israel nyicón xaan ñu ley, tyi cuñí maa ñu tyi cuvaha ñu nuu Nyoo chihin cuan, soco ña cuví.

³² ¿Ñáá tuhun? Vatyí cuñí ñu cuvaha ñu nuu Nyoo chihin cha sacuví ñu ley cuan, ta ña cuñí ñu cuvaha ñu nuu ra chihin cha chinó iñi ñu chi ra. Yucuan chaha vatyí tari cha catyihí chaha ñu chihin noo yuu cuví chi cuan.

³³ Yuu cuan cahán Nyoo tuhun nu tutu ra tyehe caa:

Ñuu Sión, yucuan tyají chi noo rayíí
cha cuví tari noo yuu.

Noo yuu cha sanduvá chi ñáyiví cuví
ra.

Soco ñu chinó iñi chi ra ma cucahan
nuu ñu, catyí Nyoo nu tutu ra.

10

¹ Yañi, cuñí xain chihin cha tandihí añime cha cacu ñu Israel. Ta cha chicán tahví xain cha cuenda ñu.

² Cha ndicha cuví vatyí cuñí xaan ñu sacahnú ñu chi Nyoo, soco ña ñihí ñu cuhva yoso caa tahán chi sacuví ñu.

³ Vatyí ña chitó ñu yoso caa sacuvahá Nyoo chi ñáyiví nuu ra. Ta nducú ñu cuhva sacuvaha maa ñu chi ñu, ta ña nacuhvá cuenda ñu chi ñu chi ra tacuhva sacuvaha maa ra chi ñu.

⁴ Vatyí ra Cristo cha quichí ra ta sacuví ra tandihí cha catyí ley, ta sacuví ra vatyí tandihí ñu chinó iñi chi ra, cuvaha ñu nuu Nyoo.

⁵ Catyí ra Moisés vatyí cuví cuvaha ñáyiví, soco tatu quichahá ñu cha catyí ley, vatyí catyí ra tyehe caa: “Ñu cha quichahá tandihí cha catyí ley, coo ñu noo ñáyiví cha ma naa ca maa.”

⁶ Soco cha cuvaha yo nuu Nyoo cha cuenda cha chinó iñi yo chi ra Cristo, catyí nuu tutu Nyoo tyehe caa: “Ma caca xiñun vatyí cuñí chi cha cundaa noo ra andiví ta cusanoo ra chi ra Cristo tacuhva sacacu ra chi yo.” Ma caca xiñun tyicuan caa vatyí cha yahá quichi ra Cristo.

⁷ Ni ma caca xiñun vatyí cuñí chi cha cunoo noo ra chichi ñuhú vatyí

sanandoto ra chi ra Cristo, vatyí cha yahá nandoto ra.

⁸ Ma caca xiñun tyicuan caa vatyí tyehe caa catyí nu tutu Nyoo: “Tuhun Nyoo yatyin nyaá chi chihin ndo, yuhu ndo ta añima ndo nyaá chi.” Ta suri tuhun cuan sacoto ndi chi ndo, tuhun cha quichí ra Cristo ta nandoto ra. Ican cuví tuhun cha tahán chi chinó iñi yo.

⁹ Tatu chihin yuhun catyún vatyí ra Jesús cuví Sutu Mañi yo, ta chihin añimon chinó iñun tyi Nyoo sanandoto ra chi ra cha yahá chihí ra, cucacu añimon.

¹⁰ Vatyí chihin añima yo cuñí chi chino iñi yo chi ra Cristo tacuhva cuví cuvaha yo nuu Nyoo, ta chihin yuhu yo tahán chi catyí yo tyi chinó iñi yo, tyicuan ta cacu añima yo.

¹¹ Tuhun Nyoo catyí chi: “Ni noo ñu cha chinó iñi chi ra ta ma tahan ñu ticahan nuu.”

¹² Vatyí Nyoo ñin ri cuhva nyehé ra chi ñu Israel ta chi ñu inga ñuu. Vatyí suri maa ra cuví ra ra nyacá ñaha chi tandihí yo. Ta nasocó xaan ra chi tandihí yo cha chicán tahví yo chi ra.

¹³ Vatyí tyehe caa catyí tuhun Nyoo: “Tandihí ñu cha chicán tahví chi ra Jesús cucacu añima ñu.”

¹⁴ Soco ¿yoso caa cucacan tahví ñu chi ra tatu ta chino ca iñi ñu chi ra? Ta ¿yoso caa cuchino iñi ñu chi ra tatu ta cuiñi ca ñu tuhun ra? Ta ¿yoso caa cuiñi ñu tuhun ra tatu ta yori ca cahan tuhun ra chihin ñu?

¹⁵ Ta ¿yoso caa cucahan ñu yihí tuhun Nyoo chihin ñu, tatu yori tachi chi ñu? Tari catyí nu tutu Nyoo: “Ñana cha tyaquí nu chaa ñu cahán tuhun vaha nuu ñáyiví.”

¹⁶ Soco ña tandihí ñu ta quichahá ñu tuhun cha sacacú Nyoo añima yo. Vatyí tyehe caa catyí ra Isaías: “Sutu Mañi yuhu, yori cuñí chino iñi tuhun cahán ndi”, catyí ra.

¹⁷ Yucuan chaha cha chiñí xihna yo tuhun ra Cristo, tyicuan ta chino iñi yo chi ra.

¹⁸ Soco ndacá tuhun ihya: ¿Atu ña chiñi ñu Israel tuhun Nyoo? ¿Chiñi

ñu! Vatyí nu tutu Nyoo catyí chi tyehe caa:

Sutu Mañi yuhu, cha sacoto ñáyivi_i tuhun maun nicahnu siqui_i ñuhu ñayivi_i, catyí chi nu tutu Nyoo.

¹⁹ Soco ndacá tuhun inga chaha tyehe caa: ¿Atu ña chinó iñi ñu Israel cha cuenda tyi ta nacoto ca ñu tuhun Nyoo? ¡Chitó ñu! Vatyí cha xihna ri ra Moisés tyaa ra tuhun cahán Nyoo chihin ñu Israel tyehe caa:

Nyoho, cucuquiñi_i cuñi ndo vatyí cucuhve cha vaha chi noo ityi ñáyivi_i cha ñima ri tuhun, ñáyivi_i cha ña cutuñí iñi.

Ta cunaquiqui_i tisihi ndo nyehé ndo chi ñu, catyí Nyoo.

²⁰ Ta ra Isaías caña iñi ra catyí ra tyi ñu cha ña nanducú chi Nyoo, nañihí ñu chi ra. Ta sañahá ra chi ra chi ñu cha ña ndacá tuhun tuhun ra.

²¹ Ta tyaa tucu ra Isaías tuhun cahán Nyoo chihin ñu Israel tyehe caa: “Ndiyaca cané chi ñáyivi_i chii, nacuhva cuenda ñu chi ñu chii, soco ña quichahá ñu. Ndava xaan iñi ñu”, catyí Nyoo.

11

Yihí ñu Israel cha ñihí ñu cuhva cacu aña ñu

¹ ¿Atu ña cuñí ca Nyoo chi ñu Israel? Ñima cha ña cuñí ca ra chi ñu, vatyí suri ra Israel cuví tucu yuhu. Vatyí tata ra Abraham ta tata ra Benjamín cuví.

² Nyata cha naha cachí Nyoo chi ñu Israel tacuhva cuvi ñu ñáyivi_i chi ra. Ta vityin ñima cha sacuachiyó ndihí ra chi ñu, vatyí chitó ndo cha catyí nu tutu Nyoo nu chicán tahvi ra Elías, profeta Nyoo, ta catyí ra tyi ña vaha sacuví ñu Israel, ta catyí ra tyehe caa:

³ “Sutu Mañi yuhu, chahñi_i ñu chi ra cuví profeta maun, ta satani_i ñu arta vehe ñuhu maun. Noo tuhun ri ca mai ndoo, ta cuñí ñu cahñi ndihí ñu chii”, catyí ra.

⁴ Soco nacahan Nyoo ta catyí ra chi ra Elías: “Ñima maa ri maun ndoo. Ucha ca mil ñáyivi_i naquehen vahi

cha ña chicuiñi_i chiti ñu nuu xitohyo nyoo Baal”, catyí Nyoo chi ra.

⁵ Ta suri tyicuan caa vityin, ndoo suhva ñu sacahnú chi Nyoo. Ican ñu nacachí Nyoo chii tyi cusaha ra tucahnu iñi chi ñu.

⁶ Vatyí cha cuenda cha vaha ñáyivi_i cuví Nyoo ta sahá ra ticahnu iñi chi yo. Tyehe ta chihin cha vaha ñáyivi_i cuví maa yo ta sahá Nyoo tucahnu iñi chi yo, cuñí chi catyí tyi ñima ca chihin cha vaha maa ra ta sacacú ra chi yo.

⁷ Ta ¿yoso caa? Ñu Israel nanducú xaan ñu cuhva cuvaha ñu nuu Nyoo soco ña ñihí ñu cuhva. Soco ñu cha nacachí maa Nyoo chii, ñihí ñu cuan cuhva. Ta inga ñu Israel cuan ndundava xaan aña ñu.

⁸ Tari catyí nu tutu Nyoo tyehe caa: “Nyoo chaha ra noo cuhva chi ñu cha ma cutuñi iñi ñu. Ta chaha ra chiti nuu cha ña cutuñi iñi ñu cha nyehe ñu. Ta chaha ra soho ñu soco ña cutuñi iñi ñu cha chiñi ñu, ta nyacua nya vityin ta tyicuan caa ñu.”

⁹ Ta suri catyí tucu ra David tyehe caa:

Si_i xaan cuñí ñu chihin vico cha iyó ñu, soco yucuan cuví trampa cha sanacava_i chi ñu. Ta cha cuenda cuan ta cutachi tuñi Nyoo chi ñu.

¹⁰ Ta tari cha cunducuaa ñu vatyí ma ndichin ca nyehe ñu cha ndicha.

Ta tyicuan ri cucoso cha vee chata ñu, catyí ra David tuhun ñu Israel cha ña chinó iñi chi Nyoo.

Yoso caa cuvaha ñu cha ñima ñu Israel cuví nuu Nyoo

¹¹ Ta vityin ndaca tuhun ihya: ¿Atu cha cuenda cha ña quichahá ñu Israel cuan nu cahán Nyoo, ta ndoo ri maa ñu cha ma cacu ca aña ñu? Ñima. Vatyí cha cuenda cha ña quichahá ñu chi ra cha saquichí Nyoo, yucuan chaha sacacú Nyoo chi inga ñu cha ñima ñu Israel cuví. Ta tyicuan caa ta cuquiñi_i cuñí ñu Israel vatyí nachino iñi inga ñáyivi_i. Ta cha tyicuan caa ta cuquichí cuvi tucu iñi ñu cha cacu aña ñu.

12 Tatu cha cuenda cha ña quichaha ñáyiví Israel cuhva cha chaha Nyoo chí ñu, cuví chi cha vaha cha cuenda tandihí ca ñáyiví, vatyí chahá chi cuhva, ta cuaha xaan ñu nachino iñi ñu chí ra Cristo, nyaca cuví quiví cundihví tucu ñu Israel cuenda Nyoo inga chaha. Yucuan quiví, vaha xaan ta tyaqui xaan cucuvi.

13 Ta iyó suhva cha cuñí catyí chi nyoho cha ñima ñu Israel cuví ndo, vatyí ra Jesús tyatyíño ra chíi cha cuhin nu iyó ñáyiví cha ñima ñu Israel cuví. Ta chité vatyí ñiñi xaan cuví tyiño cha chaha maa Nyoo chíi.

14 Ta cuñí tiquí vatyí cunyehe ñáyiví Israel ñu ñui cuhva chinó iñi ndo chí Nyoo, ta cuquichi cuví iñi tucu suhva maa ñu sacuvi ñu tyicuan caa. Ta tyicuan caa ta cacu añima ñu.

15 Vatyí cha cuenda cha ña natíin cuenda Nyoo chí ñu Israel cuví cuvaha inga ñáyiví nuu ra. Vaha xaan cha tyicuan caa ta nyaca cuví quiví cunatiin cuenda tucu ra inga chaha chí ñu Israel, cucuvi tari cha cunandoto ñu nu chíhí ñu.

16 Tatu vaha noo pan cha savaha yo cha xihna ri chíhin yuchan pan cuan, vaha tandihí ca yuchan cuan. Ta tatu vaha yoho noo yutun, tandihí ca soco tun, ta vaha. Ta tyicuan caa tucu ñu Israel, cuñí Nyoo chí ñu cha cuenda cha vaha ra cha vachi ñu tata.

17 Ta ñu Israel cuví ñu tari noo soco noo tu olivo vaha cha cumí Nyoo. Ta chahnya Nyoo chí suhva ñu vatyí ña chinó iñi ñu chí ra. Ta chaha tu olivo cuan natyaa tahan ra soco noo tu olivo huhu. Ta maa ndo cuví tari tu olivo huhu cuan. Ta tari cha natyaa tahan ra chí ndo chaha tu olivo cha xihna ri cuan. Ta tyicuan caa ndu in ri ndo chíhin tu olivo Nyoo ta naquehén ndo tandihí cha vaha cha iyó chí ra.

18 Soco ma saha ndo tyí vaha ca ndo ican saha inga ñu cha cuví soco tu olivo cha chahnya Nyoo. Vatyí tatu cuñí maa ndo tyí vaha ca ndo, cuñí chí nichon iñi ndo vatyí ñima maa ndo nyisó ndo chí yoho yutun cuan,

soco maa yoho yutun cuan nyisó chí ndo.

19 O catyí ndo: “Ican, soco chahnya Nyoo soco yutun cuan tacuhva nicunyaa maa ndi chaha tun.”

20 Vaha. Soco chahnya Nyoo soco cuan cha cuenda tyí ña chinó iñi ñu chí ra. Ta nyoho nicunyaa ndo yucuan, soco cha cuenda cha chinó ri iñi ndo chí ra. Yucuan chaha ma sacahnu ndo chí ndo, soco saha ndo cuenda chí ndo.

21 Vatyí tatu ña saha Nyoo ticahnu iñi chí ñu cha cuví soco vaha cuan, ní chí nyoho ta ma saha ra ticahnu iñi tatu ña chinó vaha iñi ndo chí ra.

22 Nyehe yoso cha vaha Nyoo, soco tyicuan tucu xaan ra chíhin ñu cha ña natíin cuenda tumañi iñi chahá ra. Soco chíhin nyoho, vaha xaan ñáyiví cuví ra. Soco cuñí chí cha naquehén vaha ndo tumañi iñi cha chahá ra vatyí tatu ña naquehén vaha ndo, cucahnya tucu ra chí nyoho.

23 Soco tatu nachino tucu iñi ñu Israel inga chaha, cu nicunyaa tucu ñu nu coyó ñu. Vatyí Nyoo iyó tunyee iñi chí ra cha natyatahan tucu ra chí ñu cuan inga chaha.

24 Vatyí tatu nyoho cha ñima ñu Israel cuví ndo, ta quehén Nyoo chí ndo cha cuví ndo tari soco noo yutun olivo huhu, ta natyaa tahan ra chí ndo chíhin tu olivo vaha cha cumí ra, ¡ta nyaca cuví ñu Israel cha cuví ñu soco tu olivo vaha! ¡Cunatyaa tahan chaa ra chí ñu inga chaha chaha tu olivo nu coyó ñu!

Nu ndihí ta cucacu tucu ñu Israel

25 Vatyí yañi, cuñí cha coto ndo noo tuhun xehe cha sacuví Nyoo, tacuhva vatyí ma caca xiñi ndo vatyí chitó xaan ndo. Vatyí ñu Israel ndundava añima ñu suhva quiví, nyacua nya cha cuví nachino iñi inga ñáyiví chí Nyoo.

26 Ta cha yaha quihví inga ñu cuenda Nyoo, tyicuan ta tandihí ñu Israel cucacu añima ñu, vatyí nu tutu Nyoo catyí chí tyehe caa:

Ra cha cusacacu chí ñáyiví, ityí Sión cuquichi ra.

Ta cusacanyaha ra cuatyí cha iyó chí ñáyiví chí ra Jacob.

27 Ta ihya cuví tuhun cha cunatyihí tahin chihin ñu, quiví na sacuachiye cuatyí ñu, catyí Nyoo nu tutu ra.

28 Cuxaán xaan ñu Israel chihin Nyoo cha cuenda tuhun vaha ra Cristo cha cacu aña yó. Ta tyicuan ta cuví chino iñi maa ndo. Soco Nyoo tacuhva cuñí ri maa ra chi ñu Israel tata ra Abraham, ta ra Isaac, ta ra Jacob vatyí cachino iñi ra chi ra quiví cachiyo ra, ta yucuan chaha cachí ra chi ra.

29 Vatyí noo cha cha yaha chaha Nyoo ña natinyaá ra. Ni ña ndu uvi iñi ra cha yaha nacana ra chi yo.

30 Nyoho, ta ityi chata ca, nacahnú ndo nu cahán Nyoo. Soco vityin, Nyoo cundahví cuñí ra nyehé ra chi ndo cha cuenda vatyí ñu Israel nacahnú ñu nu cahán ra.

31 Nacahnú ñu nu cahán Nyoo vityin tari nacahnú maa ndo quiví cuan. Ta tari cundahví cuñí Nyoo nyehé ra chi ndo vityin, tyicuan caa tucu cucundahví cuñi ra nyehe ra chi ñu Israel ñandihí.

32 Vatyí Nyoo chaha ra ityi chi tandihí ñáyiví cha nacahnú ñu nu cahán ra, tacuhva vatyí cundahví cuñi ra nyehé ra inuu ri chi tandihí yo.

33 ¡Ñana cha cahnu cuví cha tyayí Nyoo! ¡Ñana cha vaha cha chitó xaan ra, ta cha chiñi tuñi ra! Ma cuví nacatyí yo kuhva chicá iñi ra, ni ma chaa yo cutuñi iñi yo kuhva sacuví ra.

34 Vatyí ¿yóo cha cutuñi iñi kuhva chicá xiñi Sutu Mañi yo? ¿O yóo cha sañahá chi ra? Yori.

35 Vatyí yori cha cuví kuhva xihna ca noo cha vaha chi Nyoo ta cha cuenda cuan ta quihí iñi ñu vatyí na kuhva tucu Nyoo chi ñu.

36 Vatyí tandihí maa cha iyó, maa Nyoo savaha, ta chingo chi ta iyó chi cha cuenda ra. ¡Cahnu xaan ca cuví Nyoo tyicuan ri maa! Ta na cuví chi tyicuan caa.

1 Yucuan chaha yañi, chacú ndahví nuu ndo cha cuenda cha ndahví cuñí Nyoo nyehé ra chi yo, na nacuhva cuenda yo coño ñuhu yo chi ra, tari noo ofrenda cha nyitó, ta cachi coo yo nuu ra, vatyí yucuan cuví kuhva tin cuenda ra cha sacahnú yo chi ra.

2 Ta ma coo ca yo kuhva iyó ñáyiví iyó siqui ñuhu ñáyiví ihya. Soco na nasama yo kuhva iyó yo chihin cha nduchaa kuhva chicá xiñi yo. Ta tyicuan caa ta coto yo yoso kuhva cuñí Nyoo chihin yo vatyí coto yo nya cha vaha, ta nya cha tahán iñi ra. Ta coto yo ñáá ndihí cha tahán chi sacuvi yo.

3 Nyoo, cha catyí cha vaha ñáyiví cuví ra, ta tyatyíño ra chii vatyí cuví apóstol chi ra, yucuan chaha catyí chi tandihí nyoho vatyí ni noo ndo ta ma caca xiñi ndo tyi vaha ca ndo. Soco caca vaha xiñi ndo yoso kuhva iyó ndo chihin yoso kuhva cha vaha chaha Nyoo chi ndo in ri chihin cha chinó iñi ndo chi ra.

4 Vatyí cha noo coño ñuhu, cuaha xaan kuhva iyó chi, ta ña in ri maa tyiño saha chi. Chiti nuu yo, noo tyiño sahá chi, ta soho yo inga tyiño sahá chi.

5 Ta tyicuan caa tucu yoó vasi cuaha yo, soco noo ri coño ñuhu ra Cristo cuví yo, cha cuenda cha in ri cuví yo chihin ra, ta in ri cuví yo chihin tahan yo. Tari cha noo ri coño ñuhu cuví tandihí ri yo.

6 Siin siin tyiño chaha Nyoo chi yo, yoso kuhva cha cuñí maa ra kuhva ra chi noo noo yo. Ta cuñí chi cotyiño vaha yo cha vaha cuan. Tatu chaha Nyoo cha vaha cha sahá yo profetizar, na chino iñi yo tyi ican cuan chaha ra chi yo, ta na naquehen yo tuhun sacoto ra chi yo ta nacatyí yo chi ñáyiví.

7 Tatu chaha ra cha vaha cha sacuví yo tyiño nuu inga ñu, cuñí chi sacuví vaha yo. Tatu chaha ra cha cuví sañaha yo chi inga ñu, cuñí chi cunyaa yo tyiño cuan.

8 Tatu chaha ra cha cuví kuhva yo tuhun chi ñáyiví na ndu ni iñi ñu, cuñí chi cunyaa yo tyiño cuan. Ta

12

Na coo yo noo ñáyiví cha sacuvi yo kuhva cuñí Nyoo

ñu cha chaha Nyoo xuhun chi, cuñi chi cuhva ñu chihin cha n̄i ñi ñu. Tatu chaha Nyoo cha saquehen ityun chi ñu yihí cuenda ra, chihin cha n̄i ñun sacuvun. Tatu chaha Nyoo cha tyinyeé yo chi ñu chiñuhú cha chiñuhú chii, cuñi chi sacuvi yo chihin cha s̄i cuñi yo.

Nu catyí ra Pablo yoso caa sacuvi yo cha yihí yo cuenda ra Cristo

⁹ Cuñi ndo chihin cha ndicha chi tahan ndo. Ta cutasi cuñi ndo chi cha ña vaha. Ta cunyicon ndo cha vaha.

¹⁰ Cuñi chi cha cuñi ndo chi tahan ndo cuenda Nyoo tari cha tahan ndo cha ñin ri s̄i ñin ri sutu ndo. Ta quichaha ndo chi ñu ta saha ndo ñáyivi chi ñu.

¹¹ Sañihi ndo ñi ndo. Ma cusuchan ndo. Ta sacuvi ndo tyiño nuu Sutu Mañi yo chihin cha n̄i ñi ndo.

¹² S̄i cuñi ndo coo ndo ñáyivi, vatyi chitó ndo vatyi cucoo ndo chihin Nyoo nu cuahan ca chi. Sanyee ndo ñi ndo tatu nyehé ndo t̄ndoho. Ta ma sandihi maa ndo cha cacan tahvi ndo chi Nyoo nyita ri.

¹³ Tyinyee ndo chi ñu yihí cuenda Nyoo chihin ñaa cha chiñuhú chi ñu. Vaha tyiñuhu ndo chi ñu chaa vehe ndo.

¹⁴ Vaha çahan ndo siqui ñu cha çahán chi ndo. Ta ma soco ndo chi ñu. Çacan tahvi ndo cha cuenda ñu nuu Nyoo tacuhva na nasoco ra chi ñu.

¹⁵ Cus̄i cuñi ndo chihin ñu s̄i cuñi, ta cuacu ndo chihin ñu chacú chaa cha cuihya cuñi ñu.

¹⁶ ñin ri c̄vi ndo chihin tahan ndo. Ta ma cahn̄u saha ndo chi ndo. ñnuu ri saha ndo chi ndo chihin ñu ndahvi. Ma saha ndo cha chitó xaan ndo.

¹⁷ Ma sacuvi ndo cha ña vaha chihin ñu sacuvi cha ña vaha chihin ndo. Soco san̄i ndo sacuvi ndo cha vaha nuu tandihi ñáyivi.

¹⁸ San̄i ndo cha coo taxi ri ndo chihin tandihi ñáyivi.

¹⁹ Yañi luhli, tatu yóo cha satasi ñi chi ndo, ma tachi tuñi ri maa ndo chi ñu, soco saña ndo ta natyaa ndo ndaha Nyoo na tachi tuñi maa ra chi ñu. Vatyi nu tutu Nyoo catyí chi tyehe

caa: “Yuhu tahán chi tachi tuñi, yuhu cutiyahvi chi ñu”, catyí Sutu Mañi yo.

²⁰ Ta suri catyí tucu ra: “Tatu ra xaan ñi chuun ta chisocó ra, cuhva cha cachi ra, ta tatu ityi ra ndutya, cuhva coho ra. Vatyi cha sacuvún tyehe caa, sacuvún cha nyacua nducua soho ra chihin t̄cahan nuu.”

²¹ Ma cuhvon cha cunyaca ñaha cha ña vaha chuun, soco san̄i ñun ta cuvi chasahun chi cha ña vaha chihin cha sacuvún cha vaha.

13

¹ Tandih̄i ñáyivi cuñi chi cha quichaha ñu chi ra cacuvi tyiño cuenda gobiernu. Vatyi yori ra cuvi tyiño cha ñima Nyoo tyaa tyiño chi ra. Ta ra cuvi tyiño cha iyó, maa Nyoo tyiso chi ra.

² Yucuan chaha, ñu cha ña quichahá chi ra cacuvi tyiño, cuñi chi catyi vatyi ña quichahá ñu cuhva catyi Nyoo. Ta ñu cha sacuvi tyicuan caa, chicoo cuatyí ñu cha cuenda cuan, ta cucutuñi chi ñu.

³ Vatyi ra cacuvi gobiernu, ña nyaá ra cha cuenda cha sayuhvi ra chi ñu cha sacuvi cha vaha, soco nyaá ra vatyi tachi tuñi ra chi ñu sacuvi cha ña vaha. ¿Atu cuñún coun chihin cha ña yuhvun chi ra cacuvi tyiño? Çachi coun, ta cunyehe ra tyi vaha ñáyivi cuvún.

⁴ Vatyi nyaá ra tyiño vatyi sacuvi ra tyiño nuu Nyoo cha cuenda cha vaha chuun. Soco tatu ña cachi iyón, yucuan ndicha cuñi chi cuyuhvun chi ra. Vatyi ña nyaá ri maa ra, soco nyaá ra vatyi tachi tuñi ra chi ñáyivi cha sacuvi cha ña vaha, vatyi tyiño cuan tyaa Nyoo chi ra.

⁵ Yucuan chaha ñiñi cuñi chi cha quichaha ndo chi ra cacuvi tyiño, ñima cha cuenda cha yuhvi ndo coto tachi tuñi ra chi ndo, soco cha cuenda vatyi chitó ndo tyi tyicuan caa tahán chi sacuvi ndo.

⁶ Ta s̄in ri cha cuenda cuan tyiyahvi ndo xuhun cha tava ra cuvi tyiño cha cuenda cha sanduvahá ra ñuu ndo. Vatyi yucuan cuvi tyiño

tahán chi cunyaa ra, ta cha tyicuan caa tyiño nuu Nyoo sacuví ra.

⁷ Cuhva ndo cha tahán chi chi minoo ñáyivi. Tyiyahvi ndo cha cuenda ñáa cha tahán chi tyiyahvi ndo cha cuenda cha vaha chi ñuu ndo. Ta quichaha ndo chi ñu cha tahán chi quichaha ndo. Ta saha ndo ñáyivi chi ñu cha tahán chi saha ndo ñáyivi.

⁸ Ma coso yica ndo chi ni noo ñáyivi. Soco cuñi ndo chi tahan ndo, vatyí tatu cuñi ndo chi tahan ndo sacuví ndo tandihí cha catyí ley Nyoo cha tyaa ra Moisés vatyí sacuví yo.

⁹ Catyí ley Nyoo tyehe caa: “Ma coo inga ñusihi o rayi chuun tatu ñima ñasihun o yíun cuví. Ma cahñun chi ñáyivi. Ma suhun. Ma cahun cuendu siqui ni noo ñáyivi. Ma quichi cuvi iñun cha chii ñáyivi.” Tatu ndicha cha cuñún chi tahun, tari cha cuñún chi maun, sacuví tucun tandihí ihya ta tandihí ca inga ca ley.

¹⁰ Tatu cuñún chi tahun, ñahri cha ña vaha cua sacuvun chi ñu. Chihin cha cuñi yo chi tahan yo, sacuví yo tandihí cha catyí ley Nyoo cha tyaa ra Moisés.

¹¹ Chihin tuhun ihya saha yo cuenda quivi iyó yo. Vatyí cha cha chi cuhva cha ndoyo yo ta ma cundihñi yo. Vatyí quivi nachino iñi yo chi ra Cristo, naha xaan ca nyaá quichi quivi cucacu ndihí añima yo, soco vityin cha cuyatyin.

¹² Cha cua yaha cha cha cuaa. Ta cha cua cundichin. Yucuan chaha cuñi chi sandihí yo cha sacuví yo cha sacuví ñu iyó nu ñaa iñi. Ta tahán chi sacuví yo cuhva sacuví ñáyivi iyó nu ndichin.

¹³ Cachi cuñi chi coo yo. Vatyí nu ndichin Nyoo iyó yo. Ta ma coho yo ndixi, ta ma coo yo vico nu chihi xaan ñu ndixi. Ta ni ma coo yo chihin savaha ri ñusihi o rayi. Ni ma coo viciu chi yo. Ta ma cutasi cuñi yo nyehe yo chi tahan yo. Ta ma nyiyo iñi yo nyehe yo chi ñu.

¹⁴ Soco coo yo chihin tunyee iñi Sutu Mañi yo Jesucristo, tari noo sahma cuví tunyee iñi ra tyi ndihvi

noo yo. Ta ma quihí iñi ndo cha sacuvi ndo cuhva cuñi coño ñuhu ndo.

14

Ma cahan nyaun chi tahun

¹ Tatu noo ñáyivi yihí cuenda Nyoo ta chiin ri chinó iñi ñu chi ra, ña vaha cha ma tñin cuenda ndo chi ñu. Vaha natñin cuenda ndo chi ñu soco ma cuvi yuhu ndo chihin ñu siqui tuhun cha chicá uvi iñi ñu.

² Vatyí yihí ñáyivi cuñi maa ñu vatyí cuví cachi ñu tandihí. Ta yihí tucu ñu cha ña chinó vaha iñi ñu, ta maa maa ri yucu chachí ñu.

³ Soco ñu chachí tandihí cuan, tahán chi cha tñin cuenda ñu chi ñu cha chachí yucu ri. Ta ñu chachí yucu ri, ma cahan nyaun ñu chi inga ñu cuan. Vatyí Nyoo tñin cuenda ra chi ñu cuan.

⁴ Vatyí ¿yóo ñu cuví yoho vatyí cahan nyaun chi ñu cha sacuví tyiño nuu inga ra? Vatyí tatu vaha o ña vaha sacuví ñu soco nyehe maa ra cuví nuu chi ñu chihin ñu. Ta vaha cuquita ñu vatyí Sutu Mañi yo iyó tunyee iñi chi ra ta cutyinyee ra chi ñu tacuhva quita vaha ñu.

⁵ Inga tucu cuhva: Yihí ñu cha sacahnú ca ñu chi noo quivi ta ñima ca inga quivi. Ta yihí tucu ñu cha cuñi maa ñu vatyí inuu ri tandihí quivi. Tahan tahan yo cuñi chi coto vaha yo yoso cuhva chicá xiñi yo.

⁶ Ñu cha naquehén vaha noo quivi, naquehén vaha ñu cha cuenda cha sacahnú ñu chi Sutu Mañi yo. Ta ñu cha ña naquehén vaha cuan, suri cha cuenda cha sacahnú ñu chi Nyoo cuví. Ta ñu cha chachí tandihí cuan, suri chachí tucu ñu cha cuenda cha sacahnú ñu chi Sutu Mañi yo, ta nacuhva ñu tyahvi nyoo chi Nyoo tyi chaha ra cha cachi ñu. Ta ñu cha ña chachí tandihí, ña chachí ñu cha cuenda cha sacahnú ñu chi Sutu Mañi yo ta suri nacuhva tucu ñu cuan tyahvi nyoo chi ra.

⁷ Vatyí ni noo yo ña iyó yo chihin fuerza maa yo. Ni ñima maa yo catyí ama cúvi yo.

⁸ Vatyí tatu iyó yo, iyó yo tacuhva sacuvi yo tyiño nuu Nyoo, ta tatu chihí yo, chihí yo tyi Sutu Mañi yo naquehen cuenda ra añima yo. Yucuan chaha tatu iyó yo, o chihí yo soco chi Sutu Mañi yo cuví chi yo.

⁹ Vatyí ra Cristo chihí ra ta nandoto tucu ra vatyí tacuhva cunyaca ñaha ra chi ñu nyitó ta chi ñu chihí.

¹⁰ Soco yoho, ¿ñáá tuhun cha nyehé nyaun chi yañun? ¿o ñáá tuhun cha ña natín cuendon chi ra? Vatyí tandihí yo cutahan chi cucuhva cuenda yo chi yo nuu Nyoo vatyí cutuñi chi yo nuu ra.

¹¹ Vatyí nu tutu Nyoo catyí chi tyehe caa:

Cha ndicha ndicha cuii vatyí yuhu nyité, catyí Sutu Mañi yo.

Ta tandihí cuii ñáyivi cunacuiñi chiti ñu nui.

Ta tandihí ñu cunacoto nuu ñu chii cha cuví Nyoo.

Ta cusacahnu ñu chii chihin nuu tandihí ñáyivi, catyí Nyoo.

¹² Yucuan chaha noo noo maa yo ta cunacuhva yo cuenda cha sacuvi yo chi Nyoo.

Ma sanacavon nu cuatyí chi yañun

¹³ Yucuan chaha, ña tahán ca chi cahan nyaá yo chi tahan yo. Soco nducu yo cuhva cha ma sanacava yo chi ñu nu cuatyí coto sandihí ñu tuhun cha chino iñi ñu.

¹⁴ Yuhu chité vatyí ñahri cha ma cuví cachi, vatyí chinó vaha iñi chi Sutu Mañi yo Jesucristo, ta maa ra sañahá chii. Soco tatu yihí ñu chicá xiñi ñu tyi yihí cha ña vaha cachi ñu, cha cuenda maa ñu, ña vaha.

¹⁵ Soco tatu cha cuenda cha chachún ta quiñi cuñi yañun, ña ndicha cha cuñún chi ra, ñima ca cuhva cuñi Nyoo sacuvún. Ma cuhvon cha tiví noo ñu chihin cha chachún vatyí ra Cristo chihí ra cha cuenda ñu.

¹⁶ Ma cuhva ndo cha cahan ña vaha ñu siqui noo cha chahá Nyoo ityi chuun tyi cachun.

¹⁷ Vatyí cha nyacá ñaha Nyoo chi yo cuví chi noo cha cachi coo yo nuu ra.

Cusií cuñi yo ta taxi ri cuñi añima yo cha cuenda Tatyí li Nyoo cha nyaá añima yo. Ta ña ñiñi tuhun cha chachi yo o cha chihí yo.

¹⁸ Ñu sacuví tyiño nuu ra Cristo tyehe caa, siñ cuñi Nyoo nyehé ra chi ñu, ta catyí tucu ñáyivi tyi vaha ñáyivi cuví ñu.

¹⁹ Yucuan chaha cuñi chi cha sañihi ca yo cha coo taxi ri yo chihin ñáyivi. Ta tyicuan caa ta cuví tyinyee yo chi noo noo tahan yo na cuahnu yo chihin tuhun Nyoo.

²⁰ Ma sativun tyiño sahá Nyoo añima inga ñáyivi cha cuenda noo cha chachí run. Ndicha vatyí tandihí cha chachí yo ta vaha. Soco ña vaha cha cachi yo tatu chihin cuan sanacavá yo nuu cuatyí chi inga ñu.

²¹ Yucuan chaha, vaha ca cha ma cachi yo coño, ni cha ma coho yo vinu, tatu quiñi cuñi yañi yo chihin cuan. Ma sanacava yo chi ñu nu cuatyí. Ma casi yo chihin noo cha sacuvi yo nu chinó iñi ñu chi Nyoo.

²² Tatu chinó iñun vatyí cuví cachun tandihí, vaha. Soco ma cahun tuhun cuan chihin inga ñu. Noo tuhun ri maun chihin Nyoo coto tuhun cuan. Siñ xaan cuñi yo tatu ña chicá uvi iñi yo noo cha chaha Nyoo ityi chi yo cha sacuví yo.

²³ Soco ñu cha chachí ñáá cha chachí ñu, ta chicá uvi iñi ñu, chicoo cuatyí ñu, vatyí ña chinó vaha iñi ñu tyi cuví cachi ñu. Ta tandihí cha sacuví yo chihin cha ña chiño iñi yo tyi chaha Nyoo ityi chi yo tyi sacuvi yo, cuatyí cuví.

15

Na sacuvi yo cha tahán iñi tahan yo, ta ñima cha tahán iñi ri maa yo

¹ Yoó cha ñihi nyaá yo chihin Nyoo, cuñi chi cha tyinyee yo chi ñu cha ña ñihi nyaá chihin Nyoo. Ta ma nducu yo cha tahán iñi ri maa yo.

² Tahan tahan yo cuñi chi cha sacuvi yo cuhva tahán iñi inga ñu cha cuenda cha vaha chi ñu, tacuhva cuví cuahnu ca ñu chihin tuhun Nyoo.

3 Vatyí nî ri ra Cristo ña sacuvî ra cuhva tahán iñi maa ra, soco cuvî chi ra tari catyí nu tutu Nyoo tyehe caa: “Tandihî cha cahán ñáyivî chi Nyoo, chi ra Cristo cahán ñu”, catyí chi.

4 Vatyí tandihî cha chicunyaá nu tutu Nyoo ta ityî chata ca, chicunyaá chi cha cuenda cha cutuhva yo, tacuhva cuvî cuatu yo cha cuñihî yo chihin cha cama iñi yo. Ta vaha cuñí aña yo cha cuenda cha sacuahá yo nu tutu Nyoo.

5 Ta Nyoo ican ra chahá cha cama iñi yo, ta chahá ra cha vaha cuñí aña yo. Na tyinyee ca ra chi yo cha coo yo chihin cha ñin ri cuvî yo chihin tahan yo tari cuhva iyó ra Cristo Jesús.

6 Vatyí tacuhva tandihî yo ñin ri noo cuhva sacahnu yo chi Nyoo Sutu ra Jesucristo ra nyacá ñaha chi yo.

Ñáyivî ñima ñu Israel cuvî, cucuñî ñu tuhun Nyoo

7 Yucuan chaha tñin cuenda vaha yo chi tahan yo tacuhva vatyí sacahnu yo chi Nyoo tari tñin cuenda vaha ra Cristo chi maa yo cha cuenda vatyí sacahnú ra chi Nyoo.

8 Vatyí catyí yuhu chi ndo vatyí ra Cristo quichî tyinyee ra chi yo cha cuvî yo ñu Israel, tacuhva sacuvi ra cha catyí Nyoo chi sutu chahnu yo tyi cusacuvî ra. Ta tyicuan caa ta sañahá ra Cristo vatyí Nyoo sacuvî ra cha catyí ra tyi sacuvi ra.

9 Ta quichî tucu ra Cristo tacuhva vatyí ñu cha ñima ñu Israel cuvî sacahnu tucu ñu cuan chi Nyoo, vatyí Nyoo ndahvi cuñí ra nyehe ra chi ñu, tari catyí nu tutu Nyoo tyehe caa:

Yucuan chaha cusacahni chuun chihin nuu ñu cha ñima ñu Israel cuvî, tandihî ityî ñu iyó siquî ñuhu ñáyivî.

Ta cucate yaa cha cuenda cha sacahnî chuun nuu ñu, catyí chi.

10 Ta inga tucu nu catyí chi nu tutu Nyoo tyehe caa:

Cusî cuñî nyoho ñu cha ñima ñu Israel cuvî.

Cusî cuñî ndo chihin ñu Israel cha cuvî ñu ñáyivî cuenda Nyoo.

11 Ta inga tucu nu catyí chi nu tutu Nyoo tyehe caa:

Sacahnu ndo chi Sutu Mañi yo, nyoho ñu cha ñima ñu Israel cuvî.

Tandihî ñáyivî sacahnú ñu chi ra cha cuenda cha cahnu xaan cuvî maa ra.

12 Tyaa tucu ra Isaías nu tutu Nyoo tyehe caa:

Cucacu minoo ra vachi tata ra Isaí.

Cuquichî ra vatyí cunyaca ñaha ra chi ñu cha ñima ñu Israel cuvî.

Ta maa ñu cuquihî iñi ñu chi ra vatyí cusacacu ra chi ñu.

13 Nyoo ican ra chahá tunyee iñi chi yo ta chitó yo tyi cuhva ra cha cuhva ra chi yo. ¡Na sacutu ra chi ndo chihin tusî iñi! Ta coo cha taxi ri cuñí aña ndo cha cuenda cha chinó iñi ndo chi ra, tacuhva vatyí chihin tunyee iñi Tatyí Ii ra ta quihî vaha iñi ndo cha cucuhva ra chi ndo.

14 Yañi luhli, chitó vahi vatyí nyoho vaha xaan ñáyivî cuvî ndo ta chitó ndo tandihî, ta chitó vaha ndo cuhva ndo tuhun chi tahan ndo.

15 Soco nu carta ihya ñihi xaan cahín siquî tandihî tuhun cha tyai, tacuhva cha ma naa iñi ndo. Tyehe caa sacuvî cha cuenda tyi Nyoo chahá ra tumañi iñi chii

16 cha sacuvi tyiño nuu ra Jesucristo nu nyicu ñu cha ñima ñu Israel cuvî. Ta tyiño cha sacuvî, ican cuvî cha cahín tuhun Nyoo yoso caa sacacu ra aña ñáyivî. Tyehe caa sacuvî tacuhva vatyí ñu cha ñima ñu Israel cuvî, cuvî nacuhva cuende chi ñu chi Nyoo tari noo ofrenda cha tahan iñi ra, vatyí cha ndundî ñu nuu ra cha cuenda Tatyí Ii ra.

17 Cha cuenda cha nacuhva cuende chii chi ra Cristo Jesús, yucuan cuenda cuvî cusî cuñi ta chité tyi vaha quitá tyiño sacuvî nuu Nyoo.

18 Vatyí ña cañá iñi cahin cha ña nyehî. Soco nacatyí cha sacuvî ra Cristo nu chicá noi cahín tuhun Nyoo tacuhva vatyí ñu cha ñima ñu Israel cuvî quichaha ñu chi Nyoo. Ta ihya ndicha cha cahín.

19 Vatyí chihin seña ta milagru ta chihin tunyee iñi Tatyí Ii ra sacuvî ra. Ta tyicuan caa cahín tuhun cha

cacu añima ñu sahá ra. Quichahí nya Jerusalén ta tandihí ityi ta nyacua nya Ilírico.

²⁰ Ta tyicuan caa saniñí cahin tuhun cha cacu añima yo maa maa ri nu ta cuiñi ca maa ñáyivi tuhun ra Cristo, tacuhva vatyí ma saha tyiñe nu quichaha saha tyiño inga ra.

²¹ Tari catyí nu tutu Nyoo tyehe caa: Cucoto ñáyivi cha ta coto ca maa tuhun ra.

Ta cucutuñi iñi ñu cha ta ñaha ca maa cuiñi tuhun ra, catyí chi.

Nu tyaá ra Pablo cuhva cha cuhun ra ñuu Roma

²² Yucuan chaha ña cuvi maa tuhun cha cuhin cunyehi nu nyicú ndo, vasi cuaha xaan chaha cuñi cuhin.

²³ Soco vityin cha ndihí tyiño sahi ityi ñuu ihya. Ta cha cuaha xaan cuiya cuñi cuhin cunyehi nu nyicú ndo ta cunyai suhva quivi chihin ndo.

²⁴ Nyehí tatu cuhin cunyehi nu nyicú ndo quivi cuhin España. Ta cha yaha cha cunyehi chi ndo, nyehi tatu cuvi tyinyee ndo chii ta cuchaa ndihí nu cuahin.

²⁵ Soco vityin cuahin ñuu Jerusalén ta nyisé suhva cha cutyinyee chi ñu cuenda Nyoo yucuan.

²⁶ Vatyí ñu vehe ñuhu ityi Macedonia ta ityi Acaya nacuaan iñi ñu cha tava ñu suhva xuhun vatyí sacuhun ñu chi ñu ndahvi ñu cuenda Nyoo cha iyó Jerusalén.

²⁷ Tyehe caa quichí cuvi iñi ñu sacuví ñu. Ta ndicha vatyí tahán chi sacuvi ñu. Vatyí tari maa ñu Israel, ñu chinó iñi chi ra Cristo, chaha ñu tuhun Nyoo chi ñu cha ñima ñu Israel cuvi, tyicuan caa tahán chi chi ñu cuan tyinyee tucu ñu chi ñu Israel chihin cha iyó chi ñu.

²⁸ Yucuan chaha, tatu cha yaha sandai tyiño ihya, ta cha yaha nacuhva cuende xuhun ihya chi ñu Jerusalén, tyicuan ta cuhin nya España ta yahi nu nyicú ndo.

²⁹ Chitó vahi vatyí na cuhin nu nyicú ndo, cuchai chihin cha tyitu añime chihin cha vaha Nyoo cha chahá ra Cristo chii.

³⁰ Yañi, chacú ndahvi nuu ndo na cu ñn ri ndo chihin, chihin tndoho cha nyehí, ta çacan tahvi ndo chi Nyoo cha cuende vatyí cuñi ndo chi Sutu Mañi yo Jesucristo, ta vatyí chahá Tatyí Ii Nyoo cha cuñi ndo chii.

³¹ Çacan ndo cha cuende, na sacacu Nyoo chii ndaha ñu ña chinó iñi chi ra Cristo ityi Judea cuan. Ta çacan ndo cha cuenda cha nyisé ihya cha cuenda ñu cuenda Nyoo ñu Jerusalén cuan, na natñn cuenda vaha ñu.

³² Vatyí tatu Nyoo ta cuñi ra, chihin cha sii cuñi quichi nyehi chi ndo ta cuví nyitati ñn ri chihin ndo.

³³ Ta Nyoo ra chahá cha taxi ri coo añima yo, na cunyaa ra chihin tandihí ndo. Ta nacuvi tyicuan caa.

16

Nu sacuhún ra Pablo nocumi chi ñu amigo ra

¹ Sacoté chi ndo cha cuenda hermana Febe vatyí tyinyée xaan ña chi ñu yihí cuenda Nyoo ñuu Cencrea.

² Tñn cuenda vaha ndo chi ña tari tñn cuenda Sutu Mañi yo, tari tahán chi sacuvi ñu yihí cuenda Nyoo. Ta tyinyee ndo chi ña chihin tandihí cha chiñuhu chi ña, vatyí cuaha xaan ñu tyinyee ña chi, ta chí yuhu ñandihí.

³ Cuhva ndo nocumi chi cu Priscila ta chí ra Aquila ñu cha cutahan chihin ndi nu tyiño cha sacuví ndi cuenda ra Cristo Jesús.

⁴ Chahnya iñi ñu ñáyivi ñu quivi cuan cha cuenda cha sacacu ñu chii, yucuan chaha vatyí nacuhvé tyahvi nyoo chi ñu. Ta ñima yuhu ri, soco tandihí tucu ñu cha ñima ñu Israel cuvi, ta yihí tucu ñu cuenda Nyoo.

⁵ Cuhva tucu ndo nocumi chi ñu yihí cuenda Nyoo cha candú ñn ri vehe cu Priscila ta ra Aquila. Vachi tucu nocumi chi ra tahin, ra Epeneto. Ican ra cuví ra cha xihna ca chino iñi chí ra Cristo ityi Acaya.

⁶ Cuhva ndo nocumi chi cu María. Sahá tyiño xaan ña nu nyicú ndo.

⁷ Cuhva ndo nocumi chi ñu ñui, ra Andrónico ta ra Junias, ra tahin cha ñohó chihin vehe caa. Cahnu tyiño

casahá ra cuenda Sutu Mañi yo chihin tandihí ca ra sahá tyiño cuenda Nyoo. Ta xihna ca ra cachino iñi chi ra Cristo ican saha yuhu.

⁸ Cuhva ndo nocumi chi ra Amplias ra tahn cuenda Sutu Mañi yo.

⁹ Cuhva ndo nocumi chi ra Urbano, ra tahn yo cuenda tyiño ra Cristo Jesús, ta chi ra Estaquis ra tahn ñandihí.

¹⁰ Cuhva ndo nocumi chi ra Apeles. Nyehé yo tyi ndicha cha chinó iñi ra chi ra Cristo. Ta nocumi chi ñáyivi chi ra Aristóbulo ñandihí.

¹¹ Cuhva ndo nocumi chi ra ñui, ra Herodión, ta chi ñáyivi chi ra Narciso ñu cha chinó iñi chi Sutu Mañi yo.

¹² Vachi nocumi chi cu Trifena ta chi cu Trifosa, ñu casahá tyiño chihin Sutu Mañi yo. Ta chi hermana yo cu Pérsida, ñaha cha sahá tyiño xaan nu tyiño Sutu Mañi yo.

¹³ Cuhva ndo nocumi chi ra Rufo, noo ra cahnu cuví ra nuu Nyoo vatyí chinó vaha iñi ra chi Sutu Mañi yo. Ta vachi tucu noo cumi chi sihi ra Rufo. Cuví ña tari sihi.

¹⁴ Cuhva ndo nocumi chi ra Asíncrito, chi ra Flegonte ta chi ra Hermas, ta chi ra Patrobas, chi ra Hermes ta chi ra hermano cha canyicú chihin ra.

¹⁵ Cuhva tucu ndo nocumi chi ra Filólogo ta chi cu Julia ta chi ra Nereo chihin cuhva ra, ta chi ra Olimpas ta chi tandihí ñu cuenda Nyoo cha nyicú chihin ñu.

¹⁶ Nacuhva ndo noo cumi chi noo noo tahn ndo cuenda Nyoo. Tandihí ñu yihí cuenda ra Cristo saquichí ñu nocumi chi ndo.

¹⁷ Yañi, chacú ndahvi nuu ndo, na saha ndo cuenda chi ñu cuñí sasín chi ndo, ta nducú ñu cuhva cha nduva ndo chihin tuhun Nyoo, vatyí ñima tyicuan caa cutuhva ndo tuhun ra Cristo. Ma cutahan ndo chihin ñu cuan.

¹⁸ Vatyí ñu cuan ñima tyiño nuu Sutu Mañi yo Jesucristo sacuví ñu, soco cuhva cuñí maa ñu sacuví ñu. Ta sandahví ñaha ñu añima ñáyivi ndahvi chihin tuhun vita cahán ñu.

¹⁹ Tandihí ñáyivi chitó yoso caa quichahá vaha ndo chi Nyoo. Yucuan chaha cusí xaan cuñí chihin ndo, ta cuñí vatyí natyihí tuñi vaha iñi ndo sacuvi ndo cha vaha. Ta ñaha cutuhva ndo sacuvi ndo cha ña vaha.

²⁰ Nyoo ra iyó tandihí cha taxi ri añima, numi ri cuhva ra cha saha ganaa ndo chi ra ña vaha, ta cuhva ra cha cuañi ndo siqui ra. Na nasoco Sutu Mañi yo Jesucristo chi ndo.

²¹ Ra Timoteo ra cuví ra tahn nuu tyiño sacuví ndi nuu Nyoo, saquichí ra nocumi chi ndo. Ta tyicuan caa tucu ra Lucio, ta ra Jasón, ta ra Sosípater, tandihí ra ñui cuan casaquichí ra nocumi chi ndo.

²² Yuhu ra Tercio savahi tutu ihya cha cuenda ra Pablo, suri saquichí tiqui nocumi chi ndo tyi ñn ri yihí yo cuenda Sutu Mañi yo.

²³ Saquichí ra Gayo nocumi chi ndo ñandihí. Vehe ra nyaí suri ihya ndú ñn ri ndi tandihí ñu yihí cuenda Nyoo. Ra Erasto ra cuví tesorero ñuu ihya, saquichí ra nocumi chi ndo, ta yañi yo ra Cuarto ñandihí.

²⁴ Na cocumi Sutu Mañi yo Jesucristo chi tandihí ndo. Ta na cuví chi tyicuan caa.

Nu ndihí cahán ra Pablo ta sacahnú ra chí Nyoo

²⁵ Ta vityin na sacahnu yo chi Nyoo, vatyí maa ra cuví ra cucuhva cha cuní iñi ndo, ta ma sandihí ndo cha chinó iñi ndo tuhun ra cha sacacú ra añima yo. Ican cuví tuhun cahán ta tuhun cha sañahí cha cuenda ra Jesucristo. ñn ri cuví chi chihin tuhun cha ñohó xehe ta cha naha nyata ni cumañi chinó ñuhu ñáyivi.

²⁶ Soco vityin sañahá Nyoo chi yo cha cuenda tutu cha casandoo ra profeta, ra cachaha cuenda tuhun ra ta cha naha. Catyí Nyoo, ra iyó tyicuan ri maa, tyi vityin tahn chi coto tandihí ñáyivi tacuhva chino iñi ñu chi ra ta quichaha ñu tuhun cahán ra.

²⁷ Nyoo noo tuhun maa ra, ta chiñi tuñi xaan ra. Na sacahnu yo chi ra cha cuenda ra Jesucristo tyicuan ri maa. Ta na cuví chi tyicuan caa.

Carta Cha Xihna Ri Sacuhun Ra Apóstol Pablo Chi Ñáyiví Ñuu Corinto Cha Yihí Cuenda Nyoo

Nu tyaára Pablo noo tutu chi ñáyiví ñuu Corinto cha yihí cuenda Nyoo

¹ Yuhu ra Pablo, nacana Nyoo chii vatyí cuñí ra cha cuví noo apóstol ra Jesucristo, o cuñí chi catyí vatyí tachi ra chii nacaque tyiño ra. Yuhu chihin ra Sóstenes yañi yo

² saquichí ndí noo carta ihya chi ndo cha nyicú ndo vehe ñuhu cuenda Nyoo cha nyaá ñuu Corinto. Ñáyiví chi Nyoo cuví ndo vityin, cha cuenda cha ndu ñin ri ndo chihin ra Cristo Jesús. Nyoo nacana ra chi ndo vatyí nanduví ndo noo ñáyiví vaha cuenda ra, chihin tandihí ñáyiví cha sacahnú chi Sutu Mañi yo Jesucristo tandihí ri ityi. Vatyí cuví ra Nyoo cuenda ñu ta cuenda maa yo ñandihí.

³ Nyoo Sutu yo ta Sutu Mañi yo Jesucristo na nasoco ra chi ndo, ta nacuhva ra cha taxi ri coo aña ndo.

Yoso caa nasocó Nyoo chi ñu yihí cuenda ra

⁴ Tyicuan ri nacuhvé tyahvi nyoo chi Nyoo cha catyí maa ndo, vatyí chaha ra cha vaha chi ndo cuenda ra Cristo Jesús.

⁵ Ta cha ñin ri cuví ndo chihin ra Cristo, Nyoo chahá ra tunyee ñni ra chi ndo tacuhva cuví cahán ndo tuhun ra. Ta chahá ra cha chiñi tuñi vaha chi ndo.

⁶ Ta tandihí cha catyí chi ndo, tuhun ra Cristo, cuahán chino cava ñáyiví ndo vityin.

⁷ Yucuan chaha ñahri cha cumañí chi ndo. Chahá Nyoo tandihí cha vaha chi ndo cha ñi ri ca cha nyatú ndo quiví quichi Sutu Mañi yo Jesucristo.

⁸ Nyoo cusaha cuenda ra chi ndo nyacua nya naa ñáyiví tacuhva yori

cuví catyí ñáá cha catyí chi ndo quiví quichi Sutu Mañi yo Jesucristo.

⁹ Nyoo tyicuan ri sacuví ra tari cuhva catyí ra. Ta maa ra cuví ra nacana chi ndo tyi cu ñin ri ndo chihin Sehe ra, ra Jesucristo, Sutu Mañi yo.

Tatu yihí yo cuenda Sutu Mañi yo, ña vaha cha cusin yo

¹⁰ Yañi, chiquén chi ndo chihin sivi Sutu Mañi yo Jesucristo, na ñin ri cuví ndo ta ma cusin ndo. Ta ñin ri cuhva caça xiñi ndo. Ta ñin ri tuhun quihí ñni ndo.

¹¹ Catyí chi ndo tyehe caa, yañi, tyi catyí ñáyiví chi ra Cloé chii, vatyí iyó tisihi nu nyicú ndo.

¹² Vatyí nyoho sin sin cuhva cahán ndo. Noo ndo catyí ndo: “Yuhu, cuenda ra Pablo yihí.” Inga ndo catyí ndo: “Yuhu, cuenda ra Apolos yihí.” Inga ndo catyí ndo: “Yuhu, cuenda ra Pedro yihí.” Inga ndo catyí ndo: “Yuhu cuenda ra Cristo yihí.”

¹³ ¿Atu tahvi sava ra Cristo? ¿Atu chihí yuhu ra Pablo nu cruzi cha catyí ndo? ¿Atu condutyá ndo chihin sivi yuhu? Ñima.

¹⁴ Tyahvi nyoo chi Nyoo vatyí yuhu ña sacondutyé chi ni noo nyoho. Soco noo ri sacondutyé chi ra Crispo ri chihin ra Gayo ri.

¹⁵ Tyicuan caa ta ni noo ndo ta ma cuví catyí ndo vatyí condutyá ndo chihin sivi.

¹⁶ Aan, ta suri sacondutyá tiqui chi ñáyiví chi ra Estéfanos. Soco ña nicohón ñni cha sacondutyé chi inga ndo.

¹⁷ Vatyí ra Cristo ña tachi ra chii tyi sacondutyé. Soco tachi ra tyiño chii vatyí cahin tuhun ra yoso caa sacacú ra chi yo. Soco ña cahín chihin cha chiñi tuñi ñáyiví ihya, coto catyí ñáyiví chii tyi ñahri yahvi nyaá cha chihí ra Cristo cuenda cuatyí yo.

Vaha ca cha chiñi tuñi Nyoo ta ñima ca cha chiñi tuñi ñáyiví ihya

¹⁸ Tuhun cha chihí ra Cristo nu cruzi cha catyí cuatyí yo, ñima ri tuhun cuví cuan cha cuenda chi ñáyiví cha cunaa nu cuví anyaya.

Soco cha cuenda chi maa yo cha cuví yo ñáyiví cacú añima, tunyee iñi cha chahá Nyoo chi yo cuvi cuan.

19 Vatyí tyicuan caa tucu catyí maa tuhun Nyoo:

Cusanai cha chiñi tuñi ra cuñí maa tyi chitó xaan.

Ta cha chitó xaan ra chiñi tuñi cutave ñin chiyo xiin, catyí Nyoo.

20 Ñahri tuhun cha chitó xaan ra chiñi tuñi, ta ra sacuaħa, ta ra chitó xaan nacahan ñáá ndihí tuhun iyó siqui ñuhu ñáyiví ihya. Vatyí cha chiñi tuñi cha iyó siqui ñuhu ñáyiví ihya, cha ñima ri tuhun nasaha Nyoo chi cuan.

21 Nyoo chihin cha chiñi tuñi ra tyaá ra cuħva vatyí ma cuvi cohon nuu ñáyiví chi ra chihin cha chiñi tuñi cha iyó siqui ñuhu ñáyiví ihya, soco tyaá ra cuħva vatyí sacacú ra chi ñu chinó iñi tuhun cha cahan noo ñáyiví nuu ñu. Vasi ñima ri tuhun cuví tuhun cuan cha cuenda ñu cha ña ñohó nuu chi Nyoo.

22 Vatyí ñáyiví Israel cuñí ñu nyehe ñu milagru. Ta ñu Grecia maa maa ri maa cha chiñi tuñi ñáyiví ihya nanducú ñu.

23 Soco yoó sacotó yo tuhun ra Cristo, ra chihí nu cruzi. Ta ñáyiví Israel cahan nuu ñu chiñí ñu tuhun ihya. Ta ñu cha ñima ñu Israel cuví, cuñí maa ñu tyi tuhun cha ñima ri tuhun cuví ihya.

24 Soco cha cuenda chi ñu nacana Nyoo, an cuví ri ñu ñu Israel, o ñu Grecia, ra Cristo cuví tunyee iñi ta cha chiñi tuñi Nyoo.

25 Vatyí cuñí maa ñáyiví vatyí noo cha ñima ri tuhun cuví cha sacuví Nyoo. Soco chiñi tuñi xaan ca Nyoo ta ñima ca ñáyiví iyó siqui ñuhu ñáyiví ihya. Ta cuñí maa ñáyiví tyi ña ñihí fuerza Nyoo. Soco ican cuan cuví fuerza cha ñihi ca cha nuu fuerza tandihí ñáyiví.

26 Yañi, cuñí chi coto ndo vatyí Nyoo nacana ra chi ndo vasi maa ri ñáyiví soho cuví ndo, ta mañi ndo cuví ndo ñáyiví tyayí o ñáyiví chitó xaan cha chiñi tuñi ñáyiví ihya.

27 Soco Nyoo nacachí vaha ra chi ñáyiví soho. Vatyí cuħvá ñu ticahan

nuu chi ñu cuñí maa tyi chiñi tuñi xaan. Ta nacachí vaha ra chi ñáyiví ñahri fuerza vatyí cuħva ñu ticahan nuu chi ñu cuñí maa tyi iyó xaan fuerza.

28 Nyoo nacachí vaha ra chi ñáyiví ndahvi cha cuñí maa ñáyiví tyi ña chiñuhú ñu. Nacachí ra chi ñáyiví cha ña cuñí nyehe ñáyiví chii, vatyí sanocuee ra chi ra cuví tyiño nahnu.

29 Tyicuan caa sacuví Nyoo tacuhva tyi yori sacahnú chii nuu ra.

30 Soco maa maa Nyoo sacu ñin ri ra chi yo chihin ra Cristo Jesús. Ta sacuví ra tyi ra Cristo cuħva ra cha chiñi tuñi chi yo, ta sacuvaha ra chi yo ta sandundi ra chi yo nuu Nyoo vatyí tyiyahví ra chihin ñiñi ra cha catyí cuatyí yo, tacuhva cuví cacu yo.

31 Yucuan chaha sacuví yo tari cuħva catyí nu tutu Nyoo tyehe caa: “Tatu yóó cha cuñí cuyaa, vaha na cuyaa maa soco chihin Nyoo.”

2

Tuhun ra Cristo, ra chihí nu cruzi

1 Soco yañi, quiví chahin chicahin tuhun Nyoo chihin ndo, ña cahin tuhun cha chiñi tuñi ñuhu ñáyiví ihya.

2 Soco maa ri maa tuhun ra Jesucristo, yoso caa chihí ra nu cruzi cha catyí cuatyí yo tyaj xiñi ta nacatyí chi ndo.

3 Ta chaj nu nyicu ndo tari cha ñahri fuerze. Ta ñihí chihin cha yuhvi.

4 Ta cuħva cha cahin nuu ndo, ña cahin chihin tuhun tyaquí tuhun cha chiñi tuñi tari cahan noo ra chitó xaan. Ñima. Soco chihin fuerza maa Tatyí Ii Nyoo cahin chihin ndo.

5 Tacuhva vatyí nachino iñi ndo chi Nyoo soco cha cuenda fuerza maa Nyoo. Ta ñima cha cuenda cha chiñi tuñi ñáyiví ihya.

Nyoo chahá ra cha cohon nuu yo chihí ra chihin Tatyí Ii ra

6 Soco suvita ri tyi cahan ndi tuhun cha chiñi tuñi chihin ñu cha ñihi ca nyaá chihin tuhun Nyoo. Soco cha chiñi tuñi Nyoo, ta ñima cha chiñi tuñi ñuhu ñáyiví ihya, ni ri cha chiñi tuñi

ra nyacá ñaha síqui ñuhu ñayivi. Vatyí maa ra cucunaa ra.

⁷ Soco tuhun xehe cha chiñi tuñi maa Nyoo cahán ndi. Vatyí Nyoo chicumi xehe ra minoo tuhun vaha nya ta ni cumañi chino ñuhu ñayivi ihya. Vatyí tyaq ra kuhva tyi cucacu añima yo ta cunyaa yo noo nu vaha chihin ra tyicuan ri maa.

⁸ Ta tuhun ihya ta cutuñi ca iñi ni noo ra nyacá ñaha ñuhu ñayivi ihya. Vatyí tyehe ta cutuñi iñi ra, ma catyaa ra chi Sutu Mañi yo, ra nyacá ñaha gloria, nu cruzi.

⁹ Soco tari kuhva catyí maa tuhun Nyoo:

Nyoo sanduvaha ra noo cha vaha xaan tyi kuhva ra chi ñayivi cha cuñi chi ra.

Ta ni noo ñayivi ta nyehe ca ñu, ta ta cuiñi ca ñu, ta ta ndichi ca xiñi ñu yoso kuhva cha vaha cha chahá Nyoo chi yo, catyí tuhun Nyoo.

¹⁰ Soco Nyoo chahá ra Tatyí Ii ra vatyí cutuñi iñi yo tuhun ihya. Vatyí Tatyí Ii ra sañahá chi tandihí chi yo nyacua nya tuhun cha xehe ca cha cumi maa Nyoo.

¹¹ Ma cuvi coto noo ra cha chicá xiñi inga ra. Soco suri maa ra chitó ra cha chicá xiñi maa ra. Ta tyicuan caa tucu noo ri Tatyí Ii Nyoo chitó cha yihí iñi maa Nyoo.

¹² Yoó ñima cha chiñi tuñi ñuhu ñayivi naquehen yo, soco maa Nyoo chaha ra Tatyí Ii ra chi yo vatyí sacoto chi chi yo yoso caa cha tyaqui cha chahá Nyoo chi yo.

¹³ Tuhun cha cahán ndi chihin ndo ihya, tuhun cha sañahá maa Tatyí Ii Nyoo chi ndi cuví. Ñima tuhun cha cutuhva ri maa ndi chihin cha chiñi tuñi xiñi ndi. Nacatyí ndi tuhun cha sañahá Tatyí Ii Nyoo chi ndi chi ñu cha yihí Tatyí Ii Nyoo chi.

¹⁴ Soco ñu cha ña yihí Tatyí Ii Nyoo chi, ña cutuñi iñi ñu ta ña cuñi ñu cuiñi ñu cha sañaha Tatyí Ii Nyoo chi ñu, vatyí cuñi maa ñu tyi tuhun cha ñima ri tuhun cuví cuan. Vatyí ñn ri maa

ñu cha yihí Tatyí Ii Nyoo cuví cutuñi iñi ñu tuhun cuan.

¹⁵ Soco ñu yihí Tatyí Ii Nyoo cuví cutuñi iñi ñu. Ta chitó ñu tatu vaha o ña vaha ñáá noo tuhun. Soco ma cuví catyí inga ñayivi tatu vaha o ña vaha cha caá añima maa ñu.

¹⁶ Vatyí tuhun Nyoo catyí chi: “Yori chitó tuhun cha chicá xiñi Sutu Mañi yo. Yori cuví sañahá chi Nyoo”, catyí tuhun Nyoo. Soco yoó cha yihí yo Tatyí Ii Nyoo, chitó yo cha chicá xiñi ra Cristo.

3

Ña tahán chi cunyicon yo chi noo ra yañi yo, chi Nyoo na cunyicon yo

¹ Soco yañi, quivi cuan ña cuví cahin chihin ndo tari cahin chihin ñu saquehen ityi Tatyí Ii Nyoo chi, soco cahin chihin ndo tari cahin chihin ñu ni nachino iñi chi Nyoo, tari cha vatyí ni nyihi ndo chihin tuhun ra Cristo cuví cuan.

² Cahin chihin ndo chihin tuhun cha ña yihí ri cutuñi iñi ndo. Tari chahá yo sícuí coho cha lee cha ta cuvi ca cachi nyayu, tyicuan caa sacuví chihin ndo. Vatyí nyoho, quivi cuan ta cuvi ca chi ndo. ¡Ta ni vityin ta ta cuvi ca chi ndo!

³ Vatyí ni chicá ca xiñi ndo kuhva chicá xiñi ñayivi iyó síqui ñuhu ñayivi ihya. Nyiyó iñi ndo. Iyó tisihi nu nyicú ndo. Cacusin ndo. Ni chicá ca xiñi ndo tuhun ñuhu ñayivi ihya. Ta nyacuví ndo tari nyacuví ñayivi cha ña ñohó nuu Nyoo.

⁴ Vatyí yihí ndo catyí ndo: “Yuhu cuenda ra Pablo yihí.” Ta inga ndo catyí ndo: “Yuhu cuenda ra Apolos yihí.” Cuñi chi catyí tyi nyacuví ndo tari nyacuví ñayivi ña ñohó nuu chi Nyoo.

⁵ Vatyí ¿yoó ra cuví yuhu, ra Pablo? Ta ¿yoó ra cuví ra Apolos? vatyí cañi tahan ndo cha catyí ndi. Vatyí noo ra casacotó tuhun Nyoo chi ndo cuví ndi. Ta yucuan chaha nachino iñi ndo chi Sutu Mañi yo. Ta noo noo ndi sacuví ndi tyiño cha catyí maa Nyoo tyi sacuvi ndi.

⁶ Yuhu tachí chítí tuhun Nyoo añima ndo. Ta ra Apolos chosó ra. Soco Nyoo sacuahnu ra tuhun ra añima ndo.

⁷ Ta yucuan chaha ni ri ra cha tachí ta ni ri ra cha chosó, ñahri ra cuví ra. Soco Nyoo cuví ra tandihí. Vatyí maa ra sacuahnú ra tuhun ra añima ndo.

⁸ Ra cha tachí ta ra cha chosó, ñin ri ra cuví ra. Ta cuñihi ra nu vaha sahá Nyoo yoso cuhva tyiño sahá noo noo ra.

⁹ Ta tyicuan caa nyuhu, sahatyiño ndi soco tyiño nuu Nyoo. Ta nyoho cuví ndo tari noo ñuhú nu sahá tyiño Nyoo.

Cuví tucu ndo tari noo vehe cha cuahán savaha Nyoo.

¹⁰ Catyi Nyoo tyi yuhu cuví tari noo ra cuví nuu cha sama vehe. Vatyí chaquín cuhva vehe cuan ta tyihí chaha chi ñuhú. Ta inga ra samá ityi síqui. Soco cuñí chi sahá ra cuenda yoso cuhva samá ra síqui cuan.

¹¹ Ta yori cuví cacun inga cuhva vatyí cha caá cuhva cuan. Vatyí suri maa ra Jesucristo cuví cuhva cuan.

¹² Ta síqui cuhva cuan cuví sama yo chihin xuhun cuaan, chihin xuhun cuichin, chihin yuu tyaqui, o chihin vitu, o chihin tuñama o chihin ndaha numa.

¹³ Soco quiví cutuñi chi ñáyiví, cunyehe ra Cristo tyiño sahá noo noo yo. Vatyí cuquichi ra chihin ñuhu. Ta ñuhu cuan cuahmi chi nya cha ña vaha.

¹⁴ Ta tatu yihí ñu sacuvi ñu tyiño vaha, ma cayu chi. Cuñihi ñu cha cuhva Nyoo chi ñu.

¹⁵ Soco tatu tyiño sahá ñu ta ndi cayu, cunaa tandihí tyiño sahá ñu. Cacu maa ñu soco tari noo ra cha cuyatyí ca quita nu ñuhu. Vatyí chiin cuii ri ca ta cayu ra.

¹⁶ ¿Atu ña chitó ndo vatyí vehe ñuhu Nyoo cuví chi ndo, ta Tatyí Ii Nyoo iyó ra añima ndo?

¹⁷ Tatu nya noo ñu sativí vehe ñuhu Nyoo, Nyoo cusanaa ra chi ñu, vatyí vehe ñuhu Nyoo, cha ii cuví. Ta vehe ñuhu cuan ican cuví maa yo.

¹⁸ Ni noo ndo ta ma sandavi ñaha ndo chi ndo. Tatu nya nyoho cuñí

maa ndo tyi chitó xaan ndo cha chiñi tuñi ñayiví ihya, ndahvi saha ndo chi ndo tari noo ra cha ña chitó maa. Tyicuan ta Nyoo cuhva ca ra cha chiñi tuñi vaha chi ndo.

¹⁹ Vatyí cha chiñi tuñi ñayiví ihya cuví chi noo cha ñima ri tuhun nuu Nyoo. Vatyí tuhun Nyoo catyi chi: “Nyoo sanacavá ra chi ra chitó, suri maa nu trampa cha savaha ra.”

²⁰ Ta catyi tucu chi: “Sutu Mañi yo chitó ra vatyí cha chicá xiñi noo ra chitó, cha ñima ri tuhun cuví.”

²¹ Yucuan chaha ni noo ndo ña tahán chi sacahnú ndo chi ndo tatu nyicón ndo chi noo rayí. Vatyí tandihí cha iyó ta chi maa ndo cuví, tyi maa Nyoo chaha ra chi ndo.

²² Yuhu ra Pablo, ra Apolos, ra Pedro, maa Nyoo chaha ra chi ndi chi ndo tyi nacatyí ndi tuhun ra chi ndo. Ta ñuhu ñayiví ihya, ñayiví iyó yo, tuhun chihí, cha cuví vityin, cha cuví nu cuahan ca chi, tandihí ta chi maa ndo cuví.

²³ Ta ñin ri, maa ndo, chi ra Cristo cuví chi ndo, ta ra Cristo, chi Nyoo cuví chi ra.

4

Ma sacahnu yo chi yo ta ni chi noo yañi yo

¹ Cuñí chi vatyí nyehé ndo chi ndi tari noo ra sahá tyiño chihin ra Cristo. Vatyí tyaá Nyoo tyiño chi ndi vatyí sañaha ndi tuhun xehe ra cha ña chitó ñáyiví nu quichí chi.

² Ta cuñí chi vatyí nyuhu cha cuví ndi musu Nyoo nyita ri quichahá ndi tandihí cha catyi ra chi ndi.

³ Soco cha cuenda yuhu, ña quichahí tatu cahán ndo chii. O tatu cutuñí chii nuu noo ra cuví tyiño, ñahri cuende. Ta ni ri mai ta ña catyi tyi vahi.

⁴ Vasí tuví ñi mai tyi ñahri ca cuatyí, soco ña cuñí chi catyi vatyí ñahri cuatyí nuu Nyoo. Vatyí nuu maa Sutu Mañi yo cucutuñí chi yo.

⁵ Ican tuhun, nyoho ma cahan ndo chi ndi. Cuatu ndo quiví quichi ra Cristo. Ta maa ra cutava nu ndichin

cha ñohó xehe nu ñaa iñi. Vatyí cu-sanatuvi ra cha caá añima noo noo yo. Tyicuan ta Nyoo cutiyahvi ra yoso cuhva sacuví noo noo yo.

⁶ Yañi, cahín tuhun ihya chihin ndo cuenda cha vaha chi maa ndo. Vatyí nyehé ndo cuhva iyé, ta cuhva iyó ra Apolos. Vatyí ña cahnu sahá ndi chi ndi. Ta tyicuan caa tucu maa ndo, cutuhva ndo sacuvi ndo tari catyí nu tutu Nyoo: Ma cahnu saha ndo chi ndo. Ta ñima chi noo ri ra cuñi ndo. Soco inuu ri cuhva cuñi ndo chi tandihí ñáyivi.

⁷ Ni noo ndo ta ña cahnu ca ra cuví ndo ican saha inga ndo. Vatyí cha iyó chi ndo maa ri maa cha chahá Nyoo cuví. Yucuan chaha ña tahán chi cha sacahnú ndo chi ndo, vatyí ñima maa ndo ñihí.

⁸ Cha cuhva cha cuñi maa ndo vatyí tandihí tuhun Nyoo chitó ndo, ta ñahri ca cha cumañi chi ndo. Ta cuñi maa ndo tyi Rey cuví ndo. Ta ña chiñuhú ca nyuhu chi ndo, cuñi maa ndo. Vaha tyehe ta tyicuan caa, tacuhva vatyí cuví tucu nyuhu rey chihin ndo.

⁹ Nyuhu cha cuví ndi apóstol, tari maa cha sandoq Nyoo chi ndi nya chata ca, cahvi iñi. Vatyí nyehé xaan ndi tindoho. Cuví ndi tari noo ra iyó cuatyí, ta tari quivi cha yahá policia chihin ndi ityi cahnu vatyí tacuhva tyi nyehe ñáyivi ta ángel chi ndi.

¹⁰ Sahá ñáyivi tyi ra tondo cuví ndi cha cuenda ra Cristo. Ta nyoho cuñi maa ndo tyi chitó xaan ndo tuhun ra Cristo. Nyuhu cuví ndi tari noo ra cha ñahri fuerza, cha ni ri ca cha nyoho cuñi maa ndo tyi cuaha xaan fuerza ndo iyó. Tasi cuñi nyehe ñáyivi chi ndi, ta chi nyoho sahá ñu ñáyivi.

¹¹ Nya vityin, nyehé ndi tindoho. Chisocó ndi. Ityi ndi ndutya. Cumañi sahma ndi. Ñahri vehe ndi iyó. Ta ñáyivi, tasí iñi ñu chi ndi.

¹² Ta chitatú ndi cha sahá tyiño ndi chihin ndaha ndi. Cahán ñáyivi chi ndi. Soco nacahán ndi chihin cha vaha nu cahan ñu. Chicá nyicon ñu chi ndi soco cunyeé ndi.

¹³ Cahán ña vaha ñu siqui ndi. Soco ña yatyín iñi ndi, vita ri chaha ndi tuhun chi ñu. Sahá ñu tari noo mihin chi ndi. Sahá ñu tari noo cha ña chiñuhú ca chi ñáyivi chi ndi. Tyicuan caa sacuví ñu nyacua nya vityin.

¹⁴ Sacuhín tuhun ihya chi ndo, soco ñima ticahan nuu chahí chi ndo. Soco chahí tuhun chi ndo tari chahí tuhun chi sehi tyi cuñi chi ndo.

¹⁵ Soco vasi uchi mil ra sacuahá sañahá tuhun ra Cristo chi ndo, soco ña cuaha sutu ndo iyó. Yuhu cuví sutu ndo cha cuenda tuhun ra Cristo Jesús. Vatyí sañahí chi ndo yoso caa cacú añima ndo.

¹⁶ Ta tyicuan caa catyí chi ndo na cunyicon ndo cuhva iyé.

¹⁷ Yucuan chaha tachí chi ra Timoteo, sehi cuenda Sutu Mañi yo, nu nyicu ndo. Ni xaan iñi ra nyicón ra chi Nyoo. Ta cuñi xain chi ra. Maa ra cuasanicohon ra iñi ndo yoso cuhva iyé, vatyí chinó iñi chi ra Cristo. Cusañaha ra chi ndo yoso cuhva sañahí tandihí ri vehe ñuhu.

¹⁸ Yihí nyoho cahnu sahá ndo chi ndo. Cuñi maa ndo vatyí ma cahun que nu nyicú ndo.

¹⁹ Soco tyaí cuhva tyi cunyehe nu nyicu ndo cha numi ri, tatu Sutu Mañi yo ta cuñi ra. Tyicuan ta cunyehe tatu ndicha cha iyó fuerza Nyoo chi ra cahnu sahá chii chiña, o tatu cacahán ri maa ra.

²⁰ Vatyí tatu ndicha cha chahá ra cha cunyacá ñaha Nyoo chi ra, ma cahan ri ra. Soco cuatuvi iñi yo vatyí nyaá fuerza Nyoo chihin ra.

²¹ ¿Ñáa cha cuñi nyoho vii? ¿Atu cha quichi tachi tuñi chi ndo, o cha quichi nyehi chi ndo chihin cha vita iñi?

5

Nu cutuñi chi noo ra chiyo chihin sihi queen

¹ Catyí ñu chii vatyí iyó noo nyoho cha iyó ndo chihin sihi queen ndo. Ihya cuví noo cuatyí cha cahnu xaan, vatyí ni ñu ña ñohó nuu chi Nyoo ta ña nyacuví ñu tari nyoho.

² ¡Ta tyicuan caa ta cahnu sahá ndo chi ndo cha nuu cha cucuihyá iñi ndo! Cuñí chi vatyí catyí ndo chi ra cha nyacuví cha quiñi caa cuan vatyí ma cutahan ca ra chihin ndo.

³⁻⁴ Vasi ña nyaí chihin ndo chihin coño ñuhi, soco cohon iñi ndo vatyí ñohó iñi tuhun ndo, tari cha nyaá mai chihin ndo cuví cuan. Ta cha sandai tyiño ra cha sacuví cuatyí cuan chihin sivi maa Sutu Mañi yo Jesucristo. Cuñí chi tyi ndu ñn ri ndo. Ta saha ndo tuhun tyi nyaí chihin ndo. Ta cunyaa fuerza maa Sutu Mañi yo Jesús chihin ndo ñandihi.

⁵ Tyicuan ta cuñí chi vatyí nacuhva cuenda ndo chi ra cuan chi cuihna, tacuhva nativi ndihi coño ñuhu ra. Ta cuhva cuví cacu añima ra quivi quichi Sutu Mañi yo Jesucristo.

⁶ Ña tahán chi sacahnu ndo chi ndo chihin cha sacuví ndo. Vatyí nyehé ndi ndo nyacuví ra cuan cha quiñi caa. ¿Atu ña chitó ndo noo tuhun cha catyí chi vatyí chihin chiin ri yuchan iya ta nandaa nani yuchan pan?

⁷ Tava ñehe ndo yuchan iya chahnu cha cuví cha ña vaha cha sativi chi ndo. Tyicuan ta cuví ndo tari pan cha ñahri yuchan iya yihí chihin, cha tuhva yo chachí cha vico pascua. Ta pan cuan, ican cuví ndo vatyí ra Cristo cuví mbee cha chihi cha catyí cuatyí yo.

⁸ Yucuan chaha tahán chi cachi coo yo cuenda cha chihí maa ra Cristo cha catyí yo. Ta sandoó yo cha quiñi caa cha sacuví yo ityi chata cha cuví tari yuchan iya chahnu. Ta cahán yo maa maa ri cha ndicha chihin cha ñi iñi yo. Vatyí cuví chi tari pan cha ñahri yuchan iya yihí.

⁹ Nuu inga carta cha yaha saquichi chi ndo, catyí chi ndo vatyí nyoho ma cohon naha ndo tuhun chihin ñu cha sacuví cha iyó ri maa chihin ñusihi o rayi.

¹⁰ Ta cha catyí chi ndo tyehe caa, ñima cha cuachiyo ndo ingaña ri nu nyicú ñu cha iyó chihin rayi o ñusihi, ta ñima yí ñu o ñasihi ra cuví, o ñu nyiyó iñi, o ñu suhú, o ñu sacahnú xi-

tohyo. Vatyí tatu tyicuan caa, cuñí chi cha quita ndo ingaña ri ñuhu ñayivi.

¹¹ Soco cha cuñí catyí chi ndo vatyí ma cohon naha ndo tuhun chihin noo ñu cha catyí vatyí hermano cuví ñu, ta iyó ri maa ñu chihin rayi o chihin ñusihi ta ñima yí ñu o ñasihi ra cuví, o nyiyó iñi ñu, o sacahnú ñu xitohyo, o cuendu ñu, o chihí ñu ndixi, o suhú ñu. Ñu cha caá tyehe caa, ni cha ma cunyaa ndo cachi ndo chihin ñu.

¹²⁻¹³ Vatyí yoó ña tahán chi sahá yo cuenda chi ra ña ñohó nuu chi Nyoo. Nyoo cuví ra sahá cuenda chi ñu cuan. Soco nyoho cuñí chi sahá ndo cuenda chi ñu yihí cuenda Nyoo. Yucuan chaha tavá ñehe ndo chi ra iyó cuatyí chiña nu nyicu ndo.

6

Ma cacan yo cuatyí chaha noo yañi yo cuenda Nyoo nuu ra cuví tyiño

¹ ¿Yoso caa quichi cuví iñi nyoho chicán ndo cuatyí chaha tahan ndo nuu ra cuví tyiño cha ña yihí cuenda Nyoo chihin ndo, cha nuu cha sacotó ndo chi ra yihí cuenda Nyoo, tacuhva canyehé ra nya ra iyó cuatyí?

² ¿Atu ña chitó ndo vatyí suri maa ndo cusandaa ndo cuatyí ñayivi iyó siqui ñuhu ñayivi ihya nu cuahan ca chí? Ta tatu maa ndo cusandaa ndo cuatyí cuan, ¿atu ma cuví sandaa ndo noo tyiño cha ñima ri tuhun ihya?

³ ¿Atu ña chitó ndo vatyí nyacua nya ángel ta cutuñi chi ra nuu yo? ¡Ta nyaca cuví noo tuhun luhlu ñayivi ihya!

⁴ Yucuan chaha tatu iyó tisihí nu nyicú ndo, ¿ñáá tuhun cuahan ndo nuu ra cuví tyiño cha ña chitó tuhun Nyoo?, ta ñahri tyiño cuví ra cuan vehe ñuhu nu nyicú ndo.

⁵ Ihya ndicha tuhun catyí chi ndo, na coo chiin ticahan nuu nuu ndo. ¿Atu yori ndicha cuii noo ra cuví sandaa noo tyiño yañi yo nu canyicú nyoho chiña?

⁶ Vatyí cuahan ndo cua cacan ndo cuatyí chaha yañi yo cuenda Nyoo nuu noo ra cuví tyiño cha ña chiño iñi chi Nyoo.

7 Cha iyó t̄is̄ih̄i nu nyicú ndo, ña vaha. Vaha taxin ca c̄un̄yee ri ndo tatu sacuvi ñu cha ña vaha chihin ndo. Saña ndo, na suhu maa ñu cha chii ndo.

8 ¡Soco nyoho suri maa ndo sataśi ndih̄i ca iñi ndo chi ñáyiv̄i, ta nyacua nya cha chii yañi ndo ta suhú ndo!

9-10 ¿Atu ña chitó ndo vatyi ñu quiñi iyó ma quihv̄i ñu nu nyacá ñaha Nyoo? Ma sandavi ñaha ndo chi ndo. Ma quihv̄i tandih̄i ñu iyó ri maa chihin ñusih̄i o chihin raȳi cha tyicuan ri caa. Ta ni ri ñu cha sacahnú xitohyo, ni ri ñáyiv̄i cha iyó ñasih̄i o ȳi, ta cavá noo ñu chihin inga ñaha o chihin inga raȳi, ni ra iyó chihin tahan ȳi, ni ra suhú, ni ra nyiyó iñi cha tyaȳi, ni ra chiñí, ni ri ñu cuendu, ni ri ñu chitó yoso caa sacuví cha quiñi caa, ma ñihi ñu cha vaha nu nyacá ñaha Nyoo.

11 Vatyi tyicuan caa cuv̄i suhva nyoho. Soco Nyoo cha sandund̄i ra aña ndo chihin Tatyí Ii ra. Cha sacuvah̄a Sutu Mañi yo Jesucristo chi ndo nuu Nyoo.

Coño ñuhu yo cuv̄i vehe ñuhu Nyoo

12 Catyí chi tuhun vatyi libre iyó yo cha sacuví yo tandih̄i cha cuñí yo. Cha ndicha cuv̄i. Soco ña tandih̄i ta cuv̄i chi cha vaha chi yo. Ndicha libre iyó yo cha sacuví yo tandih̄i, soco saha yo cuenda tatu cha vaha cuv̄i o cha ña vaha. Ta ma cuhva yo cha cunyaca ñaha chi chi yo.

13 Catyí ñáyiv̄i vatyi chahá Nyoo nyayu cha cuenda chichi yo. Ta chah̄a ra chichi yo cha cuenda cha cachi yo nyayu. Cha ndicha cuv̄i. Soco n̄induvi cuan cusanaa Nyoo quiv̄i naa ñayiv̄i. Ta ña ndicha cha coño ñuhu yo cuv̄i cha cuenda cha sacuvi yo cha ña vaha chihin ñusih̄i o chihin raȳi. Vatyi coño ñuhu yo cuenda Sutu Mañi yo cuv̄i. Ta maa Sutu Mañi yo cuv̄i ra cuenda coño ñuhu yo.

14 Tari sanandoto Nyoo chi ra Cristo Jesús, tyicuan caa cusanandoto ra chi yo chihin tunyee iñi ra.

15 ¿Atu ña chitó ndo vatyi tandih̄i yo cha yih̄i yo cuenda ra Cristo nanduvi yo noo coño ñuhu chihin ra? Ta noo noo yo cuv̄i tari suhva ri coño ñuhu ra. ¿Atu quehen yuhu chiin coño ñuhu ra Cristo ta sativ̄i chihin noo ñaha cata iñi? Ña tahán chi cunyacuvi yuhu tyicuan caa.

16 ¿Atu ña chitó ndo vatyi tatu noo raȳi ndu in ri ra chihin noo ñaha cata iñi, noo ri coño ñuhu nanduví ra chihin ña? Vatyi nu tutu Nyoo catyí chi tyehe caa: “Cha n̄induvi ñu, noo ri nanduvi ñu.” Ta ña tahán chi cu in ri ra yih̄i cuenda Nyoo chihin ñaha cata iñi.

17 Soco tatu noo ñáyiv̄i nacuhvá cuenda ñu aña ñu chi ra Cristo, yucuan cuv̄i nu quihv̄i Tatyí Ii ra aña ñu ta noo ri nanduví ñu chihin ra.

18 Sanaa ndo iñi ndo tatu quichi cuv̄i iñi ndo chi ñusih̄i o raȳi tatu ñima ñasih̄i ndo o ñima ȳi ndo cuv̄i. Vatyi tandih̄i inga nu cuatyí cha nyacuví ñáyiv̄i ña sativ̄i chi coño ñuhu ñu. Soco ñu nyacuví cuatyí chihin cha iyó ñu chihin ñusih̄i o raȳi cha tyicuan ri caa, sativ̄i ñu coño ñuhu ñu.

19 ¿Atu ña chitó ndo vatyi coño ñuhu yo cuv̄i vehe Tatyí Ii cha chah̄a Nyoo chi yo, vatyi cunyaa ra chihin yo? Yoó ñima maa yo nyacá ñaha yo chi yo, Nyoo cuv̄i ra nyacá ñaha chi yo.

20 Vatyi Nyoo sat̄a ra chi yo ta yahvi xaan chah̄a ra chi yo. Yucuan chaha cuñí chi vatyi sacahnú yo chi Nyoo chihin coño ñuhu yo, ta chihin cha chiñi tuñi yo vatyi n̄induvi cuan, chi maa Nyoo cuv̄i.

7

Chahá ra Pablo tuhun yoso caa coo ñu tandahá noo ñayiv̄i vaha

1 Ta vityin cuatyí tuhun cha ndac̄a tuhun ndo chii nu tutu cha sacuhun ndo chii. Ndicha vatyi vaha cha ma tandaha yo.

2 Soco vatyi iyó xaan tuhun cha quichí cuv̄i iñi ñáyiv̄i cha coo ñu chihin ñáyiv̄i cha tyicuan ri caa. Yucuan chaha cuñí chi vatyi tahan tahan raȳi

coo noo ñasihí ra, ta tahan tahan ñusihí coo noo yíi ñu.

³ Na sacuvi rayíi cuhva tahán chi chihin ñasihí ra. Ta tyicuan caa tucu maa ñusihí, na sacuvi ñu cuhva tahán chi chihin yíi ñu.

⁴ Ñaha síhi cuan ma cuvi cunyaca ñaha ri maa ña coño ñuhu ña. Vatyí chi yíi ña cuví coño ñuhu ña. Tyicuan caa tucu maa yíi ña, ma cuvi cunyaca ñaha ri maa ra coño ñuhu ra vatyí chi ñasihí ra cuví coño ñuhu ra.

⁵ Coto ñaha ma cuhva ndo chi ndo chi tahan ndo. Tatu cuñí ndo nanducu ndo chi Nyoo chihin oración, ñin ri cuhva caca xiñi nanduvi ndo. Ta ma cuhva ndo chi ndo chi tahan ndo suhva quívi. Yaha cuan tyicuan ta cuhva tucu ndo chi ndo chi tahan ndo coto ma cunyeé ndo. Ta coto nducu nyehe ra ña vaha chi ndo ta cahun ndo cunducu ndo inga ñusihí o inga rayíi. Ta ña vaha cha tyicuan caa.

⁶ Cha catyí chi ndo tyehe caa ñima cha catyí tyi tandaha ndo. Ña saniñí chi ndo cha tandaha ndo. Soco cuví tandaha ndo tatu cuñí ndo.

⁷ Cha cuenda chi yuhu, vaha ca coo maa ri maa ndo tari mai. Soco Nyoo sñin sñin fuerza chahá ra chi noo noo yo. Yihí yo chahá ra fuerza chi yo vatyí cuvi coo maa ri maa yo. Ta yihí yo ña chaha ra fuerza cha coo maa ri maa yo.

⁸ Chi ñu tyivaa ta chi ñu chihí yíi, chahí tuhun chi ñu. Vaha ca cha ma coo yíi ñu tari mai.

⁹ Soco tatu ma cunyeé ñu cha ma coo yíi ñu, vaha ca cha tandaha ñu ta ñima ca cha quichi ri cuvi iñi ñu tandaha ñu, ta ña tandaha ñu.

¹⁰ Soco ñu cha yaha tandaha, catyí chi ñu vatyí ma sanandoo ñu chi yíi ñu. Cha ndicha cuví vatyí mandamiento ihya ñima cha ndichí xiñi ri cuví soco maa Sutu Mañi yo catyí.

¹¹ Soco tatu noo ñaha síhi ta sanandoo ña yíi ña, cuñí chi vatyí ndoo ña cunyaa ña cha ma tandaha ca ña. O naquehen ña chi yíi ña. Ta suri tyicuan caa, ña tahán chi sanandoo rayíi chi ñasihí ra.

¹² Ta cha cuenda chi yuhu catyí chi inga ndo tuhun ihya. Vatyí tatu ñasihí noo hermano ta ña chinó iñi ña chi Nyoo, soco ndoo ña vaha cha cunyaa ña chihin ra, ñahri ityi iyó chi ra cha sanandoo ra chi ña.

¹³ O tatu yíi noo hermana, ta ña chinó iñi ra chi Nyoo, soco ndoo ra vaha cha cunyaa ra chihin ña, ñahri ityi iyó chi ña cha sanandoo ña chi ra.

¹⁴ Vatyí cha yaha nasoco Nyoo chi rayíi cha ña chinó iñi cuan cha cuenda cha ñin ri cuví ra chihin ñaha cha chinó iñi cuan. Ta cha yaha nasoco tucu Nyoo chi ñaha cha ña chinó iñi chi Nyoo cha cuenda cha ñin ri cuví ña chihin ra chinó iñi. Tatu ña nyacuví ndo tyicuan caa, sehe ndo cucuvi ndotyín tari sehe ñu cha ña chinó iñi chi Nyoo. Soco cha cuenda cha sacuví ndo tyicuan caa, nasoco Nyoo chi sehe ndo.

¹⁵ O tatu rayíi o ñusihí cha ña chinó iñi chi Nyoo, ta cuñí ñu sanandoo ñu chi tahan ñu cha chinó iñi chi Nyoo, na sanandoo maa ñu. Tyicuan ta ra hermano o ñaha hermana ndoo ñu libre. Vatyí maa Nyoo cuñí ra vatyí coo vaha yo chihin cha ñahri tisihi.

¹⁶ Vatyí ña chitó minoo ñaha síhi tatu cacu añima yíi ña saha ña. Ta ñi ri noo rayíi ña chitó ra tatu cacu añima ñasihí ra saha ra.

¹⁷ Ta tyicuan caa catyí chi ndo vatyí coo ndo yoso cuhva catyí Sutu Mañi yo chi ndo. Ta yoso cuhva iyó ndo quívi nacana Nyoo chi ndo. Ta tyicuan caa catyí chi tandihí ñu yihí cuenda Nyoo noo noo vehe ñuhu.

¹⁸ Tatu Nyoo ta nacana ra chi noo nyoho ta cha yaha sacuví ñu costumbre circuncisión chi ndo, ma caca iñi ndo. Soco tatu nacana ra chi noo ndo cha ña sacuví ñu costumbre cuan chihin ndo, ña tahán ca chi sacuvi ndo vityín.

¹⁹ Ña niñi xaan cha sacuví yo, o cha ma sacuvi yo costumbre circuncisión cuan. Soco cha niñi ca cha quichahá yo tuhun cahán Nyoo.

²⁰ Tahan tahan ndo cuñí chi ndoo ndo yoso cuhva cha iyó ndo quívi cha nacana Nyoo chi ndo.

21 Vatyí tatu iyó chitoho ndo cha nyacá ñaha chi ndo quiví cha nacana Nyoo chi ndo, ma caca iñi ndo, soco tatu chahá chi cuhva cha ndoó ndo libre, cuñí chi nducu ndo cuhva ta ndoó ndo libre.

22 Vatyí quiví nacana Nyoo chi noo ra cha iyó chitoho, nduví ra tari noo ra cha libre iyó, vatyí sacuví ra tyiño nuu Sutu Mañi yo. Ta suri tyicuan caa tucu ra cha iyó libre quiví cha nacana Nyoo chi ra. Vityin ra Cristo nyacá ñaha chi ra.

23 Satá Nyoo chi nyoho. Ta yahvi xaan chaha ra chi ndo. Yucuan chaha ma cuhva ndo cha cunyaca ñaha rayíi chi ndo. Ta ma sacuvi ndo tyiño nuu ra.

24 Ta tyicuan caa catyí chi ndo yañi, coo ndo tari cuhva chiyo ndo quiví nacana Nyoo chi ndo.

25 Ta tyicuan tucu ñu cha ta tandaha ca. Ñahri tuhun chaha Sutu Mañi yo chii cha cuenda ndo. Soco catyí chi ndo yoso cuhva ndichí xiñi. Ta cuví naquehen ndo tuhun cahín tyi cha chitó ndo vatyí cha ndahvi cuñí Nyoo nyehe ra chii ta chaha ra tyiño ihya chii.

26 Cha cuenda chi yuhu, vaha taxin ca ma tandaha ndo. Vatyí cuaha xaan tindocho ñayiví cha iyó yo vityin.

27 Soco tatu cha iyó ñasihí noo hermano, ma nducu ra cuhva cha sanando ra chi ña. O tatu ta coo ca ñasihí ra, ma nducu ra chi ña.

28 Soco tatu tandaha ra, ñima cuatyí cuví. O tatu noo ñaha tyivaa tandaha ña, suri ñima cuatyí cuví. Soco ñu tandaha cuaha xaan tindocho cunyehe ñu ñayiví ihya. Ta yucuan chaha catyí chi ndo vatyí vaha ca cha ma tandaha ndo. Vatyí ña cuñí cha nyehé ndo tindocho ta tísihí cuan.

29 Yañi, cha vityin ta ityi nuu ña cuaha ca quiví nyaá. Cuñí chi vatyí ra cha iyó ñasihí cuví ra tari noo ra cha yori ñasihí. Vatyí nyita ri tahán chi caca xiñi ra tuhun Nyoo.

30 Ta tatu nyaá ndo tucuihya iñi, ma quichaha ndo tucuihya iñi cuan, o tatu nyaá ndo tusíi iñi, soco ma quichaha xaan ndo tusíi iñi cuan. Ta

tyicuan caa tucu tatu iyó xuhun ndo, ma quichaha xaan ndo xuhun cuan. Nacuhva ndo tandihí cuan chi Nyoo.

31 Ta ra iyó xaan cha chii ñayiví ihya, ma quichaha xaan ra chi cuan, soco cotyiño ra tyiño Nyoo. Vatyí ñayiví cha nyehé yo ihya cha cuahán sandihí xaan chi.

32 Cuñí vatyí nyoho ma caca xaan xiñi ndo tuhun cha iyó ñayiví ihya. ñn ri maa tuhun Nyoo caca xiñi ndo. Noo ra tyivaa cha ta tandaha ca chicá xiñi ra yoso caa sacuví ra cuhva cuñí maa Sutu Mañi yo.

33 Soco tatu cha tandaha ra, chicá xiñi ra yoso caa coo vaha ra ñayiví cuhva tahan iñi ñasihí ra.

34 Ta siin cuhva iyó noo ñusihí cha cha yaha tandaha, ta siin cuhva iyó tucu noo ñusihí cha cumañi ca tandaha. Ñaha cha cumañi ca tandaha chicá xiñi ña ñn ri maa tuhun Sutu Mañi yo. Ta chicá xiñi ña yoso caa sacahnú ña chi Nyoo chihin coño ñuhu ña ta chihin cha ñi añima ña. Soco ñaha cha cha yaha tandaha chicá xiñi ña yoso caa coo vaha ña ñayiví ihya cuhva tahan iñi yí ña.

35 Catyí tuhun ihya chi ndo cuenda cha vaha chi maa ndo. Ñima cha saniñí chi ndo. Soco vatyí coo vaha ndo noo ñayiví chihin cha ñahri sayangá chi ndo. Ta ñn ri tyiño Nyoo sacuvi ndo.

36 Soco nya nyoho chicá xiñi ndo vatyí vaha cha tandaha ndo vatyí cha cuayaha quiví ndo; vaha, tandaha ndo tatu cuñí ndo. Ñima cuatyí cuví cuan.

37 Soco tatu inga ndo cha nacuaan vaha iñi ndo vatyí cuandoo ndo cha ma tandaha ndo, vaha tucu.

38 Tu tandaha ndo, vaha. Tu ma tandaha ndo, vaha ca.

39 Soco catyí nu ley Nyoo chi yo vatyí tahán chi cunyacá ñaha rayíi chi ñasihí ra cha ñi ri ca cha iyó ra. Soco tatu chihí ra, iyó ityi chi ña cha tandaha ña yóo chihin cuñí maa ña. Soco tatu ra yihí cuenda Nyoo cuví ra.

40 Soco vaha ca coo ña ñayiví tatu ma tandaha ña inga chaha. Ihya cuví cha chicá xiñi yuhu. Ta chahí tuhun

ihya chi ndo chihin Tatyí Ii maa Nyoo, cahvi iñi.

8

Nu sañahá ra Pablo vatyí ma sacoo yo cuatyí inga ñáyiví

¹ Ta vityin cuanacatyí chi ndo cuenda nyayu cha chahá ñu chi xitohyo. Tandihí yo cha ñohó nuu ca yo chi Nyoo, chitó yo tatu vaha o ña vaha cachi yo nyayu cuan. Ta cha cuenda cha chitó yo, yucuan chaha cahnu xaan sahá yo chi yo ta sativí cuan chi yo. Soco cha cuñí yo chi tahan yo sandunyeé cuan chi yo.

² Tatu yihí ndo cha cuñí maa ndo tyi chitó ndo, cha cuenda vatyí ta coto ca ndo yoso cuhva cuñí chi cuví cuan.

³ Soco Nyoo ñohó nuu ra chi ñu ñi vaha iñi cuñí chi ra.

⁴ Ta vityin cha cuenda cha cachi yo nyayu cha iyó vico xitohyo: cha chitó vaha yo vatyí noo xitohyo ñahri maa vale chi, vatyí noo ri maa Nyoo iyó.

⁵ Vasi cuñí maa ñáyiví vatyí cuaha xaan Nyoo iyó nu ñuhu ñáyiví ihya ta andiví,

⁶ soco cha cuenda chi maa yo noo ri Nyoo Sutu yo iyó. Ta maa ra savaha ra tandihí cuii maa cha iyó. Ta yoó iyó yo cha cuenda maa ra. Ta iyó tucu noo ri Sutu Mañi yo Jesucristo. Ta maa ra savaha tandihí maa cha iyó, nyacua nya chi maa yo.

⁷ Soco ña tandihí yo chitó yo tuhun ihya. Vatyí suhva ñu tahan yo cuenda Nyoo, ta ñi cumañi ca quihvi ñu cuenda Nyoo, sacahnu ñu xitohyo. Ta cha cañ ñu sacahnu ñu chi cuan ta cuñí maa ñu tyi nyitó xitohyo cuan. Vatyí ña ñi vaha iñi ñu nyicón ñu chi Nyoo. Ta tatu chachí ñu nyayu cha chahá ñáyiví chi xitohyo cuan, cuñí maa ñu vatyí chicoó cuatyí ñu cuenda xitohyo cuan nuu Nyoo.

⁸ Soco Nyoo ñahri cuenda ra tatu chachí yo, o ña chachí yo. Ñima vatyí chachí yo ta ña vaha ca yo nuu Nyoo, ta ñima cha cuenda cha ña chachí yo ta vaha ca yo.

⁹ Soco saha ndo cuenda nya ndo chachi nyayu cuan ta chitó ndo vatyí ñahri cuatyí ndo chicoo. Cuví sanacava ndo nuu cuatyí chi ñu ni quihvi ri cuenda Nyoo, vatyí ñu cuan cuñí maa ñu tyi chicoo cuatyí ñu tatu chachi ñu nyayu cuan.

¹⁰ Vatyí tatu yoho cha chiton tuhun ihya, ta cunyaun ta cachun noo cha iyó vehe xitohyo, ta noo ra yañi yo cha ña ñihi vaha cuahán ra chihin Nyoo nyehé ra chuun yucuan, ra yañi yo cuan cucachi ndihí ra chuhun.

¹¹ Ta ra yañi yo cutiví añima ra vatyí cuñí maa ra tyi chicoo cuatyí ra. Ta ra cuan chihí ra Cristo cha cuenda ra. Ta vityin chicoo cuatyí ra cuñí maa ra. Ta yoho cha chitón, sicun cuhun cuatyí cuan.

¹² Yucuan chaha tatu sanacavá yo chi noo yañi yo cha ña ñihí vaha cuahán chihin Nyoo, chicoó cuatyí yo nuu ra Cristo.

¹³ Yucuan chaha tatu sanacavé chi noo yañi yo nuu cuatyí cha cuenda cha chachí, vaha taxin ca ma cachi ca mai coño, tacuhva cha ma sanacave chi ra nuu cuatyí.

9

Cha tahán chi sacuví ra apóstol Nyoo

¹ Yuhu cuví noo ra apóstol Nyoo. Ta yori ñáyiví nyacá ñaha chii. Vatyí nyehí chi ra Jesús Sutu Mañi yo. Ta suri maa ndo cuví cha ndaa tyi ndicha cuví yuhu noo apóstol Nyoo, vatyí chinó iñi ndo tuhun Nyoo cha sacote chi ndo.

² Vasi ña cuñí ñáyiví chinó iñi ñu cha apóstol Nyoo cuví, soco cha cuenda nyoho ican cuví. Vatyí cha cuenda cha chinó iñi ndo chi Sutu Mañi yo, cuví ndo cha ndaa vatyí ndicha cha apóstol cuví.

³ Ihya cuví tuhun cuacahin cuenda ñu cha cahán nyaa chii.

⁴ Iyó chi ityi chii cha quehín tandihí cha chahá ñu cachi ta cha chahá ñu cohi.

⁵ Ta siin ri cha coo noo ñasihí cha chinó iñi chi Nyoo, tari yañi ra Jesús, ta ra Pedro ta tandihí ca ra apóstol.

6 O chicá xiñi ndo vatyí yuhu ri ta ra Bernabé tahán chi saha tyiño ndi chihin ndaha ndi ta sata ndi cha chiñuhú chi ndi. ¿Atu ña tahán chi chi nyuhu sandoo ndi tyiño cuan ta cahan ndi tuhun Nyoo?

7 Ra cha cuví sindaro tyiyahví gobiernu chi ra ta chotyíño ra xuhun cuan. Ta ra cha tachí yoho tichaha ndiví, chachí ra tichaha ndiví cha quita nu iyó tyiño saha ra. Ta ra cha sahá cumi mbee chihí ra sicui ti.

8 Ta ma cuñi ndo vatyí tuhun ihya cha ndichi xiñi ri mai cuví. Vatyí nu ley cha tyaá ra Moisés catyí chi tyehe caa:

9 “Ma tyihi ndo yoho yuhu quiti cha sandundi trigo, vatyí tahán maa chi cachi ti suhva trigu nu sahá tyiño ti.” Ndicha vatyí Nyoo catyí ra tyehe caa soco ñima vatyí cuniñi xaan cuñi ra chihin quiti.

10 Soco na cutuñi ca iñi yo vatyí tari ra tahví ñuhu ta ra cha tachí, tahán chi vatyí cuita iñi ra vatyí cunaquehen ra cha quita nu saha tyiño ra.

11 Ta tyicuan caa, tatu nyuhu quichi cahan ndi tuhun Nyoo chihin ndo, tari quivi cha quichi tachí ndi chiti cuví cuan. Ta tahán chi tyi tyinyeé ndo chi ndi cha cuenda cha sacotó ndi tuhun Nyoo chi ndo.

12 Tatu tyinyeé ndo chi inga ra cha ña quichi tyihi tuhun Nyoo nu nyicú ndo, tahán ca chi cha tyinyeé ndo chi nyuhu, vatyí nyuhu tyihí ndi tuhun Nyoo nu canyicú ndo.

Soco ña cahán ri ndi, ta cunyeé ndi tandihí. Ta ña sayangá ndi chi ndo chihin cha chiñuhú chi ndi. Tacuhva cha ma sandihí ndo tuhun ra Cristo.

13 Chitó ndo tyi ra sahá tyiño vehe ñuhu ñáyivi Israel, iyó ra chihin cha iyó vehe ñuhu cuan. Vatyí tahán chi tavá sin ra suhva coño quiti vatyí cachi ra. Ta tandihí ca coño cuan cacahmi ra tari cuhva catyí maa Nyoo chi ra.

14 Ta suri tyicuan caa catyí Sutu Mañi yo, vatyí tahán chi tyinyeé ñu yihí cuenda Nyoo chi ra cahán tuhun Nyoo chihin ñu.

15 Soco yuhu ni noo chaha ña

chiquen cha tahán chi chii. Ta ni ña tyaí tuhun ihya vatyí cuñi cha cuhva ndo cha cuhva ndo chii. Vatyí tatu chiquén cha tahán chi chii, ña sii cuñi cahín tuhun Nyoo. Vaha taxin ca cuñi cha cúvi ta ñima ca cha caquen xuhun chi ndo.

16 Cha cuenda chi yuhu ñima cha cahnu sahi chii cha cahín tuhun Nyoo. Soco vatyí nyaá siqui cha sacuví. Soco ndahvi cuví yuhu ra ndahvi tatu ma cahin tuhun Nyoo ihya.

17 Yucuan chaha tatu sacuví chihin cha iyó iñi, cuñihi yahvi. Soco tatu sacuví chihin fuerza, suri cuví chi, vatyí noo tyiño cha tachí maa Nyoo chii tyi sacuví, tahán chi cha sacuví.

18 Ta tyicuan caa, yahvi cha ñihi, ican cuví cha sii cuñi cahín tuhun ra Cristo. Ta ña chiquén cha tahán chi chii cha cuenda cha cahín tuhun ra.

19 Vasí ñima musu cuví yuhu. Soco nanduví musu tandihí ñáyivi. Vatyí tyicuan caa saha ganaí cuaha ca ñáyivi cuenda ra Cristo.

20 Tatu ñohí nu nyicú ra Israel, nanduví tari maa ra tacuhva vatyí tya-soho ra tuhun cahin. Vatyí cuñi saha ganai chi ra cuenda ra Cristo. Vatyí ra cuan iyó ra cuhva catyí ley ra Moisés. Ta yuhu sacuví tari cuhva catyí ley cuan. Soco ñima ley cuan nyacá ñaha chii.

21 Soco tatu cuñi saha ganai chi ñu ña quichahá ley ra Moisés, sacuví tari cuhva sacuví ñu. Vatyí tacuhva saha ganai chi ñu. Soco ley maa Nyoo nyacá ñaha chii vatyí chihin ley ra Cristo chicá noi ta ña cuví cunyacuvi cha quiñi caa tari nyacuví maa ñu.

22 Tatu nyaí chihin noo ra cha ta coo vaha ca fuerza Nyoo chii, nanduví tari maa ra, vatyí tacuhva cahan que tuhun Nyoo chihin ra. Ta ndunyeé ca iñi ra chihin tunyee iñi Nyoo. Nanduví yuhu tari cuhva caa noo noo ñáyivi, vatyí tacuhva tyasoho ñu tuhun Nyoo cha cahín ta cacú aña ñu.

23 Tyicuan caa sacuví tacuhva cuví sacoté tuhun Nyoo chi ñáyivi. Vatyí

tacuhva ñihi tumañi iñi cha chahá maa Nyoo chi yo.

²⁴ Chitó ndo vatyí noo síhva cha chinó ñu, tandihí ñu chinó, soco noo ri ñu sahá ganaa. Tyicuan caa tucu maa yo, cuñí chi cha ñihi cunyicon yo chi Nyoo tacuhva sahá ganaa yo nu vaha cha chahá ra chi yo.

²⁵ Tandihí ñu cuahan síhva, sandoo ñu tandihí cha satyoño chi ñu vatyí cuñí ñu sahá ganaa ñu. Ta ñu cuan, cusaha ganaa ñu, soco noo corona numa cha tañi tyehe ri na ityi. Ta yoó nducú yo cuhva soco cha sahá ganaa yo noo cha ma tiví ca maa.

²⁶ Cha cuenda yuhu ña chinó tondo ri mai, ni ña cañí tahan tondo ri mai.

²⁷ Soco ñihi nyacá ñahi chi coño ñuhi. Ta saniñí quichahí chi Nyoo. Coto suri mai cha yaha sañahí chi inga ra ta ndoí.

10

Nu sañahá ra Pablo vatyí ma tyaa xiin yo Nyoo

¹⁻² Yañi, ña cuñí cha naa iñi ndo cha cuví chi sutu chahnu yo ta cha nahá. Nyoo tyinyee ra chi ñu, ta tachí ra noo vico vatyí cuhun ityi nuu ñu coto cunaa ñu. ñin ri nanduví ñu chihin ra Moisés, ra cuví nuu chí ñu, ta yaha sava ñu tyañuhu. Ta cha tyicuan caa, tari cha condutyá ñu chihin vico cuan ta chihin tyañuhu cuví cuan.

³ Ta tandihí ñu chachí ñu ñin ri nyayu cha chahá maa Nyoo.

⁴ Ta tandihí ñu chihí ñu ñin ri ndutya cha chahá maa Nyoo. Vatyí ndutya cuan tavá ra chata noo yuu cha cuahan chihin ñu. Ta yuu cuan ra Cristo cuví.

⁵ Soco vasi nyehe ñu cuaha milagru cha sacuví Nyoo, cuaha ñu ña quichahá ñu tuhun cahan ra chihin ñu. Ta chihí ñu chiqui ndí cuan, ta yucuan ndoo ñu.

⁶ Tandihí tuhun ihya chahá chi noo cuhva chi yo. Vatyí tacuhva ma cuñí yo sacuvi yo cha ña vaha tari sacuví ñu cuan.

⁷ Yucuan chaha ma sacahnu nyoho chi xitohyo, tari chinyacuví suhva ñu

cuan ta cha naha, tari catyí nu tutu Nyoo tyehe caa: “Ta cachiyo ñu vico, ta cachachí ñu, ta cachihí ñu.”

⁸ Ta ma coo ri maa yo chihin inga ñusihí o chihin inga rayí tatu ñima ñasihí yo cuví, o yí ñu cuví, tari chinyacuví suhva ñu cuan. Ta noo ri quiví chihí oco uñi mil ñu cha cuenda cha chinyacuví ñu cha quiñi caa cuan.

⁹ Ta Sutu Mañi yo cama iñi ra, soco ña tahán chi nducú nyehe yo chi ra. Tari chinyacuví suhva ñu cuan. Ta cachihí ñu cha tyaa coo chí ñu, cha cuenda cha cuñí ñu nducú nyehe ñu chí ra.

¹⁰ Ta ni ma cahan ña vaha ndo síqui Nyoo, tari cahan ña vaha suhva ñu cuan síqui ra. Ta saquichí ra ángel cuenda ra ta chahñí ra chí ñu.

¹¹ Tandihí ihya cuví chi sutu chahnu yo cha chiyo ta cha naha. Ta chicunyaa chi nu libru Nyoo tari noo cuhva vatyí sacotó ra chí yo cha iyó yo ñayiví ihya vityin, nu cuahán sandihí chí.

¹² Ta tyicuan caa tatu tuví iñi maa ndo tyi vaha cuahán ndo chihin Nyoo, ñasaha ndo cuenda coto canacava ndo saha ra ña vaha.

¹³ Tindoho cha nyehé ndo, cuñí maa ndo tyi noo ri maa ndo nyehé tindoho cuan. Soco inuu ri nyehé tandihí ca ñu. Soco cuví cunyeé iñi ndo chí Nyoo, ta maa ra ma cuhva ra nyehé ndo tindoho cha ma cunyeé ca ndo. Soco tatu chaa tindoho chí ndo, tyicuan ta Nyoo cunducu ra cuhva cha quita ndo chichi tindoho cuan ta cuví cunyeé ndo.

¹⁴ Yucuan chaha yañi, ma sacahnu ndo chí xitohyo.

¹⁵ Cahín chihin ndo tari cahín chihin noo ra tyihí tuñi iñi. Yucuan chaha saha ndo cuenda cha catyí chí ndo. Ta nyehe ndo tatu ndicha o ña ndicha tuhun cahín chihin ndo.

¹⁶ Quiví cha nichón iñi yo tyi chihí ra Cristo nu cruzi, chihí yo vinu ta chachí yo pan. Ta vinu cuan cuñí chí catyí vatyí ñin ri cuví yo chihin ra Cristo cuenda ñiñi ra. Ta chachí yo pan ta cuñí chí catyí vatyí ñin ri cuví yo chihin ra cuenda coño ñuhu ra.

¹⁷ Vatyí vasi cuaha yo, soco tandihí yo chachí yo noo ri pan. Ta yucuan chaha tandihí yo nduví yo noo ri coño ñuhu ra.

¹⁸ ¿Atu nicohón iñi ndo yoso caa iyó ñu Israel? Chachí tucu maa ñu quití cha chahá ñu chi Nyoo, ta cha cuenda cha nyacuví ñu cha tyicuan caa, ñn ri cuví ñu chihin cuan.

¹⁹ Ñima cha catyí chi ndo tyi vale xitohyo cha sacahnú ñu ña ñohó nuu chi Nyoo. Ña vale, ni ri coño cha chahá ñu chi xitohyo cuan ta ña vale.

²⁰ Soco catyí chi ndo vatyí ñu ña ñohó nuu chi Nyoo chahá ñu cha chahá ñu, soco chí ra ña vaha. Ta ñima chi Nyoo. Ta ña tahán chi cha ndu ñn ri ndo chihin ra ña vaha.

²¹ Vatyí ma cuví coho yo copa Nyoo ta suri cuhva cuan ta coho tucu yo copa ra ña vaha. Ta ma cuví cachi yo nu mesa Nyoo. Ta suri cuhva cuan cachi yo nu mesa ra ña vaha.

²² Ma cuhva yo tisihi chi Nyoo vatyí maa ra iyó ca fuerza chi ra ta ñima ca maa yo.

Sacuvi yo ñáá cha sacuvi yo, soco cha cuenda cha vaha chi tahan yo

²³ Catyí chi tuhun: “Cuví sacuvi yo ñáá cha cuñí yo. Soco ña tandihí ta cuví chi cha vaha chi yo.” Ta ndicha cuví sacuví yo cha cuñí yo. Soco ña tandihí ta tyinyeé chi chi yo cha cuahnu yo chihin tuhun Nyoo.

²⁴ Ma nanducu yo cha vaha chi maa ri maa yo, soco na nducu tucu yo cha vaha chi inga ñu.

²⁵ Cachi ndo ñáá coño cha xicó ñu nuyahvi. Ta ma ndaca tuhun ndo ta ma ndichi xiñi ndo yóo chi cuenda cuví.

²⁶ Vatyí ñuhu ñayivi ta tandihí cha iyó nuu chi, chi maa Nyoo cuví.

²⁷ O tatu noo ñu ña chinó iñi chi Nyoo, catyí ñu chi ndo cha cucachi ndo vehe ñu, ta tatu cuñí ndo cuhun ndo, cuhun ndo ta cachi ndo tandihí cha chahá ñu cachi ndo. Ta ma ndaca tuhun ndo ñáá cuenda cuví.

²⁸ Soco tatu nya noo ñu catyí ñu chi ndo: “Nyayu ihya nyayu cha chaha cuenda ñu chi xitohyo cuví”, catyí

ñu. Ma cachi ca ndo tacuhva cha ma nducuihya cuñi añima ñu cha catyí chi ndo tyicuan caa.

²⁹ Cahín tuhun ihya cuenda inga ñu ta ñima cuenda maa ndo.

Soco yihí ndo catyí ndo: “¿Ñáá tuhun cha sahá xaan ra ihya cuenda chi yuhu cha catyí inga ñáyivi?”

³⁰ Tatu nacuhvé tyahvi nyoo chi Nyoo cuhva cha cuacachi, ñáá tuhun catyí inga ra cuan tyi ña vaha cachí”, catyí ndo.

³¹ Cuacatyí chi ndo tyehe caa, tatu chachí ndo, o chihí ndo, o sacuví ndo ñáá ca cha sacuví ndo, sacuví ndo soco chi maa Nyoo sacahnú ndo chihin cha sacuví ndo.

³² Ta ma cuhva ndo cuhva cha canacavá noo tahan ndo, ni ra Israel, ni ñáyivi cha ñima ñu Israel cuví, ni ñu yihí cuenda Nyoo.

³³ Tari yuhu, nanduquí cha vaha cuví chi ñáyivi. Ña nanduquí cha vaha chi mai, soco cha vaha chi inga ñáyivi nanduquí. Vatyí tacuhva cacu añima ñu.

11

¹ Cuñí vatyí cunyicon ndo cuhva nyacuví. Tari mai nyiquén cuhva nyacuví ra Cristo.

Yoso caa coo ñusihí nu ndu ñn ri yo

² Yañi, sñi xaan cuñí vatyí tyicuan ri nicohón iñi ndo chii. Ta quichahá ndo cha sañahí chi ndo.

³ Soco cuñí tyi coto ndo vatyí ra Cristo cuví xiñi noo noo rayii, ta rayii cuví xiñi ñasihí ra, tari Nyoo cuví ra xiñi ra Cristo.

⁴ Tatu noo rayii, nyasí xiñi ra ta chicán tahvi ra o cahán ra tuhun cha chahá Nyoo chi ra, ticahan nuu chahá ra chi ra cuví xiñi ra.

⁵ Soco tatu noo ñaha sihi ña chasí ña xiñi ña cuhva cha chicán tahvi ña, o cuhva cha cahán ña tuhun cha chahá Nyoo chi ña, tari cha satya ndii xiñi ña cuví cuan. Ta ticahan nuu chahá ña chí ra cuví xiñi ña.

⁶ Tatu noo ñaha sihi ña chasí ña xiñi ña, vaha taxin ca nacahnya ña tandihí ixi xiñi ña. O tatu cahán nuu ña cha satya ndii ixi xiñi ña, nacasi ña xiñi ña.

7 Ña tahán chi casi rayii xiñi ra. Vatyí cuhva caá Nyoo caa ra, vatyí nyacá ñaha ra chi ñasihí ra, tari nyacá ñaha Nyoo chi ra. Soco noo ñaha sihi chahá ña cha cunyaca ñaha yii ña chi ña.

8 Vatyí quiví savaha Nyoo chi rayii, ña savaha ra chi ra chihin yiquí naha ñaha sihi. Soco chihin yiquí naha rayii savaha Nyoo chi ñaha sihi.

9 Ta cha catyí rayii, ta chinó ñaha sihi.

10 Yucuan chaha ñusihí cuñí chi cunyasí xiñi ñu. Vatyí ican cuan cuví noo seña vatyí nyacá ñaha yii ñu chi ñu. Ta cha cuenda cha vaha chi ángel cuví.

11 Soco tyaa maa Nyoo cuhva vatyí chiñuhú rayii chi ñusihí. Ta chiñuhú ñusihí chi rayii.

12 Vatyí ndicha ñaha sihi chinó ña chihin yiquí naha rayii, tari quiví cha sacacu ra chi ña cuví cuan. Soco nya cua nya quiví cuan ta maa ña quichaha sacacu ña chi rayii. Ta nya cua nya vityin ñusihí ta rayii maa Nyoo chahá cha coo ni nduvi tahan ñu.

13 Nyehe maa ndo. ¿Atu vaha que-tuví cha ña nyasí xiñi ñusihí ta chicán tahvi ñu chichi vehe ñuhu?

14 Vatyí cha chitó ndo vatyí ticahan nuu cuví chi rayii tatu nañí xiñi ra.

15 Soco ñusihí, vaha cha cunañí xiñi ñu vatyí Nyoo chahá ra ixi nañi chi ñu vatyí casi chi xiñi ñu.

16 Soco tatu yóo cha cuñí cuví yuhu cha catyí tuhun ihya, cuñí chi coto ndo vatyí ni nyuhu ta ni vehe ñuhu Nyoo, ñahri inga costumbre iyó chi ndi.

Nu sañahá ra Pablo chi ñu vatyí ña vaha cuhva chachí ñu Santa Cena

17 Yañi, nonga tuhun cuacatyí chi ndo. Vatyí ña sii cuñí chihin ndo, vatyí ndu ñin ri ndo, soco ña chahá chi cha vaha chi ndo. Ta sativí chi chi ndo.

18 Ta cuaha xaan ñáyiví nacatyí chii vatyí cuhva cha ndu ñin ri ndo cha cuacoo culto, iyó ndo cha tavá sin ndo chi ndo. Ta suhva ri chinó iñi,

ta suhva ña chinó tucu iñi. Soco vasi ndicha.

19 Vasi cuñí chi coo tisihi nu nyicú ndo tacuhva coto yo nya ndo ndicha cha yihí cuenda Nyoo.

20 Soco tatu tyicuan caa iyó tisihi nu nyicú ndo, ñima Santa Cena chachí ndo cuví cuan.

21 Vatyí cuhva cha cuacachi ndo, chachí ri ndo cha nyisó ndo. Ta ña nyatú ndo nya ndu ñin ri tahan ndo. Ta yihí ndo cuaha chachí ndo. Ta chiñí ndo chihin vinu. Ta yihí ndo ña ñihí ndihí ndo cha cachi ndo.

22 ¿Atu ñahri vehe ndo cachi ndo ta coho ndo? Vatyí cha nyacuví ndo tyehe caa, ña cuñi nyehé ndo vehe ñuhu Nyoo cuví cuan. Ta chahá ndo ticahán nuu chi ñu ñahri maa iyó chi. ¿Atu tahán chi catyí chi ndo vatyí vaha cuhva nyacuví ndo, cuñi maa ndo? Ña tahán chi tyi ñahri noo cha cachi caa nyacuví ndo.

Ra Pablo chahá ra tuhun chi ñu, ñáá tuhun quehén ñu Santa Cena

(Mt. 26.26-29; Mr. 14.22-25; Lc. 22.14-20)

23 Vatyí yuhu suri maa Sutu Mañi yo sañaha tuhun ihya chii. Ta suri maa tuhun ihya sañahi chi ndo. Cha cuaa cha ni cumañi ca cuhva cuenda ra Judas chi Sutu Mañi yo chi ra xaan iñi chi ra, ra Jesús quehen ra noo pan.

24 Ta cha yaha nacuhva ra tyahvi nyoo chi Nyoo ta tahvi sava ra. Ta catyí ra: “Cachi ndo. Vatyí tari coño ñuhi cuví pan ihya. Ta cha catyí ndo ta cucúvi yuhu. Sacuvi ndo tyehe caa vatyí nicohon iñi ndo chii”, catyí ra Jesús.

25 Ta cha yaha cha cacuxiñi ra ta quehen ra Jesús copa ta catyí ra: “Chihin copa vinu ihya natyihí tahan Nyoo tuhun chaa chihin ndo vityin. Vatyí vinu cha yihí chichi copa ihya, niñi cuví. Tahan ri cuacoho ndo, coho ndo cha cuenda cha nicohón iñi ndo chii”, catyí ra Jesús cha cuaa cuan.

26 Ta tahan ri cha ndu ñin ri yo ta chachí yo pan ta chihí yo vinu sacotó yo chi ñáyiví vatyí cha catyí cuatyí yo

chihí Sutu Mañi yo. Ta tyicuan caa sacotó yo chi ñáyivi nyacua nya quivi quichi tucu ra.

Ra Pablo chahá ra tuhun chi yo yoso caa saccoó yo Santa Cena

²⁷ Tatu chachí yo pan ta chihí yo vinu noo cuhvá cha ña chitahán iñi Nyoo, chicoó cuatyí yo. Vatyí ña sahá yo ñáyivi coño ñuhu ta ñiñi ra Cristo.

²⁸ Yucuan chaha cuñi chi sahá yo cuenda tatu vaha cuahán yo chihin Nyoo cha ni ri ca cha cumañi cachi yo pan ta coho yo vinu.

²⁹ Vatyí tatu chachí yo ta chihí yo chihin cha ña sahá yo cuenda ñáá tuhun chihí ra Cristo, Nyoo cutachi tuñi ra chi yo.

³⁰ Yucuan chaha cuaha xaan nyoho cuhvi ndo, ta ñahri vaha fuerza ndo. Ta yihí ndo cha chihí ndo.

³¹ Soco tatu sahá vaha yo cuenda chi yo, Sutu Mañi yo ma tachi tuñi ra chi yo.

³² Soco tatu Sutu Mañi yo ta tachi tuñi ra chi yo tyicuan caa, vatyí tacuhva ma cunaa yo chihin ñáyivi iyó siqui ñuhu ñáyivi ihya.

³³ Ta tyicuan caa nyoho yañi, tatu cuandu ñn ri ndo cha cuacoo Santa Cena, cuatu ndo chi noo noo tahan ndo ta cachi ndo ta coho ndo ñn ri.

³⁴ Soco tatu nya noo nyoho chisocó ndo, cachi ndo nya vehe ndo tacuhva cha ma tachi tuñi Nyoo chi ndo.

Ta inga tuhun cusandaa mai quivi cha quichi nyehi nu nyicu ndo.

12

Cha vaha cha chahá Tatyí Ii Nyoo chi yo

¹ Yañi, cuñi vatyí coto ndo ñáá ndihí cha vaha cha chahá Tatyí Ii Nyoo chi noo noo yo.

² Chitó ndo vatyí quivi cha ña ñoho nuu ndo chi Nyoo, chahá ndo chi ndo cha cunyaca ñaha xitohyo cha ña cuví cahan.

³ Yucuan chaha cuñi tyi coto ndo vatyí tatu noo ra catyí tyi ña vaha ra Jesús, ñima Tatyí Ii Nyoo yihí chi ra. Soco tatu noo ra cha catyí tyi ra Cristo

cuví Sutu Mañi yo, Tatyí Ii Nyoo yihí chi ra.

⁴ Siin siin cha vaha naquehén noo noo yo, soco maa Tatyí Ii Nyoo ican chahá.

⁵ Siin siin cuhva sahá tyiño yo soco tyiño nuu noo ri maa Sutu Mañi yo sacuví yo.

⁶ Siin siin tunyee iñi chahá ra chi noo noo yo. Soco noo ri maa Nyoo cuví ra chotyíño chi tandihí yo.

⁷ Chi noo noo yo chahá ra tunyee iñi Tatyí Ii ra, tacuhva tyi tyinyeé yo chi tandihí ñu yihí cuenda ra.

⁸ Chi suhva ñu chahá Tatyí Ii Nyoo vatyí cahan ñu chihin cha chiñi tuñi maa ra. Ta chi inga ñu chahá ra cha nacoto ñu ta cahan ñu tuhun cha sacotó Nyoo chi ñu.

⁹ Ta chi inga ñu chahá ra cha chinó vavaha iñi ñu chi ra. Ta suri maa Tatyí Ii ra chahá ra tunyee iñi chi inga ñu vatyí cuví sanduvaha ñu chi ñu cuhvi.

¹⁰ Ta chi inga ñu chahá ra tunyee iñi vatyí cuví sacuvi ñu milagru. Ta inga ñu chahá cuenda ñu tuhun cahan Nyoo. Ta chi inga ñu chahá ra vatyí cuví cohon nuu ñu Tatyí Ii Nyoo ta tatyí ña vaha. Ta chi inga ñu chahá ra tunyee iñi ra vatyí cuví cahan ñu inga sahan cha ña chitó ñu. Ta chi inga ñu chahá ra tunyee iñi vatyí cuví nacoto ñu ta nacatyí ñu inga sahan cha cahan tahan ñu.

¹¹ Soco tandihí tuhun ihya, noo ri maa Tatyí Ii Nyoo chahá. Soco siin siin cuhva chahá ra chi noo noo yo, yoso cuhva cuñi maa ra.

Chichi cha tandihí yo ta nduví yo noo ri coño ñuhu ra Cristo

¹² Ra Cristo cuví ra tari noo coño ñuhu. Vatyí cuaha cha nyaá chi coño ñuhu. Nyaá xiñi. Nyaá ndaha. Nyaá chaha. Ta chichi cha tandihí cuan nanduví chi noo ri coño ñuhu.

¹³ Ta tyicuan caa tucu tandihí yo, an cuví yo ñu Israel, o ñu Grecia, o ñu iyó chitoho, o ñu yori chitoho, condutyá yo vatyí cuví yo noo ri coño ñuhu cuenda ra Cristo. Vatyí noo ri maa Tatyí Ii ra chahá ra tyi quihí chi tandihí yo.

14 Noo coño ñuhu cuaha xaan cuenda yihí tahan. Ñima minoo ri cuenda.

15 Tyehe ta cuví cahan chaha yo ta catyí chi: “Yuhu ñima coño ñuhu cuví vatyí ñima ndaha cuví.” Ñima vatyí catyí chi tyicuan caa ta ñima coño ñuhu cuví chi.

16 O tyehe ta cuví cahan soho yo ta catyí chi: “Yuhu ñima coño ñuhu cuví vatyí ñima chiti nuu cuví.” Ñima tyí catyí chi tyicuan caa ta cusandihí chi cha cuví chi coño ñuhu.

17 Tyehe ta tandihí coño ñuhu yo cuví chiti nuu yo, yoso caa cuví cuiñi yo. O tyehe ta tandihí coño ñuhu yo cuví soho yo, yoso caa cuví tahñi yo.

18 Soco Nyoo tyaq̄ ra noo noo cuan nu cuñi maa ra.

19 Tatu in̄ cahnu ri caa coño ñuhu yo, ñima coño ñuhu cuví. Ta ña vaha quetuví.

20 Soco vasi cuaha cha nyaá chi yo, vaha quetuví vatyí nyaá tandihí cha cuví coño ñuhu chi yo.

21 Tyehe ta cuví cahan chiti nuu yo, ñahri ityi iyó chi chi cha catyí chi chi ndaha yo: “Ña chiñuhú yoho chii.” Ta ni xiñi yo ta ñahri ityi iyó chi chi cha catyí chi chi chaha yo: “Ña chiñuhú yoho chii.”

22 Ña vaha cha catyí chi tyicuan caa. Vatyí vasi luhlu ri noo coño ñuhu yo cha cuñi maa yo tyi ña chiñuhú chi yo, ican cuan cuví cha chiñuhú ca chi yo.

23 Ta nu cuñi vaha yo, ican cuan sacuihnó vaha ca yo. Ta nu cuñi maa yo tyi ña tyaqui, ican cuan sacuvií ca yo.

24 Ta nu tyaqui ca, ña cuñi chi sacuvii yo. Soco maa Nyoo sandu in̄ ri ra coño ñuhu yo, tacuhva vatyí nu cuñi maa yo tyi ña tyaqui, sacahnú ca yo.

25 Tacuhva cha ma cusin̄ coño ñuhu, tahan tahan chi cuñi chi quihí iñi chi cha catyí inga tahan chi.

26 Tatu suhva coño ñuhu yo nyehé chi tindoho, tandihí ri chi nyehé, ñima noo ri chi. Ta tatu suhva chi cusii cuñi chi, tandihí ri chi ta cusii cuñi chi, ñima noo ri chi.

27 Ta maa yo cuví yo coño ñuhu ra

Cristo. Ta suhva suhva coño ñuhu ra cuví noo noo yo.

28 Ta Nyoo cuatyaa ra chi noo noo yo vehe ñuhu tacuhva tyinyeé yo chi tahan yo. Cha xihna ca cuatyaa ra chi ra apóstol. Cha cu uvi, chi ra profeta, o ra cachahá cuenda tuhun cahán Nyoo cuví cuan. Ta cha cu uñi, chi ra casañahá. Ta yaha cuan, ra cha casacuví milagru, ta ra cha casanduvahá chi ñu cuhví, ta ra cha catyinyeé chi ñáyivi, ta ra casahacuendá vehe ñuhu, ta ra cha cacahán inga sahan cha ña chitó ra.

29 Ña tandihí yo cuví yo apóstol. Ña tandihí yo cuví yo noo profeta. Ña tandihí yo cuví yo ra sañaha. Ña tandihí yo sacuví yo milagru.

30 Ña tandihí yo chahá Nyoo vatyí sanduvahá yo ñu cuhví. Ña tandihí yo cahán yo inga sahan cha ña chitó yo. Ña tandihí yo cuví nacoto yo ta nacatyí yo ñáá cha cuñi chi catyí noo cha cahán yo chihin inga sahan.

31 Ta nducu ndo cuhva naquehen ndo cha vaha ca cha chahá Nyoo. Soco cuasañahi noo ityi cha vaha ca chi ndo.

13

Chahá ra Pablo tuhun chi yo yoso caa tahán chi cha cuñi yo chi ñáyivi

1 Tatu yuhu ta cuví cahin cuaha ri nuu sahan iyó siqui ñuhu ñáyivi ihya, ta cuví cahan tiqui sahan ángel ñandihí, soco tatu ñahri cha cuñi chi Nyoo ta chi ñáyivi, cuví tari noo tambu cha ñañi ri maa o noo caa cha chacú ndaxin ri maa.

2 Tatu cuví cuhva cuende tuhun cahan Nyoo, o tatu cutuñi iñi tandihí tuhun xehe ca, ta chité tandihí, ta ña cuñi chi Nyoo ta chi ñáyivi, ñahri maa tuhun. Tatu chinó vavaha iñi chi Nyoo nyacua cuví catyí chi ra na tohon ra noo yucu cuan ta natyaa ra inga ityi, ta sacuví ra cha chiquén, soco tatu ña cuñi chi Nyoo ta chi ñáyivi, ñahri ra cuví.

3 O tatu cuhve tandihí cha iyó chii chi ñu ndahvi, ta nyacua cuhva cuende ñáyivi tyi cayu coño ñuhi, soco

tatu ña cuñí chi Nyoo ta chi ñáyivi, ñahri maa tuhun.

⁴Tatu cuñí yo chi Nyoo ta chi ñáyivi, ña ihñi tisihi yo. Vaha ñáyivi cuví yo. Ña nyiyó iñi yo cha chahá Nyoo chi inga ñu, ña cahnu sahá yo chi yo, ta ña yaá yo.

⁵Tatu cuñí yo chi Nyoo ta chi ñáyivi, ña quiñi iyó yo. Ña nanducú yo maa ri cha vaha chi maa yo. Ña cuxaán yo. Ña ndoó tisihi añima yo.

⁶Tatu cuñí yo chi Nyoo ta chi ñáyivi, ña cusii cuñí yo ñáá ndihi cha ña vaha sacuví ñáyivi. Soco cusii cuñi yo cuenda cha vaha ta cha ndicha.

⁷Tatu cuñí yo chi Nyoo ta chi ñáyivi, cunyeé yo nyehe yo tindoho sahá ñáyivi. Chinó iñi yo tyi cusacuví ñu cha vaha. Nyatú yo cha nasama ñu cuhva iyó ñu. Chihin cha cama iñi yo ta cunyeé yo tandihi.

⁸Cha cuñí yo chi Nyoo ta chi ñáyivi ma ndihi maa, soco coo quivi cha ma coo ca tuhun cha sahá yo profetizar. Ta ma cahan ca yo inga sahan cha ña chitó yo, ta tandihi tuhun cha chitó xaan yo cundihí.

⁹Vityin chiin ri chitó yo ta chiin ri sahá yo profetizar.

¹⁰Soco quivi quichi ra Cristo, cunduvaha tandihi ta cucoto yo tandihi, ta cundihí tuhun cha chitó yo chiin ri.

¹¹Quivi cu luhlí cahin ta chica xiñi tari ra cuatyaa. Soco quivi chahni sandoi cha nyacuví tari ra cuatyaa.

¹²Ta tyicuan caa tucu, cuví yo tari ra cuatyaa vityin. Tari cha nyehé yo nu ino cha ña ndichin vaha. Soco quivi quichi ra Cristo ta cunyehe vaha yo chihin nuu yo chi ra. Chiin ri chitó yo cha vityin. Soco quivi cuan tandihi cuii ta cucoto yo, tari ñohó nuu Nyoo chi yo.

¹³Iyó uñi tahan cha ma ndihi maa: cha chinó iñi yo chi Nyoo, cha cuatu yo cha ñihí yo cha cuenda ra Cristo, ta cha cuñí yo chi Nyoo ta chi ñáyivi. Soco chichi cha ninduñi tahan cuan, cha chihuhú ca chi yo, cha cuñí yo chi Nyoo ta chi ñáyivi.

14

Nu sañahá ra Pablo yoso caa cahán yo inga sahan cha ña chitó yo

¹Na sañihi yo cuñí yo chi Nyoo ta chi ñáyivi. Ta na nducu yo cuhva naquehen yo tunyee iñi cha chahá Tatyí Ii Nyoo chi yo. Na nducu xihna yo cha cuhva cuenda yo tuhun cahán Nyoo, o sahá yo profetizar cuví cuan.

²Vatyí tatu cahán yo inga sahan cha ña chitó yo, cahán yo soco chihin Nyoo. Ñima chihin ñáyivi. Vatyí ni noo ñu ta ña cutuñí iñi ñu. Vatyí tuhun xehe cuví tuhun cha cahán yo cha cuenda Tatyí Ii Nyoo.

³Soco tatu sahá yo profetizar, cutuñí iñi ñu. Ta chahnu ca ñu chihin tuhun Nyoo. Ta tyicuan caa sanduní yo ta sandunyeé ca yo iñi ñáyivi.

⁴Tatu cahán yo inga sahan cha ña chitó yo, maa ri maa yo ndunyeé yo. Soco tatu sahá yo profetizar, ndunyeé cuñi tandihi ñu yihí cuenda Nyoo.

⁵Yuhu cuñí vatyí tandihi ndo cahán ndo inga sahan cha ña chitó ndo. Soco vaha ca cha saha ndo profetizar. Vatyí tyinyeé ca chi chi ñu nyicú vehe ñuhu ta ñima ca cha cahán yo inga sahan. Soco tatu noo ndo cuví nacoto ndo ñáá tuhun cahán noo tahan ndo chihin inga sahan, nacatyí ndo. Tyicuan ta cuví tyinyee chi chi tandihi ndo.

⁶Yucuan chaha yañi, tatu yuhu ta chai nu nyicu ndo, ta cahín inga sahan, ña tyinyeé chi chi ndo. Soco tatu cahín noo cha sanyehé Nyoo chii, o noo cha sacoto ra chii, o noo profesia, o noo cha sañahi chi ndo, tyinyeé chi chi tandihi cuii maa ndo.

⁷Tatu tiví yo noo cutu, o sacuacu yo noo guitarra ta ña quita vaha ndusu cuan sahá yo, ma coto yo ñáá yaa cuví.

⁸Ta tatu nu iyó cuatyí ta ña tyacú vaha trompeta, yori coto ñáá cuhva tahan chi cañi tahan ra.

⁹Ta tyicuan caa yoó, tatu cahán yo inga sahan cha ña cutuñí iñi ñáyivi, ma coto ñu ñáá tuhun cahán yo. Tari cha cuví yuhu ri maa yo cuví cuan.

10 Cuaha xaan nuu sahan iyó ñáyiví ihya. Ta noo noo nuu sahan ta iyó iyó ri cha cuñí chi catyí.

11 Soco tatu ña cutuñí iñi sahan cha cahán inga ñáyiví chihin, ma cuví ndatuhin chihin ñu. Ta ni ri maa ñu ma cuví ndatuhun ñu chihin yuhu. Cuví ñu tari ñu inga ñuu cha cuende.

12 Yucuan chaha nyoho cha cuñí xaan ndo naquehén ndo tunyee iñi cha chahá Tatyí Ii Nyoo, nducu ndo noo tunyee iñi cha vaha ca cutyinyee chi ñáyiví vehe ñuhu.

13 Yucuan chaha nyoho cha cahán ndo inga sahan, cacán ndo chi Nyoo vatyí cuví nacoto ndo ta nacatyí ndo chi tahan ndo.

14 Vatyí tatu nacuatí chi Nyoo chihin noo sahan cha ña cutuñí iñi, espíritu mai cha yihí chichi coño ñuhi ican nacuatú soco cha chiñi tuñi xiñi ña cutuñí iñi chi.

15 Yucuan chaha cuñí chi cacán tahvi chi Nyoo chihin inga sahan. Soco cuñí tucu chi cha cacán tahvi chi ra chihin sahan cha cutuñí iñi. Ta cuñí tucu chi cha cate chihin sahan cha ña cutuñí iñi, Soco cuñí tucu chi cha cate chihin sahan cha cutuñí iñi yo ñandihí.

16 Vatyí tatu maa maa ri chihin sahan cha chahá Tatyí Ii Nyoo chuun, sacahnún chi ra, ma cutuñí iñi ñáyiví cha ña chitó ñáá cha cuví cuan. Ta ma cuví sacahnu ñu Nyoo chuhun.

17 Vasi vaha tuhun cahún, cuhva cha nacuhvón tyahvi nyoo chi Nyoo tyicuan caa, soco ña tyinyeé chi chi inga ñáyiví vatyí ña cutuñí iñi ñu tuhun cahún.

18 Soco yuhu nacuhvé tyahvi nyoo chi Nyoo vatyí cuaha ca chaha cahin inga sahan ta ñima ca tandihí nyoho.

19 Soco chichi vehe ñuhu tahan ca iñi cahín vasi ohon tahan tuhun cha cutuñí iñi ndo vatyí sañahi chi inga ndo, ta ñima ca cha cahín uchi mil tuhun cha ña cutuñí iñi ndo.

20 Chahnu cuhva caca xiñi ndo, yañi. Ta ma lee xaan cuhva caca xiñi ndo. Soco lee cuhva cunyacuvi ndo. Vatyí cha lee ña nyacuví chi cha quiñi caa.

21 Catyí Nyoo nu libru ley ra tyehe caa: “Cucahin chihin ñáyiví ihya chihin yuhu ñáyiví inga ñuu ta chihin inga sahan. Cha ña cutuñí iñi ñu. Soco ni ri tyicuan caa ta ma quichaha ñu chii”, catyí Sutu Mañi yo.

22 Yucuan chaha tuhun cha cahán yo inga sahan cuví chi tari noo seña chi ñu cha ña chino iñi tuhun ra Cristo. Soco tuhun cha sahá yo profetizar, cuví chi cuenda ñu cha chinó iñi chi ra.

23 Vatyí tatu ndu ñin ri ndo, ta tandihí ndo cahán ndo inga sahan ta quihví noo ñu cha ña yihí cuenda Nyoo, cucatyí ñu tyi ña vaha cuñí xiñi ndo.

24 Soco tatu tandihí ndo sahá ndo profetizar, ta quihví noo ñu cha ña yihí cuenda Nyoo, o noo ñu ña cutuñí vaha iñi tuhun Nyoo, coto ñu tyi iyó cuatyí ñu cha cuenda tyi cutuñí iñi ñu cha cahán ndo.

25 Ta tandihí cha caa chichi añima ñu cunacoto ñu. Ta nicuiñi chiti ñu ta sacahnu ñu chi Nyoo. Ta catyí ñu vatyí ndicha ndicha cuii cha nyaá Nyoo chihin ndo.

Yoso caa sacoo yo culto minoo cha cachi minoo cha ndaa

26 Yucuan chaha yañi, tatu cuandu ñin ri yo, cuiso noo noo yo yaa cha cata yo, o cha sañaha yo, o ñáá cha sanyehe o sacoto Nyoo chi yo, o cahan yo inga sahan, o cha nacoto yo ta nacatyí yo yoso caa cuahán tuhun inga sahan cuan. Soco tandihí ihya nacuvi chi noo cha chahá tunyee iñi maa Nyoo chi tandihí yo cha yihí yo cuenda ra.

27 Tatu cuacahan yo inga sahan nu ndu ñin ri yo, cuñí chi cahan uvi yo o uñi ri yo, soco noo noo ri yo cahan. Ma cahan yo ñin ri. Ta ñin ri cuñí chi cha nacatyí noo yo tuhun cahán tahan yo.

28 Soco tatu yori cuví nacatyí ñáá tuhun cahán yo, vaha taxin ca ma cahan ca yo chihin inga sahan nu ndu ñin ri yo. Cahan yo inga sahan soco xehe ri chihin Nyoo tacuhva cuiñi ri maa yo.

29 Tyicuan caa tucu tatu sahá yo profetizar, cahan uvi yo, o uñi ri yo. Ta tandihí ca yo saha yo cuenda tatu vaha cha cahán tahan yo.

30 Soco tatu sacoto Nyoo ñáá noo ca tuhun chi inga ñu cha canyicú chiñi tuhun cuan. Tyicuan ta ñu cha xihna ri, cuñí chi sandihí ñu cha cahán ñu tacuhva cuvi cahan inga ñu cuan.

31 Ta tyicuan caa tandihí ndo cha naquehén ndo tuhun cha chahá Nyoo chi ndo cuví nacatyí noo noo ndo. Vatyí tacuhva cutuhva tandihí ca ndo ta cuní ca iñi ndo.

32 Ñu cha sahá profetizar cuví cuatu noo ñu nya ndihí cahán inga ñu. Vatyí noo ri Nyoo cuví ra cha nyacá ñaha chi noo noo yo.

33 Vatyí Nyoo cachi iyó ra ta ña iñi ndaa iñi noo nyacuví ra.

Quehen ndo cuhva vaha nyacuví inga hermano nu ca ndu iñi ri ra.

34 Ñusihí taxi ri na coo ñu. Cuñí chi quichaha ñu chi yí ñu tari catyí ley Nyoo.

35 Tatu ñáá cha cuñí ñu coto ñu, na ndaca tuhun ñu chi yí ñu nya vehe ñu. Vatyí ña vaha quetuví cha cahán ñusihí nu ndu iñi ri yo.

36 Tatu sín cuhva chicá xiñi ndo, cuñí chi nicohón iñi ndo vatyí ñima chihin ndo quichaha tuhun Nyoo. Ta ñima nyoho ri naquehén tuhun Nyoo.

37 Tatu nya noo ndo cuñí maa ndo vatyí profeta cuví ndo, o tatu cuñí maa ndo tyí Tatyí li saquehén ityí ra chi ndo, cunacoto ndo vatyí cha catyí chi ndo ihya, mandamiento Sutu Mañi yo cuví.

38 Soco tatu ña cuñí ndo naquehén ndo tuhun ihya, ni nyuhu ta ma naquehen ndi tuhun cahán ndo.

39 Ta tyicuan caa yañi, na nducu ndo cuhva saha ndo profetizar. Ta ma casi ndo cha cahán ñu inga sahan.

40 Soco sacuvi ndo tandihí chihin cha ndaa ta chihin cha cachi.

15

Yoso caa nandoto ra Cristo

1 Vityin yañi, cuñí vatyí nicohon iñi ndo tuhun ra Cristo, cha sacacú chi

yo, cha cahín nuu ndo quivi cuan. Ta ican naquehen ndo ta ñi iñi ndo chinó iñi ndo.

2 Ta suri cha cuenda tuhun ra Cristo cacú ñima ndo tatu cuahán ndo tari cuhva sañahí chi ndo. Soco tatu natyihí caxiin ndo cuahan ndo, ñahri maa tuhun cha chinq iñi ndo chi Nyoo.

3 Cha xihna ri sacote tuhun cha cutuhve chi ndo. Ta sañahí chi ndo vatyí ra Cristo chihí ra cha catyí cuatyí yo, tari catyí nu libru Nyoo vatyí cucuvi.

4 Tyicuan ta chicuchí ñu chi ra. Soco nu ndu uñi quivi nandoto ra tari catyí tucu nu libru Nyoo.

5 Tyicuan ta tuví ra Cristo nuu ra Pedro ta yaha cuan ta nuu ndi uchi uvi tahan ra chicá tyiño ra.

6 Yaha cuan ta noo chaha tuví ra nuu yaha ca ohon cientu yañi yo. Ta cuaha ca ñu cuan iyó ca ñu vityin. Soco suhva ñu cha yaha chihí ñu.

7 Yaha cuan ta tuví ra nuu ra Jacobo. Yaha cuan ta nuu tandihí ra apóstol.

8 Ta nu ndihí tuví tucu ra nuu yuhu, cha cuví tari noo ra cuatya cha cacú ta ta chaa ca yoo cacu. (Vatyí ta cutuñi ca iñi tuhun Nyoo cuví cuan.)

9 Vatyí cha nuu tandihí ca ra apóstol cuví yuhu noo cha ñima ri tuhun. Ta ni ña nañé cha cuví apóstol vatyí chicá nyicon xain chi ñu ñohó cuenda Nyoo.

10 Soco Nyoo vaha xaan ñáyivi cuví ra chihin. Ta ñima cha caha ri saha ra tumañi iñi chii cha cuví noo ra chicá tyiño ra. Ta ñihi ca sahá tyiñe ican saha inga ra. Soco ñima mai sahá tyiñe vatyí maa Nyoo nyaá chihin. Ta ican ra sacuví tandihí cuan.

11 Soco ñahri saha, an yuhu, an inga ra cuan. Soco tuhun cahán ndi chihin ndo, ican ihya cuvi tuhun cha chinó iñi ndo.

Nu sañahá ra Pablo vatyí cha ndicha cuví vatyí cunandoto ñu ndiyi

12 Tatu cahán ndi tuhun cha nandoto ra Cristo mahñu ñu ndiyi chihin ndo, ¿ñáá tuhun cha yihí ndo catyí ndo vatyí ma nandoto ñu ndiyi?

13 Vatyí tatu ma nandoto ñu ndiyí, ni ri ra Cristo ta ña nandoto ra cuví cuan.

14 Tyehe ta ña nandoto ra Cristo, tuhun cha cahán ndi chihin ndo ñahri maa vale. Ta ni ri cha chinó iñi ndo, ñahri maa tuhun.

15 Tatu tyehe ta ña ndicha cha sanandoto Nyoo chi ra Cristo, cuví ndi noo ra cuendu tyi catyí ndi vatyí sanandoto Nyoo chi ra. Ta tatu ña ndicha cha nandoto ñu ndiyí, ña ndicha cha sanandoto Nyoo chi ra Cristo.

16 Vatyí tyehe ta ma nandoto ñu ndiyí, ni ri ra Cristo ta ña nandoto ra.

17 Ta tatu ña nandoto ra Cristo, ñahri maa tuhun cha chinó iñi ndo cha sandachí ra cuatyí ndo. Ta tacuhva iyó ri maa cuatyí ndo.

18 Ta ñu yihí cuenda ra ta cachihí ñu, cuanaa ri maa ñu cuví cuan.

19 O tyehe ta ihya ri ñayiví tyinyeé ra Cristo chi yo, ta ma nandoto yo quiví quichi ra, cuví yo noo ñu tondo cha nuu tandihí ca ñáyiví.

20 Soco chitó vaha yo vatyí cha ndicha cuví cha nandoto ra Cristo. Ta ican ra cuví cha nandoto xihna ca mahñu ñu ndiyí.

21 Vatyí cha catyí cuatyí ra Adán ta chicoó tuhun chihí. Yucuan chaha tahán chi cúvi yo. Soco cha catyí cha nandoto ra Cristo tahán chi nandoto tucu ñu yihí cuenda ra.

22 Ta tari tandihí ñáyiví chihí cha cuenda ra Adán, tyicuan caa tucu cunandoto tandihí ñu cuenda ra Cristo.

23 Soco noo noo yo cunandoto yo quiví tahan chi chí yo. Xihna ca ra Cristo nandoto. Yaha cuan ta quiví quichi tucu ra inga chaha cunandoto tucu ñu yihí cuenda ra.

24 Yaha cuan ta cundihí tuhun ñuhu ñayiví ihya ta ma cunyaca ñaha ca ra cuví tyiño nahnu, ta tatyí ña vaha. Vatyí ra Cristo cuatinyaa ra fuerza chi ra cuan. Ta cunacuhva cuenda ra chi Nyoo Sutu ra.

25 Vatyí ra Cristo cunyaca ñaha ra nyacua nya quiví cuhva Nyoo cha cuví chasaha ra chi tandihí ra xaan iñi chi ra.

26 Ta nya nu ndihí, cusanaa ra tuhun chihí.

27 Vatyí cha yaha nacuhva cuenda Nyoo tandihí chi ra Cristo vatyí cunyaca ñaha ra. Soco nu catyí chi vatyí tandihí natyaa Nyoo ndaha ra, cuñí chi catyí vatyí ma cunyaca ñaha ra chi maa Nyoo vatyí ican maa Nyoo natyaa tandihí cuan ndaha ra.

28 Soco quiví saha ganaa ra Cristo tandihí, tyicuan ta maa ra cha cuví ra Sehe Nyoo, cunacuhva cuenda ra tandihí chi Nyoo Sutu ra. Vatyí Nyoo cucuvi ra Nyoo cuenda tandihí maa cha iyó.

29 Tatu tyehe ta ña nandoto ñu chihí, ¿ñáá tuhun yihí ñu condutyá ñu tyiño nuu ñu chihí?

30 Ta tyicuan caa tucu mai, tatu ma nandote, ¿ñáá tuhun ndoi vaha cha ndi quiví nyatí tuhun chihí?

31 Tandihí quiví nyatí tuhun chihí. Soco ñahri caa vatyí sí cuñi chihin ndo. Vatyí chinó iñi ndo chi Sutu Mañi yo Jesucristo.

32 Ñáá ri tuhun nyehí tindoho ñuu Éfeso tatu tyehe ta ma nandoto ca yo. Vaha taxin ca sacuvi yo tari catyí ñáyiví: “Na cachi yo, na coho yo vatyí tyaan isa cúvi yo”, catyí maa ñáyiví cha ña chitó.

33 Ma cuhva ndo cha sandavi ñaha ñu chi ndo. Vatyí iyó tucu tuhun cha catyí: “Tatu ñu tahan yo quiñi iyó ñu, cuví sativí ñu cuhva vaha cuahan yo.”

34 Saha ndo cuenda cuhva iyó ndo. Ta ma sacuvi ca ndo cha quiñi caa. Vatyí chihin cuhva iyó suhva ndo chité tyi ña ñohó nuu ndo chi Nyoo. Catyí chi ndo tyehe caa vatyí nacoo ticahan nuu nuu ndo.

Nu sañahá ra Pablo yoso caa cusanandoto Nyoo chi yo quiví quichi ra Cristo

35 Soco yihí ndo ndacá tuhun ndo: “¿Yoso caa cunandoto ñu chihí? ¿Ñáá coño ñuhu cucuiso ñu?”

36 ¡Tondo xaan xiñi ndo! ¿Atu ña chitó ndo vatyí tatu tachí yo noo chiti yutun, cuñí chi cha tyahyu soo chiti cuan? Tyicuan ta cañá noo yutun.

(Chihí chítí cuan tacuhva na coo yu-tun cuan ñayiví.)

³⁷ Vatyí cha tachí yo ñima maa tun tachí yo. Soco chítí tun, an cuví ri nuñi, o trigo, o ñáá ndihí ca chítí.

³⁸ Ta cha cañá cuan Nyoo sacuví ra yoso cuhva cuñí maa ra chi noo noo cha cañá cuan. Vatyí sñn sñn cuhva caa noo noo nuu chítí.

³⁹ Ta tyicuan caa tucu tandihí coño ñuhu, ña ñn ri caá chí. Sñn caa coño ñuhu ñáyiví. Sñn caa coño ñuhu cuiñí. Sñn caa coño ñuhu saa. Sñn caa coño ñuhu tiyaca.

⁴⁰ Ta tyicuan caa tucu cha iyó andiví. Sñn caa cha iyó yucuan. Ta sñn caa tucu cha iyó ñuhu ñayiví ihya. Ta cha iyó nya andiví tyaqui xaan, ta cha iyó siquí ñuhu ñayiví tyaqui tucu cuan soco sñn caa.

⁴¹ Cha ndichin ñanyii, ña inuu ri chihin cha ndichin yoo. Ta ña inuu ri chihin cha ndichin tiño. Ta tiño ña inuu ri chihin inga tucu tiño.

⁴² Ta tyicuan caa tucu tuhun cha nandoto yo. Vatyí chicuchi yo noo coño ñuhu yo cha tuhva tyahyu. Ta cunandoto yo soco chihin noo cha ma cúvi ca maa.

⁴³ Chicuchi yo noo cha numi ri tyahyu. Soco cunandoto noo cha tyaqui. Tyihí yo noo coño ñuhu pehe chichi ñuhú. Ta cunandoto noo cha nyee.

⁴⁴ Vatyí chicuchí yo coño ñuhu yo cuenda ñayiví ihya chichi ñuhu. Ta cunandoto noo cha ñima ca cuenda ñayiví ihya cuví, soco cuenda Nyoo andiví. Tatu iyó coño ñuhu yo ñayiví ihya. Suri coo tucu noo cha ñima ca cuenda ñuhu ñayiví, soco cuenda andiví.

⁴⁵ Catyí tuhun Nyoo vatyí ra Adán ra cha chiyó cha xihna ri, chahá Nyoo ñayiví coo ra. Soco ra Adán cu uvi, ra cuví Cristo, cuví ra Tatyí Ii ta chahá ra noo ñayiví cha ma naa ca maa chí yo.

⁴⁶ Yucuan chaha, cha xihna ri tahán chí coo yo chihin coño ñuhu cuatyí yo. Ta yaha cuan ta coo yo cuenda Tatyí Ii Nyoo.

⁴⁷ Rayíi cha chinq cha xihna ri, chihin ñuhú chinq ra. Ra cuenda ñuhu

ñayiví cuví ra. Ta rayíi cu uvi cha cuví Sutu Mañi yo, ra cuenda andiví cuví ra.

⁴⁸ Tandihí yo nyisó yo coño ñuhu cha chinq chihin ñuhú, tari coño ñuhu ra Adán. Ta cha cucuiso yo andiví cuví chí tari nyisó ra Cristo ra quichí nya andiví.

⁴⁹ Tari ndacú yo chí rayíi, ra cha chinq chihin ñuhú, tyicuan caa tucu cundacu yo chí ra Cristo ra quichí nya andiví.

⁵⁰ Ta cuñí catyí chí ndo yañi, vatyí coño ñuhu yo ma cuví quihví chí andiví nu nyacá ñaha Nyoo. Noo cha tañi tyehe ri tiví ma cuví quihví noo nu ña tiví.

⁵¹ Soco cuñí tyi coto ndo noo tuhun xehe cha yori maa chitó. Vatyí ña tandihí yo cucúvi yo. Soco tandihí yo ta cunasama cuhva caa yo.

⁵² Ta ñn yaha cuii ri, tari noo cha ndahvá nuu ri yo, nu ndihí tiví ángel trompeta. Vatyí cutiví ángel trompeta ta ñu ndiyí cunandoto ñu cha ma cúvi ca maa ñu. Ta Nyoo cunasama cuhva caá ñu.

⁵³ Vatyí cuñí chí tyi nasama Nyoo coño ñuhu yo chihin noo cha ma naa ca maa.

⁵⁴ Ta quiví cuan nasama coño ñuhu yo ta quehen yo cha ma tiví maa. Cua cuví tari catyí nu libru Nyoo tyehe caa: “Nyoo cuví chasaha ra chí tuhun chihí.”

⁵⁵ Yoho, Tuhun Chihí, ¿nya nyaa tunyee iñi chuun vityin vatyí cahñun chí ndi?

¿Nya nyaa cha cua saha ganaun vityin, yoho Tuhun Chihí?

⁵⁶ Vatyí cuatyí yo ican chahá cha cahñi tuhun chihí chí yo. Ta ley chahnu, ican cuví cha chahá fuerza chí chí.

⁵⁷ Soco tyahví nyoo chí Nyoo, yañi. Vatyí sahá ganaa yo siquí cuan cha catyí Sutu Mañi yo Jesucristo.

⁵⁸ Yucuan chaha yañi, na cuinanyaa yo chihin Nyoo chihin cha ñi iñi yo. Tyicuan ri na saha tyiño yo nu tyiño Sutu Mañi yo. Vatyí tyiño sahá yo chihin Sutu Mañi yo, ñima cha sahá tyiño caha ri maa yo cuví.

16

Chahá ra Pablo tuhun chi ñu Corinto yoso caa tyinyee ñu chi tahan ñu cuenda Nyoo

¹ Ta tuhun cha tyinyeé ndo xuhun chi ñu ndahvi, ñu yihí cuenda Nyoo. Cunyacuvi ndo tari catyí chi ñu nyicú tandihí vehe ñuhu ityi Galacia.

² Ma cuatu ndo nya quichi ta cuhva ndo xuhun. Soco tahan tahan nu ndihí vitya ri ta tyihí sñn ndo cha tahan chi cuhva ndo chi ñu, yoso cuhva cha chahá Nyoo chi ndo.

³ Ta quiví cha quichi, cutachi nya ra cha cuñí maa ndo vatyí cunyaca ra xuhun cuan chihin carta chi tahan yo cha canyicú nya Jerusalén.

⁴ Ta tatu tahan tucu chi cuhin, cuhun coyo ra chihin.

Yihí iñi ra Pablo nya ndihí nu cuahan ra tuhun ra Cristo

⁵ Cuhin nu nyicu ndo Corinto chiña, soco cuhun xihne ityi Macedonia. Vatyí ityi cuan cuyahi.

⁶ Ta tatu chahá chi cuhva cundoí chihin ndo nyacua nya yahá yoo vichin. Tyicuan ta cuví tyinyeé ndo chiin chii ta cuhin inga ñuu.

⁷ Ña cuñí cha ñn yaha ri yahi nu nyicu ndo. Vatyí cuñí ndoí suhva quiví chihin ndo tatu Sutu Mañi yo ta cuñí ra.

⁸ Soco cunyai ñuu Éfeso ihya, nyacua nya yaha quiví cha sanducahnú ñu Israel vico Pentecostés. Tyicuan ta quichi nu nyicu ndo.

⁹ Cundoí suhva ihya vatyí vasi cuaha xaan ñáyiví ña cuñí nyehe ñu tuhun Nyoo, soco chahá xaan chi cuhva cahín tuhun Nyoo chihin ñáyiví ñuu ihya.

¹⁰ Tatu chaa ra Timoteo, na cunyaa ra chihin ndo. Ta vaha tyiñuhu ndo chi ra. Vatyí sahá tyiño tucu maa ra cuenda Sutu Mañi yo tari mai.

¹¹ Ta vaha coo iñi ndo nyehé ndo chi ra. Ta tyinyee ndo chiin chi ra tyi quichi ra nu nyaí. Vatyí nyatí chi ra chihin inga yañi yo.

¹² Ta yañi yo, ra Apolos, chacu ndahvi xain nuu ra nacuhun ra chihin inga yañi yo nu nyicu ndo. Soco ña cuñí ra. Soco cuhun maa ra nacuhva chi cuhva chi ra, na.

Chahá ra Pablo nocumi chi tandihí ñu yihí cuenda Nyoo ñuu Corinto

¹³ Sañihí ndo chinó ca iñi ndo chi Nyoo. Ta cuní iñi ndo ta nacoó vaha fuerza Nyoo chi ndo.

¹⁴ Tandihí cha sacuví ndo, sacuvi ndo cha cuenda cha cuñí ndo chi Nyoo ta chi tahan ndo.

¹⁵ Chitó ndo yañi vatyí ñáyiví chi ra Estéfanos xihna ca ñu chinó iñi tuhun ra Cristo ityi Acaya chiña. Ta vityin sacuví ñu tyiño nuu ra hermano.

¹⁶ Ta catyí chi ndo vatyí saha ndo ñáyiví chi ñu cha iyó tari iyó ñu chiña, ta chi tandihí ñu cha tyinyeé ta sahá tyiño cuenda Nyoo.

¹⁷ Ta cusí xaan cuñi cha quichi coyo ra Estéfanos ta ra Fortunato ta ra Acaico. Vatyí maa ra catyinyeé ra chi ndi. Vatyí tandihí ndo ña cuví quichi ndo vatyí cañi xaan ñuu ndo.

¹⁸ Soco maa ra quichi coyo ra. Ta sandunyeé ca ra iñi chihin tuhun Nyoo. Tari sanduní ra iñi nyoho ñandihí. Ta vaha coo iñi ndo nyehé ndo tyiño casacuví ra. Vatyí maa ra ñn ri chi Nyoo canyicón ra.

¹⁹ Ta vachí nocumi chi ndo sahá tandihí yañi yo ta tahan yo cha ndu ñn ri ityi Asia ihya. Ta vachi tucu nocumi chi ndo sahá ra Aquila ta cu Priscila, ta ñu yihí cuenda Nyoo cha ndu ñn ri vehe ñuhu nu cuví vehe ñu.

²⁰ Vachi nocumi chi ndo sahá tandihí yañi yo, ta nacuhva maa ndo nocumi chi noo noo ndo nu nyicú ndo chiña.

²¹ Nocumi cha vachí chi ndo ihya, yuhu ra Pablo tyai chihin ndahi.

²² Tatu nya ñáyiví ña cuñí chi Sutu Mañi yo Jesucristo, nacuhun ñu anyaya. Soco yuhu catyí: ¡Sutu Mañi yuhu, ñaha!

²³ Ta nasoco Sutu Mañi yo Jesucristo chi tandihí ndo.

²⁴ Ta catyí chi ndo vatyi yuhu cuñí
chi tandihí ndo cha cuenda ra Cristo
Jesús. Ta nacuví chi tyicuan caa.

Carta Cha Cu Uvi Sacuhun Ra Apóstol Pablo Chi Ñáyivi Ñuu Corinto Cha Yihí Cuenda Nyoo

Nu sacuhún ra Pablo noo tutu chi ñu ñuu Corinto cha yihí cuenda Nyoo

¹ Yuhu ra Pablo, cuví noo ra apóstol ra Jesucristo vatyi Nyoo nacachi vaha ra chii. Ta yuhu ta ra Timoteo yañi yo tyaá ndi noo tutu ihya chi ndo cha cuví ndo ñáyivi ñuu Corinto cha yihí cuenda Nyoo, ta chi tandihí ñu yihí cuenda Nyoo nicacahnu ityi Acaya chiña.

² Nyoo Sutu yo ta Sutu Mañi yo Jesucristo na nasoco ra chi ndo ta nacuhva ra cha taxi ri coo añima ndo.

Nu chicá noo ra Pablo sacotó ra tuhun ra Cristo nyehé xaan ra tindoho

³ Na sacahnu yo chi Nyoo Sutu Sutu Mañi yo Jesucristo. Vatyi ican ra cuví Nyoo Sutu yo. Ta cundahvi xaan cuñi ra nyehé ra chi yo. Ta maa ra tyicuan ri naquehén ndahvi ra chi yo.

⁴ Ta cuhva cha nyehé yo tindoho maa ra naquehén ndahvi ra chi yo. Vatyi tyicuan caa ta cuvi naquehen ndahvi tucu maa yo chi ñu nyehé tindoho tari naquehén ndahvi tucu maa ra chi yo.

⁵ Vatyi cha cuenda ra Cristo, nyehé xaan ndi tindoho ta suri cha cuenda ra Cristo naquehén ndahvi xaan Nyoo chi ndi.

⁶ Tatu nyehé ndi tindoho cha cuenda cha sacoto ndi tuhun ra Cristo chi ndo, soco cha cuenda cha vaha chi ndo cuví vatyi tyicuan ta Nyoo naquehen ndahvi tucu ra chi ndo, ta sacacu ra chi ndo. Ta tatu Nyoo ta sandunyeé ra iñi ndi, cuví tucu chi cha cuenda cha sandunyeé tucu ra iñi maa ndo ta cacu ndo, ta sïn ri tacuhva cha cunyeé ndo tindoho cha nyehé ndo. Vatyi ñn ri tindoho nyehé yo.

⁷ Vatyi chitó vaha ndi tatu nyehé ndo tindoho cha cuenda ra Cristo tari cha nyehé nyuhu, maa ra cunaquehen ndahvi ra chi ndo, tari naquehén ndahvi tucu ra chi nyuhu.

⁸ Yañi, cuñi ndi tyi coto ndo vatyi cuaha xaan tindoho nyehé ndi ta chinyaa ndi ityi Asia. Ñihi xaan chiyo tindoho nyacua cha ñahri ca fuerza ndi cahvi iñi ndi. Ta tyaá ndi cuhva vatyi cha yahá chihí ndi ta quita ndi yucuan.

⁹ Cuñi maa ndi vatyi cha cha cuacúvi ndi. Ta ña cuví sacacu ndi chi ndi. Soco yucuan sañahá chi chi ndi na nachinó ca iñi ndi chi Nyoo ra sanandotó ndiyi.

¹⁰ Nyoo sacacu ra chi ndi ndaha tuhun chihí quivi cuan, ta sacacú ca ra chi ndi nya vityin. Ta chitó ndi vatyi tyicuan ri cusacacu maa ra chi ndi.

¹¹ Tatu tyinyeé ndo chi ndi chihin cha chicán tahvi ndo chaha ndi, ta tatu cuaha ñáyivi chicán tahvi chaha ndi, cunacuhva ñu tyahvi nyoo chi Nyoo cha cuenda tyi ñihí ñu tuhun tyi Nyoo chahá ra cha vaha chi ndi, vatyi chicán tahvi ñu chaha ndi.

Nu nacatyí ra Pablo ñáá tuhun ña chaq ñaha ra ñuu Corinto

¹² Iyó noo tuhun cha cusii xaan cuñi ndi, vatyi yoso ri sandaví ñaha ndi. Vatyi cachi cuhva iyó ndi. Ta ndaa cuhva iyó ndi xihna ca chihin tandihí ri ndo, ta chihin inga ñáyivi ñandihí. Ta ñima chihin cha chiñi tuñi maa ndi iyó ndi tyehe caa, soco cha cuenda tyi tyinyeé xaan maa Nyoo chi ndi.

¹³⁻¹⁴ Ta nu tutu cha sacuhún ndi chi ndo, maa maa ri tuhun cha cuví sacuahá ndo, ta cha cuví cutuñi iñi ndo, tyaá ndi. Vityin cuahán cutuñi iñi ndo suhva. Ta nyatú ndi na cutuñi vaha ca iñi ndo tandihí tuhun cuan. Tacuhva cusii cuñi ndo chihin ndi quivi quichi Sutu Mañi yo. Ta cusii cuñi tucu maa ndi chihin ndo.

¹⁵⁻¹⁶ Ta cha cuenda cha cusii iñi yo tyehe caa, tyaj cuhva quivi cuan cha cuhun xihne nu nyicú ndo. Yihí iñi cha cuhin nu nyicú ndo, quivi cha yahí cha cuahín nya Macedonia ihya.

Ta quiví cha nayaha tiqui cha chahin Macedonia, cuhin inga chaha nu nyicú ndo. Tyicuan caa ta cuvi cusii iñi ndo chihin yuhu uvi chaha, tyají cuhva. Ta tyicuan caa ta cuvi tyinyee ca ndo chii ta cuhin ityi Judea.

¹⁷ O cuñi maa ndo vatyí ña tyají cuhva cha cuhin nu nyicu ndo. Ta vasi cuñi maa ndo vatyí sacuví tari ñáyiví iyó síqui ñuhu ñayiví ihya. Vatyí catyí ñu tyi cuhun ñu, ta ña sacuví ñu.

¹⁸ Maa Nyoo chitó ra vatyí ndicha cha cahín. Ta ña tuhvé sandavi ñahi.

¹⁹ Vatyí yuhu ta ra Silvano ta ra Timoteo cahán ndi chihin ndo. Vatyí tuhun maa ra Cristo maa maa ri tuhun ndicha cuví.

²⁰ Tyi cha cuenda maa ra ñihí yo tandihí cha vaha cha catyí Nyoo tyi cucuhva ra chi yo. Yucuan chaha cuhva cha sacahnú yo chi Nyoo, o chicán tahvi yo chi ra, catyí yo: “Amén”. Vatyí chitó yo tyi cuacuhva ra cha vaha chi yo cha cuenda ra Cristo.

²¹ Ta Nyoo sanduní ca ra iñi yo nu sandu ñin ri ra chi yo chihin ra Cristo. Ta nacachí ra chi yo.

²² Ta tari cha tyaa ra tuñi ra chi yo cuví cuan. Vatyí chaha ra Tatyí li ra quihí aña yocha cuenda cha cuñihi ca yo ñáa ca cha cucuhva ra chi yo.

²³ Na naquehen Nyoo chii vityin ri tatu ña ndicha tuhun cua catyí chi ndo. Ta cuhun que nu nyicú ndo Corinto chiña vatyí tatu cuhin tyají cuhva cha cahin chiin chi ndo. Yucuan chaha ña cuñi ñahi cuhin vatyí nacuaan iñi nyehí chi ndo. Ta Nyoo chiñi ra vatyí ndicha cha cahín.

²⁴ Ñima cha cuñi ndi cunyaca ñaha ndi chi ndo yoso cuhva chinó iñi ndo chi Nyoo. Vatyí chinó vaha iñi ndo. Soco cha cuñi ndi tyinyee ca ndi chi ndo na coo ca tusii iñi maa Nyoo aña ndo.

2

¹ Yucuan chaha ña cuñi quichi tiqui nu nyicu ndo coto cuhva que tucuihya iñi chi ndo.

² Vatyí tatu yuhu ta sanducuihyé iñi ndo, yori ca cuví sandusii iñi mai. Vatyí ma cuvi ca sandusii ndo iñi tatu cha yaha sanducuihyé iñi ndo.

³ Yucuan chaha sacuhin tuhun cuan chi ndo. Vatyí tatu cuhin soco ma sanducuihya ndo iñi chihin cuhva iyó ndo. Vatyí tahán chi sandusii ndo iñi. Ta tatu sii cuñi yuhu, chité tyi tandihí yo ta cusii iñi yo.

⁴ Quiví cha tyají carta cuan chi ndo, chica xaan xiñi. Ta nducuihya xaan iñi nyacua chaqui. Soco ñima cha sacuhin carta cuan chi ndo vatyí cuñi cha nducuihya iñi ndo. Soco vatyí coto ndo vatyí yaha xaan cuñi chi ndo.

Nu chahá ra Pablo tuhun chi ñu yoso caa saha ñu ticahnu iñi

⁵ Tucuihya iñi cha chaha ra chiña, ñima ñin ri chi yuhu chaha ra. Chaha tucu ra chiin chi tandihí nyoho ñandihí. Catyí tyehe caa tacuhva cha ma yaha xaan cahín.

⁶ Vaha ri, cha iyó vaha. Ma cahan ca ndo chi ra. Ma tachi tuñi ca ndo chi ra.

⁷ Ta vityin tahán chi vatyí saha ndo ticahnu iñi chi ra. Ta naquehen ndahvi ndo chi ra, coto yaha xaan nducuihyá iñi ra.

⁸ Yucuan chaha catyí chi ndo sañaha ndo cha cuñi ndo chi ra.

⁹ Sacuhin carta cuan chi ndo quiví cuan vatyí cuñi cote tatu sacuví ndo cuhva chahí chi ndo.

¹⁰ Ta vityin tatu sahá ndo ticahnu iñi, sahá tucu yuhu ticahnu iñi yóo cha chahá tisihi chi yo. Tatu ndicha cha chahá ra tisihi chii. Soco sahi ticahnu iñi chi ra cha cuenda cha vaha chi nyoho. Vatyí yucuan cuhva cuñi maa ra Cristo.

¹¹ Vatyí chitó yo vatyí tatu ma saha yo ticahnu iñi chi tahan yo, cuihna cutyihi ra cha quiñi caa aña yo. Vatyí maña xaan ra. Ta cuví sacañi tahan ra chi yo.

Ñandoo ra Pablo ñuu Troas vatyí ña nañihí ra chi ra Tito

¹² Quiví chají ñuu Troas cha cuacahin tuhun ra Cristo, chahá chi cuhva

cha sahá tyiñe tyiño nuu Sutu Mañi yo yucuan.

¹³ Soco ña sii maa cuñi añime. Vatyí ña nañihí chi yañi yo, ra Tito. Yucuan chaha ña ndoo que ñuu cuan cahin chihin ñu. Ta vachi ityi Macedonia ihya.

Cahán ra Pablo tuhun ra Cristo chihin cha ñi ñi ra

¹⁴ Soco tyahvi nyoo chi Nyoo vatyí tyicuan ri sahá ganaa yo chihin fuerza ra Cristo Jesús. Vatyí sacotó yo tuhun ra chi ñáyivi. Ta tuhun ra cha cahán yo, cuví chi tari noo xico vixi chahan cha caña tandihí ri ityi nu cuahán yo.

¹⁵ Ta yoó cuví yo tari noo xico vixi cha chahá cuenda ra Cristo chi Nyoo. Ta caña xico cuan mahñu ñu cha cacu añima, ta mahñu ñu cha ma cacu añima ñandihí.

¹⁶ Soco cha cuenda ñu cha ma cacu añima cuan, quiñi chahán, tari noo xico ndiyi cuví tuhun cha sacotó yo chi ñu, cuñi maa ñu. Vatyí sacotó yo yoso caa cucuvi ñu vatyí ña chinó ñi ñu chi ra Cristo. Soco cha cuenda ñu cha cacu añima, vixi xaan chahán, Vatyí sacotó yo yoso caa coo ñu ñáyivi cha ma naa ca maa. Soco ¿yoó cha cuví sacuvi tyiño ihya?

¹⁷ Nyuhu ña sacuvi ndi tari sacuvi cuaha ra cachicá noo. Ra cuan cuñi ra xuhun. Tuhun ra Cristo ñima noo cha xico yo cuví. Soco cahán ndi chihin cha ñi ñi ndi tuhun ra vatyí ñi ri cuví ndi chihin ra, ta Nyoo ta ra Cristo tachí ra chi ndi.

3

Tuhun chaa cha quichi cacun ra Cristo

¹ Ta cha cahán ndi tuhun ihya, ¿atu cha cuñi ndi sayaa ndi chi ndi, cuñi maa ndo? Ñima tyicuan caa. Ta yoó ¿atu chiñuhú cha cuiso yo tutu cha catyí chi vatyí vaha ñáyivi cuví yo, tari tuhva inga ra canyiso? Ñima.

² Vatyí nyoho cuví ndo carta ndi cha tyaá Nyoo añima ndi. Vatyí cuví nyehe ñáyivi yoso caa nasama Nyoo cuhva iyó ndo. Ta coto ñu tyi maa maa ri cha vaha sañahá ndi chi ndo.

³ Ta cachi nyehé ñu tyi cuví ndo carta cha tyaá ra Cristo vatyí nyehe ñu, ta nyuhu nacuhva cuenda ndi carta cuan chi ñu. Ta ñima chihin tinta tyaá Tatyí li Nyoo nyitó añima ndo. Ta ni ñima nu yuu chicunyaa.

⁴ Cahán ndi tyehe caa vatyí chitó ndi vatyí Nyoo cuacuhva ra cha quita vaha tyiño sahá ndi. Vatyí tyinyeé ra Cristo chi ndi.

⁵ Ma caña ñi ndi caca xiñi ndi tyi iyó tunyee ñi maa ndi cha sacuvi ndi ñáa cha sacuvi ndi. Soco tandihí cha sacuvi ndi maa Nyoo sacuvi.

⁶ Maa Nyoo chahá ra tunyee ñi ra chi ndi, ta sacotó ndi tuhun chaa cha natyihí tahan ra tuhun chihin yo. Vatyí Tatyí li ra chahá ñáyivi chaa coo yo. Ta ley chahnu cuan cha chahá Nyoo chi ra Moisés, sacuhún chi chi yo anyaya vatyí ña cuví quichaha yo tandihí ley cuan.

⁷ Ley chahnu cuan, chicunyaa chihin letra chata yuu ta cha naha. Ta cuhva cha chaá ra Moisés chihin cuan, tyaquí xaan xiño nuu ra nyacua nayuhví ñu Israel nanyehe ñu nuu ra. Soco suvita ri tyi cha tyaquí cuan numi ri ndihí. Soco tatu tyaquí cuví cuan,

⁸ tyaquí ca cuví tuhun chaa cha quichí nyaca Tatyí li Nyoo chi yo. Tyaquí xaan ca cuan.

⁹ Tatu ley chahnu cha sacuhún chi yo anyaya, tyaquí xaan cuví, nyaca cuví tuhun cha saváha chi yo nuu Nyoo. Tyaquí xaan ca cuví cuan.

¹⁰ Vatyí ley chahnu tyaquí xaan cuví quivi cuan, cuñi maa ñáyivi. Soco vityin chitó yo tyi ña tyaquí xaan cuví. Vatyí tyaquí xaan ca maa tuhun ra Cristo cha sacacú chi yo nuu Nyoo.

¹¹ Vatyí tatu tyaquí xaan cuví cha ñi yaha ri chiyó, nyaca cuví noo cha ma ndihí ca maa.

¹² Chitó ndi tyi ma naa cuan. Yucuan chaha cahán ndi chihin cha ñi ñi ndi. Na cahán nuu ndi ta ña yuhví ndi.

¹³ Ña sacuvi ndi tari sacuvi ra Moisés. Vatyí chasi ra nuu ra chihin noo sahama, tacuhva cha ma nyehe ñu Israel nu cunaa cha xiño cuan.

¹⁴ Soco quiví cuan ña cutuñí iñi ñu. Ta nyacua nya vityin ta ña cutuñí iñi ñu. Vatyí tatu sacuahá ñu ley cuan tari quiví cha nyasí nuu ñu. Vatyí ña cutuñí iñi ñu. Soco noo tuhun ri maa ra Cristo nuñá ra nuu yo.

¹⁵ Ta nyacua nya vityin tatu sacuahá ñu Israel ley ra Moisés, ña cuví cutuñí iñi ñu. Vatyí tari noo cha nyasí nuu ñu.

¹⁶ Soco tatu nacuhvá ñu añima ñu chi Sutu Mañi yo, maa ra cunuña ra nuu ñu.

¹⁷ Vatyí Sutu Mañi yo, Tatyí Ii cuví ra. Ta tatu nyaá Tatyí Ii Sutu Mañi yo añima yo, sacotó ra chi yo tyi ña nyacá ñaha ca ley chahnu chi yo.

¹⁸ Yucuan chaha tandihí yo ña nyasí ca nuu yo. Ta vityin cuví yo tari noo ino, tacuhva cuví nyehe ñáyiví cha vaha Sutu Mañi yo. Ta cuahán nduvaha ca yo yoso cuhva sacuví Tatyí Ii Sutu Mañi yo chi yo.

4

¹ Yucuan chaha ma ndu uvi maa iñi ndi, vatyí Nyoo nyehé ndahvi ra chi ndi. Ta tyaa tyiño ra chi ndi tyi cahan ndi tuhun ra chihin ñáyiví.

² Ña sacuví ndi cha xehe vatyí ticahan nuu cuví cuan. Ña chicá noo ndi sandaví ñaha ndi chi ñáyiví. Maa maa ri tuhun Nyoo sañahá ndi. Ña nasacá noo ndi tuhun Nyoo chihin inga tuhun. Soco chihin nuu Nyoo chacú ndahvi ndi nuu tandihí ñáyiví, na saha vaha ñu cuenda vatyí maa maa ri cha ndicha sañahá ndi.

³ Nyuhu ña tyihí xehe ndi tuhun Nyoo. Soco cha cuenda chi ñu cha cua cunaa ñohó xehe.

⁴ Cuihna, ra nyacá ñaha cha quiñi caa ñuhu ñáyiví ihya, ican ra chasí cha chiñi tuñi xiñi ñu cha ña chinó iñi chi Nyoo. Vatyí coto nyehe ñu cha ndichin Nyoo. Ta coto cutuñí iñi ñu yoso caa sacacú ra Cristo chi yo. Vatyí ra Cristo nyitó ra ta cuví ra xiñahñu Nyoo.

⁵ Cuhva cha cahán ndi chihin ñáyiví, ña cahán ndi tuhun maa ndi. Soco sacotó ndi tyi ra Jesucristo cuví

ra Sutu Mañi yo. Ta nyuhu cuví ndi noo musu ndo cha catyi cha cuñí ndi chi ra.

⁶ Vatyí suri maa Nyoo catyí vatyí na ndundichin nu ñaa iñi quiví chingo ñuhu ñáyiví. Ican ra chaha ra cha ndichin coo añima yo, tacuhva vatyí chihin cha ndichin cha chaha ra Cristo chi yo, cuví cutuñí ca iñi yo tyi cahnu xaan ca cuví maa Nyoo.

Chihin cha chinó ri iñi yo chi Nyoo coo yo noo ñáyiví chaa

⁷ Coño ñuhu yo cuví tari noo quisí ñuhú, vatyí noo cha ñima ri tuhun cuví. Vatyí tyicuan caa ta cuví nyehe ñáyiví tunyee iñi cha cahnu xaan cha iyó chi yo, maa Nyoo chahá, ta ñima tunyee iñi maa yo cuví.

⁸ Yucuan chaha vasi iyó tisihí tandihí ri ityi nu cuahán ndi, soco ña ndu uvi iñi ndi. Vasi ña cutuñí iñi ndi tandihí cha cuví chi ndi, soco chitó ndi tyi quitá vaha ndi.

⁹ Vasi chicá nyicon ñu chi ndi soco ñima maa ri maa ndi nyicu. Vatyí Nyoo nyaá ra chihin ndi. Vasi cha chacun taxin ñu chi ndi soco ña chihí ndi.

¹⁰ Tandihí ri ityi nu cuahán ndi ta nyatú ndi tuhun chihi cha catyi tuhun ra Jesús. Vatyí yucuan cuhva nyehé ñu tyi iyó ndi ñáyiví chaa cha chahá ra chi yo.

¹¹ Vatyí nyuhu tandihí quiví, cha yatyin cúvi ndi cha cuenda ra Cristo tacuhva cuví nyehe ñáyiví vatyí yihí ñáyiví ra Cristo añima ndi.

¹² Nyatú ndi tuhun chihi cha cuenda cha cahán ndi tuhun Nyoo. Soco cha tyehe caa, nañihí ndo ñáyiví chaa.

¹³ Chinó iñi ndi chi Nyoo tari chingo iñi ra David. Ta tyaa ra nu libru Salmos: “Chinó iñi chi Nyoo, yucuan chaha cahín tuhun ra”, catyí ra David. Ta tyicuan caa tucu nyuhu. Chinó iñi ndi chi Nyoo. Ta yucuan chaha cahán ndi tuhun ra.

¹⁴ Vatyí chitó ndi vatyí Nyoo ra sanandoto chi Sutu Mañi yo Jesucristo, cusanandoto tucu ra chi yo. Ta

in ri chihin nyoho, cunyaca ra chi yo nya gloria nu nyaá ra.

¹⁵ Tandihí ihya cuví cha vaha chi maa ndo ta chi inga ñáyiví. Vatyí cuaha cha vaha Nyoo cuñihi ndo. Ta cuaha ndo nacuhvá ndo tyahvi nyoo chi ra, ta sacahnú ndo chi ra.

¹⁶ Yucuan chaha ña ndu uví maa iñi ndi. Vasi coño ñuhu ndi cha cuahán sandihí xaan chi. Soco ñáyiví chaa cha iyó ndi cuahán nduchaa chí tahan tahan quiví.

¹⁷ Tindoho cha nyehé ndi ñáyiví ihya, tindoho in yaha ri cuví. Vatyí chahá chí cha cunañihi ndi noo nu vaha ca cha ma ndihí maa nu nyaá Nyoo.

¹⁸ Vatyí ñima cha cuví nyehe yo sahá ndi cuenda. Sahá ndi cuenda soco cha ña nyehé yo. Vatyí cha cuví nyehé yo ñáyiví ihya, ña naha maa chiyó. Soco cha ña cuví nyehé yo, yucuan cuví cha ma ndihí ca maa.

5

¹ Ta chitó ndi vatyí quiví cúvi yo, coño ñuhu yo cunaa chí. Vatyí cuví chí tari noo vehe cha ña naha maa chiyó. Soco Nyoo cumí ra noo nu cunyaa añima yo, noo cha ma naa ca maa nya andiví. Ta ñima cha cacú chihin ndaha rayí ñáyiví ihya cuví.

² Ndicha, cha ní ri ca cha iyó yo chichi coño ñuhu yo, nducuihyá xaan cuñí yo, vatyí nyatú tuhva yo nicoo yo chichi cha chahá Nyoo chí yo nya andiví.

³ Vatyí cohon añima yo chichi cha chahá Nyoo tacuhva cha ma cuviyaá yo.

⁴ Cha ní ri ca cha iyó yo chichi coño ñuhu yo cha cuví tari noo vehe ri, nducuihyá iñi yo vatyí ña cuñí yo quita ri maa añima yo chichi coño ñuhu cuan ta cuviyaá chí. Soco cuñí yo cha coo añima yo chichi cha ma naa ca maa nya andiví ta tyicuan ri maa cuacoo yo.

⁵ Ta Nyoo tyaá ra cuhva vatyí tyehe caa cucuvi chí yo. Ta chahá quiyí ri ra Tatyí li ra chí yo. Vatyí tacuhva coto yo tyi cuví naquehen ca yo tandihí ca cha cuacuhva ra chí yo.

⁶ Ta yucuan chaha ma yuhvi yo cha cúvi yo. Vatyí chitó yo tyi cha ní ri ca cha iyó yo chichi coño ñuhu ihya ñáyiví, ña yatyin nyaá yo chihin Sutu Mañi yo andiví.

⁷ Vityin ña cuví nyehe yo chí ra, soco chihin cha chiñó ri iñi yo chí ra, iyó yo ñáyiví ihya.

⁸ Soco yihí vaha iñi yo chí ra ta cha cuñí yo quita yo chichi coño ñuhu ihya vatyí cuhun yo cucunyaa yo chihin Sutu Mañi yo.

⁹ Yucuan chaha sañihi ca ndi nducú ndi cuhva yoso caa cha tahan iñi Sutu Mañi yo sacuví ndi. Cuví ri cha iyó ca ndi chihin coño ñuhu ñáyiví ihya. O cuví ri cha yori ca ndi, vatyí cha nyaá ndi chihin Sutu Mañi yo nya andiví.

¹⁰ Vatyí tahan tahan yo ta cuhun yo nuu ra Cristo cucuhva yo cuenda nu nyaá cutuñi chí yo nuu ra. Ta cuñihi yo cha tahán chí chí yo, yoso cuhva cha vaha o cha ña vaha cha sacuví noo noo yo quiví chiyó yo chihin coño ñuhu yo ñáyiví ihya.

Nu sacotó ra Pablo yoso caa nicoo vaha yo chihin Nyoo

¹¹ Vatyí chitó ndi vatyí Sutu Mañi yo cutachi tuñi ra chí ndi tatu ma sacuvi ndi tuhun cahán ra. Yucuan chaha nducú ndi cuhva cahán ndi chihin ñáyiví na nacuhva cuenda ñu chí ñu chí Nyoo. Ta Nyoo chitó ra vatyí tyicuan ri sacuví ndi. Ta chitó tucu maa ndo ñandihí.

¹² Ñima cha cuñí ndi cuyaa ndi chihin cha cahán ndi tyehe caa, soco cha cuñí ndi vatyí nicohón iñi ndo vatyí tuhun ndicha sacotó ndi, ta cuví cusí iñi ndo chihin ndi. Ta cuñihí ndo cuhva cahán ndo chihin inga ra cha sacahnú chii. Catyí ra tyi vaha iyó ra, soco ñima cha ndicha caa añima ra.

¹³ Tatu ña vaha cuñí xiñi ndi, cuñí maa ñáyiví tyi cahín tuhun tyehe caa, soco cha cuenda maa Nyoo. Soco tatu vaha cuñí xiñi ndi, ta cachi tuhun cahán ndi, soco cha cuenda tyi cuñí ndi tyinyeé ndi chí ndo.

¹⁴ Soco saníñi ndi chí ndi cha sacotó ndi tuhun ra Cristo chí ñáyiví. Vatyí chitó ndi tyi cuñí xaan ra chí ñu. Ta

chitó ndi tyi chihí ra cha catyi cuatyí tandihí cuii maa ñáyiví. Ta yucuan chaha chihi tucu yo cha ma sacuvi ca yo cha ña vaha cha chinyacuví yo nu quichí chi.

¹⁵ Ra Cristo chihí ra cha catyi tandihí yo vatyí tacuhva cha ma coo ca yo cuhva cuñí maa yo. Coo yo soco cuhva cuñí maa ra. Vatyí chihí ra ta nandoto ra cha cuenda yo.

¹⁶ Cha cuhva cha vityin, tatu nyehé yo chi noo ñáyiví, ma caca xiñi yo nyehe yo chi ñu tari chicá xiñi ñáyiví cha ña ñohó nuu chi Nyoo. Noo quiví tyicuan caa chicá xiñi vatyí ra Cristo cuví ra noo ra ñuhu ñáyiví ri. Vityin ña chicá ca xiñi tyicuan caa.

¹⁷ Vatyí quiví nacuhva cuenda yo chi yo chi ra Cristo, maa ra sanduchaa ra aña yo. Ta tandihí tuhun cha chicá xiñi yo nu quichí chi, ña chicá ca xiñi yo vityin. Vatyí maa ra nacuhva ra nonga cha chiñi tuñi chaa chi yo.

¹⁸ Ta tandihí ihya maa Nyoo sacuvi, vatyí sanicoo vaha ra chi yo chihin ra cha cuenda maa ra Cristo Jesús. Ta catyí ra chi yo vatyí na sacoto yo chi ñáyiví vatyí Nyoo cuñí ra cha nicoo vaha ñu chihin ra.

¹⁹ Vatyí chihin cha chihí ra Cristo cha catyi cuatyí yo, ñáyiví nicoo vaha ñu chihin Nyoo. Ta Nyoo sahá ra tuhun tyi ñahri ca cuatyí ñu. Ta chi nyuhu, catyí ra vatyí sacotó ndi tuhun ihya chi ñu.

²⁰ Ta vityin cuví ndi ra chicá tyiño ra Cristo. Ta tari cha maa Nyoo chacú ndahvi nuu ndo, vatyí tyiño maa ra chicá ndi. Ta yucuan chaha chacú ndahvi ndi nuu ndo chihin siví ra Cristo, na nicoo vaha ndo chihin ra.

²¹ Ra Cristo ña sacuvi ra ni minoo cuatyí. Soco Nyoo tachí ra chi ra siqui ñuhu ñáyiví ihya, quichí cúvi ra tari noo ra iyó cuatyí cahnu. Tacuhva vatyí cuví sacacu ra chi yo. Ta cha cuenda maa ra Cristo saha Nyoo tuhun tyi vaha yo nuu ra.

6

¹ Yañi, ñin ri tyiño Nyoo sacuví yo.

Yucuan chaha chacú ndahvi xaan ndi nuu ndo vatyí ma coo ndo tari cha ña ñohó nuu ndo Nyoo. Cotyiño ndo tandihí cha vaha cha chahá ra chi noo noo ndo.

² Vatyí catyí Nyoo nu tutu tyehe caa:

Quiví tahañ chi tyi sacaqui chuun, yuhu chiñi nu cahun ta tyinyejí chuun, catyí Nyoo.

Saha ndo cuenda tyi vityin cuví quiví tahañ chi. Vityin cuví quiví sacacú Nyoo chi yo.

³ Nducú xaan ndi cuhva cha ma nyehe nyaa ñáyiví tyiño Nyoo cha sacuví ndi, coto ma chino iñi ñu chi Nyoo.

⁴ Soco cuñí ndi vatyí nyehé ñu vatyí ndicha cha cuví ndi musu Nyoo vatyí cunyeé ndi ñáá ndihí cha cuví chi ndi, tandihí tindoho, tandihí tisihi.

⁵ Vasi cañi ñáyiví chi ndi, vasi tyihí ñu chi ndi vehe caa, vasi canachaa ityi ñu siqui ndi, soco cunyeé xaan ndi. Ta ñihi xaan sahá tyiño ndi nyacua ña quixí ndi. Ta yahá ndi soco.

⁶ Ta tandihí maa ihya cunyeé ndi vatyí ndicha ndicha cuii cha cuví ndi musu Nyoo. Yucuan chaha cachi iyó ndi. Ta chitó ndi cha ndicha. Ta cunyeé ndi chihin cha ña chihí ndi tisihi tandihí cha cuví chi ndi. Ta vaha ñáyiví cuví ndi. Ta cuñí ndi chi ñáyiví. Ta nyaá maa Tatyí li Nyoo chihin ndi.

⁷ Cahán ndi maa ri tuhun ndicha maa Nyoo. Ta nyaá fuerza ra chihin ndi. Ta chotyíño ndi tandihí cha vaha cha chahá maa ra chi ndi, tacuhva cuví chasaha ndi chi ra ña vaha.

⁸ Iyó quiví cuñí nyehe ñáyiví chi ndi. Ta iyó quiví ña cuñí nyehe ñu chi ndi. Iyó quiví vaha cahán ñu siqui ndi. Ta iyó quiví quiñi cahán ñu siqui ndi. Iyó chaha catyí ñu vatyí ra cuendu cuví ndi. Soco maa maa ri cha ndicha cahán ndi.

⁹ Sahá ñu chi ndi tari noo ra ña ñohó nuu ñu. Soco ñu yihí vaha cuenda Nyoo ñohó nuu vaha ñu chi ndi. Iyó quiví cha yatyin ri cúvi ndi, soco iyó ca ndi. Ta iyó quiví tachí tuñi ñu chi ndi, soco ña chihí ndi.

¹⁰ Vasi iyó quiví cha nducuihyá iñi ndi, soco tyicuan ri siñ cuñí ndi. Vatyí

tyiño Nyoo sacuví ndi. Vasi ndahvi ndi, soco cuaha ñáyiví ñihi ñu cha vaha chihin tuhun cha chahá Nyoo chi ndi. Vasi ñahri maa iyó chi ndi, soco iyó tandihí cha vaha Nyoo chi ndi.

¹¹ Cahán ndi chihin ndo yañi, cha cuví ndo ñáyiví ñuu Corinto chiña. Catyí cachi ndi chi ndo chihin cha ñiñi aña ndi vatyí ndicha cha cuñí ndi chi ndo.

¹² Nyuhu, ña quiñi cuñi ndi nyehe ndi chi ndo. Maa ndo cuví ñu ña vaha cuñi nyehe chi ndi.

¹³ Chacú ndahvi ndi nuu ndo tari chacú ndahvi noo rayí nuu sehe ra, nuña ndo aña ndo, ta ma quiñi cuñi ndo nyehe ndo chi ndi, vatyí maa ndi ña quiñi cuñi ndi nyehé ndi chi ndo.

Cuví yo vehe Nyoo vatyí ñohó ra aña yo

¹⁴ Ma ndu ñin ri ndo chihin ñu ña chinó ñiñi chi Nyoo. Vatyí ña nacachí tahan aña ndo chihin ñu cuan. Vatyí cha vaha ma cuví ndu ñin ri chihin cha ña vaha. Ta cha ndichin ma cuví ndu ñin ri chihin cha ña ñiñi.

¹⁵ Vatyí ra Cristo ña ndu ñin ri ra chihin ra cuví cuihna. Ta tyicuan caa tucu ñu chinó ñiñi chi ra Cristo, ña nacachí tahan chi tatu ndu ñin ri ñu chihin ñu ña chinó ñiñi chi ra.

¹⁶ Ña chahá chi cha sacahnú yo Nyoo ta sacahnú tucu yo chi cha cuví xitohyo. Vatyí maa yo cuví yo vehe Nyoo nyitó. Tari catyí maa ra tuhun ihya ta cha naha:

Coi ta caca noi chihin ñu.

Ta yuhu cucuvi Nyoo ñu,

ta maa ñu cucuvi ñu ñáyiví chii, catyí Nyoo.

¹⁷ Yucuan chaha catyí tucu ra quiñi cuan:

Quiñta ndo mahñu ñu ña chinó ñiñi chii.

Ta ma cutahan ndo chihin ñu.

Ta ma sacuvi ndo cha ña vaha.

Tyicuan ta cunaquehin chi ndo.

¹⁸ Ta sutu ndo cucuvi chii.

Ta maa ndo cucuvi ndo sehi, catyí Sutú Mañi yo, ra iyó tandihí tunyee ñiñi chii.

7

¹ Ican ihya cuví cha chahá Nyoo chi yo. Yucuan chaha yañi, cuñi chi nducu yo cuhva cuvaha yo nuu Nyoo. Ma sacuvi yo cha quiñi caa ni ri ma caca xiñi yo cha ña vaha. Na ndu cuiñi coo yo vatyí sahá yo ñáyiví chi Nyoo.

Nu nacatyí ra Pablo yoso caa nasamq ñu cuhva iyó ñu

² Yañi, chacú ndahvi ndi nuu ndo, na cuvaha coo ñiñi ndo nyehé ndo chi ndi vatyí ñahri cha sacuví ndi chi ni noo ndo. Ta ni ña sativí ndi chi ndo. Ni noo ndo ta ña sandaví ñaha ndi chi ndo.

³ Cha catyí chi ndo tyehe caa ñima cha cahín chi ndo. Vatyí cha yaha catyí tiqui chi ndo ta ityi chata ca, vatyí ndicha cha cuñi chi ndo. Vatyí ñin ri ñu cuví yo chihin Nyoo. Tatu iyó yo soco ñin ri cuví yo. O tatu cuví yo soco ñin ri cuví tucu yo.

⁴ Ñahri maa cha chica ñiñi chihin nyoho. Sii xaan cuñi nyehi chi ndo. Ta yucuan chaha vasi nyehé ndi tindoho ihya, cuní ca ñiñi ndi. Ta cusii xaan ca cuñi ndi.

⁵ Nya quiñi chaq ndi Macedonia ihya, ta ta nyitatu ca maa ndi. Vatyí cuaha xaan tisihí ta tindoho nyehe ndi tandihí ri ityi chahan ndi. Ta cañi tahan ñu chihin ndi. Ta yuhví ndi.

⁶ Soco Nyoo, tyicuan ri sanduní ca ra ñiñi yo tatu cuihyá cuñi yo. Ta sanduní ra ñiñi ndi cuhva cha chaq ra Tito.

⁷ Ta ñima cha cuenda cha chaq ri ra. Soco cha cuenda cha nduní ñiñi ra saha nyoho. Nacatyí ra chi ndi vatyí cuñi xaan ndo nyehe ndo chi ndi. Ta chacu xaan ndo cha cuihya ñiñi ndo. Ta cuñi ca ndo chii, na. Ta cha cuenda cuan ndusii xaan ca cuñi vityin.

⁸ Soco quiñi cuan chica xaan xiñi vatyí chahí tucuihya ñiñi chi ndo chihin tutu cha sacuhin chi ndo. Ta ndu uví ñiñi cha sacuhin tutu cuan chi ndo. Soco suhva ri quiñi, nducuihya ñiñi ndo. Ta vityin ña chicá ca xiñi cha cuenda tucuihya ñiñi cha chahí chi ndo.

⁹ Ta vityin cusii xaan cuñí, ñima cha cuenda tucuihya iñi cha chiyo ndo, soco cha cuenda vatyí tucuihya iñi cuan sanandichi chi ndo ndaha Nyoo. Nyoho cunyeé ndo tucuihya iñi cuan yoso cuhva tahán iñi Nyoo, yucuan chaha cha vaha sacuvi ndi chihin ndo chihin tucuihya iñi cuan.

¹⁰ Iyó tucuihya iñi cha maa Nyoo chahá, tacuhva ndu uvi iñi yo cuatyí yo ta nañihi yo ityi vaha cuhun yo nu nyaa ra. Ta ña tahán chi cha cuxaán yo chi Nyoo cha cuenda cuan. Soco tucuihya iñi cha iyó chi ñu cha ña ñohó nuu chi Nyoo, ñima tucuihya iñi chi Nyoo cuví cuan. Vatyí ña tyinyeé chi chi ñu tacuhva cha ma cuhun ñu anyaya.

¹¹ Nyoho cunyeé ndo tucuihya iñi yoso cuhva tahán iñi Nyoo. Soco vityin nyehé ndo vatyí cuaha xaan cha vaha nañihí ndo cuenda cha cucuihya iñi ndo. Ta sandaa vaha ndo tyiño ra cuan. Cuxaán ndo chi ra. Ta nyacua cuñi ndo tachí tuñi ndo chi ra. Tandihí cuan, ta nayuhvi ndo chi Nyoo. Ta nacatyí vaha ndo yoso caa cuahan. Yaha cuan ta nyacua quichí cuvi iñi ndo nyehe ndo chii. Ta cha cuenda cha sacuvi ndo tari cuhva cuñí Nyoo, cuñí chi catyí vatyí ñahri cuatyí ndo cha cuenda cuan.

¹² Yucuan chaha quivi sacuhin carta cuan chi ndo ñima cha cuenda cha chicá xaan xiñi cuenda ra cha sacuvi cuatyí cuan. Ta ñi ñima cuenda ra cha nyehe tisihi cuan. Soco cha cuenda maa ndo, vatyí cuñí tyi coto ndo yoso cuhva chicá xiñi ndo tuhun ndi nuu Nyoo vatyí cuñí ndo tyinyeé ndo chi ndi.

¹³ Yucuan chaha nduvaha cuñí aña ndi. Ta sii xaan cuñí ndi vatyí chitó ndi tyi cuñí ndo chi ndi.

Ta sii ca cuñí ndi cha nyehé ndi vatyí chahá xaan ndo tunyee iñi aña ra Tito. Vatyí vaha xaan tyiñuhu ndo chi ra.

¹⁴ Catyí chi ra Tito cha cumañi ca cuhun ra nu nyicú ndo vatyí vaha cutyasoho ndo tuhun cha sacuhin chihin ra. Ta vityin sii cuñí vatyí chinó cava tuhun cahín chihin ra.

Maa maa ri cha ndicha cahín chihin ndo. Ta tyicuan caa ndicha tucu tuhun cha catyí chi ra Tito.

¹⁵ Ta cuñí xaan ra chi ndo vatyí nicohón iñi ra vatyí nyoho sacuví ndo tandihí cuí cha catyí ra chi ndo. Ta cuhva cha chaá ra, ndahvi saha ndo chi ndo nuu ra. Ta vaha xaan cahan ndo chihin ra. Ta vaha xaan quichahá ndo chi ra.

¹⁶ Ta sii xaan cuñí vatyí chité tyi tyicuan ri sacuví ndo cha vaha.

8

Tahán chi tyinyeé yo chi ñu yihí cuenda Nyoo chihin cha iyó vaha iñi yo

¹ Ta vityin yañi, cuñí ndi nacatyí ndi chi ndo vatyí cuaha xaan tyinyee Nyoo chi ñu yihí cuenda ra, ityi Macedonia ihya.

² Vasi cuaha xaan tindoho nyehé ñu, soco sii xaan ca cuñí ñu chihin Nyoo. Ta vasi ndahvi ñu soco cuaha cha iyó chi ñu chahá ñu, tari maa cha tyayii ñu.

³ Ta yuhu cuví noo cha ndaa vatyí nyehí tyi chihin cha iyó vaha iñi ñu chahá ñu yoso cuhva cha iyó chi ñu. Ta nyacua yaha ca chahá ñu.

⁴ Chacú ndahvi xaan ñu nuu ndi tyi nacuhvá ndi cha tyinyeé tucu maa ñu chi ñu tahan yo nya Jerusalén.

⁵ Cuaha ca sacuvi ñu cha nuu cha yihí iñi ndi. Vatyí cha xihna ca cha sacuvi ñu, nacuhva cuenda ñu chi ñu chi Nyoo chihin cha ñi vaha iñi ñu. Ta quichahá vaha ñu tuhun Nyoo cha sacote chi ñu, vatyí yucuan cuhva cuñí maa Nyoo.

⁶ Ta cha nyehí tyi tyehe caa chinyacuvi ñu Macedonia ihya, yucuan chaha catyí chi ra Tito vatyí na sandihí ndihí ra tyiño vaha cha quichahá ra cha nacaya ra xuhun nu nyicú ndo.

⁷ Nyoho vaha xaan sacuví ndo tandihí ri. Chinó xaan iñi ndo chi Nyoo. Vaha xaan sañahá ndo tuhun ra. Ta vaha cutuñí iñi ndo. Ta ñi xaan iñi ndo sacuví ndo tyiño nuu ra. Ta vaha xaan ñáyivi cuví ndo chihin ndi. Ta tyicuan caa tucu tahán chi

cha tyinyeé ndo chi ñu ndahvi ñu yihí cuenda Nyoo noo cuhva vaha xaan.

⁸ Ñima tyi catyí chi ndo tyehe caa ta cuñí ndo tyi cha saniñí chi ndo. Soco cha cuñí vatyí nyehé ndo cha vaha cha nyacuví ñu yihí cuenda Nyoo inga ityi. Ta tyicuan caa tucu maa ndo sañahá ndo chi inga ñáyivi tyi ndicha vaha ñáyivi cuví ndo chihin tahan ndo.

⁹ Vatyí cha chitó maa ndo yoso cha cuñí Sutu Mañi yo Jesucristo chi yo. Vatyí maa ra tyayhi xaan ra. Soco sandundahvi ra chi ra cha catyí yo tacuhva vatyí cuví sandutyayhi ra chi yo.

¹⁰ Chahí tuhun ihya chi ndo cha cuenda cha vaha chi maa ndo. Na sañihi ndo chihin tuhun cha quichahá ndo quiyava. Ñima tacuhva sacuvi ri ndo, soco sacuvi ndo chihin cha iyó vaha iñi ndo.

¹¹ Ta tari chahá ndo chihin cha iyó vaha iñi ndo, tyicuan caa sacuvi tucu ndo vityin. Ta cuhva ndo yoso ri cuhva cha iyó chi ndo.

¹² Vatyí tatu noo ñáyivi ni vaha iñi ñu, cuñí ñu cuhva ñu yoso ri cuhva cha iyó chi ñu, Nyoo naquehén ra cha chahá ñu. Vatyí Nyoo ña chicán ra cha ñahri iyó chi yo.

¹³ Ñima cha cuñí vatyí nyehe ndo tindoho cha cuenda cha tyinyeé ndo chi inga ñu tacuhva ma nyehe ca ñu cuan tindoho.

¹⁴ Soco vityin cha iyó chiin chi ndo, tahan chi cha tyinyeé ndo chi ñu ndahvi cuan. Ta inga chaha maa ñu cucuhva cha chiñuhú chi maa ndo. Tyehe caa tahán chi tyinyeé chi tahan ri yo tacuhva tyi ninoo yo ta ni inga yo ma nyehe yo tindoho.

¹⁵ Vatyí tyehe caa catyí chi tuhun Nyoo: “Ra cha cuaha xaan cumí, ña ndoó ca chi ra. Ta ra cha chiin ri cumi, ña cumañi chi ra”, catyí tuhun Nyoo.

Ra Tito chihin ra tahan ra tyaá ra cuhva cuhun ra ñuu Corinto

¹⁶ Soco tyahvi nyoo chi Nyoo vatyí chahá ra cha vaha coo añima ra Tito tyi chicá xiñi ra tuhun ndo tari chicá xiñi yuhu.

¹⁷ Ta quehén ra tuhun cha catyí chi ra cha cuhun ra nu nyicú ndo. Tyi cha yihí xaan iñi tucu maa ra tuhun ndo. Ta yucuan chaha vityin vachí ra nu nyicú ndo chihin cha iyó vaha iñi maa ra.

¹⁸ ñin ri chihin ra Tito tachí ndi chi noo ra yañi yo. Ta vaha xaan hermano cuví ra, ta tyicuan caa catyí tandihi ñáyivi yihí cuenda Nyoo.

¹⁹ Ta siin ri nacachi vaha maa ñu yihí cuenda Nyoo chi ra yañi yo ihya vatyí cuhun ra chihin ndi cun-yaca ndi xuhun chi ñu ndahvi nya Jerusalén. Ta cuñí ndi sacahnú ndi chi Sutu Mañi yo cha sacuví ndi tyiño ihya. Ta suri sañahá ndi vatyí cuñi xaan ndi tyinyeé ndi chi tandihi ñu yihí cuenda Nyoo.

²⁰ Ta cuñí ndi sacuví ndi tyehe caa tacuhva cha ma quihí yuhu ñáyivi tuhun ndi cha cuenda cha nacayá ndi xuhun cha cuacuhva ndi chi ñu ndahvi.

²¹ Ta nducú xaan ndi cuhva sacuvi ndi noo cuhva cachi. Tatu ñáá noo cha cuasacuvi ndi soco chihin cha cachi iyó ndi chihin nuu Sutu Mañi yo ta chihin nuu ñáyivi ñandihí.

²² Ta chihin ra Tito ta inga yañi yo cuan, vachí inga tucu ra yañi yo, vatyí nyehé ndi vatyí ni xaan iñi ra. Ta vityin yaha ca cuhva, vatyí vaha cuñi ra nyehé ra chi ndo cha cuenda cha chinó xaan iñi ra tyi cuñi ndo sacuví ndo cha vaha nuu Nyoo.

²³ Tatu yóó cha ndaca tuhun tuhun ra Tito, catyí ndo chi ñu tyi ra tahin cuví chi ra. Ta sahá tyiño ra chihin, ta tyinyeé ra chi ndo chihin tuhun Nyoo. Ta tatu ndaca tuhun ñu tuhun inga uvi ca ra yañi yo ihya, catyí ndo chi ñu vatyí maa ñu yihí cuenda Nyoo saquichí chi ra. Ta vaha xaan sacuvi ra tyiño nuu ra Cristo.

²⁴ Yucuan chaha sañaha ndo chi ra ihya vatyí ndicha ndo cha cuñi ndo chi ra. Tyicuan ta coto tandihi ñu yihí cuenda Nyoo vatyí tahán chi cha cahín tuhun ndo tyicuan caa.

9

Nu chahá ra Pablo tuhun yoso caa cuatyinyee ñu chi ñu ndahvi ñu yihí cuenda Nyoo nya Jerusalén

¹ Ta cuenda xuhun cha nacayá ndo cuenda ñu ndahvi ñu yihí cuenda Nyoo, ña cuñí chi cha sacuhin tuhun chi ndo.

² Vatyí cha chité cha vaha caá ñima ndo. Yucuan chaha chihin cha sii cuñí nacatyí chi ñu ityi Macedonia ihya, vatyí nyoho ñu ityi Acaya, nya ta quiyava quichaha cuñí ndo tyinyeé ndo. Ta cuaha xaan ñu Macedonia cuní ca iñi ñu cha tyinyeé tucu maa ñu.

³ Soco suvita ri yuhu cutachi chi yañi yo ihya nu nyicú ndo. Vatyí sanumi ndo ta sacaya ndo xuhun, tari cuhva catyí vatyí yihí iñi ndo sacuví ndo. Vatyí tacuhva cha ma catyí ñu Macedonia ihya vatyí ña ndicha cha cahín siqui ndo cha cuenda cuan.

⁴ Vatyí coto cuhun nya noo ra Macedonia chihin, ta nyehe ra vatyí ñahri maa nacayá ndo. Ta cuquehin ticahan nuu cha cuenda cha ñahri cumi ndo. Ta vihi ca maa ndo. Vatyí cha yaha catyí vatyí cuatyinyee ndo.

⁵ Yucuan chaha cuñí mai vatyí vaha cha cuhun xihna ca ra yañi yo ihya nu nyicú ndo tacuhva tyinyeé ra chi ndo cha sacañá tahan ndo xuhun cha yihí iñi ndo tyi cuhva ndo. Tacuhva tyi quivi quichi soco tandihí ta cha iyó vaha. Vatyí cha iyó vaha iñi maa ndo cuví, ta ñima noo cha saniñi ndi chi ndo.

⁶ Ta nichon iñi ndo tuhun ihya: Ra cha chiin ri tachí, chiin ri tyiño sahá ra chicoó. Ta ra cuaha tachí, cuaha tyiño sahá ra chicoó.

⁷ Ta tahan tahan yo cuñí chi cuhva yo yoso cuhva quichi cuvi ñima yo. Ñima chihin cha ña ñi iñi yo o chihin fuerza. Vatyí Nyoo cuñí ra chi ñu cha chahá chihin cha sii cuñí.

⁸ Nyoo cuví cuhva ra cuaha, ndihí ndoo ndihí cuiti nuu cha vaha chi ndo. Vatyí tyicuan ta coo tandihí ri cha chiñuhú chi ndo. Ta ndoo ca

ta cuví tyinyee ndo chi ñáyivi chihin tandihí ri nuu chiñuhú chi ñu.

⁹ Tuhun Nyoo catyí chi tyehe caa: Minoo ra vaha, chahá ra cha iyó chi ra chi ñu ndahvi.

Ta tumañi iñi cha sacuví ra cuan, yucuan cuví cha ña chinaá nuu Nyoo, catyí chi.

¹⁰ Nyoo chahá ra chiti tachí yo. Ta chahá tucu ra cha cachi yo. Cuhva tucu ra cuaha ca chiti tachi ndo ta cuhva ra cuvaha chi. Ta chihin cha chahá ndo, cusacuví ra tyi cuaha cha vaha cucunyaa ñima ñáyivi.

¹¹ Tyicuan caa ta coo tandihí ri nuu cha tyayí chi ndo, tacuhva cuvi tyinyee ndo chi tahan ndo. Ta maa ñu cuan, cuanacuhva ñu tyahvi nyoo chi Nyoo cha cuenda cha tyinyeé yo chi ñu.

¹² Vatyí cha tyinyeé yo tyehe caa chi ñu yihí cuenda Nyoo, uvi tahan cha vaha sacuví yo. Noo cha chahá yo cha chiñuhú chi ñu. Ta inga cha nacuhvá xaan ñu tyahvi nyoo chi Nyoo.

¹³ Maa ñu cusacahnu ñu chi Nyoo. Vatyí chihin cha tyinyeé ndo chi ñu, nyehé ñu vatyí ndicha cha quichahá ndo tuhun ra Cristo. Ta cuhva ñu gloria chi Nyoo cha tyinyeé xaan ndo chi ñu ta chí tandihí ñáyivi.

¹⁴ Ta cucacan tahvi ñu chaha ndo. Ta cucuñi ca ñu chi ndo cha cuenda cha vaha cha chahá Nyoo chi ñu cha cuenda ndo.

¹⁵ Tyahvi nyoo chi Nyoo vatyí chahá ra noo cha vaha xaan chi yo. Nyacua ña ñihí yo cuhva nacatyí yo.

10

Iyó ityi chi ra Pablo tyi saha ra cuenda chi ñu cha sacotó ra tuhun Nyoo chii

¹ Yuhu ra Pablo chiquén noo tumañi iñi chi ndo chihin cha vita iñi. Tari cha vita iñi ra Cristo. Vatyí yihí ndo catyí ndo vatyí tatu ñáá tuhun sacoté chi ndo chihin tutu, ñihi xaan cahín chihin ndo. Soco tatu nyaí chihin ndo, vita xaan cahín, catyí ndo.

² Vaha. Soco quivi cuhin nu nyicú ndo, ma saniñi ndo chii cha cahin chi ndo. Soco chité tyi cuñí chi cha

sañahí chi suhva ndo yoso cuhva cha ñihi cahín. Vatyí yihí ndo catyí ndo vatyí sacuví tari sacuví noo ra ña yihí cuenda Nyoo.

³ Ndicha vatyí ñáyiví cuví ndi. Soco ña cañí tahan ndi tari cañí tahan ra ñáyiví ihya.

⁴ Vatyí cha xaan cha cañí tahan ndi chihin, ñima cha xaan ñáyiví ihya cuví. Soco maa tunyee ñi Nyoo cuví, vatyí cuví chasaha ndi tandihí maa fuerza nyacua nya fuerza tatyí ña vaha.

⁵ Ta tyicuan caa cuví chasaha ndi chi tandihí tuhun cha cahán ñáyiví síqui tuhun Nyoo, ta tandihí cha cahán sahá chii cha chasi nu quichahá yo tuhun Nyoo. Tandihí cuhva chicá xiñi yo síqui ñuhu ñáyiví ihya, chahá yo na cunyaca ñaha ra Cristo vatyí quichahá yo chi maa ra.

⁶ Ta quiví cuquichaha vaha tandihí ndo chi ra Cristo, tatu nya nonga ndo ña cuñí ndo quichahá ndo, tyaá ndi cuhva cha tachi tuñi ndi chi ndo.

⁷ Soco nyoho sahá ndo cuenda cuhva caá ri noo ñáyiví. Ta ña sahá ndo cuenda cuhva caá ñima ñu. Ta tatu nya noo nyoho chitó vaha ndo vatyí cuenda ra Cristo yihí ndo, coto tucu ndo vatyí yihí tucu nyuhu cuenda ra.

⁸ Vatyí vasi yaha cuhva cahín, ña tahan chi cha cucahan nui. Vatyí maa Sutu Mañi yo chahá ra ityi chii cha cunyaca ñahi cha cuenda cha vaha chi maa ndo, tacuhva ñihi ca ndo tunyee ñi Nyoo. Ta ñima cha sativí chi ndo.

⁹ Ña cuñí vatyí catyí ndo vatyí sayuhví chi ndo chihin cha cahín nu tutu cha sacuhín chi ndo.

¹⁰ Vatyí yihí ndo catyí ndo vatyí nu tutu cha saquichí chi ndo ñihi xaan cahín chihin ndo. Soco tatu mai chaa nu nyicú ndo cuví noo ra ña ñihi tuhun cahan, catyí ndo. Ta tuhun cha cahín, maa maa ri tuhun cha ña chiñuhú cuví, catyí ndo.

¹¹ Soco ñu cha catyí tyehe caa cuñí chi cha coto ñu vatyí tari cuhva cahín nu tutu, tyicuan caa cusacuvi tiqui

nachai nu nyicú ndo.

¹² Ndicha ña cañá ñi ndi sandu inuu ri ndi chi ndi chihin ra casayaá chi tyi cahán ra tuhun maa ra. Vatyí casacuví ra cha ña tahan chi. Vatyí nyehé ra cuhva chicá xiñi maa ra ta cuhva cuahan inga ra, ta cuñí maa ra tyi vaha cuahan ra. Ta ña cutuñí ñi ra tyi tahan chi nanducú ra cuhva cuñí Nyoo.

¹³ Nyuhu ma sacahnu ndi chi ndi chihin cha ña tahan chi chi ndi. Nyoo cuví ra sañahá ñáá cuví tyiño cha tahan chi cha sacuví ndi. Ta maa ra chahá cha quichi ndi nya nu nyicú ndo Corinto chiña.

¹⁴ Tyehe ta ñima xihna ca ndi sacoto tuhun Nyoo chi ndo, ña tahan chi sahá ndi cuenda chi ndo. Soco tahan maa chi vatyí xihna ca maa ndi cha ndi nu nyicú ndo chihin tuhun ra Cristo.

¹⁵ Soco nyuhu ña sayaá ndi chi ndi chihin tyiño sahá inga ra. Ña catyí ndi tyi tyiño maa ndi cuví. Soco yihí ñi ndi vatyí cunachino vaha ca ñi ndo chi Nyoo. Tyicuan ta cuví sañaha ca ndi tuhun ra Cristo chi ndo, soco yoso cuhva tahan chi chi ndi.

¹⁶ Ta yihí ñi ndi cha cahan ndi tuhun ra Cristo chihin ñáyiví nya ndihí ñuu nu cañi ca cha nuu nu nyicú ndo chiña, nu ta coto ca ñu tuhun ra. Tacuhva cha ma catyí ñáyiví vatyí cuyaa ndi chihin tyiño sahá inga ra.

¹⁷ Soco tatu nya noo yoó cuñí yo cuyaa yo, na cuyaa yo soco chihin Sutu Mañi yo.

¹⁸ Vatyí nuu Nyoo ña quitá vaha ra catyí tyi vaha maa. Soco tatu cahán Nyoo tuhun noo ra ta catyí ra tyi vaha sacuví ra, ican ra cuan cuví ra quitá vaha nuu Nyoo.

11

Nu chahá ra Pablo tuhun chi ñu Corinto na saha ñu cuenda coto sandaví ñaha ra cuendu chi ñu

¹ Vaha tyehe ta cunyeé ndo chiin cha ñima ri tuhun cha cuacatyí chi ndo. (Vasi ña tahan chi cha sacoté tuhun mai, soco cuñí chi cha nacotó ndo yoso caa cuñí ra cuan sandaví

ñaha ra chi ndo.) Ta yucuan chaha vasi yoso ca caa soco cunye ndo cha cuacatyí chi ndo.

² Vatyí cuiño xain chi ndo. Ta maa Nyoo chahá cha cuiñe chi ndo, vatyí mai ican tyihí chi ndo ityi ra Cristo. Ta cuñí tyí cuñí ndo chi ra tari noo ñaha tyivaa cha cuñí xaan ña chi noo ri maa ra cha cuatandaha ña chihin.

³ Soco chicá xiñi cha cuenda ndo, coto cuví chi ndo tari cuví chi cu Eva. Vatyí sandaví ñaha coo chihin maña ti chi ña. Ta coto casandaví ñaha ra cuan chi ndo. Ta coto ndusiñ caa cuhva nacacá xiñi ndo tuhun ra Cristo. Ta sandihí ndo tuhun cha sacahnú ndo chi noo tuhun ri maa ra.

⁴ Ta nyoho tañi tyehe xaan ri tyasohó ndo nu cacahán ra tuhun ra Jesús soco ña ndicha ra. Vatyí ñima tuhun ra Jesús cha sacotó ndi chi ndo cuví. Ta vaha xaan cuñí ndo nacacá xiñi ndo siñ ca tuhun cha ña chachí tahan chihin tuhun Tatyí li Nyoo cha naquehen ndo quiví xihna ri. Ñima tuhun ra Cristo cha sacacú chi yo cacahán ra cuan. Ta nyoho tañi tyehe xaan ri tyasohó ndo chi ra.

⁵ Soco tuví iñi tyi ra cha cacatyí tyi apóstol Nyoo cacuví ra, ñima ra vaha xaan cuví ra cuan cha nuu yuhu. Soco nyoho, nyicón ndo chi ra.

⁶ Vasi ña ñihí vahi cuhva cahín, cuñí maa ndo. Soco cutuñí vaha iñi tuhun Nyoo. Ta yucuan sañahá ndi chi ndo chihin tandihí cuhva sacuví ndi.

⁷ O cuñí maa ndo vatyí ña vaha cuhva sacuví quiví cha cahín tuhun ra Cristo chihin ndo. Vatyí ña quehín yahvi chi ndo. Ta sandundahví chii cha cuenda cha cuñí cha cacu ndo.

⁸ Ñáyivi inga vehe ñuhu tyinyee ñu chii. Vatyí maa ñu chahá xuhun chii. Ta yuhu quehín xuhun cuan ta sacuví tyiño nuu ndo.

⁹ Ta quiví cha chinyaj chihin ndo ña chahí tindoho chi ni noo ndo vasi iyó cha chiñuhú chii. Vatyí ra hermano cha quichi coyo nya ityi Macedonia, ican ra chahá tandihí cha chiñuhú chii. Ta sahá vavahi cuenda chii vatyí ña cuñí cuhve tindoho chi ndo. Ta tyicuan ri sacuvi que.

¹⁰ Vatyí chitó vahi tyi maa maa ri

tuhun ndicha ra Cristo cahín, ta chité tyi ma cuhve cha tinyaa ni noo ndo, cha cuví ndo ñu ityi Acaya chiña, cha vaha cuñí cha ña chiquén cha coo yahvi chi ndo.

¹¹ ¿Ñáá tuhun cha cahín tyehe caa? ¿Atu cha cuenda cha ña cuñí chi ndo? Ñima. Nyoo chitó ra yoso cha cuñí chi ndo.

¹² Ta cuasacuvi que tari cuhva sacuví mai. Vatyí ña cuñí cuhve ityi chi ra cachicá noo yanga vatyí cacatyí ra tyi sacuví ra tari cuhva sacuví ndi soco ña ndicha.

¹³ Vatyí cacatyí ra cuan vatyí apóstol cuví ra. Soco ña ndicha ra. Vatyí cuví ra noo ra sandaví ñaha ta nasahá ra chi ra tari noo ra apóstol ra Cristo.

¹⁴ Ta ihya ñima cha iyo cuñí yo cuví. Vatyí cuhna cuví nasaha ra chi ra tari noo ángel cha xiño tuví chihin cha ndichin Nyoo.

¹⁵ Yucuan chaha ra cha nyicón chi ra ña vaha, nasahá tucu maa ra chi ra tari noo ra cha sacuví cha vaha. Soco coo quiví cutachi tuñi Nyoo chi ra cha cuenda cha ña vaha cha sacuví ra.

Tindoho cha nyehé ra Pablo nu chicá noo ra tyiño Nyoo

¹⁶ Inga chaha catyí tiqui chi ndo vatyí ni noo ndo ta ma caca xiñi ndo vatyí loque cha cahín tyehe caa. Soco tatu tyicuan caa chicá xiñi ndo, saña ndo chii na cahín chihin ndo tari noo ra loco. Vatyí tyicuan caa ta cuví sacahnu tucu yuhu chiin chii.

¹⁷ Ñima Sutu Mañi yo catyí chii vatyí sacahni chii tyehe caa. Soco cahín tari cahán noo ra loco.

¹⁸ Vatyí cuaha ra cha cacatyí vatyí tyiño Nyoo cachicá ra, ta ñima, vatyí cahnu xaan casahá ra chi ra. Yucuan chaha cusacahnu tucu yuhu chii ñandihí.

¹⁹ Nyoho, chitó xaan ndo, cuñí maa ndo. Ta quiví ri tyasohó ndo nu cahán ra cuan. Ta tondo xaan cacuví ra.

²⁰ Soco nyoho ñahri cuenda ndo cha saniñí ra chi ndo cha sacuví ndo tyiño nuu ra. Suhú ra chi ndo ta ña tuví iñi ndo. Sandaví ñaha ra chi ndo. Ta ña cuñí nyehé ra chi ndo. Ta nyacua

cañi chihin ndaha ra chi ndo. Ta maa ndo cunyeé xaan ndo cha sacuvi ra chi ndo.

²¹ Vasi cahán nuu ndi soco cua catyi ndi, nyuhu vita xaan cuñi ndi yucuan chaha ña caña iñi ndi sacuvi ndi chi ndo tyicuan caa.

Soco inga ra cuan caña ndicha cuii iñi ra sacotó ra tuhun maa ra. Ta yuhu tucu caña iñi vasi cahin tari noo ra loco.

²² Tatu ñáyivi hebreo cuví ra, suri cuví tucu yuhu. Ta tatu ñáyivi Israel cuví ra, ican cuví tucu yuhu. Ta tatu vachí ra tata ra Abraham, suri vachi tucu yuhu.

²³ Ta tatu ra sacuvi tyiño nuu ra Cristo cuví ra, vihi ca yuhu. Vatyí yaha ca cuhva sacuvi tyiño nuu ra Cristo. Vasi cahín tari noo ra loco vatyí catyi tyicuan caa. Soco ndicha. Vatyí ñihi ca sahá tyiñe ican saha ra cuan. Ta cha cuaha ca chaha ndohi chihin ñi ican saha ra cuan. Ta cuaha ca chaha ñohi vehe caa ican saha ra cuan. Ta cuaha chaha cha cha yatyin cúvi, soco ña chihí.

²⁴ Ta ohon tahan chaha cacañi ra Israel chii chihin ñi. Cha noo chaha cañi ra chii, oco chahun cumi tahan chaha sahvi ra ñi chate.

²⁵ Ta uñi chaha cañi ra chii chihin yutun. Ta noo chaha cacañi ra chii chihin yuu. Ta uñi tahan chaha nyee barcu cha yihí. Ta chichi cha uñi tahan chaha cuan, noo chaha ndoi nu tyañuhu noo ñuu ta noo quivi.

²⁶ Cha cuaha xaan cha cuví chii nu chica noi. Ta cha cuaha chaha cañi tyañi chihin yuvi ndutya. Ta cuaha cha cuví chii. Quita ra suhu nu cuahin. Nyacua nya ra ñui, ra Israel, ta satasí iñi ra chii. Ta ra inga ñuu ñandihi. Ta cuaha cha cuví chii ityi chichi ñuu, ityi nu chiqui, ityi nu tyañuhu. Ta cuaha cha cuví chii mahñu ra cha catyi vatyí hermano cuví ta ñima hermano cuví ra.

²⁷ Ta ñihi sahá tyiñe ta chitati. Ta cuaha xaan chaha ña quixi. Yahi soco: soco xita ta soco ndutya. Cuaha chaha sahi ayunar, o ña chachí ta nanduqui chi Nyoo cuví cuan. Cuaha chaha yahí cha vichin. Ta ni sahme ta

ñahri.

²⁸ Ta siin ri nyaá siqui vatyí saní que iñi tandihi ndo: nyoho ta ñu inga ñuu cha yihí cuenda Nyoo.

²⁹ Vatyí tatu noo ndo vita cuñi ndo, yuhu tari cha vita cuñi cha cuenda ndo. O tatu sacco ñu cuatyí nya noo ndo, yuhu quehín tisihi ta ticahan nuu.

³⁰ Tatu cuñi chi cha sacote tuhin tacuhva nacoto ndo tyi ndicha cuví yuhu noo musu Nyoo, cusacote soco cha cuví chii. Vatyí sañahá chi tyi ñahri maa fuerza mai iyó chii.

³¹ Nyoo sutu Sutu Mañi yo Jesucristo, tahán chi cha sacahnú yo chi ra tyicuan ri maa. Ta chitó maa ra vatyí ndicha cha cahín, ñima cuendu cahín.

³² Quivi chinyai Damasco (ñuu nu nicachico yihí barda) ra cha cuví gobernador cha sacuvi tyiño nuu rey Aretas ñuu Damasco cuan, cuatyaa ra chi sindaro yuvehe cahnu ñuu cuan, tyi casahá cuenda ra. Vatyí tatu quite yuvehe ñuu cuan catin ra chii ta cunyaca ra chii vehe caa.

³³ Soco ñáyivi iyó chaha barda cuan iyó ventana ñu. Ta ityi ventana sanoo ñu chii. Yihí chichi noo tica cahnu. Ta tyicuan caa sacacu Nyoo chii ndaha gobernador cuan.

12

Noo cha chaha Nyoo vatyí nyehera Pablo

¹ Ñahri maa ñihí chihin cha cahín tuhun mai, soco cuanacatyí cha sañaha Sutu Mañi yo chii.

² Ñohó nui chi noo ra cha yihí cuenda ra Cristo. Ta cha iyó uchi cumi cuiya quehen Nyoo chi ra ta chahan ra nya nu cu uñi toto andivi. Soco ña chité tatu chahan ra chihin coño ñuhu ra o chihin cha chiñi tuñi xiñi ra. Ña chité. Nya ri ca maa Nyoo chitó ra.

³⁻⁴ Soco chité vatyí ra cuan chinyaca Nyoo chi ra nya nu iyó ñáyivi vaha, ñu cha chihí. Ña chité tatu chahan ra cuan chihin coño ñuhu ra o chihin cha chiñi tuñi xiñi ra. Noo tuhun ri ca maa Nyoo chitó. Ta nu

chahan ra cuan chiñi ra tuhun xehe. Ta ñahri ityi iyó chi ñáyivi cha nacatyí ñu tuhun xehe cuan.

⁵ Tahán chi sacahní chii chihin cha sañahá Nyoo chii quivi cuan. Soco ña sacahní chii cha cuenda cuan. Sacahní chii, soco chihin cha ñahri fuerza mai iyó chii.

⁶ Tatu cuñí tiqui cahín tuhun mai, ñima noo tuhun tondo ri cuví. Vatyí maa maa ri cha ndicha cuacatyí. Soco ma catyi vatyí coto cahnu xaan sahá ñáyivi chii. Vaha ca nyehe ñu cuhva vaha iyé ta cuhva vaha sañahí, tyicuan ta coto ñu tatu ra vaha o ra ña vaha cuví.

⁷ Ña cuñí Nyoo cha sacahnú xain chii chihin cha sañahá ra chii. Yucuan chaha chahá ra cha sanyehé xaan cuhna tindocho chii. Tari uhvi nu quiñi noo iñu cahnu, tyicuan caa uhvi chii. Vatyí tyicuan caa ta ma cuví cuyai chihin cha sañahá Nyoo chii.

⁸ Ta cha uñi chaha chiquen chi Sutu Mañi yo na tinyaa ra tindocho cuan siqui.

⁹ Soco maa Sutu Mañi yo catyí ra chii tyehe caa: “Chahí tandihi cha vaha cha iyó chii chuun. Vatyí yucuan cuví cha chiñuhú chuun. Vatyí tatu ñáyivi ta ñahri maa tunyee iñi maa ñu iyó chi ñu, yucuan ta cuví cunyaa maa maa ri tunyee iñi mai chihin ñu”, catyí ra. Yucuan chaha si xaan cuñí cha ñahri fuerza mai iyó chii. Vatyí tyicuan caa ta cuví cunyaa tunyee iñi ra Cristo chihin.

¹⁰ Yucuan chaha si xaan cuñí cha ñahri tunyee iñi mai iyó chii. Vasi cahán ñáyivi chii, vasi chicá nyicon ñu chii, vasi ñahri cha iyó chii, vasi cuaha cha cuví chii, soco si xaan cuñí cha nyehí tindocho cha cuenda maa ra Cristo. Vatyí tatu ñahri fuerza mai iyo chii, soco ñihi ca cuñí chihin fuerza maa Nyoo.

Chicá xiñi ra Pablo tuhun ñu yihí cuenda Nyoo ñuu Corinto cuan

¹¹ Cahín tari noo ra loco. Soco maa ndo cuñí ta cahín tyicuan caa vatyí ña sahá ca ndo ñáyivi chii. Vatyí maa ndo tahán chi cuyaa ndo chihin.

Vasi noo ra cha ñima ri tuhun cuví yuhu, soco nyaca cuví ra cha catyí tyi apóstol cuví ra, ta ña ndicha ra. Cuñí maa ra tyi vaha xaan ca ra cha nuu inga ra chicá tyiño Nyoo.

¹² Nyehe ndo yoso caa tyiño Nyoo cha sacuvi mahñu ndo. Ta chihin cha cama iñi ta cunyej tandihi tindocho cha nyehi. Ta cuaha xaan milagru sañahá Nyoo chi ndo tacuhva coto ndo vatyí ndicha cha cuví yuhu noo ra chicá tyiño maa ra.

¹³ ¿Atu vaha ca cuhva tyiñuhí chi yañi yo inga ñuu cha nuu nyoho? Ñima. Inuu ri cuhva tyiñuhí chi tandihi ndo. Noo ri cha ña sacuvi chihin nyoho cha ña cuñí cuhve tindocho chi ndo. Saha ndo ticahnu iñi chii tatu ña vaha cuhva sacuvi.

¹⁴ Ta vityin cha iyó vahi cha quichi nyehi nu nyicu ndo. Cha cu uñi chaha vityin. Ta ñahri tindocho tyaí siqui ndo. Vatyí ñima cha iyó chi ndo vachí nanduquí. Chi maa ndo cuví cha cuñí yuhu. Vatyí sutu, ican tahan chi cuhva cha chiñuhú chi sehe. Ta ñima sehe nducú cha chiñuhú chi sutu.

¹⁵ Yucuan chaha yuhu nyacua si cuñí cusanaí cha iyó chii cha cuenda cha vaha chi ndo. Ta nyacua si cuñí cuhve ñayivi cha cuenda ndo. Soco ta caa ri vatyí tatu cuñí que chi ndo, maa ndo ña cuñí vaha ndo chii.

¹⁶ Ta vasi chitó cachi ndo vatyí ña chahí tindocho chi ndo, soco yihí ndo catyí ndo vatyí sandaví ñahi chi ndo ta ña tuví iñi ndo.

¹⁷ ¿Atu sandaví ñahi chi ndo chihin nya noo ra cha tachí nu nyicu ndo quivi cuan?

¹⁸ ¿Atu sandaví ñaha ra Tito chi ndo quivi tachí chi ra chihin inga yañi yo cuan nu nyicu ndo? Ña sandaví ñaha ra chi ndo. Vatyí nyuhu ña tuhvá ndi sandaví ñaha. Vatyí ñn ri cuhva iyó ndi. Ta ñn ri cuhva sacuvi ndi.

¹⁹ Vasi chicá xiñi ndo vatyí cuahan ndi tumañi iñi chi ndi cha cuenda tuhun cha cahán ndi ihya, soco ñima tyicuan caa. Vatyí tandihi tuhun ihya cahán ndi cha cuenda cha vaha chi maa ndo tacuhva cohon nuu ca ndo chi Nyoo. Vatyí ndicha cha cuñí ndi

chi ndo. Ta cahán ndi soco chihin nuu Nyoo ta cha cuenda maa ra Cristo.

²⁰ Chicá xiñi coto iñi ndaa iñi noo nyicú ndo ta chaí. Ta ma cutahan iñi cuhva nyicú ndo. Ta maa ndo ma cutahan iñi ndo cuhva cucahin chi ndo. Yuhví coto coo tisihi, coto nya ndo quichí cuvi iñi ndo cha chii noo tahan ndo, coto nya ndo cuxaán ndo chi tahan ndo, coto nducú ndo maa maa ri cha vaha chi maa ndo, coto nya ndo ñi ca ndo cuendu, coto cahán cuehe ndo chi tahan ndo, coto nya ndo cahnu sahá ndo chi ndo. Yuhví coto nyehi tyi ña cachi ña ndaa nyicú ndo.

²¹ Ta yuhví coto cha cuhin inga chaha nu nyicú ndo, Nyoí cuhva ra cha cucahan nui cha cuenda nyoho. Ta chicá xiñi coto quita ndutya nui cha cuenda cha nyacuví ndo. Vatyí yíhi ndo sacuví ndo cuatyí nu quichí quiví. Ta nya vityin ta ña ndu uví iñi ndo cha ca iyó ndo chihin ñusihi ta ñima ñasihi ndo cuví, ta iyó ndo chihin rayi ta ñima yi ndo cuví. Ta ña sandíhi ndo tuhun cha sacuví ndo ñáá ndíhi cha ña vaha.

13

Chahá ra Pablo tuhun chi ñu Corinto, na saha vaha ñu cuenda chi ñu tatu vaha cuahán ñu chihin Nyoo

¹ Quiví cha cuquichi inga chaha nu nyicu ndo cuví chi chaha cu uñi. Yucuan ta cuvi cundaa tyiño ñu cha sacuví cuatyí. Soco cuñí chi uvi o uñi cha ndaa.

² Vatyí quiví chahin nu nyicú ndo cha cu uví chaha, catyí chi ra sacuví cuatyí cuan, na sandíhi ra tuhun. Ta vityin catyí tiqui inga chaha chi ra, ta chi tandíhi ndo. Vatyí tatu cha quichi inga chaha, ta sacuví ca ndo cuatyí cuan, ma cundahvi cuñi nyehi chi ndo.

³ Tyicuan ta coto ndo cha cuñi xaan ndo coto ndo. Vatyí ndicha ndicha cha chihin fuerza maa ra Cristo cahín. Vatyí ra Cristo ñima noo ra ñima ri tuhun cuví ra. Yucuan chaha sañahá ra tunyee iñi ra chi ndo.

⁴ Ndicha vatyí chihí ra nu cruzi tari noo ra cha ñahri tunyee iñi iyó chii. Soco nandoto ra ta iyó ra chihin tunyee iñi Nyoo. Ta tyicuan caa tucu maa ndi vasi ñahri fuerza maa ndi iyó chi ndi. Soco ñin ri cuví ndi chihin ra Cristo. Ta iyó ndi chihin tunyee iñi maa Nyoo vatyí tyicuan caa ta cuvi tyinyee tucu nyuhu chi nyoho.

⁵ Saha ndo cuenda chi ndo tatu ñi vaha iñi ndo cuahán ndo chihin Nyoo. Saha ndo cuenda vatyí ra Cristo ñohó ra aña ndo tatu chinó vaha iñi ndo chi ra. Soco tatu ñima chihin cha ñi iñi ndo cuahán ndo chata Nyoo, ra Cristo ña nyaá ra chihin ndo.

⁶ Soco chitó vahi tyi coo quiví cuna-coto ndo tyi vaha cuhva tyinyee ndi chi ndo tacuhva cuví cuhun vaha ndo chihin ra Cristo.

⁷ Ta chicán tahvi xaan ndi chi Nyoo chaha ndo, tacuhva vatyí ma sacuvi ndo cha ña vaha. Ñima cha cuñí ndi tyi catyí ñáyiví tyi vaha ndi. Soco cha cuñí ndi vatyí nyoho sacuví ndo maa maa ri cha vaha. Ñahri saha vasi catyí ñáyiví, an vaha, an ña vaha cuhva cha sacuví ndi.

⁸ Vatyí nyaá siqui ndi cha sacuví ndi cha vaha. Ma cuvi tixehe ndi tuhun ndicha. Noo ri cha cuví sacuvi ndi, cha sañahá ndi tuhun ndicha.

⁹ Yucuan chaha cusí xaan cuñí ndi cha ñahri fuerza maa ndi iyó chi ndi, ta cuhva tyi nyee cuñí ndo chihin fuerza maa Nyoo. Ta tyicuan ri chicán tahvi ndi chaha ndo na vaha ca cuhun ndo chihin Nyoo nyacua nya cha ñahri ca cumañi chi ndo.

¹⁰ Sacuhín carta ihya chi ndo cha ni ri ca cha cumañi quichi nu nyicú ndo. Vatyí sanduvaha ndo chi ndo. Tyicuan ta ma cuñi ca chi cha cahín chi ndo quiví chai nu nyicu ndo. Vatyí ndicha cha chaha Nyoo ityi chii cha sahí cuenda chi ndo. Soco chaha ra tyiño ihya chii vatyí sandunyeé que iñi ndo. Ta ñima cha sanducuihyá ndíhi que iñi ndo.

¹¹ Ta nu ndíhi cahín, yañi, catyí chi ndo, na nducu ndo cuhva nicoo vaha ndo ta sií cuñi ndo. Nanducu ndo cuhva coo cuiti ndo nuu Nyoo cha

ñahri cumañi chi ndo. Na cun#i iñi ndo, na coo vaha ndo chihin tahan ndo. Ta Nyoo ra cuñi xaan chi ndo, ta ra chahá cha taxi coo añaima ndo na cunyaa ra chihin ndo.

¹² Ta nacuhva maa ndo nocumi chi noo noo tahan ndo chihin cha s#i cuñi ndo nyehé ndo chi ñu.

¹³ Ta vachí nocumi chi ndo sahá tandihí ñu yihí cuenda Nyoo ñuu ihya.

¹⁴ Nacuhva Sutu Mañi yo Jesucristo cha vaha coo añaima ndo. Ta nacoto ndo tyi Nyoo cuñi xaan ra chi ndo. Ta na cunyaa Tatyí Ii ra chihin ndo. Ta nacuvi chi tyicuan caa.

Carta Cha Sacuhun Ra Apóstol Pablo Chi Ñáyivi Ityi Galacia Cha Yihí Cuenda Nyoo

Ra Pablo tyaá ra noo carta chi ñu ityi Galacia cha yihí cuenda Nyoo

¹ Yuhu ra Pablo cuví noo apóstol. Soco ñima ñáyivi tachí chii. Ta ñima rayí catyi vatyí ñihí yuhu tyiño ihya. Soco maa ra Jesucristo ta maa Nyoo Sutu yo chaha ra tyiño ihya chii. Vatyí ican Nyoo sanandoto chi ra Cristo mahñu ñu chihí.

² Yuhu ta tandihí yañi yo cha nyicú chihin, tyaá ndi carta ihya chi nyoho ñu yihí cuenda Nyoo tandihí vehe ñuhu Galacia.

³ Nyoo Sutu yo ta Sutu Mañi yo Jesucristo nasoco ra chi ndo ta nacuhva ra cha taxi ri coo aña ndo.

⁴ Vatyí maa ra Jesucristo chaha ra ñáyivi ra tyiño nuu yo cha catyi cuatyí yo. Vatyí tacuhva sacacú ra chi yo mahñu ñu quiñi iyo cha iyó siqui ñuhu ñáyivi ihya vityin. Vatyí tyicuan caa tyaá maa Nyoo Sutu yo cuhva tyi sacuvi ra Cristo.

⁵ Yucuan chaha na sacahnu yo chi maa Nyoo tyicuan ri maa. Ta na cuvi chi tyicuan caa.

Ñahri ca inga cuhva cuví cacu aña yo

⁶ Iyo xaan cuñí vatyí nyoho numi xaan cuahan sandoó ndo chi Nyoo, ra nacana chi ndo tyi nicoo vaha ndo chihin ra cha cuenda tumañi iñi cha sahá ra Cristo chi yo. Ta vityin siin caa ityi natyihí ndo cuahan ndo. Ta cuñi maa ndo tyi cucacu ndo chihin cuan.

⁷ Soco ñahri ca inga cuhva cuví cacu aña yo. Soco iyó ra cuñí satondo xiñi ndo. Ta cuñí ra sativi ra tuhun cha sacacu ra Cristo chi yo.

⁸ Ñahri saha, an cuví ri nyuhu, an cuví ri noo ángel cha quichi nya andivi, soco tatu tyehe ta cahán noo

ndi tuhun ra Cristo nuu ndo, ta siin caa, ta ñima tari cuhva sañaha ndi chi ndo quivi cuan, Nyoo cutachi tuñi ra chi ndi.

⁹ Cha catyi tuhun ihya chi ndo quivi cuan soco cuacatyí tiqui inga chaha chi ndo vityin. Tatu yóo cha cahán tuhun cha cacú aña yo chihin ndo ta siin caa, ta ñima cuhva cha chiñi ndo quivi xihna ri, Nyoo cutachi tuñi ra chi ra cahán tyicuan caa.

¹⁰ Cha catyi tuhun ihya chi ndo, ñima cha nduquí cuhva savahi chii nuu ñáyivi. Soco nduquí cuhva savahi chii nuu Nyoo. Tyehe ta nduquí cuhva savahi chii nuu ñáyivi, ñima noo ra sacuvi tyiño nuu ra Cristo cuví.

Yoso caa cha nanduví ra Pablo noo ra chicá tyiño Nyoo

¹¹ Soco coto ndo tuhun ihya yañi, vatyí tuhun ra Cristo cha cahán yuhu, ñima tuhun cha ndichí xiñi ñáyivi cuví.

¹² Ñima ñáyivi sañaha chii. Yori sañaha chii. Soco suri maa ra Cristo sacotó chii.

¹³ Vatyí nyoho chiñi ndo yoso caa chinyacuvi quivi cuan, quivi ñohi cuenda ñu Israel. Ta chitó ndo yoso caa cha xaan chica nyiquen chi ñu yihí cuenda Nyoo. Ta nduquí cuhva sativi cuhva chinó iñi ñu.

¹⁴ Ta ñohi cuenda ñu Israel, yuhu cuví ra cuahan ityi nuu ca ta ñima ca suhva ca ra tahin cha in ri cuiya ndi. Vatyí cuñi xaan que sacuvi yoso cuhva chinyacuvi maa sutu chahni ta ityi chata ca.

¹⁵ Soco nya ta ni cumañi caqui ta tyaá Nyoo cuhva tyi cusaha ra tumañi iñi chii. Ta nya cha chaa maa chi quivi cha tyaá ra cuhva, yucuan ta nacana ra chii. Vatyí cuñi xaan ra chii.

¹⁶ Ta tyicuan caa sacuvi ra vatyí cohon nui chi Sehe ra. Tacuhva vatyí cahin tuhun Sehe ra, ra Cristo, chihin ñáyivi cha ñima ñu Israel cuví, tacuhva cacu aña ñu. Ta quivi cha cuví tyehe caa, ña nduquí cuhva cha catyi ñáyivi chii ñáá cha tahán chi sacuvi.

¹⁷ Ta ni ña chahin nya Jerusalén nu canyicu ra apóstol, vasi cha chicha ca ra chihin tuhun Nyoo, vatyí maa ra cha naha cana Nyoo chi ra ta ñima ca yuhu. Soco chahin nya Arabia. Tyicuan ta cuanuhu tiqui inga chaha nya Damasco.

¹⁸ Cha yaha uñi cuiya tyicuan ta chahin nya Jerusalén, ta chicohon nui chi ra Pedro. Ta ndoj chihin ra chahun quivi.

¹⁹ Soco ña nyehi chi inga apóstol. Noo ri ra Jacobo yañi Sutu Mañi yo nyehi.

²⁰ Ta chihin nuu Nyoo ta catyí chi ndo vatyí tuhun cha catyí chi ndo nu tutu ihya, cha ndicha cuví.

²¹ Cha yaha cha chahin Jerusalén ta chahin ityi Siria ta ityi Cilicia.

²² Soco ra yañi yo cha canyicu vehe ñuhu ra Cristo cha nyaa nicacahnu Judea, ña ñoho nuu maa ra chii.

²³ Tacuhva cha cachiñi ri ra cahan ñu tuhun, vatyí catyí ñu: “Ra cha chicha nyicon chi yo quivi cuan, vityin cahan noo ra nuu ñáyivi na nachino iñi ñu chi ra Cristo. Ta quivi cuan cuñi ra sativi ra tuhun ra Cristo”, catyí ñu.

²⁴ Ta ra canyicu vehe ñuhu ra Cristo casacahnu ra chi Nyoo cha cuenda cha sacuvi Nyoo chihin tyicuan caa.

2

Ra nyisó tyiño vehe ñuhu Jerusalén, ndoó ra vaha cuhva sahá tyiño ra Pablo

¹ Cha yaha cha uchi cumi cuiya, chahin Jerusalén inga chaha chihin ra Bernabé. Ta chahan ra Tito chihin ndi.

² Chahin nyicuan vatyí maa Nyoo sañaha chii vatyí tahán chi cuhin Jerusalén. Ta nacatyí chi ñu yoso caa sañahí tuhun ra Cristo chi ñu cha ñima ñu Israel cuví. Quita siin chihin ra cha canyiso tyiño vehe ñuhu, ta chahi cuenda chi ra yoso caa tuhvé cahn chihin ñu. Coto ma candoo ra vaha ta cacatyí ra vatyí yuhu sahá tyiño caha ri mai.

³ Soco candoo ra vaha. Vatyí ni ri chi ra Tito ta ña saniñi ra cha sacuvi

ra costumbre circuncisión. Ta ra Tito ñima ra Israel cuví ra.

⁴ Ndicha vatyí quihvi xehe suhva ra cha catyí vatyí yañi yo cuví chi ra, soco ñima. Vatyí cuñi ra nyehe nyaa ra cuhva iyó yo. Vatyí libre iyó yo cha cuenda ra Cristo Jesús. Soco cuñi ra cuan tyi cunyaca ñaha tucu ley chahnu chi yo.

⁵ Soco ni noo cuhva ta ña chaha ndi cha cunyaca ñaha ra cuan chi ndi. Vatyí cuñi ndi vatyí nyoho ma saña ndo cha ndicha tuhun ra Cristo cha cacu añima yo.

⁶ Soco maa ra canyisó tyiño vehe ñuhu, ñahri tuhun chaa chaha ra chii. Ta vasi cahn tyiño canyisó ra cuan, soco cha cuenda chi yuhu, ñahri saha. Vatyí Nyoo ña sahá ra cuenda cuhva tyiño nyisó yo. Soco añima yo sahá ra cuenda.

⁷ Cha nuu cha catyí ra canyiso tyiño vehe ñuhu cuan chii ñáá ndihi tuhun, maa ra canacoto ra vatyí maa Nyoo tachí chii vatyí cahn tuhun ra Cristo chihin ñu cha ñima ñu Israel cuví. Tari tachí ra chi ra Pedro vatyí cuahan ra suri tuhun ra Cristo cuan chihin ñu Israel.

⁸ Vatyí suri maa Nyoo tachí chi ra Pedro tyi cuví ra apóstol cuenda ñu Israel. Ta tachí tucu ra chi yuhu tyi cuví apóstol ra Cristo cuenda ñu cha ñima ñu Israel cuví.

⁹ Yucuan chaha ra Jacobo, ra Pedro ta ra Juan ra cacuvi nuu yucuan, nicohón nuu ra vatyí Nyoo chahá ra tunyee iñi chii cha cahn tuhun ra Cristo chihin ñáyivi. Ta chaha ra ndaha ra chii, ta chi ra Bernabé vatyí candoo ra vaha cha sahatyiño ndi mahñu ñu cha ñima ñu Israel cuví. Ta maa ra casahatyíño ra mahñu ñu Israel.

¹⁰ Noo ri vatyí catyí ra chi ndi vatyí na nicohon iñi ndi ta natyinyee ndi chi ñu ndahvi. Ta ican cuví cha nanducú xain cuhva sacuvi tandihí quivi.

Ra Pablo cahn ra chi ra Pedro vatyí ña vaha cha nyacuví ra

¹¹ Soco quivi chahan ra Pedro ñuu Antioquía, cahan vavahi chi ra chihin nuu ra vatyí ña vaha cha nyacuví ra.

12 Vatyí cha xihna ri vaha sacuvi ra vatyí chachi ra chihin ñu cha ñima ñu Israel cuví, nyacua nya cha chaá suhva ñáyivi Israel cha tachi ra Jacobo. Tyicuan ta quichaha ña chachi ca ra chihin ñu. Tyicuan caa sacuvi ra vatyí yuhví ra coto cahan ra itá ñni costumbre circuncisión cha chaá coyo cuan chi ra.

13 Tyicuan ta inga ra Israel cha yihí cuenda ra Cristo ndu ñn ri ra chihin ra Pedro. Ta sacuvi ra cha ña vaha cuan. Vatyí ndu uvi yuhu ra tari ndu uvi yuhu ra Pedro. Ta nyacua nya ra Bernabé ta ndutahan ra chihin ra.

14 Soco nyehi vatyí ña vaha cuahán nyacuvi ra. Ñima tari cuhva catyí tuhun ra Cristo. Yucuan chaha catyí chi ra Pedro chihin nuu tandihí ñu canyicu cuan: “Yoho cuvún noo ra Israel. Ta iyón tari iyó ñáyivi cha ñima ñu Israel cuví. ¿Yoso caa cha cuñún saniñun chi ñu tyi sacuvi ñu costumbre cha sacuvi ñu Israel? Ta ni maun ta ña sacuví con”, catyí yuhu chi ra.

15 Maa yo cha cuví yo ra Israel nya ta cacu yo, ña sacuví yo cuatyí tari sacuví ñu cha ñima ñu Israel cuví.

16 Soco chitó yo vatyí ma cuvi saváha yo chi yo nuu Nyoo chihin cha nanducú yo cuhva sacuvi yo ley chahnu cha tyaa ra Moisés. Soco nduvahá yo nuu Nyoo cha cuenda cha chinó ri ñni yo chi ra Jesucristo. Yucuan chaha chinó tucu ñni maa yo chi ra. Vatyí tyicuan caa ta nicoo vaha yo chihin Nyoo. Ta ñima cha cuenda cha nducú yo cuhva sacuvi yo cha catyí ley. Vatyí ni noo yo ta ña nduvahá yo nuu Nyoo chihin cha nanducú yo cuhva sacuvi yo cuhva catyí ley chahnu.

17 Soco vityin tatu nducú yo cuhva nduvaha yo nuu Nyoo cha cuenda ra Cristo, cuñí chi catyí vatyí nacoto yo tyi iyó tucu cuatyí yo tari iyó cuatyí ñu cha ñima ñu Israel cuví. Tatu tyicuan caa, ¿atu cuñí chi catyí vatyí ra Cristo sacuví ra tyi iyó cuatyí yo vatyí sandoo yo ley ta nachino ñni yo chi ra? Ñima.

18 Soco tyehe ta naquehen tucu yo ley cha cha yaha sandoo yo, yucuan ndicha coo cuatyí yo.

19 Vatyí ley cuan sañahá chi chii vatyí tahán chi cúvi, ta yucuan chaha sandihí tuhun cha nduqui cuhva caqui chihin ley cuan, ta chihí cha cuenda chi cuví cuan, tacuhva cuvi coi cha cuenda Nyoo.

20 Yuhu, tari cha chihí nuu cruzi ñn ri chihin ra Cristo. Ta ñima ca ñáyivi mai iyé soco ra Cristo iyó ra añime. Ta ñáyivi ra cha iyé vityin, iyé soco chihin cha chinó ñni chí ra cha cuví ra Sehe Nyoo. Ican ra cuñí ra chii, ta chihí ra cha catyí cuatyí yuhu.

21 Ña cuñí yuhu sacuachiye cha vaha Nyoo. Vatyí tatu tyehe ta cuví cacu añima yo cha cuenda ley, ñahri tuhun chihí ra Cristo cuví chi cuan.

3

Naquehén yo Tatyí Ii Nyoo cha cuenda cha chinó ñni yo chi ra Cristo

1 ¡Ñana cha tondo iyó nyoho ñu canyicu Galacia chiña! ¿Yóo cha sativí chi ndo vatyí ña cuñí ca ndo quichaha ndo tuhun cha ndicha? Cachi xaan chaha ndi cuenda tuhun ra Jesucristo chi ndo. Ta cutuñi vaha ñni ndo ñáa cuenda chihí ra nu cruzi.

2 Noo ri cuñí ndaca tuhun chi ndo. ¿Atu naquehen ndo Tatyí Ii Nyoo cha cuenda cha sacuví ndo cha catyí ley ra Moisés, o cha cuenda cha chinó ñni ndo tuhun ra Cristo cha chiñi ndo?

3 ¿Yoso caa cha tondo xaan iyó ndo vityin? Ta quivi xihna ri vaha xaan quichaha ndo chi Nyoo chihin tunyee ñni Tatyí Ii ra. Soco vityin, ¿yoso caa cuñí ndo coo ndo ñáyivi cha chihin fuerza maa ndo?

4 ¿Atu cha caha ri nyehe ndo cha sacuvi Tatyí Ii Nyoo chihin ndo? Ñima cha caha ri cuví, cahví ñni.

5 ¿Ñáa tuhun chahá Nyoo Tatyí Ii ra chi ndo, ta sacuví ra milagru mahñu ndo? Ñima cha cuenda vatyí nducu ndo cuhva sacuvi ndo cha catyí ley, soco cha cuenda vatyí chinó ñni ndo tuhun ra Cristo cha chiñi ndo.

⁶ Ra Abraham, chinq iñi ra tuhun cahān Nyoo chihin ra, yucuan chaha cuví ra noo ra vaha nuu Nyoo.

⁷ Yucuan chaha tahán chi coto ndo vatyí ñu cha ndicha cuví ñáyiví chi ra Abraham, ican ñu cuan chinó iñi ñu chi Nyoo.

⁸ Ta cha naha ndoo tuhun Nyoo nu tutu. Ta catyí chi vatyí nu cuahán ca chi quiví, cusacuvi Nyoo tyi nduvaha ñáyiví cha ñima ñu Israel cuví nuu ra cha cuenda cha chinó iñi ñu chi ra. Yucuan chaha catyí Nyoo chi ra Abraham ta cha naha: “Tandihí ri maa ñu cunasoque cha cuenda maun”, catyí Nyoo chi ra.

⁹ Yucuan chaha ñu cha chinó iñi chi ra Cristo, Nyoo nasocó ra chi ñu ñin ri chihin ra Abraham, vatyí chinó iñi tucu maa ra.

¹⁰ Ñu cha itá iñi ley cha tyaa ra Moisés, cutachi tuñi Nyoo chi ñu. Vatyí tuhun Nyoo catyí. “Tandihí ñu cha ña sacuví tandihí cuii maa tuhun cha nyaá nu libru ley cuan, cutachi tuñi Nyoo chi ñu.”

¹¹ Ta ndicha vatyí yori yo nduvaha yo nuu Nyoo cha cuenda cha itá iñi yo ley cuan. Vatyí tuhun Nyoo catyí chi: “Ra nduvahá nuu Nyoo cha cuenda cha chinó iñi ra, coo ra ñáyiví”, catyí tuhun Nyoo.

¹² Ta ley ra Moisés ña cu ñin ri chi chihin cha chinó iñi yo chi ra Cristo. Vatyí catyí ley cuan: “Yóo ñu cha sacuvi tandihí cuii ley ihya, coo ñu ñáyiví cha cuenda cuan”, catyí chi.

¹³ Ra Cristo natavā ra chi yo ndaha ley cha catyí tyi tahán chi cutuñi chi yo cha cuenda cuatyí yo. Vatyí maa ra nanduvi ra noo ra iyó cuatyí tyiño nuu yo. Vatyí catyí tuhun Nyoo: “Ñima ra vaha cuví ra cha chihí ta tacaá nu yutun.”

¹⁴ Tyicuan caa cuví tacuhva vatyí cha cuenda ra Cristo Jesús ta nasocó Nyoo chi ñáyiví cha ñima ñu Israel cuví, tari catyí ra chi ra Abraham tyi cunasoco ra chi ra. Ta chihin cha chinó iñi yo chi Nyoo, naquehén tandihí yo Tatyí Ii cha catyí Nyoo tyi cuhva ra chi yo.

Ley chahnu sañahá chi chi yo vatyí iyó cuatyí yo, soco ña sacacú chi chi yo

¹⁵ Yañi, cuacuhve noo cuhva chi ndo, cuhva iyó yo siqui ñuhu ñáyiví ihya. Tatu noo ra catyí ra vatyí cucuhva ra cha cucuhva ra chi inga ra. Ta tatu cha yahā tyihí ra firma, yori cuví satani. Ta yori cuví natyiso suhva ca siqui.

¹⁶ Ta vityin, Nyoo catyí ra tyi cucuhva ra cha cucuhva ra chi ra Abraham ta chi nonga ra cha vachi tata ra. Ña catyí nu tutu Nyoo vatyí cuhva ra chi cuaha ra vachi tata ra, soco chi nonga ri ra. Ta ican ra cuan cuví ra Cristo.

¹⁷ Cha catyí yuhu, ican cuví ihya: Nyoo natyihí tahan ra tuhun chihin ra Abraham. Ta ñin ri tuhun cahán ra. Tyicuan ta yaha cumi ciento oco uchi cuiya ta chaā ley cha tyaa ra Moisés. Soco ma cuví casi ley cuan nu natyihí tahan Nyoo tuhun chihin ra Abraham. Ta ma cuví casi chi nu naquehen yo cha catyí Nyoo tyi cuhva ra chi yo.

¹⁸ Tyehe ta naquehén yo cha tahán chi chi yo cha cuenda ley ra Moisés, cha caha ri cuvi tuhun natyihí tahan Nyoo chihin yo. Soco vatyí Nyoo catyí ra chi maa ra Abraham vatyí cuhva maa ra chi ra.

¹⁹ Tatu tyicuan caa, ¿ñáá cuenda vaha ley ra Moisés? Chahā Nyoo ley cuan soco cha yahā catyí ra tyi cuhva ra cha cucuhva ra chi yo. Vatyí ley cuan sanatuví chi cuatyí yo. Ta ndoo chi nyacua nya quiví quichí ra Cristo ra cuví tata ra Abraham. Ta chi maa ra Cristo catyí Nyoo tyi cuhva ra cha cucuhva ra. Ta ángel Nyoo chahā cuenda ley cuan chi ra Moisés. Ta ra Moisés chahā ra chi ñáyiví.

²⁰ Soco Nyoo noo tuhun ri maa ra cahān ra chihin ra Abraham quiví cuan. Ta ña chiñuhú cha nducu ra noo ra nacatyí tuhun cuan chi ra Abraham.

²¹ ¿Atu cuñí chi catyí vatyí ley cha tyaa ra Moisés ña chachí tahan chihin cha catyí Nyoo tyi cuhva ra chi yo? Ñima. Soco tyehe ta cuví coo yo ñáyiví chaa cha cuenda ley cuan,

yucuan ndicha nduvaha yo nuu Nyoo cha cuenda chi. Soco ma cuvi.

²² Vatyí catyí nu tutu Nyoo tyi iyó cuatyí tandihí cuii ñáyiví. Vatyí tyicuan caa ta ñu chinó iñi chi ra Jesucristo cuví ñihi ñu ñayiví chaa cha catyí Nyoo tyi cuhva ra chi yo.

²³ Ta ni cumañi ca quichi tuhun cha chinó iñi yo chi ra Cristo, ley cuan chicumí chi chi yo tari cha ñohó yo vehe caa. Vatyí nyatú yo nyacua nya sañaha Nyoo chi yo yoso caa chino iñi yo chi ra.

²⁴ Ta ley cuan cuví tari noo ñu cha sahá cumi chi ra cuatyaa. Vatyí ley saha cumi chi yo tari ra cuatyaa nyacua nya quiví quichí ra Cristo. Ta cuví chinó iñi yo chi ra ta nduvaha yo nuu Nyoo.

²⁵ Ta vityin cha chaá quiví cha chinó iñi yo chi ra Cristo, ña sahá cumi ca ley cuan chi yo tari noo ra cuatyaa.

²⁶ Vatyí tandihí yo cuví yo sehe Nyoo vatyí chinó iñi yo chi ra Cristo Jesús.

²⁷ Ta tandihí yo condutyá yo ta ndu ñin yo chihin ra Cristo. Vatyí nyaá ra añima yo.

²⁸ Ña ñiñi xaan ca cha cuví yo, an ñu Israel, an ñu Grecia, an cuví ri yo ñu libre iyó, an cuví yo ñu iyó chitoho. An cuví yo rayíi, an cuví yo ñusihi, soco ña chiñuhu ca cuan. Vatyí cha ñin ri cuví yo chihin ra Cristo, noo ri cuví yo chihin ra.

²⁹ Ta tatu cuenda ra Cristo yihí ndo, ndicha cha ñáyiví vachi tata ra Abraham cuví ndo. Ta ñihí ndo cha catyí Nyoo chi ra Abraham tyi cuhva ra chi ra.

4

¹ Cuacuhve minoo cuhva chi ndo. Noo ra cuehe tatu chihí sutu cue, ta sandoo sutu cue tandihí cha tyayíi ra chi cue, ra cuehe ihya ma cuvi cotyiño ñaha cue cha tyayíi sutu cue. Nyacua nya quiví cuahnu cue ta cuvi cotyiño cue. Ta cha ni ri ca cha ta cuahnu ca cue, cuví cue tari noo musu ri. Vasi chi maa cue cuví tandihí cha tyayíi sutu cue.

² Iyó ra cumí chi cue nyacua nya chaa cuiya cue cha catyí sutu cue, tyi naquehen cue cha tyayíi cuan.

³ Ta tyicuan caa cuví maa yo. Cha ni ri ca cha ta quichí ca ra Cristo, cuví yo tari noo musu ri chi cha nyacá ñaha siqui ñuhu ñayiví.

⁴ Soco quiví tahan chi, Nyoo tachí ra chi Sehe ra, sacacu noo ñaha sihi chi ra. Ta chinyacá ñaha ley chahnu chi ra.

⁵ Tachí Nyoo chi ra tacuhva sacacú ra chi yo ndaha ley cuan. Vatyí tyicuan caa ta Nyoo naquehén cuenda ra chi yo tari sehe ra.

⁶ Ta vatyí sehe ra nanduví yo, Nyoo tachí ra Tatyí li ra Cristo cunyaa añima yo. Ta cha cuenda Tatyí li ra caná chaa yo chi Nyoo ta catyí yo: “Sutu Mañi yuhu.”

⁷ Yucuan chaha sehe Nyoo cuvun ta ñima ca noo musu ri. Ta cha cuenda cha cuvún sehe Nyoo, chahá ra cha vaha cha tahán chi chuun cha cuenda ra Cristo.

Chicá xiñi ra Pablo cha cuenda ñu yihí cuenda Nyoo

⁸ Quiví ta cohon nuu ca ndo chi Nyoo, cuví ndo musu noo cha ñima Nyoo cuví.

⁹ Soco vityin ñohó nuu ndo Nyoo, o maa Nyoo ñohó nuu ra chi ndo. ¿Yoso caa cha cuñí ndo natíin tucu ndo noo tuhun ndahví cha ñima ri tuhun, ta nanduví tucu ndo musu inga chaha?

¹⁰ Nyoho sanducahnú ndo quiví vico, quiví natyacú yoo, ta vico cuiya.

¹¹ Yuhví xain coto vaha ñahri maa tuhun sahá tyiñe chihin ndo.

¹² Yañi, chacú ndahvi nuu ndo na nanduví ndo tari mai (cha ña nyacá ñaha ca ley chii). Vatyí yuhu cha nanduví tari maa ndo, soco ñima cha sativí ndo chii.

¹³ Vatyí cha chitó ndo quiví chahan nui ñuu ndo yihí noo cuehe chii. Ta chaha chi cuhva cahin tuhun ra Cristo chihin ndo.

¹⁴ Ta cuehe cuan cuví tari noo prueba cha cuenda vatyí ña tyaa xiin ndo chii. Soco vaha naquehen cuenda ndo chii, tari noo ángel Nyoo,

ta tari cha vatyi suri maa ra Cristo cuví.

¹⁵ ¿Nya nyaa cha s̄i xaan cuv̄i chi ndo chihin vityin? Vatyi yuhu cuv̄i cha ndaa vatyi quiv̄i cuan, nyacua caña iñi ndo catava ndo ch̄iti nuu ndo ta cuhva ndo chii, tyehe ta cuv̄i ndu-vahi chihin cuan.

¹⁶ Ta vityin, ¿atu cuñí maa ndo tyi nanduv̄i yuhu noo ra cha xaan cahnu iñi ndo cha cuenda vatyi catyí cha ndicha chi ndo?

¹⁷ Ñáyiv̄i cuan, cuñí xaan ñu chi ndo, catyí ñu. Soco ñima chihin cha vaha. Vatyi cha cuñí ñu cuan, cha sacanyaha ñu chi ndo chi ndi. Ta cunyicon ndo chi maa ñu.

¹⁸ Soco vaha cha cuñí yo chi ñáyiv̄i, soco chihin cha vaha, ta tyicuan ri maa. Ta ñima in yaha ri cuhva cha nyaa ri yuhu chihin ndo.

¹⁹ Sehe luhli, inga chaha nyehi t̄ndoho ta cha uhv̄i cha catyí ndo. Tari noo sihi cha yihí cha uhvi chi ña tatu cuacacu sehe ña. Ta cunyehe que t̄ndoho nyacua nya ndunye vaha ndo chihin fuerza maa ra Cristo.

²⁰ Vaha tyehe ta nyaí chihin ndo vityin vityin. Tacuhva cuv̄i cahan vii chihin ndo inga cuhva. Vatyi ña chité yoso caa caca xiñi cha cuenda ndo.

Nacoo yo cha cuenda Nyoo ta ñima ca cha cuenda ley chahnu

²¹ Nyoho cha cuñí ndo cha cunyaca ñaha ley ra Moisés chi ndo, catyí ndo chii. ¿Atu ta cuiñi ca ndo cha catyí ley cuan?

²² Catyí chi vatyi ra Abraham chiyo uvi tahan sehe ra. Noo sehe ra chiyo chihin ñaha cha cuv̄i musu ñasih̄i ra. (Chinañi ña Agar.) Ta nonga sehe ra chiyo chihin cu Sara cha cuv̄i ñasih̄i vaha ra.

²³ Cac̄u sehe ñaha cha cuv̄i musu cuan tari cac̄u tandih̄i ra cuatyaa. Soco sehe ñasih̄i vaha ra Abraham cac̄u cue tacuhva chino cava cha catyí Nyoo chi ra Abraham vatyi cuhva ra noo sehe chi ñasih̄i ra.

²⁴ Ta chihin ihya iyó noo cha cuñi chi catyí chi chi yo. N̄induvi ñusih̄i cuan cuv̄i ñu tari uvi tahan tuhun cha natyih̄i tahan Nyoo chihin yo. Noo

tuhun cuan cuenda yucu Sinaí. Ta ñáyiv̄i yihí cuenda ley cuan cuv̄i ñu tari cu Agar, vatyi noo musu ri cuv̄i tucu maa ña chihin sehe ña.

²⁵ Tari cu Agar, ta tari yucu Sinaí cha nyaá Arabia, tyicuan caa tucu ñuu Jerusalén quiv̄i vityin. Vatyi ñáyiv̄i ñuu cuan nyaá ñu ndaha ley chahnu. Tari noo musu ley cuan cuv̄i ñu.

²⁶ Soco nya andiv̄i iyó inga Jerusalén, cha cuv̄i ñuu yo. Ta yori nyacá naha chi chi. Ta cuv̄i chi tari sihi yo.

²⁷ Ta catyí tuhun Nyoo:

C̄us̄i iñi yoho, ñaha sihi cha ña cuv̄i coo sehe.

Yoho yori sehun.

C̄ana chaa chihin cha s̄i cuñun, yoho cha ña ñoh̄o nuu cha uhvi cha cacu sehe.

Vatyi ñaha sihi cha sanandōo ȳi chi, coo ca sehe ña ta ñima ca ñusih̄i cha iyó ȳi, catyí tuhun Nyoo.

²⁸ Yañi, yoó cuv̄i yo tari ra Isaac, ra cuv̄i sehe cu Sara. Cuv̄i yo sehe ra Abraham cuenda tuhun cha natyih̄i tahan Nyoo chihin ra.

²⁹ Ta ra cha cuv̄i sehe ñaha cha cuv̄i musu cuan xaan iñi ra chi ra Isaac cha cuv̄i sehe ñasih̄i vaha ra Abraham. Tyicuan caa cuv̄i tucu vityin. Ra cha cuñí vatyi sacuv̄i yo cha catyí ley, xaan iñi ra ta chicán nyicon ra chi yo cha cuv̄i yo ñáyiv̄i nacac̄u chaa chihin Tatyí Ii Nyoo.

³⁰ Soco ¿ñáá cha catyí tuhun Nyoo? Catyí chi: “T̄ava ñehe chi ñaha cha cuv̄i musu cuan chihin sehe ña. Vatyi sehe ña ma cuvi naquehen cue cha tahán chi chi sehe ñasih̄i vaha ra Abraham”, catyí tuhun Nyoo.

³¹ Yucuan chaha, yañi, ñima tari sehe ñaha cha cuv̄i musu cuan cuv̄i yo. Soco cuv̄i yo tari sehe ñasih̄i vaha ra Abraham.

5

Ñihi cuinanyaa yo chihin cha ña ny-acá ñaha ca ley chi yo

¹ Ra Cristo sacac̄u ra chi yo ndaha ley chahnu cuan. Yucuan chaha saha

ndo cuenda coto nanduvi ndo musu inga chaha cuenda ley.

² Tyasoho ndo, yuhu ra Pablo catyi chi ndo. Tatu cuhva ndo cha saha ñu circuncidar chi ndo, ta cuñi maa ndo tyi cucacu ndo chihin cuan, ma cuvi tyinyee ra Cristo chi ndo.

³ Cuñi catyi inga chaha chi ndo vatyí tandihí ra cha cuñi cacu chihin cha saha ñu circuncidar chi ra, cuñi chi vatyí sacuvi ra tandihí cuii cha catyí ley ra Moisés ñandihí.

⁴ Tandihí nyoho cha nducú ndo nduvahá ndo nuu Nyoo cha cuenda ley cuan, cha sañá tahan ndo chihin ra Cristo cuví cuan. Ta sañá ndaha ndo tumañi iñi cha chahá Nyoo chi ndo.

⁵ Soco yoó chihin cha tyinyeé Tatyí Ii Nyoo chi yo ta chinó iñi yo chi ra Cristo. Ta itá iñi yo nduvahá yo nuu Nyoo.

⁶ Vatyí tatu ñn ri cuví yo chihin ra Cristo Jesús, ñahri tuhun cha sacuvi yo costumbre circuncisión, o cha ña sacuvi yo. Cha vale ca tatu chinó iñi yo chi ra Cristo. Ta chihin cha chinó iñi yo coo yo, chihin cha cuñi yo chi noo noo tahan yo.

⁷ Nyoho vaha cuahán ndo quivi cuan. ¿Yóo cha sativi chi ndo? Ta ña tyasohó ca ndo cha ndicha.

⁸ Tuhun cha sañahá ñu cuan, ñima tuhun Nyoo ra nacana chi yo cuví.

⁹ Vatyí tari nandaá yuchan pan chihin chiin ri yuchan iya, tyicuan caa tucu noo ri ñáyivi quiñi caa cuví sativi ñu chi cuaha ñáyivi.

¹⁰ Nyoo cutachi tuñi ra chi ñáyivi cha sativi chi ndo. Ñahri cuenda ra yóo ñu cuví ñu. Soco yuhu chitó vahi tyi Sutu Mañi yo cutyinyee ra chi ndo tacuhva vatyí nyoho ma caca xiñi ndo inga cuhva cha ña sañahí chi ndo.

¹¹ Ta cha cuenda chi yuhu, yañi, tyehe ta catyí vatyí ñu chinó ini chi ra Cristo cuñi chi cha sacuvi ñu costumbre circuncisión, ra Israel ma caca nyicon ra chii. Ta ma cuquiñi ca cuñi ra chihin tuhun ra Cristo cha chihí nu cruzi cha catyi cuatyí yo.

¹² Soco ra sayangá chi ndo chiña, vaha cha quita ra nu nyicu ndo,

tacuhva cha ma sayanga ca ra chi ndo.

¹³ Vatyí nyoho, yañi, nacana Nyoo chi ndo vatyí coo ndo libre. Soco ñima cha cuenda cha iyó ndo libre ta cuví sacuvi ndo ñáá ndihí cha cuñi coño ñuhu ndo. Soco sacuvi ndo tyiño nuu tahan ndo chihin cha cuñi ndo chi ñu.

¹⁴ Vatyí iyó noo tuhun Nyoo cha catyí chi: “Cuñi ndo chi tahan ndo tari cuñi ndo chi maa ndo”, catyí chi. Ta tatu ndicha ndicha cha cuñi yo chi tahan yo, ña yí sacuví yo tandihí cha catyí ley chahnu.

¹⁵ Saha ndo cuenda vatyí tatu cahán ndo ta sataśi iñi ndo chi tahan ndo, cutivi nu nyicu ndo.

Cuhva cuñi coño ñuhu yo ta cuhva iyó yo chihin Tatyí Ii Nyoo

¹⁶ Cha cuñi catyi chi ndo ican cuvi ihya: Coo ndo chihin tunyee iñi Tatyí Ii Nyoo. Tyicuan caa ta ma cuvi ca sacuví ndo cuhva ña vaha cuñi ndo.

¹⁷ Vatyí cha sacuví yo cha ña vaha cha cuñi yo, ñima cuhva cuñi Tatyí Ii Nyoo cuví. Vatyí Tatyí Ii Nyoo ña cuñi chi cha sacuví yo cha ña vaha. Ta coño ñuhu yo ña cuñi chi sacuví chi cuhva cuñi Tatyí Ii Nyoo. Ña nacachí tahan cha cuñi Tatyí Ii Nyoo chihin cha cuñi coño ñuhu yo. Ta yucuan chaha ma cuvi sacuvi yo cha cuñi yo.

¹⁸ Soco tatu sacuví yo cha catyí Tatyí Ii Nyoo chi yo, ma cuvi ca cun-yaca ñaha ley chi yo.

¹⁹ Ña xehe caa ñu sacuví cuhva ña vaha cha cuñi coño ñuhu. Yihí ra, iyó ñasihí ra ta iyó inga ñu chi ra. Ta yihí ñu iyó yí ñu ta iyó inga ra chi ñu. Ta yihí ñu sacuví ñu cha ña vaha chihin coño ñuhu ñu ta iyó viciu chi ñu.

²⁰ Yihí ñu sacahnú ñu xitohyo. Yihí ñu sataśi ñu. Yihí ñu tasi cuñi nyehe ñu chi tahan ñu. Yihí ñu cañi tahan ñu. Yihí ñu cuiño ñu. Ta yihí ñu yatyin iñi ñu. Yihí ñu chicá xiñi ñu maa maa ri cha vaha chi maa ñu. Ta yihí ñu iyó división nu nyicu ñu. Vatyí cacañi tahan ñu. Ta tyicuan caa ta cusín ñu.

21 Ta yihí ñu nyiyó iñi ñu cha tyayii. Ta yihí ñu cachahñi chi tahan ñu. Ta yihí ñu tuhva ñu chiñi. Ta yihí ñu chachí cuahyi ñu. Ta sacuví ñu cuaha ca cha sacuví ñu. Ta catyí chi ndo tari catyí chi ndo quivi cuan. Vatyí tandihí ñu cha sacuví tyehe caa ma cuvi naquehen cuenda ñu nu nyacá ñaha Nyoo.

22 Soco cha chahá Tatyí Ii Nyoo, ican cuví ihya: cha cuñi yo chi Nyoo ta chi tahan yo, cha sii cuñi yo, cha taxi cuñi añima yo, cha cama iyó yo chihin ñáyivi, cha masu iñi yo, cha vaha ñáyivi cuvi yo, cha ña cundihñi yo sacuví yo cha vaha chihin ñáyivi, cha chinó iñi yo chi ra Cristo.

23 Ta inga cha chahá Tatyí Ii Nyoo chi yo, ican cuví ihya: cha ndahvi sahá yo chi yo, cha ña sacuví yo cuhva cuñi coño ñuhu yo. Tatu sacuví yo tandihí cha vaha ihya, ni noo ley ta ma cuvi catyí chi tyi iyó cuatyí yo.

24 Ta yoó cha yihí yo cuenda ra Cristo Jesús, cha sandihí yo tuhun cha sacuví yo cuhva ña vaha cha cuñi coño ñuhu yo.

25 Ta tari cha iyó yo ñáyivi chaa cha cuenda Tatyí Ii Nyoo, tyicuan caa cuñi tucu chi cha quichahá yo cha saquehen ityi ra chi yo.

26 Ma cahnu saha yo chi yo. Ta ma sacañi tahan yo chi tahan yo. Ma quichi cuvi iñi yo cha chii inga tahan yo.

6

Tahán chi tyinyee yo chi tahan yo

1 Yañi, tatu nanyehé yo sacuví noo tahan yo cuatyí. Nya yo cha ñihi nyaá yo chihin Tatyí Ii Nyoo tyinyee yo chi ñu na ndunyeen ñu inga chaha. Soco cuñi chi cahán vii yo chihin ñu chihin cha vita iñi yo. Ta cuñi chi sahá yo cuenda chi yo coto nducu nyehe tucu cuhna chi maa yo.

2 Na tyinyee yo chi tahan yo ñáa cha cuví chi ñu. Tatu tyicuan caa sacuví yo, quichahá vaha yo chi ra Cristo cuví cuan.

3 Tatu nya noo yo cuñi maa yo vatyí cahnu ñu cuví yo, ta ñahri ñu cuví yo, suri chi maa yo sandaví ñaha yo.

4 Ma saha yo tuhun tyi vaha yo tari vaha noo hermano cha vaha chicá chihin Nyoo. Nasaha xihna yo cuenda tatu vaha cha nyacuví yo. Tyicuan ta coto yo tatu vaha sacuví yo ta cusii cuñi yo.

5 Vatyí tahán chi cunyeen noo noo yo ñáa ndihí cha tyisó Nyoo siqui yo.

6 Ta cuñi chi tyinyee ndo chihin cha chiñuhú chi ra cha sañahá tuhun Nyoo chi ndo.

7 Ta ma sandaví ñaha ndo chi ndo. Nyoo yori cuví cuacu nyaa chi ra. Vatyí tandihí cha tachí ñáyivi, ican cuan cunaquehén ñu. Vatyí tatu sacuví ñu cha vaha, cha vaha naquehén ñu. Soco tatu sacuví ñu cha ña vaha, cha ña vaha cuñihi ñu.

8 Tatu noo ñáyivi nyacuví ñu cuhva ña vaha cha cuñi coño ñuhu ñu, suri maa cha sacuví ñu cusativí chi chi ñu. Soco tatu nyacuví ñu cuhva cuñi Tatyí Ii Nyoo, Tatyí Ii Nyoo cucuhva noo ñáyivi chaa cha ma naa ca maa tyi coo ñu.

9 Yucuan chaha ma cutatu yo cha sacuví yo cha vaha. Vatyí tatu ma ndu uvi iñi yo, coo quivi ta naquehen yo cha vaha.

10 Yucuan chaha tahan ri chaha cha chahá chi cuhva, na sacuví yo cha vaha chihin tandihí ri ñáyivi. Ta cha xihna cuii ri sacuví yo cha vaha chihin ñu yihí cuenda Nyoo.

Cusii xaan cuñi ra Pablo vatyí nyehé ra tindoho cha cuenda ra Cristo

11 Nyehe ndo ñana cha nahnu letra tyaí chihin ndahi nu tutu ihya vityin.

12 Ñu cha cuñi saniñi chi ndo vatyí sacuví ndo costumbre circuncisión, saniñi ra chi ndo vatyí cuñi ra cuvaha ra nuu ñáyivi. Ña cuñi ra nyehe ra tindoho cha cuenda ra Cristo, ra chihí nu cruzi.

13 Vatyí ni maa ra cha sacuví ra costumbre circuncisión cuan ta ña quichahá ra tandihí cha catyí ley. Soco cuñi ra cha sacuví nyoho costumbre cuan. Vatyí tyicuan caa ta

cuví sacahnu ra chi ra vatyi sacuví ndo cuhva catyí ra.

¹⁴ Soco yuhu ña cuñí sacahni chii cha cuenda ñáá ndihí tuhun. Soco sñi xaan cuñí cha chihí Sutú Mañi yo Jesucristo nu cruzi cha cuenda yuhu. Vatyi cha cuenda cha chihí ra nu cruzi, tari quívi cha yaha chihí cha quiñi caa cha iyó ñayívi ihya. Ta cha yaha chihí tucu mai cha cuenda cuan.

¹⁵ Vatyi tatu nyicón yo chi ra Cristo Jesús, ña ññi xaan cha sacuví yo costumbre circuncisión o cha ña sacuví yo. Noo cha ññi ca, cha nanduví yo noo ñáyívi chaa.

¹⁶ Tandihí ndo cha iyó ndo tyehe caa, ñaquehen ndo cha taxi ri coo aña ndo. Ta na cundahvi cuñi ra nyehe ra chi tandihí ndo, ñu cha ndicha cuví ndo ñáyívi cuenda ra.

¹⁷ Cha vityin ta nu cuahán chi ityi nuu ca, ni nonga ndo ta ma cuhva ca ndo tisihi chii. Vatyi tandihí pehla cha nyaá coño ñuhi, cuñí chi catyi vatyi ndicha cha cuví yuhu noo ra chicá tyiño Sutú Mañi yo Jesús.

¹⁸ Yañi, Sutú Mañi yo Jesucristo na nasoco chi tandihí ndo. Ta tyicuan caa na cuvi chi.

Carta Cha Sacuhun Ra Apóstol Pablo Chi Ñáyivi Ñuu Éfeso Cha Yihí Cuenda Nyoo

Nu sacuhún ra Pablo noo tutu chi ñu ñuu Éfeso cha yihí cuenda Nyoo

¹ Yuhu ra Pablo cuví noo apóstol ra Jesucristo. Vatyí yucuan cuhva cuñí maa Nyoo. Tyái noo carta ihya chi tandihí ndo cha yihí ndo cuenda Nyoo ñuu Éfeso chiña, ta níi ñi ndo chinó ñi ndo chi ra Cristo Jesús. Ta ñn ri cuví ndo chihin ra.

² Na nasoco Nyoo ta Sutu Mañi yo Jesucristo chi ndo. Ta nacuhva ra cha taxi ri coo aña ndo.

Cha ñn ri cuví yo chihin ra Cristo, Nyoo nasocó xaan ra chi yo

³ Na sacahnu yo chi Nyoo, ra cuví Sutu Sutu Mañi yo Jesucristo. Vatyí nasocó xaan ra chi yo chihin tandihí nuu cha vaha cha iyó andivi cha cuenda cha ñn ri cuví yo chihin ra Cristo.

⁴ Vatyí nyata ni cumañi ca savaha ra ñuhu ñayivi ta nacachí vaha ra chi yo tyi cu ñn ri yo chihin ra Cristo. Vatyí tyicuan caa cundundí yo nuu ra chihin cha ñahri ca cuatyí yo. Cha cuenda cha cuñí ra chi yo,

⁵ ta nyata cha naha ta tyaá ra cuhva chi yo vatyí nanduvi sehe ra chi yo cha cuenda ra Jesucristo. Tyicuan caa sacuvi ra vatyí yucuan cuhva cuñí maa ra.

⁶ Yucuan chaha tyicuan ri sacahnú yo chi ra. Vatyí vaha xaan ñáyivi cuví ra. Ta cahnu xaan tumañi ñi chahá ra chi yo. Vatyí sacu ñn ri ra chi yo chihin Sehe ra, ra cha cuñí xaan ra chi.

⁷ Ta cha cuenda cha cuñí xaan Nyoo chi yo, natavá ra chi yo ndaha ra ña vaha, tacuhva cha ma cutuñi chi yo. Vatyí chihin cha chatí ñiñi Sehe ra, sandachí ra cuatyí yo. Ta tyicuan caa sahá Nyoo tīcahnu ñi chi yo.

⁸ Ta vatyí cahnu xaan tumañi ñi sahá ra chi yo, chahá xaan ra cha chiñi tuñi ra chi yo.

⁹ Ta chahá ra cha cutuñi ñi yo tuhun ra cha ña chito ñáyivi. Vatyí sacotó ra chi yo yoso cuhva tyaá ra cuhva tyi sacuvi ra chihin tandihí cha iyó cha cuenda ra Cristo.

¹⁰ Vatyí coo quivi cuchino cava cha tyaá ra cuhva tyi sacuvi ra. Vatyí cusandu ñn ri ra tandihí cha iyó ihya ñayivi ta cha iyó andivi, ta tandihí cucunyaa ndaha ra Cristo. Vatyí maa ra cucunyaca ñaha ra tandihí.

¹¹ Cha cuenda ra Cristo ñihí tucu maa yo cha tahán chi chi yo. Vatyí Nyoo nyata cha naha nacachí ra chi yo tyi cu ñn ri yo chihin ra Cristo. Tyicuan caa tyaá Nyoo cuhva tyi cusacuvi ra. Ta maa ra sacuvi tandihí yoso cuhva nyehé maa ra tyi vaha.

¹² Ta tyehe caa sacuvi ra tacuhva vatyí nyuhu cha nachino ñi ndi chi ra Cristo cha xihna ri, coo ndi soco cha sacahnu ndi chi Nyoo cha cuenda cha cahnu cuví maa ra.

¹³ Ta tyicuan caa tucu nyoho. Vatyí quivi chiñi ndo tuhun Nyoo cha ndicha vaha, catyi ñu chi ndo tuhun ra Cristo yoso caa sacacú ra chi yo. Ta chingo ñi ndo chi ra. Ta ndu ñn ri ndo chihin ra. Ta tari cha tyaá Nyoo tuñi ra chi ndo cuví cuan, vatyí chahá ra Tatyí Ii ra cohon aña ndo, tari cuhva catyi ra tyi sacuvi ra.

¹⁴ Ta ican maa Tatyí Ii cuví cha chahá quiyi ri Nyoo chi yo tacuhva cuví naquehen ca yo cha cucuhva ra chi yo. Vatyí tyinyeé Tatyí Ii ra chi yo nyacua nya quivi ndihí sacacu ra chi yo, cha cuví yo ñáyivi chi ra. Ta tandihí ihya sacuvi ra chihin yo tacuhva sacahnu yo chi ra. Vatyí maa ra cahnu ca ra cuví ra.

¹⁵⁻¹⁶ Yucuan chaha, cuhva cha chicán tahvi chi Nyoo, ña sandihí tuhun cha nacuhvé tyahvi nyoo chi ra cha cuenda ndo. Vatyí ñihí tuhun tyi chinó vaha ñi ndo chi Sutu Mañi yo Jesucristo. Ta cuñí xaan ndo chi tandihí ñu tahan yo ñu yihí cuenda Nyoo.

¹⁷ Chiquén chi Nyoo Sutu Sutu Mañi yo Jesucristo. Vatyí ican ra cuví ra cahnu ca. Ta chiquén chi ra nacuhva ra cha chiñi tuñi Tatyí li ra chi ndo, tacuhva cutuñi iñi ndo cha sañahá ra chi ndo. Vatyí cohon nuu vaha ca ndo chi ra.

¹⁸ Ta chiquén chi ra, na nuña ra cha chiñi tuñi xiñi ndo, na coto ndo ñáá cha cuñí ra cha naquehen ndo cha cuenda cha caná ra chi ndo. Ta na coto ndo ñana cha tyaqui ta tyayí cha chahá Nyoo chi yo ñu yihí cuenda ra.

¹⁹ Ta chiquén chi Nyoo tyi cuhva ra cha coto ndo ñana cha cahnu tunyee iñi iyó chi ra, nyacua ña cuví tyicuhva yo. Ta ican cuan tyinyeé chi yo cha chino iñi yo chi ra. Ta suri maa chihin tunyee iñi ihya

²⁰ Nyoo sanandoto ra chi ra Cristo. Ta cuatyaa ra chi ra chiyo vaha ra nya andívi.

²¹ Ta yucuan cuví nu sacahnú xaan ca Nyoo chi ra Cristo cha nuu tandíhi ca cha nyacá ñaha síqui ñuhu ñayívi ihya ta andívi ñandíhi. Cuví ri tandíhi rey, o cuví ri ra cuví tyiño nahnu, o cuví ri ángel andívi. Soco yori yóo ca ra cahnu ñayívi ihya ta niri ñayívi cha cua coo. Vatyí noo tuhun ri maa ra Cristo cuví ra cahnu cuví.

²² Ta tandíhi cuii maa chahá Nyoo tyi cunyaca ñaha ra Cristo. Ta suri chi maa ra chahá Nyoo vatyí cuví ra xiñi o nuu chi ñu yihí cuenda ra.

²³ Vatyí yoó, cha yihí yo cuenda ra, cuví yo coño ñuhu ra. Ta maa yo ta maa ra cuví chi noo coño ñuhu naní ra. Ta maa ra cuví ra sandunaní tandíhi.

2

Sacacú Nyoo chi yo cha cuenda cha cuñí ra chi yo

¹ Nyoo chahá ra noo ñayívi chaa chi ndo tyi coo ndo quívi ndu in ri ndo chihin ra Cristo, vasi nicaa ni iñi ndo cuatyí quívi cuan. Ta tari maa cha chihí aña ndo tyi ñahri maa ñayívi Nyoo chinyaa aña ndo.

² Ta chinyacuví ndo cuhva nyacuví ñáyívi ña ñohó nuu Nyoo. Ta chinyacón ndo chi cuihna ra cuví nuu. Ta ican ra cuví tatyí ña vaha cha tyiyuhú chi ñu ña quichahá nu cahán Nyoo.

³ Ta suri tyicuan caa chiyo tucu yoó quívi cuan. Vatyí chinyacuví yo cha ña vaha cha quichi cuví iñi yo cha cuñí coño ñuhu yo. Ta sacuví yo yoso cuhva chica xiñi yo. Ta cha cuenda tuhun cha chinyacuví yo tahán chi tachi tuñi Nyoo chi yo inuu ri chihin tandíhi ca ñu sacuví cha ña vaha.

⁴ Soco Nyoo cundahví xaan cuñi ra nyehe ra chi yo. Vatyí cuñí xaan ra chi yo.

⁵ Ta vasi cuaha xaan cuatyí yo quívi cuan, tari quívi cha chihí aña yo chihin cuatyí cuan, soco Nyoo chahá ra cha conyito aña yo noo ñayívi chaa, vatyí sacú in ri ra chi yo chihin ra Cristo. Ta cha cuenda tumañi iñi cha saha Nyoo chi ndo ta cacú ndo.

⁶ Ta tari quívi cha sanandoto Nyoo aña yo quívi nandoto ra Cristo Jesús. Vatyí iyó yo noo ñayívi chaa cha chahá maa Nyoo tyi coo yo. Ta tari quívi cha cuatyaa ra chi yo andívi.

⁷ Ta sacuví Nyoo tyehe caa tacuhva vatyí nu cuahán ca chi quívi cusañaha ra chi tandíhi ñáyívi yoso cuhva cha cahnu tumañi iñi chahá ra chi yo cha cuenda ra Cristo Jesús. Vatyí vaha xaan ñáyívi cuví ra chihin yo tyi sacú in ri ra chi yo chihin ra Cristo.

⁸ Vatyí cha sacacú Nyoo chi yo cuví chi noo cha chahá ra chi yo. Ta naquehén yo tumañi iñi cuan chihin cha chinó iñi yo chi ra. Ta cha sacacú Nyoo chi yo ñima noo cha cuví sacuví maa yo cuví. Vatyí yucuan cuví noo tumañi iñi cha sacuví ra chihin yo.

⁹ Ñima cha cuenda cha sacuví yo cha vaha ta cuita iñi yo cha sacacú cuan chi yo. Tyehe ta cuví chi tyicuan caa, cahnu cusaha yo chi yo.

¹⁰ Nyoo sacuví ra vatyí nduvahá aña yo chihin cha ndu in ri yo chihin ra Cristo Jesús. Ta sacuví ra tyehe caa tacuhva vatyí cuví sacuví yo cha vaha. Vatyí maa ra tyaa ra cuhva nu quichi quívi vatyí tyicuan ri sacuví yo

cha vaha.

Cuví ri yo ñu Israel, o cuví ri yo ñu inga ñuu, soco cha cuenda ra Cristo ñin ri ñáyivi chi Nyoo cuví tandihi yo

¹¹ Yucuan chaha ñicohon iñi ndo cuhva chiyó ndo nu quichi quivi, tyi cuví ndo ñáyivi cha ñima ñu Israel cuví. Ta catyí ñáyivi Israel tyi ñu cha ñima ri tuhun cuví ndo cha ña sacuví ndo costumbre circuncisión tari sacuví maa ra. Ta cha cuenda cuan cuñi maa ra Israel tyi vaha ra nuu Nyoo ta nyoho ña vaha ndo.

¹² Ñicohon iñi ndo vatyi nu quichi chi, yori ra Cristo chinyaa ñima ndo. Ta ña ñin ri cuví ndo chihin ñu Israel. Ta ña chito ndo tuhun cha tyihí tahan Nyoo chihin ra Abraham: tuhun cha catyí Nyoo tyi cuhva ra cha ñicoo vaha yo chihin ra. Chiyó maa ndo ñuhu ñáyivi ihya chihin cha yori Nyoo nyaá chihin ndo, ta ña yihí iñi ndo cha cuñihi ndo.

¹³ Ta quivi cuan cañi xaan chinyaa ndo chihin Nyoo. Soco vityin ñin ri cuví ndo chihin ra Cristo Jesús. Maa ra Cristo chihí ra. Ta chati ñiñi ra cha catyi ndo. Ta yucuan chaha cuví cuyatyin ndo nuu Nyoo.

¹⁴ Vatyi ra Cristo sanicoo vaha ra chi yo chihin Nyoo. Ta sandu ñin ri ra chi ñanduvi yo. Sandu ñin ri ra chi nyuhu cha cuví ndi ñu Israel chihin nyoho cha cuví ndo ñu inga ñuu. Ta sanduvahá ra cuhva iyó yo. Vatyi tari noo cha sanduvá ra noo nama vehe cha nanyaa mahñu, cha chasi nu cu ñin ri yo.

¹⁵ Maa ra Cristo sandihí ra tuhun ley chahnu chihin cha chahá cuenda ra coño ñuhu ra tyi cúvi ra nu cruzi. Vatyi tandihi ley cuan sasiñ chi chi yo. Tyi nyuhu sacuvi ndi costumbre cha catyí ley cuan. Ta nyoho ña sacuvi ndo. Soco ra Cristo sandu ñin ri ra chi yo quivi chahá ra noo cuhva cha tyi coo yo. Ta tyicuan caa sanicoo vaha ra chi yo.

¹⁶ Vatyi chihí ra nu cruzi cha catyi cuatyí yo. Ta sacuvi ra vatyi nanduvaha coo yo chihin Nyoo. Ta tyicuan

caa sanaa ra cha ña cuñi nyehe yo chi tahan yo.

¹⁷ Ra Cristo quichi ra ta cahan ra tuhun vaha Nyoo chihin yo: chihin nyoho cha cañi ca chinyicu ndo chihin Nyoo ta chihin nyuhu ñu Israel, ñu chitó tuhun Nyoo. Catyi ra chi yo vatyi na ñicoo vaha yo chihin Nyoo.

¹⁸ Vatyi chaha cha catyi cha chihí ra Cristo cha cuenda yo cuví natuhva ñanduvi yo chi Nyoo Sutu yo. Vatyi noo ri Tatyí Ii ra nyaá ñima yo: an cuví ri yo ñu Israel, an cuví ri yo ñu cha ñima ñu Israel cuví.

¹⁹ Yucuan chaha nyoho ña cuví ca ndo ñu inga ñuu. Soco nanduvi ndo ñáyivi ñuu Nyoo ñin ri chihin tandihi ñu yihí cuenda ra. Nanduvi ndo ñáyivi chi ra.

²⁰ Ta cuví tucu ndo tari noo vehe. Ta ra apóstol, ta ra profeta, ra cachahá cuenda tuhun Nyoo cacuví ra tari ra catyihí yuu chaha vehe. Vatyi suri maa ra Cristo cuví yuu cha ñiñi ca cha yihí chaha vehe cuan.

²¹ Ta cha cuenda maa ra Cristo cuahan ndaa vehe cuan ta vehe cuan ícan cuví maa yo ñin ri chihin ra. Ta cuahán sandu ñin ri ra chi tandihi yo ta nanduví yo tari noo vehe ii nu nyaá maa Sutu Mañi yo.

²² Ta tyicuan caa tucu nyoho chihin tandihi ñu yihí cuenda Nyoo, nanduvi ndo tari noo nu iyó Nyoo. Vatyi nyaá Tatyí Ii ra ñima tandihi yo.

3

Nyoo tachi ra tyiño chi ra Pablo vatyi cahan ra tuhun ra chihin ñu cha ñima ñu Israel cuví

¹ Yucuan chaha yuhu ra Pablo ñohí vehe caa ihya vatyi sacoté tuhun ra Cristo Jesús chi nyoho cha ñima ñu Israel cuví ndo.

² Tahán chi natyihí tuñi iñi ndo tyi cahnu xaan tumañi iñi chahá ra chii cha cuenda cha vaha chi ndo, tyi sacoté chi ndo.

³ Vatyi cha yaha catyi suhva chi ndo yoso caa sañahá Nyoo chii noo tuhun xehe.

⁴ Ta cuhva cha sacuaha ndo tuhun cha yaha catyi chi ndo, cuví coto ndo

yoso caa chaha Nyoo tyi cutuñi iñi tuhun ra Cristo cha ña chitó ñáyivi.

⁵ Vatyí nu quichí chi, ña sañaha Nyoo chi ñáyivi, tari sañahá ra chi apóstol ta ra cacuví profeta cha vityin. Vatyí Nyoo chihin Tatyí li ra sañahá ra chi yo cha vityin.

⁶ Ta tuhun xehe cuan, ican cuví ihya: vatyí nyoho cha ña cuví ndo ñu Israel, ñn ri cha cutahan chi chi ndo chihin nyuhu cha cuví ndi ñu Israel. Vatyí noo ri coño ñuhu ra Cristo cuví yo. Ta cuñihi yo cha catyí Nyoo tyi cuhva ra chi yo cha cuenda maa ra Cristo Jesús.

⁷ Saha Nyoo tumañi iñi chi yuhu vatyí chaha ra tunyee iñi ra chii tyi sacoté tuhun vaha ihya chi ñáyivi.

⁸ Soco cha cuenda chi yuhu cuví noo ra luhlu, noo ra ndahvi ca cha nuu tandihí ca ñu yihí cuenda Nyoo. Soco sahá Nyoo tumañi iñi ihya chii. Vatyí tacuhva cahin tuhun ra Cristo chihin ñu cha ñima ñu Israel cuví. Ta sacoté chi ñu ñana cha tyayí cha cuñihi ñu cha cuenda ra Cristo.

⁹ Tyatyíño Nyoo chii tyi sacote chi tandihí ñáyivi yoso caa tyaa ra cuhva nyata ni cumañi ca savaha ra tandihí cha iyó. Ta cha naha ña chaha Nyoo cha coto ñáyivi tuhun ihya.

¹⁰ Tyicuan caa cuví tacuhva vatyí vityin tandihí ra nyacá ñaha andiví cunyehe yoso caa cha vaha cha sacuví Nyoo chihin yo cha cuví yo ñu yihí cuenda ra. Ta cucoto ra tyi chiñi tuñi xaan Nyoo.

¹¹ Tandihí ihya chachí tahan chihin cha tyaa Nyoo cuhva tyi sacuvi ra chihin Sutu Mañi yo Jesucristo cha cuenda cha vaha chi yo.

¹² Ta cha cuenda maa ra Cristo iyó chi ityi chi yo cha chaá yo nuu Nyoo chihin cha ña yuhví yo. Vatyí chinó iñi yo chi ra Cristo.

¹³ Yucuan chaha chacú ndahvi nuu ndo tyi ma ndu uvi iñi ndo chi Nyoo cha nyehi tindoho cha cuenda ndo. Vatyí cuví chi cha cuenda cha vaha chi maa ndo. Ta cusi cuñi ndo cha cuenda ihya.

Chicán tahvi ra Pablo chaha ñu, na cohon nuu ca ñu chi ra Cristo

¹⁴ Yihí iñi yoso cuhva cha vaha cha tyaa Nyoo Sutu yo cuhva tyi cuhva ra chi yo. Ta yucuan chaha chicuñi chiti nuu ra.

¹⁵ Maa ra cuví ra Sutu tandihí ñáyivi cuenda ra: ñu cha cuahan coyo andiví, ta ñu cha iyó ca siqui ñuhu ñayivi. Tandihí yo cuví yo ñáyivi chi ra.

¹⁶ Ta chiquén chi ra na sandunyee ra iñi ndo chihin Tatyí li ra cha nyaá aña ndo. Vatyí maa ra cahnu xaan ca cha tyayí ra chahá ra chi yo.

¹⁷ Ta na coo ra Cristo aña ndo vatyí chinó iñi ndo chi ra. Ta coo ndo chihin cha cuñi Nyoo chi ndo. Vatyí tari yihí vaha yoho noo yutun chichi ñuhú, tyicuan caa cunyaa vaha aña ndo chihin Nyoo.

¹⁸ Tyicuan ta cuacoo tunyee iñi ra chi ndo tacuhva cuví cutuñi vaha iñi ndo chihin tandihí ñu yihí cuenda ra vatyí cuñi xaan ra Cristo chi yo. Nyacua ña ñihí ca yo cuhva catyí yo yoso cuhva cha cuñi ra chi yo.

¹⁹ Vatyí yaha xaan cahnu cuan. Nyacua ma cuví cohon nuu yo yoso cha cuñi ra chi yo. Soco cuñi cha nacoto ndo yoso cha cuñi ra chi yo. Tyicuan ta ñahri ca cumañi chi ndo. Vatyí Nyoo nyaá maa ra chihin ndo.

²⁰ Ta vityin na sacahnu yo chi Nyoo, ra cha iyó xaan ca tunyee iñi chii. Vatyí cuaha vavaha ca cha cuví sacuvi ra cha nuu cuhva cha chicán maa yo chi ra o cha nuu cuhva cha chicá xiñi yo. Vatyí suri chihin tunyee iñi ra cha iyó chi yo, sacuví ra tandihí.

²¹ Yoó ñu chino iñi chi Nyoo, na sacahnu yo chi ra tyicuan ri maa, ta tandihí tyembu cha cuenda cha sacuvi ra Cristo Jesús. Ta na cuví chi tyicuan caa.

4

Cha cuenda Tatyí li Nyoo ñn ri cuví tandihí yo cha yihí yo cuenda ra Cristo

¹ Yucuan chaha yuhu cha ñohí vehe caa cha cuenda Sutu Mañi yo chacú ndahvi nuu ndo na cachi coo ndo tari cuhva tahan chi coo ñu cha nacana

Nyoo chii. Vatyí chi nyoho nacana Nyoo tyi cuví ndo ñáyiví chi ra.

² Ndahvi saha ndo chi ndo. Ta vaha cahán ndo chíhin ñáyiví. Cama cuví iñi ndo. Ta cunyeé ndo ñáá cha sahá noo noo tahan ndo chi ndo chíhin cha cuñí ndo chi ñu.

³ Nducu ndo cuhva cha tyicuan ri cu ñin ri ndo chíhin tahan yo. Vatyí maa Tatyí Ii Nyoo tyinyeé chi yo, na coo vaha yo chíhin tahan yo.

⁴ Vatyí iyó noo ri coño ñuhu ra Cristo. Ta ícan cuan cuví tandíhi yo. Ta tari cha noo ri Tatyí Ii Nyoo iyó, tyicuan caa tucu iyó noo cha chitó cachi yo tyi cunaquehen yo tyi nacaná ra chi yo.

⁵ Ta iyó noo ri Sutu Mañi yo nyacá ñaha chi yo. Ta noo ri chi maa ra chinó iñi tandíhi yo. Ta noo ri cha cuenda maa ra condutyá yo.

⁶ Ta noo ri Nyoo iyó ta maa ra cuví ra Sutu tandíhi yo. Ta maa ra nyacá ñaha chi tandíhi yo. Ta chotyíño ra chi tandíhi yo yoso cuhva cuñí maa ra. Ta nyaá ra añima tandíhi yo.

⁷ Chahá ra Cristo noo cuhva chi noo noo yo, vatyí sacuvi yo tyiño nuu ra yoso cuhva cuñí maa ra cuhva ra.

⁸ Yucuan chaha cahán Nyoo tuhun ra Cristo nu catyí chi:

Cuví chasaha ra chi ra xaan iñi chi ra,
ta nandaá xica ra andívi chíhin
ñu tava ra ndaha ra ña vaha.

Ta chahá ra cuhva yoso cuhva cusaha tyiño ñu tyiño nuu ra, catyí chi.

⁹ ¿Ta ñáá cha cuñí chi catyí cha nandaá xica ra cuan? Cuñí chi catyí vatyí noo xihna ra nya yuvi ca nu ñuhu ñáyiví.

¹⁰ Ra cha noo cuan, nandaá tucu ra nya nu sucun ca andívi. Vatyí tyicuan caa ta cuví sacutu ra tandíhi maa ta cunyaa ra chíhin yo tandíhi ityi.

¹¹ Ta suri maa ra Cristo chahá ra cha vaha chi yo. Chi suhva yo chahá ra tyi cuví yo apóstol ra. Ta chi inga yo chahá ra cha cuhva cuenda yo tuhun cha chahá ra chi yo, o saha yo profetizar cuví cuan. Ta chi inga yo chahá ra tyi sacoto yo chi ñáyiví yoso caa sacacú ra añima yo. Ta chi inga

yo chahá ra cha quiñi ndaha yo chi ñu yihí cuenda ra, ta chi inga yo chahá ra cha cuví sañaha yo tuhun ra chi ñu.

¹² Tyicuan caa chahá Nyoo tyiño chi yo vatyí cunyaa yo tyiño cha sandunyeé yo iñi tahan yo vatyí cuví yo coño ñuhu ra.

¹³ Nyacua nya cu ñin vaha tandíhi yo cha cuenda cha chinó vaha iñi yo chi Sehe Nyoo. Ta cohon nuu vaha yo chi ra. Tyicuan caa ta cutu yo chíhin tandíhi cha vaha cha chahá ra Cristo chi yo.

¹⁴ Yucuan ta ma cuví ca yo tari ra cuatyaa. Vatyí totyehe ri chino iñi ndotyín ñáá noo tuhun cha ñima ri tuhun sandaví ñaha ñu chi ndotyín. Ta coto cutondo xiñi yo tyicuan caa chíhin tuhun cha ña ndicha cha sañahá ñu sandaví ñaha.

¹⁵ Soco cha nuu cha cuví yo tari ra cuatyaa, cuñí chi cha cahán yo cha ndicha chíhin cha cuñí yo chi Nyoo ta chi ñáyiví. Ta ndunyeé ca añima yo chíhin ndí cha vaha cha iyó chi Nyoo. Ta cuahnu yo chíhin ra Cristo, cha cuví ra nuu chi yo.

¹⁶ Ta cha cuenda ra Cristo tandíhi yo cha cuví yo coño ñuhu ra, ñin ri cuví yo. Tari yihí tahan noo coño ñuhu, ta sahá tyiño tahan tahan nu yihí tahan chi, yoso cuhva tyiño cha tahán chi chi, ta tyicuan caa tyinyeé chi chi coño ñuhu, na coo vaha chi ta cuahnu chi, ta tyicuan caa yoó, cuñí yo chi tahan yo ta tyinyeé yo chi ñu.

Ñáyiví chaa cha tahán chi coo yo cha cuenda ra Cristo

¹⁷ Ican ihya cuví cha chahí cuenda chi ndo, catyí Sutu Mañi yo. Ta cuñí chi cha quichaha ndo. Ma coo ca yo tari iyó ñu ña ñohó nuu chi Nyoo. Vatyí maa ri maa cha chiñi tuñi tondo chicá xiñi ñu.

¹⁸ Ta ña cutuñí iñi ñu, tyi ñima ñáyiví Nyoo iyó ñu. Vatyí ña chitó ñu, cha cuenda cha ndava añima ñu.

¹⁹ Ña cahán ca nuu ñu cha sacuví ñu cha ña vaha. Ta nacuhva cuenda ñu chi ñu chi cha quiñi caa. Cuaha xaan cha ña vaha quiñi cuví iñi ñu.

20 Soco ñima tyicuan caa cutuhva yo. Vatyí ñima tyicuan caa cuhva iyó ra Cristo.

21 Tatu ndicha tyi chiñi yo cha cahan ra chihin yo, ta cutuhva yo cha ndicha cha sañaha ra chi yo,

22 ma coo ca yo cuhva chiyo yo quivi cuan. Vatyí chiyo yo ñayivi chahnu quiñi caa. Vatyí cha quichi cuvi iñi yo sandavi ñaha chi chi yo.

23 Nacuhva cuenda yo chi yo chi Nyoo na nasama ra cuhva chicá xiñi yo.

24 Ta nacoo yo noo ñayivi chaa chihin noo aña chaa cha savahá Nyoo. Ta cuvi yo noo ñu vaha cha ndicha ndicha, noo ñu cachi iyó nuu Nyoo tari maa ra.

25 Yucuan chaha ma cahan ca yo cuendu. Cahan yo maa maa ri cha ndicha chihin tahan yo. Vatyí ñu ri ñayivi cuvi yo.

26 Tatu cuxaan yo, saha yo cuenda coto sacuvi yo cha ña vaha. Ta suhva ri cuhva cuxaan yo. Ma cuxaan yo ndiyaca.

27 Ta ma cuhva yo cuhva chi ra ña vaha.

28 Ra cha tuhva suhu quivi cuan, ma suhu ca ra vityin. Soco saha tyiño vaha ra chihin ndaha ra. Tyicuan caa ta coo cha chii ra, tacuhva cuvi tyinyee ra chi ñu cha chiñuhú chii.

29 Ma cahan yo cha quiñi caa. Cahan yo, soco maa ri cha vaha cha tyinyee ta sacuahnu chi ñu chiñi tuhun cahan yo.

30 Ta ma cuhva yo tucuihya iñi chi Tatyí Ii Nyoo. Vatyí chaha Nyoo Tatyí Ii ra chi yo tari noo tuñi ra tyaa ra aña yo nyacua nya quivi ndihi sacacú ra chi yo.

31 Ta ma xaan cuñi yo. Ta ma cuxaan yo. Ta ma quihí tisihi iñi yo. Ma cana chaa yo siqui tahan yo. Ma cahan uhvi yo chi tahan yo. Ta ninoo cha ña vaha ma caca xiñi yo.

32 Soco vaha ñayivi cuvi yo chihin tahan yo. Ta cundahvi cuñi yo nyehe yo chi ñu. Ta saha yo ticahnu iñi chi ñu, tari Nyoo sahá ra ticahnu iñi chi maa yo cha cuenda ra Cristo.

5

Yoso caa tahan chi coo ñayivi yihí cuenda Nyoo

1 Yucuan chaha nanducu yo cuhva coo yo tari cuhva iyó maa Nyoo. Vatyí sehe ra cuví chi yo. Ta cuñi xaan ra chi yo.

2 Vita cuvi iñi yo. Cuñi yo chi tahan yo, tari ra Cristo cuñi ra chi yo. Ta tari noo mbee luhlu cha tuhva tata sutu cachaha ra chi Nyoo ta cha naha, tyicuan caa chaha cuenda ra Cristo chi ra cha cuenda yo. Ta sii xaan cuñi Nyoo cha cuenda cha chaha cuenda ra chi ra.

3 Soco vityin cha cuví yo ñayivi yihí cuenda Nyoo, ña tahan chi sacuvi yo cha quiñi caa chihin coño ñuhu yo. Ni ña tahan chi cha cahan yo cha quiñi caa. Ta ni ma nyiyo iñi yo.

4 Ma cahan yo tuhun cha chaha ticahan nuu. Ni ri ma cahan yo noo tuhun cha ñima ri tuhun. Vatyí ña tahan chi cahan yo cha tyicuan caa. Soco cha nuu cha cahan yo cha ña tahan chi, na nacuhva yo tyahvi nyoo chi Nyoo.

5 Vatyí cha chitó yo vatyí tandihí ñu cha sacuvi cha quiñi caa, ma quihvi ñu nu nyacá ñaha ra Cristo chihin Nyoo. Ra iyó chihin ñusihi ta ñima ñasihi ra cuví, o ñu iyó chihin rayi ta ñima yi ñu cuví, ñu nyiyó iñi, ma quihvi ñu nu nyacá ñaha Nyoo. Vatyí cha nyiyó iñi yo tari cha sacahnú yo xitohyo cuví cuan. Vatyí tavá xiin yo chi Nyoo.

6 Ma cuhva yo cha sandavi ñaha ñayivi chi yo chihin tuhun cha ña ndicha, tuhun cha ñima ri tuhun. Vatyí tachí tuñi Nyoo chi ñu cha ña quichahá chi ra.

7 Ta ni ma cutahan yo chihin ñu cuan.

8 Vatyí chiyo yo nu ñaa iñi quivi cuan. Soco vityin iyó yo nu ndichin chihin Nyoo. Cachi coo yo tari tahan chi coo ñu chitó tuhun Nyoo.

9 Vatyí Nyoo sacundichín ra aña yo tacuhva cuvaha aña yo ta sacuvi yo cha vaha ta cha ndicha.

10 Saniñi yo cutuhva yo cuhva tahán iñi Sutu Mañi yo.

11 Ma sacuvi yo cha nyacuví ñu nyicú nu ñaa iñi. Vatyí ñahri cha vaha ñihí ñu chihin cuan. Soco sacoto yo chi ñáyivi tyi ña vaha cuan.

12 Vatyí cahán nuu yo cha cahán yo tuhun cha nyacuví ñu cuan cha xehe ri.

13 Soco quivi quita cha ñohó xehe nu ndichin, tyicuan ta cucoto yo cha ndicha. Vatyí cha ndichin Nyoo sanatuví tandihí cha ñohó xehe.

14 Yucuan chaha iyó nu catyí chi: Yoho cha quixun, ndicuita mahñu nu nyicú ñu chihí chiña.

Ta ra Cristo cusacata ra ñuhu nu cuahún, catyí chi.

15 Yucuan chaha saha yo cuenda cuhva iyó yo. Ta ma coo yo tari noo ra soho. Coo yo tari noo ra chitó.

16 Ma sacunaa yo quivi yo. Na cahan yo tuhun Nyoo chihin ñáyivi. Vatyí vityin quiñi xaan caa ñáyivi iyó yo, ta ña naha ca iyó yo.

17 Yucuan chaha ma tondo xaan cohon iñi yo. Soco nandichi xiñi yo cuhva cuñi maa Sutu Mañi yo tyi sacuvi yo.

18 Ma coho yo ndixi. Vatyí ican cuan sativí chi yo. Soco cuhva yo na cunyaca ñaha vaha Tatyí Ii Nyoo aña yo.

19 Cahan yo chihin tahan yo soco chihin cha sacahnú yo chi Nyoo. Cata yo salmo cuenda ra. Cata yo yaa cha chahá Tatyí Ii chi yo. Sacahnu yo chi Sutu Mañi yo chihin cha tandihí aña yo.

20 Tyicuan ri nacuhva yo tyahvi nyoo chi Nyoo Sutu yo cha cuenda tandihí maa, vasi sñi cuñi yo, vasi nyehé yo tindoho. Nacuhva yo tyahvi nyoo chi ra chihin sivi Sutu Mañi yo Jesucristo.

Na coo vaha yo chihin tahan yo cuenda ra Cristo, catyí ra Pablo

21 Quichaha yo nu cahán inga tahan yo cuenda ra Cristo. Vatyí sahá yo ñáyivi chi ra Cristo.

22 Nyoho ñu iyó yñi quichaha ndo cha cahán Sutu Mañi yo. Ta tyicuan caa tucu quichaha ndo nu cahán yñi ndo.

23 Vatyí rayñi ican ra cuví nuu chi ñasihí ra, tari cuhva cuví ra Cristo nuu chi ñu yihí cuenda ra. Ta suri maa ra sacacú ra chi yo cha cuví yo coño ñuhu ra.

24 Soco tari tahán chi cha quichahá ñu yihí cuenda ra Cristo chi ra, tyicuan caa cuñi tucu chi cha quichahá ñusihí tandihí cha catyí yñi ñu.

25 Ta rayñi cuñi chi cha cuñi ra chi ñasihí ra, tari cuñi ra Cristo chi yo cha yihí yo cuenda ra. Ta chaha ra ñáyivi ra cha catyí yo.

26 Tacuhva vatyí sandundñi ra aña yo. Ndñi aña yo vatyí nacatyá ra quivi cha nachino iñi yo tuhun cahán ra ta condutyá yo.

27 Ndoq aña yo tari ndoo noo sahna, ña yacua ca chi, ña tyi ca chi. Vatyí ra Cristo sandundñi ra chi yo cha cuví yo ñu yihí cuenda ra. Tacuhva cuví nacuhva cuenda ra chi yo chi Nyoo, soco vaha yo, ñahri ca cuatyí yo.

28 Ta tyicuan caa tucu cuñi chi cha cuñi rayñi chi ñasihí ra, tari cha cuñi ra chi coño ñuhu ra. Vatyí tatu cuñi ra chi ñasihí ra, tari cha cuñi ra chi maa ra cuví cuan.

29 Vatyí yori noo yo cha ña cuñi nyehe yo chi coño ñuhu yo. Soco sacachí yo ta sacuihnó yo chi coño ñuhu yo. Ta ra Cristo suri tyicuan caa sacuví ra chihin ñu yihí cuenda ra.

30 Vatyí coño ñuhu ra cuví yo. Ta noo noo yo cuví yo suhva coño ñuhu ra ta yiqui ra.

31 Catyí tuhun Nyoo: “Rayñi sandoó ra chi sutu ra ta chi sihi ra. Ta ndu iñi ri ra chihin ñasihí ra. Ta noo ri nanduví ñu.”

32 Ta yuhu catyí vatyí ihya cuví noo tuhun xehe cha cahnu xaan. Ta cuñi chi catyí tyi ra Cristo ndu iñi ri ra chihin ñu yihí cuenda ra.

33 Ta sñi ri cuñi tucu chi catyí vatyí tahan tahan ndo cuñi ndo chi ñasihí ndo, tari cuñi ndo chi maa ndo. Ta

nyoho cha cuví ndo ñusihí, saha ndo ñáyiví chi yíi ndo.

6

¹ Nyoho cha cuví ndo sehe, tahán chi cha tyasoho ndo nu cahán sutu ndo ta síhi ndo. Vatyí cuñí ndo chi Nyoo.

²⁻³ Nu tutu Nyoo nyaá cha xihna ri sacuvi yo ta nañihi yo cha cucuhva Nyoo chi yo. Catyí chi: “Saha ndo ñáyiví chi sutu ndo, chi síhi ndo. Tyicuan caa ta síi xaan cuacoo ndo. Ta naha xaan cuacoo ndo ñáyiví ihya”, catyí Nyoo.

⁴ Ta nyoho cha iyó sehe ndo, ma nanducu ndo cha cuxaan sehe ndo. Soco sañaha ndo tuhun Nyoo chi ñu, ta yoso caa quichaha ñu chi ndo ta chi Nyoo.

⁵ Ta nyoho cha cuví ndo musu, quichaha ndo chi chitoho ndo síqui ñuhu ñáyiví ihya. Saha ndo ñáyiví chi ñu. Quichaha ndo chi chitoho ndo chihin cha ñi iñi ndo. Tatu sacuví ndo tyicuan caa, chi ra Cristo quichahá ndo cuví cuan.

⁶ Ma saha tyiño ndo cuhva cha nyehe ri chitoho ndo tacuhva vatyí catyí ñu tyi vaha ndo. Soco saha tyiño vaha ndo tari cha vatyí sacuví ndo tyiño nuu ra Cristo. Ta tyicuan caa sacuví ndo cuhva cuñí Nyoo chihin cha ñi añima ndo.

⁷ Chihin cha iyó vaha iñi ndo sacuvi ndo. Tari cha sahá tyiño ndo nuu Sutu Mañi yo ta ñima nuu ñáyiví.

⁸ Vatyí cha chitó yo tyi tahan tahan yo, an cuví ri yo musu, an ñima, soco cutiyahvi Sutu Mañi yo chi yo yoso cuhva cha vaha cha chinyacuví yo.

⁹ Ta nyoho cha iyó musu ndo, suri vaha coo ndo chihin musu ndo. Ta ma sayuhvi ndo chi ñu. Vatyí chitó ndo tyi ña cahnu ca maa ndo cha nuu musu ndo. Inuu ri cuví ndo nuu Nyoo ra cuví chitoho yo nya andiví. Vatyí maa ra ña cachi ra chi yo.

Tunyee iñi cha chahá Nyoo chi yo cha yihí yo cuenda ra

¹⁰ Ta vityin sandunyee yo iñi yo chihin cha ñin ri cuví yo chihin Sutu

Mañi yo. Vatyí iyó xaan tunyee iñi chi ra.

¹¹ Ta tari noo sindaro sahá cuenda ra chi ra, tyicuan caa tucu yoó, ñasaha cuenda vaha yo chi yo chihin tandihí cha cuví tyinyee Nyoo chi yo. Tyicuan caa ta cuví chasaha yo chi cuihna. Vatyí nducú xaan ra cuhva sandavi ñaha ra chi yo.

¹² Tyicuan caa coo yo chihin tunyee iñi Nyoo. Vatyí ñima chihin ñáyiví cañí tahan yo. Soco cañí tahan yo chihin tatyí ña vaha cha ña nyehé yo. Vatyí ican cuan cuví cha nyacá ñaha chi ñáyiví cha nyacuví cha quiñi caa.

¹³ Yucuan chaha saha cuenda vaha yo chi yo chihin tandihí cha cuví tyinyee Nyoo chi yo, tacuhva cuví chasaha yo chi ra ña vaha ñáá quiví nducu tin ra chi yo. Coto cana cava yo saha ra.

¹⁴ Tari noo sindaro ñihi nanyaá ra chihin noo sincho yihí chichi ra, tyicuan caa ñihi cuñanyaa yo chihin tuhun cha ndicha vaha. Tari cacú noo sindaro vatyí tyaá ra noo caa pecho ra, tyicuan caa Nyoo cusacacu ra chi yo ndaha ra ña vaha, tatu maa ri cha vaha sacuvi yo.

¹⁵ Ta tari natyihí sindaro bota chaha ra ta nyatú tuhva ra cha cahun ra cuatyí, tyicuan caa cuatu tuhva yo chihin tuhun Nyoo. Na sacoto yo chi ñáyiví yoso caa nicoo vaha ñu chihin ra.

¹⁶ Ta tari sindaro chasí ra chi ra chihin noo caa tacuhva ma nañi nduva chi ra, tyicuan caa cuñí chi nachino vaha iñi yo chi Nyoo tacuhva cha cuví chasaha yo tandihí cha sacuvi ra ña vaha chi yo.

¹⁷ Ta tari sahá cuenda sindaro xiñi ra chihin noo caa, tyicuan caa nacuhva cuenda yo chi yo chi Nyoo, na sacacu ra chi yo. Ta naquehen yo tuhun cha chahá ra chi yo. Vatyí tari noo mityí Tatyí li ra cuví tuhun cuan. Vatyí chihin tuhun ra sahá ganaa yo chi cuihna.

¹⁸ Ta nyita ri cahan yo chihin Nyoo. Ta Tatyí li ra cuatyinyee chi yo tacuhva cacan tahvi yo chi ra. Ta cuacu ndahvi yo nuu ra. Ta tyicuan

caa cuatu tuhva ri yo. Ta ma ndu uvi iñi yo. Tyicuan ri caçan tahvi yo cha cuenda tandihî ñu yihî cuenda Nyoo.

¹⁹ Ta naçatu tucu ndo chahi, tacuhva vatyî ñihî que tuhun cahin. Ta ma yuhvi sacote tuhun ra Cristo chi ñáyivî. Vatyî ta cha naha ña chito ñáyivî tuhun ra.

²⁰ Ta cha cuenda cha sacoté tuhun ra Cristo ñohî vehe caa ihya vityin. Soco Nyoo tachi chii vatyî cahin tuhun ra chihin ra nyicú vehe caa ihya. Caçan tahvi ndo cha cuende, tacuhva cuvi cahin chihin cha ña yuhví, tari cuhva tahán chi cahin.

Tachí ra Pablo chi ra Tíquico tyi cuhun ra nu nyicu ñu

²¹ Ta ra Tíquico yañi yo, cunacatyî ra tandihî tuhî chi ndo. Maa ra ñii iñi ra sahá tyiño ra cuenda Sutu Mañi yo. Ta cuñi xaan yo chi ra.

²² Tachí chi ra nu nyicú ndo tacuhva sacoto ra chi ndo yoso caa iyó ndi ihya, tacuhva ndunî ca iñi ndo chino iñi ndo chi Nyoo.

²³ Ta Nyoo Sutu yo ta Sutu Mañi yo Jesucristo nacuhva ra cha taxi ri coo añaïma tandihî ra yañi yo. Ta na cuhva Nyoo cha chinó vaha iñi ra chi ra. Ta vityin suri Nyoo naçuhva ra cha cuñí ca ra chi ra ta chi ñáyivî.

²⁴ Ta na nasoco ra chi tandihî yo cha nyita ri cuñí yo chi Sutu Mañi yo Jesucristo chihin cha ñii iñi yo. Ta naçuvi chi tyicuan caa.

Carta Cha Sacuhun Ra Apóstol Pablo Chi Ñáyivi Ñuu Filipos Cha Yihí Cuenda Nyoo

Ñohó ra Pablo vehe caa, ta tyaá ra noo carta chi ñu yihí cuenda Nyoo ñuu Filipos

¹ Yuhu ra Pablo ta ra Timoteo sacuví ndi tyiño nuu ra Jesucristo. Ta tyaá ndi carta ihya chi tandihí ndo cha cuví ndo ñu ñuu Filipos cha yihí cuenda Nyoo. Ta chi ra cayihí ndaha vehe ñuhu, ta chi ra canyehe tyiño vehe ñuhu, ta chi tandihí ndo.

² Na nasoco Nyoo Sutu yo ta Sutu Mañi yo Jesucristo chi ndo. Ta nacuhva ra cha taxi ri coo aña ndo.

Nu chicán tahvi ra Pablo chaha ñu yihí cuenda Nyoo ñuu Filipos

³ Tahan ri cha nichón iñi chi ndo, nacuhvá xain tyahvi nyoo chi Nyoo cha cuenda ndo.

⁴ Ta chicán tahvi chi Nyoo cha cuenda ndo chihin cha sñi cuñi añaime.

⁵ Vatyí nyata quívi xihna ri cha chiñi ndo tuhun ra Cristo ta nya vi-tyin ta ña sandihí ndo tuhun cha tyinyeé ndo chii. Vatyí ñin ri tuhun ra Jesucristo sacotó yo chi ñáyivi.

⁶ Quívi naquehen cuenda Nyoo aña ndo, maa ra chaha tunyee iñi chi ndo, na sacuvi ndo tyiño nuu ra. Ta chité tyi tyicuan ri cuacuhva ra chi ndo nyacua nya quívi quichi ra Cristo inga chaha.

⁷ Tahán chi cha caca xiñi tyehe caa cha cuenda ndo, vatyí cuñi xain chi ndo. Vatyí ñin ri nasocó Nyoo chi yo. Vasi ñohí vehe caa, o vasi nanyaí nuu ra cuví tyiño, soco sacoté tuhun Nyoo chi ra canyicú vehe caa ihya, ta chi ra cuví tyiño, na cacoto ra tyi ndicha tuhun ra Cristo.

⁸ Nyoo chitó ra vatyí cuñi xain chi tandihí nyoho tari cuñi ra Jesucristo chi ndo.

⁹ Ta chicán tahvi xain chi Nyoo na cuvita ca iñi ndo, ta cuñi ca ndo chi ñáyivi. Ta suri coo ca cha chiñi tuñi Nyoo chi ndo,

¹⁰ tacuhva vatyí tyicuan ri coto ndo nacachi ndo cha vaha ca. Ta tyicuan caa ta cachi coo ndo ta ma coo ca cuatyí ndo quívi quichi ra Cristo.

¹¹ Maa ra cutyinyee ra chi ndo. Ta tyicuan ri cusacuvi ndo maa maa ri cha vaha, ta cha ndaa. Tyicuan caa ta cusacahnu ñáyivi chi Nyoo tyi cahnu xaan ca cuví maa ra ta sacuví ra tyicuan caa chihin ndo.

Maa maa ri tyiño Nyoo sacuví ra Pablo vatyí ñohó ra Cristo añaime ra

¹² Ta cuñi tyi coto ndo yañi vatyí tandihí cha cuví chii tyinyeé xaan chi chii nu cahín tuhun Nyoo chihin ñáyivi.

¹³ Vatyí chitó tandihí sindaro vehe rey ta tandihí inga ñáyivi ihya vatyí ñohí vehe caa cha cuenda cha nyiquén chi ra Cristo.

¹⁴ Ta cuaha xaan ra yañi yo cuenda Sutu Mañi yo cuní ca iñi ra cha cuenda cha ñohí vehe caa. Ta naá cha yuhvi ra vatyí cachitó ra vatyí tyinyeé Nyoo chi yo. Ta ñihi ca cacahán ra tuhun Nyoo chihin ñáyivi.

¹⁵ Ta ndicha vatyí yihí ra, cahán ra tuhun ra Cristo soco cha cuenda cha tasi cuñi ra nyehé ra chii, o cuñi ra na cunyicon ñáyivi chi ra. Soco yihí ra cahán ra tuhun ra Cristo chihin ñáyivi, soco chihin cha vaha chicá xiñi ra.

¹⁶ Yihí ra cacahán ra tuhun ra Cristo cha cuenda cha cuñi ra chi ra. Vatyí chitó ra vatyí maa Sutu Mañi yo quichi nyaca ra chii ihya. Vatyí cotyíño ra chii, ta sacoté chi ñáyivi tyi ndicha cha sacacú ra añaime yo.

¹⁷ Soco inga ra cuan ñima cha ñi iñi ra cahán ra tuhun ra Cristo, soco cuñi ra cuhva ra tisihi chii nu ñohí vehe caa ihya.

¹⁸ Soco cha cuenda chi yuhu ñahri saha, vasi sacuví ra chihin cha vaha chicá xiñi ra o chihin cha ña vaha. Soco tuhun ra Cristo ican casacotó ra. Ta sñi xaan cuñi cha cuenda cuan.

19 Ta cusii ca iñi vatyí chité vatyí chichi cha tandihí cha cuví chii, Nyoo cuasacacu ra chii. Tyahvi nyoo chi Nyoo vatyí chicán tahvi xaan nyoho cha cuende nuu Nyoo. Ta tyinyeé xaan Tatyí li ra Cristo chii.

20 Chitó vahi vatyí Nyoo cutyinyee ra chii cha ma cucahan nui, ta ma yuhvi cahín chihin cha ní iñi tuhun ra Cristo. Ñahri cuende, an coo que ñáyiví, an cúvi, soco cuñí vatyí vityín ta ityi nuu ca saha ñáyiví cuenda cuhva iyé ta coto ñu tyi ra Cristo cahnu ca cuví ra.

21 Vatyí cha cuenda yuhu tatu iyé, sacuvi tyiño nuu ra Cristo ihya síqui ñuhu ñáyiví. Soco tatu cúvi, cuñihi cha tyaqui cha iyó andiví.

22 Soco tatu iyó que, vaha xaan. Vatyí sahá tyiño que cha cuenda cha vaha maa Sutu Mañi yo. Yucuan chaha ña chité nya ityi cuhin, an cuhin ityi andiví, an cuhin cucahan que tuhun Nyoo chihin ñáyiví, ña chité.

23 Yii xaan cote nya cha cuñí, vatyí iyó quiví cuñí cha coo que. Soco iyó quiví ña cuñí. Vatyí cha cuñí cunuhi cucunyai chihin ra Cristo. Vatyí vaha ca cuan.

24 Soco cha cuenda cha vaha chi nyoho, vaha ca cha ndoí chihin ndo.

25 Yucuan chaha chité vatyí cundoí suhva ca ñáyiví ihya. Vatyí cuñí chi cha tyinyeé que chi ndo tacuhva cuvi cahun ca ndo ityi nuu ca ta cu sii cuñí ndo chihin cha chinó iñi ndo chi Nyoo.

26 Ta quiví cunyehi nu nyicu ndo, tyicuan caa ta cuví cusii ca iñi yo cha ñn ri cuví yo chihin ra Cristo.

27 Cuñí chi cha coo yo yoso cuhva tahán chi coo noo ñu yihí cuenda Nyoo. Vasí nyaí chihin ndo, o cañi nyaí, soco cuñí cote tuhun ndo vatyí nyoho vaha cuahan ndo chihin Nyoo. Ta ñn ri sahá tyiño ndo tacuhva nachino iñi ñáyiví tuhun ra Cristo.

28 Ta ma yuhvi ndo ñáá cha sacuvi ñu xaan iñi chi ndo cuenda tuhun Nyoo. Vatyí cha tyicuan caa, cachi xaan sañahá chi chi yo vatyí cunaa

ñu. Ta sañahá tucu chi chi yo vatyí cha cacú añima yo sahá maa Nyoo.

29 Vatyí tari chahá ra Cristo ityi chi yo cha chinó iñi yo chi ra, tyicuan caa tucu chahá ra cha nyehé yo tindocho cha cuenda ra.

30 ñn ri cuhva nyehé yo tindocho ta sacotó yo tuhun ra Cristo, ta cha chitó ndo yoso caa nyehí tindocho, ta vityin suri chitó ndo vatyí ña sañé cha sahá tyiño tuhun Nyoo.

2

Tyayii xaan ra Cristo, soco quichi cúvi ra tari noo ra ndahvi

1 Ndicha vatyí ra Cristo saní xaan ra iñi yo cha ñn ri cuví yo chihin ra. Ta vaha cuñí yo cha cuenda cha cuñí ra chi yo. Ta ndicha tucu vatyí nyaá Tatyí li Nyoo chihin yo. Ta ndicha tucu cha ndahvi cuñí yo nyehé yo chi tahan yo.

2 Tatu ndicha tandihí ihya, cuhva ndo cha cusii cuñí chihin cha ñn ri cuví ndo. Ta cuñi ndo chi tahan ndo tari cuñí ra Cristo chi ndo. Ta ñn ri cuhva caca xiñi ndo. Ta ñn ri cuhva sacuvi ndo.

3 Ma sacuvi ndo cha vaha chi maa ri maa ndo, soco sacuvi ndo cha vaha chi ñáyiví ñandihí. Ta ma cahnu saha ndo chi ndo. Ndahvi saha yo chi yo. Ta tahan tahan yo saha yo tuhun vatyí vaha ca inga ñáyiví ta ñima ca maa yo.

4 Ta tahan tahan yo caca xiñi yo cha cuenda cha vaha chi inga ñáyiví, ta ñima cha vaha chi maa ri maa yo.

5 Caca xiñi ndo tari chicá xiñi ra Jesucristo.

6 Vasí cuví ra Nyoo, soco ña cahnu saha ra chi ra ta ña quichi cuvi iñi ra cha sacahnú ñáyiví chi ra, tari sacahnú ña chi Nyoo Sutu ra.

7 Soco sandoo ra tandihí tunyee iñi ra ta tandihí cha tyayii ra ñn chiyo xiin.

Ta quichi nanduví ra noo ñáyiví ndahvi quiví cacú ra síqui ñuhu ñáyiví.

8 Ta ndahvi saha ra chi ra, vatyí nanduví ra noo rayii ri.

Ta chihin cha iyó vaha iñi ra ta quichaha vaha ra chi Nyoo nyacua chaha ra cha cahñi ñáyivi chi ra.

Tari noo ra quiñi iyó saha ñu chi ra, vatyi nu cruzi chihí ra.

⁹ Yucuan chaha Nyoo sacahnú xaan ra chi ra.

Ta chahá Nyoo noo sivi chi ra, noo sivi cha cahnu xaan ca cuví nuu tandihí maa sivi.

¹⁰ Vatyí tacuhva tatu cuiñi yo sivi ra Jesucristo, tandihí yo ta cuiñi chiti yo. tandihí cha iyó andivi.

Ta tandihí cha iyó siqui ñuhu ñayivi, ta chichi ñuhú, cucuiñi chiti ta sacahnu chi ra.

¹¹ Vatyí tandihí cha iyó ta nacoto nuu vatyí ra Jesucristo cuví ra nyacá ñaha chi tandihí maa cha iyó.

Tyicuan caa cunyehe chi tyi cahnu xaan ca cuví maa Nyoo Sutu yo.

Ñu yihí cuenda Nyoo cuví ñu tari noo cha ndichin siqui ñuhu ñayivi ihya

¹² Yañi, cuñi xain chi ndo. Ta tari cha quichaha ndo chii quiñi chinyai chihin ndo, quichaha tucu ndo chii vityin cha cañi nyaí. Nducu xaan ndo cuhva na nyehe ñáyivi tyi ndicha cha sacacú Nyoo chi ndo. Ta saha ndo cuenda cuhva coo ndo chihin ra.

¹³ Vatyí maa Nyoo sacacu cha vaha aña ndo. Ta tyinyeé ra chi ndo tacuhva vatyí quichi cuvi iñi ndo quichaha ndo nu cahán ra, ta sacuvi ndo cuhva cuñi ra.

¹⁴ Tatu cuasacuvi ndo ñáá cha cuasacuvi ndo, nducu ndo cuhva cha ma coo tisihi, ta ma cañi tahan ndo.

¹⁵ Tyicuan ta ma coo ni noo cuatyí ndo. Cuvi ndo noo ñáyivi cachi iyó, cuvi ndo ñáyivi ñahri cuatyí, tari tahán chi coo ñáyivi cuenda Nyoo mahñu ñáyivi quiñi iyó ihya. Cuñi chi cha cuví ndo tari noo ñuhu cha sandichín nu ñaa iñi siqui ñuhu ñayivi ihya.

¹⁶ Cahán yo tuhun Nyoo chihin ñáyivi vatyí ican cuan chahá ñayivi chaa cha iyó yo. Sacuvi ndo tyicuan caa, tyicuan ta quiñi cuquichi

ra Cristo, yuhu vaha coo iñi cha cuenda nyoho, vatyí ña sacoto cahi tuhun Nyoo chi ndo.

¹⁷ Ta vasi cahñi ñáyivi chi yuhu, cha catyi tuhun Nyoo, soco siñ xaan cuñi ta cuñi cusñi cuñi ndo chihin vatyí tyicuan caa sacañá tahin cha cucuhva cuenda yo chi Nyoo, cha cuenda cha chinó iñi ndo chi ra.

¹⁸ Ta tahán chi cha cusñi iñi tucu nyoho chihin yuhu ñandihí.

Nu tachí ra Pablo chi ra Timoteo ta ra Epafrodito nu nyicu ñu yihí cuenda Nyoo ñuu Filipos cuan

¹⁹ Tatu Sutu Mañi yo ta cuñi ra cutachi chi ra Timoteo quichi nyehe ra nu nyicú ndo. Ta quiñi ndichí ra nu nyaí cucusñi xaan cuñi. Vatyí cunacatyí ra chii yoso caa nyicú ndo.

²⁰ Vatyí noo tuhun ri maa ra chicá xiñi ra cha cuenda cha vaha chi maa ndo tari chicá xiñi yuhu. Ta yori yóo ca ra chicá xiñi tyicuan caa.

²¹ Vatyí tandihí ca ra, maa maa ri cha cuenda chi maa ra nanducú ra. Ta ña nanducú ra yoso caa cuhva cuñi ra Jesucristo.

²² Chitó ndo vatyí ra Timoteo, vaha cuahan ra chihin Nyoo, ta cha cuenda chi yuhu cuví ra tari noo sehi. Ta tyinyeé xaan ra chii cha cahán ndi tuhun ra Cristo chihin ñáyivi.

²³ Ta nyaá sacuhin chi ra nu nyicú ndo. Soco nya coto xihne ñáá catyi ra cuví tyiño, tatu ña naha ca ñohí.

²⁴ Vatyí chitó vahi tyi Sutu Mañi yo numi ri cuhva ra cha cuhin cunyehe nu nyicú ndo.

²⁵ Ta vaha cha cunuhu ra Epafrodito yañi yo nu nyicu ndo. Tachí ndo chi ra vatyí quichi tyinyee ra chii nu tyiño sahi. Ta tñn tahan xaan ndi chihin ra ña vaha cha cuví ndi sindaro ra Cristo.

²⁶ Ta cuñi xaan ra Epafrodito cunuhu ra nu nyicú ndo, vatyí chicá xaan xiñi ra cha chitó ndo tyi cuhvi ra.

²⁷ Vatyí ndicha cuhvi xaan ra ta cha yatyin maa cha cuví ra. Soco Nyoo cundahvi cuñi ra nyehe chi ra, ta chi yuhu ñandihí. Ta ña chaha ra cha cuví

ra. Ña cuñí ra cha coo ca tucuihya iñi chii.

²⁸ Yucuan chaha yuhu cuñí xain cha ndichi ra nu nyicú ndo. Vatyí chité tyi nyoho cundusi xaan cuñí ndo cha nanyehé ndo chi ra. Tyicuan ta ma caca ca xiñi tuhun ndo. Vatyí cha nanyehé ndo chi ra tyi iyó vaha ra.

²⁹ Yucuan chaha vaha naquehen ndo chi ra chihin cha siñi cuñí ndo, vatyí yañi yo cha cuenda maa Sutu Mañi yo cuví chi ra. Ta tyicuan ri saha ndo ñayivi chi yañi yo cha iyó tari caa cuhva iyó ra.

³⁰ Vatyí cha yatyin maa cha cúvi ra cha cuenda cha sacuví ra tyiño ra Cristo. Soco ña yuhví ra vasi cúvi ra cha cuenda cha tyinyeé ra chii. Vatyí maa ndo ña cuví quichi tyinyee ndo chii vatyí cañi xaan nyicu ndo.

3

Nu sañahá ra Pablo yoso caa ndu ndi yo nuu Nyoo

¹ Ta vityin yañi, cusñi iñi ndo chihin Sutu Mañi yo. Cha cuenda chi yuhu ñahri sahá cha cha yaha tyai tuhun ihya chi ndo, cutyaa tiqui inga chaha. Vatyí cha vaha chi maa ndo cuví.

² Saha ndo cuenda chi ndo chihin ra cha quiñi iyó chiña. Nyacuví ra cuhva cuñí ra ña vaha. Vatyí catyí ra tyi cuñí chi sacuvi yo costumbre circuncisión ta cacu yo.

³ Soco yoó noo circuncisión cha ndicha savaha Nyoo chi yo. Vatyí maa yo sacahnú yo chi ra chihin Tatyí Ii ra cha ñohó aña yo. Ta cusñi cuñí yo vatyí cuenda maa ra Cristo Jesús yihí yo. Ta ña itá iñi yo tyi cacu yo chihin cha sacuví yo costumbre.

⁴ Tyehe ta cuví cacu yo chihin cha sacuví yo, yuhu vihi ca caquí cha nuu tandihí ñu sacuví tyicuan caa.

⁵ Vatyí uña quivi ta saha ñu circuncidar chii. Vatyí tata ra Israel vachi. Ta tata ra Benjamín sehe ra Israel cuví. Ta tata ñu cahán sahan hebreo cuví. Yucuan chaha yuhu hebreo cuví. Ta siñi ri quichaha xain ley chahnu quivi cuan, vatyí fariseo cuví.

⁶ Ta cha cuenda cha cuñi quichahí ley, ta chican nyicon xain chi ñu yihí cuenda ra Cristo. Ta ña cuñi nyehi chi ñu. Ta quichahí tandihí maa ley chahnu, vatyí nducu xain cuhva quichahí nu cahán ley cuan.

⁷ Soco tandihí cha cuñi mai vatyí vale xaan quivi cuan, vityin ña vale ca cuan. Vatyí maa ra Cristo cuví ra itá iñi.

⁸ Ta siñi ri tandihí cha sacuvi, chitó mai vatyí ña vale cha cuenda cha chicohón nui chi ra Cristo Jesús, Sutu Mañi yuhu. Vatyí yucuan cuví cha tyayñi xaan ca. Ta cha cuenda ra Cristo tandihí cha sacuvi ta ityi chata ca cuví chi noo cha ñima ri tuhun vityin. Yucuan chaha sandoñi in chiyo xiin tandihí cuan. Vatyí cuñi cohon nuu que chi ra Cristo.

⁹ Ta cha cuñi yuhu nacu in ri que chihin ra. Vaha iyé cha cuenda tyi chinó iñi tyi sacacú ra chi yo. Ñima cha cuenda cha quichahí ley Nyoo ta vaha iyé, soco cha cuenda vatyí chinó iñi tuhun cahán ra, vatyí sacacú ra chi yo. Ta cha cuenda cha chinó ri iñi yo, ra Cristo naquehén cuenda ra chi yo.

¹⁰ Cha cohon nuu que chi ra Cristo yucuan cuví cha cuñi. Nyoo sanandoto ra chi ra Cristo chihin tunyee iñi ra. Ta cuñi tyi coo ca tunyee iñi cuan chii. Ta cuñi cunyeí tindoho cha tahán chi nyehí. Ta cuñi cha cúvi tandihí cha ña vaha cha cuñi coño ñuhi, tari chihí ra Cristo cha catyí cuatyí yo.

¹¹ Vatyí nanducú xain cuhva cha cunandote noo ñayivi chaa chihin Nyoo nya andivi.

Cuhun cayo ityi nuu ca chihin Nyoo

¹² Ñima tyi catyí chi ndo tyi ñahri ca cha cumañi chii, ta vaha xain. Soco cuahin ityi nuu ca. Vatyí cuñi naquehin cha chahá ra Cristo chii. Vatyí xihna ca maa ra naxita ra chii ityi ra.

¹³ Yañi, ña catyí chi ndo tyi cha ñihí tandihí cha vaha cuan. Soco sanaí iñi cha quichi ityi chata. Ta sañihí cuhin ityi nuu ca.

14 Tacuhva tyi chaí nu nyaá cha tahán chi chii. Vatyí caná Nyoo chi yo nya andiví. Vatyí cunaquehen yo cha catyí ra chi yo vatyí cuhva ra cha cuenda cha ñn ri cuví yo chihin ra Cristo Jesús.

15 Tyehe caa tahán chi caca xiñi tandihí yo cha ñihí nyaá yo chihin Nyoo. Soco tatu ñima tyehe caa chicá xiñi nya noo nyoho, Nyoo cucuhva ra cha cutuñí iñi ndo.

16 Soco noo ri tyi cuñí chi cha quichahá vaha yo tuhun cha cha yaha sacoto Nyoo chi yo.

17 Yañi, quehen ndo cuhva iyé ta cuhva cahín. Ta saha ndo cuenda chi ñu iyó tari cuhva sañahá ndi chi ndo.

18 Vatyí ticuítí chaha catyí chi ndo, saha ndo cuenda chi ra cuendu. Ta vityin catyí tiqui chi ndo inga chaha chihin cha chaquí cha cuihya iñi, vatyí cuaha xaan ra xaan iñi chi ra Cristo. Vatyí catyí ra tyi noo cha ña ñiñi xaan cuví cha chihí ra Cristo nu cruzi.

19 Soco quiví quichi tucu ra Cristo, cahun coyo ra cuan anyaya. Vatyí sacuví ra cuhva cuñí coño ñuhu ra. Ta cahnu sahá ra chi ra chihin cha tahán chi coo ticahan nuu nuu ra. Ta itá iñi ra maa maa ri cha iyó ihya ñayiví ri.

20 Soco yoó nya andiví nyaá ñuu yo. Ta suri ityí cuan nyatú yo chi Sutú Mañi yo Jesucristo, ra sacacú chi yo.

21 Ta cuquehen ra coño ñuhu pehe yo. Ta cusananduvi ra chi yo tari coño ñuhu maa ra. Ta chihin tunyee iñi cha iyó chi ra cha nyacá ñaha ra tandihí, cusacuvi ra tyicuan caa.

4

Tyicuan ri na cusí cuñi yo chihin Sutú Mañi yo

1 Yañi, cuñí chi ndo. Ta cuñí xain nyehi chi ndo. Ta sñi xaan cuñí chihin ndo. Ta chité tyi ña cahán cahi tuhun Nyoo chihin ndo. Vatyí ñí xaan iñi ndo nyicón ndo chi ra. Na cuinyaña ca ndo chi Nyoo chihin cha ñí iñi ndo.

2 Ta vityin chiquén chi cu Evodia, ta chi cu Síntique, nanduvaha coo ñu

chihin tahan ñu. Ta na coo ñu tari cha cuhu ñu cuenda Sutú Mañi yo.

3 Yoho, yañi, ñi iñun sahá tyiñon chihin, ta chiquén chuun na tyinyeun chi ñu tahan yo ihya. Vatyí tyinyee xaan ñu chii chihin cha sacoto ñu tuhun Nyoo cha cacu añaima yo chihin ra Clemente ta suhva ca ñu ñandihí. Ta nyaá sivi ñu nuu tutu Nyoo nya andiví.

4 Ta tyicuan ri maa cusí iñi ndo chihin Sutú Mañi yo. Ta catyí tiqui chi ndo inga chaha, na cusí iñi ndo chihin ra.

5 Ta tandihí ñayiví na nyehe ñu chi nyoho vatyí ndicha noo ñayiví vaha cuví ndo. Ta ñicohon iñi ndo vatyí cha nyaña yatyin quiví quichi Sutú Mañi yo.

6 Ta ma ndahvi xaan cuñi ndo ñáá ndihí cha cuví chi ndo. Nyita ri ñacatyí ndo chi Nyoo ñáá ndihí cha cuví chi ndo. Ta çacan tahvi ndo chi ra ñáá ndihí cha chiñuhú chi ndo. Ta yaha cuan ta nacuhva ndo tyahvi nyoo chi ra.

7 Ta cha sacuví ndo tyehe caa, Nyoo cuhva ra cha taxi ri coo añaima ndo. Ta cahnu xaan ca cha vaha cuví cuan. Ta ni noo ñayiví ta ña cuví cutuñi iñi ñu yoso cuhva cha cahnu cuan. Ta cha taxi maa Nyoo cusaha cumi añaima ndo ta cha chiñi tuñi xiñi ndo. Vatyí ñn ri cuví ndo chihin ra Cristo Jesús.

Na caca xiñi yo maa maa ri cha vaha

8 Yañi, nu ndihí tuhun çaca xiñi ndo maa ri cha ndicha vaha, cha cachi iyó, cha ndoo iyó, cha ndi, cha ñahri cha quiñi caa, cha tyaquí, cha vaha. Çaca xiñi ndo maa maa ri maa cha vaha tacuhva cuví sacahnu yo chi Nyoo.

9 Sacuvi ndo cha sañahí chi ndo. Tuhun cha chiñi ndo cahín, cha nyehe ndo chinyacuví, sacuví ndo. Ta Nyoo ra chahá cha taxi coo añaima yo, cucunyaa ra chihin ndo.

Tyinyee ñu Filipos chi ra Pablo chihin cha iyó chi ñu

10 Sñi xaan cuñí. Ta sacahni chi Sutú Mañi yo cha cuenda cha tyinyee ndo chii inga chaha. Ta chité vatyí

tyicuan ri cuñí ndo tyinyeé ndo chii. Soco ña chaha chi cuhva chi ndo.

¹¹ Ñima tyi catyí chi ndo tyehe caa ta cuñí ndo tyi iyó cha chiñuhú chii, vatyí yuhu cha cutuhve cha cusí cuñí chihin ñáá ri cha iyó chi.

¹² Vatyí yuhu chité yoso caa coo ndahvi ta chité yoso caa coo tyayí. Vatyí cha cutuhve coi chihin cha iyó o chihin cha ñahri cha cachi, o tatu nyacua ndoo ca, o tatu ñahri tucu, ndoi vaha.

¹³ Tandihí ta cuví chasahí vatyí maa ra Cristo cuví ra tyineé chii.

¹⁴ Soco nyoho yañi vaha xaan cha tyinyeé ndo chii chihin tindocho cha nyehé xain.

¹⁵ Cha chitó nyoho ñu Filipos yoso caa cuví quívi quichaha cahin tuhun Nyoo chihin ndo. Ta quite Macedonia chiña tyi cuasacote tuhun Nyoo inga ñuu. Ta noo tuhun ri nyoho tyinyeé ndo chii chihin xuhun, vatyí vaha xaan cuñí ndo cha cahin tuhun Nyoo chihin ndo.

¹⁶ Ta sijn ri cha ni ri ca cha chinyai Tesalónica, cuaha ri chaha tyinyeé ndo chii.

¹⁷ Ñima cha chicá xiñi cha cuenda cha cuhva ca ndo chii, soco cha cuñí vatyí nyoho coo ca cha vaha chi ndo nuu Nyoo.

¹⁸ Ta vityin cuhva, ñahri cha cumañi chii. Nyacua ndoo ca cha sacuhun ndo chii chihin ra Epafrodito. Ta cha chaha ndo cuan cuacuví chi tari noo xico vixi, xico vaha cha chaá nuu Nyoo. Yucuan cuví cha tahán iñi ra.

¹⁹ Ta Nyoo cuhva ra tandihí cha chiñuhú chi ndo. Cha cuenda ra Cristo cucuhva ra tandihí cha vaha cha tyayí cha cumí ra nya andívi.

²⁰ Chi Nyoo Sutu yo na sacahnu yo tyicuan ri maa. Ta na cuví chi tyicuan caa.

Sacuhún ra Pablo nocumi chi ñu Filipos

²¹ Chahí nocumi chi tandihí ndo cha yihí ndo cuenda ra Cristo chiña. Ta vachi tucu nocumi chi ndo sahá yañi yo cuenda Nyoo cha nyicú chihin ihya.

²² Ta ñáyivi cha nyicú vehe ra nyacá ñaha ñuu Roma ihya, ta tandihí ca ñu yihí cuenda Nyoo ñuu ihya chahá ñu nocumi chi ndo.

²³ Ta na nasoco maa Sutu Mañi yo Jesucristo chi tandihí ndo. Ta na cuví chi tyicuan caa.

Carta Cha Sacuhun Ra Apóstol Pablo Chi Ñáyivi Ñuu Colosas Cha Yihí Cuenda Nyoo

Nu sacuhún ra Pablo noo tutu chi ñáyivi ñuu Colosas cha yihí cuenda Nyoo

¹⁻² Yuhu ra Pablo cuví noo apóstol ra Jesucristo. Vatyí tyicuan caa cuhva cuñí maa Nyoo. Yuhu chihin ra Timoteo yañi yo, tyaá ndi noo carta ihya chi ndo ñu ñuu Colosas cha yihí vaha cuenda Nyoo ta cuenda ra Cristo. Nyoo Sutu yo nasoco ra chi ndo ta nacuhva ra cha taxi ri coo añima ndo.

Nu chicán tahvi ra Pablo chaha ñu yihí cuenda Nyoo ñuu Colosas

³ Tyicuan ri cha chicán tahvi ndi chaha ndo. Ta nacuhvá ndi tyahvi nyoo chi Nyoo Sutu Sutu Mañi yo Jesucristo cha cuenda ndo.

⁴ Vatyí ñihí ndi tuhun vatyí chinó xaan iñi ndo chi ra Cristo Jesús. Ta cuñí xaan ndo chi tandihí ñu cha yihí cuenda ra.

⁵ Tyicuan caa sacuví ndo vatyí chitó vaha ndo vatyí cucoo ndo chihin Nyoo nya andívi. Nya quívi chiñi ndo tuhun Nyoo cha ndicha vaha, quíhi iñi ndo vatyí sacacú ra Cristo añima ndo.

⁶ Ta suri maa tuhun ra Cristo cha cahan ra Epafra chihin ndo, ican cuan chityá tandihí ri ityi tari chityá tucu nu canyicú ndo. Ta cuaha ñáyivi nacuhvá cuenda ñu chi ñu chi Nyoo, tari nacuhvá cuenda nyoho chi ndo ñandihí. Ta cuhva cha chiñi ndo tuhun ra Cristo, ta chitó ndo vatyí ndicha vaha cha cuñí Nyoo chi yo.

⁷ Ican ihya sañaha yañi yo ra Epafra chi ndo. Vatyí in ri tuhun Nyoo sahá tyiño ndi chihin ra. Ta ican ra cuví ra sacuví tyiño nuu ra Cristo cha cuenda ndo.

⁸ Maa ra sacotó tuhun ndo chi ndi, vatyí cuñí xaan ndo chi tahan ndo.

Vatyí maa Tatyí Ii Nyoo chahá cha vaha coo añima ndo.

⁹ Yucuan chaha nyacua nya quívi chitó ndi tuhun ndo ta ña sandihí ndi tuhun cha nacuatú ndi chaha ndo. Ta chicán ndi chi Nyoo nacuhva ra cha chiñi tuñi ra chi ndo cha cuenda Tatyí Ii ra. Ta cuacutuñi iñi ndo tacuhva coto vaha ndo ñáá ndihí cha cuñí Nyoo tyí sacuví ndo.

¹⁰ Tyicuan caa ta cuví coo ndo tari cuhva tahán chi coo ñu yihí cuenda Nyoo. Ta na sacuví ndo tari cuhva cuñí maa ra. Tacuhva sacuví ndo tandihí nuu cha vaha ta cohon nuu vaha ca ndo chi ra.

¹¹ Ta chicán tucu ndi vatyí na sandunye ca ra chi ndo chihin tunyee iñi cahnu ra vatyí cuví cunye ndo tandihí cuí chihin cha cama iñi ndo.

¹² Ta chihin cha sii cuñí ndo, ta nacuhvá ndo tyahvi nyoo chi Nyoo Sutu yo, vatyí chahá ra cha coo ndo noo ñáyivi chaa. Vatyí natava ra chi ndo nu quiñi caa, ta nanyita ndo nu ndichin nu nyacá ñaha ra chi tandihí ñu yihí cuenda ra. Ta cuhva ra tandihí cha vaha cha tahán chi chi ñu yihí cuenda ra.

¹³ Nyoo tava ra chi yo nu ñaa iñi ta nacuhvá cuenda ra chi yo chi ra Cristo vatyí cunyaca ñaha ra chi yo. Vatyí ican ra Cristo cuví Sehe Nyoo. Ta cuñí xaan Nyoo chi ra.

¹⁴ Nasata Nyoo chi yo chihin niñi ra Cristo ta saha ra tucahnu iñi cuatyí yo.

Nduvaha iyó yo chihin Nyoo cha cuenda cha chihí ra Cristo cha catyi cuatyí yo

¹⁵ Nyoo, ña nyehé yo chi ra. Soco nanduví ra ñáyivi tacuhva cuví cohon nuu yo chi ra. Ta ican ra cuví Cristo Sehe Nyoo. Nya ta ni cumañi ca chino ñáyivi ta cha iyó maa ra Cristo.

¹⁶ Ta Nyoo chaha ra tyí savaha maa ra Cristo tandihí cha iyo andívi ta siqui ñuhu ñáyivi. Ta savaha ra cha cuví nyehe yo ta cha ña cuví nyehe yo. Savaha ra ángel. Ta savaha ra chi ra ña vaha ta chi tatyí ña vaha ñandihí. Ta tandihí cha nyacá ñaha

siqui ñuhu ñayivi ihya, maa ra savaha. Ta tandihi ihya chino chi tacuhva cotyino ra yoso cuhva cuñi maa ra.

17 Ra Cristo cha iyó maa ra nya ta ni cumañi coo tandihi maa cha iyó. Ta tyicuan ri chahá ra cha conyito tandihi maa cha savaha ra.

18 Ta maa yo cha yihí yo cuenda ra Cristo, ñin ri cuví yo chihin ra. Cuví yo coño ñuhu ra. Ta maa ra Cristo, cuví xiñi yo, vatyí maa ra cuví nuu chi yo. Ta ican ra cuví cha nandoto cha xihna ca. Yucuan chaha cuví ra nuu chi tandihi cha iyó.

19 Vatyí maa Nyoo cuñi ra tyi coo tandihi tunyee ñni ra chi ra Cristo.

20 Ta cuñi tucu ra vatyí cha cuenda ra Cristo ta nicoó vaha tandihi cha iyó chihin ra. Yucuan chaha chaha Nyoo cha chihí ra Cristo. Ta chati niñi ra nu cruzi. Vatyí cuñi ra cha nicoó vaha tandihi cha iyó siqui ñuhu ñayivi ta andivi chihin ra.

21 Ta nu quichi chi, xaan cuví ñni ndo chi Nyoo cuhva cha chicá xiñi ndo cha cuenda cha ña vaha cha chinyacuví ndo.

22 Soco Nyoo sanicoo vaha ra chi ndo chihin ra vatyí tachí ra chi Sehe ra, ra Cristo vatyí quichi cuví ra nu cruzi. Ta nyehe ra tindoho chihin coño ñuhu ra ta chihí ra, tacuhva vatyí cuhva cuenda ra chi ndo chi Nyoo, soco ñahri ca cuatyí ndo.

23 Yucuan chaha cuñi chi vatyí sañihí ca ndo chinó ñni ndo. Ta ma sandihi ndo cha yihí ñni ndo tuhun ra Cristo cha chiñi ndo tyi cusacacu ra ñnima ndo. Ican tuhun ihya, cuví cha cacahán ra nicacahnu ñayivi. Ta sacuvi Nyoo vatyí yuhu ra Pablo tyinyeí cahín tuhun ihya chihin ñayivi.

Nu catyí ra Pablo vatyí nyaá siqui ra cha sañahá ra tuhun ra Cristo tandihi ri vehe ñuhu

24 Vityin cusii cuñi cha cuenda cha nyehí tindoho chihin coño ñuhi cha catyí ndo. Vatyí cha tyicuan caa sacañá tahin tindoho cha nyehe ca ra Cristo cha cuenda yo cha cuví yo coño ñuhu ra.

25 Yuhu cuví noo ra cahán tuhun ra Cristo vatyí tyicuan caa tyinyeí chi tandihi ñu yihí cuenda ra. Vatyí maa Nyoo catyí ra vatyí cahin tandihi tuhun ra cha cuenda cha vaha chi ndo.

26 Sañahí tuhun cha ñoho xehe nya ta tyembu chahnu, nya ta ni cumañi ca chino ñayivi. Nyoo chicumi xehe ra. Soco vityin cuñi ra cha coto tandihi cuii maa ñu yihí cuenda ra.

27 Ta chi ñu cha ñnima ñu Israel cuví tari nyoho, cuñi Nyoo sacotó ra noo tuhun vaha xaan, noo tuhun xehe chi ndo. Ta tuhun xehe cuan ican cuví ihya, vatyí ra Cristo ñohó ra ñnima ndo cha yihí ndo cuenda ra. Ta cha cuenda maa ra cuñihi ndo gloria nu cunyaa yo chihin Nyoo.

28 Tuhun maa ra Cristo cahán ndi. Ta chahá ndi tuhun chi tandihi ñayivi. Ta sañahá ndi chi ñu tandihi cha chiñi tuñi, tacuhva cuahnu ñu ta nyacua nya cha ñahri ca cumañi chi ñu cha ñin ri cuví ñu chihin ra Cristo.

29 Yucuan chaha tyi ní ñni sahá tyiñe chihin tunyee ñni ra Cristo ta ñihi xaan chotyino tunyee ñni cuan chii.

2

1 Vatyí cuñi cha coto ndo vatyí chicá xiñi cha cuenda ndo. Ta chicán tahvi xain cha cuenda tandihi ndo ta cha cuenda ñu Laodicea, ta tandihi inga ñu cha ta nyehe ca chii.

2 Chiquén chi Nyoo na cunii ca ñni ndo, ta cu ñin ri ndo chihin cha cuñi ndo chi tahan ndo. Ta cutuñi vaha ca ñni ndo yoso caa cohon nuu ca ndo chi ra Cristo. Vatyí ican ra cuví tuhun cumi xehe Nyoo ta cha naha. Soco vityin sacotó ra chi yo tuhun ihya.

3 Maa ra Cristo chahá ra tandihi cha vaha ta cha chiñi tuñi chi yo. Tatu ñohó nuu yo chi ra Cristo, ñohó nuu yo chi Nyoo.

4 Catyí chi ndo tyehe caa tacuhva cha ma sandavi ñaha ñayivi chi ndo chihin tuhun tyaquí.

5 Vasi ña nyaí chihin ndo, soco cohon ñni ndo vatyí ñohó ñni tuhun ndo. Ta sii cuñi nyehi chi ndo. Vatyí vaha xaan cuhva cuahán iyó ndo. Ta ñii

xaan iñi ndo cuahan ndo chata ra Cristo.

⁶ Yucuan chaha tari chinó iñi ndo chi noo tuhun ri maa ra Cristo quiví nañihí ndo chi ra, tyicuan caa cuñí tucu chi coo ndo ta ñn ri cuvi ndo chihin ra.

⁷ Ta cuinyaña ca ndo chi ra. Ta quihí vaha yoho ndo chihin ra. Ta sanñi ca ndo iñi ndo chihin cha chino iñi ndo, tari cuhva sañaha ñu chi ndo. Ta nyita ri nacuhvá ndo tyahvi nyoo chi Nyoo.

Ñayiví chaa cha chahá ra Cristo chi yo

⁸ Saha ndo cuenda vatyi iyó ñáyiví cuñí ñu sandavi ñaha ñu chi ndo chihin tuhun cha ndichí ri maa xiñi ñáyiví, tuhun cha ña ndicha. Vatyi ñima chi ra Cristo chinó iñi ñu cuan. Noo costumbre ri nyicón ñu cuan. Ta nyicón ñu chi cha nyacá ñaha siqui ñuhu ñayiví ihya.

⁹ Soco cha sañahá ñu cuan, ñima cha ndicha cuví. Vatyi Nyoo ta tandihí cha cahnu cuví ra, tandihí cuan ta nyaá chihin ra Cristo. Vatyi maa ra Cristo cuví Nyoo.

¹⁰ Ta cha nyaá ra Cristo chihin ndo, tyitú aña ndo chihin Nyoo. Ta ra Cristo ican ra cuví ra nuu chi tandihí ángel ta tatyí cuihna cha nyacá ñaha.

¹¹ Quiví nañihí ndo chi ra Cristo, quihví ra aña ndo. Ña nduvaha ndo nuu Nyoo chihin costumbre circuncisión cha itá xaan iñi ra Israel. Maa ra Cristo sacuachiyo tandihí cha ña vaha cha tuhva ndo sacuví. Saha ra circuncidar aña ndo cuví cuan soco ñima chihin ndaha ra.

¹² Quiví condutya ndo chichi ndutya, tari quiví chihí ndo chihin ra Cristo cuví cuan. Tyicuan ta quita ndo chichi ndutya, tari quiví nandoto ndo chihin ra Cristo, vatyi chinó iñi ndo tyi Nyoo chihin tunyee iñi ra sanandoto ra chi ra Jesús.

¹³ Nu quichí chi ña ñoho nuu ndo chi Nyoo. Vatyi sacuví xaan ndo cuatyí. Ta cuví ndo tari noo ñáyiví chihí chihin cuatyí cuan. Ta ña saha ñu circuncidar chi ndo. Soco vityin Nyoo saha ra ticahnu iñi tandihí cuatyí ndo.

Ta chaha ra cha coo ndo noo ñayiví chaa chihin cha ñn ri cuví ndo chihin ra Cristo.

¹⁴ Sanatuví ley chahnu cuan cuatyí yo. Ta catyí chi tyi tahán chi cuhun yo anyaya vatyi ña quichahá yo chi chi. Soco ley cuan Nyoo sacuachiyo ra quiví chihí ra Cristo nu cruzi.

¹⁵ Quiví cha chihí ra nu cruzi cuví chasaha ra chi cuihna ta chi tandihí tatyí ña vaha cha nyacá ñaha. Chihin nuu tandihí maa ángel Nyoo sacotó ra vatyi cahnu ca cuví maa ra ta ñima ca cuihna.

Nu chahá ra Pablo tuhun tyi nanducú yo cha vaha cha chahá Nyoo

¹⁶ Yucuan chaha ña tahán chi quihí yuhu ñáyiví chi yo cha cuenda cha chachí yo o cha chihí yo, o cha cuenda cha ña naquehén vaha yo noo quiví vico. Cuví ri quiví cha natyacu yoo, o cuví ri quiví nyitatu yo.

¹⁷ Tandihí cuan cuví chi tari noo xiñahñu ri cha cuquichi ityi nuu. Ta vityin cha quichí ra Cristo ta ican ra cuví ra cha ndicha vaha sacacu chi yo.

¹⁸ Ma cuhva ndo cha casi ñáyiví nu naquehen ndo noo cha cuacuhva Nyoo chi ndo. Maa ñu ndahvi sahá ñu chi ñu soco ña ndicha ñu, ta sacahnú ñu chi ángel. Ta sahá ñu tyi ñyehe ñu cha sañaha Nyoo chi ñu. Ta cahnu sahá ñu chi ñu chihin cha chicá xiñi ñu tuhun ñayiví ihya.

¹⁹ Ñu cuan ñima chi ra Cristo ra cuví xiñi nyicón ñu. Yucuan chaha nyacuví ñu tandihí cuan. Soco yoó cha nyicón yo chi ra, maa ra cuví nuu chi yo. Ta sandu ñn ri ra chi yo chihin ra. Ta sacuahnú ca ra chi yo chihin tunyee iñi ra tari cuhva cuñí maa Nyoo.

²⁰ Tari quiví chihí coño ñuhu cuatyí ndo chihin ra Cristo cuví cuan. Ta ña nyacá ñaha ca tuhun ñuhu ñayiví ihya chi ndo. ¿Ñáá tuhun cha iyó ca ndo tari caa iyó ñáyiví cha ña ñohó nuu Nyoo? Ta quichahá ca ndo cha cahán ñu cha sacuví costumbre cuan.

²¹ Vatyi catyí ñu chi ndo tyehe caa: “Ma tiun ihya chihin ndahun, ma

cachun ihya. Coto ma cacun”, catyi ñu.

²² ¿Ñáá tuhun cha quichahá ca ndo tuhun cahán ñu cuan? Vatyí maa maa ri cha ndichí xiñi ñáyivi cuví. Vatyí nyayu noo cha ñn yaha ri cuví. Ma tiví ndo nuu Nyoo cha cuenda cha cachi ndo.

²³ Ndicha vatyí costumbre ihya tari maa cha vaha cuví, cuñí maa ñáyivi. Vatyí sanyehé ñu tindocho coño ñuhu ñu. Ta cuñí ñu tyi vaha sacahnú ñu chi Nyoo tatu sacuví ñu tyicuan caa. Soco ña chaá cuan nuu Nyoo. Vatyí ma cuví tinyaa cuan cha quiñi caa cha cuñí coño ñuhu ñu.

3

¹ Chahá Nyoo noo ñáyivi chaa chi yo vatyí nandoto ra Cristo. Ta vityin nyaá ra chiyo vaha Nyoo andivi. Yucuan chaha na nducu yo cha vaha cha chahá Nyoo chi yo nya andivi.

² Caca xiñi ndo cha vaha cha chahá Nyoo chi yo nya andivi. Ta ma caca xaan xiñi ndo tuhun cha iyó siqui ñuhu ñáyivi ihya.

³ Vatyí nyoho cha yaha chihí ndo in caa ri chihin ra Cristo. Ta vityin iyó ndo ñn ri chihin ra chihin Nyoo.

⁴ Ta quívi quichi tucu ra Cristo, ra chahá ñáyivi chaa cha iyó ndo, tyicuan ta cunyehe ñáyivi tyi cahnu xaan ca ra cuví maa ra. Ta cunanyehe tucu ñu chi nyoho in caa ri chihin ra. Ta cutahan tucu maa ndo quichi ndo nu tyaquí cuan chihin ra.

Yoso caa chiyo yo costumbre nu quichi chi ta yoso caa cuñí chi coo yo chihin Nyoo vityin

⁵ Yucuan chaha cuñí chi cha nanducú yo cuhva na cúvi tandihí cha quiñi caa cha quichí cuvi iñi coño ñuhu yo. Ta ni noo yo ta ma coo ri maa yo chihin ñusihí o chihin rayii. Ta ma sacuvi yo cha ña vaha cha cuñí coño ñuhu yo, o inga cha ña vaha. Ta ma nyiyo iñi yo cha tyayii. Vatyí tari cha sacahnú yo xitohyo, o tavá xiin yo chi Nyoo cuví cuan.

⁶ Cha cuenda tandihí cha ña vaha cuan cuxaan xaan Nyoo chihin ñu

cha ña quichahá nu cahán ra. Ta cutachi tuñi ra chi ñu vatyí sacuví ñu cha ña vaha cuan.

⁷ Ta suri tyehe caa chinyacuví tucu maa ndo quívi ña ñoho nuu ndo chi Nyoo.

⁸ Soco vityin ma sacuvi ca yo tandihí cha ña vaha cuan. Ma cuxaan ca yo. Ma cahan uhvi ca yo chí tahan yo. Ta ma cahan cuehe yo chí tahan yo. Ta ma cahan ca yo cha quiñi caa. Ma quita tuhun quiñi caa yuhu yo.

⁹ Ma ñii ca yo cuendu. Vatyí quívi ta ityi chata ca, quívi ña ñoho nuu yo chí Nyoo, tyicuan caa chinyacuví yo. Soco vityin ña nyacá ñaha ca tandihí cuan chí yo.

¹⁰ Vatyí ñáyivi cha iyó yo vityin, ñáyivi chaa cuví. Noo ñáyivi chaa nanduví yo. Ta nduchaá ca yo tari cuhva caá Nyoo, ra savaha chí yo, nyacua nya cohon nuu vaha yo chí ra.

¹¹ Ña niñi cha cuví yo ñu Israel, an ñu Grecia, an ñu inga ñuu. Ta ña niñi cha sacuví yo costumbre circuncisión, an cha ma sacuvi yo. Cuví ri yo noo ra chiñi tuñi o cuví ri yo noo ra soho. Cuví ri yo ra iyó chitoho, o cuví ri yo ra yori nyacá ñaha chí yo, ña niñi xaan ca tuhun cuan. Niñi ca cha ñn ri cuví tandihí yo chihin ra Cristo, vatyí maa ra cuví tandihí.

¹² Nyoo cuñí ra chí yo ta nacachí vaha ra chí yo vatyí cuví yo ñáyivi chí ra. Yucuan chaha na coo yo ñáyivi chaa tari tahán chí coo ñu yihí cuenda ra. Na cundahvi cuñi yo nyehé yo chí tahan yo. Na cuví yo ñáyivi vaha. Ndahvi saha yo chí yo. Na cumasu iñi yo. Cunyee yo tandihí tisihi tindocho chihin cha sii cuñí yo.

¹³ Na cucama iñi yo chihin noo noo tahan yo. Ta saha yo ticahnu iñi chí tahan yo tatu ñáa cha sacuví ñu chí yo. Tari sahá ra Cristo ticahnu iñi chí yo, tyicuan caa cuñí chí cha sacuví tucu maa yo.

¹⁴ Ta sñn ri cuñi yo chí tahan yo. Ta nducu yo cuhva coo vaha yo chihin ñu. Vatyí ican cuan cuví cha sacu ñn ri chí yo. Ta ican cuan cuví cha niñi ca.

15 Ta cha taxi maa Nyoo na coo añima yo. Vatyí ra Cristo nyacá ñaha chi yo. Nyoo nacana ra chi yo vatyí tacuhva ñin ri cuví yo cuenda ra Cristo. Ta tyicuan ri nacuhva yo tyahvi nyoo chi ra cha cuenda ihya.

16 Ta tuhun ra Cristo na sacutu añima yo. Sañaha ca yo tuhun ra chi tahan yo. Ta sañi ca yo ñi tahan yo chihin cha chiñi tuñi Nyoo. Sacahnu yo chi Nyoo chihin cha cata yo yaa, o salmo. Ta cata yo yaa cha chahá maa Tatyí li Nyoo chi yo chihin cha ñi añima yo. Ta tyicuan ri nacuhva yo tyahvi nyoo chi Nyoo.

17 Tatu ñáá tyiño sahá yo, o ñáá tuhun cahán yo, sacuvi yo soco tari cha tyi tyiño maa Sutu Mañi yo Jesús sacuví yo. Ta nacuhva yo tyahvi nyoo chi Nyoo cha cuenda maa ra Cristo.

Chahá ra Pablo tuhun yoso caa nducú yo cuhva coo vaha yo chihin ñáyivi

18 Nyoho cha iyó yñi ndo, cuhva ndo cha cunyaca ñaha yñi ndo chi ndo. Vatyí yucuan cuhva tahán chi coo ndo, vatyí yihí ndo cuenda Sutu Mañi yo.

19 Ta nyoho rayñi, cuñi ndo chi ñasihi ndo. Ta ma nduxaan ndo chi ña.

20 Nyoho cha cuví ndo sehe quichaha ndo chi sutu ndo ta chi sihi ndo. Vatyí yucuan cuhva cuñi maa Sutu Mañi yo.

21 Nyoho cha cuví ndo sutu ta sihi, ma cahan xaan ndo chi sehe ndo, vatyí coto nducuihya ñi chi.

22 Ta nyoho cha cuví ndo musu, quichaha ndo chi chitoho ndo. Ñima cuhva cha nyehé ri ra chi ndo quichaha ndo chi ra, tacuhva vatyí vaha cuñi ra nyehe ra chi ndo. Soco sacuvi ndo chihin cha tandihí añima ndo. Vasi ña nyehé ra. Vatyí Nyoo nyehé ra chi ndo.

23 Tandihí ri tyiño sacuví yo, sacuvi yo chihin cha ñi ñi yo. Saha yo tuhun tyi tyiño nuu maa Sutu Mañi yo sacuví yo. Ta ñima maa ri maa tyiño nuu ñáyivi.

24 Vatyí chitó yo vatyí maa Sutu Mañi yo cucuhva ra noo cha tahán chi chi yo vatyí sacuví yo tyiño nuu ra Cristo. Vatyí ican maa ra cuví chitoho yo cha ndicha vaha.

25 Soco tatu sacuví yo cha ña vaha, Nyoo cutachi tuñi ra chi yo cha cuenda cha ña vaha cha sacuví yo. Ta tandihí yo ñin ri ñáyivi cuví yo nuu ra. Vatyí Nyoo ña cachi ra ñáyivi cuñi ra.

4

1 Nyoho cha iyó musu ndo, cuñi chi tyi vaha ñáyivi cuví ndo chihin musu ndo. Nícohon ñi ndo vatyí iyó tucu noo chitoho maa ndo nya andivi. Ta maa ra nyehé ra chi ndo.

2 Ta tyicuan ri cacan tahvi ndo chihin cha ñi ñi ndo. Ta nacuhva yo tyahvi nyoo chi Nyoo cha cuenda tandihí maa.

3 Cacan tahvi ndo chaha ndi, vatyí nanuña ca Sutu Mañi yo xiñi ñáyivi ta tyasoho ñu tuhun ra Cristo cha cahán ndi nuu ñu. Vatyí tari noo tuhun xehe cuví tuhun ra Cristo chi ñu, vatyí ña chitó ñu tyi ican ra cuví ra sacacú chi yo. Ta cha catyi tuhun ihya ñohí vehe caa.

4 Cacan tahvi ndo chahi tacuhva cuví sañahí chi ñu yoso cuhva cuvi cutuñi vaha ñi ñu tuhun ra Cristo, tari cuhva tahán chi tyi sacuví.

5 Cachi coo ndo chihin ñu ña ñohó nuu chi Nyoo. Vatyí tyicuan caa ta cuvi cahan ndo tuhun Nyoo chihin ñu.

6 Cuñi chi vatyí ndatuhún yo maa maa ri cha vaha, ta cha cachi, (ta cha tahán ñi ñáyivi) tari tahán chi cunyacuvi yo cha yihí yo cuenda ra Cristo. Tyicuan ta cuvi coto yo yoso caa cunacahan yo tatu ñáá noo tuhun ndaca tuhun ñu chi yo.

Nu sacuhún ra Pablo nocumi chi ñu ñuu Colosas cha yihí cuenda Nyoo

7 Ra Tíquico, yañi yo, ra sahá tyiño tyiño Sutu Mañi yo chihin, maa ra cunacatyí ra chi ndo yoso caa cuahán nyaí.

8 Yucuan chaha tachí chi ra nu nyicu ndo vatyí nacatyí ra chi ndo yoso

caa nyicú ndi. Ta sandunî ca ra îñi ndo.

⁹ Ta chihin ra Tíquico vachi tucu ra Onésimo, yañi yo. Ta nî îñi ra. Ta cuñí yo chi ra. Cuví ra noo ra ñuu ndo. Maa ra cucanacatyî ra chi ndo tandîhî cha cuví nu nyai.

¹⁰ Ra Aristarco, ra tahin cha ñohó ndi vehe caa, saquichí ra nocumî chi ndo. Ta saquichí tucu ra Marcos, yañi cunducuatyî ra Bernabé, nocumî chi ndo. Ta cha sacote chi ndo tuhun ra Marcos. Tatu chaa ra nu nyicu ndo, vaha çahan ndo chihin ra.

¹¹ Vachi tucu nocumî chi ndo sahá ra Jesús, ra cha nañi tucu Justo. Ta chichi cha tandîhî ñu Israel cha yîhî cuenda Nyoo, uñi tahan ri ra ihya sahá tyiño ra tuhun Nyoo chihin. Ta ndunî xaan ca îñi sahá ra.

¹² Vachi tucu nocumî chi ndo sahá ra Epafra, ra ñuu ndo. Ta maa ra sacuví ra tyiño nuu ra Cristo. Tyicuan ri chicán tahvi ra chaha ndo chi Nyoo tyi nacaca vaha ndo chihin Nyoo. Nacuhva cuenda vaha ndo chi ndo chi Nyoo tacuhva cuvi sacuvi ndo cuhva cuñí ra.

¹³ Ta yuhu cuví cha ndaa vatyî ra Epafra chicán tahvi xaan ra cuenda ndo, ta cuenda ñu cha nyicu nya ñuu Laodicea ta ñuu Hierápolis.

¹⁴ Vachi tucu nocumî chi ndo sahá ra Lucas, ra cha cuví doctor cha cuñí xaan yo chi. Ta vachi tucu nocumî chi ndo sahá ra Demas ñandîhî.

¹⁵ Cuhva ndo nocumî chi yañi yo ta tahan yo cha nyicu ñuu Laodicea. Ta cuhva ndo nocumî chi cu Ninfas ta chi tandîhî ñu yîhî cuenda Nyoo cha ndu ñn ri vehe ña.

¹⁶ Tatu yaha sacuaha ndo carta ihya, ta sacuhun ndo nu canyicu ñu yîhî cuenda Nyoo nya Laodicea na sacuaha tucu maa ñu. Ta sacuaha tucu maa ndo carta cha sacuhîin chi ñu Laodicea.

¹⁷ Çatyî ndo chi ra Arquipo vatyî na sacuví vaha ra tyiño cha chahá Sutu Mañi yo chi ra tyi sacuví ra.

¹⁸ Yuhu ra Pablo saquichí nocumî ihya chi ndo. Ta ma naa îñi ndo cha

ñohí vehe caa. Ta Nyoo na nasoco ra chi ndo. Ta na cuvi chi tyicuan caa.

Carta Cha Xihna Ri Sacuhun Ra Apóstol Pablo Chi Ñáyivi Ñuu Tesalónica Cha Yihí Cuenda Nyoo

Nu tyaq ra Pablo ta ra tahan ra noo tutu chi ñu yihí cuenda Nyoo

¹ Yuhu ra Pablo chihin ra Silvano ta ra Timoteo, tyaá ndi tutu ihya chi ndo cha cuví ndo ñu yihí cuenda Nyoo ñuu Tesalónica chiña. Vatyí ñin ri cuví ndo chihin Nyoo Sutu yo ta chihin Sutu Mañi yo Jesucristo. Ta Nyoo Sutu yo ta Sutu Mañi yo Jesucristo na nasoco ra chi ndo. Ta na cuhva ra cha coo cha taxi ri añima ndo.

Vaha xaan chinó iñi ñu Tesalónica cuan chi Nyoo

² Tyicuan ri nacuhvá ndi tyahvi nyoo chi Nyoo cha cuenda tandihí ndo. Ta nyita ri chicán tahvi ndi cha cuenda ndo.

³ Tyicuan ri yihí iñi ndi tuhun ndo nuu Nyoo Sutu yo ta nicohón iñi ndi vatyí ñi iñi ndo chinó iñi ndo chi Nyoo ta sacuví ndo tyiño nuu ra. Ta ñihi sahá tyiño ndo cha cuenda cha cuñí ndo chi ra. Ta chihin cha ñi iñi ndo yihí iñi ndo cha cuañihi ndo cha cuenda ra Jesucristo.

⁴ Vatyí chitó ndi tyi Nyoo nacachí vaha ra chi nyoho yañi. Ta cuñí xaan ra chi ndo.

⁵ Vatyí quiví cahan ndi tuhun Nyoo yoso caa sacacú ra añima yo chihin ndo, ñima chihin tuhun yuhu ri cahan ndi, soco tyinyee xaan Tatyí Ii chi ndi, ta cuaha xaan sacuvi ra chihin tunyee iñi ra. Ta cahan ndi chihin cha chitó vaha ndi tyi tuhun ndicha Nyoo cuví. Ta nyehe vaha ndo yoso caa chiyo ndi quiví chinyaa ndi chihin ndo. Tyicuan caa chiyo ndi cha cuenda cha vaha chi maa ndo.

⁶ Ta quichaha iyó ndo cuhva iyó ndi, ta cuhva iyó Sutu Mañi yo. Vatyí natñin cuenda ndo tuhun Nyoo, vasi

cuaha tindoho nyehe ndo cha cuenda cuan. Soco sii xaan cuñí ndo vatyí maa Tatyí Ii chahá tusii iñi cuan chi ndo.

⁷ Ta cha tyicuan caa, tyinyee xaan ndo chi tandihí ñu yihí cuenda Nyoo nicahnu ityi Macedonia chiña ta nicahnu ityi Acaya ihya ñandihí, vatyí nyehe ñu cuhva iyó ndo chihin Nyoo.

⁸ Ñima ityi Macedonia ta Acaya ri, soco tandihí ri ityi nu chiñí ñu tuhun ndo chitó ñu tuhun Sutu Mañi yo ta chitó ñu vatyí chinó xaan iñi ndo chi Nyoo. Ta yucuan chaha nyacua ña ñiñi ca cha cahan ndi tuhun Nyoo chihin ñu.

⁹ Vatyí suri maa ñu nacatyí ñu chi ndi yoso caa cha vaha xaan tñin cuenda ndo chi ndi quiví cuan. Nacatyí ñu yoso caa sandihí ndo tuhun cha sacahnu ndo xitohyo ta quichaha sacuvi ndo tyiño nuu Nyoo nyitó, Nyoo cha ndicha.

¹⁰ Ta nacatyí tucu ñu yoso caa nyatú ndo naquichi tucu ra Jesús Sehe Nyoo inga chaha ityi andiví. Ican ra cuví ra cha sanandoto Nyoo chii. Ta maa ra cuví ra ra sacacú chi yo tacuhva cha ma tachi tuñi Nyoo chi yo quiví sacutuñi ra chi ñáyivi.

2

Tyiño sahá ra Pablo ñuu Tesalónica

¹ Nyoho yañi, chitó ndo vatyí ñima cha caha ri chahan ndi chicahan ndi tuhun Nyoo ñuu ndo.

² Vatyí chitó ndo yoso caa nyehe ndi tindoho saha ñáyivi ñuu Filipino cha ni cumañi ca chaq ndi ñuu ndo. Ta vasi nyehe xaan ndi tindoho ñuu cuan soco quiví chaq ndi ñuu ndo cahan tucu ndi tuhun Nyoo chihin ndo chihin cha ña yuhví ndi. Ta vasi xaan xaan nanduví ñáyivi ñuu ndo, soco tyinyee xaan Nyoo chi ndi ta sacoto ndi chi ndo yoso caa sacacú ra añima yo.

³ Vatyí tuhun cha chaha ndi chi ndo maa maa ri cha ndicha cuví. Ta ñahri cha quiñi caa chicá xiñi ndi. Ta ni ñima cha cuñí ndi sandavi ñaha ndi chi ndo.

⁴ Ñahri cha ña vaha cahán ndi, vatyí Nyoo nyehé ra chi ndi, ta maa ra tyatyíño ra chi ndi vatyí sacoto ndi chi ndo yoso caa sacacú ra añima yo. Ta yucuan cuví cha cahán ndi tari cuhva tyatyíño ra chi ndi. Vatyí ña cuñí ndi cuvaha ndi nuu ñáyiví, soco nuu Nyoo cuñí ndi cuvaha ndi, vatyí maa ra nyehé ra ñáá cha caa añima yo.

⁵ Ta nyoho chitó ndo vatyí ni noo chaha ña cahán ndi chihin tuhun tyaquí cha cuñí ndi sandaví ñaha ndi chi ndo. Ta ni ñima cha cuñí ndi saha ganaa ndi xuhun ta cahán ndi tuhun ihya chihin ndo. Nyoo cuví ra cha ndaa tyí ndicha cha cahín ihya.

⁶ Ta ni noo chaha ña nanducu ndi cuhva cha sacahnu ñáyiví chi ndi, ni nyoho, ni inga ñu. Ndicha, iyó ityi chi ndi cha cunyacá ñaha ndi chi ndo tyí maa ra Cristo tachí ra chi ndi, soco ña cuñí ndi coso ndi síqui ndo cha tyicuan caa.

⁷ Soco cuñí ndi tyinyee ndi chi ndo. Tari noo síhi sacuahnú ña chi sehe ña, sahá cuenda ña chi cue, tyicuan caa cuñí ndi tyinyee ndi chi ndo.

⁸ Cuñí xaan ndi chi nyoho, ta cahví iñi ndi vatyí ñima tuhun Nyoo ri cuhva ndi chi ndo, soco nyacua nya ñáyiví ndi ñandíhi, cha cuenda cha cuñí ndi chi ndo.

⁹ Nyoho yañi, nicohón iñi ndo yoso caa saha tyíño ndi quiví chinyicu ndi chihin ndo. Sahá tyíño ndi ñicahñu ta cha cuaa vatyí ña cuñí ndi coso ndi síqui ni noo ndo cha ni ri ca cha cahán ndi tuhun Nyoo chihin ndo.

¹⁰ Ta nyoho cuví ndo cha ndaa, ta Nyoo ñandíhi, vatyí maa ri cha vaha ta cha ndaa chinyacuví ndi quiví chinyaa ndi chihin ndo cha cuví ndo ñu chinó iñi chi ra Cristo. Maa maa ri cuhva cuñí Nyoo chinyacuví ndi, ta ña chaha ndi cuhva vatyí cahan ña vaha ndo síqui ndi.

¹¹ Ta chitó tucu ndo yoso caa sanduní ndi iñi noo noo ndo chihin tuhun chaha ndi chi ndo. Sandunyeé ndi iñi ndo tari noo ra chihin sehe ra.

¹² Ta catyi ndi chi ndo nacachi coo

ndo tari tahán chi coo ñu yihí cuenda Nyoo. Vatyí maa ra nacana chi ndo vatyí coo ndo nu nyacá ñaha ra, ta nyehe ndo cha tyaquí gloria ra.

¹³ Yucuan chaha tyicuan ri nacuhvá ndi tyahví nyoo chi Nyoo, vatyí quiví chiñí ndo tuhun ra cha cahán ndi chihin ndo, natíin cuenda ndo vatyí nacoto ndo tyí tuhun Nyoo cuví ta ñima tuhun ñáyiví ri. Ta ndicha cha tuhun Nyoo cuví, vatyí sacuví chi vatyí chino iñi ndo chi Nyoo ta nasama ndo cuhva iyó ndo.

¹⁴ Yahá cuan ta nyehe tucu maa ndo tindoho saha ñáyiví ñuu ndo, tari nyehe tucu ñu yihí cuenda ra Cristo Jesús nicahnu ityi Judea. Tyicuan caa sanyehe tucu ñu Israel ityi Judea cuan tindoho chi ñáyiví tahan yo cuenda ra Cristo cuan.

¹⁵ Ta ican ñu Israel cuan cachahñí chi Sutu Mañi yo Jesús tari cachahñí tucu ñu chi ra profeta, ra cachaha cuenda tuhun cahán Nyoo ta ityi chata ca. Ñu Israel cuan tava ñehe ñu chi ndi. Ñima cuhva cuñí Nyoo iyó ñu. Ta tasi cuñí ñu nyehe ñu chi tandíhi ñáyiví.

¹⁶ Tatu cuñí ndi cahan ndi tuhun Nyoo chihin ñu cha ñima ñu Israel cuví tacuhva cacu ñu, ña chahá ñu Israel cuan cahan ndi. Ta cha cuenda cha chasí ñu nu cahán ndi, cucuaha ca cuatyí ñu. Ta vityin nu ndíhi tuhun cutachi tuñi xaan Nyoo chi ñu.

Nu catyi ra Pablo vatyí cuñí ra cunyehe ra nu nyicú ñu Tesalónica inga chaha

¹⁷ Yañi, cha yahá cha quita ndi ñuu ndo vasi ña naha nyehe ndi chi ndo soco ñohó xaan iñi ndi chi ndo. Ta chihin cha ñi iñi ndi cuñí ndi cunyehe ndi nu nyicú ndo inga chaha.

¹⁸ Ta nducu ndi cuhva cuhun ndi soco ña cuví. Ta yuhu ra Pablo ñandíhi, cuaha xaan chaha nduquí cuhva cuhun ndi, soco tahan ri chaha cha cuñí ndi cuhun ndi ta ña chaha ra ña vaha.

¹⁹ Soco ¿yóó chi ita iñi ndi? Ta ¿yóó chi cuenda cusí cuñí ndi, ta vaha cuñí ndi? ¿Atu ñima cha cuenda

maa ndo cusii xaan cuñi ndi nuu Sutu Mañi yo Jesucristo quivi quichi ra inga chaha?

²⁰ Vatyí cha cuenda cha vaha cuahan ndo chihin Nyoo ta nyehé yo tyi ña caha ri sahá tyiño ndi. Ta sii xaan cuñi ndi cha cuenda cuan.

3

¹ Ta yucuan chaha ña cunyeé que cha ma cote yoso caa cuahan ndo chihin Nyoo. Ta natyaji iñi tyi ndoj ñuu Atenas.

² Ta tachí chi yañi yo ra Timoteo na cahun ra cunyehe ra chi ndo. Maa ra sacuvi ra tyiño nuu Nyoo vatyí in ri chihin ndi cahán ra tuhun yoso caa cacú aña yosa sahá ra Cristo. Tachí ndi chi ra nu nyicú ndo na sandunii ca ra iñi ndo ta sandunyeé ca ra iñi ndo tacuhva vatyí chinó ca iñi ndo chi Nyoo.

³ Tyicuan caa ta ni noo ndo ta ma ndu uvi iñi ndo cha cuenda cha nyehé ndo tindoho. Vatyí nyoho chitó ndo vatyí nyaá yo cha nyehe yo tindoho tyehe caa.

⁴ Vatyí ta ninyaá ca ndi chihin ndo, catyí ndi chi ndo vatyí cha cuñi quichi quivi cha nyehé yo tindoho. Ta chitó vaha maa ndo tyi tyicuan caa cuvi.

⁵ Yucuan chaha ña cunyeé que cha cuñi cote tuhun ndo. Ta tachí tyiño chihin ra Timoteo na nyehe ra yoso caa cuhva cuahan chinó iñi ndo chi Nyoo. Vatyí yuhví coto sandavi ñaha cuihna chi ndo ta nandihvi tucu ndo nu quiñi caa inga chaha. Vatyí tu tyicuan caa, cucunaa tandihí tyiño saha ndi nu nyicú ndo.

⁶ Soco vityin cha nachaa ra Timoteo cha chahan ra nu nyicú ndo ñuu Tesalónica chiña. Ta nacatyí ra chi ndi vatyí ñi iñi ndo chinó iñi ndo chi Nyoo. Ta catyí ra tyi tyicuan ri nichón iñi ndo chi ndi ta cuñi xaan ndo nyehe ndo chi ndi, tari nyuhu, cuñi tucu maa ndi nyehe ndi chi ndo.

⁷ Yucuan chaha, yañi, vasi cuaha cha cuví chi ndi ta nyehé ndi tindoho, soco vaha xaan cuñi ndi cha chitó ndi

vatyí nyoho vaha chinó iñi ndo chi Nyoo ta ña saña ndo chi ra.

⁸ Tari quivi cha nduchaa ñayivi ndi, cuñi maa ndi cuhva cha nacoto ndi vatyí nyoho ñihi cuahan ndo chihin Nyoo.

⁹ Nyacua ña ñihí ndi cuhva nacuhva ndi tyahvi nyoo chi Nyoo cha cuenda ndo. Vatyí sii xaan cuñi ndi nuu Nyoo cha cuenda vatyí vaha cuahan ndo chihin ra.

¹⁰ Chicán tahvi xaan ndi chi Nyoo ñicahñu ta cha cuaa, vatyí cuñi ndi cahun ndi cunyehe maa ndi chi ndo. Tyicuan ta cuvi sandunanii ndi cha chinó iñi ndo.

¹¹ Ta vityin nyatú ndi na tyinyee maa Nyoo Sutu yo ta Sutu Mañi yo Jesucristo tacuhva cuvi cahun ndi nu nyicú ndo.

¹² Ta na tyinyee ca Sutu Mañi yo Jesucristo chi ndo tacuhva cuñi ca ndo chi noo noo tahan ndo ta chi tandihí ñayivi tari cuñi nyuhu chi nyoho.

¹³ Tacuhva vatyí cunii ca iñi ndo ta cunduvii ndihí aña ndo. Ta ma coo ca cuatyí ndo nuu Nyoo Sutu yo quivi quichi tucu Sutu Mañi yo Jesucristo chihin tandihí ca ñu yihí cuenda ra.

4

Cuhva cha tahán iñi Nyoo cha coo yo

¹ Vityin yañi, chacú ndahvi ndi nuu ndo ta chahá ndi tuhun chi ndo chihin ndusu yuhu Sutu Mañi yo Jesucristo, na coo ca ndo tari cuhva sañaha ndi chi ndo, cuhva tahán iñi Nyoo. Ta sañihi ca ndo coo ndo tyicuan caa noo noo quivi.

² Nyoho cha chitó ndo yoso caa chaha ndi cuhva chi ndo tari chaha tucu maa Sutu Mañi yo Jesús cuhva chi ndi.

³ Cha cuñi Nyoo, ican cuví ihya: Cha nacuhva ndihí ndo chi ndo chi ra tacuhva sanduvii ndihí ra aña ndo. Ta ni noo ndo ta ma coo ndo chihin noo ñaha sihi o rayii tatu ñima ñasihí o yii ndo cuví.

⁴ Ta tahan tahan ndo cuñi chi coto ndo yoso caa coo ndo chihin ñasihí

ndo. Coo vii ndo chihin ña chihin cha cuñi ndo chi ña.

⁵ Ñima chihin cha quichi cuvi iñi ndo cha quiñi caa tari nyacuví ñáyivi cha ña ñohó nuu chi Nyoo.

⁶ Ta ni noo ndo ta ma sandavi ñaha ndo chi yañi ndo ta coo ndo chihin ñasihí ra. Vatyí Sutu Mañi yo, ñihi xaan tachí tuñi ra chi ñu sacuví tyicuan caa, tari cuhva catyi ndi chi ndo.

⁷ Vatyí Nyoo nacana ra chi yo vatyí tacuhva sacuvi yo cuhva cuñi maa ra, ta ñima noo cuhva quiñi caa.

⁸ Ta yucuan chaha yóo ñu cha ña cuñi tyasoho tuhun ihya, ñima tuhun ñáyivi ri ña tyasohó ñu, soco tuhun Nyoo ña tyasohó ñu. Vatyí suri maa Nyoo chaha ra Tatyí Ii ra chi ndo.

⁹ Soco tuhun cha cuñi yo chi tahan yo, ña chiñuhú cha tyai nu tutu ihya tuhun cuan. Vatyí suri maa Nyoo cha sañaha ra chi ndo vatyí cuñi yo chi tahan yo cuenda Nyoo.

¹⁰ Ta tyicuan caa cuñi ndo chi tandihí tahan yo nicahnu Macedonia chiña. Soco chacú ndahvi nuu ndo yañi, vatyí na cuñi ca ndo chi ñu noo quivi.

¹¹ Nducu ndo cuhva coo vii ndo. Ta ma tyihí ndo chi ndo nu ña tahán chi, soco ñin ri tyiño maa ndo caa xiñi ndo. Ta saha tyiño ndo chihin ndaha ndo tari cuhva catyi ndi chi ndo quivi cuan.

¹² Tyicuan caa sacuvi ndo tacuhva vatyí ñáyivi ña ñohó nuu Nyoo cuasaha ñu ñáyivi chi ndo. Ta ñahri cuacumañi chi ndo.

Yoso caa cucuvi quivi quichi Sutu Mañi yo Jesús inga chaha

¹³ Yañi, ña cuñi ndi cha ma coto ndo ñáa cha cuví chi ñáyivi chihí, vatyí coto nducuihya iñi ndo tari nducuihyá iñi ñáyivi cha ma tahan chi nyehe chi Nyoo.

¹⁴ Ta tari cha chinó iñi yo vatyí chihí ra Jesús ta nandoto ra, tyicuan caa chinó tucu iñi yo vatyí Nyoo cusanandoto ra chi ñu ndiyi cha chinó iñi chi ra.

¹⁵ Yucuan chaha catyi ndi chi ndo tari sañaha Sutu Mañi yo chi ndi.

Vatyí yoó cha nyitó yo nyacua nya quivi quichi ra, ñima xihna ca yo cuhun ícan saha ñu cha yaha chihí.

¹⁶ Vatyí suri maa Sutu Mañi yo cunoo xica ra andivi, ta cucana chaa ra vatyí maa ra cuví ra nyacá ñaha. Ta cucana chaa noo ra cuví nuu chi ángel. Ta cunativi trompeta Nyoo. Tyicuan ta ñáyivi cha yihí cuenda ra Cristo ta chihí ñu, xihna ca ñu cunandoto.

¹⁷ Yaha cuan ta yoó cha nyitó ca yo cundaa xica yo ñin ri chihin ñu nu vico, nu cunañihi tahan yo chihin Sutu Mañi yo ityi andivi. Ta yucuan ta cucunyaa yo chihin ra tyicuan ri maa.

¹⁸ Yucuan chaha sandunii ndo iñi tahan ndo chihin tuhun ihya.

5

¹ Soco ama o ñáa quivi cucuvi tuhun ihya, ña ñiñi cha cahin tuhun cuan chihin ndo yañi.

² Vatyí cha chitó vaha maa ndo vatyí ma tuvi ri iñi yo ta cuchaa quivi quichi tucu Sutu Mañi yo. Vatyí tari cuhva quihvi noo ra suhu vehe ñáyivi cha cha cuaa, tyicuan caa cucuvi.

³ Vatyí quivi cha catyi ñáyivi vatyí vaha xaan iyó ñu, ta ñahri maa cha yuhvi ñu, tyicuan ta sana iñi ñu ta quichi tindoho cuan siqui ñu. Tari noo ñaha sihi cha cuacacu sehe, sana iñi ña ta quihvi cha uhvi chi ña. Ta tyicuan caa cucuvi chi ñáyivi quivi quichi Sutu Mañi yo, vatyí ma cuvi cono ñu.

⁴ Soco nyoho yañi, ñima ca nu ñaa iñi nyicú ndo ta catyi ndo vatyí sana iñi ndo ta cuchaa chi quivi Sutu Mañi yo, tari sana iñi ñáyivi tatu quihvi ra suhu vehe ñu.

⁵ Vatyí tandihí yo chitó yo yoso caa tahán chi coo yo vatyí Nyoo sandundichin ra añima yo, ta ña iyó ca yo nu ñaa iñi tari ñu ña ñohó nuu Nyoo.

⁶ Yucuan chaha ma cuvi yo tari inga ñu cuan. Tari quivi cha quixí ñu vatyí ña quichahá ñu cha ndichi Sutu Mañi yo. Soco yoó cuatu tuhva yo ta cachi coo yo.

⁷ Vatyí ñu quixí, quixí ñu cha cha cuaa, ta ñu chihí xaan ndixi, chiñí ñu cha cha cuaa.

⁸ Soco yoó cha cuví yo ñu cuenda cha ñicahñu, nacachi cōo yo. Ta tari noo sindaro sahá ra cuenda chi ra chihin noo cha tyaá ra pechu ra, tyicuan caa saha yo cuenda chi yo chihin cha ñiñi yo chinó iñi yo chi Nyoo, ta chihin cha cuñí yo chi tandihí ñáyivi. Ta tari sindaro sahá cuenda ra xiñi ra chihin noo caa, tyicuan caa cuñí chi cha sahá yo cuenda chi yo chihin cha yihí iñi yo tyi cacu yo.

⁹ Vatyí Nyoo ña tyaá ra cuhva chi yo vatyí tachi tuñi ra chi yo, soco nacachi ra chi yo vatyí cacu yo cha cuenda Sutu Mañi yo Jesucristo.

¹⁰ Vatyí ra Jesucristo chihí ra cha cuenda yo vatyí tacuhva coo yo ñin ri chihin ra. Ñahri saha vasi cha chihí yo o iyó ca yo, soco tandihí yo coo yo ñin ri chihin ra.

¹¹ Yucuan chaha sandunñi ca ndo iñi tahan ndo ta sandunyeey ca ndo iñi ñu, tari cuhva cuahan nyacuví ndo vityin.

Nu chahá ra Pablo tuhun chi ñu

¹² Soco yañi, chacú ndahvi ndi nuu ndo, na saha ndo ñáyivi chi ra sahá tyiño nu nyicú ndo. Vatyí nyisó ra tyiño cuenda Sutu Mañi yo ta chahá ra tuhun chi ndo.

¹³ Cuñí chi cha saha xaan ndo ñáyivi chi ra chihin cha cuñí ndo chi ra. Vatyí sacuví ra tyiño Sutu Mañi yo. Ta vaha cōo ndo chihin tahan ndo cuenda Nyoo.

¹⁴ Ta tyatyíño ndi chi ndo yañi, vatyí cuhva ndo tuhun chi ñu cha ña cuñí saha tyiño. Ta sandunñi ndo iñi ñu cha ña ñi ca iñi. Ta tyinyee ndo chi ñu vita cuñí vatyí ta chino vaha ca iñi ñu. Ta cucama iñi ndo chihin tandihí ñáyivi.

¹⁵ Saha ndo cuenda coto sacuvi ndo cha ña vaha chihin ñu nyacuví cha ña vaha chihin ndo. Nducu ndo cuhva sacuvi ndo cha vaha chihin tahan ndo cuenda Nyoo ta chihin tandihí ñáyivi.

¹⁶ Tyicuan ri cusñi cuñi ndo.

¹⁷ Ta cācan tahvi ndo tyicuan ri maa.

¹⁸ Nacuhva ndo tyahvi nyoo chi Nyoo cha cuenda tandihí cha cuví. Vatyí ican ihya cuví cha cuñí Nyoo cha sacuvi yo cha cuví yo ñu chinó iñi chi ra Cristo Jesús.

¹⁹ Ma ndahva ndo ñuhū Tatyí Ii cha nyaá aña ndo.

²⁰ Ma cuacu nyaa ndo tuhun Nyoo cha cahán noo ra cahán tuhun chahá Nyoo.

²¹ Tiñin cuenda ndo tandihí cha cahán ra. Ta naquehen ndo cha vaha.

²² Cuachiyo ndo nuu tandihí cha quiñi caa.

²³ Ta maa Nyoo ra iyó cha taxi ri chii, na sanduvii ca ra aña ndo tacuhva vatyí ñin ri chi maa ra nacuhva cuenda ndo chi ndo. Ta na cocumi ra aña ndo ta cha chiñi tuñi ndo ta coño ñuhu ndo tacuhva vatyí ma coo ca cuatyí ndo quivi quichi tucu Sutu Mañi yo Jesucristo.

²⁴ Ra cha nacachi chi ndo, cuví cunyeey iñi yo chi ra, vatyí maa ra cusacuvi ra tandihí maa ihya.

Nu ndihí cahān ra Pablo ta chahá ra nocumi chi ñu

²⁵ Yañi, cācan tahvi ndo cha cuenda ndi.

²⁶ Ta nacuhva ndo nocumi chi tandihí yañi yo cuenda Nyoo.

²⁷ Tyatyíñé chi ndo chihin ndusu yuhu Sutu Mañi yo vatyí sacuha ndo carta ihya nuu tandihí tahan yo cuenda Nyoo.

²⁸ Ta na nasoco Sutu Mañi yo Jesucristo chi ndo. Ta na cuvi chi tyicuan caa.

Carta Cha Cu Uvi Cha Sacuhun Ra Apóstol Pablo Chi Ñáyivi Ñuu Tesalónica Cha Yihí Cuenda Nyoo

Nu tyaq ra Pablo ta ra tahan ra noo tutu chi ñu ñuu Tesalónica cha yihí cuenda Nyoo

¹ Yuhu ra Pablo chihin ra Silvano ta ra Timoteo, tyaá ndi noo tutu ihya tyi sacuhun ndi chi ndo cha cuví ndo ñu yihí cuenda Nyoo ñuu Tesalónica chiña. Vatyí ñin ri cuví ndo chihin Nyoo Sutu yo ta chihin Sutu Mañi yo Jesucristo.

² Ta na nasoco Nyoo Sutu yo ta Sutu Mañi yo Jesucristo chi ndo. Ta na cuhva ra cha taxi ri coo añima ndo.

Nu catyi ra Pablo yoso caa cusacutuñi Nyoo chi ñu iyó cuatyí quívi quichi ra Cristo

³ Nyoho yañi, tyicuan ri cuñí chi cha nacuhva ndi tyahvi nyoo chi Nyoo cha cuenda ndo, vatyí tyicuan caa tahán chi cha sacuví ndi cha cuenda cha ñihi ca cuahan chinó iñi ndo chi Nyoo noo noo quívi, ta ñin ri cuñí xaan ca ndo chi tahan ndo.

⁴ Yucuan chaha ñi cuñí ndi cahán ndi tuhun ndo chihin nuu ñu yihí cuenda Nyoo inga ca vehe ñuhu. Vatyí nyoho cama xaan iñi ndo ta vaha xaan chinó iñi ndo chi Nyoo cha ñi ri ca yahá ndo tandihí tindocho sanyehé ñáyivi chi ndo.

⁵ Ihya sañahá chi yo vatyí vaha cuhva sacutuñi Nyoo chi yo, vatyí nu ndihí tuhun cusaha Nyoo tuhun vatyí naña tucu nyoho quíhvi ndo nu nyacá ñaha ra. Vatyí cha cuenda tuhun ra, nyehe xaan ndo tindocho vityin.

⁶ Ta cha cuenda chi Nyoo, vaha cha cutiyahvi ra chihin tindocho chi ñu sanyehé tindocho chi ndo.

⁷⁻⁸ Ta chi nyoho cha nyehé ndo tindocho sahá ñu, cuhva ra cha nyitatu ndo tari cuhva tucu ra chi nyuhu,

quívi cuquichi tucu Sutu Mañi yo Jesucristo nya andívi chihin ángel cha iyó xaan tunyee iñi ra chi, quíchi ra chihin ñuhu cha cayú. Vatyí cutachi tuñi ra chi ñáyivi ña ñohó nuu Nyoo, ñu ña quichahá tuhun ra, tyi cuví ra Sutu Mañi yo Jesucristo, ra quíchi sacacu chi yo.

⁹ Ñu cuan, cundoho ñu ta ma ndihí maa cha ndoho ñu, ta cunaa ñu nuu Sutu Mañi yo Jesucristo vatyí ma nyehe ñu chi ra. Ni ma nyehe ñu ñana cha cahnu cuví ra chihin tunyee iñi ra

¹⁰ quívi cuquichi ra. Vatyí quívi cuan ñu yihí cuenda ra cusacahnu ñu chi ra, tandihí ri ñu chinó iñi chi ra. Ta mahñu ñu, ñohó tucu nyoho vatyí chinó iñi ndo cha ndaa cha chahá ndi chi ndo.

¹¹ Yucuan chaha tyicuan ri chicán tahvi ndi chaha ndo, na tyinyee Nyoo yo chi ndo tacuhva na saha ra tuhun vatyí naña ndo cha cuví ndo ñáyivi nacachí ra. Ta chicán tahvi tucu ndi chaha ndo na tyinyee ra chi ndo tacuhva cuví sacuvi ndo cha vaha chihin tunyee iñi ra. Ta tandihí tyiño sahá ndo nuu ra cuacacu vaha, suri cha cuenda tunyee iñi chahá ra chi ndo vatyí chinó iñi ndo chi ra.

¹² Tacuhva sacahnu ñáyivi sívi Sutu Mañi yo Jesucristo, vatyí nyehé ñu cuhva iyó ndo. Ta maa ra cusacahnu ra chi ndo nuu ñáyivi cha cuenda tumañi iñi cha chahá Nyoo chi ndo cha cuenda ra.

2

Ra cha ñahri maa ley Nyoo iyó chi

¹ Ta cha cuenda quívi cuquichi Sutu Mañi yo Jesucristo nu cusandu ñin ri ra chi yo, cuñí cahin vityin, nyoho yañi. Vatyí chacú ndahvi nuu ndo,

² ma vatyí xaan cutondo xiñi ndo. Ni ma nayuhvi ndo vatyí nyacua nya tatyí ñavaha ta cucatyí chi chi ndo vatyí cha chaá quívi Sutu Mañi yo, ta nyacua nya ra cahán tuhun Nyoo ta cucatyí ra vatyí cha chaá quívi cuan, ta cutyaa ra nu carta ta cucatyí ra tyi yuhu sacuhin carta cuan chi ndo.

³ Ni noo cuhva ma cuhva ndo cha sandavi ñaha ñu chi ndo. Vatyí cha ni cumañi ca chaa quiví cuan cuaha xaan ñu cusandihí ñu cha chino iñi ñu chi Nyoo ta cundicuita rayi cha ñahri ley Nyoo iyó chi, ra cacu vatyí cunaa cuví ra cuan.

⁴ Ican ra cuví ra xaan iñi chi Nyoo. Cundicuita ra siqui tandihí cha nyisó sivi Nyoo. Tandihí cuhva sacahnú ñáyivi chi Nyoo cunducuita ra siqui. Ta nyacua nya chichi vehe ñuhu cahnu Nyoo ta cucunyaa ra ta cunyaca ñaha ra, cusaha ra tyi Nyoo cuví ra.

⁵ ¿Atu ña nichón iñi ndo vatyí ta ni nyaa que chihin ndo cahin tuhun ihya chihin ndo?

⁶ Soco vityin nyoho chitó ndo ñáá tuhun cha ña ndicuita ñaha ra tacuhva vatyí ndicuita ra soco nya quiví tahán maa chi.

⁷ Cha iyó tuhun cha ña quichahá ñáyivi chi Nyoo siqui ñuhu ñáyivi, soco iyó xehe chi, vatyí iyó noo cha chasí, ta ña chahá cuan cha nducuaaha chi. Soco quiví canyaha cuan, cunduñihi cha quiñi caa cuan.

⁸ Tyicuan ta cundicuita ra quiñi caa cuan ta Sutu Mañi yo cucahñi ra chi ra chihin tatyí yuhu ra ta cusanaa ra chi ra chihin cha xiño ra quiví cuquichi ra.

⁹ Ra quiñi caa cuan, cuenda cuihna cuquichi ra. Ta tandihí tunyee iñi cuihna cucoo chi ra, ta cusandavi ñaha ra chi ñáyivi chihin seña ta milagru ta cha iyo.

¹⁰ Tandihí ri nuu cha ña vaha cuotyíño ra tacuhva cuví sandavi ñaha ra chi ñáyivi cha cucunaa. Vatyí ñu cuan ña cuñi ñu quichaha ñu cha ndicha tacuhva cuví cacu ñu.

¹¹ Ta yucuan chaha cucuhva Nyoo vatyí cusandavi ñaha cha ña vaha cuan chi ñu. Ta cuchino iñi ñu cha ña ndicha.

¹² Tacuhva vatyí cutachi tuñi ra chi tandihí ñu vatyí ña cuñi ñu chino iñi ñu cha ndicha. Ta tahán ca iñi ñu sacuví ñu cha ña vaha.

Nu cahan ra Pablo tuhun ñu cha nacachí Nyoo vatyí cacu ñu

¹³ Soco tyicuan ri cuñi chi cha nacuhva ndi tyahvi nyoo chi Nyoo cha cuenda nyoho yañi. Vatyí cuñi xaan Sutu Mañi yo chi ndo. Vatyí Nyoo nacachí ra chi ndo nyata quiví xihna ri vatyí cuacacu ndo cha cuenda cha sanduvaha Tatyí Ii ra añaíma ndo ta cha cuenda cha chinó iñi ndo cha ndicha.

¹⁴ Yucuan cuenda nacana Nyoo chi ndo quiví cahan ndi tuhun ra chihin ndo tacuhva vatyí cuñihi ndo chiin cha cahnu cuví Sutu Mañi yo Jesucristo.

¹⁵ Yucuan chaha sanñi ndo iñi ndo, nyoho yañi. Ta ma naa iñi ndo tuhun cha sañaha ndi chi ndo ta ni nyaa ca ndi chihin ndo. Ni ma naa iñi ndo tuhun cha tyaa ndi nu tutu cha sacuhun ndi chi ndo.

¹⁶⁻¹⁷ Sutu Mañi yo Jesucristo ta Nyoo Sutu yo cuví ra cha cuñi chi yo. Ta cha cuenda tumañi iñi cha chahá ra chi yo sanduní ra iñi yo tyicuan ri maa. Ta chahá ra cha cuita iñi yo coo yo chihin ra. Ta na nacuhva maa ra cha si cuñi añaíma ndo. Ta na sandunanñi ra iñi ndo, tacuhva cuví cahan ndo ta sacuvi ndo tandihí nuu cha vaha.

3

Nu chicán ra Pablo na cacan tahvi ñu chaha ra

¹ Nu ndihí tuhun, nyoho yañi, cacan tahvi ndo chaha ndi tacuhva vatyí numi ri chaa tuhun Sutu Mañi yo tandihí ri ityi. Ta na quichaha ñáyivi ta natin cuenda ñu tari natin cuenda nyoho.

² Cacan tahví tucu ndo tacuhva vatyí na cacu ndi ndaha ñáyivi ña vaha, ñu quiñi iyó. Vatyí ña tandihí ñáyivi chinó iñi ñu chi Sutu Mañi yo.

³ Soco Sutu Mañi yo ndicha ra. Ta maa ra cuasaquehen ityi ra chi ndo, ta cuasaha cuenda ra chi ndo coto tin ra ña vaha chi ndo.

⁴ Ta cunyeé xaan iñi ndi chi Sutu Mañi yo vatyí nyoho sacuví ndo tari cuhva catyí ndi chi ndo, ta cusacuvi ca ndo.

⁵ Ta vityin na tyinyee ca Sutu Mañi yo chi ndo tacuhva cuñi ca ndo chi

ñáyiví tari maa ra cuñí ra chi ñu. Na tyinyee ra chi ndo na cucama iñi ndo cuhva nyehe ndo tindoho, tari ra Cristo cunyeē xaan iñi ra nu nyehe ra tindoho.

Tahán chi cha saha tyiño yo

⁶ Ta vityin chihin ndusu yuhu Sutu Mañi yo Jesucristo, catyí ndi chi ndo, nyoho yañi, ma cutahan ndo chihin yañi yo ra ña cuñí saha tyiño, ta ña iyó ra cuhva sañaha ndi chi ndo.

⁷ Vatyí nyoho chitó ndo yoso caa tahán chi coo ndo tari cuhva sañaha ndi chi ndo. Vatyí nyuhu ña chinyicu ndi chihin ndo cha ña sahá tyiño ndi.

⁸ Ta ni ña chachi ndi cha chii ndo cha ña tyiyahví ndi. Soco saha tyiño ndi ñicahñu ta cha cuaa vatyí ña cuñí ndi coso ndi siqui ni noo ndo.

⁹ Vasi iyó chi ityi chi ndi cha cacan ndi cha tyinyee ndo chi ndi, soco nyuhu saha tyiño ndi vatyí cuñí ndi sañaha ndi noo cuhva vaha cunyicon ndo.

¹⁰ Vatyí quiví chinyaa ndi chihin ndo, catyí ndi chi ndo vatyí ñu cha ña cuñí saha tyiño, ma cachi ñu.

¹¹ Cahán ndi siqui ihya vatyí ñihí ndi tuhun vatyí yihí ndo chicá noo yanga ri ndo ta ñahri maa tyiño sahá ndo.

¹² Chi nyoho cha iyó ndo tyicuan caa, catyí ndi chi ndo chihin ndusu yuhu maa Sutu Mañi yo Jesucristo, na casaha tyiño vaha ndo, ta yaha ndo noo noo quiví.

¹³ Yañi, ma cutatu ndo sacuvi ndo cha vaha.

¹⁴ Tatu iyó noo ra ña cuñí quichaha tuhun cahán ndi nu tutu ihya, saha ndo cuenda chi ra ta ma cutahan ndo chihin ra tacuhva na cucahan nuu ra.

¹⁵ Soco ma cuxaan iñi ndo chi ra, soco cuhva ndo tuhun chi ra vatyí yañi yo cuví ra.

Nu ndihí cahan ra Pablo

¹⁶ Sutu Mañi yo taxi ri iyó añima ra, ta suri maa ra na cuhva ra cha taxi ri coo añima ndo tandihí ri cuhva tandihí ri quiví. Ta nacuhva ndo cha cunyaa vaha ra chihin tandihí ndo.

¹⁷ Yuhu ra Pablo tyaí nocumi ihya chi ndo chihin ndahi, ta chihin letre. Ta tyehe caa tyihí firme nu tandihí carte. Ta tyehe caa tuhvé tyai.

¹⁸ Ta Sutu Mañi yo Jesucristo na nasoco ra chi tandihí ri ndo. Ta na cuví chi tyicuan caa.

Carta Cha Xihna Ri Sacuhun Ra Apóstol Pablo Chi Ra Timoteo

Nu tyaq ra Pablo noo tutu chi ra Timoteo

¹ Yuhu ra Pablo cuví noo apóstol chi ra Jesucristo vatyí tachí ra chii na caque tyiño ra. Maa Nyoo cuví ra sacacú chi yo. Ta ican ra catyí tyi sacuvi tyiño ihya, ta Sutu Mañi yo Jesucristo ñandihí. Vatyí maa ra cuví ra cha yihí iñi yo.

² Tyaí tutu ihya chi yoho Timoteo vatyí sehe vahi cuví chuun cha cuenda cha chinó iñun tuhun ra Cristo cha sacote chuun. Ta cuñi vatyí nasoco Nyoo Sutu yo ta Sutu Mañi yo Jesucristo chuun. Ta na nyehe ndahvi ra chuun. Ta na coo ca cha taxi ri añimon saha ra.

Nu sañaha ra Pablo chi yo yoso caa saha yo cuenda tuhun cha ña ndicha

³ Quiví quite ñuu Éfeso chiña cha cuaquichi ityi Macedonia ihya, catyí chuun na ndoun Éfeso chiña ta catyun chi suhva ñu vatyí ma sañaha ñu tuhun cha ña ndicha. Ta vityin catyí tiqui chuun na sacuvi con tari cuhva catyí chuun quívi cuan.

⁴ Catyun chi ñu cuan vatyí ma tyaq ñu xiñi ñu tuhun tyisu, ni tuhun cha cuví chi noo noo sutu chahnu ñu. Vatyí cha nuu cha tyinyeé chi chi yo, satondó chi xiñi yo. Maa maa ri cha ñima ri tuhun cuví yuhu yo. Ña tyinyeé chi chi yo cha chinó iñi yo cha sacuví ca yo cha catyí Nyoo.

⁵ Soco tuhun cha catyí maa yo chi ñáyivi, cha cuñi yo chi tahan yo chihin cha cacú añima yo cha sanduvaha Nyoo. Cuñi yo chi ñu chihin cha vaha chicá xiñi yo ta chihin cha ndicha chinó iñi yo chi Nyoo.

⁶ Soco yihí ñu saña ñu tuhun ihya ta quita caxiin ñu chihin tuhun cha ñima ri tuhun.

⁷ Cuñi ñu cuvi ñu ñu sacuahá cuenda ley chahnu Nyoo soco ni maa ñu ta ña cutuñi iñi ñu tuhun cahán ñu.

⁸ Chitó yo tyi ley cuan, vaha chi, soco cotyiño yo tari cuhva tahán chi.

⁹ Cuñi chi coto yo vatyí ni noo ley ña chicunyaá chi cha cuenda ñu vaha. Soco nyaá chi cha cuenda ñu nacahnú nu cahán Nyoo, ñu iyó cuatyí, ñu quiñi iyó, ñu ña saha ñáyivi chi Nyoo. Nyaá tucu chi cha cuenda ñu chahñi chi sutu, chi sihi, ta cha cuenda tandihí ñu chahñi.

¹⁰ Nyaá ley cuan cha cuenda ñu iyó chihin rayi o ñusihí ta ñima yi ña o ñasihí ra cuví. Nyaá chi cha cuenda ra ca iyó chihin tahan yi, ta cha cuenda ñu suhu cha chii ñáyivi, ta ñu cuendu, ta ñu cha catyí: “Chito vaha Nyoo”, ta ña ndicha cha cahán ñu. Ta suri nyaá tucu ley cuan cha cuenda yóo ñu cha ña nyicon cuhva cahan tuhún Nyoo.

¹¹ Ta tuhun tyaqui xaan cha sacoto Nyoo chi yo cha cuenda ra Cristo, ican cuví tuhun cha nacuhva cuenda Nyoo chii vatyí sacote chi ñáyivi. Maa ra cuví ra cha sacahnú yo.

Chahá ra Pablo tyahvi nyoo chi Nyoo vatyí nyehé ndahvi ra chi ra

¹² Nacuhvé tyahvi nyoo chi Sutu Mañi yo Jesucristo cha cuenda tunyee iñi cha chaha ra chii ta nyehe ra chi tari noo ra chinó vaha iñi, ta natyaa tyiño ra chii vatyí sacuví tyiño nuu ra.

¹³ Tyehe caa sacuvi ra chihin vasi ta ityi chata ca yuhu cahan ña vahi siqui ra. Chica nyiquen chi ra ta cahan cuehi chi ra. Soco Nyoo cundahvi cuñi ra nyehe ra chii, vatyí yuhu ta chino ca iñi chi ra, ta ña chite cha chinyacuví.

¹⁴ Ta tyinyee xaan Sutu Mañi yo chii. Ta chaha ra cha chino xaan iñi yo chi ra, ta cha cuñi xaan yo chi ñáyivi vatyí in ri cuví yo chihin ra.

¹⁵ Ta ndicha, cha ndicha vaha cuví tuhun ihya. Ta tahán chi cha chino iñi yo, vatyí ra Cristo Jesús quichí ra siqui ñuhu ñáyivi ihya vatyí sacacú ra chi ñu iyó cuatyí. Ta yuhu cuví noo ra quiñi caa ca cha nuu tandihí ñu cuan.

16 Yucuan chaha xihna que tava Nyoo chii nu quiñi caa vatyí tacuhva sañaha ra Jesucristo chi ñáyivi tyi cuñí xaan ra chi ñu. Tacuhva vatyí nachino iñi ñu ta cucoo ñu noo ñayivi chaa cha ma naa ca maa.

17 Yucuan chaha na sacahnu yo chi ra cha tyicuan ri nyacá ñaha, ra cha ñahri tuhun chihi iyó chi, ra cha ña cuví nyehe yo chi, ra cha noo ri maa ra cuví Nyoo ta chitó ra tandihi cha chiñi tuñi. Na sacahnu yo chi ra ta na cunyaca ñaha ra tyicuan ri maa. Ta na cuví chi tyicuan caa.

18 Ihya tuhun chahí chuun, yoho Timoteo sehi, vatyí cañi tahan vahun chihin tatyí ña vaha chihin cha chinó iñun, ta chihin cha vaha cuñí añimon tyi chitón tyi vaha sacuvun noo cha sacuvún vatyí suri tuhun ihya cachaha ra hermano chuun chihin ndusu Nyoo.

19 Ta ma sandihun cha chinó iñun chi Nyoo ta sacuvun cha vaha na vaha cuñi añimon. Vatyí sava ra sandihi ra tuhun ihya, yucuan chaha caquita xiin ra.

20 Tyicuan caa sacuvi tucu ra Hime-neo ta ra Alejandro. Ta yucuan chaha nacuhva cuende chi ra chi cuihna, na cacutuhva ra yoso caa tahan chi sacuvi ra ta ma cahan ña vaha ca ra chi Nyoo.

2

Nu sañaha ra Pablo yoso caa cacan tahvi yo

1 Catyí chi ndo vatyí cha nuu tandihi ca, tahan chi cha cacan tahvi ndo chi Nyoo cha cuenda tandihi ñáyivi. Ta nacuhva ndo tyahvi nyoo chi Nyoo cha cuenda ñu.

2 Cacan tahvi ndo cha cuenda ra cacuvi rey ta cha cuenda tandihi ra cacuvi tyiño. Cacan tahvi ndo cha cuenda ra tacuhva cuvi coo vaha yo, coo taxi yo, coo yo noo ñayivi cachi nuu Nyoo ta nuu ñáyivi. Ta cusaha ñu ñáyivi chi yo.

3 Vatyí ihya cuví cuhva tahan iñi Nyoo ra cha sacacú chi yo.

4 Ta maa ra cuñí ra vatyí cacu tandihi ñáyivi. Ta cuñí ra cha nacoto ñu cha ndicha.

5 Vatyí iyó noo ri Nyoo. Ta iyó noo ri ra cuví chaa nuu Nyoo tyiño nuu yo. Ican ra cuví ra Cristo Jesús. Ta cuví ra ñáyivi tari maa yo.

6 Ta maa ra Jesucristo chaha ra ñayivi ra tyiño nuu tandihi ñáyivi. Tyiyahvi ra cuatyí yo tacuhva cuvi cacu tandihi yo. Ta chinó cava cuan quivi tyaa maa Nyoo cuhva.

7 Cha cuenda ihya, tyatyíño Nyoo chii, vatyí cahin tuhun ra, ta cuví apóstol ra, tachi ra chii vatyí sañahi chi ñu cha ñima ñu Israel cuví, yoso caa nachino iñi ñu cha ndicha. Ta nyoho chitó ndo tyi ña tuhvé cahin cuendu vatyí cuenda ra Cristo yihí.

8 Yucuan chaha cuñí vatyí cacan tahvi rayi tandihi ri ityi. Ta na coo ra noo ñayivi ndi. Ta na sacahnu ra chi Nyoo chihin cha nacoñehe ra ndaha ra nuu Nyoo. Ta vaha caça xiñi ra. Ta ma coo ra tisihi chihin ñáyivi. Ta ni ma xaan ra.

9 Tyicuan caa tucu ñusihi. Cachi cuhva cuihno ñu, tari cuhva tahan chi cuihno ñu yihí cuenda Nyoo. Ta ma iyo xaan cuihno ñu. Ma iyo xaan sanduvii ñu xiñi ñu. Ñima chihin xuhun cuaan o yuu tyaqui, o chihin sahna yahvi xaan sanduvii ñu chi ñu.

10 Soco chihin cha cachi coo ñu ta chihin cha sacuvi ñu cha vaha na sanduvii ñu chi ñu, tari tahan chi sacuvi ñu nacuhva cuenda chi chi Nyoo.

11 Ta taxi ri cunyaa ñusihi ta tyasoho ñu tuhun Nyoo. Ta saha ñu ñáyivi chi ra chahá tuhun chi ñu.

12 Vatyí ña chahí cha sañaha ñusihi. Ni ña chahí cha cunyaca ñaha ñu chi rayi. Soco taxi ri na cunyaa ñu.

13 Vatyí xihna ca chi ra Adán savaha Nyoo ta yaha cuan ta chi cu Eva.

14 Ta ñima chi maa ra Adán sandavi ñaha ra ña vaha, socio chi ñasihi ra cuví sandavi ñaha ra ta chicoo cuatyí ña.

15 Soco ñusihi cucacu añima ñu cha cuenda cha sacacú ñu sehe ñu, ta sacuhnú vaha ñu chi chi. Soco tatu chinó vaha iñi ñu chi Nyoo ta cuñí ñu chi ra ta chi ñáyivi, ta cachi coo ñu

nuu Nyoo ta nuu ñáyiví ñandihí.

3

Yoso caa tahán chi coo ra yihí ndaha chi ñu yihí cuenda ra Cristo

¹ Ndicha tuhun ihya: Tatu minoo ndo cuñí ndo quindaha ndo chi ñáyiví yihí cuenda ra Cristo, vaha xaan tyiño quichí cuvi iñi ndo sacuvi ndo.

² Soco niñi cuñí chi vatyí ra yihí ndaha vehe ñuhu cuvi ra noo ra ñahri cuatyí iyó. Ta cuñí chi cha coo noo ri ñasihí ra. Ta cuñí chi cha cuvi ra noo ra tyihí tuñi vaha iñi yoso caa cunyacuvi, noo ra vaha nuu ñáyiví. Ta cuñí chi vatyí vaha cuví ra chihin ñáyiví chaa vehe ra. Ta coto ra yoso caa sañahá ra.

³ Ma cuvi ra noo ra tuhvá chihi ndixi, ni ma cuvi ra noo ra nanducú tisihí. Ta ma cuvi ra noo ra nducu xuhun noo cuhva ña vaha. Soco cuñí chi cha vaha ñáyiví cuví ra, ta cuvi ra noo ra ña tuhvá cañi tahan. Ta ma cuvi ra noo ra cuñí xaan xuhun.

⁴ Ta cuvi ra noo ra yihí ndaha vaha ñasihí ta sehe: Noo ra nyacá ñaha chi sehe tacuhva vatyí quichaha ñu chi ra, ta saha ñu ñáyiví chi ra.

⁵ Vatyí tatu ña chitó ra cunyaca ñaha ra vehe ra, ¿yoso caa cusaha cumi ra vehe ñuhu Nyoo?

⁶ Ta noo ra nichaa chihin tuhun Nyoo ña tahán chi quindaha ra vehe ñuhu vatyí coto sacahnu ra chi ra ta tachi tuñi Nyoo chi ra, tari tachi tuñi ra chi cuihna vatyí cahnu sahá ra chi ra.

⁷ Ta sin ri cuñí chi vatyí cuví ra noo ñáyiví vaha nuu ñu ityi chata, coto tahan ra ticahan nuu ta cana cava ra chichi ndaha cuihna.

Yoso caa tahán chi coo noo ra tyinyee chihin tyiño vehe ñuhu

⁸ Ta tyicuan caa tucu ra tyinyeeé chihin tyiño vehe ñuhu. Na cachi coo ra. Ma cuvi ra noo ra cuendu, ta ma cuvi ra noo ra tuhva chihi ndixi ñandihí. Ta ni ma nyiyo iñi ra saha canaa ra xuhun chihin noo cuhva ña vaha.

⁹ Cuñí chi vatyí cutuñí vaha iñi ra yoso caa tahán chi chino iñi yo chi

Nyoo ta coto vaha ra tyi vaha cuahan ra chihin Nyoo.

¹⁰ Ta cuñí tucu chi cha nyehe xihna yo tatu vaha iyó ra chihin Nyoo tyicuan ta cuví sacuvi ra tyiño vehe ñuhu.

¹¹ Ta tyicuan caa tucu ñusihí, cuñí chi vatyí cuví ñu ñáyiví vaha. Ma ñi ñu cuendu. Ta cachi coo ñu. Ta niñi cuñí ñu chihin tandihí ri tyiño.

¹² Noo ra tyinyeeé chihin tyiño vehe ñuhu na coo noo ri ñasihí ra. Ta cuñí chi vatyí coto vaha ra cunyaca ñaha ra chi sehe ra ta ñáyiví nyicú vehe ra.

¹³ Vatyí ra tyinyeeé, tatu vaha sacuvi ra tyiño cha tahán chi sacuvi ra, cuahan ca ra ityi nuu chihin Nyoo. Ta cuní ca iñi ra cahan ra tuhun cha chinó iñi ra chi ra Cristo.

Noo tuhun xehe cuenda cuhva chino iñi yo

¹⁴⁻¹⁵ Yihí iñi cha cuhin cha numi ri cunyehe nu nyaún. Soco tatu cucuei, yucuan chaha tyaí ihya chuun tacuhva coton yoso caa tahán chi coo ñáyiví cuenda Nyoo. Vatyí maa yo cuví yo vehe ñuhu Nyoo nyitó. Ta cuñí chi vatyí sañihí ca yo sañaha yo cha ndicha cha cumí yo chi inga ñáyiví.

¹⁶ Cha ndicha cuví vatyí yaha xaan cuhva cahnu tuhun xehe cha sanatuví Nyoo, vatyí coo yo tari iyó maa ra:

Nyoo nanduví ra rayí ta chicoo ra chichi noo coño ñuhu tari maa yo.

Ta catyí Tatyí Ii vatyí vaha ra.

Ta nyehe ángel chi ra.

Nicahnu ñuhu ñáyiví cahán ñu tuhun ra.

Ta chinó iñi ñáyiví chi ra nicacahnu ñuhu ñáyiví.

Ta cuanuhu ra nya gloria.

4

Nu catyí ra Pablo vatyí yihí ñu ma chino ca iñi ñu nu cuahan chi tyembu

¹ Soco cahán cachi Tatyí Ii ta catyí chi vatyí nu cuandihí tyembu yihí ñu ma chino ca iñi ñu chi ra Cristo vatyí cutyasoho ñu tuhun cahán tatyí ña vaha cha sandavi ñaha chi ñu. Ta cunyicon ñu ndusu ñuhu cuihna.

² Cutyasoho ñu tuhun cahán ñu cuendu. Ta ñu cuendu cuan ña tuví ca iñi ñu cuhva nyacuví ñu vatyi cha ndundava xaan añima ñu. Tari cha cayu añima ñu chihin noo caa ihñi ta ndundava chi cuví cuan.

³ Cucasi ñu cuan nu tandaha ñáyivi. Ta cucatyi ñu vatyi ña vaha cha cachi yo suhva nuu nyayu. Vasi chitó yo tyi tandihi nuu cha cachi yo, Nyoo savaha. Ta tandihi yo cha chinó iñi yo chi Nyoo ta chitó yo cha ndicha, cuvi cachi yo ta nacuhva yo tyahvi nyoo chi ra.

⁴ Vatyi tandihi cha savaha Nyoo ta vaha. Ta ña tahán chi catyi yo tyi ña vaha. Cuví cachi yo tatu nacuhva yo tyahvi nyoo chi Nyoo.

⁵ Vatyi ndundi chi cha cuenda tuhun Nyoo ta cha cuenda cha chicán tahvi yo chi Nyoo.

Yoso caa noo ra vaha sacuví tyiño nuu ra Jesucristo

⁶ Tatu sañahun tuhun ihya chi tandihi yañi yo, cua cuvun noo ra vaha cahán tuhun ra Cristo Jesús. Ta tuhun cha chinó iñi yo ta tandihi tuhun ra Cristo cha nyicón, cua tyinyee chi chuun.

⁷ Soco ma quichahun tuhun cuendu, tuhun tondo cha iyó ñáyivi ihya. Vaha ca saniñun chuun sacuvun maa maa ri cuhva cuñi Nyoo.

⁸ Cha saniñi yo ndunye coño ñuhu yo tyinyee chi suhva chi yo. Soco cha saniñi yo sacuví yo cuhva cuñi Nyoo, tyinyee chi chi yo tandihi ri cuhva, vatyi tyinyee chi chi yo ñáyivi ihya. Ta tyinyee tucu chi chi yo cha coo vaha yo nu cuchaa yo andivi.

⁹ Ta ndicha, cha ndicha vaha cuvi tuhun ihya ta tandihi yo tahán chi cha chinó iñi yo.

¹⁰ Ta suri cha cuenda ihya sahá tyiño yo ta nyehé yo tindoho vatyi nyatú yo naquehen yo cha vaha cha chaha Nyoo nyito chi yo. Vatyi maa ra cuvi ra sacacú chi tandihi ñáyivi, ta xihna ca chi yoó cha chinó iñi yo chi ra.

¹¹ Ihya tuhun cua sañahun chi ñáyivi, ta cusaniñun chi ñu na cuhva ñu.

¹² Cachi sañahun chuun coto ma saha ñu ñáyivi chuun cha cuenda cha cuvún noo ra tyivaa. Soco sañahun noo cuhva vaha chi ñu chihin cuhva iyón, chihin cuhva cahun. Sañahun chi ñu, chihin cuhva cha cuñún chi Nyoo ta chi ñáyivi, chihin cuhva chicá xiñun, chihin cuhva chinó iñun, ta chihin cuhva sacuvún maa maa ri cha vaha.

¹³ Cha ni ri ca cha cumañi chai nu nyicú ndo, sacuaaha con tuhun Nyoo nuu ñu yihí cuenda Nyoo. Cuhva tuhun chi ñu ta sañahun chi ñu yoso caa caca vaha ñu ityi Nyoo.

¹⁴ Sañahun cuenda nyatu cha chaha Nyoo chuun quivi cha tyiso ra yindaha vehe ñuhu ndaha ra sicun ta cahan ra yoso cuhva chahá Tatyí Ii Nyoo chi ra.

¹⁵ Tyaa vaha xiñun tuhun ihya ta sacuvun. Tacuhva vatyi nyehe ñáyivi yoso caa cuahun ityi nuu ca chihin Nyoo.

¹⁶ Saha cuenda chuun chihin cuhva iyón. Ta saha cuenda cuhva sañahun chi ñáyivi ta ñaha saña ndahun cha vaha. Tatu tyicuan caa sacuvún cuacacun, ta cucacu ñu chiñi tuhun sañahun ñandihí.

5

Nu chahá ra Pablo tuhun chi ra Timoteo yoso caa cuhva ra tuhun chi ñu yihí cuenda ra Cristo

¹ Ma cahun chi noo ra chahnu, soco cuhva tuhun chi ra tari cha sutun cuví chi ra. Ta chi ra tyivaa cuhva tuhun chi ra tari cha yañun cuví chi ra.

² Ta chi ñu chahnu tari cha sihun cuví chi ñu. Ta chi ñu tyivaa, tari cha cuhvon cuví chi ñu. Ta sacuvun chihin cha vaha chicá xiñun.

³ Tyinyee chi ñu ndahvi ñu chihí yíi tatu yori ñáyivi chi ñu cha tyinyee chi ñu.

⁴ Soco tatu iyó noo ñaha chihí yíi ta iyó sehe ña, o sehe ñañi ña, cuñi chi cha cutuhva xihna maa ñu cha tyinyee ñu chi ña. Na nicohon iñi ñu

yoso caa saha cuenda sihi ñu chi ñu ta luhlu ñu. Ta tyicuan caa tahán chi cha saha cuenda tucu ñu chi ña vityin. Vaty cha tyehe caa vaha xaan, ta cha tahán iñi Nyoo cuví.

⁵ Soco ñu chihí yíi cha ndoo noo tuhun ri maa, chi Nyoo tyihí ñu iñi ñu ta tyicuan ri chicán tahvi ñu chi ra ñicahñu ta cha cuaa.

⁶ Soco noo ñaha chihí yíi cha nducú tusíi iñi cha iyó ñáyivi ihya, tari quivi cha chihí ña cha cuenda tuhun Nyoo cuví cuan, vasi iyó ña.

⁷ Sacoto tuhun ihya chi tahan yo tacuhva cha ma ñihi ñáyivi cuhva cahan ñu chi ñu.

⁸ Soco tatu yihí yo cha iyó ñáyivi chi yo cha chihí yíi ta ña chicá xiñi yo cha cuenda ñu, ta cha xihna ri cha cuenda ñu vehe yo, tari quivi cha ña chinó iñi yo chi Nyoo cuví cuan. Ta cahnu ca cuatyí yo ta ñima ca ñu cha ña chinó iñi chi Nyoo.

⁹ Nu tutu cha nyaá sivi ñu chihí yíi, na cunyaa sivi ñu, soco ñu cha yaha ca uñi xico cuiya. Ta cuví cunyaa sivi ñu tatu noo ri yíi ñu chiyo.

¹⁰ Ta cuñí chi tatu ñohó nuu vaha ñáyivi chi ñu cha cuenda cha vaha cha sacuví ñu: tatu sacuhnú vaha ñu sehe ñu, tatu chaha ñu cha cachi ñu cha vehe ñu, tatu sacuvi ñu tyiño nuu yañi yo chihin cha tandihí añima ñu chihin cha ndahvi sahá ñu chi ñu, tatu tyinyee ñu chi ñu nyehé tindoho, tatu tyehe caa sacuví ñu tandihí nuu cha vaha, cuví cunyaa sivi ñu.

¹¹ Soco ma tyihi ndo sivi ñu cha ta chaa ca uñi xico cuiya coto coo quivi ta quichi cuvi iñi ñu tandaha ñu inga chaha ta sandihí ñu tuhun sacuví ñu tyiño nuu ra Cristo.

¹² Ta tyicuan caa cucoo cuatyí ñu vatyí ña sacuví ca ñu cuhva catyí ñu.

¹³ Ta siin ri tatu chicá noo suchan ri maa ñu tahan tahan vehe ñáyivi. Ta ñima yucuan ri soco chicá noo ndihí ñu chihin cuendu ñu. Ta tyihí ñu chi ñu noo nu ñahri cuenda ñu. Ta cahán ñu cha ña tahán chi.

¹⁴ Yucuan chaha vaha taxin ca na tandaha ñu inga chaha. Na coo sehe ñu. Na saha cuenda ñu vehe ñu. Ta

ma cuhva ñu ityi chi ñu xaan iñi chi yo vatyí cahan nyaa ñu chi yo.

¹⁵ Tyehe caa catyí chuun vatyí yihí ñu cha saña ñu chi Nyoo ta na nyicon ñu chi ra ña vaha.

¹⁶ Tatu noo ñu yihí cuenda Nyoo ta iyó noo ñáyivi chi ñu cha chihí yíi, cuñí chi cha tyinyee ñu chi ñu, tacuhva cha ma cuví ñu noo carga chi vehe ñuhu. Ta tyicuan caa ta cuví tyinyee ñu vehe ñuhu chi ñu chihí yíi cha ndicha ndicha chiñuhú chi.

¹⁷ Ra chahnu ra nyisó tyiño vehe ñuhu, cuñí chi vatyí saha xaan ñu ñáyivi chi ra. Ta cha xihna ca chi ra cahán tuhun Nyoo ta ra sañahá chi ñu.

¹⁸ Vatyí tuhun Nyoo catyí chi: “Ma tyihun yoho yuhu sindiqui nu saha tyiño ti tacuhva vatyí cuvi cachi ti chiin.” Ta catyí tucu chi: “Iyó ityi chi ra cha sahá tyiño cha ñihí ra yahvira.”

¹⁹ Tatu tyaá ñu cuatyí siqui noo ra chahnu ra nyisó tyiño vehe ñuhu, ta tatu ña quita uvi o uñi tahan cha ndaa, ma quichahun chi ñu tyaá cuatyí cuan.

²⁰ Soco ñu sañihi ca sacuvi cuatyí cuñí chi cha catyí ndo chi ñu chihin nuu tandihí ñu nyicú vehe ñuhu tacuhva vatyí tandihí ca ñu na cuyuhvi ñu sacuvi ñu cha ña vaha.

²¹ Tyatyíne chuun chihin nuu Nyoo ta chihin nuu Sutu Mañi yo Jesucristo, ta chihin nuu ángel cha nacachí ra. Ta catyí chuun vatyí quichahun cha catyí ihya ta ma cuhun tumañi iñi chi noo ra ta ni chi inga ra.

²² Ma numi xaan ri tyaa tyiño chi noo ra cha cuvi ra tyiño vehe ñuhu. Coto ndoo cuatyí sacuví ra sicun. Saha vahun cuenda chuun chihin tandihí cha sacuvún ta ma cuhvon ityi chi cha ña vaha.

²³ Ta vatyí iyó noo cuehe chichun, ma cohun maa ri maa ndutya, soco cohun chiin vinu ñandihí.

²⁴ Yihí ñáyivi quetuví ri cuatyí ñu cha cumañi ca cutuñi chi ñu. Ta yihí ñu nya cha yaha cutuñi chi ñu ta cuquetuvi cuatyí ñu.

²⁵ Ta tyicuan caa tucu cha vaha cha sacuví yo, ña xehe caá. Soco vasi ña tuví cha numi ri, ñima tyicuan ri cucohon xehe chi.

6

¹ Ñu cha cuvi musu cuñí chi cha saha vaha ñu ñáyiví chi chitoho ñu. Tyicuan ta ma ñihi ñáyiví cuhva cahán ña vaha ñu siqui Nyoo ni siqui tuhun ra, cha sañahá yo.

² Ta tatu noo musu iyó chitoho ra cha yihí cuenda Nyoo, ña tahán chi cha ma saha ra ñáyiví chi ra vatyí yañi ra cuenda Nyoo cuví chi ra. Soco ñihi ca cuñí chi cha sacuví ra tyiño nuu ra, vatyí chinó tucu iñi maa ra chi ra Cristo, ta Nyoo cuñí ra chi ra. Sañaha tuhun ihya chi ñu hermano ta cuhva tuhun chi ñu na sacuvi ñu.

Cuhva iyó yo ta cusí cuñi yo

³ Tatu iyó noo ra cha sañahá inga tuhun cha ña chachí tahan chi chihin tuhun vaha cha sañahá Sutu Mañi yo Jesucristo, ta ni ri chihin tuhun vaha cha cuahan sacuahá yo,

⁴ cuví ra noo ra cahnu sahá chi. Ta tahán xaan iñi ra cuvi yuhu ra siqui noo cha ñima ri tuhun. Tari noo cuehe cuví cuan. Ta cha cuenda tuhun ihya cacú tisihi ta tuhun nyiyo iñi, tuhun cha cahán ña vaha chi tahan, ta tuhun cha ña vaha cuñi nyehe chi tahan.

⁵ Ta tyicuan ri cañi tahan ñu vatyí quiñi chica xiñi ñu, vatyí ña chitó ñu cha ndicha. Nyacua cuñi maa ñu tyi cusaha ganaa ñu xuhun chihin tuhun Nyoo. Ma cutahan ndo chihin ñu cuan.

⁶ Ndicha vatyí cha sacuví yo cuhva catyí Nyoo ta ndoó yo vaha chihin cha cha chahá ra chi yo cuví chi tari noo cha tyayí iyó chi yo.

⁷ Vatyí ñahri nyiso yo vachi yo ihya ñáyiví. Ta ñahri cuiso yo cunuhu yo quiví cúvi yo.

⁸ Soco tatu iyó cha cachi yo ta sahma ñihnó yo, na cusí iñi yo, ta na ndoo yo vaha chihin yucuan ri.

⁹ Soco ñu cuñi cutyayí, nducú nyehe ra ña vaha chi ñu. Caná cava ñu chichi xayu ra. Cutondó xiñi ñu

chihin cha cuaha xaan cha quichi cuví iñi ñu. Ta sativí chi chi ñu ta nu ndihi tuhun cutiví ndihi ñu ta cunaa ñu.

¹⁰ Vatyí cha cuñi xaan yo xuhun, yucuan cuví nu caña tandihí ca nuu cha ña vaha. Ta yihí ñu cha tyehe caa cuñi xaan ñu xuhun, ta cha cuenda cuan sandihí ñu tuhun cha chinó iñi ñu tuhun Nyoo. Ta yucuan cuví nu suri chi maa ñu sanyehé ñu tindoho.

Lucha cha iyó chi yo cha chino iñi yo chi Nyoo

¹¹ Soco yoho cuvún noo rayí cuenda Nyoo. Caca cono chi tandihí cha quiñi caa cuan. Ta cuhun chata cha cuti. Vaha coun nuu Nyoo. Cuní iñun chihin ra. Cuñun chi ñáyiví. Coo cha cama iñun chihin tandihí cha cuví chuun. Ta masu cuví iñun.

¹² Ñihi sacuvun tyiño nuu Nyoo vatyí tyicuan caa tahán chi tyi chinó iñi yo chi ra. Ta ma saña ndahun ñáyiví chaa cha ma naa ca maa cha chahá Nyoo chi yo. Vatyí ican cuenda cuan nacana Nyoo chuun, quiví catyí cachun tyi chinó iñun nuu cuaha xaan ra cuví cha ndaa.

¹³ Ta chihin nuu Nyoo, ra cha chahá ñáyiví coo tandihí cha iyó, ta chihin nuu ra Cristo Jesús ra cha chahá vaha cuenda nuu ra Poncio Pilato, catyí chuun vityin,

¹⁴ na sacuvun tandihí cha catyí chuun tacuhva ma cuhvon cuhva cha cahán ñáyiví chuun nyacua nya quiví quichi Sutu Mañi yo Jesucristo.

¹⁵ Na chaa maa quiví, Nyoo cusaquichi ra chi ra Cristo inga chaha. Ican ra cuví ra cha sacahnu yo, ta noo tuhun ri maa ra cuví Nyoo ra iyó xaan tunyee iñi chii. Rey cuví ra cuenda tandihí ca ra cuví rey. Ta nyacá ñaha ra chi tandihí ca ra cha nyacá ñaha.

¹⁶ Noo ri maa ra cuví ra ra ñahri tuhun chihi iyó chii. Ta iyó ra nu ndichin nu yori maa tuhva. Ta ni noo ñáyiví ta nyehe ca ñu chi ra. Ta ni ña cuví nyehe ñu chi ra. Chi maa ra na sacahnu yo. Ta na cunyaca ñaha ra

tyicuan ri maa. Ta na cuvi chi tyicuan caa.

¹⁷ Ta ñu cha iyó cha tyay#i chi ñayiv#i ihya, catyí chi ñu vatyí ma cahnu xaan saha ñu chi ñu. Ta ma cuita iñi ñu chi cha tyay#i cha iyó chi ñu. Vatyí coto coo quiv#i ta ndih#i cha tyay#i cuan. Soco na cuita iñi ñu chi Nyoo nyitó, vatyí maa ra cuví ra chahá tandih#i. Ta cuaha chaha ra chi yo tacuhva cus#i cuñi yo.

¹⁸ Catyun chi ñu tyay#i na sacuvi ñu cha vaha ta n#i iñi ñu c#ihva ñu cha iyó chi ñu chihin cha ma uhvi cuñí ñu.

¹⁹ Tyicuan ta coo cha tyay#i ñu andiv#i ta cutyinyee chi chi ñu nu cuahan ca chi quiv#i. Ta tyehe caa cuvi coo ñu ñayiv#i cha ma naa ca maa.

Nu ndih#i chahá ra Pablo tuhun chi ra Timoteo

²⁰ Yoho Timoteo saha cumi vahun tyiño cha chahá Nyoo chuun. Ma tyasohun tuhun cha s#in caa, tuhun cha ñima ri tuhun. Ma quichahun tuhun cha catyí ñu vatyí cha chiñi tuñi cuví, vatyí ña ndicha.

²¹ Vatyí cha cuenda cuan yih#i ñu cha quita caxiin ñu ityi Nyoo. Ta ña chinó vaha ca iñi ñu cha ndicha.

Ta Nyoo na nasoco ra chi ndo.

Ta na cuvi chi tyicuan caa.

Carta Cha Cu Uvi Cha Sacuhun Ra Apóstol Pablo Chi Ra Timoteo

Nu tyaq ra Pablo noo tutu chi ra Timoteo

¹ Yuhu ra Pablo cuví noo apóstol ra Jesucristo vatyí tachí ra chii na caque tyiño ra. Vatyí tyicuan caa cuñí maa Nyoo, tyi cuñí ra cha sacote chi ñáyiví vatyí chahá ra noo ñáyiví chaa chi tandihí ñu cha ndu ñin ri chihin ra Cristo Jesús vatyí nacuhva cuenda ñu chi ñu chi ra.

² Tyaí tutu ihya chi yoho Timoteo. Ta cuñí xain chuun tyi tari cha sehi cuví chuun. Ta cuñí vatyí Nyoo Sutu yo ta Sutu Mañi yo Jesucristo na nasoco ra chuun. Ta na nyehe ndahvi ra chuun. Ta na coo ca cha taxi ri cuñí añimon saha ra.

Nu catyi ra Pablo chi ra Timoteo tyi nacatyí ra chi ñáyiví tyi cuenda ra Cristo yihí ra

³ Tyicuan ri nicohón iñi tuhun yoho cuhva cha chicán tahvi chi Nyoo ñicahñu ta cha cuaa. Ta nacuhvé tyahvi nyoo chi ra cha cuendon. Nuu maa ra sacuví yuhu tyiño chihin cha vaha chicá xiñi, tari sacuví tucu ñáyiví chii ta cha naha.

⁴ Tyicuan ri nicohón xaan iñi chuun ta nicohón xaan iñi tuhun yoso caa chacun quiví cuachiye chiña. Ta cuñí xain nyehí chuun inga chaha ta cusii iñi chuhun.

⁵ Vatyí nicohón iñi yoso caa chingo xaan iñi cu Loida chiton chi Nyoo, ta cu Eunice sihun ñandihí. Tyicuan caa tucu yoho chinó xaan iñun vityin.

⁶ Yucuan chaha chahí tuhun chuun vatyí na saniun iñun ta cotyiño nyatu cha cahun tuhun Nyoo cha chaha ra chuun quiví tyisé ndahi sicun.

⁷ Nyoo ña chaha ra cha yuhvi yo. Soco chaha ra noo tunyee iñi cahnu chi yo. Ta chaha ra vatyí cuñí yo chi tahan yo. Ta chaha ra cha cunyaca ñaha vaha yo chi yo.

⁸ Yucuan chaha ma cahan nuun cahun tuhun Sutu Mañi yo. Ta ri cha ma cahan nuu cha cuenda cha ñohí vehe caa cha cuenda ra. Soco chihin tunyee iñi chaha Nyoo chuun ta chihin cha iyó vaha iñun cunyeun tindoho cha vachi siqui yo cha cuenda tuhun Nyoo.

⁹ Vatyí ican ra sacacu chi yo. Ta nacana ra chi yo vatyí coo yo noo ñáyiví ii. Ñima cha cuenda cha vaha cha sacuví yo ta nacana ra chi yo, soco vatyí tyicuan caa tyaq ra cuhva nyata ni cumañi ca chingo ñuhu ñáyiví. Vatyí nya quiví cuan cuñí ra chi yo cha ñin ri cuví yo chihin, ra Cristo Jesús.

¹⁰ Ta vityin cha quichí ra Jesucristo sacacu ra chi yo, nacoto yo vatyí tyicuan caa cuñí ra chi yo. Ta nu quichí ra, sataní ra tandihí tunyee iñi cha iyó chi tuhun chihi. Ta chihin tuhun vaha cahan ra, tava ra nu ndichin tuhun cha coo yo noo ñáyiví chaa cha yori cuví sativí.

¹¹ Nyoo tyaq ra tyiño chii vatyí cahun tuhun ihya chihin ñáyiví. Tachí ra chii vatyí cuví noo apóstol chi ra, ta sañahí chi ñu cha ñima ñu Israel cuví.

¹² Yucuan chaha nyehí tandihí tindoho ihya. Soco ña cucahán nui vatyí chitó mai yóo chi chinó iñi. Vatyí nacuhva cuende chii chi ra, ta chitó vahi vatyí cuví saha cuenda ra chii nyacua nya quiví quichi tucu ra.

¹³ Cunyicon tuhun vaha cha chahí chuun. Ta coun chihin cha chinó vaha iñun chi Nyoo. Tyicuan ri cuñun chi ñáyiví tahan yo. Vatyí yucuan cuví cha chahá Nyoo chi yo tyi ñin ri cuví yo chihin ra Cristo Jesús.

¹⁴ Ta maa Tatyí Ii cha iyó añima yo na tyinyee chuun ta saha cumun tuhun vaha cha chaha Nyoo chuun.

¹⁵ Cha chitón vatyí tandihí ra ityi Asia chiña casandoq ra chii, tari ra Fígelo ta ra Hermógenes.

¹⁶ Soco ra Onesíforo na nyehe ndahvi Sutu Mañi yo chi ñáyiví chi ra vatyí cuaha xaan chaha quichí sandunyee ra iñi. Ta ña cucahan nuu ra cha cuenda cha ñohí vehe caa.

¹⁷ Soco qui^vi chinyaa ra ñuu Roma ihya, ña sandihⁱ ra tuhun cha nanducu ra chii nyacua nya cha nañihⁱ ra chii.

¹⁸ Sutu Mañi yo nacuhva ra cha ñihⁱ ra tumañi iñi qui^vi cha cutuñi chi yo nuu ra. Chitó vahun yoso cuhva tyinyee ra Onesíforo chi yo nya ñuu Éfeso chiña.

2

Noo sindaro vaha ra Jesucristo

¹ Ta yoho sehe luhli, sandunyeey iñun chihin tunyee iñi cha chahá ra Cristo Jesús chuun cha cuenda cha ñn ri cuvⁱ yo chihin ra.

² Tuhun cha chiñun cha cahin nuu cuaha ñáy^vi, nacatyⁱ chi ra cha ñi iñi chinó iñi chi Nyoo, ra cha cacuvⁱ sañaha chi inga ñu.

³ Ta cunyeun tindocho tari noo sindaro vaha ra Jesucristo.

⁴ Ni noo ra cuvⁱ sindaro ta ma cuvⁱ tyihⁱ ra chi ra chihin inga tyiño. Vatyⁱ cuñⁱ chi sacuvⁱ ra maa maa ri cha catyⁱ ra cuvⁱ nuu chi ra.

⁵ Ta tyicuan caa tucu ra canyasi^quí, ma saha canaa ra cha tahán chi saha canaa ra tatu ma cunyasi^quí ra tari cuhva tahán chi.

⁶ Noo ra sahá tyiño chichi cuhu, tahán chi cha saha tyiño xihna ra, yucuan ta cachi ra cha quitá nu iyó tyiño sahá ra.

⁷ Caca xiñun tuhun cha catyⁱ chuun ihya, ta maa Sutu Mañi yo cucuhva ra cha cutuñi iñun tandihⁱ.

⁸ Nícohon iñi tuhun ra Jesucristo, ra cha nandoto cha yahá nyehe ra tindocho ta chihⁱ ra. Cuvⁱ ra tata rey David. Ta ican ihya cuvⁱ tuhun Nyoo cha cacu añima yo cha chahá ra vatyⁱ cahin tuhun.

⁹ Ta cha cuenda tuhun ihya cunyeⁱ tandihⁱ tindocho nyacua nuhñi chihin cadena tari noo ra quiñi iyó. Soco tuhun Nyoo ña nuhñi chi.

¹⁰ Yucuan chaha cunyeⁱ tandihⁱ tindocho cha cuenda cha vaha chi tandihⁱ ca ñu nacachⁱ Nyoo chi, tacuhva vatyⁱ cuvⁱ cacu tucu tandihⁱ ñu. Chihin cha ndu ñn ri yo chihin ra

Cristo cuacacu yo ta cuñihⁱ yo noo nu tyaqui xaan cha ma ndihⁱ ca maa.

¹¹ Ihya cuvⁱ cha ndicha xaan:

Tatu cuvⁱ yo cha cuenda ra, coo tucu yo chihin ra.

¹² Tatu cunye^e yo tindocho, cucunyaca ñaha yo chihin ra.

Tatu catyⁱ yo tyi ña yihⁱ yo cuenda ra, maa ra cucatyⁱ ra tyi ñima ñáy^vi cuenda ra cuvⁱ chi yo.

¹³ Tatu sandocho yo chi ra, soco maa ra tyicuan ri sacuvⁱ ra cuhva catyⁱ ra.

Vatyⁱ maa ra ña tuhvá ra nasama ra tuhun cahán ra.

Tatu sahá tyiño vaha yo, cuaquita vaha yo

¹⁴ Sanicohun iñi ñu tuhun ihya, ta catyun chi ñu chihin nuu Sutu Mañi yo na sandihⁱ ñu cha cuvⁱ yuhu ñu cha ñima ri tuhun. Vatyⁱ cha cuvⁱ yuhu ñu tyehe caa, ñahri maa tuhun. Tyi sativⁱ ñu chi ñu tyasohó tuhun cahán ñu.

¹⁵ Sanñun ta cuhva cuendon chuun nuu Nyoo tari noo ra sahá tyiño vaha. Vatyⁱ ñahri cha cucahan nuun tatu chotyíño vahun tuhun ndicha yoso cuhva tahán chi.

¹⁶ Naha tyasohun tuhun cha ñima ri tuhun ñay^vi ihya. Vatyⁱ ñahri maa tyinye^e chi chi yo. Soco sativⁱ ca chi chi yo nuu Nyoo

¹⁷ vatyⁱ tari quih^vi xico ndiyⁱ noo nu cahvi, tyicuan caa cuvⁱ tuhun cuan vatyⁱ sativⁱ chi chi yo. Ta cuaha ñu cuativⁱ cha cuenda cuan. Ican cuvⁱ cha cuvⁱ chi ra Himeneo ta ra Fileto.

¹⁸ Vatyⁱ caquita caxin ra ityi vaha ta catyⁱ ra vatyⁱ tari qui^vi cha yahá nandoto yo ta ma nandoto ca coño ñuhu yo. Ta tyicuan caa satondoch^o ra cuhva chinó iñi suhva ñu.

¹⁹ Ta vasi yihⁱ ñu nducaxin ñu, soco Nyoo chacun ra cha ndicha, ta yucuan cuvⁱ cha ma nasama maa. Ta nyisó chi noo seña cha catyⁱ: “Sutu Mañi yo ñohó nuu ra chi ñu cuenda ra.” Ta catyⁱ tucu chi: “Tandihⁱ ñu nyisó sivⁱ ra Cristo na quita ñu nu quiñi caa.”

20 Chichi noo vehe cahnu, ñima maa maa ri ndaha tyiño chino chihin xuhun cuaan ta xuhun cuichin iyó. Iyó tucu cha chino chihin vitu ta chihin nyahyu. Yihí cuan chotyíño ñu chi nu vaha, ta yihí cuan cha chotyíño ñu nu ñima ri tuhun.

21 Tyicuan caa tucu maa yo tatu ña tiín cuenda yo tuhun cha ñima ri tuhun ñáyiví ihya, cuví yo noo ñáyiví cha chotyíño Nyoo chi, tari noo vaso xuhun cuaan. Ta cuñí chi vatyi cundií vasu cuan, tyicuan ta cuví cotyíño ra chi yo cha cuenda tandihí nuu vaha.

22 Ma caca xiñun tari chicá xiñi ra tyivaa ñáyiví ihya. Vatyi maa maa ri cha quiñi caa chicá xiñi ra. Coo noo ñáyiví cuiti. Chino vaha iñun chi Nyoo. Cuñun chi Nyoo ta chi ñáyiví. Coo taxi run chihin tandihí ñu yihí cuenda Nyoo, ñu cha chihin cha vaha añima chicán tahvi chi Sutú Mañi yo.

23 Ta ma quichahun tuhun cha ñima ri tuhun cha cuví yuhu ñáyiví. Vatyi chitón tyi chihin cuan cacú tisihi.

24 Ta noo ra sacuví tyiño nuu Sutú Mañi yo, ña tahán chi cañi tahan ra. Soco tahán chi cha vaha ñáyiví cuví ra chihin tandihí ñáyiví. Ta cuñí chi cha ñihi vaha ra cuhva sañaha ra tuhun Nyoo. Ta cuñí tucu chi cha cama cuví iñi ra chihin ñáyiví.

25 Ta chihin cha masu iñi ra cuñí chi cha sandundoo ra chi ñáyiví ndava iñi. Ta cuatu ra nasama Nyoo cuhva iyó ñu ta nacoto ñu cha ndicha.

26 Ta tyicuan caa ta cunducachi iñi ñu ta cuaquita ñu chichi ndaha ra cuví cuihna vatyi cha vityin nyacuví maa ra yoso cuhva cuñí ra chihin ñu.

3

Yoso caa cucoo ñáyiví nu cuandihí ca quiví

1 Ta cuñí tucu chi cōton vatyi nu cuandihí tyembu cuquichi quiví cha yíi xaan coo yo.

2 Vatyi cucoo ñáyiví ñu cuñí xaan suri chi maa. Ta cucuñi xaan ñu xuhun. Ta yaa xaan cucuvi ñu. Ta cahnu cusaha ñu chi ñu. Cucahan ña vaha ñu siqui Nyoo. Ta ma quichaha

ñu nu cahán sutu ñu ta sihi ñu. Ma nacuhva ñu tyahvi nyoo chi Nyoo, ni chi tahan ñu. Ma quichaha ñu chi Nyoo.

3 Ma cuñi ñu chi tahan ñu. Ma coo ticahnu iñi chi ñu chihin ñáyiví. Cuñi ñu cuendu. Ma cuví cunyaca ñaha ñu coño ñuhu ñu. Xaan xaan cucuvi ñu. Ta ma cuñi nyehe maa ñu cha vaha.

4 Cunaxico tuhun ñu chi tahan ñu. Ta ndava xaan cucuvi iñi ñu. Ta cacaña iñi ñu sacuvi ñu ñáá ndihí cha cuñí ñu. Ta maa maa ri cha quichi cuví iñi ñu cunanducu ñu, ta ma nanducu ñu chi Nyoo.

5 Cunyicon ñu noo cuhva tari cha chinó iñi ñu chi Nyoo, soco ña ndicha ñu. Vatyi chasí ñu cha sañahá Nyoo tunyee iñi ra. Ma cutahun chihin ñu caa tyicuan caa.

6 Vatyi mahñu ñu ihya iyó ra cha quihvi ra chichi vehe ta sandavi ñaha ra chi ñusihí cha ñahri cha chiñi tuñi xiñi. Ta nyisó ñusihí cuan cuatyí, vatyi nyicón ñu tandihí cha quichi cuví iñi ñu.

7 Tyicuan ri cuñí ñu coto ñu tandihí tuhun chaa soco ña cuví cutuñi iñi ñu ñáá cha cuví cha ndicha.

8 Ta ñu cucoo cha cahin tuhun ihya, cucuvi ñu tari maa ra Janes ta ra Jambres, ra tasi cha cachiyó ta cha naha. Ta cuñi ra saha canaa ra chi ra Moisés. Ta tyicuan caa tucu ñu cucoo nu cuahan ca chi. Ma tahan iñi ñu sacuvi ñu cha vaha. Quiñi cucaca xiñi ñu. Ta ma chino iñi ñu cha vaha.

9 Soco cuhva cunyacuví ñu ma cuví cutya chi vatyi ña xehe caa tyi cha ñima ri tuhun cuví cha cusacuví ñu, tari cha chinyacuví ra Janes ta ra Jambres.

Nu ndihí tyatyíño ra Pablo chi ra Timoteo

10 Soco yoho chitó vahun tyi yuhu ñima tyicuan caa iyé. Vatyi chitón tuhun cha sañahí, ta cuhva iyé. Ta chitón ñáá cha nanduquí ta yoso cuhva chinó iñi chi Nyoo. Ta chitó tucun yoso caa cunyeé iñi cha cahán ñáyiví chii. Ta chitón yoso cha cuñí chi ñu.

11 Ta chitón yoso caa cunyeé tindoho nu chicán nyicon ñáyiví chii.

Chiton cha cuvı chii, tandihı tindoho cha nyehı cha catyi tuhun Nyoo ñuu Antioquía, ta ñuu Iconio, ta ñuu Listra. Soco Sutu Mañi yo sacacu ra chii chichi tandihı cuan.

¹² Cha ndicha cuvı vatyı tandihı yo cha cuñı yo coo yo cuhva cuñı ra Cristo Jesús cunyehe yo tindoho saha ñáyıvi.

¹³ Soco ñu quiñi iyó ta ñu sandavi ñaha, quiñi xaan ca cunanduvi ñu. Vatyı cusandavi ñaha ñu chi ñáyıvi ta cusandavi ñaha ñáyıvi chi ñu.

¹⁴ Soco yoho sañihun coun chihin cha cutuhvon. Vatyı chitón yóo cha sañaha chuun ta chitó vahun tyi cha ndicha cuvı.

¹⁵ Nya ta ni luhlun ta chitón cha nyaá nu tutu tuhun Nyoo. Ta yucuan cuvı cha chahá cha cutuñi ca iñun tacuhva cacun cha cuenda cha chinó iñun chi ra Cristo Jesús.

¹⁶ Tandihı tuhun cha nyaá nuu tutu Nyoo, ta maa Nyoo chaha. Ta tyinyeé xaan chi chi yo nacoto yo yoso caa tahán chi chinó iñi yo. Sañahá chi chi yo cuhva caa yo. Sandundoó chi chi yo. Ta sañahá chi chi yo yoso caa coo yo noo ñáyıvi vaha nuu Nyoo.

¹⁷ Tyehe caa tyinyeé tuhun Nyoo chi yo tacuhva vatyı cuvı yo noo ra cuiı cuenda Nyoo. Ta cuatu tuhva yo sacuvi yo tandihı cha vaha.

4

¹ Tyatyıñe chuun nuu Nyoo ta nuu Sutu Mañi yo Jesucristo, vatyı maa ra cusandaa ra cuatyı ñu nyitó ta ñu chihı quıvi quichi ra cunyaca ñaha ra chihin tunyee iñi ra.

² Çahan tuhun Nyoo chihin ñáyıvi. Tyicuan ri sanıñun sacuvun. Çahan tuhun Nyoo nuu ñu tatu chahá chi cuhva o vasi ña chahá chi cuhva. Cuhva tuhun chi ñu, catyi cuhva caa ñu tacuhva cunyicon vaha ñu chi ra Cristo. Ta cuatun nasama ñu cuhva iyó ñu chihin cha cama iñun. Ta sañahun chi ñu yoso caa tahán chi coo ñu.

³ Vatyı coo quıvi ma cunyeé ca iñi ñáyıvi tyasoho ñu tuhun vaha. Soco cunducu ñu cuaha xaan ra sacuaha

cha sañahá maa maa ri cha tahan iñi maa ñu cuiñi ñu.

⁴ Ta cusacuachiyo xiin ñu cha ndicha. Ta cucuñi ñu cuiñi ñu noo tuhun cha ña ndicha.

⁵ Soco yoho saha cuenda chuun chihin cha vaha chica xiñun. Cınyeyun tindoho. Çahan tuhun Nyoo chihin ñáyıvi. Sacuvi vahun tyiño chaha Nyoo chuun.

⁶ Yuhu cha cuñı cuiı ri nacuhva cuende ñáyıvi cha cuenda tuhun Nyoo, vatyı cha nyañaa yatyın tuhun chihı chii.

⁷ Cha cañi tahin tari cuhva tahán maa chi ta cha sandihı tyiño cha chaha Nyoo chii. Ta ña sandihı tuhun cha chinó iñi chi ra.

⁸ Ta vityın nu cuahan ca chi quıvi, nyatú tuhva noo cha tahán chi chii cha cuacuhva Sutu Mañi yo chii. Ta ñima chi maa ri mai cuhva ra, soco cuhva tucu ra chi tandihı ca ñu cha nyatú chi ra. Vatyı noo ri maa ra cuvı ra vaha sacutuñı.

Nonga tyiño tyaa ra Pablo chi ra Timoteo

⁹ Sanıñi ta quıchun cha numi ri, quıchi nyehun nu nyai.

¹⁰ Vatyı ra Demas sandoo ra chii vatyı cuñı ca ra cha iyó ñáyıvi ihya. Ta cuahan ra nya ñuu Tesalónica. Ta ra Crescente cuahan ra nya ityi Galacia. Ta ra Tito cuahan ra ityi Dalmacia.

¹¹ Noo ri maa ra Lucas nyaá chihin. Nanducu chi ra Marcos ta na quıchi ra chuhun quıvi quıchun. Vatyı chiñuhú xaan ra chii nu tyiño Nyoo.

¹² Tachı chi ra Tíquico ñuu Éfeso.

¹³ Quıvi quıchun cuiıson sahma con cha sandoı ñuu Troas vehe ra Carpo. Tyicuan caa tucu libri, quıhi ndahun quıchi. Ta cha niñi ca tutı.

¹⁴ Ra Alejandro ra cañi mityi cuan, cuaha xaan cha ña vaha chinyacuvı ra chihin. Ta maa Sutu Mañi yo cıtyiyahvi chi ra cha cuenda cha chinyacuvı ra chihin.

¹⁵ Saha cuenda chuun chihin ra. Vatyı xaan xaan cuñı ra siquı tuhun Nyoo cha cahán yo.

¹⁶ Cha xihna ri quıvi sacaquı chii nuu ra cuvı tyiño, yori maa tyinyee

chii. Casandoq noo tuhun maa ra chii. Na saha Nyoo tıcahnu iñi chi ra cha cuenda cuan.

¹⁷ Soco Sutu Mañi yo tyinyee xaan ra chii. Ta chaha ra tunyee iñi chii tacuhva cuvi cahan cachi tuhun ra nuu ñu, ta chiñi tandihi ñu cha ñima ñu Israel cuvi. Ta sacacu Nyoo chii cha cachi ndicaha chii.

¹⁸ Ta cuasacacu ca ra chii ndaha tandihi cha ña vaha. Ta cuasaha cuenda ra chii nyacua nya nachaa quivi cunyai chihin ra nu nyaca ñaha ra. Chi maa ra na sacahnu yo tyicuan ri maa. Ta na cuvi chi tyicuan caa.

Nu ndihi cahan ra Pablo ta chaha ra nocumi chi ñu

¹⁹ Ihya vachi nocumi chi cu Prisca ta chi ra Aquila ta chi ñáyivi chi ra Onesíforo.

²⁰ Ndoq ra Erasto ñuu Corinto. Ta ndoq ra Trófimo ñuu Mileto vatyi cuhvi ra.

²¹ Saniñun ta quichun cha ni cumañi ca chaa yoo vichin.

Vachi nocumi chuun sahá ra Eubulo ta ra Pudente ta ra Lino ta cu Claudia ta tandihi ca ñáyivi tahan yo cuenda Nyoo ihya.

²² Na cunyaa Sutu Mañi yo chuhun. Ta Nyoo na nasoco ra chi tandihi ndo.

Carta Cha Sacuhun Ra Apóstol Pablo Chi Ra Tito

Nu tyaa ra Pablo noo tutu chi ra Tito

¹ Yuhu ra Pablo sacuví tyiño nuu Nyoo. Ta cuví noo apóstol ra Jesucristo, o cuñí chi catyi vatyí tyatyíño maa ra chii vatyí tyinyei chi ñu nacachi maa Nyoo, na nachino iñi ñu chi ra, ta cohon nuu ñu cha ndicha, ta coo ñu cuhva cuñí Nyoo.

² Ta cuatu tuhva ñu coo ñu ñayivi chaa cha ma naa ca maa andivi. Vatyí ta ni cumañi ca chino ñuhu ñayivi ta catyi Nyoo vatyí cucuhva ra noo ñayivi chaa chi yo. Ta maa ra ña cuendu ra.

³ Ta vityin chaa quivi cha tyaa Nyoo cuhva tyi nacoto yo tuhun ra. Maa ra cuví ra sacacú chi yo, ta chaha ra tyiño chi yuhu cha cahin tuhun ra chihin ñayivi.

⁴ Sacuhín tutu ihya chuun, Tito, vatyí tari noo sehe vahi cuví chuun cha cuenda tuhun Nyoo, vatyí in ri chinó iñi yo chi ra Jesucristo. Cuñí vatyí Nyoo Sutu yo ta Sutu Mañi yo Jesucristo, ra sacacú chi yo, na nasoco ra chuun, ta na nyehe ndahvi ra chuun, ta na coo ca cha taxi ri añimon sahá ra.

Tyiño chaha ra Pablo chi ra Tito tyi sacuvi ra ñuhu Creta

⁵ Sandoj chuun ñuhu Creta vatyí sandaun tyiño Nyoo cha nyaá cundaa. Ta tyison ra chahnu ra quindaha vehe ñuhu tahan tahan ñuu tari cuhva catyi chuun.

⁶ Vatyí ra nyisó tyiño ihya cuñí chi coo ra noo cuhva cha ma cahan ñayivi chi ra. Noo ri ñasihí ra coo. Ta tandihí sehe ra cuñí chi cha chinó iñi ñu chi Nyoo, ta cachi coo ñu ta ma ndava iñi ñu tacuhva cha ma tyaa ñayivi cuatyí siqui ñu.

⁷ Vatyí ra yindahá chi ñu yihí cuenda Nyoo, Nyoo tyatyíño cuan chi ra. Yucuan chaha niñi cuñí chi vatyí

cuví ra noo ra vaha. Ñima noo ra cahnu sahá chii, ni ñima noo ra tyityi iñi, ni ñima noo ra tuhvá chiñi. Ñima noo ra quixin cuatyí, ni ñima noo ra cuñí xuhun cha ña saha ganaa vaha ra.

⁸ Soco tyicuan ri sii cuví chi ra tatu chaa ñayivi vehe ra. Ta tahan chi cuhva ra nu coo ñu. Cuñí chi cuví ra noo ra cha sacuví cha vaha. Noo ra chitó yoso caa nyaca ñaha ra chi maa ra. Na cuví ra noo ra ndaa iyó, noo ra sacahnú vaha chi Nyoo. Ta chitó vaha ra cuhva tahan chi sacuvi ra ta sañiñi ra sacuvi ra.

⁹ Ta cunyicon vaha ra tuhun ndicha cha sañahá yo chi ra. Tyicuan ta coto ra sandunñi ra iñi inga ñu chihin tuhun vaha ihya. Ta chi ñu catyi tyi ña ndicha tuhun cahan yo, coto ra yoso caa sañaha ra chi ñu tyi ña vaha cahan ñu siqui tuhun Nyoo.

¹⁰ Vatyí cuaha xaan ra ndava iñi iyó. Cuaha ra cahan cha ñima ri tuhun, cuaha ra sandaví ñaha. Ta cuaha xaan ca ñayivi Israel sacuví tyicuan caa.

¹¹ Cuñí chi cha casi yo yuhu ra cuan, vatyí cuaha xaan ñayivi satondó ra xiñi. Vatyí cha cuenda cha cacuñí ra xuhun ta sañahá ra noo tuhun cha ña tahan chi.

¹² Ta suri maa noo ra Creta, noo ra chiñi tuñi, ra cahan nuu ñu catyi ra tyehé caa: “Ñu Creta, cuendu xaan ñu. Tari quiti cuví ñu. Cuahyi ñu ta suchan ñu”, catyi ra cuan.

¹³ Ta cha ndicha catyi ra cuan. Yucuan chaha cuñí chi cha cahan ñihun chihin ñu na saña ñu tuhun cuan, tacuhva vatyí vaha na chino iñi ñu chi ra Cristo.

¹⁴ Tacuhva cha ma tyasoho ca ñu tyisu cha ñima ri tuhun cha canasavaha ri maa ñu Israel. Ta ni ma tyasoho ca ñu tuhun cahan ñayivi cha ña cuñí coto cha ndicha.

¹⁵ Cha cuenda ñayivi cha vaha chicá xiñi, tandihí ta vaha chi ñu. Soco cha cuenda ñu cha ña chinó iñi ta ña vaha chica xiñi, ñahri maa cha vaha chi ñu vatyí nyacua nya cuhva chicá xiñi ñu ta cuhva tuví iñi ñu ta ña vaha ta quiñi caa.

16 Catyí ñu vatyí ñohó nuu ñu chi Nyoo, soco chihin cha ña vaha nyacuví ñu nyehé yo tyi ña ndicha ñu. Vatyí quiñi yihí iñi ñu ta ndava iñi ñu. Ta ma cuvi sacuvi ñu noo cha vaha.

2

Tuhun vaha cha chahá Nyoo tyi sañaha yo

1 Soco yoho, sañaha tuhun vaha tari cuhva sañahá tuhun Nyoo chi yo.

2 Sañahun vatyí ra chahnu, cachi coo ra, tacuhva vatyí na saha ñáyivi ñáyivi chi ra. Ta tyicuan ri cachi caca xiñi ra. Vii cuhun ra chihin cha chino iñi ra. Cuñi chi cha cuñi ra chi Nyoo ta chi ñáyivi. Ta cunyehe iñi ra tandihi.

3 Ta tyicuan caa tucu ñu chahnu. Catyí chi ñu na coo ñu noo cuhva cha tahan iñi Nyoo. Ta ma ñi ñu cuendu. Ma coho ñu ndixi. Ta na sañaha ñu cha vaha iyó ñu,

4 na nyehe ñu nicaa tandaha. Tacuhva vatyí cuñi ñu chi yí ñu ta chi sehe ñu.

5 Na caca vaha xiñi ñu. Ta saha vaha ñu cuenda cuhva iyó ñu. Na saha cuenda vaha ñu vehe ñu. Ta vaha ñáyivi cuvi ñu. Na cuhva ñu cha cunyaca ñaha yí ñu chi ñu tacuhva vatyí yori cuvi cahan ña vaha siqui tuhun Nyoo.

6 Ta tyicuan caa tucu ra tyivaa. Cuhva tuhun chi ra na cacachi coo ra.

7 Ta maun cuñi chi cha sañahun maa ri cha vaha chihin cuhva iyón chi ra. Sañahun chi ra chihin cha cachi ta cha ndaa.

8 Maa ri tuhun vaha cahun tacuhva vatyí yori cuvi tyaa cuatyí sicun. Tyicuan ta ra xaan iñi chi ndo cucahan nuu ra vatyí ma ñihi ra cuhva cahan ña vaha ra siqui ndo.

9 Cuhva tuhun chi ra yañi yo ra iyó chitoho, na caquichaha ra chi chitoho ra. Na sacuvi vaha ra tandihi cha catyí ra. Ta ma na cahan ra nu cahan ra.

10 Ta ma tiin ri maa ra cha chii chitoho ra. Soco na saha vaha ra ñáyivi chi ra, tacuhva vatyí cunyehe ñáyivi vatyí vaha xaan tuhun Nyoo ra sacacú chi yo.

11 Vatyí Nyoo sañahá ra vatyí vaha xaan ñáyivi cuví ra. Ta cuñi ra sacacu ra chi tandihi ñáyivi.

12 Chihin cuan sañahá Nyoo chi yo vatyí na saña yo cha quiñi caa cha nyacuví ñáyivi ña ñohó nuu chi ra ta cha quichi cuvi iñi ñu. Ta cachi coo yo siqui ñuhu ñáyivi ihya, tari cuhva cuñi Nyoo.

13 Ta sañahá tucu ra chi yo yoso caa cuatu tuhva yo cha vaha cha cuñihi yo quivi quichi tucu ra Jesucristo. Vatyí cucusi xaan cuñi yo cuhva cha cunyehe yo cha tyaqui quivi quichi ra cuví Nyoo yo ra cahnu ca, ra cha sacacú chi yo.

14 Chahá ra ñáyivi ra tyiño nuu yo tacuhva sacacu ra chi yo ndaha tandihi cha quiñi caa. Ta sandundi ra chi yo tacuhva na cuvi yo ñáyivi cuenda ra, ta cha yaha tuhun cuan cuñi ra vatyí sacuvi yo maa maa ri cha vaha.

15 Ican ihya cuñi chi sañahun chi ñáyivi. Sanduniun iñi ñu. Ta cahun nuu ñu chihin ndusu yuhu Nyoo tatu ña vaha sacuvi ñu. Ta ma sacuvun ni noo cha ña vaha. Tyicuan ta ma cuvi ñihi ñu cuhva cahan nyaa ñu chuun.

3

Cuhva cha tahan chi sacuvi ñu yihí cuenda Nyoo

1 Sanicohun iñi ñu tahan yo cuenda Nyoo na quichaha ñu chi gobiernu ta chi ra cacuví tyiño. Ta chihin cha ñi iñi ñu na sacuvi ñu ñáá tyiño vaha cha catyí ra cuví tyiño tyi sacuvi ñu.

2 Ta ma cahan ña vaha ñu siqui ni noo ñáyivi. Na taxi ri coo ñu. Vaha ñáyivi na cuvi ñu. Na masu cuvi aña ñu chihin tandihi ñáyivi.

3 Vatyí nyacua nya maa yo ta tyicuan caa cuvi yo ta ityi chata ca. Tondo xaan chiyo yo. Ta ndava xaan cuvi iñi yo. Ñahri noo ityi vaha chica noo yo vatyí ra cuví cuihna sandahvi ñaha ra chi yo. Chinyaca ñaha cuhva ña vaha cha cuñi coño ñuhu yo chi yo. Ta chinyacuví yo tandihi maa cuhva cuñi chi. Tandihi cha iyó chi inga

ñáyiví ta cuñi yo coo chi yo. Tasi cuñi yo nyehe yo chi tahan yo. Ta ñáyiví ña cuñi nyehe ñu chi yo.

⁴ Soco Nyoo vaha ñáyiví cuví ra ta sacacu ra chi yo. Yucuan cuvi nu sañahá ra vatyí cuñi ra chi tandihí ñáyiví.

⁵ Ñima cha cuenda cha cachi iyó yo ta sacacu ra chi yo, soco cha cuenda cha ndahví cuñi ra nyehe ra chi yo. Ta chihin ñiñi ra Jesús nacatyá yo cuatyí yo ta nacacu chaa yo, ta chahá Tatyí li ra noo ñáyiví chaa coo yo.

⁶ Ta chahá xaan Nyoo cha coo Tatyí li ra añima yo cha cuenda maa ra Jesucristo ra sacacú chi yo.

⁷ Chihin tumañi iñi cha chahá ra chi yo ta sacuvaha ra chi yo nuu ra. Ta vityin nyatú yo cunanyehe yo noo cha cha yaha chahá ra chi yo, noo ñáyiví cha ma naa ca maa.

⁸ Tandihí tuhun ihya ndicha xaan. Ta cuñi vatyí cahun tuhun ihya nuu ñu chinó iñi chi Nyoo chihin cha ñi iñun, tacuhva na saha cuenda ñu chi ñu, ta sacuvi ñu cha vaha. Vaha xaan tuhun ihya, ta cuatyinyee chi chi tandihí ñáyiví tatu quichahá ñu.

⁹ Soco ma tyasohun nu cuví yuhu ñu tuhun cha ñima ri tuhun. Ma tyasohun tuhun cahán ñu vatyí ñu cuan ñañi xaan cuñi ñu coto ñu yoso caa vachi tata yo. Ma quichahun chi ñu cañi tahan cha cuenda ley cha tyaa ra Moisés ta cha naha. Ñahri maa tyinyeé cuan. Cha ñima ri tuhun cuví.

¹⁰ Tatu iyó ñu cuñi ñu sacusiñ ñu chi ñu nyicú vehe ñuhu, çana chi ñu noo chaha o uvi chaha ta çatyí chi ñu tyi ña vaha sacuví ñu. Ta tatu ña quichahá ñu, çasi nu quichi ñu.

¹¹ Vatyí ma chihin yucuan ri chitón vatyí ña vaha añima ñu tatu tyicuan caa nyacuví ñu. Chicoo cuatyí ñu. Ta suri maa ñu sacunaá ñu chi ñu.

Tyiño tyaa ra Pablo chi ra Tito

¹² Cutachi chi ra Artemas, o chi ra Tíquico nu nyaún. Quiví chaa ra, nducu cuhva ta cuhun ñuu Nicópolis vatyí cuñihi tahan yo yucuan. Vatyí tyaí cuhva cuyahi yoo vichin yucuan.

¹³ Nducu cuhva tyinyeun chi ra Zenas ra chitó xaan ley, ta chi ra Apolos ta cuhva cha chiñuhú chi ra nu cachicá noo ra tuhun Nyoo.

¹⁴ Na cutuhva ñu yihí cuenda Nyoo sacuvi ñu cha vaha ta tyinyee ñu tatu iyó cha cumañi chi inga ñu. Tyicuan ta ña caha ri nyicón ñu chi Nyoo.

Nu ndihí cahán ra Pablo

¹⁵ Tandihí ra nyicu chihin, chahá ra nocumi chuun, Tito. Ta na cuhva nocumi chi tandihí ñu cuñi chi ndi cha cuenda cha ñin ri cuví yo cuenda Nyoo. Na nasoco Nyoo chi tandihí ndo.

Carta Cha Sacuhun Ra Apóstol Pablo Chi Ra Filemón

Nu tyaq ra Pablo noo tutu chi ra Filemón

¹⁻² Yuhu ra Pablo ta ra Timoteo yañi yo, tyaá ndi tutu ihya chi yoho, Filemón, tyi ra tahan ndi nu tyiño Sutu Mañi yo cuvún. Ñohí vehe caa ihya cha cuenda ra Jesucristo ta sacuhún ndi tutu ihya chuun ta chi ra Arquipo, ra cuvi sindaro ra Jesucristo chihin yo, ta chi cu Apia, ta chi tandihi ñu ndu ín ri vehun.

³ Na nasoco Nyoo Sutu yo ta Sutu Mañi yo Jesucristo chi ndo. Ta na coo cha taxi ri cuñi añima ndo sahá ra.

Nu catyi ra Pablo vatyí ra Filemón vita xaan iñi ra ta chino vaha iñi ra chi Nyoo

⁴ Tyicuan ri nacuhvé tyahvi nyoo chi Nyoi cha cuendon nu nichón iñi tuhun, nu chicán tahvi chi ra.

⁵ Vatyí ñihí tuhun tyí chinó vaha iñun chi Sutu Mañi yo Jesucristo, ta cuñi xaan chi ra ta chi ñu yihí cuenda ra.

⁶ Ñáyivi cha sacotón yoso caa cuhva chinó iñun chi Nyoo, nachino iñi tucu maa ñu chi ra ta vityin chicán tahvi cha cuenda ñu, na coto vaha ñu tandihi cha vaha cha chahá Nyoo chi yo cha cuenda ra Cristo Jesús.

⁷ Si xaan cuñi, ta vaha xaan cuñi añime vatyí cuñi xaan chi ñu tahan yo, ta sandunyeún iñi ñu.

Nu chicán ra Pablo noo tumañi iñi chi ra Filemón cha cuenda ra Onésimo

⁸ Vasi iyó chi ityi chii cha catyi chuun ñáá cha tahán chi sacuvun vatyí apóstol cuví, soco ña cuñi saniñi chuun.

⁹ Vaha ca cha caquen noo tumañi iñi chuun cha cuenda cha cuñi yo chi Nyoo vatyí yuhu ra chahnu cuví ta ñohí vehe caa cha cuenda ra Cristo Jesús.

¹⁰ Chiquén noo tumañi iñi chuun cha cuenda ra Onésimo vatyí nanduvi

ra sehi cha cuenda Sutu Mañi yo nu ñohí vehe caa ihya.

¹¹ Quivi cuan musu cuví ra chuun, ta chaha xaan ra tisihi, soco vityin musu vaha cuví ra, tyi vaha sacuví ra tyiño nui ta tyicuan caa tucu cusacuvi vaha ra tyiño nuu maun.

¹² Ta vityin sacunuhí chi ra chuun. Ta cuñi vatyí ñaquehen cuenda vahun chi ra tari cha mai cuví.

¹³ Vasi cuñi cha ndoo ra ihya chihin, ta tyinyee ra chii tyiño nuu maun cha niri ca cha ñohí vehe caa cha cuenda tuhun Nyoo,

¹⁴ soco ña cuñi cha ndoo ra tyiño nuun tatu ña ndoun vaha, vatyí tacuhva sacuvun tumañi iñi chii soco chihin cha iyó vaha iñun ta ñima ca chihin cha saniñi chuun.

¹⁵ Ra Onésimo chaha xaan ra tisihi chuun quivi cuan, soco vaha xaan nanduvi ra vityin, vasi yucuan cuenda canyaha ra chuun ta vityin nachaa ra nu nyaún vatyí cuacunyaa ra chuhun tyicuan ri maa

¹⁶ soco ñima tari noo musu ri, soco tari noo ra vaha ca. Vatyí yañi yo cuví chi ra. Ta cuñi xain chi ra, ta vihi ca yoho, tahán chi cha cuñi con chi ra. Vatyí ñima noo yañun cuenda coño ñuhu ri cuví chi ra. Soco yañun cha cuenda Sutu Mañi yo cuví chi ra ñandihí.

¹⁷ Tatu ndicha cha ra tahun cuví chii, cuñi vatyí ñaquehun chi ra Onésimo tari cha chi yuhu ñaquehún.

¹⁸ Tatu iyó cha sacuví ra chuun, o tatu yosoyicá ra chuun, tyiyahvi mai.

¹⁹ Yuhu ra Pablo tyaí tuhun ihya vatyí cutiyahvi cha yosoyicá ra chuun, cha nuu cha tahán chi catyí chuun vatyí yosoyicón nyacua nya ñayivun chii.

²⁰ Chiquén chuun, yañi, na sandusiun iñi ta ñaquehun chi ra Onésimo chihin cha vaha. Sanduchaa añime chihin cha ñn ri cuví yo cha cuenda ra Cristo.

²¹ Tyaí tutu ihya chuun vatyí chité tyi cuaquichahun tuhun cahín. Ta chité vatyí ñima yucuan ri, soco cuaha ca cuasacuvun.

²² Ta nonga cha chiquén chuun tatu ma sanduvahun chiin noo nu cuví cunyai chihin ndo. Ta cuñí vatyí cacan tahvun cha cuende, na cuhva Nyoo cha cuhin nu nyaá ndo.

Nu ndíhi cahan ra Pablo ta chahá ra nocumi chi ñu

²³ Vachi nocumi chuun sahá ra Epafras, ra ñoho chihin vehe caa cha cuenda ra Cristo Jesús.

²⁴ Ta vachi tucu nocumi chuun sahá ra Marcos, ta ra Aristarco ta ra Demas, ta ra Lucas, ra catyinyeé chii chihin tyiño Nyoo.

²⁵ Na nasoco Sutu Mañi yo Jesucristo chuun. Ta na cuví chi tyicuan caa.

Carta Cha Chino Cha Cuenda Ñáyivi Israel, Ñu Cahán Sahan Hebreo

Nyoo cahán ra chihin yo chihin yuhu Sehe ra

¹ Ta tyembu chahnu cahán Nyoo cuaha xaan chaha, ta cuaha xaan cuhva, chihin sutu chahnu yo, ñu chiyó ta cha naha. Cahán ra chihin yuhu ra cacuvi profeta, ra cha cachaha cuenda tuhun cahán ra.

² Ta vityin nu cua ndihi tyembu ihya, cahán ra chihin yo chihin yuhu Sehe ra. Ta tandihi maa ta natyaa ra ndaha Sehe ra. In ri cuví ra chihin Sehe ra ta savaha ra ñuhu ñayivi.

³ Cha cahnu ta cha tyaqui cuví Nyoo iyó chi Sehe ra, vatyí suri ican ra cuví maa maa xiñahñu Nyoo. Ta chihin tunyee ñi tuhun cahán ra, nyisó cuenda ra tandihi cha iyó. Ta cha yaha sandachi ra cuatyí yo, ta chicunyaa ra chiyo vaha Nyoo, ra cha cahnu ca cuví. Ta vityin nyacá ñaha ra chihin ra nya andivi.

Cahnu ca cuví Sehe Nyoo ta ñima ca ángel

⁴ Ta tyicuan caa cahnu xaan ca nanduvi Sehe Nyoo ta ñima ca tandihi ángel. Ta cahnu ca sivi chaha Nyoo chi ra ta ñima ca ángel cuenda ra.

⁵ Vatyí Nyoo ña catyí ra ni noo chaha chi ni noo ángel tyehe caa:

Yoho cuvún Sehi.

Ta yuhu chahí ñayivi coun vityín.

Ta ni ña cahán ra tuhun ni noo ángel tyehe caa:

Yuhu cucuvi Sutu ra.

Ta maa ra cucuvi Sehi.

⁶ Soco quivi saquichi Nyoo chi Sehe nuu ra siqui ñuhu ñayivi, catyí ra:

Na sacahnu tandihi ángel cuende chi ra.

⁷ Ta cahán tucu ra tuhun ángel cuenda ra ta catyí ra:

Sacuví vatyí tatyí cuví ángel cuende,

ta tari yaa ñuhu cuví ra sacuví tyiño nui, catyí Nyoo.

⁸ Soco tuhun Sehe ra catyí ra tyehe caa:

Nyoo cuvún, ta cua cunyaca ñahun tyicuan ri maa chihin cha ndaa ta chihin cha ndicha.

⁹ Vatyí cuñún cha vaha ta cutasi cuñún cha ña vaha.

Yucuan chaha vatyí yuhu, ra cha cuví Nyoo cuendon, cuaha ca tusii ñi chahí chuun, ta ñima ca chi ra tahun.

¹⁰ Ta catyí tucu Nyoo chi Sehe ra tyehe caa:

Yoho, ra nyacá ñaha cuvún. Ta quivi xihna ri savahun ñuhu ñayivi ta chihin ndahun savahun andivi.

¹¹ Maa ñuhu ñayivi ta andivi cundihí chi, soco yoho, cundoun tyicuan ri maa.

Tandihí maa cuan cu cuchahnu tari sahma.

¹² Ta cunicava tahnu chi tari noo vestido.

Ta cunasama chi tari nasamá ñayivi sahma ñu.

Soco yoho suri maa ra cuvún tyicuan ri maa.

Ta ma ndihi maa ñayivun, catyí Nyoo chi Sehe ra.

¹³ Nyoo ni noo chaha ña catyí ra chi ni noo ángel tari catyí ra chí Sehe ra tyehe caa:

Cunyaun chiyo vahi nyacua nya cha caquin chi ra xaan ñi chuun chahun.

¹⁴ Soco tandihí ángel, tatyí cacuví ra ta tyaa Nyoo tyiño chi ra cha caca ra ta tyinyee ra chi ñu cucacu aña.

2

Cahnu xaan cuví tuhun cha sacacú Nyoo aña chi yo

¹ Yucuan chaha vatyí cuñí chi cha quichahá xaan ca yo tuhun ndicha cha chiñi yo, coto cunuhu yo ityí quiñi caa.

² Ta cha naha catyí Nyoo chí ángel, na cuhva ra ley ra chí ra Moisés. Nyoo catyí ra tyi tahán chí quichaha ñayivi. Ta ñu casacuvi cuatyí ta ña quichaha

ñu ley ra, tachí tuñi ra chi ñu tari cuhva catyí maa ley cuan.

³ Cahnu xaan cuhva sacacú Nyoo añaima yo. ¿Yoso caa cucacu añaima yo tatu sacunaa yo cuhva cuan? Cha xihna ri suri maa Sutu Mañi yo Jesucristo cahan ra tuhun yoso caa cuví cacu añaima yo. Ta yaha cuan ta ñu cha cachiñi tuhun cahan ra, chitó ñu tyi ndicha ta canacatyí tucu ñu chi maa yo.

⁴ Ta siin ri, Nyoo sañaha cachi ra chi yo chihin cuaha milagru ta cha iyo, vatyí ndicha cha sacacú ra chi yo. Ta chaha ra Tatyí li ra chi yo siin siin cuhva, yoso cuhva cha cuñí maa ra. Ta chihin tandihí cuan sañaha ra chi yo vatyí ndicha cha sacacu ra añaima yo.

Ra Jesucristo cuví ra cha cua sacacu añaima yo

⁵ Nyoo, ña chaha ra cha cunyaca ñaha ángel chi ñuhu ñayivi chaa cha cahán yo tuhun vityin.

⁶ Vatyí iyó noo nuu cahán chi nu tutu Nyoo tyehe caa:

Nyoo Suti ¿yóo ra cuví rayi vatyí nicohon iñun tuhun ra?

¿Yóo ra cuví Sehe ra vatyí tñn cuendon chi ra?

⁷ Vatyí suhva quivi, ndahvi ca sacuvun chí ra, ican saha ángel. Soco yaha cuan sacahnū xaun chí ra. Ta sahá xaun ñayivi chí ra.

Ta chahun cha cunyaca ñaha ra siqui tandihí cha savahun.

⁸ Tandihí cuan natyaun ndaha ra. Tandihí maa, Nyoo chaha cha cunyaca ñaha ra, cuví chí cuan. Soco nyehé yo vatyí cumañi ca quichaha tandihí cuan chí ra.

⁹ Soco nyehé yo chí ra Jesús vatyí suhva ri quivi, sanocuee Nyoo chí ra ican saha chí ángel. Soco cha cuenda cha cuñí xaan Nyoo chí yo, chaha cuenda ra chí ra Jesús cha cúvi ra cha cuenda tandihí yo. Ta vityin sahá xaan Nyoo ñayivi chí ra ta sacahnū xaun ra chí ra cha cuenda tñdoho cha nyehé ra quivi chihí ra.

¹⁰ Tandihí maa cha iyó, cha cuenda maa Nyoo cuví. Ta maa ra savaha.

Ta cuñí ra vatyí tandihí sehe ra ta chí maa ñu cucuvi tandihí cha tyaqui cha iyó gloria. Ta chihin tñdoho cha sanyehé ra chí ra Jesucristo Sehe ra, sacuvaha ra chí ra. Vaha xaan quita ra.

¹¹ Sehe Nyoo cuví chí ra Cristo, ra sacacú añaima ñayivi. Ta suri sehe Nyoo nanduví chí ñayivi ñu chinó iñi chí ra. Yucuan chaha vatyí ña cuahan nuu ra Cristo catyí ra yañi ra chí ñu, vatyí iñn ri sutu ra chihin ñu.

¹² Vatyí catyí ra Cristo nu tutu Nyoo tyehe caa:

Cucahin tuhun maun chihin yañi.

Ta cucate yaa cuendon nu ndú iñn ri ñu.

¹³ Catyí tucu ra tyehe caa:

Yuhu cuita iñi chí Nyoo.

Ta catyí tucu ra:

Ihya nyaí chihin sehi, cha chaha Nyoo chí, catyí ra.

¹⁴ Ta tandihí yo cha cuví yo sehe ra, coño ñuhu cuví yo ta yihí niñi yo, yucuan chaha ra Jesús ñandihí, suri coño ñuhu ta niñi ñayivi nyiso ra suhva quivi, tacuhva cuví chaa tuhun chihí chí ra, ta tyicuan caa ta satani ra chí cuihna, ra cha chiyo tunyee iñi chí cha cahñi chí ñayivi.

¹⁵ Ta tyicuan caa sacacu ra chí ñu cha yuhvi chí tuhun chihí. Chiyo ñu tari noo musu ra ña vaha vatyí yuhvi ñu cha cúvi ñu.

¹⁶ Cha ndicha vatyí ña quichí tyinyee ra chí ángel, soco chí ñayivi tata ra Abraham quichí tyinyee ra.

¹⁷ Yucuan chaha cuñi chí cha nduvi ra tari ñayivi, tacuhva cuví ra noo ra ndicha cundahvi cuñi chí yo. Ta tyicuan caa cuví ra tata sutu cahnu cha cuenda yo nuu Nyoo. Ta tyicuan caa ta sacuachiyó ra cuatyí ñayivi cha cuenda tñdoho cha nyehé ra.

¹⁸ Vatyí maa maa ra nyehé tñdoho quivi nducu nyehé ra ña vaha chí ra, yucuan chaha, vityin cuví tyinyee tucu ra chí maa yo tatu nducú nyehé ra ña vaha chí yo.

3

Cahnu ca cuví ra Jesús ta ñima ca ra Moisés

¹ Yañi, nyoho chaha cuenda ndo chi ndo chi Nyoo. Ta cuví tucu ndo ñu cha nacana Nyoo chii vatyí coo ndo chihin ra andivi. Ta cha cuenda cha nyehe ra Cristo Jesús tindoho tyiño nuu ndo, yucuan chaha, nyehe vaha ndo kuhva vaha iyó ra. Vatyí ican ra cuví ra cha saquichi Nyoo chi vatyí cuví ra tata sutu cahnu cuenda yo cha chinó iñi yo tuhun Nyoo.

² Ta maa ra quichaha ra tandihi cha catyí Nyoo cha sacuvi ra, tari quichaha tucu ra Moisés ta cha naha, ta sacuvi ra tyiño cha tahan chi sacuvi ra nuu ñáyivi sehe Nyoo.

³ Ta ra Jesucristo cahnu ca ra cuví ra, ta ñima ca ra Moisés. Vatyí noo ra cha savahá vehe, cahnu ca cuví ra ta ñima ca maa vehe cuan.

⁴ Tahan tahan vehe, iyó ra savaha chi chi, soco Nyoo cuví ra cha savaha tandihi maa cha iyó.

⁵ Ra Moisés, quichaha vaha ra chi Nyoo ta sacuvi ra tyiño nuu ra cha cuenda ñáyivi Israel ta cahan ra tuhun cha cusacoto Nyoo nu cuahan ca chi ityi nuu.

⁶ Soco ra Cristo ra cuví Sehe Nyoo, suri quichaha vaha ra chi Nyoo ta ican ra nyacá ñaha vehe Nyoo. Ta vehe cuan ican cuví maa yo, tatu saní ca yo iñi yo kuhun yo ityi nuu chihin Nyoo ta itá iñi yo chi ra nyacua nya nu ndihi, ta tyicuan ri cusii cuñi yo nyatú yo cha cuñihi yo.

Ñu chinó iñi chi Nyoo, nyitatu ñu chihin Nyoo

⁷ Yucuan chaha cuñi chi saha cuenda yo chi yo, tari catyí Tatyí li Nyoo nuu tutu Nyoo tyehe caa:

Tatu chiñi ndo tuhun cahan Nyoo chihin ndo vityin,

⁸ ma sandava ndo aña ndo, tari sacuvi ñu ña quichaha chi Nyoo quivi canducú nyehe ñu chi ra nu chica noo ñu chiqui ndii cuan.

⁹ Tyehe caa catyí Nyoo: Ñáyivi cuan nducu nyehe ñu chii, vasi chichi cha uvi xico cuiya nyehe ñu cha sacuvi.

¹⁰ Yucuan chaha cuxain chi ñu, ta catyí tyehe caa: “Tyicuan ri chica uvi iñi ñu, ta ña cuñi ñu coto ñu ityi mai.”

¹¹ Yucuan chaha cuxain chi ñu, ta catyí cachi chi ñu, vatyí ma quihvi ñu nyitatu ñu chihin, catyí Nyoo.

¹² Yañi, saha ndo cuenda chi ndo coto cu ña vaha aña ndo ta coto yoso ri caa ta sandoo ndo chi ra cuví Nyoo nyitó cha cuenda cha ña chinó ca iñi ndo chi ra.

¹³ Soco sanii ndo iñi tahan ndo tahan tahan quivi, cha ni ri ca cha chahá ca chi kuhva vityin, tacuhva vatyí ni noo ndo ta ma sandavi ñaha cha quiñi caa chi ndo, ta ndundava aña ndo.

¹⁴ Vatyí tatu sanii yo iñi yo chihin Nyoo nyacua nya nu ndihi ñáyivi, yucuan ta in ri cuñihi yo cha vaha chihin ra Cristo.

¹⁵ Catyí chi nu tutu Nyoo vatyí saha yo cuenda chi yo tyehe caa: Vityin tatu nyoho ta chiñi ndo cha catyí Nyoo.

Ma sandava xaan ndo aña ndo, tari sacuvi ñu ña quichaha chii, catyí Nyoo.

¹⁶ ¿Yóo ñu cha cachiñi tuhun cahan Nyoo ta ña tyasohó ñu? Tandihi ñu Israel cha tava ra Moisés Egipto ta cha naha, ican ñu cuan.

¹⁷ Ta ¿yóo chi cuxaan Nyoo chichi cha uvi xico cuiya? Suri chi ñu cuan, ñu cha chicoo cuatyí. Ta cachihí ñu nu chiqui ndii nu chica noo ñu.

¹⁸ ¿Ta yóo chi catyí cachi Nyoo tyi ma quihvi ñu, cunyitatu ñu chihin ra? Chi ñu cha ña tyasohó nu cahan ra.

¹⁹ Nyehe yo vatyí ña cuví quihvi ñu cuan vatyí ña chinó iñi ñu chi ra.

4

¹ Yucuan chaha, cha ni ri ca cha iyó ca quivi cuví quihvi yo cunyitatu yo chihin Nyoo, cuñi chi saha yo cuenda

coto ma cuví quihví nya noo nyoho nu cunyitatu yo chihin Nyoo.

² Vatyí chiñi tucu yoó tuhun Nyoo cha sacacú ra añima yo, tari chiñi maa ñu Israel cuan. Soco ñahri maa tuhun cha chiñi ñu, vatyí chiñi ndii ri maa ñu, ta ña chino iñi ñu.

³ Soco yoó cha chinó iñi yo, ican yo cuví ñu quihví nyitatu chihin Nyoo. Ta cha cuenda ñu ña chinó iñi cuví chi tari catyí Nyoo tyehe caa:

Yucuan chaha cuxajin chi ñu ta catyí cachi chi ñu vatyí ma quihví ñu nyitatu ñu chihin, catyí Nyoo.

Soco cha nyaá nu nyitatu yo chihin Nyoo vatyí nyitatu Nyoo cha sandihí ra tyiño sahá ra nyata savaha ra ñuhu ñayivi.

⁴ Vatyí yihí nu catyí chi nu tutu Nyoo cha cuenda quivi cu ucha nu ndihí vitya. Tyehe caa catyí chi:

Nyoo nyitatu ra nu cu ucha quivi, vatyí ndihí tyiño saha ra.

⁵ Ta inga tucu chaha catyí chi nu tutu Nyoo tyehe caa:

Ni noo quivi ma quihví ñu nu cunyitatu ñu chihin, catyí Nyoo.

⁶ Ñu cuan, ñu cha xihna ri cachiñi tuhun cha sacacú Nyoo añima yo, ña quihví ñu cha cuenda vatyí nacahnú ñu nu cahán Nyoo. Soco nyaá cha quihví inga ñu.

⁷ Vatyí cha yaha nacahnú ñu Israel cuan nu cahan Nyoo, natyaá tucu ra cuhva vatyí nya inga quivi cuví quihví yo cunyitatu yo chihin ra, ta ican cuví quivi vityin. Ta cahán Nyoo tuhun quivi vityin chihin cha catyí ra David. Nyaá chi nu tutu Nyoo tyehe caa:

Vityin tatu nyoho ta chiñi ndo cha catyí,

Ma sandava xaan ndo añima ndo, catyí Nyoo.

⁸ Tyehe ta chinyaca ra Josué chi ñu Israel cuan nu cunyitatu ñu chihin Nyoo, ma cahan ca Nyoo inga chaha tuhun cha cuenda inga quivi.

⁹ Soco nyaá ca nu cuví nyitatu ñu yihí cuenda Nyoo chihin ra.

¹⁰ Vatyí ñu quihví nyitatu chihin Nyoo, ña chicá ca iñi ñu soco nyitatu

añima ñu tari nyitatu Nyoo quivi ndihí tyiño saha ra.

¹¹ Cuñi chi saniñi yo chinó iñi yo chi Nyoo tacuhva cuví nyitatu yo chihin ra, coto yoso ri caa nya noo nyoho sacuvi ndo tari sacuvi ñu Israel cuan vatyí ña cuñi ñu chino iñi ñu chi ra.

¹² Vatyí tuhun Nyoo, nyitó chi, ta iyó tunyee iñi chi chi. Ta xaan ca chi ta ñima ca mityi cha xaan nanduvi chiyo yuhu, ta nyee chi nyacua nya chichi añima yo ta nyacua nya chichi cha chiñi tuñi xiñi yo, nyacua nya chichi tuhun xehe cha caá añima yo. Ta sañahá cachi Nyoo ñáá cha chicá iñi yo ta ñáá cha caá añima yo tatu vaha o ña vaha.

¹³ Ñahri maa cha savaha Nyoo ta cuví tixehe nuu chi chi ra. Tandihí maa ta nyehé ra. Ta chi ra nyaá nacuhva cuenda yo cha sacuvi yo.

Ra Jesús cuví ra tata sutu cahnu cha cahán chaha yo nuu Nyoo

¹⁴ Ra Jesús Sehe Nyoo, cuví ra tata sutu cahnu cha cuenda yo, vatyí quihví ra nuu Nyoo ta cahán ra chaha yo. Yucuan chaha cuñi chi cha ma sandihí yo cha chinó iñi yo chi ra.

¹⁵ Vatyí ra cuví tata sutu cha cuenda yo cuví naquehen ndahvi ra chi yo tatu cuihya cuñi yo chihin Nyoo, vatyí chitó tucu maa ra cha cuví tindocho cha nyehe yo vatyí nyehe tucu maa ra tandihí nuu tindocho, saha ra ña vaha cha nducú nyehe ra chí ra, soco maa ra Jesús, ñahri cuatyí ra chicoo.

¹⁶ Yucuan chaha cuví tuhva yo nuu nyaá Nyoo ta cahan yo chihin ra chihin cha ña yuhví yo vatyí cuñi xaan ra chí yo, ta ndahvi cuñi ra nyehe ra chí yo. Ta cha cuenda cha vaha ñayivi cuví ra, tyinyee ra chí yo nu nyehe yo tindocho.

5

¹ Tandihí ra cuví tata sutu cahnu ca cuenda ñu Israel, ñayivi cuví ra. Ta na cachi Nyoo chí ra vatyí cahan ra chaha tandihí ñu nuu Nyoo, ta cuhva cuenda ra cha chahá ñu chí Nyoo, ta cahñi ra quití cha cuenda cuatyí ñu.

² Ta suri vachi quiví ndahvi cuñí ra cacuví sutu cha nducú nyehe ra ña vaha chi ra, yucuan chaha cuví cundahvi cuñí ra nyehé ra chi ñáyiví ña chitó maa, ta tyinyeé ra chi ñu quita caxiin ityi vaha Nyoo, na ndu uvi iñi ñu cuatyí ñu.

³ Ta cha cuenda cuatyí maa ra ta cha cuenda cuatyí ñáyiví, cachahñí ra quití ta chahá cuenda ra chi Nyoo na cahnya ra cuatyí ñu.

⁴ Yori sacuvi ri maa sutu chi. Maa Nyoo cuví ra cana chi ra, ta chaha ra cha cuví ra tata sutu, tari sacuví ra chihin ra Aarón ta cha naha.

⁵ Ta tyicuan caa tucu ra Cristo, ñima maa ra sacuví ra sutu chi ra, soco maa Nyoo chaha cha cuví ra, tari catyí maa ra tyehe caa:

Yoho cuví Sehi.

Yuhu chahí ñáyiví coun vityin, catyí Nyoo chi ra Cristo.

⁶ Tari catyí tucu ra chi ra nu inga nu cahán chi tyehe caa:

Yoho cuvún tata sutu tyicuan ri maa. Cuvún tari ra Melquisedec.

⁷ Ta quiví chiyó ra Cristo ihya siqui ñuhu ñáyiví, chicān tahvi ra chi Nyoo, ta chacu chaa ra ta cahan ra chihin Nyoo vatyí ican ra cuví ra iyó tunyee iñi chii cha sacacu chi ra ndaha tuhun chihi. Ta Nyoo chiñi ra tuhun cahan ra vatyí sacuví ra tandihí cha catyí Nyoo.

⁸ Yucuan chaha vasi Sehe Nyoo cuví chi ra Cristo, soco cutuhva ra cha quichaha ra chi Nyoo chihin cha nyehe ra tindoho.

⁹ Ta cha yaha cha sacuvaha Nyoo chi ra, tyicuan ta cuví ra ra sacacú añima ñáyiví tacuhva coo ñu chihin Nyoo tyicuan ri maa, tandihí ñu cha quichahá tuhun cahán ra.

¹⁰ Vatyí Nyoo tyaa tyiño chi ra cha cuví ra tata sutu cahnu, tari ra Melquisedec.

Yica xaan cha sandihí yo cha chinó iñi yo tuhun Nyoo

¹¹ Cuaha xaan nyaá cahan yo siqui tuhun ihya, soco yí xaan nacatyí yoso caa cuahan, vatyí nyoho ña cuñí ndo cutuñi iñi ndo.

¹² Cha naha xaan chinó iñi ndo chi Nyoo, cuñí chi cha cuví ndo ra sacuahá ta sañaha ndo chi inga ñu. Soco nyoho ni cuñí chi cha nacatyí tucu ndi inga chaha chi ndo tuhun cha xihna ri chiñi ndo tuhun Nyoo. Tari cha lee cuví ndo chihin tuhun Nyoo, vatyí tari cha chaxin ca ndo cha nuu cha cachi ndo nyayu.

¹³ Ta ñu cuví tari cha lee cha chaxín, ta chaa ca ñu cutuñi iñi ñu yoso caa coo vaha ñu nuu Nyoo.

¹⁴ Soco nyayu vaha cuví chi cha cuenda ñu chahnu chihin tuhun Nyoo: ñu cha cutuñi vaha iñi tuhun ra, nacotó ñu nya cha vaha ta nya cha ña vaha.

6

¹ Yucuan chaha ma ndoo ri yo chihin cha xihna ri cutuhva yo tuhun ra Cristo, cuhun yo ityi nuu ca tacuhva cuví yo ñáyiví chahnu chihin tuhun Nyoo. Ma ndoo ri yo chihin tuhun cha yaha cutuhva yo, ta cuñun tuhun cha ma nducu yo cuhva cha cuvaha yo nuu Nyoo chihin cha sacuví yo cha vaha, ta tuhun nachino iñi yo vatyí sacacú Nyoo chi yo.

² Ma ndoo yo chihin tuhun cha yaha sacuvi yo, tari cha condutya yo, tari cha tyisó yo ndaha yo siqui ñu chiñó iñi chi Nyoo na nasoco ra chi ñu, tari tuhun cha cunandoto tandihí ñáyiví cha yaha chihí, ta tari tuhun cha cucutuñi chi tandihí ñáyiví nuu Nyoo ta yihí ñu cuhun ñu anyaya tyicuan ri maa. Ma ndoo ri yo chihin tandihí cuan.

³ Soco tatu Nyoo ta chaha ra, sacuvi yo ihya: cuhun yo ityi nuu ca.

⁴⁻⁶ Vatyí ñu cha yaha naquehen cuenda cha ndichin Nyoo noo chaha, chitó ñu cha chahá Nyoo, ta nyaá Tatyí Ii Nyoo chihin ñu. Ta cha chitó ñu yoso caa cha vaha tuhun Nyoo, ta cha ñihi ñu tunyee iñi Nyoo. Ta chihin tunyee iñi cuan cunyaca ñaha Nyoo ñuhu ñáyiví chaa. Tatu cha yaha naquehen cuenda ñu tandihí cha vaha cuan noo chaha, ta yaha cuan ta sandihí ñu cha chinó iñi ñu chi Nyoo, ma cuví ca cha ndu uvi iñi

ñu inga chaha. Vatyí suri maa ñu tari cha tyaá ñu chi ra Cristo nu cruzi inga chaha, vatyí chahá ñu cha cuacu nyaa ñáyiví chi ra.

⁷ Añima ñáyiví cuví tari noo ñuhú nu sahá tyiño ñu, vatyí noo ñuhú tahan ri chaha cha coon savi, chihí ñuhú cuan ndutya savi cuan. Tatu vaha ñuhú cuan ta vaha cuvaha cha tachí ñu nuu chi, cunasoco Nyoo chi ñuhú cuan.

⁸ Soco tatu cañá iñu ta cañá nyava nuu chi, ñahri maa tuhun. Ta cusoco Nyoo chi ñuhú ña vaha cuan ta cucayu chi. Ta tyicuan caa tucu cucuvi chi ñu cha sandihí cha chinó iñi chi Nyoo.

⁹ Yañi, vasi cahán ndi tyicuan caa, soco chitó vaha ndi vatyí nyoho sacuví ndo cha vaha, maa maa ri cha sacuví ñu cha cacú añima sacuví ndo, ta ña sacuví ndo tari ñu cuví tari ñuhú ña vaha cuan.

¹⁰ Vatyí Nyoo, ra vaha cuví ra, ta ma naa iñi ra cha sacuví ndo. Ta nyehé ra vatyí cuñí xaan ndo chi ñu yihí cuenda Nyoo, vatyí tyinyee ndo chi ñu, ta tyinyee ca ndo chi ñu nya vityin.

¹¹ Cuñí ndi vatyí na cunhi ca iñi ndo nyacua nya quichi Sutu Mañi yo, tyicuan caa ta cuñihi ndo tandihí cha nyatú ndo.

¹² Ña cuñí ndi cha cusuchan ndo, soco saha ndo cuenda chi ñu cha chinó vaha iñi chi Nyoo ta sacuví ndo tari sacuví ñu. Vatyí ñu chinó vaha iñi chi Nyoo chihin cha cama iñi ñu, ican ñu ñihí cha catyí Nyoo tyi cuhva ra chi yo.

¹³ Vatyí ta cha naha catyí Nyoo chi ra Abraham, vatyí cuhva ra noo cha cuhva ra chi ra. Ta Nyoo tyaa ra cuhva cha cuhva ra, ta noo ri tuhun cahan ra vatyí maa ra, Nyoo cuví ra.

¹⁴ Ta tyehe caa catyí ra: “Cha ndicha vatyí cunasoco xain chuun ta cuaha xaan sehun cucuhve”, catyí ra chi ra Abraham.

¹⁵ Ta ra Abraham chihin cha cama iñi ra, nyatú ra tuhun cahan Nyoo chihin ra, ta tyicuan caa naquehen cuenda ra cha catyí Nyoo tyi cuhva ra chi ra.

¹⁶ Tatu noo ñáyiví cuacuhva ñu noo cha cuacuhva ñu chi tahan ñu ta tyanaha ñu sivi noo ra cahnu ca. Ma chihin yucuan ri.

¹⁷ Ta yucuan chaha vatyí Nyoo minoo ri tuhun cahan ra, vatyí cuñi ra cha coto ñáyiví vatyí ndicha tuhun cahan ra, ta ña nasamá ra tuhun cahan ra.

¹⁸ Yucuan chaha iyó uvi tahan cha ma cuví nasama chi. Noo cuví cha catyí Nyoo tyi cuhva ra nyatu chi ra Abraham, ta cha cu uvi, noo ri tuhun cahan ra vatyí maa ra, Nyoo cuví ra. Ta Nyoo ña cahan ra cuendu. Yucuan chaha tandihí yo cha nyañaá yo chi ra, ñi iñi yo cunyeé iñi yo chi ra, ta nyatú yo cha tyaá ra cuhva cha cuhva ra chi yo.

¹⁹ Tari noo barcu cha nuhñi noo caa vee, coto cuhun chi chihin tatyí, ta tyicuan caa quihí iñi yo cha sacacú ra Cristo añima yo. Ta cha quihí iñi yo chi ra, nuhñi yo chihin Nyoo ra nyaá inga chiyo cortina, o nya gloria cuví Cuan.

²⁰ Vatyí ra Jesús cha quihvi ra yucuan ta nuña ra ityi nu cuhun yo nu nyaá Nyoo. Ta ican ra Jesús cuví ra minoo tata sutu tyicuan ri maa, tari ra Melquisedec.

7

Ra Jesús cuví tata sutu tari ra Melquisedec

¹ Ra Melquisedec cha cahín tuhun, cuví ra rey ñuu Salém, ta cuví ra tata sutu cuenda Nyoo, ra cuví ra cahnu ca. Quiví cha cuandichi ra Abraham cha chahan ra chicañi tahan ra chihin suhva ra cacuví rey, ta cuví chasaha ra chi ra, tyicuan ta quitá ra Melquisedec ityi nuu ra ta nasoco ra chi ra.

² Ta ra Abraham uchi uchi tinyaa ra siquí cha saha ganaa ra nu chicañi tahan ra, ta chaha ra chi ra Melquisedec. Ta sivi ra Melquisedec cuan cuñi chi catyí: “Rey, ra cuví ra vaha.” Ta rey ñuu Salem cuan cuví ra, yucuan chaha cuví ra: “Rey vaha cha chahá cha taxi coo añima ñáyiví.”

³ Ña catyí tuhun Nyoo yóo cha cuví sutu ra ta sihi ra, ni ña cahán chí tuhun yóo ñáyivi chi ra. Ni ri ña cahán chí tuhun ama cacu ra, ni ama chihí ra. Yucuan chaha cuví ra tari caá Sehe Nyoo, noo tata sutu tyicuan ri maa.

⁴ Soco, vityin nyehe ndo yoso cha cahnu cuví ra Melquisedec, vatyí ra Abraham tinyaa ra uchi uchi siqui cha saha ganaa ra chí ra cacuví rey cuan nu chicaní tahan ra, ta chaha ra chí ra Melquisedec.

⁵ Tyehe ta tata ra Abraham cuví ra Melquisedec, ta cuví ra sutu, ma catyí yo tyi ra cahnu ca cuví ra. Vatyí nu cuahan ca chí ityi nuu ta suri maa ley Nyoo saniñi chí ñáyivi tata ra Abraham nacuhva ñu uchi uchi cha saha ganaa ñu chí ra cacuví sutu tata ra Leví, vasi tata ra Abraham cacuví chí ra tari maa ñu.

⁶ Ta ra Melquisedec, ñima tata ra Leví cuví chí ra, ta ni ñima tata ra Abraham, soco vita ri tyi quehen ra uchi uchi siqui tandihí cha ñihí ra Abraham. Ta nasoco ra Melquisedec chí ra Abraham, ra cha chaha Nyoo promesa chii.

⁷ Ta chitó cachi yo vatyí cahnu ca cuví ra cha nasocó cuan, ta ñima ca ra cha nasoco ra chí.

⁸ Nyehé yo vatyí cahnu ca ra cuví ra Melquisedec cha nuu inga ra caquehén cuenda uchi uchi siqui cha iyó chí ñáyivi, vatyí rayi ri cacuví ra cuan, ta tuhva chaa tuhun chihí chí ra. Soco tuhun ra Melquisedec cahán chí nu tutu Nyoo ta catyí chí tyi ñahri tuhun chihí iyó chí ra.

⁹ Ta ra Leví, chihin sehe ra, ra cacuví tata ra Abraham, ican ra cacuví tata sutu cha tahán chí caquehén cha uchi uchi siqui cha iyó chí ñáyivi. Soco tari quivi tyiyahvi tucu ra Leví cuan uchi uchi cha saha ganaa ra chí ra Melquisedec cuví cuan, vatyí ra Abraham tyiyahvi ra.

¹⁰ Vatyí ra Leví, tata ra Abraham cucuvi chí ra, vasi ta cacu ca ra quivi chisatahan ra Melquisedec chí ra Abraham.

¹¹ Ta ra cacuví tata ra Leví suri tata ra Aarón cacuví chí ra, ican

ra cacuví sutu cuenda yo ñu Israel, ta cha cuenda ra cuan quichí ley chahnu Nyoo. Ta vityin tyehe ta cuví nduvaha coo yo chihin Nyoo cha cuenda cha sacuví yo cha catyí ley cuan, yucuan ndicha ña niñi ca cha quichí ra Cristo ra cuví tata sutu tari ra Melquisedec, ta ñima tari ra Aarón.

¹² Vatyí tatu Nyoo ta nasama ra chí ra cuví sutu, cuñi tucu chí cha nasama ley ñandihí.

¹³ Ta Sutu Mañi yo cha cahán tutu Nyoo tuhun, ñima tata ra Leví ta ra Aarón cuví ra, soco tata inga sehe ra Israel cuví chí ra. Ta ni noo ra vachi tata cuan ta ña tuhvá ra cuví sutu.

¹⁴ Vatyí chitó vaha yo vatyí Sutu Mañi yo tata ra Judá, sehe ra Israel vachi ra, ta ra Moisés ñahri maa tuhun tata ra Judá cahan ra quivi cahan ra tuhun ra cacuví sutu.

¹⁵ Ta yucuan nyehé vaha yo, vatyí Nyoo natyaa ra inga sutu tari ra Melquisedec.

¹⁶ Ñima tari catyí ley quichí ra, vatyí ley catyí chí yóo chí tata cua quichi noo ra cuví sutu, ta ña quichí ra tata cuan, soco quichí ra vatyí iyó cha ndicha ñuhu Nyoo chihin ra ta ñahri tuhun chihí nyisó ra.

¹⁷ Vatyí ican ihya cuví cha cahán Nyoo tuhun ra:

Yoho cuvún tata sutu tyicuan ri maa, Tari ra Melquisedec.

¹⁸ Yucuan chaha sacuachiyó Nyoo ley chahnu cuan vatyí ña cuví maa tyinyee chí chí ñáyivi, ta ña chiñuhú.

¹⁹ Vatyí ley cha chaha Nyoo chí ra Moisés, ña sanduvaha maa chí añaño yo. Ta vityin, tyiño nuu ley chahnu cuan, iyó inga tuhun vaha ca cha yihí iñi yo. Ta chihin ihya tuhvá yo chí Nyoo vatyí sanduvaha ra Cristo cuhva coo yo chihin Nyoo.

²⁰⁻²¹ Nyoo tyaá ra cuhva ta tyanaha ra vatyí cuhva ra noo sutu cha cahnu ca chí yo. Soco sutu cha iyó vityin ña tyanaha Nyoo quivi tyiso ra chí ra. Vatyí nu tutu Nyoo catyí chí tyehe caa:

Sutu Mañi yo, ñin ri tuhun cahan ra, ta ma nasama ra cuhva catyí ra tyehe caa:

“Yoho cuvún Sutu tyicuan ri maa, tari cuví ra Melquisedec”, catyí Nyoo.
 22 Yucuan chaha ra Jesús chaha ra noo tuhun vaha ca chi yo, ta ñima ca tuhun cha xihna ri cuan.

23 Vatyí cha cuaha xaan ra cacuví sutu, soco chaa chaa ri tuhun chihí chi ra.

24 Soco ra Jesús ñahri tuhun chihí iyó chi ra, ta ña ndihí tuhun cha cuví ra sutu.

25 Yucuan chaha tyicuan ri maa cuví sacacu ra ñima ñu natuhvá chi Nyoo cha cuenda ra, vatyí iyó maa ra tyicuan ri maa, vatyí cacan tahvi ra chi Nyoo cha cuenda ñu.

26 Yucuan chaha ra Jesús cuví sutu cha chiñuhú chi yo. Ta maa ra, ii ra, ñahri cha quiñi caa sacuví ra, ta ni ñahri cuatyí ra. Ta ña cutahán ra chihin ñu iyó cuatyí. Ta sucun ca nyaá ra, ican saha andiví.

27 Ñima tari inga ra cacuví tata sutu cuan, vatyí cuñi chi cha cacahñi ra chi quití ta cuhva cuenda ra chi Nyoo ndi quiví. Ta cha xihna ri, na naa cuatyí maa ra, ta yaha cuan ta naa cuatyí ñáyiví. Soco ra Jesús noo ri chaha, chaha cuenda ra chi ra chi Nyoo na naa cuatyí tandihí yo.

28 Ley Nyoo cha quehen cuenda ra Moisés, tyisó chi chí ra cacuví nuu chi tata sutu, soco ra iyó cuatyí cacuví ra. Soco yaha cuan ta chaha Nyoo noo tuhun chaa, ta ñin ri tuhun cahan ra. Ta tyiso ra chi Sehe ra cha cuví ra Sutu cahnu ca, ta maa ra cuví ra noo ra vaha tyicuan ri maa.

8

Natyihí tahan Nyoo tuhun chaa chihin yo quiví chihí ra Jesús cha cuendayo

1 Ta chichi cha tandihí cha cahín nu tutu ihya, ican ihya cuví cha ñiñi ca tuhun: Ra cuví tata sutu cahnu chi yo cuví ra noo ra vaha tyicuan ri maa, ta chicunyaá ra nu tyayu chichi gloria chiyo vaha Nyoo.

2 Ta cuví ra Sutu noo nu cuví vehe ñuhu cha ndicha vaha nu nyaá Nyoo. Maa Sutu yo Nyoo savaha vehe cuan, ta ñima rayíi.

3 Tandihí ra cacuví tata sutu tyiso Nyoo chi ra, vatyí cuhva cuenda ra ofrenda chi Nyoo ta cahñi ra quití na naa cuatyí ñáyiví chihin ñiñi ti. Ta yucuan chaha ñiñi cuñi chi cuhva cuenda tucu ra Jesucristo ñiñi ra chi Nyoo.

4 Tyehe ta siqui ñuhu ñáyiví nyaá ra cuví ra sutu, ni ñima sutu cuví ra tatu tyicuan caa. Vatyí siqui ñuhu ñáyiví, iyó ca ra cacuví sutu cha cachahá cuenda ofrenda chi Nyoo tari cuhva catyí ley cha tyaa ra Moisés.

5 Soco ra cacuví sutu siqui ñuhu ñáyiví, sacuví ra tyiño nuu Nyoo soco tari cuhva cuví andiví. Cuví chi noo xiñahñu tyiño sahá ra Cristo. Ta chitó yo vatyí tyicuan caa, vatyí quiví cha cua savaha ra Moisés vehe ñuhu cuan ta cha naha, Nyoo catyí ra chi ra tyehe caa: “Saha vaha cuenda, ta savahun tari cuhva caá cha sañahi chuun quiví chinyaun nu yucu cuan”, catyí Nyoo chi ra.

6 Soco ra Cristo ra cuví sutu cahnu chi yo, vaha ca cuhva sacuví ra, vatyí cha cuenda maa ra, natyihí tahan Nyoo noo tuhun vaha xaan ca chihin yo, vatyí vaha ca cha cucuhva ra chi yo.

7 Vatyí tyehe ta cuví cacu ñima yo chihin tuhun xihna ri cha natyihí tahan Nyoo chihin yo, ña chiñuhú ca cha natyihí tahan chaa ra tuhun chihin yo cha cu uvi chaha.

8 Soco Nyoo nyehe ra vatyí ña vaha maa sacuví ñáyiví cuan, ta cahán ra tuhun ñu nu tutu ra tyehe caa:

Cuchaa chi quiví vatyí cunatyihí tahin tuhun chaa chihin ñáyiví Israel ta ñu Judá, catyí Sutu Mañi yo.

9 Ñima tari natyihí tahin tuhun chihin ñáyiví chahnu ñu, quiví tñin ndaha ñu ta tave chí ñu ñuu Egipto.

Vatyí ña sacuví ñu tuhun cha natyihí tahin chihin ñu,

ta yucuan chaha sañe chi ñu, catyí
Sutu yo Nyoo.

¹⁰ Tuhun cha cunatyihí tahn chihin
ñu ñuu Israel nu cuahan ca chi,
tyehe caa cucuvi, catyí Sutu
Mañi yo:

Chichi cha chiñi tuñi xiñi ñu, cutyai
ley mai, ta chichi añima ñu
cutyai.

Tyicuan ta mai cucuvi Nyoo ñu,
ta maa ñu cucuvi ñu ñáyivi chii.

¹¹ Tyicuan ta ña niñi ca cha sañahá
ñu chi tahan ñu, ni chi yañi
ñu, tacuhva vatyí cohon nuu
ñu chi yuhu cha cuví Nyoo ñu.

Vatyí tandihí ñu, cucohon nuu ñu chii,
nyacua nya ñu luhlu ca ta nyacua nya
ñu chahnu ca.

¹² Ta cusahi ticahnu iñi cha quiñi caa
cha sacuvi ñu.

Ta ma nicohon ca maa iñi cuatyí ñu,
catyí Sutu Mañi yo.

¹³ Quiví cha cahán Nyoo tuhun cha
natyihí chaa ra tuhun chihin yo, cuñí
chi catyí vatyí cha sacuchahnu ra cha
xihna ri cuan. Ta numi ri cundihi
tuhun cha cuví cha chahnu cuan.

9

*Nu sañahá chi yoso caa vehe ñuhu
cha iyó siqui ñuhu ñáyivi ta vehe ñuhu nu
cuví andivi*

¹ Quiví natyihí tahan Nyoo tuhun
cha xihna ri chihin ñáyivi, chaha ra
cuhva chi ñu yoso caa sacahnu ñu
chi ra, soco chichi noo vehe ñuhu cha
nyaá siqui ñuhu ñáyivi ihya.

² Tyehe caa chino vehe ñuhu cuan:
Chata noo cortina nyaá cuarto cha
xihna ri nu tayucú cañileru, ta nanyaá
mesa nu catuvi pan ii. Ta chicunañi
cuarto cuan Nu Ii.

³ Chata cortina cu uvi, yucuan cuví
nu chicunañi Nu Ii Xaan Ca.

⁴ Ta yucuan nanyaá noo arta
xuhun cuaan nu chahmi ra cutu.
Ta nanyaá caja, cha natyihí tahan
Nyoo tuhun chihin yo, ta iñi xuhun
cuaan nicacahnu. Ta chichi cuan
ñoño casitu xuhun cuaan cha ñoño
maná. Ta ñoño yutun cha natyacú cha
chindaha ra Aarón. Ta ñoño tucu yuu
cha nyaá ndi uchi mandamientu.

⁵ Ta siqui caja cuan nyicú cha tari
caa ángel, ta cuñí chi catyí vatyí nyaá
Nyoo yucuan. Ta chihin ndichin
ángel cuan cachasí ra nu cuví nu
tuhva Nyoo saha ra ticahnu iñi cuatyí
ñáyivi. Cha vityin ña cuví nacatyí ca
ndi siqui tuhun ihya.

⁶ Ta tyicuan caa cuví vehe ñuhu
cuan. Ta ndiquivi ri caquihvi ra
cacuvi sutu chichi cuarto cha xihna ri
nu nañi Nu Ii, tacuhva sacahnu ra chi
Nyoo.

⁷ Soco cuarto cu uvi Nu Ii Xaan
Ca cuan iyó maa minoo ra cuví nuu
chi sutu, ta yucuan ra cuví quihvi
yucuan, noo chaha cha noo cuiya. Ta
cuhva cha quihvi ra, cuñí chi cuiso
ra niñi quití vatyí cuhva cuenda ra
chi Nyoo cha cuenda cuatyí maa ra ta
cuatyí ñáyivi.

⁸ Ta cha tyicuan caa sañahá Tatyí Ii
Nyoo chi yo vatyí, ta cuví ca chaa yo
nuu Nyoo vatyí ni nyaá ca cuarto cha
xihna ri cuan.

⁹ Tandihí maa ihya cuví chi tari noo
xiñahñu ri cha cuenda tuhun chaa
cha chacun Nyoo vityin: vatyí noo
cha chaha cuenda ñu chi Nyoo ña
tyiñyeé chi chi ñu na caca vaha iñi ñu.

¹⁰ Vatyí tandihí cuhva sacuvi ra
cacuvi sutu cuan cahán chi maa ri
cuenda ñáa cha cuví cachi ñáyivi, ta
ñáa cha cuví coho ñu, ta yoso caa
cundundi coño ñuhu ri ñu. Ta catuvi
cuhva cuan, nyatu chi nya quivi ca-
cun Nyoo inga cuhva vaha ca.

¹¹ Soco vityin cha yaha quichi
ra Cristo ta maa ra cuví tata sutu
cahnu cha cuenda tuhun vaha ca cha
chacun Nyoo. Quihvi ra chichi vehe
ñuhu vaha ca, ta ndi ca, vatyí maa ra
cuví sutu. Ta ñima rayi savaha vehe
ñuhu cuan o cuñí chi catyí, ñima vehe
ñuhu ñuhu ñáyivi ihya cuví.

¹² Ra Cristo quihvi ra vehe ñuhu
nu cuví gloria Nu Ii Xaan Ca. Soco
ñima ca cha cuhva cuenda ra niñi
mbee luhlu, o becerro, soco niñi maa
ra chaha cuenda ra. Ta tyicuan
caa quihvi ra noo ri chaha nu ndihi
tuhun, ta tyicuan caa ta cuví sacacu
ra chi yo tyicuan ri maa.

13 Niñi toro, ta niñi ndixihyu, ta ñiyaa becerro cha cachahm̄i ra nu arta, tuhva ra catyicu ra chata ñu ca iyó cuatyí, ta coño ñuhu ri ñu sandund̄i chi cuan nuu Nyoo.

14 Ta tatu tyicuan caa, ¡Ñana cha cahnu ca tunyee iñi iyó chi niñi ra Cristo! Vatyí tyinyee Tatyí Ii chi ra ta chaha cuenda ra chi ra chi Nyoo chihin cha ñahri cuatyí ra. Ta niñi ra sandachí chi cha ña vaha cha caá aña yó tacuhva ma cuita ca iñi yó ley cha chaha tuhun chihi chi yó, ta tyicuan caa ta cuví sacuvi yó tyiño nuu ra cuví Nyoo nyitó.

15 Yucuan chaha ra Jesucristo cuví ra cha cahán chaha yó cha cuenda tuhun chaa cha natyih̄i tahan Nyoo chihin yó. Ta cha cuenda cha chih̄i ra, iyó ticahnu iñi cuatyí cha sacuvi yó quivi chinyaca ñaha tuhun cha xihna ri cuan chi yó. Ta yóó, ñu nacana Nyoo chi cuví yó, cuví naquehen cuenda yó noo cha ma ndih̄i ca maa, cha catyí maa ra tyi cuhva ra chi yó.

16 Vatyí tatu iyó noo tutu cha sandoo noo ra chihi, ta catyí tutu cuan ñáá ndih̄i cha cuñi ñáyivi chi ra tatu chihi ra; cuñí chi cha coto vaha ra cuví tyiño tatu ndicha cha chih̄i ra cha sandoo tutu cuan; tyicuan ta cuví sacaca ra tyiño cuan ta nasacha ra cha tahán chi chi ñu cuan.

17 Vatyí cha niri ca cha iyó ra cha sandoo tutu cuan, ma cuví cundaa tyiño cha quehen cuenda ñu cha tahán chi chi ñu, soco nya cúvi ra, tyicuan ta cuví quehen cuenda ñu.

18 Yucuan chaha chih̄i quiti ta chati niñi ti quivi natyih̄i tahan Nyoo tuhun cha xihna ri cuan chihin yó.

19 Quivi cuan, ra Moisés sacoto ra tandih̄i ley Nyoo chi tandih̄i ñáyivi. Yaha cuan ta quehen ra noo sahna cuaha cha chin̄o chihin ixi mbee ta chihin noo soco yutun cha nañi hisopo, satyij̄i ra nu niñi becerro ta nu niñi ndixihyu luhlu, nasaca ra chihin ndutya, ta tyicu ra chata libru ley Nyoo ta chata tandih̄i ñáyivi ñandih̄i.

20 Tyicuan ta quichaha catyí ra chi

ñu: “Ican ihya cuví niñi cha cuví cha ndaa vatyí natyih̄i tahan Nyoo tuhun chihin ndo”, catyí ra.

21 Ta suri tyicu tucu ra Moisés niñi nu cuví vehe ñuhu cuan, ta siqui tandih̄i cha cachotyíño ra yucuan nu casacahnú ra chi Nyoo.

22 Tyicuan caa sacuvi ra vatyí catyí ley Nyoo tyi tandih̄i ta chihin niñi, cuñí chi ndund̄i nuu Nyoo. Ta catyí tucu chi vatyí ma saha Nyoo ticahnu iñi cuatyí tatu ma cati niñi.

Niñi ra Cristo, ican cuan tinyaa cuatyí yó

23 Ta yucuan chaha cuñi chi cha sacuvi tata sutu tyicuan caa, vatyí ndund̄i tandih̄i cuan, vatyí cuví chi noo xiñahñu cha iyó ityi andivi. Soco tandih̄i cha cuenda ityi andivi, cuñí chi noo niñi vaha ca cha cuhva cuenda yó, ta ñima ca tari niñi quiti cuan. Cuñí chi niñi ra Cristo.

24 Vatyí ra Cristo ña quihvi ra chichi noo vehe ñuhu cha savaha ñáyivi cha cuví xiñahñu ri. Soco quihvi ra chichi vehe ñuhu cha ndicha vaha cha cuví gloria. Ta vityin cahán ra chaha yó nuu Nyoo.

25 Ra cuví nuu chi sutu cuenda ñu Israel quihvi ra Nu Ii Xaan Ca cuan tahan cuiya vatyí cuhva cuenda ra niñi cha ñima niñi ra cuví. Soco ra Cristo, ña cuaha chaha cuñí chi cuhva cuenda ra chi ra.

26 Vatyí tyehe ta tyicuan caa, cuaha chaha cuñí chi cha nyehe ra tindoho ta cúvi ra nyata chin̄o ñuhu ñáyivi ta nya vityin. Soco vityin cha cua cuyatyin cundih̄i tuhun ñáyivi, noo ri chaha quichi ra Cristo, ta chaha cuenda ra chi maa ra tacuhva vatyí cuví tinyaa ra cuatyí yó.

27 Noo ri chaha, cúvi yó ta yaha cuan ta cucutuñi chi yó.

28 Ta tyicuan caa tucu ra Cristo, noo ri chaha, chaha cuenda ra chi ra tacuhva tinyaa ra cuatyí cuaha xaan ñáyivi. Yaha cuan ta cuquichi ra cha cu uvi chaha, ñima ca cha quichi tinyaa ra cuatyí, soco cha quichi sacacu ra chi ñu cha nyatú chi ra.

10

¹ Vatyí ley Nyoo cha tyaa ra Moisés, cuví chi tari noo xiñahñu ri, cha cuenda cha vaha ca cha cuquichi. Soco ñima maa cha ndicha vaha cuví. Vatyí ley cuan, ma cuví maa sanduvaha chi chi ñu nanducú chi Nyoo. Vatyí tahan cuiya ri chahá cuenda ra cuví nuu chi tata sutu cuenda ley chahnu niñi quití. Soco ma cuví cacu añima yo chihin cuan.

² Vatyí tyehe ta cuví sanduvaha ley cuan chi ñu, cundihi tuhun cha chahá cuenda ra niñi ndicuiya ri. Vatyí tatu cha ndundhi ñu noo chaha cha cuenda tandihi maa, ma caca ca xiñi ñu vatyí iyó cuatyí ñu ta ña chiñuhú ca cha cuhva cuenda ra inga chaha.

³ Soco tahan cuiya ri chahá cuenda ra niñi, ta ican cuan sanicohón chi iñi ñu vatyí iyó cuatyí ñu.

⁴ Vatyí niñi toro ta niñi ndixihyu, ma cuví maa tinyaa chi cuatyí yo.

⁵ Yucuan chaha ra Cristo, quiví cuaquichi ra siqui ñuhu ñayiví ihya, catyí ra chi Nyoo tyehe caa:

Ña cuñún cha cahñi ñayiví quití ta cuhva cuenda ñu chuun, yucuan chaha savahun noo coño ñuhu chii.

(Vatyí tyicuan caa ta cuví cuhva cuende chii chuun.)

⁶ Ta vatyí ña tahán iñun cha cahmi ñu quití ta cuhva cuenda ñu chuun cha cuenda cha tinyaa cuatyí ñu.

⁷ Catyí yuhu: “Ma yuhu, vachi ihya vatyí sacuví cuhva cuñún, Nyoo Suti,

tari cuhva cahán chi tuhun nu libru ley maun”, catyí ra Jesucristo.

⁸ Cha xihna ri, catyí ra Jesucristo vatyí Nyoo, ña cuñí ra cha cuhva cuenda ñu chi quití chi ra. Ni cha cahmi ñu quití cha cuenda cha tinyaa cuatyí ñu, ña cuñí Nyoo, catyí ra. Vasi maa ri tuhun cha catyí ley chahnu vatyí sacuví yo cuví, soco ña tahán iñi Nyoo, catyí ra.

⁹ Ta yaha cuan ta catyí tucu ra: “Ma yuhu vachi ihya, vatyí sacuví cuhva cuñún, Nyoo Suti.” O cuñí

chi catyí, sacuachiyo Nyoo cuhva chahnu cuan, ta nacuví chi inga cuhva chaa ihya.

¹⁰ Nyoo sandundhi ra chi yo vatyí ra Jesucristo sacuví ra cuhva cuñí Sutu ra, ta chaha cuenda ra coño ñuhu ra. Noo ri chaha chihí ra ta ndihí tyiño saha ra.

¹¹ Tandihí ra cacuví tata sutu ñuu Israel, ndi quiví sacuví ra tyiño nuu Nyoo, ta tyicuan ri chaha cuenda ra suri maa cha tuhvá maa ra chahá cuenda chi Nyoo, vasi ña cuví tinyaa chi cuatyí yo.

¹² Soco ra Jesucristo, noo ri chaha chaha cuenda ra chi ra chi Nyoo cha cuenda cuatyí yo. Tyicuan ta chicunya ra tyayu gloria chiyo ndaha vaha Nyoo.

¹³ Ta yucuan nyatú ra nyacua nya cacun Nyoo chi ra xaan iñi chi ra chaha ra.

¹⁴ Vatyí chihin noo ri chaha cha chihí ra Cristo ta cuví sanduvaha ra añima ñayiví cuenda Nyoo, tyicuan ri maa.

¹⁵ Ta suri tyicuan caa catyí tucu Tatyí Ii Nyoo chi yo. Vatyí cha xihna ri catyí ra chi yo nu tutu tuhun Nyoo tyehe caa:

¹⁶ Tuhun cha cunatyihí tahin chihin ñu quiví cuan, tyehe caa cucuví, catyí Sutu Mañi yo:

Cutyai ley mai chichi añima ñu, ta cutyai chichi cha chiñi tuñi xiñi ñu, catyí Nyoo.

¹⁷ Ta yaha cuan ta catyí tucu ra: Ma nicohon ca maa iñi cuatyí ñu, niri cha quiñi caa cha chinyacuví ñu, catyí Sutu Mañi yo.

¹⁸ Ta cha yaha saha Nyoo ticahnu iñi cuatyí, ña cuñí ca chi cha cahñi ñayiví chi quití, ta cuhva cuenda ñu chi Nyoo cha cuenda cuatyí ñu.

Cuñí chi nanducu yo chi Nyoo

¹⁹ Yucuan chaha yañi, cuví quihví maa yo Nu Ii Xaan Ca cuan nu nyaá Nyoo, cha cuenda vatyí cha chati niñi ra Jesucristo ta tinyaa ra cuatyí yo.

²⁰ Cha nuña ra Cristo noo ityi chaa, ityi cuhun yo nu conyito añima yo. Vatyí maa maa cuhva cha chihí ra ta

ndata cortina cha chasi nu chinyaa Nyoo. Cha tahnya cortina, ican cuvi cha chihí ra, tacuhva nuña ityi quihvi yo ta chaa yo nu nyaá Nyoo.

²¹ Ra Jesús cuvi sutu cha nyacá ñaha nu cuvi vehe Nyoo andivi.

²² Yucuan chaha cuñi chi nanducu yo chi Nyoo chihin noo cha ndicha ta chihin cha ñi ñi yo chinó ñi yo chi ra, vatyí maa ra sandundi ra añima yo, tacuhva ma quihí ca ñi yo vatyí iyó cuatyí yo, vatyí tari cha nacatya ra coño ñuhu yo chihin ndutya cuii, na ndu ñi yo nu Nyoo.

²³ Na cuní ca ñi yo chino ñi yo chi Nyoo ta ma ndu uvi ñi yo vatyí Nyoo cuhva ra cha catyí ra vatyí cuhva ra chi yo.

²⁴ Ta cuñi chi nanducu yo cuhva tyinyee yo chi tahan yo, na cuñi ca ñu chi tahan ñu ta sacuvi ca ñu cha vaha.

²⁵ Ña tahán chi quehen yo cuhva caá ñu cha sandihí cha quichi nu ndu ñi ri yo, soco cuñi chi cha sanduní yo ñi noo noo tahan yo. Ta yaha ca cuhva cuñi chi tyinyee yo chi tahan yo vityin cha nyehé yo vatyí Sutu Mañi yo cha cuñi chaa quivi quichi ra ta cucutuñi chi tandihí ñáyivi.

²⁶ Vatyí tatu cha yaha chicohon nuu yo cha ndicha, ta ña quichahá yo ta tyicuan ri sacuvi ca yo cuatyí, ñahri ca cuhva coo tichahnu ñi cuatyí yo.

²⁷ Ta cutachi tuñi Nyoo chi yo. Ta cutyihí ra chi yo nu cucayu ñáyivi cha xaan ñi chi ra, ta cundihí tuhun ñu.

²⁸ Tatu noo ñáyivi Israel ña quichaha ñu cuhva catyí ley ra Moisés, ta chiyo uvi o uñi testigu, cúvi ñu cuan cha cuenda cuatyí ñu, ta yori cundahvi cuñi nyehe chi ñu.

²⁹ Ta nyaca cuvi ñu cha ña quichaha ca chi Sehe Nyoo ta sahá ñu tyi ñiñi ra cha sanduvaha añima ñu cha ñima ri tuhun cuvi. Ta chihin ñiñi cuan natyihí tahan Nyoo tuhun chihin yo. Soco cahán ña vaha ñu siqui Tatyí Ii Nyoo cha chahá tumañi ñi chi yo. Yaha ca cuhva cutachi tuñi Nyoo chi ñu cuan.

³⁰ Vatyí chitó yo vatyí Sutu Mañi yo, ican ra catyí ra tyehe caa: “Yuhu

tahán chi tachi tuñi chi ñáyivi, yuhu catyí cha cuvi chi ñu.” Ta catyí tucu ra vatyí cutuñi chi ñu nuu ra.

³¹ Ndicha cha iyó Nyoo, ta yucuan chaha tahán chi cuyuhvi yo chi ra, coto tachi tuñi ra chi yo cha cuenda cuatyí yo.

³² Soco ma naa ñi ndo quivi natin cuenda ndo cha ndichin Nyoo chichi añima ndo, vatyí quivi cuan cunyeexaan ñi ndo cha nyehe ndo tindoho cha cuenda ra.

³³ Yihí nyoho cahan ñáyivi chi ndo, ta sanyehe ñu tindoho chi ndo nu tuvi. Ta yihí nyoho uhvi xaan cuvi chi ndo cha nyehe ndo cha cuvi chi tahan ndo cha tyicuan caa, ta cunyeexaan ndo.

³⁴ Ta cundahvi ñi ndo chi ñu ñoho vehe caa, ta chihin cha si cuñi ndo cunyeexaan ndo quivi tinyaa ñu cha iyó chi ndo, vatyí chitó ndo vatyí andivi iyó ca cha vaha ca cha cuenda ndo, ta ña ndihí maa cuan.

³⁵ Yucuan chaha ma sandihí ndo cha quihí ñi ndo chi ra Cristo, vatyí nu cuahan ca chi ta cuñihí ndo cha vaha ca vatyí chinó ñi ndo.

³⁶ Cuñi chi cha coo cha cama ñi ndo tacuhva cuvi sacuvi ndo cuhva cuñi Nyoo, ta tyicuan caa ta naquehen ndo cha catyí ra tyi cuhva ra.

³⁷ Vatyí nu tutu Nyoo catyí chi tyehe caa:

Ña naha ca ta cuquichi ra cha tahán chi quichi, ta ma cucuee ca ra.

³⁸ Ta catyí Sutu Mañi yo tyehe caa: “Ñu cha sanduvahí añima, chihin cha chinó ri ñi ñu chi yuhu, ta conyito añima ñu.

Soco tatu cunuhu chata ñu, ma cusii cuñi yuhu chihin ñu”, catyí Nyoo.

³⁹ Soco maa yo ña sacuvi yo tari sacuvi ñu cuanaá añima, vatyí ñu chinó ñi chi Nyoo cuvi yo, ta tyicuan caa cucacu añima yo.

11

Cuhva cuñi chi cha chinó ñi yo chi Nyoo

1 Cha chinó iñi yo chi Nyoo ican cuví cha chitó vaha yo tyi cuñihi yo cha nyatú yo, ta chitó vaha yo vatyí noo cha ndicha vaha cha ña nyehé yo vityin, cuñihi yo vatyí chinó iñi yo chi Nyoo.

2 Ñáyivi chiyo ta cha naha, chinqo iñi ñu chi Nyoo, ta yucuan chaha quita vaha ñu nuu ra.

3 Cha cuenda cha chinó iñi yo chi Nyoo, ta chitó yo vatyí savaha ra ñuhu ñayivi chihin tuhun cahán ra. Ta chitó yo vatyí tandihi cha nyehé yo vityin, chinqo chi ta cha naha chihin cha ña tuhva yo nyehé.

4 Cha cuenda cha chinqo iñi ra Abel chi Nyoo, ta chaha cuenda ra noo cha chaha ra chi Nyoo. Ta vaha ca cha chaha ra ta ñima ca cha chaha ra Caín, yañi ra. Ta yucuan chaha natiin cuenda Nyoo chi ra tari noo ra vaha, ta natiin cuenda ra cha chaha ra. Yucuan chaha vasi cha chihí ra Abel, soco tari quivi cahán ca ra tuhun chihin yo vityin, yoso caa tahán chi chino iñi yo chi Nyoo.

5 Cha cuenda cha chinqo xaan iñi ra Enoc chi Nyoo, ta cuanuhu ra chihin Nyoo chihin cha ña chihí ra. Ta ña nañihi ca ñu chi ra, vatyí naquehen Nyoo chi ra. Ta nu tutu Nyoo, catyí chi vatyí cha ni cumañi ca naquehen Nyoo chi ra Enoc, sacuví ra maa ri maa cuhva tahán iñi Nyoo, yucuan chaha naquehen ra chi ra.

6 Soco ma cuví sacuvi yo cha tahán iñi Nyoo tatu ña chinó iñi yo chi ra. Vatyí tatu cuñí yo nanducu yo chi ra, cuñí chi cha chinó iñi yo tyi iyó ra. Ta cuñí tucu chi chinó iñi yo vatyí cucuhva ra cha vaha chi ñu nanducú chi ra.

7 Cha cuenda cha chinqo iñi ra Noé chi Nyoo, ta quichaha ra tuhun cahan Nyoo, cha catyí Nyoo chi ra noo cha cucuvi ityi nuu ca. Ta vasi tañaha ca nyehe ra soco cha cuenda cha chinó iñi ra chi Nyoo, ta savaha ra barcu cuan ta sacacu ra chi ñáyivi chi ra. Ta cha cuenda cha chinqo iñi ra chi Nyoo, sandoo ra cuatyí ñu siqui ñu cha ña quichahá chi Nyoo, na tachi tuñi ra

chi ñu. Ta cha cuenda cha chinqo iñi ra Noé chi Nyoo cuvaha ra nuu ra.

8 Ta cha cuenda cha chinqo iñi ra Abraham chi Nyoo, ta quichaha ra chi ra quivi cana ra chi ra. Yucuan chaha quita ra ñuu ra ta cuahan ra nu cucuhva Nyoo ñuhú cha cundoo chi ra. Quita ra ñuu ra chihin cha ña chitó ra nya cuahan ra.

9 Cha cuenda cha chinó iñi ra Abraham, yucuan chaha chiyo ra nu ñuhú cha ta cuhva ca Nyoo chi ra. Chiyo ra noo vehe sahma ri, ta suri tyicuan caa tucu ra Isaac, sehe ra, ta ra Jacob, sehe ñañi ra. Vatyí suri catyí tucu Nyoo chi ninduvi ra cuan tyi cucuhva ra ñuhú cuan chi ra.

10 Vatyí ra Abraham nyatú maa ra noo ñuu vaha ca cha cucuhva Nyoo chi ra, ta maa Nyoo chacun cuhva ñuu cuan ta maa ra savaha ra, ta chicha cimientu tyihi ra chaha.

11 Ta suri chinqo iñi tucu cu Sara cha catyí Nyoo chí ña cha cucoo sehe ña. Ta vasi cha chahnu xaan ña, soco chaha Nyoo fuerza ra chí ña, ta chicoo sehe ña. Tyicuan caa cuví vatyí chinqo iñi cu Sara cha catyí Nyoo chí ña.

12 Yucuan chaha vasi cha nyaña quivi cha cúvi ra Abraham, soco chicoo sehe ra. Ta yaha cuan cuaha xaan ñáyivi cacu cha cuví ñu tata ra. Tari cha cuaha tiñoo andivi, ta tari cha cuaha niyiti yuhu tyañuhu, vatyí ña cuví nacahvi yo.

13 Tandihí ñu cuan cachihí ñu cha ni cumañi ca naquehen cuenda ñu cha catyí Nyoo tyi cuhva ra chí ñu. Soco vasi ta naquehen cuenda ca ñu ta chihí ñu soco nyehe cachi vaha ñu chihin cha chinó iñi ñu. Ta si xaan cuñí ñu. Ta chihin cuan cutuñí iñi ñu ta cahán ñu tuhun vatyí noo ñu yahá ri siqui ñuhu ñayivi ihya cuví ñu.

14 Vatyí ñu cacahán tyehe caa, cuñí chi catyí vatyí ni nanducú ñu noo nu coo ñu.

15 Tyehe ta chicá ca xiñi ñu ñuu nu quita ñu, totyehe cuví cunuhu ñu nyicuan.

16 Soco vatyí cuñí ñu noo ñuu vaha ca, o cuñí chi catyí nya gloria, yucuan chaha Nyoo ña cucahan nuu ra cha

cuví ra Nyoo ñu. Vatyí cumí ra noo ñuu nu cuví coo ñu.

17 Ta cha cuenda cha chinqo ñi ra Abraham chí Nyoo, yucuan cuenda quichaha ra nu cahan Nyoo ta tyaá ra cuhva cha cahñi ra chí sehe mañi ra ra Isaac, quívi nducu nyehe Nyoo chí ra tu ndicha cha chinó ñi ra, vasi suri maa Nyoo catyi ra

18 vatyí cuaha xaan ñáyivi cucuvi tata ra chihin ra Isaac cuan.

19 Soco ña yuhvi ra Abraham cuacuhva cuenda ra sehe ra chí Nyoo, vatyí chitó ra vatyí Nyoo, iyó tunyee ñi chí ra nyacua nya cha sanandotó ra ndiyi. Ta tari quívi sanandoto Nyoo chí sehe ra, vatyí cha nyaá cha cua cahñi ra chí ra, ta nacuhva Nyoo chí sehe ra chí ra inga chaha.

20 Ta ra Isaac chinqo tucu ñi ra chí Nyoo. Ta yucuan chaha catyi ra vatyí sehe ra, ra Jacob ta ra Esaú, cuñihi ra cha vaha nu cuahan ca chí.

21 Ta ra Jacob chinqo ñi ra chí Nyoo, cuhva cha cua cúvi ra. Ta catyi ra vatyí tahan tahan sehe ñañi ra, sehe ra José, cuñihi ra cha vaha. Ta sacahnú ra chí Nyoo nu nanyaá ra chihin yutun cha tuví ra.

22 Ta ra José ñandihí, chinqo ñi ra chí Nyoo, ta catyi ra, cuhva cha cua cúvi ra, vatyí ñu Israel, ñáyivi chí ra, cu quita coyo ñu ñuu Egipto cuan nu cuahan ca chí. Ta sandoq ra tyiño chí ñu, vatyí na naquehen ñu yiqui ra quívi quita ñu ñuu cuan.

23 Cha cuenda cha chinqo ñi sutu ra Moisés ta síhi ra chí Nyoo, yucuan chaha quívi cacú ra, nyehe ñu tyi noo cha lee tyaquí xaan cuví ra. Ta yihí ñi ñu cha cusacacu Nyoo chí ra ta ma cúvi ra, vasi catyi rey cuan vatyí cúvi ndi ra cuatyaá. Ta ña yuhvi ñu ta tixehe ñu chí cue uñi yoo.

24 Ta ra Moisés tucu, chinqo ñi ra chí Nyoo. Ta quívi cha chahnú ra, ña cuñi ca ra cha cuví síhi ra chí ñaha sehe rey ñuu Egipto cuan.

25 Ta ni ña cuñi ra ndoo ra ñuu Egipto cuan vatyí cusii ñi ra o cunyacuvi ra cha quiñi caa. Vatyí chitó ra tyi tuhun ñn yaha ri cuví cuan.

Soco vaha taxin ca cuñi ra nyehe ra tindoho chihin ñáyivi cuenda Nyoo.

26 Ra Moisés, vaha ca cuñi ra cha nyehe ra ticahan nuu cuenda ra Cristo vatyí cahnú ca cha tyayii cuví cuan chí maa ra ta ñima ca tandihí cha tyayii cha iyó ñuu Egipto. Vatyí chitó ra tyi cua cuhva Nyoo cha vaha chí ra.

27 Ta cha cuenda cha chinqo ñi ra Moisés chí Nyoo, ta quita ra ñuu Egipto, ta ña yuhvi ra cha cuxaán rey cuan. Ta sanyee xaan ra ñi ra. Tari cha vatyí nyehe ra chí Nyoo cha ña nyehé yo.

28 Cha cuenda cha chinqo ñi ra Moisés chí Nyoo ta sanducahnú ra vico cha cahñi ñu noo mbee luhlu, ta tachí ra nacahyu ñu ñi ti yuvehe ñu, tacuhva vatyí ma cahñi ángel Nyoo chí ni noo sehe nuu ñu Israel.

29 Ta cha cuenda cha chinqo ñi ñu Israel chí Nyoo ta yaha sava ñu Tyañuhu Cuaha, tari cha yaha ñu noo ñuhú ityi. Ta cuhva cha cacuñi tucu ra Egipto cayaha ra, ña cuví yaha ra vatyí nacasi Nyoo tyañuhu cuan siqui ra ta cachihí ra chichi ndutya cuan.

30 Ta cha cuenda cha chinqo ñi ñu Israel chí Nyoo, ta chico ñu ucha tahan chaha chata ñuu Jericó, ta tandihí cuii maa nu sama chata ñuu cuan cana-coyo.

31 Ta cha cuenda cha chinqo ñi cu Rahab, ñaha cata ñi cuan, chí Nyoo, ta ña chihí ña ñn ri chihin ñu ñuu ña, ñu ña quichaha chí Nyoo, vatyí maa ña, tyinyee vaha ña chí ra Israel, ra chahan coyo chinyehe tatu cuví chasaha ra tinyaa ra ñuu ña chí ra nyacá ñaha ñuu cuan.

32 ¿Ñáá ca cha cuví catyi vityin? Cuaha xaan cuhva cucuñi chí chii tatu cahín tuhun ra Gedeón, ra Barac, tuhun ra Sansón, ra Jefe, ta tuhun ra David, ta ra Samuel ta tuhun ra cacuvi profeta Nyoo ta cha naha.

33 Cha cuenda cha cachinqo ñi ra chí Nyoo, ta yihí ra saha ganaa ra chí inga ñuu nahnu. Ta yihí ra vaha xaan chinyaca ñaha ra ñáyivi cuenda Nyoo. Yihí ra ñihí ra cha catyi Nyoo tyi

cuhva ra chi ra. Yihí ra chasi ra yuhu ndicaha.

³⁴ Yihí ra ña cayu ra chihin ñuhu chichi horno nu catyihí ra chi ra. Yihí ra cacu ra cha cahñi ñáyivi chi ra chihin mityi. Yihí ra cha ñahri fuerza chi ra, soco candunyeē ra, ta chiyo xaan fuerza chi ra chichi cuatyí cuan, ta cuví chasaha ra chi sindaro cuenda ñu xaan iñi chi ra.

³⁵ Ta chicoo suhva ñusihí, nandoto ñáyivi chi ñu.

Ta inga ñáyivi chihí ñu chihin cha cuaha xaan tindocho sanyehe ñáyivi chi ñu, soco ña sandoo ñu chi Nyoo vasi chihí ñu cha catyí ra, vatyí chitó ñu, vatyí tatu ma sandihí ñu cha chinó iñi ñu chi Nyoo, cunandoto ñu ta cucoo ñu noo ñáyivi vaha xaan ca.

³⁶ Ta inga ñu nyehe ñu tindocho cha cahán nyaa ñáyivi chi ñu ta cañi ñu chi ñu. Ta inga ñu chinuhñi ñu chihin cadena ta cuahan ñu vehe caa.

³⁷ Yihí ñu chihin yuu chahñi ñáyivi chi ñu. Yihí ñu chahnya ra chihin tierra chi ñu. Yihí ñu nducú nyehe ñáyivi chi ñu. Yihí ñu chihí ñu cha chahñi ñáyivi chi ñu chihin mityi. Yihí ñu chica noo ñu ta ñahri sahma ñu. Chihin ñi mbee ri ta ñi ndixihyu ñihno ñu. Ndahvi xaan ñu. Ta cuihya xaan cuñi ñu. Ta sanyehe ñáyivi cha ña ñohó nuu Nyoo tindocho chi ñu.

³⁸ Ta ñáyivi ña ñohó nuu Nyoo ña nañá ñu cha cu ñin ri ñu chihin ñáyivi ndahvi cuan vatyí vaha ñu nuu Nyoo. Chica noo ndahvi ñu ityi chiqui ndi, ityi yucu. Chiyo ñu chichi yavi yuu ta yavi ñuhú.

³⁹ Tandihí maa ñu vasi cahan vaha Nyoo siqui ñu cha cuenda cha chinó iñi ñu chi ra, soco ña ñihí ñu cha catyí Nyoo cha cuhva ra chi ñu.

⁴⁰ Vatyí natyaa ra cuhva, cha cuhva ra nonga cha vaha ca chi ñu vatyí natyihí ra cuenda chi yo ta ñin ri cuthan chi chi yo chihin ñu cuan.

12

ñin ri chi ra Jesús tahán chi cuita iñi yo

¹ Tandihí ñáyivi cuan quita vaha ñu vatyí chino iñi ñu chi Nyoo. Ta vityin chihin cuan sandunñi ñu iñi yo ta nyatú ñu nyehe ñu tatu quita vaha yo. Yucuan chaha cuñi chi cha sacuachiyo xiin yo tandihí cha sayangá chi yo, tandihí cuatyí cha nyicón chi yo. Ta chihin cha cama iñi yo ta cuhun yo ityi nuu ca chihin Nyoo.

² ñin ri chi ra Jesús quihí nuu yo, vatyí maa ra chaha ra cha chinó xaan iñi yo chi Nyoo, ta chaha ra tandihí cuhva tahán chi chino iñi yo. Ta cha ni cumañi ca cúvi ra, chitó ra vatyí si xaan cucuvi chi ra cha yaha cúvi ra. Yucuan chaha, chaha ra cha cahñi ñáyivi chi ra. Ña quichaha ra tichan nuu cha cúvi ra tari chihí noo ra iyó cuatyí, ta vityin nyaá ra chiyo vaha Nyoo gloria.

³ Saha ndo cuenda cuhva chiyo ra Jesús, vatyí nyehe xaan ra tindocho saha ñu iyó cuatyí. Yucuan chaha ma cutatu ndo, ta ma ndu uvi iñi ndo cha nyicón ndo chi ra.

⁴ Vatyí nyoho ta chaa ca ndo nyehe ndo tindocho cha cuenda cha cañi tahan ndo chihin cha quini caa, tari nyehe ra Cristo tindocho ta chihí ra.

⁵ ¿Atu cha naa iñi ndo tuhun chaha Nyoo chi ndo tari cha sehe ra chi ndo? Catyí ra tyehe caa nu tutu ra:

Sehe luhli, ma cuxaun tatu saquehen ityi chuun.

Ma nducuihya iñun tatu cahín chuun.

⁶ Vatyí ra saquehén ityi yuhu chi, chaha cha cuñi chi ra, vatyí sehi cuví chi ra, catyí Nyoo.

⁷ Cunyeē ndo ta cutuhva ndo tatu saquehen ityi ra chi ndo, vatyí Nyoo, sehe vaha ra saha ra chi ndo. Vatyí tandihí ra iyó sehe, saquehén ityi ra chi sehe ra.

⁸ Vatyí tatu ña saquehén ityi Nyoo chi ndo, ñima sehe vaha ra cuví chi ndo, soco tatu saquehén ityi ra chi ndo, sehe vaha ra cuví chi ndo.

⁹ Ta ñin ri, ta nyihi yo, sutu yo ihya ñáyivi saquehen ityi ra chi yo, ta saha yo ñáyivi chi ra. Ta nyaca cuví Nyoo, tahán tucu chi saha yo ñáyivi chi Sutú

yo Nyoo, tyicuan ta coo añima yo tyicuan ri maa.

¹⁰ Sutu yo cuenda coño ñuhu yo, saquehen ityi ra chi yo suhva ri quivi, yoso cuhva cha cuñi chi. Soco Nyoo saquehén ityi ra chi yo cha cuenda noo cha vaha ca chi yo, vatyí sa ii ra chi yo tari maa ra, cha ii ra.

¹¹ Ndicha vatyí ña tahán iñi yo cha ndohó yo vatyí uhvi chi yo. Soco chihin cha ndoho yo, cutuhva yo coo yo noo ñayivi vaha.

Yica xaan tatu ma quichaha yo cha catyí Nyoo chi yo

¹² Yucuan chaha sandunyeé ndo iñi ndo, ta ma quihí iñi ndo cha ma cuvi cunyicon ndo chi ra Cristo.

¹³ Ta nanducu ndo cuhva coo vaha ndo chihin Nyoo, nanducu ndo cuhva caca ndoo ndo chihin ra. Tyicuan ta maa ra cuhva ra fuerza chi ndo ta nduvaha ndo nuu Nyoo ta ma cucuihya ca cuñi ndo.

¹⁴ Saniñi ndo coo vaha ndo chihin tandihí ñayivi. Ta coo ndo noo ñayivi cachi. Vatyí tatu ña cachi iyó yo, chihin Sutu Mañi yo Nyoo, ma nyehe yo chi ra.

¹⁵ Saha ndo cuenda chi ndo coto yihí ndo, ma ñihi ndo tumañi iñi cha iyó chi ra. Ta saha ndo cuenda chi ndo, coto cuvi ndo tari noo yutun cha chahá chiti uva, ta coto quehen ñayivi cha caá ndo ta tiví ñu nuu Nyoo.

¹⁶ Ta ni noo ndo ta maa coo ndo chihin ñayivi tatu ñima ñasihí ndo o yí ndo cuví. Ni ma cuñi ndo vatyí tuhun Nyoo noo cha ñima ri tuhun cuví, vatyí tyicuan caa sacuvi ra Esaú, vatyí chihin noo nyayu ri, xico ra tandihí cha tahán chi chi ra cha cuví ra sehe nuu sutu ra.

¹⁷ Ta chitó ndo vatyí cha yaha cuan ta cuñi ra Esaú cha nasoco sutu ra chi ra, soco ña cuví ca. Ta vasi chacu vavaha ra, soco ña ñihí ca ra cuhva nasama ra cuhva cha chinyacuvi ra.

¹⁸ Ta maa ndo chaá ndo nuu nyaá Nyoo soco ñima tari chaá ñu Israel cuan quivi chahan ñu noo yucu nu cuví yucu Sinaí. Ta yucuan nyehe ñu cayu ñuhu, ta nduñaa iñi, ta ñihi xaan vatyí.

¹⁹ Ta chiñi ñu nativi cutu cuihya ta cahan Nyoo chihin ñu. Ta ñu cha chiñi tuhun cahan ra, chacu ndahvi ñu tacuhva ma cahan ca ra chihin ñu, vatyí yuhvi xaan ñu

²⁰ cha cuenda vatyí ña cunyeé iñi ñu tuhun cha chaha ra chi ñu. Vatyí catyí ra tyehe caa: “Tatu quihvi noo ñayivi, cahñi ndo chi ñu chihin yuu o chihin lanza, cuví ri ñu ñayivi o quití”, catyí Nyoo chi ñu.

²¹ Yuhvi xaan ñu cha nyehé ñu yucuan, vatyí nyacua nya ra Moisés ta catyí ra: “Ñihí xain chihin cha yuhvi”, catyí ra.

²² Soco yoó ña nyehe yo cha yuhvi cuan vatyí noo yucu cha nañi Sión nu cuví ñuu Nyoo nyitó chaá yo. O cuñi chi catyí ñuu Jerusalén cha nyaá andivi, nu nyicú cuaha mil ángel.

²³ Candú ñin ri yo vatyí sacahnu yo chi Nyoo vatyí ndú ñin ri tandihí ñu cha cuví sehe Nyoo cha nyicú sivi nu tutu nya andivi. Ta chaa yo nuu Nyoo cha cuví jee chi tandihí ñayivi. ñin ri nyicú yo chihin añima ñu vaha cha sanduvaha maa Nyoo.

²⁴ Ta natuhva ndo chi ra Jesús ra cuví ra cahan chaha yo vityin cha natyihí tahan Nyoo tuhun chaa chihin yo. Ta chatí ñiñi ra. Ta ican chi chahá noo cha vaha ca ta ñima ca cha chahá ñiñi ra Abel. (Vatyí ra Abel chihí ra ta tachí tuñi Nyoo chi yañi ra. Soco chihí ra Jesús, ta iyó tucahnu iñi cuatyí yo.)

²⁵ Yucuan chaha saha yo cuenda coto ma quichaha yo chi ra cha cahan chihin yo. Vatyí ñu Israel cuan, ña cacu ñu cha ña cuñi quichaha nu cahan Nyoo quivi cahan ra nu cuví yucu Sinaí ihya siqui ñuhu ñayivi. Ta nyaca cuví yoó, ma cuvi maa cacu yo tatu nacuhva yo chata yo chi ra cha cahan chihin yo nya andivi vityin.

²⁶ Quivi cuan ndusu Nyoo sacanda chi ñuhu ñayivi. Soco vityin catyí chi tyehe caa: “Noo ri ca chaha cusacande ta ñima ñuhu ñayivi ri, soco andivi ñandihí.”

²⁷ Ta cha catyí ra vatyí cusacanda ra nonga chaha, cutuñi iñi yo vatyí

cucuachiyo tandihí cha nyaá ii ri cha savaha Nyoo. Ta cundoo cha ma cuvi nacanda.

²⁸ Nu chahá Nyoo cunyaa yo chihin ra nu nyacá ñaha ra, ma nacanda cuan. Yucuan chaha na nacuhva yo tyahvi nyoo chi ra, ta sacahnu yo chi ra chihin cha ñi ñi yo, ta chihin cha saha yo ñáyivi chi ra, vatyí tyicuan caa tahán ñi ra.

²⁹ Vatyí Nyoo cuenda yo, cuví ra tari noo ñuhú cha chahmí tandihí, ta tyicuan caa cusanaa ra tandihí cha ña vaha.

13

Na coo yo cuhva tahán ñi Nyoo

¹ Ma sandihí ndo cha cuñi ndo chi tandihí ñu yihí cuenda Nyoo tari cha tahan ndo chi ñu.

² Ta ma naa ñi ndo cha cuvaha ñáyivi cuví ndo chihin ñáyivi cha chaá vehe ndo. Vatyí iyó chaha cha cuenda cha vaha ñáyivi cuví ndo, ta chaha ndo nu coo ñáyivi; chi ángel, chaha ndo nu coo, ta ña tuví ñi ndo.

³ Ma naa ñi ndo chi ra ñohó vehe caa tari cha ñohó tucu maa ndo vehe caa chihin ra. Ta tyicuan caa tucu ñu nyehé tindoho sahá ñáyivi. Saha ndo tyi nyehé tucu maa ndo tindoho tari nyehé ñu, tyicuan ta cundahvi cuñi ndo chi ñu ta tyinyee ndo chi ñu. Vatyí chitó ndo yoso caa uhvi chi ñu cuan tyi ñáyivi cuví ñu tari maa ndo.

⁴ Cha tandaha ndo, noo cha vaha cuví. Ta nyoho cha tandaha ndo tahán chi saha ndo ñáyivi chi yí ndo o chi ñasihí ndo. Vii coo ndo chihin tahan ndo, vatyí Nyoo cutachi tuñi ra chi ñu iyó yí ta iyó inga ra chi ñu, o ra iyó ñasihí ta iyó inga ñusihí chi ra.

⁵ Ma cuñi xaan ndo xuhun. Ndo ndo vaha chihin cha iyó chi ndo, vatyí Nyoo catyí ra: “Ma sañe chuun ta ni ma sandoo ñihne chuun”, catyí ra.

⁶ Yucuan chaha cuví catyí yo chihin cha ñi ñi yo:

Sutu Mañi yo cuví ra tyinyeeé chii, Ma yuhvi ñáá cha sacuvi ñáyivi chii.

⁷ Nícohon ñi ndo chi ra cayihí ndaha vehe ñuhu, ra cacahán tuhun

Nyoo chihin ndo. Nacaca xiñi ndo vatyí maa ra cachi iyó ra nuu Nyoo, ta cunyicon ndo cuhva cha vaha xaan chinó ñi maa ra chi Nyoo.

⁸ Ra Jesucristo ña nasamá ra. Ican ra cuví ra ta tyembu chahnu, ta ican ra cuví ra vityin. Ta ican ra cuví ra nuu cuahan ca chi tyicuan ri maa.

⁹ Ma cuhva ndo cha sandavi ñaha ñáyivi chi ndo chihin tuhun sñn caa cha sañahá ñu. Vaha ca cha cu ñi ñi ndo chihin cha cuñi Nyoo chi yo, ta ñima ca tuhun cha sañahá ñu cuan: cha yica cha cachi yo. Ña tyinyeeé maa cuan chi ñu nyacuví tyicuan caa.

¹⁰ Iyó noo arta cha cuenda yo. Nu chati ñiñi ra Cristo nu cruzi, ican cuan cuví. Ta ñu cuñi cacu chihin cha quichahá ñu ley chahnu cha quichahá ra cacuvi sutu ta cha naha, ma cuvi tyinyee ra Cristo chi ñu.

¹¹ Ra cuví sutu cahnu cuenda ñu Israel chinyaca ra ñiñi quiti Nu Ii Xaan Ca cuan cha cuenda cuatyí ñáyivi, soco coño ti chinyaca ra ityi chata ñu vatyí cayu chi.

¹² Ta tyicuan caa tucu ra Jesús, tyaa Nyoo tyiño chi ra cha nyehe ra tindoho ta cúvi ra ityi chata ñuu Jerusalén, tacuhva vatyí sandundí ra chi yo chihin ñiñi ra.

¹³ Ma cahan nuu yo nyehe yo tindoho ticahan nuu cha cuenda ra Cristo, tari nyehe tucu maa ra cha cuenda yo quivi chahan ra chicúvi ra ityi chata ñuu Jerusalén. Tari quivi cha cuahan tucu yoó ityi chata ñuu cuví chi cuan tatu ña cahán nuu yo nyehe yo tindoho cha cuenda tuhun ra.

¹⁴ Vatyí ihya siqui ñuhu ñáyivi, ñahri noo ñuu cha tyicuan ri maa cucoo iyó. Soco nanducú yo noo ñuu cha cuquichi, cha yaha ndihí tuhun ñuhu ñáyivi ihya.

¹⁵ Yucuan chaha vityin cha ñohó ra Cristo aña yo, tahán chi cha saniñi yo ta sacahnu yo chi Nyoo chihin yaa, ta chihin cha cahan yo tuhun cha cahnu cuví ra.

¹⁶ Ta ma naa ñi ndo cha sacuvi ndo cha vaha. Ta tyinyee ndo chi tahan

ndo chihin cha iyó chi ndo, vatyí ican ihya cuví cha tahán iñi Nyoo.

¹⁷ Quichaha ndo tuhun cahán ra casaquehén ityi chi ndo, ta cūhva ndo chi ndo cunyaca ñaha ra vatyí nyicú ra tyiño casahá cumi ra añima ndo. Ta coo quivi cutahan chi cunacuhva ra cuenda tyiño casahá ra chi Nyoo. Ndūcu ndo cūhva sacuvi ndo cha vaha, tacuhva vatyí chihin cha siñ cuñi ra cūhva ra cuenda ndo nuu Nyoo, vatyí tatu ña sacuví ndo cha vaha, chihin cha cuihya iñi ra cūhva ra cuenda ndo, ta nyoho, ma quita vaha ndo nuu Nyoo.

¹⁸ Vaha cuñi añima ndi chihin Nyoo, ta cuñi ndi cha cacán tahvi ndo chaha ndi vatyí cuñi ndi sacuví ca ndi cha vaha.

¹⁹ Ta chiquén noo tumañi iñi chi ndo cha cacán tahvi ndo chiin chahi tacuhva vatyí nacuhva Nyoo cūhin cucunyai cha numi ri chihin ndo inga chaha.

Nu ndihí cahan ra ta nacuhva ra nocumi chí ñu

²⁰ Nyoo ican ra iyó cha taxi chi ra, ican ra sanandoto ra chi Sutu Mañi yo Jesucristo, ra cuví ra sahá vaha cuenda chi yo tari cha cuví yo mbee sana ra. Ra Cristo chati ñiñi ra, ta chihin cuan natyihí tahan Nyoo tuhun chaa cha ma ndihí ca maa chihin yo.

²¹ Na cūhva Nyoo cha vaha chi ndo tacuhva cuvi sacuvi ndo cūhva cuñi ra. Ta na sacuvi maa ra cha cuñi maa ra cha cuenda ra Jesucristo chihin tandihí maa yo. ¡Na sacahnu yo chi ra Cristo tyicuan ri maa! ¡Na cuvi chi tyicuan caa!

²² Yañi, chacú ndahvi nuu ndo, na cunyeé xaan iñi ndo chihin tuhun cha chahí ihya chi ndo, vatyí ña cuaha xaan tyai nu tutu ihya chí ndo.

²³ Coto ndo vatyí ra yañi yo, ra Timoteo, cha quitá ra vehe caa. Ta tatu nachaa ra cha numi ri, cūhun ra chihin, na cūhin cunyehi nu nyicú ndo.

²⁴ Cūhva ndo nocumi chí tandihí ra sañahá chí ndo, ta chí tandihí ra yañi yo cuenda ra Cristo. Ñu Italia ihya, tachí ñu nocumi chí ndo.

²⁵ Ta Nyoo na nasoco ra chí tandihí maa ndo. Ta na cuvi chí tyicuan caa.

Carta Cha Sacuhun Ra Santiago Chi Ñu Yihí Cuenda Ra Cristo

Nu chahá ra Santiago nocumi chi ñu

¹ Yuhu ra Santiago cuví noo ra sacuví tyiño nuu Nyoo ta nuu Sutu Mañi yo Jesucristo. Sacuhín nocumi chi ndo cha cuví ndo cha uchi uvi ityi ñáyiví Israel ñu yihí cuenda ra Cristo. Ta quití cuatyí ndo sñn sñn ñuu.

Cha chiñi tuñi cha chahá maa Nyoo

² Yañi, cuñí chi vatyí sñi cuví chi ndo tatu cuaha nuu tñdoho nyehé ndo.

³ Vatyí chitó ndo tatu nyehé ndo tñdoho tari cha vatyí Nyoo nducu nyehé ra tatu ndicha cha chinó iñi ndo chi ra cuví cuan. Ta tyicuan caa ta cua cutuhva ca ndo cha cucama iñi ndo.

⁴ Saña ndo na quichi maa tñdoho siqui ndo, vatyí ican cuví cha sacoo cha cama iñi ndo. Ta tatu cha chicoo cha cama iñi ndo ta cucuvi ndo noo ñáyiví chicha chihin tuhun Nyoo, ta cuacunyeé ndo tandihí cuii maa tñdoho cha vachi ca siqui ndo.

⁵ Tatu nya noo nyoho cumañí cha chiñi tuñi chi ndo, çacan ndo chi Nyoo. Ta Nyoo cuhva ra. Ta ñima chiin ri chahá ra chi ñu chicán chi ra. Ta ña tyicuhvá ra cuhva chahá ra. Ta ña natyihí ra nuu yo cha cuenda cha chahá ra chi yo.

⁶ Soco cuñí chi çacan yo chi ra chihin cha chinó vaha iñi yo. Ta ma quihí iñi yo vatyí ma cuhva ra chi yo. Vatyí ñu cha ña chinó vaha iñi, cuví ñu tari ndutya yuhu tyañuhu cha tyandahá tatyí chii sñn sñn ityi.

⁷⁻⁸ Ta tyicuan caa maa ñu cuan, sñn sñn cuhva chicá xiñi ñu, vatyí sñn cha chicán ñu vityin ta sñn cha chicán ñu tyaan, ta ña ñi iñi ñu sacuví ñu noo cha sacuví ñu. Ña tahán chi quihí iñi ñu vatyí cuñihi ñu cha cuacuhva Sutu Mañi yo chi ñu.

⁹ Tatu iyó noo ra yañi yo, ndahvi ra, cuñí chi cusii cuñí ra vatyí Nyoo nacoñehé ra chi ra.

¹⁰ Soco tatu noo ra yañi yo, tyayii ra, cuñí tucu chi cha cusii cuñí ra tatu ndundahvi ra, vatyí ra tyayii cuví ra tari noo ita cha nyaá nu cuhu, vatyí ña naha maa chiyó chi.

¹¹ Vatyí tatu cañá ñanyii ta ihñi vavaha cuhu cuan, na ityi chi. Ta ita cuan canacavá ri ta ndihí cha tyaquii chi. Ta tyicuan caa tucu ra tyayii, cuquichi tuhun chihi chi ra ta ndoo maa tyiño sahá ra.

Yoso caa cunyeé yo tñdoho

¹² Ñana cha sñi cuví chi ndo cha cunyeé ndo chihin cha cama iñi ndo ñáá tñdoho cha vachí chi ndo. Vatyí tatu cunyeé ndo, cuñihi ndo tari noo corona. Vatyí Nyoo cucuhva ra chi ñu cuñí chi ra, cha coo ñu ñáyiví chaa chihin ra.

¹³ Tatu nya noo nyoho quichí cuví iñi ndo cha sacuvi ndo cha ña vaha, ma cuñi ndo vatyí Nyoo sacuví cha caca xiñi ndo tyicuan caa. Vatyí Nyoo ña quichí cuví iñi ra sacuví ra cha ña vaha. Ta ni ña tyiyuhú ra chi yo cha sacuví yo cha ña vaha.

¹⁴ Soco tatu nya noo ndo quichí cuví iñi ndo sacuví ndo cha ña vaha, suri cha cuenda cha chicá xiñi maa ndo cha ña vaha, yucuan chaha canacava ndo nu cuatyí.

¹⁵ Tatu cuhva xaan yo cuhva cha quihí tuhun ña vaha iñi yo, cuacoo noo quiví ta cuasacuvi yo cuhva ña vaha cuan, ta tyicuan caa cacu cuatyí yo nuu Nyoo. Ta Nyoo tachi tuñi ra cuatyí cuan ta cuchaa tuhun chihi chi yo.

¹⁶ Yañi yuhu, cuñí xain chi ndo. Ma sandavi ñaha ndo chi ndo.

¹⁷ Tandihí cha vaha ta cha vii cha ñihí yo, quichí chi nya ityi siqui vatyí maa Nyoo chahá ra. Ta maa ra savahá ra ñuhú cha iyó andiví: tñño, ta yoo, ta ñanyii. Ta Nyoo tyicuan ri cuví ra Nyoo, ta ni chiin ña tuhvá ra nasama ra cuhva cuví ra.

¹⁸ Ta chahá ra ñáyiví chaa cha iyó yo cha cuenda tuhun ndicha cha cahán ra. Vatyí xihna ca yo cuví

cha nduchaá cha nuu tandihí ca cha savaha ra. Vatyí tyicuan caa cuñí maa ra.

Noo ityi cha ndicha cha tahán chi cuhun yo

¹⁹ Yucuan chaha yañi, noo noo yo ta cuñí chi cha yatyí cōhon iñi yo cha tyasoho yo, soco cuñí chi cha ma yatyí xaan nacahán yo ta ma yatyí xaan cuxaan yo.

²⁰ Vatyí ñáyivi cha cuxaán, ña nyacuví ñu cha tahán iñi Nyoo.

²¹ Yucuan chaha saña ndo cha ña vaha ta cha quiñi caa cha cuaha xaan iyó siqui ñuhu ñáyivi. Ta natin cuenda vaha ndo chihin cha masu iñi ndo tuhun Nyoo cha tachí ra añima ndo. Vatyí tuhun Nyoo cuan iyó tunyee iñi chi chi vatyí sacacú chi añima yo.

²² Soco sacuvi yo yoso cuhva sañahá tuhun Nyoo. Ta ma cuiñi ri maa yo vatyí tatu tacuhva chiñi ri maa yo, suri chi maa yo sandavi ñahá yo.

²³ Vatyí ñu cha chiñi ri maa tuhun Nyoo ta ña sacuví ñu, cuví ñu tari noo ñu cha nyehé chi nu ino.

²⁴ Ta nyehé ñu yoso caa nuu ñu, ta yaha cuan ta cuahan ñu ta naá ri iñi ñu yoso cuhva caá nuu ñu.

²⁵ Soco inga ñu cha nyita ri tyasohó tuhun Nyoo, vatyí sacuví vaha ñu cha chiñi ñu. Ta tyicuan ri sahá vaha ñu cuenda cha catyí ley Nyoo, cha cuví ley vaha ca, ley cha chahá libertad chi yo tyi tava chi chi yo ndaha ra ña vaha. Ta ñu nyacuví tyicuan caa sii xaan cucuvi chi ñu.

²⁶ Tatu nya noo ñáyivi cuñí maa ñu vatyí ityi Nyoo cuahan ñu, soco ña nyatú yuhu ñu cahan ñu, suri chi maa ñu sandahvi ñahá ñu. Ta cha catyí ñu tyi ityi Nyoo cuahan ñu, cha ñima ri tuhun cuví.

²⁷ Vatyí ityi ndicha, ityi vaha nuu Nyoo Sutu yo ican cuví ihya: Cha tyinyeé yo chi ñu nyehe tindoho, ñu yori sutu ta sihi, ta ñu chihí yí. Ta inga, cha sahá vaha yo cuenda chi yo coto sacuvi yo cha quiñi caa cha sacuví ñu ña ñohó nuu Nyoo.

2

Ña tahán chi cuñí yo chi noo ñáyivi ta chi inga ñu ma cuñí yo. Inuuri tahan chi cuñí yo chi ñu

¹ Yañi yuhu, nyoho chinó iñi ndo chi Sutu Mañi yo Jesucristo ra cha cahnu ca cuví, ta ña tahán chi cha vaha ca cahan ndo chihin noo ri ñáyivi, ta chihin inga ñu ma cahan ndo.

² Vatyí tatu quihvi noo ra tyayí nu nyicu ndo, yihí xehe xuhun cuaan ndaha ra, ta finu sahma ra, ta quihvi tucu nonga ra cha ñihnó sahma chahnu ri.

³ Ta nyoho tatu vaha ca tyiñuhu ndo chi ra cha vaha ñihno cuan, ta catyí ndo chi ra: “Cunyata ihya noo nu vaha.” Ta chi ra ndahvi cuan catyí ndo chi ra: “Yoho cunanyaa yucuan o cunyata ihya nu ñuhú”, catyí ndo chi ra.

⁴ Ña vaha tatu sacuví ndo tyicuan caa, vatyí ña inuuri sahá ndo ñáyivi chi ñu, ta cha tyicuan caa, ña vaha cha chicá xiñi ndo.

⁵ Yañi, tyasoho ndo tuhun ihya. Nyoo nacachí vaha ra chi ñu ndahvi ihya ñáyivi, vatyí ta cuhva cuví ñu ñu tyayí chihin cha chinó xaan iñi ñu chi Nyoo, ta cuñihi ñu nu vaha nu nyacá ñaha ra. Vatyí ican ihya cuví cha catyí ra tyi cuhva ra chi ñu cuñí chi ra.

⁶ Soco nyoho chahá ndo ticahan nuu chi ñu ndahvi. Ta ¿atu ña chitó ndo vatyí ñu tyayí, ican ñu cuví ñu cha chahñi ndahvi chi ndo? Ta chinyacá ñu chi ndo nuu ra cuví tyiño.

⁷ Ta ¿atu ña chitó ndo vatyí ican ñu cuví ñu cahan ña vaha siqui ra Cristo? Ta cuenda ra Cristo yihí ndo.

⁸ Tatu ndicha cha sacuví ndo tandihí cha catyí ley Nyoo ra cuví rey cuenda yo, vaha nyacuví ndo. Tari catyí tuhun Nyoo: “Cuñi ndo chi tahan ndo tari cuñi ndo chi maa ndo.”

⁹ Soco tatu chi noo ri ñu cuñí ndo. Ta chi inga ñu ña cuñí ndo, chicoó cuatyí ndo. Ta iyó cuatyí ndo nu ley Nyoo.

¹⁰ Vatyí tatu noo ñáyivi sacuví ñu tandihí cha catyí ley, ta cumañi ñu

noo ri cha catyí chi, cuví chi tari cha tandihí ley ña sacuví ñu.

¹¹ Vatyí Nyoo catyí ra vatyí ma coo inga ñusihi o inga rayí chi ñu, tatu iyó yí ñu o iyó ñasihi ra. Ta suri maa ra catyí vatyí ma cahñi yo. Yucuan chaha tatu noo ñu ña sacuvi ñu cuatyí cha ña iyó inga rayí o inga ñusihi chi ñu soco chahñí ñu, suri ña quichahá ñu cha catyí ley.

¹² Soco yoó cucutuñi chi yo nu ley ra Cristo cha sacacú chi yo. Yucuan cuenda tahan chi nducu yo cuhva cahan yo ta nducu yo cuhva coo yo.

¹³ Vatyí ñu cha ña cundahvi cuñí nyehe chi inga ñu, Nyoo cusacutuñi ra chi ñu, soco ma cundahvi cuñí ra nyehé ra chi ñu. Soco ñu cha ndahvi cuñí nyehé chi inga ñu, cuquita vaha ñu cuhva cha cutuñi chi ñu.

¿Ñáá cha sacacú chi yo, cha chinó iñi yo o cha sacuví yo cha vaha?

¹⁴ Yañi, ñáá ri tuhun tatu catyí ndo vatyí chinó iñi ndo, soco ñahri cha vaha nyacuví ndo. ¿Atu cuví cacu ndo chihin cha chino iñi ri ndo chi Nyoo?

¹⁵ Vatyí tatu noo ñu tahan yo cumañí sahma ñu, cumañí cha cachi ñu,

¹⁶ ta minoo nyoho catyí ndo chi ñu: “Cuahan ta Nyoo na cocumi ra chuun. Na coo ca sahmon ta cha cachun”, catyí ndo. Soco ña chahá ndo cha chiñuhú chi ñu. ¿Ñáá ri tuhun cuan?

¹⁷ Ñahri yahvi nyaa cha catyí yo vatyí chinó iñi yo chi Nyoo, ta ña tyinyeé yo chi tahan yo.

¹⁸ Vasiyihí ndo cua catyí ndo: “Yoho chihin cha chinó iñun chi Nyoo ta cuñun cacun, ta yuhu caqui soco chihin cha vaha ñáyivi cuví ta chihin cha tyinyeí chi tahan yo.” Vaha. Soco yuhu catyí chuun, ¿atu cuví sañahun chii tyi ndicha chinó iñun chi Nyoo tatu ña vaha ñáyivi cuvún ta ña tyinyeún chi tahan? Ma cuví. Soco yuhu chihin cha tyinyeí chi tahan yo sañahí chuun vatyí chinó vaha iñi chi Nyoo.

¹⁹ Ta yoho chinó vavaha iñun tyi iyó noo ri Nyoo. Vaha cha chinó iñun. Soco cuhna chinó tucu iñi ra cuan tyi iyó noo ri Nyoo. Ta nihí ra chihin cha yuhví ra vatyí ma cacu ra.

²⁰ Ma tondo xaan caca xiñun. Na cutuñi iñun vatyí tatu chinó iñi yo ta ña sacuví yo cha vaha, ñahri yahvi nyaa cha chinó iñi yo.

²¹ Ra Abraham sutu chahnu yo, cuví ra noo ra vaha nuu Nyoo cha cuenda cha sacuví ra cha catyí Nyoo. Vatyí chaha ra chi sehe ra, ra Isaac chi Nyoo tari cuhva catyí Nyoo chi ra.

²² Nyehún vatyí chinó iñi ra Abraham chi Nyoo ta chaha cha chinó iñi ra ta sacuví ra tuhun cha catyí Nyoo chi ra tyi sacuvi ra. Ta nu sacuví ra cuhva catyí Nyoo chi ra, yucuan cuví nu natuví vaha cha chinó iñi ra chi Nyoo.

²³ Ta tyicuan caa chinqo cava tari cuhva catyí nu tutu Nyoo tyehe caa: “Ra Abraham chinqo iñi ra chi Nyoo ta yucuan chaha Nyoo saha ra tuhun tyi vaha ra nuu ra.” Ta iyó inga nu catyí chi: “Ra Abraham, nanduví ra amigo Nyoo.”

²⁴ Ta tyicuan caa nyehe yo vatyí vaha yo nuu Nyoo cha cuenda cha nyacuví yo cha vaha, ta ñima cha cuenda cha chinó ri iñi yo chi ra.

²⁵ Ta tyicuan caa tucu cu Rahab ñaha cata iñi cha chiyo ta cha naha. Yahá cha sacuví ña cuatyí, sacuví ña cha vaha quiví chahá ña nu cacohon xehe ra cha tachí ra Josué. Ta tyinyee ña chi ra cha cuhun ra inga ityi. Ta cha cuenda cuan Nyoo saha ra tuhun tyi vaha ña.

²⁶ Ta tyicuan caa tucu cuví noo coño ñuhu ñáyivi. Tatu ñahri ca cha nyitó ñu yihí chichi coño ñuhu cuan, ñahri ca vale chi. Ta tyicuan caa yoó, tatu ña sacuví yo cha vaha, ña vale cha chinó iñi yo.

3

Yoso caa saha cuenda yo cuhva cahan yo

¹ Nyoho yañi, ma yaty xaan quichi cuvi iñi ndo cuvi ndo noo ra sañahá tuhun Nyoo. Vaty nyuhu cha sañahá ndi tuhun Nyoo, tatu ña vaha sañahá ndi, cahnu ca cuaty cuvi, ta cuaha ca cutachi tuñi Nyoo chi ndi.

² Vaty ni noo yo ta ña sacuví yo maa maa ri maa cha vaha. Soco tandihí yo cuaha ri cuhva sacuví yo cuatyí. Soco tatu noo yo cuví cunyaca ñaha vaha yo cuhva cahan yo tacuhva ma coo cuatyí yo cha cuenda cha cahán yo, cuñí chi catyí vatyí ñahri cuatyí yo vatyí cuví tucu cunyaca ñaha yo tandihí coño ñuhu yo.

³ Vaty tatu tyihi yo yoho yuhu caballo cuví cunyaca ñaha yo chi ti, vasi cahnu ti.

⁴ Ta tyicuan caa tucu noo barcu cahnu, vasi cahnu chi soco chihin noo vitu luhlu ri cha nyaá chata chi, cuví sacuhun ra chi chi nya ityi nu cuñí maa ra, vasi ñihi tatyí.

⁵ Ta tyicuan caa tucu yaa yo. Cuví chi noo cha luhlu ri. Soco cahnu xaan cahnu xaan nanduvi noo tuhun luhlu ri cahan yaa yo. Tari nahnu cuvi cayu chihin ñuhu lee cha tyaa yo chichi cuhu ta ndi maa yutun cayu.

⁶ Vaty tyicuan caa yaa yo tari noo ñuhu luhlu cuví chi. Ta cuví chi tari noo cha quiñi caa cahnu cha ñohó chichi coño ñuhu yo, ta sativí chi chi coño ñuhu yo ta tandihí cuhva iyó yo ñayiví, vatyí suri maa cuihna, ican tyiyuhú chi chi.

⁷ Ñáyiví cuví samasu ñu tandihí ri nuu quití: saa, coo, ta quití cha iyó chichi tyañuhu, ta samasú ñu chi ti.

⁸ Soco yori cuví samasu yaa yo. Vaty cuví chi noo cha ña vaha cha ña chahá chi cha cunyaca ñaha yo chi chi. Tari noo coo, tyaá ti chi ñáyiví, tyihi ti venenu ti ta chihi ñáyiví. Ta tyicuan caa yaa yo.

⁹ Vaty suri chihin yaa yo sacahnú yo chi Nyoo Sutu yo. Ta suri chihin cuan cahán ña vaha yo chi ñáyiví cha savaha Nyoo tari cuhva caá maa ra.

¹⁰ Suri maa chihin yuhu yo sacahnú yo chi Nyoo. Ta suri chihin cuan cahán yo cha quiñi caa. Soco

yañi, ña tahán chi cha sacuví yo tyicuan caa.

¹¹ Vaty, ¿atu cuví quita ndutya vixi ta ndutya uva noo ndohyo? Ma cuví.

¹² Yañi, ¿atu cuví quita papaya nuu noo tumangu, o cuví cuhva tupapaya noo mangu? Ma cuví. Ta tyicuan caa ma cuví quita ndutya uhva ta ndutya vixi noo ndohyo.

Cha chiñi tuñi cha vaha ca

¹³ Tatu yihí ndo cha chitó ndo ta iyó cha chiñi tuñi chi ndo, sañaha ndo chihin cha cachi iyó ndo. Ta sacuvi ndo cha vaha chihin cha ma cahnu saha ndo chi ndo, vatyí iyó cha chiñi tuñi Nyoo chi ndo.

¹⁴ Soco tatu iyó tuhun nyiyo iñi ña vaha chichi aña ndo, sacuví ndo cha sacuvi ndo soco cha cuenda cha cuñí ndo cuvaha ndo nuu ñáyiví, ta cha tyicuan caa nyacuví ndo, ña tahán chi cuyaa ndo tyi iyó cha chiñi tuñi chi ndo, vatyí cha cuyaa ndo, sandaví ñaha ndo cuví cuan, ta tixehe ndo cha ndicha.

¹⁵ Vaty tatu chicá xiñi ndo tyicuan caa ñima cha chiñi tuñi Nyoo cuví cuan, soco cuhva chicá xiñi ñu ña ñohó nuu Nyoo cuví. Cuenda cuihna cuví.

¹⁶ Vaty tatu nyiyo iñi ndo ta cuñí ndo cuvaha ndo nuu ñáyiví, yucuan cuví nu ican ñima nyicú ndo. Ta iyó tucu tandihí inga nuu cha ña vaha nu nyicú ndo.

¹⁷ Soco tatu iyó cha chiñi tuñi Nyoo chi ndo, ndaa iyó ndo, cachi iyó ndo. Ta nanducú ndo cuhva coo vaha ndo chihin ñáyiví chihin cha vita iñi ndo. Ta vaha ñáyiví cuví ndo. Ta cachi vaha chicá xiñi ndo. Ta cundahví cuñi ndo chi ñáyiví. Ta nducú ndo cha vaha chi tandihí ñáyiví chihin cha ñi iñi ndo.

¹⁸ Tatu nanducú yo cha coo vaha yo chihin ñáyiví, ta sañihi yo coo taxi ri yo chihin ñu, cuacoo yo noo ñáyiví cha cui ti.

4

Ma sacuvi yo cuhva cuñí coño ñuhu yo

¹ ¿Ñáá tuhun iyó tisihi nu nyicu ndo? ¿Ñáá tuhun iyó cuatyí? Cha cuenda cha ña vaha cha cuñí coño ñuhu ndo. Vatyí tyicuan ri iyó cha cuñí ndo ta yucuan sacañí tahan chi ndo.

² Nyoho cuñí ndo coo ñáá ndihí cha coo chi ndo. Ta ñahri iyó chi ndo. Tyicuan ta sataśí iñi ndo ta chahñí ndo tacuhva ñihi ndo. Iyo tahan ndo chihin cha nyiyo iñi ndo ñáá cha nyehé ndo soco ña cuví ñihi ndo. Tyicuan ta cañí tahan ndo. Iyó cuatyí nu nyicú ndo soco ña ñihí ndo cha cuñí ndo. Vatyí ña chicán tahvi ndo chi Nyoo.

³ Ta tatu chicán tahvi ndo chi Nyoo, ni ri ña ñihí ndo cha cuenda vatyí ña vaha chicán ndo. Vatyí cuñí ndo soco cha sanaa ndo cha caca noo ri maa ndo cuhva cuñí ñáyivi.

⁴ Ña ndicha cha chinó iñi ndo chi Nyoo. ¿Atu ña chitó ndo vatyí tatu nyacuví ndo cuhva cuñí ñáyivi, ñu xaan iñi chi Nyoo cuví ndo vatyí ña nyacuví ndo cuhva cuñí Nyoo? Yucuan chaha tatu yíhi ndo nyacuví ndo cuhva cuñí ñáyivi, ñu xaan iñi chi Nyoo cuví ndo.

⁵ ¿Atu cha caha ri catyí nu tutu Nyoo vatyí Tatyí Ii cha chahá Nyoo coo ańima yo, cuñí xaan chi chi yo, ta cuiño xaan chi chi yo? Cuñí Nyoo cha ñi ri chi maa ra cua cuñi xaan yo.

⁶ Soco tyinyeé ca ra chi yo tacuhva vatyí cuví nacuhva ndihí yo chi yo chi ra. Yucuan chaha catyí tucu tuhun Nyoo vatyí Nyoo ña tahán iñi ra chi ñu cahnu saha chii. Soco tyinyeé ca ra chi ñu nacotó tyi chiñuhu ra chi ñu.

⁷ Ican tuhun nacuhva vaha ndo chi ndo chi Nyoo. Ma quichaha ndo nu cahán cuihna chihin ndo. Ta maa ra cucacacono ra nyehe ra chi ndo.

⁸ Tuhva yatyin ndo chi Nyoo ta maa ra tuhva yatyin ra chi ndo. Nyoho ñu iyó cuatyí, sandundii ndo chi ndo. Ta nyoho cha uvi nyaa xiñi ndo sandunii ndo iñi ndo ta cuhva ndo na sacutu Nyoo ańima ndo chihin cha vaha, tyicuan ta cundundii ndo nuu ra.

⁹ Cucuihya cuñi ndo. Cuacu ndo. Na ndichi xiñi ndo vatyí ña vaha cuhva iyó ndo. Cha nuu cha cuacu ndo chihin cha sii cuñi ndo cuacu ndo

chihin cha cuihya iñi ndo. Ta cha sii cuñi ndo na nanduvi chi tucuihya iñi.

¹⁰ Ndahvi saha ndo chi ndo nuu Sutu Mañi yo, ta maa ra cusanduc-ahnu ca ra chi ndo.

Ma nyehe nyaa yo chi tahan yo

¹¹ Yañi, ma cahan ña vaha ndo siqui noo tahan ndo. Vatyí ñu cha cahán ña vaha siqui noo tahan, o nyehé nyaa ñu chi ñu, siqui ley Nyoo cahán ña vaha ñu ta nyehé nyaa ñu. Vatyí tatu nyehe nyaun, juez nasahún chuun cha nuu cha quichahún nu cahán ley cuan.

¹² Vatyí noo ri ra cuví ra cha chahá ley cuan. Ta suri ra cuví ra juez. Ta suri maa ra cuví ra ra sacacu chi yo, o sacunaa ra chi yo. Soco ¿yóó ñu cuví yoho vatyí nyehe nyaun chi inga ñu, ta sacutuñun chi ñu tari cha juez cuvún?

Ña chitó yo ñáá cha cucuvi chi yo tyaan, ta yucuan chaha ña tahán chi cahnu saha yo chi yo

¹³ Vityin cuiñi ndo tuhun ihya, nyoho cha catyí ndo: “Vityin o tyaan cahun yo ñuu cuan, o inga ñuu cuan. Ta yucuan cunyaa yo noo cuiya vatyí sahatyiño yo ta saha ganaa yo xuhun”, catyí ndo.

¹⁴ Ta ni ña chitó ndo cha cucuvi tyaan. Vatyí ñayivi cha iyó yo cuví chi tari noo vico nuhu vatyí noo ri cuhva yíhi chi, ta tañi ri ta cha naa tucu chi.

¹⁵ Soco tahán chi catyí ndo tyehe caa: “Tatu Sutu Mañi yo ta cuñí ra, coo yo ta sacuvi yo ihya o yucuan.”

¹⁶ Soco nyoho nyee xaan ndo cuñí maa ndo ta cahnu sahá ndo chi ndo. Ta ña vaha tyicuan caa.

¹⁷ Vatyí tandihí yo cha chitó yo sacuví yo cha vaha ta ña sacuví yo, chicoó cuatyí yo cha tyicuan caa.

5

Nu catyí ra Santiago ñáá cha cucuvi chi ñu tyayí

¹ ¡Cuiñi ndo tuhun ihya, nyoho ñu tyayí! Cuacu ndo chihin cha cuihya cuñi ndo, canachaa ndo cha cuenda tindoho cha cunyehe ndo.

² Vatyí cha tyayíi cha sacayá ndo, cha cuñí tiví. Ta sahma finu ndo, ndíi maa cha cuñi cachi tiquixin.

³ Xuhun cuaan ndo ta xuhun cuichin ndo cuxi vavaha chí. Ta yucuan chahá chí noo seña cha chinyacuví ndo. Ta tari quiví cha cucahmi chí chí ndo tari cayu ñuhu vatyí cucunaa ndo. Tyí sacayá xaan ndo cha tyayíi ndo tyí cotyiño ndo tyaan.

⁴ Ta ña tyiyahví ndo yahví cha tahán chí chí ñu ndahví cha sahatyiño nu tyiño sahá ndo. Ta vityin chicán ñu cuatyí chaha ndo nuu Sutu Mañi yo ra nyacá ñaha ángel cha cuví sindaro cuenda ra. Ta maa Sutu Mañi yo chíñi ra tuhun cahán ñu ndahví cuan.

⁵ Ihya síqui ñuhu ñayiví tyaquí iyó ndo, tyayíi iyó ndo. Ta sacuví ndo yoso cuhva cuñí maa ndo. Tari nduxahan quini cha cucúvi, tyicuan caa nyoho, vatyí cucunaa ndo.

⁶ Ta nyoho tyaá ndo cuatyí chaha ñayiví vaha. Ta chahñi ndo chí ñu. Ta ñu ndahví cuan ña cuví sacacu ñu chí ñu.

Cuatu yo chí ra Cristo chihin cha cama íñi yo

⁷ Yucuan chaha, yañi, nyatú yo chihin cha cama íñi yo nyacua nya quiví quichi Sutu Mañi yo. Tari noo ra cha sahá tyiño chí cuhu nyatú ra nyacua nya cha coon savi cha xihna ri ta cha yaha savi nu ndíhi, tyicuan ta naquehen ra ñáá cha tachí ra.

⁸ Ican tuhun cuatu ndo chí Nyoo chihin cha cama íñi ndo. Ta cuní ca íñi ndo vatyí cha cuyatyin cha quichi Sutu Mañi yo.

⁹ Yañi, ma tyaa ndo cuatyí chaha tahan ndo, coto tachi tuñi Nyoo chí ndo. Vatyí Nyoo, juez cuví ra. Ta cha cuñi quichi ra.

¹⁰ Yañi, saha ndo cuenda cuhva chiyó ra profeta cha chaha cuenda tuhun Sutu Mañi yo ta cha naha, vatyí cuhva cha canyehé ra tindocho, cacunyeé xaan ra.

¹¹ Chitó yo vatyí síi xaan cuñí ra cha cunyeé tandíhi nuu tindocho. Tari ra Job. Chíñi ndo tuhun yoso caa cunyeé

ra tindocho cha nyehe ra. Ta chító ndo vatyí nu ndíhi tuhun, cuaha xaan cha vaha chaha Sutu Mañi yo chí ra. Vatyí Sutu Mañi yo iyó xaan ticahnu íñi chí ra. Ta cundahví cuñi ra nyehe ra chí yo.

¹² Soco yañi, ma tyanaha ndo tacuhva chino íñi ñayiví vatyí ndicha cha sacuví ndo. Ma tyanaha ndo ni tuhun andívi, ni tuhun ñuhu ñayiví, ni ma catyí ndo: “Chitó vaha maa Nyoo.” Tatu ndicha tuhun cahán ndo, ndicha catyí ndo. Soco tatu chító ndo tyí ña ndicha, catyí ndo tyí ña ndicha, vatyí coto tachi tuñi Nyoo chí ndo.

¹³ Tatu nya noo nyoho nyehé ndo tindocho, cacan tahví ndo chí Nyoo. Ta tatu nya noo ndo síi cuñí ndo, cata ndo yaa Nyoo.

¹⁴ Tatu nya noo ndo cuhví ndo, cuñí chí cana ndo chí ra nyisó tyiño vehe ñuhu vatyí cacan tahví ra chaha ñu cuhví cuan ta tyíhi ra acetye chí ñu chihin sívi ra Cristo.

¹⁵ Ta tatu chinó vavaha íñi ra chí Nyoo cuhva cha chicán tahví ra, ñu cuhvi cuan cucacu ñu. Ta Sutu Mañi yo cusanducuita ra chí ñu. Ta tatu sacuví ñu cuatyí, Nyoo cusaha ra ticahnu íñi cuatyí ñu.

¹⁶ Yucuan chaha nahma ndo cuatyí ndo nuu tahan ndo. Ta cacan tahví ndo chaha tahan ndo vatyí na nduvaha ndo. Vatyí nu chicán tahví noo ra vaha chicá chihin Nyoo iyó xaan tunyee íñi Nyoo.

¹⁷ Tari ra Elías ra profeta Nyoo ta cha naha. Cuví ra noo rayíi tari maa yo. Ta chicán tahví ra chí Nyoo vatyí ma coon savi. Ta ña coon savi uñi cuiya sisava.

¹⁸ Yaha cuan ta nacacan tahví tucu ra chí Nyoo inga chaha. Ta nacoon savi inga chaha. Ta cuvaha chíti cha tachí ñayiví nu ñuhú.

¹⁹ Yañi, tatu noo tahan ndo sandoo ñu tuhun ndicha Sutu Mañi yo, ta cuanuhu ñu ñayiví inga chaha, ta tatu tyinyeé ndo chí ñu na ndichi ñu ityí Nyoo inga chaha,

²⁰ coto ndo vatyí cha tyinyeé ndo chí ñu sacuví cuatyí cuan na ndíhvi

ñu ityi Nyoo inga chaha, sacacú ndo
añima ñu ndahvi cuan coto cuhun ñu
anyaya. Ta sacuv̄i ndo vatyī saḥa
Nyoo ticahnu iñi tandih̄i cuatyī ñu.

Carta Cha Xihna Ri Cha Sacuhun Ra Apóstol Pedro Chi Ñáyivi Yihí Cuenda Nyoo

Nu tyaa ra Pedro noo carta chi ñáyivi yihí cuenda Nyoo

¹ Yuhu ra Pedro cuví noo apóstol cuenda ra Jesucristo, ta cuñí chi catyí, vatyí maa ra tachí chii vatyí caque tyiño ra. Tyaí noo tutu ihya chi nyoho cha ña iyó ndo ñuu ndo, vatyí iyó ndo noo noo ñuu ityi Ponto, ta Galacia, ta Capadocia, ta Asia ta Bitinia.

² Chi nyoho nacachí vaha maa Nyoo Sutu yo vatyí nyata cha naha chito ra vatyí tyicuan caa cuquichaha ndo chi ra. Maa Tatyí Ii tyinyee chi ndo vatyí cuví nacuhva ndo chi ndo chi Nyoo, ta tyicuan caa cuví quichaha ndo chi ra Jesucristo, ta ndundí ndo chihin niñi ra. Na naquehen ndo cuaha ca cha vaha ta cha taxi ri coo añima ndo sahá maa Nyoo.

Noo cha yihí vaha iñi yo vatyí cuñihi yo

³ Sacahnu yo chi Nyoo Sutu Sutu Mañi yo Jesucristo vatyí ndahvi cuñí ra nyehé ra chi yo ta chahá ra cha nacacu chaa yo inga chaha tacuhva coo yo ñáyivi chaa cha ma naa ca maa. Ta yucuan cuví cha chahá cha cuita iñi yo cha cuñihi yo vatyí cha nandoto ra Jesucristo.

⁴ Ta Nyoo cuacuhva ra tandihí cha tahán chi chi yo cha cumí vaha ra nya andívi. Ta cuví chi noo cha ma naa ta ni ma tiví, ta ni ma ndahva chi tari ndahva ita.

⁵ Ta vatyí chinó iñi yo chi Nyoo maa ra sahá cumi chi yo chihin tunyee iñi ra nyacua nya cacu ndihí añima yo. Ta cusañaha ra chi yo ñáá cha cuñi chi catyí cha cacú yo nu cuandihí tyembu. Vatyí cha nyatú tuhva cuan chi yo.

⁶ Ta yucuan chaha sii xaan cuñí ndo, vasi tahán chi cha nyehé ndo ndihí nuu tindocho suhva quívi.

⁷ Vatyí cha chinó iñi yo chi Nyoo, vaha ca ican saha xuhun cuaan. Vatyí xuhun cuaan cuví chi noo cha cundihi. Soco cuví nyehe yo chihin ñuhú tatu vaha chi, vatyí chihin cha ihñi cundutya chi ta cucayu cha ña vaha yihí chihin chi. Soco ndoó xuhun cuaan vaha cuan. Tyicuan caa tucu nyehé Nyoo chi ndo tatu vaha chinó iñi ndo chi ra. Yucuan chaha nyehé ndo tindocho vityin. Soco tatu ña ndu uví iñi ndo cha chinó iñi ndo chi ra, cutuví ndo nuu ra ta cusacahnu ñáyivi chi maa ra ta chi maa ndo quívi quichi Sutu Mañi yo Jesucristo inga chaha.

⁸ Nyoho cuñí ndo chi ra Jesucristo vasi ta nyehe ca ndo chi ra. Ta vasi ña nyehé ndo chi ra vityin, soco chinó iñi ndo chi ra, ta sii xaan sii xaan cuñí ndo nyacua ña ñihí ca ndo cuhva catyí ndo yoso cuhva cha sii cuñí ndo.

⁹ Vatyí cucacu ndihí añima ndo ta yucuan cuví cha cuñihi ndo vatyí chinó iñi ndo chi Nyoo.

¹⁰ Siquí cuan canducú tuhun ra profeta Nyoo ta cha naha. Ta canducú xaan ra cuhva coto ra ñáá cha cuví cuan. Ta catyaa ra nu tutu cuenda tumañi iñi cha cucuhva Nyoo chi yo.

¹¹ Ta Tatyí Ii ra Cristo sacoto chi chi ra ñáá ndihí tindocho cunyehe ra Cristo, ta yaha cuan yoso caa cusanducahnu Nyoo chi ra. Ta profeta cuan canducú xaan ra cuhva cacoto ra yóo ra cucuvi ra Cristo cha cucuvi chi tyicuan caa, ta ama cucuvi tuhun cha catyí Tatyí Ii chi ra.

¹² Soco sacoto Nyoo chi ra vatyí tyiño cha casacuví ra, ñima cha vaha chi maa ra cuví, soco cha vaha chi maa yo cuví. Ta ican cuví cha sacoto ndi chi ndo vityin. Vatyí chihin tunyee iñi maa Tatyí Ii cha saquichí Nyoo, cahan ndi tuhun ra Cristo nuu ndo yoso caa sacacú ra chi yo. Ta ángel cacuñí xaan ra cacoto ra tuhun ihya.

Nacana Nyoo chi yo vatyí coo yo

noo ñayiví cachi

¹³ Yucuan chaha saha vaha ndo cuenda cha cua sacuví ndo, ta cachi coo ndo. Quihi vaha iñi ndo cha cuacuhva Nyoo chi yo cha cuenda cha cuñi ra chi yo. Cuaha cuacuhva ra chi yo quivi quichi ra Jesucristo inga chaha.

¹⁴ Ta coo ndo tari noo sehe cha quichahá chi nu cahán sutu chi. Ma coo ndo tari chiyo ndo quivi ta ni cumañi ca cohon nuu ndo chi Nyoo. Vatyí cha ña vaha cha cuñi coño ñuhu ndo chinyaca ñaha chi chi ndo.

¹⁵ Soco coo ndo noo ñayiví ndi, vatyí maa Nyoo, ra cha nacana chi ndo, ndi ra.

¹⁶ Vatyí tyicuan caa catyí Nyoo nu tutu ra. “Cundi ndo vatyí mai ndi”, catyí Nyoo.

¹⁷ Tatu tuhvá ndo chicán tahvi ndo chi Nyoo ta catyí ndo “Sutu Mañi yuhu” chi ra, saha ndo cuenda chi ndo ta saha ndo ñáyiví chi ra cha ni ri ca cha iyó ndo siqui ñuhu ñayiví. Vatyí Nyoo ña sahá ra cuenda cuhva cahán yo. Soco sahá ra cuenda cuhva iyó noo noo yo, an cuvi ri yo ñu tyayí, an cuvi ri yo ñu ndahvi.

¹⁸ Nyoo nasama ra cuhva chiyo ndo, vatyí cuhva cuan ña vaha, Cuhva cha sanandoo Sutu chahnu ndo chi ndo cuví. Ta chitó ndo tyi Nyoo tyiyahvi ra tacuhva cuvi cacu aña yo. Soco ñima chihin xuhun cuan o xuhun cuichin. Noo cha cundihi noo quivi cuví cuan.

¹⁹ Soco cha tyiyahvi maa Nyoo chihin ñiñi ra Cristo. Ta yucuan cuvi noo cha vaha xaan ca. Ta ra Cristo cuví ra tari noo mbee luhlu quití vaha, ñahri nu pehe ti, tyicuan caa ra Cristo, ñahri cuatyí ra soco chihí ra.

²⁰ Ta nyata ni cumañi ca chino ñuhu ñayiví chicunyaa cuhva cha cucuvi chi ra Cristo tyehe caa. Soco ña cuví cha numi ri. Nyacua nya vityin nu cuandihi quivi, chinó cava tandihi cuan cha cuenda cha vaha chi maa yo.

²¹ Cha cuenda ra Cristo ta chinó iñi ndo chi Nyoo. Vatyí ican ra sanandotó chi ra Cristo cha yaha chihí ra.

Ta sacahnu Nyoo chi ra. Ta yucuan chaha chinó vaha iñi ndo chi Nyoo tyi cunaquehen ra chi ndo.

²² Maa Tatyí Ii Nyoo tyinyeé chi ndo ta cuví quichahá ndo tuhun cha ndicha. Yucuan ta cuví cuñi ndo chi tahan ndo cuenda Nyoo chihin cha ñi iñi ndo. Tyicuan caa cuñi chi cha cuñi ndo chi tahan ndo chihin cha vaha yihí aña ndo ta chihin tandihi fuerza ndo.

²³ Vatyí tari quivi cha nacacu chaa ndo, ñima tari cacu ndo chihin sutu ndo ihya ñuhu ñayiví, vatyí ra cuan numi ri chihi ra, soco nacacu chaa ndo chihin tuhun Nyoo cha ña tuhvá chihí vatyí tuhun Nyoo tyicuan ri maa iyó.

²⁴ Vatyí tyehe caa catyí tuhun Nyoo: Tandihí ñáyiví iyó siqui ñuhu ñayiví ihya cuví ñu tari cuhu.

Ta cha cahnu cha sacuví ñu cuví chi tari ita.

Vatyí cuhu cuan na ityi, ta coyo ita cuan. (Ta tyicuan caa ñáyiví, chihí ri ñu.)

²⁵ Soco tuhun Sutu Mañi yo tyicuan ri maa iyó.

Ican cuví tuhun cha cahan ndi chihin ndo: tuhun vaha cha sacacú Nyoo aña yo.

2

¹ Yucuan chaha na sandoo yo tandihi nuu cha quiñi caa. Ma sandavi ñaha yo chi ñáyiví. Ma saha ri maa yo tyi vaha yo ta ña ndicha. Ma nyiyo iñi yo nyehe yo cha iyó chi inga ñáyiví. Ñahri cuendu cahan yo.

² Soco tari cha lee cha ni cacu, nanducú vavaha chi cha caxin chi, tyicuan caa nducu ndo tuhun Nyoo tacuhva vatyí chihin cuan cuahnu ndo ta cohon nuu ca ndo chi Nyoo, nyacua nya cacu ndihi aña ndo,

³ tatu ndicha cha nacotó ndo vatyí Sutu Mañi yo, vaha xaan ñáyiví cuví ra chihin yo.

Tari yuu nyitó, tyicuan caa cuví ra Cristo

⁴ Sayatyin ca ndo chi ndo chi Sutu Mañi yo. Vatyí cuví ra tari noo yuu

nyitó. Ñáyivi ña cuñi ñu cotyiño ñu yuu cuan. Soco Sutu Mañi yo cuví ra tari noo yuu tyaqui cha nacachi Nyoo.

⁵ Ta nyoho tucu cuví ndo tari yuu nyitó. Ta maa Nyoo tari noo ra savahá vehe cuví ra. Ta yucuan chaha cuhva ndo na sandu ñn ri ra chi ndo tacuhva cuví ndo tari noo vehe nu coo ra. Na cu ñn ri ndo ta cuhva ndo cha sandu ii Nyoo chi ndo tacuhva cuví sacuví ndo tyiño nuu ra. Ta maa maa ri tyiño cha sacahnú ndo chi Nyoo cucunyaa ndo. Vatyí yucuan cuví cha tahán iñi Nyoo sacuví yo chihin tunyee iñi maa ra Jesucristo.

⁶ Vatyí catyí tucu nuu tutu Nyoo tyehe caa:

Nyehe xihna, yuhu nacachi noo yuu cha chiñuhú ca ta tyaqui xaan ca, ta chaquín yuu cuan nu cuasavahi vehi nya Sión.

Ta ñu chinó iñi chi ra cha cuví yuu cuan, ma quehen ñu ticahan nuu. Tyicuan caa catyí Nyoo tuhun ra Cristo nuu tutu ra.

⁷ Yucuan chaha, cha cuenda yoó cha chinó iñi yo chi ra Cristo ra cuví yuu cuan, chiñuhú xaan ra chi yo. Soco cha cuenda ñu cha ña chinó iñi chi ra, cuví ra tari noo yuu cha cahán Nyoo tuhun nu tutu ra ta catyí chi tyehe caa:

Yuu cha ña cacuñi ra casavahá vehe cotyiño ra, ícan cuví yuu cha chiñuhú ca, catyí chi.

⁸ Ta catyí tucu chi:

Ican ra cuví yuu cha cuaha xaan ñu cunañi chaha ta nduva ñu.

Cuví ra noo cava cha sanduvá chi ñu, catyí chi nuu tutu Nyoo.

Tari cha nduvá ñu cuví cuan vatyí chiñi ñu tuhun Nyoo, ta ña quichahá ñu. Vatyí tyicuan caa nyaá vatyí cusacuví ñu cuan.

Ñáyivi cha yihí cuenda Nyoo

⁹ Soco nyoho cuví ndo ñáyivi nacachi vaha Nyoo. Ta tari tata sutu cuví ndo tyi sacuví ndo tyiño nuu Nyoo, ra nyacá ñaha. Ta cuví tucu ndo noo ñáyivi ii nuu Nyoo. Vatyí cuví ndo ñáyivi chi maa ra, tacuhva

vatyí cahan ndo tuhun cha vaha cha sacuví ra. Vatyí maa ra natava ra chi ndo nu ñaa iñi ta vityin cuahan ndo nu ndichin nu tyaqui.

¹⁰ Ta quívi ca cuan, cuví ndo ñáyivi cha ñima ri tuhun. Soco vityin ñáyivi chi Nyoo cuví ndo. Ta quívi cuan yori cundahvi cuñi nyehe chi ndo, soco vityin Nyoo cundahvi cuñi ra nyehé ra chi ndo.

Nu catyí ra Pedro vatyí coo yo, soco sacuví yo tyiño nuu Nyoo

¹¹ Yañi, cuñi xain chi ndo. Chicá noo ndo síqui ñuhu ñáyivi ihya, soco ñima ca ra ñuhu ñáyivi ihya cuví ndo. Soco andívi cuví ñuu ndo. Yucuan chaha catyí chi ndo ma cuhva ndo ityi chi coño ñuhu ndo vatyí sacuví ndo cha ña vaha cha cuñi chi. Vatyí tari quívi cañi tahan cuan chihin añima yo cuví cuan.

¹² Saha ndo cuenda cuhva iyó ndo mahñu ñu cha ña ñohó nuu Nyoo. Vatyí vasi cahán ña vaha ñu síqui ndo, ta catyí ñu vatyí ña vaha ndo, soco nyehé ñu cha vaha cha sacuví ndo ta cusacahnu ñu chi Nyoo nachaa chi quívi cha cuquichi nyehe ra cha sacuví yo.

¹³ Ta cha cuenda cha cuñi ndo chi Nyoo, quichaha ndo chi ra cuví tyiño ñuu nu iyó ndo. Quichaha ndo chi ra cuví tyiño, cuví ri ra rey cahnu ca,

¹⁴ o cuví ri noo ra tachi rey chi vatyí tachi tuñi ra chi ra iyó cuatyí o tatu ñahri cuatyí yo ma tachi tuñi ra chi yo, soco cucatyí ra tyi vaha yo.

¹⁵ Vatyí Nyoo cuñi ra vatyí chihin cha vaha nyacuví ndo ta sandihí ñu tondo cha cuví yuhu ñu, ñu cahán cha ña ndicha vatyí ña chitó ñu tuhun cahán ñu.

¹⁶ Coo ndo tari cha yori nyacá ñaha chi ndo, soco ñima cha cuenda cuan ta cusacuví tucu ndo cha ña vaha. Soco sacuví ndo tyiño nuu Nyoo.

¹⁷ Saha ndo ñáyivi chi tandihí ñáyivi. Cuñi ndo chi ñu yihí cuenda Nyoo. Saha ndo cuenda vatyí Nyoo nyehé ra tandihí cha sacuví ndo. Saha ndo ñáyivi chi ra nyacá ñaha.

Uvi tahan cuhva nyehé yo tindoho

¹⁸ Nyoho cha cuví ndo musu, cūhva ndo cha cunyaca ñaha chitoho ndo chi ndo, ta quichaha ndo chi ra, vasi xaan ra o vasi vaha ra.

¹⁹ Vatyí tatu cunyeé yo tindhohu cha sanyehé ñáyiví chi yo cha cuenda cha sacuví yo cha vaha nuu Nyoo, yucuan cuví cha chaá nuu Nyoo.

²⁰ Soco tatu sacuví ndo noo cha ña vaha ta tachí tuñi ñu chi ndo, ñahri maa tuhun cha cunyeé ndo tindhohu cha nyehé ndo cha cuenda cuan. Soco tatu nyehé ndo tindhohu cha cuenda cha sacuví ndo cha vaha, ta cunyeé ndo chihin cha cama iñi ndo, ican ihya cuví cha vaha nuu Nyoo.

²¹ Vatyí nacana Nyoo chi yo vatyí coo yo tyehe caa. Vatyí tyicuan caa tucu nyehé ra Cristo tindhohu cha cuenda maa yo, na cutuhva yo ta quehen yo cha caá ra.

²² Maa ra ni noo cuatyí ña sacuví ra. Ni noo chaha ña sandaví ñaha ra chi ninoo ñáyiví.

²³ Cuhva cha cahán ñu chi ra, ña nacahán xaan ra. Cuhva cha nyehé ra tindhohu, ña tyanahá ra chi ñu. Soco natyaa ra chi ra ndaha Nyoo, vatyí Nyoo tuhvá ra sacutuñi ra chi ñáyiví chihin cha ndaa ta chihin cha ndicha.

²⁴ Vatyí chata maa ra Cristo nicoso ndi maa cuatyí tandihí yo kuhva cha tacaá ra nu cruzi cuan. Tyicuan caa cuví tacuhva vatyí ma sacuví ca yo cuatyí, ta coo yo noo ñáyiví vaha. Vatyí cha cuenda cha ñicuehé maa ra, yoó nduvahá yo.

²⁵ Vatyí quiví cuan chica noo ndo tari mbee cha cuanaá. Soco vityin nacuhva cuenda ndo chi ndo chi ra Cristo, ra cuví pastor cha sahá cuenda ánima yo.

3

Yoso caa tahán chi coo ñu tandaha

¹ Tyicuan caa tucu nyoho, ñu iyó yí. Quichaha ndo chi yí ndo. Vatyí tatu ña quichahá ra tuhun Nyoo soco cunachino iñi ra cha cuenda cha nyehé ra kuhva iyó ndo. Ta ña chiñuhú ri cha cuví yuhu xaan ndo chihin ra.

² Vatyí nyehé ra tyí cachi iyó ndo ta sahá ndo ñáyiví chi ra.

³ Ta ma caca iñi ndo tuhun cha sandutyacuí ndo chi ndo kuhva nyehé ndo, cuví ri chihin cha iyo xaan sanduvií ndo xiñi ndo, o cuví ri cha sandutyacuí ndo chi ndo chihin cha tyaa ndo xuhun cuan chi ndo, o cuví ri cha cuihno ndo sahma vaha xaan. Ma nducu ndo tandihí cuan.

⁴ Soco nducu ndo kuhva ndutyacuí ndo chihin kuhva vaha iyó ndo. Vatyí cha vita iñi yo ta cha taxi ri iyó yo, yucuan cuví cha quitá chichi ánima yo. Ta yucuan ña tuhvá cuan tiví. Vatyí ñahri nonga cha tyacuí ca nuu Nyoo tari cuan.

⁵ Vatyí tyicuan caa kuhva chiyo ñusihi cha yihí iñi chi Nyoo ta cha naha. Tyicuan caa sandutyacuí ñu chi ñu, ta quichahá ñu chi yí ñu.

⁶ Tari cu Sara, quichahá ña chi ra Abraham yí ña. Ta catyí ña: “Tata”, chi ra. Ta nyoho tari sehe ña cuví chi ndo tatu sacuví ndo cha vaha tari maa ña. Ta ñahri cha yuhví ndo.

⁷ Ta tyicuan caa tucu nyoho ra iyó ñasihi. Cutuñi iñi ndo kuhva coo ndo chihin ñasihi ndo. Ta saha ndo ñáyiví chi ña, ñima vatyí yica ca ña cha nuu nyoho. Soco vatyí in ri naquehen ndo tumañi iñi cha chahá Nyoo chi ndo. Ta yucuan cuví ñáyiví iyó ndo. Vaha coo ndo tyehe caa, tacuhva vatyí tin cuenda Nyoo tuhun chicán tahvi ndo chi ra.

Nu catyí ra Pedro yoso caa tahán chi coo yo

⁸ Nu ndihí tuhun, cuñí chi cha in ri kuhva caca xiñi tandihí ndo. Ta cundahvi cuñi ndo nyehé ndo chi tahan ndo. Cuñi ndo chi tahan ndo cuenda Nyoo tari cha yañi ndo cuví. Vita cahan ndo chihin ñu. Ta ma cahnu saha ndo chi ndo. Vaha ñáyiví cuví ndo.

⁹ Ma sacuví ndo cha ña vaha chihin ñu sacuví cha ña vaha chihin ndo. Ni ma cahan ndo chi ñu tatu cahán ñu chi ndo. Soco cha vaha sacuví ndo chihin ñu. Vatyí Nyoo nacana ra chi ndo vatyí cunaquehen ndo cha vaha cha iyó chi ra.

10 Vatyí catyí tuhun Nyoo tyehe caa: Ñu cha cuñí coo noo ñayiví chihin tusii iñi, cuñí chi saha ñu cuenda cuhva cahán ñu.

Ta ma cahan ñu cha ña vaha, ta ni ma cahan ñu cuendu.

11 Ta cuñí chi cha sandoo ñu cha ña vaha

ta sacuvi ñu cha vaha.

Nanducu ñu cuhva coo taxi ri ñu.

Ta ma saña ñu.

12 Vatyí Sutu Mañi yo sahá cuenda ra chi ñu vaha.

Ta tyasohó ra nu chicán tahvi ñu chi ra.

Soco ñu sacuví cha ña vaha, xaan cuñí ra nyehé ra chi ñu.

13 ¿Yóó cha cuví sacuvi cha ña vaha chihin ndo tatu nyoho tyicuan ri nducú ndo cuhva sacuvi ndo cha vaha?

14 Soco vasi nyehé ndo tindoho cha cuenda cha sacuví ndo cha vaha, soco cucusi cuñi ndo. Ta ni ma nayuhvi ndo tatu tyanaha ñáyivi chi ndo.

15 Soco chichi aña ndo sacahnu ndo chi ra Cristo ta cuhva ndo na cunyaca ñaha ra chi ndo. Tyicuan ri caca iñi ndo tuhun Nyoo tacuhva vatyí tatu ndaca tuhun noo ñu chi ndo ñáá tuhun chinó iñi ndo chi ra, soco cuví nacuhva ndo cuenda chi ñu chihin cha ña cahnu saha ndo chi ndo ta chihin cha ndicha sahá ndo ñáyivi chi ra.

16 Cachi coo ndo tacuhva cha ma yuhvi aña ndo nuu Nyoo, vatyí tatu cahán ña vaha ñáyivi siqui ndo cha cuenda cuhva vaha iyó ndo chihin tuhun ra Cristo, soco suri maa ñu cucahan nuu ñu cha cuenda tuhun cahan ñu siqui ndo.

17 Tatu maa Nyoo cuñí ra cha nyehe yo tindoho, vaha ca cha nyehé yo cha cuenda cha sacuví yo cha vaha ta ñima ca cha cuenda cha sacuví yo cha ña vaha.

18 Vatyí suri ra Cristo nyehe ra tindoho ta chihí ra ñn chaha cuirí cha cuenda cuatyí yo. Ra vaha cuví ra ta chihí ra cha cuenda yo ñu iyó cuatyí. Vatyí tyicuan caa nuña ra ityi nachaa yo ityi nuu Nyoo. Chihí coño ñuhu ra,

soco nandoto tucu ra chihin Tatyí Ii ra.

19 Tyicuan ta chihin Tatyí Ii ra chahan ra chicahan ra chihin aña cha ñohó vehe caa.

20 Ta ican ñu cuan cuví ñu ña quichaha chi Nyoo quivi chiyo ra Noé ta tyembu chahnu. Ta nyatú Nyoo chi ñu nandu uvi iñi ñu cuatyí ñu cha ni ri ca cha cuahan chino barcu cha savaha ra Noé. Soco ña cuaha ñu cacu quivi sahvi ndutya ñuhu ñáyivi. Uña tahan ri ñu cacu chihin ndutya vatyí nandaa barcu nu ñohó ñu nu ndutya cuan.

21 Ta tyicuan caa tucu maa yo tari quivi cacu yo chihin ndutya nu condutya yo. Cacu yo soco ñima cha cuenda cha nacatya yo coño ñuhu mecu yo. Soco cha cuenda cha chicán tahvi yo chi Nyoo na sanduvii ra aña yo ta sacacu ra chi yo cha cuenda cha nandoto ra Cristo.

22 Ta nandaa xica ra andivi, ta nyaá ra chiyo vaha Nyoo. Nyacá ñaha ra chi ángel ta tandihí cha nyacá ñaha chi ñáyivi.

4

Na sacuvi yo tyiño nuu tahan yo yoso cuhva chaha Nyoo chi yo

1 Yucuan chaha tari nyehe ra Cristo tindoho chihin coño ñuhu ra, sandunye ndo iñi ndo tacuhva cuví cunye ndo nyehé tucu nyoho tindoho. Vatyí ñu nyehé tindoho chihin coño ñuhu, ña sacuví ca ñu cha quiñi caa cha cuñí coño ñuhu ñu.

2 Tacuhva vatyí cuví coo ñu cuhva cuñí Nyoo. Ta ma sacuvi ca ñu cuhva cuñí coño ñuhu ñu.

3 Vityin cha yaha chinyacuvi xaan ndo cha quiñi caa nu quichi chi. Sacuvi ndo cuhva tahan iñi ñu ña ñohó nuu Nyoo. Ta chiyo ndo yoso cuhva cuñi ndo, cuaha viciu sacuvi ndo, cuaha cha quichi cuví iñi coño ñuhu ndo cha quiñi caa chinyacuvi ndo. Chiñi ndo chihin ndixi. Maa maa ri vico chiyo ndo. Ta quiñi xaan sacahnu ndo xitohyo cha ña tahan chi sacahnú ndo.

4 Ta vityin iyo cuñí ñu ña ñohó nuu Nyoo vatyí ña cutahán ca ndo chihin

ñu ta ña sacuví ca ndo cha quiñi caa cuan. Ta yucuan chaha cahán ña vaha ñu siqui ndo.

⁵ Soco nyaá nacuhva ñu cuenda chi ra cha nyatú tuhva quivi sacutuñi ra chi ñu nyitó ta chi ñu chihí.

⁶ Yucuan chaha sacoto ra Cristo tuhun vaha chi ñu ndiyi ñandihí. Vatyí tacuhva cuvi coo añima ñu tari iyó Nyoo, vasi cha cutuñi chi ñu tari cutuñi chi tandihí ñáyivi iyó siqui ñuhu ñáyivi quivi chihí coño ñuhu ñu.

⁷ Soco cha cuyatyin cha cundihi tandihí maa. Yucuan chaha cachi coo ndo ta cunyaa vaha ndo tyiño cha chicán tahvi ndo.

⁸ Ta cha xihna ri tahán chi cha cuñi xaan ndo chi tahan ndo. Vatyí tatu cuñi yo chi tahan yo, cuaha xaan chaha cusaha yo ticahnu iñi chi ñu, tyi maa Nyoo cuñi ra chi yo ta cuaha xaan chaha sahá ra ticahnu iñi chi yo.

⁹ Tatu chaá noo ñáyivi vehe ndo, vaha tyiñuhu ndo chi ñu ta ma cuñi ndo tyi sayangá ñu chi ndo.

¹⁰ Ta tahan tahan yo na sacuvi yo tyiño nuu inga yo, yoso cuhva cha chahá Nyoo chi yo. Vatyí cuñi chi cha cotyiño yo siin siin cha vaha cha chahá ra chi noo noo yo cha cuenda cha vaha chi inga tahan yo.

¹¹ Tatu chaha Nyoo vatyí ñihi vahun tuhun cahun chihin ñáyivi, cahan soco maa maa ri tuhun cha chahá Nyoo. Tatu chaha ra tyi sacuvun tyiño nuu ñáyivi, na sacuvun chihin fuerza cha chahá ra. Tandihí cha sacuví ndo, sacuvi ndo tacuhva vatyí chihin tandihí cha nyacuví ndo sacahnú ndo chi Nyoo cha cuenda ra Jesucristo. Chi maa Nyoo tahán chi sacahnu yo. Ta na cunyaca ñaha ra chihin tunyee iñi ra tyicuan ri maa. Ta na cuvi chi tyicuan caa.

Cuví cusí cuñi yo tatu nyehé yo tindocho cha cuenda ra Cristo

¹² Yañi, cuñi xain chi ndo. Ma iyo xaan cuñi ndo tatu vachi tindocho ñihi siqui ndo. Ma cuñi ndo vatyí ña tahán chi nyehe ndo tindocho.

¹³ Soco cusí cuñi ndo vatyí cuvi nyehe ndo tindocho tari nyehe ra

Cristo tindocho. Vatyí tyicuan caa ta cuvi cusí tucu cuñi ndo na nyehe ndo cha cahnu cuvi ra quivi cuquichi ra.

¹⁴ Tatu cahán ña vaha ñu siqui ndo vatyí nyicón ndo chi ra Cristo, cusí cuñi ndo, vatyí tyaqui xaan nyaá Tatyí li chihin ndo. Maa ñu cuan cahán ña vaha ñu siqui ra Cristo, soco nyoho sacahnú ndo chi ra.

¹⁵ Soco tatu nyehé ndo tindocho cha tyicuan caa, vaha, ta ñima ca cha nyehé ndo tindocho cha cuenda cha chahñi ndo, o cha suhu ndo, o cha sacuvi ndo cha ña vaha, o cha tyihí ndo chi ndo nu ña tahán chi.

¹⁶ Soco tatu nyehé ndo tindocho cha cuenda cha yihí ndo cuenda ra Cristo, ma cucahan nuu ndo. Soco sacahnu ndo chi Nyoo, vatyí chahá chí cuhva nyehe ndo chiin tindocho cha cuenda maa ra Cristo.

¹⁷ Vatyí cha cha quivi cha quichaha sacutuñi Nyoo chi tandihí ñáyivi. Ta xihna ca chi yoó cha cuvi yo ñu yihí cuenda ra. Soco tatu tyehe caa tachí tuñi Nyoo chiin ri chi maa yo, ¿yoso caa cucuvi chi ñu cha ña quichahá tuhun Nyoo?

¹⁸ Tatu yí cacú añima ñu vaha, ¿yoso caa cucuvi chi ñu quiñi iyó, ñu iyó cuatyí?

¹⁹ Yucuan chaha tatu nyehé ndo tindocho cuhva cuñi Nyoo, cuñi chi cha sañihi ca ndo sacuvi ndo cha vaha. Ta tyaa ndo añima ndo ndaha Nyoo. Maa ra savaha chi yo, ta maa ra ndicha tuhun cahán ra ta cusacuví ra tari cuhva catyí ra.

5

Nu chahá ra Pedro tuhun chi yo

¹ Yucuan chaha chahí tuhun chi ra chahnu nu nyicú ndo. Vatyí ra chahnu cuvi tucu yuhu. Ta cuvi cha ndaa vatyí nyehí tandihí tindocho cha cuvi chi ra Cristo. Ta cucutahin chihin tandihí ca ra quivi cunyicu yo chihin ra Cristo na quichi ra inga chaha chihin cha cahnu cuvi ra.

² Tari noo ra sahá cumi mbee, tyicuan caa saha cumi ndo chi ñu yihí cuenda Nyoo ñu yihí ndaha ndo. Ta

sacuvi ndo chihin cha iyo vaha iñi ndo tari cuhva cuñi Nyoo, ta ñima chihin fuerza. Ta ni ñima cha cuenda cha cuñi ndo xuhun. Soco sacuvi ndo tyiño chihin cha ñi iñi ndo.

³ Ta ñima tari cha maa ndo nyacá ñaha ndo chi ñu sahá cumi ndo. Soco chihin cuhva vaha iyó ndo chihin Nyoo, sañaha ndo chi ñu cuví mbee sana Nyoo yoso caa tahán chi coo ñu.

⁴ Ta quivi quichi ra cuví nuu chi ra sahá cumi mbee, cunaquehen ndo noo cha vaha, noo cha tyaqui cha cucuhva Nyoo chi ndo. Noo cha ma tivi ca maa.

⁵ Tyicuan caa tucu nyoho ñu tyivaa, quichaha ndo chi ñu chahnu. Ta ñima ñin ri maa ñu tyivaa soco tandihi ri ndo quichaha ndo chi tahan ndo. Ta ndahvi saha ndo añima ndo. Vatyí:

Nyoo ña cuñi nyehe ra chi ñu cahnu sahá chi.
Soco tyinyeé ra chi ñu ndahvi sahá chii.

⁶ Ndahvi saha ndo añima ndo nuu Nyoo. Ta cuhva ndo chi ndo na cunyaca ñaha ra chi ndo tacuhva cuvi sacahnu ra chi ndo quivi cha tahán chi. Tyi maa ra iyó xaan fuerza chi ra.

⁷ Cuhva ndo tandihi tindoho cha chicá xiñi ndo chi Nyoo. Vatyí maa ra ñiñi cuñi ra chihin ndo.

⁸ Cachi cohon iñi ndo ta saha vaha ndo cuenda nya cha vaha ta nya cha ña vaha, vatyí cuihna, ra xaan iñi chi ndo, chicá noo ra tari noo ndicaha xaan nanducú ti yóo chi cachi ti, tyicuan caa chicá noo ra ña vaha, nducú xaan ra cuhva saha ganaa ra chi ndo.

⁹ Soco ñihi cunjanyaa ndo chihin cha ñi iñi ndo chinó iñi ndo chi Nyoo tacuhva cuvi chasaha ndo chi ra ña vaha. Ta nacoto ndo vatyí tandihi ñu ñohó cuenda ra Cristo nicahnu ñuhu ñayivi, nyehé tucu ñu cuan tindoho tari maa ndo.

¹⁰ Soco Nyoo tyinyeé ra chi yo, ta cha yahá nyehe ndo tindoho suhva ri quivi, Nyoo cusanducuiti ca ra chi ndo, ñihi ca cunicunyaa ndo chihin ra ta cunacuhva ca ra fuerza chi ndo. Ta ican Nyoo cuví ra chahá tandihi cha vaha chi yo ta maa ra cana chi yo tyi

cu ñin ri yo chihin ra Cristo tacuhva coo yo nu tyaqui chihin ra tyicuan ri maa.

¹¹ Na sacahnu yo chi ra ta na cunyaca ñaha maa ra tyicuan ri maa. Ta na cuvi chi tyicuan caa.

Nu ndihi chahá ra Pedro nocumi chi ñu

¹² Sacuhín carta ihya chi ndo chihin ra Silvano, yañi yo. Ta cha cuenda chi yuhu, maa ra cuví noo ra ñi xaan iñi nyicón chi ra Cristo. Tyají suhva nu tutu ihya chi ndo vatyí chahí tuhun chi ndo ta catyí chi ndo vatyí cha vaha cha ñihí ndo cuví cha ndicha vaha cha chahá Nyoo chi yo cha cuenda cha cuñi ra chi yo. Ma saña ndo ihya.

¹³ Vachi nocumi chi ndo sahá ñu yihí cuenda Nyoo nya nu cuví ityi Babilonia. Tari nacachi Nyoo chi maa ndo, tyicuan caa nacachi tucu ra chi ñu cuan. Ta vachi nonga nocumi sahá ra Marcos sehi cha cuenda Sutu Mañi yo.

¹⁴ Cuhva ndo nocumi chi noo noo tahan yo chihin cha cuñi ndo chi ñu.

Na coo cha taxi ri cuñi añima tandihi ri ndo cha ñin ri cuví ndo chihin ra Jesucristo.

Ta na cuvi chi tyicuan caa.

Carta Cha Cu Uvi Cha Sacuhun Ra Apóstol Pedro Chi Ñáyiví Yihí Cuenda Nyoo

Nu tyaá ra Pedro noo tutu chi ñu yihí cuenda Nyoo

¹ Yuhu ra Simón Pedro sacuví tyiño nuu ra Jesucristo. Ta cuví noo apóstol chí ra. Cuñí chí catyí tyi tachí ra chí vatyi caque tyiño ra. Tyaí tutu ihya chí nyoho cha chinó ñi ndo chí Nyoo tari cuhva cha tyaquí chinó ñi nyuhu. Vatyi yucuan cuví cha chino ñi yo vatyi vaha ra Jesucristo, ra cuví Nyoo, ra sacacú chí yo.

² Na naquehen ca ndo cha vaha cha chahá Nyoo chí yo. Ta na coo ca cha taxi ri ñima ndo cha cuenda cha ñohó nuu ndo chí Nyoo ta chí Sutu Mañi yo Jesús.

Yoso caa coo ñu yihí cuenda Nyoo

³ Nyoo chíhin tunyee ñi ra, chaha ra tandihí cha chíñuhú chí yo tacuhva cuví coo cachí yo nuu ra ta saha yo ñáyiví chí ra. Tandihí ihya ñihí yo cha cuenda cha chícohon nuu yo chí ra cha cana chí yo. Vatyi chícohon nuu yo tyi cahnu cuví ra ta tyaquí xaan cha sacuví ra.

⁴ Ta chíhin tandihí ihya, chaha ra cha catyí ra tyi cucuhva ra chí yo. Ta cahnu xaan ta yahvi xaan nyaá cuan. Vatyi cha cuenda ihya nanduvi yo tari maa ra. Vatyi sacanyaha ra cha quiñi caa cha quichí cuví ñi yo, ta ma tiví yo tari tiví ñáyiví iyó síqui ñuhu ñáyiví ihya.

⁵ Ta yucuan chaha cuñí chí cha chinó ca ñi yo chí Nyoo ta nducu yo cuhva cha coo cachí yo. Yaha cuan cuñí chí cha nducu yo cuhva ta cutuñi vaha ñi yo cuhva cuñi Nyoo chíhin yo.

⁶ Ta yaha cuan cuñí chí cha saniñi yo cha cunyaca ñaha yo coño ñuhu yo ta cuhva chicá xiñi yo. Yaha cuan ta nducu yo cuhva cha cucama ñi

yo. Yaha cuan ta nducu yo cuhva cha cuñi ca coo yo nuu Nyoo.

⁷ Yaha cuan ta nducu yo cuhva cha cuñi yo chí tahan yo. Yaha cuan nducu yo cuhva cha cuvita xaan ñima yo chíhin tandihí ñáyiví.

⁸ Tatu tyehe caa iyó ndo ta tyicuan ri nducú ndo cuhva cha coo tandihí ihya chí ndo, Nyoo cucotyíño xaan ra chí ndo. Ta tatu sacuvi ndo tyehe caa, ña caha xaan ri chícohon nuu ndo chí Sutu Mañi yo Jesucristo.

⁹ Soco ñu cha ñahri ihya iyó chí, cuví ñu tari noo ra cuaa. Ña cutuñi ñi ñu cha tahán chí coto ñu. Ta naa ñi ñu tyi sandachí Nyoo cuatyí ñu ta ityi chata ca.

¹⁰ Yucuan chaha yañi, saniñi ndo coo ndo tyehe caa. Tyicuan ta cundicha vaha tyi cana Nyoo chí ndo ta nacachí ra chí ndo. Vatyi tatu sacuví ndo tyehe caa, ma canacava maa ndo.

¹¹ Tyicuan caa ta totyehe ri cuhva Nyoo cha quihvi ndo nu nyacá ñaha Sutu Mañi yo Jesucristo tyicuan ri maa. Maa ra cuví ra sacacú chí yo.

¹² Yucuan chaha cuasanícohon que ñi ndo tuhun ihya, vasi cha chitó ndo, ta ñi ñi ndo sacuví ndo tuhun ndicha cha cutuhva ndo.

¹³ Ta cuhva cha cuñí mai, vatyi cha ni ri ca cha iyé, vaha sanícohin ñi ndo coto naa ñi ndo tuhun ihya.

¹⁴ Vatyi chité tyi ña naha ca ta cusandoi ñáyiví ihya. Vatyi tyicuan caa sacoto Sutu Mañi yo Jesucristo chí.

¹⁵ Soco cuasaniñi tacuhva vatyi tatu yaha chíhi soco nícohón ñi ndo tuhun ihya.

Nu nacatyí ra Pedro yoso caa nyehe ra cha cahnu cuví ra Cristo

¹⁶ Ñima tyisu ri canatava ndi quivi sacoto ndi tuhun ra Jesucristo chí ndo. Vatyi cha nyehe vaha ndi chíhin chíti nuu ndi cuví. Vatyi nyehe ndi cha cahnu xaan cuví Sutu Mañi yo Jesucristo. Ta sacoto ndi chí ndo tyi iyó xaan tunyee ñi chí ra ta cuquichi ra inga chaha.

¹⁷ Vatyi nyehe ndi nu sacahnu xaan Nyoo Sutu yo chí ra. Ta tyaquí xaan

tyaquí xaan cuví nu cahan Nyoo ta catyí ra: “Ican ihya Sehi. Ta cuñí xain chí ra. Ta sñi cuñí chihin ra”, catyí Nyoo tuhun ra Jesús quívi cuan.

¹⁸ Ta nyuhu chiñi ndi ndusu Nyoo cha quichí ityi andívi quívi cha nyicú ndi chihin Sutu Mañi yo nu yucu ii cuan.

¹⁹ Ta sñin ri cumí yo nonga tuhun cha ndicha vaha cha catyaa ra profeta. Nyaá vaha nu tutu nu cahán chi tuhun ra Cristo. Ta vaha sacuví ndo tatu quichahá vaha ndo tuhun ihya. Vatyí cuví chí tari noo ñuhu ndichin cha cayú nu ñaa iñi nyacua nya cundichin ta caña ra Cristo tari cañá tiñoó cahnú cha ñaa ca, vatyí sandichín ra añima yo.

²⁰ Soco coto vaha ndo vatyí cha minoo tuhun ri yo, ma cuví catyí yo ñáá cha cuñí chí catyí noo tuhun cha nyaá nu tutu Nyoo.

²¹ Vatyí ra cacuví profeta ta cha naha, ña cahan ra cuhva cuñí ri maa ra. Soco cuhva cuñí Nyoo cahan ra. Ta Tatyí li saquehen ityi chí ra.

2

Ra casañahá cha ña ndicha (Judas 4-13)

¹ Soco cachiyó tucu ra profeta cuendu nu nyicu ñu Israel ta cha naha, cacatyí ra tyi cuví ra profeta Nyoo. Ta tyicuan caa cuacoo tucu ra sacuahá ra sañahá cuendu nu nyicu ndo. Xehe ri cuasañaha ra tuhun cha ña ndicha cha cuví satívi chí ndo. Ta cuacatyí ra tyi ña ndicha Sutu Mañi yo ra sacacú chí ra. Yucuan chaha numi ri cucunaa ra cuan.

² Ta cuaha xaan ñu cucunyicon ñu chí ra chihin cha quiñi caa cha sacuví ra. Ta cuaha xaan ñu cucahan ña vaha ñu síqui tuhun cha ndicha vaha ra Cristo.

³ Ta chaha cha iyo cuñi ra xuhun, ta cusandavi ñaha ra chí ndo chihin cha casañahá ra maa ri cha ña ndicha. Soco nyatú Sutu Mañi yo tachi tuñi ra chí ra vatyí cha naha iyó maa tuhun cha cunaa ra.

⁴ Vatyí ni ri chí ángel cha chicoo cuatyí quívi cuan ta ña saha Nyoo

ticahnu iñi. Soco tuchí ra chí ra anyaya. Ta sandoo ra chí ra nu ñaa iñi, nuñí ra chihin cadena nyacua nya quívi cutuñi chí ra nuu Nyoo.

⁵ Ta ni ña saha Nyoo ticahnu iñi chí ñu chiyo ta cha naha. Yucuan chaha tachí ra savi xaan síqui ñáyívi quiñi iyó cuan. Ta sacacú ra chí noo tuhun ri maa ra Noé, ra cha cahan tuhun vatyí coo yo noo ñayívi cachi. Ta cacú tucu ucha ca ñáyívi ñandíhi.

⁶ Ta tyicuan caa tucu sacunaa Nyoo ñuu Sodoma ta ñuu Gomorra. Vatyí chahmí ra nyacua nya cha ndíhi maa nduví ñiyaa. Tacuhva vatyí cunyehe ñáyívi quiñi iyó cha cucoo nu cuahan ca chí.

⁷ Soco sacacú ra chí ra Lot vatyí cuví ra noo ra vaha nuu ra. Ta cuihya cuñí ra Lot nyehé ra cuhva iyó ñu quiñi iyó cuan.

⁸ Ta ndí quívi cuihya cuñí añima ra Lot quívi chíyo ra ñuu cuan, cha cuenda cha nyehe ra ta chiñi ra cha quiñi caa nyacuví ñu cuan. Vatyí maa ra, ra vaha cuví ra. Ta maa ñu maa maa ri cha ña vaha nyacuví ñu.

⁹ Ta tyicuan caa cuví sacacú Nyoo chí yo tatu iyó yo cuhva cuñí ra. Ta ñu quiñi iyó naquehén vaha Nyoo chí ñu vatyí cutachí tuñi ra chí ñu quívi cutuñi chí ñu nuu ra.

¹⁰ Ta yaha ca cutachí tuñi Nyoo chí ñu nyicón cha ña vaha cha cuñí coño ñuhu, ñu ña cuñí cha cunyaca ñaha Sutu Mañi yo chí. Ta cahnú sahá ñu chí ñu ta sacuví ñu maa ri cuhva cuñí maa ñu. Ta ñu cuan ña yuhví ñu cahan ña vaha ñu síqui ra nahnu ca ican saha maa ñu cuví ri síqui ángel, cuví ri síqui tatyí ña vaha, cuví ri síqui Nyoo.

¹¹ Soco ángel, cahnú ca cuví ra cha nuu ñáyívi, soco ña cacañá iñi ra cahan ña vaha ra síqui ra nahnu ca cuan chihin nuu Sutu Mañi yo.

¹² Soco ra cahán cuendu nu nyicú ndo cuví ra tari quítí cha ña cutuñí iñi ta sacuví tí cuhva cuñí maa tí. Vatyí quítí, ¿ñáá cuenda iyó tí? Iyó tí vatyí tñin rayí chí tí, ta cahñi ra chí tí. Tyicuan caa maa ra cuan. Cakahán ña

vaha ra siqui cha ña cutuñi ñi ra. Ta cucuvi ra tari chihí qui ti.

¹³ Cunyehe ra tindoho tari sanyehé maa ra tindoho chi inga ñáyivi. Ta si xaan cacuñi ra chihin cha quiñi caá nyacuví ra nu tuvi. Ticahan nuu chahá ra, tatu cha cutahan ra chihin ndo nu iyó ndo vico. Nyaá vavaha ra tusi ñi. Soco ña ndicha cuhva sañahá ra.

¹⁴ Ta tandihi ri ñusihí cha nyehe ra ta quichi cuvi ñi ra. Ña chitatú ra cha casacuví ra cha quiñi caa. Casandaví ñaha ra chi ñu ña ñihi nyaá chihin Nyoo. Yatyí xaan ra cha nducu ra cuhva maa maa ri cha cuenda maa ra. Nyaá cha cunaa ndihi ra minoo qui vi.

¹⁵ Casandoo ra cuan ityi vaha ta naquehen ra ityi nu cucunaa ra. Casacuví ra tari sacuvi ra Balaam sehe ra Beor. Vatyí cuñi ra Balaam saha ganaa ra xuhun chihin cha ña vaha cha nyacuví ra.

¹⁶ Tyicuan ta noo burra nacahan ti chihin ra, tari cahán ñáyivi, ta ña chahá ti cha cuhun ca ra Balaam chihin cuhva loco chicá xiñi ra.

¹⁷ Ta tyicuan caa tucu maa ra cha nyicú chihin ndo. Cacuví ra tari noo yavi ityi cha ñahri ndutya ñohó. Ta cuví ra tari noo vico cha tyandaha tatyí ñihi chi. Soco cha nyaá cha cohon ra nu ñaa ñi cahnu tyicuan ri maa cha cuenda cha nyacuví ra tyicuan caa.

¹⁸ Yaa vavaha cahán ra soco tandihi tuhun cahán ra cha ñima ri tuhun cuví. Ta chihin vicio ta chihin cha quichi cuvi ñi coño ñuhu yo casandaví ñaha ra chi ñu cha yahá quita mahñu cha quiñi caa.

¹⁹ Ta tyiyuhú ndihi ra chi ñu na cunyacuví ca ñu cha quiñi caa vatyí yori nyacá ñaha chi ñu, catyí ra. Soco suri maa ra chahá ra cha cunyaca ñaha cha quiñi caa chi ra. Vatyí tatu chahá yo cha cunyaca ñaha noo cha cunyaca ñaha chi yo, musu cuan cuví chi yo.

²⁰ Vatyí ñu cha chicohon nuu chi Sutu Mañi yo Jesucristo, ra sacacú chi yo, cha yahá sandoo ñu cha quiñi caa

ñayivi ihya. Soco tatu natin tucu ñu tuhun ñayivi ihya inga chaha, quiñi ca nanduvi ñu ta ñima ca ta cuvi maa.

²¹ Vaha taxin ca tyehe ta ña chicohon nuu ñu ityi vaha cuan, ta ñima ca cha yahá chicohon nuu ñu ta nacuhva ñu chata ñu tuhun cha chahá Nyoo chi ñu.

²² Soco cuvi chi ñu tari cuhva catyí noo tuhun cha iyó ñayivi: “Ina nduchan ti, ta nacachi tucu ti cha nduchan ti. Ta quiñi chityi ti, ta ndihvi tucu ti nu nyahyu inga chaha.”

3

Qui vi cuquichi tucu Sutu Mañi yo

¹ Yañi, cuñi xain chi ndo. Ta ihya cuví carta cha cu uvi sacuhín chi ndo. Ta nu nanduvi tahan carta chahí tuhun chi ndo tacuhva vatyí caca vaha xiñi ndo.

² Ta ñicohon ñi ndo tuhun cha cahán ra cacuví profeta Nyoo, ta cha naha. Ta ñicohon tucu ñi ndo tuhun cha sañahá nyuhu chi ndo. Vatyí cuví ndi apóstol cuenda Sutu Mañi yo Jesucristo ra sacacú chi yo.

³ Coto xihna ndo vatyí nu cundihí ca chi qui vi cuquichi ñáyivi cucuacu nyaa ñu tuhun Sutu Mañi yo. Cucoo ñu yoso cuhva cha quiñi caa cha cuñi coño ñuhu ñu.

⁴ Ta cucatyí ñu: “Ra Jesucristo catyí ra vatyí cuquichi ra inga chaha. ¿Ta nya nyaá ra vityin? Vatyí nyata cachihí sutu chahnu yo ta nyata chingo ñuhu ñayivi ta nya vityin ta cuhva caa ri maa”, cucatyí ñu chi ndo.

⁵ Vatyí maa ñu ña cuñi ñu coto ñu vatyí ta tyembu chahnu cahán Nyoo ta savahá ra andivi ta ñuhu ñayivi. Quita ñuhu ñayivi chichi ndutya ta chihin ndutya chingo chi.

⁶ Soco cha yahá savahá Nyoo ñuhu ñayivi ta suri chihin ndutya cuanaa ñayivi cuan qui vi coon savi xaan.

⁷ Soco andivi ta ñuhu ñayivi cha iyó vityin sahá cumi vaha Nyoo vatyí suri chihin ñuhu cucayu chi qui vi cutuñi chi ñáyivi nuu ra. Tyicuan ta ñuhu cha cayu cuan cusanaa chi chi ñu ña quichahá chi Nyoo.

⁸ Soco yañi, cuñi xain chi ndo. Ta cuñi vatyí ma naa iñi ndo vatyí cha cuenda Sutu Mañi yo noo quivi tari cha noo mil cuiya cuví cuan, ta cha noo mil cuiya tari cha noo quivi cuví cuan chi ra.

⁹ Nima cha ña cuñi ñaha Sutu Mañi yo quichi ra. Vasi yihí ñu chicá xiñi ñu cha tyicuan caa. Soco Sutu Mañi yo nyatú ra chi yo vatyí ña cuñi ra cha cunaa ni noo yo. Cuñi ra vatyí tandihí yo ndu uvi iñi yo cuatyí yo ta nasama yo cuhva iyó yo.

¹⁰ Soco quivi cuquichi Sutu Mañi yo, tari cuaquichi noo ra suhu cha cha cuaa, tyicuan caa cucuvi. Vatyí sana iñi yo ta cuquichi ra. Tyicuan ta cucunaa andivi. Iyo xaan cucachan cuhva cuan. Ta cucayu tandihí cha iyó andivi. Cundutya ndi cuii chihin cha ihñi xaan. Ta tyicuan caa cucayu tucu ñuhu ñayivi ta tandihí cha iyó nuu chi.

¹¹ Ta tyicuan caa cutani tandihí. Yucuan chaha cuñi chi vatyí cachi coo yo tari cuhva cuñi Nyoo.

¹² Cuatu tuhva yo na chaa quivi quichi Nyoo. Nducu yo cuhva cha sanumi ra quichi ra. Quivi cuan cunaa andivi chihin ñuhu. Tandihí cha iyó cundutya chihin cha ihñi.

¹³ Soco yoó nyatú yo noo andivi chaa ta noo ñuhu ñayivi chaa cha catyí Nyoo tyi cucuhva ra. Ta maa maa ri cha vaha chi Nyoo cucoo yucuan.

¹⁴ Yucuan chaha yañi, cha ni ri ca cha nyatú ndo na quichi Sutu Mañi yo, sanñi ndo tacuhva vatyí quivi quichi ra, vii iyó ndo chihin ra ta ñahri cha iñi ndo ta ñahri cuatyí ndo.

¹⁵ Ta tin vaha ndo cuenda, vatyí Sutu Mañi yo nyatú ra chi yo vatyí cuñi ra vatyí cuaha ca ñayivi cacu. Ta tyicuan caa tucu catyí ra Pablo yañi yo nu tutu cha sacuhun ra chi ndo. Vatyí chihin cha chiñi tuñi cha chaha Nyoo chi ra tyaa ra.

¹⁶ Ta tandihí ri nu carta ra ta cahán ra tuhun ihya chihin ndo. Vasi yihí tuhun cha yí vavaha cutuñi iñi yo. Ta ñu cha ña cutuñi iñi, ñu cha ña ñihi nyaá chihin Nyoo, sin caa cuhva

natyihí tuñi iñi ñu tuhun cuan. Ta suri tyicuan caa sacuvi tucu ñu chihin tuhun cha tyaa inga ra nu tutu tuhun Nyoo. Sin caa cuhva natyihí tuñi iñi ñu. Ta cha tyicuan caa, sacunaá ñu suri chi maa ñu.

¹⁷ Yucuan chaha yañi, vityin cha chitó ndo tuhun ihya cha ni cumañi ca cuvi, saha ndo cuenda chi ndo, coto cunyicon ndo cuhva sandaví ñaha ra quiñi caa cuan, ta coto sandoo ndo cuhva vaha cha cuahan ndo.

¹⁸ Soco cohon nuu vaha ca ndo chi Sutu Mañi yo ra Jesucristo ra sacacú chi yo. Ta cuahnu ca ndo chihin tumañi iñi cha chahá ra chi ndo. Na sacahnu yo chi ra vityin ta tyicuan ri maa. Ta na cuvi chi tyicuan caa.

Carta Cha Xihna Ri Cha Tyaa Ra Apóstol Juan

Ñayiví chaa coo yo

¹ Ihya tyaaá ndi tuhun cha cha iyó maa quiví cha quichaha tandihí. Ta cuví chi tuhun cha chiñi ndi ta cha nyehe ndi chihin nuu ndi; vatyí nyehe ndi ta tñn ndi chihin ndaha ndi. Ta ican tuhun ihya cuví tuhun cha chahá ñayiví chaa coo yo.

² Ñayiví chaa ihya quetuví quiví quichí ra Cristo. Maa ndi nyehe ndi ta chahá ndi cuenda tuhun chi; ta sacotó ndi tuhun ñayiví chaa cha ma naa ca maa ihya chi ndo. Vatyí ñayiví ihya, nyaá chi chihin Sutu yo Nyoo, ta vityin tuví chi nu nyicú yo.

³ Nacatyí ndi chi ndo cha nyehe ndi ta cha chiñi ndi tacuhva na cu ñn ri ndo chihin ndi, tari maa ndi, ndicha cuí vatyí ñn ri cuví ndi chihin Sutu yo Nyoo ta chihin Sehe ra, ra Jesucristo.

⁴ Ta tyaaá ndi tuhun ihya chi ndo tacuhva na coo tandihí tusí ñni cha chahá Nyoo chi ndo.

Nyoo, ñuhu ndichin cuví ra

⁵ Ican ihya cuví tuhun cahán ra Cristo chihin ndi. Ta chiñi ndi ta sacotó ndi chi ndo: Nyoo maa ri ñuhu ndichin iyó nu nyaá ra. Ta ñahri cha ñaa ñni, (ñahri cha ña vaha yihí ñni ra cuví cuan).

⁶ Tatu catyí yo vatyí ñn ri cuví yo chihin ra, soco sacuví yo cha ña vaha, nu ñaa ñni chicá noo yo cuví cuan. Sandaví ñaha yo. Ta ñahri tuhun ndicha cahán yo.

⁷ Soco tatu nu ndichin iyó yo, tari maa Nyoo iyó ra nu ndichin, tyicuan ta ñn ri cuví yo chihin tahan yo, ta ñni ra Jesucristo Sehe Nyoo, nacatyá chi ndi cuí maa cuatyí yo.

⁸ Tatu catyí yo vatyí ñahri cuatyí yo, suri chi maa yo sandaví ñaha yo, ta ñahri cha ndicha nyaá ñni yo.

⁹ Soco tatu nahmá yo cuatyí yo nuu Nyoo, yihí ñni yo chi ra vatyí vaha ra ta ña sandaví ñaha ra, soco sacuví ra cuhva catyí ra, ta cusaha ra tñcahu ñni cuatyí yo ta cusandachi ra ndi cuí maa cha quiñi caa yo.

¹⁰ (Nyoo catyí ra tyi iyó cuatyí yo), ta tatu catyí yo vatyí ñahri cuatyí yo, sahá yo tuhun tyi Nyoo, cuendu ra. Ta tuhun cahán ra, ñahri maa nyaá ñni yo.

2

Ra Cristo cuví ra cahán chaha yo

¹ Sehe nyihi, sacoté tuhun ihya chi ndo, tacuhva ma sacuvi ndo cuatyí. Soco tatu chicoo cuatyí minoo ndo, ma yuhvi ndo, vatyí iyó ra cahán chaha yo nuu Nyoo. Ta ican ra cuví ra Jesucristo, ra vaha.

² Ta maa ra cuví ra chahnyá cuatyí yo, vatyí chihí ra tyiño nuu yo cha cuenda cuatyí yo. Ta ñni cha cuenda maa ri maa yo, soco cha cuenda tandihí ñayiví.

³ Tatu quichahá yo tuhun cahán Nyoo, ñohó nuu yo chi ra.

⁴ Soco tatu noo ra catyí ra: “Yuhu, ñohó nui chi Nyoo”, soco tatu ña quichahá ra tuhun cahán ra, cuví ra noo ra cuendu. Ta ñahri tuhun ndicha caá ñni ra.

⁵ Soco ñu naquehén vaha tuhun cahán Nyoo, ican ñu cuan cuví ñu cuñí chi ra chihin cha ñni ñni. Ta cha tyicuan caa chitó yo tyi ñn ri cuví yo chihin ra.

⁶ Yóo cha catyí vatyí ñn ri cuví chihin Nyoo, tahan chi coo ra tari cuhva chiyo maa ra Jesucristo quiví chica noo ra siqui ñuhu ñayiví.

Tuhun chaa cha cuñí yo chi tahan yo

⁷ Yañi yo, ñni noo tuhun chaa sacoté chi ndo, soco cuví chi noo tuhun chahnu cha chitó ndo nyata quiví xihna ri. Ta ican tuhun chahnu ihya cuví tuhun chiñi ndo.

⁸ Soco tari noo tuhun chaa cuví chi. Ta sacuví ra Cristo, ta chaha ra cha sacuví tucu maa ndo ñandihí. Ta cha tyicuan caa, cha ñaa ñni cuahan

nocuee chi. Ta cha ndichin Nyoo cha sandundichín chi.

⁹ Ñu cha catyí vatyí nyaá ñu nu ndichin, ta ña cuñí nyehe ñu chi tahan ñu, ni nyaá ca ñu nu ñaa iñi.

¹⁰ Ta ñu cuñí chi tahan, nu ndichin nyaá ñu. Ta ñahri maa cha cuví sanacava chi ñu nu cuatyí.

¹¹ Soco ñu cha ña cuñí nyehe chi tahan, nu ñaa iñi nyaá ñu. Ta ña chitó ñu nya ityi cuahan ñu vatyí ña cuví nyehe ñu vatyí tari cha cuaa ñu.

¹² Sacuhín tuhun ihya chi nyoho, ra cuatyaa sehi. Vatyí cha yaha saha Nyoo ticahnu iñi cuatyí ndo cha cuenda cha chihí ra Jesucristo tyiño nuu ndo.

¹³ Ta chi nyoho, cha cuví ndo sutu, sacuhín tuhun ihya chi ndo, vatyí ñohó nuu ndo chi ra iyó nyata cumañi cacu ñuhu ñayiví. Ta chi nyoho, ra tyivaa, sacuhín tuhun ihya vatyí cuví chasaha ndo chi ra ña vaha.

Ta chi nyoho, cha cuví ndo ra cuatyaa sehi, sacuhín tuhun ihya vatyí ñohó nuu ndo chi Sutu yo Nyoo.

¹⁴ Sacuhín tuhun ihya chi nyoho cha cuví ndo sutu, vatyí ñohó nuu ndo chi ra cha iyó nyata cacu ñuhu ñayiví. Ta sacuhín tuhun ihya chi nyoho ra tyivaa vatyí nyaá xaan fuerza chi ndo. Ta tuhun Nyoo caá añima ndo. Ta cuví chasaha ndo chi ra ña vaha.

¹⁵ Ma cuñi ndo cha quiñi caa cha iyó ñayiví ihya. Ni ma cuñi ndo cha iyó siqui ñuhu ñayiví. Vatyí ñu cuñí tandihí ihya, ña cuñí ñu chi Nyoo.

¹⁶ Vatyí tandihí cha iyó ñayiví ihya, cha ña vaha cha quichi cuví iñi coño ñuhu yo, ta cha nyehe yo ta quichi cuví iñi yo coo chi yo, ta cha cuñí yo cuyaa yo chihin cha iyó chi yo, tandihí ihya ñima cuhva chahá Sutu yo Nyoo chi yo cuví, soco maa maa ri cha chahá ñayiví ihya cuví.

¹⁷ Ta ñayiví ihya cuahan sandihí chi, chihin tandihí cha quiñi caa cha quichi cuví iñi ñayiví. Soco ñu cha sacuví cuhva cuñí Nyoo, tyicuan ri maa cuacoo ñu chihin ra.

Ra xaan iñi chi ra Cristo

¹⁸ Sehe nyihi, cha nyaá yo nu cuandihí quiví. Ta nyoho chiñi soho ndo vatyí vachi noo ra cha ña cuñí nyehe chi ra Cristo, ta vityin cha cuaha xaan ra ña cuñí nyehe chi ra Cristo iyó vityin. Yucuan chaha nacoto yo vatyí cha nyaá yo nu cuandihí quiví.

¹⁹ Maa ra nu nyicú yo quita coyo ra, vatyí ñima ra cuenda yo cuví chi ra. Vatyí tyehe ta ra cuenda yo cacuví chi ra, candoó ra chihin yo. Soco cuahan coyo ra tacuhva quetuví vatyí ña tandihí ñayiví ta cuenda yo cuví ñu.

²⁰ Soco chi nyoho chaha ra Cristo Tatyí Ii Nyoo cunyaa añima ndo. Ta chitó ndo tandihí.

²¹ Sacuhín tuhun ihya chi ndo ñima cha cuenda vatyí ña chitó ndo cha ndicha, soco vatyí chitó ndo. Ta ni noo cuendu ma quita cahan ñu sacuví cha ndicha.

²² ¿Yóo cha cuví ñu cuendu? Ñu catyí vatyí ra Jesus ñima ra Cristo cuví ra. Ta ñu cha catyí tyehe caa, ñu xaan iñi chi ra Cristo cuví ñu. Vatyí ña chinó iñi ñu chi Sutu yo Nyoo, ta ni ri chi ra Jesucristo Sehe Nyoo.

²³ Tandihí cuii ñu ña chinó iñi chi Sehe Nyoo, yori Sutu yo Nyoo nyaá chihin ñu. Soco ñu catyí vaha chi ñayiví vatyí ra Jesucristo cuví Sehe Nyoo, ñin ri cuví ñu chihin Nyoo ñandihí.

²⁴ Yucuan chaha nyoho, tuhun cha chiñi ndo nya quiví xihna ri, naquehen vaha ndo chichi añima ndo. Tatu ndoó chi chichi añima ndo, ñin ri cuví ndo chihin Sehe Nyoo ta chihin Sutu yo Nyoo ñandihí.

²⁵ Ta ra Jesucristo catyí ra vatyí cuhva ra noo ñayiví chaa cha ma naa ca maa coo yo.

²⁶ Sacuhín tuhun ihya chi ndo cha cuenda vatyí cuaha xaan ra sandaví ñaha chi ndo iyó.

²⁷ Soco ra Jesucristo chaha ra Tatyí Ii Nyoo cha cunyaa añima ndo, ta ña chiñuhú ca cha sañaha ni noo ñayiví chi ndo. Vatyí suri maa Tatyí Ii Nyoo sañahá chi ndo ndi cuii maa tuhun. Ta cha ndicha cuví, ñima cuendu cuví. Yucuan chaha sañihi ca ndo cu ñin

ri ndo chihin ra Cristo tari cuhva sañahá Tatyí li Nyoo chi ndo.

²⁸ Ta vityin nyoho, ra cuatyaa sehi, cuinyañaa yo chi ra Cristo tacuhva vatyí nachaa chi quiví quichi ra, ma cutucu cuñi yo chihin ra. Ta tyicuan caa tucu maa ra chihin yo. Ta sñin ri tacuhva cha ma tahan yo ticahan nuu nuu ra quiví quichi ra.

²⁹ Cha chitó ndo vatyí ra Cristo vaha ra. Chitó tucu ndo vatyí tandihí ñu cha nyacuví cha vaha, sehe Nyoo cuví chi ñu.

3

Ñu cha cuví sehe Nyoo

¹ Nyehe ndo, yoso cha cuñí Sutu yo Nyoo chi yo, vatyí nasaha ra sehe ra chi yo. Ta catyí ra: “Nyoho, sehi cuví chi ndo.” Yucuan chaha ñáyiví, ña cuñí nyehe ñu chi yo vatyí tyicuan caa tucu, ña cuñí nyehe ñu chi maa ra.

² Yañi, vityin cha cuví yo sehe ra. Soco ta coto ca yo yoso caa cucuví yo. Soco chitó yo vatyí nachaa chi quiví quichi ra Jesucristo, cucuví yo tari maa ra, vatyí cunyehe vaha yo chi ra tari cuhva caá ra.

³ Ta tandihí yo cha nyatú yo cha cucuví tyehe caa, nducú yo cuhva ta sandundií ca yo añima yo, tari ndí maa Sutu Mañi yo Jesucristo.

⁴ Tandihí ñu sacuví cuatyí, ña quichahá ñu ley Nyoo. Vatyí cha sacuví yo cuatyí, ña quichahá yo ley Nyoo cuví chi cuan.

⁵ Cha chitó ndo vatyí ra Cristo quichí ra ñáyiví tacuhva tinyaa ra cuatyí yo, ta maa ra ñahri cuatyí ra.

⁶ Tandihí yo cha ñin ri cuví yo chihin ra, ña sacuví yo cuatyí. Soco ñáyiví cha sacuví cuatyí, ta quehen cuenda ca ñu chi ra, ni ta cohon ca ra añima ñu.

⁷ Sehe luhli, ñaha sandavi ñaha ñáyiví chi ndo, vatyí ñu cha sacuví cha vaha, vaha ñu, tari maa ra Cristo vaha ra.

⁸ Soco ñu cha sacuví cuatyí, cuenda ra ña vaha yihí ñu. Vatyí ra ña vaha sacuví ra cuatyí nyata quiví xihna ri. Soco yucuan chaha quichí ra

Jesucristo, ra cha cuví Sehe Nyoo, tacuhva vatyí satani ra ndí cuii cha sacuví ra ña vaha.

⁹ Tandihí yo cha cha yaha nacacu chaa yo, nanduví yo sehe Nyoo, ta ña sacuví ca yo cuatyí, vatyí ñáyiví Nyoo iyó yo. Yucuan chaha ña sacuví ca yo cuatyí, vatyí cha yaha nacacu chaa yo ta sehe Nyoo cuví chi yo.

¹⁰ Ta tyehe caa cuví nichon nuu yo chi ñu cha cacuví sehe Nyoo, ta ñu cuví sehe cuihna. Vatyí yóo ñu sacuví cha ña vaha o ña cuñí nyehe ñu chi tahan ñu, ñima ñáyiví cuenda Nyoo cuví ñu.

Na cuñi yo chi noo noo tahan yo

¹¹ Vatyí ican ihya cuví tuhun cha chihí ndo quiví xihna ri: Cha cuñi yo chi noo noo tahan yo.

¹² Ña tahan chi sacuví yo tari cuhva sacuví ra Caín. Cuví ra noo ra cuenda ra ña vaha. Ta chahñí ra chi yañi ra. ¿Ñáa tuhun chahñí ra chi ra? Cha cuenda vatyí vaha cuhva sacuví yañi ra, ta maa ra Caín chinyacuví ra cha ña vaha.

¹³ Yañi yo, ma iyo cuñi ndo tatu ña cuñí nyehe ñáyiví chi ndo.

¹⁴ Yoó chitó yo vatyí tari minoo ra chihí ta nandoto cuví yo vatyí iyó yo noo ñáyiví chaa vatyí cuñí yo chi tahan yo. Ñu cha ña cuñí chi tahan, tari quiví ni cuví ca ñu tari noo ra chihí, ta ta nandoto ca ñu.

¹⁵ Yóo ñu cha xaan iñi chi tahan, tari noo ñu chahñí ñáyiví cuví ñu. Ta chitó ndo vatyí ni noo ñu chahñí, ma cuhva Nyoo ñáyiví chaa cha ma naa ca maa coo añima ñu.

¹⁶ Nichón nuu yo ñáa cha cuví cha cuñí yo chi tahan yo vatyí ra Jesucristo sañaha ra chi yo. Vatyí maa ra cuñí ra chi yo, ta chaha ra ñáyiví ra cha catyí yo. Ta tyicuan caa tucu maa yo, cuñi yo chi tahan yo ta cuhva yo ñáyiví yo cha cuenda ñu.

¹⁷ Ta tatu yihí yo iyó chiin chi yo siqui ñuhu ñáyiví ihya, ta nyehé yo cumañí cha cumañí chi tahan yo, ta sahá ri yo cha ña nyehé yo, ¿atu cuñí

yo chi Nyoo cha sacuví yo cha tyicuan caa? Ña cuñi yo chi ra cuví chi cuan.

¹⁸ Ra cuatyaa sehi, ñima chihin tuhun yuhu ri yo, cuñi yo chi tahan yo, soco na cuñi yo chi ñu chihin cha sacuví yo tumañi iñi, ta chihin cha ñi iñi yo.

Yoso caa sacuvi yo ta coo vaha yo chihin Nyoo

¹⁹ Tatu sacuví yo tyicuan caa, chitó yo tyi yihí yo tuhun ndicha. Ta vaha iyó yo chihin Nyoo.

²⁰ Tatu chichi añima yo ta tuví iñi yo tyi iyó cuatyí yo, vihi ca cuví Nyoo, chitó ra cha caá añima yo.

²¹ Yañi, tatu tuví iñi yo tyi ñahri cuatyí yo, ma yuhvi cuñi yo nyehe yo chi Nyoo.

²² Ta ñáá ri cha cacan tahvi yo cuacuhva ra chi yo, vatyí quichahá yo tuhun cahán ra, ta sacuví yo cuhva tahán iñi ra.

²³ Ta ican ihya cuví tuhun chaha ra chi yo: Cha chino iñi yo vatyí ra Jesucristo cuví Sehe ra. Ta cha cuñi yo chi noo noo tahan yo vatyí tyicuan caa tuhun cha chaha ra chi yo.

²⁴ Ta ñu cha quichahá tuhun chaha ra chi yo, iyó ñu cha ñin ri cuví ñu chihin ra, ta maa ra iyó ra chichi añima ñu. Ta cha cuenda Tatyí Ii ra cha chaha ra chi yo, chitó yo vatyí nyaá ra chihin yo.

4

Tatyí Ii Nyoo ta tatyí ña vaha

¹ Cuñi xain chi ndo, yañi. Ma chino iñi ndo tandihí ñáyivi cha catyí tyi cuenda Nyoo cahán ñu. Nyehe xihna ndo tatu nacachí tahan cha cahán ñu chihin tuhun Nyoo. Vatyí cuaha xaan ra cha catyí vatyí Nyoo sañahá chi ra. Soco ña ndicha.

² Soco tyehe caa cuví nichon nuu ndo tatu Tatyí Ii Nyoo sacahán chi ra o ñima. Tandihí ra cha catyí vatyí quichí ra Jesucristo nya gloria ta cacu ra chihin coño ñuhu ñayivi ihya, ican ra cuan, sacahán Tatyí Ii Nyoo chi ra.

³ Soco ndi cuii maa ñáyivi cha catyí vatyí ra Cristo ña chica noo ra chihin coño ñuhu ñayivi ihya, ñima Nyoo sacahán chi ñu cuan, soco tatyí ña vaha, cha xaan iñi chi ra Cristo, ican sacahán chi ñu. Cha chiñi ndo vatyí nyaá quichi cuan. Ta vityin cha chicá noo chi siqui ñuhu ñayivi.

⁴ Ra cuatyaa sehi, ñáyivi chi Nyoo cuví ndo. Ta cuví chasaha ndo chi ra xaan iñi chi ra Cristo. Vatyí cahnu ca ra Cristo, ra nyaá añima ndo ta ñima ca ra ña vaha, ra cha chicá noo siqui ñuhu ñayivi ihya.

⁵ Maa ñu cuan, ñu cuenda ñayivi ri ihya cuví ñu. Yucuan chaha cahán ñu tuhun ñayivi ihya. Ta ñu cuenda ñayivi ihya tyasohó ñu tuhun cahán ñu.

⁶ Soco yoó cuví yo ñu cuenda Nyoo. Ta ñu cuenda Nyoo tyasohó ñu tuhun cahán yo, soco ñu yihí tatyí ña vaha añima, ña cuñi ñu tyasoho ñu. Ta tyicuan caa cuví nichon nuu yo chi ñu yihí Tatyí Ii Nyoo ta ñu yihí tatyí ña vaha.

Nyoo cuñi xaan ra chi tandihí ñáyivi

⁷ Yañi yo, na cuñi yo chi tahan yo, vatyí Nyoo sañahá ra chi yo yoso caa cha tahán chi cuñi yo chi ñu. Tandihí yo cha cuñi yo chi tahan yo sehe Nyoo cuví chi yo, ta ñohó nuu yo chi Nyoo.

⁸ Soco ñu cha ña cuñi chi tahan, ta cohon nuu ca ñu chi Nyoo, vatyí Nyoo cuñi xaan ra chi yo ta chi tandihí ñáyivi.

⁹ Ta sañaha Nyoo vatyí cuñi ra chi yo chihin cha chaha ra noo Sehe mañi ra tyi quichí ra siqui ñuhu ñayivi ihya, vatyí cuhva ra noo ñayivi chaa coo yo.

¹⁰ Nyehe xihna, yoso cha cuñi Nyoo chi yo. Ñima vatyí xihna ca yo cuñi yo chi ra, soco xihna ca maa ra cuñi ra chi yo. Ta tachí ra chi Sehe ra vatyí tacuhva cúvi ra tyiño nuu yo ta cahnya ra cuatyí yo.

¹¹ Nyoho yañi, tatu cuñi Nyoo chi yo cha tyicuan caa, tahán tucu chi cuñi maa yo chi tahan yo.

12 Vasi ni nonga ñáyiví, ta nyehe ca ñu chi Nyoo, soco tatu cuñí yo chi noo noo tahan yo, Nyoo nyaá ra añima yo. Ta tyicuan caa nñi vaha iñi yo cuñí yo chi ra.

13 Ta chitó yo vatyí nyaá yo chichi ndaha ra, ta maa ra nyaá añima yo vatyí chahá ra Tatyí Ii ra cunyaa añima yo.

14 Ta nyuhu nyehe vaha ndi ta cuví ndi cha ndaa vatyí Sutu yo Nyoo saquichí ra chi Sehe ra tacuhva vatyí sacacu ra chi yo cha cuví yo ñáyiví iyó siqui ñuhu ñáyiví.

15 Tandihí ñu nachinó iñi chihin cha nñi iñi ñu ta catyí ñu vatyí ra Jesús cuví ra Sehe Nyoo, Nyoo nyaá ra chichi añima ñu. Ta maa ñu nyaá ñu chichi ndaha ra.

16 Ta yoó cha nacoto yo ta nachino iñi yo tyi Nyoo cuñí ra chi yo, ta chi tandihí ñáyiví. Ta ñu cha cuñí chi tahan, chichi ndaha Nyoo nyaá ñu. Ta Nyoo nyaá ra chichi añima ñu.

17 Vatyí tatu cuñí yo chi Nyoo chihin cha nñi iñi yo ma yuhví cuñi yo nyehe yo chi ra, nachaa chi quiví cutuñi chi tandihí ñáyiví nuu ra. Vatyí tari cuhva iyó maa ra Jesucristo, tyicuan caa iyó yo siqui ñuhu ñáyiví ihya.

18 Nyoo cuñí ra chi yo, ta tatu cuñí yo chi ra, ñahri maa cha yuhví yo. Tatu nñi iñi yo cuñí yo chi Nyoo ña nuña ca nu quihí tuhun yuhví añima yo, vatyí Nyoo tava ñehe ra tandihí maa cuan. Vatyí tatu yihí cha yuhví cuñi yo, yihí cha cuenda vatyí iyó cuatyí yo. Ta yuhví yo cha cutachi tuñi Nyoo chi yo. Vatyí tatu yuhví cuñí yo, yuhví yo vatyí ña cuñí vaha yo chi Nyoo.

19 Yoó cuñí yo chi Nyoo vatyí xihna ca maa ra cuñí ra chi yo.

20 Tatu yoó cha catyí: “Yuhu cuñí chi Nyoo”, catyí ñu, soco ña cuñí nyehe ñu chi tahan ñu, noo ñu cuendu cuví ñu. Vatyí tatu ña cuñí nyehe ñu chi tahan ñu cha nyehé ñu, ¿atu cuví cuñí ñu chi Nyoo cha ña nyehé ñu? Ma cuví.

21 Ta Nyoo chahá ra tuhun ihya chi yo: Ñu cha cuñí chi Nyoo, tahan chi cha cuñí tucu ñu chi noo noo tahan ñu ñandihí.

5

Cha nñi iñi yo chinó iñi yo chi Nyoo sahá ganaa yo chi cha ña vaha

1 Tandihí ñu chinó iñi tyi ra Jesús cuví Cristo cha saquichí Nyoo, sehe Nyoo cuví chi ñu; ta tatu cuñí yo chi noo sutu, cuñí tucu yo chi tandihí sehe ra.

2 Tatu cuñí yo chi Nyoo ta sacuví yo cha catyí ra, chitó yo vatyí cuñí tucu yo chi ñu sehe Nyoo.

3 Vatyí cha cuñí yo chi Nyoo ican cuví cha quichahá yo tuhun chahá ra chi yo. Ta tandihí tuhun cha chahá ra chi yo ña yñi sacuví yo.

4 Vatyí tandihí yo cha cuví yo sehe Nyoo, cuví chasaha yo chi cha ña vaha cha iyó ñáyiví ihya chihin cha chinó iñi yo chi Nyoo.

5 Ñu cha chinó iñi vatyí ra Jesús cuví Sehe Nyoo, ican ñu cuan cuví chasaha chi cha ña vaha cha iyó ñáyiví ihya.

Tatyí Ii Nyoo cuví cha ndaa cuenda ra Jesús ra cuví Sehe Nyoo

6 Ra Jesucristo quichí ra siqui ñuhu ñáyiví ihya. Ta chitó yo tyi ndicha cha Sehe Nyoo cuví chi ra nu condutyá ra, ta nu chati niñi ra ñandihí. Ñima noo ri nu condutyá ra. Soco nu chati niñi ra ñandihí. Ta Tatyí Ii Nyoo cuví cha ndaa tyi tyicuan caa cuví. Ta maa ri cha ndicha cahán Tatyí Ii Nyoo.

7 Iyó uñi tahan testigu cha nyaá andiví: Sutu yo Nyoo ta ra Cristo ra cuví Tuhun Cahán Nyoo, ta Tatyí Ii Nyoo. Ta nduñi tahan ihya cuví noo ri, ta ñin ri cuhva cahán nduñi tahan.

8 Ta iyó uñi tahan testigu siqui ñuhu ñáyiví ihya: Tatyí Ii Nyoo cha nyaá añima yo catyí vatyí ican ra Jesús cuví Sehe Nyoo. Yucuan cuví noo. Ta nu condutyá ra Jesús, Nyoo catyí ra vatyí ican ra cuví Sehe ra. Yucuan cuví cha cu uvi. Ta nu chati niñi ra Jesús, yucuan cuví cha cu uñi cha sañahá

chi vatyi ra Jesucristo cuví ra Sehe Nyoo. Ta tyicuan caa nduñi tahan cuan ñin ri cuhva cahán.

⁹ Yoó tuhvá yo naquehen yo tuhun cahán ra cuví testigu siqui ñuhu ñayiví ihya. Soco Nyoo cahnu ca cuví ra ta ñima ca ra ñuhu ñayiví ihya. Ta ican ra catyi ra vatyi ra Jesús cuví Sehe ra.

¹⁰ Ñu cha chinó ñi tyi Sehe Nyoo cuví chi ra Jesús, chitó ñu chichi añima ñu tyi ndicha. Ñu cha ña chinó ñi chi ra, tari quiví cha sahá ñu tuhun tyi Nyoo ra cuendu cuví ra, vatyi ña cuñí ñu chino ñi ñu cha cahán Nyoo tumañi ñi cuenda Sehe ra, ra Jesús.

¹¹ Ta ican ihya cuví tuhun cahán Nyoo chihin yo: Catyi ra tyi chahá ra noo ñayiví chaa coo yo tatu chinó ñi yo vatyi ra Jesucristo cuví Sehe ra.

¹² Ñu cha nyaá Sehe Nyoo añima, iyó ñu ñayiví chaa ihya. Ta ñu cha yori Sehe Nyoo nyaá añima, ñahri ñayiví chaa cuan iyó ñu.

Nu ndihí cahan ra Juan ta chahá ra tuhun chi ñu

¹³ Sacuhín tuhun ihya chi nyoho cha chinó ñi chi ra Jesús Sehe Nyoo, tacuhva coto ndo tyi cha iyó ndo ñayiví chaa cha ma naa ca maa.

¹⁴ Cunyeé xaan ñi yo chi Nyoo vatyi chitó yo vatyi tatu chicán yo cha chicán yo chi ra ta cuhva cuñí ra cuví, maa ra chiñí ra tuhun cahán yo.

¹⁵ Ta tatu chitó yo tyi chiñí ra tuhun cahán yo, chitó tucu yo tyi cha ñihí yo cha chican yo chi ra.

¹⁶ Tatu nyehé yo noo ñu tahan yo sacuví ñu noo cuatyi, soco noo cuatyi cha ña sacunaá chi chi ñu nuu Nyoo, cuví cacan tahvi yo chi ra cha cuenda ñu. Ta cusaha ra ticahnu ñi cuatyi ñu tacuhva coo ca ñu nuu ra. Soco iyó noo cuatyi cha sativí chi ñáyiví nuu Nyoo. Ña tahán chi cacan tahvi yo cha cuenda ñu cha sacuvi cuatyi cuan.

¹⁷ Tandihí cha ña vaha cha sacuví ñáyiví, cuatyi cuví. Soco iyó cuatyi cha ña sativí ndihí chi chi yo nuu Nyoo.

¹⁸ Chitó yo vatyi ñu cha nacacu chaa sahá Nyoo, ña sañihí ñu sacuvi

ñu cuatyi. Vatyi Sehe Nyoo sahá cuenda chi ñu ta ña chahá ra cha tñin ra ña vaha chi ñu.

¹⁹ Ta yoó chitó yo tyi cuenda Nyoo yihí yo. Tandihí ca ñáyiví, cuenda ra ña vaha yihí ñu, vatyi nyacá ñaha ra chi ñu.

²⁰ Chitó tucu yo vatyi cha quichí Sehe Nyoo. Ta chahá ra cha chiñi tuñi vatyi cohon nuu yo chi Nyoo, ra ndicha vaha. Ta nyaá yo chichi ndaha ra cuví cha ndicha, ra cuví Sehe Nyoo, ra Jesucristo. Ican ra cuví Nyoo cha ndicha, ican ra cuví ñayiví chaa cha ma naa ca maa.

²¹ Nyoho ra cuatyaa sehi, saha ndo cuenda chi ndo chihin cha sacahnú ñáyiví, ta ni ñima Nyoo cuví.

Ta na cuvi chi tyicuan caa.

Carta Cha Cu Uvi Cha Tyaa Ra Apóstol Juan

Nu catyí ra Juan vatyi cuñí xaan ra chi ñu yihí cuenda Nyoo

¹ Nyoo nacachi ra chuun, yoho Hermana. Ta yuhu cha cuví ra chahnu vehe ñuhu, sacuhín tutu ihya chuun ta chi tandihí sehun. Ta cuñí xain chi ndo chihin cha ñi ñi. Ta ñima yuhu ri cuñí chi ndo soco tandihí ca ñu cha nacotó cha ndicha ñandihí.

² Cuñí chi ndo cha cuenda cha ndicha cha ñohó chichi añima yo. Ta tyicuan ri maa cunyaa cha ndicha cuan chihin yo.

³ Sutu yo Nyoo ta Sutu Mañi yo Jesucristo Sehe Nyoo na nasoco ra chi ndo ta na nyehe ndahvi ra chi ndo. Ta na coo cha taxi ri añima ndo, chihin cha ndicha, vatyi cuñí xaan ra chi ndo.

⁴ Siñi xaan cuñí cha chité tuhun suhva sehun ta nyehí vatyi iyó ñu tari cuhva catyí cha ndicha, tari cuhva catyí Sutu yo Nyoo tyi sacuvi yo.

⁵ Ta vityin, Hermana, chacú ndahvi nuun, na cuñi yo chi noo noo tahan yo. Ican ihya cuví cha tyaí nu tutu ihya. Ta ñima noo tuhun chaa cha chaha Nyoo chi yo cha vityin ri cuví cha cuñí yo chi noo noo tahan yo. Soco ican ihya cuví tuhun cha catyí Nyoo chi yo nyata quivi xihna ri.

⁶ Ta cha cuñí yo chi ra, ican cuví cha sacuvi yo tandihí cha catyí ra chi yo. Ican ihya cuví cha catyí Nyoo tyi sacuvi yo. Ta nyoho, chiñi ndo tuhun ihya nya quivi xihna ri. Na coo ndo chihin cha cuñí ndo chi Nyoo ta chi ñáyivi.

Nu catyí ra Juan vatyi saha cuenda yo chi yo chihin ñu chicá noo sandavi ñaha

⁷ Catyí chuun tyehe caa vatyi cuaha xaan ra casandaví ñaha cachicá noo ra nicahnu siqui ñuhu ñáyivi. Cacatyí ra vatyi ña ndicha cha quichi cacu ra Jesucristo chihin coño ñuhu ñáyivi ihya. Ra cacatyí tyicuan caa, sandaví

ñaha ra chi ñáyivi. Ta cuví ra noo ra xaan ñi chi ra Cristo.

⁸ Yucuan chaha, saha ndo cuenda chi ndo chihin tuhun cha sañahá ra coto sacunaa ndo cha vaha cha sacuvi ndo, ta coto ma ñihi ca ndo tandihí cha cuacuhva Nyoo chi ndo.

⁹ Yóo ñu cha ña ndoó vaha chihin cha sañahá ra Cristo chi yo ta sañahá ñu inga tuhun, yori Nyoo nyaá chihin ñu cuan. Soco ñu ndoó vaha ta quichahá tuhun cha sañahá ra Cristo, nyaá Sutu yo Nyoo ta ra Jesucristo Sehe ra chihin ñu cuan.

¹⁰ Tatu chaa noo ra vehe ndo, cua nyehe ra nu nyicú ndo ta cuñí ra sañaha ra tuhun cha ña sañaha ra Jesucristo, ma cuhva ndo vehe ndo cun-yaa ra, ni ma tyinyee ndo chi ra.

¹¹ Vatyi tari quivi cha ñi ri cha ña vaha sacuvi yo chihin ra tatu naquehén cuenda vaha yo chi ra cuan.

Nu ndihí cahan ra Juan

¹² Cuaha xaan ca tuhun tyaí cuhva sacote chi ndo, soco ña cuñí sacote chi ndo chihin tutu. Soco nyatí cuhin nu nyicú ndo. Tyicuan ta ndatuhun vaha maa yo, tacuhva cusii ca cuñi yo.

¹³ Ihya vachi nocumi chuun sahá sehe cuhun. Nacachi tucu Nyoo chi maa ña ñandihí.

Carta Cha Cu Uñi Tyaa Ra Apóstol Juan

Nu catyí ra Juan vatyí ra Gayo vaha cuahan ra chihin Nyoo

¹ Yuhu cha cuví ra chahnu vehe ñuhu, sacuhín carta ihya chí yoho, Gayo, vatyí yoho cuvún noo ra tahn cha cuñí xain chihin cha ñi ñi.

² Yañi, chicán tahví chí Nyoo cha cuendon vatyí na coo vahun. Ta tari cuhva cuahan vahun chihin Nyoo, ta tyicuan caa tucu, na nasoco Nyoo chuun tacuhva cha ma tñin cuehe chuun.

³ Vatyí cusñi xaan cuñi quivi quichi coyo suhva ra yañi yo. Ta canacatyí ra vatyí cha ndicha vaha iyón cuhva cha sañaha ra Cristo. Ta ican cuví cha ndicha vaha.

⁴ Ñahri ca cha sñi cuñi tari cha chité vatyí sehi sacuví vaha ñu cuhva catyí tuhun ndicha.

⁵ Cuñí xain chuun, yañi. Vaha xaan sacuvún, vatyí tyiñuhún chí ra yañi yo, ta cha vaha xaan ca cha sacuvún vatyí tyiñuhún chí ra yañi yo inga ñuu cha chaa vehun.

⁶ Chihin nuu tandihí ñu vehe ñuhu canacatyí ra vatyí cuñi xaun chí ra. Ta saha tumañi ñi, yoho Gayo, tyinyee con chihin cha chiñuhú chí ra yañi yo vatyí sañihi ca ra cuhun coyo ra nu cuahan ra. Vatyí tyicuan caa tahán ñi Nyoo cha sacuví yo.

⁷ Vatyí tyiño nuu Jesucristo cachicá noo ra. Ta ña cacuñi ra cha tyinyee ñáyivi cha ña ñohó nuu Nyoo chí ra.

⁸ Yucuan chaha vatyí maa yo tahán chí nyehe yo ñáá ndihí cha chiñuhú chí ra. Ta tyicuan caa ta cutahan yo chihin ra nu cahán ra tuhun ndicha.

Nu catyí ra Juan vatyí ra Diótfefes, ña vaha sacuví ra

⁹ Yuhu sacuhín noo carta chí ñu nyicú vehe ñuhu, soco ra Diótfefes sacuví ri maa ra nuu chí ra, ta ña tyasohó ra tuhun cahín.

¹⁰ Yucuan chaha tatu cuhin chiña, cusandai tyiño chihin ra cha cuenda tuhun cahán ra, vatyí cahán ña vaha

ra siqui yo. Ta sñin ri tatu yóo hermano chaa, ña naquehén cuenda ra chí ra. Ta tatu ñu nyicú vehe ñuhu naquehén cuenda ñu chí ra, chasí ri ra, ta tavá ñehe ra chí ñu vehe ñuhu.

¹¹ Cuñí xain chuun, yoho yañi. Ma sacuvun cuhva ña vaha tari cha sacuví ra, soco sacuvun cha vaha. Vatyí ra sacuví cha vaha, ra cuenda Nyoo cuví ra, soco ra sacuví cha ña vaha, ña ñohó nuu ra chí Nyoo.

Nu catyí ra Juan vatyí vaha xaan cuhva chinó ñi ra Demetrio

¹² Tandihí ñu ta vaha cahán ñu siqui ra Demetrio. Ta vaha xaan quichahá ra tuhun Nyoo, ta suri ican cuan sañahá chí tyi ra vaha cuví ra. Ta sñin ri nyuhu tucu cuví ndi cha ndaa cha cuenda ra, ta nyoho chitó ndo vatyí tuhun ndicha cahán ndi.

Nu ndihí cahan ra Juan

¹³ Cuaha xaan tuhun tyaí cuhva sacote chuun, soco ña cuñi sacote chuun chihin tutu.

¹⁴ Soco nyatí cuhin nu nyaún cha numi ri, tyicuan ta ndatuhun vaha ca maa yo.

¹⁵ Na coo cha taxi ri añimon. Ra tahan yo cha iyó ityi tyehe saquichí xaan ra nocumi chuun. Ta sahun tumañi ñi cuhvon nocumi chí noo noo ra tahan yo cha iyó ityi chiña.

Carta Cha Sacuhun Ra Apóstol Judas Chi Ñáyivi Yihí Cuenda Nyoo

Nu tyaq ra Judas noo tutu chi ñu nacana Nyoo chi

¹ Yuhu ra Judas cuví noo ra sacuvi tyiño nuu ra Jesucristo. Ta yañi ra Jacobo cuví chii. Tyaí noo carta ihya chi ndo cha cuví ndo ñáyivi cha nacana Nyoo Sutu yo. Ta naquehén vaha ra chi ndo vatyí cuví ndo ñáyivi cuenda ra. Ta vityin cumí vaha ra chi ndo cha cuenda cha ñn ri cuví ndo chihin ra Jesucristo.

² Nyoo na nyehe ndahvi ra chi ndo. Ta na cutuñi ca iñi ndo yoso caa cha cuñi ra chi yo. Ta na coo cuaha ca cha taxi ri cuñi añima ndo, saha ra.

*Nu cahan ra Judas siqui ñáyivi cha sañahá cha ña ndicha
(2 Pedro 2.1-17)*

³ Cha naha xaan yihí iñi tyai noo carta chi nyoho yañi, vatyí cuñi cahin chiin siqui yoso caa sacacu Nyoo añima yo. Soco vityin cuñi chi cha tyaí tutu ihya chi ndo vatyí saniñi chi ndo cunñi iñi ndo chihin tandihí fuerza ndo ta cahun ndo ityi nuu ca chihin cha chinó iñi ndo tuhun vaha cha chahá Nyoo chi yo. Vatyí noo ri chaha chahá ra ta ñn caña ri chahá ra tandihí cha tahán chi chi yo vatyí chinó iñi yo cha cuví yo ñu yihí cuenda ra.

⁴ Vatyí yihí ra quihví xehe ra nu nyicu ndo. Ta cuñi ra sandavi ñaha ra chi ndo. Catyí ra vatyí cha yaha saha Nyoo tichahnu iñi chi yo ta yucuan chaha cuvi sacuvi yo yoso cuhva quichi cuvi iñi coño ñuhu yo. Soco ra canyacuví tyicuan caa, cuví ra noo ra cucunaa. Vatyí tyicuan caa catyí Nyoo nya tyembu chahnu, vatyí canyacuví ra cha quiñi caa cha ña tahán chi sacuvi ra. Vatyí ña caquichahá ra chi Nyoo ta ña chinó

iñi ra cha Nyoo cuví noo ra cahnu ca, ra nyacá ñaha chi yo. Ta ni ri ra Jesucristo Sutu Mañi yo, ña cahnu xaan cuví ra, cacatyí ra.

⁵ Vasi cha chitó ndo cha sacuvi Nyoo ta cha naha, soco cuñi sanicohín iñi ndo vatyí Sutu yo Nyoo tava ra chi sutu chahnu yo ñu Israel ñuu Egipto, sacacu ra chi ñu ndaha ñáyivi ñuu Egipto cuan. Soco yaha cuan sanaa ra tandihí maa ñu cha ña chinó iñi chi ra.

⁶ Ta tyicuan caa tucu ángel. Ii ra. Ñahri cuatyí ra. Soco suhva ra caquita ra nu cuatyaq Nyoo chi ra cha cuenda cha ña quichahá ra chi ra. Yucuan chaha Nyoo cumí ra chi ángel cuan, nuhñi ra chihin cadena nu ñaa iñi. Nyatú ra cha sacutuñi Nyoo chi ra na chaa chi quivi cahnu.

⁷ Tyicuan caa tucu ñáyivi ñuu Sodoma ta ñuu Gomorra, ta ñu ñuu cuatyaq cha chiyo nicachico ñuu cuan. Sanaa Nyoo chi ñu cha cuenda cha quiñi caa cha chinyacuví ñu. Ca chiyó ri maa ra chihin ñusihi. Ta ñusihi ca chiyó ri maa ñu chihin noo ra ta chihin inga ra. Ta cuaha ca cha quiñi caa chinyacuví ñu vatyí rayi ca chiyó ra chihin tahan yii ra ñandihí. Soco cha cuenda cuan, nyehe ñu tindoho nu cayu ñu, quivi chahmi Nyoo ñuu ñu. Ta yucuan sañahá chi chi yo vatyí ñu sacuví cha quiñi caa, cucayu ñu chihin ñuhú cha ma ndahva ca maa.

⁸ Ta tyicuan caa tucu ra cacuñi sativi chi ndo. Vasi cha chitó vaha ra cha sacuvi Nyoo ta ityi chata ca, soco maa ra chicá iñi ra vatyí tyaqui xaan cuacoo ra nu cuahan ca chi chihin cha nyacuví ra tyicuan caa. Soco ndahvi ra vatyí tari quivi cha tahán ra noo ñumahna tyaqui cuví cuan. Sativi ra coño ñuhu ra ta ña cuñi ra cha cunyaca ñaha Sutu Mañi yo chi ra. Ta cahan ña vaha ra siqui ra nahnu ca cha nuu maa ra, cuví ri siqui ángel, cuví ri siqui tatyí ña vaha, cuví ri siqui Nyoo.

⁹ Soco ángel Miguel cha cuví ra noo ra cahnu nuu Nyoo, ta ña caña iñi ra sacuvi ra tyicuan caa. Vatyí quivi

cañi tahan ra chihin ra ña vaha cha cuenda coño ñuhu ra Moisés, ña caña iñi ra cahan ña vaha ra siqui ra ña vaha. Noo ri cha catyi ra chi ra: “Maa Sutu Mañi yo na tachi tuñi ra chuun cuenda cha ña vaha cha nyacuvún”, catyi ángel Miguel cuan chi ra.

¹⁰ Soco ra cha sayangá chi ndo cuan, cahán cuehe ra vaty ña chitó ra. Ta sacuvi ra tari sacuvi quití. Vaty quití ña cutuñi iñi ti. Nyacuví ri maa ti cha cuñi coño ñuhu ti. Ta tyicuan caa tucu ra cuan. Chihin cha quiñi caa nyacuví ra, sativí ra chi ra.

¹¹ ¡Ndahvi ra ndahvi cuan! Vaty quehen ra cha caa ra Caín. Ta cha cuenda cha cuñi ra saha ganaa ra xuhun, quitá caxiin ra tari quitá caxiin ra Balaam. Ta cucunaa ra tari cuanaa ra Coré, vaty chihí ra cuan cha cuenda cha nacahnú ra nu cahán ra cuví nuu chi ra.

¹² Ra cha sayangá chi ndo chahá ra ticahan nuu chi ndo nu ndu iñi ri ndo. Vaty chachí ra ta chihí ra, chihin cha si cuñi ra. Ta ña cahán nuu ra cha ña sahá ra ñáyivi chi Nyoo. Ta noo ri maa ra sacuvahá ra chi ra. Cuví ra tari noo vico cha tyandahá tatyí chi, ta cuñi maa yo tyi cua coon savi, ta ña coón ra. Cuví ra tari noo yutun cha ña chaha chiti. Vaty noo yutun cha ña chahá chiti cuví tun tari noo yutun chihí vasi nyitó tun. Ta siin maa cha cucuvi vaha tun vaty cucahnya ñáyivi chi tun. Tari cha uvi chaha chihí tun cuví cuan. Ta tyicuan caa maa ra, tari cha uvi chaha chihí ra vaty chitó ra tuhun vaha ta ña cuñi ra sacuvi.

¹³ Tari ndutya yuhu tyañuhu tatu cha nduxaan chi, iyo xaan nicuinanyaa chi. Soco iñi yaha ri tyicuan ta ndoo maa ri maa tiñi ta mihin nu niyiti cuan. Tyicuan caa maa ra, sandoó ra cha quiñi caa aña ñáyivi. Ta cuví ra tari tiñoo andivi cha cuanaa. Soco cha nyaá maa cha cundoo ra nu ñaa iñi cahnu tyicuan ri maa.

¹⁴ Tuhun maa ra cuan cahan ra Enoc ta cha naha. Ra Enoc tata cu ucha ra Adán cuví ra. Ta cahan ra

tuhun cha chaha maa Nyoo chi ra, ta catyi ra: “Nyehi chi Sutu Mañi yo cha vachí ra chihin cuaha mil ángel cuenda ra

¹⁵ vaty nyehe ra cha sacuvi tandihí ñáyivi. Ta tachi tuñi ra chi tandihí ñu quiñi iyó cha cuenda tandihí cha ña vaha cha chinyacuví ñu, ta cha cuenda tuhun quiñi caa cha cacahán ñu siqui ra”, catyi ra Enoc ta cha naha.

¹⁶ Ra cha sayangá chi ndo, ña ndoó ra vaha chihin cha chahá Nyoo chi ra. Cahán ra chi Nyoo ta chi ñáyivi ta iyó ra tari cuhva quichi cuví iñi coño ñuhu ra. Cahán ra chihin cha cahnu sahá ra chi ra. Tatu cahan vaha ra chihin noo ñáyivi soco cha cuenda cha cuñi ra cuvaha ra nuu ñu.

Nu chahá ra Judas tuhun chi ñu yihí cuenda Nyoo

¹⁷ Soco nyoho yañi, ma quichaha ndo chi ra cuan. Soco nicohon iñi ndo tuhun cha cahan ra apóstol cuenda Sutu Mañi yo Jesucristo.

¹⁸ Cacatyí ra chi ndo vaty nu cuasandihí ca chi quivi ta cuacoo ra cucuacu nyaa tuhun Nyoo. Ta coo ra yoso cuhva quichi cuvi iñi maa ra chihin cha quiñi caa ra.

¹⁹ Ta ican ra ihya cacuví ra cuñi sacusiin chi yo. Vaty quichahá ra cuhva cuñi coño ñuhu ra ta ñahri Tatyí Ii Nyoo nyaá chihin ra.

²⁰ Soco nyoho yañi, cuní ca iñi ndo chihin cha chinó iñi ndo chi ra Cristo. Ta cacán tahvi ndo chi ra chihin tunyee iñi Tatyí Ii maa ra.

²¹ Ta tyicuan ri ñihi cuñyaña ndo chi Nyoo, ta coto ndo vaty cuñi xaan ra chi ndo. Ta cuatu tuhva ndo quivi chaa yo nu coo yo ñáyivi chaa cha ma naa ca maa. Vaty ican cuví cha cuacuhva Sutu Mañi yo Jesucristo chi yo cha cuenda cha ndahvi cuñi ra nyehé ra chi yo.

²² Ta ndahvi cuñi nyehe ndo chi ñu cha ña ñi vaha iñi.

²³ Ta inga ñu, tyinyee ndo chi ñu tacuhva cacu ñu. Tari quivi cha tava ndo chi ñu nu cayú ñuhu. Ta chi inga ñu cundahvi cuñi ndo nyehe ndo chi

ñu, soco saha ndo cuenda chi ndo chihin cha quiñi caa cha sacuví ñu, coto sacuvi ndo tari sacuví ñu. Nyacua nya sahma ñihnó ñu ta ña vaha cha cuenda cha sacuví ñu cha quiñi caa.

Nundihi cahñu ra Judas ta sacahnu ra chi Nyoo

²⁴⁻²⁵ Noo ri Nyoo iyó, ta chiñi tuñi xaan ra. Ta ican ra cuví ra cha sacacú chi yo. Ta iyó xaan tunyee iñi chi ra cha sahá cuenda ra chi yo ta sanduví ra chi yo cha ñahri cuatyí yo coo quiví cunyaca ra chi yo nu nyaá ra chihin cha cahnu cuví ra. Ta sii xaan cucuvi chi yo.

Na coto yo ñana cha cahnu xaan ca cuví ra. Chi maa ra na sacahnu yo vatyí cahnu xaan ca maa ra. Ta iyó xaan ca tunyee iñi chi ra. Noo tuhun ri maa ra nyacá ñaha tandihi. Nyacá ñaha ra ta ityi chata ca, vityin. Ta tyicuan ri maa cunyaca ñaha ra. Ta na cuví chi tyicuan caa.

Cha Sañaha Ra Jesucristo Chi Ra Apóstol Juan

Cha nyehe ra Juan

¹ Ican ihya cuví noo cha catyí Nyoo chi ra Jesucristo vatyí na sacoto ra chi ra casacuví tyiño nuu ra. Sañaha ra ñáá ndíhi cha cucuvi cha numi ri. Noo ángel tachí ra Jesucristo vatyí sañaha ra chi yuhu ra Juan.

² Ta cahín cha ndaa ta cha ndicha cuenda tandíhi cha nyehí. Ta cuví cha ndaa cuenda tuhun Nyoo ta cuenda tandíhi cha sacoto ra Jesucristo.

³ Sii xaan cuñí ñu sacuaha tuhun cha nyaá nu tutu tuhun Nyoo ihya. Ta sii xaan cuñí ñu chiñí tuhun cha cahán chi ta quichahá ñu, vatyí tandíhi tuhun cha nyaá nuu tutu Nyoo, cha nyaña yatyin quívi cha cunyehe yo.

Nu sacuhun ra Juan tutu chi ndi ucha tahan vehe ñuhu

⁴ Yuhu ra Juan sacuhín tutu ihya chi ndi ucha vehe ñuhu ñuu cha nyicú ityi Asia. Nyoo ta ndi ucha tahan Tatyí li ra cha nyicú nuu ra nu nyaá ra nyacá ñaha ra nu tyayu chichi gloria, na nasoco ra chi ndo. Ta na coo cha taxi ri añima ndo sahá ra. Nyoo ican ra cuví ra iyó vityin, ta iyó maa ra quívi quichahá tandíhi, ta ican ra cuquichi.

⁵ Ta naquehen tucu ndo cha vaha cuan sahá ra Jesucristo ñandíhi. Vatyí ican ra cuví ra cha ndaa vaha ta ra ndicha. Ta cuví tucu ra noo ra cha nandoto cha xihna ri ta tyicuan ri maa cucoo ra. Ta iyó ityi chi ra ta nyacá ñaha ra chi ra cacuví rey cha iyó síqui ñuhu ñayívi ihya. Ican ra cuví ra cha cuñí xaan chi yo. Ta sandachi ra cuatyí yo chihin ñíhi ra.

⁶ Ta sacuví ra rey chi yo. Ta sacuví ra tata sutu chi yo tacuhva vatyí sacuvi yo tyiño nuu Nyoo Suturá. ¡Na sacahnu yo chi ra. Ta na cunyaca ñaha ra tyicuan ri maa! Ta tyicuan caa na cuví.

⁷ ¡Nyehe ndo! ¡Cha vachi ra Cristo nu vico andiví! Tandíhi ñáyivi cunyehe ñu chi ra. Nyacua nya ñu cha sañicuehe chi ra ta cunyehe ñu chi ra. Ta tandíhi ñu cucuacu chaa ñu chihin cha yuhví ñu na nanyehe ñu chi ra inga chaha vatyí suri maa ra cuví. Cha ndicha, tyicuan caa cucuvi.

⁸ Catyí Nyoo:

—Yuhu cuví ra xihna cuiri, ta yuhu cuví ra cundoo nu ndíhi tuhun —catyí Suturá yo Nyoo, ra iyó tandíhi tunyee íhi chi. Ican ra cuví ra iyó vityin. Ta iyó maa ra nu quichahá tandíhi, ta ican ra cuquichi.

Noo cuhva tyaqui cha sañaha Nyoo chi ra Juan cuenda ra Cristo

⁹ Yuhu ra Juan cuví yañi nyoho. Ta ñin ri nyehé yo tindoho. Ta ñin ri nyacá ñaha Nyoo chi yo. Ta ñin ri cunyee xaan yo ñáá ndíhi cha cuví chi yo vatyí tyinyeé ra Jesucristo chi yo. Ñoho yuhu vehe caa noo ñuhú cha nañí Patmos cha nyaá mahñu tyañuhu. Ñohi vehe caa cha cuenda vatyí cahín tuhun Nyoo cha quichi sañaha ra Jesucristo.

¹⁰ Ta cuví chi noo quívi cha sacahnú yo chi Suturá mañí yo. Ta ñihi xaan chinyaa Tatyí li Nyoo chihin. Ta chiñi noo ndusu ñihi xaan ityi chate, tari noo ndusu cha ñihi xaan tari ndusu trompeta.

¹¹ Ta catyí chi chíi tyehe caa:

—Yuhu cuví ra xihna cuiri, ta yuhu cundoi nu ndíhi tuhun. Tyaá nuu noo libru tuhun cha nyehun, yoho Juan. Ta sacuhun chi ndi ucha vehe ñuhu cha nyicú ityi Asia. Sacuhun chi ñu nyicú vehe ñuhu ñuu Éfeso, chi ñu vehe ñuhu ñuu Esmirna, chi ñu vehe ñuhu ñuu Pérgamo, ta chí ñu vehe ñuhu ñuu Tiatira, ta chí ñu vehe ñuhu ñuu Sardis, ta chí ñu vehe ñuhu ñuu Filadelfia, ta chí ñu vehe ñuhu ñuu Laodicea —catyí ndusu cuan.

¹² Tyicuan ta nanyocave vatyí cuñí nyehí yóo chi ndusu cha cahán chihin cuan. Ta nanyehí ucha tahan cañileru xuhun cuan.

¹³ Ta mahñu ucha tahan cañileru cuan, nyehí chi noo ra cha caá tari

caá noo rayiñi ñuhu ñayivi ihya. Ñihnó ra noo sahma cañi nya nu chaha ra. Ta yihí ra noo sinchu xuhun cuaan, ta nya nu nyaá pechu ra chitahan sinchu cuan.

¹⁴ Ta cuichin ixi xiñi ra, tari ixi mbee cuichin, tari cha cuichin catyi. Ta tari cha cayú ñuhu chiti nuu ra.

¹⁵ Ta xiñó chaha ra tari xiñó noo caa cha nañi bronze cha tuhva nducuaha nu cayú ñuhu chichi noo horno. Ta ñihi xaan ndusu ra tari ndusu cha cuaha vavaha yuvi nahnu.

¹⁶ Ta yihí ndaha ra ucha tahan tiñoo andivi chiyo vaha ra. Ta tari caa noo mityi cha xaan ninduvi chiyo yuhu, (tyicuan caa tuhun cahán ra cha quitá yuhu ra). Ta tari caá cha ñihi xaan nyehé ñanyii cha xiñó vavaha, tyicuan caá nuu ra.

¹⁷ Cuhva cha nanyehi chi ra, nduve chaha ra tari maa cha chihí. Soco maa ra tyiso ra ndaha chiyo vaha ra siqui, ta catyi ra chii:

—Ma yuhvun. Yuhu cuví ra xihna cuiri, ta yuhu cundoí nu ndihi tuhun.

¹⁸ Iquen cuví ra cha nyitó. Ta vasi chihí soco vityin cuacoí tyicuan ri maa. Ta iyó ityi chii cha catyi ama tahan chi tuhun chihí chi noo noo ñáyivi, ta iyó ityi chii cha catyi tatu cuhun ñu anyaya.

¹⁹ Tyaa nu libru tandihí cha nyehún, cha iyó vityin, ta cha cucoo nu cuahan ca chi.

²⁰ Ican ihya cuví tuhun xehe cuenda ndi ucha tiñoo andivi cha nyehún yihí ndaha chiyo vahi, ta cha cuenda ndi ucha cañileru xuhun cuaan cuan: Ndi ucha tiñoo andivi cuan cuñi chi catyi: ra cha cahán tuhun ucha tahan vehe ñuhu cuan. Ta ndi ucha cañileru cuan cuñi chi catyi ndi ucha vehe ñuhu cuan.

2

Tuhun cha sacuhun ra chi ñu nyicú vehe ñuhu ñuu Éfeso

¹ Sacuhun tutu chi ra cahán tuhun chihin ñu nyicú vehe ñuhu cha nyaá ñuu Éfeso. Ta catyun chi ra tyehe caa: “Tyehe caa catyi ra cha yihí ndaha ucha tiñoo chihin ndaha chiyo vaha

ra. Ta chicá noo ra mahñu ndi ucha cañileru xuhun cuaan:

² Yuhu chité tandihí cha sacuví ndo. Chité vatyí ñihi xaan tyiño sacuví ndo. Ta cunyeé xaan iñi ndo. Ta chité vatyí ña cunyeé iñi ndo nyehé ndo chi ñu quiñi iyó. Ta chité vatyí tuhva ndo nducu nyehe ndo chi ra cha catyi vatyí tyiño Nyoo chica noo ra soco ña ndicha ra.

³ Cunyeé xaan iñi ndo. Ta nyehé xaan ndo tindoho ta cha sahá tyiño xaan ndo cha cuende chihin cha ña ndu uvi iñi ndo.

⁴ Soco iyó noo cha caá ndo nui. Vatyí ña cuñi vaha ca ndo chii tari quivi xihna ri.

⁵ Yucuan chaha nichohon iñi ndo nya maa maa cuví nu ña vaha sacuví ndo. Ta nasama ndo cuhva iyó ndo. Ta sacuví ndo tari cuhva chiyo ndo quivi natin cuenda ndo notuhun Nyoo. Tatu ma nasama ndo cuhva iyó ndo, numi ri cuhin nu nyaá ndo, ta tinyai cañileru ndo nu nyaá chi. Soco tatu ndu uvi iñi ndo cuatyí ndo, ma tinyai.

⁶ Soco iyó tucu cha vaha nyacuví ndo. Vatyí ña cuñi nyehe ndo cha quiñi caa cha sacuví ñu yihí cuenda ra Nicolás. Tyicuan tucu yuhu ña cuñi nyehí yucuan.

⁷ Ta nyoho cha cutuñi iñi ndo, tyasoho ndo ñáá cha catyi Tatyí Ii Nyoo chi nyoho ñu nyicú vehe ñuhu. Catyi ra tyehe caa: Tatu cuví chasaha ndo chi ra ña vaha, cuhve cha cachi ndo chiti yutun cha chahá cha conyito aña ndo. Ta yutun cuan nanyaá tun nya nu iyó Nyoo andivi, ta cuñihi ndo tandihí cha vaha cha iyó yucuan.”

Tuhun cha sacuhun ra Jesucristo chi ñáyivi nyicú vehe ñuhu ñuu Esmirna

⁸ Sacuhun tucu tutu chi ra cahán tuhun chihin ñu nyicú vehe ñuhu cha nyaá ñuu Esmirna, ta catyun chi ra tyehe caa: “Tyehe caa catyi ra cuví cha xihna cuiri, ra cundoí nu ndihi tuhun, ra cha chihí ta nandoto:

⁹ Yuhu chité tandihí cha sacuví ndo. Ta chité tindoho cha nyehé xaan ndo. Ta chité cha ndahvi ndo. Soco chihin

tuhun Nyoo, tyay#i ndo. Ta chité yoso caa ñu cha catyí vatyí ñu Israel cuví ñu, ta cahán ña vaha ñu siqui ndo. Ta ni ñima ñu Israel cuví ñu vatyí noo ityi ñu yihí cuenda ra ña vaha, ra nañí Satanás, cuví ñu.

¹⁰ Soco ma yuhvi ndo cha cunyehe ndo tindoho. Vatyí ra ña vaha cutyihí ra vehe caa chi suhva nyoho, vatyí cunducu nyehe ra chi ndo tatu cusaña ndo chi Nyoo. Ta uchi quiví cunyehe ndo tindoho. Soco cunyicon vaha ndo chi Nyoo nyacua nya quiví cúvi ndo. Ta yuhu cuhve ñayiví coo ndo chihin Nyoo.

¹¹ Ta nyoho cha cutuñí iñi ndo tyasoho ndo ñáá cha catyí Tatyí Ii Nyoo chi nyoho ñu nyicú vehe ñuhu. Catyí ra tyehe caa: tatu cuví chasaha ndo chi ra ña vaha, ña tahán chi chuhun ndo anyaya, nu cutachi tuñi Nyoo chi aña ña vaha.”

Tuhun cha sacuhun ra Jesucristo chi ñu nyicú vehe ñuhu ñuu Pérgamo

¹² Sacuhun tucu tutu chi ra cahán tuhin chihin ñu nyicú vehe ñuhu ñuu Pérgamo. Ta catyun chi ra tyehe caa: “Tyehe caa catyí ra cha nyisó mityi cha xaan ndinduvi chiyo yuhu:

¹³ Yuhu chité tandihí cha sacuví ndo. Ta chité vatyí iyó ndo nu nyacá ñaha cuihna, ra nañí Satanás. Soco tyicuan ri chinó iñi ndo chii. Ta vasi nu canyicú ndo chiña chahñi ñu chi ra Antipas, ra cha cuví noo cha ndoo cuende, vatyí chiña chicá noo ra cha nañí Satanás cuan. Soco ni ri maa chahñi ñu chi ra, nyoho ña sandihí maa ndo tuhun cha chinó iñi ndo chii.

¹⁴ Soco catuví suhva cha caá ndo nui: Vatyí nu nyicú ndo nya Pérgamo chiña, yihí ra cha ña cacuñí ra saña ra cuhva cha sacuví ra Balaam. Ta maa ra Balaam tyiyuhú ra chi ra Balac, na sacachi ra chi ñu Israel nyayu cha chiyo nu sacahnú ñu chi xitohyo. Tyiyuhú ra chi ra nacatyí ra chi ñu vatyí ñahri caa cha coo ñu chihin tahan ñu vasi ñima y#i ñu cuví, o vasi ñima ñasihí ra cuví.

¹⁵ Ta suri iyó suhva ñáyiví mahñu ndo cha ña cacuñí ñu saña ñu cuhva

sañahá ra cuenda ra Nicolás. Ta yuhu ña cuñí nyehi cuhva sañahá ra cuan.

¹⁶ Yucuan chaha numi ri nasama ndo cuhva iyó ndo. Vatyí tatu ma nasama ndo cuhva iyó ndo, cuquichi siqui ndo cha numi ri ta cucañi tahin chihin ñu cuan chihin cha tari mityi cha quitá yuhi.

¹⁷ Ta nyoho cha cutuñí iñi ndo, tyasoho ndo ñáá cha catyí Tatyí Ii Nyoo chi nyoho ñu nyicú vehe ñuhu: tatu cuví chasaha ndo chi ra ña vaha, cucuhve cha cachi ndo noo pan maná cha ñohó xehe. Ta cucuhve noo yuu cuichin chi ndo. Ta nu yuu cuan cucunyaa noo sivi chaa cha yori chitó. Ta noo tuhun ri ñu cuquehen cuenda cuan cucoto.”

Tuhun cha sacuhun ra Jesucristo chi ñu nyicú vehe ñuhu ñuu Tiatira

¹⁸ Sacuhun tucu tutu chi ra cahán tuhin chihin ñu nyicú vehe ñuhu cha nyaá Tiatira. Ta catyun chi ra tyehe caa: “Tyehe caa catyí Sehe Nyoo, ra cha caá chiti nuu tari noo cha cayú ñuhu. Ta tari caá noo caa finu cha nañí bronce cha xiño xaan, tyicuan caa chaha ra:

¹⁹ Yuhu chité tandihí cha sacuví ndo. Ta chité yoso cuhva cha cuñí ndo chi ñáyiví. Ta chité cuhva cha chinó xaan iñi ndo chii. Ta tyinyeé ndo chi tahan ndo. Ta cunyeé xaan iñi ndo. Ta chité vatyí cuaha ca cha vaha sacuví ndo vityin ta ñima ca ta nu quichaha.

²⁰ Soco iyó noo cha caá ndo: Vatyí chahá ndo ityi chi ñaha cha nañí Jezabel na sañaha ña chi ndo. Catyí ña vatyí cuenda Nyoo cahán ña. Soco chihin tuhun cha sañahá ña, sandaví ñaha ña chi ñu sacuví tyiño nui. Vatyí sañahá ña cha coo ñu chihin inga ray#i o ñusihí ta ñima y#i ñu o ñasihí ra cuví. Ta sañahá ña cha cachi ñu nyayu cha chiyo nu sacahnú ñu chi xitohyo.

²¹ Yuhu cha nyatu xain cha nasama ña cuhva iyó ña, soco ña cuñí ña nasama ña. Vatyí ta sandoo ca ña cha iyó ña chihin ray#i ta ñima y#i ña cuví.

²² Ta vityin cua quehen noo cuehe chi ña. Ta cua cuhvi ña. Ta ma cuví

nducuita ña. Ta ñu sacuví cha quiñi caa chihin ña, tatu ma ndu uvi iñi ñu, cucuhve noo tindoho nyehe ñu.

²³ Ta cucahñi chi sehe ña. Ta tyicuan caa, coto tandihí ñu nyicú vehe ñuhu, vatyí yuhu chité tandihí cha chicá xiñi ñu, ta tandihí cha caá ñima ñu. Ta chi tahan tahan nyoho cucuhve cha tahán chi chi ndo yoso cuhva cha sacuví ndo.

²⁴ Soco chi tandihí ca nyoho ñuu Tiatira, cha ña quehen ndo cuhva cha sañahá ña, ni ña sacuví ndo cha catyí maa ñu tuhun nahnu cuenda ra ña vaha, ña tyaí inga tuhun cha yíi síqui ndo.

²⁵ Soco ma saña ndo cuhva cha vaha nyacuví ndo nyacua nya quichi.

²⁶ Ta nyoho tatu cuví chasaha ndo chi ra ña vaha, ta sacuví ndo cuhva cuñí nyacua nya nu ndihí tuhun, cucuhve ityi chi ndo cha cunyaca ñaha ndo chi ñu ñuhu ñayiví.

²⁷ Tari chahá Suti ityi chii cha cunyaca ñahi, tyicuan caa cucunyaca ñaha ndo. Tari cha chihin noo yutun caa cutachi tuñi ndo chi ñu. Tari tahvi cuatyí minoo quisí ñuhú, tyicuan caa cusacuvi ndo chihin ñu.

²⁸ Ta cuhve tiñoó cahnu andiví cun-ya chihin ndo. Ta ican yuhu cuví cuan.

²⁹ Ta nyoho cha cutuñí iñi ndo tyasoho ndo ñáá cha catyí Tatyí Ii Nyoo chi nyoho, ñu nyicú vehe ñuhu.”

3

Tuhun cha sacuhun ra Jesucristo chi ñu nyicú vehe ñuhu ñuu Sardis

¹ 'Sacuhun tucu tutu chi ra cahán tuhun chihin ñu nyicú vehe ñuhu ñuu Sardis. Ta catyun chi ra tyehe caa: “Tyehe caa catyí ra cha yihí ndaha ndi ucha Tatyí Ii Nyoo ta ndi ucha tiñoó andiví: Yuhu chité tandihí cha sacuví ndo. Ta vasi catyí ñáyiví tyi nyitó ndo soco cha cuenda chi yuhu, chihí ndo.

² Saha cumi vaha ndo chiin ri ca cha vaha cha iyó chi ndo. Vatyí cha cuñí ndihí tuhun nu nyicú ndo. Vatyí nyehí vatyí cha sacuví ndo, ña vaha maa nuu Nyoo.

³ Nícohon iñi ndo tuhun vaha cha cutuhva ndo. Cunyicon ndo cuhva cuan, ta ñasama ndo cuhva iyó ndo. Vatyí tatu ma naquehen vaha ndo cha vaha, sana iñi ndo ta cuquichi síqui ndo, tari tuhva ra suhu quichi.

⁴ Soco iyó suhva nyoho ñu Sardis chiña cha ña sacuví ndo cha quiñi caá. Ña sacanyahyu ndo sahma ndo cuví cuan. Ta maa ndo cucuihno ndo sahma cuichin chihin. Ta cucaca noo ndo chihin, vatyí tyicuan caa tahán chi chi ndo.

⁵ Ta nyoho tatu cuví chasaha ndo chi ra ña vaha, cucuihno ndo sahma cuichin chihin. Ta ma sanai sívi ndo nu libru ñu cuaconyito chihin Nyoo. Ta cunacoto nui chi ndo, chihin nuu Suti, ta chihin nuu ángel.

⁶ Ta nyoho cha cutuñí iñi ndo, tyasoho ndo ñáá cha catyí Tatyí Ii Nyoo chi nyoho ñu nyicú vehe ñuhu.”

Tuhun cha sacuhun ra Jesucristo chi ñu nyicú vehe ñuhu Filadelfia

⁷ 'Sacuhun tucu tutu chi ra cahán tuhun chihin ñu nyicú vehe ñuhu ñuu Filadelfia. Ta catyun chi ra tyehe caa: “Tyehe caa catyí ra ii, ra ñahri cuatyí, ra cha ndicha vaha, ra cha ndaha ndaha ticu rey David, ra cha nuñá yuvehe ta ni noo ñu ta ma cuví nacasi ñu. Ta tatu nacasi ra, ni noo ñu ta ma cuví nuña ñu. Tyehe caa catyí ra:

⁸ Yuhu chité tandihí cha sacuví ndo. Ta nuu ndo nuñe noo yuvehe. Ta yori cuví nacasi, (vatyi chahí cha cahan ndo tuhun Nyoo chihin ñáyiví, ta yori cuví casi). Ta vasi chiin ri fuerza ndo, soco quichahá ndo tuhun cahín, ta ña catyí ndo vatyí ña ñohó nuu ndo chii.

⁹ Ta ñu cuenda ra ña vaha, ñu cuendu, ñu catyí vatyí ñu Israel cuví ñu, ta ñima, cusacuiñi chiti chi ñu nuu ndo, tacuhva coto ñu tyi yuhu cuñí chi ndo.

¹⁰ Ta sacuví ndo cha catyí, vatyí cunyeé iñi ndo. Ta yucuan cuenda cusaha cuende chi ndo chihin tindoho cahnu cha cusaquichi síqui tandihí ñáyiví, vatyí cunducu cote chihin tandihí ñu iyó síqui ñuhu ñayiví tatu cuñí ñu chii.

¹¹ Numi ri cuquichi. Saha vaha ndo cuenda cuhva iyó ndo, coto yóo cha tinyaa premio cha cuñihi ndo.

¹² Nyoho tatu cuví chasaha ndo chi ra ña vaha, cahnu ca tyiño cucuvi ndo nuu Nyoí. Ta ma canyaha ca ndo nu nyaá Nyoo. Ta cutyai sívi Nyoí chi ndo, ta sívi ñuu Nyoí, ñuu Jerusalén chaa cha cusaquichi Nyoí nya andívi, ta suri cutyaa tiquí sívi chai chi ndo ñandíhi.

¹³ Ta nyoho cha cutuñí iñi ndo, tyasoho ndo ñáá cha catyí Tatyí Ii Nyoo chi nyoho ñu nyicú vehe ñuhu.”

Tuhun cha sacuhun ra Jesucristo chi ñu nyicú vehe ñuhu ñuu Laodicea

¹⁴ Sacuhun tucu tutu chi ra cahán tuhin chihin ñu nyicú vehe ñuhu ñuu Laodicea. Ta catyun chi ra tyehe caa: “Tyehe caa catyí ra cha ndicha vaha, ra cuví cha ndaa vaha cha cahán cha ndicha, ra cha savaha tandíhi cha iyó chihin Nyoo.

¹⁵ Yuhu chité tandíhi cha sacuvi ndo. Ta chité vatyi ni ña cuñí vaha ndo chii. Ta ni ña cuñí tucu ndo saña ndíhi ndo chii. Vaha tyehe ta saña ndíhi ndo chii, o sañihi ndo quichaha ndo tuhun cahin, vaha.

¹⁶ Soco vatyi chiin ri cuñí ndo chii, ta ni ña saña ndíhi ndo chii, ta ni ña cuñí ndo sacuvi ndo tuhun cahin, yucuan chaha cusanaa ndíhi iñi tuhun ndo.

¹⁷ Vatyi nyoho catyí ndo tyehe caa: Yuhu tyayii, vaha iyé, ta ñahri ca maa cha chiñuhú chii, catyí ndo. Ta ña chitó ndo vatyi cuví ndo noo ra ña síi cuñí, noo ra ñahri iyó chi, noo ra ndahvi, noo ra cuaa, noo ra vityiyaa cuví ndo.

¹⁸ Yucuan chaha chahí tuhun chi ndo vatyi chi mai sata ndo xuhun cuaan vaha cha yaha nu ñuhu ta ña cayú, tacuhva na cutyayii ndo. Ta chi mai sata ndo sahma cuichin vatyi cuihno ndo, tacuhva cha ma cuahan nuu ndo vatyi vityiyaa ndo. Ta tyíhi ndo colirio chíti nuu ndo tacuhva na nanyehe ndo.

¹⁹ Yuhu chahí tuhun chi ñu cha cuñí xain chi. Ta tachí tuñi chi ñu ñandíhi. Yucuan chaha catyí chi ndo, ñasama

ndo cuhva iyó ndo ta sacuvi ndo cha vaha.

²⁰ Yuhu nanyaí yuvehe aña ñáyivi ta sacachén. Tatu nya noo ñu chiñí ñu ndusi, ta nuña ñu yuvehe, yuhu quihvi ta cuxiñi chihin ñu. Ta maa ñu cuxiñi ñu chihin mai.

²¹ Cucuhve cha cunyaa ndo chihin nu nyacá ñahi tatu cuví chasaha ndo chi ra ña vaha. Tari yuhu cuví chasahi chi ra, ta vityin nyaí chihin Suti nu nyacá ñaha ra.

²² Ta nyoho cha cuví cutuñi iñi ndo, tyasoho ndo cha catyí Tatyí Ii Nyoo chi nyoho ñu nyicú vehe ñuhu” —catyí ra Jesucristo.

4

Noo cuhva cha sacahnú ñu chi Nyoo nya gloria

¹ Cha yaha tuhun cuan, ta nyehi noo yuvehe tacoho nya andívi. Ta noo ndusu cha tari caa ndusu trompeta chiñi cha cahán chihin cha xihna ri ta catyí chi chii:

—Ndaa ihya ta cusañahi chuun cha cuacuvi nu cuahan ca chi —catyí ndusu cuan chii.

² Ta caa cuhva ri cuan ta tuví iñi vatyi ñihi vavaha nyaá Tatyí Ii Nyoo chihin. Ta nanyehi noo tyayu nanyaá nya andívi. Ta nyaá noo ra nuu tyayu cuan.

³ Ta ra nyaá cuan, xiño nuu ra tari xiño noo yuu vaha cha nañi jaspe ta cornalina. Ta nicachico yuhu tyayu cuan nyaá noo coo yahnyí, ta xiño ti tari yuu cha nañi esmeralda.

⁴ Ta nicachico tyayu cuan nyehi oco cumi ca tahan tyayu. Ta nyicú oco cumi tahan ra cha vaha chahnu. Cañihnó ra sahma cuichin. Ta yíhi corona xuhun cuaan xiñi ra.

⁵ Ta nu nanyaá tyayu cha nyaá mahñu cuan, yucuan quitá minoo tacha. Ta vaa ri ca maa cuví. Ta ñihi xaan cahán savi. Ityi nuu tyayu cuan cayú ucha tahan ñuhu. Ta ucha tahan Tatyí Ii Nyoo cuví cuan.

⁶ Ta ityi nuu tyayu cuan iyó tucu noo cha tari caa tyañuhu, xiño xaan tari ino.

Nicachico yuhu tyayu cuan ta mahñu tyayu cuan, tayucú cumi tahan cha nyitó cha tari caa quití ta tari caa ñáyiví caa. Ta cuaha xaan chítí nuu cuan nyicú, tari ityi nuu ta tari ityi chata.

⁷ Cha xihna ri cha nyitó ihya, tari caá noo ndicaha caá. Ta cha cu uvi tari caá noo sindiquí caá. Ta cha cu uñi, tari caá nuu rayí caá nuu. Ta cha cucumi tari caá noo tasu cha cuahan ndava, tyicuan caá.

⁸ Ta ndí cumi tahan cha nyitó ihya, tahan tahan chi ta nyaá iñu tahan ndichin chi. Ta nicahnu maa chi nyaá chítí nuu chi, tari ityi chata chi ta tari ityi chichi ndichin chi. Ta ndiyaca ta ñiyaca ta ña chicuita chi catyí chi tyehe caa:

Ra ii xaan cuvún, ra ndí xaan cuvún,
ra ñahri cuatyí cuvún,

Sutu Mañi yuhu, Nyoo, iyó tandihí
tunyee iñi chuun.

Ra cha iyó nu quichaha tandihí
cuvún, Ta ra iyó vityin. Ta ra
cha nyaá cha cuquichi.

⁹ Ta cachahá ndí cumi tahan cha nyitó cuan gloria chi Nyoo. Ta sacahnú chi chi ra, ta canacuhvá chi tyahví nyoo chi ra nyaá nu tyayu cahnu cuan, ra cha iyó tandihí tyembu. Ta tahan ri chaha cha casacuví chi tyicuan caa,

¹⁰ ta ndí oco cumi ra cha vaha chahnu cuan chicuiñi chítí ra ta casacahnú ra chi ra iyó tandihí tyembu. Ta catyihí ra corona ra nu tyayu cahnu cuan. Ta cacatyí ra tyehe caa:

¹¹ Sutú Mañi nyuhu, Nyoo cuvún
chi ndí.

Chi yoho tahán chi cha cuhva ndí glo-
ria, ta sacahnú ndí chuun.

Ta tahán chi cha cunyaca ñahun.

Vatyí maun savaha tandihí cha iyó.

Ta cha cuenda cha iyó iñi maun ta
chicoo tandihí, cacatyí ra.

5

*Nu nyehe ra Juan noo libru ta noo
Mbee Luhlu cha cuví ra Jesucristo*

¹ Tyicuan ta chiyo vaha ra cha nyaá nu tyayu cahnu cuan, nyehí yihí ndaha ra noo libru tari caá noo tutu cha natuví yo. Ta nyaá letra ityi nuu ta ityi chata. Ta nyasí chi chihin ucha tahan sellu.

² Ta nyehí noo ángel cha nyee xaan. Ta chaa xaan cahán ra ta ndacá tuhun ra:

—¿Yóo ra tahán chi nuña libru ihya ta sacanyaha ra sellu ihya? —catyí ra.

³ Soco ni ityi andiví ta ni ityi nu ñuhu ñayiví, ta ni ityi chichi ñuhú, ta yori maa cha cuví nuña libru cuan. Ta ni cha nyehe ñu nuu, ta ma cuví.

⁴ Ta yuhu chacu chaa xain, vatyí yori maa quitá cha cuví nuña libru cuan. Yori maa cuví sacuaha, ta yori cuví nyehe nuu chi.

⁵ Tyicuan ta noo ra cha vaha chahnu cuan catyí ra chii:

—Ma cuacu con. Vatyí ra cuví ndicaha o cuñí chi catyí, ra nyacá ñaha, ra vachi tata ra Judá, ra vachi tata rey David, ican ra cuví chasaha ra tacuhva cuví nuña ra nu libru cuan ta cahnya ra ndí ucha sellu cuan —catyí ra.

⁶ Tyicuan ta mahñu tyayu cuan ta mahñu ndí cumi cha nyitó cuan, ta mahñu ra cha vaha chahnu cuan, nyehí chi noo Mbee Luhlu. Nanyaá tí ta caa tí cha chahñi ñáyiví chi tí. Ucha tahan ndiquí tí ta ucha tahan chítí nuu tí nyaá. Ta chítí nuu cuan ican cuví ndí ucha tahan Tatyí Ii Nyoo cha tachí ra nicacahnu síqui ñuhu ñayiví.

⁷ Ta ra cuví Mbee Luhlu cuan chahan ra ta quehen ra libru cuan cha yihí ndaha chiyo vaha ra nyaá nu tyayu cuan.

⁸ Cuhva cha quehen ra libru cuan, ndí cumi cha nyitó cuan ta ndí oco cumi ra cha vaha chahnu cuan cachicuiñi chítí ra nuu ra cuví Mbee Luhlu cuan. Ta tahan tahan ra cha vaha chahnu cuan nyisó ra arpa, noo cha tari caá guitarra caá. Ta canyisó tucu ra copa xuhun cuaan tyitu yihí cutu. Ta cutu cuan cuví chí tandihí cha chicán tahvi ñu cuenda Nyoo.

⁹ Ta cachitá ra noo yaa chaa, ta catyí ra tyehe caa:

Yoho cuví ra tahán chi cha quehun libru ihya, ta cahnyon ndi ucha sellu cha nyaá nu chi.

Vatyí chihun saha ñáyivi. Ta chihin ñiñun saton chi ndi vatyí coo vaha ndi chihin Nyoo.

Ta cuví ndi ñáyivi ñuu nyihi ta ñuu nahnu nicacahnu ñuhu ñáyivi, ñáyivi siin siin sahan cahán, ñáyivi siin siin tata.

¹⁰ Chahun ityi chi ndi vatyí cuví ndi rey ta cuví ndi sutu cha cuenda Sutu yo Nyoo.

Ta cucunyaca ñaha ndi chi ñáyivi iyó siqui ñuhu ñáyivi, cacatyí ra, chítá ra.

¹¹ Yaha cuan ta nanyehi, ta chiñi ndusu cha cahán cuaha xaan ángel, tayucú ra nicachico yuhu tyayu cahnu cuan, ta nu nyicú cumi tahan cha nyitó cuan, ta nu nyicú ra cha vaha chahnu cuan. Ta cuenda millón ángel nyicú cuan, nyehi.

¹² Ta chihin cha ñihi cahan ángel cuan, ta cacatyí ra:

Ra cuví Mbee Luhlu cha chahñi ñáyivi,

tahán chi cha cunyaca ñaha ra, ta naquehen cuenda ra cha tyayí.

Tahán chi naquehen cuenda ra cha chiñi tuñi.

Tahán chi cha naquehen cuenda ra tandihi tunyee ñi.

Tahán tucu chi cha cuhva yo gloria chi ra, ta sacahnu yo chi ra.

Ta cahnu xaan ca ra cuví maa ra, cacatyí ángel cuan.

¹³ Ta chiñi tiqui cha cahán tandihi cha savaha Nyoo, tandihi cha iyó andivi, ta siqui ñuhu ñáyivi, tandihi cha iyó chichi ñuhú, ta chichi tyañuhu, tandihi cha savaha Nyoo catyí chi tyehe caa:

Cahnu xaan ca cuví ra cha nyaá nu tyayu.

Cahnu xaan ca cuví ra cuví Mbee Luhlu.

Ta nacuhva yo gloria chi ra.

Ta na cunyaca ñaha ra tandihi maa tyembu, catyí tandihi cha savaha Nyoo.

¹⁴ Ta ndi cumi cha nyitó cuan catyí chi:

—¡Tyicuan caa na cuvi! —catyí chi.

Ta ndi oco cumi ra cha vaha chahnu cuan, cachicuiñi chiti ra ta casacahnu ra chi ra iyó tandihi tyembu.

6

Nu chahnya ra Jesucristo ndi ucha tahan sellu

¹ Tyicuan ta nyehi nu chahnya ra cuví Mbee Luhlu cuan sellu cha xihna ri chichi cha ndi ucha tahan cuan. Ta chiñi cahán noo cha nyitó cha cumi tahan cuan, chihin noo ndusu cha tari caá cha cahán savi ta catyí chi:

—¡Ñaha, ta nyehun! —catyí chi chii.

² Tyicuan ta nanyehi ta nyehi noo caballu cuichin, ta ra yosó chi ti cuan ndaha ra noo arco. Ta ñihi ra noo corona quihí xiñi ra vatyí saha ganaa ra, ta cuasaha ganaa ca ra.

³ Ta cuhva cha chahnya ra cuví Mbee Luhlu cuan sellu cu uvi, chiñi cha catyí cha nyitó cu uvi cuan tyehe caa:

—¡Ñaha ta nyehun! —catyí cuan chii.

⁴ Ta quita inga caballu, tyacu cuaha. Ta ra cha yosó chi ti chicoo ityi chi ra vatyí tinyaa ra cha taxi ri iyó ñáyivi, tacuhva cahñi ñu chi tahan ñu. Ta ñihi ra noo mityi cahnu quindaha ra.

⁵ Ta cuhva cha chahnya ra cuví Mbee Luhlu cuan sellu cu uñi, ta chiñi cha catyí cha nyitó cu uñi cuan tyehe caa:

—¡Ñaha ta nyehun! —catyí cuan chii.

Ta nanyehi, ta nyehi noo caballu toon. Ta ra yosó chi ti, yihí ndaha ra noo ticatya.

⁶ Ta chiñi noo ndusu mahñu cumi tahan cha nyitó cuan, ta catyí cuan:

—Tari cuhva xuhun yahvi ñu cha noo quivi, yucuan cuhva yahvi noo litru nuñi. Tyicuan caa tucu uñi litru cebada. Ta ma sativun acetye ta vinu —catyí ndusu cuan.

7 Ta cuhva cha chahnya ra cuví Mbee Luhlu cuan sellu cu cumi, chiñi cha cahán cha nyitó cucumi cuan, ta catyí chi, tyehe caa:

—¡Ñaha ta nyehun! —catyí chi.

8 Ta nanyehi ta nyehi noo caballu cuan. Ta ra yosó chi ti nañi ra Tuhun Chihí. Ta chata ra vachi inga ra cha nañi Ra Nyacá Ñaha Nu Nyicú Ndiyí. Ta cañihí ra tunyee iñi cha cahñi ra chi cuaha xaan ñáyivi iyó siqui ñuhu ñayivi. Vatyí chichi cha sava ñáyivi iyó siqui ñuhu ñayivi, cucahñi ra sava ñu. Ta cucahñi ra chi ñu chihin cha sanacanda ra cuatyí, ta chihin tama, ta chihin cuehe, ta chihin quiti xaan iyó siqui ñuhu ñayivi.

9 Cuhva cha chahnya ra cuví Mbee Luhlu cuan sellu cu ohon, nyehi xiu arta. Yucuan ñohó ñima ñu cha chihí cha cuenda tuhun Nyoo tyi sacoto ñu tuhun ra chi ñáyivi.

10 Ta tyehe caa catyí ñu chihin noo ndusu chaa xaan:

—Sutu Mañi yuhu, ra ii cuvún. Ta sacuvún cha catyún. ¿Ama cutachi tuñun chi ñáyivi cha chahñi chi ndi cha catyí tuhun maun? —catyí ñu.

11 Tyicuan ta cañihí noo noo ñu cuan sahma cuichin cuihno ñu. Ta catyí ra chi ñu na canyitatu ñu suhva ca quivi, nyacua nya cha caña tahan tandihí ca tahan ñu, ñu sacuví tyiño nuu ra Cristo, ñu cha tahán chi cucúvi tari cuhva chihí maa ñu.

12 Cuhva cha chahnya ra cuví Mbee Luhlu cuan sellu cu iñu, nanyehi ta quichi noo cha taán cahnu. Ta nduña ñayivi, tari sahma ñu nyaá tucuihya iñi, toon xaan nduvi. Ta yoo andivi cuan nanduvi tari niñi.

13 Ta tiño andivi canacoyo ti nya nu ñuhu ñayivi. Tari sanacoyo tu higo chiti yutya tun tatu yahá noo tatyí ñihi.

14 Tari natuví yo noo tutu tyicuan caa cuanaa ri andivi. Ta tandihí yucu ta tandihí ñuhú cha nyicú mahñu tyañuhu nacanda chi ta nasama chi nu nyaá chi.

15 Ta tandihí rey cha iyó siqui ñuhu ñayivi in ri chihin ra nahnu, ta ra

tyayii, ta ra cacuví nuu chi sindaro, ta ra iyó xaan fuerza chi, ta tandihí ñu cacuví musu, ta ñu cha ña cuví musu, tandihí ri ñu cuan caquihvi xehe ñu chichi yavi yuu cha iyó yucu nahnu, ta chichi yavi ñuhú.

16 Ta catyí ñu chi yucu cuan ta chi yuu cuan tyehe caa:

—Canacoyo ndo siqui ndi, ta tixehe ndo chi ndi nuu ra nyaá nu tyayu andivi, coto tachi tuñi ra cuví Mbee Luhlu cuan chi ndi.

17 Vatyí cha chaa quivi cahnu cha cutachi tuñi ra chi ndi. ¿Ta yóo cuví cha cuví cunye caa? —catyí ñu.

7

Nu ñihí ñu Israel sellu cunyaq tyaan ñu

1 Cha yaha tuhun ihya ta nyehi cumi tahan ángel catayucú ra ndi cumi chiyo nu quichi tatyí siqui ñuhu ñayivi. Ta ña chaha ra yaha tatyí cuan vatyí cava chi siqui ñuhu ñayivi. Ni ña chaha ra cha cava chi nuu tyañuhu, ni siqui yutun catayucú nuu ñuhú.

2 Ta nyehé tiqui inga ángel, vachi ra ityi nu caña ñanyii, ta nyisó ra sellu Nyoo nyitó. Ta ángel cuan canachaa ra chihin cha ñihi ndusu ra chi inga cumi ca ángel cuan, ra cha ca iyó ityi chi vatyí casativi ra nuu ñuhu ñayivi ta nuu tyañuhu. Ta catyí ra chi ra:

3 —Ma sativi ñaha ndo nuu ñuhu ñayivi, ni nuu tyañuhu, ta ni nuu yutun cha niri ca cha ta sañaha ca ndi yóo ñu cuví musu Nyoo, vatyí cutyaa ndi noo sellu tyaan ñu —catyí ángel cuan.

4 Ta chiñi nacatyí ra yoso tahan ñáyivi tyaq ra sellu cuan: cientu uvi xico cumi mil tahan ñu Israel.

5 Uchi uvi mil ñu tata ra Judá chicunyaq sellu, ta uchi uvi mil ñu tata ra Rubén, inga uchi uvi mil ca ñu cuenda tata ra Gad,

6 uchi uvi ca mil cuenda tata ra Aser, uchi uvi mil ca cuenda tata ra Neftalí, uchi uvi mil ñu tata cuenda ra Manasés,

7 ta uchi uvi mil cuenda tata ra Simeón, uchi uvi mil cuenda tata ra Leví, ta uchi uvi mil cuenda tata ra Isacar,

8 uchi uvi mil ñu cuenda tata ra Zabulón, ta uchi uvi ca mil ñu cuenda tata ra José, ta uchi uvi mil ca ñu cuenda tata ra Benjamín. Tandihí ñu cuan ta chicunyaḗ sellu Nyoo chi ñu.

Nu nyehe ra Juan chi ñu ñihno sahma cuichin

9 Cha yahaḗ tuhun cuan ta nanyehi ta nyehi cuaha xaan ñáyivi nyicú. Ta yori cuví nacahvi chi ñu, vatyí nyicú ñáyivi tandihí ri ñuu nyihi ta ñuu nahnu iyó siqui ñuhu ñayivi. Ta nyicú ñáyivi sin sin sahan cahan. Ta nyicú ñáyivi tandihí ri tata. Ta catayucú ñu nuu ra nyaá nu tyayu, ta nuu ra cuví Mbee Luhlu. Ta cañihno ñu sahma cuichin. Ta cayihí ndaha ñu ndaha ñoo.

10 Ta tandihí ñu chihin cha ñihi ndusu ñu, ta canachaa ñu ta catyí ñu:

—Sutu yo Nyoo, ra nyaá nu tyayu gloria, ta ra cuví Mbee Luhlu, ican ra sacacu chi yo —cacatyí ñu canachaa ñu.

11 Ta tandihí ángel catayucú ra nicachico yuhu tyayu cuan, ta nicachico chata ra cha vaha chahnu cuan, ta nicachico chata ndi cumi tahan cha nyitó cuan. Ta cachicuiñi chiti ra chihin nuu ra nya nu ñuhú nuu ra nyaá tyayu cuan. Ta casacahnú ra chi ra. Vatyí Nyoo cuví ra.

12 Ta cacatyí ra:

Tahán chi tyehe caa chuun:

Sacahnú ndi chuun ta chahá ndi gloria chuun vatyí chiñi tuñi xaun.

Nacuhvá xaan ndi tyahvi nyoo chuun.

Ta sacuvahá ndi chuun vatyí iyó xaan tunyee iñi chuun, ta cuaha xaan fuerza iyó chuun, Nyoo Sutu ndi cuví chuun. Ta tyicuan ri na cuvi chi tandihí tyembu, catyí ra.

13 Tyicuan ta noo ra cuví ra cha vaha chahnu cuan ndacaḗ tuhun ra chii ta catyí ra:

—¿Yóó ñu cañihno sahma cuichin ihya? ¿Ta nya ityi quichi coyo ñu? —catyí ra.

14 Ta yuhu catyí chi ra:

—Tata, yoho chitón.

Ta catyí ra chii:

—Ican ñu ihya cuví ñu cayahaḗ nu tindoho cahnu. Ta canacatyá ñu cuatyí ñu, ta nducuichin sahma ñu chihin niñi ra cuví Mbee Luhlu.

15 Yucuan chaha nyicú ñu ityi nuu tyayu nu nyaá Nyoo. Ta sacuví ñu tyiño nuu ra ndiyaca ta ñiyaca chichi vehe ñuhu ra. Ta ican ra cuví ra nyaá nu tyayu gloria ta cusaha cumi ra chi ñu vatyí cua cunyaa ra chihin ñu.

16 Ta ma nyehe ca ñu tindoho chihin soco, ni chihin cha ityi ñu ndutya. Ta ni ma cahmi ca ñanyii chi ñu. Ni ma sayanga ca cha ihñi chi ñu.

17 Vatyí ra cuví Mbee Luhlu cha nyaá mahñu tyayu cuan cusaha cumi ra chi ñu, tari sahá cumi yo mbee. Ta cunyaca ra chi ñu nu coho ñu ndutya cha chahá cha cuconyito ñu tandihí tyembu. Ta Nyoo cunacuhva ra tandihí ndutya nuu ñu —catyí ra chii.

8

Nu chahnya ra Jesucristo sellu cu ucha ta quitá noo ángel chihin noo cuu xuhun cuaan

1 Cuhva cha chahnyaḗ ra cuví Mbee Luhlu sellu cu ucha nu libru cuan, ndutaxin ri nya andivi tari noo cha sava hora.

2 Yahaḗ cuan ta nyehi chi ndi ucha ángel catayucú ra nuu Nyoo. Ta caquehen cuenda ra ucha tahan trompeta.

3 Yahaḗ cuan ta quichi inga ángel chihin noo cuu xuhun cuaan cha tuhvá yihí cutu. Ta chicuinanyaḗ ra ityi nuu arta cuan. Ta quehen cuenda ra cuaha xaan cutu, vatyí cuhva cuenda ra ñn ri chihin cha chicán tahvi ñáyivi chi Nyoo. Nu arta xuhun cuaan cha nyaá ityi nuu tyayu Nyoo, yucuan chahá cuenda ra.

4 Ta quitá ñuhma cutu cuan, nandaá chi nu nyaá Nyoo ñn ri chihin cha chican tahvi ñu cuenda ra.

5 Tyicuan ta ángel cuan quehen ra cuu cuan. Tyicuan ta sacutu ra chihin titi ñuhu cha quitá arta cuan. Ta tuchi

ra siqui ñuhu ñayivi. Ta quichaha cahan savi, ta iyo cuví. Ta quihvi tacha, ta quichaha taan.

Nu tiví ángel trompeta

⁶ Tyicuan ta ndi ucha ángel cha canyisó ndi ucha trompeta cuan, cha nyatú tuhva ri ra vatyí cativi ra.

⁷ Ángel cha xihna ri cuan quichaha tiví ra trompeta ra. Ta quichaha coon savi yuu ta saca ñiñi chihin chi, ta saca ñuhu cha cayú chihin. Ta cayú cha yatyin cha sava ñuhu ñayivi. Ta cha yatyin cha sava yutun cayú chihin tandihi cuhu cuii.

⁸ Ta ángel cu uvi cuan tiví tucu ra trompeta ra. Ta canacava tari noo yucu cha cayú ñuhu mahñu tyañuhu. Ta cha yatyin sava tyañuhu cuan nduvi chi ñiñi.

⁹ Ta cha yatyin sava quití cha iyó chichi tyañuhu cuan chihí ti. Ta cha yatyin sava barcu cha iyó cuan, catahvi cuatyí.

¹⁰ Ta ángel cu uñi tiví ra trompeta ra. Ta canacava noo tiño cañu andivi, suri cayú ñuhu chi ti tari ñuhu ñiti. Canacava ti siqui cha yatyin ri sava yuvi nahnu ta siqui cha yatyin ri sava ndohyo.

¹¹ Ta tiño cañu cuan nañi ti Ajenjo. Ta cha yatyin ri sava ndutya cha iyó, nduvi chi Ajenjo cha cuví noo veneno cha uva xaan. Ta cuaha xaan ñayivi chihí cha cuenda ndutya cuan, vatyí ndu uva chi.

¹² Ta ángel cu cumi cuan nativi ra trompeta ra ta cha yatyin sava ñanyii nduñaa, ta cha yatyin sava yoo, ta cha yatyin cha sava tiño andivi cuanaa ti. Ta cha cuenda cha nduñaa suhva ñanyii cuhva cuan, nduñaa cumi tahan hora cha noo noo quivi. Ta cha cuenda cha tiví yoo ta tiño, yucuan chaha ña cacuví sandichin chi cumi tahan hora cha noo noo ñuu.

¹³ Yahá cuan ta nanyehi ta chiñi vatyí noo ángel ndavá ra mahñu andivi. Ta chihin cha ñihi ndusu ra ta catyí ra tyehe caa:

—¡Ndahvi cuví ñu iyó siqui ñuhu ñayivi vatyí nyaá tiví uñi ca tahan ángel trompeta ra! —catyí ángel cuan.

9

¹ Ta ángel cu ohon cuan nativi ra trompeta ra. Ta nyehi chi noo ra cuan, tari tiño andivi caá ra. Ta canacava ra siqui ñuhu ñayivi. Ta quehen cuenda ra cuan ndaha ticu cha cuenda yavi cono cha ñahri maa nu chitahan chi.

² Tyicuan ta nuña ra yavi cuan. Ta cuaha ñuhma nandaa tari maa ñuhma cha quitá chichi noo horno cañu. Ta ñuhma cuan chasi chi nuu ñanyii ta nasaca noo chihin tatyí. Ta nduñaa ñayivi.

³ Ta mahñu ñuhma cuan caquita coyo pinchi. Ta candava coyo ti siqui ñuhu ñayivi. Ta chicoo ityi chi ti vatyí tyaa ti chi ñayivi tari tisuhma cha iyó siqui ñuhu ñayivi.

⁴ Quehen ti tuhun vatyí ma satasi iñi ti, ni chi cuhu cha iyó nu ñuhu ñayivi, ta ni noo cuhu cuii, ta ni noo yutun, soco chi ñayivi cha ñahri sellu Nyoo nyaá tyaan ñu. Chi ñu cuan cutyaa ti.

⁵ Soco ñahri ityi iyó chi ti cha cañi ti chi ñayivi, soco tacuhva tyaa ri ti chi ñu. Ta coo xico uhvi chi ñu chichi cha ohon yoo. Ta cha uhvi cuan, tari caá xico tisuhma cha tyaa chi ñayivi tyicuan caá.

⁶ Ta quivi cuan ñayivi cunanducu ñu tuhun chihi. Soco ma nañihi ca ñu. Ta vasi cuñi ñu cúvi ñu, soco tuhun chihi cucono ri chi chi ñu vatyí ma cúvi ñu.

⁷ Tari caá caballu nahnu cha cachicá cuatyí, tyicuan caá pinchi cuan. Ta xiñi ti yihí tari caá noo corona xuhun cuaan. Ta tari caá nuu rayi, caá nuu ti.

⁸ Ta ixi xiñi ti tari caá ixi xiñi ñusihi caá. Ta tari caá noho ndicaha caá noho ti.

⁹ Ta soo ti tari caa, tyicuan caa. Ta ñihi xaan cachan ndichin ti. Tari cachan cha cuaha xaan carreta caballu cuhva cha cachinó ti nu iyó cuatyí.

¹⁰ Ta tari caá suhma tisuhma caá suhma ti, vatyí yihí iñu. Ta chihin cuan cuví tyaa ti chi ñayivi chichi cha ohon yoo.

11 Ta pinchi cuan iyó noo ra cuví nuu chí tí. Ta ican cuví noo ángel cha nyacá ñaha yavi cahnu ta cono cha ñahri nu chitahan. Ta cha chihin sahan hebreo nañí ra Abadón. Ta chihin sahan griego nañí ra Apolión, ta cuñí chi catyi: Ra Sanaa.

12 Yaha noo tindocho cuan, soco cumañi uvi ca.

13 Ta ángel cu iñu cuan nativi ra trompeta ra. Ta chiñi noo ndusu cha quitá chichi ndi cumi ndiqui tutun arta xuhun cuaan cha nyaá nuu Nyoo.

14 Ta ndusu cuan catyi chi ángel cu iñu cha nyisó trompeta cuan, tyehe caa:

—Ndachi chi ndi cumi ángel cha canuhñi yatyin yuhu yuvi cahnu Eufraates —catyi ndusu cuan.

15 Tyicuan ta ndachi ndi cumi ángel cuan, vatyi cha nyatu tuhva xaan ra maa maa cuhva cuan maa maa quivi cuan, maa maa yoo cuan, maa maa cuiya cuan, vatyi cahñi ra chi cha yatyin cha sava ñayivi iyó siqui ñuhu ñayivi.

16 Ta chiñi yoso tahan sindaro chihin caballu ra, ta quitá uvi cientu millón tahan ra.

17 Ta tyicuan caa nyehi caballu cuan chihin visión, cha sanyehi Nyoo chii. Ta pechu ra cayosó chi tí cuan, yihí noo caa tyacu cuaha, tyacu azu ta tyacu cuaan. Ta tari caá xiñi ndicaha caá xiñi caballu ra. Ta chichi yuhu tí quitá ñuhu ta ñuhma ta azufre.

18 Ta cha yatyin sava ñayivi iyó siqui ñuhu ñayivi cachihí chihin uñi tahan cha caquitá yuhu caballu cuan; ñuhu ta ñuhma ta azufre.

19 Vatyí tunyee iñi cha iyó chí tí, chichi yuhu tí ta suhma tí nyaá. Vatyí tari caá coo, caá suhma tí. Tari noo xiñi coo tyicuan caa nuu suhma tí. Ta chihin cuan sañicuehé tí chí ñayivi.

20 Soco tandihí ca ñu cha candoq, cha ña cachihí chihin cuehe cuan, ña sacucuitá ñu cha sacuví ñu cha ña vaha. Ta ni ña sacucuitá ñu cha sacahnú ñu chí tatyí ña vaha ta chí xitohyo. Vatyí cuví cuan noo xuhun cuaan, xuhun cuichin, bronce, yuu,

yutun. Cha ña cuví nyehe, ni ña chiñi ta ni ña cuví caca cuví cuan.

21 Ni ña casandihí ñu cha chahñi ñu, ta cha sataśi ñu. Ta ña sandihí ñu cha iyó ñu chihin rayi ta chihin ñusihí ta ñima yí ñu cuví, ta ñima ñasihí ra cuví. Ta ña sandihí ñu cha suhú ñu.

10

Ángel cha nyisó libru luhlu

1 Tyicuan ta nyehi inga ángel cha iyó xaan tunyee iñi chí, cha vachi noó ityi andivi mahñu noo vico. Ta noo coo yahnyi nyaá xiñi ra. Ta xiño xaan nuu ra tari ñanyii. Ta tari cha cayú ñuhu chaha ra, tyicuan caá.

2 Ta yihí ndaha ra noo libru luhlu cha tanuña nuu. Ta chinanyaá ra chaha chiyo vaha ra nu tyañuhu. Ta chaha chiyo satyin ra chinanyaá ra siqui ñuhu ñayivi.

3 Tyicuan ta ñihi xaan cana chaa ra, tari ndusu ndicaha cha nduxaan tí. Ta cuhva cha canachaá ra, chiñi ucha tahan ndusu cha siin siin caa tari cha cahán savi, tyicuan caa ndusu ra.

4 Ta cha yaha cha chiñi cha cahan ndi ucha ndusu cuan, tyicuan ta cuaryai nuu tutu. Soco chiñi noo ndusu ityi andivi, ta catyi chí chí tyehe caa:

—Cocumi xehun tuhun cha chiñun cahan ndi ucha ndusu cuan. Ta ma tyaun nuu tutu —catyi ndusu cuan chí.

5 Tyicuan ta ángel cha nyehi cha chañi nu tyañuhu ta siqui ñuhu ñayivi, nacoñehé ra ndaha chiyo vaha ra ityi andivi.

6 Ta ángel cuan tyanaha ra vatyi cahan ra noo cha ndicha cuenda Nyoo, ra nyitó tyicuan ri maa, ra cha savaha andivi ta ñuhu ñayivi ta tyañuhu ta tandihí cha iyó nuu chí. Ta catyi ra:

—Ñahri ca cha cucuee.

7 Vatyí cuhva cha cuquichaha tiví ángel cu ucha cuan trompeta ra, yucuan cuhva cuchino cava tuhun xehe cha yihí iñi Nyoo tyi sacuvi ra, tari cuhva sacoto ra chí ra casacuví tyiño nuu ra, ra cacuví profeta cuenda ra —catyi ángel cuan.

8 Ta ndusu cha chiñi yuhu, cha quita ityi andivi, cahan tucu chi chihin inga chaha, ta catyí chi chii tyehe caa:

—Cuahan, ta quehun libru luhlu cha tanuña nuu, cha yihí ndaha ángel cha chañi nu tyañuhu ta nu ñuhu ñayivi —catyí chí.

9 Tyicuan ta chahin nu nyaá ángel cuan ta chiquen libru luhlu cuan nacuhva ra chii, ta catyí ra chii:

—Quehen, ta çahun, vixi xaan tari tyañuñu. Soco chichun cundu uva chi —catyí ra chii.

10 Tyicuan ta quehin libru luhlu cha yihí ndaha ángel cuan, ta chachi. Vixi xaan tari tyañuñu. Soco cha yaha cha chachi, uva xaan nduvi chi chichi.

11 Tyicuan ta catyí ra chii:

—Cuñi chi cha cunacatyun inga chaha tuhun cha cahan Nyoo siqui ñayivi cuaha xaan ñuu nyihi ta ñuu nahnu, ta siqui ñayivi sin sin sahan cahan, ta siqui ra cacuví rey —catyí ra chii.

11

Uvi tahan ra cacuví cha ndaa

1 Tyicuan ta cachaha ra noo ndoo cha tari caá noo yutun cha tyicuhvá chi. Ta cacatyí ra chii tyehe caa:

—Nducuíta ta tyicuhvon vehe ñuhu Nyoo ta arta ra, ta nacahvun yoso tahan ñu tuhvá sacahnú chi Nyoo yucuan.

2 Soco ma tyicuhvon nuquehe cha nyaá ityi chata vehe ñuhu cuan. Vatyí cha cuenda ñu inga ñuu cuví. Ta ican ñu cuan cucuaca chaha ñu ñuu ii cuan chichi cha uñi cuiya sisava.

3 Ta yuhu cutachi uvi testigu cuahan ra cha cuende cha ni ri ca cha chichi noo mil uvi cientu uñi xico quivi. Ta cacuihno ra sahma tucuihya iñi.

4 Ta ican ninduvi testigu cuan cuví uvi tahan yutun olivo ta uvi tahan cañileru cha tayucú nuu Sutu Mañi yo, ra nyacá ñaha siqui ñuhu ñayivi.

5 Tatu yóo ñu cuñi satasi iñi chi ninduvi testigu cuan, cuquita ñuhu yuhu ninduvi ra, ta cahmi chi tandihi

ñu xaan iñi chi ra. Ta tyicuan caa cucuvi ñu cuñi satasi iñi chi ra.

6 Testigu cuan iyó ityi chi ra cha cacasi ra nu ma coon savi cha niri ca cha cachahá cuenda ra tuhun cahan Nyoo chi ñayivi. Ta iyó tucu ityi chi ra cha casananduvi ra niñi chi ndutya. Ta iyó tucu ityi chi ra cha casanyehe ra tindoho chi ñu iyó siqui ñuhu ñayivi chihin tandihi ri nuu cuehe, yoso tahan chaha cha cacuñi maa ra.

7 Soco cuhva cha cua ndihi cuhva cuenda ra tuhun Nyoo chi ñayivi, cuquita noo quití xaan yavi cono cuan, ta cucañi tahan ti chihin ninduvi testigu cuan. Ta cucuvi chasaha ti chi ra. Ta cucahni ti chi ra.

8 Ta coño ñuhu ra cundoo maa cava calle ñuu nu chihí Sutu Mañi yo nu cruzi. Ta tari Sodoma ta Egipto nanduvi ñuu cuan, (cha cuenda cha ña vaha cha sacuvi ñayivi ñuu cuan).

9 Ta chichi cha uñi quivi sisava, cunyehe tandihi ñayivi coño ñuhu ra, ñayivi tandihi ñuu nyihi, ñayivi tandihi ri tata, ta ñayivi sin sin sahan cahan, ta ñayivi ndihi ri ñuu nahnu, cunyehe ñu coño ñuhu ra. Ta ma cuhva ñu cha quihí coño ñuhu ra chichi ñuhú.

10 Ta ñu cha iyó siqui ñuhu ñayivi cu cusí xaan cuñi ñu cha cuenda cha cachihí ra cuan. Ta nyacua cutachi ñu regalo chi tahan ñu cha sí cuñi ñu, vatyí cachihí ninduvi rayí cha cachaha cuenda tuhun cahan Nyoo chi ñu. Vatyí chaha xaan ra tindoho chi ñu cha cuhva cha cuñi maa ñu.

11 Soco cha yaha cha uñi quivi sisava, Nyoo sanandoto ra chí ra, ta candicuita tucu ra inga chaha. Ta tandihi ñu nyehe canandoto ra, canayuhvi xaan ñu.

12 Tyicuan ta ninduvi testigu cuan cachihí ra noo ndusu ñihi xaan ityi andivi. Ta catyí chi chi ra tyehe caa:

—Ndaa ndo ityi siqui ihya —catyí ndusu cuan chi ra.

Ta candaa ra ityi andivi chichi noo vico. Ta canyehe ñu xaan iñi chi ra nu canandaá ra.

13 Ta cuhva cuan quichi noo cha taan cahnu. Ta chichi ñuu cuan cana-

coyo cuaha xaan vehe. Ta chichi cha uchi uchi tahan vehe, canacoyo noo noo. Ta cha tandihí chichi ñuu cuan chihí ucha mil ñáyiví cha cuenda cha taan cuan. Ta ñáyiví ña chihí, casacahnú ñu chi Nyoo, ra nyaá andiví, cha cuenda cha yuhví ñu.

¹⁴ Yahá tindoho cu uvi cuan, soco numi ri cuquichi tindoho cu uñi.

Nu tiví ángel trompeta cu ucha

¹⁵ Ta ángel cu ucha nativí ra trompeta ra. Ta canatyacu ndusu ñihi xaan ityi andiví, ta catyí chi tyehe caa: Tandihí nu nyacá ñaha rey siqui ñuhu ñáyiví ihya, cha yahá nanduvi chi Sutu yo Nyoo ta chi ra Cristo.

Ta maa ra cucunyaca ñaha tyicuan ri maa, catyí ndusu cuan.

¹⁶ Tyicuan ta ndi oco cumi ra cha vaha chahnu, ra canyicú nuu tyayu nu nyaá Nyoo, cachicuiñi chiti ra chihin nuu ra nya nu ñuhu. Ta casacahnú ra chi Nyoo.

¹⁷ Ta cacatyí ra:
Nacuhvá ndi tyahvi nyoo chuun,
Sutu Mañi nyuhu.
Nyoo ra iyó tandihí tunyee iñi chii cuvún.
Yoho iyón vityin, ta iyón nu quichaha tandihí ta nya cha cuquichun.
Vatyí cha naquehen cuendon tunyee iñun.

Ta cha quichahun nyaca ñahun vityin.
¹⁸ Ta ñáyiví tandihí ñuu nahnu cuxaan ñu.

Soco cha chaá quiví cha tachi tuñun chi ñu.

Ta cha chaá quiví cha cucutuñi chi ñu ndiyí.

Ta cucuhvon cha vaha cha tahán chi chi ñu sacuví tyiño nuun, ñu chahá cuenda tuhun cahún, ñu cha nacuhvá cuenda añima chi maun, ta sacahnú ñu sivun.

Vasi cahnu ñu cuví ñu ta vasi ndahvi ñu.

Ta chaá cuhva cha sanaun chi ñu sativí chi ñáyiví siqui ñuhu ñáyiví, cacatyí ra.

¹⁹ Tyicuan ta nuña yuvehe ñuhu Nyoo cha nyaá andiví, ta chichi vehe ñuhu natuví caja cuenda cha natyihí

tahan ra tuhun chihin yo. Ta quihví tacha. Ta vaa ri maa cuví, ta cahan savi. Ta chiyo noo cha taan. Ta ñihi xaan coon savi yuu.

12

Nu chicán nyicon noo coo cahnu chi noo ñaha sihi

¹ Tyicuan ta tuví noo seña cahnu andiví. Vatyí quitá noo ñaha sihi ta siquí noo ña ñanyii tari cha ñihnó ña vestido. Ta chañí ña siquí yoo. Ta yihí noo corona cha uchi uvi tiño andiví xiñi ña.

² Ta ñaha sihi ihya ñohó sehe ña. Ta chacú chaa vavaha ña chihin cha uhví cha cacú sehe ña, vatyí nyehé xaan ña tindoho cha cua cacu sehe ña.

³ Tyicuan ta quitá nonga seña ityi andiví. Ta nyehí noo coo cuaha cahnu. Ta nyaá ucha xiñi ti, ta uchi ndiqui ti. Ta tahan tahan xiñi ti yihí noo corona.

⁴ Ta chihin suhma ti sanacoyo ti cha yatyin cha sava tiño andiví siquí ñuhu ñáyiví. Ican coo ihya chicuiñi ti nuu ñaha cha cua cacu sehe cuan, vatyí ta cha cacu ri cue ta cachi ti chí cue.

⁵ Ta ñaha cuan sacacu ña noo rayii. Ta ican ra cuacunyaca ñaha tandihí ñáyiví iyó siquí ñuhu ñáyiví. Ñihi xaan cua cunyaca ñaha ra tari cha chihin noo yutun caa vee. Ta cha yahá cacu ra, naxitá Nyoo chi ra nu nyaá ra nu tyayu ra.

⁶ Ta ñaha cuan chingo ña cuahan ña noo ñuhú ityi, nu sanduvahá Nyoo noo nu coo ña, vatyí yucuan cucuhva ra cha cachi ña cha ni ri ca cha noo mil uvi cientu uñi xico quiví.

⁷ Yahá cuan ta chiyo noo cuatyí nya andiví, nu cañi tahan ángel cahnu Miguel ta tandihí ángel cuenda ra chihin coo cahnu cuan. Ta coo cuan ta tandihí tatyí ña vaha cuenda ti, cacañi tahan chihin ra Miguel.

⁸ Soco ña saha ganaá ti cha cañi tahan ti. Ta ña ñihí ca ti nu ndoo ti nya andiví chihin tatyí ña vaha cha candihí chihin ti.

⁹ Tyicuan ta tava ñehe Nyoo chi ti, cuví ti Coo Chahnu, cha nañi cuihna

ra cuví nuu, ra cha sandaví ñaha chi tandihí ñáyiví iyó síqui ñuhu ñayiví. Maa ra ta tatyí ña vaha cuenda ra cacanacoyó ra nya nu ñuhu ñayiví.

¹⁰ Tyicuan ta chiñi noo ndusu ñihi nya andiví. Catyí chi tyehe caa:

—Cha chaá nu cacu añima yo vityin. Cha saha ganaa tunyee ñhi Nyoo. Cha nyacá ñaha Nyoo yo vityin chihin ra Cristo Sehe ra. Vatyí cha tava ñehe ra chi ra cha tyaa xaan cuatyí síqui ra yañi yo ndiyaca ta ñiyaca nuu Nyoo.

¹¹ Ta ra yañi yo cacuví chasaha ra chi ra chihin ñhi ra cuví Mbee Luhlu, ta chihin tuhun Nyoo cha cacahan ra tuhun chihin ñáyiví. Vatyí ña yuhvi ca ra cha cucúvi ra.

¹² Yucuan chaha cusii cuñi nyoho cha iyó ndo andiví. Soco jndahvi nyoho ñu iyó síqui ñuhu ñayiví ta nu tyañuhu! Vatyí cuihna canacava ra nya andiví ta nyacua nya síqui ñuhu ñayiví nu nyicú ndo. Ta xaan xaan ra vatyí chitó ra vatyí suhva ri ca quiví ra nyaá.

¹³ Ta cha nyehe coo cahnu cuan vatyí nacava ti nu ñuhu ñayiví, chica nyicon ti chi ñaha cha sacacu sehe cuan.

¹⁴ Soco ñaha cuan ñhi ña uvi tahan ndichin nahnu tasu, tacuhva cuví ndava ña ta cono ña chi coo cuan nyacua nya ñuhu ityi cuan. Ta yucuan cuví nu cuñihi ña cha cachi ña chichi cha uñi cuiya sisava.

¹⁵ Ta coo cuan tuchí ti ndutya chihin yuhu ti, vatyí cono noo yuvi cahnu, vatyí satyañi chi ñaha cuan.

¹⁶ Soco ñuhu ñayiví tyinyee chi ña, vatyí ndata chi ta quihví yuvi cahnu cha tuchí coo cahnu cuan chihin yuhu ti.

¹⁷ Ta cha cuenda cha ña cuví chasaha ti chi ña, cuahan ti cua cañi tahan ti chihin ñáyiví vachi tata ña, ñu cha quichahá tuhun cahán Nyoo, ñu nyicón cha ndicha cha cahán ra Jesucristo chihin cha ñhi ñhi ñu.

13

Nu nyehe ra Juan uvi quití quiñi caa

¹ Chicuinanyaj nu ñhi yuhu tyañuhu cuan. Ta nyehí quitá noo

quití quiñi xaan caa nuu tyañuhu. Ta nyaá ucha xiñi ti, ta uchi ndiqui ti. Ta tahan tahan ndiqui ti yihí noo corona. Ta xiñi ti nyaá noo tuhun cha cahán ña vaha síqui Nyoo.

² Quití quiñi caa ihya caá ti tari caá noo cuiñi. Ta tari caá chaha yihí caá chaha ti. Ta yuhu ti tari caá yuhu ndicaha caá. Ta coo cahnu cuan chaha ti ityi chi quití quiñi caa cha cunyaa ti nu tyayu ti. Ta chaha ti ityi chi ti cha cunyaca ñaha ti chi ñáyiví.

³ Ta noo xiñi quití quiñi caa cuan tari maa cha nyaá noo nu cahví cahnu. Soco nu cahví cuan nduvaha. Ta iyo xaan cuñi tandihí ñáyiví iyó síqui ñuhu ñayiví. Ta nanyicón ñu chi quití quiñi caa cuan.

⁴ Ta sacahnú tucu ñu chi coo cahnu cuan, vatyí chaha ti ityi chi quití quiñi caa cuan. Ta sacahnú tucu ñu chi quití quiñi caa cuan, ta catyí ñu:

—¿Yóó cha cuví chi tari cuví chi quití quiñi caa ihya? ¿Ta yóó cha cuví cañi tahan chihin ti? —catyí ñu.

⁵ Ta ñhi tucu quití quiñi caa cuan ityi vatyí cahan ña vaha ti ta cahan quiñi caa ti síqui Nyoo. Ta cua cunyaca ñaha ti chichi cha uvi xico uvi yoo.

⁶ Ta tyicuan caa sacuví ti. Cahán ti síqui Nyoo. Ta cahan ña vaha ti síqui nu nyaá Nyoo. Ta cahan ti chi ñu nyicú andiví.

⁷ Ta chicoo tucu ityi chi ti cha sacco ti cuatyí síqui ñu cuenda Nyoo nyacua nya cuví chasaha ti chi ñu. Ta chicoo ityi chi ti síqui ñáyiví ndihí ri tata, ñáyiví sñ sñ sahan cahan, ñáyiví tandihí ri ñuu nyihi, tandihí ri ñuu nahnu,

⁸ tandihí ñu cha ma ñhi ñayiví chaa coo chihin ra cuví Mbee Luhlu, ra cha chihí. Ma ñhi ñu vatyí nyata ni cumañi chinó ñuhu ñayiví ta ñahri sívi ñu nyaá nu libru ra. Tandihí ñu cuan cusacahnu ñu chi quití quiñi caa cuan.

⁹ Ta ñu cutuñí ñhi, na quichaha ñu tuhun ihya:

¹⁰ Ñu cunyaca vehe caa chi inga ñu, suri cuhun tucu maa ñu. Ta ñu cha

cachahñí chihin cha xaan, suri chihin cuan cucúvi tucu maa ñu. Yucuan chaha cuñí xaan chí cha cunyeexaan iñi ñu cuenda Nyoo. Ta cuñí chí cha chino iñi ñu chí ra.

¹¹ Yaha cuan ta nyehi inga quití quiñi caa. Quitá ti chíchi ñuhú. Quití ihya nyaá uvi ndiqui ti cha tari caá ndiqui mbee luhlu. Soco tari cahán noo coo xaan vavaha cahán ti.

¹² Ta nyacá ñaha ti tari nyacá ñaha quití quiñi caa cha xihna ri cuan. Suri chihin nuu quití cha xihna ri cuan nyacá ñaha ti. Ta tyiyuhu ti chí ñuhu ñayivi ta ñu iyó siqui na sacahnu ñu chí quití quiñi caa cha xihna ri cuan, quití cha nduvaha nu cahvi cahnu cha chinyaá chí ti.

¹³ Ta cuaha xaan milagru sacuvi ti. Nyacua cuví sanacoyo ti ñuhu cayú ityi andivi chihin nuu ñayivi.

¹⁴ Ta sandavi ñaha ti chí ñayivi iyó siqui ñuhu ñayivi chihin seña cha cuví sacuvi ti chihin nuu quití quiñi caa cha xihna ri cuan. Ta tachi ti nachino noo xiñahñu quití quiñi caa cha tahnaya cahvi chihin mityi, soco ña chíhi ti.

¹⁵ Ta quití quiñi caa cu uvi cuan chicoo ityi chí ti cha cuhva ti cha conyito xiñahñu quití quiñi caa cha xihna ri cuan, vatyí xiñahñu cuan cuví cahan. Ta tachi xiñahñu cuan nacúvi tandihi ñayivi ña cuñí sacahnu chí chí.

¹⁶ Ta siin ri catyí ti vatyí na cunyaa noo tuñi chí tandihi ñayivi, tandihi ñu nyihi, ñu chahnu, ñu tyayii, ñu ndahvi, ñu yori chitoho, ta ñu iyó chitoho. Ta cucunyaa tuñi cuan ndaha chiyo vaha ñu o tyaan ñu.

¹⁷ Ta yori maa cuví sata ta xico tatu ñahri tuñi cuan nyaá chí ñu. O tatu ñahri sivi ti, o número sivi ti nyaá chí ñu.

¹⁸ Tuhun ihya cuñí xaan chí cha chíhi tuñi. Ñu cutuñi iñi, na saha ñu cuenda número quití quiñi caa cuan. Vatyí número noo rayii cuví. Ta número ra cuan ican cuví iñu cientu uñi xico iñu.

14

Nu sacahnú cientu uvi xico cumi mil ñayivi chí Nyoo chihin cha chítá ñu

¹ Yaha cuan ta nyehi chí ra cuví Mbee Luhlu, nanyaá ra nu yucu Sión. Ta chihin ra tayucú cientu uvi xico cumi mil ñayivi cha nyaá sivi ra tyaan ta sivi Sutu ra.

² Tyicuan ta chíhi noo cha cayu cha quichi ityi andivi, tari cayu cuaha yuvi nahnu. Ta tari cahán savi cha ñihi xaan, o tari noo ndusu cha cuaha xaan ra casacuacú arpa.

³ Ta cachitá ñu noo yaa chaa nuu tyayu Nyoo, ta nuu ndi cumi cha nyitó cuan, ta nuu tandihi ra cha vaha chahnu cuan. Ta yori cuví cutuhva yaa cuan, iin ri maa cientu uvi xico cumi mil ñu cha cacú aña sivi ñuhu ñayivi.

⁴ Ican ñu ihya cuví ñu cha ña chicoo cuatyí ñu chihin inga rayii ta ni ri rayii chihin inga ñusihí, vatyí ii ndoo ñu, ta nyicón ñu chí ra cuví Mbee Luhlu tandihi ri ityi nu cuahan ra. Cacú aña ñu ta cuví ñu ñu xihna ca chaha cuenda ñu chí ñu chí Nyoo ta chí ra cuví Mbee Luhlu.

⁵ Yori cuví catyí vatyí cuendu ñu, vatyí ni noo cuendu ña tuhvá ñu cahan. Yucuan chaha ñahri cuatyí ñu nuu Nyoo.

Tuhun cha sacoto uñi tahan ángel

⁶ Tyicuan ta nyehi inga ángel cuahan ndava ra andivi. Ta nyisó ra tuhun Nyoo cha ma ndihi ca maa, ta ican tuhun ihya cuví cha sacacú ra Cristo aña yo, Vatyí cusacoto ra tuhun ihya chí ñayivi iyó siqui ñuhu ñayivi, ñayivi ndihi ri ñuu nahnu, ta ndihi ri ñuu nyihi, ta ñayivi ndihi ri tata, ta ñayivi siin siin sahan cahan.

⁷ Ta ñihi xaan cahan ra ta catyí ra:

—Na yuhvi ndo chí Nyoo, ta sacahnu ndo chí ra. Vatyí cha chaá cuhva cha cua cutuñi chí ñayivi. Sacahnu ndo chí ra savaha andivi ta ñuhu ñayivi, ta tyañuhu ta ndohyo ndutya.

⁸ Tyicuan ta cuahan inga ángel cuan chata ra, ta catyí ra:

—Cha canacava ñuu Babilonia cahnu vityin, cha taní chí. Vatyí ñu

iyó ñuu cuan sañahá ñu chi inga ñáyiví iyó siqui ñuhu ñayiví cha quiñi caa tari sacuví maa ñu. Tari quiví cha sacuiñi ñu chi ñu chihin vinu ña vaha cuví cuan.

⁹ Ta nacahan ángel cu uñi chihin cha ñihi ndusu ra ta catyí ra:

—Tatu nya noo ñu sacahnú ñu chi quití quiñi caa cuan ta chi xiñahñu ti, o chahá ñu chi ñu cha cunyaa tuñi ti tyaan ñu, o ndaha ñu,

¹⁰ cunyehe xaan ñu tindocho vatyí cutyihí Nyoo chi ñu nu ñuhu, ta nu azufre tari cha cusacoho Nyoo noo vinu xaan chi ñu. Ta chihin nuu ángel ta chihin nuu ra cuví Mbee Luhlu cucuvi cuan.

¹¹ Ta ñuhma cha quitá nu nyehé ñu tindocho cuan tyicuan ri maa cuquita chi. Ta ma nyitatu maa ñu ndiyaca ta ñiyaca nu cohon ñu yucuan, vatyí sacahnú ñu chi quití quiñi caa cuan ta chi xiñahñu ti, o chahá ñu cha cunyaa tuñi sivi ti chi ñu.

¹² Yucuan chaha ñu yihí cuenda Nyoo, ñu quichahá tuhun cahán ra, ñi ñi ñu chinó ñi ñu chi ra Jesús ta cuñi chi cha cunyehe xaan ñi ñu cha nyehé ñu tindocho sacuvi inga ñáyiví.

¹³ Tyicuan ta chiñi noo ndusu cha quichí ityi andiví, ta catyí chi chii tyehe caa:

—Tyaa tuhun ihya: “Vityin ta ityi nuu ca, sñi xaan cucuvi chi ñu chihí ta chinó ñi ñu chi Sutu Mañi yo.” Ndicha, catyí Tatyí Ii Nyoo vatyí cunyatatu ñu chihin tyiño sahá ñu. Ta ñi ri cuhun cha vaha cha sacuví ñu chihin ñu.

Nu cutachi tuñi Nyoo chi ñáyiví

¹⁴ Tyicuan ta nanyehí ta nyehí noo vico cuichin. Ta siqui vico cuan nyaá noo rayi cha ndicha cuii maa cha quichí nya gloria. Ta yihí noo corona xuhun cuaan xiñi ra. Ta yihí ndaha ra noo mityi cutya ta xaan.

¹⁵ Ta quitá nonga ángel chichi vehe ñuhu ta chaa canachaa ra chi ra nyaá siqui vico cuan. Ta catyí ra:

—Vityin saha tyiñon chihin mityun, ta na satacon cosecha cha iyó siqui ñuhu ñayiví. Vatyí cha chaá cuhva, ta

cha iyó siqui ñuhu ñayiví cha chityí chi —catyí ra.

¹⁶ Tyicuan ta ra cha nyaá siqui vico cuan sayaha ra mityi ra siqui ñuhu ñayiví, ta nasataca ra cha iyó nuu chi.

¹⁷ Tyicuan ta inga tucu ángel quitá chichi vehe ñuhu cha nyaá andiví. Ta nyisó tucu maa ra noo mityi cutya cha xaan vavaha.

¹⁸ Ta nu nyaá arta quitá tucu nonga ángel cha iyó ityi chi cha cunyaca ñaha chi ñuhu cha cayú. Ta canachaa ra ta cana ra chi ra cha nyisó mityi cutya cha xaan cuan. Ta catyí ra chi ra:

—Saha tyiñon chihin mityi xaan cha nyisón chiña, ta na satacon vatu tichaha ndiví cha iyó siqui ñuhu ñayiví, vatyí cha chityí —catyí ra.

¹⁹ Ta ángel cuan sayaha ra mityi ra siqui ñuhu ñayiví ta chahnya ra tichaha ndiví cha iyó siqui ñuhu ñayiví. Ta tyihí ra noo nu tyihí ra vatyí cucuhñi ra ta quita ndutya chi. Ta cha tyehe caa cuñi chi catyí cha cutachi tuñi Nyoo chi ñáyiví.

²⁰ Ityi chata ñuu cachahñi ra tichaha ndiví cuan, ta cuñi chi catyí vatyí cachihí cuaha xaan ñáyiví, ta nu cuví cuan, cama xaan cama xaan ñiñi ñu chati. Ta chaa chi nya nu sucun nu nyaá frenu yuhu caballo ta tari cuhva noo uñi cientu kilómetro chinó ñiñi cuan.

15

Nu quitá ángel chihin ucha ca tahan tindocho cha cunyehe ñáyiví nu ndihi tuhun

¹ Nyehí nonga seña cahnu andiví, ta yuhvi xain cuví, vatyí nyehí ucha tahan ángel chihin ndi ucha tindocho. Chihin ihya cuví nu ndihi tindocho vatyí cundihí cha cuxaan Nyoo chihin ñáyiví cha ña quichahá ñu tuhun cahán ra.

² Ta nyehé tiqui noo cha tari caa tyañuhu, xiño tari caá ino, nasaca chi chihin ñuhu cha cayú. Ta ñu cha yahá cuví chasaha chi quití quiñi caa cuan ta chi xiñahñu ti, ñu cuví chasaha cha ma cunyaa número sivi ti cuan chi ñu, tandihí ñu tayucú ñu yuhu tyañuhu

cha xiño cuan. Ta ndahá ñu arpa, cha chaha Nyoo chi ñu.

³ Ta chitá ñu yaa ra Moisés, ra sacuví tyiño nuu Nyoo, ta yaa ra cuví Mbee Luhlu. Ta tyehe caa catyí ñu: Cahnu ta iyo xaan caá tandihí maa cha sacuvún. Nyoo, Sutu ndí, iyó tandihí tunyee iñi chuun.

Ndoo xaan ta ndicha xaan ityun. Yoho Rey cuvún cuenda tandihí ñáyivi iyó siqui ñuhu ñáyivi.

⁴ ¿Yóo cha ma yuhvi chuun, yoho Sutu Mañi nyuhu?

¿Yóo cha ma sacahnu chuun?

Vatyí noo tuhun ri maun cuví ra ii.

Ta cuquichi coyo ñáyivi tandihí ñuu, ta cusacahnu ñu chuun.

Vatyí cha nyehé ñu cha vaha cha sacuvún, catyí ñu chitá cuan.

⁵ Cha yaha tuhun ihya ta nanyehi nuña yuvehe ñuhu nya andivi nu cumi vaha ñu tabla cha nyaá ley.

⁶ Ta chichi vehe ñuhu cuan quita coyo ndi ucha ángel cha canyisó ndi ucha tindocho cuan. Ta cañihno ra sahma finu, cuichin ta xiño. Ta cayihí ra sincho xuhun cuaan ta nya pechu ra chitahan.

⁷ Tyicuan ta noo cha nyitó cuan, chaha cuan noo noo copa xuhun cuaan chi ndi ucha tahan ángel cuan. Ta chichi copa cuan tyitu maa yihí cha xaan Nyoo cha cutachi tuñi ra chi ñáyivi. Ta ican ra iyó ra tyicuan ri maa.

⁸ Ta chichi vehe ñuhu cuan chitu maa chihin ñuhma cha cuenda cha cahnu xaan cuví Nyoo ta cha cuenda tunyee iñi iyó chi ra. Ta yori maa cuví quihvi chichi vehe ñuhu cuan cha niri ca cha cumañi ndihí ndi ucha tindocho cha nyisó ndi ucha tahan ángel cuan.

16

Copa cha yihí tindocho cha cua saquichi ndi ucha tahan ángel cuan

¹ Tyicuan ta chiñi noo ndusu ñihí cha quita vehe ñuhu nu nyaá Nyoo. Ta catyí chi chi ndi ucha ángel cuan:

—Cuahan ndo cua coyo ndo cha ñohó chichi copa chiña siqui ñáyivi

iyó siqui ñuhu ñáyivi, vatyí Nyoo cutachi tuñi ra chi ñu —catyí ndusu cuan.

² Ángel cha xihna ri cuan chahan ra ta coyo ra cha ñohó chichi copa cuan siqui ñáyivi cha nyaá tuñi quiti quiñi caa cuan chi, ñu cha sacahnú xiñahñu ti. Ta quitá noo nu cahvi xaan chi ñu, ta uhvi xaan.

³ Ta ángel cu uvi cuan coyo ra cha yihí chichi copa ra nu tyañuhu. Ta ndutya tyañuhu cuan nanduví ñiñi tari ñiñi noo ndiyi, ta tandihí cha nyitó chichi tyañuhu cuan cachihí.

⁴ Ta ángel cu uñi cuan coyo ra cha yihí chichi copa ra siqui yuvi nahnu ta siqui ndohyo ndutya ta cananduví chi ñiñi.

⁵ Tyicuan ta chiñi cha cahán ángel cuenda ndutya tyehe caa:

—Sutu Mañi yuhu, yoho cuvún noo ra vaha vatyí tachí tuñun chi ñáyivi tyehe caa, Sutu Mañi yuhu, Nyoo ii cuvún ta iyón vityin ta nu quichaha tandihí.

⁶ Vatyí maa ñu cachati ñu ñiñi ñáyivi cuendon ta ñiñi ra cacuví profeta cuendon. Ta vityin yoho tari cha cunasacohun ñiñi chi ñu vatyí tyicuan caa tahan chi chi ñu —catyí ángel cuan.

⁷ Ta chiñi tiqui vatyí cahan noo cha cahán ityi nu nyaá arta Nyoo tyehe caa:

—Ndicha, Sutu Mañi yuhu Nyoo, iyó tandihí tunyee iñi chuun. Vityin cha yaha tachi tuñun chi ñáyivi chihin cha ndicha ta chihin cha ndaa —catyí cuan.

⁸ Ta ángel cu cumi cuan coyo ra cha yihí chichi copa ra nu ñanyii. Ta chicoo ityi chi ñanyii cuan vatyí cahmi chi chi ñáyivi chihin ñuhu chi.

⁹ Ta tandihí ñu, quiñi xaan chahmi ñanyii chi ñu. Soco ña canasama ñu cuhva iyó ñu, ni ña casacahnu ñu chi Nyoo. Ta cahan ña vaha ñu siqui Nyoo ra cuví sanyehe tindocho chi ñu tyehe caa.

¹⁰ Ta ángel cu ohon cuan coyo ra cha yihí chichi copa ra siqui tyayu quiti quiñi caa cuan. Ta nduñaa ri nu nyacá ñaha ti. Ta ñáyivi cuenda ti, nyacua

nacachi yihí ñu yaa ñu cha cuenda cha nyehé xaan ñu cha uhvi.

¹¹ Soco ni tyicuan caa ta ña sandihí ñu cha sacuví ñu cha ña vaha. Ta cahán ña vaha ñu síqui Nyoo ra nyaá andiví cha cuenda cha uhvi chi ñu ta cha cuenda nu cahví chi ñu.

¹² Ta ángel cu iñu cuan coyo ra cha yihí chichi copa ra síqui yuvi cahnu Eufates. Ta yuvi cuan na ityi chi tacuhva vatyí nuña noo ityi cha yaha ra cacuví rey cha vachi coyo ityi nu caña ñanyii.

¹³ Tyicuan ta nyehí cha quitá yuhu quití quiñi caa cuan ta yuhu coo cahnu cuan ta yuhu ra cuví profeta cuendu. Vatyí caquitá coyo uñi tahan tatyí ña vaha yuhu ra cuan. Tari caá sahva caá tatyí ña vaha cuan.

¹⁴ Ican ihya cuví tatyí cuihna cha casacuví milagru nahnu. Ta quitá coyo chi vatyí sandu ñn ri chi tandihí rey cha iyó síqui ñuhu ñayiví, vatyí cacañi tahan ra quiví cusañaha Nyoo tyí iyó tandihí tunyee iñi chi ra.

¹⁵ Ta catyí Nyoo:

—Nyehe ndo vatyí yuhu cha vachi tari noo ra suhu. Vatyí sana ri iñi ndo ta quihví ra suhu vehe ndo. Sií xaan cucuvi chi ñáyiví nyatú tuhva ri quiví quichi. Ta vií cumí ñu sahma ñu (o cuñí chi catyí ñanima ñu) tacuhva cha ma cuvityiyaa ñu nu cua quichi, ta ma cucahan nuu ñu, catyí Nyoo.

¹⁶ Ta cundu ñn ri ra cacuví rey nu nañí chi chihin sahan hebreo Armagedón.

¹⁷ Tyicuan ta ángel cu ucha cuan coyo ra cha yihí chichi copa ra nu tatyí, ta nya vehe ñuhu andiví nu nyaá Nyoo nu tyayu ra, quitá noo ndusu chaa xaan ta catyí chi:

—Cha cuví vityin —catyí ra.

¹⁸ Tyicuan ta vaa ri maa cuví ta cahán savi ta quihví tacha. Ta ñihi xaan taan síqui ñuhu ñayiví. Ta ndaha chicoo ñáyiví síqui ñuhu ñayiví, ta ña tuhva taan cha ñihi xaan tyicuan caa.

¹⁹ Ta nu taan cuan ndata ñuu cahnu cuan, uñi nu ndata. Ta tandihí ca ñuu síqui ñuhu ñayiví canacoyo. Ta Nyoo

nicohon iñi ra chi ñuu cahnu Babilonia cuan vatyí quiñi xaan sacuví ñu. Ta sanyehe xaan ra tindocho chi ñu vatyí cuxaan xaan ra chi ñu.

²⁰ Tandihí ñuhú cha iyó chichi tyañuhu ta tandihí yucu, ndihí cuanaa.

²¹ Ta nahnu xaan tucu savi yuu coon ityi andiví síqui ñáyiví. Ta vee xaan. Tari noo cha uvi xico kilu vee noo noo savi yuu cuan. Ta ñáyiví cahán ña vaha ñu síqui Nyoo cha cuenda tindocho savi yuu cuan, vatyí cuví chi noo tindocho cahnu xaan cha cuenda ñu.

17

Nu cua tachi tuñi Nyoo chi noo ñaha cata iñi

¹ Tyicuan ta chichi cha ucha tahan ángel cha cayihí ndaha ucha copa cuan, quichí noo ra nu nyaí, ta catyí ra chii:

—Ñaha tyí cusañahi chuun yoso caa cucutuñi chi ñaha cata iñi cahnu cha nyaá síqui tyañuhu.

² Vatyí ra cacuví rey síqui ñuhu ñayiví casacuví ra cha quiñi caa chihin ña, ta ñáyiví cha iyó síqui ñuhu ñáyiví, tiví xaan ñu chihin cha quiñi caa cha sacuví ña —catyí ra chii.

³ Tyicuan ta nyehí noo cha sañaha Tatyí Ii Nyoo chii, ta chinyaca ángel cuan chii chiqui ndi nu yori maa ñáyiví iyó, ta yucuan nyehí chi noo ñaha, yosó ña síqui noo quití cuaha quiñi caa. Ta nyicú sívi cha cahán ña vaha síqui Nyoo chi ti. Ta ucha tahan xiñi ti nyaá ta uchi ndiqui ti.

⁴ Ta ñaha cuan ñihnó ña noo sahma tyacu nyaa ta tyacu cuaha. Ta cuaha xaan xuhun cuan iñi chi ña, yuu tyaqui ta perla ñandihí. Ta yihí ndaha ña noo copa xuhun cuan tyitú yihí chihin cha ña vaha ta cha quiñi caa cha sacuví ña.

⁵ Ta tyaan ña nyaá noo sívi cha cuví noo tuhun xehe cha ña cutuñi iñi ñáyiví. Vatyí catyí chi: “Ican ñaha síhi ihya cuví ñuu Babilonia cahnu, síhi tandihí ñu cha cata iñi ta tandihí cha ña vaha cha iyó síqui ñuhu ñayiví.”

⁶ Tyicuan ta tuv̄i iñi vatyí ñaha cuan chih̄i ña chihin cha chih̄i ña niñi ñu cuenda Nyoo, ta ñu cha cachih̄i cha cuenda cha cahan ñu tuhun ra Jesús. Ta cha nyeh̄i cuan, iyo xaan cuñí.

⁷ Tyicuan ta catyí ángel cuan chii:

—¿Ñáá tuhun cha iyo xaan cuñún? Cua sacote chuun ñáá cha cuñí chi catyí tuhun xehe ñaha sihi ihya ta quit̄i quiñi caa cha yosó ña, quit̄i cha nyicú ucha xiñi ta uchi ndiqui.

⁸ Quit̄i quiñi caa cha nyehun cuan, cuv̄i ti noo quit̄i cha chiyo ta vityin yori ca ti iyó. Soco cuquita ti chichi yavi cono xaan cha ñahri nu chitahan. Yucuan ñohó ti cha ni cumañi ca ndih̄i tuhun ti. Ta ñayiv̄i iyó siqui ñuhu ñayiv̄i iyo xaan cucuñi ñu na nanyehe ñu chi quit̄i quiñi caa cha chiyo tyicuan, soco vityin yori ca ti iyó, soco cuquichi ti inga chaha. Ñu cua nyehe chi ti cuan, cuv̄i ñu ñu cha ñahri siv̄i nyaá nu libru Nyoo nyata quiv̄i chingo ñuhu ñayiv̄i. Ican libru cuan cucatyí yóo ñayiv̄i cuconyito tyicuan ri maa.

⁹ Ihya cuv̄i noo cha cuñí chi nacoto ndo: Ndi ucha xiñi ti cuan cuñí chi catyí ucha tahan yucu cha nyaá ñaha cuan siqui.

¹⁰ Ta xiñi ti cuñí tucu chi catyí ucha tahan rey. Ta ohon tahan rey cuan cha yaha chinyaca ñaha ra. Ta rey cu iñu nyacá ñaha ra vityin. Ta ra cu ucha, cumañi ca cucunyaca ñaha ra. Ta quiv̄i quichi ra nu ndih̄i, ña naha cucunyaca ñaha ra.

¹¹ Ta chichi cha ucha tahan rey cuan, cunanyita noo ra inga chaha, ta ican ra cucuvi ra rey cu uña. Ta ican tucu ra cuv̄i quit̄i quiñi caa cha chiyo quiv̄i cuan, ta vityin yori ca ti soco cunanyita ti inga chaha. Ta cha yaha cunyaca ñaha tucu ti, yucuan cuv̄i nu cua ndih̄i tuhun ti.

¹² 'Ta ndi uchi tahan ndiqui cha nyehun cuan, cuñí chi catyí ndi uchi tahan rey cha cumañi ca cucunyaca ñaha. Soco cucoo ityi chi ra cha cunyaca ñaha ra noo ora, ñn ri chihin quit̄i quiñi caa cuan.

¹³ Ndi uchi tahan rey cuan ñn xaan ri kuhva cucaca xiñi ra. Ta cu-

nacuhva ra tunyee iñi ra chi quit̄i quiñi caa cuan. Ta tandih̄i ityi cha iyó chi ra cunacuhva ra chi ti.

¹⁴ Ta cucacañi tahan ra chihin ra cuv̄i Mbee Luhlu. Soco ra cuv̄i Mbee Luhlu cuan, cucuvi chasaha ra chi ra. Vatyí ican ra cuv̄i nuu chi tandih̄i ra nyacá ñaha. Ta cuv̄i tucu ra nuu chi tandih̄i ra cacuv̄i rey. Ta ñu nyicú chihin ra, Nyoo nacana chi ñu ta nacachi ra chi ñu. Ta ñi xaan iñi ñu nyicón ñu chi ra.

¹⁵ Ta catyí tucu ángel cuan chii ñandih̄i:

—Tandih̄i tyañuhu cha nyehun cuan, cha nyaá ñaha cata iñi cuan siqui, ican cuv̄i ñayiv̄i tandih̄i ñuu nyihi ta tandih̄i ñuu nahnu, ñu siñ siñ sahan cahan.

¹⁶ Ta ndi uchi ndiqui cha nyehun xiñi quit̄i quiñi caa cuan cha cuv̄i uchi tahan rey cuan, ican ra cuan cuasata si iñi chi ñaha cata iñi cuan. Ta cusandoo ra chi ña cha notuhun ri maa ña. Ta cusanduvityiyaa ra chi ña. Ta cucachi ra coño ñuhu ña. Ta cutyihi ra chi ña nu cayú ñuhu.

¹⁷ Vatyí Nyoo sana ndaha ra añima rey cuan vatyí casacuvi ra kuhva cuñí maa ra. Vatyí ñn ri kuhva cucaca xiñi ra, ta cucuhva ra ityi chi quit̄i quiñi caa cuan cha cunyaca ñaha ti tari rey nyacua nya chino cava tuhun cahan maa Nyoo.

¹⁸ Ñaha sihi cha nyehun cuan, ican cuv̄i ñuu cahnu cha nyacá ñaha chi tandih̄i ra cuv̄i rey siqui ñuhu ñayiv̄i.

18

Nu cua tiv̄i ñuu Babilonia

¹ Cha yaha tuhun ihya ta nyeh̄i inga ángel cha vachi noó ityi andiv̄i ta iyó xaan ityi chi ra. Ta ñuhu ñayiv̄i ndichin xaan nduv̄i chihin cha ndichin ra.

² Ta ñihi xaan ndusu ra ta canachaa ra, ta catyí ra:

—Cha yaha tuhun ñuu Babilonia cahnu cuan. Ta cha nanduv̄i chi nu iyó ra ña vaha. Vehe tandih̄i nuu tatyí ña vaha cha nanduv̄i. Ta taca saa ña vaha nanduv̄i ñandih̄i.

³ Vatyí tandihí ñáyiví tiví ñu cha cuenda cuatyí sacuví ñuu Babilonia cuan. Ta ra cacuví rey, ra nyacá ñaha síquí ñuhu ñáyiví tari cha cachiyó ra chihin ñaha cuan cha cuví ñuu Babilonia. Casacuví ra cuatyí chihin ña. Ta ra cha cuahan cuanaxico ñuu Babilonia cuan candutyayí ra chihin cha xico ra chi ñu ñuu cuan vatyí tandihí cuhva ta sanaa ñu xuhun ñu chihin cha cata íñi ñu.

⁴ Tyicuan ta chiñí nonga ndusu ityí andívi. Ta catyí chí:

—Qujta ndo ñuu chiña, nyoho cha cuví ndo ñáyiví chí, tacuhva cha ma cutahan ndo sacuví ndo cuatyí chihin ñu chiña, tacuhva ma cutahan ndo ndoho ndo tari maa ñu.

⁵ Vatyí cha caá ticuítí cuatyí ñu ñuu cuan, nyacua cha chaá chí nu nyaá Nyoo. Ta Nyoo cha nichon íñi ra cha ña vaha sacuví ñu.

⁶ Cuhva ndo chí ñu suri maa cha chahá ñu chí inga ñáyiví. Ta uvi ca chaha sananyehe ndo tindoho síquí cha sacuví ñu. Cuhva ndo noo tindoho cunyehe ñu cha ñihi uvi ca chaha ican saha cha chahá maa ñu chí inga ñáyiví.

⁷ Yucuan chaha cuhva ndo cha iyo xaan tahan ñu chihin ta sanayehe xaan ndo tindoho chí ñu tari cuhva cha sacahnú xaan ñu chí ñu ta cusí xaan íñi ñu. Vatyí catyí ñuu cuan chichi añima chí: “Ihya nyaí tari noo reina. Ñima ñaha chí yí cuví, ta ni ma cunyehe tindoho”, chicá íñi chí.

⁸ Yucuan chaha chichi cha noo ri quívi cuquichi tindoho síquí ñuu cuan, cuquichi tuhun chí, cuquichi tucuihya íñi ta coo tama ñuu cuan, ta cucayu chí chihin ñuhu. Vatyí iyó xaan tunyee íñi chí Nyoo Sutu yo ta cutachi tuñi ra chí ñu ñuu cuan.

⁹ Ra cacuví rey síquí ñuhu ñáyiví ihya tari cha cachiyó ra chihin ñaha cha cuví ñuu cuan, cuacu chaa ra, cunducuihya xaan íñi ra na cananyehe ra ñuhma cha cayú ñuu cuan.

¹⁰ Ta nya sava ri cucuitayucu ra cha cuenda cha cayuhvi ra tindoho cuan. Ta cucatyí ra:

—¡Ndahvi yoho, ñuu cahnu Babilonia, ñuu cha chíyó xaan tunyee íñi chí! Vatyí noo tuhun cuhva ta chaá tindoho nyehún —cucatyí ra.

¹¹ Ta ra cha canaxicó ñáá ndihí cha canaxicó, suri cucuacu chaa ra ta cunducuihya íñi ra cha cuenda ñuu cuan. Vatyí yori ca sata cha canaxicó ra.

¹² Vatyí xicó ra xuhun cuaan, xuhun cuichin, yuu tyaquí, perla, sahma lino finu, sahma seda, ta sahma tyacu nyaa, ta tyacu cuaha. Ta nyisó tucu ra tandihí nuu vitu cha vixi chahán ta ñáá ndihí cha chingó chihin noho landa, vitu tyaquí, ta caa cha cuví bronce, ta caa cha cuví hierro, ta yuu cha cuví mármol.

¹³ Ta nyisó tucu ra canela, ñáá ndihí ca cha vixi chahán, tari cutu, mirra, perfume, vinu, aceteye, yutyí paan finu, ta trigo. Ta suri nyisó tucu ra quíti cuenda carga, ta mbee, caballu, carru. Ta nyacua nya añima ndahvi cha cuví musu ra ta caxico ra.

¹⁴ Ta catyí ra chí ñáyiví ñuu cuan tyehe caa:

—Ñahri ca cha tyaquí cha chíyó chuun, cha tahán xaan íñun. Ta cha cuachiyo tandihí cha tyayíun. Ta ma cunañihi ca maun tandihí cuan —catyí ra.

¹⁵ Ra cha caxicó tandihí ihya, candutyayí ra cha cuenda cha sata ñu ñuu cuan cha xicó ra. Cañi cucuitayucu ra chihin cha cayuhvi ra cha cunyehe ñu cuan tindoho. Ta cucuacu chaa ra ta cunducuihya íñi ra.

¹⁶ Ta cucatyí ra:

—¡Ndahvi ñuu cahnu cuan! Cuví chí tari noo ñaha síhi cha ñihnó sahma lino finu, sahma tyacu nyaa ta tyacu cuaha. Ta iyo yíhi ña xuhun cuaan, ta yuu tyaquí ta perla.

¹⁷ ¡Vatyí noo tuhun ri cuhva ta ndihí cha tyayí xaan cuan! —cucatyí ra caxico cuan.

Ta tandihí ra cuví capitán cuenda barcu, chihin ñu cañoho chichi, tandihí ñu casahá tyiño nu tyañuhu, nya sava candoó ñu.

18 Ta cha cananyehé ñu ñuhma cha cayú ñuu cuan, canachaa ñu, ta catyí ñu:

—¿Ñáá nonga ñuu chiyo tari ñuu cahnu ihya? Ñahri ca —cucatyí ñu.

19 Ta tyicu ñu niyaca xiñi ñu, ta chacu chaa ñu. Ta cuihya iñi ñu, ta canachaa ñu ta catyí ñu:

—¡Ndahvi nduvi yo cha cuanaa ñuu cuan! Vatyí chihin cha tyayí ñuu cahnu cuan ndutyayí tandihí yo, ñu chicá noo nu tyañuhu chihin barcu. ¡Ta vityin noo tuhun cuhva luhlu ri ta cuanaa chi! —catyí ñu.

20 Soco cusí cuñi nyoho cha cuenda ñuu cuan, nyoho cha iyó andivi, nyoho ñu yihí cuenda Nyoo ta nyoho ra cachicá tyiño ra Cristo ta nyoho ra cacuví profeta Nyoo. Cusí cuñi ndo vatyí cha cuenda ndo ta tachí tuñi Nyoo chi ñu cuan, ta cha cuenda cha ña vaha cha sacuví ñu chihin ndo.

21 Tyicuan ta noo ángel cha iyó xaan tunyee iñi chi, nacoñehé ra noo yuu molino cahnu xaan ta tuchi ra cuahan nu tyañuhu, ta catyí ra:

—Suri tyehe caa cundihi tuhun ñuu Babilonia cahnu, Ta ni inga ca chaha ta ma nyehe ca ndo chi ñu.

22 Ta ma cuiñi con yaa ityi chichi ñuu cuan, vatyí yori ca cusacuacuarpa, ta ni flauta, ta ni trompeta, ta ma tiví ca ñu. Ta ni ma coo ca ra casahá tyiño ñáá ndihí tyiño. Ta ni ma tyacu ca cha cayu molino.

23 Ta ni nonga ñuhú tima, ta ma cayu ca chichi ñuu cuan. Ta ni nonga chaha ta ma cuiñi yo ndusu ñu cha iyó ñu vico tandaha. Vasí ra canaxico cha chiyo ñuu cuan, ican ra cuví ra cahnu ca cuví nuu ñáyiví iyó síqui ñuhu ñáyiví. Nyoho ñu Babilonia, sandaví ñaha xaan ndo chi tandihí ñáyiví iyó síqui ñuhu ñáyiví chihin cha satasi ndo.

24 Vatyí cuaha xaan niñi ra cacuví profeta Nyoo iñi chichi ñuu cuan vatyí chahñi ñu chi ra. Ta iñi tucu niñi ñu cuenda Nyoo, ta niñi tandihí ñu cha cachahñi ñáyiví nichahnu ñuhu ñáyiví.

19

1 Cha yaha cuan, ta chiñi noo ndusu cha cuaha vavaha ñáyiví nya andivi. Ta catyí ñu:

¡Cahnu xaan cuví Nyoo! Sutu Mañi yo, Nyoo cuví ra ra sacacu chi yo. Ta chi maa ra tahán chi cha sacahnu yo, tyi iyó xaan tunyee iñi chi ra.

2 Vatyí vaha sacutuñi ra chihin cha ndaa ta chihin cha ndicha.

Tachí tuñi ra chi ñaha cata iñi cuan. Vatyí sativí xaan ña chi ñáyiví iyó síqui ñuhu ñáyiví chihin cha quiñi caa cha sacuví ña chihin ñu.

Ta yucuan chaha tachí tuñi ra chi ña, ta cha cuenda cha chahñi ña chi ñu sacuví tyiño nuu ra.

3 Ta quichaha catyí ñu inga chaha:

—¡Cahnu xaan cuví Nyoo! Ñuhma cha cayú ña, ma cucuita ca maa cha ndaa chi ityi síqui —catyí ñu.

4 Ta ndi oco cumi ra cha vaha chahnu ta ndi cumi tahan cha nyitó cha nyicú nu nyaá tyayu Nyoo, cachicuiñi chiti ra nya nu ñuhú. Ta casacahnú ra chi Nyoo nu nyaá ra nu tyayu ra. Ta catyí ra:

—¡Na cuví chi tyicuan caa! ¡Cahnu xaan cuví Nyoo! —cacatyí ra.

5 Ta nu nyaá tyayu Nyoo, tyacu noo ndusu, ta catyí chi:

Sacahnu ndo chi Sutu yo Nyoo
Tandihí nyoho cha sacuví ndo tyiño nuu ra,

ta quichahá ndo chi ra, vasí nyihi ndo, o chahnu ndo.

Nu cua tandaha ra cuví Mbee Luhlu chihin ñáyiví chinó iñi chi ra

6 Ta chiñi tiqui noo ndusu tari cha cuaha vavaha ñáyiví cahán, tari ndusu nu cuaha xaan yuvi ndutya, ta tari cha ñihi xaan cahán savi. Ta catyí chi:

¡Cahnu xaan cuví Sutu yo Nyoo! Vatyí cha quichahá nyaca ñaha ra ta iyó tandihí tunyee iñi chi ra.

7 Na cusí cuñi yo ta na cutu yo chihin tusí iñi. Na sacahnu yo chi ra.

Vatyi cha chaq̄ cuhva cha cua coo
yo vico tandaha ra cuví Mbee
Luhlu.

Ta yoó cuacuvi yo tari noo ñasihí ra,
cha nyatú tuhva ri yo quiví tan-
daha yo chihin ra.

⁸ Ta maa yo cucuihno yo sahma linu
finu, ndii ta cuichin.

Vatyi sahma linu finu cuan cuñí chi
catyí cha vaha cha sacuví ñáyiví
cuenda ra.

⁹ Tyicuan ta quichaha catyí ángel
cuan chi:

—Tyaa tuhun ihya nu tutu: “¡Sii
xaan cuví chi ñu cha nyaá cuhun vico
tandaha ra cuví Mbee Luhlu!”

Ta catyí tucu ra chii tyehe caa:

—Ican ihya cuví tuhun ndicha
Nyoo —catyí ra chii.

¹⁰ Tyicuan ta chicuiñi chiti chaha
ángel Nyoo cuan vatyi sacahni chi ra,
soco catyí ra chii:

—Ma sacahnun chii, vatyi musu
Nyoo cuví tucu yuhu tari yoho, ta tari
tandihí ra yañi yo cha nyicón tuhun
ndicha ra Jesucristo. Chi Nyoo tahan
chi sacahnu yo —catyí ra chii.

Vatyi tuhun ndicha ra Jesús, ican
cuví cha chahá cuhva chi ra cacuví
profeta, ra cha cachahá cuenda
tuhun cahán Nyoo chihin yo.

Nu sañahá chi cuenda ra cha yosó caballu cuichin

¹¹ Tyicuan ta nyehi tanuña andiví.
Tyicuan ta tuví noo caballu cuichin.
Ta ra yosó chi ti nañí ra Ra Ndicha
Cha Nii Iñi Sacuvi Tyiño Nu Nyoo.
Vatyi chihin cha ndaa sacutuñi ra chi
ñáyiví, ta cañi tahan ra chihin cha ña
vaha chihin cha ndaa.

¹² Xiño xaan chiti nuu ra tari cha
cayú ñuhu. Ta cuaha xaan corona yihí
xiñi ra. Ta nyaá noo sivi chi ra cha noo
tuhun ri maa ra chitó ra ñáá sivi nyaá
chi ra.

¹³ Ta ñihnó ra noo sahma iñi niñi. Ta
maa ra nañí ra Tuhun Cahán Nyoo.

¹⁴ Ta canyicón sindaro andiví chi ra,
cañihnó ra sahma linu finu, sahma
cuichin ta ndii. Ta cayosó ra caballu
cuichin.

¹⁵ Ta chichi yuhu ra nañí Tuhun
Cahán Nyoo cuan, quitá noo mityi

cha xaan ni nduvi chiyo yuhu, vatyi
chihin tuhun cahán ra cusañicuehe ra
ñáyiví iyó siqui ñuhu ñáyiví. Ta ñihi
cunyaca ñaha ra chi ñu tari chihin noo
yutun caa. Maa ra cutachi tuñi ra chi
ñu tari noo ra cha sacunyihi tichaha
ndiví chihin chaha ra. Ta cusacoho ra
vinu uva chi ñu, ta ihya cuñi chi catyí
tyi cuxaan Nyoo chihin ñu ta cutachi
tuñi ra chi ñu vatyi chaha xaan ñu
tisihi chi Nyoo ra iyó tandihí tunyee
iñi chii.

¹⁶ Ta nu sahma ra ta nu sihin ra
cuan nyaá letra cha catyí tyehe caa:
“Ihya cuví Ra cuví nuu chi tandihí
rey. Ta ican ra cuví nuu chi tandihí ra
nyacá ñaha.”

¹⁷ Tyicuan ta nyehi chi nonga ángel
nanyaá ra nu ñanyii. Ta chihin tandihí
fuerza ra canachaa ra chi tandihí saa
cha candavá ityi andiví, ta catyí ra chi
ti:

—Ñaha ndo ta candu ñin ri ndo vatyi
cuxiñi ndo cha chahá Nyoo cachi ndo.

¹⁸ Vatyi cachi ndo coño ra cacuví
rey ta ra cuví nuu chi sindaro ta chi
ra ndachan xaan saha chii. Ta cachi
ndo coño caballu ta coño ñuhu ra cha
cayosó chi ti. Cachi ndo coño tandihí
ra, vasi ra yori chitoho o ra iyó chi-
toho, vasi ra nyihi o ra chahnu —catyí
ra chi saa.

¹⁹ Tyicuan ta nyehi chi quití quiñi
caa cuan ta chi ra cacuví rey cha
iyó siqui ñuhu ñáyiví chihin sindaro
cuenda ra, vatyi candu ñin ri ra vatyi
cacañi tahan ra chihin ra yosó ca-
ballu cuichin cuan ta chihin sindaro
cuenda ra.

²⁰ Ta tin ra chi quití quiñi caa cuan
ñin ri chihin ra cuví profeta cuendu
cuan, vatyi chihin nuu quití quiñi caa
cuan ta sacuví ra cuendu cuan mila-
gru, ta sandaví ñaha ra chi ñáyiví cha
chahá chi cunyaa tuñi quití quiñi caa
cuan, ta chi ñu sacahnú chi xiñahñu ti.
Ta nyitó nyitó ra ta tuchi ra yosó ca-
ballu cuichin chi ninduvi ra nu ñuhu
cha cayú chihin azufre.

²¹ Ta tandihí ca ñu cachihí ñu chi-
hin mityi xaan cha quitá yuhu ra cha
yosó caballu cuichin cuan. Ta tandihí
maa saa, cachachí xaan ti coño ñu.

20

Nu sañahá chi cuenda noo mil cuiya

¹ Cha yaha tuhun cuan ta nyehi chi noo ángel vachi noó ityi andivi ta yihí ndaha ra ndaha tucu yuvehe yavi cono cuan. Ta yihí tucu ndaha ra noo cadena cahnu.

² Ángel ihya tijn ra chi coo cahnu cuan, quití cha cuví Coo Chahnu cuan, cha cuví cuihna. Ta chahñi ra chi ti chihin cadena noo mil cuiya.

³ Ta tuchi ra chi ti yavi cono cuan. Ta yucuan nacasi ra chi ti. Ta tyaa ra noo sellu yuvehe cuan tacuhva cha ma sandavi ñaha ca ti chi ñáyivi iyó siqui ñuhu ñayivi, nyacua nya cha yaha noo mil cuiya. Ta cha yaha noo mil cuiya cuan ta cundachi tucu ti suhva ca quivi.

⁴ Yaha cuan ta nanyehi cuaha xaan tyayu tayucú. Ta nuu chi nyicú ñu cha chicoo ityi chi vatyí tachi tuñi ñu chi ñáyivi. Ta nyehe tiqui añima ñu chahnya ñáyivi xiñi cha cuenda cha cahan ñu tuhun Nyoo cha chaha cuenda ra Jesús chi ñu. Ta maa ñu, ña sacahnu ñu chi quití quiñi caa cuan, ni chi xiñahñu ti, ni ña chaha ñu chi ñu cha cunyaa tuñi ti tyaan ñu, ni ndaha ñu. Nyehi vatyí ican ñu ihya, canandoto ñu ta chicunyaca ñaha ñu chihin ra Cristo noo mil cuiya.

⁵ Ican ñu ihya cuví cha nandoto cha xihna ca. Soco inga ityi ndiyi ña nandoto ñu nyacua nya cha yaha mil cuiya cuan.

⁶ ¡Si! xaan cuñi ñu ii cuenda Nyoo, ñu cha tahán chi nandoto cha xihna ri! Ta ma cuhun ñu tuhun chihi cu uvi nu cuví anyaya nu tachí tuñi Nyoo chi añima ña vaha. Vatyí cucuvi ñu sutu cha cuenda Nyoo ta cuenda ra Cristo. Ta cucunyaca ñaha ñu mil cuiya chihin ra.

⁷ Ta cha yaha mil cuiya cuan, tyicuan ta cundachi cuihna nu ñohó ra vehe caa.

⁸ Ta cuquita ra, ta cusandavi ñaha ra chi ñáyivi nicahnu siqui ñuhu ñayivi. Cuquita ra vatyí cusandavi ñaha ra chi ñáyivi Gog ta Magog, ñu xaan iñi chi Nyoo. Ta cusandu ñin ri

ra chi sindaro ñuu cuan vatyí cuhun ra cuatyí. Cuaha xaan ra, tari maa ñiti yuhu tyañuhu.

⁹ Tyicuan ta cuahan coyo ra nicacahnu siqui ñuhu ñayivi. Ta cachasi cutya ra nu iyó ñu cuenda Nyoo ñuu Jerusalén nu cuñi xaan Nyoo. Soco Nyoo cusaquichi ra ñuhu ityi andivi ta cucahmi chi chi tandihí sindaro cuan.

¹⁰ Ta cuihna cha sandavi ñaha chi ñu, cutuchi Nyoo chi ra chichi anyaya cahnu nu cayú ñuhu chihin azufre, nu tuchi tucu ra chi quití quiñi caa cuan ta chi ra cha cuví profeta cuendu. Ta yucuan cunyehe ra tindocho tyicuan ri maa ndiyaca ta ñiyaca.

Nu cua cutuñi chi ñáyivi nu tyayu cuichin nu nyaá Nyoo

¹¹ Tyicuan ta nyehi noo tyayu cuichin cahnu. Ta nyehi chi ra nyaá nu tyayu cuan. Ta chihin nuu ra ta cuanaa ñuhu ñayivi ta andivi. Ta ñahri ca maa nu cucunyaa chi.

¹² Ta nyehi chi tandihí ñu ndiyi, ñu chahnu ta ñu nyihi, tayucú ñu nuu Nyoo. Tyicuan ta canuñá libru cha nyaá tandihí cha sacuvi ñu quivi chiyo ñu ñayivi. Ta nuña tucu inga libru cha nyaá sivi ñu cha cuconyito tyicuan ri maa chihin Nyoo. Ñu ndiyi cuan cuacutuñi chi ñu ñáá ndihí cha chinyacuvi ñu cha nyaá nu tandihí libru cuan.

¹³ Ta tyañuhu nacuhva cuenda chi chi ndiyi cha cumí chi. Ta tandihí nu nyicú ñu chihí nu nyacá ñaha Tuhun Chihi, nacuhva cuenda chi ndiyi cha cumí chi. Ta tandihí ñu cuatahan chi chi ñu yoso cuhva cha casacuvi ñu.

¹⁴ Tyicuan ta cundihí Tuhun Chihi cuan ta ñahri ca nu cuacunyicu ñu chihi, vatyí cutuchi Nyoo chi nanduvi tahan cuan chichi anyaya cahnu nu cayú ñuhu. Ta ican ihya cuví Tuhun Chihi Cu Uvi.

¹⁵ Ta yucuan tuchi ra chi ñu cha ñahri sivi nyaá nu libru cha cuenda ñáyivi cha cua conyito chihin Nyoo tyicuan ri maa.

21

Nu nyehe ra Juan andivi chaa ta ñuhu ñayivi chaa

¹ Yahá cuan ta nyehi noo andivi chaa ta noo ñuhu ñayivi chaa, vaty andivi ta ñuhu ñayivi cha xihna ri cuanaa chi. Ta tyicuan caa tucu tyañuhu, cuanaa tucu cuan.

² Yuhu ra Juan nyehi ñuu ii Jerusalén chaa cha vachi noó ityi andivi nu nyaá Nyoo. Ta tyaqui xaan nduvij chi tari noo ñaha cha cua tandaha chihin noo ra, tyicuan caa nduvij chi.

³ Ta chiñi noo ndusu ñihi cha quita ityi andivi, ta catyí chi:

—¡Nyehe ihya! Nyoo, iyó ra mahñu ñáyivi. Ta cua coo ra chihin ñu. Ta maa ñu cua cuvi ñu ñuu ra. Ta cua cunyaa ra chihin ñu. Ta cua cuvi ra Nyoo cuenda ñu.

⁴ Ta Nyoo cunacuhva ra ndutya nuu ñu. Ta ma cúvi ca ñu. Ta ma cucuihya ca ñhi ñu. Ma cuacu ca ñu vaty ma nyehe ca ñu tindoho. Ta ma nyehe ca ñu cha uhvi. Vaty tandihi cha chiyo, cha yahá tuhun —catyí chi.

⁵ Tyicuan ta Nyoo, ra cha nyaá nu tyayu cahnu, catyí ra:

—Nyehe. Sanduchaj tandihi maa cha iyó.

Ta catyí tucu ra:

—Tyaa tuhun ihya, vaty tuhun cahín ihya, ndicha. Ta cuví cunhi iñun vaty tuhun cahín cuchino cava —catyí Nyoo chii.

⁶ Yahá cuan ta catyí tucu ra chii:

—Cha tandihi chinó cava vityin. Yuhu cuví ra xihna cuiri, ta yuhu cundoi nu ndihi tuhun. Ñáyivi cha ityi ndutya cha cuñi ñu tuhun yuhu, cucuhve ndutya cha chahá ñayivi cha ma naa ca maa coho ñu, ta ñahri cutiyahvi ñu.

⁷ Ñu cha cuví chasaha chi ra ña vaha, cuñihi ñu tandihi ihya, tari noo cha cundoo chi ñu. Ta yuhu cucuvi Nyoo cuenda ñu ta maa ñu cucuvi ñu sehi.

⁸ Soco ñáyivi cha yuhvi xaan, ñu cha ña chinó ñhi, ñu cha quiñi iyó, ñu cha chahñi ñáyivi, ñu iyó chihin

rayii, ta ñima yii ñu cuví, o ra iyó chihin ñusihí ta ñima ñasihí ra cuví, ñu tasi, ñu casacahnú xitohyo, ta tandihi ñu cuendu, tandihi ñu cuan, tahán chi cuhun ñu chichi anyaya cahnu nu cayú ñuhu chihin azufre, nu cuví Tuhun Chihí Cu Uvi, nu tachi tuñi Nyoo chi añima ña vaha.

Nu nyehe ra Juan yoso caa cucuvi ñuu Jerusalén chaa

⁹ Tyicuan ta quichí noo ángel cha ucha tahan cuan, ra cha canyisó ndi ucha copa tyitú chihin ndi ucha tahan tindoho cuan. Ta cahán ra chihin ta catyí ra:

—Ñaha, ta cusañahi chuun yóo ñu cuví ñu yihí cuenda ra Cristo, ñu cha cuví tari ñasihí ra, tyi ra cuví Mbee Luhlu cuví ra —catyí ra chii.

¹⁰ Ta Tatyí Ii Nyoo chinyaca chii noo yucu cahnu ta sucun. Ta sañaha ra ñuu ii, ñuu Jerusalén cahnu cuan chii. Maa maa cuhva cha vachi noó ñuu cuan ityi andivi nu nyaá Nyoo, sañaha ra chii.

¹¹ Xiño xaan ñuu cuan chihin cha tyaqui Nyoo. Xiño xaan tari caá noo yuu tyaqui, tari caá yuu jaspe, ta xiño tari ino.

¹² Nicachico ñuu cuan sucun xaan sama. Ta iyó uchi uvi tahan yuvehe. Ta noo ángel nanyaá tahan tahan yuvehe. Ta ndi uchi uvi tahan sivi tata ñáyivi Israel nyaá yuvehe cuan.

¹³ Uñi tahan yuvehe cuan nyaá ityi nu caña ñanyii. Ta uñi tahan ityi norte. Ta uñi tahan ityi tyañuhu. Ta uñi tahan ityi nu quee ñanyii.

¹⁴ Uchi uvi tahan yuu yihí nu sama ra nu cacu chaha chi. Ta nuu yuu cuan nyaá sivi ndi uchi uvi apóstol cuenda ra cuví Mbee Luhlu.

¹⁵ Ta ángel cha cahán chihin cuan, yihí ndaha ra noo yutun xuhun cuan, vaty chihin cuan cutyicuhva ra ñuhú ñuu cuan, ta yuvehe ta nu sama nicachico ñuu cuan.

¹⁶ Cumi tahan tutun ñuu cuan nyaá. Ta inuu ri cuhva cha quehen ta cha cañi. Ta ángel cuan tyicuhva ra ñuu cuan chihin yutun xuhun cuan. Ta tyicuhva ra, ta quita uvi mil

uvi cientu kilómetro. Ta inuu ri cha cañi ta cha sucun ta cha quehen.

¹⁷ Tyicuan ta tyicuhva ra nu sama nicachico ñuu cuan. Ta quita uñi xico cumi metru cha cocon, tari tyicuhvá ñáyivi, tyicuan caa tyicuhva ángel cuan.

¹⁸ Chihin yuu jaspe sama yuhu ñuu cuan. Ta maa maa ri xuhun cuan cuví ñuu cuan. Tari caá noo ino cha ndi vavaha, tyicuan caa.

¹⁹ Ta yuu cha cuví cimientu cuan tandihi ri maa nuu yuu tyaqui cuví: yuu cha xihna ri cuví jaspe; yuu cha cu uvi cuví yuu zafiro; yuu cha cu uñi cuví yuu ágata; yuu cha cu cumi cuví yuu esmeralda;

²⁰ ta yuu cu ohon cuví yuu ónice; ta cha cu iñu cornalina; ta cha cu ucha crisólito; ta cha cu uña berilo; ta cha cu ñin topacio; ta cha cu uchi crisoprasa; ta cha cu uchi ñin jacinto; ta yuu cu uchi uvi cuví amatista.

²¹ Ndi uchi uvi yuvehe cuan cuví chi uchi uvi tahan perla. Tahan tahan yuvehe cuan, ta chino chi chihin noo ri perla. Ta nu cuví ityi cahnu ñuu cuan, maa ri maa xuhun cuan cuví, tari ino cha xiño.

²² Ni noo vehe ñuhu ña nyehí chichi ñuu cuan, vatyí Sutu yo Nyoo, ra iyó tandihi tunyee iñi chii, ican cuví vehe ñuhu ñu cuan, ta tyicuan caa tucu ra cuví Mbee Luhlu.

²³ Ñuu cuan ña chiñuhú cha sacundichín ñanyii. Ta ni cha ndichin yoo ta ña chiñuhú. Vatyí suri maa cha ndichin Nyoo chihin ra cuví Mbee Luhlu cuví cha sacundichin chichi ñuu cuan.

²⁴ Tandihí ñu cha cacu aña, cacaca noo ñu nu ndichin ñuu cuan. Ta ra cacuví rey siqui ñuhu ñáyivi cunyaca ra cha tyayí ra ta cuhva cuenda ra tandihí cha cahnu cacuví ra chi ñuu cuan.

²⁵ Ta ma nacunyasi yuvehe cha ñicahñu, ta yucuan ma coo cha cha cuaa.

²⁶ Ta tandihí cha tyayí, ta cha cahnu, cha iyó siqui ñuhu ñáyivi cuchaa chi nya ñuu cuan.

²⁷ Soco ma cuví quihvi cha quiñi caa. Ni noo ñu sacuví cha quiñi caa,

ni ñu cuendu ma cuví quihvi ñu. Noo ri maa ñu nyaá sivi nu libru ra cuví Mbee Luhlu cuquihvi ñu, vatyí cunconyito ñu chihin ra tyicuan ri maa.

22

¹ Tyicuan ta sañaha ángel cuan noo yuvi cuí vavaha chii. Nduya cha chahá cha conyito yo cuví. Cuii vavaha tari noo yutyí finu. Ta quitá yuvi cuan nuu nyaá tyayu Nyoo ta nu nyaá ra cuví Mbee Luhlu.

² Mahñu ityi cahnu ñuu cuan ta ninduvi chiyo yuvi cuan, nanyaá yutun cha chahá cha conyito yo. Ta uchi uvi chaha cha noo cuiya chahá tun chiti. Tahan tahan ri yoo chahá tun chiti. Ta ndaha tun, vaha cha cuví tatan chi ñáyivi iyó siqui ñuhu ñáyivi.

³ Ñuu cuan, ñahri maa cha ña vaha cucoo vatyí yucuan nyaá Nyoo nu tyayu ra ta cucunyaca ñaha ra chihin ra cuví Mbee Luhlu. Ta cusacahnu ñu cuenda ra chi ra.

⁴ Ta cunyehe ñu chi ra chihin nuu ñu. Ta cua cunyaa sivi ra tyaan ñu.

⁵ Ta ma coo ca cha cha cuaa yucuan. Ta ñu coo yucuan ma cuchihñuhu ñuhu lámpara chi ñu, ni ñuhu ñanyii. Vatyí Nyoo Sutu yo cusacundichin ra nu nyicú ñu. Ta maa ñu cucunyaca ñaha ñu chihin ra tyicuan ri maa.

Nu sañahá chi vatyí cha cuyatyin quichi ra Cristo

⁶ Tyicuan ta catyí ángel cuan chii:

—Ihya tuhun ndicha cuví, ta cuví cuní iñun vatyí cuchino cava tuhun ihya. Ta suri maa Sutu yo Nyoo ra cahan chihin yuhu ra cacuví profeta cuenda ra ta cha naha, ican ra tachí ra chi ángel ra, vatyí sañaha ra chi ñu sacuví tyiño nuu ra yoso caa cucuvi cha numi ri —catyí ra.

Ta catyí Sutu Mañi yo:

⁷ —¡Cha cuñi quichi! —catyí ra.

¡Si xaan cuñi ñu cha sacuví cuhva cahan tuhun Nyoo cha nyaá nu libru ihya!

⁸ Yuhu ra Juan, chiñi tuhun ihya. Ta nyehí tandihí ihya. Ta cha yahá nyehí

ta chiñi, chicuiñi chiti chaha ángel cha sañaha cuan chii, vatyí sacahni chi ra.

⁹ Soco maa ra catyí ra chii:

—Ma sacahnun chii, vatyí yuhu, musu Nyoo cuví, tari yoho. Ta yañun cuví, tari ra yañi yo cha cacuví profeta cuenda Nyoo, ta tari tandihí ñu quichahá tuhun cha nyaá nu libru ihya. Chi Nyoo tahán chi sacahnu yo —catyí ra chii.

¹⁰ Ta catyí tucu ra chii:

—Ma tixehun tuhun Nyoo cha nyaá nu libru ihya, vatyí cha cuyatyin quivi cha cuchino cava chi.

¹¹ Soco saña chi ñu quiñi iyó, na sacuvi ca maa ñu cuhva cuñi maa ñu. Ta ñu sacuví cuatyí na sacuvi ca maa ñu. Soco ñu sacuví cha vaha, na sacuvi ca ñu cha vaha. Ta ñu ii, ñu nacuhva cuenda añima chi Nyoo, na cu ñi ca iñi ñu chihin ra —catyí ra chii.

¹² Ta Sutu Mañi yo catyí ra:

—Nyehe ndo. Cha cuyatyin quivi quichi. Ta cutiyahvi chi tahan tahan ñáyivi yoso cuhva cha sacuví ñu, tatu cha vaha o cha ña vaha.

¹³ Yuhu cuví ra xihna cuiri ta yuhu cundoí nu ndihí tuhun, yuhu iyé nu quichaha tandihí ta cucoo que nu cundihí tuhun —catyí Sutu Mañi yo.

¹⁴ Si xaan cucuvi chi ñu sanduvii sahna o añima cuví cuan, vatyí coo ityi chi ñu cachi ñu chiti yutun cha chahá cha conyito añima yo tyicuan ri maa. Ta cuví quihvi ñu yuvehe ñuu cuan.

¹⁵ Soco ñu cha sacuví cha quiñi caa, ñu tasi, ñu cha iyó chihin tahan, ta ñima ñasihí ra o yí ñu cuví, ñu chahñi ñáyivi, ñu sacahnú xitohyo, ta tandihí ñu ñi cuendu ta sandavi ñaha ñu, tandihí ñu cuan, cundoo ñu ityi chata ñuu cuan.

¹⁶ Ta catyí tucu Sutu Mañi yo:

—Yuhu ra Jesús, sacuhin chi ángel cuende vatyí sacoto ra tandihí tuhun ihya chi ñu nyicú vehe ñuhu. Yuhu cuví ñáyivi chahnu chi rey David. Ta vachi tiqui tata ra ñandihí. Ta cuví tiqui tiño cañu cha xiño, cha caña cha ñaa ca —catyí ra.

¹⁷ Tatyí Ii Nyoo ta ñasihí ra cuví Mbee Luhlu cha cuví ñu cuenda ra, catyí ñu tyehe caa:

—Ñaha, Sutu Mañi yuhu —catyí ñu.

Ta ñu chiñi tuhun ihya, ta catyí ñu chi ra:

—Ñaha —catyí ñu.

Ta ñu ityi ndutya cha conyito yo chihin, ta tandihí ñu cuñi quichi, na quichi ñu ta coho ñu ndutya cha chahá cha conyito añima yo, ta ñahri cutiyahvi ñu.

¹⁸ Ta yuhu catyí chi tandihí ndo cha chiñi ndo tuhun Nyoo cha nyaá nu libru ihya, yuhu sacoté chi ndo noo tuhun ihya: Tatu nya noo ñáyivi sanducuaha ca ñu tuhun ihya, Nyoo cunatyiso ca ra tindoho cha nyaá nu libru ihya siqui ñu.

¹⁹ Ta tatu nya noo ñáyivi tinyaa ñu suhva tuhun Nyoo cha nyaá nu libru ihya, Nyoo cu tinyaa ra cha tahán chi chi ñu cha nyaá nu libru cha cahán chi tuhun cha cuconyito ñu tyicuan ri maa ta cucoo ñu ñuu ii cuan. Ta ma tahan ca chi chi ñu cha vaha cha cahán nu libru ihya.

²⁰ Ta Sutu Mañi yo ra cha chahá cuenda ihya catyí ra tyehe caa:

—Cha ndicha vatyí cha cuñi quichi —catyí ra.

Ta yuhu catyí:

—Na cuvi chi tyicuan caa. Ñaha, Sutu Mañi yuhu, Jesús —catyí yuhu.

²¹ Na naquehen tandihí ndo cha vaha chahá Sutu Mañi yo Jesucristo chi yo. Ta na cuvi chi tyicuan caa.